


Ja øgyajpxy ja ømyadya'aky midi xukpaajtimp
ja nitso'ok'ajtin



New Testament in Mixe, Tlahuitoltepec (MX:mxp:Mixe,
Tlahuitoltepec)

**Ja ɔgyajpxy ja ɔmyadya'aky midi xukpaajtɨmp ja
nitso'ok'ajtin
New Testament in Mixe, Tlahuitoltepec (MX:mxp:Mixe,
Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

422dcf73-46a5-5403-b423-8406ed76ac1d

Contents

MATEO	1
MARCOS	64
LUCAS	105
JUAN	169
HECHOS	219
ROMANOS	281
1 CORINTIOS	306
2 CORINTIOS	330
GÁLATAS	345
EFESIOS	354
FILIPENSES	362
COLOSENSES	368
1 TESALONICENSES	374
2 TESALONICENSES	379
1 TIMOTEO	382
2 TIMOTEO	389
TITO	394
FILEMÓN	397
HEBREOS	399
SANTIAGO	416
1 PEDRO	422
2 PEDRO	429
1 JUAN	433
2 JUAN	439
3 JUAN	440
JUDAS	441
APOCALIPSIS	443

JA ØGYAJPX̄Y JA ØMYADYA'AKY MIDI JA MATEO YJAAY

Ja Jesucristo tyety'aptøk

¹ Ja' idø'øn ja yiknajtskajpx̄ip pøn jaty ja nwindson'ajtim Jesucristo tyety'apip ku ja teety'api ja Abraham jøts ja David,

² ku Abraham t'u'ngi ja Isaac, jøts ja Isaac t'u'ngi ja Jacob, jøts ja Jacob t'u'ngi ja Judá. Namay ja'adi møøt y'uch myigu'ukti. ³ Ja Judá møøt ja ñidø'øxy Tamar ja'ats t'una'jk'ajttip ja Fares jøts ja Zara. Jøts ja Fares t'u'nk'aty ja Esrom, jøts ja Esrom t'u'nk'aty ja Aram. ⁴ Jøts ja Aram t'u'nk'aty ja Aminadab, jøts ja Aminadab t'u'nk'aty ja Naasón, jøts ja Naasón t'u'nk'aty ja Salmón. ⁵ Jøts ja Salmón møøt ja ñidø'øxy Rahab tmajnk'atti ja Booz, jøts ja Booz møøt ja ñidø'øxy Rut tmajnk'atti ja Obed, jøts ja Obed t'u'nk'aty ja Isai. ⁶ Jøts ja Isai t'u'nk'aty ja rey David, jøts ja rey David møøt ja tø'øxyøjk midi ja Urías wyinaty tø t'atsnidø'øxy'aty, ja'ats idø'øn tmajnk'ajttip ja Salomón.

⁷ Jøts ja Salomón t'u'ngi ja Roboam, jøts ja Roboam t'u'nk'aty ja Abías, jøts ja Abías t'u'nk'aty ja Asa. ⁸ Jøts ja Asa t'u'ngi ja Josafat, jøts ja Josafat t'u'ngi ja Joram, jøts ja Joram t'u'nk'aty ja Uzías. ⁹ Jøts ja Uzías t'u'ngi ja Jotam, jøts ja Jotam t'u'nk'aty ja Acaz, jøts ja Acaz t'u'ngi ja Ezequías. ¹⁰ Jøts ja Ezequías t'u'ngi ja Manasés, jøts ja Manasés t'u'ngi ja Amón, jøts ja Amón t'u'nk'aty ja Josías. ¹¹ Jøts ja Josías t'una'jk'aty ja Jeconías, namay ja'adi møøt y'uch myigu'ukti. Winet ets ja israelit jaa'y idø'øn yiknajtswa'wigyøjxtøø jam jadu'ukpi etjotp midi yiktejp Babilonia.

¹² Tøts ja jade'en wyinaty y'ukjaty ku ja Jeconías tpaajty ja y'u'nk midi txøøw'ajtp Salatiel, jøts ja Salatiel ja Zorobabel ja y'u'ngip. ¹³ Jøts ja Zorobabel t'u'ngi ja Abiud, jøts ja Abiud t'u'ngi ja Eliaquim, jøts ja Eliaquim t'u'ngi ja Azor. ¹⁴ Jøts ja Azor t'u'ngi ja Sadoc, jøts ja Sadoc t'u'ngi ja Aquim, jøts ja Aquim t'u'ngi ja Eliud. ¹⁵ Jøts ja Eliud t'u'ngi ja Eleazar, jøts ja Eleazar t'u'ngi ja Matán, jøts ja Matán t'u'ngi ja Jacob. ¹⁶ Jøts ja Jacob t'u'ngi ja José midi tñidø'øxy'ajtp ja María midi tyaagip ja nwindson'ajtim Jesús, ja Cristo midi yiknitsokp.

¹⁷ Makmajkts najtska'axits idø'øn ja tpaajty ku ja cho'onda'aky Abraham ñikøxp jøts ja ttamigugøxi ja David. David ñikøjxpts jadu'uk cho'onda'aky jøts ja jaduk jade'en ñajtska'axidyøø kunim ja israelit jaa'y yikwaanøjkxtøø aguwan'i'ampy jam Babilonia. Winetnims jadu'uk cho'ondaajky, ja'ats najtska'axidyøø jaduk jadine'en ja makmajkts najtska'axi kunim kyaxi'jky ja Cristo ja yiknitsokpi.

Ku ja Jesucristo kyaxi'jky

¹⁸ Yide'en idø'øn y'ejxi tyiyi sã jaty yjajty kyubejty ku nwindson'ajtim Jesucristo ojts kyaxi'iky: Ja María midi tyaagip, ja' idø'øn wyinaty najts'awani'ejtnip jøts ja tmøøt'amajtskit ja José; nawyaawajnidipnim ja wyinaty ku ja María jam tñikøxp'ajtni ja mutsk, Dios idø'øn ja tuujnip jøts ja Espiritu Santo myøk'ajtin jade'en tyikmajada'aky. ¹⁹ Øy yikxonts ja José yjaa'y'aty midi idø'øn ñiyaa'y'ajtpy, ka'ap ja pøn sã tjadyimñøjmi jøts ja María kyayikpøky'ext; myajststu'utwampy ja' jøts ja ka'ap pøn ttuknijawiwya'añ.

²⁰ Exam idø'on ja wyinaty jade'en wyinmay ku ja ojts agumaa'y'ampy tyuk'ijxyi ja Dios y'ankilis jøts ja ojts ñii'mxyi:

—José, metsxi mdeety'amøjip ja David, kidits mdsø'øgi, møøt amajtski yø María. Yikaxø'økwapmy mutsku'nk tu'uk, Dios y'Espíritu Santo jade'en myøk'ajtín tyikwingaxø'økp. ²¹ Mixyu'nk ja yikaxø'økp, ja'ats meets ja xyøøw mbiktaajkip JESÚS. Jade'en'ampy idø'on ja jade'en txøøw'att ja'agøjxp ku ja pojkpitumbi jaa'y ja ttuknitso'ok'att ja pyøky.

²² Tyimyjajt tymgyubajts idø'on ja jade'en sa nwindsøn'ajtim Dios wyinaty tø tyikwa'añ ja kyugajpxy ku ja wyaañ:

²³ Jøtpyp tu'uk ja kiixye'dø'øxy midí amaay tsinaapy, yikaxø'økpts ja tu'uk myajnu'nk,

Emanuel ja xyøøw'atp,
mídi ayuujk pidsømp: Dios adøm møøt.

²⁴ Xjats kuts ja José ojts ñiwijy, jøts idø'on ja jade'en tpaduun sa Dios y'ankilis ja wyinaty tø y'ane'emyiyi, jøts ja ojts tñidø'øpxyiky ja María. ²⁵ Jøts idø'on ja ka'ap jade'en tmøøtsøoninim sam amajtsk'ajtín ñaxy kunim ja tø'øxy tyikaxi'iky ja myijawyeeenu'nk; jøts ja ojts txøðijy JESÚS.

2

Ku ja wijyjaa'y ojts t'ats'ejxti ja maxu'nk Jesús

¹ Jam ja Jesús ojts kye'exy Belén, jam kajpjtøp midí Judeit etjotp, ja Herodes idø'on jam wyinaty windsøn'ajtp, ja' wyinaty tuki'iyi tñitanaapy ja naajx jøts ja kajp. Xjats jam Jerusalén yja'attøø winaagin wijyjaa'dyi midí tsoo'ndip xøøbidsimy, ² ja'ats jam ojts tyiknidøwidi, yide'en ja wyandøø:

—¿Ma dø'on ja tø kye'exy ja' pøn tñiwindsøn'atp ja ya'it israelit jaa'y? Tøts øøts ja n'ejxpaajti ja maadsa' ma øø tø ndsøøn, ixyats øøts ja tø nnimiñ jøts øøts ja nwindsø'øgiwya'añ.

³ Kuts ja windsøn Herodes ja ojts jade'en tñimadøy jøts ja tyatøkiyi ja jotmay, nayide'en niduki'iyi ja Jerusaléngit jaa'dyi. ⁴ Winets ja windsøn Herodes tñankñamyujki niduki'iyi ja israelit teety windsøndøjkti jøts nayide'en pøn jaty tkajpxwejtíp ja jaa'y, ja'ats idø'on ja ojts ttiibyiky ma et idø'on ja Cristo wyinaty kyaxø'økwa'añ. ⁵ Xjats ja tñimaadyøø:

—Jam Judeit etjotp ma kajp jam txøøwi Belén; pø yide'enimxi ja Dios kyugajpxy jekyip tjaadyañ:

⁶ Ja kajp midí yiktejp Belén, midí jam Judá etjotp, kidi tymñugo kajpíp yø' sam o midí kajp ma jaty jam yikutukti ja windsøndøjkti wine'enin yjam'atti jam Judá; jam ja kyaxø'økt tu'uk ja møj windsøn, midí øts nIsraelit kajp x'ejx'ejtip.

⁷ Winets ja Herodes amaa'tsk twaadsøøy ja wijyjaa'dyi midí idø'on jam wyinaty tø choondi xøøbidsimy, jøts ja ojts ttiibyiky juuni dø'on ja wyinaty tø t'ejxpaajti ja maadsa'. ⁸ Jøts ja ojts tkexy jøts ja ñøjkxtit jam Belén, yide'en ja tñimaay:

—Nøjkxti jam, øyim yikxonim idø'on xyiknidøwidit ja mixyu'nk; kuts xpaattit, jatyiøts meets ja xnigajpxt jøts meets ja xukmado'ot, jøts øts ja nayide'en n'atswindsø'øgit.

⁹ Kuts idø'on ja windsøn Herodes ja jade'en ñimaajyidøø, xjats idø'on ja wijyjaa'y choo'ndøø. Jøts ja maadsa' ja wyinyø'øyi midí ja jam wyinaty tø t'ejxti ma dø'on ja jam choo'ndi xøøbidsimy, yø'øpy idø'on ja' kunim ja yja'jty jam ma dø'on ja mutsku'nk Jesús wyinaty, jamnimts ja yø'øy'amøjkiyi'ñ. ¹⁰ Ku

dø'øn ja wijyjaa'y ja jade'en t'ejxti ja maadsa', xjats ja yjantyimxyondaktøø; 11 kuts ja tyøjkidøø jam tøjktotp, japts ja tpaattøø t'ejxtøø ja mutsku'nk jøts ku ja tyaak María ja jap møøt. Winets ñagyuxendyaajkidøø jøts ja twindsø'jkidøø ja mutsku'nk. Ojts ja tyikni'awa'atsti ja oori, ja poom, jøts ja pa'akxuu'kpi midi tyejtíp mirra. Jade'en ja tyikni'awa'atstøø, ja'ats ja ojts ttamay'atti, ja' ja ojts ttawindsø'øgidi. 12 Kuts idø'øn ja wyinaty jade'en tø t'ukwindsø'øgidi, xjats ja yiktukmadoodøø agumaa'yjotpy jøts ku ja ka'ap nayide'en y'ukwimbejtnidit midi ja wyinaty tø tmendi, ma ja windsøn Herodes ja jam wyinaty tø t'ukpaatti. Xjats idø'øn ja wyimbejtnidøø, abiktyuu' tpojktøø jøts ja ñøjkxnidi jam pyuxkøjxp kyajpkøjxp.

Ku ja maxu'nk Jesús ojts yikmigüe'xy jøts yikminijky jam Egipto

13 Tøts idø'øn ja wijyjaa'y jam wyinaty choondi, ku ja nwindson'ajtm ja y'ankilis ñanky'ejxøø jøts ja José ja agumaa'yjotpy ojts t'ixy, yide'en ankilis ja ñimaajyøø:

—Tsojk pidø'øk, møøt tsoon yø mutsk møøt yø tyaak jøts mgaknøjxktit jam Egiptit etjotp, taa'nidi jam. Pøni wine'en jam mdaa'nidi øtsnim ja kø'øm nnigajpxp, ja'agøjxp ku Herodes yø t'ixa'awa'añ yø mutsk jøts yø tyik'ookwa'añ.

14 Xjats ja José ojts pyidi'iky, jøts ja ojts koots tsa'angue'eky ja mutsku'nk, jøts ja tmøødiyøø ja tyaak jøts idø'øn ja ojts tmøøtnijky jam Egipto. 15 Jam ja chinaadyi jeky kunim ja Herodes y'ø'jky. Jade'en'ampy idø'øn ja jade'en tyimyjajty ti mibaat ja Dios kyajpxy jadi'iñi y'uknaxt pø patyxi wyinaty yide'en tø tyikwa'añ ja kyugajpxy: “Egiptit etjotp øts ja n'U'nk nyiktsø'øn ku øts ja nwaadsøøy.”

Ku ja Herodes tyikutuky jøts ja mutsk mixyuna'jk y'oo'køxtit

16 Kuts ja Herodes tñija'wiyii'ñ jøts kudam ja wijyjaa'y ja wyinaty tø wyin'iiñiyi, xjats ja yjantyimy'ambijky; jøts ja ojts tni'ane'emy ku y'oo'køxtit ja mixyuna'jk. Majtsk jumøjtpibaat ja ojts tñankyik'øøgyiyi wine'enin ja mixyuna'jk jam wyinaty Belén, jøts nayi wine'en ja kajp jam tm'wington'aty. Ja jumøjt idø'øn ja pyay'øpy sa ja wijyjaa'y ja wyinaty tø tyukmadøyi.

17 Ka'pxy idø'øn ja jade'en yjajty sa ja kugajpxy Jeremías wyinaty ja nøky tø tja'ay ku ja wya'añ:

18 Yikmadoop ayuujk jam Ramá, sam yjawi øy pøn ti tpaji'iy tpayaxy;

ja tø'øxyøjk Raqueldam idø'øn y'u'nk y'una'jk tpajipy tpayaxp jade'en, jøts ja ka'ap tkupiky jøts ja yikpa'ayo'ot, pø tøxi y'u'nk y'una'jk ja y'oo'køjxni.

19 Xjats ku y'ø'jky ja Herodes, winets nay'agumaa'yjotpy tja'wiyii'ñ ja José jøts ku t'ixy tu'uk ja Dios y'ankilis jam Egiptit etjotp, jøts ja ñimaajyøø:

20 —Pidø'øk, jøts xmøødit yø mixyu'nk yø Jesús møøt yø tyaak, wimbejtnidi nøjkxnidi jam Israelit etjotp, tø ja y'oo'køjxni pøn jaty y'ijty tyik'ookwandip yø mutsku'nk.

21 Winets ja José pyidi'jky jøts ja tyiktsøø'ñ ja mutsku'nk. Ja Jesús idø'øn yikwaadsø'omp møøt ja tyaak jøts ja ojts ñøjkxti jam Israelit etjotp. 22 Kuts ja José tñija'wiyii'ñ jøts kudam ja Arquelao jam wyinaty wyindsøn'aty Judeit etjotp, ja tyeety Herodes ja kyudanaapy ku dø'øn ja wyinaty tø y'øøky, jøts ja José tsø'jkip ja', jade'ents ja jade'en'ampy kyanijky; tøts idø'øn ja wyinaty yiktukmadoogjmi agumaa'y'ampy jøts ja ojts ñøjkxti jam Galileit etjotp.

23 Kuts idø'øn ja jam yja'attøø, jøts ja ñøjkxti tsinaabyi ma kajp txøøwi Nazaret.

Ka'pxy idø'øn ja jade'en tyuujni yjajty sa Dios kyugajpxy wyinaty tø wya'andi jøts ku ja nwindson'ajtim Jesús jam kyugajpi Nazaret.

3

Ku ja Juan Bautista kya'amaay jam abak etjotp

¹ Tøts ja tiempi wyinaty ñaxy jøts ja Juan Bautista midi yiknøbajtp, jam wya'kaxi'jky Judeit y'abak'etjotp, jøts ja jam kyajpxwa'kxy, ² yide'en ja jam wya'añ:

—Jawidi mbøky, yiktigajtsti mdsinaa'yindi, ja wyingøñ ja Dios kyutujk midi ja tyanitanaapy ja yjaa'y.

³ Yø Juan idø'øn ja' midi ja kugajpxy Isaías ñigajpx ku ja yide'en tjaadyaañ: Yikmadoop ayuujk jam abak etjotp ku wya'añ møk'ampy: “Awejxidi ja nwindson'ajtim y'ixpøjkin; yiktøwdi yiktuuda'akti mwinnmaa'ñ.”

⁴ Kameeyi pøjk idø'øn ja Juan jam wyinaty wyet'ajtpy, jøts jiyujk'ak tendsum'aty, ja mu' dø'øn ja jam chu'chpy jøts jiyujk pa'ak ja tji'kxy midi jam muum ujtsjotp, ja'ats idø'øn ja jam ñidsinaapy. ⁵ Jøts idø'øn ja jam øy pøn jaa'y ñimiñiyi jøts ja tmadowdi sa wya'añ, mendip ja' pøn tsoo'ndip jam møj kajpkøjxp Jerusaleñ, nayide'en wine'enin jam pøngapøn chøøñidi jam Judeit etjotp, midi tmiwingon'ajtp ja nøø midi txøwip Jordán; ⁶ kuts idø'øn ja jaa'y ja pyøky tmayatsti, jøts ja Juan ja tyiknøbety ma ja Jordángit nøø jam.

⁷ Jøts ku dø'øn Juan ojts t'ixy jøts ku ja fariseotøjk may'ampy yjanchmendi nøbajtpi møøt ja saduceotøjkti, jøts ja tñimaay:

—iMee miku!! ¿Pøn mee tø mni'mxyi jøts ku jade'en mgayiktabayø'dyit ja mbøky, jøts ku yø'øyi chøkyi ku meets ya nøbajtpi tø mmiñ? ⁸ Yikxon idø'øn mjaa'y'attit, wan idø'øn tyik'ijxy jøts ku ja mdsinaa'yin tø xyiktigatsti, ⁹ jøts kidi mee kø'øm mnawya'añidi namyikajxim: “Tixi ka'ap ti chøkyi kumi ja Abraham adøm n'apteety'amøj'ajtyindip”; jøts ka'ats yjade'eni ti Dios kamajyip øy ja pøn ttukmigu'uk'att ja Abraham pøni pøn ja kø'øm y'a'ejxip. ¹⁰ Jøts tsojk ja nøjx yiktädyuñ pøn jaty tkami'øy'ajtip ja Dios. ¹¹ Tiy janch ixyam ndyimdyukmadowdi jøts ku øts yø'øyi tø nmiñ jøts meets nøø nduktanøbattit. Jade'en'ampy yiknijawit jøts ku mdsinaa'yindi tø xyiktigatsti; jats øts tu'uk ix'oojk xpamiñ pøn meets Espiritu Santo mduktatøkiyip jøts ja' tñime'ent ja tiidyu'unin. Møk'ampy kutujk ja tñimiñ, nijuuni øts ja møøt nganamyibaat'atiyit. ¹² Jade'en ja ttu'unt ja naxwii'ñit jaa'y sam ariindøøm yikwigumyin, abiky ja tpiktaajkit ja y'ak jøts ja tñitø'øty ja jøøn midi nijuuni kape'tsp, jøts ja ariinbajk abiky yikpøkjø'økt. Jade'ents idø'øn ja jaa'y yiktu'undit sa pønjabøn tmi'øy'aty tkami'øy'aty ja Dios.

Ku ja Jesús ñøbejty

¹³ Xjats idø'øn ja Jesús yja'ljty jam ma ja Jordán nøø, jam ja chøøñ Galileit etjotp jøts idø'øn ja jam yja'ljty ma ja Juan wyinaty, ja' ja ñinijkxpy jøts ja yiknøbatit. ¹⁴ Ka'ap ja Juan ja twa'añ jøts ja tyiknøbatt, yide'en ja Jesús yikniamaay:

—¿Jawyeen me xtsøky jøts me nyiknøbatt? Pø metsxi dø'øn ndijy xyiknøbattp.

¹⁵ Yide'en ja Jesús y'adsøøy:

—Wan idø'øn t'ukjaty; jade'en ne'egi ndyimdyøø'jint jøts ku ja'ayi nbadu'unint sa Dios Teety tyiy'ajtin wya'añ.

Kyupøjk idø'øn ja Juan ja jade'en. ¹⁶ Ja'ayi ja Jesús ñøbejty, jøts ja pyidsiimy jam nøøjotp. Winets nay jaty adsu'jky y'awaajch ja tsajp, jøts ja ojts

t'ejxpaatti ja Dios y'Espíritu Santo ku ja ñigida'agyi sam tsapakin jøts ja tyakakpajti. ¹⁷ Winets ja Dios Teety y'ayuuik yikmadøø, yide'en ja jap tsajpjøtpy wya'añ:

—Ya'at øts idø'on n'U'nk'ajtpy, yø' øts idø'on ndsøky'ajtpy, njantya-jotkujk'ajtpyts øts yø'.

4

Ku ja Jesús yikjot'amutsk'ejxwq'añ

¹ Xjats ja Dios y'Espíritu Santo ojts yiknijkxyi ja Jesús jam abak etjotp, jøts miku' ja jam yjot'ejxit.

² Wixijxxyøøw wixijxchuu' idø'on ja jam y'ayuu'ajty, jøtsnim yuu ja pyaajti.

³ Winets miku' ja jam ñimeejni jøts ja yikpøkyunwq'añi, yide'en ja ojts ñi'imxyi:

—Pøni janch ku me mjanchdiosu'ngi, yiktsapkaakyjat yø tsaa.

⁴ Xjats ja Jesús y'adsøøy:

—Yide'en Dios kyajpxy wya'añ: “Kuuyi Dios kyajpxy myøji, kidi ja'ajip naqxwi'ñit jaa'y nugo tyajujky'attip ti jaty yikjøø'kxp.”

⁵ Winets miku' ja ojts yiknijkxyi jam Jerusalén midi Dios kyunuu'kxkyajp'ajtpy, jamts ja ojts yikøxpetyi tsaptøjk kubajk ⁶ jøts ja ojts ñi'imxyi:

—Pøni janch Dios U'nk mets, kajtswoon ya; pø nømpxi ja Dios kyajpxy jøts ku:

Ja tnøjmit y'ankilis jøts me myik'ejx'ett jøts ku me ka'ap ti mjattit.

Jøts ku mets ja ankilis mdsa'anjøøkit,
jøts mdeky tsaa kyakumit kyayo'odsit.

⁷ Xjats ja Jesús t'adsøøy jøts ja tnimaay:

—Janch nayinømts Dios kyajpxy: “Kidi mDios xjot'ixy.”

⁸ Xjats ja miku' ja ojts wyaanøjkxkojmiyi jam møj kojpkøjxp, jøts ja jam tyuk'ejxøø wine'en ja kajp naqxwi'ñ jøts ku janchkumeeñ janchjotkujk;

⁹ yide'en ja ojts ñi'imxyi:

—Ngøyajkøjxp øts yø kajp tuki'iyi jøts mets yø xja'bøkøxt, pøni xwinguxanaapy øts, pøni xwindsø'jkp øts.

¹⁰ Winets ja Jesús wyaañ jøts ja tnimaay:

—Miku', jiwā'ak, kidi øts ya xwin'ixy, pø yide'ents Dios kyajpxy wya'añ: “Ja Dios Teety tu'ugyi mwindsø'øgip, ja' mbadu'lump pøni sa ja wya'añ.”

¹¹ Xjanimts ja nwindsøn'ajtim Jesús ja miku' myajtstujtyøø, jøts ja ankilis ja ñimeejnøø, ja'ats ja ojts pyudøkiyi.

Ku ja Jesús tpadøjkiy'ñ ja tyunk

¹² Kuts ja nwindsøn'ajtim Jesús tñimadøøy jøts ku ja Juan jam wyinaty puxøjkjotp, winets ja ojts ñijkxy jam Galileit etjotp. ¹³ Jøts nika'ap ja tyaa'niyi'ñ jam Nazaret, ne'egi ja ojts ñijkxy tsinaabyi ma ja kajp jam mejy'am midi Zabalón etjotp jøts Neftali etjotp, jam idø'on ja ojts ñijkxy Capernaumit kajpkøjxp. ¹⁴ Ka'pxy idø'on ja jade'en tyuujni yjajti sa ja Dios kyugajpxy Isaías wyinaty tø wya'añ ku ja yide'en tjaadyaañ:

¹⁵ Meets Zabalónit jaa'y, meets Neftalit jaa'y,

ma tuu' wingon ñaxy jam mejy'am, midi yiknido'onip xøøbidsimy ku nnøjkxint jam Jordán.

Meets Galileit tsinaabyidi, pøn ka'israelit jaa'dyi.

16 Jade'en meets x'ejxpaattit midì Dios Teety ñajtskajxp sam ja jajin pøn wimbeets kugoots tyimy'ejtnidip, nisudso mgawinmaa'nbyaatti pøni sadam idø'øn ja Dios mdsøkyidi, tøts ja tyikujajtaagi tyikudøø'kxaagi pøn ja pyøky tmi'ookwanidip jadi'iñi, jøts tø ja Dios mduu'mø'øyiidi sudso mnitso'ok'attit.

17 Kuts ja Jesús ja'ayi jam Capernaum kyajpkøjxp yja'aty, yide'en ja kyajpxwä'kxnibøjkiyi'iñ:

—Jawidi mbøky, yiktigatsti mdsinaa'yindi, ja'agøjxp ku ja wyingøñ ja Dios kyutujk midì ja tyanitanaapy ja naqxwii'ñit jaa'y.

Ku ja Jesús twaadsøøy nimaktaxk ja ajkxmajk

18 Jam ja Jesús wyinaty ñaxy mejpya'am midì jam Galilea etjotp, ku ja t'ejxpaajty namaajtsk ja jaa'y midì ttukmiga'ax'ajttip, tu'uk txøøw'aty Simón, nayi yikxøømøøpy ja Pedro, jøts jadu'uk Andrés. Ajkxmakk idø'øn ja tyunk'ajttip ixam ja wyinaty tymñiwejtspatti ja tya'ajkxmajk. 19 Winets ja nwindsøn'ajtim Jesús ja ñimaa'jyidøø:

—Mada'akti, møøt widettik øts jøts nduknijawidit sudso jaa'y ja nitsø'ok'ajtin tpaatt.

20 Jøts idø'øn ja nay jatyi tnajtswø'jidøø ja tya'ajkxmajk jøts ja ojts tmøødidi.

21 Tø wyinaty waani yø'ødyi, jamts ja Jesús ojts t'ejxpatkojmi nayi namaajtsk ja jaa'dyi midì tukjaa'dyi: tu'uk yJacobø'aty jøts jadu'uk Juan txøøwi, ja Zebedeo dø'øn ja y'una'jk. Jam ja wyinaty møøt ja tyeety barkijotp, ja tya'ajkxmajk ja jam wyinaty y'adajkidip. Winets Jesús ja ojts yaajxiyidi, 22 jøts ja nay jatyi tnajtstuttøø ja tyeety jam barkijotp, jøts idø'øn ja tmøødidøø ja Jesús.

Ku ja Jesús tyik'ixpijky ja mayjaa'y

23 Øy ja Jesús øy madsoo tyimwyidity jam Galileit etjotp, ku ja øy magajp yja'aty jøts ja yik'ixpiky jam tsaptøjkjotp, jøts ja tkajpxwa'kxy ja Dios y'øgyajpxy midì ja tyanitanaapy ja yjaa'y, jøts ja øy pønjabøn tyiktsø'øky pøn jam tigati pa'am øøjkip. 24 Jøts ja Jesús yiknija'wiyi'iñ, ñija'wigyøjxtøø ja' pønity tsinaadyip jam Siria etjotp, ja'ats ojts ja pyamaa'y tyikmendi pøn jaty jam o tigati pa'am øøjkidip ajnidip, jøts ñayikmemidi ja' pøn ja miku' tø tyatøkiyidi jøts pøn ja mø'ødyi pa'am øøjkidip, pøn køxujxtip pakxujxtip. Xjats idø'øn ja nwindsøn'ajtim Jesús ja tyiktsokijxy. 25 Jøts idø'øn ja mayjaa'y jam jade'en yja'atti choondi pøn tso'ondip jam Galileit etjotp, jøts ja yikpawidity ja Jesús. Jam ja'adi pøn kugajp'ajttip ma jaty ja kajp midì kyutujktaajk tjagyajptip Decápolis jøts Jerusaleñ, jøts nayide'en pøn tso'ondip Judeit etjotp, jøts nayide'en jamidi pøn kugajp'ajttip jaduktamajñ'ampy ma ja Jordaniit nøø tyañ.

5

Ku ja Jesús ojts kya'amay jam kojpkøjxp

1 Xjats ku ja Jesús ojts t'ixy ja mayjaa'y jam, winets ja ñijkxy kojpkøjxp jøts ja jam y'ixaajky, jamts pyabøjkpøjk ja ñachinaa'y'awidejtøø, 2 jøts ja ojts yide'en tyik'ixpøjktøki:

Ja' pøn nekim t'ejxtip

3 —Tya'ø'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midì ja tyanitanaapy ja yjaa'y.

4 'Tya'øy'ajtidip Dios kyunuu'kxin ja'adi pøn jotmayaxtip pøn jotmay'oo'ktip, ja' idø'øn Dios ayo'ejxidip.

5 'Tya'øy'ajtidip ja' Dios kyunuu'kxin pøn myiduda'aky'ajttip ja y'aweix'ajtin, ja'ats pyaattip ja øy'ajtin midi ja Dios tø tni'adsowi.

6 'Nayide'ents ja tta'øy'ajtmidi ja Dios kyunuu'kxin pøn tjantyimtyojktip ja øy'ajtin ja tiy'ajtin midi Dios yja'ajip, pudøkiiyidipts ja' jøts ja jade'en ttu'undit sam idø'øn ja tsokti.

7 'Nayi tya'øy'ajtidip Dios kyunuu'kxin ja'amidi pøn t'ayo'ejxtip ja myigu'uk, ayo'ejxidipts Dios ja nayide'endi.

8 'Tya'øy'ajtidip Dios kyunuu'kxin ja'adi pøn ja yjanchja'win tu'ugyi yik'ejttip, kuwanis ja Dios ja tpaattit.

9 'Tya'øy'ajtidip Dios kyunuu'kxin ja'adi pøn yikxon tkajpx'øydip jøts tsep tkananktyuñidi, ja'abi jaa'y idø'øn Dios u'nk'atidip una'jk'atidip.

10 'Nayi tya'øy'ajtidip Dios kyunuu'kxin ja'amidi pøn tku'ayo'ombaajtidip ja øy chinaa'yin, jøts yikjemandi yiktedundi, ja'abits idø'øn paat'ajtidip ja Dios kyutujk midi ja tyanitanaapy ja yjaa'y.

11 'Nayi tya'øy'ajtidip Dios kyunuu'kxin ja'amidi pøn yikjemnimaadyip yik-tenimaadyip uk yikjemandi yiktedundi, yikniwambatti a'øy'ampy øts køjxp.

12 Kidits xkumayjawidi, xonjajti jotkujk'atti meets, møj'ampy meets ja nøjkk mwingaxø'jkxiyi jap tsajpjøtpy, pø nayide'enxi ja yikjemandøø yiktedundøø pøn jaty tø y'atstsøøniidi y'atstanidi pøn kugajpxy'ajtidip ja Dios.

Ja' pøn jade'en naxwiñ tundip sam ja jaj tyuñin sam ja kaan tyuñin

13 'Jade'en meets idø'øn sam kaan tyuñin midi wa'ats midi naxwii'ñit jaa'y yiktundip jøts chu'jch kyawindigø'ødyit. Nayide'en idø'øn ndejint mdunkpaattit ku mmigu'uk xukmado'odit ja Dios yja' sudso'ampy y'anmija'win kyawindigø'ødyit. Kuts ka'ap jade'en mdu'undit tø wyinaty mbidsømdi ejxim ja kaanin midi kawa'ats midi katump.

14 'Kuwan' myik'ejxtit myiknijawidit nayide'en sami kajp yik'ijxyin midi jam ejxin'am midi jam kojpkøjxp. Jade'en meets idø'øn exjpajt mwā'andip sam jaj yjajyin tyi'kxyin. 15 Kidi ja'apxi yø jaj tniðøøbyøki jøts ja yikpikta'akt kajuun patki'py, pø ja'axi ja wya'ant jøts ja yikpikta'akt jam ejxin'am ma ja tyikujajit tyikudøø'kxiti pøn jaty tsinaadyip jam tøjkotp. 16 Nayide'ents meets idø'ønmi, tuk'ejxti ja jaa'y ja øy'ajtin ja xondaajkin jøts t'ejxtit tnijawidit jøts kudam meets xuñ ja tiy'ajtin, mjajotwamp tam meets, myijawidipts kyunuu'kxyjawidipts ja' ja Dios Teety midi mee mnitanaajyip o madsøo midi jap tsajpjøtpy.

Ku ja nwindson'ajtim Jesús tniagjpxy sa tyu'unt ja Moisés kyutujk

17 'Kidi meets jade'en mwinmaañidi jøts ku øts ja' tø nnimiñ jøts øts ja Moisés kyutujk jøts øts ja Dios kyugajpxy y'ixpøjkin nyikudigøjyidit; kidi ja'apts ø tø nnimiñ, ja'axi ø nnimimpy jøts øts ja jade'en yikxon njaaktyimñigajpxy sa jaty ja tø wya'andi. 18 Janch øts idø'øn nwa'añ, pøni wine'en iiy tyaa'ni yø naajx yø tsajp, niwine'enints ja kutujk kyagudigø'øty kunim ja tuki'iyi ka'pxy jade'en tyimyjatt pøni ti jaty idø'øn tunipnim. 19 Paty ja ka'ap yikmøj'ext ku Dios kyutujk ttanitanit ja yjaa'y pøni pøn yiin waan tkayikmøjip ja Dios kyutujk, kuts ja myigu'uk ja nayide'en ttukpabiky sam ja kø'øm tpaduñ yiin waan, ja'ats idø'øn ja Dios kamøj'ejxip nayide'en. Pønts ka'pxy tpadump jøts myigu'uk ja nayide'en ttukpabiky, møj'ejxipts Dios ja' ku kyutujk ja ttanitanit ja yjaa'y. 20 Paty mee ndukmadøy, pøni ka' øy

yikxon mjaaj'y'atti, pøni mdundip nayide'en sam yø fariseotøjkti sam yø kajpxwejpitøjkti, ni juunits meets Dios kyutujk jade'en xkapaajtiyidit midit yjaaj'y ja tyanitanaapy.

Ku ja Jesús tñigajpxy sa kya'øyi ja aki jøts ja jotma'jtin

²¹ Tøxi xnimadowdi ku ja n'apteety'amøj yiknimaadyøø: "Kidi myikjaa'y'øøky, pøni pøn yikjaa'y'oo'kp yiktiidyu'ump ja'." ²² Yide'ents mee nnøjmi pøni pøn ja myigu'uk tmi'ambøjkp, nayi yiktiidyu'ump ja'. Uk jam o pøn ja myigu'uk tjemnøjmi ttenøjmi, tiidyunidipts ja' ja kutujk adsinaabyidi ma ja kutujktaajk jam; uk pøn tñimaapy ja myigu'uk jøts ku ja myø'øty, paat'ajtíp ja' jøts ja y'ayo'ot ma jøøn jap ayodaajkjotpy.

²³ Paty pøni mbikta'akwandip ja myøxy jam altajrwemp, kuts jam mja'atti jøts winet xja'myatsi jøts kudam ja mmigu'uk jap tu'uk pøn mmidsep'ajtíp, ²⁴ jamyits ja altajrwemp xmajststuttit midit myoxwandip, jøts ja jawyeen x'atskajpx'oyidit møøt ja mmigu'uk. Pøni ti dø'øn mnadyami'ambøjkidip jøts mnamyijotjimbetidit xem yam møøt ja mmigu'uk, winetnims jadigojk mnøjkt jam altajrwemp, jøtsnim ja xyoxtit midit jam tø x'ukyiknøjkxti.

²⁵ 'Ku pøn mni'øøniwya'añidi jøts ja myiknøjkwaañidi jam kudunk wyindum, namga'aním jam myiknijkxyidi, tiku yikxon xkakajpx'oyidi jøts ja møøt mnamyijotjimbetidit jadigojk, jøts kidi myiknijkxyidi jam windsøn tiidyumbi wyindump. ¿Ja ti nø'ømp ja windsøn jam? Pø mgøyakidipxi ja jam jøts mee myikøyakt ma ja tajk mayojr jamdi, ja'ats mee myikpuxøjktøkiyip jøts mee myiktsu'umt. ²⁶ Øts idø'øn wamp, jøts ku jaaním mbidsø'ømdit ku wyinaty tø ja multi xkubatkojxti.

Ku ja Jesús tñigajpxy pøn tø'øxy yaa'y nabyøjkxidip

²⁷ Tø meets inet ja xnimadøy ku jekyip yide'en yjawa'andi: "Kidi mmigu'uk ñiyaa'y ñidø'øxy xpøjkxyi." ²⁸ Yide'ents øts nwa'añ, pøn ja'ayi t'ejkkip ja tø'øxyøjk øy ja nugo y'am yjotp yjawnmay, pøkyumpts idø'øn ja jade'en.

²⁹ Pøni ka'ap yø mween y'øyi ku yø mduktunk'aty jøts myikpøkyunwaañ, jade'en ne'egi mdyimdyø'øt jøts ku mnawyenjuudit, jøts jagam xpikta'akt ja mween; ne'egi øy'ajtp jade'en ku ja'ayi wyindigø'øty midit myikpøkyunwajnip, jøts kidi amuum mwindigøøgyixy, jøts kidi amuum mnijky jap ayodaajkjotpy. ³⁰ Uk nayide'ents mgø' myikpøkyunwaañi, ne'egits xkajtspoott jøts køtuk mda'ant; ne'egi øy'ajtp jade'en ku ja'ayi wyindigø'øty midit myikpøkyunwajnip, jøts kidi amuum mwindigøøgyixy, jøts kidi amuum mnijky jap ayodaajkjotpy.

Ku ja Jesús kyajpxwiyj sudso ja amajtsk'ajtin ñaxy

³¹ 'Nayi tø jekyip yiknigajpxy: "Pøni pøn ñidø'øxy tñajststutwamp, tiy'ajtingøjxpts ja tminawya'kxít, kojpp tu'uk ja nøky." ³² Yide'ents ø nwa'añ, ku pøn yaa'dyøjk ñidø'øxy tminawya'kxyi a'øy'ampy, ku ka'ap ja wyinaty ja wenk yaa'dyøjk tmøøt'aty, møj tundigø'øyin ja tyumpy, jøts ja tø'øxy pyøkyuñ ku ja wenk yaa'dyøjk ja møøt y'amajtskimyi. Nayi pøky ja yaa'y nayide'en taja'jtíp pøni myøøt'amajtskip ja tø'øxyøjk ja' midit tø wyinaty yikmajststuty.

Ku ja Jesús tñigajpxy ku ka'ap Dios køjpx nugo ndaay'ajntin

³³ 'Nayi tøts inet xnimadowdi ku ja mdeety'aptøjk jekyip yiknimaadyi: "Pøni ti mni'adso'owip Dios wyingujkp, kidits meets ja xka'ukyik'adujkni ja mgajpxy ja m'ayuujk." ³⁴⁻³⁵ Øtsts wamp jøts pøni ti ja mmigu'uk mdamini'adso'owip, ka'ap ja Dios nugo xyiktestigi'att. Ni xkakajpxpaattit ja tsajp jøts ja naajx, jabi Diosxi ja nayide'en yja'ajtpy; ni ja Jerusalén kajp

xkajakpxpaattit, jabi nay ja Dios møj yikutujkpxi kyajp ja'. ³⁶ Uk kə'əmbaatt mgubajk x'awanidi ku ja kyayikmibiky midi mjadukjanchjawiwiyandip o pən, kidits jade'en nugo mwa'andi, kidi kə'əmpixi meets mwaay mgubajk xyik'əyi, pə nay Dios ja jade'en kə'əm mməəjyidip. ³⁷ Ka'ap nugo ti xkajpxjimbettit xkajpx'adəjtit pəni ka'adam ja ka'pxy xnijawidi, jade'ents idə'ən ja miku' ja tyunkjəəjp tyikyə'əy ku xkajpxyondi.

Ku ja Jesús tnigajpxy sa pən ja pyəky nanktyukubetyidi

³⁸ 'Nayi tə net xnimadowdi ku ojts jekyip yide'en yiknigajpxy: "Jəts nayide'en pəngapən ja myigu'uk tyik'ayo'ombaatt pəni ti ayo'on ja jade'en ttuñ, nayide'ents idə'ən ja tyimyiktu'unt." ³⁹ Yide'ents ə nwa'añ: Jəts kidi mee nayide'en xuñ sam ja ka'əyjaa'yindi; pəni mgojxip mdse'jkip, ja' əy ku xmaa'kxuktit. ⁴⁰ Kuts əy pən mniwambatwa'añidi jəts adsepkəjxp myikpəjkiwya'andi ja mnijan, mo'odits, jəts pəni yjaaktyimbyəkwampy ja yukwop, kidits ayuujk nugo xyikyondi, mo'odi. ⁴¹ Pəni myiktaguwa'anidip jəts tsimy xpadsə'əmdit, jəts ja jam xyikja'attit pəni ma tə t'a'ejxidi, mjaaktyimdyuujnidipts ja may'ajt ja' jəts ja jawaani jagam xyikja'jtidit. ⁴² Pəni myik'amidoodip əy ti, mo'odits, kidi meets ja kamə'əyin x'ixy; nayide'en pəni pən anuu'kxy əy ti m'amidojdidip, kidi mee tə mwa'akjimbejtni jəts mmigu'uk møj may x'adsowdi.

Sudso yikminamyayit ja midseptəjk

⁴³ 'Nayi tə xnimadowdi ku jekyip yide'en yiknigajpxy: "Ja' məət mnamyayit pən məət mnamyigu'ukwa'añi, jəts ja kawin'ixyim xjawit pən məət mnamyidsep'aty." ⁴⁴ Yide'en ə nwa'añ: Jəts xtsoktit xmiyuuj'attit ja mmidseptəjkti, ədyejti ja' pən mga'ədyejyidip, pudəki ja mmigu'uk pən mjami'ajkidip mjamijotma'jtidip, ku'amidowidi meets ja' pən mjemniəajyidip mdeniəajyidip, pən mjemduujnidip mdeduujnidip. ⁴⁵ Jade'en'ampy meets ja Dios Teety tsajpjətpit mja'bəkədit jəts ja m'u'nk'atidit; pə tum ja'axi tyikni'amp tyikniəajp ja əyjaa'y ja ka'əyjaa'y, uk ku tyu'uy ja'ats ja nəə tuu tkajxp. ⁴⁶ Kuts meets ja'ayi məət mnamyayit pən mee mmiyuuj'ajtəp, ətits ja jade'en niwya'ant, ti may'ajt meets ja jade'en myiktaguməyip? Pən ja jade'en tkajajtp, yikugubajtpi paat ja jade'en ttuñ. ⁴⁷ Uk xkajpxpoo'kxtits ja'ayi pən jaty mmigu'uk'ajtəp pən tu'ugyi ja mdsinaa'yin məət nabyaadyi, ətə əy'ajtən meets idə'ən jade'en mdumpy? Ti pən ja jade'en tkajajtp, pə nayide'enxi ja y'adə'ətsti pən Dios tkajanchja'widip. ⁴⁸ Yikxonts mjaa'y'attit əy wa'ats, nayide'en sam ja mgunuu'kxyeety midi jap tsajpjətpy.

6

Ku ja Jesús tnənk'y'ixpikiyi ja ədyu'unin

¹ 'Əyim x'ejxtit, jəts kidi mdsinaa'yin nugo xa'ədyəki nadyijyi ja mmigu'uk xuk'ejxti əy paat. Pəni m'adə'ətswandipts jade'en, niwine'enints meets Dios Teety may'ajtin ja mgadaguməyidit ja' midi jap tsajpjətpy. ² Paty ku xpudəkədit əy pən ayooəi jaa'y, kidits meets ja niduki'iyi jaa'y xamimadyakixy, kidi mee nayide'en m'adə'tsni sam ja jaa'dyi midi jam tsajptəjktəp, midi jam nəə'am tuu'am win'əə'ndip. Jade'en'ampy idə'ən ja jade'en y'adə'ətsti jəts ja kajxa'aky pyidsə'əmdit, jade'eñits myay'ajtin ja təəkti. ³ Jəts ku xmo'ot əy ti ja ayooəi jaa'y, tunts idə'ən jade'en jəts kidibaat ja xukniəawidi pən me mjadyimjaməjmigu'uk'ajtpy, ⁴ ne'egi əy ku ka' pən

xuknijawit ku jade'en xu'unt. Jøts ja Dios Teety wa'ats ja t'ixy ti jaty me mdumpy øy ja pøn xjagaduknijawi, mbaajtipts mets ja myay'ajtin ja'.

Ku ja Jesús tnanky'ixpiky ja Dios'ajot'ajtin

⁵ Jøts ku mdsapkaajpxtit, kidi jade'en xundi sam ja jaa'y midi win'øø'ndip, ja' midi tsojktip jøts ja tani Dios'ajot'attit jap tsaptøjkjøtpy, uk ma jaa'y y'ejxidit jøts ja jade'en yikajxa'aktit. Jade'eñits ja kø'øm ñadyukpikyidi ja myay'ajtindi. ⁶ Kuts ja Dios x'ajot'attit, tøkidi mdøjkjøtpy, agø'ødi ja mdøjk jøts xminuu'kxa'aktit anadyu'uk'ampy ja mDios Teety, pø ixajpxi ja nayide'en jøts y'ijxpy ja' ti jaty mee mdumpy, øy meets ja pøn xjagaduknijawi.

⁷ Jøts ku dø'øn jade'en ja Dios x'ajot'attit, kidi ja xkajpxjimbetti xkajpx'adøjti midi tø xja'ukajpxti, kidi jade'en m'adøtsnidi sam ja jaa'dyi pøn Dios tkanija'widip, pøn winmaadyip ku ja y'øømayidit kyajpxmayidit winets Dios ja myadowidit. ⁸ Kidits meets nayide'en m'adi'ich sam ja y'adø'øtstin; pø wa'atsxi Dios Teety ja ne'egi tnijawi pøni ti meets idø'øn mga'ejtxip, pøni ti meets idø'øn mdsøjkpy, wa'ats ja tnija'wiñi yam meets ja xka'amidøynim.

⁹ Paty idø'øn yide'en ja Dios x'ajot'atti:

Dios Teety tsajpjotpit,

kuuyi mets jadu'uk øy wa'ats.

¹⁰ Øyts ku xminiñ ja mgutujk midi mdanitanaapy ja mjaay'.

Yikjatts ya ñaxwiñ nayide'en kø'øm dsojkingøjpx pøni sa xamidsøky nayide'en sam jap xuñin tsajpjøtpy.

¹¹ Møøkyts øøts icyam ja ngaajyik n'uujkik midi øøts xka'ejtxip.

¹² Maa'kxik øøts ja nga'øy'ajtin ti jaty øø tø nduñ, kumi tø øøts nayide'en nmaa'kxuky pøn øøts xjemdump xedump.

¹³ Agidyujk øøts axajtujk øøts, kidi øøts xmajtstu'uty jøts kidi myajada'aky ja miku' yja'.

Pø metsxi ja' mgutujk midi ja mjaay' mdanitanaapy, mets amuum møk'ajtin, jøts ja øy'ajtin xondaajkin midi xemikøjpx. Jade'en idø'øn ja yjatt.

¹⁴ Pøni mmaa'kxuktip ja jaa'y pøn mjemduujnidip mdeduujnidip, nayide'ents meets ja Dios Teety mmaa'kxukidit pøn jap tsajpjøtpy; ¹⁵ kuts pøn xkamaa'kxuktit, ka'ats meets ja Dios Teety mbojkipmaa'kxidit.

Ku ja Jesús tnigajpxy ja amaay'ajtin

¹⁶ Jøts ku m'amaay'attit ku ø xkagugayidit xkagu'uugidit, kidi meets jot-may'øøgyim x'ejxnidi, kidi meets ja jade'en xyiknigaxi'iky sam y'adø'øtsti ja win'øø'mbi jaa'dyi; jade'en'ampy ja jade'en ttundi jøts ja ttuk'ejxti øy pøn jaa'y ku ja jade'en y'amaay'atti. Jade'eñi ja tpaatti ja may'ajtin jøts ja ka'ap Dios yja' tpaajtidi. ¹⁷ Kuts mee m'amaay'att, nawyoogi nagyaa'xi, puj mween m'aaw, ¹⁸ jøts ja jaa'y kidi tnijawidi jøts kudam me m'amaay'aty. Ja Dios Teety ja tu'ugyi tnija'wip, pø ixajpxi mets ja møøt. Øy mets ti xuñ xkajpxy, ñija'wipts ja wa'ats; nay ja'ats mets ja may'ajtin mmo'ojip.

Ja kunuu'kxy juky'ajtin midi jap tsajpjøtpy

¹⁹ Kidi meef kidi pikta'aky ya ñaxwiñ nugo x'abøjktøkidi ma ja'ambi jøø'kxpi tyikudigøy ja pikta'aky, jøts ma maa'tspi kadye'ebyi tyøkidi jøts ja tuki'iyyi tyikpidsømguixy ja pikta'aky. ²⁰ Ne'egi øbyidsø'ømp jade'en ku xjøp'ijxy'attit jøts xpaattit ja juky'ajtin midi jap tsajpjøtpy, midi ka'ap mwindigø'xyidip. ²¹ Pøni ma xnajtsjawidi xpaatwa'andi ja juky'ajtin, nay japs meets ja mwinmaa'ñ y'ity.

Ja øy jaj midi ja jaa'y tyikja'gyukip

²² Xjats ja Jesús yjaakwaañ:

—Jade'en idø'øn yø mween n'ukpiktaajkint sam ja jain, yø'øts tyikujajtaajkip tyikudøø'kxaajkip amuum ja mne'kx mgojpk; kuts ja mween y'øy'aty, nayide'ents ja amuum tjagyepy ja ne'kx ja kojpk, ka'ap ja ttuktuñ ja kya'øybi; ²³ kuts ja mween kya'øyi, nayide'ents ja tyikjaty ja ne'kx ja kojpk sam pøn kube'ets kugoots y'ity. Pøni jamts ja jaj xmøødi jøts kuts ja xjaaktyimyik'ookni ku ja jade'en yjaaktyimyijajtni sam kyoots'ityin, jjaaktyimyjinajxpts ja' yam ja tø yjakoodsimy!

Ku ka' tuk'ojkyi majtskjøøjp n'ajot'ajtin jade'en ja Dios jøts jade'en ja meeñ

²⁴ Ka' pøn tumbi namajtsk wyindsøn tmiduñ, ku ja jade'en ttu'unt, tu'ukts ja pyidsø'ømt pøn ja wyinjawip, jøts ja yjadu'ukpi ja tkawinjawit, tu'uk ja t'ømyidu'unt jøts ja yjadu'ukpi ja tka'ømyidu'unt. Paty nayide'en ka' pyaat'aty jøts nmidu'unin ja meeñ ixyadams Dios njamidu'unma'andi, tu'ugyi Dios n'ajot'ajtin.

Ku ja Dios t'ejx'ity pøn jaty ja y'u'ngip y'una'jkip

²⁵ Ja'agøjxp øts idø'øn nwa'añ, jøts kidi xjotmay'atti pøni ti dø'øn mga'adyip m'uuktup, pøni ti dø'øn mdajujky'attip, ni ja mwet mnaamy xkajotmay'attit ti dø'øn mnadyaxoxidip. ¿Ti jade'en ja jujky'ajtin yikpaaty sami kaaky jii'kxyin? Pø ka'axi. ¿Jøts ja wet naamy mibaat ja t'uk'amibaat nayide'en pøni sa dø'øn ja ne'kx ja kojpk yikmøø'taty? ²⁶ Ejxti yø joon, ejxti yø jiyujk midi kakwidejttip jam tsajpwemp, ka'axi yø ñe'epti kyojti, ka'axi pyikta'aky yø tyikpidø'økti, ka'axi pyikta'aky yø tpøkjø'økti jøts tpikta'akti jap tsa'jxjøtpy; øy yø jade'en yjagatundi, yikmøødypts yjii'kxy yø', ja' yø tmøøpy pøn mee m'ajot'ajttip, ja Dios Teety pøn jap tsajpjøtpy. ¡Tits mee mdsow sa ja jiyujk jade'en ja yja' yikmo'odi! ²⁷ ¿Pøn kø'ømdsøky tyimy'uknankyojnip jagujkp metrin, øy ja mabaat jade'en tjadyimyjatsøky?

²⁸ ¿Jøts tiku xjotmay'atti ja wet ja xox? Ejxti yø ujts ejxti yø pijy midi yomp aayjøøjty ujtsjøøjty, ka'axi yø pyeetti kyojti, ka'axi yø ti ttundi; ²⁹ jøts øts idø'øn yam wamp, jøts ku ni ja rey Salomón jade'en ojts kyanadyaxøxyi ja xyox ti jaty ja jam wyinaty myøøt'ajtpy, sam yø ujts sam yø pijy tmdisujkaxi'iky ja xyox. ³⁰ Pøni xyøjxpy tamts Dios jade'en ja ujts midi ja ixyam yomp ja aayjøøjty ja ujtsjøøjty, øy ja jabom wixøjpk yjayiknitsaañit, ¡tits mee mdsow sa ja ujts sa ja pijy jade'en yjaaktyikxøxy, meets kaja'gyukibidi meets ka'ajot'ajtpidi! ³¹ Paty kidi mmaydi mdajti, jøts kidi mwa'andi: “¿Ti dø'øn ngaa'yim njøø'kxim? uk ¿ti dø'øn n'uujkim? uk ¿ti dø'øn nwet'ajtim nnaamy'ajtim?” ³² Tum yø yjade'embi pikta'aky pyawinmaadyip ja jaa'y pøn Dios yja' tkaja'gyukiyidip; meests mjagyajppip ja Dios Teety midi jap tsajpjøtpy, ja' ja tnija'wip pøni ti mee mga'ejtxip. ³³ Ja'ats meets jaweyen mjotmay'atp sa xpaattit ja Dios kyutujk midi ja tyanitanaapy yjaa'y, jøts nayide'en ja y'øy'ajtin chuj'ajtin midi yja'ajtpy, mbaatpts meets ja yjade'embi pikta'aky tuki'iyi. ³⁴ Paty kidi nugo xjotmay'atti pøni ti me'emp kida'akp jabom wixøjpk, jabi kø'ømxi ja ñanky'ejxit ñankñijawiyit ja jabomit'ajtin.

7

Kidi pøn o ti xawindsø'ødyi

¹ Kidi pøn nugo o ti xapøky'ejxti, jøts Dios nayide'en mgapøky'ejxidit. ² Nayide'en meets Dios ja mdagubatiyit pøni sa meets ja mmigu'uk xuñ, nay ja'ats ja yik'awetsp. ³ ¿Sudso dø'øn ja mmigu'uk pyøky x'ejxpaajtiyi, jøts ja mja' ne'egi xka'ixy kudam ja jawaani møj? ⁴ Jøts, ¿sudsots mets idø'øn

namyikajxibim xkajpx'oyiwy'añ yam mets ja mdsinaa'yin oy xkayikyø'oy?
 5 ¡Meets win'øø'mbi ataadyi! yik'oyidi jawyeen ja mga'øchinaa'yindi, winetnimts ja mmigu'uk chinaa'yin xkajpx'oyiyidit.

6 'Jøts kidi nugo ajawí øy pøn xmo'odi midí ja Dios yja'ajip, kidi jade'en xundi sam uk'otigati nugo ajawí yikmø'øy, ku ja nay ja'ayi m'uktanibidø'jkniyidit, jøts tsojk tatsu'utsa'am m'ukyik'ejxnidit. Jøts kidi nugo ajawí xukmadowdi Dios kyajpxy pøn tkaja'gyukidip, ku ja nugo t'uk'amnixeknidi t'uktsaachnixeknidi, taxi'iky nugo tjawidi.

Amidowdi pøktsowdi, ixa'adi kugajpxidi øy ma

7 'Amidowdi pøktsowdi, jøts Dios mmo'ojidit; ixa'adi pøni ti mga'ejtxidip, mdukupadipsts meets Dios ja'; uk ku mgugajpxidit muum, yik'awa'atspts øy pøn ja tøjk'aaw. 8 Ti ja kidyimy'ukyikmøøpy pøn t'amidoop pøn tpøktsoop, pyajtpy ja' pøn tigati t'ixaapy; uk ku pøn kyajpxwidit kyugajpxi, øy muum yik'awajtsxyipts ja tøjk'aaw ja øy pøn.

9 '¿Ti wan meets ja ndejin winaagin pøn y'u'nk y'una'jk tmøøpy tsaa ku ja t'amidøý tsapkaaky? 10 ¿Uk tmø'øy tsaa'n ku ja t'amidøý ajkx tsaa'y? 11 Øyts mee mabaat mjagatyimy'øyjaa'y'atti, mjaajtípts ku xmo'odit m'u'nk m'una'jk midí øy tsuj pidsømp, jtits Dios tyungip pø tsajpjtøpyxi ja', myo'opts ja' ja øy'ajtin ja tsuj'ajtin pøni pøn ja amido'oxiyip!

12 'Jade'en idø'øn xun'ettit, meets idø'øn ja mmigu'uk mwindsø'øgip sam meets ja kø'øm xjatsøky ja nawyindsø'øgi; kumi yo' idø'øn ja Moisés kyutujk ñi'ane'empy, jøts nayide'en wya'añ ja kugajpxtyøjk ja ñøktyi.

Ja mutsk tøjk'aaw

13 'Jap idø'øn mdøkidit ma ja tøjk'aaw kadanaxyim midí mutsk midí xu'uts. Møj ñidøjk'aaw ja', mõj ñiduu' ja' midí nøjkxp jap ayodaajkjøtpy manim idø'øn tuki'yi wyindigøøgyixy, may ja' pøn jap tøjkidip; 14 jøts ja tøjk'aaw, jøts ja tuu' midí nøjkxp jap ma tsinaa'yin xemikøjxp nbaajtindit, mutsk ja' xu'uts ja', niwaana ja iidyi pøn idø'øn ja tøjkidip.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

15 'Øyim mnay'ejx'etidit, øyim x'ejxtit ja jaa'y pøn win'øø'ndip, ñadyijiywa'andi jøts ku Dios yja' ja tkajpxidi. Ñadyijiy ja mninijkyidi amyujy tsaachuyjy, ja' y'aaawidip yjojtídid ja kubety'ajtin, ja' wyinmaa'ñ'ajttip ja kya'øybi. 16 Ja' meets ja mda'ejxkap pøni ti jaty tyundip, pøni sa jaty y'adø'øtsti; ka'axi uvi tsaa'm yikwiduky jam kujp kipkyøjxp, ni iigi tsaa'm kyawinaky jam kujp'aagyipkyøjxp. 17 Paty idø'øn ja kipy midí øy, pøni øgyipy ja', nayide'ents tyøøm ja øy tyikpidsimy; midí'its ka'øy, nayide'ents tyøøm ja tyikwingaxi'iky ka'øy. 18 Ka'ap ja øgyipy tyøøm tyikwimbidsimy ka'øy, ni ja ka'øgyipy ka' tyøøm tyikwingaxø'økmi janch øy. 19 Ja kipy midí jaty ja tyøøm ka'øy, jøts kumi nayide'en idø'øn ja kipy kya'øyi, yikpootp ja' jøts ja ñitø'øty jap jønjøtpy. 20 Jade'en meets idø'øn ja jaa'y x'ejxkapt, ja' ja tnigajpxp pøni ti jaty tyundip pøni sa jaty y'adø'øtsti.

Ku ka'ap pøn nugo ajawí tyøkit ma Dios ja kyutujk ja naxwii'ñit jaa'y ttanitani

21 'Pøni pøn jaty øts jade'en nugo xkajpxpatp, jøts nika'ap ja Dios Teety yja' tpaduujniyidi, ja'ats ka' tpaatti ja Dios kyutujk. 22 Ku tpaatt ja'abi tiempi, ku yja'att ja xøøw jumøjt, may øts ja jaa'y xnøjmidit: "Windsøn'ajtim, windsøn'ajtim, ja'ats øøts tø ngajpxwa'kxy mets ja mja', mets køjxp øøts ja jade'en tø nduñ ku øøts ja miku' tø ngajpxpidsimy jøts øøts jaa'y ja

ndukmajstustu, jøts ku øøts ja milagri nayide'en may'ojk tø nduñ." ²³ Kuts ja jaa'y jade'en xnøjmit, winets n'adso'ot: "Ka'axi mee mā møøt nnay'ijxy'aty, jiwa'akti ya kidi øts ya xwin'ejxti, ku meets kawine'en tø mgawindiy'aty jøts xundi ja kya'øybi."

Majtsk jøøp ja pøch kyojpk

²⁴ Pøn ø xnimadoop jøts jade'en ttuñ sa nwa'añ, jade'en idø'on ja' sam ja jaa'y midu wiyu midu tyøjk tkojpk tsaagøjxp, tum tsaq ja amuum tyuko-jpk'ajtpy. ²⁵ Kuts ja tuu myiñ, jøts ja nøgom pyidi'jky, amuum ja nøø'aaw nøøjoojt kyombejty, jøts ja poj jadi'iñi tyikpojwimbetwani ja tøj; jøts ja nigidi kyidaay, kumi tum tsaq ja jap wyinaty amuum kyojpk'ajtpy. ²⁶ Pønts ø xkamimadoop ku ka'ap jade'en ttuñ sa nwa'añ, jade'en idø'on ja' sam ja jaa'y midu tkaja'gyukip o ti, midu ja tyøjk ojts tkojy jam pu'jotp. ²⁷ Ku ja tuu ojts myiñ, jøts ja nøø'aaw nøøjoojt kyøømy, jøts ja poj jadi'iñi tyikpojwimbetwani ja tøj, ojts ja tøj kyiday. jAdsø'jkibim ja ojts yjanchkujeti!

²⁸ Ku dø'on ja nwindson'ajtim Jesús kyajpx'abajtyi'iñ jøts ja jaa'y janchñigyumaap tja'widøø ja ixpøjkin; ²⁹ pø jade'enxi ja yik'ixpikyidi sam o pøn møk'ampy kutujk tjagyepy, ka'ap ja jade'en yik'ixpikyidi sam ja kajpxwejpitøjkti.

8

Ku ja Jesús tyiktsøøjky ja jaa'y pyu'uts

¹ Ku Jesús chøø'ñ jam kojpkøjxp jøts kyidaajky, may jaa'y ja ojts pyadsøøñi. ² Xjats jaa'y ja ojts tu'uk wingon ñinijxxyi, møj pu'uts pa'am ja pøjkip, ja'ats idø'on jam ojts ñagyuxendya'agyi jam nwindson'ajtim Jesús wyingujkp, jøts ja tnimaay:

—Teety, mmøøt'ajtpy ja møk'ajtin jøts xyiktso'okt, yiktsokts øts mdsoj'ajtingøjxp.

³ Xjats ja ojts ja'ayi tkønixajy, yide'en ja tnimaay:

—Ndsøky'ajtpy øts jøts mdso'okt. Tsokni.

Ja'ayi ja jade'en wyaañ, jøts ja pu'uts pøjkibi jatyi ñajxy ja pya'am, jatyi tyaagyijxy ja pyu'uts. ⁴ Jøts nwindson'ajtim ja ojts ñii'mxyi:

—Øyim x'ext, kidi pøn xukmadøy; øy ja'ayi xninøjkt ja teety ja', ja'ayi m'atspaatp jøts ja myøxy ja'ayi xpikta'akt midu ja Moisés ojts tni'ane'emy, jøts ja jaa'y t'ejxtit jøts ku tø mdsø'øky.

Ku ja Jesús tyiktsøøjky ja romanit soldadi tyumbi

⁵ Xjats ku ja Jesús kyajptøjkiy'iñ mā ja kajp jam txøøwi Capernaum, jamts ja tu'uk ñimejni ja romanit jaa'y midu wyinaty tniwindsøn'ajtp nidukpiky ja soldadidi, ja'ats ja møk'ampy nimaajyøø, ⁶ yide'en ja wyaañ:

—Teety, ixajp øts tu'uk ndumbi pa'am timgo'kni ndøjkjøtpy, jadi'iñi tø myujkni xyujxni, yjanchkupijky idø'on ja jam ja jajy tøøyi.

⁷ Winets ja nwindson'ajtim Jesús ja tnimaay:

—Øy øts ja n'atsyiktso'okt.

⁸ Jøts ja jaa'y yide'en y'adsowimbijty midu idø'on twindsøn'ajtp nidukpiky ja soldadidi:

—Teety, ka'ap ø xpaat'aty jøts mets mdøkit ndøjkjøtpy; ana'am ja'ayi jøts cho'okt øts ja ndumbi. ⁹ Nayide'en øts ane'emy n'ity, nay jats øts ndumbimi midu ø n'ana'amp. Ku øts nidu'ugin nnøjmidu, nøjxk, nøjkpts ja jaty; uk nnøjmits øts jadu'uk jøts mye'ent, mempts ja jaty; uk nduktunwa'añ øts ja

ndumbi øy ti pøn øts jadi'iñi ñiyiktumpy ndøjkjotpy, tyumptš ja' pøni sã øts ja n'ane'emy.

¹⁰ Xjats ku Jesús ja jade'en tmadøø, ñigyumaap ja tja'wiyii'ñ, jøts ja tnimaay pøn jaty ja jam wyinaty payø'øiyiip:

—Janch øts idø'øn nwa'añ, ni Israelit jaa'y øts ya ma jade'en ngapaadynim sam ya 'at jaa'y tmøødin ja janchja'win møk'ampy. ¹¹ Øts idø'øn wamp jøts ku may nayjade'embi jaa'y øy madsoo choondit, jøts møøt jujky'ajtpi y'ixa'aktit ja Abraham, ja Isaac jøts ja Jacob; yik'ejxti jap ma Dios kyutujk ttanitani ja yjaa'y; ¹² jøts pøn japaat'ajtidip jøts ja yjap'attit ma Dios kyutujk ttanitani ja yjaa'y, yikajxpidsø'ømdipts ja jap jøts ñøjkxtit ma kube'ets kugoots, jøts ja jap chabaawidettit y'amdøtskaattit chaachtøtskaattit.

¹³ Jøts idø'øn ja nwindson'ajtim Jesús tnimaay ja jaa'y midi tnwindson'ajtp tukpiky ja soldadidi:

—Nøjkxni mdøjkwindum, jøts sã tø xjanchjaw i yiktu'umpts ja jade'en. Jøts ja tumbi nay jatyi myøkpiky.

Ku ja Jesús tyiktsøøjky ja Pedro tyaaqmøjt

¹⁴ Winets ja Jesús ojts ñijxy Pedro tyøjkwindum, jøts ja jam ojts tpaajti ja tyaaqmøjt, jøts kudam ja møk jømba'am ja jam tmigo'kni. ¹⁵ Ojts ja tñixaji kyø'køjxp, jøts jømba'am ja ojts jatyi ñiwa'açhiyi; ojts ja jatyi wya'kuki jøts ja nay jatyi wyindsø'jkidyøjkiyidøø.

Ku ja Jesús tyiktsøøjky ja maabyamaay

¹⁶ Xjats ku kyoodsiyii'ñ, jøts ja nwindson'ajtim Jesús may'ampy ja jaa'y yiktanimiñi midi ja miku' wyinaty tø tyatøkiyidi; jøts ja ojts ja'ayi tuk'aawyi tmigajpxy, ja'ayts ja tyuktapidsøøm ja maamyiku' jøts ja tyikmøkpxøkiyx niduki'iyi ja pamaa'y. ¹⁷ Jade'en'ampy idø'øn ja jade'en yjajty, jøts idø'øn ja jade'en tyimyjaty sã wyinaty tø tmigajpxy ja kugajpxy Isaias, ku ja yide'en wyaañ: “Ja' tuki'iyi tmidanaagyøjxp adøøm n'ayo'on, nay ja' tmidanaapy adøøm ja nbøjkin n'aa'nin.”

Ja jaa'y midi wyinaty tpawidewamp ja Jesús

¹⁸ Xjats ku ja nwindson'ajtim Jesús ojts t'ixy ku mayjaa'y ja yjanchtamujkniyi, winets ja ojts wya'añ jøts ttanaxtit ja nøø jøts ñøjkxtit jam jaduktamañ. ¹⁹ Winets tu'uk ja kajpxwejpi myiñ ma ja Jesús jam wyinaty, jøts ja Jesús ojts yiknøjmi:

—Windsøn, tsoomp øts, nbanøjkxp mets øy madsoo pøni ma me mnijxy.

²⁰ Jøts ja nwindson'ajtim Jesús y'adsøø, yide'en ja wyaañ:

—Ne'egi jaa ja waajx yjut, ne'egi jaa ja joon pya'an; øtsts, niti ø xka'ejtxi øyik øts idø'øn ma n'øøni'int.

²¹ Xjats ja jaa'y jadu'uk wya'ni midi ja wyinaty pyabøjkpi'ajtpy, yide'en ja ñimaajyøø:

—Windsøn'ajtim, tñijxy øts jawyeen ja ndeety t'atsyiknaxøki.

²² Winets ja Jesús y'adsøø jøts ja wyaañ:

—Møødik øts, majtstu'ut yø oo'kpi, wan ja tyikpidø'økti ja myi'oo'kpi pøn y'anmija'win jajuky; tø tyik'oo'knidi.

Ku ja Jesús tyiknajxy ja møk poj jøts ku ja tyik'amøkiyi'ñ ja mejy

²³ Jøts ja nwindson'ajtim Jesús tyøjkiñaã jam barkijotp møøt ja pyabøjkpitøjk. ²⁴ Winets ja poj møk'ampy yjantymyñi jam mejyotp, jadi'iñi ja nøø yjanchtojmjø'kni jøts jap barkijøtpy yjanch'ayø'oyini. Maapts ja nwindson'ajtim Jesús wyinaty. ²⁵ Winets pyabøjkpitøjk ja ojts yuxyiyi, yide'en ja ojts ñi'mxyiyi:

—iWindsøn'ajtim, ejx øø nnøøjøø'kxni, yiknitsok øøts! iPø
nøðjkiy'adøjtsnampts!

²⁶ Jøts ja t'adsøøy yide'en:

—¿Ti mdsø'jkidip ku mdsø'øgidi? iJanch yii'nim meets ja janchja'win
xmøøt'aty!

Xjats ja tyanaagyukiyii'ñ, jøts ja ojts tnøjmi ja poj jøts wan tnaxy jøts ja mejy
kya'uk'adøtsnit; jøts idø'on ja jadi'iñi myøøñ, nayide'en jotkujk'atyim tyaañ
sam idø'on ku ja et kyapøjy. ²⁷ Jøts ñigyumaap ja tyimya'widøø, nømdip ja':

—¿Ti pøn jaa'y yø jade'en, mimadoojipaät poj yø', mimadoojipaät mejy yø'?

Ja Gadarit jaa'y pøn wyinaty ja miku' tø tyatøkiyi

²⁸ Xjats ku ja nwindsøn'ajtim Jesús yja'ljty jaduktamajñ mejy'agø'øm, jamts
ñaxwimbidsømdøø Gadara y'etjotpti, winets jaa'y namajtsk pyidsømdøø jam
kamisantijotp ma oo'kpi ñaxøkidi, jøts ja ojts tñimendi ja nwindsøn'ajtim
Jesús. Miku' ja wyinaty tø tyatøkiyidi tum jade'en ja namajtskti, janch
tyimgyubetyts idø'on ja'adi, ka'ap idø'on ja jam øy pøn tkunaxi jam tuu'am.

²⁹ Jøts ja yjanchabaabinaxwa'aktøø:

—¿Ti øø xanibøjkip, ti tsepxik adøm njageyepjyim, mets Jesús, mets Dios
U'nk? ¿Ja' mets ya tø xnimiñ jøts øøts ixyamyi xtyimyik'ayo'ombaatwangøjy?

³⁰ Nay jamyits idø'on wingon wyinaty y'ojkwidajtmidi maagyuch; ³¹ winets
ja miku' nuu'kxaajkingøjxp t'amidoodøø ja Jesús, yide'en ja tnimaadyøø:

—Pøni xyikpidsømwamp øøts, wants øøts yø' kuch ttatøki.

³² Xjats ja Jesús wyaañ, yide'en ja tnimaay:

—Nøjkxti.

Jøts idø'on ja miku' jade'en pyidsømdøø, ojts tmajtstu'tutti ja jaa'y jøts ja
maagyuch ja ttøjkidyøø; winets ja kuch niduki'iyi yjanchnabyagunajxidøø
jap jaa'jotpy jøts ñaxkidaktøø jap nøøjotpy, japts ja ñøøjøø'kxkøjxtøø.

³³ Jøts ja jaa'y midu wyinaty kuch'ejxtip, ojts ja kya'akti, janch tsø'jkidip ja',
jøts ku ja jam kajpjotp yja'ttøø, jamts ja tuki'iyi tñimadyakøjxtøø sa wyinaty
ja jaa'y tø yjatti kyubatti pøn ja miku' wyinaty tø y'uktatøkiyidi. ³⁴ Winets ja
jaa'y niduki'iyi cho'ondøø pøn jaty jam wyinaty kajpjotpti, jøts ja ojts ñøjkxti
ma ja Jesús jam wyinaty; kuuyits ja ojts t'ejxti, jøts ja tnimaadyøø møk'ampy
jøts ja jam tymbyidsøømt ja' y'etjotpti.

9

Ku ja Jesús tyiktsøøjky ja køxujxp pakxujxp

¹ Xjats ja Jesús tyøjkiyii'ñ barkijotp, jøts ja ojts ñijkxy jam jaduktamajñ,
ojts ja ñøønaxy jøts ja yja'ljty kyajpkøjxp. ² Jamts jaa'y ja ojts tu'uk yik-
taninijxxy midu køxujxp pakxujxp, ki'iy ja jam ojts tyiknøjkxti. Jøts ku dø'on
ja nwindsøn'ajtim Jesús ojts jade'en t'ixy ja jaa'y jøts kudam ja møk'ampy ja
janchja'win tjanchmøødidi, jøts ja pamaa'y ja tnimaay:

—Kidi u'nk nugo mdyimyjotmay'øøky; nbøjkpimee'kxpy mets.

³ Winets winaagin ja kajpxwejpitøjk wyinmaadyøø jøts ja wyandøø: “Dios
yø jade'en kya'ømyigajpxpy, pø nugo jaa'lyxi yø'.” ⁴ Jøts kumi wa'ats ja
nwindsøn'ajtim Jesús ja tñijawi sa jaty ja wyinmaydi, jøts ja tnimaay:

—¿Tigøjxp ku jade'en ka'øwynmaa'ñ xjagyapti? ⁵ ¿Ja ti ne'egi jawaani
jajnti, kuts yø pa'amjaa'y nnøjmit: “Nmee'kxpy øts yø mbøky”, uk ku nnøjmit:
“Wa'kuki, pøkmukni yø mmaabajt jøts nøjkxni mdigam”? ⁶ Ixyannim meets
inet x'uk'ext mabaät øts idø'on ja møk'ajtin nmøøt'aty ya naxwiñ jøts ø
nmaa'kxt ja pøky.

Xjats ja tnimaay ja koxujxpi pakxujxpi:

—Pidø'kni wə'kukiñi, wejtsjø'øk yø mmaabajt jøts mnøjkxnit mdigam.

7 Winets ja pamaa'y jatyi wya'kukiyiñ jøts ja ojts ñijxxy jam tyøjkwindum.

8 Kuts ja mayjaa'y ja ojts jade'en t'ejxti, xjats ja yjanchø'jkiñidi, winets ja tja'myajtsti ja Dios jøts ja tmøja'widøø tkunuu'kxyja'widøø, ja'agøjx ku ja jade'en t'ejxti jøts kudam ja Dios Teety myø'ajtin tmøøt'ajtti, pø ñiñugo jaa'xyi ja ttejti.

Ku ja Jesús tpawaay ja Mateo

9 Xjats ja nwindson'ajtim Jesús jam ojts chøøñ, jøts ja ojts t'ejxpaaty tu'uk ja jaa'y pøn txøow'ajtp Mateo, jam ja wyinaty chøøni ma ja yikugubajtpi y'ixa'akti, jøts idø'on ja tnimaay:

—Mada'ak, møøt widetk øts.

Winets ja Mateo tyanaagyukiyiñ, jøts ja ojts pyadsøøñiyi.

10 Ku wyinaty ja nwindson'ajtim Jesús jam kyay Mateo tyøjkjotp, winets ja mayjaa'y jam mendøø pøn yikugubajtip, møøt ja'adi pøn ka'øy jaa'y yiktejtíp. Ja'ats idø'on ojts yjam'atti, jøts ja tmøøt'ixaktøø jam kaadyaajk windum møøt ja Jesús jøts ja pyabøjkpitøjkti. 11 Ja'ayi ja fariseotøjk ja ojts jade'en t'ejxti, xjats ja nwindson'ajtim Jesús pyabøjkpitøjk yik'amidoodøø:

—¿Tigøjxp ku yø mwindsøn tmøøtkay yø yikugubajtpitøjkti møøt yø kawindiyjaa'dyi?

12 Ojts ja nwindson'ajtim Jesús ja tmadøy, xjats ja kø'øm tnimaay ja fariseotøjk:

—Pøn møk pøn kasajajtip, ¿ti ja tyikwa'andit ja tsøøyibi? Ja' ja ttojktíp pøn pøjkidíp. 13 Kidi ja'ajip ø tø nnimiñ pøn øy pøn wa'atsti, ja' ø tø nnimiñ pøn pøkyundíp jøts ja chinaa'yin tyiktigatstít. Nøjkxti jiwa'akti, pamaadyi padajti pøni ti dø'on tyijpy ya'at Dios kyajpxy: “Ja' ø ndsøjkpy jøts xmøøt'attit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaä midí jaty myojxtíp.”

Ku ja Jesús yiktibyijky tigøjxp ku ja kya'ayuu'atti

14 Winets ja Juan Bautista tyumbi myendøø ma ja nwindson'ajtim Jesús jam wyinaty, jøts ja ojts tyiktøwdi, yide'en ja tnimaadyøø:

—¿Tigøjxp ku øø n'amaay'aty møøt ja fariseotøjkti, ngakay nga'uuky øøts jøts mets yø mbabøjkpitøjk jaayi yjanchkaydi yjanchjøø'kxti, ñiwine'en kya'amaay'atti?

15 Xjats ja nwindson'ajtim Jesús y'adsøøy jøts ja tnimaay:

—¿Ma meets jade'en tø x'uknijawi jøts ku tø'øxñigaabyi tø'øxñi'ukpi winet y'amaay'atti winet kyakaydi kya'uukti ku ja jemyaa'y jamni? Abikñimts ja tiempí tyimya'tmit ku ja jemyaa'y wyinaty kya'uk'ejtni ku ja jam wyinaty tø cho'oni, jaanimts idø'on tiy pøn kya'ukaañit kya'uk'uknit; jaaním idø'on ja y'amaay'attit.

16 'Ka'axi pøn wyetpach tta'agiyi jemwyet midí tyimjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'. 17 Jøts nayide'en ka' y'øyi jøts yikpikta'akt ja vino jap po'dukjotpy midí ñami'kxñim; ku ja jade'en ndu'unint, takøø'tsipts ja po' jøts jade'en nugo wyindigøy, windigøøpy ja po' jøts nayide'en ja vino. Paty ja vino midí ñami'kxñim nda'ada'amyin ja jembyo'ak jøts jade'en nimidi kyawindigø'øty.

Ja Jairo ñøøx, jøts ja tø'øxyøjk pøn ja Jesús ja wyet ojts ttojni

18 Exam idø'on ja nwindson'ajtim Jesús jade'en wyinaty wya'añ, ku yja'jty tu'uk ja windsøn pøn tnigubajk'ajtip ja israelit jaa'y, jøts ja ojts ñagyuxendya'agyiyi ja' wyingujkp, jøts ja ñimaajyøø:

—Tø øts nnøøxu'nk y'øøky tyimy'ixanim; kudsik mets inet ja'ayi mme'ent jøts waani xkønixajt, jujkpyøjpk inet ja jadigojk.

19 Xjats ja nwindson'ajtim Jesús wya'kukiyii'ñ jøts ja ojts tmøødi ja jaa'y møøt ja pyabøjkpitøjk. 20 Winets tu'uk ja tø'øxyøjk myii'ñ jam nwindson'ajtim Jesús yjixkø'øm jøts wyet pa' ja ojts yiktøñ. Myakmajtsk jumøjtíp idø'on ja wyinaty tø pyaajtniyi ja taxnaxyi jøts ja jadine'en tmi'ity; 21 jøts kumi yide'en idø'on ja wyinnmay: “Ja'ayik øts ja wyet inet yø ndojnit jøts øts inet ndso'okt.” 22 Jøts ja nwindson'ajtim Jesús ojts wya'kjimbity, ojts ja tyimy'ixy ja tø'øxyøjk jøts ja tnimaay:

—Kidi u'nk mdsø'øgi; ja'agøjxp tø mdsø'øky ku ø tø xjanchjawi.

Jøts idø'on ja nay jatyi myøkpjiky.

23 Kuts ja nwindson'ajtim Jesús yja'jty jam israelit windsøn tyøjkwindum, jøts ojts t'ixy ku ja xuxpi ixapnidi, ja oo'kpi ja yikpidø'økwandip, jøts ja mayjaa'y xem yam yjanchya'axti, 24 xjats ja tnimaay:

—Pidsømdi; ka'ap yø kiixyu'nk y'øøgyi, maap yø ja'ayi.

Jøts ja yjanchyiknixijkxy ku dø'on ja jade'en wyaañ. 25 Kuts ja tyikpidsømgijxy ja mayjaa'y, winets ja tyøjkiyii'ñ jøts ja ojts kyø'køjxp tmach ja kiixyu'nk, jøts ja nay jatyi pyidi'jky. 26 Jøts idø'on ja jam jade'en øy ma yiknija'wiyii'ñ ja kajpxy ja ayuujk midi wyinaty tø tyuñi.

Ku ja Jesús tyikwin'ejxwa'kxy ja winap jaa'y

27 Kuts ja nwindson'ajtim Jesús jam chøø'ñ, winets ja winap jaa'y namajtsk tuu'ajy pyadso'oniyi, møk ja yjanchnømdi:

—iRey David me m'ap'ajtip, ayo'ejxk øøts!

28 Kuts ja Jesús tyøjkiyii'ñ jap tøjkjøtpy, winets ja namajtskpi winap jaa'y ñimejni, xjats ja tnimaay jøts ja ttiiby'jky:

—¿Mwāndip idø'on amumjoojt jøts ku øts yø yjade'embí xma'aty?

Jøts ja ñømðøø:

—Windsøn'ajtim, wamp øøts idø'on jade'en.

29 Winets ja nwindson'ajtim Jesús ja mimøj twingudo'oniyii'ñ, yide'en ja tnimaay:

—Wan idø'on jade'en tjaty pøni mabaat mee nayide'en ja mjanchja'win xmøø'taty.

30 Jøts wyeen ja øy tyandøø, ojts ja wyin'ejxpøkti. Jøts ja nwindson'ajtim Jesús ja møkta'aky tnimaay:

—Øyim mnay'ejxidit jøts kidi pøn xuknijawidi.

31 Jøts ja'ayi ja jap ñibyidsømdøø, ojts ja tnimadyakøxti sa nwindson'ajtim Jesús ja wyinaty tø yikmøkpikyidi, ojts ja tnimadya'akti øy madsoo wine'enin ja et jam.

Ku ja Jesús tyikajpxpiky ja uum jaa'y

32 Kuts ja jam wyinaty wya'kpidsømdi, winets winaagin ja jaa'y ttanimendi ja nwindson'ajtim Jesús tu'uk uum jaa'y, miku' idø'on ja wyinaty mi'ejtiiyip, ja'ats ja ka'ukyikajpxniyip. 33 Ja'ayits ja nwindson'ajtim Jesús tyikpidsiimy ja miku', jøts ja uum jaa'y jatyi jadigojk y'awiiy. Jøts idø'on ja mayjaa'y ñigyumaap yjajtøø, yide'en ja wyandøø:

—Ka'aním yā Israel pøn jade'en t'ijxñim sam ixyam yik'ijxyin.

34 Ja fariseotøjkti yide'en ja wyamidi:

—Jade'en'ampy yø jaa'y tyikpidsimy yø miku' ku yø nayi' wyindsøn myøk'ajtin tyiktuujniyi.

Ku ja Jesús t'ayo'ijxy ja mayjaa'y

³⁵ Widejtp idø'øn ja nwindšøn'ajtim Jesús øy mađsoo wan tkamjotpi wan tkajpjotpi, jøts ja yik'ixpiky ma jaty ja tpaaty ja tsaptøjk kajp kajp. Ja Dios y'øgyajpxy y'ømyadya'aky ja kyajpxwa'kxip sa ttanitanit ja yjaa'y, jøts ja tyiknaxy øy ti pa'am, øy ti pøjkin aa'nin. ³⁶ Ku ja ojts t'ixy ja mayjaa'y, jøts ja ojts t'ayo'ixy ku ja tsaach'ijxyimdi, janchjotmay'oo'ktip ja', nugo ja jadi'iñi myondi tyukti, jade'en ja yjawi yjajtnidi sam borreek ñi'ejxpi kya'ejtxiyidi.

³⁷ Xjats ja tñimaay ja pyabøjkpitøjk:

—Janch øts idø'øn nwa'añ, ku ja jaa'y may pøn tñijawiwyaandip ja Dios yja', jats ka'ejtíp pøn ttukmadowidip. ³⁸ Paty x'amido'odit ja Dios Teety jøts ja tyumbi ttanigaxt ja'abi jaa'y.

10

Ku ja Jesús twiwijch ñimakmajtsk pøn wyinaty kyudanaaby'atwampy

¹ Xjats ja nwindšøn'ajtim Jesús tyaxmujky ja pyabøjkpitøjk midí ñimakmajtskti, jøts myøk'ajtin ja ojts tmø'øy, ja'ats ja ttuktabidsø'ømdit ja miku' jøts ja tyikmøk'pøktit pøn øy tigati pa'am pøjkidip.

² Yide'en idø'øn ja ñimakmajtskpi pabøjkpitøjk ja xyøøwdi: tu'uk Simón txøøwi, nayi yiktejp ja Pedro, jøts ja y'uch txøøwi Andrés; Jacobo møøt ja' y'uchmi midí txøøw'ajtp Juan, ja Zebedeo y'una'jk; ³ Felipe, Bartolomé, Tomás, jøts Mateo ja yikugubajtpi; jøts ja Alfeo myajnk pøn txøøw'ajtp Jacobo; jøts Lebeo pøn nayi yiktejp Tadeo; ⁴ jøts jadu'uk Simón cananista; jøts ja Judas Iscariote pøn tñankmyajtsip ja nwindšøn'ajtim Jesús.

Ku ja Jesús tkexy ja pyabøjkpitøjk kajpxwa'kxpi

⁵ Yide'en ja nwindšøn'ajtim Jesús t'ane'emy ja ñimakmajtskpi pabøjkpitøjk ku ja ojts tkajxtsø'ñ:

—Kidi jam etjotp mnøjkxti ma chøønidi pøn ka'israelit jaa'dyi, ka'abaat mnøjkxtit ma jaty ja kajp jam Samaria; ⁶ ja'ayi mee mninøjkxp midí ya Israelit na'xjøøjty, ja' idø'øn ejtnidip sam ja borreek tyigøydi. ⁷ Nøjkx xkajpxwa'kxiti jøts ku Dios kyutujk wyingøñ midí ja tyanitanaapy yjaa'y. ⁸ Yiktso'okti pøn pøjkip ja møk pu'uts pa'am, jøts pøn tigati jajtidip, yikjujkyøkti ja oo'kpidi, jøts kajpxpidsømdí ja miku' jøts tñajtsu'utt ja jaa'y. Meets idø'øn yø yjade'embí møk'ajtin tø mñiyikmø'øy; nayide'ents xyiktunkpaattit sam tø myikmo'odi.

⁹ Kidi ti meen xkondi, ni oori, ni plati, ni cobre, ¹⁰ ni pejnbaat xkawetstit. Mnimdajk ñiti xkako'ondit, tu'ugyi mwet xminøjkxtit midí ixja mwet'ajttip; tñibiñi mnøjkxti, mgaabya'atp meets.

¹¹ Ku øy ma mja'attit wan tkamjotpi wan tkajpjotpi, jamts x'ixa'adit tu'uk ja jaa'y midí ñijawi, midí tsojpk ja Dios yja', ja' tyøjkjotp mja'da'aktit kunim mdsøondit jam kajpjotp, winetnimts jam mbidsø'ømdit. ¹² Ku mdøkidit tøjkjøtpy, kajpxpoo'kxiti ja jaa'y. ¹³ Pøni m'adsojidip ja jaa'y, øy'ajtp; kuts ja ka' t'adsojimbity, majtsu'tuttits ja'. ¹⁴ Jøts ku pøn mgagupøkidit, uk ka' paat tmadowa'andi pøni sa me mjawa'añ, pidsømdits jam ja'abi tøjkjotp uk ja'abi kajp. Winapti ja pu'ux midí jam mdekyøjxp, jøts jade'eñi xuk'ejxtit jøts ku jade'eñi tø mñañiwa'a'chidi. ¹⁵ Øts idø'øn wamp ku wyinaty yja'aty ja tiidyu'unin, ne'egi kajaa yø yjade'embí jaa'y ja ayo'on tyimbya'attit, jøts nigidi

jade'en y'ayo'ombaattit ne'egi ja kawindiy jaa'dyi pøn jam tsinaadyøø jam Sodoma jøts jam Gomorra.

Ku ja yiknigajpxy jøts ku ja pabøjkpitøjk yikmatsw'a'andit

¹⁶ 'Øyim xmodo'odit jøts xnijawidit jøts ku meets jam nguexy ma ka'ap nugo ajaw'i øy pøn tyøki! Mjadyimñay'ejx'etidip, yikxonim mnañiwijy'atidit, kidi øy ti xtsepøkti, yujy kø'øm mnabyikta'agidit. ¹⁷ Øyim x'ejxtit, øyxi dø'øn jaa'y mgøyakidit ma kudunktøjk jamdi, jøts myikwinwoptit myikjøpwoptit jam tsaptøjkjotp. ¹⁸ Myiknøjkxi paat meets ja jaa'y jam ma jaty ja møj windsøn yikutukti, ja'agøjxp ku øts nja' xpabøjkidi; jats idø'øn ja ñibidsømit jøts meets ja kukmado'ot pøni sa øts idø'øn ja n'ixpøjkin, ja'abaat meets xukmado'odit pøn ka'israelit jaa'dyi. ¹⁹ Kuts myikøyaktit jam kudunk wyindumdi, kidi xkumayjawidi, kidi meets ja xpamaañi xpadajni pøni ti dø'øn jam mgajpxtip, uk pøni sa dø'øn jam mwa'andit; ja'ayi ja y'ukja'att pøni juuni dø'øn mgajpxtip, nagyø'ømts Dios mmo'o'jidit ja ayuujk pøni sa dø'øn mwa'andit. ²⁰ Kidi meedsipxi ja mmiwinmaa'nbyaap ku mee mgajpxt, pø ja Dios Teetyxi y'Espiritu Santo myikajpxidip.

²¹ 'Jade'en nøjx jaty kyubety pøni pøn øts nja' wyinaty xkupøjkijip, jøts ja myigu'uk paat ja tyamidsepøkit jøts ja tñankyik'oogit, jøts ja u'nkteety jøts ja u'nktaak nayide'en ttumidit ja y'una'jk nay ja'agøjxp ku øts nja' janchpabøjkidi nidu'ugin; jøts ja u'nk una'jk nayide'ents ttumidit ja tyeety tyaak, tyik'ookit paat ja'adi. ²² May jaa'y mee mmi'akiyip mmijotma'adiyip ja'agøjxp ku meets nja' xpabøjkijiy; pønts tmidanaapy øy wine'en paat, ja yjade'embj jaa'yts idø'øn nitso'ok'atp. ²³ Ku myiktabawidetit ja kipy ja tsaa, kaknøjxtits ma kajp jam jadu'uk; øts idø'øn wamp, jøts ku øts wyinaty jawyeen tø nmeni yammim meets ja kajp xka'ayø'ø'y'abidsømdi midit jaty ja israelit jaa'y kyajp'ajtip.

²⁴ 'Ka' pøn ixpøjkpi tjaaktyimyjinaxy ja mya'estri, jøts ni ja tumbi tkajinaxy ja wyindsøn. ²⁵ Tyajotkujk'attip idø'øn ja ixpøjkpi, janch møj idø'øn ja wyinaty ku yja'attit jade'en sam ja mya'estri, jøts ja tumbi sam ja wyindsøn. Pøni miku'dam ø nyiktijy ku mee nniwindsøn'aty, ÷tits meets mdsow, ti meets jade'en mjaakayiktejp?

Ja' midi yiktsø'øgip

²⁶ 'Paty ka' pøn xtsø'øgidit. Ka'axi ti kyanigaxi'iky øy pøn ti tjadyimy'ama'atsk'aty, ka'ats ja kyayiknijaw'i øy pøn ti tjadyimyjayu'uch'ity. ²⁷ Pøni ti mee nda'agajpxip, tukmadowdits meets ja jaa'y ja'; nigajpxtits ja yikxon pøni ma x'a'ejxidi myikmadowdi ømyadsowi. ²⁸ Kidi yikjaa'y'oo'kpi xtsø'øgidi, pø ka'axi anmija'win ja tjadyimiyik'ookti; ja Dios ja' idø'øn tiy ne'egi mdsø'øgidi, pø ja'axi møk'ajtin tjagyajp jøts ja jaa'y tyikwindigøy møøt ja y'anmija'win jap ayodaajkjøtpy.

²⁹ 'O dø'øn ja joon mabaat kyidyimchobaaty, nayide'en idø'øn ja Dios Teety ja t'ejx'ity. Ni tu'ugin ja kyawindigøy pøni ka'ap ja kø'øm tyikutuky. ³⁰ Tu'uk tu'uk meets mwaay machøy y'ity. ³¹ Kidi mdsø'øgidi, ne'egi jawaani jinaxy mee mnibayø'øyi, ÷ti ti meets mdsow, ti sa ja mayjoon chobaaty?

Pøn tmøjpiktaktip ja Jesucristo jam mayjaa'y agujk

³² 'Pøn jaty ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nnitanit jam Dios Teety wyingujk pøn jap tsajpjøtpy. ³³ Pønts ø xkabukajpxip, pøn wamp mayjaa'yjøøjty jøts ku øts ja ka' xpabiky,

nayide'ents øts ja niwine'enin nga'ejxjimbett, niwine'enin nganitanit jam Dios Teety wyingujkp.

Jesús køjxp ja jaa'y ñawya'kxyidi

³⁴ 'Kidi mee mwani jøts ku øts jaa'y kuwani xtyimyjatytajotkujk'attit, pø may idø'on ja nøjxk kyanachokidit øts køjxp. ³⁵ Jade'en ja tpaatni jøts jaa'y ja y'u'nk y'una'jk y'ukmidsepøjkniyit, ja u'nk ja xa'kxy ja u'nk ja nøø ñamyatsidit; ³⁶ tukmigu'uk ja jade'en y'uknamyidsepøjkniyidit.

³⁷ 'Pøn tyeety tyaak jawaani tyikmøjtøjkip sam ø ka'ap xmøjpikta'agyiin, ka'ap øts ja mibaat nja'aty; jøts nayide'en pøn y'u'nk y'una'jk jawaani tyikmøjtøjkip jøts nigidi ka'ap øts, nayide'en øts ja ka'ap mibaat nja'biky; ³⁸ jøts pøn ø xkagu'ayo'ombaadiwyamp ku jaa'y yik'ookwa'anit, jøts øts ja nja' jade'en xkatunwajni, ka'ats øts ja mibaat nja'bøkt. ³⁹ Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtin tpaaty; pønts kanabya'ayojip wan tjaty sa yjaty øts køjxp, ja'ats idø'on tpaatp ja nitso'ok'ajtin.

Ja may'ajt

⁴⁰ 'Ja jaa'y pøni pøn mgupøjkidip, øts idø'on ja wyinaty jade'en xkupøjktip; jøts pøn øts jade'en xkupøjkp, ja'ats ja nayide'en kyupiikpy pøn ø xkajxp. ⁴¹ Pøni pøn tkajpxkyupøjkp ja Dios kyugajpxy, jøts kumi Dios ja kajxip, nayide'en ja jaa'y yikmay'att sam ja Dios kyugajpxy yikmay'atyin; jøts pøn tkajpxkyupøjkp ja øyjaa'y ja'agøjxp ku y'øyjaa'y'aty, nayide'en ja yikmay'att sam ja øyjaa'y yikmay'atyin. ⁴² Jøts pøn ø xmøøjyip ja n'u'nk n'una'jk øy tukvasin ja tsujxk nøø jøts kumi øts ja nja'ajtpy, jøts janch øts idø'on nwa'añ ja ja nayide'en yikmay'att.

11

Ja jaa'dyi pøn ja Juan Bautista ojts tkexy

¹ Xjats ku nwindson'ajtim Jesús tta'ana'am'abajtiyii'ñ ja nimakmajtskpi pabøjkpitøjk, winets ja ojts chøøñ, jøts ja ñijxxy yik'ixpøjkpi kajpxwa'kxpi ma jaty ja kajp jam ja'abi etjotp.

² Jøts ja Juan Bautista, ku ja jam wyinaty puxøjkjotp, jøts ja tñija'wiyii'ñ ti jaty wyinaty tyump ja Cristo ja yiknitsokpi, winets ja tkejxy namajtsk ja pyabøjkpi jøts ja t'ats'ejxtit ja nwindson'ajtim Jesús, ³ jøts ja t'atsiyktø'ødit yide'en:

—¿Mjanchjacristo mets idø'on, ja yiknitsokpi midi tijy menwamp, uk njøp'ejxp øøts idø'on jadu'ukpi?

⁴ Xjats ja nwindson'ajtim Jesús y'adsojimbijty:

—Nøjkxti jøts jade'en xukmado'odit ja Juan sa jaty ti jaty m'ejxtip mnija'widip. ⁵ Tamimadya'akti sa winap jaa'y wyin'ejxwa'kxti, sa pakma'at jaa'y yø'øyjø'økti, sa yø pu'uts øjkiabi cho'okti tuki'iyi, sa na jaa'y myadoobøkti, sa oo'kpi yjujkyøkti, jøts sa ayoo'bi jaa'y ja Dios kyajpxy yiktukmadowdi. ⁶ Nekim ja'adi pøn tu'ugyi ja janchja'win tmøøt'ajttip, ka'ap winguwopi jøpkuwopi tmijattit ku ø xjanchjawidi.

⁷ Ixanim idø'on ja wyinaty tymchoondi ja Juan Bautista yjaa'y midi ja pyabøjkpi'ajtpy, ku ja nwindson'ajtim Jesús tñimadyaktøjkiiyii'ñ ja Juan, yide'en ja tñimaay ja mayjaa'y:

—¿Ti ojts x'ejxti jam abak etjotp ku jam ojts mnøjkxti? ¿Ojts meets jam yjawi x'ixy tu'uk ja jaa'y midi jade'en jajtp sam kapy pyojimbity pyoj'adijy? Pø ka'axi, pø tu'ugyi xi ja tmi'ity ja wyinmaa'ñ. ⁸ ¿Tits idø'on ojts x'ats'ejxti?

¿Uk ojts x'ejxti tu'uk ja jaa'y midi janchweti janchnaamyi, midi janch tsuj ja wyet tɔ tyikpety? Pɔ wɑ'atsxi xnijawidi pɔn jade'en naxyojxidip jɔts ku ja jam ñachɔkyidi ma ja windsɔndɔjk jam chɔɔnidi. ⁹ ¿Tits inkwan idɔ'ɔn mjantyim'ats'ejxtɔ? ¿Tu'uk ja Dios kyugajpxy? Janch ja'ats idɔ'ɔn pɔn jawaani tjaaktyimyoj, nigidibaat ja yjadu'ukyi jade'endi. ¹⁰ Ja Juan idɔ'ɔn jade'en yiknigajpx ku wya'añ Dios kyajpxy yide'en:

Ngajxjawyenip ɔts, u'nk, ja ngugajpxy tu'uk, jɔts ja jaa'y ja wyinmaa'ñ ja tyiktɔɔjit tyiktuudaajkit, jɔts mets ja m'ixpɔjkin yikjɔp'ext.

¹¹ Tyiibyɪ ɔts idɔ'ɔn nmadya'aky, jɔts ku ka'ap jade'en pɔn myajada'akñim Dios kyugajpxy sam ja Juan Bautista; pɔni pɔnts ɔts nja' xpaduujnip jɔts ku tyɔki ma ɔts ngutujk ttanitanit ja jaa'y, ja'ats ne'egi yikmɔjpiaktip jɔts nika'ap ja Juan Bautista.

¹² Jaayip ja Dios kyutujk cheptak'okwani ku yɔ Juan Bautista myiñ jɔts ixymbaatnim kyakixy kyanaxy. Aguwani ja tjadyimy-jamimajada'akwa'andi pɔn nadya'aja'wiyidip ja yjotmɔk'ajtindi. ¹³ Pɔn ja Dios kyutujk yjawi tka'uknigajpxip, ni'ijtyi ja tñigajpxti pɔn Dios kugajpxy'ajtidip, jɔts nayide'en ja Moisés kyutujk tyikwa'añ jɔts jaabaatnim ja tɔ yikni'amɔñ ku ja Juan Bautista yam tɔ myiñ; ¹⁴ jɔts pɔni mjantyimyjanchjawiwiyandip, ja Juan idɔ'ɔn ja' pɔn yiknigajpxp jɔts ku mye'ent jadigojk ja Dios kyugajpxy midi txɔw'ajtp Elías. ¹⁵ Pɔni pɔn yikxon tñimadoop, wants tja'gyuki.

¹⁶ Jade'en meets mdami'ejxi sam ja mutskuna'jk muum y'adɔ'ɔtsti jam maayjɔp, ku ja myi'una'jk nisudso'ampy tkagupɔjkiyidi ja kyuyajtin midi ja yja' tɔsɔjkpy yjaguyatwampy, jade'en ja yiknimaadyi: ¹⁷ "Tɔ ɔɔ njaxu'uxy, ka'ats m'atswa'andi; tɔ ɔɔts ja cancion jɔtmay'ɔɔgyim nja'ɔɔmi, ni jade'ents tɔ mgaya'axti." ¹⁸ Tɔxi yɔ Juan myiñ jɔts ka' yɔ kyay jɔts ka' yɔ y'uuky, jɔts mwɔ'andi jɔts ku miku' yɔ myɔɔt'ajtpy. ¹⁹ Xjats ɔ tɔ njamemi, kaapy ukpts ɔts, jɔts mwamidi jɔts ku ɔts janchkaxim ngay n'uuky, jɔts ku ɔts ja mɔɔt nnamyayɪ pɔn yiktejtɪp jantyimbyojkpitumbijaa'dyi, jɔts nayide'en mɔɔt ja yikugubajtpitɔjkti. Pɔni pɔnts ja Dios yja' tkupɔjkip, ja'ats tja'gyukip sam ja Dios yja' tsɔkyin.

Ja kajp midi kamadoodip

²⁰ Xjats ja nwindson'ajtim Jesús ttamigajpxkijxy ja kajp ma jaty ja wyinaty tɔ ttuñ ja milagri'ajtin, ku dɔ'ɔn ja jaa'y jam ka' tyimykigtatstiniñ ja chinaa'yin. Yide'en idɔ'ɔn ja wya'añ:

²¹ —iMjanch'ayɔɔy meets, Corazingit jaa'dyi! iMjanch'ayɔɔy meets Betsaidit jaa'dyi! Ku jeexyɪp ja milagri'ajtin tyuñi jam Tiro jɔts jam Sidón midi meets ya tɔ myiktu'unxi, ku ja jeexyɪp jam yiktuujnidi ja milagri'ajtin, windi'ixyɪp ja jeexyɪp tyiktigajtsnidi ja chinaa'yindi, ku ja pyɔky jeexyɪp tyimchaachjawidi.

²² ɔtsts yam wamp jɔts ku nɔjkx ja tiɔdyu'unin ñaxy, mgu'ayowip meets ja jinaxy, nika'ap ja ne'egi jade'en y'ayo'odit pɔn tsinaadyip jam Tiro jɔts Sidón.

²³ Jɔts meets Capernaumit jaa'dyi, ¿ma mee xijy mnɔjkxti tsajpɔtpy? Pɔ jaxpi meets ayodaajkjɔtpy mnɔjkxtit. Ku jeexyɪp ja milagri'ajtin yiktuñ jam Sodoma midi meets ya tɔ myiktu'unxi, ne'egi nay jaa ja kajp jeexyɪp, ka'ap ja jeexyɪp sa yjaty. ²⁴ ɔtsts idɔ'ɔn tyimwyamp ku wyinaty ja tiɔdyu'unin ñaxy, ne'egi yikxon mee ne'egi mjaaktyim'y'ayo'onbaat, jɔts nigidi jade'en pɔn jaty tsinaadyɔɔ jam Sodoma.

Ya mendi jɔts mboo'kxtit

²⁵ Xjats ja nwindson'ajtim Jesús yjaakwa'añ:

—Dios Teety tsajpjotpit, yikjujky'ajtpi ya naxwiiñ, nmøja'wip mets ngunuu'kxyja'wip mets, ja'agøjxp ku tø xamidsøky o pøn ja mnitsoojkin jøts yø wijy jaaj'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'on ka'ejxiiyimdi. ²⁶ Jade'ents Teety tø xuñ sa kø'øm xamidsøky øy pøn.

²⁷ Xjats ja Jesús tnimaay ja mayjaaj'y:

—Tum ja' øts ndeety xuktump midi ja kø'øm tyunwampy. Ka'ap øts pøn jade'en xnijawi sam øts ndeety kø'øm xnijawi; nika'ats øts ndeety pøn wa'ats ñijawiyi sam øts ja kø'øm ndyimñijawi, jøts pøni pøn øts ja nduknijawiwampy, ja'ats tnijawidip ja Dios Teety. ²⁸ Øts idø'on xnime'endip pøn jaty agøjxtip jotkøjxtip, pøn jaty ø xku'ayo'ombaaajtidip, øts mee nyikpoo'okxp. ²⁹ Kupøjkidik øts ja n'ixpøjkin jøts mwinmaa'nbyaattit jade'en sa meets tø ndaniwinmayi, yujy øts winmaa'ñ njagypey; pyaaptts meets ja m'anmija'win ja øy'ajtin ja kunuu'kx'ajtin. ³⁰ Yø xipøjkin midi meets yam nmøøpy, ka'ap yø chepi, jajtni yø', ja'ayi xka'ixmatstit.

12

Ku ja Jesús ttøjtøø ja ariin yam poo'kxin xøøw

¹ Tuu'yø'øpy ja nwindson'ajtim Jesús wyinaty, poo'kxin xøøwts idø'on, jøts ja jam wyinaty ñaxti ma kam jam. Janch yuu'oo'ktpits ja pyabøjkpitøjk jøts ja ariin uun ja ttøjpinaxwä'ktøø, jøts ja pyajk ja tjøø'kxiyidi. ² Xjats kuts ja fariseotøjk ja jade'en t'ejxtøø, winets ja ttamajstøø ja nwindson'ajtim Jesús:

—Ejx yø mbabøjkpitøjk jade'en y'adø'øtsti, jøts ka'ats pyaaj'aty jøts yø jade'en y'adø'øtstit ku poo'kxin xøøw.

³ Xjats ja yide'en yiknimaadyøø:

—¿Ti ka'anin meets ja Dios kyajpxy x'ixy midi tnigajpxp sa ja David tuk'ojk tmøøt'adijch ja myigu'uk, ku yuu ja wyinaty yik'ookwa'aniiyidi? ⁴ Tsaptøjkjotpyxi ja ojts tyøki, jajts ja ojts tkay ja kunuu'kxy chapkaaky midi ja Dios yiktamiyoxp, midi ja ka'ap pyaaj'aty jøts ja tka'aty, uk jøts ja ttuka'aty ja myigu'uk, ja'ayi ja paat'ajtidip pøn teety'ajtip. ⁵ ¿Jøts nigidibaatnim meets ja kutujk x'ejxni midi ja Moisés yjaay, midi wamp jøts ku teetyøjk ka' pyoo'kxti jap tsaptøjkjotpy ku poo'kxin xøøw, jøts nika'ats ja pyøkyi? ⁶ Øts wamp jøts ku ja jadu'uk jawaani møj, nika'ap tsaptøjk yja' jade'en. ⁷ Ka' meets yø xnimadøy pøni sa dø'on yø tjatijy ya'at Dios kyajpxy ku ja Dios Teety wyaañ: “Ja' ø ndsøjkpy jøts xmøøt'attit ja pa'ayo'owin ja ayo'ejxin, jøts ne'egi kidi xyik'ookty yø jiyujk yø tsakaaj' midi jaty myojxtip.” Kuk y'ijty xja'gyukidit, ka'abik mmigu'uk y'ijty xpøky'ejxtit øy ja ti pøky tjagatundi. ⁸ Ngudanaapy øts ja naxwii'ñit jaaj'y jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaaj'y midi ja kyø' jadi'iñi tøtsnip

⁹ Xjats ja nwindson'ajtim Jesús jam chøø'ñ jøts ja ojts ñijky, tyøjkii'ñ jam tsaptøjkjotp ¹⁰ ma wyinaty jam tu'uk ja jaaj'y midi ja kyø' jadi'iñi tøtsnip tuktamajñ; jøts kumi øy idø'on ja tyimy'ixa'adi ti ja yjadyimy'uktani'øønidip ja nwindson'ajtim Jesús, jøts ja tyiktøødøø t'amidoodøø ñadyijyi:

—¿Kutujk yø' ku pamaaj'y jaaj'y nyiktsojkin ku poo'kxin xøøw, u ka'?

¹¹ Jøts ja nwindson'ajtim Jesús ja ojts t'adsøy, yide'en ja tnimaay:

—¿Wan meets ja mborreek ndejin jadi'iñi xmajstututt ku ja wyinaty tø kyunaxy jap jutjotpy yam poo'kxin xøøw? Pø kuwanixi ja xninøjkxtit jøts ja x'atsjuuttit. ¹² ¿Ti sats ja jiyujk jade'en yjaakjikjotmay'aty, jøts ja jaaj'y jadi'iñi

yikmajststutt? iPø ka'axi, pø jaa'yxi ja! Paat'ajtip n'odyu'unin øy pøn ku poo'kxin xøøw.

¹³ Xjats ja yiknimaay midi ja kyø' wyinaty tøtsp:

—Xajtøw.

Jøts ku dø'øn ja ojts xyajtiy, tyimyøkpøjk ja kyø' ja', nayide'en ja tyimya'wiyi'iñ sam ja yjadu'ukpi kø' midi møk. ¹⁴ Winets ja fariseotøjk wya'kpidsomdøø, jøts ja tkajpxy'ajtpinibøjkidøø sudso ja tjadyimy'ukyik'ookit ja nwindson'ajtim Jesús.

Ku ja Dios kyugajpxy Isaias tnigajpxy sa ja Jesús jyatwa'añ kyubatwa'añ

¹⁵ Kuts ja nwindson'ajtim Jesús ja tnija'wiyi'iñ, winets ja jam ojts cho'oni jøts mayjaa'y ja ojts pyadsøøni. Yikmøkpxøjkixpy idø'øn ja pamaa'y ja',

¹⁶ jøts ja yikxon ttukmadøy jøts ja ka'ap ñimadya'agidit pøni pøn idø'øn ja'.

¹⁷ Jade'en'ampy idø'øn ja jade'en jyaty, jøts ja jade'en ka'pxy tyimyjatt sa wyaañ Dios kyugajpxy midi Isaias'ajtp, ku ja yide'en wyaañ:

¹⁸ Yø' øts idø'øn tø n'a'ejxi, øts yø' ndumbi,

yø' ø ndsøjkpy jøts yø' ø ndajotkujk'ajtpy.

Nmo'op øts yø' ja nmøk'ajtim ja n'Espíritu Santo,

jøts øts yø xnigajpxit ja ndiy'ajtim o magajp.

¹⁹ Ka'ap yø cheekt, ka'ap yø wyopt, ka'ap yø ya'axt yjokt, niduk'aawin yø kyayikmado'ot ja y'aaw y'ayuujk ja nøø'ajy tuu'ajy.

²⁰ Ka'ap yø øy pøn nugo tyimdya'oo'kpety,

ka'ap yø nugo tukmajada'ak tyimyajada'aky øy pøn mabaat tyimyjatundigøy, kunim yø yikxon tpiakta'akt ja kyutujk ja tyiy'ajtim.

²¹ Jøts yø ødyimbyøngajpi y'ajot'attit.

Ku ja Jesús yiknimaay jøts ku miku' myøk'ajtin ja tyiktuujni

²² Xjats ja nwindson'ajtim Jesús ojts yiktaninijkxy tu'uk ja jaa'y midi winap midi uum, jøts tø miku' ja wyinaty tyatøkiyi. Ojts ja tyikmøkpijky jøts ja jaa'y wyin'ejxwa'kxy jøts ja y'awijy jadigojk. ²³ Jøts idø'øn ja jaa'y ja ñigyumaap tyimya'widøø, yide'en ja ojts wya'andi:

—¿Ti ya'at ndejin, ja rey David y'apip?

²⁴ Xjats ja fariseotøjkti ja'ayi ja ojts jade'en tnimyadowdi, xjats ja wyandøø:

—Jade'en'ampy ya'at jaa'y tyikpidsimy yø miku' kumi ja møj miku' myøk'ajtin yø yiktuujni, jøts yø ttuktabidsimy ja myimiku', yø'øts yø wwindson'ajtip.

²⁵ Wa'ats ja nwindson'ajtim Jesús ja tnijawi sa jaty ja wyinaty wyinmaydi, jøts ja tnimaay:

—Ñimidi'ibi kutujk kø'ømyi ñamyidsep'aty, kuts ja cheptundi ja xem yam jadi'iñits ja ñankyudigøyidi; u ku kajp u ku jaa'y tukmigu'uk ñamyidsepikyidi jøts ñawya'kxyidi, ka'ap ja yikjø'ijxy'aty jøts ja jeky ñankchøøniyidit. ²⁶ Jøts nayide'en jyaty ku ja møj miku' tyikpidsimy ja myimiku', tøts idø'øn ñamyayi ñawya'kxniyi; ¿sudso'ampyts ja jade'en y'ett ja myøk'ajtin? ²⁷ Pø jade'enxi mee mwa'añ jøts ku øts jade'en'ampy ja miku' nyikpidsimy ku øts ja møj miku' myøk'ajtin nyiktuujniyi; pøni janch jade'ents, ¿pønts meets ja mmigu'uk ja myøk'ajtin yiktuujni ku ja miku' ja nayide'en tyikpidsømdi? Ja'axi mee mni'øø'niyidip jøts ku nugo jade'en nugo mjadyimgyajpxigøydi. ²⁸ Kuts øts, jade'en'ampy øts ja miku' nyikpidsimy ku øts ja Dios myøk'ajtin nyiktuujniyi, jade'ents meets idø'øn yø xja'gyukit jøts ku Dios ja kyutujk tø mdanija'adyidi midi ja tyanitanaapy yjaa'y.

²⁹ '¿Pønts øy nugo tyimy'uknidøjkip ja jaa'y jap tyøjkøtpty midi janch kamaabyim, øy ja pøn tyimyjapøjkxiwyajni ja pyikta'aky? Jawyeenxi ja yikwøønt yikpakwøønt, winetnimts ja yikpøjkøjixit ja pyikta'aky, pø tøxi øts nayide'en ja miku' yja' nmimajada'aky.

³⁰ 'Pøn ø xkabudøjkip, ja' øts idø'øn xmidsepwamp; jøts ku øts pøn ti møøt njapøkmukwa'añ, jøts ja jinaxy tpo'kwa'kxy.

³¹ 'Paty meets idø'øn nnøjmi, jøts ku øy tyimyjapøni yikmaa'kxkøjpx ja pyøky, pøni ti jaty pøn tyumpy kyajpxpy; kuts pøn tka'uk'ømyigajpxt ja Espiritu Santo, niwindem ja mibaat kyayikpojkpimee'kxy. ³² Jøts øy øts pøn xjaga'ømyigajpxy, jaakyikpojkpimaa'kxp ja'; jøts ja' pøn tka'ømyigajpxp ja Espiritu Santo, ka'ap ja mibaat yikpojkpimee'kxy ya naxwiñ, jøts øy tyimyjamadso'ji.

Pøni sa wyimbidsimy øy ti, ja'ats tyiknigaxø'kp pøni sa ti y'øyi kya'øyi

³³ 'Ku kipy y'øyi, nayide'en ja øy tyøøm tyikwingaxi'iky; jøts midi ka'øy, nayide'ents tyøøm ja tyikwingaxi'iky ka'øy. Ja tyøømts ja kipy yikta'ejxkajp pøni sa øy ka'øy tyøømi. ³⁴ 'Meets win'øø'mbidi! ¿Sudso mee m'øgyajpxt jøts ka'ats m'øyjaa'yidi? Jøts pøni sa y'awa'kxy yø aaw, tum jamts yø chøøn midi jam ujts abøki yikmøøt'ajtp jam amjotp. ³⁵ Pøn øy jaa'y, jade'en'ampy ja tyikpidsimy ja øgyajpxy ja øwyinmaa'ñ, kumi tum'øwyinmaa'ñ ja yjagyjpy jam y'am yjotp; jøts idø'øn ka'øyjaa'myidi jade'en'ampy tkayikpidsimy ja øwyinmaa'ñ, kumi tum ja ka'øybi ja jam myøøt'ajtpy y'am yjotp. ³⁶ Øtsts mee nnimaapy jøts ku wyinaty ja tiidyu'unin ñaxy, ja'abi xøøwts tuki'iyi yikøyajkøxt ja øgyajpxy ja ka'øgyajpxy pøni sa pønjabøn tø wya'añ. ³⁷ Pøni sa ja m'ayuujk pøni sa ja mwinmaa'ñ, nayide'ents myiktiidyu'undit, nay ja' myiktapøky'ejxtip, nay ja'ats mgayiktapøky'ejxtip.

Ku ja ka'øyjaa'y t'amidowdi jøts yiktuk'ejxtit ja milagri

³⁸ Winets ja nwindson'ajtim Jesús ja fariseotøjk ñimaa'jyøø møøt ja kajpxwejpitøjkti:

—Windsøn, ja' øø n'ejxwampy jøts øøts xuk'ext tu'ugin ja milagri'ajtin, pøni janch ku mjanchdiosu'ngi:

³⁹ Xjats ja nwindson'ajtim Jesús ja t'adsøøy:

—Ja' idø'øn ja milagri'ajtin amidoodip pøn kawindiyjaa'y'ajttip; ka'ats ti milagri'ajtin y'ukyiktuk'ejxnidit, wan ja'ayi sa yjajty kyubejty ja Jonás ja Dios kyugajpxy. ⁴⁰ Nayide'en ja Jonás y'ijty tigøøk xøøw tigøøk tsuu jam ajkx yjotp jøts pyidsimuy jujky, nayide'ents øts idø'øn jap naxpatki'py n'ett tigøøk xøøw tigøøk tsuu jøts nbidsøømt jujky. ⁴¹ May'ampy pyidøøktit ja jaa'y pøn jaty tsinaadyøø jam Nínive ku yja'att ja tiidyu'unin xøøw, ku yø jaa'y yiktiidyu'undit pøn jaty ixyam tsinaadyip jujky'ajttip ya naxwiñ, yø'øts idø'øn yikpøky'ejxtip; kumi ne'egi yiktigajstøø ja Nínive jaa'y chinaa'yindi ku ja Jonás ja ojts tyukmadøyidi ja Dios kyajpxy, jadyim'yxyats idø'øn ja' midi jawaani møj jøts nika'ap jade'en Jonás, jøts ka'ap meets ja xmøjpi'kta'aky. ⁴² Nayi pidøøkp nayide'en ja windsøn'øxy ku tiidyu'unin xøøw, ku ya'at naxwii'ñit jaa'y yiktiidyu'undit jøts pyøky ja yiktani'øønidit; kumi jagam et ja ojts chøøn, jøts ja ojts jadine'en tñimiñ ja Salomón ku ja tpatmadoowajni ja kyajpxwejin, ixyats jadu'uk midi jawaani tñija'wip jøts nigidi jade'en Salomón, jøts ka'ap meets ja xmøjpi'kta'aky.

Ku ja miku' jadigojk t'awimbeti ja chinaadyaajk

⁴³ 'Ku miku' tmajtstu'uty ja jaa'y, jøts ñijkxy widejtpi tøøts etjotp, tja'ixa'ay ja pyoo'kxaajk; jøts kuts nima tkapaaty, xjats wyinmay: ⁴⁴ "Nay ja ndøjk ø n'awimbetip ma ø tø ndsøøñ." Kuts wyimbity, jøts ja jaa'y jade'en yikpaaty sam tøj k tawa'ats, pe'ety jaaxy ja jap. ⁴⁵ Xjats ja chøøñ, jøts ja tjaaktyimy'atsway ja niwixujk ja myimiku' midì jawaani ka'øydi, jøts ja niduki'iyi ttatøkidi ja jaa'y, tsinaadyaajk ja tyikwa'andi. Nayide'ents idøøn yø kawindiy jaa'y yjattit.

Ja Jesús tyaak jøts ja y'uch

⁴⁶ Exam idøøn ja nwindson'ajtim Jesús wyinaty jade'en tmigajpxñim ja jaa'y, ku ja tyaak yja'jty jøts y'uchti myigu'ukti. Japyi ja ojts tøk'agu'py y'awejxti, ja' ja tyimjamigajpxwandip. ⁴⁷ Jøts ja nwindson'ajtim Jesús yiktukmadøø, jam idøøn ja pøngapøn tñigajpxkøjy:

—Exap ja mdaak tøjkwimpy y'awixy møøt ja m'uch, jøts mets mmigajpxwajnip.

⁴⁸ Jøts ja tñimaay pøn wyinaty jade'en tø tyukmadøyi:

—¿Pøn øts ndaagip, pøn øts idøøn n'uchip?

⁴⁹ Winets ja tñigu'umiyi'ñ ja pyabøjkpitøjk jøts wyaañ:

—Yø' øts idøøn ndaagidip, yø' øts idøøn n'uchidip. ⁵⁰ Pøn øts ja ndeety kyutujk tpaduujniyip midì jap tsajpjøtpy, yø' øts idøøn nmigu'ugidip, yø' øts idøøn ndaagidip.

13

Ku ja Jesús tmadyakpaaty ja jaa'y pøn nøjx neppi

¹ Jøts ja nwindson'ajtim Jesús jam tøjktotp pyidsimy, jøts ja ojts ñijkxy jam mej'y'am, jamts ja y'ixaajky. ² Jøts kumi janch may ja jaa'y ñamyujkidi ma ja jam wyinaty, winets ja nwindson'ajtim Jesús tyøjkij'ñ jap barkijøtpy, japts ja y'ixaajky, jøts ja mayjaa'y jam niduki'iyi tyandøø nøø adsayjotp. ³ Xjats ja ttuk'ixpijky ja y'ixpøjkin, ñimay idøøn ja ojts tñigajpxkøjy. Tum ejxpajtin madya'aky ja tyanimadyakpy pøni midì idøøn ja y'ukyiktamija'gyukip, yide'en ja wyaañ:

—Tu'uk ja jaa'y chøøñ neppi; ⁴ jøts ku ja ojts twijy ja tyømt, xjats ja tømt winaagin ñaxkidaajky jam tuu'am, ja'ats ja joon ojts tñimendi jøts ja wa'ats tpeemujkøxtøø. ⁵ Winaagin ja tømt ñaxkidaajky jam tsaajotp ma ja naajx kyamajpxyi; ja'ats ojts tsojk myujxkojti kumi ka'ap ja naajx kyøjki. ⁶ Kuts ja xøøw ja'ayi pyidsimy, ja'ats ja ojts chaa'yiyi, yats y'aats ja yjaakidyimy'ejtnidi, xjats ja tuki'iyi ojts tyøtskøjxni. ⁷ Jøts ja tømt winaagin ñaxkidaakmøø jam maagyujp'agujkp, jøts ku ja maagyujp yøøñ, ja'ats ja ojts ñi'aa'mbajtniyi. ⁸ Jøts ja tømt ojts waani ñaxkidaakmi ma øñaajx, ja'ats janch'øyiyi'ñ; winaagin magø'pxy pyajkpejty ja tu'ukpi tømt, winaagints tugui'pxy, jøts winaagin ee'pxmajk. ⁹ Pøni pøn ja ja'gyukin tmøøt'ajtp, wan tja'gyukidi.

Tigøjxp idøøn ja Jesús ejxpajtin madya'akyøjxp ja y'ixpøjkin tyaky

¹⁰ Winets ja nwindson'ajtim Jesús ja pyabøjkpitøjk ñimejniyi wingon jøts ja tyiktøødøø:

—¿Jadits ku yø jaa'y jade'en xamimadya'aky ejxpajtin madya'aky ku xyik'ixpiky?

¹¹ Jøts ja t'adsøøy:

—Meets Dios ja'ayi mduknija'wiyip ja kyutujk jap tsajpjøtpy midì pøn tkanija'wipnim; jøts ka' yø mibaat tñijawidit. ¹² Pønts tjagyajp

ja ja'gyukin, jaaktyimyikmo'opts ja' jøts yikxon tyimya'gyukit; jøts pøn kaja'gyukip, jaaktyimyikpøjkxipts ja' pøni wine'en paadin ja jap tjaakjamøødi ja wyijy'ajtin. ¹³ Paty øts yø jade'en ndukmadowdi wenk madya'akyøxp; yjadyimy'ejxtipxi jade'ents yjatti sam tø tkidyimy'ejxti, yjadyimjamadoodip jade'ents yjatti sam ti tkidyimñimadowdi, uk sam pøn ti tkidyimadøyin. ¹⁴ Jade'en idø'øn ixyam tyimyjati sam wyaañ ja Isaias ja Dios kyugajpxy, ku ja yide'en wyaañ:

Mjadyimjamado'odip jøts ka' xnimado'odit;
mjadyimya'ejxtip jøts jade'en mjattit sam pøn ti tkidyimy'ijxñim.

¹⁵ Nisudso'ampy yø yjade'embj ja' y kya'ukmadoonidi ja y'anmija'win, tum ka'øy tñimadowdi,

jøts wimbeets kugoots y'ejtnidi;
ka'ap ja wyeen ttawin'ejxti,
nika'ap ja tyatsk ttamadowdi,
nika'ap ja kyubajk yja'gyukidi,
jøts ni øts xkanimendi øyik øts idø'øn nyiktso'oktit.

¹⁶ Xjats ja Jesús tjaaknimaay ja pyabøjkpitøjk:

—Meetsts idø'øn janchjotkujk'atyim, kumi mda'ejxtip ja mween jøts kumi mdamadoodip ja mdatsk. ¹⁷ Jøts janch øts idø'øn nwa'añ, jøts ku may ja jaa'y pøn jaty Dios kugajpxy'ajtidip, pøn jaty øyjaa'y'ajttip, jade'en tyimya-jawemp'ejxwandi pøn meets ixyam m'ijxpy, jøts nijuunists tø tka'ejxti; yjadyimjamadoowandi ya'at jade'en midi meets ixyam mmadøøpy, nijuunists ja tkamadowdi.

Ku ja Jesús tñigajpxy sudso dø'øn yikja'gyukit ku jaa'y neppi ñijky

¹⁸ Ukpatmadowdim meets, jøts xja'gyukidit pøni sudso'ampy idø'øn ya'at madya'aky tijy ku ja jaa'y chøø'ñ neppi. ¹⁹ Pøn tjamadojidip ja Dios kyajpxy sa ja ttanitaniit ja yjaa'y jøts nika'ap tmøjpikta'akti, ja'ats idø'øn jade'en jajtip sam ja tømt midi naxkidaajk jam tuu'am; jøts miku' ja jaty ñimiñiyi jøts ja pyøjkxiyi ja Dios kyajpxy midi ja tø tja'ukja'gyuki. ²⁰ Jøts ja tømt midi naxkidaajk jam tsaajotp, jade'en idø'øn ja ñamyayi yjaty sam jadu'uk ja jaa'y pøn tpatmadojidip ja Dios kyajpxy jøts ja jotkujk'atyim tkupøjkoti, ²¹ jøts kumi jade'ents yjatti sam ja ujts y'aats kya'ejtxiyi, jøts ja nigidi jeky tmi'etti; ku ja tku'ayo'ombaadidi ja Dios kyajpxy uk yiktabawopti paat, jøts ja jaty tyimya'ayojidi. ²² Jøts ja tømt midi yikwøj jam maagyujp agujk, jade'en idø'øn ja n'ukpiktaajkin sam ja jaa'y pøn tpatmadojidip ja Dios kyajpxy, jøts ja pikta'aky jøts ja jotkujk'ajtin ja' ne'egi yjotmay'ajttip, ja' ja win'øø'nidip, jøts ja Dios yja' tyigøøñi jøts ja jaa'y ja yjanchja'win nika'ap tyikwingaxi'iky. ²³ Ja tømt midi ojts naxkida'aky jam øñaxjotp, jade'en ja nbiktaajkin sam ja jaa'y pøn tpatmadojidip ja Dios kyajpxy jøts yja'gyukidip, jøts yikwingaxø'øktip. Jade'en ja winaaginidi sam ja tu'ukpi tømt pyajkpety magø'pxy, jøts winaagin jade'en sam ja' midi pajkpaajt tugui'pxy uk ee'pxmajk.

Ku ja ariin yiktamineejpi ja ka'øy ujts

²⁴ Jøts ja nwindson'ajtim Jesús tjaaktamimadyaajky jadu'uk ja madya'aky, jøts ja mayjaa'y yide'en tñimaay:

—Jade'en idø'øn ja Dios kyutujk midi yjaa'y ja tyanitanaapy sam tu'uk ja jaa'y twijyin ja ødyømt jam kyamjotp, ²⁵ jøts ku ja wyinaty ixjam myaanidi niduki'iyi, winets ja kugam myidsep ojts tyatøjkxiyi ja kyam, jøts ja ojts t'atswiyj ja ka'øy ujts jam ariinjotp. ²⁶ Kuts ja ariin yøøñ ku ja y'uuniy'iñ, jøts ja ka'øy ujts jam nayide'en pyidsiimy. ²⁷ Winets ja tumbi t'atsnimaadyøø ja wyindsøn: “Windsøn, pø janch tum ødyømts mets ojts xijy xwijy jam

mgamjotp, ¿mats yø ka'øy ujts tø chøøñ?" ²⁸ Jøts ja wyindsøn ja ñimaajyidøø: "Ja ta'ajkibi ja tajotma'tpi net jade'en tø y'adø'øtsti." Xjats ja tumbi tyiktøwdi jøts ja wyandøø: "¿Mdsøjkpy jøts øøts ja ka'øy ujts n'atswejxkøxt?" ²⁹ Yide'ents ja ojts y'adsøyidi: "Ka', ku net ja ka'øy ujts yjayikwext, nayide'ents inet ja ariin yikwejxnit. ³⁰ Ne'egi tyimy'øy'atp jøts jade'en xmajtstu'ttiti, wan jade'en tyondi, jaanim ku wyinaty tø tymbyaaty jøts yikwejxnit; winets øts ja tumbi ngaxt jøts ja jawyeen twejmxujkøxtit ja ka'øy ujts, yikxon t'adsu'umdit tuk'øøxy jaty jøts ja jade'en yiknitsa'at, jøts ja ariin yikpøkjø'økt jap abøjk'ii'ñjotpy."

Ku ja Jesús tmadyakpaaty ja mortas tømt

³¹ Ñayi myadyaajk ja nwindson'ajtim Jesús jadu'uk ja madya'aky:

—Jade'en idø'øn ja Dios kyutujk midi yjaa'y ja tyanitanaapy sam ja møj mortas tømðin midi jaa'y wyijpy kyamjotpy. ³² Jøts kumi jaaktyimchuu'kxñi ja ñidømt yø', ka'ap jadu'uk jade'en ujts midi yjamigu'uk'ajtpy; kuts yøñ, yikxon yjantyimyøñ møj tukmøj kipyin, janch møj idø'øn yøñ ti sa øy ti joon myendi kixy kida'aky, jøts ja ñabye'eñidi jam kipy awajkjøxp.

Ku ja Jesús tmadyakpaaty ja levaduri

³³ Ñayi tyamimadyaajk jadu'uk madya'aky:

—Jade'en idø'øn ja Dios kyutujk midi yjaa'y ja tyanitanaapy sam ja levaduri midi tøøxyøjk tyamimøø'kxyip ja ariin way ku ja tø tkijpxy tigøøk ojk a'ejxi, jøts ja jich yikxon yaa'kpiky.

Tigøjpx ku Jesús xumi jade'en tyik'ixpiky ja jaa'y ejxpajtin madya'akyøjpx

³⁴ Ejxpajtin madya'akyøjpx idø'øn ja nwindson'ajtim ja y'ixpøjkin tñigajpxy, jøts tum jade'en idø'øn ja tñigajpxy pøni ti dø'øn ja ñimadya'akwampy. ³⁵ Ja'agøjpx ja jade'en yjajty jøts ka'pxy wyimbidsø'ømt sa wyaañ ja Dios kyugajpxy ku ja yide'en tjaadyaañ: Ejxpajtin madya'aky ø nyiktu'ump ku ti ngajpxwa'ant; jøts nñigajpxp øts ja' midi ka' pøn tñigajpxñim, wine'en yam kujk y'ity kuuyip ja Dios tyik'øyiyii'ñ ja naxwii'ñit jøts ixyambaat.

Ku ja Jesús tñigajpxy sudso dø'øn yikja'gyukit ku ja ariin yiktamineepi ja ka'øy ujts

³⁶ Xjats ja nwindson'ajtim Jesús ojts tminawya'kxyi ja jaa'y jøts ja tyøjkii'ii'ñ tøjkjotpy, japts pyabøjkpitøjk ja ojts ñimiñiyi, jøts ja ñimaajyiyi:

—Tuknimadook øøts yikxon ja madya'aky ku tø xnimadya'aky ja ka'øy ujts midi yomp jam kamjotp.

³⁷ Winets nwindson'ajtim Jesús ja ñimaajyidi:

—Ja tømt wøjpi, øts idø'øn ja', ³⁸ jøts ja kam, naxwii'ñit ja'. Jøts ja ødyømt, ja jaa'dyi pøn Dios kyutujk tpaduujnidip, jøts ja ka'øy ujts, ja jaa'yts ja'adi pøn ja miku' yja' tpaduujnidip, ³⁹ jøts ja ta'ajkibi tajotma'atp'idi midi tnepp ja ka'øy ujts, nay ja miku' ja kø'øm. Jøts ku tpaaty ja ariin wejxka'gts, ja dø'øn ja' ku naxwii'ñit jaa'y yiktiidyu'undit, jøts pøn tøkmuksit ja pikta'aky, ja ankilis ja'adi. ⁴⁰ Nayide'en idø'øn yjatt ku naxwii'ñit kyøxt sam ja ka'øy ujts yikpøkmukyin, sam ja yikpikta'agyin jap jønjøtpy jøts ja jap ñitøy. ⁴¹ Ngaxp øts ja n'ankilis jøts ja twaamujkøxtit pøn jaty ja myigu'uk tyikpøkyundip, jøts pøn nayide'en ttunk'ajttip ja pøkyunk, jøts ja ttukmajtstu'ttiti øts ja ngutujk jøts kidi mibaat tatøtkidi. ⁴² Jap ja møj jøndøødyajkjøtpy tpiakta'aktit ma ja yikxon tñijø'ødit tmiya'axtit, tmiwingidsetsttit tmi'agidsetsttit ja jøøn. ⁴³ Jøts pønts ja Dios tpadundip pøni sa ja wya'añ, ja'ats idø'øn jap ja møj kunuu'kxin

tmøøt'ajttip ma ja Dios Teety ja kyutujk ttanitani ja yjaa'y. Pøni mmøøt'ajttip ja ja'gyukin, ja'gyukidits!

Ku ja Jesús tmadyakpaaty ja meen̄ midi jaa'y yikyu'uch y'ijtpy naxjøpty

⁴⁴ 'Nayide'en idø'on ja Dios kyutujk sam meen̄ yu'uch'ityin ya naxjøøjty kamjøøjty. Xjats jaa'y ja tpaaty jøts ja nay jap jadigojk tyu'uch; jøts kumi yjantyaxondakpy winets ñijkxy jøts t'atsto'okixy tuki'iyi ja pyikta'aky ti jaty jam yjagyeypy, jøts ja naajx tjuy ma tø t'ukyu'uch ja meen̄ midi tø tpaaty.

Ku ja Jesús tmadyakpaaty ja tsaa meen̄

⁴⁵ 'Nayide'en idø'on ja Dios kyutujk midi yjaa'y tyanitanaapy sam tu'uk ajuubyi agajpxpi, pøn t'ixaapy tum ja øybi tsaa meen̄ midi ja chow kawinmaañi, ⁴⁶ kuts ja tpaaty tu'uk midi janch tsoatp, winets ñijkxy jøts tuki'iyi y'atsnawiyidoo'kixyi ti jaty jam yjagyeypy, jøts ja tjuy ja tsaa meen̄.

Ku ja Jesús tmadyakpaaty ja xuummy midi' yikta'ajkmakp

⁴⁷ 'Nayide'en idø'on ja Dios kyutujk sam tu'uk ja xuummy midi yikta'ajkmakp, kuts ja yiknøøwejtspety jam mejjotp, jøts ja tyikpidsimy køx kida'ak ja ajkx. ⁴⁸ Jøts ku ja xuummy tø y'uch, winets ja ajkxmakpi ja twejtspidsømdi jøts ja tyiknøjkxti jam nøø'adsayjotp, jøts jam y'ixa'akti jøts ja jam twi'ejxti ja ajkx; kachjøpty ja tpikta'akti midi janch tum'øy jøts ja ka'øy ajkx yik'ixwijy. ⁴⁹ Jade'ents idø'on yjatt ku naxwii'ñit jaa'y kyøxt; nibidsømidip ja' ja ankilis jøts ja abiky pyikta'agidit pøni sa pønjabøn y'øyi kya'øyi, ⁵⁰ jøts ja ka'øybi yikpikta'aktit jap møj jøndøødyajkjøpty ma ja yikxon yjøødit ya'axtit, wyingidsetst̄it y'agidsetst̄it.

Sa ja Dios kyutujk nyiknigaxø'jka'ant

⁵¹ Winets ja nwindson'ajtim Jesús ja yiktøøjidi:

—¿Mnimadoodip idø'on tuki'iyi?

Xjats ja wyandøø:

—Nnimadøøpy øø nwindson'ajtim yø'.

⁵² Winets ja ñimaajyidi:

—Ku tu'uk ja kajpxwejpi t'ukni'ixpøki sudso tñijawit ja Dios kyutujk midi yjaa'y ja tyanitanaapy, jade'ents ja pyidsimy sam tu'uk ja windson midi tjaftp tyikwngaxø'kp ja yjotkujk'ajtin ku ja tñanky'ijxyi øy ti køx kida'ak, wan tjemyi wan tku'aamyi.

Ku ja Jesús yja'jty jadigojk Nazaretit kajpjotp

⁵³ Xjats ku ja nwindson'ajtim Jesús jade'en tñimadyak'abajtiyi'ñ, winets ja jam chøø'ñ ⁵⁴ jøts ja ojts yja'aty jam kyø'øm etjotp ma ja kyugajpi. Jamts ja yik'ixpøjktøjkøø tsaptøjkjotp midi jam wyinaty, jøts ja jaa'y ñigyumaap yjanchjajtøø, yide'en ja wya'andi:

—¿Ma yø jaa'y jade'en tø tjaty yø'øbi ixpøjkin? ¿Sudso yø jade'en ttuñ milagri'ajtin? ⁵⁵ Pø ja tsajtspits yø' y'u'nk, jøts ja María ttaagi. Kidi ja Jacobo yø' y'ajhti, jøts ja José møøt ja Simón, jøts Judas. ⁵⁶ Nayats ja y'uch kiixy yø chinaamyidi ma adøm ya. ¿Ti maʼs yø jade'en tuki'iyi tø tjaty?

⁵⁷ Patyts idø'on ja jade'en ka' tmøjpikta'akti. Xjats ja nwindson'ajtim Jesús ja ñimaajyidi:

—Tum yiktsojpk ja Dios kyugajpxy øy ma, kuts kyø'øm kajpkijxy ku kyø'øm tøjkjøøjty, ka'abimts ja tiyy yiktsøky.

⁵⁸ Jøts idø'on ja jam ka'ap jadine'en ttuun̄ ja milagri, kumi ka'ap ja janchjawidi.

14

Ku ja Juan Bautista ja o'jkin tpaqjty

1 Nayi winet ets ja nwindson'ajtim Jesús yiknimadøoy jam Galilea, ja Herodes idø'on ja tnimadoop pøn jam wyinaty windsøn'ajtp, 2 jøts ja tniimaay pøn jaty ja wyinaty møøt tyuñ:

—Ja Juan Bautista net ja' midi y'ijty yiknøbajtp, ja' inet tø yjujkpyiky jadigojk. Paty yø jade'en tmøøt'aty ja møk'ajtin jøts yø jade'en ttu'unt ja milagri'ajtin.

3 Jøts kumi ja Herodes ja Juan wyinaty tø chumyi, ja' ja wyinaty tø ñi'ane'emyi jøts ja pujx kadeen ja yiktagøwøønt yiktabakwøønt jap puxøjkjøtpy, ja'agøjxp ku ja ojts ttamigajpxy ja Herodías, pøn ja Herodes ja y'uch Felipe ñidø'øxy'ajtpy. 4 Yide'en idø'on ja Juan wyinaty tø tniimaani ja Herodes:

—Ka' pyaāt'aty jøts yø jade'en xtyimñidø'øxy'att.

5 Jøts idø'on ja Herodes tyimyjayik'ookwə'añ ja Juan, ja mayjaa'yts chø'jkip; kumi tyumnija'widip ja' jøts ku ja Juan tum ja Dios yja' tkajpxi. 6 Kuts ja Herodes ja xyøøw ja yjumøjt txøduuñ, winets ja Herodías ñøøx pyidsiimy ajtspi mā ja mayjaa'y jam wyinaty tø yikwəwdi yikwetsti migaabyi mi'ukpi, ja'ats ja Herodes yjantyaxondaajk, 7 jøts ja tniimaay møk'ampy jøts ku ja tmo'ot øy ti pøni ti ja kø'øm y'amidoowampy. 8 Xjats ja kiixy, tø tyaak ja wyinaty jawyeen y'agajpxiyi ku ja tniimaay ja Herodes:

—Møøky øts platijøtp ja Juan Bautista kyubajk.

9 Ja'ats ja windsøn Herodes kyujotmaadyøjkii'ñ; jøts kumi tøts ja wyinaty kø'øm møk'ampy ñimy jøts ku ja tmo'ot øy ti, tøts ja jaa'y ja wyinaty tmadowdi pøn jaty jam wyinaty migaadyip mi'uktip, xjats idø'on ja ojts wyə'añ jøts yikmo'ot. 10 Ojts tyikutuky jøts ja Juan Bautista ja kyubajk y'atsyikajtspoot jap puxøjkjøtpy; 11 jaty dø'on ja ojts tyikmendi jap platijøtpy jøts ja kiixy ja yikmøøy, jøts tyaak ja tmøøy.

12 Xjats ja Juan Bautista yjaa'y yja'atti, ja'ats ja ñine'kx ja ojts yiktsoo'nxiyi jøts ja y'atsyikni'ajit; kuts ja t'ukyiknaxøjkidøø, winets ja ñøjkxtøø jøts ja ojts t'atstukmadowdi ja nwindson'ajtim Jesús.

Ku ja Jesús tyikaay ja ñimagoxk milbi jaa'y

13 Kuts ja tniija'wiyii'ñ, jøts ja chøø'ñ nadyu'uk jap barkijøtpy, jøts ja ñijky mā jam nipøn kya'ity. Jatyts ja jaa'y ja tniija'widøø, winets ja ojts choondi mā jaty ja kajp jam, jøts ja tpanøjkxti tekyjø'øm. 14 Kuts ja Jesús pyidsiimy jam barkijøtp, jøts ja ojts t'ixy jøts kudam jaa'y jam wyinaty janch namaydi, jøts idø'on ja ojts t'ayo'ixy, may tyikmøkpijky ja pamaa'y midi ja jam yik-tanimeen. 15 Tsuu'jiñipts wyinaty, winets ja pyabøjkpiøjk ja ojts ñimiñiyi jøts ja ñiimaajyøø:

—Tøts ja et chuu'jiñi, jøts ka' yə pøn chøøni. Kajxni yø jaa'y, jøts wan tnøjknidi mā jaty kajp jøts jam tju'udyit kyaaky tyojkx.

16 Xjats nwindson'ajtim Jesús ja tniimaay:

—Ka' yø ñøjkxtit; yikaydi meets yø'.

17 Jøts ja wyandøø:

—Ka'ap øøts yə ti nmøødi, ja'ayi tsapkaaky jap ja magoxkyi, jøts ajkx jamajtskyi.

18 Winets ja nwindson'ajtim Jesús ja ñiimaajyidi:

—Yə yikmendi.

¹⁹ Jøts ja ojts tnøjmi jøts y'ixa'aktit jam miyjotp. Xjats ja tnixajiyi'ñ magoxk ja tsapkaaky jøts majtsk ja ajkx, jøts ja ojts tkunuu'kxy jøts ja ttatujkiyi'ñ, jøts ja tkømøoy ja pyabøjkipitøj, ja'ats ja ojts tyikwa'kxti jøts ja tmøodyi ja mayjaa'y. ²⁰ Niduki'iyi ja kyaydi ku'uxyi; jøts ja makmajtsk kach ujts wyindaañ ja aga'ak abu'xk. ²¹ Nimagoxk mil ja jaa'y kyaydi tum yaa'dyøj, jøts abiky ja tøyxyøjkti møøt ja mutsk una'jkti, ka'ap ja yikmachowdi.

Ku ja Jesús yø'øy jam mejwyngøjxp

²² Xjats ja nwindson'ajtim Jesús nay jatyi tyiktøjkiyi'ñ ja pyabøjkipitøj jap barkijøtpy, jøts ja ñøjktit jawyeen jam jaduktamajñ, yam ja ixjam tyañim jøts ja tminawya'kxit ja mayjaa'y. ²³ Kuts ja t'ukminawya'kxøø, xjats ja nadyu'uk pyatøjkiyi'ñ tsapkajpxpi jam kojpkøjxp. Jøts ku kyoodsiña, ixjam idø'on ja wyinaty nadyu'uk. ²⁴ Jøts ja barki ixjamni ja mejkyujk'am jagamni ja wyinaty. Janch jadi'iñi ja jam yikwibejpyø'øñi ku ja nøø tyojmji'iky, jade'en'ampy ja poj myiñ midi ja ñøjktip. ²⁵ Xjats ku yjöpkyoots'ajty, winets ja nwindson'ajtim Jesús ja jam ñimejnidøø, jadi'iñi ja yø'øy jam nøøwingøjxp. ²⁶ Kuts ja pyabøjkipitøj ja ojts jade'en y'ixxyi; jøts ku ja yø'øy jam nøøwingøjxp, xjats ja yjantymchø'jkidøø, jøts nay ja tsø'øgi ja møk'ampy yikwajnidøø:

—iTi miku' yø jade'en!

²⁷ Jøts ojts ja nwindson'ajtim Jesús ja myigajpxyidi, jøts ja ñimaajydøø:

—iKidi mdsø'øgidi, yikmøjkidi m'aaw mjoøjt; øts idø'on wamp!

²⁸ Winets ja Pedro wyaañ, xjats ja ñimaay:

—Windsøn'ajtim, pøni janch mets idø'on, yikyø'øky øts nøøwingijxy jøts øts xyiknøjkt mǎ mets ixjam.

²⁹ Xjats ja nwindson'ajtim Jesús ja ñimaajyøø:

—Men.

Winets ja Pedro pyidsiimy jam barkijotp, jøts ja yø'øchøø'ñ nøøwingøjxp, jøts ja ñijkxy mǎ ja nwindson'ajtim Jesús jam wyinaty. ³⁰ Kuts tjä'wiyi'ñ ja møk poj, ja'ats chø'jkiñøø; jøts enkyi køjk yjøptak'adøtsni, winets møk chabaguejky jøts wyaañ:

—iWindsøn'ajtim, yikpidsømk øts!

³¹ Jøts ja nwindson'ajtim Jesús nay jatyi tmajch kyø'køjxp, jøts ja ñimaay:

—¿Tyimwyinii'nxyip mets mjanchja'win? ¿Tiku tø mnayjöpja'wiyi?

³² Xjats ku ja tyøjkidøø jap barkijøtpy, jøts ja poj jatyi y'amø'jty. ³³ Winets ja jaa'y ja wyinguxanaajyi pøn jaty jap wyinaty jap barkijøtpy, yide'en ja wya'andi:

—Mets tam idø'on mjantymdiosu'nk.

Ku ja Jesús tyiktsøøjky ja mayjaa'y jam Genesaret

³⁴ Xjats ja ttanajxtøø ja meji jøts ja naajx ja tpaattøø yja'ttøø Genesaret. ³⁵ Xjats ku ja jaa'y t'ejxkapti ja nwindson'ajtim Jesús pøn jaty jam kugajp'ajttip, ja'ats ja ayuujk tyikyø'ødyøø, jøts tñija'wigyøjxtøø pøn jaty jam tsinaadyip ja'abi et, jøts ja tyikmendøø niduki'iyi pyamaa'y mǎ ja nwindson'ajtim Jesús wyinaty. ³⁶ Møk ja ttanuu'kxa'akti øy ja ja'ayi tyukpaadidit ja wyet pa'; jøts pøn ja wet jade'en yjøjxtøø, møkpojxøjxtøø ja'.

15

Ja ka'øy winmaa'ñ ja jaa'y tyikpøkpyajtp

¹ Winets ja fariseotøj winaañinimendøø ja nwindson'ajtim Jesús, møøt ja kajpxwejpitøjkti midi jam wyinaty tø choondi Jerusaléngit kajpkøjxp, jøts ja ojts yiktowdi:

² —¿Tigøjxp ku yø mbabøjkpitøjk tkabadundi ja mōjaa'ychinaa'yin? Ka'ats ttundi ja windsø'jkin ku kyøbujti ku kyawya'andi.

³ Jøts ja nwindson'ajtim Jesús ja ojts nayide'en tyiktøøjimbity:

—¿Jøts tigøjxpts ku meets ja Dios Teety kyutujk xkamimadojyiyi, jøts ja' mee myikmajadakpy ja mōjaa'ychinaa'yin? ⁴ Jøts yide'ents Dios wyaañ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan tpa'øøky.” ⁵ Jøts ka' meets jade'en mwa'añ, pø mnømpxi meets jøts wan jaa'y tnojmi ja tyeety tyaak: “Niwine'enin ngabudøkit, tø øts Dios ndamay'ajtkøjxni ti jaty øts jap nmøøt'ajtpy”; ⁶ jøts ku jade'en pøn wya'añ, ka'ats tyeety tyaak ja t'ukpudøjkiñi. Jade'ents meets ja Dios kyutujk xka'ukmøjpktaajkniyi jøts meets ja mgostumbri xyikmajadakni. ⁷ Meets win'øø'mbidi! Yikxon yjawaañ ja Isaías ja Dios kyugajpxy jøts mdi meets msā meets, ku ja nøky ja yide'en tjaay:

⁸ Nugo aaw nugo ayuujk, yø' øts yø jaa'y xawindsø'jkidip, pø ma yø y'aaw yjoajt yø'ødi.

⁹ Jøts ti yø ñiwyā'ant øy øts yø wine'en xjawindsø'øgidi, pø ja'axi y'ixpøjkin'ajtip pøni sã jaa'y kø'øm tyikutuky.

¹⁰ Winets ja tyaxtsøøy ja mayjaa'y jøts ja tnimaay:

—Ukmadowdi meets jøts xja'gyukidit: ¹¹ Kidi yø'øjip jaa'y yikpøkpyajtip midit tøjkip y'aawjøtpy. Yø' jaa'y yikpøkpyajtip midit pidsømp y'aawjøtpy.

¹² Xjats ja pyabøjkpitøjk ja ñimejniyi, jøts ja ñimaajyøø:

—¿Tø x'ixy yø fariseotøjk, ku jade'en tø tmdowdi sã tø xnøjmi jøts yikxon tø yjantyimy'ambøkti?

¹³ Jøts ja Jesús yide'en y'adsojimbijty:

—Øy ja tyimyidi ixpøjkin, pøni ka'ap ja tminabyaadyi ja Dios yja' møøt, windigøøpy ja y'ity. ¹⁴ Exmatsti; jade'en yjatti sam ja winap jaa'y ttuu'wawdi ja myiwinap jaa'dyi. Jøts ku ja winap jaa'y tjanch'uktuu'way ja myiwinap jaa'y, kuts jut ja tpaatit namajtskts ja jap kyunaxtit.

¹⁵ Winets ja Pedro wyaañ, jøts ja tnimaay ja nwindson'ajtim Jesús:

—Tukmadook øøts ti yø yjade'embĩ madya'aky tyijpy.

¹⁶ Xjats ja nwindsin'ajtim Jesús wyaañ:

—¿Ni meets paat yø xkanimadooni? ¹⁷ ¿Yø' idø'øñ mgaja'gyukidip, midit tøjkip aawjøtpy jøts ja ñijkxy jam maatsjotp, jøts pyidsimy ku nnawwyiø'yin?

¹⁸ Midit'its yø aaw yikpidsimpy, jam idø'øñ ja chøøñ amjotp; yø'øts idø'øñ jaa'y yikpøkpyajtip. ¹⁹ Jam ja amjotp chøøñ ja ka'øwynmaa'ñ ku jaa'y myigu'uk tyik'øøky, ku jaa'y ñiyyā'y uk ñidø'øxy tpojkxi, ku jaa'y kyawindiy winmaa'ñ tyiktuñ, ku jaa'y myeech, ku jaa'y tyaayi, jøts ku jaa'y øy ti tumjiwimbet tmdyāknaxy. ²⁰ Yø yjade'embĩ winmaa'ñ idø'øñ ja jaa'y yikpøkpyajtidip; jøts kidi yø'øjip ku jaa'y tkatuñ jade'en ja windsø'jkin ku tkapujy ja kyø' ku kyaawya'añ.

Ku ja Tiro tø'øxyøjk tjanchja'wiyi'ñ ja Jesús

²¹ Xjats ja nwindson'ajtim Jesús jam choo'naa, jøts ja ojts ñijkxy ma ja jaa'y y'et jamdi, pøn kugajp'ajttip Tiro jøts Sidón. ²² Jøts tu'uk ja tø'øxyøjk myiñ midit tso'omp cananea, midit jam wyinaty tsinaapy ja'abi etjotp, jøts ja tnimiñ ja nwindson'ajtim Jesús, yide'en ja møk'ampy tnimaay:

—iWindsøn'ajtim, metsxi rey David m'u'nk'ajtip m'ap'ajtip, ayo'ejxk øts! Yø nøøx øts idø'øñ ja miku' tø tyatøjkiniyi, jøts yø' møk yjanchyik'ayojip.

²³ Jøts ja nwindson'ajtim Jesús ka'ap ja t'adsøy niwine'enin ja'agøjxp ku ja tkamigugajpi, winets ja pyabøjkpitøjk myendøø, jøts ja møkta'aky wyandøø, møkta'aky yiknimaay:

—Kajxni, janch na'ambim adøm yø xpayø'øyim.

²⁴ Winets ja nwindson'ajtim Jesús wyaañ:

—Yø'øyi øts Dios Teety xanigajxp pøn ja Dios kyutujk kapaajtipnim ya Israelit naxjøøjtj, ya Israelit kajpjøøjtj.

²⁵ Jøts ja tø'øxyøjk myiilñ wingon jøts ja øjts wyinguxaniyi, yide'en ja wya'añ:

—jWindsøn'ajtim, pudøjkik øts!

²⁶ Jøts yide'en nwindson'ajtim Jesús ja t'adsøøy:

—Ka' y'øyi ku u'nk una'jk yikpøjkxit ja chapkaaky jøts uk ja yikmo'ot.

²⁷ Jøts ja tø'øxyøjk wyaañ:

—Nwindson'ajtim, janch jade'en idø'øn ejx ixa mwa'añ; ja ukts jøø'kxmukøxtip ja kaaky abu'xk midi ja wyindsøn yika'adip jap mesi patki'py.

²⁸ Jøts ja nwindson'ajtim Jesús ja ñimaajyøø:

—jJanch møj mjanchja'win! Wan jade'en tyiktuñ sam idø'øn xtsøky'aty.

Jøts ja nay jatyi myøkpjky ja ñøøx.

Ku ja Jesús tyiktsøøjky ja mayjaay

²⁹ Xjats ja nwindson'ajtim Jesús jam chøø'ñ, jøts ja ñajxy Galileit mejpya'am; winets ja pyatøjkii'ñ ma jam ja kojpk tu'uk jøts ja y'ixaajky.

³⁰ Janch namay ja jaa'y jam yja'tti ma ja jam wyinaty, jade'en ja tyikmendi pøn tekmya'at, pøn winap, pøn uum, pøn koma'at, jøts pøn tigati pa'am pøjkidip. Jøts ja jam tymwyingon tpiaktøø ma ja nwindson'ajtim wyinaty, xjats ja tyikmøkpøjkixy.

³¹ Janch ñigyumaap idø'øn ja jaa'y ja tyimya'widøø ku ja jade'en t'ejxti y'awijy ja uum jaa'y, jøts ku kyø' ja myøkpøkti pøn koma'atti, jøts ku yø'øyjø'økti pøn tekmya'atti, jøts ja winap jaa'y wyin'ejxwa'kxti. Xjats ja tjanchtukmøja'widøø ja Dios Teety pøn ja Israelit jaa'y Dios'ajtip.

Ku ja Jesús tyikaay ja ñimaktaxk milbi jaa'y

³² Winets ja nwindson'ajtim Jesús tyaxtsøøy ja pyabøjkpitøjk jøts ja tnimaay:

—Njanch'ayo'ijxpy øts yø jaa'y, tigøøk xøøw øts yø kujk xmøøtsinaañidi, jøts tø ja kyaaky kyøjxnidi. Ka' øts yø ayuu ngaxwa'andi jam tyøjkwindum, kuts yø jadi'iñi tuu'ajy y'ukjotkøjxnidit.

³³ Xjats ja pyabøjkpitøjk ñimaajiyi:

—¿Mats ya jadine'en nbøjkin ja kaaky ja jii'kxy jøts yø mayjaa'y jadine'en kya'adyit, jøts nipønts ya?

³⁴ Jøts ja øjts tyii'byikiidi:

—¿Winaak mdsapkaaky japti?

Jøts ja wyandøø:

—Wixujkyi, jøts ja ajkxuna'jk waani.

³⁵ Xjats ja wyaañ jøts ku ja jaa'y y'ixa'aktit, ³⁶ jøts ja tñaxajiyi'ñ wixujk ja tsapkaaky møøt ja ajkx, jøts ttamøja'wiyii'ñ ja Dios Teety. Jøts ja ttatujkiyi'ñ jøts ja øjts tmø'øy ja pyabøjkpitøjk, ja'ats ja yikwa'kxti jøts ja tmøødyi ja mayjaa'y. ³⁷ Niduki'iyi ja jaa'y øjts kyaydi jøts niduki'iyi kyujxidi. Yjaaktyimbyøkmujktinim ja' ja kaakwyindank ja wixujk kach. ³⁸ Nimaktaxk mil idø'øn ja jaa'y øjts kyaydi tum yaa'dyøjk, abiky ja tø'øxyøjkti møøt ja mutskuna'jkti, ka'ap ja yikmachowdi. ³⁹ Jøtsnim ja nwindson'ajtim Jesús

tminawya'kxi ja ja'a'y, jøts ja ojts ttatøjkiñi ja barki jøts ja ñijkxy jam Magdala etjotp.

16

Ku ja fariseotøjk t'amidoodøø ja Jesús jøts ja ttuk'ejxtit ja myilagri'ajtin

¹ Kuts idø'øñ ja jam jade'en ñijkxy, xjats ja fariseotøjk ja ñimejniyøø møøt saduceotøjkiti, jøts ja nugo kyajpxy'ejxwə'añiyi. Ja' ja ojts t'amidowdi jøts ja myilagri'ajtin ja ttu'unt, jøts tyuk'ejxidit ja myøk'ajtin jam tsajpwemp, pøni janch ku dø'øñ ja y'ukdiosu'ngi. ² Jøts ja yide'en t'adsøøy:

—Ku ja et chuu'ji, pø mnømpxi meets: “Tø'kxwamp tam yø et, kumi tsajpts yø tsajp kyaxi'iky”; ³ jøts ku yjøpy'aty jøts mnømidi: “Ka' tam yø et yam tyø'kxwə'añ, kumi tsajpts yø tsajp kyaxi'iky jøts yoots møøt.” iMeets win'øø'mbidi! ¿Sə ja tsajp wə'ats xñijawidi ku ja jade'en kyaxi'iky, jøts meets øts nja' ka' xñija'wiyi ku ja mjayiktuk'ejxti? ⁴ Yø tsaachka'øyjaa'y øts idø'øñ jade'en x'amidoodip jøts yiktuk'ejxtit ja miilagri; ja'ayits jadu'uk y'ukyiktuk'ejxnidit nayide'en sə ja Dios ttuuñ ja Jonás.

Xjats ja twinwə'ktuujty, jøts ja tyuu'døjkiyñiñ.

Ja fariseit ja'a'y y'ixpøjkin

⁵ Kuts ja pyabøjkpitøjk ñajxtøø jam nøø agø'øñ jam jaduktamajñ, jøts ja tja'dyigøydi ja chapkaaky, ka'ap ja wyinaty tø tkondi. ⁶ Winets ja nwindson'ajtim Jesús ja ñimaajyidi:

—Ukmadowdim; øyim mnay'ejx'etidit, ejxim yø fariseotøjk, ejxim yø saduceotøjk xkaajyidi yø chapkaaky midi wenk levaduri møøt.

⁷ Jøts ja pabøjkpitøjk agø'ømyi ñawyambi ñaxwə'jikidøø:

—Ja'agøjxp yø jade'en wya'añ ku ndsapkaaky tø ngakø'øñidi.

⁸ Myadoow ja nwindson'ajtim Jesús ja', jøts ja tñimaay:

—¿Tigøjxp ku jade'en mwə'andi jøts ku mdsapkaaky kya'etti? iÑiwine'enin meets ja janchja'win xkidyimyjagyepy! ⁹ ¿Ka'ap meets ja xja'gyuki, jøts ka' meets ja xja'myech ja tsapkaaky midi magoxk, midi øts ojts nyikwa'kxy, jøts øts ja ojts nmo'odi ja ñimagoxk milbi ja'a'y, jøts ka' meets ja xja'myech winaak kach ojts xpøkmukti ja abu'xk? ¹⁰ ¿Jøts ni ja'baat xkaja'myatsti ja wixujkpi tsapkaaky midi ndagumaay ja maktaxk milbi ja'a'y, jøts winaak kach ojts xjaakpøkmukti? ¹¹ ¿Sudso'ampyts ka' xja'gyukidi jøts ku øts ka' ndijy ja tymchapkaaky midi wenk levaduri møøt, midi yja'ajttip ja fariseotøjk møøt ja saduceotøjkiti?

¹² Xjaanimts ja tja'gyukidi jøts ku ja nwindson'ajtim Jesús kidi tymy-jatsapkaagyip ja wyinaty tø tñigajpxy midi wenk levaduri møøt, pø ja xipøjkinxi ja wyinaty tø tijy jade'en midi ñanky'ixpøjkidip ja fariseotøjkiti møøt ja saduceotøjkiti.

Ku ja Pedro wyaañ jøts ku ja Jesús yja'aji yiknitsokp, ja Cristo

¹³ Xjats ku ja nwindson'ajtim Jesús yja'jty jam etjotp midi ja Cesarea de Filipit kajp y'etip, jamts ja tyiktiiy ja pyabøjkpitøjk, jøts ja tñimaay:

—¿Sə ja'a'y wya'andi, pønik øts?

¹⁴ Jøts ja wyandi:

—Jade'en winaagin wya'andi jøts ku mets Juan Bautista; jøts jadu'uk wyamidi jøts ku mets mElías, jøts pømbits wamidip jøts ku mets mJeremías, uk pøngapøñ Dios kyugajpxy.

¹⁵ Winets ja Jesús tyiktiiy:

—Jøts meets, ¿sə mee mwə'añ, pøñ øts idø'øñ?

16 Xjats ja Simón Pedro t'adsøøy:

—Ja yiknitsokpi mets, ja Cristo, ja Dios U'nk.

17 Jøts nwindson'ajtim Jesús ja t'adsøøy, jøts ja tnimaay:

—Mets Simón idø'øn janchjaakxøñim, Jonás myajnkun'k, ka' pøn jaa'yip mets yø jade'en mduk'ejxip, ja Dios Teetyxi dø'øn yø jade'en mduknija'wiyip pøn jap tsajpjøtpty. 18 Tiiy me mwinnmay, møk me mwinnmay, patyts idø'øn myikxømö'øy Pedro midi tyijpy tsaa. Tøts mets nikøjxp øts yam nyik-tso'onda'akwa'añ ja nja'; jøts øts ja nyikmøjt'aakt, ni o'jkin niti ja mibaat kyamimada'agit. 19 Øts me nmøøpy ja kutujk'ajtin; pøni pøn mets ya ja pyøky maa'kxujkip, nayide'en ja tsajpjøtpty yikmaa'kxukt. Jøts pøni pøn mets ya mgamaa'kxujkpy, nayide'en ja tsajpjøtpty kyayikmaa'kxukt.

20 Xjats ja nwindson'ajtim Jesús tnimaay møkta'aky ja pyabøjkpitøjk, jøts ja ka'ap pøn ttukmado'odit ku ja' Cristo, ku ja yiknitsø'øky.

Ku ja Jesús tnigajpxy ja y'o'jkin

21 Winetyipts ja nwindson'ajtim Jesús wa'ats tnigajpxøjkii'ñ, jøts ja ttukmadøy ja pyabøjkpitøjk jøts ku ja ñøjkxt jam Jerusalén, jøts ku ja mōjaa'dyøjk ja yikxon yik'ayo'ombaa'diyit møøt ja teetywindsøndøjkti jøts ja kajpxwejjpitøjkti. Ojts ja ttukmadøy jøts ku ja yik'oogit, jujkpyøkppts ja jadigojk, jøts ja kyidigøøk xøøw pyidsø'ømt jadigojk oo'kpi jutjøtpty. 22 Winets ja Pedro ja ojts yikniikxyi abiky, jøts ja møkta'aky ñimaajyi:

—iWindsøn'ajtim, katsojknim Dios Teety jøts jade'en mjatt! iKa'ap jade'en mdyimyjatt mdyimgyubatt!

23 Xjats ja nwindson'ajtim Jesús tniwa'kjimbijty ja Pedro, jøts ja tnimaay:

—iMets miku'jiwa'ak, majstutk øts!, nugo mets mjanchyik'adukti. Ka' mets jade'en mwinnmay sam Dios Teety wyinnmayin, jade'en me mwinnmay sam øy pøn naxwii'ñit jaa'y.

24 Winets ja nwindson'ajtim Jesús tnimaay ja pyabøjkpitøjk:

—Pøni pøn tsojkin tmøøt'ajtp jøts øts nja' jade'en xpaduujnit, ka' mibaat kø'øm ñadyunk'atit, ja'ayi ku amumjoojt ñadyamiyoxit ja ayo'on jøts idø'øn jade'en tpadu'unt. 25 Pønts kajade'enduñim nay'ejxip, niwindem ja tkapaaty ja nitso'ok'ajtin; jøts pøn ø xku'ayo'ombajtip, ja'idø'øn tpaatp ja nitso'ok'ajtin.

26 Ja ti ja ñiwyala'ant øy ja jaa'y tjaja'bøjkixy ja naxwiiñ'ajtin, jøts ja y'anmija'win ne'egi wyindigøy? Jabi ka'axi mibaat ja ñitso'ok'ajtin ja tkuju'uty. 27 Ja Dios Teety øts myøk'ajtin nmimejnip møøt ja ankilistøjkti, jøts øts nwandu'undit sa jaty nidu'uk nidu'uk pyaat'aty yiktu'undit. 28 Janch øts idø'øn nwa'añ, jøts ku ya ja winaagindi pøn ka'ookitp kunim ja jawyeen tyimy'uk'ejxtit ku ø nmime'ent ja Dios Teety kyutujk midi yjaa'y ja tyanitanaapy.

17

Ku ja Jesús adsu'jky y'atstigajch, amuum chamqambøjkixy

1 Xjats ku kyiduduk xøøw'ajty, winets ja nwindson'ajtim Jesús tmøødiyi'ñ ja Pedro, jøts ja Juan møøt ja y'ajch Jacobo, jøts ja ojts ñøjkxti ma ja kojpk jam janch køjxp; 2 jamts ja ñanktyigajtsi, wemp am ja tyimy'ejxti ku wyeen y'aaw ja jade'en yjajty sam xøøw y'añin, jøts ja wyet jade'en pyoobiyi'ñ sam ja jajin.

3 Jøts ja jotmøñ t'ejxpaatti ja Moisés jøts ja Elías, ku nwindson'ajtim Jesús ja tmøøtmadya'aky. 4 Winets ja Pedro tnimaay ja nwindson'ajtim Jesús:

—Windsøn'ajtim, ityimy'øy'ajtp ku øø ndyimyam'aty! Pøni mdsøjkpy jøts øøts ujts'aadyøjk tigøøk nyik'øyti; tu'uk mets mja', tu'uk Moisés yja' jøts tu'uk Elías yja'.

⁵ Nay ixamnim ja Pedro jade'en wya'añ ku ja yoots jam yja'jty janchyikwin'oo'kpm, jøts ja tuki'iyyi tyik'adigøoy; jøts jap yootsjøtpy ja Dios Teety y'ayuujk yikmadøoy ku yide'en wya'añ:

—N'u'nk øts idø'øn ya'at, yø' øts idø'øn njaaktajotkujk'ajtpy. Mimadowdi pøni sa wya'añ.

⁶ Kuts ja jade'en tmadowdi, xjats ja winda'ak ñaxkidakti, yikxon ja yjanty-imchø'jkidøø. ⁷ Jøts nwindsøn'ajtim Jesús ja ñimejnidi, jøts ja tjoynidi, yide'en ja ñimaajyidi:

—Pidø'økti; kidi mdsø'øgidi.

⁸ Xjats ku ja y'ejxjø'øktøø nimā ja pøn tka'uk'ejxpatnidi, nadyu'uk ja nwindsøn'ajtim Jesús jam.

⁹ Jøts ja kyidāknidi, ku kojpkøjxp choondi, jamts ja nwindsøn'ajtim Jesús ja møktā'aky y'ana'amidøø:

—Kidi yø pøn xamimadya'akti midi tø x'ejxti, jaanim ku øts wyinaty tø njujukpyiky jadigojk.

¹⁰ Winets ja pyabøjkpitøjk ja tyiibyøjkiyi:

—¿Tigøjxpimts yø kajpxwejpitøjk jade'en wya'andi jøts ku ja Elías jawyeen mye'ent, jøts ix'oojknim ja yiknitsokpi?

¹¹ Xjats ja nwindsøn'ajtim Jesús ja ojts yide'en t'adsøy:

—Janch me'emp idø'øn ja Elías, jøts ja tuki'iyyi tyik'øyigyøxt. ¹² Øtsts wamp jøts meets nnøjmi jøts ku Elías tø y'atsmengojmi, jøts nigidi tø t'ejxkapti, tø ja twandundi sam y'anmija'win tyimñekti. Nayide'ents øts yø xyik'ayo'ombaattit.

¹³ Jaanimts ja pyabøjkpitøjk ja tjā'gyukidøø, jøts kudam ja nwindsøn'ajtim Jesús ja ja' tyamimadya'agvyidi ja Juan Bautista ku ja Elías tijy tø y'atsmengojmi.

Ku ja Jesús tyikmøkpiky tu'uk ja mixyu'nk pøn wyinaty ja miku' tø tyatøkiyi

¹⁴ Xjats ku ja ojts yja'atti mā jaa'y jam wyinatyi, jamts ja nwindsøn'ajtim Jesús tu'uk ja jaa'y ñimejniyi jøts ja ojts wyinguxanay'øyiyi, yide'en ja ñimaajyi:

¹⁵ —Me teety, ayo'ejxik øts n'u'nk, adsu'jky adsu'jky mø'ødyi pa'am yø pyaadyiyi jøts tsaach'ijxyim tyuñiyi; atsnaxkidākp may'ojk jam jønjothp, uk nøøjøtpy paat ñødøki. ¹⁶ Ixyats mets yø mbabøjkpitøjk yø tø njadanimiñ, ka'ats yø myayidi jøts yø tyikmøkpøktit.

¹⁷ Jøts ja nwindsøn'ajtim Jesús y'adsøoy, jøts tnøjmi pøn jam wyinatyi:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkit? ¿Jøts windemnim meets yø yjade'embī xuktatso'okt ku øts yø ejtp njanchjanigajpx'ity? Meets, yikmen yø pamaa'y.

¹⁸ Jøts ja nwindsøn'ajtim Jesús ojts tkajxpidsimy ja miku', ojts ja ttukmajt-stu'uty ja mixy jøts idø'øn ja jade'en jatyi tyimyøkpiky.

¹⁹ Winetnimts ja nwindsøn'ajtim Jesús ja pyabøjkpitøjk myigajpxi jibiky'ampy, jøts ja ojts yiktiiyiyi:

—¿Tigøjxp ku øøts yø miku' tø ngayikpidsimy?

²⁰ Xjats ja nwindsøn'ajtim Jesús ja ñimaajyidi:

—Ja'agøjxp ku mjanchja'win kyamøkidi. Janch øts idø'øn nwa'añ ku jeexyip ja mjanchja'win ñiyjade'en xmøøt'atti sam mortas pajkin, øyts meets yø

kojpk xnøjmit: “Jiwa'ak ya jøts mnøjkxt abikytsoo”; jiwa'akpts ja kojpk. Ka' mee ti mgamayit ku janchja'win møk xjanchmøø'tattit. ²¹ Yø yjade'embu miku' ja yø iiy pyidsimy ku Dios n'ajot'ajntin, ku n'amaay'ajntin ngagugaa'yint ngagu'uujka'ant.

Ku ja Jesús tniğajpxy jadigojk ja y'o'jkin

²² Nay ixjamnim idø'on ja wyinaty wyidetinim ma ja et txøwi Galilea, ku ja nwindson'ajtim Jesús ja ojts tyukmadøyidi jøts ku mayjaa'y ja kyøyakit, ²³ jøts ja yik'ooğit, jujkpyøkppts ja jadigojk kyidigøøk xøøw. Ja'ats ja tymchaachjot-mayja'widøø ku ja jade'en tnija'widøø.

Ku ja tsaptøjk yikugubety

²⁴ Xjats ku ja nwindson'ajtim Jesús tmøøtja'jty ja pyabøjkpitøjk jam Capernaumit kajpkøjxp, jamts ja jaa'dyi pøn yiktsaptøjkugubajttip, ja'ats idø'on ojts tniñøjkxti ja Pedro, jøts ja ojts tyiktøwdi:

—¿Ka' meets yø myik'ixpøjkpi tkugubety yø tsaptøjk?

²⁵ Jøts ja Pedro y'adsøøy:

—Kyugubejtpyxi yø'.

Xjats ku ja Pedro tyøjkiyii'ñ tøjktøpty, japts ja nwindson'ajtim Jesús ja jayteen ñimaajyi:

—¿Sə me Simón mwinmay? ¿Pøn yjawi yø windsøndøjk tyukugubajttip, ja kyøømiguk uk ja wenk jaa'y?

²⁶ Jøts ja Pedro y'adsøøy:

—Ja wenk jaa'y yø tyukugubajttip.

Jøts ja nwindson'ajtim Jesús y'adsowimbijty:

—Aaa ka'ats tam adøm idø'on xpaat'ajtyim nyajkind ja tsaptøjk kugubajtin, pøni abiky jaa'y tyukugubajttip. ²⁷ Jøts nipøn ngayik'ambøjkin, nøjkx mejy'agøøøm jøts jam xjuutt ja ajkx, pøni midu inet mijawyeen mjuu'tpy, ja' y'aawjøtpyts inet meen xpaatt tu'uk. Pyaattpts inet ja' jøts ja namajtsk ngugubajtin'ajtin; ja'ats myiknøjkxp jøts x'atsmo'ot ja yikugubajtpi.

18

Pøn idø'on jawaani møj ma Dios ja yjaa'y ja kyutujk ttanitani

¹ Ñiñayi winets ja nwindson'ajtim Jesús pyabøjkpitøjk ñimejniyi, jøts ja ojts yiktiiyiyi:

—¿Pømbi øø nidu'ugin ja tyimy'ukmøjtøtkip ku ja mgutujk xyiknaxkida'akt?

² Winets ja nwindson'ajtim Jesús tyaaixiyii'ñ tu'uk mutsk mixyu'nk, jøts ja tyikwa'k'øyiyii'ñ ja' y'agujk'amdi, ³ jøts ja tniimaay ja pyabøjkpitøjk:

—Janch øts idø'on nwa'añ, pøni ka' meets ja mdsinaa'yin xyiktigach, pøni ka' meets jade'en mnabyikta'agy sam ne'egi mutskuna'jk yja'gyukindi, ka' mee mibaat jade'en myikupøkt jøts mdøkidit ma Dios ja kyutujk ttanitani ja naxwii'ñit jaa'y. ⁴ Patyts ja' myøjtøkit jam ma Dios ja kyutujk ttanitani ja naxwii'ñit jaa'y ja' pøn yik'ayowim jaa'y'ajtp, pøn jade'en nabyiktaajkip sam ya'at mutsku'ngin. ⁵ Jøts øy pøn pøni xukpøjkidip øts ja nja' midu yik'ayowim jaa'y'ajttip sam ya'at mutsku'ngin, øts idø'on ja wyinaty køøm xkupøjkp.

Ja' midu yikpøkpyajtp

⁶ Jøts pøni pøn t'ukyikpøkyu'ump øts ja nja' pøn ø xjanchja'widip, ne'egi ja øyik y'ijty jøts ja mejyøtpy yikuwibejpit, ku møj paandaak ja y'ukyiktayukxøtsit. ⁷ Janch kawindøøp yø naxwii'ñit ku ja y'ity midu jaa'y

tyikpøkpyajtp! Nøjx naxpyim yø jade'en, jøts iyjanch'ayøøy ja' pøn ja myigu'uk yikpøkyundip!

⁸ Paty nayide'en pøni myikpøkpyajttip mgø' mdeky, ja'ayi ku xtyimwyiboottit jøts jagam xpikta'aktit; ne'egi øy'atp ku køtuk paktuk mdøkit jap mā Dios jam, jøts kidi ka'pxy xminijxxy ja mgø' mdeky jap infierno. ⁹ Jøts pøni yø mween yikpøkyuujnip, nawyeenjuudits jøts abiky xpikta'akt; ne'egits øy'atp ku ne'egi wendu'uk mdøkit jap mā ja Dios, jøts kidi yø mween ka'pxy xmidøki ku myikuwibepit jap jønjøtpy midi jap infierno.

Ku ja Jesús tmadyakpaajty tu'uk ja borreek midi tigøøpy

¹⁰ Kidišts øts ja n'u'nk n'una'jk xmijotma'jtidi. Janch øts idø'øn nwa'añ jøts ku y'ankilis ja jap tsajpjøtpyti Dios Teety wyingujkpy. ¹¹ Pø ja'axi tøn nniimiñ jøts øts ja nyikništo'ok'attit pøn ja pyøky yikwindigø'øyiñidip.

¹² ¿Sā mee m'ukwa'añ? Ku jaa'y jam wyinaty tmøøt'aty nimagø'pxy ja borreegi, jøts kuts ja tu'uk tyigø'øty, ¿ti ka'ap ja t'ats'ixa'at? Kuwanixi ja jam kojpkøjxp tyikta'ant ja ñimakta'pxy myaktaxujkpi, jøts ja t'ats'ixa'at midi tø tyigøy. ¹³ Kuts ja tpaatt, ne'egi tyaxonda'akpts ja' midi tø y'uktigøy jøts nika'ap ja jade'en ne'egi yiktaxonda'akti ja ñimakta'pxy myaktaxujkpi midi kadigøødyip. ¹⁴ Jade'ents meets idø'øn ja Dios Teety mjawiyidi pøn jap tsajpjøtpy, ka'ap ja tšøky jøts y'u'nk y'una'jk ja jade'en tyigø'øty.

Sā nmigu'uktøjk nmaa'kxuujkint

¹⁵ Pøni jam mmigu'uk mga'ødyuñiyi, nagyajpxidits anadyu'uk jøts xukwinjāwit ja pyøky. Pøni kyupijkpyts, tøts ja mja' wyinaty myajada'aky jøts ja pyøky nayide'en tkagu'ayo'ombaadit. ¹⁶ Kuts mgagupøkit ku ka' mmadoowa'anit, winets tu'uk majtsk jaa'y xwaadso'ot jøts ja t'ejxtit tñijawidit pøni sā jam pøn wya'añ. ¹⁷ Kuts ja kyayikmøjpiktakmidit, winets xukmado'ot ja mayjaa'y pøn tjanchja'widip ja Dios; jøts ku ni ja'baat kyayikmøjpiktakmidit, winets ja jade'en xpikta'aktit sam ja jaa'y pøn Dios tkajanchja'widip, uk jade'en sam yikugubajtpitøjk yikwa'andi yiktejtj.

¹⁸ Janch meets idø'øn nnøjmi, pøni pøn meets ya ja pyøky maa'kxuujkip, nayide'en ja tsajpjøtpy yikmaa'kxukt. Jøts pøni pøn mets ya mgamaa'kxuujkpy, nayide'en ja tsajpjøtpy kyayikmaa'kxukt.

¹⁹ Nayi ndukmadoodip icyam, pøni pøn tu'uk majtsk nagyajpxidip, jøts t'amidoowa'andi tpoektsoowa'andi tigati ja Dios Teety, mo'ojidipts ja'. ²⁰ Pøni mā tu'uk majtsk ñamyukyidi ja jaa'y øts køjxp, jamts øts ja møøt n'ity.

²¹ Xjats ja Pedro ojts tñinijxxy ja nwindson'ajtim Jesús, jøts ja tñiibiyiky: —Windsøn'ajtim, ¿winaak ojkjn øts ja nmigu'uk nmaa'kxt ku øts ja xka'ødyu'unt kawinaak ojk? ¿Øy ku wixujk ojkjn?

²² Jøts ja nwindson'ajtim Jesús y'adsøøy:

—Ka'axi me nnøjmi jøts ku ja'ayi wixujk ojk. Nømpxi øts yam nwa'añ jøts kawinaak ojk pøni winaak ojk meets ja jaa'y mmidundigøyidi.

Ku ja Jesús tmadyakpaajty ja tumbi pøn tkamaa'kxujk ja myigu'uk

²³ Jade'en idø'øn ja Dios kyutujk sam tu'uk ja windsønin pøn ja tyumbitøjk ojts tyoipayø'øy. ²⁴ Exam idø'øn wyinaty tñibøkinim, ku ja ojts yiktaniway tu'uk ja tyumbi midi ja wyinaty kawine'en miyoj'ajtyip. ²⁵ Kumi ka'ats ja tyumbi myeeñ ti ja tyagubatp ja yoj, winets ja windsøn wya'añ jøts wan tyikni'ookti møøt y'u'nk ñidø'øxy, jøts pøni ti jaty jam pyikta'aky'ajttip. Jøts pøni wine'en ja choobaatti, ja'ats ja yoj kyudøkip. ²⁶ Xjats ja tumbi tminuu'kxaajky ja wyindsøn, ojts ja twinguxani, yide'en ja tñimaay: "Windsøn, miduda'aky'ajtk

øts, ngubatp øts ja tuki'iyi.” ²⁷ Xjats ja windsøn ja ojts y'ayo'ijxyi, jøts ja yoj ja tyamaa'kxuujkiyi jøts ja yik'awa'atspidsøjmiyi. ²⁸ Kuuyi ja tumbi ja'ayi pyidsiimy, jøts ja ojts tu'uk tminabyaadyiyi ja myigu'uk ja myøtumbi, ja' ja miyoj'ajtiyip tu'uk pesi majtsk pesi. Yukpajkiixpy ja ojts tyimyach jøts ja jadi'ini tyukpani, yide'en ja møk'ampy tnøjmi: “iPe'tpy xkubatt ja yoj, yak putyi!” ²⁹ Winets ja myigu'uk ñagyuxendyaajkøø ja' wyindum jøts ja ojts myinuu'kxa'agyiyi: “Miduda'aky'ajtk øts, ngubatp øts ja tuki'iyi.” ³⁰ Jøts ja yjadu'ukpi, ka'ap ja tkupijky, ojts ja ñijky jøts ja ojts tpikta'aky ja myigu'uk jap puxøjkjtpy kunim ja tymgyubatt ja yoj. ³¹ Kuts ja yjadu'ukpi ja jade'en t'ejxtø, tyimy'ayojidi ja' jøts ja ojts t'atstukmadowdi ja wyindsøn sa jaty ja wyinaty tø t'ejxti. ³² Winets ja windsøn ja tyumbi tnankwyadsojøø mididi idø'on jade'en adøts, jøts ja tnimaay: “iMets miku', burri! Tø mets ja myoj ndamee'kxy ku me tø xminuu'kxa'aky. ³³ Nayide'en me ndiij jeexyip ja mmigu'uk x'ayo'ijxy sa me tø n'ayo'ijxyin.” ³⁴ Yikxon ja windsøn yjanty-imy'ambijky, jøts ja tkejxy ayoobi kunim ja myigubajtkøxit.

³⁵ Jøts ja nwindsøn'ajtim Jesús yide'en myadyak'abajtiyii'ñ:

—Nayide'en meets ja Dios Teety mduniyit põni ka' amumjoojt xmaa'kxuukti ja mmigu'uk.

19

Ku ja Jesús kyajpxwiyi sudso ja amajtsk'ajtin ñaxy

¹ Ku ja nwindsøn'ajtim Jesús jade'en wyinaty tø wya'añ, xjats ja chøø'ñ Galilea etjotp, jøts ja ñijky jam Jude'it etjotp mididi tamp nøøbukø'om Jordán.

² May jaa'y ja pawidejtiiyip, jøts ja jam may tyiktsøøjky ja pamaa'y.

³ Winets ja fariseotøjk winaagin tnimendi ja nwindsøn'ajtim Jesús jøts ja tkajpxy'ejxwä'andi, ojts ja tyiktøwdi:

—¿Kutuky yø jade'en jøts øy põn tmatjstu'tt ñidø'øxy ku ja yiin waan tyundigø?

⁴ Jøts ja t'adsøøy:

—¿Ka'anin meets ja Dios kyajpxy x'ejxi? Pø patyxi ja yaa'y ja tø'øxy tyik'øyyii'ñ põn xyiktso'ondaajkindip. ⁵ Nayi nøøm ja': “Ja'agøjxp ja yaa'dyøjk ja tyety ja tyaaq tmatjstu'tt, jøts ja ñidø'øxy ja møøt tu'ugyi ja'ayi chøønit.”

⁶ Tu'ugyi ja ñamyayi tymbyaaty øy ja jaa'y yjanamajtskidi, paty ka'ap pyaat'aty jøts jaa'y ja tnankñawya'kxit mididi Dios tø ttanibiktaagi tu'uk yaa'y jøts tu'uk tø'øxy.

⁷ Xjats ja ttiibyøjkti:

—¿Jøts tigøjxpts ja Moisés tyajky ja tiy'ajtin ja tø'øxyøjk jøts øy ja yikmajtstu'tt?

⁸ Jøts ja nwindsøn'ajtim Jesús ja t'adsøøy:

—Meets jade'en ja mgawindiy'ajtin myikmajadakpy ku ja Moisés ojts tyikutuky jøts øy xminawya'kxidit ja mnidø'øxy; ka'apts yø y'ijty jade'en tso'onda'agyip. ⁹ Øts wamp, põni põn tminawya'kxiip ja ñidø'øxy a'ø'y'ampy, ku ja wenk yaa'dyøjk ja wyinaty tjagamøø'taty, jøts ja tmøø'tamajtskiyoyimi ja wenk tø'øxyøjk, ja' idø'on pøkyump; nayi pøky ja nayide'en põn tmøø'tamajtskiyip ja tø'øxyøjk mididi tø yikmajtstu'tty.

¹⁰ Xjats ja pyabøjkpitøjk ja ñimaajiyøø:

—Pøni jade'endam yaa'dyøjk tmøøtsøøni ja ñidø'øxy, ne'egi øy tamts ja' ku nguidyimy'amajtska'ant.

¹¹ Jøts ja nwindsøn'ajtim Jesús ja ñimaajyidøø:

—Pø janch jade'en, ka'apts niduki'iyi tkupøkti. Ka'ap ya'at winmaa'n pøn nugo ajawi tjä'gyuki, ja'ayi dø'øn tkupøktip pøn Dios møøjyidip. ¹² Ja mayjøøjp ja winmaa'n jøts jaa'y kya'amajtskidi: ku winaagin ka'pxy kyamendi naxwiiñ, winaagints kø'øm ñadyuñidi ku ñay'isabikyidi jøts ka'y'amajtskidi, jøts ja winaagin pøn tkagu'amajtskip ja Dios kyutujk. Pøni pøn jade'en ttunwamp, wants jade'en ttuñ.

Ku ja Jesús tkunuu'kxy ja mutskuna'jk

¹³ Winets ja nwindson'ajtim Jesús yiktaniamiñ mutsk mixyuna'jkti jøts ja tkønixajt jøts ja tku'amidowit; jøts ja pyabøjkpitøjk yide'en ja tnimaay ja jaa'y pøn twaamendip ja mutskuna'jk jøts kyatøkidit ja mutskuna'jk. ¹⁴ Yide'ents ja nwindson'ajtim Jesús wyaañ:

—Majtstu'utti, wan øts yø mutskuna'jk xnimendi, kidi meets yø xkayiknajxni; yø' dø'øn Dios ja'ajtidip pøn jade'endi sam yø mutskuna'jkindi, ja'ats tpaattip ja Dios kyutujk.

¹⁵ Jøts ja ojts tkunuu'kxy ja mutskuna'jk, jøts ja jam ojts cho'oni.

Ja kumeeñ jaa'y

¹⁶ Tu'uk idø'øn una'jk jaa'y, ja'ats ojts t'ats'ixy ja nwindson'ajtim Jesús, jøts ja t'atsnimaay:

—Mets øyjaa'y yik'ixpøjkpi, ¿ti øy'ajtin ø ndu'ump jøts øts ja n'anmija'win ja jujky'ajtin tpaatt xemikøjxp?

¹⁷ Xjats ja nwindson'ajtim Jesús ja tnimaay:

—¿Tiku ø xnøjmi jøts ku ø n'øyi? Tu'ugyi ja' midi øy, jøts ja Dios idø'øn ja'. Pøni mbaatwampyts ja jujky'ajtin xemikøjxp, paduujnits ja Dios kyutujk.

¹⁸ Jøts ja una'jk jaa'y wyaañ:

—¿Midi'ibi?

Jøts ja nwindson'ajtim Jesús tnimaay:

—Kidi myikjaa'y'øøky; kidi mmigu'uk ñidø'øxy xpøjkxi; kidi mmeech; kidi pøn xwindaa'y'aty; ¹⁹ windsø'øgi mdeety mdaak; jøts tsok mmigu'uk sam kø'øm mnachøkyin.

²⁰ Jøts ja una'jk jaa'y yide'en tnimaay ja nwindson'ajtim:

—Tø øts yø jade'en njatunguixy, jaayim øts yø jade'en mbaduñ ku nmutsk'aty. ¿Tits øts idø'øn njaaktu'ump?

²¹ Jøts ja nwindson'ajtim Jesús ja ñimaajyøø:

—Pøni øy yikxon mjaa'y'atwa'añ, nøjcx x'atsto'okjøøkixy ti jaty jam mjagejpy jøts xmo'ot ja ñimeeñ ja ayoobi jaa'y, winets xpaatt ja øy'ajtin ja xondaajkin jap tsajpjøtpy; ku jade'en x'uktu'unt, winets mme'ent jøts ø xpawidett.

²² Xjats ku ja jade'en tmadøøy, jøts ja yjotmadyøjkijii'ñ, kumi jantyim-gyumeeñ, kumi jantyimgyubikta'aky idø'øn ja'.

²³ Winets ja nwindson'ajtim Jesús tnimaay ja pyabøjkpitøjk:

—Øts yam tyimwyamp jøts ku møk y'aduky; jøts kumeeñ jaa'y tpaajtit ja Dios kyutujk midi jap tsajpjøtpy. ²⁴ Jøts jaaktymwyamp øts jøts ku ja kumeeñ jaa'y janch apeni ñaxti ma Dios ja kyutujk ttanitan tuki'iyi, pø ne'egi tsøjik ñaxt ja møj jiyujk jap xu'unjutjøtpy.

²⁵ Kuuyi ja pyabøjkpitøjk ja jade'en tmadoodøø, janch ñigyumaap ja tyimya'widøø, jøts ja xem yam ñayiktøøjidøø:

—¿Pønimts idø'øn nitso'ok'atp?

²⁶ Xjats ja nwindson'ajtim Jesús ja ojts y'ijxyidi, jøts ja ñimaajyøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsepjawi.

²⁷ Xjats ja Pedro tyiktiiyi:

—Windsøn'ajtim, tō øø tuki'iyi n'ixmajtskixy ti jaty øøts y'ity njagejpy, jøts øø tō ndsøøn jøts me myikpawidity. ¿Tits øøts idø'øn nbaatp, ti øøts idø'øn nbøkp?

²⁸ Jøts ja nwindson'ajtim Jesús ja t'adsøøy:

—Janch øts idø'øn nwa'añ, ku yja'att ja xøøw ja jumøjt ku tuki'iyi jyemygyøxt jadigojk, ku ø n'ixa'akt ngutujktaajkjøtpy ku øts ja møk'ajtin nmi'ixa'akt, jøts meets wine'enin meets ixa xpawidity, xnayimøøt'ixa'akp meets nayide'en nimakmajtsk jap kutujktaajkjøtpy, jøts xädyu'undit ja Israelit jaa'y niduki'iyi. ²⁹ Jøts nayide'en pøn jaty tō tmajststutkøxti ja tyøjk, ja myig'u'uktøjk, chø' y'uch, tyeety tyaak, y'u'nk ñidø'øxy, uk ñaajx kyam tmajststuttibaat øts ngutujkøjxp, yikmo'odipts ja jinaxy jinaxy øy ti, jøts pyaattip ja' ja jujky'ajtin midu xemikøjxp. ³⁰ Jøts may ja wyindigø'ødyit pøn ixyam namyøjpi'ktaajkidip kø'øm; jøts pøn ixyam ne'egi windigøy'ejttip, ja'ats ne'egi nøjx møjtøkidip.

20

Ku ja Jesús tmadyakpaajty ja tumbitøjk

¹ Jade'enin idø'øn ja Dios kyutujk midu yjaa'y tyanitanaapy sam tu'uk jaa'y kyugam'atyn jøts ja chøøn jøpyi jøpyi tumbi ixaabyi jøts ja y'u'vitsa'am pyidø'økt. ² Ojts ja tyikwin'øyidi møøt ja tumbitøjk, øy ja tmiju'uty tu'uk puxmeeñ tukxøøw, jøts ja ojts tkexy tumbi jam kyamjøtp. ³ Jøts idø'øn ja ojts cho'ongojmi, ja xøøw wyinaty tuk'ajopu'nk, jøts ja jap maayjøtpy ojts tjaak'ixy ja jaa'y pøn awatsidip. ⁴ Yide'en ja tnimaay: “Nøjx mee nayide'en mduñ jap kamjøtpy, jøts nmiju'udyit nayide'en sam pyaat'aty.” Winets ja ojts ñijøxti. ⁵ Xjats ja windsøn cho'ongojmi ku ja xøøw kyukiyi'ñ, nayide'en winakxyøøw nay ja tumbi dø'øn ja y'ats'ejxkojmip. ⁶ Jøts ku ja xøøw jawaani kyajajxni, xjats ja ojts cho'ongojmi tumbi ixaabyi, jøts ja ojts ñijky nay jap maayjøtpy, jøts ja ojts tjaakpaaty ja jaa'y pøn wyinaty awatsidip, yide'en ja tnimaay: “¿Tiku meets ya nugo mxinaxy, ti kidi mee mdunwa'añ?” ⁷ Yide'ents ja y'adsøødø: “Kumi ka'ap øø pøn xyiktunkpaatwa'añ.” Xjats idø'øn ja tnimaay: “Nayi nøjxkts mdundi øts ngamjøtpy, jøts nmiju'udyit.” ⁸ Xjats ku y'ux'ajty, winets ja windsøn tnimaay ja tyumbi midu yiktump: “Yaajxi yø tumbitøjk jøts xmo'ot myijuu'ñ yø' jawyenidip pøn ix'oojk tō tyøkidi tumbi, jøts ja ix'oojk xmiju'uty pøn jawyeen tō tyøkidi tumbi.” ⁹ Winets ja myendøø pøn wyinaty ix'oojk tō tyøkidi tumbi ku ja xøøw jawaani kyajajxni, jøts ja myijuu'ñ ja ojts ka'pxy t'axajidi tu'uk puxmeeñ nidu'uk nidu'uk. ¹⁰ Xjats ku yja' ja tyaja'jtidoø pøn wyinaty jawyeen tō tyøkidi tumbi, jade'en ja wyinmaydi yikmiju'udyip ja tijy jawaani tsowi; nayide'en myijuu'ñ ja ojts t'axajidi tu'uk puxmeeñ nidu'ukjaty. ¹¹ Ku ja jade'en ojts t'axajidi ja myijuu'ñ, xjats ja tmi'ambøjktøø ja wyindsøn, ¹² yide'en ja tnimaadyøø: “Pøn ne'egi oojk tō yja'atti, ja'ayi tō tyundi tuk'hori; jøts ne'egi nayide'en tō xmijuy sam øø tō xmijuyin, jøts tøts øøts yikxon nduñ jøts øøts yikxon tukxinaxy tō nni'añ.” ¹³ Jøts ja windsøn y'adsøøy, yide'en ja winaagin yiknimaadyøø: “Ka' me migu'uk yam sa nduñ. ¿Ti kidi tō nnagyajpxyin jøts ku nmiju'uty tu'uk puxmeeñ? ¹⁴ Axaji yø mmijuu'ñ jøts mnøjxni. Nayide'en øts yø nmijuuwya'añ pøn oojk tō tyøkidi tumbi sam mee tō myikmijuyin. ¹⁵ ¿Pøn øts yø ndejñ jade'en xkaduktu'ump pøni sa øts nmeef kø'øm nyiktunkpaatwa'añ? ¿Uk yø' idø'øn m'ama'at'ajtpy ku n'øyjaa'y'aty?”

¹⁶ Jøts ja Jesús jadigojk yide'en wya'añ:

—Jade'ents idø'on ejx øts ja nwa'añ, pøn tandip ix'oojk, ja'ats ne'egi jawyenidip, jøts pøn jawyenidip, ja'ats ta'andip ix'oojk. Kumi may ja'adi pøn yiktukmadoodip jøts mye'endit, niwaanits ja'adi pøn yik'a'ejxidip jøts tya'andit. Nayide'ents ja Dios Teety ttu'unt ja naxwii'ñit jaa'y.

Ku ja Jesús tnigajxpy jadigojk ja y'o'jkin

¹⁷ Xjats ku ja nwindson'ajtim Jesús jam wyinaty tuu'amni midi Jerusalén nøjxpx, winets ja abiky tjiwaay ja pyabøjkpitøjk midi nimakmajtskti, jøts ja tnimaay:

¹⁸ —Ixya tø nbejtyindi Jerusalén ma øts nyikøyakt, jøts øts ja teetywindsøndøjk, jøts øts ja kajpxwejpitøjk nyiktagidøkit pøn ø xyik'ooktip.

¹⁹ Ja'ats ø xkøyaktip jøts øts ja xagidøkidit pøn ka'israelit jaa'dyi, ja'ats ø nxix'ektip xjaxe'ektip, ja'anim ø xwinwoptip xjipwoptip jøts øts ja xyikruspattit; kidigøøk xøøwts øts ja o'jkin nmimada'akt jøts ø njujkpyøkt jadigojk.

Ku ja tø'øxyøjk t'amidøøya may'ajtin midi tyaak'ajtp ja Jacobo møøt ja Juan

²⁰ Winets ja Zebedeo y'una'jk jam myendøø møøt ja tyaak ma ja nwindson'ajtim Jesús jam wyinaty. Ja Juan idø'on ja' møøt ja Jacobo, ja'ats idø'on ja tyaak jam ojts twinguxani ja nwindson'ajtim Jesús, jøts ja t'amidoowa'añ tu'uk ja may'ajt. ²¹ Jøts nwindson'ajtim Jesús ja ojts yiktiyiyi:

—¿Ti dø'on mdsøjkpy?

Jøts ja t'adsøøy, yide'en ja tnimaay:

—Tun may'ajt, jøts øts n'u'nk xyik'ixajkit adsow aduuk ku mgutujk xyiknaxkida'akt, tu'uk aga'ñ jøts jadu'uk anajy, jøts jade'en ja kutujk tmida'andit.

²² Jøts ja nwindson'ajtim Jesús ja y'adsoojidøø:

—Ka' mee xnijawidi pøni ti mee m'amidoodip. ¿Mgupøkp meets ja ayo'on midi ø nbaatp?

Jøts ja wyandi:

—Ngupøkp øøts ja'.

²³ Xjats ja tnimaay:

—Janch tiigyajpxy. Mgupøkp meets ja' sa jaty ø njatt ngubatt; jøts kuts øts idø'on xmøøtsinaawya'andi tu'uk aga'ñ jøts jadu'uk anajy, ka'øtsip ja xpaat'ajtip jøts meets jade'en nyik'ixa'akt, ja' ja yikmo'odip pøni pøn ja Dios Teety kø'øm jade'en tø tyanibiktaagiyidi.

²⁴ Xjats ku ja jade'en tmadowdi ja yjanimajkpidi, jøts ja tjantyimy'i'ambøjktøø ja ñamajtskpidi midi tukjaa'dyi. ²⁵ Jøts nwindson'ajtim Jesús ja ojts yjayajxniyidi niduki'yiyi, jøts ja ojts ñii'mxyidi:

—Jade'en sam x'ejxtin xnijawidi, ja jaa'y pøn tnitanaadyip ja naajx ja kajp, øy ja sagasa y'adøtsnidi pøni sa ja kø'øm tsokti; kuts jam pøngapøn møk yjaakyikutujkni, tu'ugyits yja' ja tyikmøøi. ²⁶⁻²⁷ Jøts ka' meets mja' jade'endi, ne'egi yide'en meets mja'. Pøni pøn namyøjpikta'akwajnip, ja' idø'on paat'ajtip jøts ja tuki'yiyi ttu'unt pøni ti myigu'uk ejtxidip ka'ejtxidip, ja' idø'on ja twindsø'øgit, ²⁸ jade'en sam ø nduñin, kaja'ajpxi ø tø nnimiñ jøts øts jawyeen nyikwindsø'øgit, pø ja'axi ø tø nnimiñ jøts øts ja windsø'jkin nyakt, jøts øts kø'øm ngudanit ja pojkpitumbi jaa'y pyøkyti, jøts ja may ñitso'ok'attit.

Ku ja Jesús tyikwin'ejxwa'kxy ja winap jaa'y

²⁹ Xjats ku ja jam wyinaty cho'onidi jam Jerico, jøts nwindson'ajtim Jesús may ja jaa'y ja ojts pyadsøøñiyi. ³⁰ Jamts wyinaty namajtsk winap jaa'y chøønnidi tuu'am, jøts ku ja tmadowdi ku ja nwindson'ajtim Jesús jam wyinaty ñaxy, jøts ja møkta'aky tnimaadyøø:

—iWindsøn'ajtim, rey David y'u'nk y'ap, ayoejxk øøts!

³¹ Jøts ja mayja'y ja ojts y'øjyidi, ojts yiknøjmidi jøts y'amo'ondit, jøts ja tjaaktyimyikjinajxtøø jawaani møk:

—iWindsøn'ajtim, rey David y'u'nk y'ap, ayoejxk øøts!

³² Winets ja nwindsons'ajtim Jesús wya'k'øyyi'ñ, jøts ja tyaajxyi'ñ ja winap jaa'dyi jøts ja ttiibyijky, yide'en tnimaay:

—¿Ti dø'øn mdsøjktip, ti ø ndu'ump?

³³ Jøts ja ojts y'adsowdi:

—Windsøn'ajtim, jawin'ejxwamp øøts.

³⁴ Winets ja nwindsons'ajtim Jesús ja jaa'y ojts t'ayo'ixy jøts ja ojts twinguxaji. Jøts ja winap jaa'y nay jatyi wyin'ejxwa'kxtøø, jøts ja ojts tpadsoondi ja nwindsons'ajtim Jesús.

21

Ku ja Jesús kyajptøjkiy'ñ Jerusalén

¹ Kuts jam Jerusalén wyinaty yja'atwanidi, jøts ja kajp ojts tpaatti midi txøow'ajtp Befagé, midi jam tmiwingon'ajtp ja kojpk midi yiktejp Olivos, winets ja nwindsons'ajtim Jesús tkejxy namajtsk ja pyabøjkpi, ² yide'en ja tnimaay:

—Nøjkxti ixé kajpjøøjty ixé wíngon. Jamts inet buuri tu'uk xpaattit kuwiiñ møøt y'u'nk. Ja'ats inet migajidip jøts ya xyikme'endit. ³ Jøts ku pøn sá wya'ant, jade'en xnøjmidit jøts ku ø ndsøky, jøts ku ø tsojk ngøyajkojmit.

⁴ Jade'en'ampy idø'øn ja jade'en yjajty, jøts tyimyjade'en yjatt sá wyaañ ja Dios kyugajpxy ku ja yide'en tjaay ja nøky:

⁵ Nøjmidi ja Israelit kajp:

“Ejx yø mwindsøn mnimiñiyi mnija'adyiyi, amyuyj tsaachyujy, taku'xni byuuri'u'nk.”

⁶ Xjats ja pyabøjkpi ojts choondi jøts ja ojts ñøjkxti, ojts ja jade'en ttundi sá nwindsons'ajtim Jesús ja wyinaty tø y'ane'myidi. ⁷ Ojts ja twestti ja buur møøt y'u'nk, jøts ja ojts wyet ttajiba'andi jøts nwindsons'ajtim Jesús ja ojts ttawaa'tspety. ⁸ Jøts ja jaa'dyi janch namay ja'adi, jøts ja ojts tya'apti ja wyet jam tuu'am; pømbi twidøjti ja ujts'aay jøts ja ojts tpiakta'akti jam tuu'am. ⁹ Jøts ja jaa'y møk wyambinaxwa'ktøø pøn jawyeen yø'ødyip, jøts nayide'en pøn ix'oojk payø'ødyip:

—iDios Teety tsajpjotpit! iKunuu'kx yø rey David y'ap y'u'nk pøn me tø xkexy! iKuuyi Dios Teety jadu'uk yjaak'øyi!

¹⁰ Xjats ku ja nwindsons'ajtim Jesús kyajptøjkiy'ñ jam Jerusalén jøts ja kajp kyajotkukidi, may ojts ja jaa'y wya'andi:

—¿Pøn yø jade'en?

¹¹ Jøts ja jaa'y wyandøø:

—Ja Jesús yø' ja Dios kyugajpxy, pøn kyugajp'ajtp Nazaret jam Galile'it etjotp.

Ku ja Jesús twøjpidømguixy ja too'kpitøjk jam tsaptøjkjotp

¹² Jøtsnim ja nwindsons'ajtim Jesús tyøjkiy'ñ møj tsaptøjkwimpy, jøts ja ojts tkajxpidsømguixy pøn jaty jap wyinaty too'ktp yajktip, juudyip kajpxtip jap tsaptøjkwimpy. Ojts ttejsapwajkixy ja mesi midi ja jaa'y yiktundip pøn ja myigu'uk myeeñ tkugojnidip, jøts nayide'en chinaabyajt ja yiktejimbejtøø ja paktøø'kpidi; ¹³ jøts ja tnimaay:

—Yide'en jap nõkyijxpy wya'añ, jøts ku ajot'ajtaajk ja çaptøjk wya'ant, jøts jade'ents meets yø tø xpiktakni sam maa'tspitøjk chinaadyøjkti.

¹⁴ Jøts ja nwindson'ajtim Jesús jam tsaptøjkjotp winaagin ñimejniyi ja jaa'dyi pøn winapti pøn pakma'atti, jøts ja ojts tyikmøkøjkixy. ¹⁵ Kuts ja teetywindsøndøjk jøts ja kajpxwejpitøjk ojts t'ejxti ku ja jade'en ttuñ milagri, jøts ku ja ojts tmadowdi ku ja mutskuna'jk jap tsaptøjkjotpy møk wya'andi: “iDioskujyip rey David y'ap y'u'nk!”, jøts ja yjantyimy'ambøjktøø ¹⁶ jøts ja ojts tnøjmidi ja nwindson'ajtim Jesús:

—¿Madøøpy yø' ku yø ixa jade'en wya'andi?

Jøts ja nwindson'ajtim Jesús ja t'adsøøy:

—Nmadøøpy øts yø'. ¿Ti ka'anim meets ja Dios kyajpxy x'ejxi ku yø tø tjanigajpxy? Yide'enxi ja wya'añ:

Tø ndanibiktaagi jøts øts mutskuna'jk xjanchjawidit
xjanchkunu'u'kxyjawidit.

¹⁷ Xjats ja Jesús tmajtstuupty, jøts ja ojts chøøñ jam Jerusalén jøts ja ñijky Betania, jamts ja ojts mya'ay.

Ku ja Jesús ojts t'ayo'onmigajpxy ja iigi tsa'anguipy midi ja tyøøm ka'ejtp

¹⁸ Xjats ku yjøpy'ajty, jøts ja wyimbejtøjmi ñøjkxøjmi jam kajpjotp, winets yuu ja ojts pyaadyiyi. ¹⁹ Xjats ja t'ejxpaapty tu'uk iigi kipy jam tuu'ba'am, jøts ja ojts tñinjky, ojts ja kipy tjawi'ixy jøts ja ni tu'uk tyøøm tkapajtøø, nugo janchtum'aay ja'. Winets ja nwindson'ajtim Jesús ojts tnøjmi ja iigi kipy:

—iNijuuni mga'uktøømiñit!

Jade'en ja ojts wya'añ, jøts ja iigi kipy jaty tyimdy'ijch. ²⁰ Xjats ku ja pyabøjkpitøjk ja ojts jade'en t'ejxti, jøts ja jantyimy'ñigyumaap tjanty-imyja'widøø, winets ja tyiktøødøø ja nwindson'ajtim Jesús jøts ja tñimaadyøø:

—¿Sudo yø iigi kipy tsojk tø tyimdy'ich?

²¹ Jøts ja nwindson'ajtim Jesús ja t'adsøøy:

—Janch øts idø'øn nwa'añ, pøni mjanchmøøt'ajttip ja janchja'win, jøts ku kø'øm ka' xwinma'adyit majtsk'aaw majtskjoøjt, kidi yø'øyipts mee mjaøp sam øts yø iigi kipy ixa tø nduñin, yø kojpk paat mee xnøjmit: “Jiwa'ak ya jøts mnøjkt mejjotp”, jantyimyjatpts idø'øn ja jade'en. ²² Jøts ku øy ti x'amido'odit xpøktso'odit ajot'ajtingøjxp, pøni amumjoøjt ja janchja'win xmøøt'atti, myikmo'odipts ja' pøni ti m'amidoodip.

Ja Jesús myøk'ajtin

²³ Jøts ja nwindson'ajtim Jesús tyøjkijy'iñ tsaptøjkjotpy, ixap ja wyinaty yik'ixpiky ku winaagin jap myendøø ja teetywindsøndøjkti jøts ja møjaa'dyøjkti, jøts ja ojts tyiibyikyiyi, yide'en ja ñimaajyøø:

—¿Pøn yø yjade'embi mdanigutujk'ajtip jøts yø jade'en xu'unt? ¿Pøn yø kutujk jade'en tø mmø'øyi?

²⁴ Jøts ja nwindson'ajtim Jesús t'adsøøy:

—Nayide'en meets yam nyiktøøwami; jøts pøni m'adsowimbejtip inet, winets meets ja ndukmado'ot pøni pøn øts yø jade'en xanigutujk'ajtp ku øts yø jade'en nduñ. ²⁵ ¿Pøn ojts Juan Bautista tyanigutukyiyi jøts ja ya yiknøbatt? ¿Dios, uk jaa'y?

Jøts ja xem yam kø'ømyi tkajpxy'ajtpinaxwa'ktøø, yide'en ja ñawya'añidi:

—Ku net yø njanima'ayin jøts ku Dios ja tñ'ane'emy, yide'ents inet yø x'adso'owin: “Jøts ¿tigøjxp ku ja ojts xkajanchjawidi?” ²⁶ Jøts ku net njanima'ama'an jøts ku nugo jaa'y ja ojts kyexyi yiknøbatpi, winets yø

mayjaa'y xnibidø'jka'andit; kumi niduki'iyi yø jade'en tnija'widip jøts ku ja Juan tum ja' tkajpxy midì Dios yja'ajip.

²⁷ Jøts ja ojts nugo t'uknimaañidi ja nwindson'ajtim Jesús:

—Ka'ap øø nnijawi.

Winets ja ojts ñii'mxyidi:

—Ni øts meets inet ja ngadukmado'ot pøni pøn øts yø jade'en xanigutujk'ajtp ku øts yø jade'en nduñ.

Ku ja Jesús tmaryakpaajty namajtsk ja jaa'y tukmiga'axpi

²⁸ Xjats ja tjaaknimaay:

—¿Sa meets idø'on x'ukja'gyuki ya'atpi ayuujk? Tu'uk idø'on jaa'y, jamts namajtsk myajnk; jøts ja tu'uk tnimaay: “Mets u'nk, ixyam mnøjxkt tumbi jøts ø x'atstujkit ja n'uvi tsa'am.” ²⁹ Jøts ja myajnk ojts yide'en y'adsøyiyi: “iKa' nnøjkxwa'añ!” Winmaadyigajts ja jadigojk xjats ja ñijxky tumbi. ³⁰ Jøts ja u'nkteety ojts ja tniinjxky ja yjadu'ukpi majnk, jøts ja ojts nayide'en tnøjmi, jøts ja ojts yide'en y'adsojyiyi: “Øyip teety, øy ø nnøjxkt.” Jøts ja nigidi y'uknøjkxni. ³¹ ¿Pømbits ja tpaduun jade'en sa ja møjaa'y tjatsøky?

Jøts ja wyandøø:

—Ja' midì ja jawyeen y'uknimaay.

Xjats ja nwindson'ajtim Jesús wyaañ:

—Janch øts idø'on nwa'añ, jøts ku ja ne'egi jawyeen ja Dios kyutujk ttatøjkiyidit ja'adi pøn pøkyun'ejt kunajxtip, jøts nigidi meets. ³² Kumi ja' meets ja Juan Bautista tø mdanimiñiyi jøts ja mduk'ixpikyidi sa mdsøønidit mdanidit sa mjujky'attit, jøts ka'ats ja tø xmibøkti; ne'egi ja' ja ojts tjanxh-jawidi ja jaa'dyi pøn pøkyun'ejt kunajxtip. Jøts kuts meets øy ja ojts jade'en xja'ejxti, ka' meets ja ojts xjanchjawidi, jøts ka' mdsinaa'yin xyiktigajstøø.

Ku ja Jesús tmaryakpaajty ja ka'ødyumbi

³³ 'Ukmadowdim jadu'uk ya'at madya'aky: Tu'uk ja jaa'y midì ja kam kaja'ampy tjagyajp, ja'ats ojts tni'ipy ja uvi kipy jam kyamjotp, jøts ja ojts tnguemy; jøts ja ojts tyik'øyi tu'uk ja abøjk'iñ mja ja uvi nøø yik'amøø'kxit, jøts tu'uk ja ne'ey janch køjxp ma ja kam yik'ejx'ett.

'Xjats ja ojts winaagin ja tyumbi tmø'øy ajuudyujk ja kyam, jøts ja ojts tkømo'øy jøts ja chøø'ñ widejtpi. ³⁴ Xjats ku tpaajty ja uvi tujk'aats, winets ja ojts tkexy winaagin ja tyumbi, jøts ja ttaniguexy ja yjadu'ukpi tumbidi midì ja wyinaty tyuk'ajuudyujkpy ja kyam, jøts ja yik'amido'odit ja pikta'aky midì ja paat'ajtiyip. ³⁵ Ka'ap ja ñømdøø, ojts ja tmatjsti ja tumbi midì yikajxtip, pømbi yikwojpy yiktse'jk, pømbi o'jk jøts pømbi yikwinga'lts yikjøpka'lts. ³⁶ Jøts ja kugam ojts tjaakajxkojmi ja tyumbi jawaani namay, nigidi jade'en sam ja yjawyeembidi; nayide'ents ja kam ejx'ejtpi ja ojts tyungojmiyidi.

³⁷ Jøtsnim ja ojts tkexy ja kyø'øm'u'nk, yide'en idø'on ja y'ukwinmay: “Yikwindsø'øgip øts n'u'nk.” ³⁸ Jøts kuts ja ojts ja'ayi yik'ixy, winets ja kam ejx'ejtpi ñawajnidøø: “Yø' yø kam yø' yø pikta'aky tmidanwängøjxp, yø' yø tmaabyøkwap; wan tyimykpa'ø'jkyindi jøts adøm yø nmidaangøjxint.”

³⁹ Xjats idø'on ja tmatjstøø, jøts ojts tyikpidsømdì jam kamjotp, jøts ja ojts tyik'ookti.

⁴⁰ Winets ja nwindson'ajtim Jesús ttiibyijky, jøts ja wyaañ:

—Ku mye'ent ja kugam, ¿sats ja tumbitøjk yiktu'undit midì kam'ejx'ejtpi?

⁴¹ Jøts ja teetywindsøndøjk jøts ja møjaa'dyøjk wyandøø:

—Niwine'en ja tkidyimy'ayo'ext yø yjade'embì ka'øy jaa'dyi, yikpa'ookp ja', jøts ja t'ayajknaxt jadigojk ja ñaajx, jøts ja abiktyumbi ja tmo'ot pøn ja mo'ojyiyip ja pyikta'aky pøni wine'enin ja pyaat'aty.

⁴² Winets ja nwindson'ajtim Jesús ja ñimaajyidøø:

—¿Ñiwindinim meets Dios kyajpxy xka'ejxi? Yide'enxi ja wya'añ:

Ja tsaa midi ja pojtspi kya'uk'a'ejxidøø,

ja'ats ne'egi icyam tø y'ukyikpiktakni jam pøch kyubajkp jøts ja t'amajtsmujkixy ja pøch.

Ja Dios Teety idø'on yø jade'en tø ttuñ,

øy yø ñigyumaap njaja'wandi.

⁴³ Jade'ents ja Dios kyajpxy wya'añ, paty mee nnøjmi jøts ku ka' myikmo'odit jøts xatøjkidit ja Dios kyutujk, ja' ja ne'egi yikmo'odip pøn tyikwingaxø'jkidip ja Dios yja' midi ja yja'ajtpy. ⁴⁴ Jøts ja tsaa ku jam pøn y'uknaxkida'akt, windigø'opy ja ayooobi; jøts ku ja tsaa pøn y'uktanaxkidakpatit; yikpu'xkiyip ja'.

⁴⁵ Kuts ja teetywindsindøjk jøts ja fariseotøjk jade'en tmadoodøø ja madya'aky midi ja nwindson'ajtim Jesús ja tamimadyaajkidip, ojts ja tja'gyukidi jøts ku ja' yiknimadya'akti. ⁴⁶ Winets ja tjadyimyjamatwandøø, ja mayjaa'yts chø'jkidip pøn tnija'widip jøts ku ja nwindson'ajtim Jesús ja Dios Teety yja' tkajpxi.

22

Ku ja Jesús tmadyakpaajty sam tu'uk windsøn tyik'amajtski ja myajnk

¹ Xjats ja nwindson'ajtim Jesús ojts jadigojk ttamimadyaktøjkigyojmi jadu'uk madya'aky, yide'en ja wya'añ:

² —Jade'en ja Dios kyutujk midi yjaa'y ja tyanitanaapy sam tu'uk windsøn pøn xødump jøts myajnk ja tyik'amajtski, ³ jøts ja tyumbi ja ttaniguexy pøn jaty ja yikaawyampy yik'uukwampy jøts ja t'atswa'adit, ka'ats ja jaa'y ja pyad-soo'nidøø. ⁴ Jøts ja ojts abiktyumbi tjadanigajxkojmi, yide'en ja t'uknimaay: “Nøjx ja x'atstukmadowdi pøn jaty ø nwaawampy, jøts ku ja kaaky jii'kxy ya abaadi y'ejtni. Tø øts ndsakaa nyik'øøky jøts tyimdyumjane'kxpi tyimdyum-jayeeekpyi, abaadi a'ejxi y'ejtni, wan tmenidi tø'øxñigaabyi tø'øxñi'ukpidi.”

⁵ Kidyimyøjpiktakti ja' pøn idø'on jayikwaadsodip migaabyi mi'ukpi. Pømbi nøjxni kyamjotp, jøts pømbi tyunk tniyø'øyini ma jaty pøngapøn myeembyiky, ⁶ jøts pømbi axaji tyikja'jtøø ja windsøn tyumbi jøts ja tjem-dunidi tedunidi, yik'oo'ktibaat ja'. ⁷ Winets ja windsøn yikxon jyanty-imy'ambijky, jøts ja ojts tkexy syoldaditøjk jøts ja tyikpa'ooktit ja jaa'y pøn tyimyikjaa'y'oo'knidip, jøts ja tnitsaajyidit ja kyajp. ⁸ Winets ja tnimaay tyumbitøjk: “Tum ja abaadi y'ejtni jøts xøøw yiktu'unt, ka'adamts yø yjade'embii jaa'y pyaat'atyidi jøts yø nyikmiga'ayin nyikmi'uujkin. ⁹ Nøjxtits jam ma jaa'y ñaxy tyøki, jøts ja niduki'iyi xwa'adit tø'øxñigaabyi tø'øxñi'ukpi pøni pøn jaty jam mbattip.” ¹⁰ Jøts ja tumbi cho'ondøø ñøjxtøø jam tuu'am, jøts ja ojts twaamukti pøn jaty ja jam pyattøø, jam øyjaa'byi ka'øyjaa'byi; jøts ja mayjaa'y jade'en tyik'ujtstøø ja tøjkojt.

¹¹ Xjats ja windsøn jam tøjkiyii'ñ jøts ja t'ejxwa'añ pøn jaty tø yja'atti migaabyi mi'ukpi, winets ja jap t'ejxpaajty tu'uk ja yaa'dyøjk, jøts ku ja ka'ap jade'en xyøxyi sam idø'on pyaat'atyidi ñaxyoxidit ja tø'øxñigaabyidi ja tø'øxñi'ukpidi. ¹² Jøts ja tnimaay: “¿Sudso mets ya tø mdøki, jøts ka'ats jade'en mxøxyi sam idø'on pyaat'atyidi ku tø'øxñigaaky ku tø'øxñi'ukk ñaxy?” Jøts ja nixä kidyimwya'añ, amøñi ja y'ity. ¹³ Winets ja windsøn ja tnimaay pøn jaty jam wingiidyip wimbøjktip, yide'en ja tnimaay: “Ixe køwøøndi pakwøøndi jøts xwibøjpidø'ømdit, wan tnijxxy agugootstujpy ma yjø't ma ya'axt, ma

wyngidsetst y'agidsetst.” ¹⁴ Kumi may ja yjayikwaadsowdi øy pøn, jøts waanits ja'adi pøn yik'a'ejxidip.

Ku yikajpxy'aty ja kugubajt

¹⁵ Jøts ja fariseotøjk jam ojts choondi, jøts ja ojts tkajpxy'ejxwa'andi, ja'ats ja tyikpøky'attip jøts ja ttani'øønidit pøni sã yjadyimy'ukwa'añ. ¹⁶ Xjats ja jade'en winaagin tkajxtøø ja yjaa'y møøt ja Herodes yjaa'myi, jøts ja t'atstuknimaawya'andi ja nwindson'ajtim Jesús:

—Windsøn, tø øø nnijawi jøts ku tiy mgajpxy, jøts ku tiy janch ja Dios yja' xnigajpxiyi, ka' xmøjpkta'aky øy jaa'y sa yjawa'andi kumi ka' mets pøn xkupiky xkagupiky. ¹⁷ Tukmadookts øøts sã me m'ukwa'añ: ¿Nmo'op øøts kugubajt ja møj windsøn midi jam Roma tsinaapy? ¿Nmo'op øøts u ka'?

¹⁸ Yja'wiyii'nits ja nwindson'ajtim Jesús ja' jøts ku ja kya'ødyunwa'añiyi, jøts ja tnimaay:

—Meets win'øømbidi, ¿tiku øts jade'en xkajpxy'ejxti? ¹⁹ Tuk'ejxtik øts ja meeñ midi myiktundip ku ja kugubajt xyakti.

Jøts ja ojts t'atskondi tu'uk ja pujxmeen. ²⁰ Ku ja ojts t'uk'ixy ja nwindson'ajtim Jesús, jøts ja tyiktiy:

—¿Pøn yø' wyeen y'aaw, jøts pøn yø' xyøøw ixa kyøxja'ay?

²¹ Jøts ja t'adsøødø:

—Ja nwindson.

Winets ja ñimaajyidi ja nwindson'ajtim Jesús:

—Yø'øts meets yø windsøn mmo'op midi yø yja'ajtpy, jøts Dios yø xmo'odit midi Dios yja'ajtpy.

²² Xjats ku ja jade'en tmadoodøø, ñigyumaap idø'øn ja tyimyajtøø; jøts ja ojts jade'eñi tmatjstu'utti jøts ja choo'nidi.

Ku ja jaay' tyiktøwdi pøni janch idø'øn ja' ku oo'kpi jadigojk yjujkpyøktit

²³ Jøts nay ja'abi xøøw ja saduceotøjk ojts t'ats'ejxti ja nwindson'ajtim Jesús. Jade'en idø'øn ja' ja wyinmaa'n tjugyapti jøts ku oo'kpi ka' y'ukjujkpyøjknidit; paty ja yide'en tnimaadyøø ja nwindson'ajtim Jesús:

²⁴ —Windsøn, yide'en ja Moisés wyaañ: kuk pøn tku'ookt ñidø'øxy jøts ku ka' tyiktañ ni tu'uk y'u'nk, pøni jamts y'ajch uk y'uch, ja'ats ja ku'økytø'øxy tmøøt'amajtskip jøts ja nyika'axt, jøts ja myigu'uk kyagudigø'øty midi tø y'øøky. ²⁵ Jats øøts y'ity nmigu'uk tu'uk midi jaa'y'ajttip niwixujk yaa'y. Jøts ja jagyooop y'amajtskiyii'n, o'jks ja'. Jøts kumi ka' y'u'nk y'una'jk tyiktaañ, jøts ja y'uch ojts tmdañ ja kyap, ja ku'økytø'øxy. ²⁶ Jøts nayide'en yjajty ja myimajtskpi, jøts ja myidigøøkpi nayide'en, tumjade'en ñajxkøjxti niwixujk.

²⁷ Jøts ku ja jade'en y'oo'køjxtøø, jøts ja tø'øxyøjk yjaaktyimy'ø'jky. ²⁸ Jøts kuts ja jadigojk pyidsø'ømdit jujky'ajtpi, ¿midi'ibits ja tñidø'øxy'atp, pø tøxi ja t'atsnidø'øxy'ajtkøxti?

²⁹ Jøts ja ojts yide'en y'adsøyidi ja nwindson'ajtim Jesús:

—Kajaa mdigøydi, ja'agøjxp ku ka' xnija'wiyidi ja Dios kyajpxy, ni ja myøk'ajtin xkanija'wiyidi. ³⁰ Kuts jadigojk ja oo'kpi yjujkpyøktit nipøn kya'uk'amajtskiñit, ka' pøn y'u'nk ñøøx tkøyakt jøts ja y'amajtskit, jade'ents ja chinaañidit sam ankilisti midi jap tsajpjøtpy. ³¹ Jøts ku ja oo'kpi yjujkpyøkti, ¿ka'anim meets ja nøky x'ixy sã Dios kø'øm tø wya'añ? Nøømx i ja': ³² “Tum øts xDios'ajttip ja Abraham, ja Isaac, jøts ja Jacob.” Kidi oo'kpipts ja ñiDios'ajtpy, pø ja'axi ja ñiDios'ajtpy jøts ja tyikjujky'att øy pøn.

³³ Ku ja jaa'y jade'en tmadoodøø, jøts ja ñigyumaap tja'widøø ku ja jade'en yik'ixpikyidi.

Ja møj kutujk midi ja Dios ñi'ane'empy

³⁴ Winets ja fariseotøjk ojts tñimadowdi jøts ku ja nwindson'ajtim Jesús wyinaty tø tyik'amøñ ja saduceotøjkti, jøts ja ñamyujkidøø; ³⁵ jamts tu'uk kajpxwejpì tmøødidi, ja'ats ja tja'ukajpxy'ejxwaañ ja nwindson'ajtim Jesús. Jøts ja tyiktiiy:

³⁶ —Windsøn, ¿midi'ibi kutujk jawaani møj midi ja Dios kyutujk myøøt'ajpty?

³⁷ Jøts nwindson'ajtim Jesús t'adsøøy:

—“Windsøøgi ja Dios amumjoojt, jade'en xtsokt mabaat myajada'aky m'anmija'win, mabaat myajada'aky m'aaw mjoajt.” ³⁸ Yø' idø'øn møj jøts yø' idø'øn jawyenip. ³⁹ Jøts ñiñayjade'en ja myimajtskpi, yide'en ja wya'añ: “Jade'en mmigu'uk xtsokt sam kø'øm mnachøkyin.” ⁴⁰ Yø'øbi kutujk majtsk møj midi ja Moisés tø tja'ay jap kyutujkjøtpy, jøts midi ñigajpxtip ja Dios kyugajpxy ku yik'ixpøkti.

¿Janch idø'øn ku ja David t'ap'aty ja Cristo?

⁴¹ Nay ixammim ja fariseotøjk wyinaty amuki y'etinim, ⁴² jøts ja nwindson'ajtim Jesús ttiibyiky:

—¿Så mee mwinmay, pøn yø Cristo? ¿Pøn yø' y'u'nk?

Jøts ja tñimaadyøø:

—Ja rey David yø' y'ap.

⁴³ Winets ja nwindson'ajtim Jesús ja tñimaay:

—¿Jøts sudsomts ja rey David ja Espíritu Santo yikwajñøø jøts ja ojts tijj windsøn? Tiku ja David yide'en wya'añ:

⁴⁴ Nømp ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy, kunim øts yø nmimajada'akøxt pøn jaty mmidsep'ajtip.”

⁴⁵ ¿Sudso ja Cristo ja yiknitsokpi, sudso ja David ja y'ap'aty, jøts yide'ents ja David kø'øm wya'añ jøts ku ja twindsøni?

⁴⁶ Jøts nipøn nisa kidyimwya'añ, jøts ja'abi xøøw ttamajstuttøø, jøts ka'ap pøn y'uktiibyøjkniyi tigati.

23

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

¹ Xjats ja nwindson'ajtim Jesús tñimaay ja mayjaa'y jøts ja pyabøjkpitøjk:

² —Yø kajpxwejpitøjkti jøts yø fariseotøjkti, jade'en yø wya'andi jøts ku yø tyimbyaat'atyidi, yø' idø'øn ja tyimñigajpxtip wa'ats, yø' idø'øn ja tyimñija'widip ja Moisés kyutujk. ³ Jade'ents meets yø xpadu'unt, tundi dø'øn jade'en tuki'iyi pøni sa mni'i'mxyidi; kidits nayide'en m'adø'øtsti sam yø y'adø'øtsti, kumi jade'en'ajtip yø', wenk yø jaayi y'ukwaa'andi jøts wenk y'adøtskojmidi. ⁴ Nugo tukmajada'ak myajada'akti midi janch kamaabyim, jøts ja'ats ja jaa'y tyukpadunwandip; jøts niwine'enin ja kø'øm jade'en tkatunwa'andi. ⁵ Jade'en'ampy jade'en y'adø'øtsti jøts ja kajp y'ejxidit, jøts ja mayjaa'y y'ejxidit. Wyet nikijxy tkøxja'adi wan jaty ja Dios kyutujk, jøts yik'agajpxtip ku ja tjantyimbyadundi, jøts nayide'en ñachojkmiyidi jøts wyet tum yøñ tñajtskudiyi tmiwidettit, ka'ap jade'en tyiktundi sam o pøn jaa'y. ⁶ Ja' chojktip jøts tum jam tyimy'ixa'aktit ma ja windsøn tsinaabyajt jam ku xøøw ku ti tyuñi tsaptøjkjøtpy, ⁷ jøts jade'en ttsokti jøts ja jaa'y nøø'ajy tuu'ajy wyindsøøgiyidit kyajpxpoo'kxiyidit, jøts ja tyimyktejt ku ja kyajpxwejti.

8 Jòts meetsts kidim jade'en jaa'y xnimaañidi jòts jade'en myiknòjmidit jòts ku mee mgajpxwiyj, pò tu'ugyixi mee tum jade'en mnay'uch'atidit mnay'ajch'atidit, jòts tu'ugyits ja mgajpxwejpidi mididi mgajpxwejidip, ja Cristo ja', ja yiknitsokpi.

9 Jòts kidi pòn xejti teety ya naxwiin naxkijxy, tu'ugyixi meets mdeety ja' pòn jap tsajpjòtpty. 10 Jòts nika' mnawiyindsòndejidit, pò tu'ugyixi ja' pòn mwindsòn'ajtip, ja Cristo, ja yiknitsokpi. 11 Pòn ja myigu'uk twindsò'jkip, ja' idò'òn mòj, ja' idò'òn nmigubajk'ajtidip. 12 Pòn ja namyòjpiqtà'akwajniyip kò'òm, yik'amutski ja nòjx yjaty, jòts pònts nabyiktaajkip yik'ayowim, ja'ats idò'òn nòjx mòjtòjkip.

13 'iTi jade'en mnadyatuujnidip meets kajpxwejpitòjkti meets fariseotòjkti, wine'enin win'òò'ndsòndidi! Meets ja m'agajpxujkpy jòts mmigu'uk xkaduktatòkiwya'andi ja Dios kyutujk. Jòts ka'ats kò'òm mdòkidi, jòts nika' xyiktòkiwyamididi pòn ja tsojkin tjajagyajp.

14 'iMjanch'ayòòy meets kajpxwejpitòjkti, meets fariseotòjkti, wine'enin xnidunk'atti ja win'òò'nk!, ku ja ku'òktyò'òxy ja tyòjk ja pyikta'aky xpòjxkidi jòts ñadyijyi xkayiknigaxò'òkti, ñadyijyi ja tsap'kajxpy janch yòñ xkajpxti, yò meets yikxon myiktagubatp.

15 'iTi jade'en mnadyatuujnidip meets kajpxwejpitòjkti, meets fariseotòjkti, wine'enin ja mmigu'uk xwin'òòndi! Mjantymiyjotigòòdyip meets, jòts ja jaa'y xukupòktit ja mdsinaa'yindi sa mee m'adò'òtsti, jòts kuts ja jaa'y jade'en tò xundi, ne'egi jawaani ka'òy meets ja jaa'y xjaaktyimdyuñ, jade'en ja tpatni sa ja øy øy tyimñòjxt jap infierno, jòts nigidi meets jade'en mdyimyjatt.

16 'iMjanch'ayòòy meets tuu' niwaabidi, jade'ents xundi sam winapjaa'yindi!, ku mee mwa'añ: "Ku pòn wyanda'aky jòts tyiktestigi'aty ja tsaptòjk, jade'ents ja yikpiqtà'aky pòn kyawanda'agyn; jòts pònts wanda'kp jòts tyiktestigi'aty ja oori mididi ja tsaptòjk yja'ajtpy, ja'ats idò'òn tiy janchwanda'kp." 17 'iMeets mo'otpidi, jade'en xundi sam winap jaa'yindi! ¿Midi'ibi dò'òn jawaani jaaktyimyoj: ja oori, uk ja tsaptòjk mididi tyikunuu'kxy jajtp ja oori ku ja yikajpxpaaty? 18 Jòts nayide'en mwamididi: "Ku pòn wyanda'aky jòts tyiktestigi'aty ja altajr, ka'ap ja wyanda'agyi; kuts pòn wyanda'aky jòts tyiktestigi'aty ja limunsi mididi yikyoyxp jam altajrkòjxp, ja'ats idò'òn tiy janch wanda'aky." 19 'iMee mo'otpidi, mee wimbeets kugoots ejtpidi! ¿Midi'ibi jawaani jaaktyimyoj: ja yojxin, uk ja altajr mididi tyikunuu'kxyjajtp ti jaty jam yikyoyxp? 20 Jòts pònts tyiktestigi'ajtp ja altajr ku wyanda'aky, kidi ja'ayip ja nugo yiktestigi'ajtpy, nayide'en ja tystesti'aty ti jaty jam altajrkòjxp; 21 jòts pòn tyiktestigi'ajtp ja tsaptòjk, kidi ja'ayip ja nugo yiktestigi'ajtpy ku ja wyanda'aky, nayide'en Dios ja tyiktestigi'aty pòn ja chaptòjk'ajtpy. 22 Nayide'en pòn wanda'kp jòts tyiktestigi'aty ja tsajp, ja Dios idò'òn chinaadyaajk ja yiktestigi'ajtip, jòts ja Dios kò'òm mididi jap tsinaapy.

23 'iMjanch'ayòòy meets kajpxwejpitòjkti, meets fariseotòjkti, ku ja win'òò'nk xunk'atti! Kòx kida'ak meets xjanchkugubatkixy, jòts ka'ap ne'egi xpadu'unnxidi mididi ja Dios kyutujk jawaani ne'egi yjani'ane'empy ku ja tsojky ja ødyidyu'unin, ja pa'ayo'ejxk jòts ja janchja'win. Ya'atpi meets idò'òn ne'egi jawaani mjapaat'ajtip mbadu'ump. 24 'iMeets winap tuu'waabidi, ku ti x'uukti tum axity ja xyiknaxti jòts ja uux jam kyatòki, jòts nika'ats xjawidi ja mòjpi jiyujk ku ja amuum xjòòndi!

25 'iTi jade'en mnadyatuujnidip meets kajpxwejpitòjkti jòts meets fariseotòjkti ku xunk'atti ja win'òò'nk! Ja'ayi mee mjanchkamijotkukip sudso ja texy ja tas nikijxyi nadyijyi wa'ats y'ett, jòts ka'ap ja xunk'atti pòni sadam ja yjòtpty. Ni xkaja'gyukidi kudam m'amp mjotp tum ja axòòkpi

yigaappi xjamøøt'atti, ku jaa'y nugo xwin'øøndi xwimaatsti. ²⁶ Meets fariseo winapti: jawyeen yø mga'øy'ajtin xmajtstu'uttit, jøts jade'en ja m'anmija'win ttaniwa'ats'attit ejxim n'uk'ejxint tasi nyikwaajtsin, jade'en nikijxy jade'en jøtpyi.

²⁷ 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi!, jade'en mee mgaxi'iky sam ja oo'kpi nipotsin midi tø yikpoobi jøts ja janch tsuj nikijxy kyaxi'iky, jøts ku jap jøtpy ujts abøki oo'kpi pajk jap, jøts tum ja axøøk ja jap myøøt. ²⁸ Jade'enxi meets idø'on; wemp am ñadyijyi xuk'ejxti ja jaa'y jøts ku mee m'øyjaa'yi. Midi'its jap m'aawidip mjoojtidiip, tum ja taay'ajtk, tum ja kya'øybi jap mwinmaa'n'ajttip.

²⁹ 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi! Meetsxi ja Dios kyugajpxy ja ñipots myik'ø'yidip ku ja y'oookti, jøts ja xyo'om yik'ø'yidi wyingi'y pøn tø y'ats'øyjaa'y'atti, ³⁰ jøts mjanch'uknømdi: "Kuk adøm jeexyip n'ukja'ajtyindi, ka'ap adøm ja møjaa'dyøjk jeexyip tø nbudøjkindi ku ja tø tyik'oookti ja Dios kyugajpxtyi."

³¹ Yø'øyits meets kø'øm mnadyani'øø'niyip jøts ku ja xeety'apidi pøn ja Dios kyugajpxy tø tyik'oookti. ³² 'iYik'abaadidits inet midi ja mdeety'aptøjk tø ttunjøpidi!

³³ 'iMeets win'øø'mbidi! 'iMeets kawindiyjaa'dyi! ¿Sudso meets xijy ja ayo'on m'ukniwaajtsniyidit midi jap ayodaajkjøtpy mbaattip? ³⁴ Yø'øgøjpx øts kugajpxy ngaxt møøt ja wijyaa'dyi møøt ja yik'ixpøjkpidi. Jøts myik'oookpts meets ja winaagin jøts ja xyikruspattit, jøts pømbi yiktseekp yikwopp jap tsaptøjkjotp, jøts pømbi yik'ixa'ap yikpawidetp kajp kajp. ³⁵ Jade'ents meets ja pøky mdajaj'adit, jøts ja xkubattit ku ja øyjaa'y kawine'en tø xyik'oo'knidi, Abel ñikøjxp cho'onda'aky pøn øy pøn yikxon jaa'y'ajtp, kunim ja Zacarias ttamigugøxi pøn ja Berequias myajnk'ajtpy, pøn mee myik'o'jk jap tsaptøjkjotpy ma ja altajr y'ity. ³⁶ Janch øts idø'on nwa'añ, ku jade'en yiktuñ yø'øbi pøky, yø ya'atpi jaa'y yø taja'adidip jøts yø yiktagubattit pøn jaty ja ixyam tsinaadyip.

Ku ja Jesús t'ayo'ijxy ja Jerusaléngit kajp

³⁷ 'iJerusaléngit kajp, Jerusaléngit kajp, meetsxi myik'øø'kpy ja Dios kyugajpxy, jøts xwinga'atsti xjøpka'atsti pøn ja Dios kyajpxy tyikyø'yidip, pøn ja Dios mjaniganigaxidip! 'iTø meets njapeemukwa'añ njakonmukwa'añ kawinaak ojk, sam tsikuna'jk ja tyaak ñimu'uxyi, ka'ats meets ja jade'en tø xkupiky! ³⁸ Ejxtits inet ja tsaptøjk ku ja abak tyani; ³⁹ øts idø'on wamp jøts ku meets xka'uk'ejxnit tsojk, jøts ku meets jaanim x'ejxtit pøni juuni ja tiempi yja'aty ku mnø'ømdit: "Ejxik Dios ja kyunuu'kxyu'nk ñadyaguguexyi midi mmime'enxiyip ja kyutujuk."

24

Ku ja Jesús tnigajpxy jøts ku ja tsaptøjk kyida'att

¹ Xjats ja nwindson'ajtim Jesús pyidsiimy jam tsaptøjkjotp, jøts ixam ja wyinaty ñajxni ku ja pyabøjkpitøjk ja jam wingon ñimejniyøø, jøts ja tyukmadoobinaxwa'jkøø sa jaty ja tsaptøjk jam t'ijxy ku ja janch tsuj janch øy.

² Jøts nwindson'ajtim Jesús ja t'adsøøy:

—¿M'ejxtip ixa jade'en tuki'iyi? Øts wamp jøts ku ya nitu'ugin ja tsaa kyata'ant nikiibyety, kuja'jigyøxp yø tuki'iyi.

Ja ejxa'an midi yik'ejxp ku wyinaty yikti'dyunwanidi ja naxwii'ñit jaa'y

³ Winets ja ojts ñojkxti jam kojpkøjxp midi yiktejp Olivos; jøts ku ja nwindson'ajtim Jesús ixam wyinaty tø y'ixa'aky, winets ja pyabøjkpitøjk ja ojts ñinijxyiyi, jøts ja ojts ñimaajyidi amaa'tsk:

—Ja' øø ndsøjkpy jøts øøts xukmado'ot windem idø'on ja jade'en yjatt. ¿Tti ejxpajt ti ejxa'an øø n'ejxp jøts ku wyinaty mmenwa'añ, jøts ku wyinaty yja'atwa'añ ja tiidyu'unin xøøw?

⁴ Jøts nwindson'ajtim Jesús ja ñimaajyidøø:

—Øyim mnay'ejx'etidit jøts kidi øy pøn nugo mwini'iiñidi. ⁵ Kumi may ja jaa'y mye'endit jøts ja jade'en ñadyejidit jøts ku ja y'øtsi, yide'en ja wya'andit: “Øts idø'on Cristo ja yiknitsokpi”; jøts mayts ja jade'en twin'øøndit ja jaa'y.

⁶ Jøts mmado'op meets jøts ku jaa'y tñigajpxtit ja tsep, uk tñigajpxtit sa jaty ja tsep yjaaktunit, sa jaty ja ayo'on yikpaatt; kidits mdsøøgidi, jatp idø'on ja jade'en; ka'anims wyinaty tmibaat'aty jøts ja naaxwii'ñit jaa'y yiktiidyu'undit. ⁷ Kumi tseptu'undip ja jaa'y pøn ki'abikñaajx ki'abikyajpti jøts ñañibidøøgidit xem yam, jøts ja windsøndøjk nayide'en cheptu'undit ja xem ja yam pøn jaty ja kajp ja naajx tñitanaadyip naaxwii'ñit; etp yuu xøøw, jøts pa'am køx kida'ak jøts uxj ñaxt maawyeen. ⁸ Tso'ondakpñim ja ayo'on wyinaty jade'en midi yixkon yik'ejxpnim.

⁹ Winets meets myikøyakt jøts myikjemdu'undit myiktedu'undit, jøts jaa'y yik'oogidit, jøts niþøn mgatsokidit o magajp, ja'agøjxp ku mee xjanchjawi.

¹⁰ Winet ets ja jaa'y may ja yjanchja'win t'ixmatstít, yja'dyigøøgyoxnidip ja Dios yja' ja'ami jøts ja myigu'uktøjk tkøyajknidit. ¹¹ May ja windaay'ajtpi pyidsøømdit, ñadyijiywya'andit jøts ku Dios yja' ja tñigajpxidi, jøts may ja myigu'uk twin'øøndit. ¹² Kawine'en ñaxt ja ka'ødyu'unin jøts ja ka'øwynmaa'ñ, may ja jaa'y xem yam kawin'ijxyim ñayjawayidit. ¹³ Jøts pøn tmidanaapy jøts pøn tu'ugyi winmaapy, ja'ats idø'on nøjkk nitso'ok'ajtp ja y'anmija'win. ¹⁴ Jøts ya'at øy madsoo yikajpxwa'kxt wine'enin naaxwii'ñit y'ity, ya'at Dios y'øgyajpxy y'ømyadya'aky, jøts naajx kajp ja møj ja mutsk tñijawidit; jats idø'on tmibaat'att jøts naaxwii'ñit jaa'y yiktiidyu'undit.

¹⁵ Ja Daniel, pøn ja Dios kyugajpxy'ajtpy, ja' yide'en tñajtsja'wiyii'ñit jøts tñigajpxy ti yikpøkpyajtp, ti midundigøøpy; jøts kuts x'ejxtit jøts ku ja'baat jap yik'ejxni yikpatni ma ja tsaachjagunuukxy chaptøjk jap, japts ja mga'ukmaa'kxniyidit. Pøni pøn ya'atpi nøyø kajpxp, wan tja'gyuki. ¹⁶ Wants ja tka'akti pøni pøn tsinaadyip jam Judea jøts kyaknøjkxtit jam kojpkøjxp. ¹⁷ Jøts pøni jam wyinaty pøngapøn tø pyety tyøjkøjxp ja'abi xøøw, ka'ats t'ukniwinajknit ok idø'on ti tjaak'atsjuutt jap tyøjkjøtpy; ¹⁸ jøts pøni jam wyinaty pøngapøn wyidity kyamjotp, wan ka' t'ukwimbejni, ni wyet ni ñaamy tka'atswetst. ¹⁹ Ja'oy'ijxyim ja tø'øxyøjk yjanchjattit pøn jaty mutsk jam wyinaty tñikøjxp'ajtpit, pøn jaty myaxu'nk jam wyinaty tø tyikaxø'økti!

²⁰ Amidowdi pøktsowdi Dios jøts kidi ja et mga'akti ku ja et y'amxuxy chaachxuxy, jøts kidi wyinaty jyaty ku poo'kxin xøøw; ²¹ møk ja ayo'on yik'ext sam ka' wíndi jyatyin wine'en ixyam kujk ñaxy ku ñaxwii'ñit cho'ondaajky. Jøts ku ja ñaxt ni kya'ukyik'ejxnit jadu'uk nayide'en. ²² Jøts ku Dios tyikjakt ja ayo'on jøts jeky y'ett, ka' pøn ñitsoojkin tpaatt; jøts ka'apts jade'en ttu'unt, ja'agøjxp ku ttsøky ja jaa'y jøts tpa'ayøy pøn ja kø'øm tø twi'ixy.

²³ Jøts ku winet pøn mnøø'mxidit: “Ejxti, ixya ja Cristo midi yiknitsokp”, uk ñøømdit “Ejxti, ixem ja”, kidi xmibøkti. ²⁴ May ja windaay'ajtpi mye'endit jøts myikwin'øøndit, ñadyijiyi ja ñadyejidit Cristo midi yiknitsokp, uk ñadyijiyi ja ñabyikta'agit jade'en sam ja jaa'y pøn Dios yja' tkajpxidip; jøts tñanky'ejxidit

ja ejxa'an ja ejxpajt, ñadyijyi ttu'undit ja milagri jøts ja jaa'y ttawin'øøndit, ja'baat ja twin'øønwa'andit pøn ja Dios kø'øm tø wyi'ijxyidi. ²⁵ Patki'jyi meets yø ixyam ndukmadø, ²⁶ kuxip myiknøjmidi: "Ejxti, ixem ja abak etjotp", kidits jam mnøjkxti; uk mjayiknøjmidi; "Ejxti, ixyajp tam ja tøjkjøtpy", kidits meets ja xmibiky. ²⁷ Ku ø nme'ent, jade'en ø nme'ent sam wyidsuky in ku ja kyaxi'iky jam xøbidsimy, nayide'ents ja nay jaty kyaxø'kmi xøjexy jam tsajpwemp. ²⁸ Niduki'iyi meets ja xnijawit ku nme'ent.

Sa mye'ent ja Dios ja myøjkudanaabyi ja yiknitsokpi

²⁹ Kuuyi ja ayo'on jade'en y'uknaxt, winets ja xøøw y'ookt, winets ja po' ka' y'uk'anit, jøts ja maadsa' kya'adit. Ku ja tsajp y'adøtspøjkøxnit, tuki'iyi tum jade'en yjattit ti jaty jam ejtp tsajpwemp. ³⁰ Winetnimts ja x'ejxtit jam tsajpwemp midi øts jawyeen nan'ky'ejxip, jøts ja naxwii'nit jaa'y ni'ijtyi ya'axtit, jøts t'ejxtit jøts ku ø nmime'ent yootsjøtpy ja nmøk'ajtin jøts ja kunuu'kxin. ³¹ Winets ja puxujx yikmado'ot møk'ampy jøts ø ndanigaxtit ja ankilistøjk, ja'ats twaamukøjxp pøn jaty ø nja'ajtpy wine'en naxwii'nit jaa'y amuum tuk'ojkyi tuktsajp'agida'aky.

³² Øy x'ukja'gyukidit yø madya'aky ku yø iigi kipy yiknimadya'aky: Ku ja y'awaj y'axeeñ u'nknim, jøts pyidsimy ja y'aay, jade'ents meets ja xnijawit ku ja y'anda'akwani. ³³ Nayide'ents idø'on ja nbiktaajki ku ja ayo'on jade'en x'ejxtit, jade'ents meets ja xnijawit jøts ku wyingø'n juuni ja tiidyu'unin ñaxkida'akt, tyimy'ixaani dø'on ja wyinaty jøts ja jade'en yjatt. ³⁴ Jade'en øts idø'on nwa'añ, jøts ku ja jaayi jade'en yjatt namga'anin y'oo'køxti pøn jaty ja jujky'ajttip ixyam. ³⁵ Najxp y'ity yø naajx tsajp, øy yø juuni kyudigø'øty, jøts øts n'ayuujk niyuuni yø kyakixy kyanaxy kunim jade'en tyimyjatt.

³⁶ 'Ka'ats pøn tnijawi pøni ti xøøw pøni ti jumøjt ja jade'en yjatt, ni ja ankilistøjk ja tkanijawidi pøn jap tsajpjøtpyti, jøts ni øts ja kø'øm nganijawi. Tu'ugyi ja Dios Teety ja tnijawi.

³⁷ 'Nayide'en sam ja Noé yjajty, nayide'ents jadigojk yjatt ku ø nme'ent.

³⁸ Ku dø'on jekyip, ku ja ayo'onduu wyinaty ka'anin myiñ, jøts ja jaa'y wyinaty yikxon yjanchkaydi yjanch'uukti jotkujk, pømbi amaajtskip, pømbi y'u'nk nøøx jam tni'adsø'owip jøts yaa'yøkt, jaabaat jade'en yjaaktyimy'adø'øtsti ku ja Noé tyøjkijyi'ñ jap møj barkijøtpy; ³⁹ jøts nigidiyi ja tyimy'ejxtøø ku ja møktuu ku ayo'onduu myiñ, jøts ja nøøgom ja ojts yiktso'onguixyidi. Nayide'ents idø'on nøjkx jyaty ku ø nmemit, ka'ap pøn xjöp'ejxtit. ⁴⁰ Winaagin jaa'y jam wyinaty namaajtsk tyundi jam kamjotp; tu'ukts ja ñitsø'ok'att jøts jadu'uk wyindigø'øty. ⁴¹ Jøts winaagin tø'øxyøjk jam wyinaty namaajtsk yjøtsti; tu'ukts ja ñayide'en ñitsø'ok'att jøts jadu'uk wyindigø'øty.

⁴² 'Nayjöp'ejxidits meets, kumi ka' xnijawidi pøni juuni ø nme'ent.

⁴³ Ukmadowdam ya'at, ku n'ukmadyaajkint ku pøn kudøjk wyinaty t'uknijawi juuni yja'att ja maa'tspi ku koots, çti jats ja jujky kyadsunaxt, ti jaa ja tmaajtsu'utt ja tyøjk jøts wan ja maa'tspi tyik'awatsnidi? ⁴⁴ Paty idø'on nnøjmidi, jøts jøp'ijxy xyik'ettit yam meets ja xkagumay ku øts jotmøn nme'ent.

Ja ødyumbi ejx'ejtpi

⁴⁵ 'Pømbi tumbi dø'on wijy, ja'ats idø'on ja tyimyida'amp pøn jaty ja windsøn jam yiktsinaapy tyøjkjotp, jøts ja abaadi tmo'ot kyaaky yji'kxy. ⁴⁶ çKidi ja'ajip nekim pøn ja wyindsøn paajtip, jøts ku ja ixam ka'pxy tpaduñ sa ja tø yik'ane'emy ku ja wyindsøn yja'aty? ⁴⁷ Janch øts idø'on nwa'añ, ja'abi

tumbi dō'ōn ja windsōn pyikta'akp jōts ja ttuk'ejx'ett tuki'iyi pōni ti jaty ja jam yjagyeypy. ⁴⁸ Kuts ja tumbi kya'ōy'att, ku nichōky wyinma'aty jōts ku wyindsōn ka' chojkja'aty, ⁴⁹ jōts ja tjemdumbinaxwajki ttedumbinaxwajki ja wyindsōn tyumbi, uk myu'ugyi kyu'uxyi mōōt ja amu'ukyjaa'dyi, ⁵⁰ jōts kuts ja wyindsōn wyimbett agumoni yam ja tkajōp'ijxy ja'abi xōōw; ⁵¹ jōts ja yixkon tyagubatit, nayide'en yiktu'unt sam ja jaa'dyi pōn ja win'ōō'nk ttunk'ajttip. Jōts ya'axt yjō'ōt tmiwīngidsetst tmi'agidsetst ja ayo'on.

25

Ku ja Jesús tmadyakpaajty nimajk ja kiixye' una'jk

¹ Jōts ja Dios kyutujk jade'en yjatt midi yjaa'y ja tyanitanaapy sam nimajk ja kiixye' una'jkindi, midi ja yjaj ojts t'ukondi jōts ja tminōjkxti mā ja jaa'y jam y'amajtskiwya'andi, jōts ja jemyaa'y windsō'ōgiwya'andi. ² Nimagoxk ka' ti mōj tjawidi, jōts ja nimagoxk janchwiy ja yjaa'y'atti. ³ Pōnts ka' ti mōj tjawidi ku ja tkondi yjaj, nika'ap nōō ja ojts tkojnidi, ka'ap ja te midi ja tyukta'utstip jadigojk ku ja kyōxt ja yjaj; ⁴ pōnts wijtyi ojts ja abiky tkondi ja nōō midi ja yjaj tyuktatōōdyip, jōts abiky ja' midi ja jaj jap yjaakmōōt'ajtpy. ⁵ Jōts kumi ka'ap ja jemyaa'y chojkja'tni, xjats ja niduki'iyi maa'y'ōōgyi pyaajtniyidōō, jōts ja ojts yjadyimy'ukma'oo'kōjxnidi. ⁶ Xjats tsuu'm et tmadoodōō ja ayuujk kuk yjawi wya'añ mōk: "i'ixa myiñ ja jemyaa'y; pidsōm di jōts xjōpkubaadidit!" ⁷ Jōts ja kiixye' una'jk pyidō'kōjxtōō, jōts ja yjaj ja t'a'ejxidōō. ⁸ Jōts ja ñimagoxkpi midi ka'ap ōy ti tmōjawi, ja'ats ja yjanimagoxkpi tnimaadyōō midi wijtyi midi winmaadyip: "Mōōky ōōts yō mjajnōō waani, oo'knip ōōts yō njaj." ⁹ Jōts ja ñimagoxkpi y'adsōōdōō: "Ka' ōōts yō nyaky, ku ōōts inet yō nyakt ka' ōōts inet nja' tpaatt, jōts ni meets inet mja'yō tkapatmit. Jam ne'egi mminōjkxtit mā tyōōgyi jōts jam mnadyanijuyidit." ¹⁰ Exam ja wyinaty tō tyimñōjkxti jōts ja t'atsjuuwya'andi ja jajnōō, ku ja jemyaa'y yja'jty. Jade'ents ja tyōjkidi pōn a'ejxi nayjagyajpidip, jōts ja ojts tmōōtōkidi ja jemyaa'y mā ja jap y'amajtskiwya'añ, jōts ja tōjk'aaw y'adujknaa. ¹¹ Jōts ja yjanimagoxkpi kiixye' oojknim yja'ukja'tnidōō, jōts ja yja'ukwanidi: "i'yik'awa'ats windsōn yō tōjk!" ¹² Jōts ja ojts yide'en yik'adsowdi: "Ka'axi mee nnijawi pōni mbōn meets."

¹³ Jōts idō'ōn ja nwindsōn'ajtim Jesús ja pyabōjkitōjk yide'en tnimaay:

—Jōp'ijxy mnanky'etidit, kidi nugo mdyimyaanōjkxti, kumi ka' xnijawidi pōni juuni ōts ja tiidyu'unin nmime'ent.

Ku ja Jesús tmadyakpaajty ja tumbitōjk pōn ja wyindsōn ja myeeñ tyanipiky

¹⁴ Nayide'en idō'ōn Dios kyutujk midi yjaa'y ja tyanitanaapy, sam tu'uk jaa'y wyinaty choonwani, jōts ja ñōjkxwani abikñaajx abikyajp, winets ja ojts twaadōy pōn jaty ja jam yiktumpy jōts ja tyanipiky ja myeeñ.

¹⁵ Tu'uk tmōōy magoxk mil, jōts jadu'uk majtsk mil, jōts jadu'uk tukmil, jade'en ja ojts tmō'ōy sa pōnjabōn ja wijy'ajtin tmōōdi. Jōts ja chōō'ñ ñijky widejtpi abiky'et. ¹⁶ Ja tumbi pōn ja meeñ yikmōōy magoxk mil, ojts ja tta'ajuy tta'agajpxy jōts ja tyik'u'nkjajty ja nayidinō'ōn. ¹⁷ Nayide'en jadu'uk ja meeñ ojts tyiktunkpatmi pōn yikmōōy majtsk mil, jōts jaa ja nayide'en tyik'u'nkjajty majtsk mil. ¹⁸ Pōnts ja meeñ yikmōōy tukmil, myidsō'on ja' jōts ja ayu'uch etjotp tu'uk ja jut tyik'ō'yiyi'ñ, japts ja meeñ ja tñitajy.

¹⁹ Xjats kyimjekñim ja tumbitōjk wyindsōn wyimbijty, xjats ja tyikwīngukidi ja meeñ. ²⁰ Jawyeen yja'jty pōn ja meeñ wyinaty tō yikmō'ōy

magoxk mil, jøts ja tjaakmoøy jamagoxk mil ja wyindsøn midi ja wyinaty tø tyik'u'ngi, yide'en ja tnimaay: "Magoxk milxi, windsøn, ojts xyaky ja meeñ, ix'yats jamagoxk mil midi tø nyik'u'ngi." ²¹ Xjats ja windsøn ja ojts y'adsøyi: "Øy'ajtp, øy idø'on mduñ jøts øy idø'on mjaa'y'aty; nayide'en sam øy tø x'ejx'ity yø meeñ øy yø kyamabaadi, ndanipøkp inet ja myayjawi. Jøts yä men, naç, jøts jawaani may xpøkt ja n'øy'ajtin." ²² Jøts jadu'uk yja'tmi pøn ja meeñ yikmoøy majtsk mil, jøts ja wyaañ: "Windsøn, ix'ya ja meeñ majtsk mil midi øts ojts xmo'øy, jøts ix'ya ja majtsk mil midi tø nyik'u'ngi." ²³ Jøts ja wyindsøn ja y'adsoji: "Øy'ajtp, øy idø'on mduñ jøts øy idø'on mjaa'y'aty; nayide'ents sa tø x'ejx'ity yø meeñ øy yø kyamabaadi, njaakmo'opts nayide'en jawaani may. Men, tøki ndøjkjøøjtj, paat ja m'øy'ajtin." ²⁴ Jøts ku yja'lty ja tumbi pøn ja meeñ wyinaty tø yikmo'øy tukmil, yide'en ja tnimaay ja wyindsøn: "Windsøn, nni'ja'wipxi øts ku mets ka' ti jadi'iñi xnajtsjawi, ja'baat me xpayø'øy øy mets ja xjagaja'aji, myikpidø'øk'wambyaāt mets ja pikta'aky øy me mjagani'ipy. ²⁵ Paty ø ndsø'øgi, paty øts ojts n'atsyu'uch ja meeñ jap naxjøtpy. Ix'yats ja', pø mja'ajtpxi yø'." ²⁶ Jøts ja wyindsøn ja ojts yide'en y'adsøyi: "Tsaachnuuxjaa'y mets ka'ødyumbi, pøni mni'ja'wip tam ku øts jade'en njaa'y'aty, ku øts nbøkmuky midi ø ngapiktakpy, ku øts ja xijy nyikpidø'økt paat midi ø ka' nni'ipy, ²⁷ jøts çti kuts øts ja nmeen tø xka'anuu'kxyajki, jøts ja meengyojpk ja jeexyip tø nbaaty møøt ja meeñ'u'nk ku tø nja'aty?" ²⁸ Winets ja windsøn tnimaay ja jaa'y pøn jatj jam wyinaty jam'ajttip: "Pøjkkidi yø meeñ midi tukmil, jøts ja xmo'odit pøn ja yja' majk mil. ²⁹ Pøn ja yja' jam, jaaktyimykmo'opts ja', jøts ja may'ampy tjagyapt; pønts niti tkamøøt'ajtp, jøts ku jap yii'nim tjaakjamøødi, ja'baats ja yjaaktyimykpøjkkxit. ³⁰ Yø yjade'embu tumbi midi niti kawamp, ixep wibejpidø'mdi agugootstujpy, japts ya'axt yjø'øt tmiwingidsetst tmi'agidsetst ja ayø'on."

Ku ja naxwii'ñit jaa'y yikt'idyu'undit

³¹ 'Ku ø nme'ent windsøn'ajtpi, ni'awidity niduki'iyi ja ankiilstøjk nmøøtme'ent, jøts ø n'ixa'akt jam kunuu'kxy kyutujktaajk jøp'am. ³² Jøts ja naxwii'ñit jaa'y niduki'iyi ñamyukidit øts nwingujkp, jøts øts ja nwejtswa'kxtit jade'en sam ja jiyujk'ejxpi ja byorreek t'awojpakyin møøt ja chiibi. ³³ Aga'n'ampy øts ja borreek nbikta'akt jøts anaj'yampy ja chiibi ndejnt. ³⁴ Jøts winets ø nnøjmit ja n'aga'n'amybyitti: "Ya mendi pøn tø tpaajtidi ja Dios Teety kyunuu'kxin; kupøjkidi ja Dios kyutujk midi yjaa'y ja tyanitanaapy, jaayip yø myiktanibiktaajkniiyidi ku Dios ja naxwii'ñit tyik'øyiyi'iñ. ³⁵ Tø nyu'øøky nxø'øøky, meetsts ojts xyikay; tø øts adøødsi n'ity, jøts meets ojts xyik'uuky; jøts ku øts ojts nja'aty ndsøøñ øy magajp, meets ojts xmo'øy nja'ataajk. ³⁶ Ku øts nwet ojts xka'ejtxi, meets ja ojts xmo'øy; jøts ku øts ojts nbiky, meets ojts x'atskajpxjot'amøki; ku øts ojts nyiuktsumy, jap meets ojts xkugajpxi." ³⁷ Jøts pønts wyinaty tø yikupøkti jøts øts ja nnøjmidit: "Windsøn'ajtim, çwindiixik me n'ijxy jøts ku me myu'øøky, jøts øø nyaky kaaky? çUk windits me myik'ijxy mdøødsi, jøts øø nyaky ja nøø? ³⁸ çUk windits øø n'ijxy jøts ku me mja'aty mdsøøñ ma jatj kajp, jøts øø nyaky ja ja'taajk, uk windits øts ja wet naamy nyaky? çJuuni øøts ja tø n'uk'ixy jøts ku ja mga'ejtxiyi? ³⁹ çUk windits me n'ukyik'ijxy jøts ku me mbikyi, uk windi øø n'uk'ijxy ku me myiktsumy, jøts øø n'atsku'ejxi jap puxøjkjøtpy?" ⁴⁰ Jøts yide'en ø n'adso'ot: "Janch øts idø'on nwa'añ, øy yiini wyaani midi tø

xuujnidi, midi øts tø xmøøjyidi ja nmigu'uk pøn ka'ejtxidip ja pudøjkin, øts idø'on ja jade'en ñamyayi tø xundi."

⁴¹ 'Winets øts ja nnøjmidit ja n'anajy'ambyitti: "Jiwa'akti, kidi øts ya xwin'ejxti meets kawindüdyumbidi; nøjxkti jap ma ja jøøn jap nijuuni kya'øøky, midi ja miku' yiktajøp'ejxtip møøt ja miku'ankilistøjkti. ⁴² Tøxi ø nyu'øøky, jøts meets øjts ka' xmø'øy ja ngaaky; øjts ø ndøødsi, jøts meets øjts ka' xyik'uuky; ⁴³ øjts ø nja'aty ndsøøñ ma jaty kajp, jøts mee ka' xyikja'taajky. Ku øts nwet øjts kya'ity, jøts meets ja nwet øjts ka' xmø'øy; ka' meets øjts xku'ejxi ku øts øjts nbiky, ku øts øjts nyiktsumy." ⁴⁴ Jøts øts ja xnøjmidit: "Windsøn'ajtim, ¿windixik me n'ijxy jøts ku mets wyinaty yuu xøøw myik'ookwa'anayi, uk tøødsi wyinaty myik'ookwa'anayi, uk ku me mja'aty mdsøøñ øy magajp, uk ku mwet mnaamy kya'ityxi, uk mbiky m'añi, uk myiktsumy myiktiy, jøts øøts idø'on niti pudøjkin nguidyimyduñ?"

⁴⁵ Jøts øts ja yide'en n'adso'odit: "Janch øts idø'on nwa'añ, øy yiini wyaani jøts ku ka' tø xuujnidi niti pudøjkin pøn ja ayo'on tyanaxpy, ni øts køjxp ja tø xkatuujnidi." ⁴⁶ Winets ja jaty ñøjxktit ayooði xemikøjxp, jøts pøn wyinaty yikupøkti jøts ja ñøjxkmit tsinaabyi xemikøjxp ma ja tpaajtidit ja Dios kyunuu'lxin jøts ja tsinaa'lyin øy yikxon.

26

Ku ja Jesús yikajpxy'aty sudso ja yikmatst

¹ Ku ja nwindson'ajtim Jesús jade'en y'ukwan'abajtiyi'ñ, jøts ja tnimaay ja pyabøjkitøjki:

² —Mñija'widipxi jøts ku ja paski xøøw ja majts xøøwni; jade'ents ø nyikøyakt jøts øts jaa'y xyikruspattit.

³ Jøts ñiñajaty ñamyujkidøø ja teetywindsøndøjkti, ja kajpxwejpitøjkti, jøts ja israelit møjaa'dyøjkti, jam ja tøjkwemp ñamyujkidøø ma ja Caifás jam kyutujktaajk midi ja teetywindsøndøjk wyindsøn'ajttip. ⁴ Jam ja øjts tkajpxy'attit jøts ja ttanibiktaajkidøø sudso ja yiknidaayit ja nwindson'ajtim Jesús jøts ja tyimyattst, jøts ja tyimyik'ookit. ⁵ Jøts yide'en idø'on ja wyandøø:

—Ka' y'øyt ku xøjøjty jade'en ndu'unindit, jøts jaa'y kidi xem yam nañibidi'igyidi.

Ku ja Jesús yiktagutajmji'iky ja pa'akxuu'kpi

⁶ Jøts ja nwindson'ajtim Jesús jam ja wyinaty Betania, jam Simón tyøjkwindum pøn ja møj pu'uts pa'am pøjkp; ⁷ jøts tø'øxyøjk ja jam ñimejni pøn t'ukoon tukmøj abøjk'i'ñu'nk ja aceite midi pa'akxuu'kp, ujtsoni ja tmimiñ jøts ja'abi midi idø'on janch tsowi. Xjats ku ja nwindson'ajtim Jesús jam wyinaty tø twingu'ixaagi ja mesi, winets ja tø'øxyøjk tpiktaajky ja aceite midi pa'akxuu'kp jam nwindson'ajtim Jesús kyubajkøjxp. ⁸ Jøts ku ja pyabøjkitøjki jade'en øjts t'ejxti, jøts ja yjantyimy'ambøjktøø jøts ñømbinaaxwa'ktøø:

—¿Jøts tigøjxp ku yø jade'en nugo wyindigøy? ⁹ Tøxik yø jeexyip yiktøøky jøts maamyeeñ jeexyip yikpøjkp, jøts ayooði jaa'y ja jeexyip yiktabudøkidi.

¹⁰ Tyimyadoow ja nwindson'ajtim Jesús ja', jøts ja tnimaay ja pyabøjkitøjki: —¿Tigøjxp ku yø tø'øxyøjk jade'en jotkøjxim xnøjmidit? Pø yø'øxi dø'on øy'ajtp ku øts yø jade'en tø xuñ. ¹¹ Jaa'kmibaat yø ayooði jaa'lyi, ka'axi yø mja ñøjxkti, ejtpyim yø xmøøt'ejtkunaxtit; øtsts ka', ka' mee xumi ya nwindinaagyunaxt. ¹² Yø' midit'ibi yø tø'øxyøjk tø ttuñ, ku øts nne'kx aceite yø tø xpiktaajkiyi midi pa'akxuu'kp, ja'agøjxp yø jade'en tø ttuñ

kuts ja n'o'jkin wyingoni. ¹³ Janch øts idø'on nwa'añ, ømyadso'att põni ma yikajpxwa'kxy ya'at øgyajpxy ya'at ømyadya'aky midi tnigajpxp sa nitso'ok'ajtim yikpaaty, jøts yiktukmidøy ja naxwii'ñit jaa'y, yikajpxpim yikmadya'akpim yø' midi yø tø'øxyøjk yam tø tuuñ.

Ku ja Judas ñay'awajniyi jøts ja tkøyakt ja Jesús

¹⁴ Xjats nidu'ugin ja ñimakmajtskpi pabøjkpitøjkti, põn txøøw'ajtp Judas Iscariote, ja' ojts tninijky ja teetywindsøndøjkti, jøts ja ojts tmīnagayajpxyi, ¹⁵ yide'en ja tnīmaay:

—ζWine'en ø xmiju'udyit jøts øts ja nwindson'ajtim Jesús ngøyakt?

Xjats ja ojts tmījuydi ee'pxmajk, jade'en ja meeñ ja ojts tmo'odi tum puxplati. ¹⁶ Jøts jaayip ja Judas ja twinmaa'ñ'ajtni juuni ja tjadyimy'ukøyakt ja nwindson'ajtim Jesús.

Ku nwindson'ajtim yjaak'uk'a'ux'ajtni møøt ja pyabøjkpitøjk

¹⁷ Xjats ku ja xøøw midukxøøw tyuujnøø, ku ka' pya'at'aty jøts ja tsapkaaky yika'aty lewaduri møøt, ja'abi xøøwts idø'on ku ja nwindson'ajtim Jesús ja pyabøjkpitøjk ñimejniyi wingon jøts ja ojts tyiibyikyiyi, yide'en ja wyandøø:

—ζMa xtsøky nyiknajxint ja paski a'ux jøts øøts ja n'a'ejxit?

¹⁸ Jøts ja tnīmaay:

—Nøjkxti jam kajpjtøp ma chøøni ja jaa'y, tø xnījawidi põni põn, ja'ats mnøjmīdip: “Yide'en ja windsøn wya'añ: Wingomp øts ja n'o'jkin, jøts mets mdøjkjøtpy øts ja paski a'ux nyiknaxwa'añ møøt øts ja nbabøjkpitøjk.”

¹⁹ Jøts ja ojts jade'en tpadundi sa ja nwindson'ajtim Jesús ja wyīnaty tø y'ane'emyidi, ojts ja tyik'øyidi ja paski kaaky jøts ja yik'a'ux'att.

²⁰ Xjats ku kyoodsiyi'ñ, winets ja nwindson'ajtim Jesús tmøøt'ixajky nimakmajtsk ja pyabøjkpitøjk ma ja mesi jam wyīnaty; ²¹ jøts ixam wyīnaty tyimgyaydi ku tnīmaay ja pyabøjkpitøjk:

—Janch øts idø'on nwa'añ jøts ku mee nidu'ugin amaa'tsk'ampy xkøyakwa'añ.

²² Jøts ja yjotmadyøjkidøø, jøts xem yam wyandøjkidøø:

—ζØts me windsøn'ajtim ndejint xejp?

²³ Jøts nwindson'ajtim Jesús ja ojts yide'en y'adsøyidi:

—Pøn ø møøt tø ngay tø nji'kxy, ja'ats øts idø'on xkøyakwamp. ²⁴ Janch jajtp øts inet ixyam jade'en sam ja Dios kyajpxy wya'añ. i'Yjanch ayøøy ja jaa'y'u'nk põn x'ukøyajk'oo'kp! Ne'egi tyimdyøøbik jeexyip ku jeexyip kyidyimgye'xy.

²⁵ Winets ja Judas ojts kyajpxy, põn idø'on wyīnaty køyakwajnip, jøts ja wya'añ:

—Windsøn, ζti wan ja ndejin y'øtsi?

Jøts nwindson'ajtim Jesús ja t'adsøøy:

—Paty mets.

²⁶ Exam wyīnaty kyaydi, jøts ja nwindson'ajtim Jesús tnixajiyi'ñ tu'uk ja tsapkaaky, jøts ja ttukmøja'wiyi'ñ ttukunuu'kxyja'wiyi'ñ ja Dios Teety, jøts ja ojts t'adujkpaky, winets ja tmøøy ja pyabøjkpitøjk, yide'en ja wya'añ:

—Kaydi ya'at; yø' øts idø'on ñamyayi nne'kx'ajtpy.

²⁷ Winets ja tnixajigyojmi tu'uk ja uujk'i'ñ, jøts ja ojts ttukmøjawi ttukunuu'kxyjawi ja Dios Teety, jøts ja ojts tmøøy ja pyabøjkpitøjk, jøts ja t'ukwa'kxtit, yide'en ja tnīmaay:

—Uukti ya'at niduki'iyi, ²⁸ øts idø'on yø' ñamyayi nni'jpy midi yam jadigojk tnānkñamyi'øbyøjkp ja jaa'y møøt Dios, midi ø nyikwidsump nyikwidajpxy ja'agøjxp jøts pojkpitumbi jaa'y yikpojkipmaa'kxtit, jøts ja Dios Teety ja

wyanda'aky jade'en tyik'adukt. ²⁹ Janch øts idø'on nwa'añ jøts ku øts ya'at uvi nøø ka' tsojk n'uk'uknit, jaanim jadigojk n'uujkindit jotkujk ku Dios Teety ja kyutujk tyiknaxkida'akt midi yjaa'y ja tyanitanaapy.

Ku Jesús ja ojts kø'øm tnigajpxy jøts ku Pedro ja kyu'øøniyt

³⁰ Xjats ku ja t'øøgøjxtøø ja iy midi ja Dios yja'ajpty, winets ja ñøjxktøø jam kojpkøjxp midi yiktejp Olivos. ³¹ Jamts ja nwindson'ajtim Jesús ja ojts ñii'mxyidi:

—Kuwani meets inet xmajststutkøxt ya'atpi koots; pø yide'enxi jap nøkyixpy wya'añ: “Nyik'ookp øts ja borreegi ejxpi, wan ja byorreek jadi'iñi tyø'øwya'kxy.” ³² Kuts øts ja o'jkin n'ukmimajada'akt ku øts jadigojk nju-jkpyøkt jøts ø nbidsø'ømt jap oo'kpi jutjøtpy, winets ø nnøjkxt jawyeen jam Galilea, namga'anim meets jam wyinaty mniijkyx.

³³ Xjats ja Pedro ja ojts y'adsøyiyi:

—Øy me niduki'iyi jaa'y mja'adyigøøgyixyi, øts niwindem ø ngaja'dyigøy.

³⁴ Winets nwindson'ajtim Jesús ja yide'en tnimaay:

—Janch øts idø'on nwa'añ, jøts ku yam koots inet ku ka'ap tsapni'aaw y'ayajxi'ikñim, tigøøkJ ojk mets wyinaty tø xku'iñi jøts ku me xka'ijxy'aty.

³⁵ Jøts ja Pedro tjaaktyimñimaay ja nwindson'ajtim:

—Nijuuni øts jade'en nga'adi'ich, njadyimya'øøky me møøt.

Jøts ja yjadu'ukpimidi, nayide'en ja wyamidi.

Ku ja Jesús t'ajot'ajty ja Dios Teety jam Getsemani

³⁶ Jøts idø'on ja nwindson'ajtim Jesús tmøøtja'ity ja pyabøjkpitøjk mā ja et jam txøøwi Getsemani, jamts ja tnimaay:

—Ya awejxti, wan øts ja Dios Teety t'ats'ajot'aty.

³⁷ Jøts ja tmøødiyi'ñ ja Pedro møøt namajtsk ja Zebedeo y'una'lj, jøts ja jotmay yjanchtatøjkiniyi. ³⁸ Xjats ja tnimaay ja pyabøjkpi midi ja y'ukwaaw nidigøøkJ:

—Janch køjxp øts njoojt jadi'iñi, o'jkin'ampy ø tø ntotmaadyøki. Awejxtits ya, kidim mma'oo'knidi, møøtwijy'ejtik øts.

³⁹ Winets ja nwindson'ajtim Jesús jawaani yjaaknajtsyø'øyiyi'ñ, jøts ja ojts jadi'iñi ñagyuxendya'agiyi, jøts ja ojts t'ajot'aty ja Dios Teety, yide'en ja wya'añ:

—Dios Teety, øyik jade'en xjanchkayikjatt, jøts øts kidi jadine'en ayo'on ndyimbaayty; øy idø'on kidyimjade'eni sam ø ndyimyjatsøkyin, jade'en øts idø'on ngupøkt pøni sa me xamidsøky.

⁴⁰ Xjats ja wyimbijty nay jam mā ja pyabøjkpi jam wyinaty nidigøøkJ tø t'ukyiktañ, kuts ja tpaajty tødamik ja mya'oo'knidi; winets ja ojts tnøjmi ja Pedro:

—¿Niwine'enin mee tø mguidyimyajada'aky jøts meets jeexyip xmøøtwijy'ity? ⁴¹ Wejti kajti, ajot'ajtti ja Dios Teety, nay'ejx'etidi jøts kidi mmimajada'agidi ja ayo'on midi wingomp. Janch øts idø'on nwa'añ ku ja winmaa'ñ yjanchja'ødyunwa'añ, ja ne'kxts jaayi ja ka'øybi tumbi amutsk'ejxyip.

⁴² Xjats ojts ñøjkkøjmi nay jam jadigojk, winets ojts yide'en t'ajot'aty ja Dios Teety:

—Dios Teety, pøni ka'ap jade'en xyikjaty jøts øts ja ayo'on xkadukpaatt, wants idø'on jade'en tjaty pøni sa me kø'øm xamidsøky.

⁴³ Xjats jam yjaakwimbijty jøts ja pyabøjkpitøjk jadigojk tpatkojmaa, janchmaadip ja jam, wimbeets ja tsuu ja yik'ejtniyidi. ⁴⁴ Jøts ja nay jam

tnikejky, jøts midigsook ojk ñijxxy Dios Teety ajot'ajtpi, nayide'en wyangojmaa.

⁴⁵ Winetnimts ojts ñijxxy ma ja pyabøjkpitøjk jam wyinaty, jøts ja tnimaay:

—Tøts inet, maanidi poo'kxnidi, wan jade'en tjaty. Tø dø'øn tyimbyaaty jøts ku ø nyikøyakt jøts ø nyiktagidøkit ja pojkipitumbi jaa'dyi. ⁴⁶ Pidø'økti, wan tjaa'myindi; ixa wyingøñ pøn ø xkøyakwamp.

Ku ja Jesús yikmajch

⁴⁷ Nay ixamnim ja nwindson'ajtim Jesús wyinaty jade'en wya'añ ku yja'ljty ja yada Judas, pøn ja y'ukpabøjkpi'ajtpy jøts ja møøt tyika'pxy nimakmajtsk ja pyabøjkpitøjk, ja'ats idø'øn jam tmøøtmeen ja mayjaa'y tum tsujx møøt jøts tum kipkyapidi. Ja teetywindsøndøjk, ja israelit møjaa'dyøjk, ja' dø'øn ja kajxidip. ⁴⁸ Jøts ja Judas, pøn ja nwindson'ajtim tkøyajkp, yide'en ja wyinaty ja tiy'ajtim tø tyaky, yide'en ja wyinaty tø wya'añ:

—Pøni pøn øts inet ndsu'kxpy, ja' idø'øn ja wyinaty; jøts ja' idø'øn mmatstip.

⁴⁹ Xjats ja myiñ jøts ja nwindson'ajtim Jesús yiknimiñ, yide'en ja tnimaay:

—iøts windsøn memp!

Jøts ja ojts ttsu'kxy. ⁵⁰ Jøts ja nwindson'ajtim Jesús ja ojts yide'en y'adsøyiyi:

—¿Ti migu'uk mnimimpy? ¿Ti mdsøjkpy?

Winets ja jaa'y ja wingon ñimejnyøø jøts yiknixajiyi'ñ ja nwindson'ajtim Jesús, ojts yikmajtsni.

⁵¹ Winets tu'uk ja nwindson'ajtim Jesús myigu'uk tju'ljty tu'uk ja tsujx, jøts ja ojts ttaxikpo'otu'uty tu'uk ja teetywindsøn tyumbi. ⁵² Winets ja nwindson'ajtim Jesús ja tnimaay:

—Øødyuñ yø mdsujx nay jap xtyimbyikta'akt ma yø tø xjuuty. Pøni pøn ttatseptump ja tsujx, nay ja'ats ja ty'a'ookp. ⁵³ ¿Ka' xñijawi jøts ku øts jotmøñ n'amido'ot ja Dios Teety, jøts øts ja xanigaxt icyamyi naxy nimakmajtsk piky ja ankilistøjk mididi tseptundip? ⁵⁴ Kuts ja jade'en yjatt, ¿ti jats jade'en y'adukt ja Dios kyajpxy? Pø yide'enxi ja wya'añ jøts ku tyimyjade'en yjatt sa dø'øn yam yjatwa'añin.

⁵⁵ Xjats ja nwindson'ajtim Jesús tnimaay ja mayjaa'y:

—ja tsujx, ja kipy, ja tsaa meets yam x'uuktanimenip, tø øts yjawi nmaa'tsni! Ejtp meets jam y'ljty jabom jabom nmøøt'ixakunaxy, jøts mee nyik'ixpiky jam tsapøjkjotp, ¿tikuts øts jamyi xkamajtstøø? ⁵⁶ Ja'agøjxp ya'at jade'en yjaty jøts ka'pxy pyidsø'ømt sa jaty ja Dios kyugajpxy wyandøø, ku ja tnigajpxidi ja Dios kyajpxy.

Winets ja nwindson'ajtim Jesús pyabøjkpitøjk ojts kyaakøxti jøts ja nadyu'uk y'ukyikmajtstutnaa.

Ku ja Jesús yikwaanijxxy jam kutujktaajkjotp

⁵⁷ Jøts ja jaa'dyi pøn ja majtsiyi, jam ja tyiknøjkxti Caifás wyindum, ja teetywindsøndøjk myøjwindsøndi ma wyinaty tø ñamyukyidi ja kajpxwejpitøjkti møøt ja møjaa'dyøjkti. ⁵⁸ Jøts ja Pedro ja ojts pyanijxxyi, jagam ja pyayø'øyi jøts ja ojts tpaja'aty jap møj windsøn tyøk'agui'py, jøts ja jap tyøjkyyi'ñ jøts ja tmøøt'ixaajky ja ejx'ejtpitøjkti, jøts ja t'ejxwa'añ sa dø'øn ja yjade'embu yjadyimy'ukugøxit.

⁵⁹ Jøts ja teetywindsøndøjkti, jøts ja møjaa'dyøjkti, jøts niduki'iyi ja kutujk adsinaabyidi, ja' ja yjadyimy'ixaadyip ti ja yjadyimy'uuktani'øønidip ja nwindson'ajtim Jesús, øy ja yjagajade'eni jøts ja ttaguwan'iwy'a'andi ja o'jkin. ⁶⁰ Ja'ats kyapattip sudso tyiidyøkit, may ja jaa'y yjamendøø, jøts ja tjadyimñi'øøndaagidi ja nwindson'ajtim. Xjats yja'tinim namajtsk ja ni'øø'ndaajkibidi mididi ñadyiyi tsaach'a'ejxnaxtip, ⁶¹ jøts ja yide'en wyandøø:

—Yø jaa'y yide'en waan: “Ixe øts yø Dios chaptøjk nyikiday, jøts øts yø kyidigøøk xøøw nyik'øyigyojmit.”

⁶² Winets ja teetywindsøndøjk myøjwindsøn wya'kukiyiiñ, jøts ja nwindson'ajtim Jesús yik'amidøøy:

—¿Niwine'enin yø xka'adsowimbetwa'añ? ¿Ti dø'ønyø' ixa jade'en myik-tani'øøni?

⁶³ Jøts ja Jesús ka'ap ja ojts t'adsøy. Xjats ja wyindsøn ojts ñii'mxyi:

—Tuk'eix Dios, jøts xnigajpxt tiy janch. Tukmadook øøts pøni mets idø'ønyø' mjanchnCristo pøn ja Dios Teety y'u'nk'ajtpy.

⁶⁴ Jøts ja nwindson'ajtim Jesús ja tnimaay:

—Øts ja', sam ixa tø mwa'añin. Jøts nayi ndukmadoodip icyam jøts ku ø x'ejxtit ku n'ixa'akt jam Dios Teety kyutujktaajk jøp'am.

⁶⁵ Winets ja teetywindsøndøjk myøjwindsøn ttakø'jtsiyiiñ ja wyet, jøts ja wyaañ:

—Tø ya'at jaa'y tmigajpxigøy ja Dios; ¿ti ejxp'i ti nija'wibi jaaktsojkiyip? Tøxi xmadojidi ja y'ayuujk jøts ku kya'øgyajpxy; ⁶⁶ ¿sa mee m'ukwa'añ?

Xjats ja wyandøø:

—Taja'jtíp pøky yø', wan t'øøky.

⁶⁷ Winets ja ojts twingutsujidi, jøts twojptøø jøts ttsee'ktøø, pømbi ja kojxiyip wemp'am, ⁶⁸ jøts ja yiknøjmi:

—Pø metsxi mCristo, juknajtjajawits pøn tø mgøxyi!

Ku ja Pedro tku'iiñ jøts ku ja ka' t'ijxy'aty ja Jesús

⁶⁹ Ixap idø'ønyø' ja Pedro chøøni tøjkwimpy, jøts ja tu'uk tø'øxyøjk ñimejni midi jam tump, jøts ja ojts ñii'mxyiyi:

—¿Kidi metsip y'ijty mmøøtwidijtpy yø Jesús midi Galileit etjotp tsoo'mp?

⁷⁰ Ka'ats ja Pedro ja tkupiky mā ja mayjaa'y jam wyinaty, yide'en ja wyaañ:

—Ka' nnijawi pø ti mets jade'en mgajpxy.

⁷¹ Ixap ja Pedro wyinaty pyidsømwanī mā ja tøjka'aw, ku ja ojts jadu'uk ja tø'øxyøjk y'ijxyi, jøts ja ojts ttukmadøy pøn jam wyinaty:

—Yø jaa'yxi tmøøtwidijtp yø Jesús pøn Nazaret kugajp'ip.

⁷² Jøts ja Pedro jadigojk tkagupøjkøjmi, yide'en ja tyimwyaañ:

—Ka' øts yø jaa'y n'ijxyi.

⁷³ Xjats ku jawaani y'ijty, jøts ja Pedro ja jaa'y ñimejnøø pøn jaty jam wyinaty, jøts ja ojts ñii'mxyiyi:

—Janch nayide'endam mets, nayi Jesús tam me mjanchmigu'uk'ajtpy, kø'ømts yø m'aaw m'ayuujk myiknigaxi'igyi.

⁷⁴ Jøts ja Pedro janch wenk ja kø'øm ñawya'añi ñadyiyi, ka'ap ja tyim-gyupiky, tyuk'eix ja Dios ja', tiy janch ja tyimwya'añ ku ja tka'ijxyi:

—Nguidyimy'ijxy'ajtpy øts yø jaa'y.

Winets ojts nay jaty y'aya'axy tu'uk tsapni'aaw. ⁷⁵ Xjats ja Pedro ja tjā'myejchnim ku ja nwindson'ajtim Jesús ja wyinaty tø ñii'mxyiyi: “Yam ja tsapni'aaw kya'aya'axñim, tø mets wyinaty tigøøk ojk mwani jøts ku me xka'ijxy'aty.” Jøts ja Pedro jam pyidsømmy, jøts ja nugo y'uk'amyaaxni y'uktsaachyaaxni.

27

Ku ja Jesús yiktag'idøjkiyiiñ ja Pilato

¹ Xjats ku jyøpy'ajty, jøts ja teetywindsøndøjk møøt ja israelit møjaa'dyøjkti ojts ja tkajpxy'atti, jøts ja tu'ugyi tnīwinmaa'yidøø jøts ja tyik'ooktit ja

nwindsøn'ajtim Jesús. ² Xjats ja kōwiiñ tyiknōjkxti jōts ja yiktagōdōkiyī'ñ ja Poncio Pilato, pōn jam wyinaty windsøn'ajtp.

Ku ja Judas y'ō'jky

³ Jōts ku ja Judas ojts t'ixy, pōn tkōyajkp ja nwindsøn'ajtim, jōts ku ja nwindsøn'ajtim Jesús tō yiktaguwaā'nīñi ja o'jkin, ja'ats ja ojts jadigojk tsaachkuwinmayi jōts ja tyikwimbijty ja meēñ ee'pxmajk tum plati, jade'en ja tkōmōoy jadigojk ja teetywindsōndōjk jōts ja israelit mōjaa'dyōjkti, ⁴ yide'en ja tñimaay:

—Tō njantyimdyundigōy, mōk o tō njantyimdyundigōy ku ots yō tō ngōyaky jōts yō y'ookt, jōts niti tundigō'oyin yō tkamōō'aty.

Jōts ja ojts yide'en yik'adsōy:

—Jōts, ζti oōts ja ndungī? iMgō'ōmwinnmaa'ñixi mets yō'!

⁵ Winets ja Judas tñajtswōjyī'ñ ja meēñ jap tsaptōjkjōtpy, jōts ja chōō'ñ jōts ja ñijky nayuksuujmibi.

⁶ Jōts ja teetywindsōndōjk tkonjō'ktōō ja meēñ jōts ja wyandōō:

—Ka'ap yō kyutujkyi jōts yō meēñ jap ngugo'ona'andit jap limunsi abōjk'i'ñjōtpy, kumi jaa'y chow yō'.

⁷ Jōts ja nay jaty: tkajpxy'ajttōō, tyiktunkpaatwa'andi ja meēñ jōts ja ttaju'udyit naajx jōts y'ōyit jadu'uk kami santi mā ñaxōkidit ja jaa'y pōn tso'ondip abikyajp. Campo del Alfarero, ja' ja naajx xyōōw. ⁸ Ja'agōjxpts ixyambaat ja naajx yiktijy Ni'jpkym. ⁹ Jade'ents ja Jeremias ja y'ayuujk tyiyy ku ja Dios ja wyinaty yide'en jekyip yikwa'añiyi: “Jōts ja tñixajidōō ja meēñ ee'pxmajk tum plati (ja' ñimeēñ midi ja Israelit jaa'y ja wyinaty tō pyiktaajkxiyi), ¹⁰ jōts ja ttajuudyōō ja naajx, jade'ents ots ja Dios Teety xñimaay.”

Ku ja Jesús twinguwa'jkiyī'ñ ja Pilato

¹¹ Jōts idō'on ja nwindsøn'ajtim Jesús ja jaa'y yiknōjkxiyi jam o'yikutujkpi wyingujkp, jōts ja yide'en tyiibyōjkxiyi:

—ζMets idō'on israelit jaa'y mjanchniwindsøn'ajtpy?

Jōts ja nwindsøn'ajtim Jesús yide'en tñimaay:

—Janch jade'en idō'on ja', sam ixa tō mwā'añin.

¹² Jōts ku ja teetywindsōndōjk kyajpxjō'ktōō mōōt ja mōjaa'dyōjkti, jantyimy'ōō'ndip idō'on ja', jōts ja nwindsøn'ajtim Jesús ja tkidyimy'adsōy.

¹³ Winets ja Pilato ja ñimaajyōō:

—ζKa'ap yō xmadōy sã jaty ixa myikni'ōōni?

¹⁴ Jōts ja nwindsøn'ajtim Jesús ka'ap y'adsōy; ja'ats ja yikutujkpi ñigyumaap yja'wiyī'ñ jōts ka'ap ja y'uktaābyatni.

Ku ja Jesús ñidujkiyī'ñ jōts ja y'ookt

¹⁵ Jade'ents idō'on ja yikutujkpi txumikostrumbr'aty ku xōōw tyuñi, jōts ja tu'uk tyik'awa'atpidsimy ja tsumyjaa'y, ja mayjaa'y ja kō'ōm twi'ejxtip, pōni pōn ja chojktip ja'ats ja yik'awa'atpidsōmdip. ¹⁶ Jamts idō'on tu'uk ja tsumyjaa'y wyinaty, Barrabás ja xyōōw. Tyimyjanijawi ja' ku ja mōj tundigōōbyi; ¹⁷ jōts ku ja jaa'y ñamyujkōxidōō, winets ja Pilato yiktiyy:

—ζPōmbi mdsojktip jōts o nyik'awa'atpidsō'ōmt: yō Barrabás, uk yō Jesús, midi yiktejp Cristo?

¹⁸ Tōts ja wyinaty tñijawi ja yikutujkpi jōts ku ja ja'agōjxp tkōyakti ku ja nawyinaxi tjawidi.

¹⁹ Exam ja Pilato wyinaty chøøni kyutujktaajkjotp, ku ja ñidø'oxy ñimaajyøø: "Ti yø øyjaa'y tø xanibøjkiñi; majststu'ut, janch wenk ø ngumaay tsu'uuy yø'øggøjxp."

²⁰ Jøts ja teetywindsøndøjkti møøt ja møjaa'dyøjkti ojts ja ttukmibøkti ja mayjaa'y jøts ja t'amido'odit jøts wan t'awa'atspidsimy ja Barrabás, jøts y'ookt ja nwindson'ajtim Jesús. ²¹ Xjats ja yikutujkpi ja jadigojk ñimaajyidøø, jøts ja ojts tyiktiy:

—¿Pømbi mee ndsøjkpy jøts ø nyik'awa'atspidsø'ømt?

Jøts ja mayjaa'y ñømdøø:

—Wan yø Barrabás t'awa'atspidsimy.

²² Jøts ja Pilato tjaaktyiktiy:

—¿Jøts sa øts yø ndu'unt yø Jesús midi yiktejp Cristo?

Jøts ja ojts niduki'iyi y'adsowdi:

—¿Yikruspat!

²³ Winets ja Pilato ja ñimaajyidøø:

—¿Ti tundigø'øyin yø tø ttuñ?

Jøts ja jadigojk jawaani møk wyandøø:

—¿Yikruspat!

²⁴ Xjats ku ja Pilato ojts t'ixy jøts ku nisudso'ampy kya'øyi, ne'egi jinaxy ja jaa'y tseeni mo'tsni y'adøtsnidi, winets ja nøø ja ojts t'atsnanky'iyi, jøts ja kyøbuj jam mayjaa'y wyingujkp, yide'en ja wyaañ:

—Kidi øtsip wamp jøts yø y'ookt, ka' øts yø nbøky'ixy. Meets yø mnija'wip pøni sa yø xunwa'andi.

²⁵ Xjats ja jaa'y niduki'iyi y'adsoodøø:

—¿Niduki'iyi øøts yø xpaat'aty ja y'o'jkin, nayide'en ja møj ja mutsk, u'nk una'jk, pøn yø kapaadip!

²⁶ Xjats ja Pilato tyik'awa'atspidsimy ja Barrabás; jøts ja ojts tni'ane'emy jøts ja nwindson'ajtim Jesús yikwopt, jøts ja ojts tkøyaky jøts wan tyikruspatti.

²⁷ Jøts nay ja' ja syoldadi tyiknøjkxtøø ja nwindson'ajtim Jesús jam kutujktaajk agø'øm, jøts ja jam ojts twaamujkøxti niduki'iyi ja soldadi, jøts ja ojts tnabekidi ja nwindson'ajtim Jesús. ²⁸ Jøts ja wyet ja ojts tjanidi, jøts ja tsajpts wet ja ttanijandøø, ²⁹ jøts koroni ja ojts ttagujandi tum kujp awiiti ja', jøts ja kipy ja ttagøkajpidøø y'aga'ngyøjøm. Winets ja twinguxanaadyøø jøts ja ojts tjanchaxe'ekti, yide'en ja tnøjmidi:

—¿Dios kunuu'kxip ya'at israelit jaa'y wyindsøn!

³⁰ Jøts ja tnijsujidi, jøts ja jamyi tnijsujidi ja kipy jøts ja ttaguwojppøøkti.

³¹ Xjats ku ja jade'en t'uktaguyajtøø, t'uknixektøø t'uktaxektøø, winets ja ttanijanduttøø ja tsajpts wet jøts tpiktaajkidi jadigojk ja kyø'øm wet. Jøts ja tyiknøjkxti jøts ja kyiruspatt.

Ku ja Jesús kyiruspejty

³² Tyimy'ixam wyinaty tø choondi ku ojts tpaatti tu'uk jaa'y pøn kugajp'ajtp Cirene, Simón'ajtp ja'; ja'ats ja ojts ttaguwanidi jøts ja ttsøjmit ja nwindson'ajtim Jesús kyirus.

³³ Jøts idø'on ja jade'en yja'ttøø ma ja et txøøwi Gólgota, midi yide'en ayuujk pidsøømp: Oo'kpi Kyubajk Pajk. ³⁴ Jamts ja tmøødyi ja vino adaamuky møøt ja ujts ta'am nøø; kuts ja tja'gyajpy xjats ja nika'ap t'uujky.

³⁵ Kuts ja wyinaty tø tyikruspajtnidi, winets ja soldadi tniyujajtidoø ja nwindson'ajtim Jesús wyet, jøts ja ojts twejtswa'kxti. Jade'ents ja Dios kyugajpxy tyimdyiy ja y'ayuujk ku ja wyaañ: "Tø øts nwet ja xwejtswa'kxidi, tø ja tniyuyatti jøts ja t'eixti pøn uktaja'atip." ³⁶ Winets ja jamyi y'ixaktøø jøts

ja t'ejx'etwa'andi. ³⁷ Jøts ja jam y'agubajkp ojts tkøxjajyidi ja letri midi wamp jøts ti tyuku'o'lkidip. Yide'en ja wya'añ: "Ya'at idø'øn txøow'ajtp Jesús, israelit jaa'y wyindsøndi."

³⁸ Namajtsk møj maa'tspi ja ojts tmøøtkruspety, tu'uk y'aga'ngyøjøm jøts tu'uk y'anajkyøjøm. ³⁹ Jøts ku jam pøn ñaxy tum wenk ja myigajpxyi, tum kubajkwibejttip ja'. ⁴⁰ Jøts ja wya'andi:

—Metsxi xijy tsaptøjk myikidaapy jøts jadigojk xyik'øyi kyidigøøkxøøwyi, wants mga'uk'øøky. Pøni mjanchDiosu'nk tam mets, winak jam kruskøjxp.

⁴¹ Nayide'en ja tyaxejkmyi ja teetywindsøndøjkti ja kajpxwejpitøjkti, ja fariseotøjkti, jøts ja møjaa'dyøjkti, yide'en ja agø'ømyi ñawya'añidi:

⁴² —Tø wyenkpi tyikts'øky, ka'ats tjaty jøts kø'øm ñankcho'ogit. Pøni janchts ku ja Israelit jaa'y tjanchwindsøndi, wan jam t'ukwinaky kruskøjxp, jaanimts idø'øn njanchja'want. ⁴³ Pø Diosxi y'ajoojtjip; wants inet idø'øn t'ukpidøkiyi jøts kyayik'ooogit, pøni janch ku ja yjanchøkyi; tøxi yø kø'øm wya'añ jøts ku yø Dios U'ngi.

⁴⁴ Ja maa'tspibaat ja nayide'en yjanchka'uk'ømyigajpxmyi midi ja jam wyinaty møøt tø kyiruspety.

Ku ja Jesús y'øjky

⁴⁵ Winets ja et kyoodsiyi'ñ kujkxyøøw, jøts møj winakxyøøwnim yjajtaajky jadigojk. ⁴⁶ Jøts nay jatyi ja nwindson'ajtim Jesús møk wya'añ:

—Eli, Eli, ¿lama sabactani? —midi yide'en tyijpy: Dios Teety, Dios Teety, ¿tigøjxp ku øts jade'en tø xnanktyuñi?

⁴⁷ Ojts ja winaagin tmadowdi pøn jatyi jam wyinaty, jøts ja ñømdøø:

—Ja Elías yø jaa'y wyaadsøøpy, ja Dios kyugajpxy.

⁴⁸ Winets ja jatyi nidu'uk putyi t'atskøñ tu'uk ja tanøxe'lts, jøts ja ojts ttabadijy ja vino ta'am, winets ja kipy jøp'am tkøxkøøñ, jøts ja ojts tta'agonji'iky jøts ja txeetst. ⁴⁹ Yide'ents abiky wyaamidøø:

—Majtsu'ut; wan t'uk'ijxyim pøni janch nimejnip inet ja Elías jøts ja o'jkin kyadukpaadit.

⁵⁰ Jøts ja nwindson'ajtim Jesús jadigojk ojts møk ja y'ayuujk pyidsimy, jøtsnim ja y'o'jky. ⁵¹ Winets ja møj tsaptøjk awejtstuk nay jatyi tyakø'øtsiyi'ñ, kubajkp ja kyø'øts'awiyi'ñ jøts ja ok'am kyø'øtskidaajky. Jøts ja ujx ñajxy jøts ja tsaa kyu'kx'awigyijxy, ⁵² ojts ja oo'kpi nipots may y'awa'ach; jujkpyøjktibaat ja oo'kpidi pøn wyinaty ja Dios tø tjanchjawidi ku ja yjujky'ajttøø. ⁵³ Jøts ja pyidsømdi jap yjutøtpy ku ja nwindson'ajtim Jesús wyinaty tø yjujkpyiky jadigojk, jøts ja kyajptøjkidøø jam Jerusalén midi ja Dios kyunuu'kxkyajp'ajtpy, ma mayjaa'y ja ojts y'ijxyidi.

⁵⁴ Xjats ku dø'øn ja capitán pøn jatyi ja jam wyinaty møøt t'ejx'ity ja nwindson'ajtim Jesús, ku ja ojts t'ejxti jøts ku ja ujx ñaxy jøts tuki'iyi sa jatyi ojts yjatyi, jøts ja yjadyimchø'jkidøø, yide'en ja wyandøø:

—Janch ja' tam yø jaa'y tø y'ity, ja Dios U'nk.

⁵⁵ Jøts ja maadyø'øxyøjk jam wyinaty a'ejxujktip jagam, tum ja' pøn jam wyinaty Galilea tø padooondi ja nwindson'ajtim Jesús, jøts pøn jatyi ja wyinaty tø pyudøkiyi. ⁵⁶ Ja María Magdalena dø'øn jam, jøts jadu'uk ja María pøn ja Jacobo tyaaqip møøt ja José, jøts ja Zebedeo ñidø'øxy.

Ku ja Jesús ja ñine'kx yikpiktaajky jap oo'kpi tsaa jutjøtpy

⁵⁷ Xjats ku ja et yjoo'xni jøts kyoodsiwyani, winets myiñ tu'uk kumeeñ jaa'y pøn txøow'ajtp José, jam ja kyugajpi Arimatea, jøts nayi tø dø'øn ja wyinaty tpaabøjki ja nwindson'ajtim Jesús yja'. ⁵⁸ Ja'ats ojts t'ats'ixy ja Pilato

jøts ja t'amidøø ja nwindson'ajtim Jesús ñine'kx. Jøts ja Pilato ja ojts tyikutuky jøts wan tyikømøø. ⁵⁹ Winets ja José ja t'axajøø, jøts ja wa'ats wet ja tta'abijty, ⁶⁰ jøts ja t'atspiktaajky jam oo'kpi jutjotp midi ja wyinaty tø tyimiykjemy'øyinim. Kø'øm jap y'uktøkiwya'añ ma ja tsaa jut jam. Xjats ku ja møj tsaa ja tu'uk t'ukta'agiiñaa ma ja yiknidøki, jøts ja ojts ñøjkxni. ⁶¹ Nay ixam idøøn ja wyinatymidi ja María Magdalena møøt jadu'uk ja María, jam ja wyinaty chøønidi jam oo'kpi jut agø'øm.

Ja soldaditøjk pøn jam y'ejx'ejttip ja oo'kpi jut

⁶² Xjats ku kymjabom'ajty ku wyinaty tuki'i'yi tø yik'a'ejxigyxni, tum abaadi y'ejtni ti jaty tsojkip ku poo'kxin xøøw, winets ja teetywindsøndøjk møøt ja fariseotøjk ojts t'ats'ejxti ja Pilato, ⁶³ jøts ja t'atsnimaadyi:

—Windson, ja' øøts yam tø nja'myech ku yide'en wyaañ ja windaay'ajtpi jaa'y, ku ja wyinaty jaaak ja yjujk'aty, ku ja tiiy kyidigøøk xøøw yjujkpyøkt jadigojk, jade'en pyidsøømt jadigojk jap oo'kpi jutjotpy. ⁶⁴ Paty jade'en tigøøk xøøw xjadyimñanky'ejx'etit ja oo'kpi jut, jøts ja pyabøjkpitøjk kidi myendi koots jøts ja kidi tmaatsti ja oo'kpi ñine'kx ku ja tnøjmidit ja jaa'y: “Tø ja tmimajada'aky ja o'jkin, tø ja yjujkpyiky jadigojk.” Kuts jade'en tyaa'y'attit, yø'øts ne'egi janchka'ukmaañip, ne'egi ka'ap ja jawyeembi taay.

⁶⁵ Winets ja Pilato ja ñimaajyidøø:

—Ixyadi yø mdsoldadi ka'pxy niwine'enin yø y'ejx'etti. Nøjxkti meets jøts yikxon xyik'adujkøxtit mabaat meets jam kø'øm x'ixy.

⁶⁶ Winets ja ñøjxktøø jøts ja ojts yikxon tyik'adujkøxti ja oo'kpi jut, ojts ja t'axotsti ja tsaa midi tya'agüdyip jøts ja t'adsaadyøø, ojts ja seeyi tpikta'akti jøts ja jam tyiktandøø ja soldaditøjk pøn jam ejx'ejttip.

28

Ku ja Jesús yjujkpyiky jadigojk

¹ Xjats ku wyinaty tø ñaxy ja poo'kxin xøøw, jøts wyinaty kyujajta'aky kyudøø'kxa'aky myidukxøøw ja yjadu'ukpi samaan, winets ja María Magdalena møøt jadu'uk ja María tninøjxkti ja oo'kpi jut jøts ja t'ats'ejxwa'andi.

² Jøts jotmøñ myiiñ ja uyx janch møk, ja nwindson'ajtimdamik ja y'ankilis jam wyinaty kidakp tsajpwemp, jøts ku ja ojts yja'aty ma ja oo'kpi jut jam, jøts ja tjigüy ja tsaa midi ja tø yikta'agi'iy, jøts ja tta'ixakpejty. ³ Jade'en ja yjajy tyii'kxy sam widsukin, jøts ja wyet jade'en pyoobi sam tsap'øø'pkyin.

⁴ Xjats ku ja soldadi jade'en t'ejxtøø, jøts tsø'øgi ja yjanchyikmibejpniiyidi, jøts jade'en tyandøø sam ja jaa'y øøgyindi. ⁵ Winets ja ankilis tnimaay ja tø'øxyøjkti:

—Kidi mdsø'øgidi. Nnija'wip øts jøts ku ja nwindson'ajtim Jesús x'ixa'adi pøn kruskøjxp o'jk. ⁶ Ka'ap ja ya ukpøni, tø ja yjujkpyiky, tø ja tmimajada'aky ja o'jkin, tø ja jade'en yjaty sam ja ojts kø'øm tnigajpxyin. Men x'ejxti ma ojts yikpikta'aky. ⁷ Tsojk nøjxkti, jøts x'atstukmado'odit ja pyabøjkpitøjk jøts ku ja tø yjujkpyiky jadigojk, jøts ku ja jawyeen nøjxkt jam Galilea jøtsnim mee mnøjxkt; jamts ja x'ejxtit. Yø'øyi dø'øn ja ndukmadoowandip.

⁸ Xjats ja tø'øxyøjk jam putyi cho'ondøø ma ja oo'kpi jut jam, jade'en ja chø'øgidi jøts jade'en ja yjanxhonda'akti; jøts ja ojts tsojk tyiknøjxkti ja kajpxy ja ayuujk ma ja nwindson'ajtim Jesús pyabøjkpitøjk jam. ⁹ Ixam ja wyinaty jade'en ñaxti ku ja nwindson'ajtim Jesús wya'kaxi'jky jøts ja ojts kyajpxpøø'kxyidi. Winets ja wingon twingunøjxkidøø jøts ja twinguxanaay'øyidi, nagyumajtsidi ja' tyekyøjxp, ¹⁰ jøts ja yide'en ñimaajyidi:

—Kidi mdsø'øgidi. Nøjx øts ja nmigu'uktøjx x'atstukmadojidi pøn jaty ø nbabøjkp'i'ajtip jøts ñøjxktit jam Galilea, jam øts ja xpaattit x'ejxtit.

Ku ja soldadi t'atstukmadowdi ja teetywindsøndøjx sa ja jut y'awajch

¹¹ Examnim ja tø'øxyøjx wyinaty yø'odyi, jøts ja soldadi winaagin ñøjxktøø jam kajpjtøp pøn ejx'ejttip, jøts ja t'atstukmadoodøø ja teetywindsøndøjx ti jaty wyinaty tø tyuñi. ¹² Winets ja teetywindsøndøjx ojts tñinøjxkti ja møjaa'dyøjx jøts ja tkajpxy'ajitti kyijpxy kyajpxy; ojts yikxon ja maamyeeñ tmo'odi ja soldaditøjx, ¹³ jøts ja tñimaadyøø:

—Jade'en mee mwa'ant jøts ku koots, ixap mee wyinaty mma'ay, ku ja Jesús pyabøjkpitøjx ojts yja'atti jøts ja ojts t'atsmaatsti ja oo'kpi ñine'kx. ¹⁴ Jøts øy ja windsøn ja wyinaty tjanijawi, øøts ja møøt nnagyajpxit jøts ja ka' sa wya'ant, jøts mee ka' ti pøky mdaja'adit.

¹⁵ Xjats ja soldaditøjx t'axajidøø ja meeñ, jøts ja ojts jade'en tpadundi sa jaty ja wyinaty tø yik'ana'amdi. Jøts jade'en ixyambaat tñimadya'akti ja israelit jaa'dyi.

Ku ja Jesús ttaguwa'anüy'ñ ja tunk ja pyabøjkpitøjx

¹⁶ Jøts jade'en ñøjxktøø ja ñimaktu'ukpi jaa'dyi jam Galilea, ja nwindsøn'ajtim pyabøjkpitøjx. Ja'ttøø ja jam kojpkøjxp midi ja wyinaty tø tyukmadøyidi. ¹⁷ Jøts ku ja t'ejxpattøø ja nwindsøn'ajtim Jesús, jøts ojts ja ñagyuxendya'agyidi, øy ja jam winaagindi kø'øm pøn ja tkamibøjktip. ¹⁸ Winets ja nwindsøn'ajtim Jesús wingon wyingunøjxkiyidi jøts ja ñimaajyidi yide'en:

—Tø øts møk'ajtin nyikmøøy jøts øts ja nyiktu'unt wan tsajpjøtpyi jøts wan tñaxwiñi. ¹⁹ Ninøjxktits ja jaa'y øy manaajx øy magajp jøts ø xuk-pabøjkp'i'attit; myiknøbattipts ja' Dios Teety køjxp, Dios y'U'nk køjxp, jøts Dios y'Espíritu Santo køjxp, ²⁰ jøts yik'ixpøkti jøts tpadu'undit tuki'iyi ti jaty mee tø ndani'ane'emy. Jøts nimadowdi jøts ku meets ejtp nmøøt'ity øy juuni xøøw, kunim ø nme'ent jadigøjx. Jade'en id'øn ja y'ejxi.

JA ØGYAJPXY JA ØMYADYA'AKY MIDI JA MARCOS YJAAÿ

Ku Juan Bautista kya'amaay abak etjotp

¹ Yide'en yiknimadyak'okwaañ ja øgyajpxy ja ømyadya'aky midi ja nwindson'ajtim Jesucristo yja'ajtpy, ja Dios U'nk. ² Yide'en ja y'ejxi tyiyi tð dð'on ja Dios wyinaty kð'ðm tnimaañi ja kyugajpxy Isaiás, jøts ja yide'en tjaadya'ant ja ayuujk ku ja Dios Teety ja y'u'nk yide'en tnimaay:

Ngajxjawyeenip øts, u'nk, ngugajpxy tu'uk pøn nøjxpx jawyeen kuga-jpxy'ajtpi, ja'ats ja naxwii'ñit jaa'y tnøjmip, jøts wan ja tyiktøwdi tyiktuuda'akti ja wyinmaa'ñ, jøts mets ja m'ixpøjkin jade'en yikupøkt.

³ Pø patyxi ja kugajpxy ñijky jawyeen abak etjotp jøts myigu'uk ja tnøjmit møk'ampy:

“Awejxidi Dios y'ixpøjkin, yiktøwdi yiktuuda'akti mwinmaa'ñ yikxon.”

⁴ Ja Juandam idø'on jam jade'en memp abak etjotp jøts jaa'y ja tyiknøbety, yide'en ja wya'añ jøts ku ja jaa'y tuki'iyi tja'dyigøgyøxti ja kya'øyjaa'y'ajtin jøts wan tnøbajtkøxti, kuts idø'on ja jade'en ttu'undit winets ja yikpo-jkpimaa'kxtit. ⁵ Mayjaa'y idø'on ja jam nimejniyip jøts ja pyatmadøyi, mendip ja jaa'y jam pøn tsinaadyip Jude'it etjotp, jøts nayide'en pøn kugajp'ajtmidip Jerusalén; jade'en Juan ja mayjaa'y jam ñimiñiyi møj nøøjotp midi txøøw'ajtp Jordán, jøts ja jam ñøbatti ku pyøky ja tkajpxnaxkøxti.

⁶ Kameeyi pøjk wyet'ajtpy idø'on ja Juan wyinaty, jøts po'ak ja tsum'aty; ja' ja tð ñadyatsumyi jøts møj mu' ja jam tnidsøøni møøt ja jiyujk pa'ak, ja' ja jam yji'kxpy. ⁷ Yide'en idø'on kya'amay mayjaa'y agujkp:

—Ja øts ja jaa'y tu'uk ix'oojk xpamiñ pøn møkta'aky yikutukp ja'agøjpx ku kutujk ja tmimiñ møk'ampy, ka'ap øts ja nmi'abaaty jade'en sa yikutuky, niujuuni øts ja møøt nganamyibaat'atiyit. ⁸ Paty meets ixyam tiy janch ndyimdyukmadøy, jøts ku øts ja'ayi tð nniimiñ jøts meets nøø nduktanøbatt; jøts ku dð'on ja yja'att pøn øts idø'on ndijpy ix'oojk memp, jawaani øy ja tyunk ja ttu'unt kumi Espiritu Santo ja tyuktatøkip ja jaa'y.

Ku ja Jesús ñøbejty

⁹ Xjats ja Jesús winet et chøø'ñ Nazaret, jam kajpkøjpx midi wyinaty Galile'it jaa'y y'etjotp, jøts ja ñijky nøbajtpi møj nøøjotp midi txøøw'ajtp Jordán, ma Juan ja yiknøbajti. ¹⁰ Xjats ku ja pyidsiimy møj nøøjotp, winets ja ojts t'ixy ja tsajp jøts ku ja y'awa'ach, jøts Espiritu Santo ja jade'en ñigida'agyi sam ja tsapak. ¹¹ Xjats yikmadøøy ja Dios Teety y'ayuujk jap tsajpjøtpy, yide'en ja wya'añ:

—Øts me n'u'nk'ajtpy; njanchøjky mets jøts njanchtajotkujk'ajtpy mets.

Ku ja Jesús miku' øjts yjot'ijxyi

¹² Winets ja Espiritu Santo yiknøjkxøø jam abak etjotp, ¹³ jøts ja Jesús jam wixijkyxøøw chinaay. Xjats ja miku' ja yikpojkpitunwa'añi, jøts ja niujuuni tkamimadøøy. Jam idø'on ja chinaay ma ja may awa'añ jiyujk jam chøøniði, xjats ja ankilis ja pyudøjkøø.

Ku ja Jesús tpadøjkiy'ñ ja tyunk

14 Jøts ku ja Juan wyinaty tø yikpiktakni jap puxøjkjøtpy, winets ja Jesús chøø'n jøts ja ñijkxy Galile'it etjotp, ma ja tñiga'amaay ja øgyajpxy ja ømyadya'aky, midì ñigajpxy sa Dios ja yjaa'y tñitanit ja kyutujk. 15 Yide'en ja wyaañ:

—Tønim inet ja xøøw ja et yja'aty, wingomp ixyam ja Dios kyutujk midì ya tu'ump. Yiktigatsti ja mdsinaa'yindi, ja'dyigøøgyøxti tuki'iyi ja mga'øyjaa'y'ajtindi, jøts janchjawidi ja øgyajpxy ja ømyadya'aky.

Ku ja Jesús twaadsøø nimaktaxk ja ajkxmakpi

16 Jam idø'on mejpya'am midì txøøw'ajtp Galilea, jam ja Jesús wyinaty ñaxy ku ja t'ejxpaajty namajtsk ja jaa'y, ja Simón jam wyinaty møøt ja y'uch Andrés. Ajkxmaktip idø'on ja tyunk'ajttip, xyuumy ja jam wyinaty ñøøwejtspajttip midì ja tya'ajkxmaktip. 17 Xjats Jesús ja tñimaay:

—Mada'akti, møøt widettik øts jøts nduknijawidit sudso jaa'y ja nitso'ok'ajtin tpaaty.

18 Ku ja jade'en yiknimaydi, winets ja jatyi tmajstuttøø ja xyuumy midì ja wyinaty tya'ajkxmaktip, jøts ja tpadsoo'ndøø.

19 Jawaani ja Jesús ojts yø'øy xjats ja ojts t'ejxpaaty ja Jacobo, pøn ja Zebedeo wyinaty myajnk'ajtpy. Ja' jam wyinaty barkijotp t'adajkyidi ja xyuumy møøt ja y'uch Juan. 20 Xjats ja tyaajxyii'n, wyaadsoow ja'; winets ja tyeety ja tunk ja ttukmidandøø jam barkijotp møøt ja tyumbi, jøts ja Jesús ja tmøøtnøjkxti.

Tu'uk ja yaa'dyøjk pøn ja miku' wyinaty tø tyatøkiyi

21 Xjats ja ojts yja'atti Capernaum, jam møj kajpkjøxp; jøts ku poo'kxin xøøw tpaajty, winet ja Jesús ñijkxy yik'ixpøjkpi jam israelit jaa'y chaptøjkjøtp.

22 Xjats ja jaa'y ja jam ñigyumaap tjawidi, ku Jesús ja jade'en yik'ixpikyidi sam ja jaa'y pøn ja møk kutujk tmøøt'ajtp, ka'ap ja jade'en yik'ixpikyidi sam ja kajpxwejpitøjk pøn yik'ixpøjktip jap israelit jaa'y chaptøjkjøtpy. 23 Japts wyinaty tu'uk ja jaa'y tsaptøjkjøtpy pøn wyinaty ja miku' tø tyatøkiyi, ja' møk yide'en waan:

24 —¿Mets Jesús, Nazaretit jaa'y, tiku øø tø xnimiñ, sa øø xunwa'añ? ¿Ja' mets tø xnimiñ jøts øø xyikudigøøgyøxt? Wa'ats me n'ejxkapy pøni pøn mets. Ka'axi me mbøkmyøødi, Dios jaa'yxi mets.

25 Xjats ja Jesús møk twingugajpxyii'n ja miku', jøts ja tñimaay:

—¡Amøñi, kidi nugo mgajpxy, tsojk majtstu'tut yø jaa'y!

26 Xjats ja miku' møk'ampy tyikmibejpiky ja jaa'y, jøts ja møk chabaay, winets ja pyidsiimy. 27 Xjats ja mayjaa'y janchniyumaap tja'widøø, jøts ja xem yam ñadyiibykyidi kø'øm, yide'en ja ñawya'añidi:

—¿Ti wenk ixpøjkin ya'at? ¿Ti tunk yø jade'en tyumpy? ¡janch møk kutujk tmøødi, mimadojip paat ja miku' yø' ku yø t'ane'emy!

28 Xjats ja jaa'y ja tñimadoogøxti pøni niwine'en ja jam wyinaty chøøni Galile'it etjotp. Niduki'iyi ja tñija'wigyøjxtøø ku ja Jesús jade'en t'ødyuñ ja jaa'y.

Ku ja Jesús tyikmøkpiky ja Simón Pedro tyaakmøjt

29 Xjats ku ja Jesús pyidsiimy jam tsaptøjkjøtp, winets ja tmøøtnijkxy ja Jacobo møøt ja Juan jam Simón tyøjkwindum, ma ja wyinaty tmøøtsøøni ja y'uch Andrés. 30 Jamts pamaa'y ja wyinaty tmøødidi, tyaakmøjt ja Simón wyinaty pøjkip, møwa'añ jømba'am ja yjanchpiky; jøts ja Jesús ja ttukmadowdi ku ja jade'en pyiky. 31 Xjats ja Jesús twingume'eniyii'n ja pamaa'y, jøts ja ojts

twejtſji'iky; ja'ayi ja jade'en ttuuñ, winets ja pya'am jatyi ñiwaajtsøø; kuts ja jade'en yjajty, xjats ja tø'øxyøjk ja yikaajyidi nayjatyi ku ja chøøjky.

Ku ja Jesús tyikmøkpiky ja maabyamaa'y

³² Waani y'ijty ku ja xøøw yjejxy jøts ku kyoodsiña, winet ja Jesús yiktanimiñ ja mayjaa'y pøn wyinaty pøjkidip, jøts ja jaa'y pøn wyinaty tmøøt'ajttip ja miku'; ³³ niduki'iyi ja kajp jaa'y myendøø tøk'agøøm ma ja Jesús jam wyinaty. ³⁴ Xjats ja may tyiktsøøjky ja pamaa'y pøn wyinaty tigati pøjkidip, ojts ja tyiktsokixy jøts ja miku' ja tyikpidsømgijxy midi ja jaa'y wyinaty myøøt'ajttip; jøts ka'ap ja miku' ja tyikajpxy, kumi ñija'wip ja' paty ja jade'en ttuñ jøts ja kyadamigajpxiyit jøts ku ja Dios U'ngi.

Ku ja Jesús kya'amaay

³⁵ Xjats ku yjøpkyoots'ajty, jaakmøñim ja et wyinaty, winets ja Jesús myaabidi'jky jøts ja chøøñ jam kajpjotp, Dios Teety ja wyinaty y'ajot'atwampy, paty ja ñijkxy abak etjotp. ³⁶ Xjats ja Simón choo'ndøø ixaabyi møøt ja myigu'uk, jøts ja tpaatwa'andi ja Jesús, ³⁷ xjats ku ja tpattøø winets ja tnimaadyøø:

—Mdum'ixaajyip jaa'y ixyam.

³⁸ Winets ja ñimaajyidøø:

—Wan tjaa'myindi abikyajp midi wingon tandip, jøts øts jam nayide'en nniga'ama'aty ja øgyajpxy ja ømyadya'aky; kumi ja' ø tø nnimiñ jøts øts jade'en ndu'unt.

³⁹ Xjats ja Jesús jade'en t'ayøøy ja kajp midi jam wyinaty Galile'it etjotp, jøts ja kya'amay jam tsaptøjkjotp, jøts ja nayide'en tyikpidsimy ja miku' midi ja jaa'y wyinaty winaagin myøøt'ajttip.

Ku ja Jesús tyiktsøøjky ja jaa'y pyu'uts

⁴⁰ Xjats Jesús ja jaa'y tu'uk ñimejnøø pøn wyinaty axøø'kpim putsp, jøts ja wyinguxanaajyi, yide'en ja wyaañ:

—Møøt'ajtpy mets ja møk'ajtin jøts ø xyiktso'okt, yiktsokts øts mdsojk'ajtingøxp.

⁴¹ Xjats ja Jesús ja y'ayo'ejxi, jøts ja tñixajiyi'ñ, yide'en ja tnimaay:

—Ndsøky'ajtpy øts jøts mdso'okt, tsokni.

⁴² Ja'ayi ja jade'en wyaañ, xjats ja jaa'y ja pyu'uts jatyi ñiwaajtsiyøø jøts ja myøkpiky, møk møjaaaw ja ñayja'wiyøø. ⁴³ Winets ja Jesús ja pyagajxøø, yikxon ja y'ukyik'ane'emy, yide'en ja tnimaay:

⁴⁴ —Madow, kidi jaa'y xukmadøy, ka'ap pøn sa xnøjmit, nøjkx jam teety wyindum jøts ja xuk'ext ku tø mdsøø'oky, jøts nay jam idøø'n mdamiyoxp ja Dios ja jiyujk sa Moisés jekyip tyikutuky, jade'en ja jaa'y tñijawidit jøts ku me tø mjancho'øky.

⁴⁵ Xjats ja jaa'y ñijkxy, jøts ja tuki'iyi ttamimadyakijxy ja mayjaa'y sudso pu'uts ja wyinaty tø ñiwa'achiyi. Paty ja Jesús øy ma kya'ukajtpøjkini, jagam ja wyidity ma ja et janch abak; jamts ja øy magama pøn ñidsøøñi jøts ja yikninijky.

2

Ku ja Jesús tyikpidi'jky ja køxujpxi pakxujpxi

¹ Ku wyinaty kawinaak xøøw tø ñajxni, xjats Jesús jadigojk kyajtpøjkijyi'ñ jam Capernaum; jøts jaa'y ja tñija'widøø ku ja wyinaty tø yja'aty jam tøjktotp. ² Xjats ja mayjaa'y jaty ñamyujkidøø, yikxon ja tøjky janch'ujch, ka'ap ja y'uknibaajtini; jøts ja Jesús jam tniga'amay ja øgyajpxy ja ømyadya'aky.

³ Winets ja jaa'y yja'ttøø nimaktaxk pøn tkijja'ttøø tu'uk ja pamaa'y pøn wyinaty køxujxp pakxujxp. ⁴ Xjats ja Jesús ja tjpaatwa'andi, jøts kumi nima kya'awa'ādsi kumi tō ja mayjaa'y wyinaty t'awa'kta'tsnidi ja tøjka'aw, winets ja tñitajuttøø ja tøjik jøts jut ja tyik'awatstøø. Japts pamaa'y ja tyikwinajktøø møøt ja myaabajt jap Jesús wyinduypy. ⁵ Xjats ku ja Jesús ojts t'ixy ja jaa'y pøn tyikmendøø ja pamaa'y jøts ku ja amuum yjanchjawiyi, winets ja pamaa'y ja tñimaay:

—Nbojkipimee'kxpy mets u'nk.

⁶ Jamts wyinaty ja kajpxwejpitøjik chøønidi pøn wyinaty ttuk'ixpøjktip ja Moisés kyutujk jam tsaptøjktotp, ja'ats yide'en winmaadyøø: ⁷ “¿Ti yø jaa'y jade'en kyuwa'anip, sa yjaty? ¿Tiku yø jade'en wya'añ? ¡Ka'ap idø'on jade'en y'oyi! ¿Pøn ja pøky ya t'ukmaa'kxp, kidi Diosip tu'ugyi tmaa'kxp ja pøky?”

⁸ Xjats ja Jesús ñija'wip ja wa'ats ku ja jaa'y jade'en wyinaty wyinmaydi, winets ja tñimaay:

—¿Tiku jade'en nichøky mwinmaydi? ⁹ ¿Ja ti ne'egi jawaani jajtni, kuts yø pa'amjaa'y nnøjmit: “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaaabajt jøts nøjknin mdigam”? ¹⁰ Ixyamnim meets inet x'uk'ext mabaat øts idø'on ja møk'ajtin nmøø'taty ya naxwiin jøts ø nmaa'kxt ja pøky.

Xjats ja tñimaay ja køxujxpi pakxujxpi:

¹¹ —Pidøkni, wa'kukiñi, wejtsjø'øk yø mmaaabajt jøts mnøjknin mdigam.

¹² Xjats ja pamaa'y jatyi pyidi'jky; ojts ja myaabajt ja twejtsji'iky, jøts ja jam cho'onni mayjaa'yjotp. Paty ja jaa'y niduki'iyi ñigumaap tja'widøø ku ja pamaa'y jade'en myøkpiky, xjats ja Dios ja ttamøja'widøø, jøts ja wyandøø:

—Nimā niwindinim jade'en nga'ijxyindi.

Ku ja Jesús tpawaay ja Levi

¹³ Waani y'ijty, winets jadigojk chøø'ñ ja Jesús jøts ja ñijkxy jam mejy'agø'm; jamts jaa'y ja yikxon yjanchnimiñi, jøts ja jam tyik'ixpiky.

¹⁴ Xjats ku dø'on ja ojts ñijkxy, winets ja t'ejxpaajty ja Levi, ja Alfeo y'u'nk, jam ja wyinaty chøøni mā ja ttukugubety ja jaa'y ja pyikta'aky, xjats ja Jesús wyaañ jøts ja Levi yiknimaay:

—Wan tjaa'myim jøts øts n'ixpøjkin xpabøjkit.

Winets ja Levi jatyi tyanaagyukiyi'ñ, jøts ja Jesús ja tpanijxxy.

¹⁵ Xjats ja Jesús yikwaay migaabyi Levi tyøjkwindum, winets ja yikugubajtpi yja'tmidøø, møøt jadu'ukpi jaa'y pøn kyabadundip ja myigu'uk chinaa'yin, jøts ja tu'ugyi twinguwa'jtsidøø ja kaabyajt møøt ja Jesús jøts ja pyabøjkpitøjik; janch namay ja jaa'y jam wyinaty pøn ja Jesús pawidejtiyip.

¹⁶ Xjats ku ja kajpxwejpitøjik jøts ja fariseotøjik jade'en t'ejxtøø jøts ku ja Jesús jam wyinaty tmøøtkay tum ja ka'øyjaa'dyi, winets ja tñimaadyøø ja pyabøjkpidi:

—¿Jadits ku yø mwindsøn tmøøtkay yø yikugubajtpidi jøts yø ka'øyjaa'dyi?

¹⁷ Xjats ku Jesús ja jade'en tmadøø, winets ja wyaañ:

—Ka'ap øts nyiktaniguexy jøts nbudøkit pøni pøn janch wa'ats ñayja'winiyip, ja'agøjxp ku ja pyøky kapøkyjawidi. Ja'ayi ja nbudøkip pøni pøn ñadyapøkyja'wiyidip ja pyøky. Nayide'en øts idø'on njaty sam ja tsøyibi kyanijxxy mā ja pamaa'y kya'ity. Jamyi ja ja'ayi ñijkxy mā ja pa'amjaa'y jam.

Ku ja Jesús yiktñibyiky tigøjxp ku ja kya'ayuu'atti

¹⁸ Tuk'ojk idø'on yjajty, ixam idø'on Juan Bautista pyabøjkpitøjik wyinaty l'amaay'atti møøt ja fariseotøjik, ayuu'ajttip ja jam wyinaty, Dios idø'on ja

jade'en wyindsø'lkidip, winets ja jaa'y winaagin tnimendøø ja Jesús mā ja wyinaty jøts ja ttiibyøkti, yide'en ja tnimaadyøø:

—¿Jadits ku Juan pyabøjkpitøjk y'amaay'atti jøts ja fariseotøjk nayide'endi, ka'axi ja kyaydi, jøts sudso mets yø mbabøjkpitøjk nayide'en kya'amaay'atti, sudso meets yjawī amgujk jotkujk mgaydi? Ka'ap meets yjawī ti xkumay.

¹⁹ Jade'en ja wyandøø, xjats ja Jesús yide'en y'adsøøy:

—¿Winaak ojkimts meets jade'en tø x'uktani'ixy, winaak ojk meets jade'en tø x'uknijawī ku tø'øxñigaabyi tø'øxñi'ukpi tø y'uk'ayuu'atti ku ja jemyaa'y jam tø yja'tni? Ka'axi jade'en pøn y'ayuu'aty, ka'ap jade'en pøn tø t'amaay'aty. ²⁰ Jaanim idø'øn tiy yjanch'amaay'atti pøni ku ja wyinaty tø yiktawinwaadutnidi ja jemyaa'y, jam ja jade'en kyaydi amgujk jotkujk jøts ja jemyaa'y ja myidsep ja o'jkin jatyi tyuk'anøjkxiyi. ¿Pønts jade'en kidi yjotmay'øøky? ¿Sudso dø'øn jotkujk ngaa'yint n'uujkint? Pø nayide'enxi øts idø'øn yø nbabøjkpitøjk yam xjawidi ku njaakyam'aty.

²¹ 'Ka'axi pøn wyetpach tta'agiyi jemwyet midī tyimyjemñim; ku ja jade'en yiktu'unt, jøts kumi mujkpi ja jemwyet, jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'. ²² Jøts nayide'en ka' y'oyi jøts yikpikta'akt ja vino jap po'dukjøtpy midī namii'kxñim; ku ja jade'en ndu'unint, takøø'tsipts ja po' jøts jade'en nugo wyindigøy, windigøøpy ja po' jøts nayide'en ja vino. Paty ja vino midī namii'kxñim nda'ada'amyin ja jembyo'ak, jøts jade'en nimidi kyawindigøø'ty.

Ku ja Jesús pyabøjkpitøjk poo'kxin xøøw et y'ariindøjtøø

²³ Tuk'o'jk idø'øn yjajty ku poo'kxin xøøw wyinaty tø tpaaty, winet et ja Jesús ja pyabøjkpitøjk tmøøtnajxy jam kamjotp mā ariingam jam wyinaty; jam idø'øn ja wyinaty ñaxti ku ja pyabøjkpitøjk ttøjpinaxwā'ktøø ja ariindøøm. ²⁴ Xjats ku ja fariseotøjk ja ojts jade'en y'ijxyidi jøts ku ja jade'en y'adø'øtsti, winet ja Jesús jatyi yiknimaay:

—¡Ejx yø mbabøjkpitøjk! ¿Tiku yø jade'en y'adø'øtsti, tiku ariin yø ttøjti, kumi ka'ap jade'en kyutuky: jøts yø jade'en y'adø'øtstit ku poo'kxin xøøw?

²⁵ Winets ja Jesús y'adsøøy, jøts ja wyaañ:

—Nugo meets mjanchkajpxy. Tø meets ja nøky xja'ixy midī wamp jøts ku ja David yide'en y'adijch møøt ja myigu'uk ku yuu ja pyaajtidøø, ku ja wyinaty niti kya'ijtxyidi. ²⁶ Winets ja ñøjkxtøø jap tsaptøjkjøtpy mā ja Abiator jap wyinaty tyeetywindsøn'aty, japts ja t'amidøøy ja tsapkaaky midī ja Dios yja'ajtpy jap wyinaty. Ja'ats ja ojts tkaydi midī ka'ap kyutuky: jøts nugo jaa'y ja tka'adyit. ¿Jøts tiku dø'øn ja jade'en y'adijch pøni ka'adam ja jade'en kyutuky? ¿Tiku myigu'uk ja nayide'en ttukaay ja tsapkaaky, pøni jade'endam ja kyutuky: jøts ja ja'ayi tka'adyit pøn teety'ajttip?

²⁷ Nayi waan ja Jesús yide'en:

—Ja'agøjxp ja poo'kxin xøøw yikpiktaajky jøts ja jaa'y yikpudøkit, kidi ja'ajip poo'kxin xøøw yiktanibiktaajkiyi'ñ jøts jaa'y niti kyidyimdyu'undit.

²⁸ Ngudanaapy øts ja naxwii'ñit jaa'y, jøts øts wamp ti paat'ajttip kapaat'ajttip yiktu'unt ku poo'kxin xøøw.

3

Ja jaa'y pøn wyinaty ja kyø'jadi'iñi tøøtsnip

¹ Xjats ja Jesús jadigojk tyøjkii'ñ jam tsaptøjkjøtp mā yaa'dyøjk ja tu'uk tpaajty, midī wyinaty tuktamajñ køxujxp. ² Jøts ja Jesús jam a'ejxuky y'ity, ja' ja jaa'y y'ejxwāndip pøni y'ukyiktsøky idø'øn ja jaa'y ku poo'kxin xøøw,

winets ja jatyi tni'øønidit. ³ Xjats ja Jesús tnimaay ja yaa'dyøjk pøn ja kyø' wyinaty xujxp:

—Pidø'øk jøts ixē nøjcx mdani kuk'ajj.

⁴ Xjats ja Jesús ttiibyijky ja jaa'y pøn ja jam wyinaty a'ejxujkiyidip, yide'en ja tnimaay:

—¿Midi'ibi ixyam kutuky, ku jaa'y n'ødyu'unint, uk ku jaa'y nga'ødyu'unint? ¿nyiknitsoojkimp ja jaa'y, uk nyik'oo'kimp ku poo'kxin xøøw, midi'ibi øy?

Xjats ja jaa'y amøñi y'etti, nipøn sa kyawa'lañ. ⁵ Winets ja Jesús ja twin'ejxji'jky ambøjkin'ampy, jøts ñiyjotmay'oo'kni dø'øn ja Jesús y'ejxji'jky, ja'agøjxp ku ja jaa'y niwine'en tkaja'gyukidi. Jøts ja tnimaay ja jaa'y midi wyinaty køxujxp:

—Xajtøw.

Xjats ja xyajtiy, jøts ja kyø' ja møk tyaañ, ojts ja chø'øky. ⁶ Winets yø'øpyidsømdøø ja fariseotøjkti, jøts tminagyajpxidi ja Herodes myigu'uk, ja' ja kyajpxy'ajttøø sudso t'ukyik'ooktit ja Jesús.

Ja mayjaa'y pøn jam wyinaty; mejy'agø'øm

⁷ Xjats ja Jesús chøø'ñ, jøts ja pyabøjkpitøjk ja ojts tmøøtnijxxy jam mejy'agø'øm, winets mayjaa'y ja pyanøjksidøø pøn jam wyinaty Galilea kugajp'ajttip. ⁸ Xjats ku mayjaa'y ja ojts tnimadowdi jøts ku ja Jesús jade'en tjanch'ødyuñ ja jaa'y, winets jam øy pøn jaa'y myendøø, pømbi tsoo'ndip jam Jude'it etjotp, pømbi Jerusaléngit kajpjtøp, pømbi Idume'it etjotp, pømbi tsoo'ndip wingon ma ja møj nøø midi txøøw'ajtp Jordán, pømbi tsoo'ndip jam Tiro etjotp, jøts pømbi tsoo'ndip jam Sidón etjotp, jade'en ja mayjaa'y ja jam ñimejniyøø. ⁹ Ja'agøjxp ja Jesús ojts t'ane'emy ja pyabøjkpitøjk jøts ja jam tyik'awejxtit tu'uk ja barki, jøts mayjaa'y ja kya'adejmukiyit. ¹⁰ Kumi tø ja wyinaty kawinaak tyiktsø'øky ja jaa'y, tum jam ja pamaa'y wyinaty tø ñaxkida'akti ja' ñikøjxp jøts ja cho'okti. ¹¹ Jøts ku ja Jesús maamyiku' y'ejxpaadyiyi midi ja mayjaa'y jam myøøt'ajttip y'am yjotp, jatyi ja wyinguxaniyi jøts ja ñii'mxyi:

—Dios U'nk mets.

¹² Xjats ja møk tnøjmi jøts ja ka'ap ttukmado'odit ja mayjaa'y jøts ku ja Dios U'ngi.

Ku ja Jesús twiwijch ja jaa'y nimakmajtsk pøn ja wyinaty kyudanaaby'atwampy

¹³ Xjats ja Jesús pyatøjkiyi'ñ kojpkøjxp, ma ja jaa'y ja twaadsøøy pøni pøn idø'øn ja kø'øm chøjky, winets ja jam ñimejniyøø ja jaa'y pøn ja wyinaty tø twaadsøøy. ¹⁴ Jøts ja nimakmajtsk twiwijch pøn ja ejtp myøøtwidewampy, jøts pøn tniga'ama'adyip ja øgyajpxy ja ømyadya'aky; ¹⁵ xjats ja tkutujkmøøy jøts ja tyiktso'oktit ja pamaa'y, jøts ja miku' ja tyikpidsø'ømdit midi ja jaa'y winaggin myøøt'ajttip. Jade'en tyajky ja kutujk. ¹⁶ Nimakmajtsk idø'øn ja jaa'y jam wyinaty: jam ja Simón wyinaty pøn nayide'en yiktejp Pedro; ¹⁷ jøts nay jam ja Jacobo wyinaty møøt ja y'uch Juan, ja Zebedeo y'unajk midi xøbajttøø Boanerges, ja' idø'øn tyijpy midi møk møk ja jaa'y myigajpxtip ejxim ja anaaw pyijy, ka'ap idø'øn chø'øgidi; ¹⁸ Nay jam ja jaa'y wyinaty midi txøøw'ajttip Andrés, Felipe, Bartolomé, Mateo, Tomás, Jacobo ja Alfeo y'un'k, Tadeo, jøts ja Simón midi tsoo'mp canaangit jaa'y y'etjotp, ¹⁹ jøts nay jam ja Judas Iscariote wyinaty midi tkøyajk ja Jesús.

Ku ja Jesús yiknimaay jøts ku miku' myøø'ajtin ja tyiktuujni

Xjats ku ja Jesús wyimbijty kojpkøjxp, winets pyabøjkpitøjk ja tmøøtøjkijii'ñ tøjkjøtpy, ²⁰ jøts ja jaa'y yikxon ñamyujkidi jadigojk, nigidibaat ja Jesús y'ukaañidi møøt ja pyabøjkpitøjk. ²¹ Xjats ku ja Jesús myigu'uk ñimadojyøø jøts ku ja jam wyinaty, winets ja ñimejni jøts ja yiktsoonwã'ãñi kumi jade'en ja wyinaty wyinmaydi jøts ku myø'øty ja Jesús.

²² Nayi tø ja kajpxwejpitøjk wyinaty myeemidi jam pøn tsoo'ndip Jerusalén, xjats ja wya'andi:

—Miku' windsøn yø jaa'y myøøt'ajtpy, ja Beelzebú, ja' yø tyamøj paty yø myayi jøts yø tyikpidsimy myimiku' midi yø jaa'y jadu'uk myøøt'ajttip.

²³ Xjats ja Jesús twaadsøøy ja jaa'y, jøts ja ttukwinjawiwya'ãñ tu'uk ja madya'aky, paty ja wya'ãñ:

—¿Sudso ndejint miku' kø'øm ñankpyidsømiyit aguwanikøjxp? ²⁴ Jøts nayide'en ku tu'uk kajp ñawya'kxyi, jøts ja tsep ttundi agø'ømyi, ka'ap ja kajp jeky y'ity, jaty ja jaa'y jadi'iñi ñankyixyidi; ²⁵ nayide'en jyaty ku jaa'y ñachiigyidi ni'u'nk ni'una'jk, ka'ap ja jeky chøønidi. ²⁶ Jøts ku miku' kø'øm ñañibidø'øgyit, tø dø'øn ja wyinaty kyawindiy, ñankyudigøjyip idø'øn ja wyinaty kø'øm.

²⁷ 'Nipøn midsep jap jadi'iñi kyatøki jap jotmøk jaa'y tyøkjøtpy, kunim ja tkøwøøndit tpakwøøndit; winetnims ja tpøkøjxidit ja pyikta'aky. ¿Ti sudso øts yø jaa'y jeexyip ja miku' ndukmajtstu'uty kuk øts ja miku' windsøn jawyeen tø ngamimada'aky?

²⁸ 'Janch meets idø'øn nnøjmi, jøts ku ja jaa'y ja pyøky tuki'iyi yikmee'kxy, tuki'iyi yikmaa'kxkixy ja ka'øñigajpxy ja ka'øñimadya'aky; ²⁹ ja' nijuuni kyayikpojkipimaa'kxp pøni pøn tka'øñigajpxp tka'øñimadyakp ja Espiritu Santo, ejtp ja pyøky ja tmi'ity.

³⁰ Ja'agøjxp ja Jesús jade'en wyaãñ ku ja wyinaty jade'en tø yiktijy jøts ku miku' ja tmøødi, jøts Espiritu Santo tkamøøt'aty.

Ja Jesús tyaaak jøts ja y'uch

³¹ Waani y'ijty, xjats ja Jesús y'uch yja'ttøø møøt ja tyaaak, jøts ja jap tøk'agi'py wya'k'øyidi, japts ja tñankwyaadsojidøø ja Jesús. ³² Winets Jesús ja jaa'y ñimaajyøø pøn ja jap wyinaty wingon windsinaajyip, yide'en ja wyandøø:

—Íxap ja mdaak y'awijxy tøk'agi'py møøt ja m'uch, mets myik'ixaapy.

³³ Xjats ja tnimaay:

—¿Pøn øts idø'øn xuktaak'ajttip, jøts pøn øts idø'øn xuk'uch'ajttip?

³⁴ Winets ja twin'ejxij'jky ja mayjaa'y, jøts ja tnimaay:

—Yø' øts idø'øn ndaak'ajtpy, jøts yø' øts idø'øn n'uch'ajtpy pøn øts ya wingon xwindsinaadyip. ³⁵ Ja' øts idø'øn n'uchip, jøts ja' øts idø'øn ndaagip pøni pøn tpadundip sã ja Dios chojkin.

4

Ku ja Jesús tmadyakpaaty ja jaa'y midi nøjx neppi

¹ Xjats ja Jesús jadigojk yik'ixpøjktøjkijii'ñ jam mejpya'am ma ja jaa'y ja ojts ñimiñiyi may'ampy, jøts ja jam ñañimukpajtidøø. Ku dø'øn ja jade'en janch namaydi, winets ja Jesús tyøjkijii'ñ jam barkijotp midi wyinaty nøøjotp, jants ja y'ixaajky jøts ja mayjaa'y jam nøø adsajotp tyandøø. ² Jants ja tyik'ixpijky jade'en, may ja exxajtin madya'aky ja jam tñigajpxy, yide'en idø'øn ja tnimaay ja mayjaa'y ku ja jam yik'ixpijky:

³ —Oyim idø'on xmadø'odit: Tu'uk idø'on jaa'y chøø'n ariin wøjpi. ⁴ Jøts ku dø'on ja ojts twøjwidity ja tyømt, winet ja tømt waani ñaxkidaajky jam tuu'ba'am, ja'ats ja joon jam ñimeen jøts ja wa'ats tpeemujkiyxy. ⁵ Nayide'en ja tømt jam waani ñaxkidakmøø tsaajotp mā ja naajx øy kya'ity; xjats ja ariindømt jam janch tsojk myuyxy, kumi ka'ap ja naajx wyinaty myajpxy. ⁶ Jøts ku ja xøø'an myiñ, winets ja tyiñch, ja'agøjxp idø'on ja jade'en yjajty ku y'aats ajawi kya'ity. ⁷ Nayi naxkidaajk ja tømt jam kujp agujkp; jamts ja yjanchni'aa'mbejty ku ja kujp yikxon yondøø jøts ja jade'en kyatøømiyñ. ⁸ Nayi naxkidaajk ja tømt jam øñaxjotp. Ojts ja yikxon yøñ, yikxon ja jam yjanchtøømiyñ mid'i'ibi ee'pxmajk ja pyajkwimbejt tu'ukpi tømt, mid'i'ibi tugi'pxy pajkiyñ, jøts mid'i'ibi magø'pxy, jade'en ja ariindømt pyajkpejty. ⁹ Xjats ku ja Jesús jade'en myadyakijxy, winets ja tñimaay ja mayjaa'y: —iPøni pøn ja'gyukiwyampy, wan tja'gyuki!

Tigøjxp idø'on ja Jesús ejxpajtin madya'akyøjxp ja y'ixpøjkin tyaky

¹⁰ Xjats ku ja mayjaa'y choo'ndi, jøts ja Jesús jam tyaañ, winets ja tyiktøødi ja namakmajtsk pyabøjkpitøjk, jøts nay ja pyabøjkpitøjk pøn ja jam wyinaty myøøt'ajtpy, ja' ja ñijawiwyanðip ti dø'on ja madya'aky jade'en tyijpy, sudso ja yikja'gyuki. ¹¹ Xjats Jesús ja ñimaajyidøø: —Meets nugo myiktukmadoop ja' mid'i'ibi ka'ap y'ijty yiknijawi pøni sa ja Dios kyutujk y'ejxi tyiyi mid'i'ibi ja tyani'tanaapy ja yjaa'y; jøts pøn øts ngutujk xkababøjkidip ka'ap ja jade'en tiy yiktukmadowdi, ejxpajtin madya'akyøjxp ja yiktukmadowdi; ¹² jøts ja jade'en kyawinmaa'nbyaattit ku ja ti tjani'winmayidi, ka'ap ja tmadøogukidit pøni sa jaty ja yjayiknøjmidi, paty idø'on ja jade'en yjatti ku øts ja køø'm xkajanchjawidi, køø'm idø'on ñadyuñidi paty ja pyøky kyayikmaa'kxtit.

Ku ja Jesús tñigajpxy sudso dø'on yikja'gyukit ku jaa'y neppi ñijky

¹³ Winetnims ja wyaañ:

—¿Ka'ap xja'gyukidi yø ejxpajtin madya'aky, sudsomts meets ja xjanchja'gyukigyøxt jadu'uk ja ejxpajtin madya'aky? ¹⁴ Pøn ja ariindømt twøjp, jade'en idø'on ja n'ukpiktaajkint ejxim ja jaa'y mid'i'ibi ja øgyajpxy ja ømyadya'aky tkajpxwa'kxp. ¹⁵ Jøts winaagin jaa'y jade'endi ejxim ja tømt mid'i'ibi naxkidaajk jam tuu'ba'am: y'amidøodujktip ja' ja øgyajpxy ja ømyadya'aky, jøts ku ja jade'en tmadowdi, winets ja miku' ja jaty ñimiñidi jøts ja pyøjkxyidi ja øgyajpxy ja ømyadya'aky mid'i'ibi ja wyinaty tø y'ukjotøkiyidi. ¹⁶ Nayide'en ja jaa'y winaagin n'ukpiktaajkma'ant ejxim ja tømt mid'i'ibi naxkidaajk jam tsaajotp: pyatmadoodip ja' ja øgyajpxy ja ømyadya'aky ñixyondakni, jøts kumi ka'ap ja tñimø'etti, ¹⁷ jade'en ja yjatti ejxim ja ariin y'aats ajawi kya'ityin; ka'ap ja jeky tmi'etti ja'agøjxp ku ja tku'ayo'ombaadiidi ja øgyajpxy ja ømyadya'aky, winets ja tmajtstu'utti, ka'ap ja tu'ugyi tpadundi. ¹⁸ Nayide'en jaa'y winaagin yjatti ejxim ja tømt mid'i'ibi jam yikwøj kujp agujkp: yjapatmadoodip ja' ja øgyajpxy ja ømyadya'aky, ¹⁹ jøts ja' ja ne'egi tyajotigøødyip ja pyikta'aktyi ja jujky'ajtindi mid'i'ibi ya naxwiñ, ja' møjtojkidip jøts ja tyikudigøy ja øgyajpxy ja ømyadya'aky, jøts ja jaa'y tkayikwingaxø'øktit ja Dios kyajpxy. ²⁰ Ja jaa'y nayide'en winaagindi pøn tpatmadoodip ja øgyajpxy ja ømyadya'aky jøts ja yjotøkiyidi, winets ja tyikwingaxø'økti jade'en ejxim ja tømt mid'i'ibi yikwøj jam øñaxjotp. Winaagin ja jaa'y jade'endi ejxim ja tømt mid'i'ibi tyøøm tyikwimbejtp may, mid'i'ibi ee'pxmajk pajkiyñ, mid'i'ibi tugi'pxy jøts mid'i'ibi magø'pxy.

Niti jadi'iñi kyatañ, kuwañim ja tyimyiknijawi

²¹ Nayide'en pyabøjkpitøjk ja tñimaay:

—¿Ti ja' ndejint jaj wya'añ jøts ja yiknijupt jap kajuun patki'py, uk jøts ja yikpikta'akt jap maabajt patki'py? Ka'ap ja jade'en pøn tyiktuñ, køjxp ja yikpikta'aky, jamts ja yjajy. ²² Ti yjaw'i ka'ukyikpatp ku ti yjaju'uch'ity, ti tunk uk ti winmaa'ñ yjaw'i ka'ukyiknija'wip ku ti yik'amaa'tsk'aty. ²³ Jamxi mdatskti, tamadowdi yikxon.

²⁴ Nayide'en pyabøjkpitøjk ja tñimaay:

—Øyim xpatmado'odit yø ixpøjkin midi myiktukmadoodip. Nayide'en meets ja wijy'ajtin myikmo'ot pøni sa meets ja jaa'y xukniweji ja Dios y'ixpøjkin; jøts mjaaktyimñijawip meets ja jawaani pø xmodoopxi meets yam kø'øm. ²⁵ Jaaktyimykmoøpy ja wijy'ajtin ja' pøn ja'gyukip; jøts pøn kaja'gyukip, jaaktyimykpøkøjxip tuki'iyi ja' ja wijy'ajtin.

Ku yiknimadyaajky ja tømt midi mujxp jøts midi yomp

²⁶ Nayide'en pyabøjkpitøjk ja tñimaay:

—Jade'en idø'on ja Dios kyutujk midi ja tyanitanaapy ja yjaa'y, jade'en idø'on ja n'ukpiktaajkint sa ja jaa'y yjatyin ku tyømt ja twøjy naxjotp; ²⁷ mya'ay ja koots pyidi'iky ja jøpy, najxpts idø'on ja xøøw tsuu jade'en, mujxp ja tømt jap, yomp idø'on ja jap, jøts ja jaa'y ka'ap tñijaw'i tigøjxp idø'on ja jade'en yjaty. ²⁸ Jøts kumi ja naajx idø'on ja jade'en ñamyayi kø'øm nanntyøombidsøjmiyip; ku jawyeen pyidsimy ja ariindeky, jøtsnim ja kyojki, jøtsnim ja tyøømbajtni; ²⁹ kuts ja myijay, winets ja jaa'y choondi jøts ja twejxwa'andi, kumi tø ja ariin wejkk'aats tpaaty.

Ku ja Jesús tmadyakpaaty ja mortas tømt

³⁰ Nayide'en ja Jesús tñimaay ja pyabøjkpitøjk:

—¿Ti ja Dios kyutujk møøt ndami'ejxi'int midi ja tyanitanaapy ja yjaa'y, ti ixpøjkin ti madya'aky ja ndamimado'owint? ³¹ Jade'en idø'on ja n'ukpiktaajkint ejxim ja mortas tømt midi yikwøjp jam naxjotp. Ka'ap jadu'uk ujtspajk te ya naxwiin' midi janch mutsk sa ja møj mortas tøømdin; ³² jøts ku ja yikwijy, janch yikxon ja yøn, wyinajxkijxpy ja tuki'iyi; ja ujts midi yikjagyajp jap kemyjøtpy, yikxon ja janch møj y'awaji y'axeeñi, japts ja joon patki'py y'aptso'okti.

Tigøjxp ku Jesús xumi jade'en tyik'ixpiky ja jaa'y ejxpajtin madya'akyøjxp

³³ May ja Jesús ja jaa'y jade'en ejxpajtin madya'akyøjxp tyik'ixpijky ku ja tnanky'ixpøjkøø ja øgyajpxy ja ømyadya'aky, jade'eñi paat ja y'ijty tmadya'aky mabaat ja kø'øm tñajtsjawi ja jaa'y tñimadowdi. ³⁴ Jøts ejtp idø'on ja Jesús jade'en tyik'ixpijky ja jaa'y ejxpajtin madya'akyøjxp, jøts tyukmadøøpy pyabøjkpitøjk ja wa'ats pøni ti dø'on ja jade'en tyijpy.

Ku ja Jesús tyiknajxy ja møk poj, jøts ku ja tyik'amøkiy#ñ ja mejy

³⁵ Xjats ku kyoodsiy#ñ ja et nay ja'abi xøøw, winets ja tñimaay pyabøjkpitøjk:

—iWan tjaa'myindi jaduktamajñ'ampy jam nøøba'am!

³⁶ Xjats ja jade'en tminawya'kxidøø ja mayjaa'y, jøts ja jap barkijøtpy tyiktsoo'ndøø ja Jesús mayim ja jap wyinaty, ojts abikbyarki ja pyadsøøñidi, ja' ja ojts tmøøtnøjxkti. ³⁷ Xjats ja poj jam janch møk myiñ, jøts ja nøø møk'ampy y'adøtspinaxwa'jky, yikxon ja yjanchtojmji'jky jøts ja kom nøø tyøjkiy#ñ jam barkijotp, ujtstnip ja wyinaty. ³⁸ Jamts ja Jesús wyinaty mya'ay barki ix'am, tø ja jam wyinaty ñagyukøyi; winets pyabøjkpitøjk ja ojts yuxyi, jøts ja ojts ñi#mxyi:

—iWindsøn! ¿Kidi mdsø'øgi ku nnøjøø'kxìn uk ku n'oo'kin?

³⁹ Xjats ja Jesús pyidi'jky jøts ja møk twingugajpxiyi'ñ ja poj; jøts yide'en ja mejy tnimaay:

—iMimadook øts et, kidi m'adi'ich!

Winets ja mejy jatyi y'amøkiyi'ñ jøts ja tu'ugyi tyaañ.

⁴⁰ Xjats ja tnimaay pyabøjkpitøjk:

—¿Jadits ku mdsø'øgidi, tigøjxp ku ø xkajanchjawidi?

⁴¹ Winets ja yjancho'jkidøø, yide'en ja kø'øm ñawyajnidøø:

—iPønims idø'øn ya'at ndejint, sudso poj sudso mejy yø myimadøyi!

5

Ja Gadarit jaa'y pøn wyinaty ja miku' tø tyatøkiyi

¹ Xjats ja ttayø'ñajxtøø ja nøø, jøts ja yja'ttøø jam nøøba'am ma dø'øn ja naajx wyinaty txøøw'aty Gadara. ² Xjats ku ja Jesús yø'øpyidsiimy jam barkijotp, winets jaa'y ja tu'uk ñimejnøø midì jam wyinaty tsoo'mp jam kami santijotp ma ja oo'kpi ñaxøkidi, miku' ja wyinaty myøøt'ajtpy. ³ Jam idø'øn ja wyinaty tyimchinaadyakni ma ja oo'kpi ñaxøkidi, jøts ka'ap idø'øn ja pøn pujx kadeen y'uktaxiøjtsiniyi y'uktakxøjtsiniyi. ⁴ Kumi tø ja wyinaty kawinaak ojk jade'en yjayiktuñ, xjats ja jatyi tpatoti, jadi'iñi ja pu'xk tanuki, ejtp idø'øn ja jade'en txumituñ jøts ja jade'en nipøn kyamayi. ⁵ Ejtp idø'øn ja xyumiwidity xinaxy tsunaxy, jam ja kojpkøjxp jam ja kami santijotp muum chabaawidity, jøts tsaa ja jam kø'øm yjanchnadyuktatsaachiyi. ⁶ Xjats ku ja jagamyi t'ejxpaajty ja Jesús, winets ja ojts putyi tninijkxy jøts ja twinguxanaay, ⁷ yide'en ja møk'ampy tnimaay:

—¿Jesús, Dios U'nk, ti ø xani memp, sa ø xunwa'añ? Njanchninuu'kxakpy tun may'ajt Dios køjxpit, kidi ø xyik'ayo'ombaaaty.

⁸ Ja' idø'øn ja jade'en kyua'a'aniyi'ñ kumi yide'en Jesús ja wyinaty tø ñi'mxyi:

—iMiku', majtstu'ut yø jaa'y!

⁹ Xjats ja Jesús wyangojmoø:

—¿Ti me mxøøw?

Winets ja miku' y'adsøø jam jaa'y y'am yjotp, jøts ja wyaañ:

—Legión øø nxøøw, ja'agøjxp ku øø nnamayi.

¹⁰ Yikxon idø'øn ja tjanchminuu'kxa'jky ja Jesús, jøts idø'øn kyayika-jxpidsøømt jam naajotp ma ja wyinaty chøøni. ¹¹ Jøts kumi jamdam magyuch wyinaty tyimyjøø'kxwidejtmidi jam kojpk wingon, ¹² xjats ja miku' ñuu'kxaktøø, jøts ja wyandøø:

—Tanigajxk øøts yø kuch; wan øøts jam ttøki.

¹³ Xjats ja Jesús tyajky ja tyi'ajtin, yikjajt idø'øn ja jade'en, winets ja miku' tmajstuttøø ja jaa'y, jøts kuch ja tñimajtskojmidi, ja' ja tyatøjkidøø. Namajtsk milin idø'øn ja kuch jam wyinaty tyanidi, ja'ats kø'øm ñanktyejmidøø jap jaa' jutjotpy jøts ja nøøjotpy tyimñaxkidaktøø, japts ja ñøøjøø'kxkøxtøø.

¹⁴ Xjats ja jaa'y ojts kyakøxti pøn jam wyinaty kuch'ejxtip, jøts ja t'atsnimadya'akwa'andi jam møj kajjotp, jøts nayide'en jam kamjotp. Winets ja jaa'y myendøø, jøts ja t'ejxwa'andi tñijawiwya'andi ti dø'øn wyinaty tø tyuñi. ¹⁵ Ja Jesús idø'øn ja ñimendøø, winets ja ojts t'ejxti ja jaa'y pøn wyinaty t'ukmøøt'ajtp ja miku' jøts ku ja jam chinaañi wet xøøw, tø ja yikxon weyni kyajni; winets ja jaa'y yjancho'jkidøø. ¹⁶ Pøn ja jaa'y wyinaty tø twin'ejxti, ja'ats ja tñimadyaktøø sa jaty ja wyinaty tø yjaty tø kyubety ja jaa'y pøn tmøøt'ajtp ja miku', jøts maagyuch ja nayide'en tñimadyaktøø ku ja

wyinaty tɔ y'oo'kɔjxnidi. ¹⁷ Winets ja tminuu'kxakaktɔ ja Jesús jɔts wan ja jam tyimbyidsimy etjotp midi ja ñax'ajttip.

¹⁸ Xjats ku ja Jesús tyɔjkijyi'ñ jam barkijotp, winets ja jaa'y ja ñimaajyɔɔ midi ja miku' wyinaty jekyip t'ukmɔɔt'ajtp jɔts ku ja pyadsoonwa'añiyi.

¹⁹ Xjats Jesús ka'ap tkupijky, yide'en ja tñimaay:

—Nɔjx mdɔjkwindum, nɔjx mmigu'uk jɔts xukmado'ot ku Dios tɔ mjanchpudɔkiyi, tamimadya'ak sudso Dios tɔ m'ayo'iijxyi.

²⁰ Xjats ja jaa'y ojts ñijky, jɔts ja tñimadyakwidejtɔjkijyi'ñ kajp kajp jam Decápolis etjotp sa Jesús ja wyinaty tɔ yjanchpudɔkiyi; winets jaa'y ja ñigyumaap tjanchja'widɔɔ.

Ja Jairo ñɔɔx, jɔts ja tɔ'ɔxyɔjk pɔn ja nwindson'ajtim Jesús wyet ojts ttojni

²¹ Xjats ku ja Jesús wyimbijty jap barkijɔtpy, ku ja ojts ñijky jam nɔɔba'am, winets mayjaa'y ja jam ñimejnɔɔ, jɔts ja Jesús jamyi tyaañ. ²² Tɔ dɔ'ɔn ja jam wyinaty tyañ ku jaa'y jam tu'uk yja'jty midi yik'ixpɔjkp jam tsaptɔjkjotp. Jairo, ja' ja xyɔɔw'ajtpy. Xjats ku ja t'ejxpaaoty ja Jesús, winets ja ñagyuxendyaajkɔɔ jam Jesús wyindum ²³ jɔts ja tjanchminuu'kxaaiky, yide'en ja tñimaay:

—Jotkɔjxnip ɔts n'u'nk xjap; men mgɔ' xanixajy, jɔts myɔkpɔkt jɔts yju-jky'att.

²⁴ Xjats ja Jesús ojts tpanijky ja jaa'y; namay ja ñɔjxxti, may jaa'y ja janchpadsoo'nɔɔ, yikxon ja yjanchyik'atejmujky. ²⁵ Jamts ja tɔ'ɔxyɔjk wyinaty tu'uk jam mayjaa'yjotp midi wyinaty pɔjkp, myakmajtsk jumɔjtip taxnaxyi ja wyinaty tɔ pyaajtniyi, jade'en jumɔjt ja wyinaty kujk tmi'ty ja pa'am.

²⁶ Yikxon ja wyinaty tɔ tku'ayowi ja pya'am ku tsɔyibi ja may tjayiktuñ, tɔ myeeñu'nk ja wyinaty tyik'oo'kɔjxni pɔni wine'en ja jam wyinaty tmɔɔdi, jɔts niwine'en ja wyinaty tɔ tkadamɔkpiky, ne'egi ja pa'am yjina'adɔtsni.

²⁷ Xjats ku ja ojts tmadɔy jɔts ku yiknimadya'aky ja Jesús, winets ja tpamiñ jap mayjaa'yjotp, jɔts ja ttojni ja wyet. ²⁸ Kumi yide'en idɔ'ɔn ja ñawya'añiyi: “Ja'ayɔ ɔts wyet inet yɔ ndojnit, tso'okp ɔts inet jaty.” ²⁹ Xjats ku dɔ'ɔn ja jade'en ttuñ, winets ja taxnaxyi jaty y'amɔkiyi'ñ; tyimyja'wiyi'ñ ja kɔ'ɔm jɔts ku ja wyinaty tɔ chɔ'ɔky ku pya'am ja wyinaty tɔ ñaxy. ³⁰ Xjats ja Jesús tja'wiyi'ñ, jɔts kudam ja wyinaty tɔ tyiktsɔ'ɔky tu'uk ja jaa'y ku ja myɔk'ajtin ja wyinaty tɔ tyik'awa'añ; xjats ja t'ejxwimbijty ja mayjaa'y, jɔts ja ojts tyiktyi yide'en:

—¿Pɔn ɔts nwet tɔ xojni?

³¹ Winets ja pyabɔjkpitɔjk y'adsoji:

—Jabi kawine'ents ja jaa'y mjanch'atejmuky, jɔts mjanch'ukwa'añ: “¿Pɔn ɔ xomp?”

³² Ejxwidejtp idɔ'ɔn ja Jesús, ja' ja tyimy'ejxwampy pɔn idɔ'ɔn ja wyinaty tɔ jyatyimy'uktɔñi. ³³ Winets ja tɔ'ɔxyɔjk tsɔ'ɔgi yjanchyikmibejpniyi, ñija'wipts ja' jɔts ku ja wyinaty ja tyaxnaxyi tɔ ñaxy, xjats ja ojts twinguxanaay'oyi ja Jesús, tyamimadyakɔjx ja tuki'iyi pɔni sa jaty ja y'ejxi tyiyi. ³⁴ Winets ja Jesús tñimaay ja tɔ'ɔxyɔjk:

—Ja'agɔjxp u'nk tɔ mdsɔ'ɔky ku ɔ tɔ xjanchjawi. Nɔjxkni, Dios mgunuu'kxip, jɔts kidi pa'am m'ukpaajtniyi.

³⁵ Examnim ja Jesús jade'en wyinaty wya'añ, ku jaa'y jam yja'ttɔɔ midi wyinaty tso'ondip jam mɔjaa'y tyɔjkwindum, ja mɔjaa'y midi wyinaty tump jam tsaptɔjkjotp, xjats ja yiknimaay:

—Tɔ ja mnɔɔx y'oo'kni. ¿Tiku yɔ windsɔn nugo xyikjotkɔjx'adi'ich?

³⁶ Myadøøpy idø'øn Jesús ja' ku ja møjaa'y jade'en yiknøjmi, xjats ja tnimaay:

—Kidi mdsø'øgi; ja'ayi amumjoojt xjanchjawit.

³⁷ Jøts ja ojts ñøjkxti, ka'ap ja Jesús tkupijky ja mayjaa'y jøts ja myøøtwidetiyit, Pedro ja nugo myøøt'ajit, møøt ja Jacobo, jøts ja Juan midi ja Jacobo y'uch'ajtpy. ³⁸ Xjats ku ja jam yja'ttøø ma ja jaa'y jam wyinaty chøøni pøn tump tsaptøjkjotp, winets ja ojts t'ixy jøts ku ja jaa'y nugo xem yam y'adøtsnidi, pømbi jap waani yaxp, jøts pømbi jap janch møk yaxp. ³⁹ Xjats ja Jesús tyøjkijii'ñ jap tøjktøtpy, jøts ja tnimaay ja jaa'y:

—¿Tiku jadine'en mna'amdi, jadits ku mya'axti? Ka'ap yø kiixyu'nk y'øøky, maap yø'.

⁴⁰ Winets ja jaa'y ja ojts tnixe'ekti. Xjats ja Jesús t'ixkajxpidsømgijxy ja jaa'y, nugo u'nkteety u'nktaak ja ojts tmøødi jøts ja pabøjkpitøjk midi ja jam wyinaty myøøt'ajtpy, xjats ja tyøjkijii'ñ ma ja kiixyu'nk jap wyinaty, ⁴¹ jøts ja ojts tnixaji kyø'køjxp, yide'en ja tnimaay:

—Talita, cumi —yide'en idø'øn ja tijy: Mets u'nk idø'øn nnimaapy, pidø'øk.

⁴² Xjats ja kiixyu'nk jatyi tyanaagyukiyii'ñ jøts ja yø'øbyijky jadigojk, makmajts ja yjumøjt ja wyinaty. Winets ja jaa'y yjancho'jkityigøødyøø ku ja jade'en t'ejxtøø. ⁴³ Jøts ja Jesús møk'ampy t'ane'emy ja jaa'y, jøts ka'ap pøn ttuknijawidit ku ja kiixy jade'en wyinaty tø yjujkpyiky, yide'en ja møjaa'y yiknimaadyøø jøts wan kyaaky tmo'odi ja kiixyu'nk.

6

Ku ja Jesús yja'jty jadigojk Nazaretit kajpjotp

¹ Xjats ja Jesús jam chøø'ñ jøts ja ñøjknimøø jadigojk y'etjotp, ja pyabøjkpitøjk ja myøøtnøjkx. ² Xjats ku tpaajty ja poo'kxin xøøw, winets ja yik'ixpøjktøjkijii'ñ jam tsaptøjkjotp. Jøts ja mayjaa'y pøn ja wyinaty patmadojyiyip, ñigyumaap ja tyimyja'widøø ku ja jade'en yik'ixpiky, xjats ja wyandøø:

—¿Ma yø jade'en tø y'ixpiky? ¿Ti wijy'ajtin yø jade'en tø yikmø'øy, jøts sudso yø jade'en ja tunk tjaty midi naxwii'ñit jaa'y ni tu'ugin kyajajtip? ³ ¿Ti kidi ya'at ja tsajtspi, ja Mariyixi yø y'u'nk, ja Jacobo y'ajch, møøt ja José, møøt ja Judas, jøts ja Simón? Pø yø'øxi ja y'ajch'ajttip, jøts nayø' ja kiixyuna'jk y'ay'ajttip pøn ya tsinaadyip, ¿kidi?

Jade'en ja wyandøø, xjats ja jade'en tkamibøjkidøø ja Jesús y'ixpøjkin.

⁴ Winets Jesús ja ñimaajyidøø:

—Niduki'iyi jaa'y twindsø'øgidi ja Dios kyugajpxy, ja'ayi ja nugo kawindsø'jkijiyip pøn ja myigugajp'ajtpy, pøn ja møøt tyukjaa'y'aty, jøts pøn ja myøøtsinaapy jam tyøjkjotp.

⁵ Xjats ja jam jade'en niti tkatuuñ, nugo ja waani tyiktsøøjky ja pamaa'y ku ja ojts tkønixajy. ⁶ Jøts nugo ja jadi'iñi tkumaa'yiyii'ñ tkudajyiyii'ñ ku jaa'y ja kyajanchja'wiyøø. Xjats ja jade'en kajp kajp wyidijty ma jaty ja kajp jam wyinaty wingon tyañ, jamts ja yik'ixpiky.

Ku ja Jesús tkexy ja pyabøjkpitøjk kajpxwa'kxpi

⁷ Ku dø'øn ja wyinaty jade'en tø yik'ixpiky, winets ja tyagajxyii'ñ ja myakmajtskpi jaa'y, jøts ja tpaguejxy namajtsk jaty, ojts ja tkutujkmøøgyixy sudso ja kuwani tyikpidsø'ømdit ja miku'. ⁸ Yikxon ja ojts t'ane'emy jøts ja niti tkako'ondit ñiduu'yø'øyik, nugo tyajk ja ja'ayi kyaptip. Ka'ap ja ti tminøjkxtit, ni pejni, ni tsapkaagy, ni meeni, niti tkako'ondit. ⁹ Nugo kyø'øku'nk ja

ja'ayi ttuktawa'agidit, jøts nijan tu'ugyi twetstit, ka'ap majtsk, jade'en ja yik'ana'amdøø. ¹⁰ Xjats ja yjaaktyimykniimaadyøø:

—Ku muum tøjkjøøjty mdøkidit, tu'ugyi mja'ta'aktit, jam idø'on mja'attit mdsoondit kunim mdsoondit jam kajpkøjxp, winetnimts mbidsø'ømdit jam. ¹¹ Jøts pøni magajp mgayikupøkt, pøni ma pøn niwine'enin mgapat-madoowa'añidi, jøts ku jam mdsoondit, winets pu'ux xwinaptit mdekyøjxp, jøts jade'eñi xuk'ejxtit jøts ku jade'eñi tø mnañiwa'achidi. Janch øts idø'on nwa'añ, janch meets idø'on nnøjmi, ku Dios mye'ent tu'ukpi xøøw jøts tiidyunwa'ant ja jaa'y, winets ja kajp nøjkk jinaxy yiktiidyuñ pøni ma mgayikupøkti, jøts ne'egi ka'ap ja Sodomit kajp møøt ja Gomorrit kajp jade'en nøjkk yiktiidyundi sa ja nøjkk yiktiidyundi.

¹² Xjats ja pyabøjkipitøjk ojts choondøø, jøts ja ojts yide'en kya'amaawyidetti jøts wan ja jaa'y chinaa'yin tyiktigatsti, wan tja'dyigøøgyøxti tuki'iyi ja kya'øyjaa'y'ajtindi pøni sa ja wyinaty tø chøønidi. ¹³ Jøts may ja nayide'en tyikpidsømdøø ja miku' midi jaa'y jam wyinaty myøøt'ajttip, jøts ja nayide'en tyiktsøktøø may ja pamaa'y ku aceite ja ojts tjaajaaxti.

Ku ja Juan Bautista ja o'jkin tpaajty

¹⁴ Xjats ja windsøn Herodes ja tnmadøøy ku ja Jesús øy pøn jaa'y ñija'winiyi jøts ku ja tyikutuky, winets ja Herodes wyaañ:

—Ja Juan midi ja jaa'y ojts tyiknøbety, ja' inet tø pyidsimy jadigojk jap oo'kpi jutjøtpy.

¹⁵ Xjats jadu'ukpi jaa'y ñømidi:

—Eliás ja'.

Jøts pømbi wamip:

—Dios ja' kyugajpxy, nayide'en sam jekyip myemidi ja Dios kyugajpxy.

¹⁶ Winets ja Herodes wyaañ ku ja jade'en tmadøøy:

—Ja Juan inet ja' pøn øjts nnankyajtspøødyi ja kyubajk, ja' inet yø tø pyidsimy jadigojk jap oo'kpi jutjøtpy.

Jade'en ja Herodes wyaañ.

¹⁷ Kumi ja' ja wyinaty tø ttummy, ja' ja wyinaty tø tkøwiiñ tpakwiiñ jap puxøjkjøtpy ja'agøjxp jøts ja Herodías yjotkujk'att, ja tø'øxyøjk pøn ja Felipe jawyeen y'atsnidø'øxy'ajt, pøn ja Herodes wyinaty tø t'atskap'aty. Ja'ats ja Herodes nugo myøøtsinaapy. ¹⁸ Paty ja Juan ja wyinaty yide'en tø ñii'mxyi:

—Ka'ap kyutuky jøts m'uch ja ñidø'øxy nugo xmøøt'atit.

¹⁹ Xjats ja Herodías wyinaty jade'en tø tjanchmi'ambiky ja Juan jøts ja tyimyk'ookwa'añ, xjats ja ka'ap tmiwinmaa'nbyaaty sudso ja t'ukyik'ookt;

²⁰ kumi ñija'wip ja Herodes wyinaty jøts ku ja Juan wyinaty øy tsuj yjaa'y'aty ku pøky tkamøødi, paty ja ttsø'øgi jøts paty ja ñidø'øxy ja sa tkaduktuñ. Pyatmadoojip yikxon ja kyajpxy ku ja Juan janch tsuj myadya'aky, øy ja mabaat tjaganimadøø. ²¹ Xjats ja tiempi tpaajty ku ja Herodías jøtkumoni wyaañ sudso ja tyik'ookt ja Juan. Winet et ja Herodes twaadsøøy ja tyumbitøjk migaabyi mi'ukpi, ja'agøjxp ku syandi xøøw ja wyinaty tyiknaxy. Ja may soldadi windsøn ja wyaadsoow møøt ja riki jaa'y, jøts nayide'en ja møjaa'dyøjkti pøn ja kutujk jam wyinaty t'adsinaadyip Galilea. ²² Winets ja Herodías ñøøx tyøjkii'ñ jap ma ja jaa'y jap wyinaty kyaydi y'uukti jøts ja jap y'ejch, xjats ja Herodes ja ojts tjanchuj'ixy ja y'ajtsk, nayide'en ja jaa'myidi pøn ja jap wyinaty myøøtkaapy. Winets ja tniimaay ja kiixy midi jap wyinaty tø y'ech:

—Amidook øts pøni ti mdsøjkpy, nyakp øts inet øy midi.

²³ Ojts Dios ja ttuk'ixy jøts ku ja tmo'ot pøni ti ja kiixy kø'øm y'amidøøpy, pikta'aky paat kutujk paat ja kukwa'kxy tyakwa'añ. ²⁴ Xjats ku ja kiixy jade'en tmadøøy winets ja pyidsiimy, jøts tyaak ja t'atsnimaay:

—¿Ti n'amido'op?

Xjats ja ojts ñii'mxyi:

—Ja Juan kyubajk m'amidoøjyip pøn ja jaa'y tyiknøbaj.

²⁵ Winets ja kiixy jatyi tyøjkiyi'ñ nay jap ma ja windsøn jap wyinaty, jøts ja tnimaay:

—Ixyamyi ndsøky ja Juan kyubajk pøn jaa'y tyiknøbaj, ja' øts kyubajk xmøøjyip texyjøtpy.

²⁶ Winets ja windsøn yjanchjotmay'oo'kpijky ku ja kiixy jade'en wyaañ; jøts kumi tø ja wyinaty Dios ttuk'ejxni jøts ku ja tyakt tuki'iyi pøni ti ja kiixy y'amidøøpy, tø migaabyi mi'ukpi ja wyinaty jade'en tmadowdi, xjats ja jade'en sa tkanimaay, kyupøjk ja' mido'øn ja kiixy wyinaty y'amidøøpy.

²⁷ Jatyi syoldadi tu'uk tkejxy pøn wyinaty y'ejx'ejtíp, jøts ja t'atsyikwinajkit ja Juan kyubajk, jøts tyikme'ent møkta'aky'ampy. ²⁸ Xjats ja soldadi chøø'ñ, jøts ja ojts ñijky jap puxøjkjøtpy, japts Juan kyubajk ja ojts tkajtspo'jtíyí, jøts ja tyikmiñ texyjotp. Jade'en ja kiixy ja yikømøøy, jøts ja jade'en tmøøy ja tyaak.

²⁹ Xjats ku ja Juan pyabøjkpitøjk ñija'wiyøø, winets ja yikpøkjo'knøø, ojts pyabøjkpitøjk ja yikpidø'øgiyi, ja' ja ojts yiknaxøkiyidi.

Ku ja Jesús tyikaay ja nimagoxk milbi jaa'y

³⁰ Xjats ja Jesús ja kyudanaabyi tminabyaajtøø, jøts ja ojts tyamimadyakixyi ti jatyi ja wyinaty tø ttundi, jøts ti ja wyinaty tø ttuk'ixpøkti ja jaa'y. ³¹ Xjats Jesús ja tnimaay:

—Mendi, wan tjaa'myindi poo'kxpi ma et abak.

Ja'agøjxp idø'øn ja jam jade'en ñøjkxwa'andi ku ja mayjaa'y ja myiyø'owyimbityidi myiyø'y'adijyidi, niwine'enin ja yikxon kyakaydi kya'uukti. ³² Winets ja barki ja ttatøjkidøø, jøts ja ñøjkxtøø abak etjotp.

³³ Mayjaa'y ja y'ejxidøø ku ja jade'en choo'ndøø. Yik'ejxkajp ja Jesús; xjats ja choo'ndøø pujtpm, kawinaak kajp ja jaa'y jam ñøjkxtøø jøts ja ojts t'anajxukti ja Jesús, jawyeen ja mayjaa'y jam ne'egi yja'ttøø ma ja wyinaty y'ukja'atwa'andi. ³⁴ Xjats ku ja jam yja'ttøø, ku ja Jesús pyidsiimy jap barkijøtpy, winets ja t'ejxpaajty ja mayjaa'y, jøts ja ojts t'ayo'ixy ku ja jam yik'ayowim tyanidi mabyorreegin mido'øn ñi'ejxpi ka'ejtíp; jøts ja tyik'ixpøktøjkiyi'ñ, jeky ja tyik'ixpijky. ³⁵ Xjats ku ja et chuu'ñøø, winets ja pyabøjkpitøjk ja wingon ñimejnøø, jøts ja ñimaajyøø:

—Tøts ja et chuu'ñi, pø ka'afts ya pøn chøøni. ³⁶ Kajxni yø jaa'y, wan tnøjkxnidi kamjøøjtý, wan tnøjkxnidi ma kajp wingon, jamts tj'u'udyit ja jii'kxy, kumi janch yu'oo'knidip yø'.

³⁷ Winets ja Jesús y'adsøøy jøts ja wyaañ:

—Ka'ap idø'øn mwa'ant, mo'odi chapkaaky, yikaydi.

Xjats ja pyabøjkpitøjk wyandøø:

—¿Nøjkxp øøts jøts øøts tsapkaaky n'atsju'uty majtsk magø'pxy denario, jøts øøts yø jaa'y nyika'aty?

³⁸ Winets ja Jesús wyaañ:

—¿Ja winaak jap mdsapkaaktyi? Nøjkx x'ats'ejxti.

Xjats ku ja t'ejxtøø, winets ja tnimaadyøø:

—Magoxk ja tsapkaaky jap jøts majtsk ja ajkx.

³⁹ Xjats ja Jesús tyikutujky jøts wan ja jaa'y wanjaty t'ixa'a'akti jam tsuxk miyjotp; ⁴⁰ winets ja jaa'y y'ixaktøø tukpiky jatyi, pømbi niwixijkxmyajk

ixaktøø, jøts pømbi nimagø'pxy. ⁴¹ Xjats ja Jesús magoxk tñixajiyi'ñ ja tsapkaaky jøts majtsk ja ajkx, winets ja ojts tpat'ixy yø tsajp, jøts ja ojts tkunuu'kxy ja tsapkaaky xjats ja ojts ttukwa'kxy, jøts ja pyabøjkpitøjk ja tmø'øy jøts ja ttagama'adyit ja jaa'y jøts ja tyikwa'kxidit. Tuki'iyi ja jaa'y ajkx yiktagamaagyøjxtøø, ojts ja yikmøøgyøxti, ⁴² xjats ja kyaadyøø ku'uxyi; ⁴³ winets ja tsapkaaky windank makmajtsk kach yikpøkmujky møøt ja ajkx windank. ⁴⁴ Janch namay ja jaa'y jam wyinaty yjøø'kxti, ja yaa'dyøjk ja yikmachodøø nimagoxk mil.

Ku ja Jesús yø'øy jam mejwyingøjxp

⁴⁵ Xjats ja Jesús ja pyabøjkpitøjk tkugajxigyijxy jap barkijøtpty, jøts ja ojts tyiknijkxy jawyeen jam Betsaida, kyajxjawyeeni jaa jøts ja nøø ja tñaxtit. Xjats ja yjaaktaañ jøts ja jaa'y ja tminawya'kxit. ⁴⁶ Xjats ku ja jade'en tminawya'kxøø ja mayjaa'y, winets ja ñijky Dios'ajot'ajtpi kojpkøjxp. ⁴⁷ Jøts ja barki jam ja wyinaty kujk ñaxy mejkyujk'am ku ja et kyoodsiyi'ñ, jøts ja Jesús jam wyinaty nadyu'uk tø tyañ jam naøkøjxp. ⁴⁸ Xjats ja ojts t'ixy ja pyabøjkpitøjk jøts ku ja ka'ap y'ukmaa'niyidi sudso tkaaptit ja nøø, ja'agøjxp ku ja poj wyinaty yø'øy wimbet'ampy. Xjats ku yjøpkyoost'ajty winets ja Jesús ojts tñinijky wingon ja pyabøjkpitøjk, jadi'iñi ja nøøwingøjxp yø'øy, jøts tyimy'ukwinaxwampy ja pyabøjkpitøjk ja wyinaty. ⁴⁹ Ku ja ojts y'ejxpaadyi jøts ku ja yø'øy jam nøøwingøjxp, winets ja pyabøjkpitøjk yjanchabaagaktøø, miku' ja wyinaty tø tyimwyinmaydi; ⁵⁰ kumi tø ja wyinaty niduki'iyi t'ejxti, janch tsø'jkidip ja'. Xjats Jesús ja ojts myigajpxyidi, yide'en ja ojts yiknøjmidi:

—jotmøkpøkti; øts idø'øn, kidi mdsø'øgidi!

⁵¹ Xjats ja kyøxpejty jam barkijøtp mā ja jam wyinatyi, jøts ja poj jatyi ñajxy; ñigyumaap ja tyimya'widøø, ⁵² kumi ka'anīm ja wyinaty tñijawidi yikxon pøni pøn ja Jesús, øy ja tsapkaaky ja' tjayikmayi, janch kujuun idø'øn ja'adi, ka'ap idø'øn ja tjä'gyukidi.

Ku ja Jesús tyiktsøøjky ja mayjaa'y jam Genesaret

⁵³ Xjats ja tñanajxtøø ja mejy, jøts ja ojts yja'atti jam Genesaretit jaa'y y'etjotp, jamts byarki ja ojts tmixojtspatti nøøba'am. ⁵⁴ Ja'ayi ja pyidsømdøø jap barkijøtpty, winets ja Jesús jatyi yik'ejxkajpy. ⁵⁵ Jøts ja jaa'y jatyi ttukmadow'abidsømdøø ja myigu'uk mā jatyi ja kajp jam wyinaty jøts ku ja Jesús tø yja'aty, xjats ja jaa'y tkiyja'tpinibøjkidøø maabajtkøjxp ja pamaa'y mā ja jam wyinaty tñijawidi ja Jesús. ⁵⁶ Jøts ku ja Jesús yja'lty ømyadsowi, ku ja tñiyøøyi ja kajp møj mutsk, uk ku ja yja'aty kamjotp, ejtp idø'øn ja jaa'y tuu'am tpikta'akti ja pamaa'y, jamts ja tminuu'kxa'akti ja Jesús jøts wyetpaa' ja wine'enin tyukpaadidit; jøts pøni pøn ja wet paajtiyip, jatyi ja cho'okti.

7

Ja ka'øwynmaa'ñ ja jaa'y tyikpøkpyajtp

¹ Winets ja Jesús yikni'niñ mā ja jam wyinaty, ja fariseotøjk ja ojts ñimiñi møøt ja kajpxwejpitøjk, pøn jam wyinaty winaagin tø choondi Jerusalén. ² Ja'ats t'ejxtøø kudam ja Jesús pyabøjkpitøjk kyøbujti ku kyaydi, jøts ka'ap idø'øn ejxim ja mōjaa'y chinaa'yin, ja'agøjxp ja ojts wenk tñigajpxti tñimadya'akti. ³ (Kumi yide'en ja fariseotøjk kostumbri tmøø'tti jøts nayide'en ja myigu'uk israelit jaa'y, ja' idø'øn ja pyadundip pøni sa jatyi ja mōjaa'dyøjk wyinaty tø y'atsøonidi, ka' pøn kyay kunim ja kyagøbujti may ojk, winetnims ja wa'ats ñayjawiyidi. ⁴ Nayide'en pøni pøn maayjotpty tsoo'mp,

jøts pøni ku ja ka'ap kyøbujñim kawinaak ojk, ka'ap ja nayide'en kya'aty. May idø'øn ja kostumbri jade'en midi ja pyadundip, ejtp idø'øn yikpujy uujk'i'iñ, tsajpts'øøy, møøt texy tās midi tum pujx, jøts maabajt, jade'en ja wa'ats tyik'etti.) ⁵ Paty fariseotøjk møøt ja kajpxwejpitøjk tnimaadyøø ja Jesús:

—¿Tigøjxp ku yø mbabøjkpitøjk jade'en ja kyø' tkapujti ku yø kyaydi sa ja møjaa'y chinaa'yin wya'añ?

⁶ Xjats ja Jesús y'adsøøy jøts ja wya'añ:

—Meets win'øø'mbi, yikxon ja Isafas midi Dios kyugajpxy'ajtpy ojts tja'ay ja Dios kyajpxy ku ja wya'añ:

Nugo yø jaa'y jade'en y'aaw ttakajpxy ku øts yø xwindsø'øgi, jøts niwine'enin øts n'ayuujk yø xkaja'gyukiyi.

⁷ Niti yø kyawa'añ jade'en, øy øts yø mabaat xjawindsø'øgi, ja'agøjxp ku tyikyø'ødyi ja jaa'y ixpøjkjn jøts wya'andi kuts ja nja'aji.

⁸ Nayide'en ja Jesús wyami:

—Jøts meets idø'øn jade'en, kumi jade'en meets Dios kyutujk x'ixwejtsi, jøts xpadundi midi jaa'y kyostumbri'ajtpy: ja texpyujk, ja taspujuk, jøts pøni ti jaty meets jade'en mdumpy.

⁹ Jade'en ja tnimaay:

—Janch wijy mee mnayjawiniyi jøts ku mgostumbri jade'en xpadundi, m'ixwijchp meets ja Dios kyutujk. ¹⁰ Øy ja Moisés yide'en yjawa'añ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan ja jatyi t'øøky.” ¹¹ Jøts ku meets, mdanigutujk'ajtpy meets ja jaa'y, ka'ap idø'øn tyimy'aguwaniøjxpi jøts ja tyeety tyaak ja tyimwyindsø'øgit, wan ja tnøjmidi ja tyeety ja tyaak: “Ka'ap inet ixyam nbudøkit, ka' ti nmo'owa'añ, ja'agøjxp ku øts nbikta'aky tmøøt'aty Corbán.” (Corbán, ja' tyijpy ayuujk, tø ndamiyøxy ja Dios tuki'iyyi nbikta'aky); ¹² jøts ku ja jade'en wya'añ, nijuunits meets ja xka'uktukpudøjkyini ja tyeety ja tyaak. ¹³ Jade'en'ampy meets ja xka'ukyikmøjtøjkiñi ja Dios kyajpxy, ja'agøjxp ku ja mgostumbri xuk'ixpøkti xem yam ja u'nk ja una'jk, jøts nayide'en ja mdsinaa'yin xyikyø'ødyi.

¹⁴ Xjats ja tyajxmujkøjx ja jaa'y jadigojk, jøts ja tnimaay:

—Patmadoodik øts ni'ijtyi, jøts xnimado'odit tu'uk ja ayuujk: ¹⁵ Niti jii'kxy jaa'y kyayikpøkyetyi ku jaa'y ti tji'kxy. Ja' jaa'y yikpøkyajtip midi tsoo'mp jam anmija'winjotp. ¹⁶ Madowdi yikxon, pø jamxi mdatskti, yø'øts mdamado'odip.

¹⁷ Xjats ku ja Jesús tminawya'kxøø ja jaa'y, winets ja tyøjkiyi'iñ tøjkjøtpy, japts pyabøjkpitøjk ja ojts yiktiyi ti ja'abi madya'aky jade'en tyijpy. ¹⁸ Xjats ja tnimaay:

—¿Ni meets paat yø xkanimadooni? ¿Ka'ap xnijawidi ku jaa'y niti jii'kxy kyayikpøkyetyi ku jaa'y ti tji'kxy? ¹⁹ Ka'ap jii'kxy tyøki anmija'winjotp, maatsjotp ja jii'kxy tyøki ma ja tinch, jøts pyidsimy ku jaa'y ñijky nawyiyø'øyibi.

Jade'en idø'øn ja ojts tnigajpxy jøts ku jii'kxy tum wa'ats midi yikjøø'kxp, ka' yikpøkyety. ²⁰ Yide'en ja wya'añ:

—Ja' jaa'y yikpøkyajtip midi pidsømp y'anmija'winjotp. ²¹ Kumi jam pyidsimy ja ka'øwyinmaa'ñ ku jaa'y kya'øwyinmay, jam pyidsimy ku jaa'y ñiyaa'y ñidø'øxy ñabyøjkxiyidi, ku nadyu'uk jaa'y ñamyøøt'atyidi, ku jaa'y yikjaa'y'øøky, ²² ku jaa'y myeech, ku jaa'y wenk jaa'y pyikta'aky tsojkiyi, ku jaa'y ti tka'ødyuñ, ku jaa'y tyaay'aty, ku jaa'y najts'aaw najtsjoøjt yjaa'y'aty, ku jaa'y myigu'uk ti ttami'ama'at'aty, ku jaa'y pyagajpxy, ku jaa'y ñamyikexyi,

ku jaa'y niti tkawinmay. ²³ Tum anmija'winjotp yø ka'ødyunk jade'en chøøñ midì jaa'y tyikpøkpyajtp.

Ku ja Tìrot tø'øxyøjk tjanchja'wiyi'ñ ja Jesús

²⁴ Xjats ja Jesús jam chøøñ jøts ja ñijkxy Tiro jøts Sidón, jade'en ja et jam txøow'aty mā døøñ ja ñijkxy. Xjats ku tøj ja jam tpaajty jamts ja tyøjkiyi'ñ, ka'ap ja pøn t'uktuknijawiywya'añ ku ja jam. Mā ka'ap ja jade'en yjajty ojts ja jatyi yiknijawi. ²⁵ Jatyi tø'øxyøjk ja tu'uk ñija'wiyøø pøn ñøøxu'nk jam wyinaty miku' tmøøt'ajtp; ja'ats jam meen jøts ja wyinguxanaajyi. ²⁶ Ojts ja tø'øxyøjk wya'añ jøts ja Jesús tyikpidsøømt ja miku' midì ja kiixyu'nk jam wyinaty myøøt'ajtpy, sirofenicyit jaa'y idøøñ ja tø'øxyøjk pøn jam jade'en meen, jøts griego ayuujk ja kyajpxpy. ²⁷ Xjats ja Jesús y'adsøøy jøts ja wya'añ:

—Jawyeen øts ja israelit jaa'y nbudøkit, jøts meets ix'oojknim.

²⁸ Winets ja tø'øxyøjk y'adsøøy jøts ja wya'añ:

—Janch jade'en teety, ka'ap kyajade'eni. Jade'en øts ixyam nnayjawiyei ejxim ja uku'ngin, jøts ja israelit jaa'y ndejint ejxim jaa'y una'jkin kyaydi, jøts ja kyaaky abu'xk tyika'adi jøts ja uku'nk ja jatyi tkaamyuky. Paty teety nnøjmi jøts mdu'ump may'ajtp jøts ø xpudøkit.

²⁹ Xjats ja Jesús tnimaay ja tø'øxyøjk:

—Janch idøøñ mwa'añ; nøjkxti. Tø ja m'u'nk ja miku' myajsttuujtniyei.

³⁰ Xjats ja tø'øxyøjk ojts ñijkxy tyøjkjotp, kuts ja jam yja'aty jøts ja ñøøxu'nk ja tpaajty maabajtkøjxp. Ka'ap miku' ja wyinaty t'ukmøøt'ajtni, tø ja wyinaty myajsttuujtniyei.

Ku Jesús ja nat jaa'y tyatsk tyik'awajtsiyei

³¹ Xjats ja Jesús jam choo'ngojmøø Tiro, jøts ja ñijkxy Sidón, tyimñajxts ja jam jøts magyajp ja ttanajxy jam Decápolis etjotp, jøts ja yja'jty mā ja mejy txøow'aty Galilea. ³² Jamts jaa'y jadu'uk yiktanimiñ pøn wyinaty nat, pøn wyinaty atoojts, ka'ap ja y'øgyajpxy, winets ja yiknimaay jøts ja kyø' ja ttanixajtp jøts ja tyiktso'okt. ³³ Xjats Jesús ja ojts abiky tsoo tyiknijky, ojts ja nadyu'uk tjíway mā ja mayjaa'y jam wyinaty, jøts kyøtsa'jx ja ojts tkudeji jap nat jaa'y tyatskjøtpy, ojts kyø' ja ttsujwyey jøts jaa'y tyoojts ja ojts ttpaajti.

³⁴ Winets ja Jesús chajp'ixy, jøts ojts myøkxeji, xjats wya'añ:

—¡Efata! —midì ayuujk tyijpy: ¡Awa'ats!

³⁵ Winets ja nat jaa'y jatyi ja tyatsk y'awaajch, jøts ja tyoojts nayide'en y'øyi'ñ, xjats ja jade'en kyajpxpijky øy, ojts ja yikxon y'awijy. ³⁶ Winets ja Jesús yikxon ojts t'uk'ane'emy jawyeen ja mayjaa'y jøts ja pøn ka'ap ttukmado'odit; ku ja jade'en tnimaay, ne'egi jinaxy ja ojts tnimadya'akti.

³⁷ Xjats ja jade'en ñiguyumaap tjawidi, yide'en ja wyandøø:

—Tyum'ødyumpy øy ti; yikmadøøpy nat jaa'y, jøts yik'awijpy uum jaa'y.

8

Ku ja Jesús tyikaay ja ñimaktaxk milbi jaa'y

¹ Winet ets mayjaa'y jam wyinaty tø ñiamyukyidi, jøts ja kyaajyik ja kya'etti. Xjats ja Jesús tyaa'ixiyi'ñ ja pyabøjkpitøjk, jøts ja tnimaay:

² —Njanch'ayo'ixxy øts yø jaa'y, kumi tyigøøkxøøwyip øts yø xñimenidi, jade'en øts yø ya kujk nmøøtsinaañidi jøts ja kyaaky tø kyøjxnidi. ³ Ku øts inet yø ayuu axøw njakaxt jam tyøjkjotp, jadi'ñi net yø muum yjotkøjxnidit tuu'ajy, kumi ja winaagin pøn tø choondi jagam et.

⁴ Xjats pyabøjkpitøjk ja ojts y'adsøy, jøts ja ñimaajyøø:

—¿Sudso yə jaə'y ya yjanchka'adyit, pə ka'ats ya pən chəəni?

⁵ Winets ja Jesús tyiktiy ja pyabəjkpitəjk, yide'en ja tniəaay:

—¿Winaək tsapkaaky jap xməədidi?

Winets ja wyandəə:

—Wixujk.

⁶ Xjats Jesús tniəaay ja jaə'y jəts wan t'ixəkəxti jam naxkəjxp, winets ja tniəajiyi'ñ ja tsapkaaky, jəts ja ttaməja'wiyi'ñ ja Dios. Xjats ja ojts ttukwa'kxy ja tsapkaaky jəts ja tməəy ja pyabəjkpitəjk, winets ja ttagumaadyəjkidəə ja jaə'y. ⁷ Jamts winaəgin ja mutsk əjku'nk ja wyinaty tməə'tajtmidi, ja'ats ja Jesús ojts tkunuu'kxy, jəts pyabəjkpitəjk ja ttaguwa'anii'ñ jəts wan ja jaə'y ja ttagumaagyəxti. ⁸ Xjats ja jaə'y ni'ijtyi kyaagyəjxtəə, ojts yikpəkmuky wixujk kach. ⁹ Jəts ja jaə'y pən wyinaty tə kyaydi, nimaktaxk milin ja jam wyinaty ñamay'atti. Xjats ja Jesús ja ojts tminawya'kxniyi, ¹⁰ jəts ja tyəjkinəə jap barkijətpy məət ja pyabəjkpitəjk, jəts ja ñəjkxtəə jam Dalmanutit jaə'y 'etjətp.

Ku ja fariseotəjk t'amidoodəə ja Jesús, jəts ja ttuk'ejxtit ja myilagri'ajtin

¹¹ Winets ja fariseotəjk jam myendəə, jəts ja tminagyəjpxəjkidəə ja Jesús. Ja' ja ojts t'amidowdi, jəts ja Jesús ja dios'ajtin tyikwingaxə'əkt ya naxwii'ñ, nugo də'ən jade'en tjo't'ejxti. ¹² Xjats Jesús ja tkuməkxajiyi'ñ, jəts ja wyaəñ:

—¿Tigəjxp ku jaə'y ya'atpi xəəw ya'atpi juməjt t'amidowdi jəts yiktuk'ejxtit ja dios'ajtin? Janch meets idə'ən nnəjmi, jəts ku jade'embii jaə'y ni tuk'ojkin kyayiktuk'ejxtit ja dios'ajtin.

¹³ Xjats ja tmatjstujty, jəts ja tyəjkiyi'ñ jap byarkijətpy, jəts ja ñijky jaduktamajñ'ampy jam nəəba'am.

Ja fariseit jaə'y y'ixpəjkin

¹⁴ Nika'ap kyaaky ja wyinaty tə tkondi, tə ja wyinaty tja'dyigəydi, tu'ugyi tsapkaakyy'nk ja wyinaty jap tkonidi jap barkijətpy. ¹⁵ Xjats ja Jesús tniəaay ja pyabəjkpitəjk:

—Ejxim Herodes, ejxim fariseotəjk lyevaduri xkupəjkidi, əyim mnay'ejx'etidit.

¹⁶ Winets ja pyabəjkpitəjk jatyi myadyaktəjkidəə, yide'en ja ñawyajnidəə:

—Ja'agəjxp yə jade'en wya'əñ ku adəm tsapkaaky tə ngayikmi'iñindi.

¹⁷ Wa'ats Jesús ja tniəawi ti ja wyinaty kyajpxy'ajttip. Ka'ap ja tsapkaaky ja tiji midii ñimadoodip ja pyabəjkpitəjk, ja Herodes ja fariseotəjk ndejint ja y'ixpəjkin ja y'ayuujk tyijpy. Paty ja Jesús yide'en tyiktiy:

—¿Tiku mwə'andi ku mdsapkaaky xijy kya'etti? ¿Ka'anim xnimadowdi, jəts nika'ap xniəawidinim, janch juun mgubəjk xməədidi? ¹⁸ ¿Ka'anim mgə'əm ween xawin'ejxti, jəts ni mdətsk xkadamadoodinim, niwine'enin xkaja'myatsti? ¹⁹ Ku əts ojts tsapkaaky magoxk nyikwa'kxy, jəts ojts nmə'əy ja magoxk milbi jaə'y, ¿winaək kach ja kaaky windənk ojts xpəkmukti?

Xjats ja wyandəə:

—Makmajtsk kach.

²⁰ —¿Jəts mja'myajtstip nayide'en ku əts ojts ja tsapkaaky wixujk nyikwa'kxy, jəts əts ja myaktaxk milbi jaə'y ojts nmə'əy? ¿Jəts winaək kach ja kaaky windənk xpəkmuktəə?

Xjats ja wyandəə:

—Wixujk.

²¹ Winets Jesús ja pyabəjkpitəjk tniəaay:

—Ka'anımdam meets idø'øn xja'gyuki. Ja tsapkaaky yø meets ja'ayi mda-jotmay'øø'kpy.

Ku ja Jesús tyikwin'ejxwa'kxy tu'uk ja winap jaa'y jam Betsaida

²² Jawaani y'ijty, xjats ja yja'tti jam Betsaida ma ja kajp wyinaty jade'en txøøwi; jamts ja Jesús yiktanımıiñ tu'uk ja winap jaa'y, jøts ja ojts yikminuu'kxa'aky, jøts ja tñixajit jøts ja tyiktso'okt. ²³ Xjats ja jade'en tñixajiyiiñ kyø'køjxp, jøts ja tyikpidsiimy kajpjotp. Winets tsujy ja ojts ttawenjaaxy jøts ja tñixajiyiiñ, xjats ja tyiktiy jøts pøni kujk wyinaty wine'enin t'ixy øy ti. ²⁴ Winets ja winap jaa'y wyin'ejxwa'kxy, jøts wyaañ:

—N'ijxpy øts yø jaa'y ku yø'ødyi, ja ku jade'en kyaxø'økti sa kipyin.

²⁵ Winets ja Jesús jadigojk twinguxajiyiiñ ja winap jaa'y, jøts ja yikxon tyik'ejxmøkiyiiñ, ojts ja winap jaa'y ja wyeen y'awa'ach, tum wa'ats ja t'ejxni øy tyii'ji. ²⁶ Xjats Jesús ja tkajxni jam tyøjkwindum, yide'en ja tñimaay:

—Kidi mgajptøki, jøts nipøn jam sa xkanøjmit.

Ku ja Pedro wyaañ jøts ku ja Jesús yja'aji yiknitsokp, ja Cristo

²⁷ Tø dø'øn ja jade'en wyinaty y'ukjaty, xjats ja Jesús ja pyabøjkpitøjk tmøøtsøø'ñ jøts ja ñjøkxti jam Cesarea Filipino. Jade'en ja et xyøøw ma dø'øn ja ñjøkxti. Xjats ja Jesús tuu'ajy ja pyabøjkpitøjk tø tñimaay, jøts ja tyiktiy:

—¿Pønik øts, sa jaa'y wya'andi?

²⁸ Winets ja pyabøjkpitøjk y'adsoodøø, jøts ja wyandøø:

—Winaagin jaa'y wya'andi jøts ku mets Juan Bautista, pømbi nømidip jøts ku mets Elías midı jekyibim yikni'ja'wip, jøts ku mets Dios kyugajpx'ajtpi midı jekyibim yiknigajpxp yiknimadyakp.

²⁹ Xjats ja kø'øm ja Jesús yiktøøjidøø yide'en:

—Jøts meets, ¿sa meets m'ukwa'añ, pøn øts idø'øn?

Winets ja Pedro y'adsøø yøts ja wyaañ:

—Ja yiknitsokpi mets, ja Cristo.

³⁰ Xjats Jesús ja tñimaayidøø jøts ka'ap pøn ttukmado'odit jøts ku ja kyiristi.

Ku ja Jesús kø'øm tñigajpxy jøts ku ja y'ookt

³¹ Xjats ja Jesús tyik'ixpøjktøjkiyiiñ ja pyabøjkpitøjk, ja' ja tyukmadoow sa ja y'ayo'ombaatt ja Dios, ja naxwii'ñit jaa'y ja myøjkudanaabyi, kø'øm idø'øn ja jade'en ñadyiyi. Yide'en ja Jesús ttukmadoøø yøts ku ja møjaa'dyøjk, ku ja israelit jaa'y tyeetywindsøn, jøts ku ja kajpxwejpitøjk ja y'ixwetsiyit. Jade'en ja tñimaay ja pyabøjkpitøjk jøts ku ja ja' yik'oogit, tyukmadoow ja' ku ja jade'en y'ookt jøts ku ja kyidigøø xøøw pyidsø'ømt jap oo'kpi jutjøtpy ku ja yujkpyøkt. ³² Wa'ats ja ttukmadoogijxy ja pyabøjkpitøjk. Xjats ja Pedro ka'ap t'øyja'wiyiiñ ku ja wyinaty tø wya'añ kuk ja y'ookt. Ja'agøjxp ja Pedro møk twingugajpxiyiiñ ja Jesús. ³³ Xjats ja Jesús wya'kjimbijty, jøts ja pyabøjkpitøjk ja ojts twin'ixy, xjats ku Pedro miku'jin wyinaty tø kyajpxy, winets Jesús ja twingugajpxiyiiñ nayide'en, jawaani møk'ampy ja tñimaay:

—jMets miku', jıwa'ak, majststutk øts! Ka' mets jade'en mwinmay sam ja Dios Teety wwinmayin, jade'en me mwinmay sam øy pøn naxwii'ñit jaa'y.

³⁴ Winets ja Jesús ja pyabøjkpitøjk tyaajxiyiiñ, tuki'iyi ja tyajxmukijxy ja mayjaa'y jøts ja tñimaay:

—Pøni pøn tsojkin tmøøt'ajtp jøts øts ja nja' jade'en xpaduujnit, ka' mibaat kø'øm ñadyunk'atit, ja'ayi ku amumjoojt ñadyamiyoxif ja ayo'on jøts idø'øn jade'en tpaduunt. ³⁵ Pønts kajade'enduñim nay'ejxip, niwindem tkapaaty ja nitso'ok'ajtin; jøts pøn ø xku'ayo'ombaajtip, ja' idø'øn tpaatp ja nitso'ok'ajtin. ³⁶ ¿Ja ti ja ñıwya'ant øy ja jaa'y tjaja'bøjkixy ja naxwiiñ'ajtin

jòts ja y'anmija'win ne'egi wyindigoy? ³⁷ Jabi ka'axi mibaat ja ñitso'ok'ajtin ja tkuju'uty. ³⁸ Jòts pòni pòn ø xatsø'ødyump, pòni pòn øts n'øgyajpxy n'ø'yayuujk xatsø'ødyuujnip ya jaa'y wyinduujy midì jekyìp t'ukpadundip ja Dios, ya pojkipi jaa'y wyinduujy, nayide'ents øts ja tsø'ødyumbi nøjkx ndatsø'ødyuñ ku øts ja Dios Teety kyutujk nmimejnit, ku øts ja ankilis nmøøtme'ent pòn tsinaadyip jap tsajpøtpy. Øts idø'øn ja naxwii'ñit jaa'y nmøøkjudsonaabyi'ajtpy.

9

¹ Janch meets idø'øn nnøjmi, ja jaa'y ya winaagin tyanidi pòn ka'ooktip kunim ja t'ejxtit tnijawidit ja Dios kyutujk ku ja tpikta'akt møk'ampy.

Ku ja Jesús adsu'jky tuki'iyi y'atstigajch, amuum chamambøjkiy

² Tyudujkxøøwip ja Jesús wyinaty jade'en tø wya'añ, xjats ja pyabøjkipitøjk ja nidigøok t'ukwaaay, ja Pedro ja y'ukwaaaw møøt ja Jacobo jòts møøt ja Juan, jade'en ja ojts tmøøtnijky jam kojpkøjxp ma ja Jesús adsu'jky tyigajch, jamts ja pyabøjkipitøjk wyinaty t'ukmøøtani. ³ Yikxon wyet ja chamambijky janch poop ejxim tsap'øø'pkyin, nipøn jaa'y wyet ya jade'en tkayikwa'ach sa dø'øn wyet ja pyoobiyi'ñ. ⁴ Winets ja pyabøjkipitøjk t'ejxpattøø ja Elías møøt ja Moisés, jòts ku ja tmøøtmadya'akti ja Jesús. ⁵ Xjats ja Pedro tnimaay ja Jesús:

—Windsøn, ityimy'øy'ajtp ku øø nyam'aty! Nyik'øyip øøts ujts'aadyøjk, tu'uk mets mja', tu'uk Moisés yja', jòts Elías yja' tu'uk.

⁶ Tø ja pyabøjkipitøjk wyinaty yjanchø'ogidyøjkinidi, ka'ap ja y'ukwinmaa'nbyatnidi sa ja tnøjmidit ja Jesús paty ja Pedro jade'en nugo y'ukwanaa. ⁷ Winets yoots myiñ ma ja jam wyinaty, ja'ats ja ojts yik'adigøyidi, jòts jap yikmadøøy ja Dios y'ayuujk midì waan:

—Ya'at n'U'nk øts idø'øn njanchøjky, mimadojidi pòni sa wya'añ.

⁸ Xjats ku ja jatyi y'ejxj'øktøø, winets ja nipøn tka'ejxpattøø ma ja Jesús jam wyinaty, ja'ayi jam wyinaty nadyu'uk tanaapy.

⁹ Xjats ku ja choo'nidøø jam kojpkøjxp ku ja kyidaknidi, winets Jesús ja tya'ana'amidøø, jòts ja ka'ap pòn ttamimadya'aktit midì ja wyinaty tø t'ejxti, jaanim ja tmadya'akyo'ødyit kunim ja kø'øm oo'kpi jutjøtpy pyidsø'ømt jadigojk, jaa pòn myøøkjudsonaabyi'ajtpy ja naxwii'ñit jaa'y. ¹⁰ Xjats ja pyabøjkipitøjk jade'en kø'ømyi t'amaa'tsk'ajttøø, kø'ømyi ja jade'en tkajpxy'atti ti dø'øn ja jade'en tyijpy ku ja pyidsø'ømt jap oo'kpi jutjøtpy jadigojk. ¹¹ Xjats ja tyiktøødøø ja Jesús, yide'en ja tnimaadyøø:

—¿Tigøjxp ku ja kajpxwejpitøjk yide'en wya'andi jòts ku Elías jawyeen mye'ent, jòts ix'oojknim ja yiknitsokpi?

¹² Winets ja Jesús y'adsøøy jòts ja tnimaay:

—Janch me'emp ja Elías jawyeen, ja'ats nøjkx nayide'en tyikjajtp ja øgyostumbri midì Dios ojts tpikta'aky. ¿Jòts sa ja Dios kyajpxy wya'añ, sa øts ja nyiknigajpxy pòn møj kudanaabyi'ajtp, sak njatt? Yide'en ja Dios kyajpxy wya'añ jòts kuk ø n'ayo'ombaatt, ka'abik øts ja jaa'y xtsokt, x'ixwetspik øts ja jaa'y. ¹³ Jòts ndukmadøøpy meets ixyam ku ja Juan Bautista tø y'atsmiñ, jòts tø kyugajpx'aty nayide'en ejxim Elíasin, jòts jaa'y ja ojts yjemduñi tyeduñi pòni sa y'anmija'win ja tyimñekti, jajt idø'øn ja jade'en sa Dios kyajpxy wyinaty wya'añ.

Ku ja Jesús tyikmøøpiky tu'uk ja mixyu'nk pòn wyinaty ja miku' tø tyatøkiyi

¹⁴ Jawaani y'ijty xjats ja Jesús tmøøtja'aty ja nidigøok ja myigu'uk ma ja pyabøjkipitøjk jam wyinaty tø yjaaktandi, jòts ja t'ejxpattøø ja mayjaa'y ku ja pyabøjkipitøjk jam wyinaty tø yiknabejkinidi; jòts kajpxwejpitøjk ja jam

tmøøtnay'øjyidi. ¹⁵ Xjats ku ja Jesús yik'ejxpaajty, winets ja jaa'y niduki'iyyi ñigyumaap yajattøø, jatyi ja tñibujtjø'ktøø ja Jesús, jøts ja ojts tkajjpxpoo'kxti.

¹⁶ Xjats Jesús ja yiktøøjidøø, yide'en ja ñimaajyidøø:

—¿Sats yø nbabøjkpitøjk xnøjmidi, ti yø møøt mnadyamigajpxidip?

¹⁷ Winets ja mayjaa'y nidu'ugin y'adsøø yøts ja wyaañ:

—Windsøn, ixya me tø ndanimiñ tu'uk nmajñku'nk pøn ja miku' tmøøt'ajtp, jøts ja' yø kayikajpxip. ¹⁸ Jatyi miku' yø myachi ku yø ma ñijxy, ja'ats yø yiknaxkidajkip, jamts yø yjanch'a'øøpy jøts yjanchtøtskaaty, jade'en'ampy yø tø yjanchwindigøøñi, ka'ap myøjaaw yø ukteeni. Tø øts yø mbabøjkpitøjk njanøjmidi jøts tyikpidsø'ømdit yø miku' mididi øts yø n'u'nk myøøt'ajtpy, jøts ka'ap yø tø myayidi.

¹⁹ Xjats ja Jesús y'adsøø yøts ja wyaañ:

—Mee kajanchja'wibidi, yø mbøky nugo myikmajadaktip. ¿Ma windemnim meets ja ngajpxy ja n'ayuujk xpabøjkit, jøts windemnim meets yø jade'embisuktatso'okt ku øts yø ejtp njanchjanigajpx'ity?

²⁰ Winets ja tyikmendøø, xjats ku Jesús ja miku' y'ejxpaajti, winets ja mixy yikxidejtyø'jy møk'ampy, ja miku' ja ojts jade'en tyuñi, xjats ja kyidaay, kawinaak ojk ja kyibejpwawidijty jøts ja yjanch'a'øøpy. ²¹ Winets ja Jesús tyiktüø ja u'nkteety, yide'en ja tñimaay:

—¿Windii yø jade'en pyaadyi, windii yø jade'en yjajt'okwa'añ?

Xjats ja u'nkteety wyaañ:

—Jaayip yø pyaajtniyi ku yø myutsk'ajty, ²² may ojk ja miku' yø jønjøtpy tø yiktøkiyi, may ojk yø tø yiktøkiyi møj nøjøtpy, jøts yø jade'en yik'ookwa'añi. Ukwanik sa xu'unt, ayø'ejxk øøts, pudøjkik øøts.

²³ Xjats ja Jesús wyaañ:

—Pøni mjanchja'wip ja Dios, tum'øy jaa'y pyidsø'ømxiyi øy tyii'ji pøni ku tjanchjaw ja Dios.

²⁴ Winets ja mixy tyety møk'ampy wyaañ:

—ñNjanchja'wip øts ja Dios; jøts pudøjkik øts jøts njaakjanchjawit!

²⁵ Xjats ku ja Jesús ojts t'ixy ja mayjaa'y jøts ku ja ñamyuk'adi'ichidi, winets ja møk'ampy twingugajpxiyi'ñ ja miku', yide'en ja tñimaay:

—Miku', mets ja jaa'y myik'uu'mpy jøts mets ja jaa'y myiknajtpy, øts nyiku-tujkpy jøts mbidsø'ømt; majtstu'ut yø mixy, jøts kidi m'uktøjkini jadigojk.

²⁶ Xjats ja miku' møk'ampy chabaaguejky, jøts ja mixy ojts møk'ampy yikxidejtyø'øy, winets miku' ja ojts myajtstu'udyi, jade'en ja yiktaajni ejxim ja jaa'y y'øøky, may ja jaa'y wyanidi jøts ku ja tø y'oo'kni. ²⁷ Xjats Jesús ja ojts twejtsji'iky; jøts ja mixy tyanaagyukiyi'ñ.

²⁸ Winets ja Jesús tyøjkini tøjktøtpy, jøts ja pyabøjkpitøjk ja yiktøøjiyøø yide'en:

—¿Tigøjxp ku øøts yø miku' tø ngayikpidsimy?

²⁹ Xjats ja Jesús wyaañ:

—Yø miku' jade'en'ajttip, winet yø pyidsø'mdi ku ja Dios n'ajot'ajtin jøts ku yø ngu'amaay'ajtin.

Ku ja Jesús tñigajpxy jadigojk jøts ku ja y'ookt

³⁰ Xjats ku ja ojts choondi jam, winets ja ñajxtøø Galilea. Jøts ka'ap Jesús ja pøn ttuknijawiywa'añ ku ja jam wyinatyi, ³¹ kumi yide'en ja pyabøjkpitøjk ja wyinatyi yik'ixpiya, yide'en ja tñøjmi:

—Øts idø'on nmøjkudanaabyi'ajtpy ja naxwii'ñit jaa'y, jøts meets idø'on nduknijawi sa njatt sa ngubatt ya naxwiiñ. Jade'en øts ja jaa'y xkøyakt, ku øts

ja mayjaa'y xmatst jøts ø jaty xyik'lookt; jøts ku jade'en n'uk'lookt, winets øts kyidigøøk xøøw nbidsø'ømt jap oo'kpi jutjøtpy. ³² Xjats ja pyabøjkpitøjk ja ka'ap tnmadowdi ku ja jade'en yiknøjmidi, jøts tsø'jkidip ja'øyik idø'øn ja tyiktø'ødit ti jade'en tyijpy.

Pøn idø'øn jawaani møj mā Dios ja yjaa'y ja kyutujk ttanitani

³³ Xjats ja Jesús jam tmøøtsøø'n ja pyabøjkpitøjk jøts ja yja'tti Capernaum, jade'en ja møj kajp xyøøw mā dø'øn ja ojts yja'tti; jøts ku ja tyøjkidøø tu'ugy tøjktøtpy, japts ja Jesús pyabøjkpitøjk tyiktiy, yide'en ja tnimaay:

—¿Ti meets ukwan ja mgajpxy'ajtpy tuu'ajy?

³⁴ Xjats ja pyabøjkpitøjk amøni y'amidoodukti, ka'ap ja sa wya'andi, kumi ja' ja jam wyinaty tø tnadyamigajpxyidi pøn pyabøjkpitøjk idø'øn ja tyimy-jawaani møj pidsømp. ³⁵ Winets ja Jesús y'ixaajky jøts ja tyaa'xixiyi'n ja ñimajmajskepi jaa'y pøn ixpøjktip, jøts ja tnimaay:

—Pøni pøn namyøjpikta'akwajnip, wan ja myigu'uk tpudøki, øy ti tunk ttu'unt ejxim ja jaa'y pøn ja ñitanaabyi ka'ejtp.

³⁶ Winets ja tñixajiyi'n tu'uk ja mutsku'nk jøts ja tpiktaajky jam agujk'am, jamts ja ojts tsa'anji'iky, jøts ja wyaan:

³⁷ —Pøni pøn tkupøjkp øy midi una'jku'nk øts køjxp, øts ja wyinaty jade'en xkupøjkp, kumi tum øts ja una'jk nja'ajtpy; jøts pøni pøn øts idø'øn jade'en wyinaty xkupøjkp, kidi øtsip ja wyinaty nadyu'uk xtyimgyupøkp, nayi kyupøkp ja nøjxk pøn ø xkajx.

Ku ja Jesús wyaan: Adøm ja n'budøjkibi pøni ka'ap adøm ja xmidsep'ajtyindi

³⁸ Winets ja Juan tnimaay ja Jesús:

—Windsøn, tø øøts ja jaa'y tu'uk n'ixy pøn tyiktump mets mmøk'ajtin, jøts miku' ja ttukmajtstu'uty ja jaa'y, jøts kumi ka'ap ja yik'ijxyi xjats øøts ja tøndukmajtstu'uty jøts ja ka'ap jade'en y'uk'adøtsnit.

³⁹ Winets ja Jesús wyaan:

—Janch øy midi yø jaa'y tyumpy, kidi xukmajtstu'utti; pøni yø' ja jaa'y tyiktsojpk øts køjxp, sudso øts yø jadigojk xmigajpxigøøgyojmit. ⁴⁰ Pøn adøm xkamidsep'ajtimp, xmitgu'ukwa'animp adøm ja'. ⁴¹ Jøts ku pøngapøn ja tsuxk nøø mmo'ojidit tuktsemu'ngin, ku ja ttaguyakit øts køjxp, jøts kumi øts meets njaaktyimyyaa'y'ajtnip, wimbejtxiyip tigajtsxiyip ja nøjxk jawaani øy, kumi øts idø'øn meets xkristi'ajtp.

Ja' midi yikpøkpyajtp

⁴² Øy pøngapøn pøni pøn øts n'una'jk nidu'ugin xyikpojkipituujniyip, pøni pøn øts n'una'jk nidu'ugin xyiktundigøjyiyip pøn jaty ø xjanchja'widip, ne'egi ja øyik y'ijty jøts paandaak yiktayukwøønt ja jaa'y pøni pøn jade'en adøstp jøts ja mejjyotp yikuwibepit. ⁴³ Pøni myikpøkyuujnip yø mgø', ne'egi øy ku xkajtspoott jøts mjaakayikpojkitunit; ne'egi øy jade'en ku mgø' tuktamajñ xmidøkit jap tsajpjøtpy, jøts kidi xmidøki ka'pxy jap miku' ku'py mā jøønyow nijuuni kyapi'ich, ⁴⁴ mā tinø'øk nijuuni kya'øøky. ⁴⁵ Pøni myikpojkituujnip yø mdeky, ne'egi øy ku xkajtspoott jøts mjaakayikpojkitunit; ne'egi jade'en paktuk mdøkit jap tsajpjøtpy, jøts kidi myikpikta'aky ka'pxy møøt mdeky jap miku' ku'py, ⁴⁶ mā tinø'øk nijuuni kya'øøky jøts mā jøøn nijuuni kyapi'ich. ⁴⁷ Jøts pøni ku yø mween myikpojkituniyi, ne'egi øy jøts mnawyenjuudyiyit; ne'egi øy jade'en ku wändu'uk mdøkit mā Dios kyutujk tñitani ja jaa'dyi, jøts kidi myikpikta'aky miku' ku'py møøt mween ka'pxy, ⁴⁸ mā nijuuni kya'øøky, mā jøøn ejtp tyøøy.

⁴⁹ 'Niduki'iyi ja Dios yja'a'y nøjxk ayo'ombaa'aty ya naxwiiñ, jøts ku dø'øn jade'en tpaaty t'ixy winets ja nøjxk jawaani øy pyidsømni. Jade'en idø'øn ndejint n'ukpiktaajkint ejxim ja jiyujk yøxy ku ja kaan ja møøt yiktamiyoxi, jawaani øy ja nøjxk pyidsømni. ⁵⁰ Kaañ amuum tyik'oyigyøjxp o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en md'u'undit, tø wyinaty mbidsømdi ejxim ja kaanin midu kawa'ats midu katump. Møøt mnamyayidi o pøngapøn.

10

Ku ja Jesús kyajpxwiji jøts kidi amajtsk jaa'y ñawya'kxyidi

¹ Xjats ja Jesús jam chøø'ñ Capernaum, jøts ja ñijxxy Judea, jøts ku ja jam ñajxy winets ja møj nøø ja ttanajxy midu txøøw'ajtp Jordán. Jøts ja tniyø'øyi ja kajp midu jam wyinaty tãmp jaduktamajñ'ampy, jamts ja jaa'y may'ampy ñamyukojmiyidøø ma ja wyinaty, jøts ja ojts tyik'ixpiky jade'eñim sayim ja wyinaty jekyip tø ttuñ. ² Xjats ja fariseotøjk winaa'gin tñimendøø ja Jesús jøts ja nugo tkajpxy'ejxwa'andi, yide'en ja tñimadyi pøni øy idø'øn jade'en ku ñiyaa'y ja tmajtsu'utwa'añ ja ñidø'øxy, jade'en ja ojts tyiktøwdi. ³ Xjats ja Jesús y'adsøø jøts ja wyaañ:

—¿Sã Moisés yikutujky?

⁴ Winets ja y'adsoodøø jøts ja wyandøø:

—Ojts Moisés tyikutuky jøts ja nøky tu'uk kyojt ku ja yaa'dyøjk tmajtsu'utt ja ñidø'øxy.

⁵ Xjats ja Jesús y'adsøø jøts ja wyaañ:

—Ja'agøjxp ja Moisés jade'en tyikutujky ku mee niwine'enin mgamadøø, ku mee niwine'enin mgaja'gyuki. ⁶ Kumi Dios tyikts'ondakijxy tuki'iyi ku yaa'dyøjk ku tø'øxyøjk tyiknajtskojii'ñ jøts ja jaa'y y'amajtskidit. ⁷ Paty yaa'dyøjk kuwani tmajtsu'utt ja tyeety ja tyaak, jøts ñidø'øxy tu'ugyi møøtsøønit nadyu'uk, ⁸ ku jaa'y y'amajtsk'atti ka'ap ja y'uknamajtskinidi, tu'ugyi ja ñamyayi ñabyaajtñiyidi. ⁹ Paty ka'ap y'øyi ku jaa'y tyiknawya'kxit midu ja Dios tø tyik'amajtski.

¹⁰ Xjats ku ja tyøjkidøø tøjktøtpy, winets ja pyabøjkpitøjk tyiktøødøø jadigojk midu ja Jesús wyinaty tø tmadya'aky. ¹¹ Ñigajpx idø'øn ja Jesús ja', yide'en ja wyaañ:

—Pøni pøn ja ñidø'øxy tmajtsutp jøts jadu'uk tmøøt'amajtskigyojmi, ja jawyene nidø'øxy idø'øn ja wyinaty kya'ødyumpy jøts ja pyøktyuñ; ¹² jøts ku ja tø'øxyøjk tmajtsu'uty ja ñiyaa'y, jøts ja tmøøt'amajtskimi ja wenk yaa'dyøjk, pøktypump idø'øn ja nayide'en.

Ku ja Jesús tkunuu'kxy ja mutskuna'jk

¹³ Xjats ja jaa'y y'unaja'jku'nk tyikmendøø, ja' ja tyuknimendøø jøts ja Jesús ja tkønixajt, jøts ja møjjaa'y jade'en yja'attøø jam møøt ja mutskuna'jk; winets ja pyabøjkpitøjk ja ojts møk'ampy wyingugajpxiyidi. ¹⁴ Xjats ku ja Jesús ja jade'en ojts t'ixy ja pyabøjkpitøjk, winets ja yjanch'ambijky jøts ja wyaañ:

—Majtsu'ut yø una'jk, wan øts yø xnimendi, kidi xnøjmidi kuts yø xkanime'endit, kumi tum jade'embi jaa'y nøjxk nitanaajjyip ja Dios kyutujk. ¹⁵ Janch øts idø'øn nwa'añ, pøni pøn tkagupøjkp ja Dios kyutujk midu ja tyanitanaapy ja yjaa'y, niwindem xøøw ja jaa'y ja nøjxk tkadatøki jadigojk pøni ku ja wyinaty jade'en tø tkagupiky ejxim mutsku'nk yikupikyin.

16 Winets ja tsa'anjii'jky ja mutskuna'jk jøts ja ojts tkunuu'kxy, ojts ja kyø' ja ttanixajkixy.

Ja kumeeñ jaa'y

17 Xjats ku ja yjaakwidijty, winets ja jaa'y ja tu'uk puty'i ñimejnøø jøts ja wyinguxanaajyi, yide'en ja ñimaajyøø:

—Mets øyjaa'y yik'ixpøjkpi, çti ø ndu'ump jøts øts n'anmija'win tpaatt ja nitso'ok'ajtin xemikøjxp?

18 Xjats ja Jesús wyaañ:

—ÇTi jade'en myikwajniip ku øts jade'en xnøjmi jøts ku øts janchty-imy'øyjaa'y? Ka'ap pøn y'øyjaa'y, tu'ugyi Dios y'øyi. 19 Mnija'wipxi dø'øñ ja Dios kyutujk midì nømp: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwindaa'y'aty; windsø'øgi mdeety mdaak.”

20 Xjats ja jaa'y y'adsøoy jøts ja wyaañ:

—Windsøn, jaayip øts yø tuki'iyi nbadundøjkini ku nmutsk'aty.

21 Winets ja Jesús twin'ejxji'jky ja jaa'y amyuyj tsaachuyuj, jøts ja tnimaay:

—Jap jadu'uk midì mjaakabadumpy: nøjkx, tuki'iyi x'atsto'okixy ti jaty jam mmøø'tajtpy, jøts ja ayoobi jaa'y xabudøkit, winets ja Dios mjotkujk'ajtin mmo'o'jiiyt jap tsajppøtpy; nøjkx x'atstuñ midì ndijpy, winets ø xpadsoont.

22 Xjats ku ja jaa'y jade'en tmadøoy, winets ja nugo tkumaa'yiyii'ñ tkudajiyii'ñ, janch ñiyotmay'oo'kpim ojts ñøjxni, kumi janch kumeeñ jaa'y idø'øñ ja wyinaty.

23 Xjats ja Jesús twin'ejxjø'kijxy ja jaa'y pøn ja jam wyinaty nidanaajyip, winets pyabøjkpitøjk ja tnimaay:

—iØy yjanchepi sudso ja kumeeñ jaa'y tkupøjkit ja Dios kyutujk midì yjaa'y ja tyanitanaapy!

24 Xjats ja pyabøjkpitøjk jadi'iñi myondi tyukti ku ja Jesús jade'en wya'añ; winets ja Jesús wyaañ jadigojk:

—U'nk una'jkti, ijanch tymchep sudso ja kumeeñ jaa'y ttatøkidit ja Dios kyutujk, kumi myeeñ ja amuum yikmøjtøjkidip! 25 Ne'egi tsojk ñaxt tu'uk ja møj jiyujk jap xuu'ñ jutjøtpy, jøts nigidi tu'uk ja kumeeñ jaa'y tyøkit jade'en ma Dios kyutujk ttanitani ja yjaa'y.

26 Xjats ku ja jade'en tjaaktyimyadoodøø ku ja Jesús wya'añ, winet ja tyimñigyumaap yjajttøø, jøts ja xem yam ñawyajnidøø:

—ÇJøts pønims idø'øñ nitso'ok'atp?

27 Xjats ja Jesús y'ejxji'jky, jøts ja wyaañ:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøø'tajtpy ja møk'ajtin sudso xyiknitsoojkint; ti Dios tkatsepjawi.

28 Winets ja Pedro kyajpxøjkii'ñ jøts ja wyaañ:

—Tø øø tuki'iyi nmajtstutkixy ja nbikta'aky, jøts icyam øøts idø'øñ jade'en nwidity mets møøt.

29 Xjats ja Jesús y'adsøoy:

—Janch meets idø'øñ nnøjmi, pøni pøn tmajtstuttip tyøjk, pøn tmajtstuttip y'ajch y'uch, jøts chø', ja tyeety ja tyaak, uk ja y'u'nk ñidø'øxy tmajtstu'uty møøt ja naajx ja kam, pøni pøn jade'en tmajtstutp ja pyikta'aky øts køjxp, ja øgyajpxkyøjxp ja ømyadya'akyøjxp, 30 pyaattp ja nøjkx ja tøjik may'ampy, may'ampy ja nøjkx tpaaty y'uch y'ajch, ja tyeety ja tyaak, ja ñaajx ja kyam, øy ja tjaku'ayo'ombaadi øts køjxp; pøni myidanaapy idø'øñ ku sa yiktu'unt, winets y'anmija'win ñøjkxt ma Dios. 31 Jøts may ja jaa'y Dios nøjkx

yik'amutskiyidi, pøn nugo namyøjpikta'ejtip; ja' ne'egi ja Dios kajxa'aky yikpidsø'ømp, pøn yik'ayo'om'ejtp.

Ku ja Jesús tnigajpxy jadigojk jøts ku ja y'ookt

³² Jam idø'øn ja wyinaty pyaty ma jam ja tuu' pyety midu nøjxpx Jerusalén, ja Jesús wyinaty jawyeen yø'øpy jøts ja pyabøjkpitøjk ix'oojk yø'ødyi. Xjats ja pyabøjkpitøjk ja ñigyumaap tjawidi ku ja Jesús jade'en ñijxxy, jøts janch tsø'jkidip ja'. Winets Jesús ja yjiwa'widøø nimakmajtsk, jøts ja ojts tyuk-maadoowinibøjkidi jadigojk sa jaty ja wyinaty yjatwa'añ kyubatwaLgxañ.

³³ Yide'en ja ñimaajyidøø:

—M'ejxtip ku icyam nbejtyindi jøts nnijxxyindi jam Jerusalén ma øts jaa'y xkøyakt, pøn møj kudanaabyi'ajtpy ja naqxwii'ñit jaa'y, jøts øts ja israelit jaa'y tyetywindsøn jam xmatst jøts ja kajpxwejpitøjkti, ja'ats tyikutuktip jøts ø n'ookt, jam øts ja xkøyaktit ma ja wenk jaa'y yikutukti møk'ampy. ³⁴ Yikxon ø nyiktaxe'ekt, yikwop yikoxp øts, xnidsujip øts ja jaa'y, jøts øts ja jaa'y xyik'ookt; jøts ku øts wyinaty jade'en tø n'øøky, kyidigøøk xøøw øts jadigojk nbidsø'ømt jap oo'kpi jutjøtpy.

Ku ja Jacobo møøt ja Juan t'amidoodøø ja may'ajtin

³⁵ Xjats ja Jacobo, møøt ja Juan pøn ja Zebedo myajnk'ajttip, ja' ojts tnimendi ja Jesús jøts ja tnimaadyi:

—Windsøn, ja' øø ndsøjkpy jøts øø xuujnit ja may'ajt, ja' øø n'amidoowampy.

³⁶ Winets ja Jesús tyiktiyy yide'en:

—¿Ti dø'øn mdsøjktip, ti ø ndu'ump?

³⁷ Xjats ja wyandøø:

—Xmøøtsøøni øøts ku myikutukt, adsow aduuk øøts xyiktsøønit mgutu-jktaajkjøtpy, jøts øøts ja jaa'y xwindsø'øgit.

³⁸ Winets ja Jesús wyaañ:

—Ka'ap meets yø xñijawi pø ti mee m'amidøøpy. Ngupøkp øts ja ayo'on jøts pøni sa øts ja jaa'y x'uktu'unt. ¿Jøts meets, mgupøktip meets nayide'en ja ayo'on jøts pøni sa meets ja jaa'y m'uktunit?

³⁹ Xjats ja y'adsoodøø jøts ja wyandøø:

—Ngupøkp øøts, tiku øøts ndejint ngagupøkt.

Winets Jesús ja tnimaay:

—Janch jade'en, mjanchkupøkp meets nayide'en ja ayo'on midu ø ngupøkp, jøts mjanchkupøktip meets nayide'en pøni sa øøts ja jaa'y x'uktu'undit; ⁴⁰ tyimyo' ku meets xmøøtsinaawya'añ adsow aduuk, kidi øtsip meets ja nmo'op, ja Dios Teety ja tyakp jøts ja' ja myo'op pøni pøn ja jade'en tø ttamidsøky.

⁴¹ Xjats ku ja yjadu'ukpi pyabøjkpitøjk tmadoodøø jade'en, winets ja yjanch'ambøjktøø, jøts ja Jacobo yikmi'ambøjktøø møøt ja Juan. ⁴² Winets ja Jesús pyabøjkpitøjk tyajxmujky, jøts ja tnimaay:

—Yide'en'ampy ja jaa'y wyindsøn'aty pøn Dios kyajpxy tkabadundip, ja'ayi nugo ja jaa'y tyiktuñ, jøts ja tu'ugyi tja'abøjkøxni. ⁴³ Jøts ka' mee nøjxx jade'en mjatti. Wenk meets mja'ami, pøni pøn namyøjpikta'akwajnip, ja' idø'øn jade'en møjtkip pøni pøn ja myigu'uk twindsø'jkip; ⁴⁴ jøts pøni pøn tsuj windsøn'atwamp, ja' idø'øn windsøndøkip pøni pøn tuki'iyi ja jaa'y jade'en tpudøjkip. ⁴⁵ Ja'agøjpx ø nmiñ jøts ja jaa'y nbudøkit øy ti tunk ndu'unt, kidi ja'ajip øts tø nmiñ jøts øts jaa'y øy ti tunk xuujnit, ja' ø tø nmiñ jøts øts

pøkyjaa'y ngubajtit ja pyøky ku n'ookt winets ja mayjaa'y yikpojkipimaa'kxt. Øts idø'øn ja' myøjkudanaabyi'ajtpy ja naqxwii'ñit jaa'y.

Ku ja Jesús tyikwin'ejxwa'kxy ja winap jaa'y pøn txøøw'ajtp Bartimeo

⁴⁶ Xjats ja yja'ttøø Jericó. Jøts ku ja Jesús pyabøjkpitøjk jam wyinaty tmøøtpidsimy kajpjotp møøt ja mayjaa'y, winets winap jaa'y ja tu'uk tpatøø pøn txøøw'ajtp Bartimeo, ja Timeo y'u'nk, jam ja wyinaty chøøni tuu'am jøts ja tigati tyikmuky. ⁴⁷ Xjats ku ja tñimadøøy jøts ku ja Nazaretit jaa'y jam wyinaty ñaxy midi txøøw'ajtp Jesús, winets ja winap jaa'y møk'ampy kyajpxkejky jøts ja wyaañ:

—iWindsøn'ajtim, rey David y'ap y'u'nk, ayo'ejxk øts!

⁴⁸ Xjats ja mayjaa'y ja møk'ampy wyingugajpxiyøø jøts ja y'amo'ont, ka'ap ja winap jaa'y y'amøn, ne'egi ja tjaakyikjinajx'adi'ich, yide'en ja wyaañ:

—iMets myimajtsk'ap'ajtip ja møj windsøn David, ayo'ejxk øts!

⁴⁹ Xjats ja Jesús wya'k'øyi'ii'ñ, jøts ja pyabøjkpitøjk ja tnøjmi:

—Nøjxk x'atswawdi.

Winets ja winap jaa'y y'atsyikwaay, yide'en ja t'atsnimaadyøø:

—Tsojk, pidø'øk, ixam idø'øn myikwaadsøy.

⁵⁰ Xjats ja jaty: tñajtswøjy'ii'ñ ja yukwop, wo'onjø'kp inet ja adsu'jky, jøts ja tñinijkxy ja Jesús. ⁵¹ Winets Jesús ja yiktøøjøø:

—¿Ti mdsøjkpy, sã me ndu'unt?

Xjats ja winap jaa'y y'adsøøy jøts ja wyaañ:

—Windsøn, ja win'ejxwamp øts.

⁵² Winets ja Jesús ja tñimaay:

—Nøjxni; tø me mdsokni kumi tø me xjanchjawi.

Xjats ja winap jaa'y jaty: wyin'ejxwa'kxy, jøts ja tpanijkxy ja Jesús jam tuu'am.

11

Ku ja Jesús kyajptøjk'iyi'ñ Jerusalén

¹ Xjats ku ja jam wyinaty yja'atwanidi Jerusalén, winets ja tyandøø jam Betfagé mididi kajp Betania wyinaty møøt ñamyiwingon'aty, ja kajp mididi jam wyinaty tãndip kojpk ix'am mididi txøøw'ajtp Olivos, jamts ja Jesús pyabøjkpitøjk namaajtsk tkajxtsøø'ñ, ² jøts ja tñimaay:

—Nøjkxti ixem ma yø kajpu'nk wingon, jøts ku net jam mja'attit, jamts inet buuru'nk tu'uk kuwiiñ xpaattit mididi tsotsnim, mididi ka'aním pøn ttatsøøni. Nøjxk x'atmigajidi jøts xwejtsme'endit. ³ Jøts ku pøn myiktøwidit tiku jade'en m'adø'øtsti, jade'en xnøjmidit jøts ku t'anuu'kxwã'añ nwindson'ajtim, jøts ku ja jaty: tyikwimbejtkojmit.

⁴ Xjats ja pyabøjkpitøjk ñøjkxti, jøts ja buuru'nk ja ojts tjanchpaatti kuwiiñ jam tøk'agø'øm, jam ja tpaatti tuu'am jøts ja tmigajidøø. ⁵ Winets ja jaa'y winaagin tyiktøøðøø pøn jam wyinatyi, yide'en ja ojts ñii'mxyyidi:

—¿Ti mdundip? ¿Tigøjxp ku yø buur xmigajidi?

⁶ Xjats ja pyabøjkpitøjk y'adsøøðøø jade'en sã Jesús ja wyinaty tø ñii'mxyyidi; winets ja ojts yikmajtsu'utti jøts ja jam choo'ndi. ⁷ Xjats ja jade'en tyiktso'ondøø ja buur, jøts Jesús ja ojts tñaninøjkxti; winets ja wyet ja ttajiba'andøø ja buur, jøts Jesús ja ttawaa'tspejy ja jiyujk. ⁸ May jaa'y ja wyet ojts tya'apti jam tuu'am, jøts may ujts'aay ja ojts ttu'kxti jøts ja jam nayide'en tpiktaktøø, jøts ja Jesús jade'en tpaatsowa'andi ejxim møj windsønin. ⁹ Xjats ja niduki'iyi møk'ampy kyajpxkaktøø, jøts ja niduknaq wyandøø:

—;Dios Teety tsajpjotpit, kunuu'kx yø windsøn pøn me tø xkexy!
 10 ;Kunuu'kx yø windsøn midi mgutujk mĩmejniyĩp, wan ja tyeety'ap David
 tyikmøjtajjki ja kyutujk jadigojk! ;Kuuyi ja Dios Teety jadu'uk yjaak'øyi!

11 Xjats ja Jesús jade'en tyøjkijyĩñ Jerusalén, jade'en ja yjã'jty jam
 tsaptøjkjotp. Jøts ja ojts t'ejxkixy tuki'iyi ti jaty jam wyinaty ejtp; jøts ku ja
 ojts jade'en t'uk'ejxkixy, winets ja ñøjkxni jam Betania møøt nimakmajtsk
 pyabøjkpitøjk, ja'agøjxp ja ojts ñøjkxnidi ku ja et wyinaty tø chuu'ñi.

Ku ja Jesús t'ayo'onmigajpxy ja iigi tsa'amguipy midi ja tyøøm ka'ejtp

12 Xjats ku ja Jesús kyimjabom choo'ndøø Betania, winet yuu ja pyaajtøø.
 13 Jøts ja jagam t'ejxpajty tu'uk ja iigi kipy midi jam wyinaty janch'aamyøøt;
 xjats ja ojts tñinijxky jøts ja t'ats'ejxwa'añ pøni jam idø'øn ja tyøøm. Jøts ku ja
 ojts t'ixy, ni tu'ugin ja tyøøm ja tkapaajti, nugo ja wyinaty janch aay ja ñaxy,
 kumi ka'anim ja tiempi wyinaty tpaaty ku ja iigi tyøømi. 14 Winets ja Jesús
 tmigajpxy ja iigi kipy, yide'en ja tñimaay:

—;Nijuuni mga'uktøømiñit!

Ku ja Jesús jade'en wyaañ, myadowdi ja pyabøjkpitøjk ja'adi.

Ku ja Jesús twøjpsømguixy ja too'kpitøjk jam tsaptøjkjotp

15 Jawaani y'ijty, xjats ja yjã'ttøø jam Jerusalén. Jøts ku ja Jesús tyøjkijyĩñ
 tsaptøjkjotp, winet ja t'ixwøjpsømgijxy ja jaa'y pøn jap wyinaty too'ktip
 yajktip, midi jam wyinaty juudyip kajpxtip, tuki'iyi ja t'ixkajxpsømgijxy.
 Nayi yikpidsøøm ja jaa'y ja' pøn jam wyinaty meñ tkugondip, tuki'iyi
 myesi ja yiktejsapwajkjøxtøø, jøts nayide'en ja pak too'kpi chinaabyajt
 yiktejmbejtkjøxtøø; 16 jøts ja Jesús ja jaa'y tka'uktuk'anajxni ja tsaptøjk ku
 ja jam tigati tjatsømnaxwa'andi. 17 Yide'en ja Jesús tñimaay ja jaa'y ku ja
 yik'ixpijky:

—Yide'en jap nøkyijpxy wya'añ: “Ja' øts ndøjk wya'ant jøts naxwii'ñit jaa'y
 jap t'ajot'attit ja Dios Teety”; jøts ka'ap meets ja jade'en ti xyiktuñ, maa'tstaajk
 meets ja' tø xyikwani.

18 Xjats ku ja jade'en tmadoodøø ja israelit jaa'y tyeetywindsøn møøt ja
 kajpxwejpitøjk, winets ja t'ixaadyøjkidøø ja taay jøts ja ttuku'oogi'wya'andi,
 chø'jkidip idø'øn jaa ku ja yjã'a'y yikpøjkøxniyidit, paty ja jade'en
 tñidaayiwya'andi kumi tynmni'awiniyip ja mayjaa'y ja wyinaty ku ja
 janchniyumaap yik'ixpiky. 19 Xjats ku ja et chuu'ñaa kyoodsiñaa, winets ja
 Jesús tmøøtsoo'naa ja pyabøjkpitøjk jam møj kajpjotp, jøts ja jam ñøjkxti ma
 ja chøøni.

Ku ja iigi tsa'amguipy tyijch

20 Xjats ku kyimjabom'ajty, winets ja jam jøpyi ñajxtøø ma ja iigi kipy
 jam wyinaty tyani, jøts ja ojts t'ejxti ku ja wyinaty tø tyøjtsj'økni y'aatsjotpy.
 21 Winets ja Pedro ja tja'myejch, jøts ja tñimaay ja Jesús:

—Windsøn, ejx ja iigi kipy tø tyøøtsni midi ojts x'ayo'onmigajpxy.

22 Winets ja Jesús y'adsøøy jøts ja wyaañ:

—Janchjawidi Dios møk'ampy. 23 Janch meets idø'øn nnøjmi, pøni pøn
 tñimaapy ya'at kojpk: “Nøjx mejyotp, jamts mdøkit”, pøni ku amumjoojt
 jade'en mwinmay ku ka'ap mmay mdajy, jøts ku kø'øm xjanchjawĩ ja
 m'ayuujk pøni sa wyinaty tø mwa'añ, jatp idø'øn ja jade'en pøni ku wyinaty
 jade'en ja janchja'win xmøøt'aty. 24 Paty mee nnøjmi pøni ti jaty m'amidoodip
 ja Dios, pøni ti mgu'amidoowidip jøts ku xjøp'ejxtit jade'en, jatpts ja jade'en.
 25 Jøts ku mdios'ajot'attit, pøni jam ja mmidsepti, maa'kxukti, jøts Dios Teety
 nayide'en mbojkmama'kxidit pøn jap tsajpjotpy. 26 Pøni ku ka'ap xmaa'kxukti

ja mmigu'uk, nayide'en meets ja Dios Teety mgapojkpimaa'kxit pøn jap tsajpjøtpty.

Ja Jesús myøk'ajtin

²⁷ Xjats ja jade'en jadigojk ñøjkxtøø jam Jerusalén. Jøts ku ja Jesús jap wyinaty wyidity jap tsaptøjkjøtpty, winets ja jap ojts ñimiñi ja teetywindsøn, ja kajpxwejpitøjk, jøts ja møjaa'dyøjkti pøn ja kutujk jam wyinaty t'adsinaadyip, ²⁸ ja 'ats ja ojts yiktyi, yide'en ja wyandøø:

—¿Pøn jade'en tø mdanigutujk'aty ku jade'en m'adi'ich ya tsaptøjkjøtpty? ¿Pøn mets jade'en mgutujkmø'øyi?

²⁹ Xjats ja Jesús y'adsøø y jøts ja wyaañ:

—Nayide'en mee nyiktøøwami; pøni x'adsoowimbejtjip øts inet, winets inet ndukmado'odit pøn øts yø jade'en tø xanigutujk'aty ku øts jade'en n'adi'ich.

³⁰ Ku ja Juan Bautista ojts yiknøbety, ¿pøn ja ojts tyanigutujk'aty ku ja jade'en y'adijch? ¿Sa mee m'ukwa'añ, Dios ja ojts tyanigutujk'aty jøts ja jade'en y'adøøtst? Adsoojimbejtik øts.

³¹ Winets ja køømyi ñagyajpxkaajkidøø, yide'en ja ñawy'añidi:

—¿Sa njanch'uknimaayint? Ku net yø njanimaayint: “Dios ja ojts kyutujkmø'øyi”, yide'en adøm inet yø x'adsoowint: “¿Jøts tigøjxp ku ka'ap xjanchjawidi pøni jade'endam ja'?” ³² Jøts ja jaa'y inet xmi'ambøjkma'ant ku net njawa'anma'ant jøts ku jaa'y ja ojts kyutujkmø'øyi.

Jade'en ja køøm ñawyajnidøø, jøts kumi ñija'widip ja jaa'y wyinaty may ku ja Juan ja Dios kyugajpxy'aty, paty ja jade'en chø'jkidøø. ³³ Jøts ja yide'en tnimaadyi ja Jesús:

—Ka'ap øøts ja nnijawi.

Xjats ja Jesús tnimaay ja jaa'y:

—Nayide'en meets ja ka'ap ndukmado'ot pøn øts jade'en xanigutujk'ajtp ku øts jade'en n'adi'ich.

12

Ku ja Jesús tmadyakpaajty ja ka'ødyumbi

¹ Winets ja Jesús tmigajpxøjkijy'ñ ja jaa'y ejxpajtin madya'akyøjxp, yide'en ja wyaañ:

—Jaa døø'n jaa'y wyinaty tu'uk pøn ja uvi tsa'am ojts tteñ kyamjotp; jøts ja yikxon tnagueemy tñabijky, jøts ku ja jade'en t'uktuuñ winets ja tyik'øiyi'ñ tu'uk ja uvi kumdaajk ma ja uvi tsa'am nøø ojts idøø'n ja jade'en tyik'øyi, xjats ja tøjch tu'uk tøjch janch køjxp jam kyamjotp. Kam ejx'etaajk idøø'n ja yik'øiyi'ñ, ojts idøø'n ja jade'en tyik'øiyigyixy.

'Winets ja tamuky tkyøyajknaa ja kyam, tumbi ja ojts ttukmidañ, jøts ja ñøjkxni abiky et. ² Xjats ku ja tiempi tpaajty juuni cha'am y ja uvi tsa'am, winets ja windsøn tkejxy tu'uk ja tyumbi jam ma ja jaa'y ja tsa'amgam jam wyinaty tøm tmidandi jøts ja jam t'atstuk'amidoowa'añ ja tsa'am kikujkp midì jam wyinaty ejtp kyamjotp. ³ Xjats ku ja tumbi jam yja'lty, winets ja jaty yikmajch jøts ja kam ejx'etpi ja ojts chiigyiyi, ka'ap ja ti yikmøø, jadi'iñi ja jam wyimbijty. ⁴ Winets ja kugam tkejxy jadu'uk tyumbi nay jam; ojts ja ñijxy jøts ja jam nayide'en yiktuuñ, yikxon ja jam ojts tyika'ach, ojts ja chaachi kyubajkjxpy, janchiktsepmigajpx ja jam. ⁵ Xjats ku ja nay jadi'iñi wyimbijty, winets ja kugam tjaakejxy jadu'uk tyumbi pøn ja kam ejx'etpi ojts tyik'ookti. Janch namay ja tumbi tmøø'taty jøts ja xyumikexy tu'uk jaty ja tsa'am tsømbi; ja'ats jam ojts ja kam ejx'etpi kya'ødyuñidi, pømbi yikwojpp yikojx, jøts pømbi winaagin oo'ktøø.

⁶ Jamts ja kugam myajnkun'k wyinaty tɔ tmøøtañ, tu'ugyi ja t'u'nk'aty, ja'ats ja jam kə'øm myøøtañ, ja'ayi ja yjanchøjkpy; xjats ja ojts ix'oojk tkexñim, yide'en ja wyaañ: "Yikwindsø'øgip yø kumi øts n'u'nk yø'."

⁷ Jøts ja tumbitøjk pøn jam wyinaty t'ejx'ejtipp ja tsa'amgam, ka'ap ja jade'en wyandøø jøts ja twindsø'øgidit, t'ixwibejpidsojmidoø ne'egi jinaxy ja ñawya'añidoø: "Ya'at inet ja' pøn kugam'atp; wan tyikpa'ø'jkyimp jøts adøm yø tsa'amgam nja'bøjkna'ant." ⁸ Xjats ja jade'en tmajtstøø, jøts ja tyik'oo'ktøø, ojts ja ñine'kx ja t'ixwibejpidsojmidoø jam tsa'amgamjotp.

⁹ Jøts, çti tyu'ump ja kugam kə'øm ku ja y'u'nk jade'en y'ø'jky? Kuwani ja kə'øm tñime'ent, winets ja tyikudigøøgyøxt ja kam ejx'etpi, jøts ja abikyjaa'y ja t'ixa'att, ja'ats ja myo'op ja cha'amgam.

¹⁰ 'Ka'anim ja nøky xkajpxidi ma yide'en wya'añ?

Ja tsa'a midi ja pojtspi kya'uk'a'ejxidøø,

Ja'ats ne'egi ixyam tɔ y'ukyikpiktakni pøch kyubajk jøts ja ttamajtsmujkixy ja pøch.

¹¹ Ja Dios Teety idø'øn jade'en tɔ ttuñ, øy yø nigyumaap njaja'wandi.

Jade'en ja Dios kyajpxy wya'añ.

¹² Winet et ja israelit tyeetywindsøn tmajtswandøø ja Jesús, ja'agøjxp ku ja wyinaty tɔ myigajpxyidi jade'en. Jøts kumi chø'jkidip ja mayjaa'y ja wyinaty, paty ja ojts jadi'ini tmajtsstu'utti, jøts ja jade'en choo'ñidoø.

Ku yikajpxy'aty ja kugubajt

¹³ Waani y'ijty, xjats ja Jesús winaagin yiktanigüexy ja fariseotøjk møøt ja Herodes myigu'uk, jøts ja nugo yjot'ejxwa'añi, ja' ja nugo chojktipp jøts ja kyajpxigø'øty, ja'ats ja yiktani'øønip. ¹⁴ Ojts idø'øn ja Jesús jam yikñimiñ, jøts ja yikñimaay:

—Windsøn, ñnija'wip øøts jøts ku mets tiy janch mgajpxy, ku me ka'ap xmøjpkta'aky pøni sa jaty ja jaa'y wya'andi, jøts kumi ka'ap mets pøn x'ejxkapy xka'ejxkapy, mdum'ejxkajpxixy mets ja jaa'y, jøts tu'ugyi mets tiy janch xuk'ixpiky ja jaa'y sudso nnøjkkxin ma Dios, paty øø nyiktøøwa'añ: çØy ku øøts ja windsøn César nmiyakt nmigubatt, uk ka'ap? çNmo'op øøts ja meeñ, uk ka'ap?

¹⁵ Xjats kumi ñija'wip ja Jesús wyinaty jøts ku nugo yjot'ejxwa'añidi, winets ja tñimaay:

—çTiku ø jtot'ejxti? Yakti tu'uk meeñ, wan ø t'uk'ijxy.

¹⁶ Xjats ja ojts tmo'odi, xjats ku Jesús ja twin'ixy winets ja ojts tyiktiy, jøts ja wyaañ:

—çPøn ya'at ja wyeen y'aaw, jøts pøn ya'at ja xyøøw ixya kyøjxja'ayi?

Xjats ja y'adsøødøø jøts ja wyandøø:

—César yø' yja'.

¹⁷ Winets Jesús ja tñimaay:

—Mo'odi ja César ja yja' pøni midi ja yja'ajtpy, jøts ja Dios xmo'odit pøni midi ja yja'ajtpy.

Jøts ku ja Jesús jade'en wyaañ, winets jaa'y ja ñigyumaap tja'widøø ku ja jade'en y'adsøøy.

Ku ja jaa'y tyiktøwdi pøni janch idø'øn ja' ku oo'kpi jadigojk jyujkpyøktit

¹⁸ Xjats ja Jesús ja saduceotøjk ojts ñimiñiyi. Ja' ñimejniyi pøn nømdip jøts ku oo'kpi nijuuni kya'ukpidsømnidit jap oo'kpi jutjøtpy; ja'ats ja ojts yiktiyi jøts ja ojts ñii'mxyi:

¹⁹ —Windsøn, yide'en ja Moisés ojts tjaadyañ tu'uk ja kutujk pøni pønik tku'oo'kp ja ñidø'øxy, jøts ku ja y'u'nk ja ni tu'uk tkayiktañ, winets ja

ku'oktyo'oxy tmøøt'amajtskit ja ñiyaa'y oo'kpi myigu'uk midì nadyu'uk jøts ja jade'en yika'axiyit. ²⁰ Jøts ja dø'øn ja jaa'y wyinaty niwixujkti, jade'en ja tyukjaa'y'atti. Xjats ja myøjpi jawyeen y'amajtskiyi'ñ, jøts ja jatyi tku'ø'jky ja ñidø'oxy, ka'anìm ja y'u'nk ja wyinaty tpaatinim. ²¹ Ku dø'øn ja jade'en y'ø'jky, winets ja mutskpi midì ja oo'kpi wyinaty myijidsim'yajtpy, ja' ojts tmøøt'amajtski ja ku'oktyo'oxy, jøts ja nayide'en y'oo'knimøø, ni tu'ugin ja y'u'nk ja tkayiktaa'ñ; nayide'en ja myidigøøkpi yaa'y yjajty. ²² Niduki'i'yi ja tø'oxy ja tyiknaxjkijxy ja yaa'dyøjk niwixujk yaa'y, jøts nipøn ja y'u'nk ja ojts kyadukpaadyi, nipøn ja y'u'nk tkayiktaa'ñ. Xjats ja tø'oxyøjk nayide'en y'oo'knimøø. ²³ Jøts ku ja jadigojk pyidsø'ømdit jap oo'kpi jutjøtpy, çpømbi ja tø'oxy nøjkk jadigojk tñidø'oxy'aty, kumi tø ja niduki'i'yi t'atsnidø'oxy'ajtkøxti?

²⁴ Xjats ja Jesús y'adsø'y jøts ja wya'añ:

—Ka' mee m'øwycinmay, ja'agøjxp ku xkanijawidi ja Dios kyajpxy, ku xkanijawidi ja Dios myø'ajtin. ²⁵ Ku dø'øn ja oo'kpi nøjkk pyidsømdì jadigojk jap oo'kpi jutjøtpy, nipøn nøjkk kya'uk'amajtski'ñi, nipøn nøjkk kya'uktø'øxmyiyø'øñi, nipøn y'u'nk tka'ukyik'amajtski'ñit. Jade'en ja tsinaa'y'in ja nøjkk tyiknaxti ejxim ankilis pøn tsinaadyip jap tsajpjøtpy. ²⁶ ÇKa'ap meets xnijawi, jøts ku ja Dios kyajpxy wya'añ ku ja oo'kpi pyidsø'ømt jadigojk jap oo'kpi jutjøtpy? ÇKa'anìm ja nøky x'ixpøkti midì ja Moisés ojts tja'ay, ma ja tñigajpxy sudso Dios ja ojts myigajpxyi jam ujts aayjotp? Ku ja ojts ñi'mxyi: “Tum øts xdios'ajttip ja Abraham, ja Isaac jøts ja Jacob.” ²⁷ Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjujky'att øy pøn. Jøts mga'øwycinmaapy meets idø'øn ku xkajanchjawidi.

Ja møj kutujk midì ja Dios ñi'ane'empy

²⁸ Xjats winet yja'jty tu'uk ja kajpxwejpitøjk ja myigu'uk midì wyinaty tømado'y ku ja Jesús jam jade'en tminagyajpxyi ja saduceotøjkti, jøts kumi ja wyinaty tñijawi ku ja Jesús wyinaty øy tø y'adsø'y, winets ja tyikti'y, yide'en ja tñimaay:

—ÇMidi'ibi ja Dios ja kyutujk jawaani møj jøts nmimado'owint?

²⁹ Xjats ja Jesús y'adsø'y jøts ja wya'añ:

—Ja' Dios jawaani møj kyutujk'ajtpy midì wamp yide'en: “Israelit jaa'y, ukmadowdi meets, tu'ugyi ja Dios pøn adøm ndios'ajtindip. ³⁰ Jøts tsokti ja jawaani ejxim niti jade'en xkatsokti, amumjoojt ja xwindsø'øgidit, ja' tu'ugyi mjotmay'attip, ja' tu'ugyi møk m'ajot'attip.” Yä'at idø'øn øgyutujk'ajtp. ³¹ Jøts jap jadu'uk midì ñi'ayjade'en møj, yide'en ja wya'añ: “Tsok mmigu'uktøjk, windsø'øgi mmigu'uktøjk, jade'en xtsokt jøts jade'en xwindsø'øgit sa kø'øm mnachøkyi, jøts sa kø'øm mnawyindsø'øgiyi.” Ka'ap jadu'uk kutujk te midì jawaani møj sa ya'adindi.

³² Xjats ja kajpxwejpitøjk wya'añ:

—Windsøn, ka' me mgajpxigø'y. Tiy janch me mwa'añ jøts ku Dios ja tu'ugyi, ku ka'ap jadu'uk pøn. ³³ Janch me mwa'añ jøts ku Dios amumjoojt ndsojkint, jøts ku ja amumjoojt nwindso'j'kint, jøts ku ja tu'ugyi møk n'ajot'ajtin, tyimdyigyajpxy jade'en ku nmigu'uk ndsojkint jade'en sa kø'øm nnachøjkyi'imp. Ne'egi tyimyo'y yø jade'en ne'egi Dios chøjkpy, jøts ka'ap jadine'en yiktsøky ku jiyujk ku ja ti ndawindsø'jki'int, ku ja ti ndamiyojxin jam altajrkøjxp.

³⁴ Xjats ku ja Jesús ojts t'ixy ja jaa'y ku ja Dios kyajpxy twinmadooji, ku ja yikxon øy tsuj y'adsoojyøø, winets ja tñimaay:

—Tyimyjawaani kya'ity jøts mets ja Dios kyutujk xkupøjkit midi yjaa'y ja tyanitanaapy.

Jøts jade'en ka'ap pøn y'uknay'a'ejxiniyi jøts tyiktø'adø'tst øy tyiij'i.

¿Janch idø'øn ku ja David t'ap'aty ja Cristo?

³⁵ Jam ja Jesús wyinaty yik'ixpiky tsaptøjkjotp, jamts ja yide'en wyaañ:

—¿Sa dø'øn ja kajpxwejpitøjk wya'andi? ¿Pønuk idø'øn tijy pøn ja Dios Teety ya pyiktaajk naxwiiñ jøts wyindsøn'att? ¿Nugo ja møj windsøn David y'ap ja tijy, kidi? ³⁶ Janch jade'en wya'andi, ka'ap idø'øn ja kya'pxyi kumi kø'øm ja David wyaañ ku Espiritu Santo ja ojts y'agajpxiyi, winets ja Dios kyajpxy ja ojts tjaajyi ma wyaañ yide'en:

Yide'en ja Dios Teety tnimaay ja nwindson'ajtim:

“Ixa'ak jøts ø xpudsøønit n'aga'n'ampy, jøts øts yø mmidsep nmimajadəkøxt.”

³⁷ ¿Pøni yø' wyindsøn'ajtim, sudso yø ndejint nugo t'ap'att?

Jade'en ja Jesús wyaañ. Janch namay ja jaa'y jam wyinaty, jøts janch jotkujk ja jam wyinaty pyatmadøyi.

Ku ja Jesús ttamigajpxy sa y'adø'øtsti ja jaa'y midi yik'ixpøjkitp jam tsaptøjkjotp

³⁸ Yide'en ja Jesús wyaañ ku ja jam wyinaty yik'ixpiky:

—Øyim mnay'ejx'etidit, ejxim meets kajpxwejpitøjkin, mnay'ejxniyi pøn ja wyet yøñjawi tpajidøjtipp ku yø'ødyi, pøn muum tuu'ajy nagyajpxpoo'kxi ttsojkitp windsø'øgi winjawi, ³⁹ pøn ja øybi tsinaabyajt ttsojkitp jap tsaptøjkjotpy, pøn ja tsinaabyajt twi'ejxtip ku kyaawya'andi, ⁴⁰ jøts ja' ja ku'økyø'øxyøjk pyøjkidip ja myeeñ, jøts ja jaty tku'øø'ndi, ñadyijyi ja øy Dios'ajot'atti. Janch møk ja nøjxk tku'ayowidi ku jade'en y'adø'øtsti.

Ku ja ku'økyø'øxy tpiktaajky ja lyimunsi

⁴¹ Tuk'ojk ja Jesús y'ixaajky jap møj tsaptøjkjotpy, jap ja wyinaty chøøni jap kajuun windujpy ma ja jaa'y ja myeeñ tpikta'akti midi ja yojxtip, jap ja t'a'ejxuky ja jaa'y sa jaty jap pøn myeeñ wyinaty tpikta'akti, namay idø'øn ja'adi. ⁴² Winets yja'jty tu'uk ja ku'økyø'øxy pøn wyinaty janch ayoop, pøn wyinaty niti ka'ejtxip. Ja'ats pyujxmeeñu'nk majtsk tkugo'oniyii'ñ jap meeñ abøjk'ii'ñjotpy, tuki'iyi dø'øn ja tpiktaajky midi ja wyinaty myøøt'ajtpy.

⁴³ Winets ja Jesús tyaaajxyii'ñ ja pyabøjkpitøjk, jøts ja tnimaay:

—Janch meets idø'øn nnøjmi ku yø ku'økyø'øxy janch ne'egi jawi ndejint ja myeeñ tø tyøxy. Nipøn jaa'y ja myeeñ jade'en tø tkayøxy pøn jaty ja myeeñ tø tja'agonidi jap kajuunjøtpy; ⁴⁴ kumi ja myeeñ windank yø jap nugo tø tpikta'akti; jøts yø tø'øxyøjk øy idø'øn yø ayøy, ne'egi tø yø tpiktakixy ja ñidsinaajyik midi yø jam myøøt'ajtpy.

13

Ku ja Jesús tnigajpxy jøts ku ja tsaptøjkyjett

¹ Xjats ku ja Jesús pyidiimiy jam møj tsaptøjkjotp, winet ja pyabøjkpitøjk ja tu'uk ñimaajyøø:

—iWindsøn, ejxik mets, ti tsaa yø jade'en jøts ti tøjk yø jade'en!

² Xjats ja Jesús y'adsøøy jøts ja wyaañ:

—¿M'ijxpy yø møj tøjk? Ni tu'ugin yø tsaa ya nøjxk kyatañ nikiibyety. Me'endip ja jaa'y jøts ja nøjxk tjaagøxtø tuki'iyi yø tøjk.

Ja ejx'qan midi yik'exp ku wyinaty yikt#dyunwanidi ja naxwii'ñit jaa'y

³ Xjats ja jade'en ñøjxktøø jam kojpkøjxp midi txøw'ajtp Olivos, ja kojpk midi jam wyinaty tsaptøjk awemp tamp. Jamts ja Jesús y'ixaajky, jøts pyabøjkpitøjk ja jam amaa'tsk yiktøøjiyøø, yide'en ja Pedro wyandøø møøt ja Jacobo, møøt ja Juan, jøts møøt ja Andrés:

⁴ —Ja' øø ndsøjkpy jøts øøts xukmado'ot windem idø'on yø tsaptøjk jade'en yjatt. ¿Ti tiy'ajtin øøts jawyeen n'exp jøts ku dø'on ja jade'en wyinaty yjatwa'añ?

⁵ Xjats ja Jesús y'adsøoy jøts ja wyaañ:

—Øyim mnay'ejx'etidit, ejxim mee pøn mwin'øø'niyi. ⁶ Kumi may jaa'y nøjkk myendi jøts øts ja x'adunaxtit, jøts ja ñøø'mdit: “Cristo øts”, mayjaa'y ja jade'en wyindaay'attip.

⁷ Jøts ku meets ja tsep øy ma xnimado'ot ku ja tsep wyingoni, kidi mdsø'øgidi kumi jatp idø'on ja jade'en, ka'ap ja ñaxt jøts ka'ap ja' tiidyu'unin xøøwi. ⁸ Kumi ja møj ja mutsk ja kajp nøjkk cheptundi xem yam, windsøndøjk ñañibidø'øgidit pøn jaty yikutujktip ya naxwiñ; maawyeen ja ujj nøjkk ñaxy, me'emp ja yuu, may'ampy ja jaa'y nøjkk ja myigu'uk tmidsepøkti a'øy'ampy pøn ja nugo tyikma'attip. Jøts ku dø'on ja jade'en yjatt tso'ondakpnim idø'on ja ayo'on wyinaty jade'en.

⁹ Jøts øyim mnay'ejx'etidit; kumi myikøyakp meets ma kudunktøjk yikutukti, jøts mee nøjkk myiktsiiky myikwøpy jap tsaptøjkjøtpy. Mwinguwa'agip mee nøjkk ja møj windsøndøjk; øts meets jap xkunøjkxp jøts ja windsøndøjk myikmadya'agidit, xjats meets idø'on ja nja' xnigubøjk. ¹⁰ Namga'anin ja tiidyu'unin xøøw tpaaty ku ja øyajpxy ku ja ømyadya'aky øy magajp yikajpxwa'kxt. ¹¹ Jøts ku jade'en ja kudunk øy maðsoo myiktawinguwawidit, kidi xkumayidi xkudajidi sudso x'adsojimbettit. Jade'en idø'on mwa'andit pøni sa Espiritu Santo winet myik'ayukpaadyidi; kidi meedsip kø'øm mgajpxp, ja Espiritu Santo meets m'agajpxiyip. ¹² May ja jaa'y ttukmiga'axwa'kxy ñagyøyakidit jøts y'oøktit, may ja u'nkteety ja y'una'jk nøjkk tmidsepøkti jøts ja tkøyaktit, nayide'en ja una'jk nøjkk tmidsepøkti ja tyeety ja tyaak kunim o'jkin ja ttukpaattit kø'øm. ¹³ Jøts mdumidsep'attip meets ja jaa'y ja'agøjxp ku meets øts xjanchjawi; jøts pøni pøn ja ayo'on jade'en tmidanaapy kunim y'oøkt, ja' idø'on nøjkk nitso'ok'ajtp.

¹⁴ Jade'en ja Dios kyugajpxy Daniel tjaay tu'uk ja nøky ma ja ojts tngajpxy midi ja jaa'y tyikma'atp, jøts ku meets ja jade'en x'ext ku ja ma tø yikpikta'aky ma ja kyapaat'aty —pøni pøn ya'at nøkyajpxy, wan tja'gyuki—, jøts pøni pøn jam Judea tsinaadyip wan tkaknøjkxti jam kojpkjøtp. ¹⁵ Jøts pøni jam wyinaty tø pyety tyøjkøjxp ja'abi xøøw, jøts ku ja wyinakt ka'ap ja yjaaktyimy'atstøkit jap tøjkjøtpy jøts ja tjaakyikpidsø'ømt øy ti, ne'egi tø'øp ja' ku ja jadi'iñi yjaaka'akt; ¹⁶ jøts pøni pøn jam wyinaty kyamjøtp, ka'ap ja y'ukwimbjntit jam tyøjk windum jøts ja wyet ja tjaak'atswetst. ¹⁷ ¿Ti yjanch'ayøoy ja tø'øxyøjk pøn wyinaty jøtpyti, pøn jam wyinaty myutsku'nk tmøøt'ajttip ja'abi xøøw! ¹⁸ Ajot'att amidowdi ja Dios jøts kidi yja'aty ja tiempi winet et ku ja et wyinaty xyuxy, jøts kidi ja'abi xøøw mga'akti; ¹⁹ kumi ja dø'on nøjkk ja møk ayo'on tyuñiyi midi ka'anin yik'ixy nijuuni wine'en ñaxy kujk ja tiempi jaa'yip ku Dios tyiktsø'ondaajky yø naxwiñ'ñit, nika'ap nøjkk jadu'uk ja ayo'on jade'en yik'ixy sa ja'ajin midi idø'on me'emp. ²⁰ Jøts ku Dios Teety ja jeexyyp tø tka'agajpxuky kon ja ayo'on, ti pøn xijy jade'en nitso'ok'atp; jøts ja'agøjxp Dios Teety ja tø tyikøñ ku ja ttsøky ja yjaa'y pøn ja tø twiwich.

²¹ 'Pøni pøn mdukmadoj'idip, pøni pøn mnimaajy'idip: "Ejxti, ixya dø'øn ja Cristo", uk ku myiknøjm'idit "Ejxti, ixem ja Cristo tyani", kidi xmibøkti. ²² Ja' idø'øn nøjx jade'en wandip pøn ñadyijyi jade'en sa Cristo sa ja Dios kyugajpxy, pøn ja miku' myøk'ajtin nøjx tyiktuujnidip jøts ja nayide'en ttu'unt sa Diosin, yjawin'øø'mbaatwa'amp ja nøjx pøn ø tø nwiwich. ²³ Jøts nay'ejx'etidi meets, nayjøp'ejxidi jøts kidi mwindaay'atyidi ja miku'; patki'jyi meets yø yam ndukmadøy.

Sa mye'ent ja naqxwii'ñit jaa'y myøjkudanaabyi

²⁴ 'Ku dø'øn ja tiempi ñaxt mā et ja ayo'on tyuniyit, winet ja xøøw y'ookt, winet ja po' y'ookt, jøts ja ka'ap y'uk'anidit, ²⁵ ka'agøjxp yø maadsa' jam tsajpwemp, jøts naxp ja uix jam tsajpwemp. ²⁶ Xjats t'ejxtit ja naqxwii'ñit jaa'y ja myøjkudanaabyi ku ja kyutujk tmime'ent møk'ajtingøjxp yoots agujkp. ²⁷ Winets øts ja n'ankilis ngajxwa'kxt, ja'ats øts ja njaa'y xwaamujkip pøn øts tø nwiwetsti øy madsoo, yikwaamuktup ja' øy ja wyinaty mā tyimyjatsøonidi.

²⁸ 'Uk patmadoj'idik øts ja n'ixpøjkin: Ku ja iigi kipy y'away y'u'nk'laty jøts ku ja kujk xyimumbøjkni, jade'en yiknijawi ja et jøts ku y'anda'akwani.

²⁹ Nayide'en idø'øn ja n'ukpiktaajkint sa ja ayo'on nøjx ñaxy; jøts ku ja jade'en x'ejxtit, jade'ents meets ja xnijawidit jøts ku øts wyinaty nmenwani. ³⁰ Janch meets idø'øn nnøjmi, jatp idø'øn ja jade'en namga'anim jaa'y wyinaty y'ookti.

³¹ Najxp yø naajx yø tsajp y'ity, jøts niwindem øts n'ayuujk kyanaxy.

³² 'Ka'ap ja et ja xøøw yiknijawi pøni juuni dø'øn ja jade'en yjatt, nipøn ja tkanijawi, ni ankilis ja tkanijawi, jøts ni Dios U'nk ja tkanijawi. Ja Dios Teety ja tu'ugyi tñija'wip.

³³ 'Jøts nayjøp'ejxidi meets ejtp, ejtp ja Dios x'ajot'attit kumi ka'ap meets ja xnijawi pøni juuni øts wyinaty nwimbejtkojmit. ³⁴ Jade'en idø'øn ja ndejint n'ukpiktaajkint ejxim ja jaa'y mididi nøjxpx jagam widejtpi, jøts ku ja chøøn y'uk'ane'empy ja tumbi ja', tu'uk jaty tyumbi ja t'uktunkmø'øy jøts y'ukpiktakpy tøj adinaabyi ja tu'uk, pøn t'ejx'etp ja tøj. ³⁵ Jøts ejtp idø'øn mjøp'ejxtit, kumi ka'ap meets ja xnijawi pøni juuni yja'att ja mwindsøn mididi kudøjk'ajtp, jotmøn ja yja'aty ux, uk jotmøn ja yja'aty tsuu'm, jotmøn ja yja'aty ku tsapni'aaw y'ayajxnidi, uk jotmøn ja yja'aty jøpkyoots; ³⁶ ka' ti nniija'win pøni juuni ja yja'att, kuts meets ja jotmøn mmaagubaadiyit yam meets jap wyinaty mmaa'y. ³⁷ Midi mee ndukmadøøpy, niduki'iyi øts idø'øn ja jaa'y jade'en nnøjmi jøts tjøp'ejx'ettit.

14

Ku ja Jesús yikajpxy'aty jøts ja yikmatst

¹ Ja majtsk xøøw wyinaty kya'ity jøts ja paski xøøw tpaatt ku ja jaa'y tkaydi ja tsapkaaxy jadi'ini mididi ja levaduri tkamøøt'ajtp. Winet et idø'øn ja teetywindsøn møøt ja kajpxwejpitøjk t'ixa'adi ja taay ja winmaa'ñ sudso ja tjadyimy'ukmatstt ja Jesús awin'øøni'ampy, jøts ja tyik'ooktit. ² Xjats ja yide'en kø'øm ñawyajnidøø:

—Ka'ap ja jade'en y'ø'y'att ku ja nmajtsint xøjøjty, tsojk ja jaa'y jade'en xem jam pyidø'øktit jøts adøm ja sagasa xu'unindit.

Ku ja Jesús yiktगतajmji'iky ja pa'akxuu'kp

³ Jam ja Jesús wyinaty mā ja kajp txøøw'aty Betania, jam ja wyinaty tyøk'ayø'øy Simón wyindum, ja jaa'y pøn wyinaty axøø'kpm putsp; jam ja Jesús wyinaty twindsøøni ja mesi ku tø'øxyøjk tu'uk tmija'jty ja poop tsaa'du'jts mididi wyinaty tmøøt'ajtp ja aceite mididi janch pa'akxuu'kp, jøts mididi

janch tsowi to'jkip. Ja'ats ja tø'øxyøjk ojts tkupu'udu'uty, jøts ja Jesús kyubajk ja ojts ttanitajmiyi. ⁴ Winets ja jaa'y y'ambøjktøø pøn jam wyinaty winaagindi, yide'en ja ojts ñawya'añidi:

—¿Tigøjxp ku yø pa'akxuu'kpi jade'en nugo tø wyindigø? ⁵ Tø yø jeexyip ne'egi yiktøoky tigøøk magø'pxy denarios, jøts ayoobi jaa'y ja jeexyip ja meen yiktabadøki.

Jøts ja tjanchmyi'ambøjktøø ja tø'øxyøjk.

⁶ Winets Jesús ja ojts ñi'mxyidi:

—Majtsu'utti; ¿ti yø mdamigajpxtip? Øts yø jade'en tø x'ødyuñ. ⁷ Kumi ejtp meets ayoobi jaa'y xpaatt x'ext, jøts ødyundi meets ja' pøni juuni meets ja kø'øm xmay'atwa'añ; jøts kidi xjø'ejxti jøts øts meets ejtp xpaatt x'ext. ⁸ Tø øts idø'øn yø tø'øxyøjk jade'en xuñ pøni sã øts idø'øn yø xamidsøkyin; tø øts ja pa'akxuu'kpi yø xanitemy kumi x'ookjø'ejxni pøts idø'øn ja', paty idø'øn xyik'øø'yini xyikpaajtiñi kumi wingonip øts ja n'ol'jkin. ⁹ Janch meets idø'øn nnøjmi, ku øy madsoo yikajpxwa'kxt ja øgyajpxy ja ømyadya'aky ja naqxwiñ, nayide'en yø øy madsoo yiknimadya'akt ku øts yø tø'øxyøjk jade'en tø xmay'aty, yikja'myatsp yø øy juuni ku yiknimadya'akt.

Ku ja Judas ñay'awajniyi jøts ja tkøyakt ja Jesús

¹⁰ Winets ja Judas Iscariote chøø'ñ pøn ja Jesús pyabøjkpitøjk wyinaty møøt ñimakmajtsk'aty, jøts ja ojts tñinijky ja teetywindsøn, ja'ats ja møøt tka-jpxy'ajty jøts ku ja tkøyakt ja Jesús. ¹¹ Xjats ku ja jade'en tmadoodøø, winets ja jyanchxondaktøø, jøts ja Judas ja meen jatyi yiktami'awa'aniiyi'ñ. Ja'agøjxpts ja Judas t'ixaay ja taay ja winmaa'ñ juuni et ja t'ukøyakt ja wyindsøn.

Ku ja nwindsøn'ajtim yjaak'a'ux'ajtni møøt ja pyabøjkpitøjk

¹² Xjats ku ja xøøw tpaajty midi ja israelit jaa'y yjanch'amaay'ajttip, ku chapkaaky ja jadi'iñi tkaydi midi lewaduri tkamøøt'ajtp, ja'abi xøøw idø'øn wyinaty tø tpaaty jøts ku ja xøøw midukxøøw tyuñi, ja' ja tyejitip paski, ja'abi xøøw idø'øn ja tyukni'o'jkidip ja borreegi maxu'unlk, paty ja pabøjkpitøjk winet et tyiktøødøø ja Jesús jøts ja tñimaadyøø:

—¿Ma øøts ja paski a'ux nyik'awext jøts ni'amuki n'a'ux'ajtidit?

¹³ Xjats ja Jesús ja pyabøjkpitøjk namajtsk tkajxtsøø'ñ, yide'en ja t'ukniimaay:

—Nøjkxti jam møj kajpjotp, jamts inet jaa'y tu'uk x'ejxpaattit pøn jam wyinaty tsiy tyanigo'onip, ja'ats mbanøjkxtip, ¹⁴ jøts pøni ma ja yja'aty, japts ja kudøjk xnøjmidit: “Yide'en ja windsøn wya'añ: ¿Mak idø'øn ja tøjkjoojt, mak idø'øn ja pyabøjkpitøjk ja tmøøtka'aty tmøøt'uukt, mak idø'øn paski a'ux ja tka'adyit?” ¹⁵ Winets meets inet ja myiktuk'ext tu'uk ja tøjkjoojt jap nipat tøjkiixpy midi jap a'ejxi abaadi ejtnip; japts meets ja jii'kxy xyik'øyidit midi njøø'kxindip.

¹⁶ Xjats ja pyabøjkpitøjk namajtsk ñøjkxtøø jøts ja ojts yja'atti jam møj kajpjotp, jamts ja jade'en tjanchpaattøø sã Jesús ja wyinaty tø tyukmadøyidi, jøts ja jam tyik'øyidøø ja paski a'ux, winets ja wyimbejtøø ma choo'ndøø.

¹⁷ Xjats ku ja et kyoodsiyii'ñ, winets ja Jesús ja pyabøjkpitøjk nimakmajtsk jam tmøøtja'ity. ¹⁸ Jøts ku ja twinguwa'atsidøø ja kyaabyajt, kuts ja jam wyinaty kyaañidi, winets ja Jesús ja pyabøjkpitøjk tñimaay:

—Janch meets idø'øn nnøjmi jøts ku ja ixyam nidu'ugin nmøøtkay pøn øts inet amaa'tsk'ampy xkøyapk.

¹⁹ Xjats ja pyabøjkpitøjk yjanchjotmay'oo'kpøjktøø, jøts ja nidu'uk jatyi tyiktøødøø:

—¿Wan ja ndejint y'òtsi?

Nayide'en jadu'uk wyamøø:

—¿Øts ndejint jade'en adø'øtsþ?

²⁰ Winets ja Jesús y'adsøøþ jøts ja wyaañ:

—Tu'ugyi ja' pøn øts idø'øn jade'en xu'ump, jøts ka'ap ja yjagami, ixya adøm idø'øn ja nmøøt'a'ux'ajtindi, nidu'ugin meets jade'en xunwā'añ. ²¹ Jade'ents idø'øn yjatt ja naxwii'ñit ja'a'y myøjkudanaabyi sam ja Dios kyajpxy wya'añin; jøts iti ja ja'a'y yjanch'ayøøþ pøn øts jade'en xkøyakp amaa'tsk! Tø ja jeexyip ne'egi tyiy ku jeexyip kyidyimgye'exy.

²² Ku dø'øn ja jade'en ixam wyinaty kyaydi, winets ja Jesús tñixajiyii'ñ tu'uk ja tsapkaaky, jøts ja ttamøja'wiyii'ñ ja Dios Teety, xjats ku ja t'adujkpajky, winets ja tmøøþ ja pyabøjkpitøjk, yide'en ja wyaañ:

—Kaydi, ya'at øts idø'øn ñamyayi nne'kx'ajtpy.

²³ Xjats ja nayide'en t'adam'ujch tu'uk ja uujk'ii'ñ, jøts ku ttamøja'wiyii'ñ ja Dios Teety, winets ja ttuk'uk'abidsiimy ja pyabøjkpitøjk midi ja wyinaty tø t'adami jap uujk'ii'ñjøtpy, niduki'iyi ja t'uktamujktøø. ²⁴ Yide'en Jesús ja ojts ñii'mxyidi:

—Yø øts idø'øn ñamyayi nni'jpy'ajtpy midi widsu'ump widaxp øts nnikøjxp øts ngubajkp ku nyikpikta'akt jam kruskøjxp. Ja'ats may ja'a'y y'ajot'attip jøts ja ñitsø'ok'attit. Jade'en'ampy idø'øn ja Dios Teety tyik'adukwā'añ ja wyanda'aky sam idø'øn ja ttami'awa'anii'ñ ja nitso'ok'ajtin. ²⁵ Janch meets idø'øn nnøjmi, jøts ku ka'ap n'uk'ukniit yø vino, jaanim øts yø nøjx n'uuky jadigojk ku Dios kyutujk yja'att, ku kyutujk ja ttanitanit ja yja'a'y.

Ku ja Jesús kø'øm tñigajpxy jøts ku Pedro ja kyu'øøniyt

²⁶ Xjats ku ja t'øøgøjxtøø ja Dios kyajpxy, winets ja ñjøkxtøø jam kojpkøjxp midi txøøw'ajtp Olivos. ²⁷ Jøts ja Jesús pyabøjkpitøjk tñimaay:

—Niduki'iyi meets inet xatsø'ødyu'unt ixyamgoots; kumi yide'en Dios kya-jpxy wya'añ: “Yikøyakp ja borreegi ejxpi jøts ja y'oock, jøts ja borreegi jadi'iñi kyaakwā'kxnidit.” ²⁸ Jøts ku ø nbidsø'ømt jadigojk jap oo'kpi jutjøtpy, winets ø nnøjkxjawyenit jam Galilea, jamts mee xpaatt.

²⁹ Xjats ja Pedro tñimaay ja Jesús:

—Øy mets mbabøjkpitøjk niduki'iyi mjadatsø'ødyuñiyi, nijuuni me ngatsø'ødyuñ.

³⁰ Winets Jesús ja ñimaajyøø:

—Janch mets idø'øn nnøjmi jøts ku yamgoots inet mnø'ømt ku me ka'ap x'iixy'aty, ka'anim tsapni'aaw wyinaty myajtsk'aya'axy ku mets inet tigøøk ojk mwā'ant jade'en jøts ku me ka'ap xnijawi.

³¹ Xjats ja Pedro møk'ampy tyimwyindani ja Jesús, yide'en ja tñimaay:

—Nja'øøky me møøt, nijuuni øts jade'en ngawa'ant.

Tum jade'en ja yjadu'ukpi pabøjkpitøjk wyandøø sam ja Pedro wyaañ.

Ku ja Jesús t'ajot'ajty ja Dios Teety jam Getsemani

³² Xjats ja yja'ttøø mā ja et txøøw'aty Getsemani, jamts ja Jesús pyabøjkpitøjk tñimaay:

—Ya tsøøniidi, wan ø t'ats'ajot'aty ja Dios Teety.

³³ Winets ja t'ukwaaþ ja Pedro, ja Jacobo, jøts ja Juan, jøts ja ojts tmøøtnijky, xjats ja Jesús yjantymchø'jkii'ñ, ka'ap ja y'ukwinmaa'nbyatni, ja'agøjxp ku ja y'ayo'on wyingøñ. ³⁴ Jøts pyabøjkpitøjk ja tñimaay:

—Janch tyimyjotmay'oo'kp øts, øy øts yø yjawi jadi'iñi ngu'oogit. Awejxti ya ejxim mma'oo'knidi, wijy m'ettit.

³⁵ Xjats ja Jesús jawaani yjaaknajtsyø'øyi#ñ, japts ja ojts ñagyuxendya'agiya, jøts Dios Teety ja ojts t'amidø yøts ja jade'en kidi tyimy'ayo'ombaaty sa dø'øn ja wyinaty yjatwə'añ ja'abi xøøw. ³⁶ Yide'en ja wyaañ ku dø'øn ja ojts dios'ajot'aty:

—Mets Teety, øyik jade'en xjanchkayikjatt, jøts øts kidi jadine'en ayo'on ndyimbyaaty; øy idø'øn kyidyimyjade'eni sam ø ndyimyjatsøkyin, jade'en øts idø'øn ngupøkt pøni sa me xamidsøky.

³⁷ Ku ja jade'en wyaañ, xjats pyabøjkpitøjk ja tñimiiñ, maadip ja jap wyinaty ku ja ojts tpaaty; winets ja tñimaay ja Pedro:

—Simón, ¿tø me ma'oo'kni? ¿Niwine'en me waani tø mgawijy'ity?

³⁸ Wejti kajti jøts ja Dios x'ajot'attit, nay'ejx'etidi jøts kidi mmimajada'agidi ja ayo'on midì wingomp. Janch øts idø'øn nwa'añ ku ja winmaa'ñ janchja'ødyunwa'añ, ja ne'kxts jaayi ja ka'øyi tumbi amutsk'ejxiyip.

³⁹ Xjats ja ñøjkxkojmøø Dios Teety ajot'ajtpi, nayide'en ja ojts wyangojmi sa ja wyinaty jawyeen tø wya'añ. ⁴⁰ Winets ja myengojmøø ma pyabøjkpitøjk ja jam, maagojmidip ja wyinaty ku ja tpaajty, kumi janchmaa'y'oo'ktip ja'.

⁴¹ Jøts ku ja tigøøk ojk ojts t'ixy ja pyabøjkpitøjk, jaanims ja tñimaay:

—Tøts inet, maanidi poo'kxnidi. Wan jade'en tjaty, tø dø'øn tyimbyaaty jøts yikøyakt ja naxwii'ñit jaa'y myøjkudanaabyi. ⁴² Pidø'økti, niwejti, wan tjaa'myindi; ixa ja ixyam wyingøñ pøn øts inet xkøyapk.

Ku ja Jesús yikmajch

⁴³ Nay jamnim ja Jesús wyinaty jade'en wya'añ ku ja Judas yja'jty, pøn ja pyabøjkpitøjk wyinaty møøt ñimakmajtsk'atti, ja'ats ja mayjaa'y jam tmøøtja't tsujx møøt jøts kipkyapidi. Ja teetywindsøn idø'øn ja wyinaty tø kyexyidi, møøt ja kajpxwejpitøjk, jøts møøt ja møjaa'dyøjkti. ⁴⁴ Yide'en idø'øn ja Judas wyinaty tø wya'añ jøts ja tu'uk tpiкта'akt ja ejxa'anin midì ja y'ejxtip ku ja tkøyakt ja Jesús, yide'en ja wyinaty tø wya'añ:

—Pøni pøn øts inet ndsu'kxpy, ja' idø'øn ja wyinaty; ja'ats idø'øn mmatstip, jøts ja xyiknøjkxtit ta'tspiky'ampy.

⁴⁵ Xjats ku dø'øn ja jam jade'en yja'jty, winets ja twinguwa'jkiy#ñ ja Jesús, yide'en ja tñimaay:

—Øts, windsøn, memp.

Jøts ja ojts jade'en ttsu'kxy. ⁴⁶ Xjats ja Jesús yiknixajiy#ñ, jøts ja jade'en yikmajch.

⁴⁷ Jøts ja jaa'y pøn ja Jesús jam wyinaty myøøt'ajtpy, ja' tsujx tu'uk tñixajiy#ñ jøts ja ttaxikja'tstuuyt ja teetywindsøn tyumbi, ojts ja tyatsk ja tyikwinajki. ⁴⁸ Winets ja Jesús tñimaay ja jaa'y pøn ja wyinaty tø myachi.

—¿Ti mee x'ejxni ku xanimenidi ja kipy jøts ja tsujx? ¿Ti mee x'ejxni, maa'tspi, ku meets jade'en xmətswa'añ? ⁴⁹ Jabom jabom meets jam y'ijty nyik'ixpiky tsaptøjkjotp, ¿ti kuts meets jam xkamajch? Paty idø'øn ya'at ixyam jade'en yjaty kumi Dios kyajpxy jade'en wamp, ¿sudsø'ampy idø'øn ja kyatø'øt?

⁵⁰ Winets ja pyabøjkpitøjk tñajstuttøø nadyu'uk ja wyindsøn Jesús, jøts ja ojts jadi'iñi y'agakpajknidi.

Ja una'jk jaa'y pøn jadi'iñi kaktigøø

⁵¹ Jamts ja Jesús wyinaty pyayø'øyi tu'uk ja una'jk jaa'y pøn ja poop wet wyinaty tyukwop'ajtp, ja'ats ja yikmach; ⁵² winets ja wyet ja tñajstuuuyt, jøts ja jadi'iñi niwə'ats kyejky.

Ku ja Jesús yikwaanijky jam kutujktaajkjotp

⁵³ Xjats ja Jesús yiknajtswa'awiyi'ñ jam møj windsøn wyindum pøn ja teety wyindsøn'ajtip, jam idø'øn ja windsøndøjk ñamyujkøjxidøø møøt ja møjaa'dyøjkti. ⁵⁴ Jagam idø'øn ja Pedro tpayø'øy ja wyindsøn ku ja yiknajtswa'awiyi'ñ jam windsøn kyutujktaajk agø'øm, jade'en ja tpaaja'jty, jamts ja Pedro tmøøt'ixaajky ja tajk, ja' ja jam myøøtjo'kxpjiky ma ja jøøn jam wyinaty tø myøji.

⁵⁵ Jøts ja teetywindsøndøjk møøt tuki'iyi ja kutujk adsinaabyidi t'ixaadyøø tu'uk ja pøky, jade'en ja t'ixaadyøø ja pøky jøts ja tuku'ooigiwya'andi ja Jesús; xjats ja niti tkapattøø. ⁵⁶ Kumi øy ja tigati ttaniwambatti jøts ja jade'en xem yam kyanabyaadyidi ja y'ayuujk. ⁵⁷ Winaagin pyidø'økti møk'ampy jøts ja nugo tni'øonidi øy ja yjagajade'enøi, yide'en winaagin wyandøø:

⁵⁸ —Tø øøts yø nmadøy ku yø yide'en wya'añ: “Nyikida'ap øts yø tsaptøjki midi yø jaa'y tø tyik'øyidi, jøts øts kyidigøøk xøøw jadu'uk nyikwa'kukit midi ja jaa'y kyayik'øyip.”

⁵⁹ Jøts ni jade'embaat ja kø'øm kyanagyupikyidi ku ja øy sa yjawa'andi.

⁶⁰ Winets ja teetywindsøn tyanaagyukyiyi'ñ jam mayjaa'yjotp, jøts ja tyiktiy ja Jesús, yide'en ja tñimaay:

—¿Ka' idø'øn m'adsøy? ¿Ti dø'øn jade'en myiktani'øø'nip?

⁶¹ Xjats ja Jesús amøñi tyik'ity, jeky ja niwine'enin kyidyimy'adsøøy. Winets ja teetywindsøn ja ojts jadigojk tyiibyikyiyi, yide'en ja ojts ñi'mxyiyi:

—¿Mets idø'øn ja' pøn Dios Teety pyiktaajky jøts mets mwindsøn'att? ¿Mets idø'øn ja Dios Teety m'U'nk'ajtip?

⁶² Xjats ja Jesús y'adsøøy jøts ja wyaañ:

—Øts idø'øn ja'. Øts idø'øn ja naqxwii'ñit jaa'y nmøjkudanaabyi'ajtpy, jøts x'ejxtip meets ku n'ixa'akt aga'ñ'ampy ma Dios Teety, jøts ku nayide'en ø nme'ent yoots agujky jap tsajpjøtpy.

⁶³ Winets ja teetywindsøn ja wyet kø'øm ttakø'jtsiyi'ñ ku ja y'oj'abajtiyi'ñ, ja' idø'øn tyijpy ku tø ja jaabaat y'oj'amø'øty, xjats ja wyaañ:

—¿Ti ejxpi ti nija'wibi jaaktsojkiyip? ⁶⁴ Tøxi xmadowdi sa tø wya'añ ku ja Dios Teety yø tø twingajpxnaxy; ¿sa dø'øn xjawidi ku jade'en wya'añ?

Winets ja niduki'iyi ttanikajpxtøø ja o'jkin.

⁶⁵ Jøts winaagin jaty: tñidsujidøø, jaty: twinmajtstøø jøts ja ttsee'ktøø, yide'en ja wya'adø'øtsti ku ja jade'en ttundi:

—iNajtsjawi pøn tø mgøxy!

Jøts ja tajk ja twingoxti tjøpkoxti awa'an'ampy.

Ku ja Pedro tku'iñ jøts ku ja ka' t'ijxy'aty ja Jesús

⁶⁶ Jap ja Pedro wyinaty tøk'agi'py ku yja'jty tu'uk ja tø'øxyøjk pøn ja teetywindsøn tyumbi'ajtpy; ⁶⁷ ja'ats ja ojts y'ijxyiyi ku ja jap wyinaty jøn'ajpy yjo'kxpiky, tøyim ja wyinaty wyin'ejxniyi xjats ja yide'en ñimaajyøø:

—Nayide'en mets y'ijty xpawidity ja Jesús ja Nazaretit jaa'y, ¿kidi?

⁶⁸ Xjats ja Pedro ja ka'ap tñigajpxy, yide'en ja wya'añ:

—Ka'ap øts ja n'ijxy'aty pø pøn ja', jøts nguidyimñija'wip øts pø ti me mgajpxpy.

Xjats ja jade'en yøøpyidsiimy jam tajyjøp'am. Winets ja tsapni'aaw y'ayajxi'jky. ⁶⁹ Jøts ja tø'øxyøjk ojts twin'ixy jadigojk ja Pedro, xjats ja ttukmadoobinaxwa'jky ja jaa'y pøn jam wyinaty, yide'en ja wya'añ:

—Ya'at jaa'y tmøøtwidejtp yø Jesús.

⁷⁰ Winets ja Pedro ja ka'ap tkupijky jadigojk. Waani y'ijty, xjats Pedro ja jaa'y ñimaajyøø jadigojk pøn jam wyinaty:

—Mets inet mdyimyøøtwidijtpy yø Jesús; kumi Galile'it jaa'y mets, jøts jade'en me mgajpxy sa yø kyajpxti.

⁷¹ Winets ja Pedro kø'øm kyanay'ømyigajpxiyøø møk'ampy ja jaa'y yide'en:

—Tyimy'ijxpy ja Dios jøts ku nguidyimñijawï pøni pøn jaa'y meets jade'en mdijpy.

⁷² Xjats ja tsapni'aaw myajtsk'ayajxy. Winets ja Pedro tjä'myejch ja Jesús y'ayuujk sa ja wyinaty tø ñi'mxyi: “Ka'anim wyinaty ja tsapni'aaw myajtsk'aya'axy ku mets inet wyinaty tigøøk ojk tø mwani ku me xka'ijxy'aty.” Jøts ja tkuyajxyi'ñ ku ja jade'en tjä'myejch jøts ku ja wyinaty jade'en nichøky tø wya'añ.

15

Ku ja Jesús twinguwa'jkijy'ñ ja Pilato

¹ Xjats ku xyiijndyaaky, winets ja teetywindsøn ñamyujkidøø møøt ja møjaa'dyøjkti, møøt ja kajpxwejpitøjkti, tuki'iyi wine'en ja t'adsøøniidi ja kutujk jam tsaptøjktot. Jøts ja ojts tyiknøjktxi ja Jesús køwiiñ jam Pilato wyindum, jamts ja tkøyakti. ² Xjats ja Pilato tnimaay ja Jesús:

—¿Janch mets idø'øn windsøn'ajtp ya israelit jaa'y y'etjøøjty?

Winets ja Jesús y'adsøøy jøts ja wya'añ:

—Øts ja'.

³ Xjats ja teetywindsøn janch may ja øø'nin tpiktaktøø, yikxon ja Jesús yikni'øø'niyi'ñ. ⁴ Winets ja Pilato tyiktiiy jadigojk, yide'en ja tnimaay ja Jesús:

—¿Ka'ap idø'øn m'adsøy? ¡Ejx! Yikxon mjanchyikni'øøni. ¡Ejx! Ja pøky kawinakjøøjp myiktani'øøni.

⁵ Jøts kyidyimy'adsoop ja Jesús ku Pilato ja jade'en ñi'mxyi; jøts ñigyumaap idø'øn ja Pilato ja kø'øm tjawi ku ja jade'en kyidyimy'adsøy.

Ku ja nwindsøn'ajtim Jesús ñidujky'ñ jøts ja y'oock

⁶ Yide'en idø'øn ja Pilato wyinaty ja kostumbri tmøøt'aty ku ja paski xøøw tpaaty, winets ja tyik'awa'atspidsimy nidu'ugin ja tsumyjaa'y, pøni pøn ja mayjaa'y yik'awa'atspidsømwandip. ⁷ Jamts wyinaty tu'uk ja pøkyjaa'y tsumy pøn txøøw'ajtp Barrabás, ja' ja jap møøt chum'ity pøn ja wyinaty møøt tø yikjaa'y'øøky ku tsep ja wyinaty tø ttundi møøt ja kudunktøjk. ⁸ Xjats ja mayjaa'y jam jade'en myendøø, jøts ja t'amidoobinaxwa'aktøø ja Pilato jøts tsumyjaa'y ja tyik'awa'atspidsøømt nidu'ugin sa kyostumbri ja wyinaty tmøøt'aty. ⁹ Winets ja Pilato y'adsøøy jøts ja tnimaay:

—¿Sa mee m'ukwa'añ, wan yø israelit windsøn tyikmajtstu'uty?

¹⁰ Jade'en ja wya'añ kumi tø dø'øn ja wyinaty tjä'gyuki jøts ku ja teetywindsøn wyinaty nugo tø tkøyakti ja Jesús tanejkingøjxp. ¹¹ Xjats ja teetywindsøn tkajpxwejkøjxtøø ja mayjaa'y. Ojts ja t'agajpxidi, jøts ja wya'andit jøts wan ja Barrabás t'awa'atspidsimy jøts ka'ap ja Jesús. ¹² Xjats ja Pilato tyiktiiy ja mayjaa'y, yide'en ja tnimaay:

—¿Jøtsimts yø israelit windsøn, sa yø yiktu'unt?

¹³ Winets ja y'adsoodøø jøts ja wyandøø møkta'aky:

—¡Yikruspat!

¹⁴ Xjats ja Pilato tnimaay ja mayjaa'y:

—¿Ti tundigøø'yin yø tø ttuñ, ti yø kyubatp?

Winets ja tjäkytyimykjinajxtøø, møk'ampy ja yjaaktyimwyandøø:

—¡Yikruspat!

¹⁵ Jøts kumi yikjotkukiwyampy ja Pilato wyinaty ja mayjaa'y, xjats ja tyik'awa'atspidsiimy ja Barrabás; jøts ku ja t'uknankwyojpoø ja Jesús, winet ja ojts tkøyaky jøts ja kyiruspatt.

¹⁶ Xjats ja soldaditøjk tyiknøjkxtøø ja Jesús jap kutujktaajk'agui'py ma ja tejtj Pretorio, ma ja masyoldadi jap wyinaty chøøniidi, japts ja myisoldadi ja twaamukøxti. ¹⁷ Winets ja tsuu'nk wet ja ttuktatøjkidøø ja Jesús midj ja windsøndøjk nugo myiwindsøn'ajttip, jøts ja kujp awiity ttukoroni'atti. ¹⁸ Jøts ku ja jade'en t'uktundøø, winets ja wyambinaxwa'ktøø møk'ampy, yide'en ja tkajpxpoo'kxtøø:

—jMay xøøwim may jumøjtjtim mdsøønit mdanit mets israelit jaa'y wyindsøn!

¹⁹ Jøts ja kipy ja ttaxikwojpoø'ktøø, ojts ja tndisujidi jøts ja ñadyijyi twinguxanidi, ñadyijyi ja twindsø'øgidi. ²⁰ Xjats ku dø'øn ja jade'en t'uktaxektøø, winets ja tsuu'nk wet ja ojts tjajniidi jøts ja ttuktatøjkidøø ja wyet midj ja wyinaty wyet'ajtpy. Xjats ja jatyi twaabidsømdøø jøts ja kyiruspatt.

Ku ja nwindsøn'ajtim Jesús kyiruspejty

²¹ Xjats ku ja Cirenit jaa'y jam wyinaty ñaxy pøn txøøw'ajtp Simón, kyamjotp ja wyinaty chøøñ; ja'ats ojts yiktaguwanj jøts Jesús kyirus ja tpadsojmit, ja' idø'øn jade'en jajtp pøn ja Alejandro møøt ja Rufo tyeety'ajttip.

²² Xjats ja mayjaa'y tyiknøjkxtøø ja Jesús jam Gólgota, ma ja et jade'en txøøw'aty midj jade'en tyijpy ayuujk Oo'kpj Kyubajk Pajk. ²³ Jamts ja tmøødyøø ja vino midj wyinaty tø yik'adamuky møøt ja tsøøy midj yiktejp mirra, ja' ja ojts tmo'odi ja Jesús, jøts ja ka'ap tkupijky, ka'ap ja t'uujky. ²⁴ Winets ja tyikruspajttøø; jøts ja soldaditøjk tyikwa'kxtøø ja Jesús wyet, ojts ja tniguyatti, jøts pøni pøn majadaqk ja'ats ja wet twejtstøø.

²⁵ Jaan dø'øn ja xøøwu'nk wyinaty naxny pyety ku dø'øn ja jade'en tyikruspajttøø. ²⁶ Jøts letri ja jam tkøxjaadyi; yide'en ja tyikwa'andi: "Israelit jaa'y ya'at ja wyindsøn." Ja' dø'øn ja ojts ttagubatti kidi tii'jip. ²⁷ Namajtsk ja maa'tspi ja tyikruspajttøø nay jam møøt ja Jesús, tu'uk aga'ñ'ampy jøts tu'uk anajy'ampy. ²⁸ Janch jajt idø'øn ja jade'en sa jap nøkyijxpy wya'añ, ku yide'en wya'añ: "Møøt ja yiktamimacho'owiyi'ñ ja møj ka'øy jaa'y."

²⁹ Xjats ku dø'øn ja jaa'y jam ñaxti kruswemp, ka'ap ja tjanch'ømyigajpxti, wyibejptip ja kyubajk ja jam, jøts ja tnøjmidi:

—jJø! Metsxi xijy tsaptøjk myikidaapy, jøts mets ja xijy jatyi kyidigøøk xøøw xyiktanaagyukigyojmi, ³⁰ nanknitso'ok'atits me kø'øm jøts mwinakt jam kruskøjxp.

³¹ Jade'en ja jaa'y wya'andi, nayide'en ja teetywindsøn wyamidi møøt ja kajpxwejpitøjkti, yide'en ja kø'ømyi ñawya'añidi:

—May abiky jaa'y tø tyiknitso'ok'aty, jøts ka'ap kø'øm tjaty sudso ñanknitso'ok'atiyit. ³² Pøni ku net njanch'ejxint yø Israelit jaa'y wyindsøn wyinakt jam kruswemp, winet inet njanchja'win jøts ku yø yjanchja'aji ja Cristo.

Ja jaa'ybaat ja kya'ømyigajpxøø pøn ja jam wyinaty møøt tø yjakruspety.

Ku ja nwindsøn'ajtim Jesús yø'jky

³³ Xjats ku kyujkxøøw'ajty, winets kyoodsiyi'ñ ja naxwii'ñit, jaanim ojts yjajta'aky møj winakxyøøw. ³⁴ Jøts ja Jesús møk'ampy wya'añ:

—Eloi, Eloi, ¿lama sabactani? —midi tyijpy: Dios Teety, Dios Teety, ¿jadits ku ø tø xnanktyuñi?

³⁵ Winaagin ja jaa'y jade'en tmadoodøø pøn jam wyinaty jøts ja wyandøø:

—Madowdi, ja Elías yø wyaadsøøpy.

³⁶ Xjats tu'uk myiñ janch puɣtpim pøn tñaxajyï'ñ ja tanøxe'jts midi jade'en t'ejxp ejxim ja xa'akjoptsin, ja'ats ja ojts tyikxøøky jap vino ta'amjõtpy jøts ja tpiktaajky jam kipy jøp'am, winets ja jade'en tta'adejyï'ñ ja Jesús jøts ja ttukwimuukwa'añ, yide'en ja wya'añ:

—Majststu'utti; wan t'uk'ijxyim pøni janch'ukyikwinajkip inet idø'øn ja Elías jam kruskøjxp ku inet ja mye'ent.

³⁷ Winets ja Jesús møk'ampy yaajxy, jøtsnim ja y'ø'jky. ³⁸ Jøts nay jaty ja wet kujkwa'kxy y'akø'øtspajky midi ja tsaptøjk jam wyinaty y'awejtstuk'ajtpy, kubajk'ampy ja kyø'øtstøjkijyï'ñ jøts ja kyø'øtskidaajky ok'am'ampy. ³⁹ Jøts ku ja soldadi windsøn jade'en ojts t'ixy pøn ja Jesús jam wyinaty twindanaapy, winets ja wyaañ ku ja Jesús wyinaty jade'en møk'ampy tø ya'axy, jøts ku ja wyinaty tø y'øøky, yide'en ja wyaañ:

—Janch tiy tam idø'øn Dios tam ya'at y'ity y'U'nk.

⁴⁰ Jam ja tø'øxyøjk wyinaty tyanaamyidi pøn jam jagam a'ejxujktip; ja Salomé, jøts ja María Magdalena jam wyinaty møøt jadu'uk ja María midi ja Jacobo tyaak'ajttip møøt ja José. ⁴¹ Ja tø'øxyøjk idø'øn wyinaty tø tpawidetti ja Jesús, jøts ja' ja wyinaty tø t'ejx'etti ku ja Jesús jam Galilea wyidijty. Jøts jam ja tø'øxyøjk wyinaty y'a'ejxujkmidi pøn ja Jesús jam wyinaty tø pyanijkxyi Jerusalén, møøt ja jam wyinaty tø yja'atti.

Ku ja nwindson'ajtim Jesús ñe'kx yikpiktaajky jap oo'kpi tsaa jutjõtpy

⁴² Xjats ku chuu'wiyi'ñ ku ja poo'kxin xøøw wyinaty kyimjabom tpaatwani, ⁴³ winet ja José myiñ, ja Arimate'it jaa'y pøn wyinaty ja kutujk t'adsinaadyip. Ja'ats idø'øn tjøp'ejxp jøts ja tta'økwiya'añ ja Dios kyutujk midi ja yjaa'y ja tyantanaapy, jøts ja ojts amumjoojt myiñ ma dø'øn ja Pilato jam wyinaty, jøts ja t'amidooji ja Jesús ñe'kx ku ja wyinaty tø y'øøky. ⁴⁴ Xjats ja Pilato ñigyumaap yjajty ku dø'øn ja wyinaty tø y'oo'kni, winets ja tyaajxyi'ñ ja soldadi windsøn jøts ja tyiktiy pøni janch ku dø'øn ja wyinaty tø y'øøky. ⁴⁵ Xjats ku ja soldadi windsøn ja ojts tñigajpxy jøts ku ja janch jade'en, winets ja Pilato tkøyajky ja oo'kpi jøts José ja yikmøøy. ⁴⁶ Xjats ja tjuuy tu'uk ja poop wet midi øy midi majpxy, jøts ku ja tyikwinajky ja oo'kpi, ja'ats ja tya'amojts, jøts ja tpiktaajky jutjõtpy midi ja wyinaty tø tyikjuty jam tsaajotp. Jøts ku dø'øn ja jade'en tpiktaajky, winets ja møj tsaa ja tta'agiyy. ⁴⁷ Ojts idø'øn ja María Magadalena møøt jadu'uk ja María, pøn ja José tyaak'ajtpy, t'ejxtøø ma ja Jesús wyinaty tø yikpikta'aky.

16

Ku ja nwindson'ajtim Jesús yjukpyijky jadigojk

¹ Xjats ku ja poo'kxin xøøw ñajxy, winet ja María Magdalena t'atsjuudyøø ja pa'akxuu'kpi møøt Jacobo tyaak, møøt ja Salomé, jade'en ja ojts t'atsjuudyi jøts Jesús ja t'atspikta'akwajniidi ku ja wyinaty tø y'oo'kni. ² Xjats ja ojts ttaninøjkxti jøpyi ku ja samaan wyinaty tø y'abety, xøbidsimyu'nk ja yja'ttøø jam møj tsaa agujkp ma ja Jesús jam wyinaty tø yikpikta'aky. ³ Yide'en ja køøm ñawayjniidøø:

—¿Pøn inet ja tsaa tjanch'agiidyu'ut jøts ndøjki'int?

⁴ Xjats ku ja yja'ttøø, winets ja t'ejxtøø ku ja møj tsaa ka'ap ja jap wyinaty ukteeni jap jut'agui'py, tø ja wyinaty yikyø'øñi. ⁵ Jøts ku ja tyøjkidøø jap mutsk tøjkjõtpy, winets ja t'ejxpatøø tu'uk ja ankilis midi ja wyinaty pya'ajpy tsinaapy, jøts midi wyinaty nayide'en ja poop wet myøøt'ajtpy. Xjats ku ja

t'ejxpattøø waajtyøjk ja tijy, jøts ja ojts jantymchø'jkidi. ⁶ Jøts ja ankilis ja ojts ñii'mxyidi:

—Kidi mdsø'ogidi; nnija'wip øts ku meets ja Jesús ja ñe'kx x'ixaajiyidi. Tø ja jadigojk yjujkpyiky, øy xtyimy'ejxtit ma ja yikpiktaajky. ⁷ Nøjkx ja pyabøjkpitøjk xukmadojidi møøt ja Pedro, jøts ñøjkxtit jam Galilea; jamts meets ja x'ejxtit jadigojk, jamts meets ja xminabyaadiyt jade'en sa ja kø'øm mnimaajyidøø.

⁸ Xjats ja choo'ndøø jam møj tsaä agujkp ma Jesús ja wyinaty tø yikpikta'aky, jøts ja ñøjkxtøø. Jadi'iñi tsø'øgi ja yjantyyikmibejpnnyidi jøts nipøn ja sa tkanøjmidi, kumi jantymchø'jkidip ja wyinaty.

Ku ja Jesús ñanky'ejxøø jadigojk ma ja María Magdalena jam wyinaty

⁹ Ku ja Jesús domingi jøpy wyinaty tø pyidsimy jadigojk jap oo'kpi jutjøtpy, ja María Magdalena ja ojts jawyeen y'ijxyiyi, pøn ja wyinaty tø tyikpidsøjmi niwixujk ja miku'. ¹⁰ Ja'ats ojts ñijkxy jøts ja ojts t'atstukmadøø pøn jaty ja Jesús wyinaty tø tmøøtwidetti, pøn jam wyinaty jiidyip yaxtip, maadyip tajtip. ¹¹ Jøts ku ja jade'en tñimadoodøø ku ja Jesús yjujky'aty, ku ja tø'øxyøjk ja wyinaty tø t'ixy, ka'ap ja tjanchja'widøø.

Ku ja Jesús ñanky'ejxøø jadigojk ma wyinaty ja namajtsk pyabøjkpitøjk

¹² Xjats ku dø'øn ja jade'en y'uknajxy, winets ja Jesús ñanky'ejxkojmüyøø abiky tsoo ku wyinaty ja pyabøjkpitøjk namajtsk yø'ødyi jam tuu'am. Ka'ap idø'øn ja pyabøjkpitøjk y'ejxkapyidi kumi wenk idø'øn ja kyaxi'jky. ¹³ Jawaani y'ijty, winets ja t'ejxkajptøø winets ja jaty jam wyimbejtøø kyamjotp, jøts ja ñøjkxtøø Jerusaleñ ma ja myigu'uk ja t'atstukmadoowa'andi. Kuts ja jam yja'ttøø, winets ja myigu'uk ttukmadoodøø jøts ja nika' yjanchja'wiyi.

Ku ja Jesús ttaguwa'anüyü'ñ ja tunk ja pyabøjkpitøjk

¹⁴ Waani et xøøw ñajxy, xjats ja Jesús ñanky'ejxkojmüyøø ku pyabøjkpitøjk ja jam wyinaty nimaktu'uk twindsøøniidi ja kaabyajt; jamts ja møk'ampy twingugajpxiyü'ñ ja'agøjxp ku ja niti janchja'win tkamøø'atti ku ja jadine'en kyuuuniidi, kumi ka'ap ja wyinaty tø tjanchjawidi ku ja yiktukmadoodøø jøts ku ja Jesús wyinaty tø yik'ixy, ku ja wyinaty tø jadigojk yjujkpyiky. ¹⁵ Yide'en ja yiknimaadyøø:

—Niyø'øygyøxti naξwii'ñit, jøts ja øgyajpxy jøts ja ømyadya'aky xkajpxwa'kxtit ma jaty ja jaa'y yjujky'atti. ¹⁶ Pøni pøn øts xjanchja'wip jøts pøni pøn nøbajtp, ja' nøjkx nitso'ok'ajtp ja y'anmija'win; jøts pøni pøn øts xkajanchja'wip, ja' yiktagubatp ja pyøky. ¹⁷ Ja jaa'y pøn øts xjanchja'widip, yide'en idø'øn ttu'undit øts køjxp: Yikpidsø'ømdip ja' ja miku'; kyajpxtip ja wenk ayuujk ja'; ¹⁸ pøni ayo'ombattip ja', pøni tsu'utsidip ja' ja tsaä'ñ adsu'jky, jøts pøni y'uuktip ja veneni ja', ka'ap idø'øn ja sa yjattit; jøts nayide'en ku pamaa'y ja ja'ayi tkønixajtit, jaty ja tyiktso'oktit.

Ku ja Jesús chajpejty

¹⁹ Xjats ku ja pyabøjkpitøjk ja jade'en t'uknimaay, winets ja chajpejty, ojts Dios Teety ja tsajpjøtpy yikpatøkiyi, jøts ja tpuwa'jtsiyü'ñ aga'ngyø'ampy. ²⁰ Xjats ja pyabøjkpitøjk choo'ndøø, jøts ja ojts tkajpxwa'kxti ja øgyajpxy ja ømyadya'aky øy madsoo. Ja nwindson'ajtim Jesucristo ja kø'øm pudøjkyyidip, jøts nay ja Jesús ja tmøøy ja myøk'ajtin jøts ja ttu'undit jade'en midi nipøn jaa'y ya naξwiiñ kyajajtpy, paty ja mayjaa'y ja tjanchja'widi dø'øn ja pyabøjkpitøjk ja kyajpxy. Jade'en idø'øn ja y'ejxi.

JA ØGYAJPX̄Y JA ØMYADYA'AKY MIDI JA LUCAS YJAAY

Ja Teófilo ya'at yiktanija'ayi

¹⁻⁴ Migu'uk Teófilo, may ja jaa'y t̄o tjaadyanwa'andi tyimjade'en ja madya'aky sam øøts ja nmigu'uk t̄o t'ejxti p̄on ja Jesús kyudanaadyip. Nayide'en sam øøts ja t̄o nyiktuk'ejxyin, sam øøts ja t̄o n'ixpikyin, jade'ents ja tjaja'wa'andi p̄on jaty t'ejxt̄o t̄nija'wid̄o sa jaty cho'ondaajky. Ja'ats t̄o pyud̄okiyidi j̄ōts ja øgyajpxy ømyadya'aky ja tkajpxwa'kxtit. Nay t̄ōts øts ja nbe-muky ngonmuky ti jaty tuujn̄ōo ku ya'at øgyajpxy ømyadya'aky cho'ondaajky. Ixyamts mets ja jade'en ndyimdyanijayi, j̄ōts wa'ats xnijawit ja tiy'ajtin, sa jaty t̄o myikn̄ojimi ku ja t̄o myiktukmad̄ōy ȳo'obi ixp̄ojkin.

Ku ja ankilis t̄nigajpxy j̄ōts ku ja Juan Bautista kyax̄ø'økwa'q̄ñ

⁵ Ixyam id̄ø'n cho'onda'aky ja madya'aky. Ku d̄ø'n ja Herodes wyinaty rey'aty jam Judea, jamts ja teety wyinaty tu'uk ch̄ōni p̄on tx̄ōw'ajtp Zacarías, ja' y'ijty m̄ōot tyuñ tukpiky ja teetȳojkti p̄on yiktejp Abías. Elisabet ja ñid̄øxy xȳōw, teety Aarón ja tyety'ap'ajtmip. ⁶ Janch øy jaa'y id̄ø'n ja amajtskti, pyaduujnidip id̄ø'n Dios kyutujk ja' p̄oni ti ja yikta'ana'amdip. Jade'ents ja ka'ap p̄on sa ñii'mxyidi, jade'en ja ka'ap p̄on pȳoky'ijxyidi. ⁷ Ka'ats ja y'u'nk ja teedi, ni ja Elisabet ka'ap ja y'u'nkpaaty, tyimyajaa'ñidi ja namajtsk wyinaty.

⁸ Xjats tuk'ojk ja Zacarías yj̄aa'y tyaja'jt̄id̄ō j̄ōts ja ttuujnidit ja winds̄'jkin ja Dios. ⁹ Jade'en id̄ø'n ja tkostumbri'atti ku ja teetȳojk ja jade'en tyaja'adyidi, winets ja t̄niw̄ojti p̄on jap ukt̄okip jap mā ja Dios yikwinds̄øgi, mā poom tȳōy. Xjats Zacarías ja ojts tyimdyaja'adyi, ja' ja poom ojts tyikt̄ōy. ¹⁰ Exam ja poom wyinaty jade'en tȳōy, j̄ōts niduki'yiyi ja mayj̄aa'y ixap yjan-chap̄kajpxm̄idi jap tsapt̄ojkwimpy. ¹¹ Winets ja Zacarías t'ejxpaajty tu'uk ja Dios y'ankilis j̄ōts ku ja jap aga'ñ'ampy tyani mā ja poom yikpikta'aky. ¹² Ku Zacarías ja ojts jade'en t'ejxpaaty, ni sudso'ampy ja kya'ukwinmaa'nbyatni, ts̄øgi ja janchyik'o'jkn̄iyip. ¹³ Xjats ja ankilis ja ñimaajȳōo:

—Zacarías, kidi mds̄øgi, t̄o Dios mgajpxaajkin mmado'oxiyi j̄ōts pyaatp mnid̄øxy Elisabet tu'uk ja mutsku'nk. Mbaattip m'u'nk tu'uk, Juan ja mdukx̄ōw'attip. ¹⁴ Mdxonda'akp ja' mdajotkujk'atp ja', j̄ōts may ja jaa'y ja nayide'en ttajotkujk'attit ku ja kyax̄ø'økt. ¹⁵ Ja'ats m̄ok n̄ojkx ja kunuu'kxin tm̄ōot'aty jam Dios wyingujkp. Niwine'enin ja n̄ōo ja tkatunk'att, ka'ap ja y'amu'ukyjaa'y'att. Jaayip ja Espíritu Santo tyuktat̄ojkn̄iyi ja wyinmaa'ñ yam ja ka'an̄im myiñ naxwiñ. ¹⁶ Ja'ats ja Israelit j̄aa'y tyukj̄a'myatsp tyukj̄a'byaatp ja Dios Teety jad̄ogok. ¹⁷ Jawyeen ja Juan mye'ent, jaan̄imts ja n̄winds̄on'ajtm̄ mye'ent. Nayide'en winmaa'ñ nayide'en kutujk ja tm̄ime'ent sam ja Dios kyugajpxy, ja Elias'ajtpi. Jade'ents ja u'nkteety u'nktaak ja tyikjotimbett, j̄ōts ka' ti tsep n̄iti aki m̄ōot ch̄ōon̄idit y'u'nkti y'una'jkti, j̄ōts ñayikmado'op ja' p̄on kidyimyadoodip. Jade'ents ja tyikt̄ōj̄it tyiktuudaajkit ja jaa'y wyinmaa'ñ j̄ōts ja tj̄ōp'ejxtit ja n̄winds̄on'ajtm̄.

¹⁸ Jade'en ja Zacarías yikn̄imaay, xjats ja ankilis ja t'amid̄ōy:

—¿Sudso'ampy øts ya'at ndajotkujk'att j̄ōts ku ȳō tiy janch, p̄ō tum m̄ojaa'ñits øøts amajtsk?

¹⁹ Xjats ankilis ja y'adsoj̄ōo:

—Gabriel'ajtp øts, jøts Dios ø nmidumpy; ja' øts idø'on tø xkexy jøts mets ya'at aaw ayuujk ndukmado'ot. ²⁰ Jabi ka'apxi jatyi tø xmibiky sa me tø nnøjmi, tants inet uum, jaanim me mgajpxt ku ja m'u'nk kya'axt. Jatp kubatp idø'on ya'at jade'en sa ø tø nwa'añ.

²¹ Exap idø'on mayjaay' t'awejxti ja Zacarias, maadyip tajtip ja jap ku ja jadine'en tya'nini jeky jap tsaptøjkjøtpy. ²² Xjats ku ja pyidsiimy, ka'ap y'aaw y'ayuujk ja t'ukyajkni, jøts ja tyimyjatyi tja'gyukidøø kudamik ja wyinaty tø y'ejxjøøxy y'ejxma'aty jap tsaptøjkjøtpy. Nugo ja ja'ayi tnidoni, tøyi ja wyinaty y'uu'mni.

²³ Kuts xyøøw ja ojts tyika'pxy winaak xøøw ja wyinaty tø yiktaguwani t'adsønit ja tsaptøjk, winets ja ñøjkxni tyigam. ²⁴ Jøts ja ñidø'øxy Elisabet ja nay jatyi yjøtpy'ajtni ku ja et ja xøøw jade'en y'uknajxy, magoxk po' ja y'ijty jap tyøkjøtpy jadine'en ja kya'ukpidsømni. Yide'en ja wyinmay jøts ja wya'añ: ²⁵ "Ja'agøjxp Dios tø ttuñ ja may'ajt jøts øts ja jaay' y xka'ukmi'ajknityit."

Ku ja ankilis tngajpxy jøts ku ja Jesús kyaxø'økwa'añ

²⁶ Xjats ja Dios kidudujk po' tkejxy ja y'ankilis Gabriel jam Galileit naxjotp ma ja kajp txøøw'aty Nazaret, ²⁷ jøts ja t'ats'ext ja tø'øxyøjk pøn txøøw'ajtp Maria, øy yikxon ja yjaa'y'aty. Niwa'añ ja wyinaty y'ejtni jøts ja tmøø'amajtskit tu'uk ja yaa'dyøjk midi txøøw'ajtp José, ja rey David y'aptatsk. ²⁸ Xjats idø'on ankilis ja jam tniðøjkjy'iñ ma ja jam wyinaty chøøni jøts ja tnimaay:

—iDios køjxp ngajpxpøø'kxy, tø ja mmay'atyiyi! Ixa mets ja nwindson'ajtim møøt m'ejtni; tø ja Dios njantymgyunuu'kxyi ku nadyu'uk tø myik'a'ejxi wine'enin mdø'øxyøjk'atti naxwiñ.

²⁹ Kuts ja twin'ejxpejty ja ankilis jøts ku ja jade'en myigajpxyi, ñigyumaap ja tyimya'wyiyi'ñ, jade'en ja køø'm ñawynmaa'nxyiyi ti ja jade'en ttakajpxpoo'kxyip. ³⁰ Jøts ja ankilis ñimaajyøø:

—Maria, kidi mdsø'øgi, tø Dios m'øy'ijxyiyi, mjanchtajotkujk'ajtip ja'.

³¹ Mjøtpyip mets, mbaatp tu'uk mmajnkun'k, JESÚS ja mdukkxøøw'atp. ³² Møk winmaa'ñ møk kutujk ja myøøt'atp; Dios U'nk ja yiktejt, yikutujkpi Dios Teety ja pyikta'agiyit sam ja y'apteety'amøj David, ³³ jøts ja wyindsøn'att jam Israelit y'etjotp xemikøjxp; niwindem ja kyutujk ja kyakøxt kyanaxt.

³⁴ Xjats ja Maria tyiktiiyi ja ankilis:

—¿Ti sudso dø'on ja ndejin jade'en yjatt? Pø ka'anims øts nniyaa'y nbaaty.

³⁵ Winets ja ankilis y'adsøøxy jøts ja wyaañ:

—Ja Espiritu Santo mnimeniyip, jøts ja Dios Teety tsajpjøtpyit ja' myøk'ajtin jade'en mduniyip. Jøts paty ja niwine'enin tkayikpøkyu'unt, wa'ats ja y'ett midi idø'on myika'axp. Tø ja jade'en ttanibiktaagi jøts ja Dios U'nk yiktejt. ³⁶ Ñayi pyaätp ja mmigu'uk Elisabet myajnkun'k tu'uk, øy idø'on ja yjamøjaa'yini. Ixam ja tudujk po' kujk ttsøm'ityi ja y'u'nk yam ja ka' tyim'yukyikjøp'ijxy jøts y'u'nk ja tpaatt. ³⁷ Ka' Dios ti kyamayiyi.

³⁸ Xjats ja Maria wyaañ:

—Ane'emy øts ja Dios xyik'ity; wan øts ja jade'en xuñ sam ja tø wya'añin.

Winets ja ankilis jatyi choo'naa.

Ku ja María ñijkxy jøts t'ats'ijxy ja Elisabet jam tyøjkwindum

³⁹ Jøts ja María nayi winet et anøø adsu'jky ojts ñijkxy jam kojpkjotp ma ja kajp wyinaty tu'uk jam Judeit ñaxjotp, ⁴⁰ jøts ja ojts tyøki Zacarias tyøjkjotp, jamts ja ojts tkajpxpøø'kxy ja Elisabet. ⁴¹ Kuts Elisabet ja jade'en tmadøø

ku María ja jade'en kyajpxpøø'kxyi, jatyi ja tyimyja'wiyii'ñ yjotp ku ja mutsk y'adiijch, winets ja Espíritu Santo ja amuum tyatøjkiyøø. ⁴² Jøts ja yide'en møk yjantyimwyaañ:

—Tø Dios mjantyimgyunuu'kxyi ku tø myik'a'ejxi wine'enin ndøøxyøjk'ajtindi naxwiiñ, jøts yø m'u'nk nayide'en tø yikunuu'kxyi. ⁴³ ¡Tyimdyi øts tymbyøn øts ku øts nwindson'ajtim tyaagu'nk xkugajpxi! ⁴⁴ Ja'ayi ja mgajpxpoo'kxin tø ndyimyadøy, jatyi øts n'u'nk ja xonda'agyti tø yjantyimyk'adi'ichiyi. ⁴⁵ Nekim xøñim mets ku ja tø xjanchjawwi xkunuu'kxyjawi, jatp kubatp idøø'n yø jade'en sa yø Dios tø tyikutuky.

⁴⁶ Xjats ja María wyaañ:

Øy tsuj ngunuu'kxyjawi ja nwindson'ajtim,

⁴⁷ myinijkxpy øts n'aaw njoojt ja nDios Teety Yiknitsokpi.

⁴⁸ Tønim ja Dios tnijawwi jøts tø t'ejximbity ja y'u'nk ja myaay, yamnim øts inet ejtp ejtni xoni nyiktejt wine'enin ja naxwii'ñit jaa'y yja'atti ya naxwiiñ.

⁴⁹ Janch møj ja Dios myøk'ajtin ku øts ja jade'en tø xuñ;

pø wyandijpys idøø'n yjanchwa'adsí yjanchkapøkmyøødi.

⁵⁰ Ejtp ja tpa'ayo'ot pøn jaty ja windsø'jkiiyip.

⁵¹ Tø tyikwingaxi'iky ja myøk'ajtin ku ja tø tmimajadaajki ja namyikaxi jaa'dyí wyinmaa'ñ.

⁵² Tø tyik'amutski pøn jaty kamaabyim yikutujktip,

jøts ja tø tyikjot'amøpkiky ja ayoo'bidi pøn jaty aay pista'ak yik'ejxtip.

⁵³ Pøn jaty ayoodip winmaadyip, tøts ja tmø'øy ja jotkujk'ajtin,

jøts ja kumeeñ jaa'y jadi'iñi wa'ats wíwøpy tø yikpagajxnidi.

⁵⁴ Tø ja tpudøki ja Israelit kajp ejxim ja y'u'nk t'ejkxkapyin;

ka'ap ja tjá'dyigøy paty ja tø t'ayo'ixy,

⁵⁵ sam ja ojts yiktukmadowdin ja n'oktaakti ja n'apteetyi, møøt ja Abraham, ku ja y'u'nk y'una'jk jade'en kyakøxt kyanaxt.

⁵⁶ Xjats ja María jam tmøøtaa'niiyii'ñ tigøøk po' ja Elisabet; ku jade'en ñajxy, jaanimts ja ñøjkxnåa tyøjkwindum.

Ku ja Juan Bautista kyaxi'iky

⁵⁷ Xjats ja xøøw ja po' tpaajty juuni et ja Elisabet kya'axt. Jade'ents idøø'n yikaxi'iky tu'uk ja myajnk'u'nk. ⁵⁸ Jaty ja myigu'uktøjkti myigujøøndi myigudøjkti ñimejnidi. Janch yikajxakp ja' ku ja tnija'widøø jøts ku ja Dios wyinaty ja kunuu'kxin møj tø myø'øyyi. ⁵⁹ Jøts ja kiduktujk xøøw tyiknøjkxtøø ja maxu'nk jøts ja ejxa'an yikmo'ot ñe'kxkøjxp, jamts ja tpikta'akwajxnidi ja xyøøw sam ja tyeety xyøøw'atyin Zacarías. ⁶⁰ Jøts ja tyaak, ka'ap ja tkupiky, yide'en ja wyaañ:

—Ka', ka'ap yø jade'en txøøw'att. Juan yø xyøøw'atp.

⁶¹ Xjats ja yiknimaay:

—¿Tiku yø jade'en yiktejt? Pø ka'ats ja mmigu'uktøjk jade'en pøn txøøw'aty.

⁶² Winets ja tyiktøødøø ja u'nkteety ti tyukxøøw'atp ja y'u'nk, nugo ja ttanidonidi. ⁶³ Jøts ja ojts t'amidøy tu'uk pedasi ja puu'yu'nk ma ja tkøxjajyit ja xyøøw, xjats tpiktaajky: “Juan yø xyøøw.” Jøts ja jaa'y ñigyumaap yjanchjajttøø ku ja t'ejxtøø jade'en. ⁶⁴ Jøts ja Zacarías nay jatyi ojts y'awijy jadigojk, jatyi Dios ja tkajpxpøø'kxyi, møk ja ttukmøjawi. ⁶⁵ Ja'agøjxp ja ñigyumaap tja'widøø ja tøk'ayø'obyidi, jatyi ja ojts tkajpxyø'øgyoiti sa wyinaty tø jyaty kyubety, jøts ja yiknija'wiyii'ñ wine'enin ja Judeit jaa'y jam chøøndi y'etjotp. ⁶⁶ Pøn jaty ja jade'en tñimadoodip, nugo ja tkumayidi tkudajidi jøts ja xem yam ñayiktiyidi ñay'amidøyyidi:

—¿Ti yø tyu'ump, ti yø pyaatp yø mutsku'nk ku yø yaakt?
 Jabi janchmøøjyipts ja Dios kyunuu'kxin yø'.

Ku ja Zacarías ja Dios yikajpxøø

⁶⁷ Xjats ja Zacarías ja Dios tyukajpxøø ja ayuujk ku ja wyinaty tø tyatøkiyi ja Espíritu Santo, jøts ja wyaañ:

⁶⁸ Janch møj ja Dios ja kyunuu'kxin tmøø'y ja Israelit kajp, ku tø tnimiñ tnija'aty ja y'u'nk y'una'jk wine'enin adøm ja xja'ajtindi, tøts nitsoojkin ja xukpaajtyim.

⁶⁹ Tø ja tu'uk tkexy ja yikutujkpi pøn xuknitso'ok'ajtindip ja nbøky, nay ja David y'ap y'ok pøn y'ijty ja Dios tmidump.

⁷⁰ Jade'en sa ja Dios Teety jawyeenip ojts ttuknigajpxy ja kyugajpxy,

⁷¹ jøts ku ja xaniguwandujtin ja nmidsep ja nmi'ajkiði jøts niduki'i'yi pøn x'ø'y'ejxim xka'ø'y'ejxim,

⁷² jøts ku ja ndeety'ap yik'ayo'ejxtit ku ja ka'ap tja'dyigøy ja y'ayuujk.

⁷³ Ku ja wyinaty tø twandā'aky, jade'en ja ndeety'amøj Abraham yik-tamiwandaagi

⁷⁴ jøts ku ja xukmimadaajkin ja nmidsep, jøts ja jotkujk nmidu'unin, nisudso ngatsø'jka'ant,

⁷⁵ øy tsuj tiy janch ndsinaa'yindit, jade'en ja nwindso'jka'andit ejtp.

⁷⁶ Jøts mets u'nk, mets ja Dios tsajpjøtpyit mgugajpxy'atiyip,

kumi mets ja jaa'y wyinmaa'n ja myiktøøjip myiktuudaajkip jøts ja nwindson'ajtim yikjøp'ext,

⁷⁷ jade'ents ja jaa'y tnijawidit jøts ku ja mye'ent yiknitsokpi jøts ku ja pyo-jkpimaa'kxt.

⁷⁸ Jadine'en ja Dios xtsøjkyim xpa'ayø'øyindi jøts ja xanikejxyim ja y'u'nk ja yiknitsokpi,

⁷⁹ ja'ats xyikwejim xyikajim, kujaj kudøø'kx xyiktsinaa'yindit. Ja' xukmajt-stujtimp ja nga'ødyu'unin ja ngugoots'ajtin,

jøts ja xuk'ejxint xuknija'wa'ant ja tsinaa'yin midi øy midi tsuj, jotkujk'atyim Dios wyingujkp.

⁸⁰ Jade'ents ja mutsku'nk ye'jky, møk møjaaaw, wijy quejy, jøts øy tsuj ja winmaa'n tjagyepy. Jøts ja y'atsinaay jawyeen jam abak etjotp mā niti kya'ity, winetnimts ja ñanky'ejxi mā ja Israelit jaa'y jamdi.

2

Ku ja Jesús kyaxi'iky

¹ Xjats ja møj windsøn Augusto winet et ojts tni'ane'emy møk'ampy jøts ja naxwii'ñit jaa'y niduki'i'yi yikjaamyuktit. ² Ja Cirenio jam wyinaty Siria kudunk'ajtp ku dø'øn ja jade'en miduk'ojk tjaamyuk'okwandøø ja jaa'xyøøw jøts ja jumøjt. ³ Xjats ja jaa'y jade'en ñøjkxti kyø'ømgajpkøjxpti, jøts ja xyøøw jøts ja yjumøjt tkøyaktit jam. ⁴ Jade'en'ampyts ja José jam Galilea chøø'n mā ja kajp txøøwi Nazaret, jøts ja ñøjkxtøø Belén jam Judeit y'etjotp mā ja David wyinaty tø kyaxi'iky, kumi ja' ja José tyeety'ap'ajtpy. ⁵ Patyts ja jam tmøøtnijky ja María jøts ja tkøyaktit ja xyøøw ja yjumøjt, tøts wyinaty ja kajpxy ttunidi jøts y'amajtskidit. Jøtpynim ja wyinaty. ⁶ Winets ja y'u'nk ja nay jam pyaajtøø, jam ja ojts pyo'ga'pxy. ⁷ Jøts ja tpaajty ja yjagyooobu'nk, ojts t'abity jøts ja ojts tkø'øky jam jiyujkøø'kx'ii'ñjotp. Ka'ap ja ja'taajk jam wyinaty tø ñibaadi, patyts ja jami tyandøø.

Ku ja borreek'ejxpi ja ankilis pyaadyidi

⁸ Jamts wyinaty jiyujk'ejxpidi tsign'ejxpidi wingon ma ja kajp txoowi Belén, ja'ats t'ejx'ejtipp tsunaxy'ampy ja byorreegidi. ⁹ Xjats ja jam jotmøn t'ejxpattøø ja Dios y'ankilis. Jade'enñi ja jam tyimyikjajtaajky ma ja wyinaty, jøts ja yjantyimchø'jkidøø. ¹⁰ Nimaajyidibik ja ankilis inet ja'adi:

—Kidi mdsø'ogidi, øgyajpxy øy'ayuujk ø nmimimpy. Ja' mee ndukmadoowampy, ni'ijtyi ja jaa'y ja tjantyajotkujk'attit: ¹¹ tø ixyam kye'exy ja CRISTO, ja nwindson'ajtim, ja yiknitsokpi ma ja David jam kyugajp'ajty, ja' kyajpkøjxp. ¹² Ja' idø'on ja wyinaty ku inet xpaattit tu'uk ja maxu'nk mots'abidity kyø'øgyi jam jiyujkøø'kx'ii'ñjotp.

¹³ Jaaktyimgyaxø'ktip inet ja may ankilis jam ma ja tyu'ukpi wyinaty, jøts ja Dios ja møk ttukmøjawidi ttukunuu'kxyjawidi, yide'en ja wya'andi:

¹⁴ iKunuu'kxy mets Dios Teety tsajpjotpit ku øy'ajtin tsuj'ajtin tyaky ya naxwiin naxkijxy, jøts ja jaa'y yikmo'odi pøn tmijotkujk'atwandip ja Dios!

¹⁵ Xjats ku ja ankilis wyimbejtnidøø ku ja ñøjknidøø jap tsajpjøtpy, winets ja jiyujk'ejxpidi nixem niyam ñawyambinaxwa'jkidøø:

—Wants idø'on tja'myindi Belén, jamts ja t'ats'ijxyindi mididi Dios tø xuknija'windi.

¹⁶ Xjats idø'on putyi ñøjxktøø, jøts ja María jam ojts tjanchpaatti møøt ja José, janch jamdamik ja mutsku'nk tø yikø'øky jiyujkøø'kx'ii'ñjotp. ¹⁷ Kuts ja jade'en t'ejxtøø, winets ja tnmadyaktøjkidøø sa ja ankilis ja wyinaty tø tyamimadya'agyidi ja maxu'nk, ¹⁸ jøts ja ñigyumaap yjanchajttøø pøn jaty jam wyinaty. ¹⁹ Jøts ja María ja'amech ja tyik'ity sa ja wyinaty tø yiknøjmi, ja' ja wyinmaa'ñ'ajtnip. ²⁰ Xjats ja jiyujk'ejxpi yimbejtnidøø. Møk ja Dios ja ttukmøjawidi ttukunuu'kxyjawidi ja'agøjxp ku ja wyinaty jade'en tø t'ejxti tnijawidi jøts ku ja jade'en tø yjantyimjaty.

Ku ja maxu'nk Jesús y'atsyiktuk'ijxy ja Dios Teety tsaptøjkjotp

²¹ Kiduktujk xøøw ja mutsk ojts yikpiktaajki ja ejxa'an ñe'kxkøjxp jøts ja yikxøømøøy JESÚS. Nay ja' ttukxøøw'ajty mididi ja María ja ankilis wyinaty tø tyukmadøyi ku ja wyinaty ka'anim tjøtpy'aty.

²² Xjats ku ja tiempi tpaajty wine'en ja wyinaty tø t'a'ejxidi wya'atsti sam ja Moisés kyutujk wya'añin, winetnimts ja maxu'nk ja jam Jerusalén ttaninøjxktøø ja Dios. ²³ Jade'en'ampy idø'on ja jade'en ttundøø kumi yide'en ja Dios kyutujk yja'ayi: "Tum Dios ja mixyuna'jk yiktamiyoxtip pøn jagy-oobi'ajtp." ²⁴ Xjats idø'on ja jade'en t'atswindsø'jkidøø sam ja Dios Teety tø tyikutukyin: namajtsk naxpak, pøni ka'ats ja te winets ja tsapak nayide'en namajtsk yiktawindsø'øgit.

²⁵ Jamts wyinaty ja jaa'y tu'uk chøøni Jerusalén pøn txøøw'ajtp Simeón. Janch øy jaa'y idø'on ja'. Yjanchja'myejchp idø'on Dios ja'. Ja'ats idø'on tjøp'ejx'ejtp ja Israelit kajp juunim idø'on ja yjadyimy'uknitso'ok'att. Jam ja Espíritu Santo ja wyinaty tmøødi, ²⁶ jøts tø ja wyinaty twanda'aky jøts kunim ja jawyeen t'uk'ext ja Cristo pøn ja Dios Teety kyaxp, winetnimts ja y'oookt. ²⁷ Xjats ja winet ñijkxy tsaptøjkjotp, ja Espíritu Santo ja yiknøjxkpi; kuts ja maxu'nk Jesús jam wyinaty ja tyeety tyaak tø yikniikxyi jøts ja jade'en tpadundi ja kutujk, ²⁸ jøts Simeón ja jam tñaxajyii'ñ kyø'køjxp jøts ja tsa'a'ñ'ijty, jøts Dios ja ojts ttukmøjawidi ttukunuu'kxyjawidi, yide'en ja wya'añ:

²⁹ Dios Teety, tøts inet, wan øts inet jotkujk t'oo'kni.

Tø xpaduñ ja m'ayuujk sa ø xnimaay.

³⁰ Tønīm ø nwemp'ixy ja yiknitsokpi

³¹ midi tø xanibiktaagi ja naɣwii'ñit jaa'y.

³² Yø' idø'on tu'ump ja may'ajtin jøts ja jaa'y mja'myatstit mja'byaadit pøn ka' y'Israelitjaa'yidi.

Yø'øgøjxp idø'on yik'ejxkaptit ja Israelit kajp midi tø xwi'ixy.

³³ Xjats ja José janchñigyumaap yjajtøø møøt ja ñidø'øxy ku Simeón ja mutsk jade'en tñigajpxy. ³⁴ Winets Simeón ja kyunuu'lxmyigajpxidøø. Yika-jxaktip ja' jøts ja María yiknimaay, ja Jesús tyaak:

—Ejx madow, ja' yø mixyu'nk tø yiktanibiktaagi jøts Dios Teety y'ø'y'ajtin ttukpaajtit may ja Israelit jaa'y. Nay mayts ja tkapaattit ku jaa'y yø may kyagupøkit. ³⁵ Jade'ents idø'on ja yiknijawit sa pønjabøn wyinmay y'am yjotp. Mdyimchaachkuwinmayip mets ja øy, tyimchaachjawip mets m'anmija'win ja'.

³⁶ Jamts wyinaty tu'uk Dios kyugajpxymi, Ana ja tø'øxyøjk xyøøw, ja Fanuel ñøøx, ja Aser ja y'aaðsidip kyugojidip. Møjaa'tyigøynits idø'on ja'. Tyimy'una'jkyi ja y'amajtskiyii'ñ jøts ja ja'ayi wixujk jumøjtyi tømøøtsinaay ja ñiyaa'y. ³⁷ Makta'pxy myaktaxk jumøjts ja wyinaty, jøts ejtpts idø'on ja jap tsaptøjkjotpy tñiduñ ja Dios xinaxy tsunaxy, y'amaay'ajtpy idø'on ja', ka'ap ja tkugayi tku'uugi, ejtp Dios ja t'ajot'aty. ³⁸ Ja Ana dø'on jap ojts myiñ winet, jøts ku Dios ja ojts ja t'uktukmøjawi t'uktukunuu'kxyjawi, winets ja tñigajpxøjkijyii'ñ ja mixy Jesús. Ja' ja tyukmadøøpy pøn jaty wyinaty tjøp'ejxtip jøts ku ja Jerusaleñgit jaa'y ñitso'ok'attit.

Ku ja wyimbettøø yja'ttøø jadigojk Nazaret

³⁹ Xjats ja wyimbejtñidøø ñøjknidi jam kyajpkøjxp Nazaret, jam Galileit y'etjotp, ku ja jade'en wyinaty tø tpadungøjxidi ja Dios kyutujk. ⁴⁰ Jøts idø'on ja mixyu'nk jam jade'en yeeky, møj møjjaaw, wijy kejy. Dios ja amuum jantyimkyunuu'kxyiyip.

Ku ja mixy Jesús yikpaaty jam tsaptøjkjotp

⁴¹ Xumi nøjxxtipts idø'on ja tyeety tyaak jam Jerusaleñ winjumøjt ku ja paski xøøw jam tpaaty. ⁴² Jøts ku ja Jesús yjumøjt wyinaty makmajts-kni, winets ja ojts ñøjxkti niduki'iyi Jerusaleñ, jøts ja xøøw ja t'anøjxkidi kumi jade'en ja kostumbri. ⁴³ Xjats ku ja wyimbejtñidøø xøøguixy, winets ja mixy Jesús jamyi tyaanaa Jerusaleñ, ka'ap ja José ja tkumaydi. ⁴⁴ Jade'en ja wyinmaydi, jam ja tijy pyamiñidi mayjaa'y agujkp, jøts ja jade'en yø'øxyinajxtøø; jøts ja tja'ixaadyøø tjayiktøødøø tjayik'amidoodøø ja myigu'uktøjkti pøn jaty ja møøt ñay'ijxy'atyidi, ⁴⁵ nima ja tkapattøø. Xjats ja tñiwimbejtøø jadigojk Jerusaleñ jøts ja jam t'ixaadyøjkidøø.

⁴⁶ Kidigøøk xøønim ja tprattøø, jamdamik ja wyinaty tsaptøjkjotp chøøni jam may kyajpxwejpi y'agujkp, jamik ja pyatmadøø jøts ja jam t'amidøø tyiktiy tyiktu'ugi. ⁴⁷ Jøts ku ja jaa'y ja jade'en tmadoodøø, ñigyumaap ja tyimya'widøø ku ja amwijy tsaachwijy, jøts ku ja tijy janch y'adsøy. ⁴⁸ Xjats ku ja tyeety tyaak ojts y'ijxyi, ñigyumaap ja tyimyaa'widøø jøts ja tyaak ojts ñii'mxyi:

—¿Ti, u'nk, jade'en myik'adøøjstip? ¿Ti øøts jade'en xjantyatump? Møk øø tø xjantyimykjotmadyøki wine'enin øøts ixa njawidity, mjayik'ixa'y.

⁴⁹ Xjats ja Jesús y'adsøøy jøts ja wyaañ:

—¿Tiku ø x'ixa'adi? ¿Ti kidi xnijawidi ku øts nDeety yja' nduujniyit?

⁵⁰ Niwine'enin ja tkaja'gyukidøø ku ja jade'en ñimaajyidøø.

⁵¹ Xjanimts ja tmøødidøø Nazaret, etpts idø'øn ja myimadøyiidi jøts ja tyaak nugo tja'myats'ijty sa yjajty. ⁵² Yaak'adøtspts ja Jesús, wej'adøtsp kaj'adøtsp ja'. Jade'ents Dios ja tyajotkujk'atyi ku ja jade'en y'ijxyi, jøts myigu'uk nayide'en yjotkujk'atti.

3

Ku ja Juan Bautista kyajpxwa'kxy abak etjotp

¹ Makmojkx jumøjt wyinaty kujk yikutuky ja møj windsøn Tiberio ku ja Poncio Pilato wyinaty wyindsøn'aty jam Judea, jøts ja Herodes jam Galilea, jøts ja myiga'ax Felipe jam Iturea jam Traconite, jøts ja Lisaniás jam Abilinia wyindsøn'aty. ² Ja Anás møøt ja Caifás ja' idø'øn wyinaty møjteetywindsøn'ajttip ku ja Juan, ja Zacarías myajnk, ja Dios tyukmadoji ja y'øgyajpxy ja y'øy'ayuujk jam abak etjotp. ³ Xjats ja ojts t'ayø'øy'abidsimy ja et jam møj nøøba'am midit txøøw'ajtp Jordán. jøts ja jaa'y ttukmadøy jøts ku ja ñøbattit, jøts ja tyiktø'ødit tyiktuuda'aktit ja wyinmaa'ñ, wan tyiktigatsti ja chinaa'yindi winets ja yikpojkipimaa'kxtit. ⁴ Xjats ja jade'en yjanchtuujnøø yjanchjajtøø sa ja Dios kyugajpxy Isaiás wyinaty tø tjaadyañ ja ayuujk ku ja wya'an:

Paty ja kugajpxy ñøjkt jawyeen jam abak etjotp jøts ja myigu'uk ja tnøjmit møk'ampy:

“Awejxidi ja Dios y'ixpøjkin, yiktøwdi yiktuuda'akti ja mwinnmaa'ñ yikxon.

⁵ Pønts ja kya'ukupøkp wan ja tyimyjapøni, ni'ijtyi ja tum jade'en tkupøkt.

Yik'øyip yiktuuda'akp ja' winmaa'ñ ku wyinaty pønjabøn tø wyinnaamaaya'aty.

⁶ Jade'ents ja naxwii'ñit jaa'y ni'ijtyi t'ejxtit sa dø'øn ja Dios tyaky ja nitso'ok'ajtin.”

⁷ Xjats ku ja Juan ja mayjaa'y jam ñimejniyøø jøts ja tyiknøbatt, jøts ja tnimaay:

—iMee miku!! ¿Pøn mee tø mni'i'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets ya nøbajtpi tø mmiñ? ⁸ Yikxon idø'øn mjaa'y'attit, wan idø'øn tyik'ijxy jøts ku ja mdsinaa'yin tø xyiktigatsti. Kidi mee kø'ømyi mnawya'añiyi: “Tixi ka'ap ti chøkyi, kumi ja Abraham adøm n'apteety'amøj'ajtyindip”; jøts ka'ats yjade'eni, ti Dios kamaajyip, øy ja pøn ttukmigu'uk'att ja Abraham pøni pøn ja kø'øm y'a'ejxip. ⁹ Jøts tsojk ja nøjkk yiktiidyuñ pøn jaty tkami'øy'ajtpi ja Dios.

¹⁰ Xjats ja mayjaa'y ja yiktøøjøø y'amidoojøø:

—¿Ti øø ndu'ump? ¿Sudso'ampy øø nwinmaa'nbyaatt?

¹¹ Jøts ja Juan y'adsojimbijty:

—Pøni pøn ja pyikta'aky, pøni pøn ja yjujky'ajtin may'ampy tjagyajtpip, wants ja tmo'odi kujkwa'kxy pøn niti kidyim'y'ejtxidip; pønts ja kyaajyik yjøø'kxik jam, wan ja nayide'en møøt tjøø'kxwa'kxtit pøn ja kyaajyik y'uujkik kidyim'y'ejtxidip.

¹² Winets ja yikugubajtpidi myemidi jam nøbajtpi, jøts ja Juan yik'amidøøy:

—Windsøn, jøts øøts, ¿ti øø ndu'ump?

¹³ Jøts ja Juan ja y'adsoojidøø:

—Kidi kugujuu'ñ ne'egi ne'egi x'amidowdi, ja'ayi dø'øn mbadu'undip sa kyutuky.

¹⁴ Jøts ja tseptumbidi winaağin tyiktøømidøø:

—¿Jøtsimts øøts, ti øø ndumip?

Xjats ja t'adsøøy:

—Kidi pøñ o ti xpøjkxidi aguwanikøjxp, kidi pøñ o ti xanitaayibyatti; tajotkuk'atti ja mmijuu'ndyi.

¹⁵ Ixjam idø'øn ja mayjaa'y wyinaty y'awejxti, ja' ja tyajotkukiwyandip, yide'en idø'øn ja wyinmaydi jøts ku ja Juan ja' idø'øn Cristo. ¹⁶ Jøts ja Juan ojts tñigajpxy, ttukmadøøy ja mayjaa'y:

—Tiy janch ixyam ndyimdyukmadowdi jøts ku øts yø'øyi tø nnimiñ jøts meets ja nøø nduktanøbattit; jats ø tu'uk ix'oojk xpamiñ pøñ meets ja Espiritu Santo mduktatøkiyip, jøts ja' tmime'ent ja tiidyu'unin. Møk'ampy kutujk ja tmimiñ, nija'baat ø xkapaat'aty jøts øts ja nugo nwinaxt. ¹⁷ Jade'en ja ttu'unt ja naxwii'ñit jaa'y sam ariin yikwigumyìn. Abiky ja tpiктаajkit ja y'ak jøts ja tñitøty ja jøøn midì nijuuni kape'tsp, jøts ja ariinbajk abiky yikpøkjøøkt, jade'ents idø'øn ja jaa'y yiktu'undit sam pøñjabøn tmi'øy'aty tkami'øy'aty ja Dios.

¹⁸ Jade'en idø'øn ja Juan ja t'ana'amin'aty, jade'ents ja ttukmadøøy ja mayjaa'y ja øgyajpxy ja øy'ayuujk. ¹⁹ Ñayi wyingugajpxiyi'ñ ja møk ja windsøn Herodes ku ja tñidø'øxy'aty ja Herodías, ja myiga'axy Felipe ja ñidø'øxy, jøts ñayi tyamigajpx ja' sà jaty ja jam wyinaty tyundigøøy; ²⁰ xjats ja Herodes ka'ap ja tmøjpikta'aky, jaaktyimdyundigøøy ja', ojts Juan ja tyikpuxøktøki.

Ku ja Jesús ñøbety

²¹ Ku ja Juan wyinaty ka'anim yiktsumy, ku ja jam tyiknøbejty ja mayjaa'y, winets ja Jesús jam ñøbajtmøø; ixjam ja wyinaty Dios'ajot'aty ku ja tsajp y'awaajch ²² jøts ja Espiritu Santo ja jade'en ñigida'agyi ejxim tsapak, wa'ats ja yik'ijxy, winets ja Dios Teety y'ayuujk yikmadøøy, yide'en ja jap tsajpjøtpy wya'añ:

—Øts me n'U'nk'ajtpy; ndsøky'ajtpy mets jøts njantyaajotkujk'ajtpy mets.

Ja jaa'dyi pøn jaty ja Jesús tyety'apip

²³ Ee'pxmajkin ja Jesús wyinaty ja yjumøjt ku ja tyunk ja tjøpwa'l'kiyi'ñ. Nømdip idø'øn jøts ku ja teedyi ja José. Jøts ja José tteety'aty ja Elí, ²⁴ jøts ja' ja Matat, jøts ja Matat ja Leví. Jade'en ñabyayø'øyi Leví ja Melqui, Melqui ja Jana, Jana ja José, ²⁵ José ja Matatías, Matatías ja Amós, Amós ja Nahum, Nahum ja Esli, Esli ja Nagai, ²⁶ Nagai ja Maat, Maat ja Matatías, Matatías ja Semei, Semei ja José, José ja Judá, ²⁷ Judá ja Joana, Joana ja Resa, Resa ja Zorobabel, Zorobabel ja Salatiel, Salatiel ja Neri, ²⁸ Neri ja Melqui, Melqui ja Adi, Adi ja Cosam, Cosam ja Elmodam, Elmodam ja Er, ²⁹ Er ja Josué, Josué ja Eliezer, Eliezer ja Jorim, Jorim ja Matat, ³⁰ Matat ja Leví, Leví ja Simeón, Simeón ja Judá, Judá ja José, José ja Jonán, Jonán ja Eliaquim, ³¹ Eliaquim ja Melea, Melea ja Mainán, Mainán ja Matata, Matata ja Natán, ³² Natán ja David, David ja Isaí, Isaí ja Obed, Obed ja Booz, Booz ja Salmón, Salmón ja Naasón, ³³ Naasón ja Aminadab, Aminadab ja Aram, Aram ja Esrom, Esrom ja Fares, Fares ja Judá, ³⁴ Judá ja Jacob, Jacob ja Isaac, Isaac ja Abraham, Abraham ja Taré, Taré ja Nacor, ³⁵ Nacor ja Serug, Serug ja Ragau, Ragau ja Peleg, Peleg ja Heber, Heber ja Sala, ³⁶ Sala ja Cainán, Cainán ja Arfaxad, Arfaxad ja Sem, Sem ja Noé, Noé ja Lamec, ³⁷ Lamec ja Matusalén, Matusalén ja Enoc, Enoc ja Jared, Jared ja Mahalaleel, Mahalaleel ja Cainán, ³⁸ Cainán ja Enós, Enós ja Set, jøts Set tteedyi ja Adán, jøts ja Adán ja Dios Teety.

4

Ku ja Jesús ja miku' tyaguwaniyi jøts ja yikpøktyunwa'añi

¹ Xjats ja Jesús wyimbijty jam Jordángit nòø agò'òm. Tø ja Espíritu Santo ja tyatòjkiniyi jòts ja jam yiknòjkxøø tò'òts etjotp mā niti kya'ity. ² Jamts ja ojts chøøni wixijkxyøøw jòts ja miku' ja jam yjot'ejxwà'añi. Niti ja tkaji'kxy jadine'en jòtsnim ja pyaajtøø ja yuu. ³ Winets ja miku' ja ñimaajyøø:
—Pøni janch ku me mjanchDios U'ngi yik'òyi yø tsaā tsapkaaky.

⁴ Jòts ja Jesús t'adsøjimbijty:

—Yide'en jap nòkyijxpy wya'añ: “Kuuyi Dios kyajpxy møj, kidi ja'ayip ja naxwii'ñit jaa'y nugo tyajujky'ajttip ti jaty yikjøø'kxp.”

⁵ Xjats ja miku' ja ojts wyaanijkxyi jam møj kojpkøjxp, jòts ja jam tyuk'ejxøø wine'enin ja kajp naxwiiñ. ⁶ Yide'en ja miku' ñimaajyøø:

—Nmøøgyøxp mets ya'at tuki'iyi wine'en øts yø kajp nnitani ja møj ja mutsk. Jade'en øts yø tø nyikmø'øy, øyts øts yø pøn ndyimyo'ot pøni pøn øts yø nmo'owampy. ⁷ Pøni xwinguxanaapy øts jòts ø xwindsø'øgit, winets mets yø tuki'iyi xja'ajtkøxt.

⁸ Xjats ja Jesús t'adsøøy:

—Miku' j'iwà'ak. Kidi øts ya xwin'ixy, pø yide'ents ja Dios kyajpxy wya'añ: “Ja Dios Teety tu'ugyi mwindsø'øgip, ja' tu'ugyi mduujnip ja yja' pøni sà ja wya'añ.”

⁹ Xjats ja miku' ja wyaanòjkxkojmiyøø jam Jerusaléngit kajpkøjxp jòts ja tsaptøjkøjxp yikpajtiyøø, jòts ja ñimaajyøø:

—Pøni janch Dios U'nk mets, katsioon ya; ¹⁰ pø nømpxi Dios kyajpxy jòts ku ja tnøjmit ja y'ankilis jòts me myik'ejx'ett, jòts ku me ka'ap ti mjatit. ¹¹ Mets ja mdsà'anjò'øgit jòts mdeky ja tsaā kyakumit kyayo'odsit.

¹² Xjats ja Jesús t'adsøøy:

—Janch nayide'ents ja Dios kyajpxy wya'añ: “Kidi mDios xjot'ixy.”

¹³ Jade'ents ja miku' nisudso'ampy kya'ukwinmaa'nbyatnaa sà ja tjaakjot'ejxkojt ja Jesús, jòtsnim ja jade'en ñimyajtstuujtøø.

Ku ja Jesús tjøptøki ja tyunk Galileit etjotp

¹⁴ Jòts ja Jesús ñòjkxnaā Galilea, møk'ampy ja Espíritu Santo ja wyinaty tø tyatøkiyi, jade'en ja tmøøt'aty, tum ja' idø'on ja jaa'y wyinaty y'aawidip y'ayuujkidip o maðsoo. ¹⁵ Yats ja yik'ixpiky mā jaty ja tsaptøjk jam, jade'ents ja o pøn kyajxa'agiyi.

Ku ja Jesús yja'jty jadigojk Nazaretit kajpjotp

¹⁶ Jòts ja ojts ñijky Nazaret, jam kojpkøjxp mā ja wyinaty tø myutsk'aty. Poo'kxin xøøw wyinaty ku ja tyøjkiyi'ñ jam tsaptøjkjotp, jade'en idø'on ja tkostumbri'aty, xjats ja tm'iwà'kukiyi'ñ ja Dios kyajpxy jòts ja tkajpxy. ¹⁷ Ja nøy ja wyinaty tø yikøø'øy midì ja Dios kyugajpxy Isaias yjaay; jòts ku ja ojts t'agii'byaky, ja' ja jap pyaajt mā jap wyinaty yide'en kyøjja'ay:

¹⁸ Dios Teety øts ja y'Espíritu Santo xpudøjkip, ja' ø xmøøpy, ja' ø xpiktakp jòts øts ja ayoo'bi jaa'y ndukmado'odit ja øgyajpxy ja øy'ayuujk;

ja' ø tø xkexy jòts øts ja ngajpxjot'amøkidit pøn amjotmay'oo'ktip tsaachjotmay'oo'ktip,

jòts øts ja nyik'awa'atspidsø'ømdit pøn jade'en ejtnidip sam tsumy jaa'yindi,

jòts øts ja nyikwin'ejxwà'kxtit pøn wimbeets kugoots ejttip;

jòts øts ja nyik'awa'atspidsø'ømdit pøn øy sagasa yiktundip;

¹⁹ jòts øts ja Dios Teety ja yiknitso'ok'ajtin nnigajpxiyit.

²⁰ Winets ja Jesús t'agimuyuky ja nõky, jøts ja ojts tkømø'øy ja tumbi, jøts ja y'ixaajky, jøts ja mayjaa'y ka'ap ja y'ukni'ejxujtniyi. ²¹ Xjats ja kyajpxøjkijyññ jøts ja wyaañ:

—Ixamts idø'en yø jade'en tø jyaty tø kyubety mee mwingujky sa ja Dios kyajpxy wyaañin.

²² Jøts ja ni'ijtyi t'ødyejtøø ja Jesús, ñigyumaapts idø'en ja tjawidi ku myadya'aky ja amdsuj tsaachuj pøni sa jaty ja ññ'mxyidi, jøts ja xem yam ñayiktiyidi:

—¿Kidi ja Joséjip idø'en ya'tat ja y'u'nk?

²³ Jøts ja Jesús wyaañ:

—Tiigyajpxy yide'en meets inet mdyimwyaañ: “Tsøøyi, nachøøyi kø'øm”; mnayinømdipts inet: “Jade'en sa øø tø nnimadøø m'adi'ich jam Capernaum, tu'unts inet ya nayide'en mgø'ømnaækjixy mgø'ømkaæjpxkijxy.”

²⁴ Jøts ja yjaakwaañ:

—Tiy janch meets idø'en nnøjmi jøts ku ni tu'ugin Dios kyugajpxy kyayikupiky kyø'ømnaækjixy kyø'ømgaæjpxkijxy. ²⁵ Tyimñømp øts, kawinaak ja ku'øktø'øxy ja wyinaty ya Israelit etjøøjty ku ja Dios kyugajpxy Elías y'atsinaay, ku et kyatuuy tigøøk jumøjt jagujkp winets ja yuu yjanch'ijty o magajp; ²⁶ ni tu'ukts ja kyayiktanigajxtøø ja Elías ya Israel, ne'egi ja' Dios ja tyanigajx pøn jam wyinaty tsinaapy Sarepta, jam Sidøn kajp wingon. ²⁷ Nay jats jaa'y wyinatymidi ya Israel pøn putstip ku ja Dios kyugajpxy Eliseo yjaa'ajty, jøts ja ni tu'ugin kyataadyøø ja pyu'uts. Pøn txøw'ajtp Naamán, ja' ojts ne'egi ja yja' tyay pøn jam Siria kunaajx'ajtp kugajp'ajtp.

²⁸ Xjats ku ja jade'en tmadoodøø jøts ja yjantyimy'ambøjktøø pøn jaty jam wyinaty tsaptøjkjotp. ²⁹ Ojts ja tñibidø'økti ja Jesús, jøts ja tkajpxidsømdi jam kajpjotp, jøts ja tyiknøjktøø jam kojpkubajkp ma jam tu'uk ja kats'aaw, jamts ja tkutejnaxwa'andi. ³⁰ Jøts ja Jesús jadi'iñi jam mayjaa'y agujkp ñajxy jøts ja jade'eñi chøø'ñ.

Tu'uk ja yaa'dyøjk pøn ja miku' tø tyatøkiyi

³¹ Jøts ja ojts ñijky Capernaumit kajpkøjxp midi jam Galileit etjotp tamp, jamts ja tyik'ixpiky ja jaa'y ku poo'kxin xøow. ³² Ñigyumaap ja tjawidi ku ja jade'en yik'ixpikyidi, kumi tum ja' ja kyajpxy midi kutujk møøt.

³³ Jamts tsaptøjkjotp wyinaty tu'uk ja jaa'y pøn ja miku' wyinaty tø tyatøkiyi, ja'ats ja møk yikwajnoø:

³⁴ —Majstutk øøts; ¿ti øø xanibøjkjip, mets Jesús Nazaretit jaa'y? ¿Ja' me tø xnimeni jøts øø xyikudigø'ty? Wa'ats me n'ejxkapy mbøn mets, pø Diosxi me m'u'nk'ajtip.

³⁵ Xjats Jesús ja miku' t'adsøø, yide'en ja tñimaay:

—iAmøñi et, kidi mgajpxy, jøts majsttu'ut yø jaa'y!

Winets ja miku' tyiknaækidaajky ja jaa'y jøts ja ttawaajch ja jaa'y, nika'ap ja sa ttuun. ³⁶ Ni'ijtyi ja jaa'y yjantyimchø'jkidøø jøts ja xem yam ñawyajnidøø:

—¿Ti kajpxy ti ayuujk yø jade'en kyajpxy? iMøjta'aky yø t'ane'emy yø miku' jøts yø jaty chø'øgi!

³⁷ Ja Jesús idø'en yik'aawip yik'ayuuujkip øy maðsoo.

Ku ja Jesús tyikmøpkipy ja Simón Pedro tyaaqmø'jt

³⁸ Xjats ja pyidsimy jam tsaptøjkjotp jøts ja ojts ñijky jam Simón tyigam, jamts ja tyøjkiyññ. Pøjkjip tamik ja Simón jam wyinaty ja tyaaqmø'jt, janty-imyjøn'oo'kp ja wyinaty. Winets ja Jesús yiknimaay jøts ja ttu'unt ja may'ajt jøts ja t'ext. ³⁹ Jøts ja ojts t'ixy, ojts ja ñaxkøø ma ja pamaa'y jam wyinaty, jøts

ja mək twingugajpxiyii'ñ ja jøømba'am, jøts ja jaty wyinaajky, jøts ja jaa'y nay jaty tyanaagyukiyii'ñ, jøts ja kø'øm t'ejxpinaəwə'aky ja kaaky ja jii'kxy.

Ku ja Jesús tyikmøpkiky ja maabyamaə'y

⁴⁰ Kuts ja xøøw yjaxnaə, winets ja Jesús ojts yiktaninijky ja maabyamaə'y pønity jam sagasa jajtp; jøts ja ojts tu'uk tu'uk tkønaxajy, jøts ja jade'en tyik-tsokijxy. ⁴¹ Nay jamts ja winaaginmidi pøn ja miku' ttawajtsidøø nayide'en, jøts ja yjanchnømdi møk:

—Dios U'nkxi mets.

Jøts Jesús ja møk twingugajpxiyii'ñ, ka'ap ja tyikjaty jøts ja kyajpxtit, pø ñijaa'widipxi ja' jøts ku ja' Cristo.

Ku ja Jesús kyajpxwa'kxy jam Galilea

⁴² Xjats ku xyiiindyaaiky, jøts ja Jesús chøø'ñ kajpjotp jøts ja ñijkxy jam mā pøn kya'ity. Jøts ja mayjaa'y ja yjančh'ixa'ayi jøtsnim ja yikpaajty mā ja jam wyinaty. Yikta'anwyandip idø'on ja', ka'ap ja tmajtsu'utwə'andi jøts ja choont, ⁴³ yide'ents Jesús ja ñimaajyidøø:

—Nayi nnigajpxwampy øts ja Dios y'øgyajpxy y'ømyadya'aky o magajp, pø ja'agøjpxi ø tø nyikexy.

⁴⁴ Jøts ja Jesús jam jade'en kyajpxwa'kxy mā jaty ja tsəptøjk jam Galilea.

5

Ku ja ajkx may'ampy yikma'aky Jesús myilagr'i'ajtingøjpx

¹ Tuk'ojk idø'on ja Jesús jam yikpaajty mejy agø'øm mā txøøwi Genesaret; jamts ja mayjaa'y ja ñimejniyøø jøts ja t'amidodukwa'andi ja Dios y'øgyajpxy y'ømyadya'aky. Janch yik'atejmujknipst idø'on ja Jesús jam wyinaty ² ku ja t'ejxpaajty majtsk ja barki tawa'ats jam nøø adsay agø'øm, tø ja ajkxmakpi jam wyinaty pyidsømgøxti, jam tya'ajkxmaajk ja wyinaty tpujti. ³ Winets ja Jesús tu'uk ja barki ttatøjkijyii'ñ midi ja Simón yja'ajtpy jøts ja tñimaay wan tñiyikjəwə'aky waani jøts jam wingon kidyimdyə'ant møøt ja tsayjoojt. Jøts ja jam jade'en y'ixaajky, jøts ja jam tyik'ixpøjktøjkijyii'ñ ja mayjaa'y. ⁴ Xjats ku ja kyajpx'abajtyyii'ñ jøts ja tñimaay ja Simón:

—Yiknøjkx yø barki jam mā yø nøø køjnkjəwi, jamts xniwejtspattit yø mda'ajkxmaajk.

⁵ Jøts ja Simón t'adsøøy:

—Windsøn, tuktsunaxy øø tø njanchjatuñ, ni tu'ukts øøts n'ajkx tø ngapaaty; nøøwejtspatp øts inet yø nda'ajkxmaajk jadigojk, pø tøxi me mwə'añ møk'ampy.

⁶ Jøts ku ja jade'en ttundøø, may ja ajkx ja ojts tmatsti, janch køøtswambim ja tya'ajkxmaajk ja'adi. ⁷ Winets ja tñiyamdøø ja myigu'ukti pøn jam wyinaty jade'ukpi barkijotp jøts ja pyudøkiyidit. Nøjkxti dø'on ja jam, ojts ja barki ja majtsk tyik'ujtskøxti øy ja yjəwi yjančhkøjntøjkinidit. ⁸ Xjats ku ja Simón Pedro ja ojts jade'en t'ixy, winets ja twinguxanaəy ja Jesús jøts ja tñimaay:

—Windsøn'ajtim, majtstutk øts, ka'ap øts yø xpəat'aty jade'en, pojkpitumbi jaa'y øts.

⁹ Janch tsø'jkiñip idø'on ja Simón wyinaty jøts nayide'en ja myigu'ukti, ja'agøjpx ku ja ajkx ja wyinaty jadine'en tø tma'akti. ¹⁰ Nayi tsø'jkips idø'on ja Jacobo møøt ja Juan, ja Zebedeo y'unə'jkti pøn ja Simón møøt ñamyigu'uk'atyiyi. Jøts ja Jesús tñimaay ja Simón:

—Kidi mdsø'øgi, ixyamyi nduknijəwidit sudso jaa'y ja nitso'ok'ajtin tpaətt.

¹¹ Jøts ja byarki ja jam nøøba'am tyikja'attøø, jøts ja jamyi tnikakøjxtøø tuki'iyi, jøts ja tmøødidøø ja Jesús.

Ku ja Jesús tyiktsøøky ja jaa'y pøn jadi'iñi putsnip

¹² Kuts ja Jesús jam wyinaty tu'ukpi kajpjotp, winets yja'jty tu'uk ja jaa'y, møj pu'uts pa'am ja pøjkip, jøts ku ja Jesús yik'ejxpaajty jøts ja twinguxanaay. Jamyi ja ñamyujstaa'jkøø jøts ja tminuu'kxaa'jky, yide'en ja tnimaay:

—Teety, nmøøt'ajtpy mets ja møk'ajtin jøts ø xyikts'o'okt, yiktsokts øts mdsøjk'ajtingøjxp.

¹³ Jøts ja Jesús ja ojts tkønixa'jy, yide'en ja tnimaay:

—Ndsøky'ajtpy øts jøts mdsø'okt, tsokni.

Ja'ayi ja jade'en wyaañ, jatyi ja pu'uts wyinajky. ¹⁴ Xjats ja Jesús møk'ampy tnimaay ja jaa'y jøts kidi ja pøn ttukmadøy. Yide'en ja tnimaay:

—Jamyi dø'øn mnøjkxt jam teety wyindum, jamts xpikta'akt ja myojxin midi ja Moisés ñi'ana'am, ja'agøjxp ku tø wya'ach ja mbu'uts. Jade'ents ja jaa'y ja t'ejxtit tnijawidit jøts ku tø mdsø'øky.

¹⁵ Yikmøjpikta'adøtsp idø'øn ja Jesús, may ja jaa'y ja ñimen'adi'ichiyi, namay ja ñamyukyidi jøts ja pyatmadøyi, jøts ja tnankyikts'o'okwa'añidi ja pya'am. ¹⁶ Ja Jesús jam ja ñijkxy ma abak et ma niti kya'ity, jamts ja Dios Teety t'ajot'ajty.

Ku ja Jesús tyiktsøøky ja køxujxpi pakxujxpi

¹⁷ Tuk'o'jk idø'øn, jam ja Jesús wyinaty yik'ixpiky, jamts idø'øn ja fariseotøjk møøt ja kajpxwejpitøjk wyinaty chøønidi wine'enin ja wyinaty tø choondi o magajp, pømbi mendip Galileit etjotp, Judeit etjotp, jøts Jerusaléngit etjotp; ku ja Jesús tnankyjay'ijxyi ja Dios Teety myøk'ajtin ku ja pamaa'y ja tyiktsø'øky.

¹⁸ Winets ja jaa'y tkii'jja'ittøø tu'uk ja pamaa'y pøn køxujxp pakxujxp, jøts ja jap tøjkjøtpy tyiktøk'iwya'andi jøts ja ttawingugii'yidit ja Jesús. ¹⁹ Nimats kya'awa'ads'i ma ja tyøk'idit kumi janch mayjaa'y jam wyinaty. Xjats ja tøjki'jxy pyajttøø, jøts ja ojts tniki'dy'utti ja tøjik, japts ja tyikwinajktøø ja pamaa'y jøts ja ttawingugii'yidøø ja Jesús jap mayjaa'y agujkpy. ²⁰ Kuts ja Jesús ja ojts jade'en t'ixy kudam ja amumdu'uk ja yjanchja'win tjagyapti, jøts ja pamaa'y ja tnimaay:

—U'nk, nbøkmyee'kxpy mets.

²¹ Winets ja wyinmaadyøjkidøø ja kajpxwejpitøjkti møøt ja fariseotøjkti, yide'en ja wyinmaydi: “¿Pøn yø jaa'y jade'en, tigøjxp ku Dios yø jade'en twingajpxnaxy? ¿Pøn ja pøky ya t'ukmaa'kxp, kidi tu'ugyi'p Dios pyo'jkpimee'kxy?”

²² Wa'ats ja Jesús ja tnijawi sa ja wyinaty wyinmaydi, jøts ja tnimaay:

—¿Tigøjxp ku jade'en mwinmaydi? ²³ ¿Ja ti ne'egi jawaani jajtni, kuts yø pa'amjaa'y nnøjmit, “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjkxni mdigam”? ²⁴ Ixyamnim meets inet x'uk'ext mabaat øts idø'øn ja møk'ajtin nmøøt'aty ya naxwiin jøts ø nmaa'kxt ja pøky.

Xjats ja tnimaay ja køxujxpi pakxujxpi:

—Pidøkni, wa'kukifii, wejtsjø'øk yø mmaabajt jøts mnøjkxnit mdigam.

²⁵ Jatyi ja køxujxpi pakxujxpi pyidi'jky, jøts ja tyanaagyukyiyi'ñ jam mayjaa'y agujkpn. Wyejtsmujk ja myaa'abajt ja' ma ja jam wyinaty kyo'kni, jøts ja ñøjkxnaa tyøjkwindum, møk ja Dios ja ttamøjawi. ²⁶ Jøts ja ñigyumaap tja'widøø ni'lijtyi, ojts Dios ja ttukmøjawi'idi ttukunuu'kxyjawidi, yide'en ja wya'andi ja ñichø'øgi adøtsni:

—Ix̄yamn̄im inet ja t̄o n'ix̄ȳi'ndi mid̄i n̄iw̄indi kayik'e'jx̄p̄n̄im.

Ku ja Jesús tpawaay ja Levi

²⁷ Ku ja jade'en y'ukjajty, xjats ja Jesús jam pyidsiimy, ojts ch̄oõñ j̄ots ja t'e'jx̄paajty tu'uk ja yikugubajtpi, jam ja wyinaty ch̄oõni ma ja ttukugubety ja jāa'ȳ oy tyii'ji, j̄ots ja tn̄imaay:

—M̄oõdik õts, m̄oõt widejtk õts.

²⁸ Winets ja jatyi tyanaagyukīi'ñ, j̄ots ja tuki'iyi tum jam tnikakijxy, j̄ots Jesús ja tm̄oõdiȳi'ñ.

²⁹ J̄ots ja Levi x̄oõw ttuun̄ jam tyõjkw̄indum j̄ots ja twindsõ'jk̄iyi'ñ ja Jesús, mayts ja yikugubajtpi jam wyinatyi m̄oõt jadu'ukpi jāa'dyi. Jade'en ja jam m̄oõt twindsõõn̄idi ja kaabyajt. ³⁰ Xjats ja fariseot̄ojkti m̄oõt ja kajpx̄wejp̄it̄ojkti tpāgajpx̄n̄ib̄ojkid̄oõ ja Jesús pyab̄ojkpi, j̄ots ja tn̄imaadȳoõ:

—¿Tiku meets ȳo xm̄oõt̄kay ȳo yikugubajtp̄it̄ojkti m̄oõt ȳo ka'oȳjāa'dyi?

³¹ Winets ja Jesús y'ads̄ooȳ j̄ots ja tn̄imaay:

—P̄on tkaja'widip ja pya'am, ti ts̄oõyibi ja t'ukyikwa'andit. Ja' ja tyik'amaadyaktip̄ p̄on pamaa'dyi, p̄on pya'am tja'wiy'e'jt̄tip.

³² Kidi ja'aj̄ipts̄ o t̄o nn̄imiñ p̄on n̄iw̄ine'en kanabȳok̄yja'wiȳidip. Ja' o t̄o nn̄imiñ p̄on tja'widip ja pȳokȳ j̄ots ku ja pȳok̄mȳoõd̄idi, j̄ots tyikt̄igat̄st̄it ja chin̄aa'ȳindi.

Ku ja Jesús yikt̄ībȳikȳ tigõjxp̄ ku ja kya'ayuu'atti

³³ Xjats ja tībȳojkt̄oõ ja Jesús j̄ots ja tn̄imaadȳoõ:

—¿Tiku ȳo mbab̄ojk̄pit̄ojk̄ janch nek̄im kyaydi tyojk̄xti, j̄ots ȳo Juan yja' yjanch'amaay'atti m̄oõt ȳo fariseot̄ojkti? Ni kyakaydi kyaj̄o'k̄xti, janch tsap̄kajpx̄'e'jt̄tip ȳo'.

³⁴ Winets ja Jesús t'ads̄ooȳ:

—¿Ma meets jade'en t̄o x'uk̄nijaw̄i j̄ots ku t̄o'oxȳ ñigaabyi t̄o'oxȳ ñi'uk̄pi winet y'amaay'atti winet kyakaydi kya'uukti ku ja jemyaa'ȳ jamni?

³⁵ Abik̄ñim̄ts ja tiemp̄i tyimyja'tm̄it ku ja jemyaa'ȳ wyinaty kya'uk'e'jtni ku ja jam wyinaty t̄o cho'oni; jaan̄im̄ts id̄o'õn̄ tiy p̄on kya'ukaan̄it̄ kya'uk'uk̄n̄it̄, jaan̄im̄ id̄o'õn̄ ja y'amaay'attit.

³⁶ J̄ots ja nay ja'agõjxp̄ ya'at̄ t̄tan̄imadyakt̄ojkīi'ñ:

—Ka'axi p̄on wyetpach tta'agiyi jemwyet̄ mid̄i tyim̄yjem̄ñim, ku ja jade'en yiktu'unt̄ j̄ots kumi mujkpi ja jemwyet̄ j̄ots ja tjaaktyim̄gȳoõ'tsni ja wetpach, jaaktyim̄yiw̄enip̄ ja kȳoõts'ajt̄in ja'. ³⁷ J̄ots ka'ap̄ p̄on vino tta'adami po'duk̄ mid̄i ñam̄i'kx̄ñim, ku ja jade'en ndu'un̄int̄ jatyi ja tyik̄m̄iḡoõdsi ja po'duk̄, windiḡoõpyts tuki'iyi, windiḡoõpy ja vino, windiḡoõmyipts ja po'ak̄. ³⁸ Paty ja vino mid̄i ñam̄i'kx̄ñim̄ nda'ada'amyin ja jembyo'ak̄ j̄ots jade'en nimidi kyawindiḡoõty. ³⁹ Nayide'ents ka' p̄on t'uukwa'añ ja vino mid̄i ñam̄i'kx̄ñim̄.

P̄on t̄o t'uukyujni ja vino mid̄i jekyip̄ mi'kx̄ñi, xumi ja' ja ch̄ojkpy, kumi n̄omp̄ ja tukajpxy: “Ȳo jekyip̄ mi'kxyip̄ tyim̄y'oy, ka'ap̄ ȳo mid̄i tmi'abaaty.”

6

Ku ja Jesús ttõjt̄oõ ja ariin yam poo'kxin x̄oõw

¹ Poo'kxin x̄oõw id̄o'õn̄, winets ja Jesús jam wyinaty ñaxy jam kamjotp̄ m̄oõt ja pyab̄ojk̄pit̄ojk̄, ja'ats jam wyinaty ttõjt̄ip̄ ja ariin t̄oõm; j̄ots ja twixat̄sti ja ariinbajk̄ j̄ots ja t̄jõ'kxti. ² J̄ots ja fariseot̄ojk̄ win̄aagin̄ yikt̄oõjid̄oõ, yide'en ja yik̄n̄imaadȳoõ:

—¿Tiku jade'en m'ad̄o'õt̄sti mid̄i ka'ap̄ pya'at̄'atȳi yiktu'unt̄ poo'kxin x̄oõw?

³ Xjats ja Jesús y'adsøøy:

—¿Ka'aním meets ja Dios kyajpxy x'ljxy midí tñigajpxp sã ja David tuk'ojk tmøøt'adiijch ja myigu'uk ku ja wyinaty yjantyimyuu'ookti? ⁴ Pø tsaptøjkjøtpyímxi ja tyøjkiiyí'ñ, japts ja tñixajiyí'ñ ja kunuu'kxy tsapkaaky, jøts ja tkaadyøø møøt ja myigu'uk pøn jaty ja jam wyinaty myøøt. Yam ja ka'ap yjapaat'atyidi jøts ja tka'adyit ja'abi tsapkaaky, ja teetyøjkti ja paat'ajtidíp kya'adyíp.

⁵ Nayide'ents ja wyaañ:

—Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y pøn ja kyø' jadi'iñi tøtsníp

⁶ Jadu'ukpi poo'kxin xøøwts idø'øn ja'agøjmyi ku ja Jesús tyøjkiiyí'ñ jam tsaptøjkjøtp, jamts ja yik'ixpøjktøjkiiyí'ñ. Japts wyinaty tu'uk jaa'y midí y'aga'ngyø' xujxp; ⁷ jøts ja kajpxwejpitøjk jam tpa'ejxti tpagowdi ja Jesús, ja' ja y'ejxwãndíp pøni y'ukyiktsøkpy idø'øn ja pamaa'y ja' ku poo'kxin xøøw, jade'ents ja tñi'øøniwya'andi. ⁸ Ti wa'ats ja tñijawi sã jaty ja wyinaty wyinmaydi jøts ja jaa'y ja tñimaay midí wyinaty kyø' xujxp:

—Tani, jøts ixem nøjkk mdani kujk'am.

Jaty ja jaa'y tyanaagyukiyí'ñ jøts ja jam ñijkxy tanaabyi. ⁹ Winets ja Jesús tñimaay ja mayjaa'y:

—Nyiktø'ødíp nyik'amido'odíp inet yam: ¿Midí'ibi ndu'unimp ku poo'kxin xøøw, midí'ibi kutuky ku n'ødyu'unint u ku nga'ødyu'unint? ¿ku nyiktsoojkint u ku nyik'o'jkint?

¹⁰ Jøts ja twín'ejxkijxy pøn jaty ja jam wyinaty ttamujkiyíp, jøts ja tñimaay ja pamaa'y:

—Xajtøw.

Tsoojk ja' jøts ja xyajtíy. ¹¹ Jøts ja yjadu'ukpi jaa'y yjanch'ambøjktøø, jøts ja xem yam ñawyajnidøø, agø'ømyi sudso'ampy ja tjadyimy'ukyikpøkyã'ãdit ja Jesús.

Ku ja Jesús twíwíjch ñimakmajtsk pøn wyinaty kyudanaabyi'qtwampy

¹² Winet ets ja Jesús ñijkxy Dios'ajot'ajtpi jam kojpkøjxp, jam ja Dios Teety ja tmigajpxy tuktsunaxy. ¹³ Jøts ku xyíjndyaaajky, jøts ja twaadsogijxy pøn jaty ja pabøjkíp, jøts ja twíwíjch ñimakmajtsk pøn ja tyejtip kudanaabyitøjkti.

¹⁴ Ja'ats idø'øn ja'adi ja Simón midí ja xyødejtigajts jøts ja tpiaktaajky Pedro; møøt y'uch Andrés ja', møøt ja Jacobo, møøt ja Juan, møøt ja Felipe, jøts møøt ja Bartolomé. ¹⁵ Jam ja Mateo, Tomás, Jacobo pøn ja Alfeo myajnk'ajtpy; jøts ja Simón ja cananista; ¹⁶ jam ja Judas ja Jacobo y'uch; jøts ja Judas Iscariote, pøn wyinaty tkøyakwamp ja Jesús.

Ku ja Jesús tyik'ixpijky ja mayjaa'y

¹⁷ Xjats ja Jesús tmøøtkidaajky ja kyudanaabyitøjk, jøts ja tmøøtja'jty jap jøytøpy niduki'iyi møøt ja pyabøjkpitøjk; nay jam wyinaty øy pøndi pøn jaty tso'øndip jam Judea, jam Jerusalén, jøts jam mejy agø'øm jam Tiro jam Sidón. Ja' ja jam wyinaty tø tñimendi jøts ja tpatmado'odit ja Jesús, jøts ja pyamaa'y ja tñankyiktso'okwa'ãñidi. ¹⁸ Winãagin jam pøn ja miku' tø tyatøkiyidi, tsokøxtits ja'. ¹⁹ Jøts ja jaa'y ni'ijty: tñixajiwya'andi ja Jesús. Pyaatwãndíp ja' ku ja ttuktatsø'øky ja myøk'ajtin ja pamaa'y.

Ja xondaajkin jøts ja ayo'owin

²⁰ Winets ja Jesús y'ejxi'jky ma ja pyabøjkpitøjk jam wyinatyi jøts ja tnimaay:

—Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midj ja tyanitanaapy ja yjaa'y.

²¹ Nay Dios ja tkunuu'kxp pøn yu'oo'ktip xø'oo'ktip, ja' ja tyiknajxkøjxp.

Jøts pøn yaxtip jidyip, kunuu'kxy Dios ja nayide'en yik'ityidi, ja'ats ja ttukpaadidip ja xondaajkin.

²² Mgunuu'kxip meets Dios øy meets ja jaa'y mjamidsep'atyidi øts køjxp, øy ja mjabawøpyidi, øy ja mjaga'ømyigajpxyidi, øy mjagayiktsokti, øy mxøøw mguya'axy kamadøyim yjayikjawidi ja'agøjxp ku ø xpabøkti. ²³ Kidits mjet-may'lookti, kidi x'ayoojidi, japnim ja tsajpjøtpy mwingaxø'økkxyidi; pøn jade'en mduujnidip, yø jade'embi jaa'y tyeety'ap tka'ødyundøø nayide'en ja Dios kyugajpxtyi.

²⁴ Jøts mjanch'ayøøy mee kumeeñ jaa'y, yaayi meets iij jotkujk mdsinaagyoti.

²⁵ Mjanch'ayøøy meets pøn tum jaa o ti tmøøt'ajttip, mjanch'ayuu'ajttip mjanch'axøøw'ajttip meets nøjkk.

M'ayøøy meets pøn yam agujk jotkujk yiknajxtip, mdaya'axtipts meets ja mwinmaa'ñ jadigojk.

²⁶ M'ayøøy meets ku mee myik'ødyijy myik'øñøjmi, pø nayide'ents ojts yiktejti yik'ødyejti pøn ojts nugo ñadyijyi ja Dios kyugajpxy.

Paat'ajtip jøts ja mmidsep yikmijotjimbett

²⁷ Ni'ijtyi madowdi wine'enin mja'atti: Tsokti miyujy'atti ja mmidseptøjki, pudøkidi ja' pøn mjagatsojkidip, ²⁸ amidowdi ja Dios jøts tkunuu'kxt ja mmidsep pøn o sagasa mnimaajyidip, ku'amidowi pøni pøn mmi'ambøjkidip pøni pøn sagasa mdunwajnidip. ²⁹ Pøni mgojxip mdse'ekip, ja' øy ku xmaa'kxukti; jøts ku pøn mbøjkkidit ja yukwop, jaaktyimyo'odipts ja mnijan.

³⁰ Kidi kanajtsjawim xjawidi ku tigati myik'amidowdi; jøts kidi jatyi o pøn xamatsti ku pøn o ti tønixaji. ³¹ Kidi meets ja jawyeen jade'en xjøp'ixy pøni sã mee xjatsøky, meets idø'øn mbaat'ajtip jawyeen mnajststunip sã dø'øn ja yjawi tsoktin jøts meets ja jade'en xu'unt.

³² Øy meets ja'ayi møøt mjanamyaawya'añiyidi pøn mee møøt mnachøkyiyi, ¿ti øy'ajtints meets jade'en mdumpy? ¿Ti ja' ja ka'øy jaa'y kyajajtip? Pø tyundipxi ja nayide'en. ³³ ¿Ti øy'ajtin meets jade'en mdumpy øy meets ja'ayi xjamay'aty pøn mee nayide'en mdu'unxxyip? Pø tyundipxi ja ka'øy jaa'y ja nayide'en. ³⁴ Uk ja'ats meets o tigati mduk'anuu'kxpy pøn mee m'a'ejxip tyikwimbetp jawaani mayjawi, ¿ti øy'ajtints meets jade'en mdumpy? ¿Ti ja ka'øy jaa'y ja jade'en tka'anuu'kxyajktip o tigati ja yja' jøts ja myiga'øy jaa'y ja nayide'en ttukubatti jawaani may? ³⁵ Ka'ats meets idø'øn xmidsepøkt ja mmidsep, tsokti xmiyujy'attit, mduujnip meets ja may'ajt ja'. Øy meets ja tigati xuk'anuu'kxt jadi'iñi, kidits meets ja xjøp'ijxy'aty jøts ja mmigubajtxidit jawaani møj jawaani may. Møjts meets ja myikwimbetxxyidi, ja Dios Teety tsajpjøtpyit jade'en meets ja m'u'nktejyit; ti sã ja Dios Teety tmi'øy'aty nayide'en ja ka'øy jaa'dyi ja namyikaxi jaa'dyi. ³⁶ Mja'myatstip meets jøts mba'ayo'odip o pøn nayide'en sãm ja Dios Teedyin ja tpa'ayøyin.

Kidi pøn o ti xawindsø'dyi

³⁷ Kidi pøn nugo o ti xapøky'ejxti, jøts Dios ja nayide'en mgapøky'ejxidit. Maa'kxukti, jøts ja Dios nayide'en mmaa'kxukidit. ³⁸ Mo'odi o ti pøn, winets o

ti nayide'en mmo'ojidit ja Dios. Nayide'en meets ja mmo'ojit mgamo'ojit pøni sã meets ti xyaky xkayaky møj may o ti. Nayide'en meets ja Dios mdunit pøni sã meets mmigu'uk xuñ. Nay ja'ats ja yik'awetsp.

³⁹ Xjats ja Jesús tτανιmadyaktøkjiyih'ñ jadu'uk ja madya'aky, yide'en ja wyaañ:

—¿Ma ja winap jaa'y tøk'uktuu'niway ja myiwinap jaa'y? Pø namajt-skxi dø'øn ja tyimgyunaxtit ku et'aaw ja ma tpaattit. ⁴⁰ Uk kuts pøn, pøn tni'ixpøjkimyidip o ti tunk, ka'axi mibaat twinaxtit ja yik'ixpøjkpidi; pø wan idø'øn jaanim wyinaty.

⁴¹ Jøts meetsmi, ¿sudso dø'øn ja mmigu'uk pyøky x'eixpajtiyi jøts ja mja' ne'egi xka'ixy kudam ja jawaani møj? ⁴² Jøts, ¿sudso mets idø'øn namyikajxibim xkajpx'øyiwya'añ yam mets ja mdsinaa'yin øy xkayikyø'øy? ¿Meets win'øø'mbi ataadyi! Yik'øyidi jawyeen ja mga'øchinaa'yindi, winetnimts ja mmigu'uk chinaa'yin xkajpx'øyiyidit.

Pøni sã wyimbidsimy øy ti, ja'ats tyikwingaxø'kp pøni sã ti y'øyi kya'øyi

⁴³ 'Ma meets øcha'amguipy tøk'x'uk'ixy jøts ku ja tyiktøømi ja ka'øcha'am; uk ja ka'øcha'amguipy tyiktøømi ja øcha'am, nima. ⁴⁴ Ja tyøømi ja kipy yikta'eixkajp pøni sã ja tyøømi øy ka'øy: ka'axi ja iigi tsa'am yikwiduky kujp kipykøjxp, ni jam ja uvi tsa'am kyawinaky jam kujp aatskøjxp. ⁴⁵ Jade'ents idø'øn ja øyjaa'y pøn øyjaa'y, ka'ap ja t'aawi tjootti ja ka'øybi winmaa'ñ, ka'ap ja yjemwa'añ tyewa'añ kumi øyjaa'y ja'; pønts ka'øyjaa'y'ajtp ja ka'øybits ja y'aawip yjoottip, yjemwa'andi tyewa'andi kumi jam idø'øn ja tyimyøødidi ja kya'øy'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Majtsk jøøjp ja pøch kyøjpk

⁴⁶ 'Niti øy'ajtin meets jade'en xkatuñ ku mee xjanøjmi, "Nwindsøn'ajtim, nwindsøn'ajtim", jøts ka'ats xpadundi pøni sã njawa'añ. ⁴⁷ Ya net nduk-mado'odit pønin ja kyaxø'økti ja jaa'y pøn ø xnimemp jøts øts n'ayuujk ja xpatmadoojidi, jøts ja jade'en tpadundi sã nwa'añ. ⁴⁸ Jade'enin idø'øn ja nbiktaajkin sam ja jaa'y tyøjkøjyin, jawyeen ja køjnk øy øy tniðajiyih'ñ ja tyøjk, jøts ja tsaa ja amuum ttukpøchkojpk'ajty. Xjats ku ja møj nøøgom jam wyinajky, aguwan ja tyimyikjø'tjø'økwa'añ ja tøj, jøts ja niwine'enin nisã tkatuñ, kumi tsaa ja wyinaty tyeky'ajtpy. ⁴⁹ Pønts ø xjapatmadoojidip ja n'ayuujk jøts ka'ap jade'en tpadundi sã nwa'añ, ja'ats idø'øn jade'endi sam ja jaa'y midit tyøjk tkoj xixñaxkijxy. Niti ja tkadukpøchkojpk'ajty, jøts ku ja møj nøøgom jam wyinaajky jatyi ja tmimajadaajky, ojts ja tyikiday jøts ja tyimyikudigøøy.

7

Ku ja Jesús tyiktsø'øky ja romanit soldadi ja tyumbi

¹ Xjats ku ja Jesús jade'en tñimaagyijxy ja jaa'y, winets ja ñijkxy Capernaum. ² Jamts wyinaty chøøni ja soldadi windsøn, romanit jaa'y ja'. Jamts tyumbi ja tu'uk midit ja janchkamajtsu'udyim yja'wip, mowa'añ ja yjanchpiky, ookwanip ja wyinaty. ³ Ku ja soldadi windsøn tñimadøøy ja Jesús, winets ja tñimajgyxy winaaagin ja israelit møjaa'dyøjkti, jøts ja t'atstuk'amidoowa'añ ja may'ajt, wan tmiñ ja Jesús jøts cho'økt ja tyumbi. ⁴ Xjats idø'øn ja tñinøjktøø ja Jesús jøts ja ojts t'amidowdi ja may'ajt møk'ampy, yide'en ja tñimaadyøø:

—Paat'ajtip xpudøkit yø soldadi windsøn; ⁵ kumi chøjkpy yø' adøm ngajp, nayø'øts tøk'ni'ane'emy jøts ja tsaptøj tøk'kyøj.

⁶ Winets Jesús ja tmøðiyii'ñ. Jøts ku ja jam wyinaty yja'atwanidi ma ja tøj k jam, jøts ja soldadi windsøn ttukjøpkubajtiyii'ñ pøn jaty ja minamyaajyip, jøts ja ttuknimaay ja Jesús:

—Mets teety, kidi xka'øyjawi, ka'ap ø xpaat'aty jøts mets ya mdøkit ndøjkjøstjy; ⁷ paty ø kø'øm tø nganay'a'eixiyi jøts mets jeexyip kø'øm tø n'ats'ixa'ay. Ana'am ja'ayi, jøts øts ja ndumbi cho'okt. ⁸ Ane'emy ø nayide'en nwindson xyik'lity, nay ja øts ndumbitøjkmididi pøn ø n'ana'amidip. Ku pøn nnøjmi: “Nøjcx”, nøjkxpts ja'. Uk nnøjmits øts yø ndumbi o ti, jatyits yø jade'en tpaduñ.

⁹ Ja'ayi Jesús ja jade'en tmadøoy ñigyumaap ja tja'wiyii'ñ ku ja jaa'y jade'en, jøts ja tniwa'akjimbijty pøn jaty ja jam wyinaty payø'øyip, jøts ja tnimaay:

—Tyimyjanch, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy.

¹⁰ Jøts ku ja waabi yja'ttøø møøt ja jøpkuyø'øyibidi jam tøj kjotp ma ja pamaa'y jam wyinaty, tødamik ja wyinaty myøkpøjkni ja pamaa'y.

Ku ja Jesús tyikjujkyiky ja ku'økyø'øxy myajnu'nk jam Naín

¹¹ Ukjajts ja jade'en, xjats ja Jesús ñijxxy jam ma kajp txøøwi Naín, mayjaa'yts idø'on ja jam wyinaty pawidejtjip, may ja pyabøjkpitøjk ja jam tmøødi. ¹² Kuts ja yja'lty jam kajpwingon, jøts ja ojts t'ejxpaaty tu'uk ja oo'kpi yikpagi'y jøts ja y'atsnaxøkit, tu'umchi dø'on ja tø'øxyøjk ja t'u'nk'aty, jøts ku'økyø'øxy ja'. Mayts ja yik'oo'kpi pidø'kpi jamdi. ¹³ Jøts ku ja nwindson'ajtim ojts t'ixy ja ku'oogi, yik'ayo'lijxim, jøts ja tnimaay:

—Amon, kidi mya'axy.

¹⁴ Winets ja Jesús twingunøjkxiyii'ñ ja oo'kpi, jøts ja kajuun ja tñixajiyii'ñ, jøts ja oo'kpi kiiby ja tkiidyaktøø, jøts ja Jesús tnimaay ja oo'kpi:

—Mets u'nk idø'on nnimaapy: ¡Pidø'øk!

¹⁵ Xjats ja kyu'xkukiyii'ñ pøn idø'on wyinaty tø y'øøky jøts ja kyajpxinibøjkxiyii'ñ, xjats ja u'nktaak ja yiktagidøjkxiyii'ñ ja y'u'nk, ja Jesús ja kømøøjyiyip. ¹⁶ Jøts ku ja jade'en niduki'iyi t'ejxtøø, jøts ja yjanchø'jkidøø, jøts ja ttukmija'widøø ttukunuu'kxyja'widøø ja Dios, nømdip ja':

—Ya Dios ja myøjkugajpxy tø kyaxi'iky adøm njaa'yjøøjty.

Nayide'en ja wya'andi:

—Dios tø tñimiñ ja kyajp jøts tpuðøkit.

¹⁷ Yiknija'wigyøjx ja jam wine'enin ja jaa'y jam chøønidi jam Judeit etjotp, ku wyinaty ja Jesús tø tyikjujkyiky ja oo'kpi.

Ku ja Juan Bautista tkexy ja kyugajpxy

¹⁸ Xjats ja Juan Bautista ja tñija'wiyii'ñ, nayide'en ja pyabøjkpi ja wyinaty tø tyamimadya'agiyi, winets ja tyajxiyii'ñ namajtsk ja pyabøjkpi, ¹⁹ jøts ja ojts ttaniguexy ja Jesús, jøts ja t'atsyiktø'ødit pøni ja' idø'on janch Cristo pøn wyinaty menwamp yiknitsokpi. Uk kidi ka'ats, winets ja abikpyi ja tjøp'ejxtit. ²⁰ Jøts ja wingon twingunøjkxidøø ja Jesús pøn ja Juan wyinaty tø tyanguexyidi, jøts ja tnimaadyøø:

—Ja Juan Bautista øø tø xkexy jidsik øø nyiktø'øt pøni janch ja Cristik mets idø'on mididi yiknigajpxp menwamp yiknitsokpi. Pøni ka'ats, winets øøts jadu'ukpi njøp'ext.

²¹ Ku ja wyinaty tø yja'atti, winets ja Jesús nay jaty tyiktsøøjky may ja jaa'y pømbi pa'am pøjkidip, pømbi o ti ja'ambi tmøøt'ajttip, pømbi ja miku' tmøøt'ajttip, ñayikwin'ejxwa'kxmip ja' ja may winap jaa'y. ²² Jøtsnim ja y'adsojimbijty jøts ja wyaañ:

—Nøjxkti jøts xukmado'odit ja Juan ti jaty yā tō x'ejxti xmadowdi. Tamimadya'akti jade'en sā yō winap jaa'y wyin'ejxwa'kxiti, sā yō pak-pamaa'y yō'odyi, sā yō putspi cho'okti, sā jaty yō nat jaa'y myadowdi, sā oo'kpi yjujkyōkti, jøts sā ayoo'bi jaa'y yiktukmadowdi ja ogyajpxy ja omyadya'aky midy yiknitsokp. ²³ Ejtni xoni ja'adi pōn ø xmi'bijktip, ka'ap twinmayimbettit twinmay'adōjitit sats ø xjanchjawi.

²⁴ Xjats ku ja wyimbejtndidø midy ja Juan wyinaty tō tkexy, jaats ja Jesús ttamimadyaktōjkiyih'ñ ja mayjaa'y, ja Juan yiknimadyakp, yide'en ja wyaañ:

—¿Ti meets ojts x'ats'ixy jam abak etjotp? ¿Tu'uk ja jaa'y midy jade'en ejxim kapy midy poj yik'ø'yimbejtijp yik'ø'y'adōjijp? Ka'axi ja yjade'eni, pō tu'ukyixi tmi'ity ja wyinmaa'ñ. ²⁵ ¿Tits idø'ōn ojts x'ats'ejxiti? ¿Tu'uk ja jaa'y pōn janch øybi wet tō ñadyaxoxiyi? Pō wa'atsxi mee xnijawidi pōn tsuj wet nadyaxojxidip, pōn nekim taxondip pyikta'aky, jamts ja ñachojk'ityidi jam windsøn tyōjkjotpti. ²⁶ ¿Tits idø'ōn mjanch'ats'ejxtøø? ¿Tu'uk Dios kyugajpxy? Janch ja', ja' midy jawaani mōj, nika'ap yjade'eni sam yjadu'ukpidi. ²⁷ Yō Juan idø'ōn yiktejp ku Dios kyajpxy yide'en wyaañ:

Ǝxya ngajxjawyeni tu'uk ja nngugajpxy, pōn tyiktōjijp tyiktuudaajkip ja jaa'y wyinmaa'ndy: jøts myikupōkt ku ixpōjkin xminōjxkt.

²⁸ Ndukmadoodip ixyam jøts ku ni madsoo ka'ap pōn jade'en pyidsimñim ja Dios kyugajpxy sam yō Juan Bautista; pōni pōnts øts nja' xpaduujnip jøts ku tyōki mā øts ngutujk ndanitanit ja njaa'y, ja'ats ne'egi mōj yikpiktakp jøts nika'ap ja Juan Bautista.

²⁹ Jøts ku ja jaa'y ni'ijtyi jade'en tmadoodøø pōn jaty wyinaty tō yiknøbetyidi ja Juan, nayide'en ja yikugubajtpidi, jøts ja tjanchmi'bijktøø ja Dios jøts kudam ja ka'ap jade'en mibaat wyinmaamy'aaty; ³⁰ ka'ats ja tmōjpiaktøø ja fariseotōjkti jøts ja kajpxwejpitōjkti sā Dios ja wyinaty tō tyamidsokyidi, jøts ja ka'ap tkupōjktøø jøts Juan ja yiknøbatidit. ³¹ Jøts ja nwindso'n'ajtim wyaañ:

—¿Pōnxik øts jade'en meets n'uktami'ejxip? ³² Jade'en meets ndami'ejxi sam mutsk una'jkindi muum y'adø'øtsti jap maayjōtpty ku myi'una'jk tkagupōjkiyidi ja kyuyajtin midy yjatsōjky yjaguyatwampy, jade'ents ja ñawya'añidi: “Tō øø yikxon njaxu'uxy jøts ni mga'atsti; tō øø jotmay'øøgyim nja'øømi, nijade'ents mgajotmay'oo'kmidi.” ³³ Kuts ja Juan Bautista tō myiñ jøts ja kyakay kya'uuky ku ja ka'ap vino t'uuky, jøts meets mnimy jøts ku miku' ja myøø'tajtpy. ³⁴ Jøts ku ø tō njamemi jøts ku ø ngaamyi n'ukmi, jøts mnømidy jøts ku jøts janch kaxim ngay n'uuky, jøts ku tō mōøt namyigu'uk'atyiyi ja yikugubajtpidi mōøt ja ka'øyjaa'dyi. ³⁵ Pōni pōnts ja Dios yja' tkupōjkip, ja'ats tjaja'gyukip sam ja Dios yja' ttsōkyin.

Ku ja Jesús jam fariseo tyōjkjotp wyinaty pōn txøw'ajtp Simón

³⁶ Xjats ja fariseit nidu'uk tnimaay ja Jesús jøts ja tmøødit kaabyi tyōjkwindum. Jøts idø'ōn ja ojts tmøødi, ojts ñijxxy, tyōjkiyih'ñ jam fariseit tyōjkjotp, ja kaabyajt twinguwa'jtsiyih'ñ. ³⁷ Winets ja tō'øxyōjk tu'uk pōn ka'øyjaa'y'ajtp midy jam tsinaapy jam kajpjotp, ku ja tñija'wiyih'ñ jøts ku ja Jesús wyinaty tō ñijxxy kaabyi jam fariseit tyōjkjotp, jamts ja ojts tñija'aty ja pa'akxuu'kpi, tsagueegi tul'jtsjōtpty. ³⁸ Ñiyaxpim ja twingugu'xiyih'ñ ja Jesús tyey, jøts ja wyeenøø ja ttuktaxō'jky. Jøts ja nay jaty ja wyaañ ttawibō'oty jøts ja ojts tssu'lkxy, ojts ja ttabakja'axy ja pa'akxuu'kpi. ³⁹ Jøts ku ja fariseo ja ojts jade'en t'ixy pōn ja Jesús wyinaty tō wyayi migaabyi, yide'en ja wyinmaa'ñ ja jap tyikyø'øy: “Pōni janch Dios kyugajpxy yō jaa'y jeexyip, tō

yø jeexyip tja'wyini pøn yø ixa tojnip majtsip, pøni pøn tø'øxyøjk yø', pø ejtpts yø yjantyimpyøkyun'ity yø tø'øxyøjk." ⁴⁰ Winets ja Jesús tnimaay ja fariseo:

—Simón, nmigajpxwampy.

Jøts ja fariseo y'adsøøy:

—Yinet Windsøn.

⁴¹ Xjats ja Jesús wyaañ:

—Namajtsk idø'on ja jaa'dyi pøn tmijoy'ajttip tu'uk ja meeñ'anuu'kxyajkpi.

Tu'uk tmijoy'aty magoxk magø'pxy denario jøts jadu'uk wixijxmyajk; ⁴² jøts kumi ka' idø'on ja tkubatti nipøn tkagubety ja yoj, jøts ja meeñ'anuu'xyajkpi ka'ap ja sa tijy øy ja tkagubattit, ojts ja ttamee'kxy ja myijoy. Nigajpxts inet, çpømbi ja jawaani tsojkip, pømbi ja jawaani takajxajkip?

⁴³ Jøts ja Simón y'adsøøy:

—Ja' yjaw i pøn ja yoj kajaa tmøøt'ajtp.

Jøts ja Jesús wyaañ:

—Janch tiy idø'on mwa'añ.

⁴⁴ Xjats ku ja Jesús ojts t'ixy ja tø'øxyøjk jøts ja tnimaay ja Simón:

—M'ixpxy yø tø'øxyøjk, ku tø ndøki ya mdøjkjøøjty ka' mets ja nøø tø xmoø'øy ja ndekpyujik; tøts øts yø tø'øxyøjk ne'egi xapakpujy ja wyeenøø jøts ja wyaay yø tø ttuktati'ich. ⁴⁵ Ka'ats mets ndeky tø xtsu'kxi, jøts ku yø tø'øxyøjk, jaayip ku tø ndøki ixa øts ndeky yø jade'en xtsu'kxi. ⁴⁶ Ka' mets ngubajk aceite tø xpiktaajkxiyi, tøts øts yø tø'øxyøjk ja pa'akxuu'kpi ndeky xpiktaajkxiyi.

⁴⁷ Paty mets idø'on nnøjmi, pøni pøn ja tsojkin waani tmøøt'ajtp nayide'ents ja waani yikpojkpimaa'kxt; jøts yø tø'øxyøjk møj ja tsojkin yø tmøøt'aty paty pyaat'aty jøts ja pøky yikmaa'kxkøxt.

⁴⁸ Jøts ja tnimaay ja tø'øxyøjk:

—Nmee'kxpy øts, u'nk, yø mbøky.

⁴⁹ Winets ja migaabyidi pøn jaty ja jam wyinaty møøtsinaajyip yjanch-nawyambinaxwa'jkidøø:

—çPøn jaa'y ya'at ndejint, sudso pøky paat yø tme'e'kxy?

⁵⁰ Jøts ja Jesús yide'en ja tnimaay ja tø'øxyøjk:

—Ja'agøjxp mets ja mbøky tø nmaa'kxi ku me tø xjanchjawi, nøjknits jotkujk.

8

Ja tø'øxyøjk pøn jaty ja Jesús pyudøjkidip

¹ Tøts ja wyinaty y'uknaxy jade'en, jøts ja Jesús t'ayø'øgyiyxy ja kajp ja møj ja mutsk møøt ja pyabøjkpitøjk namakmajtsk, jøts ja tkajpxwa'kxy ja øgyajpxy ja øy'ayuujk mid i yjaa'y ja tyanitanaapy. ² Nay jam idø'on ja yjamyøøt'ajtmijidi ja tø'øxyøjkmidi pøn ja wyinaty tø tyiktsø'øky, jøts pøn ja wyinaty tø tkajpxpidsøjmi ja miku' jøts ja ttukmajtstu'uty. Ja María dø'on jam wyinaty pøn yiktejp Magdalena, pøn ja miku' wyinaty niwixujk tø myajtstu'udyiyi; ³ nay jam ja Juana wyinatymi, ja Chuza ñidø'øxy, ja ñidø'øxy pøn ja Herodes tumbi'ajtip, pøn tuki'iyi t'ejxp tnija'wip ti jam ejtp ka'ejtp ma ja Herodes jam wyindsøn'aty; jam ja Susana wyinatymi jøts may abikpyi jaa'dyi pøn jaty ja tigati tabudøjkiyidip.

Ku ja Jesús tmadyakpaaty ja jaa'y pøn nøjkn neppi

⁴ May jaa'y ja Jesús jam ojts ñimiñiyi pøn jaty tsoo'ndip o ma abikyajp jøts ja Jesús yik'ejxwa'añ; jøts ku ja jaa'y may'ampy myujkpejty, jøts ja ttamimadyaktøjkiyiñ tu'uk ja ejxpajtin madya'aky. Jøts ja wyaañ:

⁵ —Tu'uk idø'øn ja jaa'y chøø'n ñomtøwøjpi. Jøts ku ja twijy, øy ja tøm t o mā ñaxkidaajky. Midi'ibi ñajtswøjyiyi'ñ jam tuu'am, ja'ats yiktaa'nbu'uxkigyøjx jøts ja joon ja wa'ats tpeemujkijxy. ⁶ Midi'ibits ñajtswøjyiyi'ñ jam tsaa agujkp, ojts ja jam yjamuxy jøts ja jaty tyøtsjø'knaa ja'agøjxp ku ja naajx jam kyaneki. ⁷ Midi'ibits ñajtswøjyiyi'ñ mā ja maguyjp jam wyinaty myuxwa'añ, ja'ats ja ojts ñi'aa'mbajtinayi. Ku ja myujxmi winet jøts ja niwine'en kyayikyonmøjkiyøø. ⁸ Midi'ibits ñajtswøjyiyi'ñ jam pu'uty ñaxkøjxp, jøts ku ja yøøñ jøts ja ojts yikxon yjantyimdyøømi, magø'pxy magø'pxy ja pyajkpejty ja tu'ukpi tøm.

Ku ja Jesús jade'en myadyak'abajtiyiyi'ñ, jøts ja møkta'aky wyaañ:
—Pøni pøn ja'gyukiwyaamp, wan tjä'gyuki.

Tigøjxp idø'øn ja Jesús ejxpajtin madya'akyøjxp ja y'ixpøjkin tyaky

⁹ Winets ja pyabøjkpitøjk ja yiktøjyiyøø ti dø'øn jade'en tyijpy, sudso yikja'gyukit ja'abi madya'aky. ¹⁰ Xjats ja t'adsøøy jøts ja tñimaay:

—Meets yø Dios mduknija'wiyip ja y'ayu'uch winmaa'ñ sã ja' kyutujk midi ja tyanitanaapy ja yjaa'y, jade'ents meets ja mdyimykstumadøy; ka'ats ja abiky jaa'y nayide'en madya'akyøjxp tñijawidit, ejxpajtin madya'akyøjxp øts yø ja'ayi ndamimadya'aktit jøts kø'øm tñimado'odit tñanimado'odit nayide'en pøni sã ø xpabøkti xkapabøkti.

Ku ja Jesús tñigajpxy sudso dø'øn yikja'gyukit ku jaa'y neppi ñijky

¹¹ 'Yide'en idø'øn yø madya'aky tijy: Jade'en ja tøm yikpikta'aky sam ja Dios kyajpxy y'ayuujkin; ¹² jøts midi yiknajtswøjyiyi'ñ jam tuu'am jade'en ja yikpikta'aky sam ja jaa'y pøn ja tpatmadoodip ja Dios kyajpxy, jøts ku ja t'ukja'gyukidi xjats ja miku' ja jaty pyøjkiyidi jøts ja ka'ap tñibøktit, jøts ja nisudso'ampy kyanitso'ok'attit. ¹³ Jøts ja tøm jade'en yikpikta'aky midi yiknajtswøjyiyi'ñ jam tsaa agujkp sam ja jaa'yindi pøn tmadoodip ja øgyajpxy ja øy'ayuujk, jøts ja ejtni xoni t'ukpabøjkojti y'ukjanchja'widip ja'; kuts ja yiin waan sã tkujatidi jøts ja jaty tñajtsu'utti, jaty ja ñayjibikpyikta'agyidi ja'agøjxp ku ja jade'endi sam ja ujts kya'aa'tsmäweninim. ¹⁴ Jøts ja tøm midi ñajtswøjyiyi'ñ jam kujp agujkp, jade'en ja yikpikta'aky sam ja jaa'dyi pøn tñamadoodip ja øgyajpxy ja øy'ayuujk, yjajanchja'widip jøts nika'ap t'ukpadunidi, ja' ja ne'egi yikmajadaktip ja pyikta'aky, ja myeeñ, ja yjingaap, ja yjotkuj'ajtindi. Jade'ents ja tka'ukyikmøjtøjkinidi ja øgyajpxy ja øy'ayuujk jøts ja niti tkayikwingaxø'økti Dios wyindum. ¹⁵ Jøts ja tøm midi ñajtswøjyiyi'ñ jam pu'uty ñaxkøjxp, jade'en ja'ami sam ja jaa'dyi pøn amumjoojt nadyamiyøjxidip ja Dios, jøts ja jade'en tpatmadøjidi ja y'øgyajpxy y'ø'y'ayuujk. Møk ja yjanchja'win ja tpikta'akti, ka'ap ja juuni tñamajtsu'utti, ja'ats idø'øn tyikwingaxø'ktip ja øgyajpxy ja øy'ayuujk.

Niti jadi'iñi kyatañ, kuwañim ja tyimyiknijawi

¹⁶ 'Kidi ja'ajip ja jaj yiktaguno'kp jøts ja yikumutst uk jøts ja yikpikta'akt jap maabajt patki'py; ja' ja wya'añ jøts ja yikpikta'akt jam køjxp mā yjajt tyøø'kxt, jøts ku jam pøn tyøkit ka'ap ja jam kube'ets kugoots yja'attit. ¹⁷ Ti ka'ukyikpatp ku ti yjayu'uch'ity. Øy kajpxy ayuujk yjagayiknigajpxwa'añ, kuwanits ja yiknijawi pøni sã ja y'eji tyiyi.

¹⁸ 'Jade'ents idø'øn øy xmado'odit; pøn tpabøjktip jøts tmadogukiwya'andi øy øy, jaa'kyikpudøkipts ja yikxondi jøts ja tjä'gyukidit. Pønts ka', jaa'kyimykpøjxidip ja' ja wyijy'ajtindi midi ja jaa'kanadyaja'wiyidip jøts ja nisudso'ampy tkidyimya'gyukidit.

Ja Jesús tyaaq jøts y'uch

¹⁹ Winets ja Jesús y'uch yja'ttøø møøt ja tyaak ma ja jam wyinaty, nika'ap idø'øn ja tpaatti wingon kumi janch mayjaa'y jam wyinaty. ²⁰ Xjats ja Jesús yiktukmadøøy jøts ja yiknimaay:

—Ja mdaak møøt ja m'uchti ja' mmigajpxwajnip, ixap ja tøjkwimptyi.

²¹ Jøts ja t'adsøøy:

—Ja' øts idø'øn ndaagip, ja' øts idø'øn n'uchidip nmigu'ugidip, pøn tmadoodip ja Dios y'øgyajpxy y'øy'ayuuik jøts ja jade'en tpadundi pøni sa nwa'añ.

Ku ja Jesús tyiknajxy ja møk poj jøts ku ja tyik'amøkiy'iñ ja mejy

²² Winets ja nay ja'abi xøøw tyøjkiy'iñ barkijøtpty møøt ja pyabøjkpitøjk, jøts ja tnimaay:

—Wan tjaa'myindi jam jaduktamajñ.

Jøts ja ñøjkxtøø, ²³ jam ja wyinaty mejkyujk'amdi ku ja Jesús mya'oo'knaa. Jøts ja møk poj ja jam jotmøñ pyaajtidoø, yikxon ja nøø jam barkijøtpty janchtøjkyini øy ja tyiknitigøøñit. ²⁴ Jøts ja tyujxtøø ja Jesús jøts ja tnimaadyøø:

—iWindsøn! iWindsøn! iNøøjøø'kxwaa'nindip!

Winets ja Jesús pyidi'jky jøts ja møk'ampy twingugajpxiy'iñ ja møk poj ku ja nøø ja tyiktojmji'iky adsø'jkibim; jøts ja poj jatyi yjanch'amø'jty, jadi'iñi ja myøøñ. ²⁵ Jøts ja tnimaay ja pyabøjkpitøjk:

—iMa dø'øn ja mjanchja'windi xyiktunwa'andi?

Tø ja yjanchnichø'jkidyigøøñidi, ñigyumaap ja tyimya'widøø jøts ja xem yam ñawyajnidøø:

—iTi pønimts ya'at jade'en, pø mimadojipst ja poj yø', pø mimadojipst ja nøø yø' ku yø' t'ane'emy?

Ja Gadarit jaa'y pøn wyinaty ja miku' tø tyatøkiyi

²⁶ Jøtsnim ja yja'ttøø jam Gadarit etjotp mididi idø'øn ja jaduktamajñ tãmp Galileit et wingon. ²⁷ Jøts ku ja Jesús jam wyinaajky, yø'øpyidsiimy, jøts ja ñimejnøø tu'uk ja kugajp pøn ja miku' wyinaty jekyip tø tyatøjkniyi. Niwa'ats ixwa'ats ja wyidejtni, ka'ap ja tyøjkjotp y'uksinaañi, jam ja chinaadyakni ma ja oo'kpi ñaxøkidi. ²⁸ Jøts ku ja t'ejxpaajty ja Jesús jøts ja jatyi twinguxanaay, yide'en ja tjantyimñøjmi møkta'aky:

—Jesús, Dios U'nk tsajpjøtptyi, i ti ø xani bøkkip? Tun may'ajt kidi xjantyimy'ayo'onduñ.

²⁹ Ja' idø'øn ja jade'en tyikwamp ku ja Jesús ja miku' møk'ampy t'ane'emy jøts ja jam pyidsøømt ja jaa'y y'am yjotp. Ejtp idø'øn ja miku' ja xyumimi'adi'ichiyi ku ja yjayiktagiwiñ yjayiktapakwiñ pujk kadeen; jatyi ja ttapojtiguixy yam ja jaa'y ja jade'en tø yja'uktajotkujk'ajtmiiyi jøts ja nima kyanøjkxt, jøts idø'øn ja miku' ja yikakwidityi o ma jam abak etjotp. ³⁰ Jøts ja Jesús yide'en tyiktiyi:

—iTi mxøøw?

Jøts ja y'adsøøy:

—Legión ø nxøøw.

Ja'agøjxp ja jade'en ñaxyøømøøyi kumi janch may miku' ja wyinaty tø tyatøkiyi. ³¹ Ja'axi dø'øn jade'en kø'øm wandip jøts ja tnimaadyøø ja Jesús jøts ja ka'ap kyaxidit jam ma miku' y'ayo'ombagatti. ³² Jamts wyinaty ja kuch yjøø'kxwajejtmidi jam kojpkøjxp ku ja miku' ñuu'kxaktøø jøts ja ttatøkidit ja kuch; yikjajt idø'øn ja Jesús ja jade'en. ³³ Xjats ja miku' tmajtstuttøø ja jaa'y jøts ja kuch ja ttatøjkidoø, winets ja jiyujk niduki'iyi yjanchepkuwo'ongøjxtøø jøts ja nøøjøtpty ñaxkidakøjxtøø, japst ja ojts ñøøjøø'kxkøxti.

³⁴ Jøts ja jaa'y pøn wyinaty kuch'ejxtip ku ja jade'en t'ejxtø yjatti kyu-batti ja kyuch, jøts ja yjantyimchø'jkidøø, jøts ja kyaknøjkxtøø jam mā jaty pøngapøn chøøni kamjotp jøts nayide'en jam kajjotp, jamts ja tuki'yiyi ttamimadyakøjxtøø. ³⁵ Jøts ja jaa'y ja tndiso'ongøjxtøø jøts ja t'ejxwa'andi pøni janch idø'øn jade'en. Jøts ku ja yja'ttøø jam mā ja Jesús jam wyinaty, xjats ja t'ejxpattøø ja jaa'y pøn ja maamyiku' wyinaty tø myajtstu'udyiyi jøts ku ja jam chøøni wijy kejy, xøxy piky ja jam mā ja Jesús wyinaty tyani, jøts ja yjantyimchø'jkidøø. ³⁶ Jøts ja jaa'dyi pøn wyinaty kø'øm tø tyimy'ejxti, ja'ats ja tmadyaktøø sudso'ampy ja ja jaa'y wyinaty ja maamyiku' tø myajtstu'udyiyi. ³⁷ Ja'agøjxpts ja jaa'y ni'lijtyi ņuu'kxaktøø pøn jaty jam wyinaty tsinaadyip Gadara jøts ja Jesús jam pyidsø'ømt etjotp, pø jantyimchø'jkidipxi dø'øn ja'adi. Jade'ents ja Jesús ttatøjkii'ñ ja byarki jøts ja chø'ñ. ³⁸ Jøts ja jaa'y pøn wyinaty tø myajtstu'udyi ja maamyiku', ja'ats møk'ampy nuu'kxakmaa jøts ja yikmøødit jøts Jesús ja tmøøtnøjkxt, jøts ja ojts t'ane'emy jøts ku ja ne'egi ty'a'ant, yide'en ja tnimaay:

³⁹ —Nøjx mdøjkwindum, jamts xnigajpxt xnimadya'akt sã Dios tø m'ødyuñiyi.

Nøjx idø'øn ja jaa'y jøts ja ttamimadyakøjkiyii'ñ amuum ja mayjaa'y sã Jesús ja wyinaty tø yikmøkpiykiyi yik'ø'y'atyiyi.

Ja Jairo ñøøx, jøts ja tø'øxyøjk pøn ja Jesús wyet ojts ttojni

⁴⁰ Jøts ku ja Jesús wyimbejtñaã ñøjknimaa jam jaduktamajñ, pøkpaat may jaa'y ja jam yjanchja'wiyøø, pø tum awejxipxi ja jaa'y ja wyinaty.

⁴¹ Xjats tu'uk yaa'dyøjk yja'jty pøn txøøw'ajtp Jairo, ja' idø'øn jam wyinaty tniwindsøn'ajtp ja tsaptøjk. Jøts ja ñagyuxendyaajkøø jam Jesús tyekyjø'øm jøts ja tnimaay, ojts ja ņuu'kxa'aky jøts ja myøøtnøjkxiyit jam tyøjkwindum. ⁴² Jam ja tyu'ukpi nøøxu'nk, makmajtskin ja' yjumøjt ja wyinaty, ja'ats jam wyinaty oo'kp ka'oo'kp. Jøts ku ja Jesús ojts ñijkxy, janch may jaa'y ja pyadso'onøø, janch yikxon ja yik'atejmuky.

⁴³ Jamts tu'uk tø'øxyøjk pamaa'y, myakmajtsk jumøjtyip ja tajxnaxyi ja pyaajtniyyi. Tø ja tndiya'ayodøjkini ku tsøøyibi ja jadine'en tjamijuy jøts ja nipøn yjanchkayiktsø'øgyiyi. ⁴⁴ Xjats ja ojts wingon tjiguyø'øyi ja Jesús, jøts ja wyet pa' ja ojts tjøjxi, jøts ja tyajxnaxyi ja nay jaty y'adujky.

⁴⁵ Jøts ja Jesús yide'en tyiktiyyi:

—¿Pøn ø tø xøñ?

Kuts nipøn tkanigajpxy, jøts ja Pedro møøt ja myigu'uk wyandøø:

—Windsøn, pø mjanchyik'atejmujkpts, nugots mjanchyiktejmiñ mjanchyiktejxipy, jøts mnimy: “¿Pøn ø tø xøñ?”

⁴⁶ Jøts ja Jesús wyaañ:

—Tø ø nyiktøñ, tø njawi jøts ku øts nmøk'ajtin tø nduktamøkpiyki tu'ugin ja jaa'y.

⁴⁷ Xjats ja tø'øxyøjk, pø ja'axi tam idø'øn yiktejp, jøts ja ojts ñimyibejpnii ñichiyuuñi ñagyuxendya'agyi jam Jesús tyekyjø'øm, jøts ja ojts ttukmadøy jam mayjaa'y agujkp tigøjxp ku ja wyinaty tø ttøñ jøts ku ja nay jaty myøkpijky.

⁴⁸ Winets ja Jesús ja ñimaajyøø:

—Ja'agøjxp u'nk tø mmøkpiyki ku ø tø xjanchjawi. Nøjknii amgujk jotkujk.

⁴⁹ Exam ja Jesús wyinaty jade'en wya'añim, ku yja'jty tu'uk ja jaa'y pøn tsoo'mp jam tsaptøjk windsøn tyøjkwindum, ja Jairo. Jøts ja Jairo yiknimaaay:

—Tøts ja mnøøx y'anuu'kxiñi, kidi yø windsøn nugo x'adsejp'adi'ich.

⁵⁰ Jøts ku Jesús ja jade'en tmadøøy, jøts ja tnimaay:

—Kidi mdsø'øgi, møk m'aaw mjoojt xpikta'akt, tu'ugyi ø xjanchjawit, jujkpyøkp ja m'u'nk inet.

⁵¹ Jøts ku ja jam tøjkwindum yja'ttøø, ka'ap ja jap tøjkjøtpy pøn tyiktøjkiyi'ñ, ja Pedro ja ja'ayi myøøtøjkiyi'ñ møøt ja Jacobo møøt ja Juan jøts ja u'nkteyte u'nktaak jade'eñi. ⁵² Janchyaxtip ja wyinaty, ja y'u'nk ja tyimchaachpa'ayoodip. Jøts ja Jesús ja ñimaajyidøø:

—Kidi mya'axti; ka'ap yø kiixy y'øøky, maapts yø ja'ayi.

⁵³ Jøts ja yjanchyiknixijky, pø ñija'widipxi ja' jøts ku ja wyinaty tø y'oo'kni.

⁵⁴ Xjats ja Jesús ja tmajch kyøjøp'am, jøts ja møk'ampy tñimaay:

—Pidø'øk, u'nk.

⁵⁵ Jøts ja yjujkpyijky, nay jaty ja pyidi'jky; jøts ja Jesús ja ojts tni'ane'emy jøts ku ja tyika'adyit. ⁵⁶ Ñigyumaap ja møjaa'y ja tyimyja'widøø jøts ja Jesús ja tñimaay jøts ka' pøn ttukmado'odit ku dø'øñ ja wyinaty jade'en tø tyuñi jyaty.

9

Ku ja ñimakmajtskpi pabøjkpitøjk yiktanipøkti ja tunk jøts ja yikajxtsoondi

¹ Xjats ja Jesús tñankñamyujkøø ñimakmajtsk ja pyabøjkpitøjk jøts ja myøk'ajtin ja tmøøy, ojts ja tkutujkmø'øy jøts ja tyikpidsøjmilit ja jaa'y ja miku', jøts ja tyikmøkpøktit ja pamaa'y. ² Ojts ja tkexy jøts ja Dios y'øgyajpxy y'ø'ayuujk ja tkajpxwa'kxidit midi ja tyanitanaapy ja yjaa'y jøts ja tyiktso'oktit ja pamaa'y. ³ Jøts ja tñimaay:

—Ka' mniyø'øyik xko'ondit, ñiti xkako'ondit, ni tajk, ni pejn, ni tsapkaaky, ni meeñ. Tu'ugyi mwet xminøjkxtit midi ixja mwet'ajttip. ⁴ Jøts ku mdøjk'amido'odit o ma pøni ma mja'tatti, tu'ugyits jam mja'ta'aktit kunim jam mdsoonditnim. ⁵ Jøts ku ma pøn mgagupøkidit, tanaxtits ja kajp, ja'ayi ja pu'ux x'ukwinaptit jøts jade'eñi xuk'ejxtit jøts ku jade'eñi tø mnañiwa'achidi.

⁶ Jøts idø'øn ja yø'øwya'kxtøø, ñøjkxtøø o magajp, jøts ja jam tkajpxwa'kxti ja øgyajpxy ja øy'ayuujk jøts ja pamaa'y ja tyiktso'okti o madsoo.

Ku ja Juan Bautista ja o'jkin tpaajty

⁷ Xjats ja windsøn Herodes ku ja tñija'wiyi'ñ sa jaty ja Jesús wyinaty y'adi'ich, jøts ja ka'ap ti tabyajtin tpaajty pømbi ja ñimaajyip jøts ku ja Juan wyinaty tø yjujkpyiky, ja' wyinaty tø pyidsimy jadigojk jap oo'kpi jutjøtpy.

⁸ Pømbits wandip jøts ku ja yja'aji ja Dios kyugajpxy Elias, jøts ku ja' wyinaty tø kyaxi'iky; pømbits nømidip jøts ku ja yja'aji ja Dios kyugajpxy pøn wyinaty windi'ixyip tø y'atmendi, ja' nidu'ugin tø pyidsimy jadigojk. ⁹ Jøts ja Herodes wyaañ:

—Pø øtsimpts ja Juan kyubajk kø'øm nankyikwinajkøø. ¿Pønts idø'øn ndejin yø'ixa njamado'ity yiknimadya'aky janch ñigyumaap?

Jøts idø'øn Herodes ja tjadyimwyin'ejxwaañ.

Ku ja Jesús yikaay ja ñimagoxk milbi jaa'y

¹⁰ Xjats ku ja Jesús kyudanaabyi wyimbejtøø, ojts ja tyamimadyakixyi ti jaty ja wyinaty tø ttundi. Winets ja ojts twaadsøøñ jøts ja tmøøtnijky ma nipøn kya'ity jam Betsaida kajp wingon. ¹¹ Kuts ja jaa'y ja tñija'widøø, jøts ja ojts tpanøjkxti; kyupøjks ja Jesús ja' jøts ja ojts ttamimadya'aky sa ja y'ejxi tyiyi ja Dios kyutujk midi ja tyanitanaapy ja yjaa'y, jøts ja tyiktsoøjky may ja pamaa'y.

¹² Jøts ku ja et chuu'ñaa, xjats ja ñimakmajtskpi kudanaabyi ja ñimejnøø jøts ja ñimaajyøø:

—Kajxni yø mayjaa'y, jøts nøjx pyoo'kxniidi jøts nøjx t'ixaañidi ja kyaajjik yjøø'kxik o magajp midi ya wingon tãmp, nitits ya kya'ity ma adøm yaadi.

¹³ Jøts ja Jesús ja ñimaajiyidøø:

—Yikaydi meets.

Jøts ja tñimaadyøø:

—Ja'ayits tsapkaaky jap jamagoxkyi jøts ajkx majtskyi, pø winet inet idø'øn pøni nda'ajuu'yigyøjxp øøts inet yø jaa'y ja kaaky ja jii'kxy.

¹⁴ Nimagoxk milin ja jaa'y jam wyinaty. Xjats ja Jesús tñimaay ja pyabøjkpitøjk:

—Yik'ixa'akti tukpij jaty niwixijxmyajk jaty.

¹⁵ Jøts idø'øn ja jade'en tpadundøø, ojts ja jaa'y y'ixakøxti. ¹⁶ Winets ja Jesús tñixajiyii'ñ magoxk ja tsapkaaky jøts majtsk ja ajkx. Ojts chajp'ixy jøts ja ttamøja'wiyii'ñ ja Dios Teety. Jøts ku ja t'adujkpajky, jøts ja ojts ttagøðøki ja pyabøjkpitøjk jøts ja mayjaa'y ja ttaguma'adyit. ¹⁷ Ojts idø'øn ja niduki'iyi kyay'abidsømdi, niduki'iyi ja kyujxidøø; jøts ja kaaky wyindank ja makmajtsk kach ujts ujts yikpøkmujky.

Ku ja Pedro wyaañ jøts ku ja Jesús yja'aji pøn yiknitsokp

¹⁸ Tuk'ojk idø'øn ku ja Jesús jam wyinaty ja Dios Teety t'ajot'aty nadyu'uk, jamts idø'øn pyabøjkpitøjk ja pyawidityiyi jøts ja tyiktiy:

—¿Sa jaa'y wya'andi kyajpxti, pønik øts idø'øn?

¹⁹ Xjats ja y'adsoodøø:

—Pømbi wandip jøts ku mets Juan Bautista; pømbits wamidip jøts ku mets m'Elías, nømidipts jadu'uk jøts ku me mja'aji ja Dios kyugajpxy pøn mendøø jekyip jøts ja' nidu'ugin tø wyimbity jadigojk.

²⁰ Jøts ja tjaakyiktiy:

—Jøts meets, ¿sa mee mwa'añ, pøn øts yja'wi?

Jøts ja Pedro wyaañ:

—Cristoxi mets, ja yiknitsokpi, ja Dios U'nk.

Ku ja Jesús tñigajpxy ja y'o'jkin

²¹ Winets Jesús ja ojts møkta'aky t'ane'emy jøts ja ka'ap tmadyakyø'ødyit.

²² Yide'en ja yiknimaadyøø:

—Møk øts ja ayo'on nbaatt, ka' øts ja møjaa'dyøjk xkupøktit, ka' øts ja teetywindsøndøjk xkupøktit, ni ja kajpxwejpitøjk ø xkagupøktit. Xyik'ooktip øts ja', ja kidigøøk xøøwts ø nbidsøømt jadigojk oo'kpi jutjøtpy.

²³ Jøts ku ja jade'en wyaañ, winets ja tñimaay niduki'iyi pøn jam wyinaty:

—Pøni pøn ø xpabøkwãmp, jawyeen ja køøm kyanabya'ayowit, jabom jabom øts ja xku'ayowit, ja'ats øts idø'øn xpabøjkp. ²⁴ Pønts køøm nabya'ayojip, pøn kasaduñim nay'ejxip, windigøøpyts y'anmija'win ja y'ity; pønts ø xku'o'jkp xkudigøøyip, ja'ats ja yja' nøjx nitso'ok'ajtp.

²⁵ ¿Ja ti ja ñiwy'a'ant øy ja jaa'y tjaja'bøjkixy ja na'xwiiñ'ajtin jøts ja y'anmija'win ne'egi wyindingøy?

²⁶ Jøts pøni pøn ø xatsø'ødyump, pøni pøn øts n'øgyajpxy n'øy'ayuujk xatsø'ødyuujnip, nayide'ents øts ja tsø'ødyumbi nøjx ndatsø'ødyuñ, ku ø nme'ent yikutujkpi, ku øts ja ndeety kyunuu'kxy'ajtin nmimejnit møøt ja ankilistøjk yja'adi. Øts idø'øn ja na'xwii'ñit jaa'y nmøjkudanaabyi'ajtpy.

²⁷ Tiy janch mee nnøjmi jøts ku jaa ja jaa'y ya winaagin tyanidi, pøn ka'ooktip kunim ja tyimy'uk'ejxtit sa Dios kyutujk tmime'ent midi ja tyanitanip yja'a'y.

Ku ja Jesús adsu'jky y'atstigajch amuum chamambøjkixy

²⁸ Tø dø'øn ja wyinaty tyuktujkxøwip jade'en y'ukjaty, jøts ja Jesús py-atøjkijii'ñ jam kojpkøjxp Dios'ajot'ajtpi, myøødiyii'ñ ja Pedro ja', møøt ja Jacobo jøts ja Juan. ²⁹ Kuts ja Jesús jam wyinaty Dios'ajot'aty, xjats ja wyeen y'aaw ja tyigajch, jøts ja wyet ja ñaamy ja pyoobiyii'ñ tøø'kxpiim tsamambim. ³⁰ Winets jam kyaxøktøø namajtsk ja jaa'y, ja'ats ja jam møøt myadya'aky, ja Moisés idø'øn ja' møøt ja Elías, ³¹ nabejk'ampyaju'uk ja ñi'awidityidi jøts ja tkajpxy'atti ja o'jkin midi ja Jesús wyinaty pyaawtampy jam Jerusalén. ³² Øy ja Pedro møøt ja myigu'uk yjamaa'y'lookti, wijy'ejttip idø'øn ja'. Jøts ja ojts t'eixidi ja Jesús y'aju'uk møøt ja ñamajtskpi yja' nayide'endi pøn ja jam wyinaty møøt tyani. ³³ Jøts ku ja jaa'y jam wyinaty jagamnidi, jøts ja Pedro tnimaay ja Jesús:

—Windsøn, jtyimy'øy'ajtp ku øø nyam'aty! Nyik'øyip øø tigøøk ja ujts'aadyøjk; tu'uk mets mja', tu'uk Moisés yja', jøts tu'uk Elías yja'.

Ka'ap idø'øn ja Pedro y'aaw tjawi pø ti dø'øn ja kyajpxpy. ³⁴ Exam ja jade'en wya'añ ku yoots jam ñaxkidaajky, jøts ja yjanchø'jkidøø ku ja jap yoots agujkpy ñay'ejxpajtidøø. ³⁵ Winets ja tmadoodøø ku jap yoots agujkpy kyajpxy ku jap ñimy:

—Øts idø'øn ya'at n'u'nk njanchøjkpy; mimadojidip pøni sa wya'añ.

³⁶ Ku ja wyinaty jade'en tø tmadowdiwya'añ, xjats ja t'ejxpatøø ja Jesús jøts ku ja jam nadyu'uk. Amøñi ja y'ejttøø, ka'ap ja pøn ttukmadowdi ku ja wyinaty jade'en tø t'ejxti.

Ku ja Jesús tyikmøpkijky tu'uk ja mixyu'nk pøn wyinaty ja miku tø tyatøkiyi

³⁷ Jøts ku kyimjabom'ajty, ku ja ojts kyidaknidi jam kojpkøjxp, jøts mayjaa'y ja Jesús yjøkubajtyøø. ³⁸ Jøts ja jam nidu'ugin møk'ampy ñimaajyøø:

—Windsøn, tun may'ajit, win'ejxik øts n'u'nk, yø'øyi ø tu'ugyi n'u'nk'ajtpy;

³⁹ miku' idø'øn yø xumitatøjkijyp, jøts yø yjanchxumiyiktsabaayi, yikmo'jtniyip yø', jøts janchyik'a'oo'pniyip tñankwyinwøpyi tñankjyøpwøpyi. Nijade'ents kyamajtsu'udyi, am'ijxyim tsaach'ijxyim yjaty. ⁴⁰ Tø øts yø mbabøjkpi njanøjmidi jøts jeexyip yø miku' tyikpidsømdi, nika'ats yø tø myayidi.

⁴¹ Xjats ja Jesús wya'añ:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkit? ¿Windemnim meets yø yjade'embi xuktatso'okt ku øts yø ejtp njanchjanigajpx'ity? Mets, yikmen yø m'u'nk.

⁴² Xjats ku ja mixy wingon myiñ, jøts ja miku' ja ojts yiknaxkida'agyiyi jøts ja tyukpatkojmiiyi ja mø'ødyi; winets ja Jesús ja miku' twingugajpxiyii'ñ jøts ja tyikmøøy møk møjaaaw. ⁴³ Nigyumaap ja jaa'y ja ni'ijtyi tja'widøø ku ja Dios ja myøk'ajtin jade'en tyikwingaxi'iky.

Ku ja Jesús tñigajpxy jadigojk jøts ku ja y'ookt

Exam idø'øn ja jade'en wyinaty ku ja Jesús tnimaay ja pyabøjkpitøjk:

⁴⁴ —Madowdi ya'at, jøts kidi xja'dyigøydi nijuuni; øts, yikøyakp øts jøts øts ja mayjaa'y nyiktagøðokit.

⁴⁵ Jøts ja pyabøjkpitøjk ka'ap ja tja'gyukidi ku ja jade'en wya'añ, jøts nika'ap idø'øn ja ttuknimadøy; tsø'jkimidipts ja' jøts ja tyiktøðdit ti dø'øn ja jade'en tyijpy.

Pøn idø'øn jawaani møj ma Dios ja yjaa'y ja kyutujk ttanitani

⁴⁶ Xjats ja tkajpxy'ajtpinibøjkidøø pømbi jadyimy'ukmøjtøkip, ⁴⁷ wa'ats ja Jesús ja tñijawi sa ja wyinaty wyinmaydi. Winets ja ojts ttsa'anji'iky tu'uk ja mutsku'nk jøts ja ñadyawingudsaa'niyøø, ⁴⁸ jøts ja wyaañ:

—Pøni pøn øts ya'at mutsku'nk xkupøjkxip, øts idø'øñ ja wyinaty xkupøjkp; pøni pønøts øts jade'en xkupøjkp, ja'ats idø'øñ ja wyinaty kyupijkp pøn ø xkajxp. Pønøts kanamyøjpiktaajkip wine'enin meets ixaadi, ja'ats idø'øñ nøjkx møjtkjkip.

Ku ja Jesús wyaañ: Adøm ja' nbudøjkibi pøni ka'ap adøm ja xmidsep'ajtyindi

⁴⁹ Xjats ja Juan tñimaay ja Jesús:

—Windsøn, tø øø n'ixy tu'uk ja jaa'y tyikpidsimy ja miku' mets mmøk'ajtingøjxp; tøts øøts ja ndukmajtstu'uty kumi ka'ap adøm ja xmøøtwidijtyim.

⁵⁰ Jøts ja Jesús ja ñimaajyøø:

—Kidi xuktamajtstu'utti; adøm ja' nbudøjkibi pøn ka'ap adøm ja xmidsep'ajtyindi.

Ka'ap ja Jesús tyikjajty sa wya'andi ja Jacobo møøt ja Juan

⁵¹ Jøts ku ja et ja xøøw tpaajty ku ja Jesús wyinaty ñøjkxwani tsajpjøtpy, xjats ja jotmøk'ampy chøø'ñ jøts ja ñijky jam Jerusalén. ⁵² Ojts ja tkajxjawyeni kyugajpxy, jøts ja ñøjkxtøø jam Samariit etjotp jøts ja jam t'ixaajyidit ja yja'taajk; ⁵³ ka'ats ja Samariit jaa'y ja tkupøjktøø ja agøjxp ku ja tñija'widøø jøts ku ja ñijky jam Jerusalén. ⁵⁴ Kuts ja Juan ja jade'en t'ejxtøø møøt ja Jacobo midi ja pyabøjkp'ajtpy, jøts ja ojts ñi'mxyi:

—Windsøn'ajtim, t'etuñ øø nayide'en sam ja kugajpxy Elias y'adijch, n'amido'op øøts ja jøøn tsajpjøtpy, wan yø jaa'y tkudigøøgyøxti?

⁵⁵ Jøts Jesús ja nugo twin'ijxy jøts ja møk'ampy twingugajpxiyi'ñ, yide'en ja tñimaay:

—Ka' meets yjawi xja'gyukidi pøn meets myøk'ajtin mmøøt'ajtxiyip.

⁵⁶ Nmøjkudanaabyi'ajtpy øts ja naqxwii'ñit jaa'y, kaja'ajip ø tø nnimiñ jøts øts ja jaa'y nyik'ookt nyiktigø'øty, ja' ø tø nnimiñ jøts øts ja jaa'y nyiknitso'ok'att. Xjats ja choo'ndøø jøts ja ñøjkxtøø abikyajp.

Ja jaa'y pøn tpaawidetwandip ja Jesús

⁵⁷ Jøts ku ja wyinaty jam tyuu'yø'ødyi, jøts ja Jesús ja jaa'y tu'uk ñimaajyøø:

—Windsøn, tsoomp øts, nbanøjkxp mets o madsoo pøni ma me mnijky.

⁵⁸ Jøts ja Jesús y'adsøøy:

—Ne'egi jaa ja waajx ja yjut, ne'egi jaa ja joon ja pya'an; jøts øts niti ø xka'ejtxi øyik øts idø'øñ ma n'ønø'ønt.

⁵⁹ Xjats ja Jesús jadu'ukpi jaa'y tñimaay:

—Møødik øts.

Jøts ja wyaañ:

—Windsøn'ajtim, wan øts ndeety jawyeen t'atsyiknaøkxi.

⁶⁰ Jøts ja Jesús y'adsøøy:

—Majtstu'ut, wan ja tyikpidø'økti ja myi'oo'kpi pøn y'anmija'win jaju-kyi tø tyik'oo'knidi; jøts mets, nøjkx mets ja Dios y'øgyajpxy y'øy'ayuujk xkajpxwa'kxi.

⁶¹ Jøts ja jade'en ñimaajyøø:

—Windsøn'ajtim, nmøødiwyampy mets, nijky øts nmigu'uk t'atstukmadøy, nijky øts t'atsnagajpxpidsimy jawyeen jap ndøjkjøtpy.

⁶² Jøts ja Jesús ja tñimaay:

—Ku jaa'y yu'uy, ja' ja y'ijxpy ja tyunk; pønts ejxjimbejt'adøtsp, tits ja nyikwa'anint. Jade'ents idø'on ja Dios wyingujkp ma ja ttanitani kyutujk ja yjaa'y; pøn ja tu'ugyi amumjoojt kamiduujniyip, tits ja jam ñiwy'a'ant.

10

Ku ja Jesús tkajxwa'kxy ja ñidugui'pxmyajkpi jaa'y

¹ Jøts ku ja jade'en y'ukjajt, jøts ja nwindson'ajtim twiwijch ja ñidugui'pxmyajk ja yjaa'y, jøts ja tpaguejxy namajtsk jaty. Jade'en ja ojts tyiknijkxy o magajp ma dø'on ja kø'øm wyinaty ñøjkxwa'añ, ² jøts ja tnimaay:

—Janch may pikta'aky pyidø'økwa'añ, ka'ats ja tumbi myayidi. Paty mee x'amido'ot ja kubiktā'aky jøts tjaaaxt ja tyumbi jøts pyidø'økt ja pykta'aky. ³ Nøjkxtis meets; jade'enxi mee mnøjkxt sam borree ñijkxy ma may miy'uk jamdi. ⁴ Ni mbejn xkawetstet, ni mmeen'abøjk'ii'ñ, ni mgø'øk, niti xkako'ondit; jøts kidi pøn xmi'øømayidi xmigajpxmayidi ku pøn xkajpxpoo'kxtit tuu'ajy. ⁵ Jøts ku ma mja'taajk x'amidowa'andit yide'en jawyeen mgajpxpoo'kxtit: “Ma meets, Dios mjagyepyi.” ⁶ Pøni jamts pøn jotøjkijy ja Dios, ja'ats idø'on Dios janchjagyapip; pøni ka'ats pøn m'adsojimbajtixiyidi ja mgajpxpoo'kxindi, anaxtits ja tøj. ⁷ Jøts jam mda'andit ja' tyøjkjotpti pøn Dios jotøjkijyidip, mga'adyip mjøø'kxtit idø'on pøni ti ja mmøøjyidip, mbaat'ajttip ku jade'en myikmo'odit. Kidits tøjkp tøjkp nugo mwidetti. ⁸ Ku o magajp mja'attit, pøni ma myikupøkti mga'adyipts mjøø'kxtipts ja' pøni ti myikmøødyip; ⁹ myikmøkøktip ja pamaa'y jam, jøts ja jaa'y xnøjmidit: “Jaani Dios kyutujk ya midi ja tyanitanaapy yjaa'y, ja adøm ja nmøø'tajtna'andi.” ¹⁰ Kuts ma ja kajp xpaattit ma mgayikupøktit, yø'øpyidsømdits jam jøts tuu'am mnø'ømdit: ¹¹ “Pu'uxpaat øø ndekyijxy tø tya'tspøjkni midi ya kajpjøøjty, ixyamts øøts nyikwa'ach meets køjxp, ejxti sa x'ejxti, nañiwaajtsip øøts jade'en. Ja ti winets xkanijawidit, jaa Dios kyutujk wyingøn midi ja tyanitanaapy ja yjaa'y.” ¹² Ixyamts mee ndukmadøy jøts ku nøjkx ja tiidyu'unin ñaxy, ne'egi kajaa yø yjade'embi jaa'y ja ayo'on tyimbyaattit, jøts nigidi jade'en y'ayo'ombaattit ne'egi ja kawindiy jaa'dyi pøn jam Sodoma kugajp'ajttøø.

Ja ayo'on midi tyanaxtip ja ka'øgyajp

¹³ 'iCorazingit jaa'dyi, Betsaidit jaa'dyi, mjanch'ayøøy meets, ti jade'en mnadyatuujnidip! Ku jeexyip jam kajpjotp jam Sidón jam Tiro ne'egi yiktuñ ja milagri'ajtin midi meets ya tø myiktu'unxi, windi'ixyip ja jeexyip ja chinaa'yin tyiktigajtsnidi, ku ja pyøky jeexyip tyimchaachjawidi. ¹⁴ Kuts nøjkx ja tiidyu'unin ñaxy, ngu'ayowipts meets ja jinaxy, nika'ap ja ne'egi jadine'en y'ayo'odit ja jaa'dyi pøn tsinaadyip jam Tiro jøts jam Sidón, ¹⁵ jøts meets Capernaumit jaa'dyi, zma mee xijy tø mdyimya'aty, tsajpjøtpy? Pø japxi meets ayodaajkjøtpy mnøjkxtit.

¹⁶ Jøts ja Jesús ja pyabøjkpitøjk ja tnimaay:

—Pøni pøn mbatmadojdip, øts idø'on ja wyinaty xpatmadoodip; pønts mgagupøjkidip, øts idø'on ja wyinaty xkagupøjktp; pønts øts jade'en xkagupøjkp, ja'ats idø'on ja wyinaty kyagupøjktp pøn ø xkajxp.

Ku wyimbejttø ja ñidugui'pxmyajkpi jaa'y

¹⁷ Xjats ja ñidugui'pxmyajkpi jaa'y ejtni xoni yjanchwimbejtnidøø, jøts ja wyandøø:

—Windsøn'ajtim, tøbaat øøts ja miku' xmimadøy ku øøts ja tø ngajpxpidsimy mets mmøk'ajtingøjxp.

¹⁸ Jøts ja Jesús ja tñimaay:

—Janch jade'en, ojtsts øts ja miku' n'ixy ku ja kya'ukmajada'kni ja myøk'ajtin ja'agøjxp ku ja pyidsiimy jap tsajpjøtpty. ¹⁹ Øtsts meets ja nmøk'ajtin tø nmø'øy jøts ka' sà mjattit. Øy meets ja tsaa'ñ øy meets ja kajpy xjadawa'kpety, øy meets ja miku' ja myøk'ajtin sà mjadatunwa'añidi, mímajadaajkip meets yja' ja' jøts meets ja ka' sà mdunit. ²⁰ Kidits yø'øyi tu'ugyi xajotkujk'atti ku yø miku' mmimadøyidi, ja' mdajotkujk'attip ku ja Dios m'ejxkapyidi xemikøjxp jap tsajpjøtpty.

Ku ja Jesús xyonda'aky

²¹ Winets ja Jesús tjantyaxondaajky ja Espíritu Santo, jøts ja wyaañ:

—Dios Teety tsajpjøtpit, yikjujky'ajtpi ya naxwiñ, nmøja'wip ngunuu'kxyja'wip ja'agøjxp ku tø xamidsøky o pøn ja mñitsoojkin, jøts yø wijyjaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'øn ka'ejxiyimdi. Jade'ents Teety tø xuñ sà kø'øm xamidsøky o pøn.

²² Tum ja' øts nDeety xuktump midi ja kø'øm tyunwampy. Ka'ap øts pøn wa'ats xnijawi sam øts nDeety kø'øm xnijawin, nika'ats øts nDeety pøn wa'ats ñijawiyi sam øts ja kø'øm nnijawin. Jøts pøni pøn øts ja nduknijawiwampy, ja'ats tnijawidip ja Dios Teety.

²³ Winets ja pyabøjkpitøjk ja twin'ejxi'jky jøts ja yide'en ja'ayi yiknimaadyøø:

—Janch nekim meets ku meets ja kø'øm xtyimy'ijxy xtyimñijawi midi meets ixa kø'øm mdyimy'ijxpy mdyimbyatpy; ²⁴ may Dios kyugajpxy, may windsøndøjk yø kø'øm tja'ejxwandøø tjanijawiwya'andi midi meets ixyam kø'øm m'ijxpy mñija'wip, nika'ats ja t'ejxtøø; ojts ja tjamadowa'andi midi meets ixyam kø'øm mmadøøpy, nika'ats ja tmadoodøø.

Ku ja samariit jaa'y yjotwa'añ

²⁵ Xjats tu'uk wya'kukiyi'ñ ja kajpxwejpidi jøts ja nugo kajpxy'ejxwa'añ ja Jesús, yide'en ja tyiktiy:

—Windsøn, ¿sudso ø ndu'unt jøts øts n'anmija'win ñitso'ok'att xemikøjxp?

²⁶ Jøts ja Jesús ja y'adsøjimbejtøø:

—¿Kidimts jap tø x'ixy nøkyjøtpty midi ja Moisés kyutujk myøøt'ajtpy, sà ja xja'gyuki?

²⁷ Jøts ja kajpxwejpi y'adsøøy jøts ja wyaañ:

—“Amumjoojt x'ajot'att ja Dios, ma'in m'anmija'win ma'in mwinmaa'ñ myajada'aky jade'en ja xwindsø'øgit; jøts nayide'en ja mmigu'uk xpa'ayo'ot sam kø'øm mnabya'ayøyin.”

²⁸ Winets ja Jesús ja ñimaajyøø:

—Tiy janch idø'øn mjanchwa'añ. Pøni mbadumpy yø jade'en, nitso'ok'atpts ja m'anmija'win.

²⁹ Jøts ja kajpxwejpi ka'ap ja ttajotkuki ku ja jade'en yik'adsøy, jøts ja tñimaay ja Jesús:

—¿Pøndsik øts idø'øn ndsaachmigu'uk'ajtpy?

³⁰ Jøts ja Jesús y'adsøøy jøts ja tñimaay:

—Tu'uk idø'øn ja jaa'y, jam ja wyinaty kyida'aky ma ja Jerusaléngit tuu' jøts ja ñijkxy Jericó, xjats maa'tspi ja pyajttøø jøts ja wa'ats yikwimaa'tskijxy, wyet ñaamy yikpøjkijxy; øy øy yikwinwøjpy yikjøpwøjpy jøtsnim ja yiknikejky, jawaani ja tkayik'oo'knidi. ³¹ Xjats jam jotmøñ wyinaajky nay jam tu'uk ja israelit teety; øy ja tja'ijxy, wyininaajk ja'. ³² Jøts jadu'uk kyidakmøø ja Leví yjaa'y jøts ja nayide'en twininaajkmaa, øy ja tja'ijxy. ³³ Winets jadu'uk

ja tuu'y0'0byi kyidaajky Samariit jaa'y, j0ts ku ja ojts jade'en t'ixy xjats ja wyinmaa'n ja tymchaachmiin ku ja jade'en yik'ayowim. ³⁴ J0ts ja wingon twingun0jkxiyi'n ja tsaachibi, xjats chaachi ja ts00yiyi, ojts ja tpiktaajki ja aceite m00t ja vino j0ts ja t'adsujmi ja chaachi. Winets ja ojts tyikpety ky0'0m jiyujk0jxp j0ts ja ojts tyikja'aty ja'taajkjotp, jamts ja tpa'am'ejx tsunajxy. ³⁵ J0ts ku kyimjabom'ajty ku ja samariit jaa'y wyinaty choonwani, j0ts ja tju'jty majtsk ja myeeñu'nk j0ts ja tk0m00y ja kud0jk, yide'en ja tnimaay: "Ejx'et y0 jaa'y, mo' p0ni ti ka'ejtxip, j0ts p0ni ka' y0 meeñ tpaaty ixa nm0'0y, yiktunts mg0'0meeñu'nk, ja 0ts ja ngubatt ku nwimbett jadigojk."

³⁶ Xjats ja Jesús tyiktiiy:

—ŁP0nts me m'a'ejxip migu'uk'ajtip ja jaa'y p0n ja maa'tspi yiktsaachidy00?

³⁷ J0ts ja kajpxwejpi wyaañ:

—Ja' ja migu'uk'ajtip p0n ja ojts y'ayo'ijxyi.

J0ts ja Jesús ja ñimaajy00:

—N0jks j0ts nayide'en xu'unt, j0ts nayide'en mjaa'y'att sam ja jaa'yin p0n ja myigu'uk ojts t'ayo'ixy.

Ku ja Jesús yja'aty jam Marta j0ts María ty0jkwindum

³⁸ Xjats ja Jesús jade'en wyidity j0ts ja yja'jty m0 kajp wyinaty tu'uk, jamts ja t0'0xy0jk ja tu'uk wyadsooj00 j0ts ja ojts wyayi ty0jk0jtpy, Marta d0'0n ja xy00w. ³⁹ Jamts myiga'ax ja tu'uk, María'ajtp ja', ja'ats twingu'ixajkiyi'n ja Jesús j0ts ja tpatmad0y p0ni sa ja wya'añ. ⁴⁰ J0ts ja Marta, ja' ja jam kyami'awatsip ja ty0jktunk, j0ts ja tnimiin ja Jesús j0ts ja tnimaay:

—Winds0n'ajtim, Łkidi sa mwa'añ ku 0ts y0 nmigu'uk nadyu'uk xuk-tunwanguixy y0 tunk? N0jmi waani j0ts 0 xpud0kit.

⁴¹ J0ts ja Jesús y'ads00y:

—Marta, Marta, y0' me nugo mdajotkijxpy mdajotmay'00'kpy y0 mdunk.

⁴² Ka' mets y0 ne'egi x'0yjawu y0 0ybi winmaa'n midi xemik0jxp tamp, ja'ats y0 María t0 tja'gyuki midi paat'ajtip. Ti p0nts y0 xijy ukp0jkxiiniyip jadigojk.

11

Ku ja Jesús tnanky'ixpiky ja Dios'ajot'ajtin

¹ Xjats id0'0n ja Jesús jam ja wyinaty ja Dios Teety t'ajot'aty, j0ts ku ja y'abajtiyi'n, winets ja pyab0jkpit0jk ja nidu'ugin ñimaajy00:

—Winds0n'ajtim, tukjajtk 00ts ja Dios'ajot'ajtk, ti sa ja Juan ttukjajty ja Dios'ajot'ajtk ja pyab0jkpit0jk.

² J0ts ja Jesús y'ads00y j0ts ja wyaañ:

—Ku mdsapkajpxtit, yide'en mwa'andit:

Dios Teety tsajpjotpit,

kuuyi mets jadu'uk 0y wa'ats.

0yts ku xnimiin ja mgutujk midi mdanitanaapy ja mjaa'y.

Yikjatts ya naxwiin nayide'en k0'0mdsojking0jxp p0ni sa xamids0ky nayide'en sam jap xuñin tsajpj0jtpy.

³ M00kyts 00ts ixyam ja ngaajjik n'uujkik midi 00ts xka'ejtxip.

⁴ Maa'kxik 00ts nb0ky, kumi t0 00ts nayide'en nmaa'kxuky p0n 00ts xjem-dump xedump.

Agidyujk 00ts axajtujk 00ts, kidi 00ts xmajtstu'tuty, j0ts kidi myajada'aky ja miku' yja'.

⁵ J0ts ja yjaakwaañ:

—Jade'enin n'ukpiktaajkin j0ts ku o p0n ja myigu'uk jam tu'uk, j0ts ja tnids00ñ m0jtsuu'm j0ts ja t'atsn0jmi: "Migu'uku'nk, tun may'ajt

t'uk'anuu'kxk øts tigøøk ja mdsapkaaky, ngubatp øts. ⁶ Nmigu'uk øts idø'on tø yjā'aty ndøjkjøtpy, ja'ats øts idø'on njadukaawyampy, ka'ap øts nja' tyimfiiti." ⁷ Jøts ja yjadu'ukpi yide'en n'ukpiktaajkmant y'adsøy japyi tyøjkjøtpy: "Kidi øts jadin'e'en nugo xjanchne'emy; aduky yø tøj k jøts ixyp øts n'unā'jk nmøøtma'ay maabajtkijxpy; ka'ap øts yap nbidø'økwa'añ, jade'ents øts inet ka' ti nyakt." ⁸ Yide'ents øts ja ndyimy'a'ejxi pø myigu'ukxi ja', øy ja yjagabidø'økwa'añ jøts ja t'atsmo'ot midi ja myigu'uk ja amidøjyip, kuwanits ja tjanchjatu'unt jade'en, y'atsmøøgyøxp idø'on ja' pøni ti jaty ja chøjkpy jøts ja jade'en ka'ap y'ukna'amniyt, pø naña'amixi ja kyatsøjkpy. ⁹ Paty mee yikxon ndukmadøy: Jøts x'amido'odit xpøktso'odit ja Dios, mmo'o'ojpts meets ja'; mdukpaadip meets ja' pøni ti meets mga'ejtxidip; myik'awaajtsxiyidip meets tøj k'aaw ja' ku øy mā mgugajpxidit. ¹⁰ Paty ku pøn o ti t'amidøy, yikmøøpyts ja'; ku pøn o ti t'ixa'ay, pyatpyts ja'; ku pøn tøj k'agaj twingøxy, yik'awaajtsxiyipts ja o pøn.

¹¹ 'zKu mee wyinaty m'uk'u'nkteety'aty jøts ku m'u'nk m'amidowidit ja tsapkaaky, wan meets m'aaw mjoojt ndejin myajada'akt jøts meets tsaā ja xkøjyit? zuk xmo'odit ja tsaā'ñ yam meets ja ajkx ja mja'amidøyyi? ¹² zuk xmo'odit ja kajpy yam meets ja tutu'uty ja tøm mja'amidøyyi? ¹³ Øyts mee mabaat mjagatyimy'øyjaa'y'atti, mjaajtpits ku xmo'odit ja m'u'nk m'unā'jk midi øy tsuj pidsømp, itits ja Dios tyungip, pø tsajpjøtpyxi ja', myo'opts ja' ja Espiritu Santo pøni pøn ja amido'oxiyip!

Ku ja Jesús yiknimaay jøts ku ja miku' myøk'ajtin ja tyiktuujni

¹⁴ Xjats idø'on jade'en ngøjmyi, jam ja Jesús wyinaty tyikpidsimy ja miku' midi jam wyinaty tyik'eitnip uum tu'uk ja jaa'y; jøts ku ja miku' pyidsimy jøts ja jaa'y jaty kyajpxpiky. Jøts ja mayjaa'y janch ñigyumaap ja tyimyja'widøø ku ja jade'en, ¹⁵ jøts ja winaagin ñømdøø:

—Ja møj miku' yø jaa'y ja myøk'ajtin yiktuujnip, ja' yø tyuktapidsimpy yø myimiku' midi yø jaa'y myøøt'ajtp, yø' wyindsøn myøk'ajtindi yiktuujnip.

¹⁶ Pømbits nugo ttatundip jøts ja tjot'ejxwa'andi, ja milagri'ajtin ja y'amidoodip jøts ja tyimdyuk'ejxidit midi kidakp tsajpjøtpy. ¹⁷ Wa'ats ja tñijawi sa jaty ja wyinaty wyinmaydi, jøts ja tñimaay:

—O pøn windsøn, ku kyutujk ja chepta'aky jøts yjaa'y ja ñawya'kxyi kawinaakpiky jøts ja xem yam cheptundi agø'ømyidi, nankyøjxidipts ja jade'eñi jøts ja kutujk niti kya'ukwani, uk kuts tu'uk migu'uk agø'ømyi cheptundi jøts ja ñawya'kxniyidi, agø'ømyits ja xem yam ñankyudigøyyidi.

¹⁸ Nayide'ents miku'mi pøni nawyanwa'kxip ja kø'ømyi jøts ja agø'ømyi ñanky'ayo'ombaadyi, zwindemts ja jeky y'ejtnit ja myøk'ajtin, kidi ja jaty kyudigøøñit? Yø' øts idø'on jade'en xyikwamp ku meets mwa'añ jøts ku øts ja miku' myøk'ajtin nyiktuujniyi ku øts yø jaa'y ja miku' ngajpxpidsøjmiiyi; ¹⁹ pøni ja'ats øts ja myøk'ajtin njanchyiktuujnip, zpønts meets mmigu'uk yja' yiktuujnidip ku ja tkajpxpidsømdii ja miku'? Pø yø'øxi mee kø'øm mni'øø'niyip jøts ku mee nugo mgajpxigøy. ²⁰ Diosts øts ja myøk'ajtin nduktapidsøjmip yø miku'di, yide'en idø'on xja'gyukidit jøts ku ja Dios tøm tyikmeni ja kyutujk midi ja tyanitanaapy yjaa'y.

²¹ 'Ku tu'uk jotmøkjaa'y t'ejx'ity tyøjk, janch yikxon ja tā'tspiky tøm tømjmjø'kixy ja ta'o'jk, pønts ja mayip jade'en, jade'ents pyikta'aky ja jap tøj k jøtpy jotkujk tyik'ity, ka'ap ja ti tkumay. ²² Jøts kuts jam jadu'uk jawaani jotmøk yja'aty jøts ja myimajada'agiyi, tuki'iyi tya'o'jk ja pyøjkxyi midi ja y'uktamøj, jøts pyikta'aky ja yikja'abøkøjxni ti jaty ja jam yjagyeypy.

²³ 'Pøn ø xkabadøjkp, ja' øts idø'øn xmidsepwamp; jøts ku øts pøn ti møøt njapøkmukwa'añ jøts ja jinxxy tpøkwa'kxy.

Ku ja miku' jadigojk t'awimbeti ja chinaadyaajk

²⁴ 'Ku ja miku' tmajststututy ja jaa'y, jøts ja nugo wyidityo o ma tø'øts etjøøjty, tja'ixa'ay ja pyoo'kxaajk; jøts ku ja nima tkapaaty, jøts ja wyinmay: "Tiku øts ndøjk jadigojk nga'awimbeti ma tø ndsøøn." ²⁵ Jøts ku ja wyimbity, jade'ents ja jaa'y ja tpaaty sam tu'uk ja tøj k tawa'ats, pe'ety jaaxy ja jap. ²⁶ Winets ja chøøn jadigojk jøts ja janixwixujk tjaaktyim'y'atsway ja myimiku' jawaani ka'øydi sam ja kyamajada'agyn, jøts ja jade'len ttatøkidi ja jaa'y, tsinaadyaajk ja tyikwa'andi, jøts ja jaa'y jade'len jinxxy myøwa'añ, nigidi ja y'ijty jade'len øyim idø'øn wyinaty ja miku' ja jam tjamøøt'aty tu'umchi.

Pøn ja xemikøjxpit xondaajkin myøøt'ajtpy

²⁷ Exam idø'øn ja Jesús wyinaty jade'len wya'añ ku tu'uk tø'øxyøjk jam jaa'y agujk møk'ampy wya'añ:

—janch kawinmaañi tmøøt'aty ja xondaajkin pøn tø myike'exyi jøts pøn ja che'tsk tø mduktayeegy!

²⁸ Xjats yide'len ja Jesús y'adsøøy:

—janch nekim ja'adi pøn tpatmadoodip ja Dios kyajpxy jøts ja jade'len tpadundi!

Ku ja ka'øyjaq'y ttamidowdi jøts yiktuk'ejxtit ja milagri

²⁹ Namyuk'adøjtsidip ja jaa'y jam wyinaty ma ja Jesús, jøts ja tnimaabyinaxwa'jky:

—Niwine'len ja yambi jaa'y kya'øyidi, ñadyijyi tnijawiwya'andi pøni janch ku nDios U'ngi, paty t'amidowdi jøts yiktuk'ejxtit ja milagri'ajtin; niwine'ents kya'ukyiktuk'ejxnidit, wan ja'ayi midu ja kugajpxy Jonás ojts tyuk'ijxyidi.

³⁰ Nayide'ents sa ja Jonás ojts t'ejxpaj'taty ja Nínive jaa'dyi, nayide'ents øts ya'atpi jaa'y x'ejxpaj'tatt. ³¹ Ku wyinaty kyutuky ja et ja xøøw, ku ya'atpi jaa'y nøjkk yiktiidyundi, jøts ja windsøndø'øxy yø ñidanaagyukiyidit jøts ja ñi'øøniyidit pøn tnidso'on jagam et ja Salomón, jøts ja t'ejxøø tnija'wiyøø ja wyijy'ajtin; icyats jadu'uk tø kyaxi'iky jawaani wijy midu tjinajxp ja Salomón, nayide'ents meets ja xkagupiky. ³² Nay jats ja Nínive jaa'y wya'kukidit ku ja tiidyu'unin ñaxt ku yiktiidyu'undit ya'atpi jaa'dyi, jøts yikni'øønidit; ja'agøjxp ku ja Nínive jaa'y ne'egi tyiktigajstøø ja chinaa'yindi ku ja Jonás ja ojts tyukmadøyidi ja Dios kyajpxy ja Dios y'ayuuik; icyats jadu'uk tø kyaxi'iky pøn tyimñija'wip wa'ats, nigidi ja Jonás y'ijty jade'len tnijawi, nayide'ents meets ja yam xkagupiky.

Ja øy jaj midu jaa'y tyikja'gyukip

³³ 'Ka'axi pøn jaj ttuknidøøbyøki jøts ja yikyu'utst o ma, uk jøts ja yikujupt kajuun patki'py, ja'agøjxp ja tyøøbyiky jøts ja yikpikta'akt ma yjajt, kuts jam pøn tyøkit tyuk'ejxpaatpts ja o ti. ³⁴ Jade'len idø'øn yø mween n'ukpiktaajkint sam jajin, yø'øts tyikujajtaajkip tyikudøø'kxaajkip amuum ja mne'kx ja mgojpk; kuts ja mween y'ø'y'aty nayide'ents ja amuum tjagyeyjy ja ne'kx ja kojpk, ka'ap ja ttuktuñ kya'øybi. ³⁵ Øyimts x'ejxtit jøts kidi xyik'oockti ja jaj midu wa'ats jajp, jøts kidim jade'len mjatti sam jaj kya'ityin, sam ja jajin midu kawa'atsjajp jøts yik'ayowin kube'ets kugoots. ³⁶ Pøni mwinmaa'nbyattipts øy yixxon, ja jajts idø'øn ndejnt mgayik'oo'tkip jøts ka' jade'len m'etti sam o pøn kugootstujpy chøønin niti winmaa'ñ, o nugo chaachjawn'ejx'oockti. Kuts meets, wa'ats meets ja mduk'ejxpaadyidi pøni ti dø'øn m'ejxwandip, ka'

ti jadu'uk chøkyi, jade'en ja myikujajtaagiyidi myikudøø'kxaagiyidi sam jaj wa'ats mduk'ejxpaadyidi o ti.

Ku ja Jesús ttamigajpxy sa'y'adø'øtsti ja fariseotøjkti møøt ja kajpxwejpitøjkti

³⁷ Kuts ja Jesús jade'en kyajpx'abajtiyü'ñ, xjats fariseo ja tu'uk wyaajøø tyigam kaabyi. Kuts ja jam tyøjkiyü'ñ jøts ja y'ixaajky, kaabyajt twinguwa'atsiyü'ñ. ³⁸ Jøts ja fariseo janch ñigyumaap tyimyja'wiyü'ñ ku ja t'ijxy ja Jesús kyagøbujy yam ja kyaawya'andi, jade'en idø'øn ja tsinaa'yin'atti ka'ap ja nugo kyøbujti, yide'en ja tyikajpxti jøts ja' ja tyaniwa'ats'ajttip ku ja kyøbujti, jøts ja kyapøkpyatti. ³⁹ Yide'ents nwindson'ajttim ja tñimaay ku ja jade'en t'ijxy wyinmay:

—Jade'en mee fariseotøjk mjaa'y'aty, ja'ayi mee mjanchkamijotkupir sudso ja texy ja tas nikijxyi nadyijyi wa'ats y'ett, jøts ka'ap ja xunk'atti pøni sadam ja yjøtpy. Ni xkaja'gyukidi kudam m'amp mjotp tum ja axøøkpi yigaappi xjamøøt'atti ku jaa'y nugo xwin'øøndi xwimaatsti. ⁴⁰ iNugo mee mdyimyø'øty! ¿Ka' xnijawidi ku tu'ugyi ja kojpi tø tyik'øyi ja m'anmija'windi jøts ja pikta'aky? ⁴¹ Jade'eñi Dios mgupøkiyidit ku amumjoojt mdsøjkingøjpx xunk'attit ja pudøjkin. Jade'en ja m'anmija'win ja wa'ats'ajtin tpaattit.

⁴² iMjanch'ayøøy me fariseotøjkti! Køx kida'ak meets xjanchkugubatki xy jøts ka'ap ne'egi xpadu'uxxidi midi ja Dios kyutujk jawaani ne'egi yjani'ane'empy, ku ja ttsøky ja øy tiidyu'unin, ja pa'ayo'ejxx, jøts ja janchja'win. Ya'atpi meets idø'øn ne'egi jawaani mjapaat'ajttip mbadu'ump.

⁴³ iMjanch'ayøøy mee fariseotøjkti!, ku mee tum jam mnachøkyidi mdsinaawya'andi tsaptøjk'okp windsønin. Jøts ku tuu'ajy, øy paat meets ja nagyajpxpoo'kxi xtsotki, myikwindsø'øgip myikwinjawip meets, ejxim meets jadi'ini myikwinajxni.

⁴⁴ iMeets tsaach'ataayjaa'dyi, jøts m'ayøøy mee kajpxwejpitøjkmidi! Jade'en mee mnankyaxji'igy sam ja oo'kpi kajuunin øy nikøjx kyaxji'iky jøts ka' nadyijyi tyikaxji'iky pøni sadam ja yjøtpy.

⁴⁵ Xjats ja kajpxwejpitøjk nidu'uk y'adsøøy jøts ja wyaañ:

—Windsøn, ku jade'en mwa'añ xuk'ayojip øøts yø nayide'en.

⁴⁶ Jøts ja Jesús yide'en y'adsøøy:

—iMjanch'ayøøy mee kajpxwejpitøjk nayide'endi!, ku ja kutujk xyik'øyidi kamaabyim, ka' meets ja kø'øm x'uktuni, ja pujx ja kajp meets ja mdukmidanapy, kamadøyim meets ja x'ukja'wiñi.

⁴⁷ iMjanch'ayøøy meets!, ku yam xjanch'ukyik'øyidi xyikpaadidi ja oo'kpi nipots pøn ja m'apteety yik'ooktøø, ja Dios kyugajpxy. ⁴⁸ Jade'en yø yikja'gyukiñi sam o ti pøn kajpxy'aty tyik'ity, kajpxy meets ja yjawi xyik'ejtni møøt ja mdeety'apti ku ja tyik'oo'ktøø ja Dios kyugajpxy, jøts meets ixyam xyik'øyimi xyikpajtimyi ma ja ñaxøjkidøø. Mdsaaçpa'ayøøpy meets ja xijy jade'en.

⁴⁹ Paty tam idø'øn ja Dios kyajpxy wya'añ yide'en: “Ndanigaxp meets ngugajpxy møøt ngudanaabyidi, myik'ookpts meets ja winaagin; jøts pønts jaakjata'andip, myik'ayo'ombaattipts meets ja'.” ⁵⁰ Meets Dios ja mdagubatiðip wine'enin ixa mnaaxwii'ñitjaa'y'atti ku ja m'apteetyi tø tyik'ookti ja Dios kyugajpxy. Tuki'iyi ja tpayø'øgyøxt, jaayip ja tpayø'øbyinaaxwa'akt kuuyip ja naxwii'ñit cho'ondaajky, ⁵¹ kuuyip ja Abel t'oo'k'awiyü'ñ jabaat ku ja Zacarías y'o'jky, ku jaa'y ja yik'o'jkøø jap tsaptøjkjotpy ma ja altajr jap. Paty me ndukmadøøy jøts ku Dios ja ttabayø'øty ja yamit naxwii'ñit jaa'y.

⁵² 'iMjanch'ayøøy mee kajpxwejpitøjkti!, ku x'ama'at'ajtidi ja Dios kyu-tujk; køømyi meets ja mnadyamidsøkyi, ni xkabadumidits ja', jøts ni xkaduknija'wimidits ja abikpyidi pøn ja tjanijawiwandyip.

⁵³ Ku ja Jesús jade'en wyaañ, jøts ja kajpxwejpitøjk møøt ja fariseotøjk yjantyim'ambøjktøø. Jantyimyikmi'ambøjk ja Jesús jøts ja tanejkin'ampy tjantyimyiktøwdi ñadyijyi tigati. ⁵⁴ Øyik idøø'n ja ti t'ukmado'odit, y'amaa'tsk'ejxwandyipxi ja' jøts ja jatyi ttani'øønidit pøni ti ja kya'uk'ømyadoodip.

12

Ku ja Jesús tnigajpxi ja fariseotøjk kya'øwycinmaa'ñ jøts yikjøpjawit

¹ Yikxon ja jaa'y yjantyimñañimujkpajtidøø mil'ampy, nugo yjanch'adøtsnidi, xem yam yjanchnadyateeni. Jøts ja Jesús ja pyabøjkpitøjk tnimaabyinaøwa'jky:

—Øyim mnay'ejx'etidit ejxim yø fariseotøjk kya'øwycinmaa'ñ mdawin'iiñidi ti sa yø iiy wyanidi, jabi wa'atsts yø iiy ñadyijyidi. ² Wants uk jade'en, ka'axi ma ti yu'uch'tity, kuwanixi ja øy juuni yjadyimyikpaaty; uk kuts o ti yjayik'amaa'tsk'aty, kuwanits ja yiknijawi. ³ Jade'en'ampy ja wa'ats nøjkk yiknijawi ti jaty mee ndumpy amaa'tsk, ti jaty mee mgayiknigaxi'kpy, adsu'jkyts ja y'uknigaxjø'kniit sam o ti xinaxy wa'ats kyaxji'iky. O me ti amaa'tsk xjakajpxy, øy meets ja pøn xjagadukmadøy, wa'ats ja nøjkk yikajpxnaxy ejxim ti tøjkjøxp yikajpxwa'kxyin jøts yiknijawit.

Ku ja Jesús tnigajpxy jøts ku ja tu'ugyi pøn yiktsø'øgip

⁴ 'Mee migu'uktøjkti pøn jaty ø xpabøjkp, meets idøø'n nnimaapy jøts kidi xtsø'øgidit ja yikjaa'y'oo'kpidi, pø ka'axi anmija'win ja tjadyimyik'ookti øy ja wyinaty tøjayik'øøky ja ñine'kx. ⁵ Ja'ats mee ndukmadoowampy jøts ku ja' xtsø'øgidit ja Dios pøn tyikutujkp jøts mnøjkxtit ayodaajkjøtpy yam meets ja ø'jkin tø xja'ixy. Ja'ats idøø'n mdsø'øgidip.

⁶ 'Ka' meets Dios m'ejxigøyi, çti sa ja nimagoxkpi joon chobaaty jøts ja yiktagujuy majtsk ja puxmeeñ? ⁷ Machøybaat meets mwaay ja myik'ejtñiyi. Paty ka' mdsø'øgidit, ti sa ja mutsk jonuna'jk ja tkaja'dyigøy; mats meets ja ndejint mja'dyigøø'ñiyit.

Pøn jaty t'øñigajpxp t'øñimadyakp ja nwindson'ajtim Jesucristo jam mayjaa'y agujkp

⁸ 'Yikxon mee x'ukmado'ot, pøn ø xpukajpxip, pøn wamp mayjaa'yjøøjtj jøts ku øts ja xpabiky, nayide'ents øts ja møk nnitanit jam Dios wyingujkp ma may'ankilis ja jam møøt; ⁹ pønts ø xkabukajpxip, pøn wamp mayjaa'yjøøjtj jøts ku øts ja ka' xpabiky, nayide'ents øts ja niwine'enin nga'ejkkapt, niwine'enin nganitanit jam Dios wyingujkp ma may'ankilis ja jam møøt.

¹⁰ 'Jaakykmaa'kxtip ja ne'egi pøn ø tøjxaguidyimy'ødyejti, ja'ats nima niwindem ja kyayikmaa'kxtit pøni pøn tka'ømyigajpxtip ja Espiritu Santo.

¹¹ 'Kuts pøn myiknøjkxidit jam tsaptøjkjotp uk myikwaanøjkxtit ma kutu-jktaajk ma kudunk ma tiidyumbi, kidits meets ja xajotmay'oo'kni, kidi meets ja xkumayjawi sa døø'n jap mwa'andit, sa døø'n jap m'adso'odit, ¹² pø ja Espiritu Santoxi meets ja mda'awa'anijip pøni sa døø'n jap mwa'andit, ja' meets jap myikajpxiyip ku tpaat ja et ja xøøw juuni mgajpxtit.

Sa ja kumeeñ'ajtin xyikwinmaa'nmya'jtint

¹³ Xjats jam tu'uk wyaañ jam mayjaa'y agujkp jøts ja tnimaay ja Jesús:

—Windsøn, nimaajjik òts yò nmigu'uk jòts wan ø xmø'øy ja nmaay.

¹⁴ Jòts ja Jesús wyaañ:

—Yikxon me waani m'ukjaa'y'att. Ka'axi ø pøn tø xpikta'aky jòts meets ja mbikta'aky nyikwa'kxiyit, uk jòts òts jade'en ndu'unt sami kudungin.

¹⁵ Nayide'en ja wyaañ:

—Øyim x'ejxtit, nay'ejx'etidim jòts kidi o ti kayakyim x'ejxti, kaja'ajip jaa'y ja y'anmija'win tyajujky'ajtpy xemikøjxp ku pyikta'aky ja may'ampy tmøøt'aty.

¹⁶ Jòts ja yide'en tmadyakpaajty tu'uk ja ejxpajtin madya'aky midi ja kø'øm ñajtsja'wip jòts ja yiktamija'gyukit midi ja ñimadya'akwampy, jòts ja wyaañ:

—Jaa dø'øn wyinaty tu'uk kumeeñ jaa'y jòts jantyimy'ejtp idø'øn pyikta'aky ja jam kyamjotp. ¹⁷ Winets ja tniwinmaa'yiyi'ñ jòts ja wyaañ: “¿Ti sudso ndabyaatt, sudso òts yò nbikta'aky ndu'unt? Ka'ats òts n'abøjk'i'ñ ma òts yò nbøkjø'økt.” ¹⁸ Jòts ja yjaakwaañ: “Tø nniwinmayi sudso òts yò ndu'unt. Yø ndsa'jx tam ø nyikida'ap jòts ø nyik'øyt jawaani møjpi, japts òts ja nbikta'aky nbøkjø'økt ti jaty òts ja nmøøt'ajtpy. ¹⁹ Winets ø kø'øm nnañø'ømxiyit: Ja tidsik winmaa'ñu'nk xijy mjadyimjadsøjkpy jabi ixyats may pikta'aky midi kawinaak jumøjt m'ajot'atp; poo'kx pøk mets, kay uuk mets jotkujk xoni.”

²⁰ Yam ja wyinaty jade'en wya'añ jòts Dios ja ñimaajyøø: “Jaa'gyumo'tpi, ixyam koots inet m'ooknit; jòts midi jap tø xpøkj'i'iky, ¿pøn yò tjat'atp?”

²¹ Jade'en idø'øn jaa'y jyaty pøn ja pyikta'aky nugo tniøpkajtp jòts ja ya jotkujk tuktanaxy ja et ja xøøw, ayoopts ja y'anmija'win ja jyaty jam Dios wyingujkp ja'agøjxp ku pyikta'aky ja ya kø'ømyi tø'ajot'aty.

Ku ja Dios t'ejx'ity pøn jaty ja y'u'ngip y'una'jkip

²² Xjats ja Jesús oojknim tñimaay ja pyabøjkpitøjk:

—Yikxon ndukmadowdi: Kidi nugo xпамaydi xpadajti ja mgaajjik m'uujkikti, ti mnidsøønidip, ni ja mwet ni ja mnaamy mee xkaguma'aty ti mwet'attip. ²³ ¿Ti jade'en ja jujky'ajtin yikpaaty sam ja kaaky jii'kxyin? Pø ka'axi. ¿Jòts ja wet ja naamy mibaat ja t'uk'amibaat nayide'en pøni sa dø'øn ja ne'kx ja kojpk yikmøøt'aty? ²⁴ Ejxti yò jøøky, ka'axi yò ñe'epti kyojti, ka'axi pyikta'aky yi tyikpidø'økti, ka'axi pyikta'aky yò tpøkjø'økti jòts tpikta'aktit jap tsal'xjøtpy; øy yò jade'en yjagatundi, ja Diosts yò yikjuyky'ajtidip. iTits mee mdsow sa ja jiyujk jade'en ja yja' yikmo'odi! ²⁵ ¿Pøn kø'ømdsøky tyimy'uknankyojnip jagujkp metrin øy ja mabaat jade'en tjadyimyjatsøky?

²⁶ Pøni ka'ats tam ja jade'en jyaty, ¿tigøjxpts ja yikmijotmay'ookt?

²⁷ Uk'ejxtim sa o ti pijy yøñ, ¿ti pee'tip kojtp yø? Jòts tiy janch meets idø'øn nnøjmi jòts ku ja windsøn Salomón nijade'en kyanaxyojxøø sam yò pijyin, øy ja mabaat tjabiktakijxy ja xyox. ²⁸ Sats idø'øn ja Dios jade'en txøxy ja pijy midi jaty ixyam o madsoo yondip øy ja jabom yjayiknitsaañit; kuts meets, ¿tiku meets idø'øn ja mgaxoxit? ¿Sudso meets ja xпамay xpadajy ti jaty mga'ejtxiyidip? ²⁹ Paty wingujk jotkujk mwidettit, kidi meets ja xkumayja'wiñi ma xpøktit ti mga'adyip m'uuktip. ³⁰ Jade'en naxwii'ñit jaa'y ixyamdi pøn ja Dios yja' tkaja'gyukidip, ja' pyawidejtp tпамaydi tpadajti ja pikta'aky ti jaty chojktip; kuts meets, wa'ats meets Dios Teety mñijawiyidi ti jaty mga'ejtxidip. ³¹ Ne'egi kupøjkidits ja Dios chinaa'yin ja kyutujk midi ja tyanitanaapy yjaa'y, jade'ents meets ja mmo'ojidit ti jaty mga'ejtxidip.

Ja kunuu'kxy jujky'ajtin midi jap tsajpjøtpy

³² Kidits mdsø'øgidi, jade'en me n'ejx'ity sam pøn ja byorreegu'nk t'ixy; o meets idø'øn mganamayi, mdanitaniipts meets Dios Teety ja kyutujk,

jade'en meets ja mdamidsøkyi. ³³ Tookti põni ti jaty jam mmøøt'ajttip jøts ja Dios jade'en'ampy xamiyoxtit ku xmo'odit põn jam ti ka'ejtxidip põn ayoodip; jade'en y'opyidsøømt ku xpaattit ja juky'ajtin midi jap tsajpjøtpy, midi ka'ap mwindigøxyidip. ³⁴ Pøni ma xnajtsjawidi xpaatwa'andi ja juky'ajtin, nay japs meets ja mwimmaa'n y'ity.

Ku ja Jesús wya'añ ku jøp'ejx'ity n'ejtindit

³⁵ A'ejxi abaadi mnanky'letidit. ³⁶ Jade'en sam tumbi tjøp'ixy ja wyindsøn ku ja ñijky tø'øxñi'ukpi, jøts kuts ja wyimbett jøts ja jaty tyik'awaajtsit ja tøjka'aw ja'ayi ja yja'att, ja'ayi ja kyugajpxit. ³⁷ Nekim ja tumbidi põn kajxa'aky pidsømdip ku ja wyindsøn ja pyaadyidi wijy kejy, ku ja kyama'adi kya'etti yam ja yja'aty; jøts tiy janch meets idøøn nnøjmi, wan ja tka'uknagyumayi køøm jøts ja tyik'ixā'akt ja tyumbitøj jøts ja ttukwinguwaadsit ja kaabyajt, wan ja tka'uktawindsøøgi ja kaaky ja tojxx. ³⁸ Øy ja juuni yjaja'aty, yjaja'aty ja tsuu'm yjaja'aty ja jøpkyoos, kuts ja kyayikmaa'gyubaadidi ja'abi tumbits idøøn nekim t'ejxtip. ³⁹ Ku o põn pyikta'aky t'ejx'ity tyøjkjøtpy, ejtp ja tjøpja'wigyunaxy ja maa'tspi, ka'ap ja ñagyumaadigøyi põni juuni døøn ja y'ukja'att. ⁴⁰ Nayide'ents meets idøøn mjøp'ext ejtp; ku øts jade'en jotmøn nme'ent yam ø ngayikumay, põn ja naxwii'ñit ja'a'y ja myøjkudanaaby'ajtpy.

Ja tumbi põn øy ejx'ejtp

⁴¹ Winets ja Pedro wyaañ jøts ja tyiktiy:
—Windsøn'ajtim, ¿øøts yø døøn yø jade'en xamimadyakp, uk niduki'iyyi døøn xnøjmi?

⁴² Jøts ja nwindson'ajtim wyaañ:

—Ja tumbi põn yiktump ku ja myadøy ku ja yja'gyuki, ja'ats ja wyindsøn tanipøjkip põn jaty ja jap tyøjkjøtpy jøts ja tyika'aty sa pyaat'atyin. ⁴³ Nekimts ja'adi põn jade'en tpadundip ti jaty ja wyindsøn ja tø tyaniipyidi. Øy ja juuni yja'aty, ixapts ja jade'en ttayøøbyety, ixap ja jade'en tyundi. ⁴⁴ Ndyimñajtsja'wip øts jøts ku ja wyindsøn ja pyikta'agit jøts ja tyuk'ejx'etit tuki'iyyi põni ti jaty ja jam yjagyepy. ⁴⁵ Pønts tkajøp'ejxp ja wyindsøn, põn jade'en winmaapy, jekñim ja tijy yja'att, ku ja yiktaminikaagi ja myøøtumbi jøts ja jaty øy sagasa ttuñ ja myøøtumbi, ja yaa'y ja tøøxy, ja'ayi ja chøøn ja wyindsøn nekim ja winet kyay y'uuky, jøts ja myuktigøøñi, ⁴⁶ kuts ja wyindsøn wyimbity øy juuni yam ja ka' tjøp'ixy yam ja niwine'enin tkagumay; ixjadam ja yja'aty jøts ja tyagubetyi ja'agøjxp ku kya'øy'aty, ¿ma døøn ja yiktumbi jade'en?

⁴⁷ Pønts wa'ats tjanija'wip sa døøn ja wyindsøn tjatsøky jøts ja nika' tjøp'ixy jøts ja nika' tmimadøy põni sa ja yjawa'añ, yixxonts ja nøjxx yiktagubety, yikxon ja yjantyimyikwojpmatst. ⁴⁸ Pønts tkidyimñija'wip põni sa tam idøøn ja wyindsøn ja tjatsøky, jøts ja ka'ap tjøp'ixy jøts ja ka'ap tmimadøy, ñiwyaanits ja ne'egi yiktagubatt, ka'ap ja ne'egi jadine'en yikwopt. Ti sa o ti jade'en põn o ti may yikmøøpy, nayide'ents ja yik'amido'oxit may'ampy; pønts o ti yiktama'ajot'ajtip, jinaxyts ja yikxon yiktabayøøty.

Jesús køjxp ja'a'y ñawya'kxyidi

⁴⁹ Ja tiidyu'unin øts ya tø nmimiñ naxwiiñ; ijanch tyimjyawamp øts idøøn jøts ja jeexyip yam nyiktunkpatni! ⁵⁰ Nniija'wip øts ku ndanaxt ja møj ayo'on, indajotmay'oo'kunaxp øts ja jaanim kunim øts ja wyinaty tø ndanaxy! ⁵¹ Sa mee m'ukwinmay, ¿øy'ajtin xondaajkin ti øts yjawi tø ndanimiñ naxwii'ñit ja'a'y? Nømp øts jøts ku ka', nanñawya'kxip øts ja'a'dy. ⁵² Yamnim inet tø

cho'onda'aky, nõjxpx naxpts idø'on jade'en tukmigu'uk xyiktsept'a'aktit øy ja tu'ugyi yjatsøonidi, nideety nidaakti, ni'u'nk ni'una'jkti. Pøn nimagoxkti, nawya'kxidipts ja', jøts ja ñayjibøkikidit jagam ixkø'øm namajtsk jaty nidigøøk jaty. ⁵³ Øts køjxp ja kawin'ijxyim ñayjawiyidit ja u'nkteety ja u'nktaakti møøt ja y'u'nk y'una'jkti, ja yaa'y ja tø'øxy, tum jade'en y'adø'øtstij ta tsu' ja xa'kxy, ja u'nk ja mø'jt.

Ja ejxa'an sudso yiknijawit jøts ku wyinaty tø tmibaat'aty jøts kyøxt ja naxwii'ñit

⁵⁴ Ñayi ñimaamyøø ja Jesús ja mayjaa'y:

—Ku x'ejxti ja yaak pyidi'iky ma xøøw yjexy winets mnømdi, tu'up tam inet, janchjajpts idø'on ja jade'en. ⁵⁵ O kuts ja poj wimbet'ampy yø'øxy ku kyaxuxpyøjy, jats mnømdi, janch'anwamp tam, janch tøødipts idø'on ja m'ayuujk, janchjajtpxi dø'on ja jade'en. ⁵⁶ ¡Mee win'øø'mbidi! Pøni mnija'widip tam sa kyaxi'iky ja et ja tsajp ku ti tyunwa'añi, çtikuts nayide'en xkanijawidi pøni ti dø'on tunwajnip ya'atpi xøøw ya'atpi jumøjt ku ja møk'ajtin wyingaxi'iky jøts ja øy sagasa mjayiktuk'ejxti?

Kajpx'øyidi jøts mnamyijotjimbetidit møøt ja mmidsep

⁵⁷ 'çTiku yikxon xkawinmagyukidi pøni sa dø'on chøkyi, pøni sa dø'on pyaat'aty? ⁵⁸ Ku pøn mni'øøniwya'añidi jøts ja myiknøjkw'a'añidi jam kudunk wyindum, namga'anim jam myiknijkxyidi tiku yikxon xkakajpx'øyidi jøts ja møøt mnamyijotjimbetit jadigojk, jøts kidi myiknijkxyidi jam tiidyumbi wyindum; çja ti nø'ømp ja windsøn jam? Pø mgøyakidipxi ja jam jøts mee myikøyakt ma ja tajk ma ja mayojr jamdi, ja'ats mee myikpuxøktøkiiyip jøts mee myiktsu'umt. ⁵⁹ Øts idø'on wamp jøts ku jaanim mbidsø'ømdit ku wyinaty tø ja multa xkubatkøxti.

13

Yajkpy øy'ajtin ja' ku ja tsinaa'yin tyigach

¹ Nayi winet et idø'on ja Jesús jam ñimejnøø wingaagin ja jaa'dyi jøts ja ojts tyamimadya'agyi ku ja Pilato wyinaty tø tyik'øøky ja Galileit jaa'y, jøts ku ja jaa'ñi'jpy ja ttukmiyø'øyiyi'ñ ja jiyujkni'jpy midit ja wyinaty kø'øm tø t'ukyik'ookti midit ja wyinaty kø'øm tø tyoxti. ² Jøts ja Jesús wyaañ:

—Jade'en mee mwinmay jøts ja' ja Galileit jaa'y kyujajtidip jade'en ku ja yjantyimbyøktyundi sam jam jade'en ka' pøn jam y'etjotpti kyajpjotpti. ³ Øts wamp jøts ku ka'; ti pøn idø'on ka'ookp, nayide'en mee m'ookt pøni ka' mdsinaa'yin xyiktigatsti. ⁴ Jade'en meets yjawi mwinmaañi, ja jaa'y pøn oo'ktøø nimaktuktujk ku ja pøch ja pyajtidøø midit wyinaty janch køjxp tanaapy midit yiktejp Siloé, jade'ents meets yjawi mwinmay jøts ja' ja kyubajtip ku ja jawaani pøky tyaja'adyidi sam ka' pøn pøn jaty jam Jerusalen tsinaadyip. ⁵ Nømpsts øts ku ka'; nayide'en mee m'oo'køxt sam ja'ajindi pøni ka' mdsinaa'yindi xyiktigatsti.

Ku ja Jesús tmadyakpaaty ja iigi kipy midit' katøømp

⁶ Xjats ja Jesús ttamadyakpaaty tu'uk ja ejxpajtin madya'aky jøts ja wyaañ: —Tu'uk idø'on jaa'y, jamts ja y'iigi tsa'am kam ja', ja'ats ja y'ats'ijxpy pøni tø dø'on ja wyinaty tyøømi, jøts ja ni tu'ugin tkapaajtøø ja tyøøm. ⁷ Jamts idø'on tyumbi tu'uk pøn ja kam t'ejx'ejtp jøts ja tñimaay: "Ukmadowim, tigøøk jumøjt øts ixyam kujk njamiyø'øxy jøts øts ja iigi tsa'am njatukwa'añ, nijuunits ø ni tu'uk ngapaatynim. Yikidaagøjxnits yø ñiguipy; nugots ja naajx yø yjawi tyikwindujkni." ⁸ Jøts ja kam ejx'ejtpi y'adsøøxy jøts ja wyaañ: "Wanimts,

windsøn, tjaak'uk'ity jadukjumøjt; n'ukuyu'up øts, n'uktajyuu'ngip øts yø naajx jøts øts ja pu'uty nbiktaajkit. ⁹ Kidi wan jade'en tyøømi; pøni ka'ats, winets yikpo'tj'økt."

Ku ja Jesús tyikmøkpiky tu'uk ja tø'øxyøjk poo'kxin xøøw et

¹⁰ Jøts idø'on ngøjmyi, poo'kxin xøøw wyinaty, jøts ja Jesús yik'ixpiky jam tsaptøjkjotp. ¹¹ Jamts idø'on tu'uk tø'øxyøjk myaktuktujk jumøjtjip pa'am ja wyinaty tø pyaajtñiyi. Jøts ja jadine'en kyatsø'øky, tø ja yjigujxkidyigøøñi, miku' idø'on ja wyinaty jade'en tø tyuñi jøts ja niwine'enin kya'ukoogukini.

¹² Ku Jesús ja y'ejxi, winets ja yaajxiyi, xjats ja ñimaajyøø:

—Tø mba'am mniwaajtsniyi, møk møjaawni mets.

¹³ Jøts ja ojts tkønixajy, jøts ja tø'øxyøjk nay jatyi kyoogukiyiñ jøts ja tiy tyaañ jadigojk, winets ja ttukmija'wiyiñ ttukunuu'kxyja'wiyiñ ja Dios.

¹⁴ Jøts ja møjaa'y midi tñigubajk'ajtp ja tsaptøjk tjantyami'ambijky ja Jesús, tigøjxp ku ja yiktsø'øky poo'kxin xøøw, jøts myigu'uk ja tñimaay:

—Paty tu'unin xøøw jaa tudujk xøøw tø yikpikta'aky jøts jaa ndu'unindit; mendits øy juuni nugo ku kyapoo'kxinxøøwi, jade'en mme'endit pøn jaty ja nankcho'ogi ttojktip.

¹⁵ Jøts nwindson'ajtim yide'en t'adsøøy:

—Mee win'øø'mbidi, ¿m'ukyik'ijtpy meets mjyujk mdsakaa miwø'ømbety, jøts adøødsi xyik'etti ku pyoo'kxinxøøwi? ¿Ti kidi meets ja xyikwinaky jøts meets nøø ja xaniwøpy? ¹⁶ Tits ya'at tø'øxyøjk kyubatp ku yø kyatsø'økt ku poo'kxin xøøw, pø Abrahamts yø tyeety'apip jøts ja miku' yø myaktuktujk jumøjtjip yikpa'ambajtñiyi, ¿sudso'ampyts yø kyamøkpøkt øy yjapoo'kxinxøøwi?

¹⁷ Ku ja Jesús jade'en wyaañ, jøts ja myidsep chø'dyunbattøø; jøts ja mayjaa'y tyaxondaktip ja' ku ja t'ejxti jade'en ja Jesús myøk'ajtin tyikwingaxi'iky.

Ku ja Jesús tmadyakpaaty ja mortas tømt

¹⁸ Yide'ents ja wyaañ:

—¿Tixik ja y'ukyiktam'ejxip ja Dios Teety kyutujk midi ja tyanitanaapy yjaa'y? ¿Tixik jade'en? ¹⁹ Jade'en idø'on n'ukpiktaajkin ja' sa møj mortas tømt midi ja jaa'y wyøjpy kyamjøtpy, kuts ja myuxy jøts ja jade'en yøñ sam o ti møj kipy yøñ paxax paxax, jamts ja joon kyøxke'eky jøts tyik'øyibaat pya'an ja jam ma jaty y'awaj y'axeñ ja jam.

Ku ja Jesús tmadyakpaaty ja levaduri

²⁰ Nayinøøm ja Jesús:

—Tixik øts jadu'uk n'uktami'ejxip ja Dios kyutujk midi ja tyanitanaapy yjaa'y. ²¹ Jade'en idø'on ndejint sa ja levaduri midi yiktamimøø'kxip ja ariin way jøts ja amuum tyakaagiyit, jøts ja jich yaakt.

Ja mutsk tøj'aaaw

²² Xjats ja Jesús ñajxy jøts ja jam ojts ñijkxy Jerusalén, yik'ixpøjkp yik'ixpøjkp idø'on ja', pøni ma jaty kajp ja tpaaty ja møj ja mutsk. ²³ Winets ja jaa'y ja tu'uk yiktøøjøø:

—Windsøn'ajtim, ¿janch niwaani dø'on ja jaa'y ñitso'ok'att?

Jøts ja Jesús ja t'adsøøy:

²⁴ —Janch jade'en jaa ku jap ka' pøn nugo ajawi ñaxti, øyimts x'ejxtit ma mdøkidit, jade'en ja n'ukpiktaajkin sam jaa'y tñanaxy mutsk tøj'aaaw; øy jap pøn yja'uktøkiwyanidi, ka'ats ja y'uknaxnidit. ²⁵ Kuts ø ndanaagyukit,

jade'en ø ndanaagyukit sam kudøjk tyanaagyukin jøts tyøjk'laaw ja t'atsyik'aduky. Pøni tøts meets jap wyinaty mdandi tøjkwimpy, mjagugajpxidi mjatøjkwingoxti meets jap, uk mjanømdi meets jap: "Windsøn'ajtim, yiktøjkik øøts." Jade'ents mee nnøjmīt sǝ ja kudøjk wya'añin: "Ka' mee nnijawi pø mbøn meets, pø mā mee mdsøøn." ²⁶ Jats mee mwinambinaxwǝ'akt: "Tiku me ndejint øøts xka'ijxyi, jabi tøts adøm ngaamyujkin n'uukmujkin, jabi mets ojts o madsoo myik'ixpiky." ²⁷ Yide'ents mee n'adso'ot: "Tø nwa'añ jøts ku mee ka' nnijawi pøni mbøn meets. Jiwa'akti ya, kidi øts ya xwin'ejxti, çpønxi ø x'abajxtip, kidi meedsip?" ²⁸ Japts mjøødit mya'axtīt, m'amdøtskaattit mdaachtøtskaattit ku x'ejxtit ja Abraham, ja Isaac, ja Jacob jøts ku ja jap ne'egi møøt niduki'iyi ja Dios kyugajpxy y'etti, mā Dios kyutujktaajk mā yjaa'y ja ttanitani kyutujk. Ka'ats meets jap jade'en mdøkit. ²⁹ Yø'omyujkøxtip naxwii'ñit jaa'dyi, o madsoo choondit, jøts ja tpaajtidit ja Dios myøjkunuu'kxin midī nīpøn kyapatpynim, midī ja tya'awijxpy ja yjaa'y. ³⁰ Pøn yam yik'ejxtip ka'ejxiyimi, pyadundipts ja ne'egi sǝ nwa'añ, ja'ats idø'øn ne'egi nøjkk yikmøjpiktatip, pønts ñadyijyi ixyam møj nija'wibimdi jøts ja ka' tpadundi sǝ nwa'añ, ja'ats idø'øn yik'ayowim jattip.

Ku ja Jesús t'ayo'ijxy ja Jerusaléngit kajp

³¹ Jøts ja fariseotøjk nay ja'abi xøøw yjajtøø mā dø'øn ja jam wyinaty jøts ja ñimaajyøø:

—Jade'en ne'egi tyimy'øy'att ku mnøjkxnit, myik'ookwajnipts ja Herodes.

³² Jøts ja t'adsøøy:

—Nøjkk x'atsnøjmidi ja tsaach wyax'atøøy jøts ku yamyi jabomyi wixøjkpyi njaakajpxpidsimy ja miku', njaakyktsø'øky ja jaa'y jøtsnim ø n'abaadit. ³³ Nøjkkpimts øts jam Jerusalén, tuu'døjkip ø tsojk, ti mā Dios kyugajpxy abikyajp y'uk'øøky.

³⁴ 'iMets Jerusaléngit kajp, meets Jerusaléngit jaa'y, pø meetsxi myik'øø'kpy Dios kyugajpxy, meetsxi mnankya'jtsip pøn Dios kyajpxy y'ayuujk tyikyø'øyip ku Dios ja ya mjadaniguexyidi! iTø njapeemukwa'añ njakonmukwa'añ ja m'u'nk ja m'una'jk sam tsikuna'jk tyaak ñimu'uxyi tu'ugyi, ka'ats jade'en tø xkupiky! ³⁵ Ejxtits inet ja mdsapøjk abak tyandi; øts idø'øn wamp jøts ku meets xka'uk'ejxnit tsojk jøts ku meets jaanim x'ext pøni juuni ja xøøw ja jumøjt wyinaty yja'aty ku mnø'ømdit: "Ejxik Dios kyunuu'kx u'nk ñadyagugexyi midī mmimejnīp ja kyutujk."

14

Ku ja Jesús tyikmøkpiky ja jaa'y pøn wyinaty kexp

¹ Xjats idø'øn yide'en yjajty ku poo'kxin xøøw tpaajty, ojts ja Jesús kaabyi ñijky jam windsøn tyøjkwindum pøn ja fariseotøjk wyindsøn'ajtip. Jamts idø'øn ja'adi ja ti mā ja y'etti, jam ja tpa'ejxti tpaogowdi. ² Jamts wyinaty tu'uk jaa'myi pøn ke'expa'am pøjkip. ³ Jøts ja Jesús tnimaay ja kajpxwejpitøjkti møøt ja fariseotøjkti, yide'en ja tyiktiiy:

—çKutuky jøts ja pamaa'y cho'okt poo'kxin xøøw u ka'?

⁴ Jøts ka'ap ja y'adsowdi, amøñi ja y'etti. Winets ja tnixajiyi'ñ ja pamaa'y jøts ja tyiktsøøjky, yide'en ja tnimaay jøts ku ja ñjøkxnit. ⁵ Winets ja tnimaay ja fariseotøjkti:

—çPøn yjiyujk chakaā jatyi tka'ukyikpidsømp ku ja ja'jotpy kyunaxy øy jypoo'kxinxøøwi?

⁶ Nika' idø'øn y'adsojimbetti, nisa ja kyawa'andi.

Ja tø'øxñigaabyi tø'øxñi'ukpidi

⁷ Jamts idø'øn ja Jesús t'lijxy ja migaabyidi jøts ku ja twi'ejxti ja chinaabyajti ku ja twinguwaadsidi ja kaabyajt jam, jam ja y'ixa'a'akti mā dø'øn ja myøjtøkidit jøts ja ojts t'ane'emy:

⁸ —Ku pøn mwawidit tø'øxñigaabyi tø'øxñi'ukpi, kidi jam jaty m'ixa'a'akti mā ja tsinaabyajt jam ja windsøn tø yiktanibiktaagi, jaa ku ja wyinaty yja'aty yam meets jam tø m'ixajkni; ⁹ jøts ja kujøøn kudøjk mnøø'mxiiyidit pøn wyinaty tø mwayidi: “Tani me waani, wan ya'at jam tsøøni.” Xjats kuwani mjanchjajiw'a'aktit tsø'ødyumbim jøts jam m'ixa'a'aktit mā o pøn y'ixa'a'akti. ¹⁰ Ku pøn jade'en mwawidit, ne'egi øyts ku m'ixa'a'aktit mā o pøn y'ixa'a'akti; kø'ømnimts ja kujøøn kudøjk ja mdukmadowidit ku ja jam wingon mye'ent, jøts ja mnøø'mxidit: “Ya, migu'uk, nax mdsøønidi mā jam yik'ayowim tø mdyimy'ixaknidi.” Jade'ents meets ja xajotkujk'attit ne'egi ku jade'en kø'øm myiktukmado'odit, yam ja jam chøøniidi pøn jaty ja kaabyajt tø twinguwaadsidi. ¹¹ Pøn kø'øm namyøjppiktaajkip, yik'amutskpiktakpts ja nøjx, pønts kanamyøjppiktaajkidip pøn ka'ejxiyimdi, ja'ats ne'egi møjtøkidip, ja' yikmøjppikta'aktip.

¹² Ñayi ñimaay ja jaa'y ja' pøn ja wyinaty kaabyi tø wyayi:

—Ku pøn xyikaawya'ant, kidi ja'ayi nugo xway pøn jaty møøt mnamyayiyi, ni ja mmig'u'uktøjk xkawa'at, ni ja kumeeñ jaa'y xkawa'at pøn jaty jam mmigujøøn'ajtpy mmigudøjk'ajtpy. Ka'ap ja'ayi xwa'at pøn jaty myiwimbejtxiyip pøni ti jaty mets myajkpy. ¹³ Ja ne'egi mwa'ap ja ayooibi jaa'y, ku ti xøøw xu'unt, waw ja' pøn kati'ejtxidip, pøn kyø' tyeky ma'atti, uk y'ejxidi sagasa, pømbi tyeky ka'ejtp, pømbi jam winap. ¹⁴ Ne'egi nekimts jade'en mnayjawiyit, pø ka'axi ja mdunwimbejtxiyi nayide'en pøni ti mets ja tø xmø'øy, jaanimts ja xwin'ext sa ja mwingaxøjkkxiyit ku jadigojk jujky'ajtpi pyidsø'ømdit pøn jaty tø tpadundi pøni sa jaty pyaat'aty.

Ku ja Jesús tmadyakpaajty ja møj a'ux

¹⁵ Xjats nidu'ugin ja fariseotøjk wyaañ pøn jam wyinaty tø twinguwaadsidi ja kaabyajt, jøts ja tñimaay ja Jesús:

—Nekim xøñim ja'adi pøn ka'adyip jade'en ku Dios ja kyutujk ttanitanit ja yjaa'y.

¹⁶ Ja'ats ja Jesús tñimaay:

—Tu'uk idø'øn jaa'y t'a'ejxiyii'ñ ja a'ux møj'ampy, tøts ja wyinaty ttukmadø ja mayjaa'y pøn jaty idø'øn ja wyaawampy. ¹⁷ Kuts ja a'ux'aats tpaajty, xjats ja tkejxy tyumbi jøts ja t'atstukmadoowa'añ pøn jaty idø'øn ja wyaawampy jøts ja t'atsnøjmit: “Jamsttik, jamik tuki'iyi a'ejxi abaadi y'ejtni.” ¹⁸ Jøts ja tum jade'en ñañikajpxu'udyidi jøts ku ja ka' ñøjkxtit, yide'en ja yjawyeembi wyaañ: “Naajx ø tø njuy, ja'ats ø n'ats'ejxwampy, mee mjanch'ukmaa'kxp.” ¹⁹ Jøts jadu'uk yide'en wyaamaa: “Ndsakaa ø magoxk yuundi tø njuy, ja'ats ø n'ejxmatswampy pøni yuup idø'øn uk ka'; mjanch'ukmaa'kxp inet idø'øn, ka' øts inet ndsoont.” ²⁰ Jøts jadu'uk wyamøø: “Tyimyjemy'amajtskipnim øts, patyts øts inet ka' nmajada'a'akt jøts øts inet ka' nnøjkxt.” ²¹ Kuts ja tumbi wyimbijty jøts ja ttukmadøø ja wyindsøn sa jaty ja wyinaty tø yiknøjmi. Jøts ja windsøn yjantyimy'ambijky jøts ja tñimaay ja tyumbi: “Tsojk nøjx nøø'ajy tuu'ajy wine'en yø kajpjoort, jøts xwaame'ent ja ayooibi jaa'dyi møøt ja'adi pøn sagasa ejxidip, pøn kyø' tyeky ma'atti, pøn winapti.” ²² Jøts ja tumbi yjatsø'ongojmi jøts ku wyimbijty jøts tñimaay ja wyindsøn: “Tø øts windsøn idø'øn jade'en nduñ sa tø mwa'añin, jaakwindampys ja tsinaadyaajk ja poo'kxaajk.” ²³ Winets ja windsøn ja

tyumbi tnimaay: “Nøjx tuu' xkuýø'øy mā jaty paduu' mā jaty ti, jøts pøn jaty mbatpy møk'ampyts ja xwaame'ent jøts yā xkuwawit, ujts øts yø ndøjkjoojt n'ejxwa'añ. ²⁴ Tyimñømp øts ixyam, kawindem xøøw øts ja xja'gyajpidi ja n'a'ux pøn jaty øts ja jawyeen tø njadaniway.”

Tuki'yi nadyamïyoxant ku Cristo nbadu'unint

²⁵ May jaa'y ja Jesús o madsoo padso'onip jøts ja pyawidityi; jøts ja tuk'ojk tniwa'k'awidijty jøts ja tnimaay:

²⁶ —Pøn jaty øts yā xpawidejtíp, pøni jaa pøngapøn, pøn tpa'ayoodip tyeety tyaak, y'u'nk ñidø'øxy, chø' y'uch, myigu'uktøjk, uk kø'øm paat ñabya'ayøyi, ka'ats øts ja mibaat nbabøjkpi'att. ²⁷ Kaja'ajip ø nbabøjkpi'ajtpy pøn ja ayo'on tkamidanaadyip pøn ø xkabaduujnidip ja nja', xjapawidetwandipts øts, ka'ats øts yjade'embí jaa'y nbabøjkpi'aty. ²⁸ Ti ka' meets ja jawyeen xanipaaty, ku pøn pøch køjxp t'ukyikpidø'økwa'añ pøni ti jaty idø'øn tsojkíp jøts ja y'abaadit pøni wine'enin ja chøkyi ja gasti, jawyeents ja yiktanipatkixy. ²⁹ Kuts nugo ja pøchkojpk pyidø'økixy jøts ja nika' y'abaadi, janch nigajpxy nimadya'akt ja yjaty ku ja jade'en pøn t'ixy, ³⁰ jøts ja wya'andi: “Tø yø jaa'y y'ukpojtsoñ jøts yø nika' tø t'ukyik'abajtiñi.” ³¹ Uk kuts o pøn windsøn tsep t'uktunwa'añ møøt jadu'uk ja myiwindsøn midí ja syoldadi ja tyik-memp ni'ee'px mil, ζti kidits ja jawyeen ttanibiktaagit pøni sudso dø'øn ja ttukwa'ktsø'ot pøni ja'ayi tam ja syoldadi tmøø'taty nimajk mil? ³² Pøni ka'ats ñay'a'ejxiyi, jøts ku jagannim ja myidsep myiñ, kyaxpts ja tu'uk ja kyugajpxy jøts ja t'amido'ot jøts ka' cheptu'undit. ³³ Nayide'ents meets pøni ka'ap jawyeen xpawinmaadyi pøni ti jaty idø'øn m'ixmatstíp øts køjxp, ka'ap meets jade'en mibaat nbabøjkpi'att.

Sq kaan amuum tyik'øyigijxy

³⁴ 'Kaan amuum tyik'øyigjøjxp o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømdi ejxim ja kaanin midí kawa'ats midí katump. ³⁵ Nima ja jade'en kyatu'unt ok naajx ok ti tyiktu'unt, ja ti nøø'mimp ok idø'øn ja nda'abu'jta'ant, pø nugoxi ja jadi'iñi ñiyik'ixkø'øy. Ja'gyukidi pøni mja'gyukiwyandip.

15

Ku ja Jesús tmadyakpaajty tu'uk ja borreegi midí tigøøpy

¹ Nimejníp idø'øn ja Jesús jam ja yikugubajtpitøjkti, ja jaa'dyi pøn amuum tyimyktejtíp pøkyumbi jaa'dyi, jøts ja jam myendi amidodujkpi, ² patyts ja fariseotøjkti møøt ja kajpxwejpitøjkti tjanchpagajpxti ja Jesús, jøts ja wya'andi:

—Tum ka'øy jaa'y yø kyupijkpy jøts yø jotkujk tmøøtkay tmøø'tuuky.

³ Ja'agøjxpts ja Jesús ttamadyakpaajty tu'uk ja ejxpajtin madya'aky midí yide'en wamp:

⁴ —Ku meets wyinaty x'ukyiktigøy tu'ugin ja mborreek midí nimagø'pxy, ζti kidi meets ja ñimakta'pxy myakta'xujkpi borreek jam xyikta'ant jam pe-jyotp, jøts ja tyu'ukpi x'ats'ixa'adit kunim meets ja xpaatt? ⁵ ζJøts kidi meets ja xaxonda'akt ku meets ja xpaatt? ζTi kidi meets ja xkøxkapt mguejnkyøjxp? ζPøn kidi jade'en xyonda'aky ku ja nbaajtin jadigojk midí tø y'uk'atstigøy? ⁶ Kuts jam mdøjkjotp mja'atti, ti kidi meets ja mmigu'uktøjk, ti kidi meets ja mgudøjk ja xukmadøy, jøts ti kidi meets ja xnøjmi: “Xonda'akti meets, tøts øts ja nborreek nbaaty midí tø y'atstigøy.” ⁷ Janch øts idø'øn nwa'añ jøts ku

nayide'en yiktaxonda'aky jap tsajpjøtpy ja pojkpõtumbi jaa'y ku ja tyiktigach ja chinaa'y'in, jøts ja 'ne'egi yiktaxondakp midi tu'uk jøts nigidi ja myakta'pxy myaktaxujkpi jaa'dyi pøn chinaa'y'in tø tyiktigatsnidi, ñadyjyji øy ñayjawiyidi.

Ku ja Jesús tmadyakpaajty ja meen' midi tigøøpy

⁸ '¿Uk pøn tø'øxyøjks myeeñ tka'uk'ixaapy ku ja tyiktigøpy tu'ugin yam ja majk t'ukmøø'taty? Kuwanits ja tyiktøøbyiky ja yjaj jøts ja pyøknaaxy yja'axnaxy jap tyøjkjøtpy, yikxonts ja tyimy'ixaadyøki jøts kunim ja tyim-byaatt. ⁹ Kuts ja tpaaty, jøts myigujøøn myigudøjk jøts myigu'uktøjk ja ttuk-madøpy, yide'en ja ojts tñøjmi: "Tø øts ja nmeen' nbaaty midi tø y'atstigøpy." ¹⁰ Janch øts idø'øn nwa'añ jøts ku Dios møøt y'ankilis ttaxonda'aktit ja pojkpõtumbi jaa'y pøn tyiktigajtsj ja chinaa'y'in.

Ku ja Jesús tmadyakpaajty ja jaa'y y'u'nk pøn tyik'o'jkøjxp ja tyeety myeeñ

¹¹ Nayide'en ja Jesús wyaañ:

—Tu'uk idø'øn jaa'y, namajtsk myajnku'nk, ¹² jøts ja mutskpi ja ñimaajyøø: "Teety, møøñik øts ja pikta'aky midi øts idø'øn nmaay'atp." Winets ja u'nkteety ja ojts tyikwa'lxy ja pyikta'aky jøts ja ttagamaay ja y'una'lk. ¹³ Ñiñannim idø'øn ja wyinaty jade'en yjaty ku ja myutskmajnk tpoøkmujkni t'ejxmujkni ja pyikta'aky tuki'iyi jøts ja ojts ttoø'kni, jøts ja ojts abikyajp abikñaajx tminijky jam jagam, jamts ja ojts tyik'o'jkixy ja myeeñ kyawindiy'ajtingøjxp. ¹⁴ Kuts ja wyinaty tuki'iyi tø tyikøjxni, jøts ja yuu jam winet et jyantyimdyøjkiy'ii'ñ ma dø'øn ja naajx ja kajp jam, jøts ja y'ayodøjkiñaa. ¹⁵ Winets ja t'ixaay tunk ma ja kugajp jaa'y jam, jøts ja ojts kyexy kyamjøtpy kuch'ejxpi. ¹⁶ Janch tsojk jøø'kxkixyim ja t'ejxi ja kuch yjii'kxy, kumi niti ja kyayikmø'øpy. ¹⁷ Jøts jotmay ja tyatøjkiiyøø, yide'en ja ojts ñawyinmaa'nxiyi: "Janch ku'uxyi ndeety tyumbi net jam kyaydi yjøø'kxti, yikwindandip paat ja o ti, jøts øts ya yuu njanch'oo'kni! ¹⁸ Tiku øts ndeety nga'awimbeti ma ja jam chøøni, jøts øts ja jam nnøjmit: Tø teety Dios nmidundigøpy; jøts mets, tø me nayide'en nmidundigøpy; ¹⁹ ka'u'nk'atyim ø tø njantyimyjaty; yiktunks ø nayide'en sam o pøn tumbi xyiktuñin." ²⁰ Jøts idø'øn ja yjanchtuu'døjkiiy'ii'ñ jøts ja wyimbijty jam tyeety wyindum.

Jøts kuts tyeety ja jagamyi y'ejxpajttøø, xjats ja ojts y'am'ijxyi chaach'ijxyi. Jøts ja ñibujtjø'jkøø jøts ja ojts pyatsøyi, jigøxy jibi'lxy ja yja'lty. ²¹ Winets ja tnimaay ja tyeety: "Teety, tø øts Dios nmidundigøpy møk'ampy, jøts nayide'en me tø nmidundigøpy; ka'u'nk'atyim ø nnayjawiyi." ²² Jøts ja u'nkteety tnimaay ja tyumbitøjk: "Tsojk nøjx xjuutti ja øybi wet jøts xukatøkidit, piktaajkidi kyøjeets, tuktawa'agidi kyø'øk. ²³ Nøjx x'atswetsti ja tsakaa midi yaa'kpidsømpnim jøts xyik'ooktit. jWan txøduu'ñindi, wan tkaa'yint t'uujkyindi! ²⁴ Tø øts yø n'u'nk ndijy tyimy'oo'kni, ixysats juky xwindanaa'yindi; tø jeky y'atstigøpy'ity, ixysats jadigojk tø nbaajtyindi." Jøts ja xyødundøjkidøø.

²⁵ Jøts ja myømajnk jam wyinaty wyidity kamjøtp; kuts ja wyimbijty, yja'lty wingon ma ja tøj jam, jøts ja tmadøøpy ja iy ja ech. ²⁶ Winets ja tu'uk tyaajxyii'ñ ja tumbi jøts ja ttiibyiky ti dø'øn jam jade'en tuujnip. ²⁷ Jøts ja tyukmadojøø, yide'en ja ñimaajyøø: "Tøts ja m'uch yja'aty; tøts mdeety ja tsakaa tnankyik'øøgyiyi midi y'ity yaa'kpety, ja'agøjxp ku møk møjaaaw tø yja'aty ja m'uch." ²⁸ Jøts ja myøjpi jyantyim'yambijky, jøts ka'ap ja twa'añ jøts ja jap tyøkit, tyeetynim ja ojts kø'øm ñibiðsimy jøts ja møk ñimaajyøø jøts tyøkit tøjkjøtpy. ²⁹ Xjats tyeety ja tnimaay: "Mnija'wipxi teety winaaak jumøjt me tø nmiduñ, jøts juuni me nga'uknimadøpy, nijade'ents me tu'ugin

xkamø'øy øyik chivi'u'nk øyik ti, jøts øts nmigu'uk jeexyip nmøøtxøduñ.
³⁰ Aa kudamts yø m'u'nk tø yja'aty, mdukn'i'o'jkip tam meets yø' mdsakaa winet midì yikxon tø yaa'kpety, ku mmeen yø tø myik'o'jksyi kawine'en møøt kawindiy tø'øxyøjk." ³¹ Winets ja u'nkteety wyaañ: "Ti sa u'nk mjaty, pø yaayimpts me nmøødi, ti jaty øts ixa nmøøt'ajtpy tum mets yø' mja".
³² Kuwanits pyaat'aty, çti ja ti nguidyimdu'uñin? çti jadam yø nguidyimdyaxondaajkyim? Patyts icyam nxødu'uñindi ku yø m'uch tø yja'aty, pø nøø'mimpts adøm jøts ku yø tø y'oo'kni, icyats juky xwin'ijxyim, jeky tø y'atstigøy'ity, tøts inet nbaajtyim jadigojk."

16

Ku ja Jesús tmaryakpaajty ja ka'ødyumbi'eix'ejtpi

¹ Nanyiñimaay ja Jesús ja pyabøjkpitøjk:

—Ja dø'øn wyinaty tu'uk kumeñ jaa'y midì yiktump, jøts jats idø'øn ja tyumbi tu'uk wyinaty midì t'eix'ejtp ja myøøtumbi, jøts ja windsøn yiknimaay jøts ku pyikta'aky ja nugo yikwindigø'øxyiyi ja tyumbi. ² Winets ja windsøn tnajtswa'wiyiñ ja tyumbi jøts ja tñimaay: "çJanch idø'øn ku dø'øn jade'en myiknimadya'aky ti øts jade'en nñimadøøpy? Køyajkøxni mdunk, ka' me n'ukyiktumbi'eix'ejtnit." ³ Jøts ja tumbi'eix'ejtpi yjanchmaañi yjanchtajni, yide'en ja kø'øm ñawya'añi: "çTits ø ndu'ump, ejx øts yide'en nwindøn xka'ukyiktunwani? Ka'ats ø n'ukmajadakni øyik øts idø'øn nyu'ut ndu'unt, tsø'ødyumipts øts ku øts inet njayiklimunsimujkmit." ⁴ Xjats ja tyabyaajty jøts ja wyaañ: "Tø ø nñijawi sudso ø ndabyaatt, sudso øts pøngapøn xkupøkt tyøjkjøtpy ku øts yø ndunk wyinaty tø yikpøjkni." ⁵ Winets ja tu'uk jaty tnajtswa'wiyiñ pøn jaty ja wyindsøn wyinaty miyoj'ajtpi. Jøts ja yjawyeembi ja tyiktiy: "çWine'en øts nwindøn xmiyoj'ajti?" ⁶ Jøts ja y'adsøøpy jøts ja wyaañ: "Magø'pxy tãmbi øts aceite ja ndamiyoj'aty." Winets ja tumbi'eix'ejtpi wyaañ: "çIxya ja ñinøky; pe'tpy ixa'ak jøts xjaadyigatst, wixijxmyajk tãmbi ja'ayi xpikta'akt." ⁷ Jøts yjadu'ukpi ja tñimaay: "Jøts mets, çwine'en mets ja xmiyoj'aty?" Jøts ja ñimaajyøø: "Magø'pxy kyunchi ariin." Xjats ja tñimaay: "çIxya ja ñinøky midì ojts xja'ay; wants tkajtswijchim jøts makta'pxy kyunchi nbiktaajkin." ⁸ Jøts idø'øn ja windsøn tjanchnija'wiyiñ jøts kudam ja tyumbi'eix'ejtpi yikxon o ti tñiwinmayi ku dø'øn o ti ttuñ. Jade'eñimts yiknija'widi pøn jaty Dios yja' tkababøjkidip, yikxon ja ne'egi tyimiykuyati ja tyay yam nigidi jade'en wyinmaa'nbyaatti pøn Dios ja'ajtidip.

⁹ Kajpxwejin øts idø'øn nyajkpy jøts kidi mbikta'aky nugo x'amnipøjkpatti xtsaañipøjkpatti; pøni jam mbikta'aktyi, yikxon xyiktunkpaattit, øy yø' ka' kya'øyi. Ku yaayi, xabudøkidit o pøn, nugo ku xñijawidi tigøjxp idø'øn ja jade'en xundi. Øy ja yjakixy, wa'atsts meets ja xñijawi jøts ku meets m'anmija'win yikupøkt jap tsajpjøtpy.

¹⁰ Pøn øyjaa'y'ajtp, øyjaa'y'ajtpimpts ja øy ma, wan o ti tmayi tkamayì nayide'ents ja øy yikxon tyiktunkpaaty; pønts kidyim'øyjaa'y'ajtpim, jade'eñimts ja øy ma, nayide'en ja ka'ap tyik'ødyunkpaaty ja pyikta'aky øy ja wine'en myayi kyamayi. ¹¹ Pøni ka'ats yikxon xyiktunkpaatti ja mmeen ja mbikta'aktyi sa pyaat'aty, çti sudsots meets Dios yja' mjaakmo'ojiyit midì ja yakwampy? ¹² Pøni ka' meets mmigu'uk yja' xwingudsø'jkiiyi, çpønts meets ja mja' jade'en xijy tsø'øgiyip, pøn meets ja xijy mmo'owajnip o meets ja xjakømjaja'ji?

¹³ 'Ka' pøn tumbi namajtsk wyindsøn tmiduñ; ku ja jade'en ttu'unt, tu'ukts ja pyidsøømt pøn ja wyinjawip jøts ja yjadu'ukpi tkawinjawit,

tu'uk t'ømyidu'unt jøts jadu'uk tka'ømyidu'unt. Jade'ents ka' y'øyi ku Dios yikmiduñ, ixyaptamts meeñ nayide'en myøjtøjkyimi. Paty ka' y'øyi adsow aduuk, tu'ugyi Dios n'ajot'ajtin.

¹⁴ Tyimyjade'ents idø'on ja fariseotøjk yjaa'y'atti, ja meeñ ja yjanchmøjmigu'uk'ajttip, ixamts idø'on ja wyinaty jade'en pyatmadowdi jøts ja jam tjanchpagajpxti ja Jesús. ¹⁵ Winets ja Jesús wyaañ jøts ja tnimaay: —Meets idø'on jade'en mjaa'y'ajttip, ñadyijyi mjanch'uknawya'atspikta'agyidi, ka' meets yjawi mbøktyuñ, jade'en ja mayjaa'y xwin'øøndi, wa'atsts ja Dios mnijawiyidi sa jaty mwa'andi mgajpxti m'am mjotp; yø' idø'on Dios kyatsøjkpy, ka' Dios jade'en tkupiky jøts ku jaa'y jade'en kø'øm ñamyøjpikta'agyidi.

Ja Moisés kyutujk jøts ja' midi Dios tyanitanaapy yjaa'y

¹⁶ 'Ku ja Juan Bautista ja myiñ, jaayip ja kugajpxtyøjk ja y'aaw y'ayuujk y'adujktøø. Nay jaabaat ja Moisés kyutujk kya'pxy sa Dios ja wyinaty tø myø'øyi. Jøts nay jatyi cho'onda'aky ja Dios y'øgyajpxy y'ø'y'ayuujk, yiknigajpxy yiknimadya'aky ja kyutujk midi ja tyanitanaapy yjaa'y, xjats jade'en kuwani o pøn tjanchjadatøkiwya'añ ja'abi kutujk.

¹⁷ 'Kuwani dø'on jade'en yjatt kyubatt sa Dios kyutujk wya'añ, nijuuni ja jade'eñi kyakixy kyanaxy pø ne'egi køjxp najxp naajx tsajp jøts niwine'enin kyagudigøy ja kyutujk.

Ku ja Jesús kyajpxwiyj sa amajtsk'ajtin ñaxy

¹⁸ 'Ku pøn tmajtstu'uty ñidø'øxy uk ja tø'øxy tmajtstu'uty ñiyaa'y, ja'ats idø'on møj pøky; uk kuts pøn yaa'dyøjk tmøøt'amajtski ja tø'øxy midi tø yikmajtstu'uty, møj pøkyts ja nayide'en.

Ja kumeeñ jaa'y jøts ja Lázaro

¹⁹ 'Tu'uk idø'on ja jaa'y janch kumeeñ, janch xøxy piky idø'on ja', tum ja y'øybi ja yikpejtpy jøts idø'on ja xyumixøduñ jabom jabom, pijy xuyin tpikta'aky ja xyox. ²⁰ Jamts idø'on jaa'y jadu'ukmi pøn txøøw'ajtp Lázaro, janch ayoop janch pøktsoop ja' jøts janch amuum pu'uts ja', ka'ap ja myøjki jøts idø'on ja jam xyumi'ixa'aky jam kumeeñ jaa'y tyøk'agø'øm, jam ja kyu'uxnay'ity. ²¹ Tsojk kaagyixyim ja tja'ijxy ja kaaky abu'xk midi jam kumeeñ jaa'y kyaabyajt patkø'øm najtska'jip; jøts idø'on uk ja jam yjanchniñiyi jøts ja twiweedyi ja pyu'uts. ²² Jøtsniñ idø'on ja ayooobi y'ø'jky, winets ja ojts yikniyxxy tsajpjøtpy ja ankilistøjk ma ja Abraham jap. Jøts ja kumeeñ jaa'y nayide'en y'oo'knimaa, ojts ja ñaxøki. ²³ Kuts idø'on ja jap ayodaajkjøtpy tja'ejxni jøts kudam ja Abraham jam jagam møøt ja Lázaro. ²⁴ Winets ja møk'ampy wyaañ: “Teety Abraham, ayø'ejxk øts, kax yø Lázaro, wan tmiñ, wan yø kyø' tyìkxøøky jøts øts yø ndoojts xuktaxujxit; janch møk øts yap jønjøtpy n'ayøy.” ²⁵ Jøts ja Abraham ja ñimaajyøø: “Ja' u'nk mja'myatsp, tøxi me xaxøñ ku me tø m'atsøøni m'atstani, ka' mets jade'en mjaty sa yø Lázaro tø y'ats'ayøyin, wants yø taxoni jøts me m'uk'ayoomit. ²⁶ Jøts ti tits nnidyu'unim, abikxyi meets jami, abikyts øøts yami; ma pøn y'uknaxt øy yam pøn yjamenwa'añ nidu'ugin, uk øyts jam pøn yjanøjkxwami, nisudso'ampyts pøn kyamajada'aky.” ²⁷ Winets ja kumeeñ jaa'y wyaañ: “Tixi teety Abraham, pøni jade'en tunts may'ajt jøts yø Lázaro xkaxt jam ndeety tyøjkwindum, ²⁸ jaak jam øts nmigu'uk ja nimagoxk, jøts t'atstukmadot'ot jøts kidi ja nayide'en myendi ayooobi ya ayodaajkjøøjty.” ²⁹ Jøts ja Abraham wyaañ, yide'en ja tnimaay: “Jøts timts ja wya'ant midi ja Moisés yjaa'y midi ja Dios kyugajpxtyøjk tø tnigajpxti. ¡Ti wan ja jam tnijawidi pøni myøjpiktaktip!”

³⁰ Jøts ja kumeen jaa'y y'adsøøy: "Janch ja jade'en teety Abraham ja', yjayiktigatstibik chinaa'yin ja y'ijtyi ku ja pøn jam jujky ñinøjkxidit pøn tø y'oo'knidi." ³¹ Jøts ja Abraham ñiimy: "Tixi pøni ka' ja tkupøjkti midi ja Moisés yjaay jøts sa jaty ja Dios kyugajpxy wyandøø, ¿ti ja'ats ja yjaakjanchjawiðip øy oo'kpi ja jujky yjaninijkyxi?"

17

Ja' midi yikpøkpyajtp

¹ Yide'en ja Jesús tnimaay ja pyabøjkpitøjk:

—Juuni øy ti kya'ukyikpøktyuñ, kø'øm tsøkyts ja'. Pønts myigu'uk tyikwinmaa'nmya'atp jøts ja tyikpøktyuñ, ipø tinim sanim ja yjanchjatt y'anmija'win! ² Ne'egi tyimyjapaat'ajtip jøts ja mejyjotp yikniwibejpatp ku møj paandaak ja y'ukyiktayukxotsit, jøts øts n'u'nk n'una'jk ja kidi mibaat xyikpøktyuujni. ³ Øyimts mnay'ejx'etidit jøts kidi nayide'en m'adø'øtsti sam o pøn y'adi'ichin.

'Pøni m'ejxtip ku ja mmigu'uk mmidundigøyidi, tukmadowdits jøts kidi jade'en y'adø'øtsti, uk pøni nagyumaajyidipts, maa'kxuktits ja'. ⁴ Øy ja wixujk ojkin tjayiknipati, øy ja jade'en mjamidundigøyidi, pøni nadyagumaajyidipts ja nayide'en wixujk ojk pøni mnimaajyidiðip ja': "Ka' øts jade'en n'uktunit", maa'kxpts meets ja'.

Ja møj janchja'win

⁵ Xjats ja nwindson'ajtim ja kyudanaabyitøjk ñimaajyøø:

—Møøky øøts janchja'win møj.

⁶ Winets ja tnimaay:

—Kuk meets jeexyip wine'enin xmøø'taty ja janchja'win sam tu'uk mortas pajkin, tøts meets ya'at kipy jeexyip xnimaañidi: "Pidø'øk ya jøts mejyjotp mnøjkxt, jamts myo'ont", nay jatyits meets ja jeexyip tø mmimadøyi.

Ja tumbi tyunkjøøjp

⁷ Ku pøn ja tumbi t'ukyiktuñ kyamjotp, tyikyu'uy tyiktuñ uk tyiktsakaa'ixy ja jam, kuts ja wyimbity jam wyindsøn tyøjkjotp, ku ja jam yja'aty, ¿ti jaty ja jam tyimiyknøjmi: "Ya tyimñax jøts mga'aty?" ⁸ Pø ka'axi ja jade'en yiknøjmi, pø yiknimaapyxi ja jam: "Yik'øyik øts n'a'ux jøts ø xwindsø'øgit, wan øts jawyeen tkay t'uuky jøtsnim me mga'aty m'uukt." ⁹ Kuts ja tumbi ja jade'en tø tja'uktumi pøni sa dø'øn ja tø yik'ane'emy, ¿ja ti winets ja yiktakajxa'aky? Pø ka'axi. ¹⁰ Nayide'ents meets idø'øn Dios xmidu'unt, ku ti xun'abaadidit pøni ti ja mduktuujnidip jøts meets ja xnøjmit: "Ti tumbi øøts idø'øn, ja'ayi øøts iyy tø nduñ, midi paat'ajtip øø ndu'ump."

Ku ja Jesús tyiktsøøjky nimajk ja jaa'y pøn jadi'iñi putsnidip

¹¹ Kuts idø'øn ja Jesús tyuu'døjkigyojmi jøts ja ñijky jam Jerusalén, najx idø'øn ja Samariit etjotp jøts nayide'en jam Galilea. ¹² Jøts kuts ja yja'jty jam mā tpaajty tu'uk ja kajp, jamts ja pyajtøø nimajk ja jaa'dyi pøn pu'uts pa'am wyinaty pøjkidip, jøts ja jagamyi wya'k'øyidøø, ¹³ jamts ja møk'ampy ñimaajyøø:

—jWindsøn Jesús, ayo'ejxk øøts, ejx øøts yide'en njaty!

¹⁴ Kuts ja t'ejxpaajty jøts ja tnimaay:

—Nøjkx x'ats'ejxti ja teetyøjkti.

Xjats ja jaty ñøjkxtøø, jamnim ja wyinaty ñaxti ku ja tsø'øky ñayja'winiyidi.

¹⁵ Winets nayjaty tu'uk t'ejxpaajty ja pyu'uts jøts kudam ja tø tyagyøjxni,

jøts ja jatyi wyimbijty, møk ja Dios ja ttukmøja'wiyii'ñ ttukunuu'kxyja'wiyii'ñ, ñiyaxni niyjojkni ja wyimbijty. ¹⁶ Jøts ja twinguxanay'øyiyii'ñ ja Jesús jøts ja jamyi ñamyujstaajkøø, ttukmøja'wiyii'ñ ttukunuu'kxyja'wiyii'ñ ku ja wyinaty jade'en tø yiktsø'øgyi. Samariit jaa'y idø'on jade'en tump. ¹⁷ Xjats ja Jesús wyaañ:

—¿Ti kidimts meets nimajk tø mdsokixy? ¿Ma net ja yjanidaxujkpidi?

¹⁸ Jabyøø'kxyik øts ya ne'egi xnimemp nadyu'uk, yø'øjik øts ya ne'egi x'atskajxajkp.

¹⁹ Jøts ja tnimaay ja jaa'y:

—Wa'kuki jøts mnøjxknit; ja'agøjxp tø tyay yø mbu'uts ku ø tø xjanchjawi.

Sa ja Dios ja kyutujk tyikme'ent midi ja tyanitanaapy ja yjaa'y

²⁰ Xjats idi'ingøjmyi, ja fariseotøjk tyiktøødøø ja Jesús juunin idø'on ja yja'att ja Dios kyutujk midi ja tyanitanaapy ja yjaa'y, jøts ja t'adsøøy:

—Ka'ap ja ti ejxin pøni sa Dios ja kyutujk tyikja'aty. ²¹ Kidi xjøp'ijxy'atti jøts pøn wya'ant: “Íxya ja!”, uk ñø'ømdit “Íxem ja!”; ka'ats, pø jaanixi meets ja ya xjamøøt'ajtni.

²² Jøts ja tnimaay ja pyabøjkpitøjk:

—Ja'atp ja xøøw ja jumøjt ku mee tsojk ejxpaadyim xja'ejxwa'ant ja naxwii'ñit jaa'y ja myøjkudanaabyi, ka'ats meets ja jatyi x'ext.

²³ Mjadyimyjayiknøjmidi meets: “Íxya ja!”, uk møknojmidi meets “Íxem ja!”. Kidits xmibøkti. ²⁴ Ku ø nme'ent, wa'ats x'ejxtit xnijawidit jade'en sam ja et wyidsukyin xem yam tyikjajta'aky, jats idø'on wyinaty tnibaat'aty.

²⁵ Jawyeents ø n'uk'ayo'ot øy øy, ka' øts ja jaa'y xkupøktit pøn jaty ja íxyam jujky'ajttip. ²⁶ Nayide'en ø njatt sam ja Noé yjajtyin ku ja ya y'atsinaay, nayide'en øy pøngapøn y'adø'øst. ²⁷ Kya'adyit y'uuktit sam ja y'adøstøø, y'amajtskidi ja jotkujk, ja y'u'nk ja ñøøx ja tyik'amajtskidi tyimyjaakja'abi

xøøw ku ja Noé tyøjkiiy'ñ jam barkijotp, kuts ja møk tuu myiñ xjats ja ojts ñi'ijtyi y'oo'køxti. ²⁸ Nayide'ents yjajty ku y'atsja'ajty ja Lot: jotkujk kyaydi y'uukti, jyuydi kyajpxti, yakti tyookti, ñe'lepti kyojti, ña'adi pyotsti, ja tyøjk tyik'øyidi jotkujk; ²⁹ kuts ja Lot jam Sodoma kajpjoth ja'ayi pyidsimy, jøts ja jøønduu jatyi myiñ jøkmyøøt, jøts ja niduki'iyi tyiknax'o'jkijxy ja jaa'y.

³⁰ Nayide'ents idø'on winet et yjatt ku ø x'ejxpaattit jotmøn.

³¹ Pøni jam wyinaty øy pøn jam tøjkojxp tø pyety, ka'ats ja t'uk'atsnidøjkinit pøni ti jaty ja jap tyøjkjøtpy myøøt'ajtpy jøts ja tøkpidsoømwa'ant; pøni pønts jam wyinaty widejtp kamjotp, ne'egi tø'øpts ku ja ne'egi kya'ukwimbejtñit tyøjkwindum. ³² Ja'myaajtsidi ja Lot ñidø'øxy sa ja yjajty. ³³ Pøn kagu'øøgyim pyikta'aky t'ejxp, windigø'øpyts y'anmija'win ja Dios wyingujkp; pønts tkayikmøjtøjkip øy ti, pøn ø ne'egi tu'ugyi xnadyamiyojxip, ja'ats idø'on y'anmija'win nøjx nitso'ok'ajtp.

³⁴ Øts idø'on wamp jøts ku jam wyinaty o pøn namajtsk ttamaamukti tu'ugyi ja maabajt, tu'ukts ja ja'ayi yikpøkjø'økt jøts ja yjadu'ukpi wyindigø'øty. ³⁵ Pøni jam tø'øxyøjk wyinaty namajtsk yjøtsmukti, tu'ukts ja nayide'en yikpøkjø'økt ja y'anmija'win jøts ja yjadu'ukpi nayide'en wyindigø'øty. ³⁶ Nayide'en ja yaa'dyøjkmidi, pøni jam ja namajtsk wyinaty jam kamjotp, tu'ukts ja yikpøkjø'økt jøts ja yjadu'ukpi ka'.

³⁷ Kuts idø'on ja jade'en tmadoodøø jøts ja ojts tyiktøwdi:

—¿Ma windsøn'ajtim idø'on ja jade'en yjatt?

Jøts ja y'adsøøy:

—Kidi mwā'andi ku ja kyayikniḡawit, jabi niduki'yī meets ja xnijawit ku ø nme'ent.

18

Ku ja Jesús tmadyakpaajty ja ku'økyø'øxy jøts ja kudunk tīdyumbi

¹ Xjats Jesús ja ttamadyakpaajty tu'uk ja ejxpajtin madya'aky. Ja' idø'øn ja tyukmadogukiwyampy jøts ja Dios'ajot'aj'tettit jøts niḡuuni kya'amutsk'attit. ² Jøts idø'øn ja tñimaay:

—Jam idø'øn kudunk tīdyumbi wyinaty tu'uk jam kajpjotp, niwine'enints idø'øn Dios ja tkidyimwyindsø'øgi, niḡøn ja tkamø'ijxy øy yjapøni. ³ Nayjamts idø'øn ku'økyø'øxy tu'uk chinaamyi, ja'ats ja kudunk tīdyumbi jam tmiyø'øy'ejtp, ejtp ja yja'øø'ngunaxy, jøts idø'øn ja tja'amidøy ja tīdyu'unin, ja myidsep tjani'øøni jøts ja yikpayø'øty. ⁴ Jeky idø'øn kudunk tīdyumbi ja tkamø'ipiktā'aky jøts ja ka'ap tpayø'øy, xjanimts ja wyinmaay: “Øy øts idø'øn Dios ngawindsø'øgi, øy øts idø'øn niḡøn ngatunk'aty, ⁵ kuwanits øts idø'øn jade'en ndu'unt, pø ejtpts øts yø xjanchmīyø'øy'ity, janch møk ø xyikjotkixy, tikuts øts yø nganitani jøts jade'en kya'ukmenit jøts øts yø xka'ukyikjotmā'tnit.”

⁶ Jøts ja nwindson'ajtim yide'en yjaakwaañ:

—Ja ka'øy kudunk tīdyumbi dø'øn jade'en wamp. ⁷ Kuts idø'øn Dios, ¿ti jaa ja tkidyimñitanit ja yja' paxti ja xinaxy tsunaxy ja'myajts'ejttip? ¿Ti kidi ja jatyi tpudøjkiñit? ⁸ Øts idø'øn wamp jøts ku ja jatyi tñitanit ku ja jatyi tñikajpxu'utt. Kuts ø nme'ent, ¿windem øts naxwiñit jaa'y n'ukpaaty tum jade'en tu'ugyi ja yjanchja'win?

Ku ja Jesús tmadyakpaajty ja fariseotøjk jøts ja yikugubajtpi

⁹ Jøts ja Jesús tñanimadyaktøjkixy'iññ jadu'uk ja madya'aky, jøts ja ttukmadøy pøn namyikaxi jaa'y'ajttip, kø'ømyi ñay'ødyiyidi ñay'øbyiktā'agyidi jøts ja myig'u'uk ja kawin'ijxyim tjawidi. Ja'ats idø'øn ja ñimaay:

¹⁰ —Namajtsk idø'øn ja jaa'y ñøjxtøø Dios ajot'ajtpi jam tsaptøjkjotp: tu'uk fariseo, jøts ja yjadu'ukpi yikugubajtpi jaa'y. ¹¹ Tanaapy ja fariseo jøts ja yide'en tmgajpxy: “Dios Teety, ndukmøja'wip ndukunuu'kxyja'wip mets ku ø ka' nayide'en nduñ sam o pøn myaatsti kyawindiyjaa'y'atti, sam øy pøn axøøk pyøkyundi; ni ngajade'eni paat øts sam yø yikugubajtpi ixa tyani. ¹² Majtsk øjk me n'amaay'aty tuksamañ, ngagugayy ngagu'luugi mets, jøts ndamīyøjpxy mets nbikta'aky wan jatyi ti jatyi ø nbatpy n'ijxpy.” ¹³ Jøts idø'øn ja yikugubajtpi jagam ja ne'egi wya'k'øyiyiññ, ka'ap ja jadine'en y'aaw yjoojt myajada'aky jøts ja wine'enin y'ejxjøkt jøts ja wine'enin chajp'ext, jøts ja ne'egi ñagyachkoxi, yide'en ja wya'añ: “iDios Teety, ayo'ejxk øts, janch pojkpitumbijaa'y øts!” ¹⁴ Xjats ja Jesús yide'en wya'añ: “Øts nømp jøts ku ja yikugubajtpi øjts ne'egi yikmee'kxy, jøts ja øjts wyimbejtni ñøjxni tyøjkwindum, tø ja yiktamee'kxy ja pyøky. Jøts ja fariseo nigidi yikmee'kxy pøn namyikaxi jaa'y'ajtip, pøn kø'ømyi nay'ødyejidip nawya'atspiktaajkidip, ka'ats ja mibaat tminaxti ja wyinmaañ jam Dios wyindum. Pønts tøkxya'widip ja pyøky, pøn yik'ayowim tminuu'kxaktip ja Dios, ja'ats idø'øn ne'egi møjtøjkidip jam Dios wyingujkp.”

Ku ja Jesús øjts tkunuu'kxy ja mutsk unaj'k

¹⁵ Nayi yiktanimemp idø'øn ja Jesús ja mutsk unaj'k jøts ja tkønixajt; jøts kuts ja pabøjkpitøjk jade'en t'ejxtøø, winets ja øjts møk twingugajpxidi

pøn jaty ja mutsk una'jk tyikmendip. ¹⁶ Winets ja Jesús ja mutsk una'jk tyaajxmiin, jøts ja pyabøjkpitøjk ojts tnøjmi:

—Wan yø mutsk una'jk tmendi, kidi meets yø xkaduknimiin; ja yjade'embijaa'y idø'on Dios kyutujk nitanaajyidip. ¹⁷ Janch meets idø'on nnøjmi, pøn tkagupøjkkip ja Dios kyutujk midi ja tyanitanaapy yjaa'y sam ja mutsk una'jk ja tkupikyin, niwindemts ja tkapaaty tka'ixy ja Dios ñitso'ok'ajtin pøni ka'ap ja tkupøkti.

Ja kumeeñ jaa'y

¹⁸ Jøts idø'on ja Jesús tu'uk ja kumeeñ jaa'y ñimaajyøø:

—Mets øyjaa'y yik'ixpøjkpi, ζti ø ndu'ump jøts øts ja n'anmija'win tpaatt ja nitso'ok'ajtin xemikøjxp?

¹⁹ Jøts ja Jesús wyaañ yide'en:

—ζTi jade'en myikwajnip jøts ku øts øy? Ka'ap ma pøn tu'ugin y'øyi sam Dios. ²⁰ Mnija'wipts ja Dios kyutujk sa ja wya'añ: “Kidi mmigu'uk ñiyaa'y ñidø'oxy xpøjkxi; kidi myikjaa'y'øøky; kidi mmeech; kidi mmigu'uk xwin'iiñ; windsø'øgi mdeety mdaak.”

²¹ Jøts ja jaa'y wyaañ:

—Jaayim øts yø jade'en nbaduñ ku nmutsk'aty.

²² Kuts ja Jesús ja jade'en tmadøøy, xjats ja tnimaay:

—Jap jadu'uk midi mgabadumpñim: too'køx ti jaty jam mmøøt'ajtpy jøts ayoobi jaa'y ja xabudøkit, jøts ja jap tsajpøtpty nøjx mwingaxø'jkxi ja jujky'ajtin; winets mdsoont jøts øts xmøødit.

²³ Kuts ja jade'en tmadøøy jøts ja jaty yjanchjotmadyøjkii'ñ kumi janch kumeeñ idø'on ja', ka'ap ja tmajtstu'twə'añ ja pyikta'aky. ²⁴ Kuts ja Jesús t'ijxy jøts ku ja jaa'y jade'en yjotmay'øøky, jøts ja wyaañ:

—iWindemnim ja kumeeñ jaa'y jade'en tpaajtniyidi ja Dios kyutujk midi ja tyanitanaapy yjaa'y! ²⁵ Ne'egi tsojk ñaxt tu'uk møy jiyujk jap xuu'ñ jutjøtpty, jøts nigidi tu'uk kumeeñ jaa'y tyøkit jade'en ma Dios kyutujk tnitani tuki'iyi.

²⁶ Pøn jaty ja jade'en tmadoodip, ja'ats wandøø:

—ζPømbits idø'on nitso'ok'atp?

²⁷ Winet Jesús ja ñimaajyidøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsepjawi.

²⁸ Jøts ja Pedro wyaañ:

—Windsøn'ajtim, tøts øøts nbikta'aky tuki'iyi nmajstutkixy ti jaty øøts y'ijty nmøøt'ajtpy, ixxyats øøts jade'en nwidity møøt mets.

²⁹ Jøts ja t'adsøøy:

—Janch øts idø'on nwa'añ, pøn yjøøn tyøjk tkaba'ayoop, pøn tyeety tyaak, y'uch myigu'uk, y'u'nk ñidø'oxy tkajotmay'ajtp, ja'agøjxp ku ja ne'egi tyikmøjiyi ja Dios kyutujk midi yjaa'y ja tyanitanaapy; ³⁰ pøni wine'enin ja ya ñaxwiin yjaaktsøøni, pyaajtipts Dios kyunuu'kxin ja' jøts nitso'ok'atp y'anmija'win ja xemikøjxp ku ja Dios jadu'ukpi tsinaa'yin ja myo'ojiyit.

Ku ja Jesús jadigojk tñigajpxy jøts ku ja y'ookt

³¹ Xjats ja Jesús abiky tyaajxiyi'ñ ja nimakmajtskpi pabøjkpitøjk, jøts ja tnimaay:

—Yamnimts inet jam Jerusalén nnøjkxindit, ma jade'en yjatt sa jaty ja ku-gajpxtyøjk tjaadyandøø jøts ja tñigajpxti ti ø ndu'ump, ti nbaatp. ³² Yikmatp øts jøts ø nyikøyakt nyiktagøðøkit pøn ø ngamigugajp, nyikni'e'ekt nyik-taxe'ekt øts, nyikwidsujt nyikjøptsujt, kawine'en nyikjemnøjmit nyiktenøjmit.

³³ Ku øts jawyeen n'ukyikwinwopt n'ukyikjøpwopt, jøtsnim øts ja xyik'ooktit; pidsø'ømpsts øts jap oo'kpi jutjøtpy kidigøøk xøøw.

³⁴ Jøts ja ka'ap tja'gyukidi nisudso'ampy, pø ti ja jade'en yiktamimadyaktip, nisudso'ampy ja tkaja'gyukidi.

Ku ja Jesús tyikwin'ejxwa'kxy ja winap jaa'y

³⁵ Kuts ja Jesús jam wyinaty Jericó yja'atwani, jøts jam tuu'pa'am tu'uk chøøni ja winap jaa'y, jam ja yiklimunsimuky. ³⁶ Kuts ja tmadøøy jøts ku ja mayjaa'y jam yjanchnaxti, jøts ja ojts tyiktiy ti dø'øn tuujnip jajtip. ³⁷ Jøts ja yiktukmadøøy jøts ku ja Jesús jam wyinaty ñaxy pøn jam Nazaret tsoo'mp.

³⁸ Winets ja møk'ampy wyaañ:

—jEsús, mets m'aats'ajtpy mgugoj'ajtpy ja David, ayo'ejxk øts!

³⁹ Pønts jam wyinaty jawyeen yøødyip, ja'ats ja møk'ampy nimaajyøø jøts y'amo'ont, jøts yjaaktyimykjinajxpy ja', ka'ap ja y'amøñ, jinaxy ja wyan'adi'ich:

—jEsús, ayo'ejxk øts!

⁴⁰ Winets ja Jesús wya'k'øyyii'ñ jøts ja wyaañ jøts y'atsyikwa'at ja winap jaa'y. Kuts ja wyingume'enyøø wingon, xjats ja tyiktiy jøts ja tnamaay:

⁴¹ —¿Ti dø'øn mdsøjkpy, ti øts idø'øn xuktunwamp?

Jøts ja winap jaa'y y'adsøøy:

—Windsøn'ajtim, win'ejxwamp øts.

⁴² Jøts ja Jesús ja ñimaajyøø:

—jWin'ejxts inet! Ja'agøjxp yø mween tø y'øyi ku ø tø xjanchjawi.

⁴³ Jøts idø'øn ja winap jaa'y jade'en wyin'ejxpiky, jøts ja tpadsø'jn ja Jesús, møk ja ttukmøjawi ttukunuukxyjawi ja Dios. Jøts ja nayide'en wyamidi pøn jaty jam ja jade'en t'ejxtøø.

19

Ja Jesús jøts ja Zaqueo

¹ Xjats ja Jesús yja'jty jam Jericó, kyajptøjkiyi'ñ, ² jamts kumeeñ jaa'y wyinaty tu'uk, Zaqueo ja xyøøw midì ja yikugubajtpitøjk wyindsøn'ajtip.

³ Ja'ats idø'øn tyimyjawin'ejxwamp ja Jesús jøts ja t'ejxkapt. Janch mayjaa'yts jam wyinaty nisudso'ampy ja tka'ext, jaa ku ja kon yjaaktyimtyanaañimi.

⁴ Xjats ja ojts jawyeen puty i'tanøjkxi mā dø'øn ja Jesús jam wyinaty ñaxwa'añ, jøts ja jam kipyøjxp kyøjxpejty. ⁵ Kuts ja Jesús jam ñajxy, ixam ja Zaqueo kipyøjxp, jøts ja Jesús pyat'ejxøø, yide'en ja ñimaajyøø:

—Zaqueo, puty winak, jap øts ixyam mets mdøjkjøtpy nja'da'akwa'añ.

⁶ Jøts ja Zaqueo jaty wyinaajky, janch ejtni xoni dø'øn ja tyikja'jty ja Jesús jam tyøjkjotp. ⁷ Pøn jatyts ja jade'en t'ejxtøø, jøts ja pyagajpxpinaxwa'ktøø, ja' ja kyajpxtip jøts kuk ja Jesús jam wyinaty tø ñijkxy mā ja ka'øyjaa'y tyøjk jam.

⁸ Jøts ja Zaqueo wya'kukiyi'ñ jøts ja nwindson'ajtim yknimaay:

—Windsøn'ajtim, ndamay'atp øts ayoobi jaa'y kujkwa'kxy ti jaty øts ixja nmøø'ajtpy; pøni tøts øts o pøngapøn o tigati nbøjkxi awin'øøni'ampy, nyik'u'nkipts øts ja' jøts øts ja jawaani may nyikwimbejtixit, maktaxk ojk tukjadine'en jaty y'u'nk'att pøni sa ja kyojpk.

⁹ Xjats ja Jesús wyaañ jøts ja tnamaay:

—Ixyam ja nitso'ok'ajtin tø yja'aty yā tøjkjøjty, kumi nay Abraham meets m'aadsip mgugojip. ¹⁰ Pø ja'abixi ø tø nnimendi jøts øts ja ndukpaattit nduk'ejxtit ja nitso'ok'ajtin pøn ja y'anmija'win y'ijty tigøy'ejtnidip.

Ku ja Jesús tmadyakpaajty ja meeñ kyojpk

11 Exam ja mayjaa'y ja pyatmadøyyi ku ja jade'en wya'añ, jøts ja ttanimadyaktøjkyyi'iñ tu'uk ja ejxpajtin madya'aky, ku ja jam wyinaty kujk wyingoni jam Jerusalén. Nømpxi dø'on ja jaa'y wyinmaydi, ja'ayi ja jam y'ukja'att jøts ja jaty wyindsøndøkit, jøts Dios kyutujk ja tyiktuujnit midi ja tyanitanaapy yjaa'y. 12 Jøts idø'on ja tnimaay:

—Jaa dø'on jaa'y y'lyjty tu'uk, jøtkujk jaa'y. Ja'ats øjts abikyajp t'anøjkxi jøts ja jam y'atswindsøndøkit. Ku ja wyimbett, møjwindsøn ja wyinatyni.

13 Jøts idø'on tyumbi ja nimajk twaadsøoy ku ja wyinaty choonwa'añ, jøts ja nidu'uk jaty ttagødøjkyyi'iñ tu'uk møj mukmyeeñ, jøts ja tnimaay: “Mda'aju'udyip mda'agajpxtip idø'on yø mmeeñ, wan tnayi kunim ø nwimbett.”

14 Mi'ajkiyipts idø'on ja jaa'y ja' pøn jaty jam tsinaadyip, jøts ku ja chø'jñ jøts kexy yø'øbyi ja yiktabagejxy jøts ja jam yide'en y'atswa'andit: “Ka' øts ya'at jaa'y ndsøky jøts øøts yø nwindsøn'att.” 15 Jøts yikpiktaajkim idø'on ja' jøts ja wyindsøn'att, winets ja wyimbijty jam ma ñaajx kyajp. Ku ja jam yja'lyty jøts ja twaadsøoy ja tyumbi pøn jaty ja wyinaty tø tkømø'oy ja meeñ, ja' ja ñijawiwypy wine'en jaty ja wyinaty tø tyik'u'ngidi.

16 Jøts ja yjawyeembi myiñ jøts ja tyukmadoojoø: “Windsøn, majk øjk øts ja jadukjadine'en jaty tø nyik'u'nk'aty ja mmeeñ.” 17 Xjats ja wyindsøn'y'adsøoy: “Øy'ajtp, øyxi dø'on jade'en mduñ, mjotwampxi dø'on jade'en; ti sã metsxi yjadini'iñibi meeñ jade'en tø xyikmayi, ja'agøjxpts mets ndukwindsøn'atwa'añ majk ja kajp.”

18 Jøts jadu'uk myiñ, ja'ats waan: “Windsøn, magoxk øjk øts jadukjadine'en jaty tø nyik'u'nk'aty ja mmeeñ.” 19 Jøts ja nayide'en yik'adsøomøø: “Windsøn'atp mets ja magoxkpi kajp.” 20 Winets jam jadu'uk myiñ jøts ja wyaañ: “Windsøn, ixyaani ja mmeeñ. Konji'iky øts yø nbaayjotpy tø nyik'ity; 21 kumi ñnija'wip øts jøts ku mets ka' ti jadi'iñi xnajtsjawi, ja'agøjxpts øts ndsø'øgi, ja'abaat me xpayø'oy øy mets ja xjagaja'aji, myikpidø'økwambyaat mets ja piktā'aky øy me mjanani'ipy.”

22 Winets windsøn ja ñmaajyøø: “Mets ka'ømyidumbi, kø'øm yø m'aaw mnadyani'øøniyi, yø' me kø'øm mdiidyujnip. Pøni mñija'wip tam ku øts jade'en njaa'y'aty ku øts ja nbøkmuky midi ø ngabiktakpy, ku øts ja xijy nyikpidi'ikpyaat midi njaganipy, 23 jøts, ¿ti kuts øts ja mmeeñ tø xka'anuu'kxyaky, jøts øts ja meengyojpk jeexyip tø nbaaty møøt ja meeñ'u'nk?” 24 Jøts ja tnimaay pøn jaty jam wyinaty: “Pøjkxidi yø meeñ, jøts ja xmo'odit pøn øts ja nmeengyojpk majk øjk tø xyik'u'nk'ajtyi.”

25 Jøts ja wyandøø: “Pø jamimts windsøn ja' myeeñ, pø majkts meeñ muky ja jam tmøødi.” 26 Jøts ja windsøn'y'adsøoy: “Øtsts idø'on wamp, jøts ku ja yjaaktyimyikpudøkit pøn tyikmøjtakp ku ja o ti yiin waan yikmø'oy; pønts kø'øm o ti tkidyimyikmøjtakp ku ja o ti yiin waan yjayikmø'oy, jaaktyimyikpøjkøjxipts ja ne'egi tuki'iyi.

27 Jøts ja' pøn ø xmi'ajkidip pøn ø xkatsojktip jøts ø nwindsøn'att, nøjkxts ja x'atswawdi jøts ya xyikme'endit jøts ya xtyimyikpa'ookit øts nwinguky.”

Ku ja Jesús kyajptøjkyyi'iñ jam Jerusalén

28 Jøts ja Jesús jade'en myadyak'abajtyi'iñ, jøts ja ñajxy, jamxi ja Jerusalén ñijky. 29 Jawaani ja jam wyinaty kyidyimya'atti jam Betfagé jøts jam Betania, jade'en ja kajpxøw jam, ku ja tkejxy namajtsk pyabøjkpi ku ja jam wyinaty wingondi ma ja kojpku'nk jam txøøwi Olivos, 30 jamts ja tnimaay:

—Nøjkxti ixem kajpjojp, ixew wingon. Kuts inet jam mja'attit, jam inet buur tu'uk kuwñi xpaattit midi ka'anim pøn ttatsøøni. Ja'ats m'atmigajidip jøts

xyikme'endit. ³¹ Pøni pønts myiktøøjidip tigøjxp ku xmigajidi, nøjmidits jøts ku ø ndsøky.

³² Jøts idø'on ja pyabøjkpi namajtsk ñøjkxtøø tpatøø jade'en sà Jesús ja wyinaty tø ñii'mxyidi. ³³ Jam ja wyinaty tyimygajidi ja kujiyujk ku ja jiyujk ja ñimaajyidøø jøts ja yiktøøjidøø:

—¿Tigøjxp ku yø jiyujk xmigajidi?

³⁴ Jøts ja t'adsoodøø:

—Kumi ja nwindson'ajtim yø ttsojpk.

³⁵ Jøts ja twejtsnøjkxtøø ma ja Jesús jam wyinaty y'awijxy, jamts wyet ja ttajiba'andøø jøts Jesús ja ttawa'atspejty. ³⁶ Kuts idø'on ja Jesús wyingon'adøtsni, xjats wet ja nøø' tuu' yiktabatya'abi. ³⁷ Ku ja wyinaty wyingoni ja kajp, ku ja jam kyida'aky Olivos kojpkwemp, winets pyabøjkpitøjk ja ejtni xoni yjanchpaya'axyi yjanchpajøkyi, jøts ja møk'ampy ttukmøjawidi ttukunuu'kxyjawidi ja Dios ku milagri'ajtin ja wyinaty jade'en tø tyuk'ijxyidi. ³⁸ Yide'en ja wya'andi:

—¡Øy'ajtp ku Dios xuknimi'ñim kyunuu'kxy wyindsøn! ¡Jotkuk'atyim idø'on jap tsajpjøtpy! ¡Kuuyi Dios jadu'uk yjaak'øyi!

³⁹ Winets ja fariseotøjk winaagin tñimaadyøø ja Jesús pøn jam wyinaty jaa'y agujkpti:

—Windsøn, tiku waani sà xkanøjmi yø mbabøjkpitøjk.

⁴⁰ Jøts ja y'adsojøø ja Jesús:

—Øts idø'on wamp jøts ku øts inet yø njayik'amo'ondit, wenkpits inet kajpxkojmidip møk'ampy, nijuuni yø kya'amondi øy yø pøn yjayik'amonwa'añidi.

⁴¹ Kuts ja t'ejxpaajty ja Jerusaléngit kajp ku ja jam wyinaty jawaani kyaja'atni, jøts Jesús ja tkudsaachwinma'ayiyi'ñ jøts ja yaajxy, ⁴² yide'en ja wyaañ:

—¡Kuk jeexyip iiy wine'enin xja'gyuki jøts ku ja mxøøw ja mjumøjt tø mjataja'adyi, jøts jeexyip ni'ijtyi ja mjaa'y tpaatti ja Dios kyunuu'kxyin! Tøts ja tiempi ñaxy, iti jaa ja xijy, jatyi myiktami'awa'anigyojmit! ⁴³ Ja'atp ja xøøw ja jumøjt ku tiempi kya'øyt, ku mmidsep mdamukit, amuum myikna'awidejtkøxt, nima awa'ats mgata'ant, ja xem ja yam myiknidøkit, ⁴⁴ naxjøtpy myikjaagida'akt jøts ja mjaa'y may'ampy kyudigø'odyit. Niwine'en niti kyata'ant; ja'agøjxp ku tø xkagupiky ja Dios ku ja køøm tø mjanimiñi.

Ku ja Jesús twøjpidømguixy ja too'kpitøjk jam tsaptøjk agøøm

⁴⁵ Xjats ja Jesús chaptøjktøjkijyi'ñ jøts ya tuki'iyi tyikpidømbinaxwa'jky pøn jaty jam wyinaty yajktip too'ktip, juudyip kajpxtip, ⁴⁶ yide'en ja tñimaay:

—Yide'ents Dios kyajpxy jap kyøjxja'ayi: "Ja' øts ndsaptøjk wya'añ jøts øts njaa'y jap Dios'ajot'attit"; ma meets yø ya jade'en xyiktuni sà maa'tspi chinaadyaajkindi.

⁴⁷ Jabom jabom idø'on ja Jesús jam tsaptøjkjotp yik'ixpijky; yam idø'on ja teetywindsønøjkti, møøt ja kajpxwejpitøjkti møøt ja mōjaa'dyøjkti midi tñigubajk'ajttip ja kajp, tñiwinnmayidi sudso ja yjadyimy'uk'ooktnim. ⁴⁸ Jøts ja nisudso tkamidabyaatti ti sà ja ttu'undit, pø amuumts ja jaa'y ja jam pyatmadøyyi, ti pøn ja jam kabatmadojiyip.

¹ Xjats idø'øn yide'en tuk'ojk yjajty ku ja Jesús jam wyinaty tsaptøjkjotp tyik'ixpiky ja mayjaa'y, ja øgyajpxy ja øy'ayuujk ja jam wyinaty kyajpxwa'kxpy sudso nniitso'ok'ajtin, ku ja teetywindsøndøjk jam yja'jttøø, møøt ja kajpxwejpitøjkti, møøt ja møjaa'dyøjkti pøn tniugugajp'ajttip ja kajp, ² ja ats idø'øn jam yide'en wandøø:

—Yø' mniigajpxp pøn jade'en tø mdagutujk'aty; jøts jade'en m'adø'øtst. ¿Pøn yø kutujk jade'en tø mmø'øyi?

³ Winets Jesús ja t'adsojimbijty jøts ja tniimaay:

—Nayide'en mee nyiktøøwami, jøts m'adso'odip idø'øn: ⁴ ¿pøn ja Juan ojts tya'ane'emyi jøts ja yiknøbatt? ¿Dios ja ojts jade'en tyanigutujk'ajtxyi, uk ja naxwiil'niit jaa'y?

⁵ Winets ja agø'ømyi tkajpxy'ajttøø, yide'en ja ñawya'añidi:

—¿Sa nniima'ayin? Ku net yø njanima'ayin jøts ku Dios ja tyanigutujk'ajttøø, yide'ents inet yø x'adso'owin: “Jøts ¿tigøjxp ku ja xkajanchja'widøø pøni jade'en tam?” ⁶ Jøts kuts inet yø njanima'amya'andit jøts ku ja yaayi jade'en yiktanigutujk'aty, tsojk inet yø jaa'y xjanchka'tspa'o'jkindit, kumi wa'ats yø tnijawidi jøts ku ja Juan ja Dios kyexyi.

⁷ Xjats ja t'adsoodøø jøts ku ja ka' tnijawidi pøni pøn ja Juan jade'en wyinaty tø tyanigutujk'aty; jøts ja jade'en yiknøbatt. ⁸ Jøts Jesús ja ñimaajyidøø:

—Pøni jade'en tam, ni øtsts meets ja ngadukmado'ot pøni pøn øts jade'en tø xanigutujk'aty ku øts jade'en n'adi'ich.

Ku Jesús tmadyakpaajty ja ka'ødyumbidi

⁹ Winets ja Jesús tniimaabyinaxwa'jky ja mayjaa'y, yide'en ja ejxpajtin madya'aky ja tu'uk tniimadyaktøjkiyi'ñ:

—Ja dø'øn jaa'y y'ijty tu'uk pøn jam kyamjotp tnejp ja uvi tsa'am, jøts ja ttukmidagañ ja tyumbi winaagin ku jeky'ampy widejtpi ñijky. ¹⁰ Kuts tpaajty ja uvi tsa'am tujk'aats, jats ja tkejxy tu'uk tyumbi jøts ja t'atstuk'amidowa'añ pøn ja kam jam wyinaty tø tmidandi jøts ja tyaktit ja nidsa'am ni'ipy, midi ja paa't'ajtip jøts ja yikmo'ot. “¿Maa?” “Ka'ap.” Ja tumbi ñømdøø. Yikxon ja jam ojts yjantyimyikwøpy, jøts ja yikajxjimbijty wa'ats jadi'iñi. ¹¹ Xjats ja kugam tkejxy jadu'uk tyumbi; nayide'en ja ojts yikjemnøjmi yiktentøjmi, yikxon ja jam yjanchyikipwyøjpy jøts ja nayi wa'ats jadi'iñi yikajxjimbijty, niti ja kyayikmøøy. ¹² Jøts idø'øn ja ka' tniimøñ, ojts tyumbi ja jadu'uk tka-jkxkojmi jøts ja jam nayide'en ttundøø, tyikwindsaachidi tyikjøptsaaichidøø jøts ja tyiakttøø.

¹³ Jøts yide'en ja kugam wyaañ: “¿Sudsom tsøky ndu'unt? Nmajnku'ngin n'ukaxp, ja ku yø t'ejxpaattit, ¿ja kidi yø ttsø'øgidit?” ¹⁴ Ja'ayi ja tumbitøjk ja ojts y'ejxpaadyiyi jøts ja xem yam ñawyajnidøø: “Ya'at yø kam tmidanwamp; wan tyikpa'o'jkyim jøts adøm yø kam nmida'anindit.” ¹⁵ Winets ja tjidøjtpidsømdøø jam kamjotp jøts ja ojts tyik'ookti.

—¿Sats idø'øn kugam ja yjawi tyunidit? ¹⁶ Me'emp ja kø'øm jøts ja tyikugøxit ja yjade'embidi tumbidi pøn jadyimyjade'en'ajttip, jøts ja ne'egi tmo'ot ja kyam ja abiky tumbidi.

Ku ja nidaay'ajtibidi ja jade'en tmadoodøø, jøts ja wyandøø:

—iPø katsojknim ja Dios!

¹⁷ Tiy Jesús ja wyin'ijxyidi, jøts ja yikniimaadyøø:

—¿Tiits idø'øn yø Dios kyajpxy ñigajpxy ku yø jap yide'en yja'ayi? ¿Nugo yø jap jade'en wya'añ?

Ja tsaq midi ja pojtspi kya'ejxidøø,

ja'ats yam ne'egi tø y'uknøjkxni jam pøch kyubajkp jøts ja' t'amajtsmujkøjxp yø pøch.

18 Ku ja y'ukyiktanaxkidakpatt ku jam o pøn y'uknaxkida'akt, pø mā ja nay'ejxpaadit; u kuts o pøn tyanaxkidakpattit ja tsaa, pu'uxints ja yiktawayit.

Ku yikajpxy'aty ja kugubajt

19 Xjats ja teetywindsøndøjk møøt ja kajpxwejpitøjk ja tjady-imy'ukmatswandøø ja Jesús, wa'ats ja tyimyjaja'gyukidi jøts ku ja ja'agøjxp ja madya'aky yikmadyakpaajty; yjadyimy'ukmatswandip ja' ja Jesús, ja jaa'yts ja chø'jkidip paty ja jade'en tkatundøø. 20 Winets ja tpiktaktøø myigu'uk pøn tpa'ejxtip tpaço'odip jøts ja ñadyiji nugo jade'en ñanky'ijxyidi sam øy jaa'y, ja'ats ja chojktip jøts ja tkajpxy'ejxtit kuuyi ja y'ukajpxigø'øty, ja'ats ja jatyi tyani'øønidip jøts ja jam tkøyaktit mā wyindsøn ja jamdi. 21 Paty ja yide'en tyiktøødøø:

—Windsøn, nnija'wip øøts jøts ku myik'ixpiky øy tsuj, tiy janch tuki'iyi xnigajpxy jøts ka' me pøn xkupiky xkagupiky ti sa me mwa'añ, ne'egi yikxon mets ja ne'egi xnankñi'ixpøkíyí tiy janch ja Dios tyiy'ajtin sudso ja yiknijawit. 22 Tukmadooks øøts: ¿Nmo'op øøts kugubajt ja møj windsøn midi jam abiky'ampy nichøky tø myiñ yikutujkpi, uk ka'?

23 Yja'wiyii'ñ Jesús ja jatyi jøts ku ja kya'ødyunwa'añi, jøts ja tnimaay:

—¿Tiku øts jade'en xkajpxy'ejxti, tigøjxp ku øts jade'en xniwambatwa'andi?

24 Uktuk'ejxtik øts tu'uk meen'. ¿Pøn ja wyeen y'aaw yø jam myøøt'ajtip, jøts pøn ja xyøøw jam køxja'ay?

Jøts ja wyandøø:

—Ja møj windsønimts yø' yja'.

25 Xjats ja tnimaay:

—Ja'ats meets ja mmo'op midi ja yja'ajtpy, jøts ja Dios ja' xmo'odit midi ja paat'ajtmiiyip.

26 Jøts ja nisudso'ampy tkakajpxy'ejxti øyik idø'øn ja ttaniwambattit sa jaty ja jam wyinaty wya'añ jam mayjaa'yjotp; jinaxy ja ñigyumaap yjajtøø ku ja jade'en yik'adsoodøø, jøts ja ne'egi y'aaw amøñi t'ukyik'ejtnidi.

Ku ja jaa'y tyiktøwdi pøni janch idø'øn ja' ku oo'kpi jadigojk yujukpyøkti

27 Jøts idø'øn ja saduceotøjk jam winaagin yja'tmidøø jøts Jesús ja t'ejxwā'andi. Ka'ap idø'øn ja saduceotøjk ja tkupøkti jøts ku oo'kpi y'anmija'win jadigojk pyidsimy juky'ajtpi xemikøjxp møøt ñine'kx; paty ja tnimaadyøø ja Jesús:

28 —Windsøn, yide'en ja Moisés tjaadyaañ, pønik ñidø'øxy ku'øøky tyiktamp yam ja ka'anin y'u'nk tpaati, pøni jamts ja' y'uch y'ajch, ja'adsik tmøøt'amajtskip ja ku'økytø'øxy jøts ja ttukpaatt y'u'nk, jøts ja jade'en tkayikudigø'øty ja myigu'uk. 29 Jats idø'øn jaa'y y'ijtyi, niwixujk ja tyukyaad'yøjk'atti jøts ja yjagyooði jawyeen y'amajtskiyii'ñ jøts ja tku'ø'jky ja ñidø'øxy, nitu'uk y'u'nk ja ojts tkapaatti. 30 Xjats ja mutskpi ja tmøøt'amajtskiyii'ñ ja ku'økytø'øxy jøts ja nayide'en tku'ø'jky, ka'ap ja tyik'u'nkpaajty. 31 Jøts ja midigøøkpi ja twaa'y ja ku'økytø'øxy jøts ja nayide'en tku'ø'jky. Tum jade'en yjajtkøjxti niwixujk, ni tu'ugin pøn y'u'nk tkayiktaañ.

32 Jøts ja tø'øxyøjk nayide'en y'o'jknimaq. 33 Kuts idø'øn ja nøjx jadigojk yujukpyøkti, ¿pømbits idø'øn ja nøjx tñidø'øxy'aty jadigojk, pø niwixujkxi ja tø t'atsnidø'øxy'atti?

34 Xjats ja Jesús ja ñimaajyidøø:

—Yaayí dø'øn yø jade'en yjaty, yaayí naḡwiiñ jade'en y'amajtskidi ja yaa'y ja tø'øxy. ³⁵ Pøn paat'ajtidip jøts ja ñøjktit jam mā Dios ja tø t'a'ejxi, ku ja yjujkyøktit jadigojk ka'ap jam pøn t'ukjotmay'ajtnit ja amajtsk'ajtin, ni tka'ukyik'amajtskyinidit y'u'nk y'una'jk jam pøn, ³⁶ ka'ap pøn y'uk'oo'knit y'uktigøøñit. Tum jade'en ja jam chinaañidit sam ankilistøjkti. Tum Dios ja amuum u'nk'ajtidip una'jk'ajtidip, ja'agøjxp ku dø'øn ja jemchinaa'yin tø tpaatti ku ja jadigojk tø yjujkyøkti jap oo'kpi agujkpy ja nwindson'ajtimgøjxp. ³⁷ Kø'øm paatxi Moisés ja xuknija'windi jøts ku oo'kpi yjujkyøkti jadigojk ku ja jam ojts t'ixy ja ximum ñitøøwyidity. Pø yide'enxi ja jam tmadøøy jøts ku ja Abraham, jøts ku ja Isaac, jøts ku ja Jacob ja tdios'atti ja Dios Teety. ³⁸ Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjyky'att øy pøn.

³⁹ Winets ja kajpxwejpitøjk winaagin ñømdøø:

—Janch tiigyajpxy, windsøn.

⁴⁰ Jøts ja ka' y'uknay'a'ejxinidyidi jøts ja tyiktøø'adø'øtstit, ne'egi ja y'amondøø.

¿Janch idø'øn ku ja David t'ap'aty ja Cristo?

⁴¹ Xjats Jesús ja tñimaay:

—¿Jøts sudso jade'en mwā'andi jøts ku David ja Cristo t'ap'aty? ⁴² Pø yide'ents ja David tyikwā'añ ja nøky ku ja tjaay ja Salmos:

Yide'en ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy,

⁴³ kunim øts yø nmimajadakøxt pøn jaty mmidsep'ajtip.”

⁴⁴ ¿Sudso'ampyts ja David t'ap'aty ja Cristo, pø wyindsøn'ajtpyts ja kø'ømbaat?

Ku ja Jesús tñigajpxi ja kajpxwejpitøjk ja kya'øwysinmaa'ndyi

⁴⁵ May jaa'y idø'øn ixam amidodujktip ku ja Jesús tñimaay ja pyabøjkpitøjk:

⁴⁶ —Øyim mnay'ejx'etidit, ejxim yø kajpxwejpitøjk mdawin'iiñidi kya'øwysinmaa'ñ, jade'en yø ñachøkyidi jøts wyet yø tyeky'ok'am paat tpajidøttit, jøts ja' yø chojktip ja nawyindsø'øgi jøts yø yikajpxpoo'kxtit jam mayjaa'y agujkpy, jøts ku yø tsaptøjkjøtpy tyøkidi tum ja tsinaabyajt yø tsatsinaawyandip mididi jam tsaptøjk'okp, jøts ku kyaamyidi tum jam yø ñaxti tsinaabyi mā dø'øn yø myøjtøkidit. ⁴⁷ Nayø'øxi ku'økytø'øxy ja pyikta'aky tpøjkxidip jøts ñadyiyi ñadyagubøjkyidi ja Dios'ajot'ajtin. Ja ti pøn ja', ja ti pøn ñadyiyi jeky'ampy tsapkajpxtip, nayø'øxi ja'adi pøn ka' ti tyiknigaxø'økti, ñadyiyi øy jaa'y'atti. Yø yjade'embi jaa'yts idø'øn Dios møj yik'ayo'op.

21

Ku ja ku'økytø'øxy tpiktaajky lyimunsi

¹ Xjats idø'øn ja Jesús ojts t'ixy jap tsaptøjkjøtpy ku ja kumeeñ jaa'y jam wyinaty tkugonidi ja lyimunsi jam meeñ'abøjk'iiñjotp. ² Jøts ku'økytø'øxy majtsk ja pyujxmeeñ'nk jam tkugo'onimøø; ³ winets ja Jesús ja pyabøjkpitøjk tñimaay jøts ja wyaañ:

—Janch meets idø'øn nnøjmi, jøts ku yø ku'økytø'øxy ayoobi ne'egi myinajpxy lyimunsi yø jam Dios wyingujkpy øy idø'øn yø kyamabaadi sam o pøn yja' tpikta'akti. ⁴ Ja' yø iyy yojxtip mididi yø winda'anxyidyidip yam yø ku'økytø'øxy ayoobi ne'egi tpikta'aky ja yiktuujnik ja ñidsinaajyk.

Ku ja Jesús tñigajpxy jøts ku ja tsaptøjkjyett

⁵ Jøts idø'øn niwinaagin jam wyinaty tnimadya'akti ja tsaptøjk, ku ja janch tsuj kyaxi'iky, ku tsaa ja jade'en janch tsuj tmøøt'aty, jøts ja nayide'en chujkaxi'iky midi jam wyinaty pøngapøn tø tyoxti. Xjats ja Jesús wyaañ:

⁶ —Ja'atp ja tiempì ku ya'at kyuja'wigyøxt ixa jade'en x'ejxti, ku yø tsaa ni tu'ugin kyata'ant nikiibyety.

Ku ejxa'an jawyeen yikpiкта'akt ku wyinaty ja tudyu'unin xøøw wyingøñ

⁷ Winets ja tyiktøødøø jøts ja tnimaadyøø:

—¿Juuni windsøn idø'øn ja jade'en yjatt? ¿Ti dø'øn ja yiktanijawip jøts ku dø'øn ja wyinaty jade'en yjatwə'añ?

⁸ Jøts ja Jesús wyaañ:

—Øyim mnay'ejx'etidit, jøts kidi mee tø mniyjajtñi ñiwyindaay'ajtk. Kumi may ja mye'endit pøn øts nxøøw nugo nadyanikajpxidip ku ja ñø'ømdit: “Cristo øts”; “Tø kya'pxy ja tiempi.” Kidits mets ja xpanijkyx jaty. ⁹ Jøts ku xnimado'attit ja tsep, uk tyiktigtatsti ja kyutujk adsepkøjxp, kidits me mdsø'øgi; pø jawyeenxi dø'øn ya'at jade'en ñajxkøxt, ka'anims idø'øn wyinaty kya'pxy jøts kyugøxit ja naẁwii'ñit.

¹⁰ Winets ja tjaaknimaay:

—Ja møj ja mutsk kajp nøjkx ñañibidi'igyidi, jøts ja windsøndøjk cheptu'undit ja xem ja yam pøn jaty ja naajx ja kajp tñitanaadyip ya naẁwiiñ.

¹¹ Møk'ampy uẁx ñaxt, yuu pa'am ñaxkida'akt øy maðsoo, adsø'jkyibim ja tuki'iyi myiktuk'ejxtit ku ja Dios ejxa'an møk tpiкта'akt jam tsajpwemp.

¹² 'Jawyeents mee myikmajtsmukøxwa'ant, myik'ixa'adit o maðsoo. Kuts myikpaattit jøts myikwanøjkxtit jam tsaptøjkjotp ma myiktiidyu'undit, myikti'idyit myiktsu'umdit puxøjkjotpy, ja møj windsøndøjk myiktawanguwawidit pøn jaty yikutujktip, ja'ats idø'øn ja mdukpøky'atidip ku øts nja' xpabøjkidi. ¹³ Jats meets idø'øn ja nja' xnigubøjk. ¹⁴ Kidits meets ja xwandijy pøni sə mee mnagyubokit ku mee mnagyu'adsowiyit.

¹⁵ Øts meets ja wijy'ajtin nmo'op, øts meets nyik'ayukpaatp sə mee mwa'ant jøts ja mmidsep nisudso'ampy kya'adsojimbettit, jadi'iñi ja tmi'amo'ondit.

¹⁶ Mdeety paat mdaak paat mee nga'ødyuniyit. Tits ja chow ja mmigu'uktøjkti jøts ja'adi pøn mminamyaajyidip, myik'oogidip winaagin meets ja'. ¹⁷ Tum midsep meets o pøn m'ejxit ja'agøjxp ku mee xjanchjawi. ¹⁸ Ka'ats meets jadi'iñi myik'ejxigø'øty, ni tu'ugin meets mwaay kyawindigø'øty. ¹⁹ Pøni mmidanaadyip tu'ugyi amumjoojt, mbaatpts meets ja nitso'ok'ajtin jøts meets m'anmija'win yujjy'att xemikøjxp.

²⁰ Ku x'ejxtit yø Jerusaléngit kajp jøts ku amuum tseptumbitøjk tø ñi'awidejtñiyi, jade'ents meets ja xnijawit jøts ku yø kajp wyinaty tsojk kyudigøwya'añ. ²¹ Pøni pønts jam Judeit naẁjotp wyinaty, wants ja tkaknøjkxti jam kojpkøjxp; pøn jaty jam Jerusaléngit kajpjotp, wan ja jam tkakpidsømdi, jøts pøn jaty jam o muum awa'ats etjotp widejttip, kidi ja winet et wyimbetti jøts ja ñøjkxtit jam kajpjotp. ²² Ja'abi xøøw idø'øn ja ayo'on mye'ent, jaa dø'øn ja jade'en yjatt kyubatt sə jaty Dios kyajpxy wya'añ.

²³ Ayo'ijxyim ja tø'øxyøjk yjattit pøn jaty ja myutsk jam wyinaty tnikøjxp'ajttip, pøn jaty ja myaxu'nk jam wyinaty tø kyaxø'økti! Pø ji'iyim ya'axyimxi dø'øn ya naẁwiiñ yjatt, møk ja jaa'y ayo'on tpaattit t'ejxtit. ²⁴ Pømbi ooktip jam tseptundaajkjotp, pømbits yikmatstip jøts ja yiktsu'umdit o magajp, øy yø Jerusaléngit kajp øy sə yiktu'lunt, øy ja ja'at jaa'y yø sə tyuniyit, kunim ja y'ayo'on yø ttanajxkøxt winetnims yø yikmajtsu'utt.

Sə mye'ent ja naẁwii'ñit jaa'y myøjkudanaabyi

²⁵ Wenk yə xəw yə po' yjatt, yə maadsa' nayide'en; jəts naajx kajp jadi'iñi tya'andit, niti tabyajtin tkapaattit, əy ja tsə'əgi yik'o'jknijidit ku tmado'odit ja mejy tyojm'ə'əkt əy mədsoo. ²⁶ Yik'oo'kjimbetidip jaa'y tsə'əgi ku ja tni'mado'odit jəts ku jade'en naxwiiñ yjatwa'añ; jəts ku ja'abaat jade'en yjatt ti jaty jam tsajpwemp ejtp. ²⁷ Jaanims ə x'ejxtit, ja naxwii'ñit jaa'dyi myəjkudanaabyi, ku nmime'ent yootsətpy ja nmək'ajtin, jajpim tsamambim ja n'aju'uk nyikaxə'əkt. ²⁸ Ku də'əon ja jade'en yjajt'ukwa'ant, mək mnabyikta'agidit jəts xjəp'ejxtit jəts ku tsojk mye'ent pəon myikni'tso'ok'atidip.

²⁹ Nəyi tyamimadyəkpa'jtiy'i'ñ ja' jadu'uk ejxpajtin madya'aky jəts ja wya'añ:

—Ku x'ejxti ja iigi kipy uk əy ti kipy kya'adigach ja y'aay. ³⁰ Ku kujk xymumni, jats ja wa'ats xnijawidi jəts ku poot wyingəñ ku ja nəw ja tuu myenwani. ³¹ Nayide'ents idə'əon ja' ku x'ejxtit jade'en ja ayo'on, jade'ents ja xnijawidit jəts ku wyingəñ ja Dios kyutujk midi ja tyani'tanaapy yjaa'y.

³² Janch əts idə'əon nwa'añ jəts ku də'əon ja jaa yjatt namga'anım y'oo'kixy pəon jaty ja ixyam jujky'ajttip. ³³ Najxp y'ity ja naajx ja tsajp, əy yə juuni kyudigə'əty, jəts əts n'ayuujk nijuuni yə kyakixy kyanaxy.

³⁴ Əyim mjaa'y'attit, kidi m'aaw mjoojt xamiyoxti midi yiktundigə'əpy, kidi ja nəw ja mu'uk xunk'atti, kidi meets ja ne'egi xajotigəydi ti jaty ja ejtp naxwiiñ jəts jade'en adsu'jky mgayikubaadidit ³⁵ sam naky myukyın, jade'en ja yiknime'endit pəon jaty jujky'ajttip əy mədsoo ya naxwiiñ. ³⁶ Jəp'ejxtits meets, ajot'at'etti ja Dios jəts mniwa'adsidit ja ayo'on midi tunip jatip, jəts ə xwinguwa'agidit amgujuk jotkujk, ja naxwii'ñit jaa'y myəjkudanaabyi.

³⁷ Xınaxy idə'əon ja Jesús jam yik'ixpiky tsaptəjkətp, jəts ja koots ni'jky jam kojpkəjxp midi yiktejp Olivos. ³⁸ Jəts ja mayjaa'y jam tsaptəjkətp ejtp xyuminə'jxkti jəpyi jəts ja jam pyatmadəyi.

22

Ku ja Jesús yikajpxy'aty jəts ja yikmətst

¹ Ja paski xəw idə'əon wyınaty pyatpy ku ja tsapkaaky yikay jadi'iñi midi kalevaduri məwət. ² Jəts ja teetywindsəndə'əjkti jəts ja kajpxwejpə'əjkti tjanch'ixa'adi ja taay sudsonım ja t'ukyik'ooktit ja Jesús, ja mayjaa'yts ja chə'jkidip.

³ Xjats ja Judas Iscariote ja miku' tyatə'əkiyəw, ja' idə'əon ja pabə'əjkə'əjkt məwət kya'pxti nimakmajtsk. ⁴ Jəts ja ojts tni'ijky ja teetywindsəndə'əjkti məwət ja tajk mayut, jəts ja ojts tminagya'jpxyi, ojts ja tkajpxy'atti sudso ja tkəyakt ja Jesús jəts ja tməttit. ⁵ Jəts ja jade'en yjotkujk'atti, ojts ttami'awanidi meen ja Judas, jəts ja ttamiju'udyit ku ja tkəyakt ja Jesús; ⁶ kyupə'əjk ja jade'en jəts ja t'ixaadyə'əkiy'i'ñ ja taay, jəts ja winet tkəyakt ku ja mayjaa'y jam kya'ettit.

Ku ja nwində'əon'ajtim yjaak'uk'a'ux'ajtni ja pyabə'əjkə'əjkt

⁷ Xjats ja xəw tpaajty ku ja tsapkaaky kyayikay lewaduri məwət, xjats idə'əon ja borreegi maxu'nk wyınaty y'ookwa'añ, jəts ja' idə'əon yikyxy'ajtp ku ja paski xəw nəxy. ⁸ Winets ja Jesús tkejxy ja Pedro məwət ja Juan, yide'en ja tni'maay:

—Nə'əjxkti jəts ja paski a'ux xyik'awe'əjxtit.

⁹ Jəts ja tyiktə'əwəw yide'en:

—¿Mamts əwəts ja xuk'a'ejxiwya'añ?

¹⁰ Jəts ja Jesús ja y'adsoo'idə'əw:

—Ku net jam mgajptokidit, jam inet tu'uk xpaattit jaa'y pøn jam wyinaty nøø twejtsp tsiijyøtpy. Ja'ats mbanøjkxtip jam tyøjkjotp, pøni mā yjā'aty jamts mja'attit, ¹¹ jøts ja kudøjk xnøjmidit: “Yide'en ja windsøn wya'añ: ¿Mak idø'øn ja tøkjooit mā ja tmøøt'a'ux'att ja pyabøjkpitøjk, mak idø'øn ja tka'adyit ja paski a'ux?” ¹² Winets meets inet ja tøkjooit myiktø'ejxtit jap nipatøjkijxpy a'ejxi abaadi; japts xyik'awejxtit ja a'ux.

¹³ Xjats idø'øn ja ojts ñøjkxti jøts ja jam jade'en tjanchpattøø sã Jesús ja wyinaty tø ñi'mxyidi, jøts ja jam t'a'ejxidøø ja paski a'ux.

¹⁴ Kuts ja a'ux'ajtk tpaajty, xjats ja Jesús møøt ja kyudanaabyitøjk twinguwa'adsiyii'ñ ja kaabyajt. ¹⁵ Jøts ja tnimaay:

—Ixayannim meets inet ja paski a'ux jade'en nmøøtkaamyuky sam ø ndy-imchøkyin namga'anim ø n'øøky! ¹⁶ Janch øts idø'øn nwa'añ jøts ku meets ixayami jade'eñi njaakmøøtkay jaanim jadigojk ku mye'ent ja Dios kyutujk midi ja tyanitanaapy yjāa'y.

¹⁷ Winets ja tnixajiyii'ñ tu'uk uujk'ii'ñ, jøts ja jawyeen ttukmøja'wiyii'ñ ttukunuu'kxyja'wiyii'ñ ja Dios Teety, jøtsnim ja wyaañ:

—Axajidi ya'at jøts x'ukwa'kxtit; ¹⁸ øts kø'øm wamp jøts ku ø ka'ap tsojk n'uk'uknit yø uvi tsa'am nøø'u'nk, jaanim jadigojk ku Dios ja kyutujk tyikme'ent midi ja tyanitanaapy yjāa'y.

¹⁹ Jøts ja tnixajiyii'ñ tsapkaaky, ojts nayide'en ttukmøjawi ttukunuu'kxyjawi ja Dios Teety, jøts ja t'adujkpaajkxi ja kyudanaabyitøjk jøts ja tmøø'y, yide'en ja tnimaay:

—Kaydi ya'at, yø' øts idø'øn ñamyayi nne'kx'ajtpy midi meets mnitsoojkingøjxp inet mnioyxp. Mdu'undip ya'at jade'en øts nja'myajtsingøjxp.

²⁰ Nayide'en ja uujk'ii'ñ ja ttuuñ ku ja y'a'ux'ajtkøjxtøø, jøts ja wyaañ:

—Ya'at tsapnøø'uujkin idø'øn ixyam tãmp ejxpajtin ku ja Dios Teety ja wyanda'aky tyik'aduky samdam ja ttami'awa'anii'ñ ja naxwii'ñit jaa'y ja nitso'ok'ajtin. Ixamts idø'øn ja cho'onda'aky ku øts ja nni'jpy inet wyidsu'unt wyidaxt.

²¹ Pønts ø xkøyakp, pøn ø xka'ødyunwamp, ixya øts ja møøt ngay, kidi majip ja'. ²² Ja' ø nbadumpy midi ø tø nyiktanipiky; tja' ayo'ijxyim jaitp pøn ø xkøyakwamp!

²³ Jøts ja ñayiktøønaxwa'jkidøø agø'omyi, pøn idø'øn jade'en ka'øy'adøøtswamp.

Ku ja Jesús kyudanaabyitøjk tkajpxy'atti pøn idø'øn jawaani møj pidsø'ømp

²⁴ Xjats ja xem yam tkajpxy'ajtpinibøjkidøø pømbi dø'øn jady-imy'ukmøjtøkip. ²⁵ Jøts Jesús ja ñimaajyidøø:

—Jade'en møj windsøn t'ana'amdi ja naajx ja kajp pøni sã ja tsokti; jøts pøn jaty tñigubajk'ajtpit o ti, ja'ats yiktejtjip jøts ku ja t'ødyundi øy pøn. ²⁶ Ka'ats meets idø'øn jade'en mjaa'y'attit; pøni pøn møjtøjkjip, pøni pøn ana'amp, kidi ja jawyeen namyiduni tsojky; ja' idø'øn paat'ajtpjip ja myigu'uk tpudøkip.

²⁷ ¿Pømbi dø'øn møjtøjkjip? ¿Ja' pøn yikwindsø'jkjip, uk ja' pøn windsø'jkjip mā ja kaadyaajk jam? ¿Kidi ja'ajip møjtøjkjip pøn jam tø twinguwaadsj ja kaabyajt jøts ja yikwindsø'øgi? Ixyats meets jade'en nmøøtwidity sam ja' pøn ja myigu'uk wyindsø'jkjip.

²⁸ Tøts meets xmøøt'ayo'ombaaty, tø nayide'en xmidanidi wine'enin øts ixyam xmøøtwidetti. ²⁹ Paty meets mbaat'aty nmo'ot ja Dios Teety kyutujk midi ja tyanitanaapy yjāa'y, nayide'en sam øts ja tø xmøøyin, ³⁰ jøts

mga'adyit m'uuktit øts ngaabyajtkøjxp ku øts ja njaa'y ja kutujk ndanitanit, jøts m'ixá'aktit mā ø nyikutukt jøts xiidyu'undit ja Israelit jaa'y niduki'iyi.

Ku ja Jesús kø'øm tniqajpxy jøts ku ja Pedro ja kyu'øøniyit

³¹ Nayide'en ja nwindson'ajtim wyaañ:

—Simón, Simón, tyimdyø jøts miku' yja' myøjtøkit. Tø ja t'amidøy ja Dios Teety ja tiy'ajtin jøts meets ja øy øy myik'ayo'ombaaðit, yikxon meets ja mduktani'eixwa'añi; ³² tøts me nni'amidowi jøts kidi yikmimajada'aky ja njanchja'win ku jade'en m'ukjatt m'ukubatt. Kuts ja m'ajot'ajtin jadigojk tu'ugy xyik'ett, kajpxjot'amøjkits ja mmigu'uk pøn jaty ø nja'ajtpy.

³³ Jøts ja Simón wyaañ:

—Windsøn'ajtim, ku me m'ukyiktsu'umt, nayide'ents øts nyiktsu'umt, ¿ti ti ø nnida'amp? Mjadyimya'øøky mets, nmøøt'ookpts mets.

³⁴ Winets Jesús ja ñimaajyøø:

—Øts Pedro dø'øn wamp jøts ku tsapni'aaw wyinaty ka'anim y'ayajxi'ikñim, ku mets wyinaty tigøøk ojk tø xku'øø'ni jøts ku me xka'ixy'aty.

Ku Jesús tñimaay kyudanaabyitøjk jøts ku ja tyagøda'akwa'añidi ja ayo'on

³⁵ Xjats Jesús ja yiktøjidøø:

—Ku meets ojts nguexy jadi'iñi, ku ja pejn ngadukwejtstøø, ku ja meeñ abøjk'i'iñ ngadukondøø, ku ja mgø'øk paat xkakondøø, ¿sats meets ojts mdyimjaty? ¿Ti ojts mguidyim'ijtxyidi o dø'øn ja jade'en xkakondøø?

Jøts ja yjanchwandøø:

—Janch ka'ap øøts ojts ti xka'ejtxi.

³⁶ Winets ja ñimaajyidøø:

—Yamnims inet ja pejn xwetstit pøni pøn yja' jam, nayide'en ja meeñ abøjk'i'iñ; pøni pøn ja chujx ka'ejtxip, wan ja ñijan tøøky jøts ja ttaju'uty.

³⁷ Øts wamp, wan idø'øn jade'en tjaty, jabi kuwanyimxi jade'en yjatt sá Dios kyajpxy wya'añ: “Møøt ka'øy jaa'y ja yik'amachomujky.” Jade'ents øts idø'øn nyiktu'unt sá øts jap tø nyiknigajpxy. Ka'pxy idø'øn ja jade'en yjatt kyubatt.

³⁸ Jøts ja wyandøø:

—Windsøn'ajtim, pø icyats majtsk tsujx.

Jøts ja y'adsøøy:

—Amøñidi.

Ku ja Jesús t'ajot'aty ja Dios Teety jam Getsemani

³⁹ Xjats ja Jesús chø'jñ, jøts ja ñijkxy jam kojpkøjxp midi yiktejp Olivos ma dø'øn ja jam xyumiø'ø'y'ity; jøts pyabøjkpitøjk ja pyadso'onøø. ⁴⁰ Kuts ja jam yja'jty, jøts ja ñimaajyidøø:

—Ajot'atti Dios Teety, jøts kidi myikmajada'akti.

⁴¹ Jøts ja ojts yjiyø'øy nadyu'uk, ñajtsyø'øyiy'iñ nijagam. Jamts ja ñagyuxendyaajkøø, jøts ja jam Dios Teety t'ajot'ajty ⁴² yide'en:

—Dios Teety, pøni mdsøjkpy, jøts ø ka' jadine'en n'ayo'ombaaqt; kidi øtsipts nja' kø'øm nyiktumpy, ja' ø nbadumpy pøni sá me xamidsøky.

⁴³ Winets ankilis ja tu'uk ñimejnøø midi tsajpjøtpy tso'omp, jøts ja myøjaawmøøjyøø. ⁴⁴ Tyimchaachja'wipts ja møk ku dø'øn ja jade'n yjatwa'añ, jøts ja ojts tjaaktyimyktañ tjaaktyimy'ajot'ajty ja Dios Teety amunjøjt. Janch yikxon ja yja'anuu'kxiñi, jade'en y'anuu'kxi ja wyixe'kxyin sam ni'jpy kom kom wyixe'kxyin.

⁴⁵ Kuts ja Dios'ajot'ajt'abajtiyii'n, jøts ja ojts tnimiñ ja pyabøjkpitøjk mā ja jam wyinatyi. Maadip ja jam ku ja tpaajty, ja jotmay ja jadi'iñi yikjotkøjxidip.

⁴⁶ Winets ja tnimaay:

—¿Tigøjxp ku mma'adi? Pidø'økti, jøts ja Dios Teety x'ajot'attit jøts kidi mibaat miku' yja' mmimajada'agyidi.

Ku ja Jesús yikmajch

⁴⁷ Nay ixam ja Jesús wyinatyi jade'en kyajpxy ku yja'jty may jaa'y. Ja Judás ja twinyø'øpy pøn ja pabøjkpitøjk wyinatyi nimakmajtsk møøt tø y'uka'pxti, jøts ja twingume'eniyii'n ja Jesús jøts ja ojts ttsu'kxy. ⁴⁸ Winets nwindson'ajtm ja tnimaay:

—Judás, ¿jade'eñi øts idø'on xkøyaky ku ø xtsu'kxy?

⁴⁹ Jøts pøn ja Jesús jam wyinatyi møøtwidejtip, ku ja jade'en t'ejxtøø, winets ja yiktøøjøø:

—Windsøn'ajtm, ¿nadyagubojkim yø tsujx?

⁵⁰ Jøts ja nidu'uk tyiktsaachiyii'n ja teetywindsøn tyumbi, ojts y'aga'ndyatsk ja tkajtspo'jtiiyi. ⁵¹ Ka'ap Jesús ñiimy, yide'en ja wyaañ:

—Majtsu'utti; wan jade'eñigøjy.

Jøts ja tkønixajøø ja soldadi tyatsk jøts ja tyiktsøøjky. ⁵² Xjats ja tnimaay ja teetywindsønøjkti, ja kajpxwejpitøjkti, ja møjaa'dyøjkti wine'enin ja jam winaty tø myendø jøts ja yiktsoonwa'añi:

—Ja tsujx, ja kipy meets yam xanimemp. ¿Ti øts yjawi tø nduni? ¿Tø øts yjawi nmaa'tsni? ⁵³ Ku meets jam y'ijty nxumiminabyaadyi jabom jabom jam tsaptojkjotp, niwine'enints meets y'ijty sa xkatuñ xkanøjmi; yamts meets winet tø mnaxwa'aky ku ja et tø chuul'ji kyoodsi jøts miku' yja' jade'en myajada'aky.

Ku ja Pedro tku'iñ jøts ku ja ka' t'ijxy'aty ja Jesús

⁵⁴ Winets ja tmajtsøø ja Jesús, jøts ja tyiønøjkxtøø jam teetywindsøn tyøjkwindum; jøts Pedro ja ojts tpanijky ix'oojk, jagam ja tpayø'øy. ⁵⁵ Jøts jøøn ja jam tajkyujk'am tyikmøjidøø, jamts ja tnidsinay'awidejttøø jøts ja Pedro nay jam y'ixakmøø. ⁵⁶ Winets tø'øxyøjk ja tu'uk y'ejxøø pøn jam wyinatyi tump, jøts ku jøøn ja jam twindsøøni, winets ja tiyim wyin'ejxøø jøts ja wyaañ:

—Yø'øts ja Jesús y'ijty tmøøtwidejtp.

⁵⁷ Ka'ats Pedro ja tkupiky, yide'en ja wyaañ:

—Ka' ø migu'uk ja n'ijxy'aty.

⁵⁸ Jøts jawaandøki y'ijty, xjats jadu'uk y'ejxpajtøø, jøts ja wyaañ:

—Mets yø y'ijty møøtwidijtpy, ¿kidi?

Ka'ats ja Pedro ñiimy, yide'en ja wyaañ:

—Mixy, ka'ap ja y'øtsi, ka' øts ja nmøøtwidthy.

⁵⁹ Tø wyinatyi tukoori ñaxy ku ja jadu'uk møkta'aky wyaañ:

—Janch yø' tam yø y'ijty myøøtwidijtpy, pø nayi Galileit jaa'lyts yø'.

⁶⁰ Xjats ja Pedro wyaañ:

—Migu'uk, nguidyimñija'wip øts pø ti mets jade'en mmadya'kpy.

Jøts nay jatyi nay ixamni ja jade'en kyakajpx'abaadi ku ja tsapni'aaw tu'uk y'ayajxy. ⁶¹ Jøts ja nwindson'ajtm t'ejxjimbijty ja Pedro, winets ja Pedro tja'myejch ku nwindson'ajtm ja wyinatyi tø ñii'mxyi: “Ku tsapni'aaw inet y'aya'axt, tø mets wyinatyi tigøøjk øjk xku'øø'ni jøts ku me ka' x'ijxy'aty, jøts ku me ka' xnijawi.” ⁶² Xjats ja Pedro yø'øpyidsiimy janchniyaxni.

Ku ja Jesús yiktaxi'iky yiktagyaty

⁶³ Jøts ja jaa'dyi pøn ja Jesús wyinaty tkøø'øm'ajttip, ojts ja ttaxe'ekti ttaya'axti, jøts kawine'en twinwopti tjøpwopti. ⁶⁴ Ojts ja twindsumdi jøts ja twingoxti tjøpkoxti, yide'en ja tnøjmidi:

—iUknajtsjawwi pøn yjawwi tø mgøxyi!

⁶⁵ Kawine'enin ja tjemnimaadyøø ttenimaadyøø.

Ku ja Jesús yikwaanijxxy jam kutujktaajkjotp

⁶⁶ Xjats ku xyiinjndyajky jøts ja jamit mõjaa'dyøjk ñamyujkidøø mõøt ja teetywindsøndøjkti, mõøt ja kajpxwejjpitøjkti, jøts ja tyiknøjkxtøø ja Jesús ma ja myøjkutujktaajk ja jamdi. Jøts ja jam tyiktøødøø yide'en:

⁶⁷ —Tukmadook øøts, ¿janch mets idø'øn myiktejp Cristo midi yiknitsokp?

Jøts ja y'adsoojidøø:

—Ku net njanøjmidit jøts ku ja y'øtsi, ka'ats meets inet xmibøkt. ⁶⁸ Kuts meets inet nyiktøøtt, ka'ats meets inet x'adsojimbett, nijade'en meets inet xkamajtstu'utt. ⁶⁹ Nay ixymyits øts inet ja Dios Teety nbu'ixaagit kyutu-ktaajk jøp'am, pøn ja myøk'ajtin kamaabyim.

⁷⁰ Winets ja niduki'iyi wyandøø, niduki'iyi ojts yiktiyi:

—¿Janch mets idø'øn Dios U'nk?

Jøts Jesús y'adsøøy, yide'en ja tnimaay:

—Øts idø'øn ja', nagyø'øm meets ixa jade'en tø mwä'añ.

⁷¹ Jøts ja wyandøø:

—¿Ti ejxpi ti nija'wibi jaaktsojkiyip? Tøxi adøm yø yam kø'øm ndy-imyadø'øyin sa yø kø'øm wyä'añ.

23

Ku ja Jesús twinguwa'jküyü'ñ ja Pilato

¹ Winets ja tyanagyukigyøjxtøø, jøts tyiknøjkxtøø ja Jesús jam Pilato wyingujkp. ² Jøts ja jam tni'øø'ninaxwä'aktø yide'en:

—Tø øøts yø jaa'y ngubaadi, yø' tkajpxmä'tp adøm ja nmigu'uk. Yide'en yø wyä'añ jøts øøts ja yjadu'ukpi windsøn ngamigubatt midi ya'at naajx kajp tnitanaapy. Nayide'en øøts yø xnimaamyi jøts ku yø' Cristo, tyimy ja mõ windsøn midi yiknitsokp.

³ Xjats Pilato ja tyiktiiy:

—¿Janch mets idø'øn israelit jaa'y mniwindsøn'ajtpy?

Winets ja Jesús y'adsøøy jøts ja wyäa'ñ:

—Janch øts ja', ka' me nugo mwä'añ.

⁴ Jøts ja Pilato tnimaay ja teetywindsøndøjkti mõøt ja mayjaa'y:

—Niti põky yø jaa'y, niti tundigø'øyin yø tkatuñ.

⁵ Tiii mõkta'aky ja tymñømdi:

—Yø', Judeit jaa'y nugo tkajpxmä'tp ku kyø'øm wyinma'añ yø ttuk'ixpiky. Jam yø ojts Galilea jade'en y'adøtspinaxwä'aky, jøts yø ixyabaat jade'en tpamiñ, ixyabaat jade'en tkamajtstu'uty.

Ku ja Jesús twinguwa'jküyü'ñ ja Herodes

⁶ Kuts Pilato ja jade'en tmadøøy, xjats ja tyiktiiy põni janch Galileit jaa'y idø'øn ja'. ⁷ Kuts ja ñømdøø jøts ku jade'en, winets ja ojts ttaninijxxy ja Herodes pøn wyinaty mõjkudunk'ajtp jam Galilea, tymbyøn ja wyinatymi jam Jerusalén ja'abi xøøw. ⁸ Kuts ja Herodes twingu'ejxiyü'ñ ja Jesús, jøts ja yjantymxyondajjky; jekyip idø'øn ja wyinaty tymyjawin'ejxwä'añ jøts ja jadine'en ka' twin'ijxñim, tø ja wyinaty yiktamimadyä'aky jøts ja jade'en tnijawi, yjøp'ijxpyts ja t'ejxit øy juuni ja myilagri'ajtin. ⁹ Kawine'en ja

ttiiɓiyiky, jøts ja Jesús kyidyimy'adsoop ja'. ¹⁰ Exam idø'on ja teetywindsøndøjk wyinaty møøt ja kajpxwejpitøjk, ja'ats jam møk'ampy jantyimy'øø'ndip. ¹¹ Xjats ja Herodes møøt ja tyumbitøjk ta'ajkin'ampy tjemdundi ttedundi ja Jesús, jøts ja tnixe'ekti ttaxe'ekti, ojts wet ja ttukatøkidi sam møj windsøn wyetin, jøts ja Herodes ja ttaniguejxy ja Pilato jadigojk. ¹² Winets ja ñamyigu'ukpøjkidøø jadigojk ja Pilato møøt ja Herodes, namyidsep'ajtidip idø'on ja wyinaty.

Ku ja Jesús ñidujkiyii'ñ jøts ja y'ookt

¹³ Jøts ja Pilato twaamujky ja teetywindsøndøjki, ja kudunktøjki, møøt ja mayjaa'y, ¹⁴ jøts ja tñimaay:

—Meets yø jaa'y ya tø xanimiñ jøts mnømdi jøts ku yø' tkajpxma'aty ja jaa'y; tøts xmadowdi ku tø njatiɓiyiky, jøts niti tundigø'oyin øts yø ngadapøky'ijxy, øy meets yø jade'en xjani'øøni. ¹⁵ Nayide'en Herodes yø niti tundigø'oyin tkapaajxti, ixyats ja tø tkajxjimbejtnimi jadigojk. Exats idø'on x'ejxti jøts ku ka' pyaaj'aty jøts yø y'ookt. ¹⁶ Nyik'ayo'opts øts inet yø' jøtsnim øts inet yø nyik'awa'atspidsøømt.

¹⁷ Xumijade'ents idø'on ja ttundi ku ja xøøw tpaaty, kuwani dø'on ja Pilato tu'uk ja pøkyjaa'y tjadyimyik'awa'atspidsimy. ¹⁸ Jøts ja ni'ijtyi møk'ampy wyambinaxwa'aktøø:

—jYikjiwa'ak yø', jøts yø Barrabás ne'egi xyik'awa'atspidsøømt!

¹⁹ Tsep'ejxp idø'on ja Barrabás jam wyinaty jam kajjotp jøts ja tø yikjaa'y'øøky, ja'ats ja kyubuxøjktøjkijyii'ñ, ja' ja wyinaty tø yiktagudsumi.

²⁰ Yik'awa'atspidsømwampy Pilato ja Jesús, jøts ja ojts tmigajpxy jadigojk ja mayjaa'y; ²¹ ¿maa?, jawaani møk'ampy ja wyandøø:

—jYikruspat! jYikruspat!

²² Xjats ja Pilato midigøøk ojk wyaañ:

—¿Tims yø tyimgyubatp? ¿Ti tundigø'oyin adøm yø tø xtyimdyu'unxim? Ka øts yø nbøky'ixy ti yø tyimgyu'oogip. Ja'ayi øts yø nyik'ayo'ot jøts øts yø nyik'awa'atspidsøømt.

²³ Jøts ti dø'on ja tjantyimdyeji, møk ja tyimdyanidi jøts ja tnøjmidi wan tyikruspety; yjanchka'uk'amonidi ja', jøts idø'on ja teetywindsøndøjk ja jade'en tnanktyuujnidøø sam idø'on ja wyinaty tyimyjotkida'akti.

²⁴ Winets ja Pilato ja tkupijky sa ja wyinaty tø wya'andi, ²⁵ jøts ja jade'en tyik'awa'atspidsiimy ja jaa'y pøn ja wyinaty tø t'a'ejxidi. Jøts ja pyidsøømt ja' pøn jam wyinaty tsumy'ejtp puxøjkjotp, pøn jam wyinaty jade'en tø tkubety ja tyundigø'oyin ku ja wyinaty tø tnankchep'ijxyi ja kajjaa'y jøts ku ja yikjaa'y'øøky. Xjats idø'on ja Jesús yikøyajky jøts ja yiktagøøjkijyii'ñ ja mayjaa'y, wan ja ttundi pøni sa ja ttundi chojkingøjpx.

Ku ja nwindsøn'ajtim Jesús kyiruspejty

²⁶ Kuts ja wyinaty jam tyiknøjkxti ma ja tyikruspattit, winets ja tu'uk tmajststøø ja jaa'y pøn kugajp'ajtp Cirene, Simón'ajtp ja'. Kyamjotp ja wyinaty chøøñ jøts ja ttaguwa'anidøø jøts Jesús kyirus ja tpagøjyit jøts ja ix'oojk ttabayøøty.

²⁷ Janch may jaa'y idø'on ja jam wyinaty payø'oyiyip, may ja tø'øxyøjk yjanchya'axti ku ja jotmay ja tyatøkiyidi, ku ja jade'en tyimyiktuñ. ²⁸ Jøts Jesús ja ojts y'ijxyidi jøts ja ñimaajyidøø:

—Meets Jerusaléngit tø'øxyøjki, kidi ø xkuyaaxidi, kø'ømyi mee mnabyaya'axit jøts ja m'ejxtip ja m'u'nk m'una'jk, ja' mbaya'axtip. ²⁹ Ja'atp ja et ja xøøw ku pøn wya'ant: “Nekim yø t'ejxti pøn ka'u'nkpattp, pøn

nijuuni kayikwidse'etstip, pøn nijuuni y'u'nk tkatsim'y'ejttip." ³⁰ Jøts ja jaa'y wyambinaḡwa'aktit: "Ok øts yø tun yø kojpk ne'egi xnijaanit." ³¹ Jade'en sam øts ixyam n'ayo'ombaaty niti pøkyøjxp, isats ja tyimy'ayo'onbaattit ja Jerusaléngit jaa'y!

³² Namajtsk pøkyjaa'y ja pyaa'yø'øyi ja Jesús jøts ja t'atsmøøt'ookt. ³³ Kuts ja jam yja'jttøø mā ja et jam txøøw'aty Calavera, jamts ja tyikruspajttøø ja Jesús møøt ja yjanamajtskpi pøkyjaa'y, tu'uk jaty ja adsow aduuk kyiruspajttøø.

³⁴ Kuts ja ixam wyinaty jade'en yikruspatti, xjats ja Jesús wyaañ:

—Dios Teety, maa'kxuk, ka' yø tñijawidi: pøni ti yø tyundip.

Jøts ja soldaditøjk ja wet tñiguyajttøø midi ja Jesús y'ijty wyet'ajtpy, jøts ja jamyi agø'ømyi twejtswa'kxtøø. ³⁵ Ixam idø'øn ja mayjaa'y y'a'ejxukti jøts kudunktøjk paat ja ñixi'igy tyaxi'igy, yide'en ja wya'andi:

—Tøxi wyenkpi tyiktsø'øky, wants inet yø kø'øm tñankchø'øgyi, pøni janch ja Cristo tam idø'øn yø' pøn ja Dios tø y'a'ejxiyi yiknitsokpi.

³⁶ Nayide'en soldaditøjk ja ñixejkmiyøø tyaxejkmiyøø, jam ja wingon wyingunøjkxiyi jøts ja ttuk'uukwa'andi ja vino ta'am, ³⁷ yide'en tñøjmidi:

—Pøni mets tam idø'øn mjanchwindsøn'ajtp ya israelit jaa'y ñaxjøøjtjy kyajpjøøjtjy, nankñitso'ogits mets jøts mga'ookt.

³⁸ Jøts letri ja jam y'agubajkp yikøxjaay kawinaak jøøjp ja ayuujk, jade'en griego, jade'en latin, jøts hebreo, yide'en ja wya'añ: "Ya'at idø'øn tñiwindsøn'ajtp israelit jaa'y." ³⁹ Jøts ja pøkyjaa'dyi pøn jam wyinaty kudiydi, ja'ats ja nidu'uk migajpxigøøyøø, yide'en ja ñimaajyøø:

—Pøni mCristo tam mets, çti kuts mganankwyinakyi jøts øøts nayide'en xyikwinakt?

⁴⁰ Jøts ja yjadu'ukpi ojts twi'øjy ja myigu'uk, yide'en ja tñimaay:

—çKa' mets ja Dios x'uktsø'jkiñi? Jabi nayide'ents jam yjawi mja'ayo'ombaati. ⁴¹ Jøts xpaat'ajtim adøm jade'en jøts adøm jade'en ngu'ayo'owant ja nga'øy'ajtin ti jaty adøm tø ndu'uñin, mats ya'at niti yø tkatuñ ti dø'øn yø jade'en kyubejtjy.

⁴² Jøts ja yjaakwaañ:

—Jesús, xja'myatspim øts ku mja'att jam mgutujktaajk jøp'am.

⁴³ Jøts Jesús ja y'adsoojøø:

—Janch øts idø'øn nwa'añ jøts ku øts inet nayamyi xmøøtñøjkxt jap tsajpjøtpy.

Ku ja nwindson'ajtim Jesús y'ø'jky

⁴⁴ Ja dø'øn ja xøøw wyinaty kyuki ku jotmøn kyoodsiyi'ñ, jøts ja et kugoots tyaañ, jaanim xiiñi jadigojk tigøøk yaxp. ⁴⁵ Kuts ja xøøw wyingoodsiyi'ñ, jats ja tsaptøjk awejtstuk kujkwa'kxy, winet tyakø'jtsiyi'ñ. ⁴⁶ Jøts ja Jesús møk'ampy wyaañ:

—Dios Teety, pøjkjø'øgik øts n'anmija'win.

Ja'ayi ja jade'en yjaakwaañ jøts ja y'ø'jky.

⁴⁷ Xjats kuts ja romit soldadi mayut ja tuki'iyi jade'en ojts t'ixy sa jaty idø'øn yjajty kyubejtjy, jøts ja tmøja'wiyi'ñ tkunuu'kxyja'wiyi'ñ ja Dios, yide'en ja wyaañ:

—Janch øy jaa'y tam idø'øn yø', ka'ap yø pyøkyjaa'dyi.

⁴⁸ Pøn jaty jam wyinaty, pøn jaty ja jade'en t'ejxtøø tñija'widøø, niyaxni ja jam cho'onidøø. ⁴⁹ Jøts pøn jaty ja Jesús ijxy'ajtip, jøts ja tø'øxyøjkti pøn ja jam Galilea wyinaty tø pyadsøøñiyi, ja'ats idø'øn jam jagam ojts t'a'ejxukti ti jaty tuujnøø jajtøø, wa'ats ja t'ejxkøjxtøø.

Ku ja Jesús ñine'kxy yikpiktaajky jap oo'kpi tsaa jutjotpy

⁵⁰ Jamts wyinaty tu'uk ja jaa'y midi janch øy jaa'y'ajtp, ka'ap ja pøn tmidundigø, José ja xyøw'ajtpy, jam ja Arimatea kyugajpi, nayjam idø'on ja kajp tyañ Judeit etjotp. Nay jamts idø'on ja tyuñ jam kutujktaajkjotp ma ja israelit jaa'y kyutujk'adsøonidi. ⁵¹ Y'awijxpyts idø'on ja José ja' ja Dios kyutujk midi ja tyanitanaapy yjaa'y, jade'ents ja ka' tkupiky sa ja møøtkutujk'adsinaabyi wyinaty tø y'adø'øtsti. ⁵² Ja'ats ojts tñinijky ja Pilato jøts ja t'ats'ijxy jøts ja t'amidoojøø ja Jesús ñine'kx. ⁵³ Kuts ja tyikruswinajky, winets ja tpoopwet'amøjch jøts ja t'piktaajky ma oo'kpi jut ja wyinaty yikxon tø tyik'øyi, tøjku'ngin ja wyinaty tø tpejkxjuty ja tsaa, nipøn oo'kpits jap kyayikpikta'akñim, tyimñay'amaay ja y'ity. ⁵⁴ Ja'abi xøøwts ja øy ti tjaaktyimdyungøxti jøts t'amaay'atti kyimjabom ja poo'kxin xøøw.

⁵⁵ Jøts ja tø'øxyøjk ñøjktøø pøn wyinaty tø tpadsoondi ja Jesús jam Galilea, jøts ja t'ats'ejxtøø ja oo'kpi jut, ojts ja t'ejxti ku ja oo'kpi jap yikpiktaajky. ⁵⁶ Kuts ja wyimbejtñidøø, ñøjknidi jam tyøjkjotp jøts ja ojts t'a'ejxidi ja pa'akxuu'kpi møøt ja aceite, jødsyim ja t'amaay'atti ja poo'kxin xøøw sam wya'añ ja Dios kyutujk.

24

Ku ja nwindson'ajtim Jesús yjujkyjky jadigojk

¹ Kuts ja yjadu'ukpi samaan tyøjkiy'ñ, ku myidukxøøw'ajty, winets ja tø'øxyøjk wyimbejtøø jøts ja ñøjktøø jøpyi jøpyi ma ja oo'kpi jut jam, jøts ja ojts tyiknøjkxti ja pa'akxuu'kpi midi ja wyinaty tø tyik'øyi; ojts ja yjadu'ukpi tø'øxyøjk ja tmøødidi. ² Kuts ja jam yja'jtøø, jøts ja oo'kpi jut ja t'pattøø jøts kudam y'agø' ja kya'uknayjamini; ³ tøjkidøø dø'on ja jam jøts ja ka'ap t'ukpaajtniyidøø ja nwindson'ajtim ñine'kx. ⁴ Jøts ja yjanchø'jkidøø, nisudso'ampy ja kya'ukwinmaa'nbyatnidi pø ti dø'on tyu'undip jøts ku ja tjaaktyimy'ejxpattøø namajtsk ja jaa'y jap wingon wyindaniyidi, janch jajp tsamamp ja wyet tmigaxø'økti. ⁵ Kumi janch tšø'jkidip ja wyinaty jøts ja nugo ñaxkoodøø, yide'en ja ñimaa'jyidøø:

—Jadits ya x'ixa'adi oo'kpi agujky midi tø yjujkyøkni? ⁶ Ka'ap ja ya pøn, tø ja yjujkyjky. Ja'myatsti sa ja mnimaa'jyidøø jam Galilea ku ja jaak nay jam wyinaty, ⁷ ku ja wya'añ jøts ku ka'ø y jaa'y ja yiktagidøkit, ku ja kyiruspatt, jøts ku ja kidigøø xøøw yjujkyøkt.

⁸ Jøts idø'on ja tjanhja'myajtstøø ja Jesús y'ayuujk sa ja wyinaty tø wya'añ, ⁹ jøts ja jam cho'ondøø ma ja oo'kpi jut jam jøts ja wyimbejtñidøø, ka'pxy ttamimadyakøjxtøø ja yjanimaktu'ukpi kudanaabyidi jøts pøn jaty jam wyinaty. ¹⁰ Ja Maria Magdalena, jøts ja Juana, jøts ja yjadu'ukpi Maria midi ja Jacobo tyaak'ajtpy, jøts jadu'uk ja tø'øxyøjk, ja' dø'on jade'en ojts yjatti jøts ja ttamimadyakøjxtøø ja kudanaabyitøjkti. ¹¹ Jøts ja kudanaabyitøjkti ka'ap ja tmibøkti ku ja tø'øxyøjk ja jade'en tyamimadya'agyidi pø sa ja tij yjatti.

¹² Xjats ja Pedro chøø'ñ jøts ja ojts pyujtnijky ma ja oo'kpi jut jam. Kuts ja kyu'ejxyi'ñ jøts ja t'ejxpaa'jty ja poop wet jøts ku ja jagam wyøjnaa'ni. Kuts ja wyimbijty tyøjkjotp jøts ja janch ñigyumaap tja'wiyi'ñ ku dø'on ja wyinaty jade'en tø yjaty.

Ku ja nwindson'ajtim Jesús ñanky'ijxyi jam Emaús tuu'am

¹³ Winets ja pabøjkpitøjk namajtsk nay ja'abi xøøw ñøjkxti jam ma kajp txøøw'aty Emaús, tuk'ajopyø'øyu'ngin idø'on ja tyø'ødyi ku choondi jam Jerusalén jøts ja jam ñøjkxti. ¹⁴ Ja' ja jam wyinaty ñigajpxtip ñimadyaktip

sá dō'ōn jade'en wyinaty tō yjaty; ¹⁵ ixam idō'ōn ja kyajpxti myadya'akti wyinaty, ja' ja jam kyajpxy'ajttip ku Jesús ja ñimejnidōō wingon jōts ja myōōtyō'ōyidōō. ¹⁶ Yja'ejxtip ja wa'ats, jadi'iñits ja yikmōñidi yiktukyidi pō pōn ja jade'en. ¹⁷ Xjats Jesús ja yiktōjidōō:

—¿Ti dō'ōn ja jaa mgajpxy'ajttip ku ixa jade'en mduu'yō'ōdyi? ¿Ti mdajot-may'oo'ktip, sá mjatti?

¹⁸ Xjats ja nidu'ugin y'adsodōō, ja Cleofas idō'ōn waan:

—Tyumnija'widip ja jaa'y ixyam ti tō tyuñi yjaty; jam Jerusalén. ¿Kidi mets mjam'ajty, pō mets inet idō'ōn ja nadyu'uk mganija'wip?

¹⁹ Jōts ja ñimaajyidōō:

—¿Tims jam ti yjaty?

Jōts ja ñimaadyōō:

—Ja Jesús oōts idō'ōn ndijpy, ja Nazaretit jaa'y, midi Dios Teety yikmōjkugajpxy'ajtip ku ja tkajpxwa'kxy ja y'ixpōjkin u ku ja ti ttuñ. ¿Ti ja kya'ukjajtpy? Myinajxpts ja jam Dios wyingujkp, jōts nayide'en mā naxwii'ñit jaa'dyi. ²⁰ Ja teetywindsōndōjk ja tō tkōyakti mōōt ja nwindōndōjkti jōts ja yiktaguwanit ja o'jkin jōts kyiruspatt. ²¹ Ja' oōts ja jaa ndyimy'ukjōp'ijxpy jōts ja jekyip tñigubōky yō Israelit naajj yō Israelit kajp. Ixyamts ja tyigōōkxōowip jade'en yjajtni. ²² Oy oōts ja tō'ōxyōjk winaagin tō xjanōjmi adsō'j'kibim, ku ja tō y'ats'otsti ixyam jōpy mā ja oo'kpi jut jam, ²³ ka'abik ja tō tpaatti ja Jesús ñine'kx, jōts oōts ja tō xninijky, tuki'iyi tō xamimadyakixy jōts ku ja tō t'ejxti namajtsk ja ankilis jōdsik ja tō ñi'mxyidi jōts ku ja Jesús yjuky'aty. ²⁴ Winets oōts ja nmigu'uk winaagin jatyi tō yjanōjkxti mā ja oo'kpi jut jam, jōdsik ja jam jade'en tō tjančpaatti sá ja tō'ōxyōjk tō tñigajpxti, ka'adsik ja mā tō t'ejxti ja Jesús.

²⁵ Xjanimts Jesús ja ñimaajyidōō:

—iNiwine'enin mjanchkaja'gyukidi, meets tsaachkujuunjaa'dyi, jeky meets ja xōōw ja jumōjt ja xukminaxy jōtsnim meets ja xjančjawit sá jatyi ja Dios kyugajpxy wyandōō! ²⁶ Jabi kuwañimxi tymbyaat'aty ja Cristo jōts ja jawyeen y'ayo'ombaatt jōtsnim ja tpaatt ja windsō'jkin winja'win o madsōō.

²⁷ Xjats ja Jesús tyukmadoobinaxwa'j'kidōō sá ja Dios kyajpxy wya'añ mā jatyi ja jap yiknigajpxy tōōyip, ja' ja ñigajpxōjkiyi'ñ sá wya'añ midi ja Moisés ja Dios tukjajyōō jōts ja tñigajpxkijxy sá jatyi ja yjadu'ukpī kugajpxy wyinaty ja Dios tō tyukjaadyañidi.

²⁸ Kuts ja jam kyajptōjkidōō mā dō'ōn ja jam wyinaty yja'atwa'andi jōts ja Jesús yjaaktyimñōjkwa'añ, tyimñaxwamp ja jam. ²⁹ Jōts kuwani tyiktandōō, yide'en ja ñimaadyōō:

—Mōōt tñank oōts ya, pō tōts chuu'jini, koodsiwyanipts.

Xjats ja Jesús ja jam jade'eñi myōōtaajnidōō. ³⁰ Kuts ja tmōōt'ixaktōō, tō wyinaty twinguaadsidi ja kaabyajt, ixam ja čhinaañidi ku ja tñixajiyi'ñ ja tsapkaaky, jōts ja ojts tkunuu'kxy, jōts ja t'adujkpajky, jōts ja tyagiko'oniyidōō.

³¹ Winets wyeen ja nay jatyi wyatstōō, jōts ja t'ejxkajptōō jōts kudam ja' Cristo; jōts ja nay jatyi ñanky'ejxigō'ōñiyi. ³² Jōts ja ñawyaajnidōō:

—Kidi janchjotkujk adōm yō tō xyikjajtyim ku tuu'ajy tō xamimadyaajkyim ja Dios kyajpxy.

³³ Xjats ja niwine'enin kyata'anidōō kya'amōjkidōō, jatyi ja jadigojk tyuu'dōjkidōō jōts ja wyimbejtōō Jerusalem, jamts ja tpatōō ja ñimaktu'ukpī kudanaabyidi, tō ja jam wyinaty ñamyukyidi mōōt ja myigu'uktōjkti. ³⁴ Jōts ja ñimaajyidōō:

—Janch tōts ja nwindōn'ajtim yjukpyiky, yō Simón tō tyimy'ixy.

³⁵ Jøts yja' ja tñimadyakmidøø sã ja wyinaty tø yjatti kyubatti jam tuu'am, jøts sudso ja wyinaty tø t'ejxkapti ja Jesús ku ja t'adujkpajky ja tsapkaaky.

Ku ja nwindson'ajtim Jesús ñanky'ijxyi mã ja pyabøjkpitøjk jam

³⁶ Examni dø'øn ja wyinaty jade'en ñawya'añidi ku ja Jesús jam ñanky'ejxøø jadigojk ja' y'agujk'amdi mã ja jam wyinaty, jøts ja ojts kyajpxpoo'kxidi, yide'en ja ñimaajyidøø:

—Dios mjagyepyidi.

³⁷ Jadi'iñi ja myondi tyukti, tsø'øgi ja jadi'iñi yikmajadaktip, jade'en ja wyinmaydi pø nugo ja tijy y'ejxjooxti. ³⁸ Yide'en ja Jesús ja ñimaajyidøø:

—¿Tigøjxp ku mdsø'øgidi, ti mdsø'jkidip? ¿Tiku xkajanchjawidi? ³⁹ Ejxidik øts ngø' ndeky. Pø øtsts idø'øn kø'øm. Tondik øts, ejxtik øts; pø ka'ats ejxma'jtin ñine'kx møødi, ni pyajk niti ja jade'en kya'ejtxi, sam meets ixyam x'ijxy tuki'iyi nmøø'taty.

⁴⁰ Kuts ja jade'en tyukmadojidøø jøts kyø' tyeky ja tñanky'ejxøø. ⁴¹ Kumi nika'anims ja wyinaty yikxon ttajotkukidi jøts ja tjanchjawidit, jade'en ja xyonda'akti, jade'en ñigumaap tja'wi'adø'øtsti, xjats Jesús ja ñimaajyidøø:

—¿Ka'ap ja ti jii'kxy xmøødidit?

⁴² Jøts ja tmøødyøø tukpidasi ja ajkxtsa'ayu'nk møøt ja jømbya'aku'nk, ⁴³ jøts ja t'axajyiii'ñ jøts ja ojts jamyi tjii'kxy ja' wyindumdi. ⁴⁴ Winets ja ñimaajyidøø:

—Jade'en øts idø'øn tø njaty sã meets ojts ndukmadøyin ku meets ja y'ijty njaakmøøtwidity, jøts ku øts jade'en wyinaty njatwa'añ sã øts jap nyiknigajpxy mã ja kutujk Moisés Dios tyukjajyøø, jøts nayide'en jap nøkyjøtpy midit ja yjadu'ukpi kugajpxy yjaadyandøø, jøts nayide'en sã ja nøky tñigajpxy jap Salmosjøtpy.

⁴⁵ Xjats ja Dios kyajpxy ja tyukja'gyukyidøø, ⁴⁶ yide'en ja ñimaajyidøø:

—Jade'en jap yja'ayi jøts ku ja Cristo y'oock, kyidigøøk xøøwts ja yjujkyøkt ku o'jkin ja tja'uk'ext; ⁴⁷ jøts ja yiknigajpxwa'kxt o manaajx o magajp, ku ja ya Jerusalén cho'onda'akt jawyeen, jøts ku ja'agøjxp yiknøjmidit o pøn, wan ja chinaa'yin tyiktigatsti jøts yikpojkipimaa'kxtit. ⁴⁸ Meets, wa'ats mdyimy'ijxpy mdyimñija'wip sã jaty tuki'iyi tyuñi yjaty. ⁴⁹ Madowdits, ndanigaxp meets ja' midit øts ja Dios Teety tø xamiwandaagi; yaayits meets m'awext ya Jerusaléngit kajpjøøty kunim ja mbaadidit ja møk'ajtin midit jap tsajpjøtpy kidakp.

Ku nwindson'ajtim Jesús chajpejty

⁵⁰ Xjats idø'øn Jesús ja jam kajpjøtp wyaabidsøøjmidøø, jøts ja yiknøjkxidøø jam Betania, ojts kyø' ja tyanixajyidi jøts ja kyunuu'kxidøø. ⁵¹ Kuts ja jade'en kyunuu'kxidøø, jøts ja myajtstujtidøø, jøts ja chajpejty. ⁵² Jøts ku ja wyinaty tø t'ukwindsø'øgidi t'ukwinjawidi, xjats ja ojts wyimbejtnidi ñøjkxnidi jotkujk'atyim jam Jerusalén, ⁵³ xumijam'ajttip idø'øn ja' jam tsaptøjkjøtp jøts ja jam tmøjawidi tkunuu'kxyjawidi ja Dios. Jade'en ja y'ejxi tyiyi.

JA ØGYAJPX Y JA ØMYADYA'AKY MIDI JA JUAN YJAA Y

Ja' pøn xuk'ejximp xuknija'wimp ja Dios Teety

¹ Jaayim ja wyinatyni pøn xuknija'wimp ja Dios ku tuki'iyi cho'ondakijxñim; Dios ja møøt tyimy'ity jøts nayi Dios ja kø'øm. ² Tso'onda'agyip ja møøt y'ity. ³ Jøts ja' ja Dios Teety tukyik'oyiyi ja tsajp jøts ja naajx jøts tuki'iyi; pø ka'axi ja naxwii'ñit jeexyip cho'ondaajky ku jeexyip kya'ity ja'. ⁴ Ja' tyiktso'ondaajk ja tsinaa'yin jøts ja jujky'ajtin, jøts nayide'en xuknija'windi ja tyiiby'i ja yjanchpi, midi tyik'øyip midi tyikwinaa'nbyatp ja naxwii'ñit jaa'y. ⁵ Møk ja tyikmajada'aky ja myøk'ajtin ku xyikudøø'kxaajka'am ma pøn wimbeets kugoots, jøts ka'ap ja miku' yja' myajada'aky.

⁶ Jats idø'øn jaa'y tu'ukmi pøn Dios ojts kyexyi, Juan ja xyøøw, ⁷ midi testigi'ajtpi meen jøts ja tñigajpxt jøts ja tñimadya'akt pøn xyikujajtaajkimp xyikudøø'kxaajkimp, jøts ja øy pøn ttiyjawit tjanchjawit pøni sa jaty ja wya'añ. ⁸ Kidi ja Juanixi ja' pøn xyikujajtaajkimp xyikudøø'kxaajkimp; nugo testigi'ajtpi ja ja'ayi yikexy jøts ja' tñigajpxt. ⁹ Tyimy ja' idø'øn wyinaty memp ja'tp ya naxwiiñ pøn tyik'øyip tyikpaadip, pøn tyikwinmaa'nbyatp ja naxwii'ñit jaa'y.

¹⁰ Ixa ja wyinaty tø yja'tni ya naxwiiñ jøts ja ojts nipøn kyagupikyiyi pøn jaty jaadi, øy ja wyinaty kø'øm tø yjadukyik'oyiyi ja naxwii'ñit. ¹¹ Kyø'øm ja' ja yjanimipy jøts kyø'ømiguluktøk paat ja ka'ap kyupøjkiyøø. ¹² Jats winaagin pøn ja kupøjkiyøø jøts pøn ja janchja'wiyøø; ja'ats ja tiy'ajtin ja ojts tmø'øy jøts Dios Teety ja y'u'nk'atidit. ¹³ Tiy'ajtingøjxp ja jade'en Dios y'u'nk'atyidi, ka'ap ja jade'en sa jaa'y y'u'nk y'una'jk tpaati.

¹⁴ Jøts ja' pøn xuknija'wa'am ja Dios, ojts ja jaa'yin y'atsøøni y'atstani, jøts ja ojts ñiyjky xmøø'tijtyindi xmøøtsinaa'yindi. Tø adøm myøk'ajtin ja nja'ixyindi midi ja kyø'ømøk'ajtin'ajtpy ja Dios U'nk. Tu'ugyi Dios Teety ja yjanchjaakjagyepyi, janch pa'ayoop, jøts tum ja tiy'ajtin janch'ajtin yajkpy.

¹⁵ Ja'ats ja Juan ojts tñigajpxy jøts ja yide'en wya'añ:

—Yø'øxi øts idø'øn ndijpy ku ø nwa'añ: “Ja' pøn oojknim me'emp, ja' idø'øn møj jøts ka'ap øts. Jøts kumi jaayim yø' wyinatyni, kidinim øts.”

¹⁶ Kajaa adøm Dios kyunuu'kxin xmøø'yijtyindi ni'ijtyi. Juuni ja tkayaky.

¹⁷ Tøts ja Moisés kyutujk xuknija'wa'am sa ja Dios kyutujk; ixys ja nwindsin'ajtim Jesucristo pøn xuknija'wa'am ja Dios pya'ayo'owin jøts ja tyi'ajtin yjanch'ajtin. ¹⁸ Nijuuni pøn tka'ijxñim ja Dios; yø'øts midi jam møøt y'ity, yø Dios U'nk, yø' xuknija'wa'am sa ja Dios Teety.

Ku ja Juan Bautista tñigajpxy ku ja nwindson'ajtim Jesucristo myeenwa'añ

¹⁹ Wïnets ja israelit jaa'dyi midi jam kugajp'ajttip jam Jerusalén, ojts tkaxti ja teetyøk møøt ja levijit jaa'dyi midi t'ejx'ejttip ja tsapølk, jøts ja t'atstiibyøktit ja Juan pøn idø'øn ja'; ²⁰ jøts ja ojts wa'ats tñigajpxy, yide'en ja wya'añ:

—Ka øtsip ja' midi yiktejp Cristo.

²¹ Xjats ja tjaaktyimdyiibyøjktøø:

—¿Pønts mets idø'øni? ¿Mets idø'øn Dios kyugajpxy midi yiktejp Elías?

Jøts ja Juan wya'añ:

—Ka'ap ja y'øtsi.

Jøts ja tjaaktyimdyiibyøjk'adø'øtsti:

—Jøts, ¿metsimts idø'øn ja' midi dø'øn menwamp midi ja Dios kyuga-jpxy'ajtpy?

Jøts ja y'adsøøy:

—Ka'.

²² Winets ja yikniimaay:

—¿Pønimts mets? Kuwanixi øøts ja nnijawit jøts øøts ja ndukmado'tot pøn øø tø xkexy. ¿Sä me m'ukwa'añ ku mga'uknañigajpxy'?

²³ Jøts ja Juan ja t'adsøøy:

—Øts ja' midi yikmadoop y'ayuujk jam abak etjotp, ma niti kya'ity: "Yiktøwdi yiktuda'akti ja mwinmaa'ñ jøts xkupøktit ja nwindson'ajtim" —nayide'en sam ja Isaiäs wyaañ, ja Dios kyugajpxy.

²⁴ Ja fariseotøjk ja wyinaty tø kyexyidi midi idø'øn ja Juan jam jade'en møøt ñagyajpxy. ²⁵ Xjats idø'øn ja Juan yiktiibyijky jøts ja yikniimaay:

—Pøni ka'adam me mCristo, ni mga'Elías, jøts ni Dios me mgagugajpxy'aty, ¿tits ku myiknøbety?

²⁶ Jøts ja Juan niimaay:

—Nøø øts iiy nduktanøbejtpy; jats ya tu'uk midi ka' x'ejxkaptinim; ²⁷ oojknim ja mye'ent, ja' tu'uk møj, nugo øts jawyeen nyiktuu'awa'ach. Nijuuni øts ja møøt nganamyibaat'atyyit.

²⁸ Jam idø'øn ja jade'en yjajty ma ja et jam txøøwi Betábara, midi tamp xøbidsimy jam nøø agøøm midi txøøw'ajtp Jordán, ma ja Juan jam ojts yiknøbety.

Ja Jesucristo yiktamiyoyp ja Dios Teety adømgøjpx

²⁹ Xjats ku kyimjabom'ajty winets ja Juan ojts t'ixy ja nwindson'ajtim Jesús ku ja jam wyinaty ñimiñiyi, jøts ja Juan wyaañ:

—Ejxti, yø' idø'øn jade'en jatwamp kubatwamp sam ja borreek u'nk yikyøxyin adøm nbojkpi køjpx, jøts yø' naxwii'ñit jaa'y tyikpøkwyat'sp. ³⁰ Yø' øts idø'øn ndijpy ku ø nwa'añ: "Ja tu'uk jaa'y myiñ, ja' idø'øn møj jøts kidi øts, jøts jaayim ja'ani." ³¹ Nika'ap øts yø y'ity nnijawi pøni pøn yø'. Tøts ø nmiñ jøts øts Israelit jaa'y nøø nduktanøbatt jøts nduknijawidit pøn ja'.

³² Nayide'en ja Juan wyaañ:

—Tø øts ja Espiritu Santo n'ixy jøts ku kyida'aky jam tsajpwemp sam tsapakin, jøts ja tø kyøkke'eky yø' kyubajkp. ³³ Ni nganijawi øts yø' pøni pøn yø'; jøts øts idø'øn ja Dios Teety ojts xnøjmi midi øts nøø xukyiktump ku nyiknøbety, yide'en øts ja xniimaay: "Ku x'ext ja Espiritu Santo kyida'akt jøts y'ixa'akt jam tu'uk jaa'y kyubajkp, ja'ats idø'øn ja wyinaty midi ja Espiritu Santo xmø'yimp ku ja yiknøbatt." ³⁴ Tøts ø n'ixy, jøts øts testigi jøts ku yø' Dios U'ngi.

Ja jaa'y pøn ojts jawyeen tpabøkti ja Jesús yja'

³⁵ Xjats ku kyimjabom'ajty, ixam ja Juan wyinaty køjmyi møøt nama-jtsk pyabøjkpi. ³⁶ Jøts ku ja Juan ojts t'ixy jøts ku jam wyinaty ñaxy ja nwindson'ajtim Jesús, winets ja wyaañ:

—Ejxti, yø' idø'øn jade'en jatwamp kubatwamp sa borreek u'nk yikyøxyin adøm nbojkpi køjpx.

³⁷ Ku ja' tmadoodøø midi ja Juan pyabøjkpi'ajtpy, midi jam wyinaty nama-jtsk ku ja Juan jade'en wyaañ, xjats ja ojts tpanøjkxti ja nwindson'ajtim Jesús. ³⁸ Winets ja nwindson'ajtim Jesús y'ejxjimbijty, jøts ojts t'ixy jøts ku jam yikpayø'y, jøts ja ojts tnøjmi:

—¿Ti m'ixaadyip?

Jøts ja ojts t'adsowdi:

—Windsøn, ¿ma me ndsøøni?

³⁹ Jøts ja nwindson'ajtim Jesús y'adsojimbijty:

—Men x'ejxti.

Xjats ja ojts ñøjkxti jøts ja ojts t'ejxti ma chøøni, jøts ja jam ojts tmøøtkudsuu'idi. Ja dø'øn ja xøøw wyinaty jawaani kyagidakni.

⁴⁰ Ja Andrés idø'øn ja', ja Simón Pedro y'uch, midi idø'øn ja jade'en tmadoodip namajtsk ku ja Juan jade'en wya'añ. Jøts nay ja' idø'øn jade'en tpanøjkxtip ja nwindson'ajtim Jesús. ⁴¹ Jøts ja Andrés tyimñayjaty ja ojts t'ats'ixa'ay ja y'ajch Simón, jøts ja ojts t'atsnøjmi:

—Tø øøts ja Mesías nbaaty midi Dios kyejxpy, midi Cristo yiktejp.

⁴² Xjats ja Andrés ojts twaanijxky ja Simón ma ja nwindson'ajtim Jesús jam wyinaty, jøts ku ja ojts y'ijxyi jøts ja ojts ñii'mxyi:

—Mets Simón, ja wa'axi me m'u'nk'ajtip ja Jonás. Cefas inet icyam mxøøw'atp.

Jade'en ja ñii'mxyi ja nwindson'ajtim. Cefas jade'en tyijpy Pedro sam ja t'ayuujk'atti.

Ku ja Jesús twaadsøøy ja Felipe jøts ja Natanael

⁴³ Jøts ku kyimjabom'ajty, jam ja nwindson'ajtim Jesús wyinaty ñøjkxwa'añ Galilea etjotp, ku ja tminabyaajti ja Felipe jøts ja tnimaay:

—Møødik øts.

⁴⁴ Jam Betsaida ja Felipe kyugajp'aty nay jam ma ja Andrés kyugajpi møøt ja Pedro. ⁴⁵ Winets ja Felipe ojts ñijxky jøts ja ojts t'ats'ixa'ay ja Natanael, jøts ja ojts t'atsnøjmi:

—Tø øøts ja jaa'y n'ixy midi ja Moisés ñigajpxpy jap nøkyjotpy ku ja kutujk ja ojts tja'ay, jøts nayide'en midi ñigajpxtip ja Dios kyugajpxtyøjkti, ku ja ojts tjaadyandi. Ja Jesús ja' midi ja José y'u'nk'ajtpy, midi jam kugajp'ajtp Nazaret.

⁴⁶ Xjats ja Natanael wyaañ:

—¿Wan ndejin y'øybi jam y'ukpidsømni Nazaret?

Jøts ja Felipe y'adsøøy:

—Men xtyimy'ixy.

⁴⁷ Kuts ja nwindson'ajtim Jesús ojts t'ixy jøts ku ja Natanael jam ñimiñiyi, winets ja wyaañ:

—Ixya net myiñ tu'uk nmigu'uk israelit jaa'y midi øyjaa'y'ajtp, midi ka'tyaayi.

⁴⁸ Winets ja Natanael ja ojts yiktiyiyi:

—¿Sudso'ampy me x'ijxy'aty?

Jøts nwindson'ajtim Jesús ja ojts ñii'mxyi:

—Tøyimxi me wyinaty n'ejxni ku mets yø Felipe ka'anim wyinaty m'atswayinim, ku mets ixajp iigi patki'py.

⁴⁹ Winets ja Natanael wyaañ:

—Windsøn, mets idø'øn Dios U'nk, jøts mets idø'øn mniwindsøn'ajtpy israelit jaa'y.

⁵⁰ Jøts nwindson'ajtim Jesús ja ojts yide'en y'adsøyi:

—¿Jaty me xtyimyjanhjawi ja'agøjxp ku me tøn nøjmi jøts ku me tøn n'ixy jap iigi patki'py? M'ejxpnim mets ja myøjpi y'øybi midi ø ndu'ump midi ka'ap yjade'eni sam ya'adin ku me tøn n'ixy.

⁵¹ Jøts ja nwindson'ajtim Jesús yjaaktyimwyaañ:

—Meets yam ndyimñimaapy, jøts ku x'ejxtit ja tsajp y'awa'ats, jøts ku Dios y'ankilis pyattit wyinaktit jøts øts ja xnigida'aktit, ja' kuxi øts ja naɣwii'ñit jaa'y ngudani Dios Teety wyingujkp.

2

Naxyøduujnidip ja jaa'y jam Galileit etjotp

¹ Kyindigøøk xøøw wyinaty tø y'ity ku jaa'y y'amajtskidi ma ja kajp txøøwi Caná, jam Galileit etjotp. Exam idø'øn ja nwindson'ajtim Jesús wyinaty tyaak.

² Jøts nayide'en ja nwindson'ajtim Jesús wyinaty tø yikwaamidi migaabyi mi'ukpi møøt ja pyabøjkpitøjk jøts ja nay jam ñøjkxtit. ³ Xjats ja vino tyimgyixy, winets ja nwindson'ajtim Jesús ja tyaak ñimaajyøø:

—Tø tyimgyugøxidi, ka'ap vino ukteeni.

⁴ Jøts ja nwindson'ajtim Jesús y'adsøø:

—¿Ti øtsimts tyaak yø xpatp? ¿Tiku øts yø xukmadø? Pø ka'anixi øts nja' xpaaty midi ø ndu'ump.

⁵ Jøts ja tyaak wyaañ, yide'en ja tñimaay ja jaa'y pøn jaty jam wyinaty windsø'jkidip:

—Mdu'undip idø'øn jade'en tuki'iyi pøni sã wya'añ.

⁶ Jamts wyinaty tudujk ja tsaadu'jts midi ja israelit jaa'y yiktundip ku Dios ja twindsø'øgidi jøts ja pyøkwa'atstit. Makta'pxy uk magø'pxy enteerin ja y'uch tu'uk tu'uk, jade'en nøø ja yikta'adami. ⁷ Xjats ja nwindson'ajtim Jesús tñimaay ja jaa'y pøn jaty jam wyinaty windsø'jkidip:

—Yik'utskøxti yø tu'jts. Adamidi nøø.

Jøts ja ojts yikxon tyimyik'utsti, ⁸ winets nwindson'ajtim Jesús tñimaay ja jaa'dyi:

—Aja'aptu'uttits inet waani, jøts xaninøjkxtit midi yø xøøw tø tñiwaamuki.

Jøts ja ojts jade'en ttundi. ⁹ Ojts ja tja'gyapy midi ja xøøw tñiwaamujkip jøts ja tsujxk nøø tø ja vino yjajtni, nika'ap ja tñijawi pø ma ja chøøñ; ja'ayi ja nugo tñija'widip pøn windsø'jkidip, pø ja'axi ja nøø wyinaty tø tjaapti. Xjats ja twaadsøø ja jemya'y ¹⁰ jøts ja tñimaay:

—Tum jawyeen øy pøn t'uuky yø vino y'øybi, jøts ku ja mi'ukpi ja kom tø t'uknidi winets ja yu'nkpi yikyakñim. Jøts mets, tø mets ja møk vino ne'egi xjaak'yik'awixy, jøts mets yø yammim ne'egi xyaky oojknim.

¹¹ Yø'øbi milagri'ajtim idø'øn ja nwindson'ajtim Jesús tyimyijawyeen nanky'ejxøø jam Caná, jam Galileit etjotp, midi yiknigaxø'jk ja myø'ajtim, winets ja pyabøjkpitøjk ja ojts yjaakjanchjawiyi.

¹² Xjats ku ja jade'en y'ukjajty, winets ja ojts ñijxy ma ja kajp jam txøøwi Capernaum, møøt ja tyaak, møøt ja myigu'uktøjk, jøts møøt ja pyabøjkpitøjk. Jøts ja jam tyaa'nidøø ñigyawinaak xøøw.

Ku ja Jesús tpawojpkijxy ja too'kpitøjki jam tsaptøjk agø'øm

¹³ Ja paski xøøwts wyinaty tyimbyatnip midi ja israelit jaa'y tyundip, winets ja nwindson'ajtim Jesús ojts ñijxy jam Jerusalén. ¹⁴ Jøts ja jam tsaptøjk'agi'py tkubajtyi'ñ ja jaa'dyi pøn too'ktip ja tsakaa, pøn too'ktip ja borreek, pøn too'ktip ja pak, jøts nayide'en pøn ja myigu'uk myeeñ tyikwa'kxidip, ja' jam wyinaty tsinaadyip mayim ja jam tunk'atti. ¹⁵ Ku ja nwindson'ajtim Jesús ja ojts jade'en t'ixy, xjats ja tyik'øyiyi'ñ tu'uk pawojp, jøts ja jam tpawojpkijxy niduki'iyi ja jaa'y jam tsaptøjk agø'øm, møøt ja byorreek møøt ja chakaa. Jøts ja meen yikwa'kxpidi ojts ja myeeñ ja yik'ixko'odi, jøts ja myesi ja ojts yiktejimbetti. ¹⁶ Jøts ja tñimaay ja jaa'y midi paktoo'ktip:

—Yikjiwa'akti yø ya! ¡Kidi nDeety tyøjk maadyøjk xyikwa'andi!

¹⁷ Winets ja pyabøjkpitøjk nay jatyi tja'myajtsidøø ja nøky ma ja David yide'en wyaañ: "Møk øts nba'ayøy ja mdøjk."

¹⁸ Xjats ja israelit jaa'y ttiibyøjktøø ja nwindson'ajtim, jøts ja tnimaadyøø:

—¿Ti tiy'ajtin øøts xuk'ejxp jøts ku xjagyepy ja kutujk ku jade'en m'adi'ich?

¹⁹ Jøts nwindson'ajtim Jesús ja ojts t'adsøy:

—Yikidawdi yø tsaptøjk, kidigøøk xøøw øts yø jadigojk nyikwa'kukit.

²⁰ Winets ja israelit jaa'y wyandøø, jøts ja ojts ñii'mxyiyi:

—Wixijkxyudujk jumøjt yø tø yiktunk'aty yø tsaptøjk jøts yø tø y'øyi; ¿jøts me mwa'añ jøts ku mets yø kidigøøk xøøw xyikwa'k'øyt jadigojk?

²¹ Ku ja Jesús ja tsaptøjk tkajpxy, pø kyø'ømne'kx ja jade'en tyijpy. ²² Pø patyxi ku ja nwindson'ajtim Jesús ojts yujukpyijky jadigojk jap oo'kpi jutjøtpy, yøøts ja pyabøjkpitøjk yja'myatstøø ku ja wyinaty jade'en tø wya'añ. Xjats ja tjantyimyjanchja'widøø ja Dios kyajpxy, jøts nayide'en tmbøjkidøø ja nwindson'ajtim y'ayuujk sa jaty ja wyinaty jade'en tø wya'añ.

Wa'ats ja Jesús tnijawi sa jaty jadu'uk jadu'uk wyinmay

²³ Kuts ja nwindson'ajtim Jesús jam wyinaty tyiknaxy ja paski xøøw jam Jerusalén, jøts may ja jaa'y ja jam yjanchja'wiyøø tyijja'wiyøø ku ja t'ejxti ja myilagri'ajtin midi ja tyumpy. ²⁴ Jøts ja nwindson'ajtim Jesús ka'ap ja nugo tyimnagiyakyi, kumi wa'ats ja t'ejxkapy ja niduki'iyi sa pønjabøn. ²⁵ Ka'ap ja chøkyiyi jøts ja pøn tyukmadowit sa jaty jaa'y jadu'uk jadu'uk yjaa'y'aty. Wa'ats ja kø'øm tyimñijawi sa pøngapøn y'am yjotp wyinmay.

3

Ja Jesús jøts ja Nicodemo

¹ Jamts idø'øn tu'uk fariseit jaa'y pøn txøøw'ajtp Nicodemo, jøts ja idø'øn ja israelit jaa'y wyindson'ajtip. ² Ja'ats ojts koots y'atstøk'ayø'øy ma ja nwindson'ajtim Jesús jam wyinaty, jøts ja ojts t'atsnøjmi:

—Windsøn, nnija'wip øøts jøts ku Dios tø mguexyi jøts øøts xyik'ixpøkt. Ka'ap me jeexyip jade'en xyiktuñ ja Dios myøk'ajtin milagri'ajtingøjxp sam iyam xyiktuñ, ku jeexyip møøt mga'ity ja Dios.

³ Xjats ja nwindson'ajtim Jesús ja tnimaay:

—Janch øts idø'øn nwa'añ, jøts ku ka'ap pøn tpaatt ja Dios kyutujk midi yjaa'y ja tyanitanaapy pøni ka'ap pøn nayide'en kyaxi'iky jadigojk sam tø kye'exyin.

⁴ Winets ja Nicodemo tyiktiy jøts ja tnimaay ja nwindson'ajtim Jesús:

—¿Sudso ja møj jaa'y nayide'en jadigojk kyaxø'økt sam ja tø kye'exyin? ¿Pø sudso'ampy jadigojk tyøkit tyaak yjotp jøts kya'axkojmit?

⁵ Jøts ja nwindson'ajtim Jesús ja yide'en t'adsøøy:

—Janch øts idø'øn nwa'añ, pøni ka'ap pøn jade'en kye'exy ejxim ja jaa'y kye'exyin, jøts nika'ats ja Dios myøk'ajtin myø'øyi, ka'ats pøn mibaat tyøkit ma Dios ja kyutujk ttanitani ja yjaa'y. ⁶ Ku ndeety ndaak xyikaxø'jkyim, nugo yø' xmø'øyim ja jaa'y'ajtin; jøts ku ja Dios x'u'nk'ajtyim, ja'ats ja myøk'ajtin ja y'Espíritu Santo xmø'øyim. ⁷ Kidi nigyumaap xjawi jøts ku jade'en nnøjmi: "Niduki'iyi jaa'y pyaät'atyidi ja chinaa'lyin tyiktigatstít, ka'axigajstipts ja ñamyayi jade'en." ⁸ Pojp øy maðsoo pyøjy; wa'ats nmadøø'yim sa wyina'añ ja poj, ka'ats nnija'wa'an pøni ma chøøñ jøts pøni ma ñijkxy. Nayide'ents idø'øn ñamyayi ja'adi pøn ja Dios myøk'ajtin yikaxø'jkjyidip.

⁹ Winets ja Nicodemo tjaaktiibyijky:

—¿Sudso yø ndejin jade'en?

¹⁰ Xjats ja y'adsoji ja nwindson'ajtim Jesús:

—¿Pø møj maestrimts mets yā israelit kajpkijxy, jøts mets yø yjade'embī xkanimadøy? ¹¹ Janch øts idø'øn nwa'añ, jøts ku øøts ja' nnigajpxy midī øø nnija'wīp, jøts nay ja' øøts nidestigi'ajtpy midī øø tø n'ixy; jøts meets ja xkajanchjawī sā øø njawa'añ. ¹² Nika' xjanchjawīdi ku øts ja'abaat ndyimy-janīgajpxy ti jaty yā naxwīñ, çti ja'ats mee mjaakjanchjawīp ja tsajpjøtpyit yja' ku meets njadukmado't?

¹³ 'Ka'axi jap pøn y'ats'øch jap tsajpjøtpy, øts idø'øn jap tsoo'mp kumi øts jap'ajtp jap tsajpjøtpy; jøts øts ja naxwīñ'ñit jaa'y ngudanaapy. ¹⁴ Jøts nayide'en ø nyiktu'unt sam ja Moisés ojts ttuñin ja tsaa'ñ jam abak etjotp ku ja ojts køjxp tiyji'iky, ¹⁵ jøts ja kyawindigø'ødyit pøni pøn ø xjanchja'wīdīp, xemikøjxp ja tpaattit ja kunuu'kxy jujky'ajtin ja kunuu'kxy chinaa'yin.

Pya'ayøøpy ja Dios ja naxwīñ'ñit jaa'y

¹⁶ Janch møk ja Dios tsojkin tjagyepy, jøts tpikta'aky ja pya'ayo'owin yā naxwīñ ku ja y'U'nk tkexy midī tu'umchi, jøts ja kyawindigø'ødyit pøni pøn ja tjanchja'wīdīp, jøts ja xemikøjxp ja kunuu'kxy chinaa'yin ja kunuu'kxy jujky'ajtin tpaattit. ¹⁷ Kidi ja'ajip ja Dios y'U'nk tyanīguejpxy yā naxwīñ jøts ayo'on ja ttukpaatt ja naxwīñ'ñit jaa'y, jade'en'ampy ja tkexy jøts ja tyiknitso'ok'att ja naxwīñ'ñit jaa'y.

¹⁸ Pøni pøn tjanchja'wīp ja Dios U'nk, ka'ap ayo'on ja yiktaguwani; pønts tkajanchja'wīp, ja' y'ayo'on kutujkp xemikøjxp ja'agøjxp ku tkajanchja'wīyidi ja Dios y'U'nk midī tu'ugyi. ¹⁹ Pøni pøn tyimyjade'en'ajttip, tø y'ayo'on ja kyutujknidi, ku ja myiññ yā naxwīñ midī ja jaa'y øy tsuj tyikwinmaa'nbyatp, ka'ap ja yikupijky. Ne'egi ja kube'ets'ajtin kugoots'ajtin ja ne'egi chojktip, ja'agøjxp ku ja tyumjaka'øbyi ttunwa'andi. ²⁰ Niduki'iyi pøn ja tyumjaka'øbyi ttundip, kawin'ijxyim ja tjawīdi ja yik'øwynmaa'nbyatpi. Niwine'enin ja tkamijotwa'andi ja'agøjxp jøts kyanīgaxø'øktit ja kya'ødyu'unindi. ²¹ Pønts ttsinaadyip ja tyiiby yjançpi, ja'ats tmijotwandip midī øy tsuj tyikwinmaa'nbyatp ja jaa'y, jøts ja tyiknīgaxø'øktit ja Dios yja' ti jaty ja tyundip.

Ku ja Juan Bautista jadigojk tkajpxpaaty ja Jesús yja'

²² Kuts idø'øn ja jade'en y'ukjajty, xjats ja nwindson'ajtim Jesús ojts tmøødi ja pyabøjpkpitøjk jam Judeit naxjotp. Ñiyjeki ja jam tyaa'nidøø jøts ja jam møøt yiknøbajttøø. ²³ Jøts ja Juan nay ixam ja wyinaty yiknøbatmi ixam Enón midī ja Salimit kajp myiwingon'ajtpy, ja'agøjxp ja jam yiknøbety ku ja nøø jam janch kom; jams ja jaa'y myendi jøts ja jam y'atsnøbatti. ²⁴ Jawyeenip idø'øn ja jade'en yjaty, ka'anim ja Juan wyinaty yikpikta'aky puxøjkjotpy.

²⁵ Jøts nay winet ja Juan pyabøjkpi winaaagin tnadyamīgajpxyidi møøt ja myigu'uk israelit jaa'dyi, ja' ja tnadyamīgajpxiyidip sā ja pøky wya'ach. ²⁶ Nay winets ja Juan y'atsyiknīmaay:

—Windsøn, ixam ja ixayam yiknøbety pøn mets jam wyinaty møøt xøbidsimy mā ja Jordāngit nøø, ja' pøn mets ojts xnīgajpxy jøts niduki'iyi jaa'y ja yjançpabikyiyi.

²⁷ Xjats ja Juan ja tnīmaay:

—Ka' pøn ti tnīyjaty pøni ka'ap Dios myø'øyi. ²⁸ Meetsxi ojts wa'ats kø'øm xtyimiyadøy ku ø nwa'añ jøts ku øts ka' nCristo, jøts ku ø nja'aji pøn jawyeen yikajxp nugo. ²⁹ Janch tsuj øts, janch xondakp øts, jade'en ejxim ja tø'øxmyiyø'øbyi tyik'amajtski myigu'uk; jade'en øts nnayjawiyi kuts nmadøy ja Jesús y'ayuujk. ³⁰ Yø' møjtøkīpnīm jøts øts kuwani n'amutskit, kuwani n'ixnøjkxt.

Ja' pøn tsoo'mp jap tsajpjøtɔpɔ

³¹ Ja' pøn tsoo'mp jap tsajpjøtɔpɔ, tum ja' tuki'iyi tñitanaapy. Jøts pøn ya naxwiin'ajtp, ja naxwii'nñits ja ja'ajtp, jøts tum ja'ayi ja ñigajpxpy ti jaty ja ejtp. Pønts tsoo'mp jap tsajpjøtɔpɔ, ja' tuki'iyi tñitanaagyøjxp, ³² jøts tum ja' ja ñigajpxpy midì ja tø t'ixy, midì ja tø tmadø; jøts ka'ap ja pøn tjanchjawì midì ja ñigajpxpy. ³³ Kuts øy pøn tjanchjawì, ja'ats wa'ats tyikniga'axp jøts ku Dios tkajpxy ja tyiiby; yjanchpi; ³⁴ Dios kyajpxy Dios y'ayuujk ja kyajpxip pøn ja Dios kajxip, kumi amuum y'Espíritu Santo ja myø'øyi. ³⁵ Chøjkpy ja Dios Teety ja y'U'nk, jøts tuki'iyi tø ttagidøjkigyixy ti jaty ejtp ka'ejtp. ³⁶ Pøni pøn ja Dios U'nk tjanchja'wip, xemikøjxp ja nøjkx tpaaty ja kunuu'kxy jujky'ajtin ja kunuu'kxy tsinga'yin; pønts tkajanchja'wip, kawindem xøøw ja nøjkx tpaaty ja jade'embì jujky'ajtin, ja Dios myøk'ayo'on ja nøjkx kyupøjkip.

4

Ja Jesús jøts ja Samariit tø'øxy

¹ Xjats ja fariseotøjk tñija'widøø jøts ku ja nwindson'ajtim Jesús may pyabøjkpitøjkni, jøts may jawaani ja jaa'y tyiknøbety jøts nigidi ja Juan jade'en; ² øy idø'øn nwindson'ajtim Jesús ja kø'øm tkidyimyiknøbety, ja pyabøjkpitøjkts ja tyiknøbajttip. ³ Xjats ku ja tñimadøøy jøts ku ja fariseotøjk tø ñijawiyi, winets ja chøø'n jam Judeit naxjotp, jøts ja ojts ñijkxy jam jadigojk Galileit etjotp.

⁴ Ja Samariit et ja tyanaxp ku dø'øn ja jam ñijkxy. ⁵ Xjats ja yja'jty ma ja kajp jam tu'uk Samariit etjotp midì tøøw'ajtp Sicar, jam wingon ma ja Jacob ja y'u'nk José wyinaty tø tmø'øy ja ñaajx. ⁶ Jamts idø'øn tu'uk ja nømu'ut midì yiktejp Jacob nømu'ut. Jøts kumi jotkøjxp ja nwindson'ajtim Jesús wyinaty ku ja yø'ø, xjats ja y'ixaajky jam nømu'ut agø'øm. Ja dø'øn wyinaty ja xøøw kujky. ⁷⁻⁸ Winets yja'jty tu'uk ja tø'øxyøjk jam nømu'ut agø'øm pøn ku'etip kugajpjp jam Samaria, jøts ja nøø ja tjuutwa'añ, xjats nwindson'ajtim Jesús ja ojts ñii'mxyi:

—Møøky øts nøø.

Jøts ja pyabøjkpitøjk, jam ja wyinaty tø ñøjkxti jam kajpjotp, jøts ja t'atsju'udyit ja kaaky ja jii'kxy.

⁹ Xjats idø'øn ja samariit tø'øxy tñimaay ja nwindson'ajtim Jesús:

—¿Sudso mets nøø x'amidøy jøts m'israelitjaa'yits mets jøts øts samariit jaa'y?

(Kumi ka'ap ja israelit jaa'y tminamayidi ja samariit jaa'y.) ¹⁰ Winets ja yide'en y'adsojøø ja nwindson'ajtim:

—Kuk xjanchñijawit midì ja Dios yajkpy, uk xnijawit pøn nøø ixa m'amidojyip, ¿ja ti jajik me xka'amidøy jøts me nmo'ot ja øybi nøø ja wa'atspi?

¹¹ Jøts ja tø'øxyøjk ja ñimaajyøø:

—Ni mdanøja'ap paat mets kya'ity, jøts køjnk yø nømu'ut. ¿Mats idø'øn xpøkwa'añ ja nøø midì mdijpy øy wa'ats? ¹² Ja ndeety'ap Jacob øøts yø nømu'ut xukmidaan ma jaa ja y'ijty kø'øm y'uuky, jøts y'u'nk y'una'jk, jøts jyiuyjk chakaq nayide'en. ¿Ti mjaaktyimbyønts me ndejin?

¹³ Jøts ja nwindson'ajtim Jesús ja t'adsøøy:

—Pøn jaty ya'at nøø t'uktup, tøødsidip ja jadigojk; ¹⁴ pønts t'ukp ja øybi ja wa'ats nøø midì ø nyajkpy, ka'ap tøødsi nijuuni y'ukpaajtniyit. Kumi jade'en ja nøø pyidsø'ømt jam y'anmija'wingøjxp midì øts ja nmøøpy, sam kom nøø pyidsimyin. Ja'ats ja xemikøjxp tukpaadiyip ja jujky'ajtin jøts ja øy'ajtin.

15 Winets ja tø'øxyøjk ja ñimaajyøø:

—Yø'øbi nøø øts teety xmo'op, jøts ø nga'uktøøjtsiñit niijuuni, jøts ø nga'ukmenit nøgombi ya nømu'tutjøøjty.

16 Jøts ja nwindson'ajtim Jesús tnimaay:

—Nøjkx mniyaa'y x'atsway jøts ya mme'ent.

17 Xjats ja tø'øxyøjk y'adsooøø:

—Ka' øts nniyaa'y.

Jøts ja nwindson'ajtim Jesús tnimaay:

—Janch tügyajpxy idø'on mwa'añ jøts ku ka'ap mniyaa'y pøn; 18 kumi nimagoxk tø xyiknaxy ja yaa'dyøjk, jøts pøn ixyam nnoøt, ka'ats ja xniyaa'y. Jøts ku jade'en tø mwa'añ, janch tügyajpxy idø'on yø'.

19 Kuts ja tø'øxyøjk jade'en tmadøø, jøts ja wyaañ:

—Mets teety, wa' mets idø'on yjawi Dios mets idø'on kyugajpxy.

20 Wine'enin øø nsamariitjaa'y'aty, ya øøts ja n'aptøjk twindsø'øgid i ja Dios ixya kojpkijxy, meetsts wine'enin mee m'israelitjaa'y'aty, jade'en mee mwa'añ jøts øøts ja jam nwindson'øgit Jerusalén.

21 Jøts t'adsøø y ja nwindson'ajtim Jesús, jøts ja tø'øxyøjk yiknøjmi:

—Øy xkamibøkt, wingomp idø'on jøts meets xwindsø'øgidit øy madsoo ja Dios. Ka' pyaat'aty i jøts kuwani mdyimye'endit ya kojpkijxy uk mnøjkxtit jam Jerusalén. 22 Meets samariit jaa'y, ka' mee xnijawi pøni ti mee mwindsø'jkip; øøts, nnija'wipts øøts midi øø nwindson'jkip; jabi israelit jaa'yts ñikøjpx myiñ ja nitso'ok'ajtin. 23 İxyamts ja xøøw ja jumøjt tø yja'aty, jøts ku nay i Dios myøk'ajtingøjpx nay ja' tyiy'ajtingøjpx yikwindsø'øgit ja Dios Teety, pøni pøn tjantymwindsø'jkidip ja Dios. Jade'en ja tšsøky jøts ja jade'en ttu'undit pøni pøn ja windsø'jkiiy. 24 Tu'ugyi tum jade'en Dios jøts myøk'ajtin; jøts pøn ja windsø'jkiiy, nay ja møk'ajtints ja yiktu'undip møøt ja tyiiby yjançpi.

25 Xjats ja tø'øxyøjk wyaañ, jøts yiknimaay ja nwindson'ajtim:

—Nnija'wip øts jøts ku mye'ent ja Mesías —midi tyijpy Cristo, midi memp yiknitsokpi—; jøts ku ja mye'ent, ja'ats tuki'iyi xukmadooøjxim.

26 Jøts ja nwindson'ajtim Jesús ja tnimaay:

—Øts ja', øtsxi dø'on, ejx idø'on ixya nmigajpxy.

27 Winets ja nwindson'ajtim pyabøjkpitøjk yja'ttøø, jøts ja ñigyumaap tj'a'widi ku tø'øxyøjk ja møøt myadya'aky. Ka'ats pøn ñay'a'ejxyi jøts ja tyiktø'øt ti çhøjkpy uk ti ja tø'øxyøjk møøt ñadyamigajpxy. 28 Xjats ja tø'øxyøjk jamyi tnikejky ja çhiiy, jøts ja øjts ñijxy jam kajpjotp. Jamts ja jaa'y ja øjts t'atsnøjmi:

29 —Mendi jøts jaa'y tu'uk x'ats'ejxtit pøn ø tø xukmadø y tuki'iyi sa jaty ø tø n'adi'ich. ¿Kidi ja Cristip idø'on ja ndejin, midi ja Dios tkajxp?

30 Winets ja jaa'y choo'ndøø jam kajpjotp, jøts ja øjts tninøjkxti ja nwindson'ajtim Jesús ma ja jam wyinaty. 31 Jøts idø'on pyabøjkpitøjk ja ixam ñii'mxyiyi møk'ampy:

—Windsøn, øy iiy wine'enin mga'aty.

32 Yide'ents ja øjts ñii'mxyidi:

—Ja øts ngaaky nji'kxy midi øts inet nga'apy njøø'kxp, ka' meets ja xnijawi.

33 Xjats ja pabøjkpitøjk agø'ømyi ñayiktøøbinaxwa'jkidøø, jøts ja ñawyaajnidøø:

—¿Wan ndejin pøngapøn ja kyaaky tø tyanimiñi?

34 Yide'ents ja nwindson'ajtim Jesús ja tnimaay:

—Ja' øts idø'on ngaaky'ajtpy nji'kxy'ajtpy ku øts ja nbaduujnit ja y'ana'amin pøn tø xkexy jøts øts tyunk ja nyik'abajtiyt. 35 Pø yide'enxi

mee mwa'añ: “Ja maktaxk po' kya'ity jøts pikta'aky pyidø'økt”; øtsts wamp jøts mee nnøjmi: Ejxti yø kam midi ni'ipy, tø pikta'aky myøjaagøjxni jøts pyidø'øknit. ³⁶ Yikmijuupy ja' pøn ttunk'ajtp ja pikta'aky jøts ja tyikpidi'iky; jøts ja pikta'aky midy yikpidi'kpy, ja' ja wya'añ jøts ja xemikøjxp tyu'unt. Jøts ja jade'en ni'amuki ttajotkujk'attit pøn neptip jøts pøn tyikpidø'ktp ja pikta'aky. ³⁷ Pø janch tamxi dø'øn ja' ku ayuujk wya'añ: “Wenkpi ja pikta'aky tnepp, jøts wenkpi ja tyikpidø'økp.” ³⁸ Jamts meets idø'øn nguexy jøts ja pikta'aky xyikpidø'øktit ma ka'ap tø mne'epti; jabi wenkpi tø yjatundi yjapøkti jøts meets tyunk ja xaxojniyi.

³⁹ Mayts idø'øn ja jamit jaa'y tjanchja'widøø ja nwindson'ajtim Jesús pøn idø'øn jam kugajp'ajttip ja'abi kajp midy jam Samaria, ku ja tø'øxyøjk ja wyinaty tø tyimñi'mxyidi tiy janch, ku ja wyinaty yide'en tø wya'añ: “Tø øts ja tuki'iyi xukmadooguixy sa jaty ø tø n'adi'ich, sa jaty njaa'y'aty.” ⁴⁰ Xjats ku dø'øn ja samariit jaa'y jam myendøø, jøts ja møk tnimaadyøø ja nwindson'ajtim Jesús jøts ja jam myøttaa'niyidit. Winets ja nwindson'ajtim Jesús jam tyaa'niyi'ñ majtsk xøøw. ⁴¹ Jøts ja jaa'y may tjaaqtiymyanchja'widøø ku ja tyimyadowdi sa jaty ja kø'øm ñi'mxyidi. ⁴² Jøts ja tnimaadyøø ja tø'øxyøjk:

—Ndyimyanchja'wipnim øøts inet. Kidi ja'ajip øøts nugo njanchja'wip sa jaty mee tø mwa'añ ku øø tø xukmadøy. Pø tøxi øøts yø yam kø'øm njaaktyimyadøy sa yø wya'añ. Tøts øøts nnijawi jøts ku yø janch Cristo, pøn naæwii'ñit jaa'y tyiknitsokp.

Ku ja Jesús tyiktsøjky tu'uk ja windsøn'u'nk

⁴³ Xjats ku kyimajtskxøøw'ajty, jøts ja nwindson'ajtim Jesús chøø'ñ jam Samariit etjotp, jøts ja ojts yjaaktyimñijky jam Galileit etjotp. ⁴⁴ Jøts idø'øn ja jade'en yjajty sam ja nwindson'ajtim Jesús wyinaty kø'øm tø wya'añin, jøts ku ja Dios kyugajpxy ne'egi ka'ap yikupiky jam kyø'ømgajpkøjxp. ⁴⁵ Kuts ja nwindson'ajtim yja'jty jam Galileit etjotp, jøts ja jamit jaa'y, chojktip ja' ku ja jam yja'jty, kumi tø ja wyinaty y'atsxøbaatnidi Jerusalén ku ja paski xøøw jam wyinaty tø ñaxy. Tøts ja wyinaty tuki'iyi t'ejxkøxti ti jaty jam wyinaty tø ttuñ ja nwindson'ajtim Jesús ku ja xøøw jam ñajxy.

⁴⁶ Xjats ja nwindson'ajtim Jesús ojts ñijky jadigojk jam Caná midy nay jam Galileit etjotp, ma ja wyinaty ja tsujxk nøø tø t'ukyikvinojaty. Jøts jamts idø'øn tu'uk møj windsøn tyumbimi midy nayide'en windsøn, ja'ats idø'øn y'u'nk jam wyinaty pøjkp Capernaum. ⁴⁷ Xjats ku ja tnmadøøy jøts ku ja nwindson'ajtim Jesús jam wyinaty tø yja'aty Galilea, jøts ku ja chøøñ Judeit etjotp, winets ja ojts t'ats'ixy jøts ja møk t'atsnøjmi jøts ja tmøødit jam tyøkwindum, jøts y'u'nk ja yiktso'ogiyit pøn wyinaty tyimy'ooki'imni. ⁴⁸ Jøts nwindson'ajtim Jesús tnimaay ja jaa'y:

—Ka' meets janchja'win xjagyepy. Yø'øyi meets ja'ayi m'ijxpy yø milagri'ajtin.

⁴⁹ Yide'ents ja ñimaajyøø ja jaa'y pøn ja windsøn tyumbi'ajtpy:

—Men teety tsojk, namga'anim øts n'u'nk y'øøky.

⁵⁰ Winets ja nwindson'ajtim tnimaay ja jaa'y:

—Wimbejtni, nøjxni jam mdøjkwindum. Jujky'ajtp inet ja m'u'nk.

Xjats ja tjanchja'wiyii'ñ ku nwindson'ajtim Jesús ja jade'en ñimaajyøø, jøts idø'øn yjanchnijky. ⁵¹ Jøts ku ja wyinaty yja'atwani jam tyøjkwindum, winets ja tyumbitøjk ja ojts pyatsøyi, jøts ja ojts ñi'mxyiyi:

—Jujky'ajtp m'u'nk.

⁵² Jøts ja tyiktäy ti hori dø'øn ja y'u'nk wyinaty kujk tø myøkpøjk'okwā'āñ, jøts ja tnimaadyøø:

—Uxø'øyip ja'ani, ja dø'øn ja xøøw wyinaty waani yjøpta'āký ku ja jøøn wyinajkijsy.

⁵³ Xjats ja u'nkteety ojts tjā'myech jøts ku nay ja'abi hori ja nwindson'ajtim Jesús wyinaty tø ñii'mxyi: “Jujky'ajtp ja m'u'nk”; jøts niduki'iyyi wine'enin y'u'nk ñidø'oxy y'u'nk y'unā'jk ja jam møøt, jadine'en ja ojts tjanchjawidi ja nwindson'ajtim Jesús.

⁵⁴ Jøts idø'øn jade'en mimajtsk ja milagri'ajtim kujk ttuñ ja nwindson'ajtim Jesús jam Galilea. Tø ja wyinaty chøøñ Judea.

5

Ku ja Jesús tyiktsøjky tu'uk køxujxpi pakxujxpi

¹ Xjats ku dø'øn jade'en y'ukjajty, jamts idø'øn israelit jaa'y wyinaty ttumidi xøøw, winets ja nwindson'ajtim Jesús wyimbijty, jøts ja ñijkxy jadigojk jam Jerusalén. ² Jam tøjkaaw tu'uk ja'abi kajp midì yiktejp Borreek Tyøjk'aaw, jøts nay jam wingon tu'uk ja pili midì hebreit ayuujk yiktejp Betesda, magoxk ja tøjkaaw ja tmøødi. ³ Jamts ja maabyamaa'y kyo'knidi; pøn winapti, pøn pakma'atti, pøn køxujxtip pakxujxtip. Jøts ja jam t'awejxti ja nøø kunim ja y'adø'øtst. ⁴ Atskidakpts idø'øn ja ankilis jam tu'uk pili agø'øm, jøts ja t'atsyik'adi'ich ja nøø. Kuts pøn pamaa'y jawyeen ñidøki, najxpts idø'øn pya'am ja', øy ja ti pa'am yjadyimyjapiky. ⁵ Jøts pamaa'y jam wyinaty tu'uk pøn wyinaty ee'pxmajktuktujk jumøjtíp ja pa'am pyaadyi. ⁶ Xjats ku nwindson'ajtim Jesús ja ojts t'ejxpaaty jøts ku ja jam kyo'kni, jøts ja t'ejxkajpy jøts ku pa'am ja wyinaty jadine'en jeky tmi'ejtni, jøts ja ojts tnøjmi:

—¿Mdsøjkpy tsoojkin?

⁷ Jøts ja pamaa'y ja ojts yide'en y'adsøyi:

—Me teety, tyimñipøn øts pøn ø xnøyiktøkip jap nøøjøtpy ku yø nøø yja'ats'adi'ich. Yam ø njatøkiwyami jøts jatyi wenkpi ñidøki.

⁸ Jøts ja nwindson'ajtim Jesús tnimaay:

—Pidø'øk, wejtsjø'øk yø mmaabajt jøts mnøjkxnit.

⁹ Jøts nay jatyi chøøjky ja jaa'y, ojts tyikpidi'iky midì ja jam tyamaapy jøts ja ojts yø'øcho'oni. Jøts kumi poo'kxin xøøwts wyinaty, ¹⁰ winets ja israelit jaa'y tnimaadyøø ja jaa'y pøn wyinaty tø myøkpiky:

—Poo'kxin xøøwxi yam; jøts ka'ap pyaat'aty xtsømwidett yø mmaabajt.

¹¹ Xjats ja t'adsøøy:

—Ja' ø tø xnøjmi pøn ø tø xyiktsø'øky: “Yikpidø'øk yø mmaabajt jøts mnøjkxnit.”

¹² Jøts ja yiknimaay:

—¿Pøn idø'øn tø mni'i'mxyi: “Yikpidø'øk yø mmaabajt jøts mnøjkxnit”?

¹³ Jøts ja jaa'y pøn idø'øn wyinaty tø chø'øky, ka'ap ja tnijawi pøni pøn idø'øn ja wyinaty tø yiktsø'øgyi. Jøts janch may jaa'yts jam, jøts ja nwindson'ajtim Jesús tøyim ja jam wyinaty cho'oni. ¹⁴ Jøts ja nwindson'ajtim Jesús jadigojk tpaajty ja jaa'y jap tsaptøjkjøtpy midì ja wyinaty tø tyiktsø'øky, jøts ja tnimaay:

—Øyim yikxon xmadø'ot, ejx idø'øn ixa tø mdsø'øky, kidi m'ukpøkyuni jøts kidi ti mjaty; ku jawaani ka'ø'y mdyimy'ukjajtnit.

¹⁵ Winets ja ñijkxy pøn tø chø'øky, jøts ja ojts ttukmadøy ja israelit jaa'y, jøts kudam idø'øn ja yja'aji ja Jesús, pøn ja wyinaty tø yiktsø'øgyi. ¹⁶ Ja'agøjxp idø'øn ja israelit jaa'y y'ijty tpawidetti ja nwindson'ajtim Jesús, jøts ja

ttuku'oogiwya'andi ku dɔ'ɔn ja jade'en y'adi'ich poo'kxin xɔɔw. ¹⁷ Yide'ents nwindson'ajtim Jesús ja ñimaajyidɔɔ:

—Yam paat ɔts idɔ'ɔn ndeety tyuñ, paty ɔts idɔ'ɔn nayide'en nduñ.

¹⁸ Yɔ'ɔts idɔ'ɔn ja israelit jaa'y masi tyuku'oogiwyaandip ja nwindson'ajtim Jesús. Kidi nugo ja kutujkipxi ja kyamɔ'iixpy ku ja poo'kxin xɔɔw, pɔ nayide'enxi ja ñabyikta'agyi sam ja Dios, ku ja wya'añ jɔts ku Dios ja tyimdy-eedyi.

Jade'en ja Dios Teety ja kyutujk tmɔ'ɔy ja Dios U'nk

¹⁹ Winets ja nwindson'ajtim Jesús ja ñimaajyidɔɔ:

—Janch ɔts idɔ'ɔn nwa'añ jɔts ku Dios U'nk ka' ti ttu'unt kyɔ'ɔm kutujkɔjxp. Ja tyeety ja pyaduujnip yja' pɔni sa ja kɔ'ɔm tnajstuni. Tuki'iyi pɔni ti tyumpy ja Dios Teety, nay ja'ats tyumpy ja Dios U'nk. ²⁰ Pɔ yjantymchɔjkpxi ja Dios Teety ja y'U'nk, jɔts ja tuki'iyi ttuk'ixy pɔni ti jaty ja kɔ'ɔm tyumpy. Jɔts yjaaktyimdyuk'eix'adɔ'ɔtspnim ja' ja myɔjpi ja y'ɔybi, midi meets ñigyumaap mjawidip. ²¹ Kumi nayide'en sam ja Dios Teety tyikjujkyipyi ja oo'kpi jadigojk, nayide'ents ja Dios U'nk tyaky ja jujky'ajtin pɔni pɔn ja tyamidsɔjkpy. ²² Jɔts ka'ap Dios Teety tpayɔ'ɔy pɔn, ja Dios U'nk ja tɔ ttaguwanɪ jɔts ja' ja tɔ tmɔ'ɔy ja mɔk'ajtin jɔts ja pyayɔ'ɔty, ²³ ja'agɔjxp nayide'en ja windsɔ'jkin yikmo'ot sam ja Dios Teedyin. Pɔn tkamɔjpiaktakp ja Dios U'nk, nay ja Dios Teety ja kyamɔjpiaktakp pɔn tkajxp ja Dios U'nk.

²⁴ Tyiibyɪ yjanchpi ɔts idɔ'ɔn nwa'añ: Pɔni pɔn ɔts ngajpxy n'ayuujk xyikmɔjjiyp sa jaty ɔ nwa'añ, jɔts ku ja tjanchjawɪ pɔn ɔ xkajxp, pyaap ja xemikɔjxp ja kunuu'kxy'ajtin; jɔts ka'ap ja yiktaguwanit jɔts ja y'ayo'ot, tɔ ja ttanaxy ja o'jkin jɔts ja tpaaty ja kunuu'kxy jujky'ajtin ja kunuu'kxy tsinaa'yin. ²⁵ Janch ɔts idɔ'ɔn nwa'añ, jɔts ku ixyam y'horipaaty ku ja jaa'y tmadojidit ja Dios U'nk kyajpxy pɔn jaty tkajanchja'widipnim; jɔts kuts tmimado'odit, pyaattips ja kunuu'kxy jujky'ajtin ja'adi. ²⁶ Ja ku Dios Teety tjagyepy ja mɔk'ajtin jɔts ja kɔ'ɔm tyaky ja'abi jujky'ajtin, jɔts nayɪ tɔts mɔk'ajtin ja tmɔ'ɔy ja y'U'nk jɔts ja tyakt nay ja'abi jujky'ajtin. ²⁷ Jɔts tɔ ja tku-tujkmɔ'ɔy jɔts tiidyu'unin jɔts payɔ'ɔyin ja ttu'unt, ja'agɔjxp ku ja naxwii'ñit jaa'dyi tkudani. ²⁸ Kidits ya'at ñigyumaap xjawidi, pɔ ja'atpxi dɔ'ɔn ja xɔɔw ja jumɔjt ku ja jaa'y tmadojidit Dios U'nk y'ayuujk pɔn windigɔy ejtnidip, ²⁹ jɔts ja pyidsɔ'ɔmdit jap oo'kpi jutjɔtpy. Pɔn ɔy tɔ y'atsnaxwiiñ'aty, pidɔ'ɔmdipts ja' jɔts ja tpaattit ja kunuu'kxy jujky'ajtin; pɔnts tɔ kyanaxwiiñ'aty ɔy, ju-kpyɔktipts ja nayide'en jɔts ayo'on ja yiktaguwanidit.

Yejxi tyiɪ sa Jesús kyutujk tjagyepy

³⁰ Niti nguidymdyuñ ngɔ'ɔmwinmaa'ngyɔjxp. Jade'en ɔ nduñ pɔni sa nyik'ane'emy, jɔts nima kyadigɔy ɔts ja ndiidyu'unin, ɔts ja nbayɔ'ɔyin. Jɔts niti nguidymdyuñ ngɔ'ɔmdsɔjkingɔjxp, ja' ɔts idɔ'ɔn ndumpy pɔni sa ttsɔky ja Dios Teety midɪ ɔ xkajxp. ³¹ Kuts ɔ kɔ'ɔm nnañitstigi'atit jɔts ɔ kɔ'ɔm nnankmɔjjiwya'anɪyit pɔni sa ɔ njawa'añ, ka'ap yɔ ti tiy'ajtin tjagyepy. ³² Jaaxi ja' pɔn ɔ xnitstigi'ajtp, jɔts ɔts ja xpudɔki; jɔts pɔni sa ja wya'añ, nnija'wipts ɔts ja' jɔts ku tiy janch ja wya'añ. ³³ Meetsxi ojts xiiɪbyiky ja Juan, jɔts tiy janch ja' sa ja wya'añ ku ja y'adsɔɔy. ³⁴ Kidits ja'ajip ɔ nmɔk'ajtpy ɔy pɔn jaa'y ja tiy'ajtin tjayaky; jade'en'ampy ɔts idɔ'ɔn jade'en nwa'añ jɔts mnitso'ok'ajtin xpaattit. ³⁵ Jade'en idɔ'ɔn ja Juan y'lijy sam jaj yjajyin, jɔts meets yjaj ja waani tɔ x'uktaxondakojyi. ³⁶ Njan yjejpyts ɔts tiy'ajtin jawani ka'pxy sam ɔts ja Juan ojts xkanigajpxyin. Tuki'iyi ti jaty ɔ ndumpy, nay ja' idɔ'ɔn yɔ' midɪ ɔts Dios Teety tɔ xa'ane'emy jɔts ɔts ja ndu'unt, yɔ'ɔts

tyanigaxø'kp jøts ku tyiyi yjanchi ku øts Dios Teety tø xkexy. ³⁷ Ñayi yajkpy ja Dios Teety tiy'ajtin nayide'en jøts ku øts ja xkexy, øy meets ja nijuuni xka'ijxñim, øy meets ja nijuuni xkamadøynim. ³⁸ Jade'ents ja y'øgyajpxy ja y'øy'ayuujk ka' xja'gyukidinim, ja'agøjxp ku ja ka' xjanchjawidi pøn ja Dios Teety tø tkexy. ³⁹ Janch ni'ejxi nibaadi meets Dios kyajpxy x'ixpøjkiyi, kumi jap meets ja xtyimyjapaatwa'añ ja kunuu'kxy jujky'ajtin midì xemikøjxp; jøts øts Dios kyajpxy jap xnimadya'aky, ⁴⁰ jøts meets ka' xpabøkwa'añ ku njadukpaatwa'andi yø'øbi jujky'ajtin.

⁴¹ 'Ka' øts naɣwii'ñit jaa'y y'agujkwindsø'jkin ngupøjkiyi. ⁴² Jøts njaahtyimñija'winip meets jøts ku meets Dios ka' xtsøky. ⁴³ Ja Dios Teety ø ngudanaapy ku ø nmiñ, jøts meets xkagupiky; kuts mye'ent jadu'uk kyø'ømdsojkingøjxp, mgupøkpts meets ja ne'egi. ⁴⁴ ¿Ma meets ja janchja'win xmøøt'ajtnit, kumi mnagyupøjkip meets ja windsø'jkin xem yam, jøts ka'ap ja tu'ukpi Dios yja' y'ixajyidi jøts ja xyiktu'undit? ⁴⁵ Jøts kidi mwa'andi jøts ku mee nni'øønit jam Dios Teety wyingujkp; ja Moisés ja' mee kø'øm mni'øø'niyip, pøn mee møk mjøp'ijxpy. ⁴⁶ Kuk meets ja jeexyip xjanchjawi sa wya'añ ja Moisés, nayi tøts meets jeexyip nayide'en xjanchjawi, pø ja'axi ja Moisés ojts tjā'ay jøts øts ja xnigajpxy. ⁴⁷ Pøni ka'ats ja xjanchjawidi midì ja yjaay, ¿mats meets ja xjanchja'winid midì mee ndukmadøøpy?

6

Ku ja Jesús tyikaay ja nimagoxk milbi jaa'y

¹ Xjats ku dø'øn ja wyinaty jade'en tø yjaty, winets ja nwindson'ajtim Jesús ojts ñijxxy jam Galileit mejy pya'am, jam jaduktamajñ. Nay yø'øbi mejy idø'øn yiktejp Tiberias. ² Jøts may jaa'y ja jam ojts myøødiyi, kumi tø ja wyinaty yik'ixy ja myilagri'ajtin ku ja tyiktsø'øky ja pa'amjaa'y. ³ Jøts ja nwindson'ajtim Jesús pyatøjkiyi'ñ ma kojpk jam, jøts ja jam tmøøt'ixaajky ja pyabøjkpitøjk. ⁴ Pyaatwanipts wyinaty ja paski xøøw midì ja israelit jaa'y xyø'ajttip. (Ja' xøøw yja'myajtstip sam ojts y'awa'atspidsømdi jam Egipto y'etjotp.) ⁵ Jøts ku nwindson'ajtim Jesús ojts t'ixy jøts ku may jaa'y ja pyamiñiyi, winets ja tnimaay ja pyabøjkpi Felipe:

—¿Mamts inet jadine'en njuu'yindit ja kaaky ja jii'kxy jøts yø jaa'y niduki'iyyi kya'adyit?

⁶ Jade'en'ampy ja jade'en wya'añ jøts ja t'uk'ijxy sa ja Felipe jyaty-imy'ukwa'ant; jøts kumi Jesús, ñija'wipts ja kø'øm pøni sa dø'øn ja ttu'unt.

⁷ Xjats ja Felipe ja y'adsojøø:

—Ku tsapkaaky majtsk magø'pxy denario juyin, niwine'en ja kyidy-imñibaadit øyik pøn wine'enin yiin waan tyaja'adiyit.

⁸ Winets ja pyabøjkpi jadu'uk wya'añ pøn Andrés'ajtp, ja Simón Pedro y'uch:

⁹ —Ixyadam tu'uk mutsk mixyu'nk, magoxk cebadi tsapkaaky tmøødi jøts ajkxu'nk majtsk. ¿Ti windem yø mayjaa'y yø ndapaajtnam?

¹⁰ Xjats ja nwindson'ajtim Jesús wya'añ:

—Nøjmidì niduki'iyyi yø jaa'y jøts wan t'ixa'akti.

Janch miyjoajt idø'øn jam ja et, jøts ja yaa'dyøjk nimagoxk milin y'ixaktø. Nika'ap ja tø'øxyøjk yikmachøy tmøøt ja y'u'nk y'una'jk. ¹¹ Winets ja nwindson'ajtim Jesús tnixajiyi'ñ ja tsapkaaky, jøts ku ja ojts jawy- een tukmøjawi tukunuu'kxyjawi ja Dios Teety, jøts ja ojts tmø'øñim ja pyabøjkpitøjk. Ja'ats ja ojts tyikwa'kxti, jøts ja ojts tmo'odi niduki'iyyi ja jaa'y pøn jam wyinaty tø y'ixa'akti. Nayide'en ja ojts tyikwa'kxti ja ajkx, jøts ja ojts

tmøøgyøxti wine'enin ja kə'əm ttsokti. ¹² Jøts ku y'abajtidøø kyujxidøø, jøts ja nwindson'ajtim Jesús tnimaay ja pyabøjkpitøjk:

—Pøkmukti tuki'iyi yø abu'xk midi jaty tø wyindañ, jøts kidi nugo ti wyindigøy.

¹³ Winets ja tpoøkmuktøø, jøts ja makmajtsk kach ujts t'abøjkidyøø ja kaaky abu'xkuna'jk, midi wyinaty tø wyindañ ja magoxkpit cebadi tsapkaaky.

¹⁴ Xjats ja jaa'y wyandøø ku ja t'ejxtøø jøts ku ja nwindson'ajtim Jesús jade'en wyinaty tø ttuñ ja milagri'ajtin:

—Janch yø' tam idø'on Dios kyugajpxy'ajtpy pøn yiktejp me'emp ya naxwiñ.

¹⁵ Jøts kumi yja'wiyi'ñts ja nwindson'ajtim Jesús, jøts ku ja jaa'y ja wyinaty aguwan i yknøjkxwa'añi, jøts ja yiktøkiwya'añi møj windsøn, winets ja ojts nadyu'uk yjiwa'aky jøts ja ojts ñijky jam kojpkøjxp.

Ku ja Jesús ojts yø'øy jam mejwyingøjxp

¹⁶ Xjats ku ja et wyinaty tø kyoodsniñ, winets ja nwindson'ajtim Jesús pyabøjkpitøjk kyidaktøø jam mejy agø'əm. ¹⁷ Jamts ja ojts tyøkidi barkijotp, jøts ja ojts ttanaxwa'andi ja mejy, jam idø'on ja nyøjkxti Capernaum. Jøts janch xaachkootsni dø'on, jøts ka'anims wyinaty ja nwindson'ajtim Jesús wyimbejni. ¹⁸ Winets janch møk pyojpinaxwa'knøø, janch jadi'iñi ja nøø pyidø'kni. ¹⁹ Jøts ku dø'on ja jam wyinaty ñaxti, magoxk uk tudujk mil xajkin tø yø'øñidi, winets ja t'ejxpattøø ja nwindson'ajtim Jesús jøts ku jam wingon ja barki tnimiñ. Yø'øpy ja nøø wingøjxp, jøts ja yjantyimchø'jkidøø. ²⁰ Yide'ents ja ñimaajyidøø:

—jØts idø'on, kidi mdsø'ogidi!

²¹ Xjats ja yjotkukidøø, jøts ja ejtni xoni tyktøjkidøø jap barkijøtpy, jøts ja pojn ojts yja'atti ma dø'on ja wyinaty ñøjkxti.

Ku ja Jesús ja mayjaa'y ojts y'ixa'ay

²² Jøts ku kyimjabom'ajty, jøts ja jaa'y pøn jam wyinaty tø tyandi jam mejy'am, jøts ja ojts tñijawidi jøts kudam ja nwindson'ajtim pyabøjkpitøjk wyinaty tø cho'onidi, jøts ku ja barki ja wyinaty tø ttanøjkxti midi jam wyinaty tu'ugyi, jøts ku nwindson'ajtim Jesús ja nika'ap tmøødidyøø. ²³ Jøtsnim ojts yja'atti wenkpi barki midi jam tso'ondip ma ja kajp jam txøøwi Tiberias, jam wingon ma ja jaa'y jam wyinaty ja tsapkaaky tø yikmo'odi, ku ja nwindson'ajtim wyinaty jawyeen tø ttukmøjawi tø ttukunuu'kxyjawi ja Dios Teety. ²⁴ Xjats ku ja jaa'y t'ejxtøø jøts ku ja nwindson'ajtim Jesús jam ka'ap pøn, jøts ni ja pyabøjkpitøjk jam kya'etti, winets ja ttatøjkidøø ja barki midi jam wyinaty tø yja'atti, jøts ja ojts ñøjkxti jøts ja t'ats'ixa'awa'andi jam Capernaum.

Ja Jesús amuum xyikjujky'ajtimp

²⁵ Jøts ku ja ojts yja'atti jam mejy agø'əm, jøts ja ojts tpaatti ja nwindson'ajtim Jesús, jøts ttiibyøjktøø:

—Windsøn, ¿windii mja'aty ya?

²⁶ Jøts nwindson'ajtim Jesús ja ñimaajyidøø:

—Janch øts idø'on nwa'añ, jøts ku meets ja'agøjxp x'ixa'ay ku mee ku'uxy i ojts mgay, jøts nigidi meets xja'gyukidi tigøjxp øts ojts ja milagri'ajtin nduñ.

²⁷ Køjxp najxp kaaky jii'kxy y'ity, jøts kidi ja'abi xnidundi. Ja' ne'egi mnidu'undip midi xemikøjxp jajkp midi mmo'ojidip ja kunuu'kxy jujky'ajtin. Yø'øbi kaaky yø'øbi jii'kxy øts idø'on nyajkpy, pø øtsxi ja naxwiñ'ñit jaa'dyi ngudanaapy.

²⁸ Winets ja jaa'y tyktøødøø jøts ja tnimaadyøø ja nwindson'ajtim:

—¿Tits øøts idø'øn ndu'ump jøts ja yiktu'unt pøni midi dø'øn ja Dios chøjkpy jøts øøts ja ndu'unt?

²⁹ Jøts nwindson'ajtim Jesús ja y'adsoojidøø:

—Midi mdu'undip, ja' Dios chøjkpy jøts ja xjanchjawidit pøn ja tø tkexy.

³⁰ Jøts ja tjaaktyimdyiibøjktøø, yide'en tnimaadyøø ja nwindson'ajtim Jesús:

—¿Ti ejxa'ants mbikta'akp midi øø n'ejxp jøts myikjanchjawit? ¿Ti dø'øn mdu'ump? ¿Ti dø'øn myik'øyip? ³¹ Ojtsxi adøm ja n'aptøjk tjøø'lkxti ja jii'kxy jam abak etjotp sam ja Dios kyajpxy wya'añin ku ja ñimy: “Ojts Dios ja tsapkaaky ja tyukayidi midi tso'omp tsajpjøtpy.”

³² Winets ja nwindson'ajtim Jesús ja ojts yide'en y'adsøyidi:

—Janch øts idø'øn nwa'añ ku mee nnøjmi: Jøts kidi ja Moisésip ja', kidi ja'ajip ja ojts myø'øyidi ja tsapkaaky midi tso'omp jap tsajpjøtpy, pø ja Dios Teetyxi ja' pøn tyajkp tyimya'abi tsapkaaky midi tso'omp tsajpjøtpy.

³³ Ja tsapkaaky midi Dios yajkpy, ja' idø'øn tø kyida'aky jap tsajpjøtpy. Ja'ats yajkpy ja kunuu'kxy jujky'ajtin pøn jaty ya naxwiiñ'ajttip, pøn ya yjanchja'widip.

³⁴ Winets ja tnimaadyøø ja nwindson'ajtim:

—Teety, møøy'ejtik øøts yø'øbi tsapkaaky.

³⁵ Jøts nwindson'ajtim Jesús ja ojts ñii'mxyidi:

—Øts idø'øn ja' sam ja tsapkaaky midi tmøøpy ja jaa'y ja kunuu'kxy jujky'ajtin. Pøni pøn ø xnimemp, pøn ø xpabøkp, nijuuni yuuj xøøw ja tka'ext; pøni pøn ø xjanchja'wip, nijuuni tøødsi ja tkagupøkt. ³⁶ Jade'ents sam tø nnøjmidi, ka' mee xjanchjawi øy mee tø xja'ixy. ³⁷ Niduki'iyi øts ja xnimendi pøn øts ja Dios Teety xagødøjkp; jøts ja'adi pøn øts idø'øn jade'en xnimendi, ka' øts ja mibaat ngajxpidsimy. ³⁸ Kaja'ajip øts jap tsajpjøtpy tø nnidsøñ jøts øts ja ngø'ømwinmaa'ñ nyiktu'unt, pø ja' Dios Teetyxi øts ja yja' nduujnip pøn ø xkajxp. ³⁹ Jøts ja' idø'øn ja chøjkpy jøts ø ni tu'ugin nga'ejxigø'ty pøn jaty øts ja tø xagødøki, jøts øts ja nyikjujkpyøktit ku wyinaty ja naxwii'ñit kyøjxnit. ⁴⁰ Jøts nay ja' ja chøjkpy jøts niduki'iyi tpaattit ja jujky'ajtin midi xemikøjxp pøni pøn t'ejxtip tnija'widip, pønts tpaabøktip ja Dios U'nk, jøts øts ja ñiyikjujkpyøktip ku naxwii'ñit kyøxt.

⁴¹ Winets ja israelit jaa'y tyabagajpxpinaxwa'akti ja nwindson'ajtim Jesús ku dø'øn ja wyaañ: “Øts idø'øn ja', ja tsapkaaky midi kidakp jap tsajpjøtpy.”

⁴² Jøts wyandøø:

—¿Kidi ja Jesúsip yø' pøn José myajnk'ajtpy? Pø nnija'wimts adøm tyety tyak yø'. ¿Sudo yø jade'en wya'añ jøts ku yø tsajpjøtpy kyida'aky?

⁴³ Xjats ja nwindson'ajtim Jesús ja tnimaay:

—Majtstu'utti yø pagajpxk. ⁴⁴ Ka'ap øts pøn nugo ajawi xtyimñiimiñ pøni ka'ap øts Dios Teety ja kø'øm xagødøki pøn ø xkajxp; jøts øts ja jaa'y nyikjujkpyøkt ku wyinaty ja naxwii'ñit kyixy. ⁴⁵ Yide'en ja Dios kyugajpxy ñøky wya'andi: “Dios ja niduki'iyi yik'ixpøkidip.” Jade'ents øts ja xnimendi pøn jaty ja Dios Teety y'ixpøjkin tmaadojidip, pøn jaty ja tnija'widip.

⁴⁶ Ka'axi pøn t'ixy ja Dios Teety; pø ja'ayixi ja nadyu'ugyi t'ejxp pøn nay jam tso'omp ma Dios. ⁴⁷ Jøts tyiiby øts idø'øn nwa'añ jøts mee nnøjmi, pøni pøn ø xjanchja'wip, ja'ats idø'øn tpatp ja tsinaa'yin midi xemikøjxp. ⁴⁸ Øts idø'øn ja' sam ja tsapkaaky. Øts nyajkpy ja kunuu'kxy tsinaa'yin ja kunuu'kxy jujky'ajtin. ⁴⁹ Ojtsxi ja m'aptøjk tkaydi ja tsapkaaky jam abak etjotp, jøts ja jade'enbaat y'o'jkøjxtøø niduki'iyi; ⁵⁰ ja tsapkaakys midi ø

ndijpy ja tsajpjøtpy kidakp, jøts ku ja pøn tka'adyit, ka'ats ja y'anmija'win wyindigø'odyit. ⁵¹ Øts idø'on ja kø'øm yø'øbi tsapkaaky midi tø kyida'aky jap tsajpjøtpy; jøts ku pøn tka'aty yø'øbi tsapkaaky, xemikøjxp ja yjujky'att. Ja'abi tsapkaaky øts idø'on ñamyayi nyakp, ku øts ja nne'kx ku øts ja nni'jpy ndagømmøoyit ja naxwii'ñit jaa'y jøts tpaattit ja nitso'ok'ajtin.

⁵² Winets ja israelit jaa'y agø'ømyi tkajpxy'ajtpinibøjkidyøø, jøts ja ñawya'añidi:

—¿Sudso ñe'kx sudso ñi'jpy yø xmøøwya'añin jøts ja nga'ayin njøø'kxin tsapkaagyin?

⁵³ Winets ja nwindson'ajtim Jesús ja ojts ñii'mxyidi:

—Øts idø'on wamp, pøni ka' øts nne'kx xjøø'kxidi nni'jpy x'uukti, ka'ats ja nitsoojkin xpaattit. ⁵⁴ Pøni pøn nne'kx xjøø'kxip nni'jpy x'uukip, ja'ats ja kunuu'kx jujky'ajtin tpaattip; øts nyikjujkyøktip ja' ku naxwii'ñit kyøxt.

⁵⁵ Kumi jade'en'ampy ja møk'ajtin xjagyaptit øts nne'kxøjxp nni'jpyøjxp.

⁵⁶ Pøni pøn øts nne'kx xjøø'kxip nni'jpy x'uukip, xemikøjxp øts nmøøtt n'ett.

⁵⁷ Ja Dios Teety pøn ø xkajxp, ja' tmøøt'ajtp ja jujky'ajtin, ja'agøjxp øts njujky'aty; jøts nayide'en pøn øts nne'kx nni'jpy xjøø'kxip, nay øts køjpxxi y'etti. ⁵⁸ Ja'abi tsapkaaky øts idø'on nnigajpxpy midi kidakp jap tsajpjøtpy. Ka'ap yø ñayide'eni sam ja tsapkaaky midi meets ja m'aptøjk ojts tkaydi, jødsyim ja ojts niduki'yiyi yjadyimy'ookti; pønts tkaapy yø'øbi tsapkaaky midi ø ndijpy, pyaatpts ja jujky'ajtin ja' xemikøjxp.

⁵⁹ Jam idø'on ja nwindson'ajtim Jesús yø yjade'embixpøjkin tyajky ma ja jaa'y ñamyukyidi tsaptøjkjotp, jam Capernaumit kajpkøjxp.

Ya'at ayuujk xuknija'wimp ja øchinaa'yin midi xemikøjxp

⁶⁰ Kuts ja pyabøjkpitøjk jade'en tmadowdi ja ixpøjkin pøn jam wyinaty tpawidejttip ja nwindson'ajtim Jesús, jøts ja wyandøø:

—Ku yø jade'en wya'añ, janch tsep yø' jøts yø yikupøkt; ¿pøn yø jade'en tijy ukmøjpkta'akip?

⁶¹ Xjats ja nwindson'ajtim Jesús tja'wiyii'ñ, jøts ku ja jade'en tjanch'ayoji ku ja wyinaty jade'en tø wya'añ, winets ja tyiktiiy:

—¿Yø' m'ayoojidip? ⁶² ¿Sa mdejtit winets jøts ku ø nbatøjkinit nay jap ma øts jap ijty ndsøøni? ⁶³ Ja anmija'win ja' idø'on jujky'ajtp; ¿ti yø ne'kx?, ka'ap yø ti wya'añ. Jøts ti jaty ø tøgajpxy, yø' idø'on ja Dios tyiy'ajtin'ajtpy, jøts yø' idø'on yikjujky'ajtp xemikøjxp. ⁶⁴ Jøts ja meets ixa winaagin pøn yø tkajanchja'wip.

Tø dø'on ja nwindson'ajtim Jesús ja wyinaty tnija'wiñi pøn jaty ja'adi pøn tkajanchja'widip, jøts ja' pøn ja køyakiyip. ⁶⁵ Jøts ja yide'en yjaakwaañ:

—Ja'agøjxp meets jade'en nnøjmi jøts ku ø ka'ap pøn nugo ajawi xnimiñ, pøni ka'ap Dios Teety ja kø'øm xagidøki.

⁶⁶ Winets may jaa'y myajtstuujtiniyi ja nwindson'ajtim Jesús, ka'ap ja t'ukmøøtwidejtnidi. ⁶⁷ Xjats ja nwindson'ajtim Jesús ojts tyiktiy jøts ojts tnøjmi ja ñimakmajtskpi jaa'y pøn ja pyabøjkpi'ajtpy:

—¿Mnøjkwamip meets nayide'en?

⁶⁸ Jøts ja Simón Pedro ja ojts yide'en y'adsøyi:

—¿Pønimts øø teety njaaktyimñinøjkxp? Tum ja'ats me mgajpxpy midi xemikøjxp yikjujky'ajtp. ⁶⁹ Tøts øøts yø njanchja'wiñi jøts nnija'wip øøts jøts ku me Cristo, ja Dios U'nk, midi jujky midi kunuu'kxy.

⁷⁰ Winets ja nwindson'ajtim Jesús t'adsøoy:

—¿Ti kidi mee tø nwi'ixy nimakmajtsk? Íxats mee nidu'ugin miku'aty.

71 Ku dø'øn ja jade'en wyaañ ja nwindson'ajtim Jesús, ja Judas Iscariote dø'øn ja jade'en tyijpy pøn ja Simón myajnkíp, pø ja Judasxi ja wyinaty køyākwaǰníp, øy idø'øn ja nimakmajtsk møøt yjaka'pxy ja pyabøjkpítøjk.

7

Ka'ap ja Jesús ja myigu'uk yjanchjawi:

1 Xjats ku dø'øn ja jade'en wyinaty tø y'ukjaty, jøts ja nwindson'ajtim Jesús jam ja wyinaty wyidity Galileit etjotp. Judeit etjotp idø'øn kyawidetwa'añ ku ja ja'it jaa'y jam wyinaty yik'ookwa'añiyi. 2 Jøts kumi ja xøøwts wyinaty tyimbyatpy midi ja israelit jaa'y tyundíp ku ja tyik'øiyidi ja wæxnaky, nayide'en sam ojts y'etti y'apteety jam abæk etjotp, 3 winets idø'øn ja nwindson'ajtim Jesús ja myigu'uktøjk ñimaajiyiøø:

—Ka'ap ya mda'ant; jam mnøjkxt Judea, jøts ja mbabøjkpítøjk nayide'en jam m'ejxmíyit sá jaty mduñ. 4 Ku pøn ttsøky jøts yiknijawit, ka'ap ja ti amaa'tsk ttuñ. Ejx mets yø jade'en xuñ. Tunts mets yø jade'en øy madsøo, jøts mets yø øy pøn xuk'ext.

5 Niwine'eninxi dø'øn ja myigu'ukti ja kyajanchjawi. 6 Xjats ja nwindson'ajtim Jesús ja tñimaay:

—Ka'aním øts ndiempi tpaaty jøts ø nnøjkxt; jøts meets, øy meets øy juuni mnøjkxt. 7 Ka' meets ya pøn mmi'ekíyí; øts, yikmi'ajkip øts ja'agøjxp ku øts ja tuki'iyi nnigajpxy sá jaty kya'øyjaa'y'atti. 8 Nøjkxts mee m'atsxøbaaty; ka'ap ø nnøjkxt, kumi ka'aním øts njujky'ajtin pyaat'atinyinim.

9 Kuts ja jade'en wyaañ, jøts ja jamyi Galilea tyaañ.

Ku ja Jesús ojts ñijky xø'ajtpi

10 Xjats ku ja myigu'uk wyinaty tø choondi, jøts ja nwindson'ajtim Jesús nayide'en ñijky ma wyinaty jam ja xøøw, øy idø'øn ja ka'ap yjadyimñanky'ijxyi jam mayjaa'yjotp. Yu'uch idø'øn ja wyidity. 11 Jøts idø'øn ja israelit jaa'y ja yjadyimyi'ixa'ayi ku ja xøøw tyuñi, yide'en idø'øn ja wya'andi:

—¿Ma net ja jaa'y midi Jesús nadyejíp?

12 Jøts jam mayjaa'yjotp jam ja may pøn ja nimadyajkiyíp. Pømbi jam nømp: “Øy jaa'yxi ja!”; jøts jadu'uk wyamidi: “Ka'ap ja y'øyjaa'yi, nugo jaa'y ja twin'iiñ.”

13 Jøts ka'ap pøn nugo ajawi møk tñimadya'akti ja'agøjxp ku ja israelit jaa'y wyindsøn jamdi, ja' ja chø'jkidíp.

14 Kujkwa'kxníp ja xøøw wyinaty ku ja nwindson'ajtim Jesús tyøjkíyí'ñ jam tsaptøjkjotp, jøts ja jam yik'ixpøjk'okwaañ. 15 Jøts idø'øn ja israelit jaa'y ja ñigyumaap tyimyjawidi, yide'en ja wya'andi:

—¿Sudso yø jadine'en tjaty, jøts ka'ats y'ixpikyí?

16 Xjats ja nwindson'ajtim Jesús t'adsøoy:

—Yø ixpøjkin ka' øts yø nja'aji, ja' yø' yja' pøn ø xkajxp. 17 Pøni jam pøngapøn, pøn jade'en ja tsojkin tjagyajp jøts tpadunwa'añ sá Dios ttsøkyin, ñijawipts ja' pøni kidi jamíp øts n'ixpøjkin chøøñ ma Dios, uk kidi ngø'øm ja' øts jade'en ngajpxy. 18 Pøn kyø'øm ja' nugo tkajpxp, jade'en'ampy ja jade'en ttuñ jøts ja jaa'y ja yikmøjtøkiyit; pøni pøn tsojkip jøts tyikmøjtøkit ja Dios Teety yja' midi ja tø tkexy, tiy janch ja wya'añ, ka'ap ja tyaayi.

19 ¿Ti kidi ja yjanchi jøts ku meets ja Moisés ojts mmø'øyi ja kutujk? Jøts ka'ats niwine'enin xpadundi ja kutujk. ¿Tigøjxp ku xyik'ookwa'andi øts?

20 Jøts ja mayjaa'y ja y'adsooyiyi:

—Pø tø mets miku' mdatøkiyí; ¿pøn idø'øn myik'ookwajníp?

²¹ Jøts ja nwindson'ajtim Jesús ja tniṁaay:

—Tyimya' idø'on ku tuk'ojkyi ojts jade'en n'adi'ich yam yjapoo'kxinxøwi, ja'ats mee mga'øya'wip. ²² Ojts meets ja Moisés mdanigutujk'atyi jøts meets mutsk una'jk ja chuujku'nk xjøptsuktuujiitidi mididi yiktejp circuncisión (ø y ja tyeety'aptøjk ja tjayiktso'onda'aky, pø nigidi ja'ajipxi ja kø'øm tyiktsø'ondakp), žtigøjxp meets ja mutsk mixyuna'jk xuujni ja circuncisión wan tjapoo'kxinxøwi? ²³ Jabi mduujnipts meets ja mutsk mixyuna'jk ja circuncisión ø y ja poo'kxinxøwi, žti kuts øts ja xami'ambiky ku øts ja jaa'y amuum tø nyiktsø'øky ku poo'kxin xøow? ²⁴ Kidi meets ø y sagsa mbayø'ø y pøni sa ø y tigati x'ejxti. Ku mbayø'øwya'andit, yikxon xu'undit tiy'ajtingøjxp.

Ku ja Jesús tniṁajpxy pøn ja kajxip

²⁵ Xjats winaagin pøn wyinaty tø choondi jam Jerusalén, jøts ñay'amidoojiñaxwa'jkidøø:

—žKidi ja'ajip yø' mididi yik'ixaapy, mididi yik'ookwandip? ²⁶ İxats yø kyajpxy mayjaa'y agujky, mats yø pøn sa kyanima'añiyi. žWan ndejin kudunktøjk tjantymyjanchjawidi yø'øbi jaa'y jøts ku yø Cristo? ²⁷ Jabi wa'atsxi adøm yø nniña'wam ma yø chøøñ, kuts ja Cristo mye'ent, ka'ats ja yikniñawit pøni ma ja choont.

²⁸ Ja'ayi ja nwindson'ajtim Jesús ja jade'en ojts tmadø y, pø ixamxi ja wyinaty tsaptøjkjotp yik'ixpiky, xjats ja møk wyaañ:

—jAaa wa'ats tam meets x'ijxy'aty, jøts mniña'wip tam meets yø' pøni ma ø ndsøøñ! Kidits ngø'ømwinmaa'ngyøjxpipxi ø nmiñ, ja' ø xkajxp jøts øts ja ngudanit mididi dø'on tyimyjanch'ajtp, mididi mee mga'ijxy'ajtpy. ²⁹ Wa'ats øts ja n'ijxy'aty kumi jam ø ndsøøñ, ja'ats ø xkajxp.

³⁰ Winets ja ojts tjadyimya'ukmatswa'andi jøts ja ttsu'umdit; nika'apts ja ojts pøn ñixajiyi kumi ka'anım ja wyinaty xyøga'pxy. ³¹ Jamts ja maydi pøn ja janchja'wiyøø, pøn wandip:

—Ku ja mye'ent ja Cristo, žti miłagri'ajtin ja jawaani yjaaktyimdyu'unt, ti ti yø jaa'y yam kyatumpy?

Ku ja fariseotøjk t'ana'amdi ja chaptøjk jøts ja Jesús yikmatst

³² Xjats ja fariseotøjk tmadowdi sa jaty ja nwindson'ajtim Jesús ja jaa'y ñimadya'agiyi; winets ja t'ana'amdøø ja tsaptajk pøn tump jap tsaptøjkjotpy, jøts tyimykmatst ja nwindson'ajtim. Ja teetywindsøn idø'on ja jade'en møøt y'adø'øtsti. ³³ Winets ja nwindson'ajtim Jesús wyaañ:

—Tyimyjawaani meets yam njaakwindsøøni, jøts øts ja n'awimbejyinit pøn tø xkexy. ³⁴ Xjadyimya'ixa'ap meets, ka'ats mee ma xpaatt. žJa ti ja meets jap mnøjkxt mats jap n'ett?

³⁵ Xjats ja israelit jaa'y agø'ømyi ñayiktøøbinaxwa'jkidøø:

—žMa dø'on yø ñøjkxwa'añ, sudso dø'on yø wya'añ jøts ku adøm yø nga'ukpaajtna'ant nima? žWan yø ndejin jam tniñøjkxwa'añ ja israelit jaa'y pøn jadi'iñi tø yø'øwya'kxnidi, møøt tø ñamyidøjkniyidi ja griegit jaa'y? žJa' ndejin yik'ixpøkwampy? ³⁶ žTi dø'on yø jade'en tyijpy ku yø jade'en tø xnima'ayin ku wya'añ: “Xjadyimya'ixa'ap meets, ka'ats mee ma xpaatt, ja ti ja meets jap mnøjkxt mats jap n'ett”?

Ja kunuu'kxy jujky'ajtin mididi ja Jesús yajkpy

³⁷ Ja yjadu'ukpi xøow mididi ja xøow tyamigugøjxinip, ja' idø'on ja tyim'yukmøjnaxnıp, winets ja nwindson'ajtim Jesús wya'kukiyi'ñ, jøts ja møk'ampy wyaañ:

—Pøni pøn ja kunuu'kxy jujky'ajtin ttsojpk jade'en sam ndøøjtsant, wants ø xnimiñ jøts ø nmo'ot. ³⁸ Pøni pøn ø xjanchja'widip, jade'ents ja yjattit sam wya'añ ja nøky jøts ku ja jam y'anmija'winjotp jade'en myu'ut ja nøø midi yikjujky'ajtp xemikøjxp.

³⁹ Jade'en idø'øn ja nwindson'ajtim Jesús tjatijy, pøni pøn ja janchja'wiyip, ja'ats ja Espiritu Santo pyaattip; ka'anim idø'øn ja Espiritu Santo wyinaty myiñ, kumi ka'anim ja nwindson'ajtim Jesús wyinaty tmimadakixy ja ayo'on jøts chajpatt.

Ku ja jaa'y ojts ñawyanwa'kxniyidi ja nwindson'ajtim Jesús køjxp

⁴⁰ Xjats jam mayjaa'y agujkp winaagin wyandøø, ku ja jade'en ojts tmad-owdi:

—Tyimyjanchja'adam idø'øn yø jaa'y ja Dios kyugajpxy midi idø'øn yik'awejxp.

⁴¹ Jøts jadu'uk wyamidi:

—Ja Cristo yø'.

Jøts wyenkpi wyamidi:

—¿Sudso ndejin ja Cristo jam kyaxø'økt Galilea? ⁴² Yide'ents jap nøkyjxpy jaabyety wya'añ jøts ku ja rey David ja' y'appa'y Cristo'atp, jøts ku ja jam choont Belén, nay jam ma ja David y'ijty kyugajpi.

⁴³ Xjats idø'øn ja jaa'y jade'en ñawyanwa'kxniyidi ja nwindson'ajtim Jesús køjxp. ⁴⁴ Jam winaagin pøn ja tjadyimy'ukmatswändøø, nika'apts jade'en pøn y'adijch.

Ku ja windsøndøjk ojts tkajanchjawidi ja Jesús y'ayuujk

⁴⁵ Jøts ja tsaptajktøjk ojts wyimbejtñidi ñøjkxnidi ma ja fariseotøjk jam wyinatyi møøt ja teetywindsøndøjkti, ja'ats ja ojts ñi'mxyidi:

—¿Tigøjxp ku tø xkayikmendi?

⁴⁶ Jøts ja tsaptajktøjk y'adsowdi:

—Ka'anim ma pøn jade'en kyajpxy sam yø jaa'y kyajpxyin!

⁴⁷ Winets ja fariseotøjk ja ñimaajyidøø:

—¿Meebaat nayide'en tø myikwin'øø'nidi? ⁴⁸ ¿Ti tø adøm winaagin ja nwindson t'ukjanchjawidi, uk tø ja yjaw'i tu'ugin ja fariseit t'ukpabøkti? ⁴⁹ Yø mayjaa'dyi pøn tkamøja'widip ja kutujkin, yø' kawindiy'ajttip ku ja t'pabøkti.

⁵⁰ Ja Nicodemo pøn ja nwindson'ajtim Jesús ojts koots ñinijkxyi, nay ja fariseit ja', ja'ats ja myigu'uk ojts tnøjmi:

⁵¹ —Jade'en sam adøm ja ngutujk tyikutujkyim, ka' pyaat'atyi jøts adøm jaa'y ja ayo'on ndyimyanigajpxkkojin ku ja ka'anim nmadø'yindi jawyeen pøni ti dø'øn ja tyumpy.

⁵² Jøts ja ojts yide'en yik'adsøy:

—¿Nayi Galileit jaa'y mets? Æxpøk waani ja Dios kyajpxy jøts xnijawit jøts ku ni tu'uknim ja Dios kyugajpxy jam kyayikni'jawinim Galilea.

Ja ka'ødyø'øxy

⁵³ Jøts ojts ñøjkxnidi ma jaty pøn tyøjk.

8

¹ Jøts ja nwindson'ajtim Jesús jam ja ojts ñijkxy Olivos kojpkøjxp, ² xjats ku yjajtaajky kyimjabom, winets ja ojts ñijkxy jam tsaptøjkjotp. Jøts ja jam øy pøn ñimejniyøø, winets ja y'ixaajky jøts ja yik'ixpøjktøjkijyñ. ³ Jøts ja kajpxwejpitøjkti møøt ja fariseotøjkti, ja' ojts twaamendi tu'uk ja tø'øxyøjk pøn

ja myigu'uk ñiyaa'y myøøt'ajtíp. Jøts idø'on ja jam ojts yikpikta'aky mayjaa'y agujkp pøn jaty jam wyinaty, ⁴ jøts ja tnimaadyi ja nwindson'ajtim Jesús:

—Windsøn, jap ya'at tø'xyøjk tø tyimykubaadi ku ja myigu'uk ñiyaa'y tmøøt'ajti. ⁵ Yikutujkpy ja Moisés kyutujk jøts adøm yø'øbi tø'xyøjk nga'tspa'oo'kint. ¿Sā me m'ukwā'añ?

⁶ Jade'en'ampy idø'on ja ojts jade'en wya'andi jøts ja tkajpxy'ejxwā'andi, jøts ja jade'en tigati ttukpoky'atwā'andi. Winets ja nwindson'ajtim Jesús wyindaajky, jøts ja ojts ja kyøtsa'jx ttajaabyinaxwā'jky ja naajx. ⁷ Jøts kumi yiktiibyøjk'adøtsp ja', winets ja kyookukiyi'ñ jøts ja tnimaay:

—Pøni jam pøn kapøkmyøøt, wan ja jawyeen tkonji'iky ja tsaa jøts ttaka'atst yø tø'xyøjk.

⁸ Jøts ja nayide'eñim ñaxkoogojmi, ja naajx ja yjay'adichpy. ⁹ Jøts ku ja ojts jade'en tmadowdi, jøts ja yjanchnabyøkyjawi'idøø, jøts ja ojts wya'kpidsømnidi nidu'uk jaty. Ja møjaa'dyøjk jawyeen pidsømnidøø; xjats ku ja wyinaty tø pyidsømgøxti, jøts ja nwindson'ajtim Jesús nadyu'uk tyaañ møøt ja tø'xyøjk. ¹⁰ Winets ja nwindson'ajtim Jesús kyookukiyi'ñ jøts ojts t'ixy ku ka' pøn, ja tø'xyøjkyi jap wyinaty, jøts ja tnimaay:

—¿Mā net ja'adi pøn mni'øø'niyidip? ¿Ka' pøn sā tø mduniyi?

¹¹ Jøts ja ñimaajyøø:

—Ka' windsøn'ajtim pøn.

Jøts nwindson'ajtim Jesús ja tnimaay:

—Ni øts mets sā ngatu'unt. Nøjxni, kidi m'ukpojkituni.

Ja Jesús xyikujajimp xyikudøø'kximp

¹² Xjats ja nwindson'ajtim Jesús ojts jadigojk tmigajpxy ja mayjaa'y, jøts ja tnimaay:

—Øts tu'uk tu'uk ja naxwii'ñit jaa'y nyikujajtaajkip nyikudøø'kxaajkip; pøni pønts ø xjotmay'ajtp, pøni pøn øts ja nja' xpabøjkjip, ja'ats idø'on yikmø'op ja wejin ja kajin jøts ja tyukpaadit ja kunuu'kxy jujky'ajtin, nijuuni ja wimbeets kugoots kyajattit.

¹³ Winets ja fariseotøjk ja ñimaajyøø:

—Kø'øm mets jam øy mnanktyiidyøkiyi, ka'ap yø mā tyuñ.

¹⁴ Jøts ja nwindson'ajtim Jesús ja t'adsøøy:

—Jade'en sā ø nwā'añ, tump yø' øy ø kø'øm nnanktyiidyøkiyi. Øts ja nnijā'wip mā ø ndsøøñ jøts mā ø nnøjkxt. Meets, ka' xnijawidi pøni mā ø ndsøøñ uk pøni mā ø nnøjkxt. ¹⁵ Jade'en meets øy ti xpayø'y sam ja naxwiiñ'ajtin ja kyutujkin. Ka'ap øts øy pøn ti ndabayø'y; ¹⁶ jøts kuts nbayø'ty øts, tiy øts ja ndiidyu'unin nbiktā'akt, kumi ka' ø nadyu'uk ndiidyu'unt, nayide'en øts ja møøt ndiidyu'unt ja nDeety pøn ø xkajxp.

¹⁷ Jade'en jap kyøxja'ayi jap nøkyjøtpy midi mee mgutujk'ajtpy, ku ja tes-tigi'ajtpi namajtsk tum jade'en wya'andi, ja'ats idø'on yja' yikjanchjawidip.

¹⁸ Jade'ents øts yam kø'øm nañidestigi'ajtip, jøts jadu'uk ja nDeety pøn ø xkajxp, ja' ø xnidestigi'ajtp.

¹⁹ Winets ja nwindson'ajtim yiktiibyijky:

—¿Mā dø'on ja mDeety?

Jøts ja nwindson'ajtim Jesús t'adsøøy:

—Meets, ka' mee xnijawi, jøts ni ja nDeety mee xkanija'wiyi; ku øts jeexyip xnijawidi, mnayinija'widipts meets jeexyip ja nDeety.

²⁰ Jade'en idø'on ja nwindson'ajtim Jesús wyaañ ku ja ixam wyinaty yik'ixpiky jam tsaptøjkjotp, mā ja limunsi meeñ wyinaty ja ñigajuun. Nika'apts ja ojts pøn myachi, kumi ka'anin ja wyinaty xyøga'pxy.

Nõmp ja Jesús: "Ka'ap meets jap mibaat mnijkxy põni ma ø nnijkxy"

²¹ Jõts idø'õn ja nwindsøn'ajtım Jesús tnımaagyõjmi ja mayjaa'y:

—Nõjknıp øts, øy mee xja'ixa'at mı'ookpts meets yø mbøky; jap ma ø nnijkxy, ka'ap meets jap mibaat mnøjkxt.

²² Winets ja israelit jaa'y wyandøø:

—¿Wan yø ndejın ñankpya'ookwa'anıyi, patyts yø wya'añ ku adøm jap nganøjkxin ma yø ñijkxy?

²³ Jõts nwindsøn'ajtım Jesús ja ñımaajyıdøø:

—Meets, ya mee mdsøøñ, ya mee mgaxı'ıky; øts, jam ø køjxp ndsøøñ. Ya mee mnaxwıiñ'aty, øts ka'. ²⁴ Paty meets idø'õn nnøjmi jøts ku mbøky xmi'ooktit; ku ka' xjanchjawıdı põni põn øts, mmi'ooktipyımıts idø'õn ja mbøky jade'en.

²⁵ Winets ja nwindsøn'ajtım Jesús yıktııbyıjky:

—¿Põn mets idø'õn?

Jõts nwindsøn'ajtım Jesús t'adsøøy:

—Jaayım øts yø nnıgajpxy ıty ku nyık'ıxpøjktøjkııyı'ñ. ²⁶ May øts ja winmaa'ñ njagyepy mıdı ø ngajpxwampy, jøts mee nbayø'øwya'añ nayıde'en. Tıy'ajtıngøjxp ja kyajpxy põn ø xkajxp, jøts põni sa ø nnøjmi ja naıxwıı'ñıt jaa'y, jade'en øts idø'õn ja tø nmadøy jøts ku ja jade'en wya'añ.

²⁷ Ka'aıts ja tja'gyukıdı jøts kudam ja ja' yıknıgajpxy ja Dios Teety.

²⁸ Ja'agøjxp ja ojts ñıı'mxyıdı:

—Ku meets jam kruskøjxp xpıkta'akt, jaanıms meets x'eıjxkapt jøts ku øts idø'õn ja wyınaty sa tø nwa'añ, jøts ku ka' ja ngø'ømwinmaa'ñ nyıktuñ; ja'ayı øts idø'õn ngajpxy mıdı øts ja nDeety tø xuknijawı. ²⁹ Põn øts xkajxp, møøt øts ja n'ıty; ka' øts ja nDeety nadyu'uk xmajtstu'uty, pø tum ja'axı ø ndumpy mıdı ja tyajotkujk'ajtpy.

³⁰ Ku ja nwindsøn'ajtım Jesús jade'en ojts wya'añ, winets may jaa'y ja ojts yjanchjawiıy.

Ka' nduknaıxa'amp, jaa ja Dios yja' jøts ja mıku'yja'

³¹ Xjats ja nwindsøn'ajtım Jesús tnımaay ja israelit jaa'y põn ja wyınaty tø yjanchjawiıy:

—Põni mnadyamıyojıdıdıp tu'ugyı sa ıxa nnøjmıdı, meetspıts idø'õn tıy xjantyımyabøjkpı'atp; ³² winets ja tyııbyı yjanchpı xnıjawıdıdı, jøts ja mıyk'awa'atıspıdsømidıp.

³³ Jõts ja ojts yıde'en t'adsowdı:

—Ja Abrahamı øøts ndeety'amøjıp, jøts ka'anıms øy põn wıdı xyıktuñ nugo ajawı. ¿Sudsøts me mnımy jøts ku øø n'awa'atıspıdsøømt?

³⁴ Jõts ja nwindsøn'ajtım Jesús ja tnımaay:

—Janch øts idø'õn nwa'añ ku mee nnøjmi, nıduki'ıyı põni põn pøkyundıp, ja pøky ja ñımyayı yja'bøjknıp. Pøkpyatki'py ja ñımyayı y'ejtnıdı. ³⁵ Tu'uk ja tumbı põn yıkøjø'ømıt'ajtnıp, ka'ap ja nayıde'en ja kutujk tjagyepy sam ja jaa'y ja y'u'nk y'una'jk tjagyepyın. ³⁶ Jade'ents øts ja Dios Teety x'U'nk'aty jøts ku mee nyık'awa'atıspıdsøømt, xemıkøjxpts ja jade'en. ³⁷ Øy meets ja Abraham xja'aadı xjakøjpkı, xyık'ookwampıts meets nayıde'en wınaagın, ja'agøjxp ku meets ø n'ayuuık xkagupøjki põni sa njawa'añ. ³⁸ Pø ja'ats ø ngajpxy mıdı øts nDeety tø xukjatı; jøts ku meets, pø ja'axı mee nayıde'en mbadumpy mıdı meets mdeety mdanı'ana'amıp.

³⁹ Jõts ja ojts yık'adsøøy:

—Ja Abraham øø ndeety'amøjıp.

Yıde'ents ja nwindsøn'ajtım Jesús ja ojts ñıı'mxyıdı:

—Ku meets jeexyip ja Abraham mjanch'u'nk'atyiyi mjanch'una'jk'atyiyi, nayide'en meets jeexyip mjaa'y'aty sam ja ojts yjaa'y'atyin. ⁴⁰ Ni jade'ents, o meets ja tyiiby i janchpi tɔ njadukmadɔy sam ɔts Dios Teety ja tɔ xjaduknijawin, ne'egi xyik'ookwamp meets. iNi ja Abraham ojts jade'en kya'adi'ich sam meedsin! ⁴¹ Nayide'en mee m'adi'ich sam ja mdeety y'adi'ichin.

Winets ja wyandøø, jøts ja nwindson'ajtim Jesús yiknimaay:

—Ka'ats øøts jadi'iñi ngaxi'iky; ja Dios øø tu'ugyi nDios Teety'ajtpy.

⁴² Winets ja nwindson'ajtim Jesús ja tnimaay:

—Ku jeexyip ja Dios Teety xDios Teetyjawidi, xtsojqp meets jeexyip, pø jamxi ø ndsøñ ma ja Dios jam ku ɔts ɔxyam nyaa'aty. Kidi ngø'ømwinmaa'ñipxi ø nmimimpy, pø ja Diosxi ø xkajxp. ⁴³ ¿Tiku wine'enin mguidyimyja'gyukidi sa ø njawa'añ? Ka' xtyimyadoowajniidi ja ngajpxy ja n'ayuujk. ⁴⁴ Ja miku' ja' mee mdeety'ajtpy; ja' mee mgøjø'omit'ajtip jøts ja' mdunwandip ti jaty ja ñanktyunwajnip. Tso'onda'agyip ja miku' yikjaa'y'oo'knibøjkini. Nijuuni ja tkayiktuñ ja tyiiby ja yjanchnpi, jøts nijuuni tiy janch kyakajpxy. Ku ja tyaay'aty, jade'eñi ja kyajpxy sayim idø'on ja myiku'atyin, ja'agøjxp ku yjantyimdyaaay, jøts ja' idø'on tnwindson'ajtp ja taay'ajtk ja win'øø'nk. ⁴⁵ Kuts ɔts yam tiy janch njawa'añ, ka'ats meets ø xmibiky. ⁴⁶ ¿Pøn jam winaagin ukwa'anwamp jøts ku ɔts pøky nmøødi? Kuts tiy janch nwa'añ, ¿tigjøjxp ku ø ka' xjanchjawidi? ⁴⁷ Pøn Dios ja'ajtip, myadoowajnip ja' ja Dios y'ayuujk; jøts kumi ka'ats meets Dios mja'aty, patyts meets ja ka' xpatmadoowajni ja y'ayuujk.

Jaayim ja Cristo ku ja Abraham yja'ajty

⁴⁸ Xjats ja israelit jaa'y ja ojts ñii'mxyiyi:

—Tyimdyiyimxi øøts idø'on njadyimyjawa'añ ku øø nnimy jøts ku me msamariitjaa'y, jøts ku ja miku' tɔ mdatøkikiy.

⁴⁹ Jøts ja nwindson'ajtim Jesús ja ojts yide'en t'adsøy:

—Niwine'enin ɔts miku' xkadatøki. Ja' ɔts ja'ayi ndumpy jøts ɔts Dios Teety nwindso'egi, ja' mee xkadamoj'ejxp. ⁵⁰ Ka'øtsip ngø'ømja' n'ixaapy, øyi ja yjajaa'aji pøn ɔts nja' x'ixaajyip. Ja'ats tpayø'øpy pøn ødyump ka'ødyump. ⁵¹ Jøts janch ɔts idø'on nwa'añ, pøni pøn tmøjpiktakp sa ø nwa'añ, nijuuni ja kya'ooktit kyawindigø'ødyit.

⁵² Winets ja israelit jaa'y ja y'adsoojiyøø:

—Tønims øøts inet yam ndyimyjanchjawinim jøts ku ja miku' tɔ mjanch-tatøkikiy. Sa ja Abraham tɔ y'øøky møøt niduki'iyi ja Dios kyugajpxtyi, jøts me mwa'añ: “Pøni pøn tmøjpiktakp sa ø nwa'añ, nijuuni ja kya'ooktit kyawindigø'ødyit.” ⁵³ ¿Ti me ndejin mjaaktyimdyajinajpxy jøts ku ka' myajada'aky øøts ja ndeety'amøj Abraham? Sa ja y'ø'jky jøts sa nayide'en y'oo'ktøø ja Dios kyugajpxy, ¿pønts mets idø'on mdsaañadyijiy?

⁵⁴ Jøts ja nwindson'ajtim Jesús ja t'adsøy:

—Ku ø kø'øm nnankmyøjtøkwy'a'anit, ka' ma tyuñ ɔts ja ngø'ømja'. Ja Dios Teetyts ja' ø xyikmøjtøjkip mididejttip jøts ku ja' xDiosidi. ⁵⁵ Meets, ka' meets ja xnijawidi. Øts, wa'ats ɔts ja nnijawi, jøts ku ø nwa'ant jøts ku ɔts ja ka'ap nnijawi, janchtyimdyaaay ɔts idø'on wyinaty nayide'en sam meedsin. Njanchtyimñija'wipts ɔts ja' jøts nmimadøøpy ɔts ja' pøni sa ja wya'añ. ⁵⁶ Jøts ja Abraham, pøn meets idø'on m'aadsidip mgugojidip, xaxondaajk ɔts ja' ku tnijaw'aty kuts nmenwa'añ ya ñaxwiin; x'ejx ɔts ja' jøts janch øy tsuj ja ñayjawiyi.

⁵⁷ Winets ja israelit jaa'y tnimaadyøø ja nwindson'ajtim Jesús:

—Ni kyaja'atynim ja mjumøjt wixijkxmyajk, ¿jøts mjanch'uknimy jøts ku ja Abraham tø x'ixy?

⁵⁸ Xjats ja nwindson'ajtim Jesús t'adsøøy:

—Tiy janch idø'on nwa'añ, jøts ku øts jaayim wyinatyni ku ja Abraham kyaxi'jky.

⁵⁹ Winets ja tnixajidi ja tsaajøts ja ttaka'atswa'andi ja nwindson'ajtim Jesús; nayu'jtsi ja', jøts ja ojts pyidsømni jam tsaptøjkjotp, jam ja mayjaa'y ja ttanajxy, jøts ja ojts jade'en cho'oni.

9

Ku ja Jesús ojts tyikwin'ejxwa'kxy ja winap jaa'y

¹ Xjats ku ja nwindson'ajtim Jesús jam wyinaty ñaxy, winets ja ojts t'ixy tu'uk ja yaa'dyøjk pøn wyinaty winap, jade'en ja tyimgye'exy. ² Jøts ja nwindson'ajtim Jesús ja pyabøjkpitøjk ñimaajiyiøø:

—Windson, ¿sudso yø jaa'y jade'en winap tø kye'exy? ¿Jade'en idø'on n'ukwa'anint, ja tyeety idø'on ndejin jantymbyøkmjøtti, uk kyø'ømbøky idø'on yø jade'en tuujnip?

³ Winets ja nwindson'ajtim Jesús ja ñimaajyiøø:

—Kidi kyø'ømbøkyip yø jade'en kyuanjajtip, jøts nigidi ka'ap tyeety yø tpøkyi; jade'en'ampy idø'on yø jade'en yjaty, jøts yø' ñikøjxp yiktuk'ejxtit øy pøn midi ja Dios tyu'ump. ⁴ Wants øts ja tyunk tjaaktyimdyuujni jaaktsojknim; jotmøn ø n'ukugoodsiñit kuts ja wyinaty ja tyunk ngatungøjxi pøn ø xkajxp. ⁵ Pøni wine'enin ø njaaktsøøni ya naxwiññ, njaaktyimdyu'umbyimts øts jade'en sam ja jaj kyujajy kyudi'kxy. Jade'en øts ja naxwiññit jaa'y ñamyayi nyikujajtaagidit nyikudøø'kxaagidit.

⁶ Kuts idø'on ja jade'en wyan'abajtyi'ñ ja nwindson'ajtim Jesús, jøts ja ojts chujy tyiknaxkida'aky jam naxkøjxp, jøts ja naajx ja yii'nim ojts ttamimo'otsyø'øyi ja chujy. Mo'ontsu'nk tyik'øyi'ñ, ja'ats ja ojts yik-tawinjaaxy ja winap jaa'y. ⁷ Jøts ja tnimaay:

—Nøjx m'atsnawyimbujyi jam nømu'tjotp midi yiktejp Siloé —jade'en idø'on ja Siloé y'ayukpidsimy: ja' pøn tø yikexy.

Xjats ja winap jaa'y jam ojts ñijkxy jøts ja ojts ñawyimbujyi, jøts ku dø'on ja ojts wyimbijty, win'ejxnip ja'. ⁸ Winets ja jaa'dyi pøn ja jam myigujøønip myigudøjkp, jøts ja'adi pøn jaty ja wyinaty tø y'ijxyiyi jøts ku ja wyinapi, ja'ats idø'on wandøø:

—¿Kidi ja'ajip yø' pøn ja y'ijty xumi'ixakp, pøn ja y'ijty xumilimunsi'amidoop?

⁹ Jam winaagin wyandi:

—Janch ja' yø'.

Winaagin ja wyamidi:

—Ka'ap ja yø'øji, jantymñayide'en tam tyimy'ixy.

Kø'ømts ja jaa'y yide'en wyaañ pøn wyinaty tø wyin'ejxwa'kxy:

—Pø øtsimpts ja'.

¹⁰ Winets ja yiktiibyijky:

—¿Sudsomts yø mween tø yjaty, pø mwin'ejxnipts yjawi?

¹¹ Jøts ja t'adsøøy:

—Yø jaa'y midi Jesús txøow'ajtp, yø' mo'onts tø tyik'øyi jøts øts ja tø xawinjaaxy, yide'en ø xnimaay: “Nøjx m'atsnawyimbujyi jam nøø'agø'øm midi yiktejp Siloé.” Xjats ø tø njanchnijky jøts kuts ø tø nnawyimbujyi, jøts øts yø mween tø y'ejxwa'kxy.

12 Jøts ja ojts tjaakyiktøwdi:

—¿Mā net ja jaa'y?

Jøts ja tnimaay:

—Ka' nnijawi.

Ku ja fariseotøjk tyiktøwdi ja winap jaa'y sudso wyin'ejxwa'kxy

13 Winets ja ojts twaanøjkxti mā ja fariseotøjk jamdi. 14 Tyimbyoo'kxin xøøwts idø'øn wyinaty ku ja nwindson'ajtim Jesús tyik'ø'yiyi'ñ ja mo'onts midi wyinaty tø ttuktatsø'øky ja winap jaa'y, 15 paty ja fariseotøjk jam ttiibyøjkojmidi ja jaa'y sudso'ampy idø'øn ja wyeen ja wa'ats y'ejxni. Jøts ja y'adsojimbijty ja':

—Mo'onts øts ja tø xawinjaa'xy, xjats ø tø nwimbuju, paty øts ixyam wa'ats n'ejxni.

16 Winets winaagin ja fariseotøjk wyandøø:

—Ja jaa'y pøn jade'en tø y'adi'ich, ka' inet Dios ja tja'aji, kumi ka'ap ja twindsø'øgi ja poo'kxin xøøw.

Jøts winaagin wyaamidi:

—¿Sudso milagri'ajtin ja ndejin jade'en ttu'unt, pøni janch pojkpitumbi jaa'y tam ja wyinaty?

Jøts agø'ømyi jade'en ñawyanwa'kxniyidi ku kyanagyupikyidi, 17 jøts ja jadigojk tyiktøgojmidi ja jaa'y pøn wyinaty winap uk'ejt:

—¿Jøts mets, sã mets idø'øn mwa'añ, pøn idø'øn yjaw'i ja jaa'y midi tø myikwin'ejxwa'kxyiyi?

Jøts ja wyaañ:

—Øts wamp, Dios ja' kyugajpxy.

18 Jøts ja israelit jaa'dyi ka'ap idø'øn ja tjanchwawya'andi ku dø'øn ja jaa'y y'ijty wyinapi, jøts ku ja tø wyin'ejxwa'kxni. Yiknajtswaa'wiyibaat ja tyeety ja tyaak, 19 jøts ja ojts tnøjmidi:

—¿Meets idø'øn ya'at mmajnk? Janch winap idø'øn yø tø kyaxi'iky, pø mnømdipxi. ¿Sudso'ampyts yø wa'ats wyin'ejxni?

20 Winets ja u'nkteety y'adsoodøø:

—Sudsomts øøts yø n'u'nk nganijawit, pø winapxi dø'øn yjanchke'exy. 21 Ni øø nganijawi sudso'ampy yø tø wyin'ejxwa'kxy, jøts nija' øø nganijawi pøni pøn yø tø yiktsojkyiyi yø wyeen. Yiktøwdi jade'en kø'øm; pø møjaa'ñixi yø', wan kø'øm mdukmadøyidi.

22 Jade'en'ampy idø'øn ja tyeety tyaak ojts jade'en wya'andi, tsø'jkidip ja', pø tøxi ja israelit jaa'y wyindsøndi wyinaty tkajpxy'ajtnidi, ku ja abiky yikpikta'aktit pøni pøn wamp jøts ku ja nwindson'ajtim Jesús Cristo'aty, midi ja Dios tkajxp. 23 Paty ja møjaa'y wyandøø: “Yiktøwdi kø'øm, pø møjaa'ñixi yø', wan kø'øm tnigajpxy.”

24 Winets ja israelit jaa'y twaadsowdi jadigojk ja jaa'y pøn idø'øn y'ijty winap, jøts ja ojts tnøjmidi:

—Tukmadook øøts tiy janch sam Dios t'ijxyin; jade'en øøts yø nnijawi jøts ku yø pyojkpitumbijaa'yi pøn tø myiktsø'øgyi.

25 Jøts ja t'adsøøy:

—Ka'ap øts yø nnijawi pøni pøn yø', pøni pojkpitumbi jaa'y uk kapo-
jkitumbi jaa'y yø'. Yø'øyi øts nnija'wip jøts ku øts y'ijty nwinapi, ixyam wa'ats
ixyam nwin'ejxni.

26 Jøts ja tyiktøgojmidi:

—¿Sa ja tø mduñi? ¿Sa ja tø ttuñ jøts ku ja tø myikwin'ejxwa'kxyiyi?

27 Jøts ja yide'en t'adsøøy:

—Tø meets ja njadukmadø yøts meets ja ka' xmøjpkta'aky; ¿winaak ojk nnigajpxt? ¿Uk ja' mdsøjktip jøts ja yja' xpabøkwajniði?

²⁸ Winets ja y'amjiknimaay chaachyiknimaay, yide'en ja wya'andi:

—Yø jaa'y me mbabijky, øøts ja Moisés øøts yja' nbabøjkyp. ²⁹ Nniija'wipxi øøts ja' ku ja Moisés øøts myigajpxyi ja Dios; yø jaa'y, nguidyimñija'wip øøts yø' pøni ma yø chøøñ.

³⁰ Jøts ja t'adsøø, yide'en ja tñimaay:

—iYø' idø'øñ tiy janch nima'at yikja'wip, ku meets yø xkanijawi pøni ma yø chøøñ, jøts tøts øts yø xyikwin'ejxwa'kxy! ³¹ Wa'atsxi yiknijawi jøts ku Dios ka' ja' tmadøø pøn pojkpitumbijaa'y'ajttip; ja'ayi ja myadoolip yja' pøn ja windsø'jkiiyip, pøn ja padu'unxiyip ja yja'. ³² Ka'axi yjawi ma pøn nmadøynim ku tu'uk ja winap jaa'y ja jaa'y tyikwin'ejxwa'kxy midi winap tyimgya'jx. ³³ Ku yø jeexyip Dios tkaja'aji, niti yø jeexyip tkatuñ.

³⁴ Xjats ja yiknimaay:

—Jøts mets, ku mets pøkyjotpy tø mgue'exy, ¿jøts mets idø'øñ jade'en xyik'ixpøkwa'añ?

Jøts ja jap ojts yik'ixkajxpidsimy.

Pøn tkanija'widip ja Dios yja'

³⁵ Jøts ja nwindson'ajtim Jesús tñimadøøø yøts ku ja winap jaa'y jap wyinaty jade'en tø yikajxpidsimy; jøts ja ojts tminabyaadyi, winets ja ojts tñøjmi:

—¿Mmøja'wip mjanchja'wip Dios U'nk?

³⁶ Jøts ja ojts ñii'mxy:

—Windsøn'ajtim, tukmadook øts pøn ja', wan ø tmøjawi tjanchjawi.

³⁷ Jøts ja nwindson'ajtim Jesús ja t'adsøø:

—Tø mets ja x'ejxni; pø øtsxi dø'øñ ja', ixya kø'øm møøt mmadya'aky.

³⁸ Winets ja jaa'y ñagyuxendyaajkøø, jøts ja twinguxanaay ja nwindson'ajtim Jesús, jøts ja tñimaay:

—Windsøn'ajtim, nmøja'wip njanchja'wip mets.

³⁹ Jøts ja nwindson'ajtim Jesús wyaañ:

—Ja' øts ya naxwiin tø nnimiñ jøts ja payø'øyin tyunit tiy'ajtingøjxp; pøni pønts wimbeets kugoots, win'ejxwa'kxtipts ja' jøts ja t'ejxtit tñijawidit; pønts tja'ejxtip tñanija'widip jøts tkamibøkti, ja'ats tandip wimbeets kugoots ejxim winap jaa'yin.

⁴⁰ Winets winaagin ja fariseotøjkti pøn jaty jam wyinaty, ku ja jade'en tmadowdi, winets ja ojts tñøjmidi ja nwindson'ajtim Jesús:

—¿Uk wan øøts idø'øñ nayide'en nwimbeedsyi?

⁴¹ Jøts ja nwindson'ajtim Jesús t'adsøø:

—Ku meets jeexyip mwimbeedsyi kugoodsi, ka' meets jeexyip myik-tapøky'ejxti ja mbøky. Kumi mnømdip jøts ku x'ejxti xnijawidi, mdaja'atidipts meets ja mbøky.

10

Jade'en ja Jesús n'ukpiqtaqjint ejxim tu'uk ja øybi kurajt n'ejxint

¹ Janch øts idø'øñ nwa'añ, pøn jap katøjkyp ma ja borreek ja kyemy'aaw, pøn abiky'ampy tøjkip, ja maa'tspi dø'øñ ja'. ² Jøts ja jiyujk'ejxpi, ja' jap najxp ma ja kemy'aaw jap. ³ Ja yiktøjk'awatspi, ja' ja yik'awajtsxiyip ja tøjka'aw jøts ja tyøki, jøts wa'ats ja byorreek ja yukmadøøyi. Xyømøøpy ja tu'uk jaty jøts ja tyikpidsimy jap kemyjotpy. ⁴ Kuts ja tø tyikpidsømguixy tuki'iyi ja yjiyujk jøts ja jawyeen twinway, payø'øyip ja' kumi wa'ats ja yukmadøøyi. ⁵ Ka'apts ja

nugo ajawi tpanøjkxti ja wyenkpi; ne'legi yjaaktyimkyajkidip ja', kumi ka'ap ja tyukmadowdi ja wenkjaa'y.

⁶ Ja'agøjxp ja nwindson'ajtim Jesús ojts jade'en tmimadya'aky ja jaa'y, jøts ja ttuktamimadowiwyaa'añ sa ja yja' yjaa'y'atti, ka'apts ja ojts tmadoodowdi põni ti dø'on ja jade'en yjatijpy ku ja jade'en ñi'i'mxyidi.

Jade'en ja Jesús n'ukpi:ktajkint ejxim tu'uk øybi borreek'ejxpi

⁷ Winets ja nwindson'ajtim Jesús jadigojk tñimaagyojmi ja jaa'y:

—Janch øts idø'on nwa'añ: Jøts ku øts idø'on jade'en ñamyayi nnabyikta'agyi sam tøjk'aawin, ma ñaxtit øts ja nja', sam ja borreek ja tyøjk'aaw t'ayø'øyidi.

⁸ Jøts ja win'øø'mbi põn tø y'atsmendi jøts wya'andi ku Dios tø kyexyi, jade'en idø'on yjamendi ejxim ja maa'tspin; øts njaa'y, ka'ap ja ñagyiyajkidi nugo ajawi. ⁹ Øts idø'on jade'en sam ja tøjk'aaw; põni pønts jap tøjkidip, ja'ats idø'on nitso'ok'attip. Jøts øts ja ndanitanit ja nja', ejxim ja borreek u'nk yiknitani jap kymeyjøtpy.

¹⁰ Ja'ayi ja maa'tspi ñimimpy jøts ja myeech, jøts ja yikjaa'y'øøky jøts ja yikudigøy; øts, ja' ø nnimimpy jøts meets øy yikxon xpaattit ja kunuu'kxin ja jujky'ajtin. ¹¹ Jade'en øts idø'on sam ja jaa'y põn øy borreek'ejxpi. Ku dø'on ja øy t'ixy ja byorreek, øy sa tñiwanjaty ja kø'øm, nugo ku byorreek ja kya'øøky.

¹² Pøni põn mijuy tump, ja'ayi ku ja t'ixy jøts ku ja myiñ ja awa'añ miy'uk, jøts ja japyi tñike'eky ja byorreek jøts kyakni, kumi ka'ap ja tyimya'aji mididi ja jiyujk ñi'ejxpi'ajtpy, jøts nika'ats ja tkø'ømja'aji. Xjats ja miy'uk tmajtsni ja borreek, jøts ja jadi'iñi tyik'ayø'øbyaky. ¹³ Jade'en'ampy ja'abi jaa'y kye'eky kumi mijuy ja tyuñ, patyts ja ka'ap tkwenti ja borreek.

¹⁴⁻¹⁵ Øts idø'on øy jiyujk'ejxpi'ajtp. Sam øts ja Dios Teety xnijawin jøts wa'ats øts ja nnijawi; nayide'ents øts idø'on ja njaa'y wa'ats nnijawi, jøts øts ja nayide'en wa'ats xnija'wimiyidi. Øts yø nguwanjatip. ¹⁶ Jøts jap øts ja borreek abiky njaakmødi mididi kajap'ajtp ya kemyjøjty; nyikme'empts øts jaa ja nayide'en. Jøts xnimadodo'odip øts ja', jøts tu'ugyi ja ñi'ejxpi yjagyajpniyit.

¹⁷ Ja'agøjxp øts ja Dios Teety xtsøky kuts ngu'oogidit yø'ødi, jujkpyøkpts øts jadigojk. ¹⁸ Nipøn ø mibaat xkayik'øøky, kø'øm øts ja nnaajtsjawit jøts ø nnagyøyakit ngø'ømsojkingøjxp. Tiy'ajtingøjxpts øts nnagyøyakiyit, jøts nay tiy'ajtingøjxpts øts njujkpyøkt jadigojk. Tøxi øts ja Dios Teety jade'en x'ane'emy.

¹⁹ Xjats ku ja israelit jaa'y jade'en ojts tmadowdi ja kajpxy ja ayuujk, jøts kø'ømyi ñawyanwa'kxkojmiyidi. ²⁰ May ja jamdi põn wandip:

—¿Tiku yø xtsaamyøjpi'akta'akti, pø miku'ts yø tø tyatøkiyi, pø loki jajtpts yø'?

²¹ Jøts wyenkpi wyamidi:

—Ka'ap jeexyip põn jade'en kyajpxy, ku jeexyip põn ja miku' tø tyatøkiyi. ¿Ti ma ja miku' tø t'ukyikwin'ejxwa'kxy ja winap jaa'y?

Ku ja israelit jaa'y ojts twindsowdi ja Jesús

²² Yu'laats nep'laats idø'on wyinaty pyatpy, jamts idø'on Jerusalén ja xøøw wyinaty tyuñi, ku ja yikja'myech yikxøduñ ja tsaptøjk. ²³ Jøts idø'on ja nwindson'ajtim Jesús jap wyinaty wyidity tsaptøjkjøtpy, ma ja tøjk'aaw jap mididi yiktejp Salomón ja Tyøjkwimbo'kx. ²⁴ Jøts ja israelit jaa'y ja ojts ñawya'k'awidityiyi, jøts ja yiknimaagy:

—¿Ejtp øøts idø'on jade'en xyik'etwa'añ maapy tajp? Pøni mets tam idø'on janch Cristo mididi Dios tkajxp, ixymyits øøts xtyimdyukmado'ot.

²⁵ Jøts ja nwindson'ajtim Jesús ja t'adsøøy:

—Tø mee njadukmadøy, jøts meets ja ka' xmibiky. Tuki'iyi ti jaty ø ndumpy, ti jaty ø xanigutujk'ajtp ja Dios Teety, yø'øts ja wa'ats tyimyjayiknigaxø'kp; ²⁶ meets, ka' meets xjanchjawi, kumi ka' mee mnayja'aji midi ø nja'ajtpy, sam aamyi tø nnøjmidi. ²⁷ Jade'en øts ja nja' xyukmadøy sam ja borreek ja ñi'ejxpi tyukmadøyin, jøts wa'ats øts ja nnijawidi. Xpaduujnidipts øts nja' ja'adi. ²⁸ Øts ja nmøødyip ja kunuu'kxy juky'ajtin midi xemikøjxp, jøts nijuuni nøjcx kyawindigøyi, jøts nipøn øts ja xkapøjkkxit ku øts ja ngøjø'ømit'atti. ²⁹ Ja Dios Teety øts ja xagødøjkip, ja' tu'uk møj, ka' pøn jade'en, pønts ja mibaat uk kønaxip jøts ja yikpøjkkxit. ³⁰ Øts møøt Dios Teety tu'ugyi øøts.

³¹ Winets ja israelit jaa'y jadigojk tkonjø'øktøø ja tsaa, jøts ja ttaka'atswa'andi. ³² Xjats ja nwindson'ajtim Jesús ja tnimaay:

—Tø mee kawinaak ojk ja mwinguiky nduujni ja ødyu'unin Dios Teety myø'ajtingøjxp. ¿Ja'ats meets yam xagubatwamp ku meets yam xka'atswa'añ?

³³ Winets ja israelit jaa'y y'adsoodøø, jøts ja nwindson'ajtim yiknimaay:

—Kidi ja'ajip mets yam myiktaguga'adsiwyamp, ku mets ja ødyu'unin tø xjadyimyjabikta'aky, pø ja'axi yam myiktagubatwamp ku ja Dios kajaa xtyimiyigajpxigøy. Pø nugo jaa'yx'i mets, jøts jade'en mnabyikta'agyi sam Dios.

³⁴ Jøts ja nwindson'ajtim Jesús tnimaay:

—Jade'en meets ja mgutujk jap yja'ayi jøts ku Dios yide'en wyaañ: “mDios meets.” ³⁵ Janch yiknija'wip jøts ku Dios kyajpxy jap yide'en wya'añ, ka'ap ja pøn tkagupiky; ja' ja Dios øjts diostijy ja jaa'y pøn ja ojts tyiknaxy ja kyajpxy ja myadya'aky. ³⁶ Jøts kuts Dios tø xwiwich abiky, jøts øts ja ya tø xkexy naxwiiñ, ¿sudsots meets jade'en mwa'añ jøts ku øts ja tø nmigajpxigøy, ku tø nwa'añ jøts ku ø nDios U'ngi? ³⁷ Pøni ka' øts ja' nduñ midi ja Dios Teety tyumpy, kidits mee xjanchjawi. ³⁸ Kuts øts ja nduñ, øy mee xjagajanchjawi janchja'widik øts ja ndunk, jøts jade'en xnijawidit jøts ku øts ja Dios Teety xmøø'tity, jøts øts ja nayide'en nmøø'tejtmi.

³⁹ Winets ja jadigojk tjadyimyjatsumwändøø, kajkts ja nwindson'ajtim Jesús.

⁴⁰ Jøts ja ojts wyimbejtñimi ñøjknimi jam xøøbidsimy'ampy, ma ja møj nøø midi yiktejp Jordán, jøts ja jam tyaañ ma ja Juan y'lijty yiknøbety. ⁴¹ Janch namay ja jaa'y ja ojts t'ats'ejxti jam, jøts ja wya'andi:

—Tyimdyiy tyimyjanch tam idø'øn, øy idø'øn ja Juan Bautista ojts tkatuñ ja milagri'ajtin, ka'pxts ja y'ayuujk pyidsimy sa tñimadyaajky ya'atpi jaa'y.

⁴² Jøts ja'abi etjotp janch namay ja jaa'y ojts tñibøkti ja nwindson'ajtim Jesús.

11

Ku ja Lázaro y'ø'jky

¹ Ja dø'øn tu'uk ja jaa'y, yaa'dyøjk, midi pøjkip. Lázaro ja xyøøw, jam ja Betania kyugajpi, nay jam ma ja María jøts ja y'uch Marta jam kyugajpidi.

² Yø María dø'øn ja' pøn yø Lázaro chø'øjip, ja pamaa'y, ja'ats idø'øn ojts ja aceite pa'akxuu'kpi tpiktaajkxiyi ja nwindson'ajtim Jesús tyeky, jøts ja wyaay ja ojts ttuktati'ich jadigojk. ³ Ja'ats idø'øn møøt ja y'uch tkajpxy ñigajxidøø ja nwindson'ajtim Jesús:

—Windsøn'ajtim, janch pøjkip ja mmigu'uk.

⁴ Xjats ku ja nwindson'ajtim Jesús ja jade'en tmadøøy, winets ja wyaañ:

—Ka'ap yø pa'am myajada'akt jøts ja tyimyk'oookt; jade'en'ampy idø'øn ja jade'en yjaty jøts ja Dios myøk'ajtin wyingaxø'økt, jøts yø'øbi pa'amgøjxp yiktuk'ejxtit ja jaa'y jøts ku ja Dios U'nk nayide'en tmøøt'aty ja møk'ajtin.

⁵ Øy ja nwindson'ajtim Jesús tjanchjaba'ayøy ja jaa'dyi, ja Marta, ja María, jøts ja Lázaro, ⁶ ku ja yiktukmadøøy jøts ku ja Lázaro pøjkniyi, jøts ja jam majtsk xøøw yjaaktyimdy'a'aniyii'n mā dø'øn ja jam wyinaty. ⁷ Winetnimts ja tnimaay ja pyabøjkpitøjk:

—Wan jam tjaa'myindi jadigojk jam Judeit naxjotp.

⁸ Jøts ja pyabøjkpitøjk ja ñimaajyiyøø:

—Windsøn, pø jamts ja israelit jaa'y jawaani mgaka'ats'o'jkøø; ¿jøts nay jam mnøjkxwa'añ jadigojk?

⁹ Jøts ja nwindson'ajtim Jesús wyaañ:

—Ka' pøn sa xu'unt ku ka' kya'pxñim. Niti tsø'øgi ngamøøt'aty sam nwidejtin xinaxy, awa'ats ja nøø' ja tuu' ja' ku tyuk'ejxpaaty ja ya'it naxwii'ñit jaj; ¹⁰ kuts ja koots'ajtin yja'aty, janchjøptsø'øgi jøpjawi nwidejtint, pø ja jajxi xka'ejtxa'am.

¹¹ Jøts ja nwindson'ajtim Jesús wyaañ:

—Maanip ja nmigu'uk Lázaro; n'atsyuxpts øts inet ja'.

¹² Winets ja pyabøjkpitøjk ja ñimaajyiyøø:

—Windsøn'ajtim, pøni tø tam idø'øn ja mya'oo'kni, pø møkpkøkwānip idø'øn ja'.

¹³ Jade'en'ampyts ja nwindson'ajtim Jesús ja tijy, jøts ku ja Lázaro wyinaty tø y'oo'kni, jøts ja pyabøjkpitøjk jade'en ja wya'andi, jade'en ja tijy wya'añ jøts ku ja nugo mya'ay. ¹⁴ Xjats ja ojts wa'ats tyukmadøøyidi ja nwindson'ajtim Jesús:

—Tø ja Lázaro y'oo'kni. ¹⁵ Ne'egi xondaqp øts jade'en jøts ku tø ngajam'aty, tyim'yø'yajtp ne'egi jade'en jøts mee xjanchjawit. Wants tjaa'myindi jøts n'ats'ejxint.

¹⁶ Winets ja Tomás, pøn yiktejp xeeñ'u'nk, ja'ats tnimaay ja myibabøjkpitøjk:

—Wan adøm nayide'en tjaa'myindi, jøts yø nmøøt'oo'kint.

Ja Jesús tyuk'awimbejtj ja jaa'y ja juky'ajtin jøts ja' juky'ajtin'ajtp kø'øm

¹⁷ Jøts ku ja nwindson'ajtim Jesús jam yja'jty, jøts ja tpaajty ja Lázaro, jøts ku ja wyinaty myaktaxk xøøwip tø ñajxøjkiñi. ¹⁸ Wingon ja Betaniit kajp tyañ mā ja Jerusalén jam, majtsk kilometro jagujkpin ja yjagami. ¹⁹ Jøts namay ja israelit jaa'y jam wyinaty tø y'atstøjk'ayø'ødyi mā ja Marta jam møøt ja María, jøts ja tkajpxjot'amøjkidi ja'agøjxp ku ja myigu'uk ja wyinaty tø y'ookni. ²⁰ Xjats ku ja Marta tnimadøøy jøts ku ja nwindson'ajtim Jesús jam wyinaty yja'atwa'añ, winets ja chø'l'ñ jøts ja tjøpkubajtyii'ñ; jøts ja María jap ja tyøjkjøtpy tyaañ. ²¹ Jøts ja Marta tnimaay ja nwindson'ajtim Jesús:

—Windsøn'ajtim, kuk jeexyip tø mya'aty, ka'abik øts jeexyip ja nmigu'uk tø y'øøky. ²² Jade'ents ø nnijawī jøts ku mets ja Dios Teety mmo'ojit pøni ti mets ja m'amidøøpy.

²³ Winets ja nwindson'ajtim Jesús ja ojts ñii'mxyi:

—Juky'atp ja mmigu'uk jadigojk.

²⁴ Xjats ja Marta wyaañ, jøts ja tnimaay:

—Janch jade'en, nnija'wip øts jøts ku ja jadigojk t'awimbetit ja juky'ajtin, ku ja pyidsø'ømt jadigojk mā oo'kpi, jaanimts ja'abi xøøwnim ku Dios tyika'pxt.

²⁵ Winets ja nwindson'ajtim Jesús ja tnimaay:

—Øts idø'øn ja' pøn ttuk'awimbejtíp ja jaa'y ja jujky'ajtin, jøts øts ju-
jky'ajtin'ajtp kø'øm. Pøni pøn ø xjanchja'wíp, øy ja yja'øøky, jujky'ajt kunaxpts
ja ejtp. ²⁶ Jøts pøni pøn ja jaakjujky'ajttíp jøts pøni xjanchja'widíp øts, ka'ats ja
y'anmija'win nøjx wyindigøy. ¿Mjanchja'widíp?

²⁷ Jøts ja tnimaay:

—Windsøn'ajtim, njanchja'wíp øts. Ndyimyjanchja'wíp øts ku me mCristo,
ja Dios U'nk, midi'iyíp idø'øn y'ity yā naxwiin menwamp.

Ku ja Jesús ojts twinya'axy ja Lázaro ku tøy'øøky

²⁸ Xjats ku ja Marta jade'en y'ukwaañ, winets ja ojts t'atsyajxi ja chø' María,
jøts ja ojts amaa'tsk tnøjmi:

—Ixa ja windsøn yā, jøts ixap mwaadsøyi.

²⁹ Ja'ayi ja jade'en tmadøøy, jøts ja María jatyi pyidi'jky jøts ja ojts t'ats'ixy ja
nwindson'ajtim Jesús. ³⁰ Ka'aním ja nwindson'ajtim Jesús wyinaty kyajptøki;
nay ixjanním ja wyinaty mā ja Marta ja møøt tøy ñabyaadyi. ³¹ Jøts ku
ja t'ejxtøø ku ja María pyidi'jky ku ja wyinaty putyi tøy pyidsimy, jøts ja
israelit jaa'dyi midi jam wyinaty tøjktøp tkajpxjot'amøkidíp ja ku'oogi, xjats
ja tpadso'ondøø, jade'en ja wyinmaydi jam ja tijy yaxpi ñijky mā ja oo'kpi
jam wyinaty tøy ñaxøki.

³² Winets ja María, ku ja yja'jty mā ja nwindson'ajtim Jesús jam wyinaty,
jøts ja ojts ñagyuxendya'agyi nwindson'ajtim tyekyjø'm, jøts ja tnimaay:

—Windsøn'ajtim, kuk jeexyíp tøy mya'aty ka' øts jeexyíp ja nmigu'uk tøy
y'øøky.

³³ Xjats ku ja nwindson'ajtim Jesús ojts t'ixy jøts ku yā'axy ja María jøts ja
israelit jaa'y nayide'endi midi ja María jam wyinaty tøy pyadsøøñiyi, winets ja
nwindson'ajtim ja jotmay ojts pyaadyiyi jøts ja ojts tymchaachjawi. ³⁴ Winets
ja tyiktiiy:

—¿Ma tøy xyiknaxøkidi?

Jøts ja yiknimaay:

—Windsøn'ajtim, men x'ats'ixy.

³⁵ Xjats ja nwindson'ajtim Jesús yjanchyajxy. ³⁶ Jøts ja israelit jaa'y winet
wyandøø:

—Ejxti yjantymchøjkpy tam yø tøy y'ity.

³⁷ Jøts ja jade'en winaagin wyandøø:

—Pø yø'øxi ja winap jaa'y tøy tyikwin'ejxwa'kxy, ¿sudso yø niwine'enin sā tøy
tkatuñ ja Lázaro jøts ja jeexyíp tøy kya'øøky?

Ku ja Lázaro yjukpyiky jadigojk

³⁸ Jøts ja nwindson'ajtim Jesús ojts ja jotmay jadigojk tyatøkiyi, jøts ja ñijky
mā ja oo'kpi jam wyinaty tøy ñaxøki. Tøjk'aawin ja tsaa jam, jøts nayi tsaa ja tøy
yjaaktyimykta'agi'iy. ³⁹ Jøts ja nwindson'ajtim Jesús wyaañ:

—Jigø'ødi yø tsaa.

Winets ja Marta, midi ja oo'kpi y'uchíp, ja'ats ja ojts ñi'mxyi:

—Windsøn'ajtim, pø janchxuu'kníp inet yø', pø myaktaxk xøøwipts yø
y'oo'kni.

⁴⁰ Jøts ja nwindson'ajtim Jesús ñimaajyøø:

—¿Ti kidi ø tøy nnigajpxy jøts pøni ku xjanchjawi, winets x'ejxit ja Dios
myøk'ajtin?

⁴¹ Winets ja tjigüdyi ja tsaa. Jøts ja nwindson'ajtim Jesús jam tsajpwemp ojts
pyat'ixy, jøts ja wyaañ:

—Dios Teety, dioskujuyip ku øts ja n'ayuujk tø xmadøjy. ⁴² Nnija'wip øts jøts ku mets ejtp ja nja' xmadøjy, jøts ja' øts jade'en xyikwamp jøts yø jaa'y ja øy'ajtin tpaattit pøn jaty ixaadi, jøts tjanchjawidit jøts ku mets xkexy.

⁴³ Xjats ku ja jade'en wyan'abajtiyii'ñ, jøts ja møk wyaañ:

—¡Lázaro, pidsøm jap!

⁴⁴ Jøts ja oo'kpi pyidsiimy køpity pakpity, jøts ja wyeen y'aaw twinwets'aty ja wet. Winets ja nwindson'ajtim tnimaay ja jaa'dyi:

—Køkajti pakajti jøts xmajststuttit, wan tnijkxy.

Ku ja jaa'y tkajpxy'ajttøø jøts yikmatst ja Jesús

⁴⁵ Ja'agøjxpts ja israelit jaa'y namay tjanchja'widøø ja nwindson'ajtim Jesús midi ja Maria jam wyinaty myøøt, jøts ja' ojts t'ejxti ku ja nwindson'ajtim Jesús jade'en ttuun. ⁴⁶ Winaagin tninøjkxtøø jøts ja ojts t'ats'ejxti ja fariseotøjk, jøts ja ojts ttamimadya'akti sa ja nwindson'ajtim Jesús wyinaty tø y'adi'ich.

⁴⁷ Winets ja fariseotøjk jøts ja teetywindsøndøjk møøt ñamyujkidi ja kutujk adsinaabyidi, jøts ja ojts ñømdi:

—¿Sudso ndaabyajtindit? Janch kawine'en yø jaa'y miłagri'ajtin tjan-tyuni jøts ja ejxa'an tpikta'aky. ⁴⁸ Ku yø jade'eñi n'ixmajtsindit, janch niduki'iyi jaa'y yø yjanchja'winiyit, jøts ja romit kudunktøjk myenidit, jøts ja tyikudugøñidit adøm yø ndsaptøjk jøts adøm yø ngajp.

⁴⁹ Nay ja'abi jaa'y txøøw'ajtp Caifás, pøn wyinaty teetywindsøn'ajtp ja'abi jumøjt, ja'ats ja ojts ñii'myxidi:

—Mguidyimñija'wip mee ti, ⁵⁰ ni xkanijawidi kudam adøm njayik'odyunwa'añindi ku tu'ugyi ja jaa'y tku'oogit ja ñaajx ja kyajp, jøts kidi tuki'iyi kyudigøøgyøxt wine'en ja naajx ja kajp.

⁵¹ Kidi kyø'ømwinmaa'ñipts ja Caifás yiktumpy ku ja jade'en wya'añ: jade'en'ampy idø'on ja', kumi ja' wyinaty teetywindsøn'ajtp ja'abi jumøjt, xjats ja Dios ja ojts yikwa'añi jøts ku ja nwindson'ajtim Jesús y'ookt tkudanit ja israelit kajp ja israelit naajx; ⁵² jøts kidi tyimy ja kajp ty-imy ja naajx, ja'ayip nayide'en jøts ja niduki'iyi ja Dios y'u'nk y'unaj'jk tyikyø'ømyukwangøjxi pøn wyinaty tø yø'øwya'kxnidi. ⁵³ Winet ets ja israelit kudunktøjk tniwinmaa'yidøø jøts ja nwindson'ajtim Jesús tyimy'ookt.

⁵⁴ Ja'agøjxp ja nwindson'ajtim y'ijty ka' nugo ajawi y'ukwewidjtni jam may israelit jaa'yjotp, ojts ja jam cho'oni Judeit etjotp, jøts ja ojts ñijkxy ma jam wingon ja abak et midi nugo tsayjoojt. Jam ja ñijkxy ma ja kajp txøøwi Efraín, jamts ja ojts tnøøtsøøni ja pyabøjkpitøjk.

⁵⁵ Tyimdyøts jøts tpatnit ja paski xøøw midi ja israelit jaa'y tyundip, jøts idø'on ja mayjaa'y yjantymñøjkxti Jerusalén, jøts ja jam ttunwa'andi tpadunwa'andi ja kostrumbri, jøts pyøky ja wya'atstik ku ka'anim ja paski xøøw tpaaty. ⁵⁶ Jøts ja nwindson'ajtim Jesús jam yjanchyik'ixa'ay ku ja jap tsaptøjkjotptyi, jøts ja xem yam ñawya'añidi:

—¿Sa mee m'ukwa'añ? ¿Me'emp ja yjawi xøbätpi uk ka'?

⁵⁷ Jøts ja fariseotøjk, jøts ja teetywindsøndøjk, tøj ja wyinaty tni'ana'amdi jøts ku pøn t'ext tnijawit ja nwindson'ajtim Jesús jøts ja jaty'ni gajpxt, winets ja nwindson'ajtim Jesús yikmatst jøts ja yiktsu'umt.

12

Ku ja Jesús ojts yiktagujaaxy ja pa'akxuu'kpi

¹ Xjats ku wyinaty ja paski xøøw tkapaatynim jadudujk xøøw, winets ja nwindson'ajtim Jesús ojts ñijkxy jam Betania ma kyugajpi ja Lázaro,

pøn ja wyinaty tø tyikjujppyiky jadigojk. ² Jamts ja a'ux y'øyiyi'i'n jøts ja nwindson'ajtim Jesús ja yiktawindsø'øgi; ja Marta ja jam ojts wyingi'iyi, jøts ja Lázaro ja tmøøtkay møøt pøn jaty jamdi. ³ Winets ja Maria tyikmiifñ kujkwa'kxy lyitrin ja aceite midi pa'akxuu'kp, jøts janch tsowi ja', ja'ats ja ojts ttaja'jxiyi ja nwindson'ajtim Jesús tyeyk, jøts ja ñayjawaayy ttuktatijch. Amuum ja tøjkojot pya'akxuu'kpøjkixy. ⁴ Jøts ja Judas Iscariote, midi ja Simón myajnkíp, midi ja nwindson'ajtim Jesús pyabøjkpi'ajtpy, jøts midi ja wyinaty køyawkajnip, ja'ats jade'en waan:

⁵ —¿Tiku yø pa'akxuu'kpi ne'egi tø kyayiktøøky? Tigøøk magø'pxy denariin jeexyip tsow'aty, jøts ayooibi jaa'y ja jeexyip yiktabudøki.

⁶ Kaja'agøjxpíp ja Judas jade'en wya'añ ku ja tpa'ayøy ja ayooibi jaa'y, pø ja meeñxi ja ne'egi pya'ayøøpy. Ja winmaa'ñ ja yikyø'øpy ku ja myeech, jøts kumi jam ja wyinaty tkøjø'øm'aty ja meeñ'abøjk'i'i'ñ midi'ibi ja myibabøjkpitøjk myøøt'ajttip, jøts ja amaa'tsk tyukpiky tyukøñ ja meeñ midi yik'ejttip. ⁷ Jøts ja nwindson'ajtim Jesús tnimaay:

—Majstutu, ja' yø ixa tø tpikta'aky midi tump ku ø nnaøjkiñit. ⁸ Ja'atpyim ayooibi jaa'y, øy juuni jaty xmay'attit xpudøkidit; jøts øts, ka' meets ja xumiwin'ejxkunaxt.

Ku ja Lázaro yikajpxy'aty ku tyik'ookwa'andi

⁹ Jøts ja israelit jaa'y may tnimadowdi ku ja nwindson'ajtim Jesús jam wyinaty Betania, jøts ja ojts tninøjkxti, kidi ja nwindson'ajtim Jesús nadyu'uk yik'ejxwamp, nayide'en ja t'ejxwa'andi ja Lázaro pøn ja nwindson'ajtim Jesús wyinaty tø tyikjujppyiky. ¹⁰ Winets ja teetywindsøndøjk tkajpxy'ajtti jøts ja nayide'en tyimyk'ooktit ja Lázaro, ¹¹ kumi ja' ñamyayi ja pøky tjagyajp ku ja israelit jaa'y ñawy'a'kxyidi, jøts ja may pyuwajtsniyidi jøts ja tjanchja'wiñidi ja nwindson'ajtim Jesús.

Ku ja Jesús kyajptøjkiyi'ñ jam Jerusalén

¹² Xjats idø'øn ja jaa'dyi may ja jam wyinaty tø yja'atti Jerusalén, jøts ja xyøbaatwa'andi ku ja paski xøøw; jøts ku kyimjabom'ajty, jats ja ojts tnijawidi jøts ku ja nwindson'ajtim Jesús jam wyinaty yja'atwa'añ ja'abi kajpkøjxp. ¹³ Winets ja tiixy ja ojts tpooiti, jøts ja ojts ttapaøtsowdi ja nwindson'ajtim Jesús, yide'en ja wyandøø:

—iMøj Dios kyunuu'kxin! ¡Øy wa'ats yø' midi ixyam Dios Teety kyejxpy, midi israelit jaa'y wyindsønip!

¹⁴ Jøts ja nwindson'ajtim Jesús tpaajty tu'uk ja buur jøts ja ojts ttawa'atpety, tymbyatpy idø'øn jade'en sam jap jaabyety nøkyijxpy:

¹⁵ Meets Sión kajpjotpit, kidi mjotmay'ookti; ejx, pø ixats myiñ ja mwindsøn, yikxon buuru'nk ttaku'xni.

¹⁶ Ka'ap ja pyabøjkpitøjk ja jaty tja'gyukidøø yø'øbi winmaa'ñ, østi jaanim ku ja nwindson'ajtim Jesús wyinaty tø chajpajtni. Jaanims yø tja'myajtstøø jøts kudam yø tnigajpxy ja nwindson'ajtim ku ja jap jade'en yja'ayi, jøts tyimjade'ents ja wyinaty tø jyaty kyubety.

¹⁷ Jøts ja jaa'dyi midi ja nwindson'ajtim Jesús jam wyinaty møøt, ku ja tyaxpidsiimy ja Lázaro jap oo'kpi jutjøtpy, ku ja wyinaty tø tyikjujppyiky jadigojk, ja'ats idø'øn jam tnimadyaktip sa jaty ti jaty ja wyinaty tø t'ejxti.

¹⁸ Patyts idø'øn ja jaa'y ojts tpaøtsowdi ja nwindson'ajtim Jesús, kumi tø ja wyinaty tnijawidi ja milagri'ajtin midi ja nwindson'ajtim wyinaty tø ttuñ.

¹⁹ Xjats ja fariseotøjk agø'ømyi ñawyajnidøø:

—Tøxi ɪxa xja'ejxti sa yø yjawɪ ñityu'unint. Ejxti, ejx niduki'iyi jaa'y pyanijxxyiyi.

Ku ja griegit jaa'y t'ejxwā'andi ja Jesús

²⁰ Jøts ja jaa'dyi midi jam wyinaty tø ñøjkxti xøbatpi Jerusalén, jam ja winaagindi pøn griegit jaa'dyi. ²¹ Ja'ats jam tñimendi ja Felipe pøn kugajpɪ Betsaida jam Galileit etjotp, jøts ja ojts tñøjmidi møkta'aky:

—Ja Jesús øø teety n'ejxwampy.

²² Xjats ja Felipe ojts tñinijxxy ja Andrés jøts ja ttukmadøø; winets ja namajtsk tñinøjkxti ja nwindson'ajtim Jesús, jøts ja ojts ttukmadowdi. ²³ Jøts ja nwindson'ajtim Jesús ja ojts ñi'mxyidi:

—Tø tpaaty ku nxøga'pxy mā øts yikxon nyikwinjawit nyikwindsø'ogit, pø Dios Teety ø xkajx jøts ja naxwii'ñit jaa'dyi ngudanaapy. ²⁴ Tiy janch ø nwa'añ ku mee nnøjmi, jøts ku tu'uk ja ariinbajk kyaka'ay naxjøtpy jadi'iñi ja ñaxy; pøni midilits ka'ap naxjøtpy, ne'egi may ja wyimbijty ku ja wyindigøy. ²⁵ Nayide'en idø'on meetsmi. Pøn kasajatyim nay'ejxip, pøn nabya'ayojp, ka'ap ja mibaat ja nitso'ok'ajtin tpaaty; pønts kanabya'ayojp, wan tjaty sa yjaty øts køjxp, ja'ats idø'on tpaatp ja nitso'ok'ajtin. ²⁶ Pøni pøn øts xpabøjkpi'atwamp, wan ya tmiñ jøts ø xmøøtwidettit xmøøtsøønidit. Yikajxa'akpts idø'on ja' jam Dios wyingujkp.

Ku ja Jesús tñigajpxy ja y'o'jkin

²⁷ Janch tø øts ɪxyam ndyimyjotmaadyøki; ¿jøts ti sa ø nwa'ant? ¿Ja ti ja ø nwa'ant: “Dios Teety, ka' øts jade'en xyikjatt xyikubatt sa øts ɪxyam njatwa'añ ngubatwa'añ”? Pø ka'axi øts ja' tø nnimiñ jøts øts jade'en ngajatt.

²⁸ Metsts Dios Teety tu'ugyi ja mja' majada'akp.

Winets yikmadøøy ja ayuujk jøts ku jap yjawɪ tsajpjøtpy wya'añ:

—Tø øts ja jade'en nduñ, jøts ndunwampy øts ja jade'en jadigojk.

²⁹ Jøts ja jaa'y midi jam wyinaty amidoodujktip, yide'en ja wya'andi jøts ku ja y'anaawy midi jade'en wyinaty tø wyina'añ, jøts pømbi wamidip:

—Ja ankilis yø tø myigajpxyi.

³⁰ Winets ja ñimaajyidi ja nwindson'ajtim Jesús:

—Ka' øts køjxp yø ayuujk jade'en tø yikmadøy, meets køjxp yø jade'en wya'añ. ³¹ ɪxyats idø'on tø tyimyja'aty ja xøow ja jumøjt ku ya'atpi naxwii'ñit jaa'y yiktiidyu'undit, jøts ku nayide'en yikpawopt ja miku' midi ya naxwiiñ tñigubajk'ajtp ja kya'øbyi. ³² Jøts ku øts jam nøjkx nyikpikta'aky jam kruskøjxp, ñijawidip ja øy pøn jøts øts xjanchjawidit.

³³ Ja'ats idø'on ja jade'en yjatijpy sudso ja wyinaty y'ookwa'añ. ³⁴ Xjats ja mayjaa'y ja yide'en y'adsooøø:

—Tø øø nnimadøy ku pøngapøn tkajpxy øøts ja ngutujk, jøts ku ja Cristo yjujky'att xemikøjxp. ¿Sudsots me mwa'añ jøts ku mets myikpikta'akt jam kruskøjxp? ¿Pøn idø'on ja' midi tsoo'mp tsajpjøtpy, midi ja naxwii'ñit jaa'y tkudanaapy?

³⁵ Winets ja nwindson'ajtim Jesús ja tñimaay:

—Mjaakujajidip mjaakudøø'kxidip meets ja jaj, tyimdyøts jøts ja kya'uk'ejtnit. Jaakyiktundits ejx yjaakja'atynim, jøts kidi kube'ets kugoots mjatti; ja jaa'y pøn jade'en jajtipp, ka'ap ja tñijawidi pø sa ja yjattit kyubattit. ³⁶ Janchja'widik øts nja', pø øtsxi dø'on ñamyayi jade'en sam ja jaj, jøts jaaktyimñayannimts øts x'ejxti xñijawidi jøts mee njaakja'bøkt.

Ja'ayi ku ja nwindson'ajtim Jesús ojts jade'en y'ukwani, jøts ja cho'onaa jøts ja jadi'iñi yø'odygøøñi.

Yá'at tñigajpxp tigøjxp ja israelit jaa'y ojts tkajanchjawidi ja Jesús

³⁷ Øy idø'øn ja nwindson'ajtim Jesús wyinaty kawine'en tø tjatuñ ja milagri'ajtin jam mayjaa'y wyingujkp, jøts ni jade'en ja kyayikjanchjawi. ³⁸ Ja ti jats ja jade'en kyajatt sa wyinaty tø wya'añ ja Dios kyugajpxy Isaias, ku ja yide'en tjaadyaañ:

Dios Teety, çpøn adøm ja ngajpxy ja n'ayuujk tø x'ukupøjky'am?

Øy ja Dios Teety ja myøk'ajtin tø tñanky'ijxyi, ka'ap ja pøn tmøjpikta'aky.

³⁹ Jøts idø'øn ja jade'en ka'ap tjanchjawidi, nayide'ents ja Isaias wyinaty tjaadyaam:

⁴⁰ Dios ja jade'en tuujnidip, jøts ja jade'en wimbeets kugoots yik'lityidi, jøts ja ka' tkupøkti,

jøts ja wyeen ja tkada'ejxtit øy ja wa'ats tyimya'ejxti,

jøts ja nika' ja ja'gyukin tjagyaptit,

jøts ja nika' ñabyøkjawiyidit øy øts ja wine'en njayikpøkwyaa'atswa'andi.

⁴¹ Jade'en'ampy ja Isaias jade'en wyaañ, kumi tø ja wyinaty jekyip Dios Teety tyuk'ijxyi jøts ku jade'en ja Jesús ja y'øy'ajtin xuk'ejxint, jøts ja ojts jade'en patk'jyi tñigajpxy.

⁴² Jøts øy idø'øn ja yjade'eni, may ja israelit jaa'y tjanchja'widøø ja nwindson'ajtim Jesús, østi windsøndøjk paat winaagin tjanchja'widøø; ja'ayi ku ja pøn ka' ttukmadowdi, ja'agøjxp ku ja ttsø'ogidi ja fariseotøjk jøts ja ka'ap tyukmajstsu'udit ja tyunk. ⁴³ Ja jaa'y yja' ja ne'egi yikmøjtøjkidip, jøts ka'ap Dios yja'.

Ja Jesús y'ayuujk payø'øyiyip ja jaa'y pyøky

⁴⁴ Jøts ja nwindson'ajtim Jesús møk wyaañ:

—Ja' pøn ø xjanchja'wip, kidi øtsip ja tu'ugyi xjanchja'wip, nayide'en ja ñamyayi tjanchjawi ja Dios Teety midit ø xkajxp. ⁴⁵ Jøts pøn øts ixa x'ejxp xnija'wip, nayide'ents ja t'ixy tñijawi pøn ø xkajxp. ⁴⁶ Jøts ku øts ñamyayi jade'en sam ja jaj, ja' ø tø nnimiñ ya naxwiñ pøni pøn ø xjanchja'widip, jøts kidi øts ja wimbeets kugoots nyiktandi. ⁴⁷ Pøni pøn ø xmadøjip ja n'ayuujk jøts ka' tmøjpikta'aky, kidi øtsip ja ndabayø'øpy ja pyøky; kaja'ajip ø tø nnimiñ jøts øts ja naxwiñ'ñit jaa'y ndabayø'øyt ja pyøky, pø ja'axi ø nnimimpy jøts øts ja nyiknitso'ok'attit. ⁴⁸ Pøni pønts øts nja' xkatsojkip jøts ka' tmøjpikta'aky sa ø nwa'añ, jats ja' pøn ja ttabayø'øyip ja pyøky, nayø'øyi ja nøjx kø'øm ni'øøniyip sa jaty ø tø nwa'añ, ku kyøxt ja naxwiñ'ñit. ⁴⁹ Kidi ja'ajip ø ngajpxy sa ø kø'øm nwinmay; ja' midit ø xkajxp, ja Dios Teety, ja' øts yø xanigutujk'ajtp jøts øts jade'en ngajpxt, jøts øts jade'en nyik'ixpøkt. ⁵⁰ Jøts wa'ats ø nnijawi, jøts ku ja' wya'añ ja Dios Teety y'ana'amin sudso yikpaatt ja jujky'ajtin xemikøjxp. Jade'ents idø'øn, pøni sa jaty ø tø nwa'añ, jade'en øts idø'øn ja tø ngajpxnaxy sam øts ja Dios Teety ja tø xanigutujk'aty.

13

Ku ja Jesús pakpujy ja pyabøjkpitøjk

¹ Tyimdyø jøts ja paski xøøw tpatnit, jøts ja nwindson'ajtim Jesús wa'ats ja tñija'wiñi jøts ku tø kya'pxy ja hori jøts ku ja tmajstsu'utt ja naxwiñ'ajtin, jøts ja Dios Teety ja tñinøjkxnit. Ejtp ja tpa'ayøøy ja pyabøjkpitøjk, xjats ja jade'en tpiakta'aky møk ja ejxa'an, jøts ja tñanky'ijxyi mabaat ja pa'ayo'owin ja tjagyepy.

²⁻⁴ Jøts ja Simón myajnk, ja Judas Iscariote, tø ja mikul' ja wyinaty tyatøkiyi, jøts ja tyukwinmaa'ñ'atyi sudso ja tka'ødyu'unt ja nwindson'ajtim Jesús.

Wa'ats ja tñijawi ja nwindson'ajtim Jesús jøts ku ja nay jam ñijkxy mā ja Dios Teety ja tø yiktsøøñi, jøts ku ja amuum tø kyutujkmø'øyi. Xjats ku dø'øn ja jam wyinaty y'a'ux'atti, winets ja tyanaagyukyiyii'ñ jam kyaadyaajk jøp'am, jøts ja twejtstaajky ja wyet, jøts poop wet ja ojts ñadyatenwøø'niyi. ⁵ Xjats ja nøø t'ada'amiyii'ñ jam købuj'ii'ñ jøtp, jøts ja pyabøjkpitøjk ja ttapakpujpinaxwa'jky, jøts ja nay jatyi ttuktati'ich ja poop wet midi ja jam wyinaty tyenwøø'n'ajtpy.

⁶ Jøts ku ja wyinaty tpakpujwa'añ ja Simón Pedro, winets ja ojts ñii'mxyi:
—Windsøn'ajtim, ¿mets ne'egi ndeky xpujip?

⁷ Jøts ja nwindson'ajtim Jesús ja t'adsøøy:

—Ka' mets yø ixyam xja'gyuki, mja'gyukipnimts mets yø nøjcx.

⁸ Jøts yide'en ja ñii'mxyi ja Pedro:

—Ka' me mibaat ndeky xpujit.

Winets ja nwindson'ajtim Jesús ja tñimaay:

—Pøni ka' øts yø mdeky nbujy, ka'ats me n'ukmigu'ukwanit.

⁹ Winets ja Simón Pedro wyaañ, jøts ja nwindson'ajtim Jesús yiknøjmi:

—Winets ø windsøn'ajtim amuum xpujiyit ja ngø' ngubajki; jøts ka' nugo ja ndeky.

¹⁰ Jøts ja nwindson'ajtim Jesús ja tñimaay:

—Øy ku ja'ayi tyeky tpujt pøn tse'abajtipnim, kumi wa'ats ja amuum. Nayide'ents meets m'anmija'win wya'adsi øy kidyimñiduki'iyi.

¹¹ Jade'en'ampy ja wyaañ ku ja ñimy: “Øy ka' niduki'iyi mdyimwya'adsidi”, ja'agøjxp ku ja wa'ats tñijawi pøn ja wyinaty køyakwajnip.

¹² Xjats ku ja jade'en y'abajtyii'ñ tpujkøjxiyi ja pyabøjkpitøjk tyeky, winets ja ñadyaniyajni ja wyet jadigojk, jøts nay jam y'ixaajky mā ja mesi jøts ja tñimaay ja pyabøjkpitøjk:

—¿Mnija'widip tigøjxp jade'en tø ndundi? ¹³ Meets, xmaestri'ajtp meets, xwindsøn'ajtin'ajtp meets, janch tiiyayjpxy kumi janch jade'en. ¹⁴ Pøni øts tamts maestri, jøts pøni øts tamts windsøn'ajtim, tøts ja mdeky nbujidi, nayide'ents meets idø'øn xuumit xem yam. ¹⁵ Tø nduk'ejxti jawyeen, jøts nayide'en xu'undit sam ø tø ndunjøpi. ¹⁶ Jøts janch øts idø'øn nwa'añ, jøts ku ka' pøn tumbi tjinaxy ja wyindsøn; uk ja ja'a'y pøn kexy yø'øpy, ka'ap ja tjinaxy pøn ja kajxip. ¹⁷ Jøts pøni mja'gyukidip yø'øbi winmaa'ñ jøts jade'en xu'undit, jotkujkts x'ejxtit.

¹⁸ Jøts kidi niduki'iyip meets jade'en ndijy; nnija'wip øts ja' pøn jaty ø tø nwi'ixy. Kuwanits jade'en yjatt sam jap jaabyety nøkyijpxy: “Jats ja tu'uk tø x'ukmidsepøjkni pøn ø møøt ngay n'uuky.” ¹⁹ Patki'iyi øts ya'at yam nnigajpxy jøts ku jade'en nøjcx yjaty, jøts xiyjawidit xjanchjawidit jøts pøni pøn øts. ²⁰ Janch øts idø'øn nwa'añ, jøts ku øts ja xkupiky pøni pøn ø xkupøjkp ja ngudanaabyi; jøts pøni pønts øts jade'en xkupøjkp, ñayi kyupijkpys ja nayide'en pøn ø xkajxp.

Ku ja Jesús tñigajpxy sa ja Judas kyøyakiyit

²¹ Xjats ku ja wyinaty jade'en tø wya'añ, jøts ja tymchaachjotmaadyøjkiyi'ñ, jøts ja ojts yikxon wa'ats tñigajpxy:

—Tiy janch mee nnøjmi, jøts ku meets ja nidu'ugin pøn ø xka'ødyunwamp.

²² Winets ja pabøjkpitøjk xem yam ñawyin'ejxjø'jkidøø, jadi'iñi tkamidaabyaatti pøni pøn idø'øn yiktejp. ²³ Winets ja tu'uk, midi ja nwindson'ajtim Jesús janchminamyajjyip, jam ja wyinaty pyukø'øm tmøøt'a'ux'aty. ²⁴ Ja'ats ja Simón Pedro amaa'tsk ñimaay jøts tyiktø'øt

pøn idø'øn yiktejp. ²⁵ Winets ja wingon tpuwa'adsiyi'ñ ja nwindson'ajtim Jesús, jøts ja tnimaay:

—Windsøn'ajtim, ¿pøn idø'øn mdijpy?

²⁶ Jøts ja nwindson'ajtim Jesús ja ojts yide'en y'adsøyi:

—Wan øts tsapkaaky tukpidasi t'uknümüji, jøts pøni pøn øts inet ja nmøøpy, ja'ats idø'øn ja wyinaty.

Xjats ja ojts jade'en tnümüji ja tsapkaaky, jøts ja ojts tmøøy ja Judas Iscariote midi ja Simón myajnkíp. ²⁷ Jøts ku ja Judas ja'ayi t'axajiyi'ñ ja tsapkaaky, jøts ja miku' ja ojts tyatøkiyi. Winets ja nwindson'ajtim Jesús ja tnimaay:

—Jatyí dø'øn xungojt midi mdunwampy.

²⁸ Jøts nipøn ja tkamadooguki tigøjxp idø'øn ja nwindson'ajtim Jesús jade'en tnimaay ja Judas. ²⁹ Ja Judasts idø'øn wyinaty tkøjø'ømit'ajtp ja meeñ abøjk'i'ñ, jøts winaagin jade'en wyinmaydi pø ja'ajik idø'øn tijy ja nwindson'ajtim Jesús tyijpy, jøts ja Judas t'atsju'uty ti jaty tsojkip ti jaty tunwamp ku ja xøøw, uk tmo'ot tigati ja ayoobi jaa'y. ³⁰ Xjats ku ja Judas wyinaty tø tkaagyixy ja chapkaaky, jøts ja ojts chøøñ. Koodsni wyinaty.

Ja jemy ana'amín

³¹ Xjats ku ja Judas wyinaty jade'en tø chøøñ, winets ja nwindson'ajtim Jesús wyaañ:

—Yamnims inet tiy yik'ext yiknijawit ja nmø'ajtin, jøts nay ja Dios Teetyts myøk'ajtin nanky'eixip. ³² Jøts kumi nanky'eixip øts ja Dios Teety myøk'ajtin, nayide'ents ja tnanky'eixmiyit øts ja nmø'ajtin, jøts tsojk ja jade'en ttu'unt.

³³ Ka' meets u'nk jeky n'ukmøøtsinaañit. Nayide'en meets yam ndukmadoowa'añ sam adøm ja nmigu'uk israelit jaa'y nmimaadyøø, jøts ku ja jap ka'ap ñøjkxtit ma ø nnijkxy øy øts wine'en xja'ixa'ay. ³⁴ Ixyamts nmo'odi ja jemy ana'amín: jøts ku xem yam mnamyi'øy'atidit mnamyiyuyj'atidit. Nayide'en sam mee njanchøkyin, nayide'ents idø'øn mnachokidit xem yam.

³⁵ Pøni mdundip jade'en, tyumnijawidipts jade'en øy pøn jøts ku mee ø xpaøjkpi'aty.

Ku ja Jesús ojts tnigajpxy jøts ku Pedro kyanigajpxiyit

³⁶ Xjats ja Simón Pedro tyiktiy ja nwindson'ajtim Jesús:

—Windsøn'ajtim, ¿ma dø'øn mnøjkxwa'añ?

Jøts nwindson'ajtim Jesús ja y'adsoojøø:

—Jap ma ø nnijkxy, ka'ap ø mibaat icyam jap xpanøjkxt; xpanøjkxp øts, ja' ku jaanim.

³⁷ Winets ja Pedro wyaañ, jøts ja nwindson'ajtim Jesús yiknøjmi:

—¿Tigøjxpimts windsøn'ajtim ku øts ka' icyam ndsoont? Ixyats øts, øy me ngu'oogit.

³⁸ Jøts ja nwindson'ajtim Jesús t'adsøøy:

—¿Janch idø'øn mwa'añ jøts ku ø xku'oogiwy'a'añ? Øts wamp, ka'aním wyinaty tsapni'aaw y'aya'axy ku mets wyinaty tigøøk ojk tø xkagupiky ku me x'ijxy'aty.

14

Jesús køjxp ja Dios Teety yikpaatt yik'ext

¹ Kidi mmaydi mdajti, ajot'atti Dios Teety, jøts ajot'ajttik øts nayide'en. ² Ma chøøni ja Dios Teety may tsinaadyaajk ja jap tmøødi; ku jeexyip ka' yjade'eni, tø meets ja jeexyip ndukmadooni. Jøts wants ø tnijkxy jøts øts ja n'a'eixit

ma mdsøønidit. ³ Jøts kuts øts wyinaty tø nnijkxy, jøts kuts øts ja wyinaty tø n'a'ejxi ja tsinaadyaajk, winets ø nme'ent jadigojk jøts mee nmøødiñit, jøts nay jap mjujky'attit ma øts idø'øn jap ndsinaawya'añ. ⁴ Mnija'widipxi pøni ma ø nnijkxy, jøts mnija'widipts ja tuu'.

⁵ Winets ja Tomas tñimaay ja nwindson'ajtim:

—Ka'ap øø windsøn'ajtim ja nnijawipøni ma mee mnøjkxwa'añ; ¿sudso'ampy øøts ja tuu' nnijawit?

⁶ Jøts ja nwindson'ajtim Jesús ja t'adsøøy:

—Tum øts amuum ja tuu', ja tyiiby: yjanchpi øts nayide'en, jøts ja kunuu'kxy jujky'ajtin nyajkpy. Øts køjxp ja Dios Teety yikpaatt yik'ext. ⁷ Kuk øts jeexyip xnijawidi pøni pøn øts, nayi mnija'wipts meets jeexyip nayide'en ja Dios Teety; jøts tøts idø'øn ja ixa xjanija'wiñidi, mja'ejxtipts idø'øn ja'.

⁸ Winets ja nwindson'ajtim ñimaajyøø ja Felipe:

—Windsøn'ajtim, ja'ayi ku øø xtyimdyuk'ext ja Dios Teety, wan øø t'ijxy.

⁹ Jøts ja nwindson'ajtim Jesús ja yide'en t'adsøøy:

—Windi'ixyip mee Felipe nminabyaajtniyidi, ¿jøts ni jade'embaat me xka'ijxy'ajtni? Pøni pøn ø x'ejxp, ñayi y'ijxpy ja nayide'en ja Dios Teety; jøts, ¿sudso'ampyts me x'amidøøy jøts mee nduk'ext ja Dios Teety? ¹⁰ ¿Ka' xmiðiky ku øts Dios Teety møøt n'ity, jøts ku øts ja nayide'en xmøøt'ejtmi? Tuki'iyi sa jaty nnøjmidi, kidi ngø'ømwinmaa'ñjotpyip øts yø njuuty. Ja Dios Teety midi ø xmøøt'ejtp, ja' kø'øm tyunk tump. ¹¹ Jøts janchja'wik øts jøts ku øts Dios Teety møøt n'ity, jøts ku øts ja nayide'en xmøøt'ejtmi; uk pøni ka'ats, øyts øts ja'ayi xajanchjawit, pø m'ijxpyxi ti jaty ø ndumpy. ¹² Jøts tiy janch mee nnøjmi, pøni pøn ø xjanchja'wip, ñayi yjatp ñayi tyu'ump ja nayide'en ti jaty ø njajtpy, ti jaty ø ndumpy, jøts ja tyikne'egidit tyikaja'adit ja'agøjxpts kuts ja Dios Teety nmøøt n'ett. ¹³ Jøts tuki'iyi pøni ti jaty mee m'amidøøpy ku ø xkajpxpaattit, øtsts ja kø'øm jade'en ndu'ump, jøts øts jade'en nyikwingaxø'jkic ja Dios Teety myøø'ajtin y'øy'ajtin. ¹⁴ Ndu'ump øts jade'en pøni ti jaty mee m'amidøøpy jøts ku øts xakajpxtit.

Ku ja Jesús wya'añ jøts ku ja Espíritu Santo tkaxt

¹⁵ Pøni xtsojpk tam meets, paduujnidik meets ja n'ana'amin. ¹⁶⁻¹⁷ Jøts nnøjmiip øts ja Dios Teety jøts ja mdanigaxidit tu'uk pøn mbudøkyyidip, pøn myikjot'amøkpkøkiyidip, pøn ja tyiiby: yjanchpi myøøt'ajtpy. Jøts ja'ats meets møøt m'ett kunaxt. May jaa'y ja kyagupøkit ja'agøjxp ku ka' t'ejxti tñijawidi. Jøts meets, tø mee ja xnijawi, pø ixaxi ja xmøødidi, jøts ja'ats mee møøt m'ett. ¹⁸ Ka' mee nadyu'uk nyiktañ, nniwimbett meets jadigojk. ¹⁹ Wingonip ja xøøw ku ø ka' ma n'ukyik'ejxnit; jøts meets, x'ejxp meets; kumi jujky øts, mjujky'atpts meets. ²⁰ Jaanimts xja'gyukidit jøts ku øts ja Dios Teety møøt n'ity, jøts meets xmøøt'ejtmi, jøts mee nayide'en nmøøt'ejtmi. ²¹ Pøn tø tñijawi jøts pøni xpaduujniyip øts ja n'ana'amin, jade'en ja tyiknigüe'xy jøts ku øts ja xjanchøky. Jøts ja'ats ja Dios Teety chokp pøni pøn ø xtsojpk, jøts ndsokp øts ja nayide'en, jøts ja'ats ø x'ejxp, ja'ats ø xnijawip ku nnanky'ejxit øts nja'.

²² Winets ja yjadu'ukpi Judas ja ñimaajyøø (nigidi Iscariotibi wamp midi ja Jesús køyapk):

—Windsøn'ajtim, ¿tigøjxp ku øøts ja ja'ayi n'ext ku mnanky'ejxit, jøts nika'ap niduki'iyi ja naaxwii'ñit jaa'y?

²³ Jøts nwindson'ajtim Jesús y'adsøøy:

—Pøn ø xtsojpk, pyadumpy ja' sa ø nwa'añ, jøts ja'ats idø'øn tsokip ja Dios Teety; jøts ja'ats ø nnime'emp møøt ja Dios Teety, jøts øøts ja xemikøjxp nmøøt'ett. ²⁴ Jøts pøn ø xkatsojpk, ka'ap ja tmøjipikta'aky sa ø nwa'añ. Yø

kajpxy yø ayuujk ixa xmadowdi, ka'øtsip yø' nja'; ja' yø' yja' midi ø xkajxp, ja Dios Teety.

²⁵ 'Ndukmodoogjxtip yam tuki'iyi, njaaktyimyøøtsinaadyipnim yam; ²⁶ ja Espiritu Santots midi ja Dios Teety mdanigaxiyidip jøts øts ja xkudanit, ja' idø'øn mbudøkiyidip, ja' idø'øn mgajpxjot'amøjkiyidip jøts ja mdukjajtkøxidit tuki'iyi, jøts nay ja' mdukjaj'myajtskøxiyidip tuki'iyi sã jaty mee tø nnøjmi.

²⁷ 'Jotkujk nnawya'kxa'andit. Nyajkpy øts ja øy'ajtin tsuj'ajtin. Ka'ap øts jade'en nyaky sam øy pønin nugo wya'añ. Kidits mmaydi mdajti, ka' mee mdsø'øgit. ²⁸ Tøxi xmadowdi ku ø nnimy jøts ku ø nnijkxy, jøts ku ø nme'ent jadigojk jøts mee nmøøtsøønit. Kuk meets jeexyip xjanchøky, mjanchxondakp meets jeexyip ku tø xnijawidi jøts ku nninijkxy ja Dios Teety; kumi ja' idø'øn jawaani møj jøts nigidi øts. ²⁹ Patki'jyi ya'at jade'en ndukmadowdi jøts ku wyinaty jade'en yjaty jøts xjanchjawidit.

³⁰ 'Ka' mee møøt jeky n'ukmøøtnagyajpxniyit; ja'agøjxp ku ja wyingøñ ja Satanás pøn yikutujkp ya naaxwiñ. Øy øts nmøk'ajtin ja xjagamimajadaajkiyi, ³¹ jatpts jade'en jøts jade'en tnijawit ja naaxwiñit jaa'y jøts ku ø ndsøky ja Dios Teety, jøts ku øts ja nbaduñ sã øts ja tø x'ane'emy. Tanidits jøts wan ya ttsøø'ñindi.

15

Ja uvi tsa'am kipy

¹ 'Jade'en øts idø'øn ñamyayi sam uvi tsa'am ñiguipy, jøts ja Dios Teety jade'en sam ja jaa'y midi ja uvi kipy t'ejx'ejtp. ² Jøts ja tyikwinajki ja y'awaj ja y'axeeñ midi katøømi; jøts midi tøømyip, yikxon ja tyikwa'ach twibøøty twibiky ma ja jam t'ijxy sa yjatwa'añ, jøts ja jawaani may yjaaktyimdyøømit. ³ Nayide'ents meets idø'ønmi; tø mee mwatsni, ja ixpøjkin mee tø myikwa'achi midi mee tø nmø'øy. ⁴ Kidi mee xmajtstutni, kumi ka'ap mee nmajt-stu'uty. Ka'axi kipy awaj tyøømi jadi'ñi ku ja kya'ity ja ñiguipy; nayide'ents meets idø'ønmi, ðti mee nadyu'uk mnityu'ump ku mee wyinaty ja nja' tø x'ixmajtsniyi?

⁵ 'Øts idø'øn jade'en sam ja ujts ñiguipyin, jøts meets jade'en sam ja' y'awaj y'axeeñin. Pøni pønts ø xkamajtstutp, jøts ku øts ja nayide'en ka' nmajtstu'uty, ja'ats idø'øn ja yja' møj wingaxø'økp; jøts ka' mee ti nadyu'uk mayi ku ø nga'ett. ⁶ Pøni pønts ja nja' xkaminamyaajiyiyip, ja'ats jade'en yik'ixjibep sam ja kipy awaj midi ka'øy, jøts kuts ja tyø'øts jøts ja jønjøtpy yikpikta'akt, jajts ja tyø'øty.

⁷ 'Pøni ka' mee xmajtstu'uty, pøni ka' mee ja n'ixpøjkin xja'dyigøjyidi, amidowdits pøni ti mdsøjktip jøts meets ja myikmo'ot. ⁸ Ku yikxon xpadundi ja Dios Teety yja' sa ttsøkyin, jade'en'ampyts ja y'øy'ajtin myøk'ajtin yikpa'ixy, jøts nayide'en idø'øn yiknijawit ku meets idø'øn xjanchpabøjkpi'aty. ⁹ Jade'en mee ndsøky sam øts Dios Teety xtsøkyin; tun'ejtik meets yø nja' ku meets ja tsojkin ndami'ity. ¹⁰ Pøni xpaduujnidip øts ja n'ana'amin, jade'en'ampyts mee møøt m'ettit øts ja ndsojkin, nayide'en ñamyayi sã øts ja nDeety y'ana'amin nbaduujniyi, jade'ents øts idø'øn ja chojkin nmøøt n'ity.

¹¹ 'Jade'en'ampy meets jade'en nnøjmi, jøts mjotkujk'attit nayide'en sam øts, jøts ejnti xoni x'ejxtit. ¹² Ya'at øts idø'øn n'ana'amin'ajtpy: øy yikxon xem yam mnamyayidit mnachokidit, nayide'en sam øts ja tsojkin nbikta'aky sã mee ndsøky. ¹³ Jade'en idø'øn ja tsojkin møj yikjagyepy pøn amuum nay-ojxip, jøts ja myigu'uktøjk tkudani jøts jujky'ajtin ja tpaattit. ¹⁴ Meets idø'øn nmigu'uk'ajtpy pøni mdundip jade'en sã ixa n'ana'amdi. ¹⁵ Ka' mee ndijy jøts

ku mee mdumbi, kumi ka'ap ja tumbi tnijaw'i pøni ti jaty tyumpy ja wyindsøn. Nmigu'uktijpyts meets yam, ja'agøjxp ku tuki'iyi tø nduknija'wigyøxti sã jaty øts ja Dios Teety tø xnøjmi. ¹⁶ Kameedsipxi tø xpikta'aky; pø øtsxi mee kø'øm tø nwi'ixy, jøts mee tø ndanipiky jøts nøjx ja mdunk yixxon xyikwingaxø'økti, jøts wan tmøji wan tkaja'aji. Jade'ents ja Dios Teety mmo'ojidit pøni ti jaty m'amidoodip ku ø xkajpxpaattit amumjoojt. ¹⁷ Yø' idø'øn nda'ana'amdip, jøts xem yam mnabya'ayowidit jøts ja tsojkin xjagyaptit.

Ku ja ka'øyyaa'dyi tkatsokti ja Jesús møøt ja pyabøjkipitøjk

¹⁸ 'Pøni mmi'ajkiyidip ja' pøn ya naxwiiñ, mnija'widipxi jøts ku øts ja jawyeen nayide'en tø xuñ. ¹⁹ Ku meets jeexyip nayide'en m'adi'ich sam pøn ya naxwiiñ wyinmaydi, nayide'ents meets ja jeexyip mdsøkyiyi sam ja ttsøkyin pøn nayide'endi sam ja'ajindi. Øts meets ya tø nwi'ixy ya naxwiiñ mã nayide'en chøønidi pøn jade'en winmaadyip, jøts ja'agøjxp myikmi'ekyidi kumi ka'ap ja'abi winmaa'ñ x'ukyikyø'øñidi sam o pøn naxwiiñ. ²⁰ Ja'myatstis sã tø nnøjmidi, jøts ku ka'ap ja tumbi ñamyøjiyit sam ja wyindsønin. Tøbaats ø nyikpawidity ku ngayikupiky, nayide'ents meets idø'øn myiktumit; jøts pøni xpaduujnidipts øts ja n'ixpøjkin, nayide'ents meets ja m'ixpøjkin yikpadumit. ²¹ Øts køjxp idø'øn jade'en myiktu'undit ja'agøjxp ku ka' tnijawidi pøn ø xkajxp.

²² Ka'ap ja jeexyip ti pøkyti, kuk øts jeexyip ngamiñ, kuk øts ja jeexyip ngaduknijawidi. Ixyam ti ñikyajpxtip jøts ja pyøky kyayiktagubatit; ²³ ja' pøn ø xmi'ajkip, ñayi myi'ajkip ja nayide'en øts ja nDeety. ²⁴ Ka'ap yø jeexyip ti pøkyti kuk øts yø jeexyip ka' ti nduk'ejxti midit ø tø nduñ yø' wyingujktyi, sam ka'ap pøn jade'en tø tyuk'ixyidi; tø yø t'ejxnidi, ja ti ja'ats yø myija'widip, pø xmi'ajkidipxi øts yø', jøts ñayi myi'ajkidip yø nayide'en ja Dios Teety. ²⁵ Ja'agøjxpts ya'at jade'en jyaty kumi ka'pxy jade'en yjatt sã ya'at kajpxy ayuujk wya'añ, midit jap køjja'ay yø' kyutujkøtptyi: "Nadøki øts yø xmi'ekyidi."

²⁶ Paty øts ja Dios Teety xukaxt ja Espiritu Santo jøts øts ja nja' xkajpxiyit, pøn pudøjkip kajpxjot'amøjkip, pøn nayide'en tmøøt'ajtp ja tyiiby'i yjanchpi. ²⁷ Jøts mee nayide'en ja nja' xkajpxmxyit, pø tøxi meets ja x'ixy sã jaty y'ejxi tyiyi, sã jaty tø ngajpxwa'kxtso'ondaajkyim østi ixyambaat.

16

¹ 'Jade'en'ampy jade'en nnøjmidi jøts kidi nugo winmayjimbetti winmay'adøjti. ² Myikwojpidso'ømp myikajxpidso'ømp meets jap tsaptøjkjøtpy, østi yja'at paat ja xøow ku ja jaa'y wya'andit jøts ku Dios yja' ja tpaduujnidi ku meets ja myik'ooigyit. ³ Ja'agøjxp ja jade'en y'adø'tsttit ku ja nijuuni tkanijawidinim pøni pøn ja Dios Teety, jøts pøni pøn øts. ⁴ Jøts ja'agøjxp ya'at jade'en ndukmadowdi ku wyinaty jade'en yjatwa'añ, jøts xja'myatsttit jøts ku yø tø ndukmadoonidi.

Ti dø'øn ja Espiritu Santo tyumpy ya naxwiiñ

'Ka' meets yø jade'en patki'jyi ndukmadøøy, kumi ja'ajt øts kø'øm.

⁵ Ixyamts ø nnøjxwani tsinaabyi mã ja jap midit ø xkajxp; jøts øts ja nnøøtsinaamyit jøts nipøn tamts mee nidu'ugin tkayiktiy pøni mã øts idø'øn nnijky. ⁶ Jotmay mee ne'egi jinaxy tø mjaaktyimdyatøkyi, ja'agøjxp ku yø jade'en tø ndukmadowdi. ⁷ Janch idø'øn nnøjmidi jøts ku ne'egi jade'en m'øy'ajtxidit jøts ku nnøjxkt. Ku ø nganøjxt, nijuunits ja kyamiñ midit mbudøkiyidip midit mgajpxjot'amøjkiyidip. Ku nnøjxt, kø'ømts øts ja ngaxt.

⁸ Jøts ku dø'øn ja nøjcx myiñ, ja' ja tyu'ump jøts ja naxwii'ñit jaa'y ja ttukjawit ja pyøky jøts ku yjanchpojkipitumbijaa'yidi, jøts ku ja tu'ugyi ja winmaa'ñ sudso tyø'odit sudso tyuda'aktit, jøts ku Dios ja pyayø'oyidit. ⁹ Ja'agøjxp pyojkipitumbijaa'y'atti ku ø ka' xjanchjawidi; ¹⁰ ñija'widipts nøjcx sa y'ejxi tyiyi midil'ibi øy midil'ibi paat'ajtidip, kumi jam ø nniikxy ma Dios Teety, jøts ka' mee x'uk'ejxnit, ¹¹ jaanims tjä'gyukidit ja Dios pyayø'oyin jøts ku tyiy'ajtingøjxp yikutuky, pø tøxi wyinaty ja tyi'ajtin tyaky, jøts ja miku' yikastigimo'ot midil'ibi møy y'ity yä naxwiiñ.

¹² Jap øts may ja madya'aky njajagyepy midil'ibi ndukmadoowandip, ka' inet xja'gyukidit ixymyi. ¹³ Kunim mye'ent ja Espiritu Santo, ja'ats ja tuki'iyi mduk'ixpøjkøxidip sudso tyiyi yjanchi; ka'axi kyø'øm ja' ja tyiktu'unt pøni sa jaty ja wya'añ, ja' ja kyajpx pøni sa jaty pøni ti jaty ja myadøpy, jøts ja mdukmadowidit ti jaty tunwajnipnim. ¹⁴ Jade'en'ampyts øts ja winja'win windsø'jkin nbaatt, kuts ja ngajpxy ja n'ayuujk xpadu'undit sa mduknijawiyidi ja Espiritu Santo. Øts ja ngajpxmy'op. ¹⁵ Nayide'ents ja Dios Teety kyajpxy ja y'ayuujk sam øts nja'ajin, paty øts jade'en nwa'añ jøts ku nayide'ents nmo'ot ja ngajpxy ja n'ayuujk, nayide'ents yø mduknijawiyidit.

Xondaajkin ja nøjcx wyimbidsimy ku njotmay'o'jkindit

¹⁶ Ka' y'ukjajknit ku mee ka' x'uk'ejxnit, ku wyinaty waani tø ñaxy ja tiempi jaanims ø x'ejxtit jadigojk, pø jamxi ø nniikxy ma jam Dios Teety.

¹⁷ Winets ja pyabøjkpitøjk winaagin nixem niyam ñawyajnidøø:

—¿Ti yø jade'en tyijpy ku yø xnimaa'yin jøts ku ka' y'ukjajknit, ku yø ka' n'uk'ejxna'ant, jøts ku waani ñaxt winetnimts ja n'ejxindit jadigojk ja'agøjxp ku ñiikxy jam ma ja Dios Teety? ¹⁸ ¿Ti dø'øn yø jade'en tyijpy jøts ku “ka' y'ukjajknit”? Ni kyayikja'gyuki niwine'en pøni ti dø'øn yø jade'en tyijpy.

¹⁹ Jøts ja nwindson'ajtim Jesús ojts ja t'ixy jøts ku ja pyabøjkpitøjk yjawi tyiibøkwa'añiyi, jøts ja tnimaay:

—Tøxi nnøjmidi jøts ku ka' y'ukjajknit ku mee ka' x'uk'ejxnit, kuts wyinaty waani tø ñaxy ja tiempi jaanims ø x'ejxtit jadigojk. ¿Kidi yø'øjip meets ixja mnayiktøøjiyidip? ²⁰ Jøts tiy janch øts idø'øn nwa'añ ku mee nnøjmi, jøts ku nøjcx ja yajxin x'ejxti, ku nøjcx ja jotmay'o'jkin xpaatti yam ja naxwii'ñit jaa'y xyonda'akti. Jøts ka'ats yjade'eni, øy mee mabaat mjantymyjajotmay'øøky, xondaajkin ja nøjcx wyimbidsimy ku jade'en njotmay'ookti. ²¹ Jade'en idø'øn ñamyayi yjaty sam ja tø'øxyøjk ku ja kya'axwa'añ, janch winmay jotmay yjaty ku tø tpaaty ja tiempi ku ja y'u'nk pyøjkjø'økni; ku tø tminawya'kxniyi ja maxu'nk nika'ap ja t'ukja'myajtsni jøts ku y'u'nk ja tø pyiky, ja'agøjxp ku ja xyonda'aky ku ja tø tyiakxi'iky tu'uk maxu'nk yä naxwiiñ. ²² Nayide'ents meets idø'øn mjaajtnimi, mjanchjotmay'oo'ktip ixyam; wimbetp øts jøts mee nminabyaadit jadigojk, winetnimts ja xondaajkin xpaattit yikxon, jøts nipøn ja mgapøjkxiyidit.

²³ Jøts ja'abi xøøw ka' ø ti x'ukyiktøønidit. Janch meets idø'øn nnøjmidi, jøts ku ja Dios Teety tuki'iyi mmo'ojidit pøni ti jaty ja m'amidoodip øts køjxp. ²⁴ Østi ixyamabaat ka'anim ti x'amidowdi øts køjxp; amidowdi pøktsowdi, mbaattip ja' jøts jade'en mxonjattit.

Tøts ja Jesucristo tmimajada'aky midil'ibi ja naxwii'ñit jaa'y yikwindigøøpy

²⁵ Madya'akyøjxp yä'at yam nugo tø ndukmadowdi jøts xamimadoodowidit; ja'atp ja xøøw ku ka'ap jade'en nøjcx n'ukmigajpxnidi abiky madya'akyøjxp, wa'ats meets ja ndyimdyukmadoonit nøjcx pøni sa ja Dios Teety y'ejxi tyiyi. ²⁶ Jøts ja'abi xøøwts øts køjxp ja Dios Teety

x'amido'odit xpøktso'odit ja øy'ajtin; jøts nika'ap øts yam ndyimwya'añ jøts ku øts n'amido'ot ja Dios Teety jøts mee nni'amidowit. Ka'ap chøkyi jøts kø'øm n'amido'ot, ²⁷ pø mdsøjkp meets ja Dios Teety. Jade'engøjxpts ja mdsøkyidi kumi xtsojpk meets nayside'en, jøts tøts xjanchjawidi jøts ku øts Dios Teety xkexy. ²⁸ Jam ø tø ndsøñ ma Dios Teety jøts øts ya tø nmiñ ya naxwiiñ, ixyamts øts inet nmajstut'utwangojmi ja naxwii'ñit, jøts ø n'awimbetiwya'añ jadigojk ja Dios Teety.

²⁹ Xjats ja pyabøjkpitøjk wyandøø:

—Ixyannim inet tiy janchwa'ats xnigajpxñim, ka' x'ukyiktuni ja abiky myadya'aky midi kayiktamimadodøø'wip. ³⁰ Ixyannimts øøts inet njanch'ixy njanchnijawi jøts ku tuki'iyi xnija'wigyixy, jøts ku ka' chøkyi jøts ku øy pøn kuwani mdyimdyiibyøkiyit. Ja'agøjxp øø njanchjawi jøts ku jam mdsøñ ma Dios Teety.

³¹ Jøts nwindson'ajtim Jesús yide'en t'adsøøy:

—¿Jøts xjanchja'winiðip øts ixyam? ³² Ja wyingøñ jøts tø yja'aty ja xøow ja jumøjt, jøts tyimñay'ixyamyi, ku meets inet m'agakpaktit pø ma pønjabøn ñøjkxt, jøts øts inet nadyu'uk xnika'aktit. Ka'ap ø nadyu'ugi, jats ja Dios Teety xmøø'tity. ³³ Ndukmodoogøjxtip ya'at yam tuki'iyi, jøts ja øy'ajtin jotkujk'ajtin xpaattit ku ø x'ajot'attit. M'ayo'ombaattip ya naxwiiñ; jotmøkts mnabyikta'agidit, tøts øts inet nmimajada'aky midi ya naxwiiñ yikwindigøøpy.

17

Ku ja Jesús tni'amidowi tni'bøktsowi ja pyabøjkpitøjk, jøts ja ttukmadøy ja Dios Teety

¹ Xjats ku ja nwindson'ajtim Jesús jade'en wyān'abajtiy'ñ, jøts ja ojts jam tsajpwemp pyat'ixy, winets ja wyaañ:

—Dios Teety, tø ja hori kya'pxy. Yikmøjtøjkikts øts, kunuu'kxyja'wikts øts, jøts me nayside'en nyikmøjtøkit, jøts me nayside'en myikunuu'kxyjawi. ² Metsxi tø xmøø'y ja kutujk jøts øts naxwii'ñit jaa'y ja ni'ijtyi nda'ana'amidit, jøts ja tpaattit ja juky'ajtin xemikøjxp pøn jaty me tø xkømoø'y. ³ Jøts jade'en'ampy yikpaaty ja juky'ajtin xemikøjxp ku tu'ugyi mets Dios Teety myikjanchjawi, sam nayside'en ja Jesucristo, pøn mets ya tø xkexy naxwiiñ.

⁴ Tø øts ja ndunguixy jade'en midi me tø xa'ane'emy, jade'engøjxpts myikmøjawi myikunuu'kxyjawi ya naxwiiñ. ⁵ Møøkyts øts jam mwinguiky nay ja'abi møk'ajtin midi øts y'ijty nmøøt'ajtpy møøt mets ku ka'anīm wyinaty naxwii'ñit y'øyinim.

⁶ Jøts ja jaa'dyi midi me kø'øm tø xwiwich ya naxwiiñ midi me tø xagødøki, tøts øts ja nduknija'wigyøxti pøni pøn mets. Jøts mets ja y'ijty mjaa'y'ajtpy, jøts mets ja tø xagødøki. Tøts ja tpadundi mets ja m'øgyajpxy mets ja m'øy'ayuujk.

⁷ Nija'winidip ja ixyam wa'ats ti jaty me tø xmøø'y jøts ku mets ja xja'aji. ⁸ Tøts øts ja ndukmadowdi ja øgyajpxy ja ømyadya'aky midi me tø xukmadøy, jøts tøts ja tkupøkti, tøts ja tñijawidi jøts ku ja yjanchi jøts ku øts jam ndsøñ ma mets jam. Tø ja tjanchjawidi jøts ku me tø xkexy.

⁹ Yø'øts ø nni'amidoo'widip pøn jaty me tø xmøø'y ja'agøjxp ku ja xja'aji; jøts nigidi ja'abi nni'amidoo'wip pøn øts tø xkabadundi. ¹⁰ Midi jaty ø nja'ajtpy, nayi mets mja' ja', jøts nay ja'ats ø nja'ajtmip; jøts nayi øts nmøk'ajtin nay øts ngunuu'kxin ja xyktuujjats.

¹¹ 'Øts, ka'ap øts n'ukya'a'ajtnit ya naxwiiñ; yø'øts ja tandip, jøts me nninøjkxnit møøtsinaabyi. Kunuu'kxy Dios Teety, agøøduk axajtuk

mmøk'ajtingøjxp pøn jaty ø tø xagødøki jøts ni'amuki ni'aga'pxi y'ettit, kyanamyajtstu'udidit nayide'en sam adømin. ¹² Ku øts yø ya y'ity nmøø'tetti ya naxwiin, n'eix'ejttip øts yø', ja møk'ajtin ø nyiktumpy mididi me tø xmø'øy, ja'ats øts yø nda'agø'ødujktip nda'axajtu'ktip. Ni tu'ugin yø tø kyawindigøydi, ja'ayim idø'øñ jade'en tø yjaty mididi'iyim y'ijty windigø'ejtnip, jøts jade'en ka'pxy tpaaty sa ja mgajjy sa ja m'ayuujk xyiktaañ.

¹³ 'Ixyamts me nninøjkxnit ma mets jam; jøts ku njaaknaya'aty ya naxwiin, ja'agøjxp øts jade'en nwa'añ jøts ja mja' yjotkujk'attit sam ø njotkujk'atyin. ¹⁴ Tø øts ja ndukmadoogøxti ja m'øgyajpxy ja m'øy'ayuujk, ja'ats mmi'ajkiyidip pøn ja ka'øwiyinmaa'n tjagyajp. Ja' yiktami'ajkidip ku ja yjade'embidi winmaa'n tka'ukyiktunidi, nayide'ents øts ka' nyiktuñ ja yja'adi. ¹⁵ Kaja'ajipts ø n'amidøøpy jøts xwaabidsø'ømt ya naxwiin, ja' n'amidøøpy jøts xkuwa'ant xkubokt, jøts miku' yja' kidi myajada'aky. ¹⁶ Nayide'en ja'adi sam øts, ka' nyiktuñ ja kya'øwiyinmaa'n. ¹⁷ Pøkjø'økts ejxjø'økts mdiy'ajtingøjxp mjanch'ajtingøjxp; pø tiy janchxi ja mgajpxy ja m'ayuujk. ¹⁸ Nayide'ents sam me tø xaniguexy ja naxwiin'it jaa'y, nayide'ents øts ja yam ndanipøkti ndani'ejxti pøn ya naxwiin ja ka'øwiyinmaa'n tjagyajptipnim. ¹⁹ Amumjoojt øts njaaktyimñadyamiyoxiyit yø'øgjxpti, nayide'ents ja ñadyamiyoxiyidit ku ja mgajpxy ja m'ayuujk tu'undit mididi tiy mididi janch.

²⁰ 'Kidi ja'ayip ø nugo ndyimni'amido'owidip, nayide'en ja'amidip pøn ø xjanchjawiwandipnim ku ja myigu'uk ja tmadoojidit ja øgyajpxy ja ømyadya'aky. ²¹ Jøts ja' øts yam n'amidøøpy jøts tu'ugyi ja wyinmaa'n tyik'ettit; jøts tu'ugyi y'ettit møøt adøm, nayide'en Dios Teety sam mets xmøø'tity jøts sam me nmøø'tity. Jøts wan tu'ugyi ja wyinmaa'n tpipta'akti jøts jade'en ttukjanchjawidit ku me tø xkexy, pøn ja ka'øwiyinmaa'n tjagyajptip. ²² Tø øts ja nmo'odi nay ja'abi møk'ajtin mididi me tø xmø'øy, jøts tu'ugyi wyinma'adyit nayide'en sam adøm nja'. Tu'ugyi nayide'en mets mja', jøts nayide'ents øts nja'ami. ²³ Øts ja møøt nnamyayidit, jøts mets xmøøtnamya'lymyit jøts ja tu'ugyi y'ettit, jøts jade'en ja naxwiin'it jaa'y t'ejxtit tnijawidit jøts ku me tø xkexy, jøts ku mets ja xjanchøky sam me xtsøkyin.

²⁴ 'Dios Teety, metsxi ja tø xagødøki, jøts ja'ats ø ndsøjkpy jøts ja yjap'attit ma øts jap ndsinaawya'añ, jøts t'ejxtit ja møk'ajtin ja øy'ajtin mididi me tø xmø'øy; jaayim me xtsøky ku ka'anin wyinaty naxwiin'it y'øyinim. ²⁵ Mets Dios Teety tiy'ajtin janch'ajtin mmøøt, jøts ka'ats ja naxwiin'it jaa'y mnijawiyi; jøts øts, nnija'wip mets; jøts yø pabøjkpitøjk, ñija'winidip yø' jøts ku me tø xjanchkexy. ²⁶ Tø øts ja ndukmadowdi mbøn mets jøts njaaktukmadoowandipnim øts. Jade'ents sa mets xpa'ayøyin, nayide'ents ttaba'ayoomidit ja myigu'uktøjk. Nmøø'tetpyim øts yø' y'agujkpti jade'en.

18

Ku ja Jesús ojts yikmach

¹ Xjats ku ja nwindson'ajtim Jesús jade'en wyinaty tø wya'añ, winets ja tmøøtsøø'n ja pyabøjkpitøjk, jøts ja ñøjkxwa'andi jam jaduktamajñ ku ja ttanaxtit ja nøø mididi yiktejp Cedrón. Jam tu'uk ja kam ma y'ity øy ti tsa'am, jamts ja nwindson'ajtim Jesús tmøøtkuyø'øyi'iñ ja pyabøjkpitøjk. ² Jøts ja Judas, pøn ja wyinaty ixam ka'ødyunwajnip, wa'ats ja t'ijxy'aty ja'abi et, pø jamxi ja nwindson'ajtim Jesús wyinaty kawinaak ojk tø ñamyukyidi møøt ja pyabøjkpitøjk. ³ Jade'en'ampyts ja Judas jam ojts tmøøtja'aty tukpiky ja soldaditøjk møøt ja jaa'dyi mididi t'eix'ejttip ja tsaptøjk, ja teetywindsøndøjk ja

fariseotɔjk ja kajxidip, tumda'o'jk m00t ja jam yja'tt00 kun0'0ky. ⁴ Nija'wiñip ja nwindson'ajtim Jesús ja wyinaty sa jaty ja yjatwa'lañ kyubatwa'lañ, winets ja twinguwa'jkiyiñ, j0ts ja tyikt0y:

—¿P0n d0'0n m'ixaadyip?

⁵ J0ts ja ojts yide'en y'adsowdi:

—Ja Jesús 00 n'ixaapy, ja Nazaretit jaa'y.

J0ts ja nwindson'ajtim Jesús ja t'ads0y:

—0tsimts ja'.

J0ts ja Judas midi ka'0y'ad0tsp, ixam ja tm00di ja mayjaa'y. ⁶ J0ts ku ja nwindson'ajtim Jesús wyaañ: “0tsimts ja'”, winets ja jadi'iñi y'ixn0jkt00 j0ts ja kya'tsimbejt00. ⁷ Winets ja nwindson'ajtim Jesús ja jadigojk tyiibyojkid00, j0ts ja ñimaajyid00:

—¿P0n d0'0n m'ixaadyip?

J0ts ja wyand00:

—Ja Jesús, ja Nazaretit jaa'y.

⁸ J0ts ja nwindson'ajtim Jesús ja tnimaay:

—T0xi nnigajpxy j0ts ku ja y'0tsi. P0ni 0ts tam x'ixaadyip, majtstu'uttits 0ts y0 nbab0jkit0jk.

⁹ Jade'en'ampy ja jade'en yjaty, j0ts ja jade'en ka'pxy tyimyjaty ku ja nwindson'ajtim Jesús wyinaty yide'en k0'0m t0 wya'lañ: “P0n jaty 0ts ja Dios Teety t0 xag0d0ki, ni tu'ugin ja t0 kyawindig0ydi.” ¹⁰ J0ts ja Sim0n Pedro jam wyinaty t0 tnixaji tu'uk ja tsujx, ja'ats ja ojts tjuuty, j0ts ja ttaxikpo'otuujty ja jaa'y midi tx00w'ajtp Malco, ojts y'aga'ndyatsk ja tyimgyajtsp'jtiiyi, ja teetywinds0nd0jk id'0n ja tyumbi jade'en jajtp. ¹¹ Yide'en ja nwindson'ajtim Jesús tnimaay ja Pedro:

—Pikta'ak y0 mdsujx nay jap ma t0 xjuuty. ¿Sa me mwimmay, uk ja 0ts id'0n xijy ngagup0kt ja ayo'on midi 0ts ja Dios Teety t0 xanibiktaagi?

Ku Jesús yiknajtswaa'wiyiñ jam ma teetywinds0n

¹² Xjats ja soldadit0jk, m00t ja' p0n tnigubajk'ajtp j0ts m00t ja tsaptajk, ojts tmatsti ja nwindson'ajtim Jesús, j0ts ja ojts tk0w00ndi tk0xojtsti. ¹³ J0ts ja tyikn0jkt00 ma ja Anás jam ty0jk midi ja Caifás tyeety my0'jtii, midi jam wyinaty ja'abi jum0jt teetywinds0n'ajtp. ¹⁴ Nayi Caifás id'0n wyinaty yide'en t0 tn0jmi ja israelit jaa'y, j0ts ku ne'egi jade'en tyimy'0y'att j0ts tu'ugyi ja jaa'y tku'oogit ja kajp.

Ku ja Pedro tku'iiñ j0ts ku ja ka' t'ijxy'aty ja Jesús

¹⁵ J0ts ja Sim0n Pedro m00t jadu'uk ja myibab0jki tpan0jkti ja nwindson'ajtim Jesús. J0ts yik'ijxy'ajtp ja' ja yjadu'ukpi, ijxy'ajtp ja teetywinds0n ja', ja'ats jap tyimy00t0jkimyaa ja nwindson'ajtim Jesús jap winds0n ty0jk'agui'py; ¹⁶ j0ts ja Pedro jap tyaañ ma yiknid0ki ja t0jk. Ja'ats ja yjadu'ukpi jap ñibids00m midi ijxy'ajtp ja teetywinds0n, j0ts ja ojts tminagyajpxyi ja t0'0xy0jk midi jap t0jk'adinaapy, j0ts ja tyikt0jkiyiñ ja Pedro. ¹⁷ Winets ja t0'0xy0jk midi t0jk'adinaapy, y'amido0j00 ja Pedro:

—¿Kidi metsip y0 jaa'y mbab0jki'ajtpy?

J0ts ja Pedro t'ads0y yide'en:

—Ka', ka'axi ja y'0tsi.

¹⁸ J0ts kumi xujxpts wyinaty, j0ts ja tumbit0jk j0ts ja tsapt0jktajk jap ja wyinaty t0 tyikm0jidi ja j00n, ja'ats ja jap wyindanaadyip j0ts ja jap xyamdi. J0ts ja Pedro ixam id'0n ja tm00txami.

Ku ja teetywinds0n tyikt00binaxwa'aky ja Jesús

¹⁹ Xjats ja teetywindsøn tyiktøøbinaxwaaajky ja nwindsons'ajtim Jesús pøn jaty idø'øn pyabøjkpītøjk'ajtpy, jøts ti dø'øn ja ñanky'ixpøjkp. ²⁰ Jøts ja nwindsons'ajtim Jesús ja t'adsøøy:

—Tø ø ngajpxy mayjaa'y'agujky øy madsoo; ejtp ø nyik'ixpiky mā jaty tsaptøjk, jøts nayide'en mā ja møj tsaptøjkmi mā israelit jaa'y ñamyukyidi, jøts ka'ap øts øy ti n'amaa'tsk'aty ku ø ti nnigajpxy. ²¹ ¿Tigøjxp ku øts ja xyiktiy? Ja' mets ja myiktø'øp pøn jaty ø tø xmadooji, jøts wan ja tnigajpxti pøni sa jaty øts idø'øn ja tønnojmidi. Ja' ja tnija'widip pøni sa jaty øts ja tønnojmidi.

²² Xjats ku ja nwindsons'ajtim Jesús jade'en wyaañ, jøts nidu'ugin ja tsaptajk ja ojts wyingugoxiyi, jøts ja ñii'mxyiyi:

—¿Jade'en yø m'aaw xa'adsøy jøts jade'en xnøjmit yø teetywindsøn?

²³ Jøts ja nwindsons'ajtim Jesús ja yide'en t'adsøøy:

—Pøni tødam ø ngajpxigøy, nigajpxts midil'ibi dø'øn mga'ømyadøøpy; jøts pøni øydam jade'en sa ø tønwa'añ, ¿tits ku øts xkøxy?

²⁴ Winets ja Anás ja ojts kyexyi wiñ ke'kxy, jøts ja jam ñøjkxt mā ja Caifás, miditeetywindsøn'ajtp.

Ku Pedro jadigojk wya'añ ku ja ka'ap t'ejxi ja Jesús

²⁵ Ixajp idø'øn ja Pedro tyani, yjoo'kxpiky jap jøn'ajpy, ku ja yiknimaay:

—¿Kidi metsip yø jaa'y mbabøjkp'ajtpy?

Jøts ja Pedro ja ka' tkupiky, yide'en ja wyangojmi:

—Ka', ka'axi ja y'øtsi.

²⁶ Winets ja yiktøøji tu'uk ja teetywindsøn tyumbi mididi ja jaa'y myigu'uk'ajtpy, mididi ja Pedro wyinaty tø txiktsajstuty jøts ja tyatsk tyimiyikwinajkiyøø, ja'ats waañ:

—¿Kidi metsip jap tøn'ixy jøts ku mets ja jap y'ity xmøødi jap tsa'amgamjøtpy?

²⁷ Jøts ja Pedro ja jadigojk ka' tkupøjkøjmi, winets nay jaty y'ayaajxy tu'uk tsapni'aaw.

Ku Jesús twinguwa'jkiyüñ ja Pilato

²⁸ Jøts ja nwindsons'ajtim Jesús ojts yikwaadsøøñ jam Caifás tyøjkjøtp, jøts ja yikwaanijky mā ja møj windsøn kyutujktaajk jam. Xiijñiwyani, jøts ja israelit jaa'y nika'ap tyøjkidøø jap kutujktaajkjøtpy, jøts ja ka'ap tyiktigøøwya'andi ja kyostumbri, pøky idø'øn ja' ku ja jade'en y'adø'øtstit, ka'ap ja t'ukaanidit ja paski xøgaaky ja paski xø'uuky ku ja a'ux ja tyiknaxtit.

²⁹ Ja'agøjxp ja møj windsøn Pilato jam ojts pyidsimy jøts ja myigajpxwa'añidi, yide'en ja ojts ñii'mxyidi:

—¿Ti yø jaa'y mdani'øø'nidip?

³⁰ Jøts ja y'adsoodøø:

—Ku yø jeexyip kyapøkyjaa'yi ka' mets yø jeexyip ya tø myiktægøðøki.

³¹ Winets ja Pilato ja ñimaajyidøø:

—Møødidi, jøts xiidyu'lundit jade'en pøni sa ja mgutujk wya'andi.

Jøts ja israelit jaa'y y'adsoodøø:

—Øøts, ka'ap øøts xpaat'aty jøts øøts øy pøn nyik'ooct.

³² Jade'en ja ojts ka'pxy jyaty sa ja nwindsons'ajtim Jesús ja wyinaty tønigajpxy jøts ku ja jade'en y'ooct. ³³ Xjats ja Pilato jap jadigojk tyøjkiyüñ jap kyutujktaajkjøtpy, jøts ja ojts tyajxi ja nwindsons'ajtim Jesús, jøts ja t'amidøøy:

—¿Mets idø'øn israelit jaa'y mjanchwindsøn'ajtip?

³⁴ Jøts nwindsons'ajtim Jesús ja tnimaay:

—¿Kò'òm mets jade'en mwinmay jòts mets jade'en xyiktiy, uk pòn jade'en tòm damimadya'agyi jòts ku ø nja'aji?

³⁵ Jòts ja Pilato ja y'adsoojòø:

—¿Ti israelit jaa'yimts øts? Kò'òmxi yø mmigugajp jòts yø teetywindsøndøjk ya myikmiñiyi jòts mets ya nyiktagødøki. ¿Ti dø'øn tø xun?

³⁶ Jòts nwindsøn'ajtim Jesús ja yide'en t'adsøøy:

—Windsøn'ajtp øts, ka' øts nja' yjade'eni sam pøn yja' ya naxwiin. Ku jeexyip jade'en, tø øts nbabøjkpitøjk jeexyip xnitseptunidi, jòts øts jeexyip ngayiktagødøki ja israelit jaa'y. Kayaa'ip øts ngutujk.

³⁷ Winets ja Pilato ja ojts ñii'mxyiyi:

—¿Jòts mjanchwindsøn mets idø'øn?

Jòts nwindsøn'ajtim Jesús ja t'adsøøy:

—Ja' øts sa ìxa mwa'añ, windsøn øts. Tø ø ngaxi'iky ku øts ya naxwiin tø nmiñ jòts ø nnigajpxt ti tiy'ajtin'ajtp, ti janch'ajtin'ajtp. Pøn jaty ja xmimadoodip, xmadojidipts øts nja' ja' sa jaty ø nwa'añ.

³⁸ Jòts ja Pilato ja ojts ñii'mxyi:

—¿Jòts ti dø'øn tiy'ajtin'ajtp janch'ajtin'ajtp?

Ku Jesús ñidujk'iyi'ñ jòts ja y'oookt

Jòts ku ja Pilato jade'en t'ukyiktiiy, jòts ja ojts pyidsimy jòts ja tminagvajpxwa'añi ja israelit jaa'dyi, jòts ja tñimaay:

—Ka' øts yø jaa'y nbøky'ixy. ³⁹ Jade'ents mee xkostumbri'aty jòts øts nidu'ugin nyik'awa'atspidsøømt ja pøkyjaa'y, ku meets ja x'amidøy ku paski xøw: ¿Jòts mdsojktip jòts wan øts yø mwindsøn tñajtsmatsi jadi'iñi?

⁴⁰ Winets ja niduki'iyi møk wyandøø:

—¡Ka' yø' xyik'awa'atspidsøømt! ¡Yø Barrabás myik'awa'atspidsøømp!

Jòts møj maa'tspi dø'øn ja Barrabás.

19

¹ Xjats ja Pilato ojts tñankmyachi ja nwindsøn'ajtim Jesús, jòts ja ojts tñankwyøpyi. ² Jòts ja soldadi ja ojts ttagujandi tu'uk ja windsøn kujan, jòts tum kujp awiity, jòts tsuun'k wet ja ojts ttaxoxti. ³ Jòts ja ojts wingon twingunøjkxidi, jòts ja ojts tñøjmidi:

—¡Møj mets, pøn ja israelit jaa'y wyindsøn ukmayip!

Jòts ja ojts twingoxti tjøpkoxti wyemp y'am.

⁴ Winets ja Pilato ojts jadigojk pyidsimy, jòts ja ojts ñii'mxyidi:

—Ejxti nijawidi, nyikpidsimpy øts yø ya jòts xnijawidit jòts ku øts yø niti ngadapøky'ixy.

⁵ Jòts ja nwindsøn'ajtim Jesús pyidsimy, ìxam tkujan'aty ja kujp awiity jòts ja tsuun'k wet ja twet'aty. Jòts ja Pilato ja ojts tñimaagyojmiiyidi:

—¡ixya dø'øn ja jaa'y!

⁶ Xjats ku ja teetywindsøndøjk ja t'ejxtøø jòts ja tsaptajk, winets ja tjanch-tayajxidøø møk'ampy:

—¡Yikruspat! ¡Yikruspat!

Jòts ja Pilato ja tñimaay:

—Wawdi jòts mee xyikruspat, kumi ka'ap øts yø ti pøky ndapøky'ixy.

⁷ Yide'en ja israelit jaa'y ja y'adsoojyøø:

—Jap øøts tu'uk ja kutujk nmøødi, jòts jade'en ja tyikutuky jòts wan t'øøky, ja'agøjxp ku yø tø ñabyikta'agyi Dios U'ngin.

⁸ Xjats ku ja Pilato ja ojts jade'en tmadøy, jøts ja jade'en yjaaktyimiyik'adsø'jkii'ñ. ⁹ Jøts ja jap kyutujktaajkjøtpy tyøjkii'ñ jadigojk, jøts ja ttiibijjky ja nwindson'ajtim Jesús:

—¿Mets, ma mdsøøñ?

Jøts ja nwindson'ajtim Jesús niwine'enin ja tkidyimy'adsøøy.

¹⁰ Winets ja Pilato ja ojts ñii'mxyiyi:

—¿Jøts ø ka'ap x'adsøy? ¿Ti ka' xnijaw i jøts ku øts kutujk njagyepy, jøts me nyikruspatt uk jøts me nyik'awa'atspidsø'omt?

¹¹ Jøts nwindson'ajtim Jesús ja t'adsøøy:

—Ti kutujk mets jeexyip mdsaaachjagyepy ku Dios Teety ja jeexyip jade'en tkayikjaty; paty ja' møj pøky tyimdyaja'adyi pøn øts ya tø xkøyaky jøts me tø nyiktagøðøki, waani mets mja' mdaja'adyi.

¹² Winets ja Pilato nay jatyi tja'ixaay ja taay, jøts ja t'ixmatst jadi'iñi ja nwindson'ajtim Jesús; xjats ja israelit jaa'y ja møkta'aky ñimaajjyiyi:

—Pøni myik'awa'atspidsimpy inet, ka' xmiçu'uugi wyinaty ja møj windsøn César jam Roma! iPøn jade'en namyøjpiktaajkip, myidsep'atpyts ja César!

¹³ Xjats ku ja Pilato jade'en tmadøøy, winets ja ojts tñankyikpidsimyi ja nwindson'ajtim Jesús jøts ja y'ixaajky jam kyutujktaajkjøp'am midi yiktejp Gabata ku hebreit ayuujk, jade'en ja tiiy ma tsaba'kxy. ¹⁴ Jaa dø'on ja xøøw wyinaty kujky ku wyinaty tyimbyatni ja paski. Winets ja Pilato tñimaay ja yjaa'y midi jamdi:

—i'xyaadi ja mwindsøn!

¹⁵ Yide'en ja møk wyandøø:

—iWan tpa'øøky! iWan tpa'øøky! iYikruspat!

Jøts ja Pilato ja tñimaay:

—¿Øts ndejin ja mwindsøn nyikruspatp?

Ja teetywindsøndøjk ja yide'en y'adsøøyøø:

—Ka'ap øts pøn jadu'uk nwindson'ajtpy, ja'ayi tu'ugyi ja møj windsøn César.

¹⁶ Ku ja Pilato jade'eñi yiknimaay, jøts ja ojts tkøyaky ja nwindson'ajtim Jesús jøts ja tyikruspattit, winets ja tyiktsø'ondøø.

Ku ja Jesús kyiruspejty

¹⁷ Xjats ja nwindson'ajtim Jesús tyiktso'ondøø, jøts ja ttukapti ja kyirus, jøts ja jam ñijkxy ma ja et yiktiiy Oo'kpi Kyubajk Pajk, midi yiktejp hebreit ayuujk Gólgota. ¹⁸ Jamts ja ojts tyikruspatti møøt namajtsk pøkyjaa'y, tu'uk jatyi ja yikpiktaktøø adsow aduuk, jøts ja nwindson'ajtim Jesús agujk'ajpy.

¹⁹ Jøts ja Pilato jam ojts tñankpyikta'agyi ja letri kruskøjxp midi nømp: “Jesús, Nazaretit jaa'y, israelit jaa'y wyindsøn.” ²⁰ Jøts may jaa'y ojts t'ejxti ja letri, pø kajpwingonxi ja jam ma ja nwindson'ajtim Jesús ojts kyiruspety, jøts ja letri jade'en ja kyøxja'ayi hebreit ayuujk, jøts griegit ayuujk, jøts latin. ²¹ Paty ja israelit teetywindsøndøjk tñimaydi ja Pilato:

—Kidi jade'en xja'ay “Israelit jaa'y wyindsøn”; ne'egi jade'en xpikta'akt “Kø'øm ñadyijiyi jøts ku israelit jaa'y twindsøni.”

²² Yide'en ja Pilato ja ojts y'adsøyidi:

—iMidi tø nja'ay, jade'en yø tya'ant!

²³ Xjats ku ja soldaditøjk wyinaty tø tyikruspatti ja nwindson'ajtim Jesús, winets ja ojts twejtsjø'jkidi ja wyet, jøts ja ojts ñadyanipaadyidi jøts ja ñawya'kxit maktaxkpiky, kitu'uk ja soldadi ja tpoøtkit. Jøts nayide'en tñixajidyøø ja nijan, jøts kumi ka'ats ja y'axuumyuky, ja'ayi ja amuum tyimdyukoikubetyi, ²⁴ xjats ja soldadi nixem niyam ñawyajnidøø:

—Ka' yø ndakø'øtsa'ant; ne'egi yø nniguyajtint, jøts n'ejxint pøn jady-
imy'uktaja'adip yø wet.

Jøts jade'en ojts ka'pxy yjaty sam jap jaabyety nøkyijxpy: “Tø øts nwet ja
xwejtswa'kxidi, tø ja tniguyatti.” Jade'ents idø'øn ja soldaditøjk y'adøtstøø.

²⁵ Jøts ma ja nwindson'ajtim kyirus jam, ixam ja tyaak ja', jøts nayi ixamts
ja'am'i mid'i ja tyaak y'uchip, jøts ja Cleofas n'idø'øxy mid'i María'ajtp, jøts nay
jam ja María Magdalenimi. ²⁶ Xjats ku ja nwindson'ajtim Jesús ojts t'ixy ja
tyaak, jøts ku ja pyabøjkpi nay jam tyanaamyi mid'i ja jantyimyinamyajjip,
winets ja tnimaay ja tyaak:

—Taaq, ixa ja m'u'nk.

²⁷ Jøts ja pyabøjkpi ja tnimaamyi:

—Ixa ja mdaak.

Jøts nay jaty'i ja'abi pabøjkpi ttaakpijky mid'i ja nwindson'ajtim Jesús
tyaagip, jøts ja jade'en yikjagyepy sam kyø'ømdaagin.

Ku ja Jesús y'ø'jky

²⁸ Xjats ku ja jade'en wyinaty tø y'ukjaty, jøts kumi ñija'wipts ja
nwindson'ajtim Jesús ja wa'ats jøts ku wyinaty jade'en tuki'i'iyi tø kya'pxy, jøts
idø'øn ja jade'en tyimyjatt sam jap jaabyety nøkyijxpy, winets ja wyaañ:

—Jantyimdyøjtsip øts.

²⁹ Jamts wyinaty tukmøjnajts'øøy ja vino mid'i jeky tø pyu'uch; ja'ats ojts
yiktabdsiich ja tanimuu'kpi, jøts ja yikpiktaajky jam hisopo kipy awaj
jöp'am, jøts ja yikta'ayøjkxyi ja nwindson'ajtim Jesús. ³⁰ Xjats ja twixi'jch ja
tanimuu'kpi jøts ja vino ka'ø'byi jade'en t'uuky, winets ja wyaañ:

—Tø tuki'i'iyi yikpaduñ ka'pxy.

Jøts ja kyubajk ja jadi'iñi kyuwojtsnajxy, jøts ja jade'en y'ø'jky.

Ku ja Jesús yikuumy kyachpuki'jy

³¹ Jøts tyimbyaatwanipts ku ja paski xøøw kyujajy, jøts ja' ja israelit jaa'y
kyatsojktip jøts ja oo'kpi jam y'awejxtit kruskøjxp ku poo'kxin xøøw, jøts
yats idø'øn ja'abi xøøw jaaktyimyojxøøwni. Ja'agøjxpts ja tnimaydi ja Pilato,
jøts wan ja tnankpyakwojptøjkixyi pøn jaty jam wyinaty tø kyiruspatti, jøts
wan ja tnankyikwinajkixyi jam ja oo'kpi ñine'kx. ³² Winets ja soldadi
ñøjkxtøø, jøts ja ojts tjanchpakwojptøjkøxti mid'i ja nwindson'ajtim Jesús jam
wyinaty møøt tø kyiruspety. Ojts ja yjawyeembi tyimiykpakwojptøjkøjy, jøts
ja yjadu'ukpi nayide'en mid'i jam jaduktamajñ. ³³ Xjats ku ja twingunøjkxidøø
ja nwindson'ajtim Jesús, jøts ja t'ejxpatøø jøts kudam ja tø y'oo'kni, patyts ja
ka' nayide'en t'uktunidøø.

³⁴ ¿Ja ti winets ja ñajxy? Ojts ja soldadi ja nidu'ugin tyakumy'i ja takuu'm
jøts ja tyimy'awajch ja kyachpuki'jy, jøts nay jaty'i ja ni'jpy pyidsiim ymøøt
nøø. ³⁵ Ja'ats mid'i ixyam njaadyampy, tø øts idø'øn jade'en n'ixy nnijawi
mid'i'ibi tiy janch, jøts mee nayide'en xi'jyawit xjanchjawit. ³⁶ Jade'enxi dø'øn
ja yjaty jøts jade'en ka'pxy tyimyjaty sam jap jaabyety nøkyijxpy: “Ni tu'ugin
pyajk ja kyatøjt kyamoott.” ³⁷ Jøts jap abiky wyami: “Y'ejxtip ja kø'øm ku
tyiktsaachidit.”

Ku ja Jesús ñine'kx yikpiktaajky jap møj tsaajutjøtpy

³⁸ Xjats ku dø'øn ja jade'en wyinaty tø yjaty, jøts ja José mid'i kugajp'ajtp
jam Arimatea, pyabijpky ja' nwindson'ajtim Jesús øy idø'øn ja ka'ap øy pøn
tjadyimdyuknijawi, ja'agøjxp ku ja ttsø'øgi ja myi'israelit jaa'y. Ja'ats idø'øn
t'amidoow ja Pilato ja may'ajit, jøts ja myo'o'ojyit ja nwindson'ajtim Jesús

ñine'kx. Xjats ja Pilato yikjajt ja jade'en, winets ja José ojts ñijkxy jøts ja ojts tyiktso'oniyi. ³⁹ Jøts ja Nicodemomi midu wyinaty jekyip tø tmøøtmadya'aky ja nwindson'ajtim Jesús koots, ja'ats jam tnija'jt ee'px majk kilin jaabya'ak midu pa'akxuu'kp, majtsk jøøjp ja', ja mirra tø t'abøjkmuky møøt ja áloes. ⁴⁰ Jøts idø'on ja José jade'en møøt ja Nicodemo tniyajyidøø ja nwindson'ajtim Jesús ñine'kx, jøts ja tta'abejtøø ja wet midu ja wyinaty tø tpiktajkidi ja'abi pa'akxuu'kpi midu jade'en abøjkmuky. Jade'en ja ttundøø sam idø'on ja israelit jaa'y kyostumbridi ku ja y'oo'kpi ja tyiknaxøkidi. ⁴¹ Jøts ma ja nwindson'ajtim Jesús wyinaty tø kyiruspety, jam wingon tu'uk ja kam ma y'ity øy ti tsa'am. Jamts tu'uk oo'kpi jut ja'abi kamjotp midu tyimyjemy'øyipnim, ka'anim jap pøn tyimykpihta'aky. ⁴² Japts ja tpiktaktøø ja nwindson'ajtim Jesús ñine'kx, pø wingonxi ja jam tyan ja oo'kpi jut, jøts tyimdyøts jøts ja israelit jaa'y pyoo'kxin xøøw tyimcho'ondaknit.

20

Ku ja Jesús yujukpyiky jadigojk jap møj tsaq jutjøtpy

¹ Xjats ku midukxøøw cho'onda'akñim ja yjadu'ukpi samaan, winets ja María Magdalena ojts jøpyi ñijkxy jam ma ja oo'kpi jut jam wyinaty, ka'anim yikxon yjajta'aky; jøts ja ojts t'ixy jøts ku ja oo'kpi jut jam tka'uk'agø'ajtni ja tsaq midu ja wyinaty tø yikta'agi'iy. ² Winets ja ojts putyi ñijkxy ma ja Simón Pedro jam wyinaty møøt øts midu yø nøky tjaapy, midu ja nwindson'ajtim Jesús jantymyina myaajyip, jøts øøts xnimaay:

—Tøts ja nwindson'ajtim jap yikjidøjtpidsømmni jap jutjøtpy, jøts ka'ap øø nnijawi pø ma net tø yikpihta'aky.

³ Xjats øts møøt ja Pedro nnijkxy ma ja oo'kpi jut jam. ⁴ Jøts øøts nama-jtsk janch putyi nnijkxy; jøts øts jawaani møk njantymbyujt jøts ja Pedro nnikejky, jaween øts jam nja'jty ma ja oo'kpi jut. ⁵ Jøts øts jap ngu'ejxiyi'ñ, ja wetyi jap n'ejxpaajt midu ja nwindson'ajtim wyinaty tø yikta'abity jøts ku ja jap wyøjni, jøts nika'ap ndøjkijyi'ñ. ⁶ Jøtsnim ja Simón Pedro ix'oojknim yja'jty, jøts ja tyøjkijyi'ñ jap oo'kpi jutjøtpy. Jøts ja nayide'en jap ojts t'ixy jøts ku ja abet jap wyøjni; ⁷ jøts ja tjaaktyimy'ejxpaajty ja wet midu ja nwindson'ajtim Jesús wyinaty tø yiktagupity, jøts nigidi ja jam møøt ja wet midu ja amuum yikta'abejt, axaach ja jam abiky tø yikpihta'aky. ⁸ Winets øts ndøjkyimyaq ma dø'on ja oo'kpi jut jam, jøts n'ijxy jøts kudam ja wyinaty jade'en tø yjaty, xjats ja njanchja'wiyi'ñ. ⁹ Jøts ka'anims idø'on øøts wyinaty nja'gyuki midu jap nøkyijxy jaabyety wya'añ, jøts ku ja nwindson'ajtim Jesús yujukpyøkt jadigojk jap oo'kpi y'agujkp. ¹⁰ Jøts øøts jade'en nama-jtsk nwimbejtnaq jøts nnøjkxnaq jam ndøjkwindump.

Ku ja Jesús ñanky'ejxøø jadigojk ma ja María Magdalena jam wyinaty

¹¹ Jøts ja María jamyi jut'agø'øm tyaañ, ñiyaxni ja jam kyu'ejxiyi'ñ ma ja jut, ¹² winets ja ojts t'ixy nama-jtsk ja ankilis, tum amuum poop ja xyøxyidi, jøts ja jam chøøni midu ja nwindson'ajtim Jesús wyinaty tø y'ukyikpihta'aky ja ñine'kx; tu'uk jam chøøni agubajkp, jøts jadu'uk teky'ok'am. ¹³ Jøts ja ankilis ja ñimaajyøø, ja tø'øxyøjk yiknimaapy:

—¿Ti mjaajtíp, tiku mya'axy?

Jøts ja tnimaay:

—Ja'agøjxp ø nya'axy ku øts ja nwindson'ajtim ya tø yikwejtspidsømmni, jøts øts ja ka' nnijawi pø ma ja tø yikpihta'aky.

14 Ja'ayi ja jade'en wyaañ, jøts ku ja y'ejxjimbijty winets ja t'ejxpaajty jøts kudam ja nwindson'ajtim Jesús jam tyani; jøts ka'ap ja tyimwyaañ jøts ku ja yja'aji. 15 Winets ja ojts k'ø'om ñii'mxyi, jøts ja t'øxyøjk yiktaibyiky:

—¿Tiku mya'axy? ¿P'øn m'ixaapy?

Jøts ja t'øxyøjk jade'en ja wyinmay, ja tsa'am kam ejx'ejtpik id'ø'n ja tijy, jøts ja tnimaay:

—Teety, p'øni mets ja t'ø xyikpidsimy, tukmadooks øts ma t'ø xpikta'aky jøts øts ja n'atsyiktsoont.

16 Winets ja ñimaajyøø ja nwindson'ajtim Jesús:

—¡María!

Xjats ja y'ejxjimbijty jøts ja tnimaay hebreit ayuujk:

—¡Raboni! —midi tyijpy yik'ixpøjkpi.

17 Jøts ja nwindson'ajtim Jesús ja ñimaajyøø:

—Kidi ø xøn, majstutk øts, p'ø ka'anixi ø nnijkxy jam ma ja nDeety jam. Nøjkxts x'atstukmadø y p'øn jaty øts nja' xpabøjkidip, jøts ku øts jap nnijkxy ma øts ja nDeety jap, midi mee mDios Teety'ajtpy.

18 Winets ja María Magdalena ojts ñijkxy, jøts ja ojts t'atstukmadoji ja nwindson'ajtim Jesús pyabøjkpitøjk jøts ku ja wyinaty t'ø t'ixy ja nwindson'ajtim, jøts ku ja wyinaty jade'en t'ø ñii'mxyiyi.

Ku ja Jesús ñanky'ejxøø jadigojk ma ja pyabøjkpitøjk jam wyinaty

19 Jøts nay ja'abi xøøw ku midukxøøw cho'onda'akñim ja yjadu'ukpi samaan, nay ja'abi ux ku ja pabøjkpitøjk jam wyinaty t'ø ñamyukyidi jøts ja wyinaty t'ø ña'ni'agiibyetyidi, ja israelit jaa'y ja ch'ø'jkidip. Winets ja nwindson'ajtim Jesús tyøjkii'ñ jøts ja jam y'agujk'am wya'k'ø'iyii'ñ, jøts ja ojts yide'en kyajpxpøø'kxyidi:

—Øy'atti jotkujk'atti.

20 Xjats ku ja jade'en y'ukwaañ, jøts ja ojts tyuk'ijxyidi ja kyø' jøts nayide'en ja kyachpuki'jyit tsaachi. Jøts ja pabøjkpitøjk yjantyimxyondaktøø ku ja t'ejxtøø ja nwindson'ajtim. 21 Jøts ja nwindson'ajtim Jesús ja jadigojk ñimaajyidøø:

—Øy'atti jotkujk'atti. Nayide'en sam øts ja Dios Teety t'ø xkexyin, jøts nayide'en meets yam nguexy.

22 Xjats ja tnibixuiyii'ñ ja pyabøjkpitøjk jøts ja tnimaay:

—Wan ja Dios y'Espíritu Santo mdatøkiiyidi. 23 Jøts p'øni mgajpxwa'kxtip jøts ku ja yikpojkpimee'kxy p'øn nabyøkyja'wiyidip, jøts øts nja' ja xpabøjkiiyidi; uk p'øni ka'ats, mdukmad'o'opts meets ja nayide'en jøts ku ja pyøky ja ka'ap mibaat yikmee'kxy, p'øni ka'ap ja ñabyøkyjawiidi niwine'en.

Ku Tomás ojts t'ixy ja Jesús ku t'ø yjukpyiky

24 Jøts tu'uk ja nwindson'ajtim pyabøjkpi midi Tomás'ajtp, midi yiktejp xeeñu'nk, ja' wyinaty ka'ejtp ma ja jamdi ku ja nwindson'ajtim Jesús wyinaty t'ø ñanky'ijxyi. 25 Xjats ja oojknim ttukmadowdi ja nwindson'ajtim Jesús pyabøjkpitøjk, jøts ja tnimaadyi:

—Tø øøts ja nwindson'ajtim n'ixy.

Ja Tomás yide'en ja ojts ñii'mxyidi:

—Ka' øts ja njanchjawit p'øni ka' øts kyø' ja n'ejxi jøts ku ja klabis ja t'ø yiktsaachiyi; ku øts ngøtsa'jx jap k'ø'om ka' ndyimgyudejit ma ja klabis ja t'ø yiktsaachiyi, p'øni ka' øts jap nguxaji ma ja kyachpuki'jy t'ø chaachi, ka'ats øts ja njanchjawit.

²⁶ Xjats ku kyiduktujkxøw'ajty, winets ja pabøjkpitøjk ñamyujkidøø jadigojk jam tøjktotp, jøts ja Tomás ixjam ja wyinaty tmøødidi. Winets jadyimja'aduky ja tøjkwynaty yikxon ku ja nwindsøn'ajtim Jesús tyøjkjyii'ñ, jøts ja jam agujk'am tyanay'øyi'ñ. Jamts ja ojts kyajpxpøø'kxyidi, yide'en ja ñii'mxyidi:

—Øy'atti jotkujk'atti.

²⁷ Jøts ja Tomás nay jatyi yiknimaay:

—Kudeji yø mgøtsa'jx yap, jøts øts yø ngø' x'ejxit; jøts yak yø mgø' jøts yap mguxajit øts ngachpuki'jy. Jøts kidi nugo xkuwinmayi, janchjawi dø'ø.

²⁸ Xjats ja Tomás y'adsøøy jøts ja wyaañ:

—jMets nwindsøn'ajtpy ndios'ajtpy!

²⁹ Jøts nwindsøn'ajtim Jesús ñimaajyøø:

—Tomás, ja'agøjxp yam xjanchjawnim ku ø tø xtyimwyemp'ijxñim. Jotkujk'atyim ja'adi pøn tmibøjktip pøn tjanchja'widip jadi'iñi, øy øts ja xjaga'ejxti.

Ya'at nigajpxp ja tiy'ajtin midiyø nøky myøø'ajtpy

³⁰ Jøts may ja nwindsøn'ajtim Jesús ojts tpiкта'aky ja ejxpajt, ku ja ojts ttuñ ja milagri jam pyabøjkpitøjk wyingujkp midiyø ka' kyøxja'ayi ya'at nøkyjotpy.

³¹ Ja'agøjxp ya'at jap jade'en tøy yikujayi, jøts xiyjawidit xjanchjawidit jøts ku ja' yiknitsøøky, jøts ku ja' Cristo ja nwindsøn'ajtim Jesús, ja Dios U'nk. Jøts ku ja xjanchjawidit, mbaatpts meets ja jujky'ajtin xemikøjxp sam pyaat'atyidi pøn tjanchja'wiyidip.

21

Ku Jesús ñanky'ejxiyi niwixujk pyabøjkpi windump

¹ Xjats ku dø'øn ja wyinaty jade'en tøy y'ukjaty, winets ja nwindsøn'ajtim Jesús ñanky'ejxi jadigojk jam ma ja pyabøjkpitøjk, jam mejy'am midiyø yiktejp Tiberias. Yide'en idø'øn ja y'ejxi tyiyi: ² Ja Simón Pedro jam wyinaty: møøt ja Tomás midiyø yiktejp xeeñu'nk, jøts ja Natanael midiyø jam kugajp'ajtp Caná midiyø Galileit etjotp, jøts ja Zebedeo y'una'jk, jøts møøt abiky janamajtsk nay ja nwindsøn'ajtim Jesús pyabøjkpi. ³ Ja'ats ja Simón Pedro ñimaay:

—Nijkxy øts t'ats'ajkxma'aky.

Jøts ja wyandøø:

—Pø tsoomp øø nayide'en.

Xjats idø'øn ja ñøjkxtøø, jøts ja ojts ttatøkidi tu'uk ja barki, ni tu'ugin ja ajkx ja tkamaktøø ja'abi koots. ⁴ Jøts ku wyinaty xyiijñiwyani, winets ja nwindsøn'ajtim Jesús jam mejy'am wya'kaxi'jky, ja pyabøjkpitøjk ka'ap ja twinmaydi jøts ku ja yja'aji. ⁵ Jøts ja ñimaajyidøø:

—Mixy, tø dø'øn ja ajkx iiy xmatsti uk tyimgya'anim?

Jøts ja yide'en t'adsoodøø:

—Ni tu'uk.

⁶ Xjats ja nwindsøn'ajtim Jesús ja ojts ñii'mxyidi:

—Niwøjpatti yø mda'ajkxmajk ixa barki puki'jy aga'ñ'ampy, jøts ja ajkx inet jap xpaattit.

Jøts ja ojts jade'en tundi, jaanims idø'øn ja tiy ka'ap ja tya'ajkxmajk y'ukmaa'yniyidi jøts ja jap nøøjotpy tjuuttit, ja'agøjxp ku ja ajkx jap janch'ujts'abøki. ⁷ Winets øts midiyø ja nwindsøn'ajtim Jesús janchminamyaajyip tñimaay ja Pedro:

—ja nwindsøn'ajtimts yø'!

Ja'ayi ja Simón Pedro ja jade'en tniemyadøoy jøts ku ja yja'aji ja nwindson'ajtim, winets ja ñikijxyit nijan ja ttatøjkijyit'ñ (pø tøxi ja wyinaty tjeñ) jøts ja ñidøjkijyit'ñ. ⁸ Jøts øøts jam mejy'am ja barki nyikja'ity, jøts ja nda'ajkmajk ja nbajidity janch ujts abøki ja ajkx, pø jadukmagø'pxy xajkxi dø'on ja jam wyinaty yjaaka'ity jøts øøts nbaatnit ja naajx. ⁹ Xjats ku øøts jam nwinajky, jøts øøts nbaajty ja jøndsabajk yikxon tø kya'kxy, jøts ja ajkx tu'uk tø yikjingtoni, jøts tsapkaaky abiky. ¹⁰ Winets øøts xnimaay ja nwindson'ajtim Jesús:

—Yikmendi tu'uk majtsk ajkx midi ixjanim tø xjuutti.

¹¹ Jøts ja Simón Pedro pyejty jam barkijotp jøts ja tjidøjtpidsimy ja ta'ajkmajk, janch ujts abøki tum ja møjaty ajkx, tukmagø'pxy ja wixijkmxyaktigøøk; jøts nika'ap ja xuumy yjapøøjty øy idø'on ja tyimyjajadine'eni. ¹² Jøts ja nwindson'ajtim Jesús wyaañ:

—Men m'ajop'atti.

Jøts ja pabøjkpitøjk ni tu'ugin ja sa kyawa'andi pøni pøn idø'on ja', pø tøxi ja wyinaty tñijawidi jøts ku ja yja'aji ja nwindson'ajtim. ¹³ Winets ja nwindson'ajtim Jesús ja wingon ñimejnidøø, jøts ja tñaxajyit'ñ ja tsapkaaky, jøts ja ojts myø'oyidi møøt ja ajkx.

¹⁴ Ya'at idø'on møøt myidigøøk ojk yjaty ku ja nwindson'ajtim Jesús ñanky'ijxyi mā ja pyabøjkpitøjk jam, ku ja wyinaty tø yjujkyiky jadigojk.

Ku Jesús møøt ñagyajpxyi ja Simón Pedro

¹⁵ Xjats ku ja y'ajop'ajt'abajtidøø, winets ja nwindson'ajtim Jesús tñimaay ja Simón Pedro midi ja Jonás myajnkjip:

—Simón, ¿xtsojky øts jawaani sam øts ya'at xtsoktin?

Jøts ja Pedro ja t'adsøoy:

—Ndsøjkpy me nwindson'ajtim, wa'ats mets ja xñijawi jøts ku me ndsøky.

Winets ja nwindson'ajtim Jesús ja ñimaajyøø:

—Winets ø xnøø'møøjyit xuu'møøjyit ja nbabøjkpitøjk.

¹⁶ Jøts ja mimajtsk ojk kujk yiktiiyiky ja Jonás myajnk, yide'en ja yiknimaay:

—Simón, ¿xtsojky øts?

Jøts ja Pedro ja t'adsøoy:

—Ndsøjkpy nwindson'ajtim, wa'ats mets ja xñijawi.

Jøts ja ojts ñii'mxyi ja nwindson'ajtim Jesús:

—Winets ø xnøø'møøjyit xuu'møøjyit ja nja'.

¹⁷ Jøts ja midigøøk ojk yiknimaay ja Jonás myajnk:

—Simón, ¿xtsojky øts?

Winetnimts ja Pedro yjotmay'oo'kpijky, ku ja midigøøk ojk yide'en yiktøøji ja nwindson'ajtim pøni chøjkpy ja', jøts ja tñimaay:

—Windsøn'ajtim, mets tuki'iyi mñija'wip. Mñija'wipxi wa'ats jøts ku ndsøky.

Jøts ja nwindson'ajtim Jesús wyaañ, jøts ja ñimaajyøø:

—Mets ndanipijky amuum, jøts xnøø'møøjyit xuu'møøjyit ja nbabøjkpitøjk. ¹⁸ Janch idø'on nnøjmi, jøts ku y'ijty mjaak'una'jk'atynim, yikxon y'ijty mjaaknaxøxyi jøts mñijky pøni mā køøm xtsøky; kuts ja møjaa'y'ajtin xpatnit, jøts mxajtøønit, wyenkpits mets ja mwet mmo'ojyiyip jøts ja myiknøjkxit mā me ka'ap mjanøjkxwa'añ.

¹⁹ Ku ja nwindson'ajtim Jesús jade'en wyaañ, ja' idø'on ja yjatijpy sa ja Pedro ja o'jkin tpaatt ku yikøyakt, jøts ja Dios jade'en yikmøjawit yikunuu'kxyjawit. Jøts ja ojts ñii'mxyi:

—¡Paduujnik øts yø nja', kidi øts xmajtstu'uty!

Ja Jesús pyabøjkpi midí janchminamyaajyí

²⁰ Xjats ku ja Pedro y'ejxjimbijty, jøts ja ojts t'ixy jøts ku øts nbamiñ midí ja nwindsøn'ajtim Jesús janchminamyaajyí. Øts ja nwindsøn'ajtim Jesús jam wyinaty nbutsinaapy ku øøts wyinaty xøøøjty n'a'ux'aty, jøts øts wyinaty nwindsøn'ajtim n'amidøøy: "Windsøn'ajtim, ¿pøn idø'on mga'ødyunwajñip?"
²¹ Jøts ku dø'on ja Pedro ja ojts y'ijxyi, winets ja Pedro tñimaay ja nwindsøn'ajtim Jesús:

—Windsøn'ajtim, jøts yø', ¿sats yø yjatt?

²² Jøts ja nwindsøn'ajtim Jesús ja ojts yide'en y'adsøyi:

—¿Ti mets yø xunk'aty, njadyimyjayikjujky'aty øts yø' nay jaa ku ø nme'ent jadigojk? Tujnik øts yø nja' tu'ugyi.

²³ Xjats ja ayuujk yøøgyøjy, jøts ja jade'en tñimadow'atti pøn jaty ja nwindsøn'ajtim Jesús yja' pabøjkpi, jøts ku ja'abi pabøjkpi ka' y'ookt. Ka-jade'enípts ja nwindsøn'ajtim Jesús wyinaty tø tñøjmi ja Pedro jøts ku ja'abi pabøjkpi ka' y'ookt, pø yide'enxi ja wyaañ jøts ku ka' ttunk'attit pøni sa ja yjatt.

²⁴ Øts idø'on Juan, midí'its idø'on ya'at ayuujk njaadyampy, pø tñy janchxi dø'on yø'. N'ejx nñija'wiyiñ øøts ku jade'en yjajty.

²⁵ Jaanim yø may ti jaty ja nwindsøn'ajtim Jesús tyuun, ku ja jeexyí jade'en tø tyimykja'ay piy køñ, mayts nøky jeexyí chøkyi jøts yikjaagyøxt sam yjajty kyubejty. Jade'en idø'on ja yjajty.

SA CHINAADYI JA JESÚS KYUDANAABYI

Ku ja Dios Teety ttamiwandaagi ja naxwii'ñit jaa'y ja Espíritu Santo

¹ Migu'uk Teófilo, ja nøky midí øts ojts nja'ay mijawyeen, ja' øts jap nguja'ayigyøjx ti jaty Jesús tyuun ku ja tpadøjkiyi'ñ ja tyunk, sa jaty ja tyik'ixpijky ² kunim ja chajpajtni. Ku ja wyinaty ka'aním ñijky jap tsajpjøtpy, winets ja jawyeen twiwejtskijxy twigongijxy ja jaa'y pøn idø'on ja wyinaty nadyagugaxwajniyip, ojts ja tkajpxwijy sa jaty idø'on ja y'adø'østít ku ja tyu'undít, Espíritu Santo ja ja'gyujkin ja møøjyidi. ³ Xjats ku ja Jesús wyinaty tø yja'oo'kni, ojts ja tpaaty ja kyudanaabyi jadigojk jade'eñim sayim idø'on ja yjaa'y'atyin, wixijkyxøøw ja jam ñanky'ejiyøø, jøts ja jade'en wa'ats ttuk'ixy ja tiy'ajtin ja kyudanaabyi ku ja ejtp yjujky'aty; jade'en idø'on ja jam ttukmadoogijxy ja kyudanaabyi sa jaty ja y'eji tyiyi, ja Dios kyutujk midí ja tyanitanaapy ja yjaa'y.

⁴ Ku dø'on ja jade'en tjaakmøøtsinaay ja kyudanaabyi jøts ja t'ane'ljmy jøts ja ka'ap ñøjkxtit ma ja kajp txøøwi Jerusalén. Yide'en ja tnimaay:

—M'awejxtip idø'on ja' midí øts nDeety tø mdamiwanda'agyidi, midí kawinaak ojk meets tø ndamimadya'aky. ⁵ Janch idø'on ja' ku ja Juan ttuktanøbejty ja nøø, jøts tsojk meets nøjcx nduktatøkidi ja Espíritu Santo.

Ku ja Jesús chajpejty

⁶ Xjats ku ja pyabøjkpitøjk jam wyinaty tø tminabyaadyidi ja wyindsøn, winets ja tyiktøødøø jøts ja tnimaadyøø:

—Windsøn, zyamnim inet ja Israelit kajp xmo'ot jøts ja kø'øm jadigojk ñay'ana'amiyidit, jøts ja kø'øm ñankyutujkxiyidit pøni ti ja kø'øm tyunwandip?

⁷ Xjats ja Jesús y'adsøø y jøts ja wyaañ:

—Ka' meets ja mbaat'aty; jøts meets ja xnijawit pøni juuni ja Dios Teety jade'en y'adø'østít, pøni ti xøøw pøni ti po' ja jade'en ttunwa'ant. Ja' ja tu'ugy; tnija'wip, jøts ja' tu'ugyi tmøøt'ajtp ja møk'ajtin jøts ja jade'en ttu'unt.

⁸ Ku meets ja Espíritu Santo wyinaty tø mnimiñi, winets meets ja nøjcx jaty; mmø'øyi ja møk'ajtin jøts øts xniga'ama'adyit jawyeen jam Jerusalén, nayide'enmi tuki'iyi wine'enin jam chøønidi Judeit etjotp, sam nayide'en jam Samariit etjotp, winetnimts øts xniga'ama'adyit ømyadsowi mabaat naxwii'ñit y'øjx y'oojck.

⁹ Tø ja Jesús wyinaty jade'en wya'añ, wa'ats idø'on ja pyabøjkpitøjk ja wyinaty ixjam y'lijxy ku ja chajpejty; jøts ja jadi'iñi yoots yik'adigø'øñiyøø, jøts ja pyabøjkpitøjk ja jade'en nimā kya'uk'eixpajtniyøø. ¹⁰ Ixjam idø'on ja wyinaty øy pyat'ejxti ku ja Jesús jade'en chajpejty, winets yaa'dyøjk namajtsk adsu'jky kyaxø'ktøø ma ja jam wyinaty, ankilis ja'adi, jøts tumboop wet ja wyet'ajttip, ¹¹ xjats ja yide'en ñimaajyidøø:

—Meets Galile'it jaa'dyi, ¿tiku yø tsajp jade'en xpat'ejxti? Tøxi x'ejxti ku ja Jesús tø pyatøki jap tsajpjøtpy, ¿kidi? Nayide'en ja nøjcx jadigojk myiñ sa ja tø pyatøki tsajpjøtpy.

Ku ja Matías yikpiktaajky jøts ja tkudanit ja Judas oo'kpi

¹² Xjats ja jam kojpkøjxp choo'ndøø midí txøøw'ajtp Olivos, jøts ja ojts ñøjkxti Jerusalén, jade'enin ja ojts tniyø'øyidi waani sa ja yø'ødyi ku ja poo'kxin xøøw tpaaty. ¹³ Xjats ku dø'on ja jam yja'ttøø kajpjotp, winets ja

kyøxpajttøø jap nipatøkijxpy mā ja Pedro jam wyinaty tø yja'ta'akti møøt ja Jacobo, møøt ja Juan, møøt ja Andrés, møøt ja Felipe, møøt ja Tomás, møøt ja Bartolomé, møøt ja Mateo, jøts møøt ja yjadu'ukpi Jacobo pøn ja Alfeo y'u'nk'ajtpy, jøts møøt ja Simón zelote, jøts nayide'en møøt ja Jacobo y'uch Judas. ¹⁴ Niduki'iyi dø'øn ja jam jade'en xyiminamyukyidi jøts ja Dios'ajot'ajtmukti jøts ja wyinmaa'ñ ja tu'ugyi tyik'etti møøt ja Jesús myigu'ukti, møøt ja María midì ja tyaa'k'ajtpy, jøts møøt nayide'en winaa'gin ja tø'øxyøjkti, jade'en idø'øn ja jam wyinaty xyimidios'ajot'ajtmukti.

¹⁵ Xjats idø'øn ja Pedro winet'et tyanaagyukyiyi'ñ jam jaa'y agujkp pøn tjanchja'widip ja Jesús, jam idø'øn ja jaa'y wyinaty nimagø'pxy ja ee'pxindi, jøts ja Pedro jade'en kyajpxwa'kxy:

¹⁶ —Meets migu'uktøjkti, tø dø'øn ja jade'en yjanchjaty sã ja Dios kya-jpxy wya'añ, ku ja Espiritu Santo jap jade'en kø'øm wyaañ, midì ja David kyajpxna'jx ku ja ojts tñimadya'aky ja Judas, ja' pøn tuu'waaw ja jaa'y jøts yikmatst ja Jesús. ¹⁷ Øøts idø'øn nmigu'uk ja' ja Judas pøn idø'øn jade'en adøøjts, nayi ya'atpi tunk ja y'ijty tyumpy midì øø ndumpy. ¹⁸ Xjats ja ñøjkxnaã jøts ja ojts tjuy na'ajx, ja meeñ ja tyagujuuy midì ja ojts yiktamijuy ku ja Jesús ja jade'en tkøy'ajky; jøts ja nay jam kyidaay, winets ja kø'øm ña'ñajtskuwojpiyøø, jøts yjoøjt ja ky'i'jch jøts ja tyi'inch pyidsømgijxy. ¹⁹ Xjats ja jaa'y ja jade'en tñija'widøø pøn jam wyinaty tsinaadyip Jerusalén, winets ja tyikxøbajttøø ja na'ajx Acéldama, midì tyijpy Ni'jpkym, jade'en ja ttejtì ku kyø'øm ayuujk ja tkajpxti. ²⁰ Jøts ja David yide'en jap ja nøky tyikwa'añ mā ja Salmos jap yikuja'ayi:

Wan ja tyøjk abak ttañ,

wan jap pøn tkidyimchøøni.

Wan tmajtstu'uty tyunk jøts jadu'uk ja jaa'y tyøkit tumbi.

²¹ 'Paty øøts ya'at jaa'y nidu'ugin nyiktunwa'añ pøn øøts jeky tø xpawidity, wine'en øøts ja nwindson'ajtim ya tø x'at-smøøtsøøni, ²² jaayip øøts yø jade'en xmøøtwidity ku nwindson'ajtim ja Juan ojts yiknøbetyi, kunim ja tø pyatøki jap tsajpjøtpy. Paty øøts ya'at jaa'y nidu'ugin ndsøky, jøts øøts yø møøt ngajpwa'kxt ku ja nwindson'ajtim tø pyidsimy jadigojk jap oo'kpi jutjøtpy.

²³ Ku ja Pedro jade'en wyaañ, xjats ja twi'ejxtøø nama'jtsk ja jaa'y pøn ja nidu'ugin pyikta'akwandip: ja José ojts yikwiwich pøn tigøøk ja xyøøw, Barsabás ja yiktijy jøts nayi yiktejp Justo, ja Matías ja ojts møøt yikwiwich.

²⁴ Xjats ja jaa'y yide'en t'ajot'attøø ja Dios U'nk:

—Nwindson'ajtim Jesucristo, mets mnija'wip sã jaty pøn jadu'uk jadu'uk wyinmay, yø jaa'y ixa øøts tø nwiwich nama'jtsk, tunkija'wik øøts pøni pøn me mdsøjkpy, ²⁵ wan ja tunk ttuñ midì ja Judas tø tmajtstu'uty, ja'agøjxp ku tø pyøkytuñ jøts ja tø ñijky jap mā ja pya'at'aty.

²⁶ Winets ojts nidu'uk yikpikta'aky ja ñama'jtskpi jaa'y, ja Matías ojts tyaja'adyiyi ja tunk, winets ja ojts yiktabuwetsi ja ñimaktu'ukpi jaa'dyi pøn ja nwindson'ajtim Jesucristo tkudanaadyip.

2

Ku ja Espiritu Santo myi'ñ

¹ Ku ja Pentecostés xøøw tpaajty, tyimwyinet'et idø'øn ja Jesús kyudanaabyi wyinaty niduki'iyi tø ñamyukyidi jap tøk'jøtpy ² ku adsu'jky tmadoodøø jøts ku y'amuy jade'en sam ku møk pyøjyin, japts tsajpjøtpy chøøñ, jøts ja tøk jam amuum ñojkta'ajky mā ja jam wyinaty tø ñamyukyidi. ³ Winets ja

jade'en t'ejxpatti ejxim ja jøøn yowin, tu'uk tu'uk idø'øn ja jade'en tmøøt'atti kyubajkp. Ja tu'ukpi jøøn idø'øn wyinaty tø ñawya'kxyi. ⁴ Xjats ja niduki'yiyi tyatøjkiyidøø ja Espiritu Santo, jøts wenk ayuujk ja jatyi tkajpxtøø sà jatyi ja pøngapøn yik'lawijyi ja Espiritu Santo.

⁵ Jamts idø'øn wyinet'et ja jaa'y wyinatyøø jam Jerusalén pøn nayi israelit jaa'dyi, ja ku abikyajp chinaañidi, ka'ap ja jam wyinaty y'ukugajp'ajtnidi.

⁶ Ku ja jade'en tmadoodøø y'amuy kyida'aky, winets ja t'anøjxxidøø mǎ ja tmadoodøø y'amuy, kuts jam yja'ttøø, ka'ap ja jam y'ukwinmaa'nbyatnidi, ja'agøjxp ku ja tmadoodøø ja y'ayuujk yikajpxti, pøni sà jatyi ja nidu'uk nidu'uk t'ayuujk'atti. (Jade'en ja kyajpxwǎ'kxtøø ja jaa'y pøn tjanchja'widip ja nwindson'ajtm Jesucristo.) ⁷ Xjats ja jadi'iñi myondi y'oookti, jøts ja xem yam nawyajnidøø:

—¿Ti kidi ja Galile'itjaa'yip ya'atti ixa jade'en kyajpxti? ⁸ ¿Sudso yø jade'en tkajpxti yø ayuujk mididi adøm nidu'uk jatyi ngajpxyindip, sà jatyi pøngapøn ja y'ayuujk tø t'aniweji? ⁹ Ixa ja jaa'y ixyamdi pøn kugajp'ajttip jam Partia, jam Media, jam Elam, mǎ Mesopotamia, jam Judea, jam Capadocia, jam Ponto, jam Asia, ¹⁰ jam Frigia, jam Panfilia, jam Egipto, mǎ jatyi kajp jam Africa, jambaat yø kyugajpidi jam Cirenit kajp ixkø'øm. Nay jats ja romanosti pøn ya tø kya'axti, pønts ya tø yjagaka'axti tø ja israelit jaa'y ja chinaa'yin tpadøjkiñidi. ¹¹ Nay jaa ja jaa'y ya tø yja'atti mididi tsoo'ndip jam Creta, jam Arabia; niduki'yiyi yø jade'en tø nmadøø'yindi ku yø tnigajpxti tñimadya'akti ja Dios myøk'ajtm, jøts jade'en xmigajpxyindi sà adøm n'ayuujk nidu'uk nidu'uk.

¹² Jade'en ja nawyajnidøø, nigyumaap idø'øn tyimya'widøø, jadi'iñi ja kya'ukwinmaa'nbyatnidi xjats ja xem yam ñañimaajyidøø ti dø'øn tuujnip.

¹³ Jamts ja jaa'y jadu'ukti pøn ttaxektip, yide'en ja ñawyaa'miyidi:

—Mujkidip yø jaa'y, paty yø jade'en y'amuygyikajpxti.

Ku ja Pedro ojts kyajpxy jam mayjaa'y agujkp

¹⁴ Ku dø'øn ja jaa'y jade'en ñawyajnidøø, winets ja Pedro wya'kukidøø møøt ja ñimaktu'ukpi myigu'uk, jøts møk'ampy tmigajpxy ja mayjaa'y, jøts tnøjmi:

—Meets Judeit jaa'dyi, jøts nayide'en niduki'yiyi pøn jatyi ya tsinaadyip Jerusalén, ukja'gyukidi yikxon mididi øts ixyam nnigajpxwampy. ¹⁵ Ka'ap øøts nmu'ugyi sà meets nugo mjawinmay, nipøn jøpyi kyamu'ugyi, apeni xøøw ixa pyetynim. ¹⁶ Jajtp idø'øn ixyam jade'en sam ja Dios Teety tñimaay ja kyugajpxy, pøn txøøw'ajt Joel, ku ja jade'en wyaañ:

¹⁷ Ku wyinaty ja naxwii'ñit tyigatswani,

winets øts ja'abi xøøw møk'ampy ja naxwii'ñit jaa'y nduktatøkit ja n'Espiritu Santo ømyagajpi;

nyikugajpxy'atp øts ja mutskuna'jktøjkti,

jøts ndukwinguma'ap øts ja wajtyøjkti kiixy'iidi sà wyinaty yjatwa'añ ya naxwiiñ,

jøts nayi xwinguma'adip øts ja møjaa'dyøjkti.

¹⁸ Xjats øts nay ja'abi xøøw møk'ampy nøjxx nduktatøkidi ja n'Espiritu Santo ja'abi dø'øndi, pøn øts nja' wyinaty amumjoojt xpadunwajniyidip, ja'ats øts n'ayuujk nøjxx møk'ampy xkajpxwǎ'kxyiyidip, øy ja yjaya'a'dyøjki øy ja yjatø'øxyøjki.

¹⁹ Nanky'ejxip øts jam tsajpwemp ja nmilagri'ajtm,

jøts nayide'en ya naxwiiñ nnanky'ejxiktu ja ni'jpyi yø'øty, jøts ja jøøn mye'ent, winets yjokta'atst.

²⁰ Jøts ja xøøw y'oookt, jøts ja po' ni'jpyin kyaxø'økt,

ku d0'0n jade'en yjatt winets 0 nme'ent, p0 0tsxi mee xwinds0n'ajtp, j0ts nyikjatt ja x00w sam nijuuni xka'ejxtinim.

²¹ J0ts niduki'i'yi p0ni p0n jaty 0 xminuu'kxakp, ja'ats 0 nyiknitso'ok'attip.

Jade'en ja Joel ja Dios kyajpxy y'ayuujk tyiknajx00.

Xjats ja Pedro yide'en tjaaknimaay ja myigu'uk:

²² —Jaak'ukmadowdi meets Israelit jaa'y midu'0ts njaaknigajpxwampy: Ja Jes0s Nazaretin jaa'y, t0 ja Dios Teety ja my0k'ajtin my0'0yi, j0ts janch tsuj janch m0j ja milagri ttuñ, j0ts may ja ejxa'añ jade'en mm0'0yidi Dios Teety my0k'ajting0jxp, paty xnijawidit ku ja Dios Teety m00t y'ity. ²³ Xjats ku meets ojts myik0m0'0y, ti nduu'nimp, t0 yjaty kyubety tuki'i'yi p0ni sa ja Dios Teety k00m tpiktaajky jekyip, j0ts nay ja' meets ojts xmach j0ts xtsumd00 xiidy00, j0ts ja ka'0ybi jaa'y xukyik'ookti jam krusk0jxp. ²⁴ Xjats ja Dios Teety ojts jadigojk tyikjujkyiky, j0ts tyik'awa'atpidsiim jap oo'kpi jutj0tppy; ja'ag0jxp ku ka' pyaat'aty j0ts ja o'jkin xemik0jxp tkup0kt. ²⁵ Yide'en ja rey David ojts ja Dios Teety yikugajpxy'aty sa ja Jes0s kyajpxy y'ayuujk:

Mets Teety, ejtp me m00t njujuky'aty m'aga'ngy0'ampy;

j0ts ka'ap 0ts p0n x'ads0'0git.

²⁶ Paty 0ts n'anmija'win janch jotkujk nnayjawi'y, j0ts 0ts ja nxondaajkin jade'en nnigajpxy.

0y n'ookt, ka' ti jotmay njagyapt;

²⁷ ja'ag0jxp ku mets ka'ap ja n'anmija'win xyikta'ant ma oo'kpi yja' tyandi,

j0ts nika'ap 0ts nnine'kx xyikwindig00jyiyit, p0 0tsxi me xts0ky'ajtp.

²⁸ T0 0ts xuknijawi ku njujukpy0kt jadigojk ku wyinaty t0 n'00ky,

j0ts nayide'en xyikxonjatt ku mets xemik0jxp nm00'tett.

Jade'en ja David tyiknaajx ja Jes0s kyajpxy.

Xjats ja Pedro tjaaknimaay yide'en ja myigu'uk:

²⁹ —Migu'ukt0jkti, wa'ats yiknijawi ku ad0m n'apteety'am0j David ojts y'00ky j0ts ñax0kiyii'ñ, nay ja n'ijxyindi ma ja yjut ma ojts ñax0ki. ³⁰ Ja David, ja' Dios kugajpxy'ajtiy00 j0ts ñija'wip sa wyinaty ja Dios m0k wyanda'aky, ku wyinaty tu'uk y'ap yikpikta'aky yiknitsokpi ya ñaxwiiñ, j0ts nayide'en yikutukt sami David kyutujkin. ³¹ Jade'en id0'0n ja David jekyip tñijawi, j0ts jade'en tñigajpxy ku ja Cristo yujukpy0kojmit j0ts ni ja ñine'kx kyawindig0'0ty.

³² P0n ja David ñigajpx ñimadyaajk, ja Jes0s id0'0n ja', ja' id0'0n ja Dios Teety t0 yikjujkyiky, p0 t0xi 00ts ja wa'ats n'ixy, p0 t0xi 00ts ja wa'ats nnijawi. ³³ J0ts ja Dios Teety ja nayide'en yiktsajpajt00 j0ts pyiktaajk00 y'aga'ngy0'ampy, j0ts jade'en ja m0j kutujk my0'0yiyi; j0ts ja' tkajxp ja Espiritu Santo ya ñaxwiiñ midu'0ts ja Dios Teety wyinaty k00m t0 twanda'aky, j0ts ja' id0'0n ja my0k'ajtin y0' midu'0ts ixa m'ejxtip mmadoodip. ³⁴ P0 kidi ja Davidipxi k00m tsajpajt, ja'ayi ku David ojts yide'en wya'añ ku ja nwinds0n'ajtim Jes0s ja Dios Teety yide'en ñimaajyiyi:

“Ixa'ak, j0ts 0 xputs00nit n'aga'ñ'ampy,

³⁵ j0ts 0ts y0 mmidsep nmimajada'0xt.”

³⁶ Meets Israelit jaa'y kuwani niduki'i'yi ka'pxy xnijawidit, j0ts ku ja Jes0s p0n meets k00m mdukyikruspajt ja abiky jaa'y, ja' y0' p0n ja Dios ixyam t0 k00m tpikta'aky m0j winds0n j0ts yiknitsokpi.

³⁷ Ku d0'0n jade'en tmadowdi ja Pedro kyajpxy, winets ja jotmay tyat0jkiyid00, xjats ja Pedro yiknimaay m00t ja ñimaktu'ukpi myigu'uk:

—Migu'ukt0jkti, 0suds0'ampy 00 ndu'unt?

³⁸ Xjats ja Pedro t'adsojimbijty j0ts tñimaay:

—Yø mbøktyu'unin mmajstustu'ttip, jøts mnøbattit nidu'uk jaty Jesús xyøøgøjxp, jøts jade'en myikpojkipimaa'kxtit; jøts nayide'en ja Dios Teety mduktatøkiyidit ja y'Espiritu Santo. ³⁹ Meets m'ø'y'ajtin yø', møøt m'u'nk møøt m'una'jkti, jøts nayide'en pøn jaty jagam tsinaadyip; uk niduki'iyits ja'adi pøni pøn jaty ja Dios Teety kø'øm wyiwetswampy.

⁴⁰ Yide'en idø'øn ja Pedro ojts tkajpxwijy ja jaa'y, jøts tnimaay:

—Majstustu'tti yø'øbi jaa'y pøn ja nwindson'ajtim Dios yja' tkajanchja'widip.

⁴¹ Xjats ku ja Pedro jade'en tnimaay, winets ja jaa'y ñøjkxtøø nøbajtpi pøn jaty tmibøjktøø ja Pedro y'ayuujk; ja'abi xøøwts ja Jesús yja' ojts ñamayididigøøk mil. ⁴² Niduknax idø'øn ja t'ixpøkti sã ja Jesús kyudanaabyi y'awa'andi, jotkujk idø'øn ja jam tu'ugyi chøøni, jøts ku ñamyukyidi dios'ajot'ajtpi, jøts ja tsapkaaky tkaydi Jesús y'oo'kingøjxp.

Sã chinaadyi ja myijawyembi ja Jesús janchja'wibidi

⁴³ Xjats ja jaa'y ñigyumaap idø'øn ja tja'widøø ku ja Jesús kyudanaabyi ja mamylagri tnan'ky'ixyidi. ⁴⁴ Tu'ugyi ja wyinmaa'ñ ja tyik'etti pøn jaty ja Jesús yja' tpabøkiyip jøts ñadyagumayidi ja pyikta'aky; ⁴⁵ jøts ttookti pøni ti jaty pøn myøøt'ajtpy, xjats jade'en ja nimeeñ tyikwa'kxidøø pøni sã jadu'uk jadu'uk yja' kya'ity. ⁴⁶ Jabom jabom idø'øn ja jap ñamyukyidi møj tsaptøjkjotp, jøts nayide'en awingujk tøjkjotpy, jøts ja chapkaaky jap tyikwa'kxti, jøts jade'en ejtni xoni kyaydi, jøts jade'en nipøn kyanamyøjpikta'agyiyi. ⁴⁷ Jøts ja Dios Teety jade'en tjanchkajxa'akti jøts ja kajp jaa'y jade'en yjanchøkyidi; jabom jabom idø'øn ja nwindson'ajtim Jesús tyikmayi ja yja' pøn jaty yikpojkipimaa'kxtit.

3

Ku ja pakma'at jaa'y choknaa

¹ Tuk'ojk idø'øn ja Pedro ojts tmøøtnijky ja Juan jam tsaptøjkjotp, wyinaky xøøw ja ñøjktøø wine'enin ja jaa'y jam wyinaty xyuminamyukyidøø dios'ajot'ajtpi. ² Jamts idø'øn wyinaty tu'uk ja jaa'y pøn ja tyeky ma'at. Ejtp idø'øn ja jam xyumiykwaanijky jam tsaptøjk agø'øm mã ja tsaptøjk'aaaw jam midit xøøw'ajtp Hermosa. Jamts ja myigu'uk yiktaajniyi, jøts ja jam yiklimunsimuky ku jam pøn tyøki tsaptøjkjotp. ³ Xjats ku ja pakma'at jaa'y ojts t'ejxpaaty ja Pedro møøt ja Juan, ku ja jam wyinaty tyøkiywa'andi tsaptøjkjotp, winets ja t'amidøøy ja limunsi. ⁴ Xjats ja Pedro møøt ja Juan twin'ejxjø'øktøø ja pakma'at jaa'y, jøts ja Pedro wyaañ:

—Win'ejxk øøts.

⁵ Xjats ja jaa'y yjanch'ejxji'jky, yide'en ja wyinmaay, yikmo'op idø'øn ja tijy øy ti yiin waan. ⁶ Winets Pedro ja ñimaajyøø:

—Kidi meenip øø nmawidijtpy, ja'abi øø ndumpy midit øø xukmiwidejtp ja nwindson'ajtim Jesús pøn ojts chøøni jam Nazaret, pidø'kni jøts myø'øñit.

⁷ Xjats ja Pedro ja jaa'y tmajch y'aga'ngyø'køjxp jøts ja twejtsji'jky, ja'ay ja jade'en ttuun winets ja tyeky ja jatyi wya'kmøkiyi'ñ, jatyi tyekyo'kt ja myøpikjy. ⁸ Xjats ja pakma'at jaa'y jade'en kanimøjaaw yjanchwo'onji'jky, jøts ja tyanaagyukyiyi'ñ, jatyi ja ojts yø'øyji'iky. Xjats ja tmøøtøjkidøø jap tsaptøjkjotpy, ñiyukwo'oni ñichajpwo'oni ja jap t'ajot'aty ja Dios. ⁹ Niduki'iyi jaa'y ja ojts t'ejxti ku ja pakma'at jaa'y jade'en yø'øy, jøts ku ja jade'en tjanchtukmøjawi tjanchtukunuu'kxyjawi ja Dios. ¹⁰ Xjats ja ñigyumaap tyimya'widøø pø mã ja tyimñayja'widøø ku dø'øn jade'en wyinaty tø yjaty. Ja'widip tsø'jkidip idø'øn ja jamdi, kumi ñija'widip ja wyinaty ku ja yja'aji pøn

jam wyinaty xumiyikmujkp jam tsaptøjk agø'øm, ma ja tsaptøjk'aaw jam midi txøøw'ajtp Hermosa.

Ku ja Pedro kyajpxwa'kxy jam møj tsaptøjk agø'øm midi yiktejp Salomón Tyøjkweenk

¹¹ Ja pakma'at jaa'y pøn idø'øn wyinaty tø myøkpiiky, ka'ap ja t'ukmajstutni ja Pedro jøts ja Juan, winets ja jaa'y pyujtmendøø ma dø'øn ja jam wyinaty, jadi'iñi ja myondi tyukti paty ja jam myendi tsaptøjk agø'øm midi txøøw'ajtp Salomón Tyøjkweenk. ¹² Xjats ku ja Pedro jade'en ojts t'ixy ja jaa'y, winets ja tnimaay:

—Israelit jaa'dyi, ztiku ñigyyumaap xjawidi? zTiku øø xwin'ixy, yide'en meets idø'øn yjawi mwani, øøts idø'øn yø xijy kø'øm møk'ajtin tø nduktatsø'øky yø jaa'y ku yø tø yø'obyiky, uk ja' øøts idø'øn yø xijy tø nduktatsø'øky ku øøts ja Dios janchtsuj n'ajot'aty? ¹³ Ka'ap yjade'eni, ja Dios Teety jade'en tø tmø'øy møk'ajtin ja y'U'nk Jesús, ja Dios Teety pøn adøm n'apteety'amøj Abraham Dios'ajttip, møøt n'apteety'amøj Isaac, jøts nayide'en møøt ja Jacobo. Ja' y'U'nk ja myøk'ajtin jade'en tmøøt'ajtp, ja Jesús pøn ja Dios Teety y'U'nk'ajtpy, ja' pøn meets mgø'ayjk jam yikutujkpi wyindum. Jøts ku ja Pilato ja wyinaty tjamajstutu'utwa'añ, ka'ats meets ja xnankyikpidsøjmi. ¹⁴ Ja' mee ne'egi myik'awa'atspidsøøm pøn wyinaty tø tyundigøy, jøts meets ja ka'ap xnankmyajstuujtøø pøn wa'ats, pøn katundigøøpy niwine'enin. ¹⁵ Jade'ents meets ja xyik'ø'jky ja yikjujky'ajtpi. Jøts tø Dios ja jadigojk yikpidi'igy ja' o'kpi jutjøtpy, tø øøts idø'øn ja jade'en ndyimybyaaty ndyimy'ixy, øøts idø'øn ñamyayi nøjkxp testigi. ¹⁶ Ja' idø'øn yø jaa'y jade'en tø yikmøkpiiky ku yø tø t'ajot'aty, ku yø tø tmø'jpkta'aky ja Jesús. M'ijxy'ajttip mnija'widip yø pakma'at jaa'y jøts ku tø yikmøkpiiky, jøts ixa dø'øn jade'en x'ejxti møk møjjaaw.

¹⁷ 'Migu'uktøjkti, wa'ats øts ja nnijawi ku meets ja mwindsøn møøt mnabyudø'jkiydøø, jøts meets ja Jesús xyik'oo'ktøø, nugo ja jade'en xundøø, nø xkanijawi meets ja' pø tigøjxp jade'en m'adøstøø. Ka'ap meets ja xnijawi pø tidam meets idø'øn mjatumpy. ¹⁸ Xjats ja Dios tø tjanchyik'aduky ja wyanda'aky ku myagyajpxnaxpi ja tyikwaañ: jøts ku ja yiknitso'kpi wyinaty jade'en y'ayo'ombaatwa'añ. ¹⁹ Paty mbøkyu'unin xmajstutu'ttit xyiktigatstit ja mdsinaa'yin, ja'myatsti ja Dios Teety jøts ja tyakt ja øxyøøw ja øyjumøjt, ²⁰ jøts ja tkaxt ja Jesús pøn ja wyinaty jekyip tø ttanibiktaagi jøts adøm ja xyiknitso'ok'ajttindit. ²¹ Øy idø'øn ja Jesús ixyam ndejint tø yjataan jap tsajpjøtpy, jaanin ku ja Dios Teety ja kø'øm tyik'øyigyøxt pøni ti dø'øn ja tyunwampin, jade'en sa ja myagyugajpxy ja kø'øm t'agajpxiyi'ñ ku ja jade'en wyandøø pøn jaty tsinaadyøø jekyip. ²² Jade'en adøm n'apteety'amøj ojts yiknimaa'yindi ku Moisés ja ojts ñii'mxyidi: “Mdanigaxidip ja Dios Teety tu'uk ja kugajpxy, meets mgø'øm migu'uk nøjkx kø'øm yikpikta'aky jade'en sa ø kø'øm nyikpiktaajky. Mímado'odip idø'øn ja' pøni sa jaty ja wyinaty mni'mxyidi, ²³ pøni pøn ja wyinaty tkamimadoop, ka'ap ja t'ukmøøtsinaañidit ja myigu'uk, kuwani ja jaty wyindigø'odyit.”

²⁴ Jade'en idø'øn ja Dios kyugajpxy wyandøø, ja' idø'øn ja ñigajpxtøø sa jaty yjatt kyubatt, ti jaty tunip ya'atpi jumøjt, jaayip ja jade'en wyangaktøø ku ja Samuel jade'en jaweyen wyaañ. ²⁵ Tum meets ja Dios kyugajpxy m'u'nk'ajttip, jøts paty ja Dios ojts tpikta'aky tu'uk ja kutujk midi ja aptøjk ojts yikmo'odi, jøts meets kidi xyikwindigøy ja m'anmija'win jam Dios wyindum, yide'en idø'øn ja Abraham Dios ojts ñii'mxyi: “Tuki'iyi ja teety ja taak, ja u'nk ja unaj'k nøjkx yikunuu'kxkøxti mets m'ap mets m'unaj'kø'jxp.” ²⁶ Ku

ja Dios tyikpidsiimy jadigojk ja y'U'nk Jesús jap oo'kpi jutjòtpy, jawyeen ja ojts mdaniguexyidi jòts ja mgunuu'kxìdìt, jòts niduki'iyi xmajtstu'uttit ja mga'òdyu'unìndi.

4

Ku ja Pedro mòot ja Juan ojts twingunòjkkxidi ja kudunktòjkti

¹ Nay ixam idò'òn ja Pedro ja jaa'y wyinaty tmgajpxti mòot ja Juan, ku ja teetyòjk jam myendòò mòot ja tsaptòjk ejx'ejtpi windsòn, jòts mòot ja saduceotòjkti. ² Tò dò'òn ja wyinaty yikxon yjanch'ambòkti, ja'agòjxp ku ja Pedro mòot ja Juan tyik'ixpòkti ja jaa'y, ku ja wya'andi jòts ku oo'kpi pyidsò'òmdit jadigojk jap oo'kpi jutjòtpy, kumi tò ja Jesús wyinaty kò'òmm pyidsimy jadigojk jap oo'kpi jutjòtpy. ³ Xjats idò'òn ja ojts yikmajtsnidi jòts ja yiktsumnidòò, kyimjabomnim ja yiktiidyundòò kumi tsuu'nip wyinaty ku ja yiktsumdòò. ⁴ May jaa'y idò'òn wyinaty tò tjanchjawidi ja ògyajpxy ja òmyadya'áky, pòn jaty ja wyinaty tò tpatmadowdi; jawaani kamagoxk mil ja yikmachoopidsiimy ja yaa'dyi pòn tjanchja'widi ja nwindson'ajtim, ku ja wyinaty tò tmadowdi ja ògyajpxy ja òmyadya'áky.

⁵ Xjats ja'abi xòòw winets ja windsòndòjk ñamyujkidòò jam Jerusalén midì t'ana'amdip ja kajp, nay ojts idò'òn ja mayjaa'y jam myendòò, mòot ja kajpxwejpitòjkti midì tundip jam tsaptòjkjotp; ⁶ nay jam idò'òn ja Anás wyinatymi pòn ja teetywindsòn'ajtip mòot ja Caifás, mòot ja Juan, jòts mòot ja Alejandro, niduki'iyi ja jam wyinaty niwinò'òn ja pyaat'atyidi ja teetywindsòn'ajtk. ⁷ Xjats ja Pedro yiknajtswa'widòò mòot ja Juan, jòts ja ojts yikpiktà'akti jam agujk'am, winets ja yiktiibyòjktòò, yide'en ja ojts yiknòjmidi: —¿Pòn yò jade'en tò mdanigutujk'atyidi jòts jade'en m'adò'òsttit, pòn jade'en tò m'ane'emyidi?

⁸ Xjats ja Pedro y'adsòòy, kumi tò ja Espíritu Santo ja wyinaty amuum tyatòkiyi, jòts ja tnimaay:

—Meets windsòndòjkti, meets mòjaa'dyòjkti pòn jaty tsinaadyip ya Israel: ⁹ ku òòts idò'òn jade'en tò xyiktiy sa tò chò'òky yò pamaa'y, sa yò tò yik'òdyuñ, ¹⁰ n'adsojimbetp òòts ja m'ayuujk, nnigajpxp òòts ya mayjaa'y agujky, jòts tnijawidit niduki'iyi pòn jaty tsinaadyip ya Israel, jòts yò jaa'y ixa tyani mee mwinduujy mòk mòjaaaw. Ja nwindson'ajtim Jesucristo ja' yò tò yiktsò'ògyi pòn kugajp'ajtp jam Nazaret, ja' midì meets ojts xyikruspety, jòts ja' Dios Teety tò yikpidsimy jadigojk jap oo'kpi jutjòtpy. ¹¹ Jade'en idò'òn ja Jesús ñamyayi tò ñòjkkni ejxim ja tsaa midì meets jagam m'ixjibejp, midì mee mgayiktuun jam pòchkyòjxp, jòts ja' ixyam ne'egi tò pyidsimy jadigojk jawaani òy, midì tmach'etkòjxp tuki'iyi ja pòch'aaaw. ¹² Nipòn jadu'uk xkayiknitso'ok'ajtim sa adòm Jesús xyiknitso'ok'ajtyindi, pòn ja Dios tu'ugyi tò ttanibiktaagi ya naxwiñ.

¹³ Xjats ku ja kudunktòjk t'ejxti ja Pedro mòot ja Juan, ku ja jade'en mòk'ampy wyingugajpxiyidi, winets ja t'ejxkajptòò kudam ja kya'ixpikyidi, ku ja ñugojaa'yidi, jòts ja jade'en nugo myaydi tyajti, winets ja t'ejxkajptinim jòts kudam ja yja'adi pòn ja Jesús wyinaty tò tmòòtwidetti. ¹⁴ Jòts ja jaa'y midì wyinaty tò chò'òky, jam idò'òn ja wyinaty tmòòtanidi, paty ja kudunktòjk ka' t'ukmidsepwanidòò. ¹⁵ Xjats ja yikajxpidsòmdòò ma ja mayjaa'y jam wyinaty tò ñamyukyidi, jòts ja kudunktòjk ja agò'òmyidi tkajpx'òyidòò. ¹⁶ Yide'en ja ñawyajnidòò:

—¿Sa yò jaa'y njanchtuu'nindit? Pò tyumnija'winidipxi yò' pòn jaty ya tsinaadyip Jerusalén jòts ku yò jade'en tò tyiktuujnidi ja Dios myòk'ajtin,

¿ti jats adøm ja ngagupijkyim ku døøn ja jade'en tø yjanchjaty? ¹⁷ Wan yø tkajpx'adsø'jka'andi, jøts ja Jesús ka'ap ja yja' y'ukyikajpxyø'øñit jam mayja'a'y agujkpx.

¹⁸ Xjats ja twaadsoodøø ja Pedro møøt ja Juan, ja møk'ampy t'ana'amdøø jøts ja kidi jade'en ja jaa'y t'ukyik'ixpøjknidi, ka'ap ja jade'en t'ukajpxwa'kxinidit ja Jesús yja'. ¹⁹ Winets ja Pedro y'adsoodøø møøt ja Juan, jøts ja wyandøø:

—Ukwinmaagyukidim køøm pøni tiy tam jade'en, pøni øy tam ja Dios jade'en tjawí ku mee ne'egi myikmimado'ot, jøts ja kyayikmimado'ot. ²⁰ Nijuuni øøts ja ngamajsttu'utt midí øøts jaa'y nduk'ixpijky, kumi tø øøts ja jade'en køøm ndyimyadø, jøts kumi tø øøts ja jade'en køøm ndyimy'ixy.

²¹ Winets ja kudunktøjk ja ojts kyajpx'adsø'øgyidi jøts nigidi'iyam ja ojts tyimykmatsti, yikmajstuttøø ja jadi'iñi. Nigidi ja yikmiwinmaa'nbyajtidøø sudso ja tyik'ayo'ombaattit, kumi tsø'jkidip ja', niduki'iyi ja kajp'jaa'y wyinaty tkajxaknidi ja Dios. ²² Jade'en idøøn ja pakma'at jaa'y chøøjky, jam idøøn ja jaa'y yjumøjt ja wyinaty wixijky myajtskin pøn ja Dios yiktsoojkiyøø.

Ku ja Jesús yjanchja'wibi t'amidoodøø ja møk'ajtin

²³ Xjats ku ja Pedro møøt ja Juan y'awa'atspdømdøø, winets ja myigu'uk ja tñinøjktøø mā ja jap wyinaty, jøts ja ojts ttamimadya'akti sa jaty teetywindsøn sa jaty møjaa'dyøjkti ja wyinaty tø ñiñ'mxyidi. ²⁴ Xjats ku ja myigu'uk ja jade'en tmadoodøø, winets ja niduki'iyi ja Dios t'ajot'ajttøø:

—Kuuyi me Dios Teety jadu'uk møk'ajtin møk xmøødi. Tø xyiknajt-skøjgyixy tuki'iyi winøøn ja pikta'aky y'ity naxwiñ, wan tsajpi, wan tñajxi, wan tñøøji tmeji. Tum mets yø mja'ajtpy amuum.

²⁵ Nayi mets ja David ja Espíritu Santo mdukyik'agajpxiyi'ñ ku ja xyikwaañ yide'en:

¿Tigøjxp ku jaa'y kajp kajp nugo jotkøjxpim t'ejxti pøn ya jagagugajp'ajttip, pønts ya kugajp'ajttip, jøts yø tmidundigøøwyamidi ja nwindson'ajtim?

²⁶ Ja windsøndøjkti midí yikutujktip ya naxwiñ, ja' tø tmidsepøkti ja nwindson'ajtim, jøts ja jaa'y midí t'ana'amdip ja kajp, tø ja ñamyukyidi may'ampy, jøts ja tñibidø'kti ja Dios Teety, nayide'en ja tmidsepøkti ja yiknitsokpi midí ja Dios Teety kyejxpy.

²⁷ Jøts janch tø døøn jyaty, kumi jade'en ja Herodes møøt ja Poncio Pilato tø tñinamyukyidi ja wenk jaa'y jøts nayide'en yø israelit jaa'dyi ya møj kajpøøjty, ja' idøøn jade'en tø yikmidsepiky ja m'U'nk Jesús pøn janch tsuj janch wa'ats, pøn me køøm tø xanibiktaagi yiknitsokpi. ²⁸ Tø døøn ja jaa'y ja jade'en yjanchtuñi sa mets ja wyinaty køøm tø xanibiktaagi jøts ku ja jade'en yjatt, tøts idøøn ja jade'en jyaty. ²⁹ Dios Teety, ejx ixyam sa tkajpx'adsø'øgidi ja jaa'y, yikjotmøkpøk yø mdumbi jøts kyatsø'øgidit ku tkajpxtit ja mgajpxy ja m'ayuujk. ³⁰ Mo' møk'ajtin, mo' pudøjkin jøts tyiktso'oktit ja pamaa'y jøts tyikwingaxø'oktit ja Jesús myøk'ajtin.

³¹ Xjats ku ja chapkajpx'abajtidøø, winets ja Dios tyikmiiñ ja uyx mā ja jam wyinaty tø ñamyukyidi; xjats ja jade'en ja Espíritu Santo yikjotmøkpøjkidøø, jøts tkajpxwa'kxidøø amumjojt ja Dios kyajpxy mā jaty ja wyidejttøø.

Ku ja Jesús pyadumbitøjk amuki ja pyikta'aky tja'ajtti

³² Ja mayjaa'y midí wyinaty tø yjanchjawidi ja øgyajpxy ja ømyadya'aky, tu'ugyi ja wyinmaañidi, ka' pøn wenk wyinmay, nitu'ugin nipøn ja pyikta'aky tkaja'adijy, tyumja'ajttip idøøn ja niduknax, ka'ap ja pøn tja'aty

nadyu'uk. ³³ Jøts ja kudanaabyi jotmøk'ampy ja tnigajpxti tñimadya'akti ja nwindson'ajtim Jesucristo, sa ja pyidsiimy jadigojk jap oo'kpi jutjotpy. Dios idø'on ja yikxon pudøjkin møøjyidip. ³⁴ Jøts nipøn niti kya'ijtxyi, kumi tyoo'ktip ja ñaajx ja', kumi tyoo'ktip ja tyøjk ja' pøni pøn jaty jam ja pyikta'aky tmøøt'ajtp, jøts ja ñimeeñ ja tyikmenidi, ³⁵ jøts ja ttagødøkidi ja kudanaabyitøjk. Ja'ats ja tyikwa'kxtip, jøts ja ttagamaydi pøni pøn jam tigati ka'ejtxyip. ³⁶ Jamts idø'on wyinaty tu'uk ja israelit jaa'y pøn ja Levi y'apteety'amøjip, José dø'on ja xyøøw, jam ja wyinaty tø kye'exy ma ja naajx jam møj mejyotp miditøøw'ajtp Chipre. Ja'abi jaa'y ja kudanaabyitøjk yikxødigatstøø, jøts ttejtøø Bernabé miditøø kajpxjot'amøjkibi; ³⁷ ja'ats idø'on tto'jk ja ñaajx jøts ja tyikmiñ ja naxtsow, jøts ja ttagødøjkii'ñ ja nwindson'ajtim kyudanaabyi.

5

Ku ja Ananías jøts ja Safira tmidundigøødyøø ja Espiritu Santo

¹ Jamts idø'on wyinaty jadu'uk ja jaa'y pøn txøøw'ajtp Ananías, jøts ja ñidøøxy Safira txøøwi, ja'ats idø'on tto'ktøø ja ñaajx tukam. ² Xjats ja kujkwa'kxy tmidanidøø naxtsow, jøts ja ojts kujkwa'kxy ttaninijky ja kudanaabyitøjk, jade'en ja ttanikajpxy jøts ku ja jam ka'pxy, ka'ap ja jade'en ttukmadøw, wa'ats ñidøøxy ja møøt tñijawi ku ja jade'en y'adøøtsti. ³ Xjats ja Pedro tñimaay ja yaa'y:

—Ananías, ¿tiku mik'u tø mdatøkiyi jøts jade'en xjawin'øønwa'añ ja Espiritu Santo, kidi kujkwa'kxyip tø xyikmiñ? ⁴ ¿Ti kidi ja kam xkøømnajxi? Jøts ku tø xøøky, ¿ti kidi ja meeñ xkøømja'aji jøts xkøøyakt pøni winø'on køøm xkøøywa'añ? Dios tø xawin'iñ, kidi øødsip.

⁵ Ja'ayi Ananías jade'en tmadøøw, winets ja jaty øøky ñaxkidaajky. Ku ja jaa'y ja jade'en niduki'iyi tñimadoodøø jøts ja yjanchø'jkidøø. ⁶ Xjats ja unaj'jk jaa'y myendøø, jøts ja t'abejtøø ja oo'kpi jøts ja t'atsyiknaxøjkidøø.

⁷ Tigøøk oorinidøø idø'on ja wyinaty jade'en tø yjaty, ku tyøjkii'ñ ja Ananías ñidøøxy nay jam, ka'ap ja tñijawi pøni tidam idø'on wyinaty tø tyuñi. ⁸ Xjats ja Pedro ja tyiibyøjkøø, jøts ja ojts ñi'mxyi:

—Nigajpx, ¿jade'en idø'on ja naajx tø xjanchtookti winø'on tø xanitejti?

Winets ja y'adsøøw jøts ja wyaañ:

—Jade'en øøts ja tø ndøøky.

⁹ Xjats Pedro ja tñimaay:

—¿Tiku jade'en tø xkajpxy'atti ku ja Dios Teety y'Espiritu Santo jade'en xwin'øøndi? Ixa ja jaa'y tøk'agi'jy myendi miditøø mniyaa'y tø y'atsyiknaxøkiyi, jøts mets inet m'atsnaxøjkimiyip.

¹⁰ Winets ja tøøxy jaty øøky ñaxkidaajky jam Pedro tyekyjøøm. Xjats ku ja unaj'jk jaa'y tyøjkidøø, øøky ja jap tpatøø ja tøøxyøjk, winets ja ojts jaty tyikpidsømdi, jøts ja ojts t'atsnidajidi nay jam ñiyaa'y pyukøøm ma ja jam wyinaty tø yiknidaji. ¹¹ Winets ja Jesús yja' niduki'iyi yjanchø'jkidøø, jøts nayide'en pøn jaty ja ojts jade'en tñimadowdi.

Ja mamiylagri miditøø Jesús kyudanaabyi ñanky'ejxidøø

¹² Møk idø'on ja Jesús kyudanaabyi ja milagri ttundi jam mayjaa'y agujkp; jøts niduki'iyi dø'on ja Jesús yja' jam yøømyukti møj tsaptøjk agøøm miditøø yiktejp Salomón Tyøjkweenk. ¹³ Janch chøky'ajttip idø'on ja kajp jaa'y ja', ka'apts ja niduki'iyi ja jotmøkwinmaa'ñ tjagyapti, jøts jap ñøjkxtit ma ja Jesús yja' jap ñamyukyidi. ¹⁴ Namay idø'on ja Jesús y'ayuujk yikmibijky, jade'en ja

yaa'dyøjk jøts nayide'en ja tø'øxyøjk. ¹⁵ Ja'agøjxpts ja pamaa'y jap yikiidyaktøø jap mā tuu' ñaxy, nay jap ja yikpikta'akti myaabajtkijxpy jøts tø'økyøjxp, jøts ja cho'oktit ku ja Pedro jap wyinaty ñaxy, øy ja y'aga'ax ja'ayi tyapaadiyidit. ¹⁶ Jøts nayide'en ja wenk kajp midi ja Jerusalén myiwingon'ajtpy, ja'ats tyikmendøø ja pyamaa'y jøts nayide'en pøn jaty wyinaty tø møk'ampy myachiyi ja miku'; xjats jade'en niduki'iyi choktøø.

Ku ja Pedro møøt ja Juan yikjemdundøø yiktedundøø

¹⁷ Winets ja teetywindsøn møøt ja saduceit jaa'y ojts nawyinaxi tjawidi, ¹⁸ winets tmatstøø ja Jesús kyudanaabyidi, jøts jap tsumdøø mā ja kajp jaa'y pyuxøjk jap. ¹⁹ Xjats nwindson'ajtim ja puxøjk agaj ojts tyik'awa'ach jøts tyikpidsiimy, jøts ojts tnøjmi:

²⁰ —Nøjkxti jam møj tsaptøjkjøtpy, tukmadowdi jam ja jaa'y ja øy'ayuuik midi ndajujky'ajtindip.

²¹ Xjats ku dø'øn jade'en yiknimaydi, winets jøpyi ñøjkxtøø jam møj tsaptøjkjøtpy, jøts ja jaa'y ja jam tyik'ixpøjktøjkidøø.

Yam idø'øn ja teetywindsøn jap wyinaty udy'a'aky twaadsoodinim niduki'iyi ja møjaa'dyøjkti midi ja Israelit jaa'y yikutujk'adsinaadyip, jøts ja Jesús kyudanaabyi nayide'en yikwaadsowa'andi pøn wyinaty tø yiktsumdi. ²² Xjats tkejxy ja teetywindsøn ja tyumbi, jøts ku jam yjaja'ttøø jam puxøjk agø'øm, nitu'uk ja ojts tkapaatti pøn idø'øn jayiktanigaxtip; winets ja jadi'iñi wyimbejtnidøø ²³ jøts ttukmadoodøø ja teetywindsøn, jøts yide'en tnimaadyøø:

—Ku øøts jam tø nja'aty, aduky øøts ja puxøjk jam tø nbaaty, jam idø'øn ja soldadi y'eix'etti puxøjk agø'øm; xjats ku øø tø nyik'awa'ach, nipøn øøts jap nitu'uk tø ngapaaty.

²⁴ Xjats ku dø'øn jade'en tmadoodøø ja ayuuik ja møj teetywindsøndi, jøts møøt ja tsaptøjk adsinaabyi, winets ñawya'añidi: “¿Sudso'ampy nmidabyaajtindit, sudso'ampy yjøkøxt yø jade'embu winmaa'ñ?” ²⁵ Jøts winet jatyi tu'uk yja'jty ja jaa'y, jøts ja wyaañ:

—¿Kidi xnijawidi? Pø ja'axi yik'ixpøjkti jam møj tsaptøjkjøtp midi meets tø x'uktsumy.

²⁶ Winets ja tsaptøjk adsinaabyi tmøødiy'ñ ja tajkti, jøts ojts twaawidi ja Jesús kyudanaabyi, nisa dø'øn ja tkatundi, tsø'jkidip ku ja kajp jaa'y myi'ambøkiyidit jøts ku jotmøn chaaga'adsiyidit. ²⁷ Ku dø'øn tyikja'ttøø, winets ttawingugajxidøø mā ja israelit jaa'y kyutujk adsinaabyidi, winets ja teetywindsøn tnimaay ja Jesús kyudanaabyidi:

²⁸ —Tø øøts nnigajpxy jøts ku øøts ojts nyikutuky, jøts ku meets ja Jesús yja' yā nāwine'enin xkananky'ixpøkiyidit. ¿Ti dø'øn ixyam jade'en tø xundi? Meets ixyam jinaxy tø xuknija'wiguixy ja m'ixpøjkin yā Jerusalén, jøts øøts xukpøky'atwa'añ nayide'en ja Jesús y'o'jkin.

²⁹ Winets ja Pedro t'adsojimbettøø møøt ja myigu'uk:

—Kuwani øøts ja Dios yja' nbaduujniyi jøts ka'ap ja jaa'y yja'. ³⁰ Ja Dios Teety pøn adøm n'apteety'amøj Dios'ajttøø, nay ja' kø'øm tø tyikjujkyiky ja Jesús, pøn meets kruskøjxp mmiwopajt kyøjø'øm tyekyjø'øm, jøts jade'en xyik'ooktøø. ³¹ Tø ja Dios ja kø'øm tpikta'aky møj windsøn y'aga'ngyø'ampy jøts yikutukt, jøts nayide'en ja tyiknitso'ok'att ja naxwii'ñit jaa'y, paty Dios jade'en t'ayo'ixy ja Israelit jaa'dyi, jøts jade'en yikpojkipmaa'kxtit ku tmatjstutttit ja pyøktu'unin. ³² Wa'ats øøts idø'øn ja nnijawi ku ja Dios Teety idø'øn jade'en ttuun, jøts y'ijxpy nayide'en ja Espiritu Santo midi ja Dios Teety tyuktatøjkip ja yjaa'y, pøn jaty ja kyajpxy paduujniyip.

³³ Xjats ku dɔ'ɔn ja Israelit jaa'y jade'en ja kyutujk adsinaabyi tmadoodɔɔ, jɔts ja Jesús kyudanaabyi yikmi'ambɔktɔɔ jɔts yik'ookwajnidɔɔ. ³⁴ Jamts wyinaty nidu'ukti ja kutujk adsinaabyidi pɔn yiktejtíp fariseit jaa'y, ja' xyɔɔw Gamaliel midi tɔnky'i xpɔɔkijiyip ja Moisés kyutujk, jɔts janch tsɔjkijiyip idɔ'ɔn ja kajp jaa'y ja'. Ja'ats ttanaagyukiyi'i'n, winets tkajxpidsingijxy ja Jesús kyudanaabyi, jɔts ja jap mímɔj t'atsyik'awixy abiky tsoo. ³⁵ Xjats yikni maadyi ja kutujk adsinaabyidi:

—Meets Israelit jaa'y, kidi yɔ jaa'y nugo ajawi sa xundi. ³⁶ Ja'myatsti ku ojts tu'uk ja jaa'y ñamyɔjpi'ktá'agyi windsɔn pɔn txɔɔw'ajtp Teudas, jɔts ja kyutujk ojts ttawin'i'i'n ja jaa'y nimaktaxk magɔ'pxy. Winets ja soldadi ojts yik'ɔɔgyi ja kya'ɔwyinmaa'ngyɔjxp, xjats ja jadi'i'ni wyindigɔɔgyɔjxti pɔn jaty wyinaty tɔ tpabɔkti. ³⁷ Xjats jadigojk yjajtkojmi nayide'en ku ja gobierni tmachomujky ja yjaa'y, winets nay ja'abi tiempi tu'uk ja Galileit jaa'y ojts kɔ'ɔm ñamyɔjwindsɔnbikta'agiyi jɔts namay ja jaa'y nayide'en ttukmibijky; winets ja soldadi nayide'en yik'o'jk iyɔɔ, xjats ja jade'en kyutigɔɔy ja kyutujk. ³⁸ Paty ɔ nwa'añ jɔts xmajstuttit yɔ'ɔbi jaa'dyi, ka'ap nugo xatɔjkijiyidit ja wyinmaa'i'n. Pɔni kyɔ'ɔmwinnmaa'i'n yɔ'ɔdi, kudigɔ'ɔpyts yɔ tsojk; ³⁹ pɔni Dios yja' yɔ', ni juunits meets yɔ xkayikudigɔ'ɔty. ɔyim mnay'ejx'eti'yidit; kidim Dios mɔɔt nugo mdseptundi.

⁴⁰ Xjats ku dɔ'ɔn ja Gamaliel jade'en kyajpxy'abajtiyi'i'n, jɔts ja kutujk adsinaabyitɔjk udy'a'aky tmibɔjkjɔxtɔɔ. Winets twaadsoodɔɔ ja Jesús kyudanaabyitɔjk jɔts tyik'ayo'ombaa'ttɔɔ, xjats tnimaadyi jɔts ka' nugo tjaakajpxwá'kx'adɔ'ɔtstit ja Jesús y'ixpɔjkin; winets jadi'i'ni tmajstuttɔɔ. ⁴¹ Xjats ja Jesús kyudanaabyi jap pyidsɔmdɔɔ ma ja israelit jaa'y kyutujk adsinaabyi japti, jotkujk idɔ'ɔn ja ñayjawiyidi kumi tɔ ja Dios ja wyinaty tyanibiktaagiyidi, jɔts ja jade'en y'ayo'odit Jesús kɔjxp. ⁴² Ejtp idɔ'ɔn ja jabom jabom tɔnigajpxti tkajpxwá'kxidi ja Jesús yja', jɔts ja jaa'y jade'en ttuk'ixpɔkti jap mɔj tsaptɔjkjɔtpy jɔts nayide'en awingujky tɔjkjɔɔty, ni juuni dɔ'ɔn ja tkamajstuttɔɔ.

6

Ku ja niwixujkpi yaa'dyɔjk yikpiktaktɔɔ ejx'ejtpi

¹ Nay ja'abi et, nay ja'abi jumɔjt idɔ'ɔn ja jaa'y ñamay'adɔtstɔɔ pɔn jaty ja Jesús yja' pyaduujnidip. Jɔts ja' midi tkajpxtip ja griego ayuujk, ja' idɔ'ɔn ojts y'ɔɔmbinaxwá'akti jɔts tni'ɔɔnidi ja myigu'uk pɔn tkajpxtip ja israelit ayuujk, ja'agɔjxp idɔ'ɔn ja y'ɔɔndi ku ja kyu'ɔktyɔ'ɔxy ja kyayik'ejxti yixxon, ku ja jii'kxy jabom jabom yjawa'kxy. ² Ja' idɔ'ɔn ja ñi'ɔɔndip, winets ja nimakmajtskpi jaa'y pɔn tkudanaadyip ja nwindson'ajtim Jesucristo, ja' ojts niduki'iyi tɔnknāmyukyidi ja Dios yjaa'y, jɔts ja tnimaadyɔɔ:

—Ka'ap jade'en y'ɔyi ku ɔɔts ja jii'kxy nyikwá'kxt, jɔts ɔɔts ja Dios y'ɔgyajpxy y'ɔmyadya'aky nga'atskajpxwá'kxiti, ɔti juuni ɔɔts ja n'atstuñ? ³ Migu'uktɔjkti, paty ɔɔts yixxon ndyimñigajpxy, ixa'adi niwixujk jaa'y, nay jaayi dɔ'ɔn kɔ'ɔm mnawyi'ejxidit, ja' idɔ'ɔn m'ixa'adip pɔn windsɔ'ɔgi'ejttip, pɔn ja'gyukidip, jɔts pɔn ja Espiritu Santo tmɔɔt'ajttip, ja'ats yɔ tunk mdaguwanidip jɔts ja jii'kxy ja jade'en tyikwá'kxiti. ⁴ ɔɔts dios'ajot'ajtwamp ɔɔts, njaaktyimdyuk'ixpɔjkwap ɔɔts jaa'y ja Dios y'ɔgyajpxy y'ɔmyadya'aky.

⁵ Xjats niduki'iyi ñagyajpxkypɔjkidɔɔ, winets ja Esteban yikpiktaajky yikjii'kxwya'kxpi, ja jaa'y pɔn idɔ'ɔn ja Dios mɔk tjanch'ajot'ajtp, pɔn tmɔɔt'ajtp ja Espiritu Santo. Ja'ats idɔ'ɔn jade'en yikwiwejtstɔɔ mɔɔt ja Felipe, mɔɔt ja Prócoro, mɔɔt ja Nicanor, mɔɔt ja Timón, mɔɔt ja Parmenas,

jøts møøt ja Nicolás pøn tsoo'mp jam Antioquía, ja' midi wyinaty jekyip tø t'ukpabiky ja israelit jaa'y chinaa'yindi. ⁶ Xjats ja jam wyinaty tø tyikmendi mā ja nwindson'ajtim kyudanaabyi jamdi, jøts ja tkunuu'kxtøø jøts ja jade'en tkønixajtøø.

⁷ Xjats ja Dios kyajpxy jade'en myøjtak'adiijch, mayi'adøtsp idø'øn jade'en ja Dios yjaa'y jam Jerusalén, kø'ømbaat ja teetyøjkti tjanchja'wiñidi, kø'ømbaat ja t'ajot'ajtnidi ja nwindson'ajtim Jesucristo.

Ku ja Esteban yiktsumnaq

⁸ Jamts idø'øn ja jaa'y wyinaty tu'uk midi txøøw'ajtp Esteban, ja' idø'øn ja Dios myøk'ajtin amuum myøøt'ajtpy, Dios idø'øn ja kyunuu'kxin nayide'en amuum myøøt'ajtpy, jøts ja jade'en ttuuñ ja myilagri Dios myøk'ajtingøjpx jam mayjaa'y agujkp. ⁹ Nay jamts idø'øn ja jaa'y wyinatymidi winaagin, pøn xuminøjktip mā tsaptøjk jam yikxødijy Esclavos Libertados. Jam wyinaty ja'adi midi tsoo'ndip Cirenit etjopt, jøts Alejandriit etjopt, jøts Ciliciit etjopt, møøt Asiit etjopt. Ja'ats idø'øn tnibidø'øktøø ja Esteban, jøts ja jade'en xe ya ñadyamigajpxnibøjkidøø; ¹⁰ jøts nigidi dø'øn ja tmidanaadyøø sã ja Esteban ojts wya'añ, kumi wijy'ajtin ja yiktumpy, jøts nayi Espiritu Santo ja pudøjkiyip. ¹¹ Xjats ja mayjaa'y winaagin tmijuudyøø ja myigu'uk, jøts idø'øn ja wya'andit jøts ku ja Esteban wyinaty tø tka'ødyijy ja Moisés jøts ja Dios. ¹² Xjats idø'øn ja jade'en jotkøjpxim tuk'ejpxinaxwa'akti ja myigu'uk, niduki'iyi ja møjaa'dyøjkti møøt ja kajpxwejpitøjkti; jøts ja t'adinaadyujktøø ja Esteban, xjats idø'øn ja jade'en tmajtstøø jøts ja tyiknøjktøø jam møj kutujktaajkjotp. ¹³ Nay ojts idø'øn ja tpiktakmidi ja testigi pøn tnidaay'ajtp ja Esteban, yide'en ja wyandøø:

—Ya'at jaa'y niijuuni yø tkamajtstu'uty ja kya'øy'ajtin, xumi jade'en yø tpagajpxy tpaxi'iky yø tsaptøjk, nayide'en yø ttuñ ja Moisés kyutujk. ¹⁴ Ti yø jade'en ñadyijyi, pø tøts øøts yø jade'en kø'øm ndyimyadøy ku yø jade'en wya'añ, jøts ku Jesús (ja Nazaretit jaa'y) tyikudigø'ty yø tsaptøjk møøt yø tsinaa'yin midi ja Moisés yiktaan.

¹⁵ Exam ja jade'en wya'andi, winets ja mayjaa'y pøn jaty jam wyinaty tsinaadyip, ja'ats ojts t'ejxti ja Esteban jøts ku wyeen y'aaw ja jade'en kyaxi'iky sam ankilisin.

7

Ku ja Esteban kø'øm yjanagyugajpxøø

¹ Winets ja teetywindsøn ttübyijky ja Esteban, yide'en ja tnimaay:

—¿Janch jade'en mets tø m'adi'ich?

² Xjats ja yøñ'ampy t'adsøøy, jøts ja wya'añ:

—Mee migu'uktøjkti winø'øn myikteedyidi myiktaagidi, madowdi waani. Ku adøm n'apteety'amøj Abraham jap chinaay ma et txøøwi Mesopotamia, jøts ka'anin ja wyinaty ñijky tsinaabyi jam mā et txøøw'ajtmī Harán. Xjats ja Dios Teety pøn janch wa'ats janch møj ojts ñanky'ijxyiyi, ³ jøts ja Abraham yiknimaay: “Majtstu'ut yø mdsinaadyaajk jøts nayide'en ja mmigu'uktøjkti, jøts mnøjkxt jam mā ja tsinaadyaajk n'atstuk'ext.” ⁴ Xjats ja Abraham choo'ndøø jam chinaadyaajkjotpti mā txøøw'aty Caldea, jøts ñøjktøø tsinaabyi jam Harán. Xjats ja tyeety jam y'oo'knāa, winets ja Dios Teety twaadsøøy ja Abraham mā ixyam ndsinaa'yindi. ⁵ Jøts ku ja jade'en yja'aty niwinø'ønin ja ñaaix ja kyayikmøøy, nugo ja chinaay; jøts nay ja Dios Teety kø'øm tyikutujk jøts yikmo'otnim ja ñaaix mā chøønidiit ja y'u'nk ja

y'una'jk oy ja Abraham wyinaty yja'øøky; ka'anım ja y'u'nk te ku ja Dios jade'en wyandaajky. ⁶ Jøts nayide'en ja Dios Teety tjaaknımaay ja Abraham, jøts ku ja y'u'nk y'una'jkıti, y'apti y'okti ñøjkxtit tsinaaby; abıkyajp, jøts jap jaa'y ja yjanchyiktunıdıt ejxim jıyujkin. Ku ja jap yja'attıt, wınets ja jaa'y kyayık'ødyunıdıt maktaxk magø'pxy jumøjt. ⁷ Xjats ja Dios nayide'en wyaañ: "Øts ndııdyu'ump ja jaa'y pøn mga'ødyunıdıp, pøn myıktunıdıp jıyujkin, jøts ngajxpıdsø'ømdıt kyø'ømnaxjotptı, jøts ø xwındsø'øgıdıt nay ya." ⁸ Jøts nay yø Dios Teety møøt ja Abraham tkajpxy'ajty sa jatı ja ejxpajt ja ejxa'an ku ja yıkmø'odıt ja naajx. Jøts tpıktaajkøø sa mutsk mıxyu'nk yıktu'undıt ku kya'axtı. Patı idø'øn ku ja Abraham y'u'nk kyaxı'jky mıdıt txøøw'ajıt Isaac, wınets jade'en ttuunı sa tkajpxy'ajttøø jøts ja ejxa'an tpıktaajkı ñe'kxkøjxp, kyıduktıjk xøøw ja jade'en ttuunı. Nayide'en ja Isaac ttuunı ja y'u'nk mıdıt txøøw'ajıt Jacob, jøts nayide'en ttuunı ja Jacob ja y'u'nk y'una'jkıti nımakmajtsk pøn y'apteety'ajttøø ja İsraelıt jaa'y.

⁹ Ya'at Jacob y'u'nk y'una'jkıti mıdıt adøm n'apteety'ajtındøø, mıy'ajkıdıp ja y'uch José ja'adı, patı ja oıts ttoø'knıdıt jøts tyıknøjkxtøø jam Eğıptıt jaa'y y'etjotp. Jøts ja José, ka'ap ja Dios myajtstu'udyı nıjuunı. ¹⁰ Nay yø Dios pudøjkıyıp ku y'ayo'ombaaty. Jøts nay ja' ja møøjyıp ja wıy'ajtı, ja'agøjxp chojkıyøø ja Faraøn mıdıt møj wındsøn'ajtp jam Eğıpto. Nay ja' tpıktaajk ja José gubernador jøts ja yıkutukt jap kutujktaajkøtpty, jøts nayide'en jap Faraøn tyøjkøtpty.

¹¹ Wınets ja yuu mıyıñ jøts janch may ayo'on pyajtıdøø jam Eğıpto etjotp jøts nayide'en jam Canaan, patı adøm n'apteety'amøjtı ka'ap tpaattøø tı yjøø'kxtıp. ¹² Xjats ku ja Jacob tnıja'wøø jøts ku jap Eğıpto y'ıty arıın, wınets jap tkejxy ja y'u'nk y'una'jkıti pømbı adøm n'apteety'ajtıyndıp. Jade'en oıts y'otstı mıjawyee. ¹³ Ku mıymajtsk ojk ñøjkxtøø, wınets ja José kø'øm ñanky'ejxyøø, jøts jade'en ja Faraøn tnıja'wøø kudam ñamyıgu'uk'atyıdıt. ¹⁴ Xjats ja José twaadsøøı ja tyeety jøts nıduki'ıyı ja mıyıgu'uktøjktı, nıduguu'pxy myakmøx nıduki'ıyı y'ejttøø. ¹⁵ Jade'en ja Jacob yja'jty ku yıkwaadsøøı tsınaabyı jap Eğıpto. Jap y'oo'knaa møøt adøm n'apteety'amøjtı. ¹⁶ Xjats ku jam y'oo'ktøø, wınets jam tyıknøjkxtøø Sıquem y'etjotp ma ja Abraham jam wyınaty ja jut tø tjuy, mıdıt ja Hamor y'u'nk tyøøktøø.

¹⁷ Xjats ku ja İsraelıt jaa'y mıyayıñıdıt jam Eğıpto ñaxjotp, wınets ja Dios ja wyanda'aky y'adukwani mıdıt wyandaajk Abraham køjxp. ¹⁸ Wınets ja Eğıptıt jaa'y tpıktaktøø tu'uk ja møj wındsøn, pøn tkanıja'wıp pøni sa ja José wyınaty tø y'atswındsøn'aty. ¹⁹ Ja'ats idø'øn twındaay'ajıt adøm nmıgugajptı jøts tjemduunı tteduunı adøm n'apteety'amøjtı, yıde'en idø'øn ttuunı jøts ku aguwanıkøjxp ttukmajtstu'uty ja teety ja taaktı ja myaxu'nktı jøts y'ooktı. ²⁰ Ja'abi xøøw ja'abi jumøjt idø'øn ja maxu'nk kye'jxy mıdıt txøøw'ajıt Moısés, jøts janch tsojki ja Dios ja'. Xjats ja Moısés ja tyeety tyaaq yıkyajkyıyøø tıgøøk po'. ²¹ Wınets yıkmajtstutnaa kuwani, xjats nay yø Faraøn ñøøx oıts tpaaty, jøts tyıkye'jky ejxim ja kyø'øm'u'ngın. ²² Xjats ja Moısés jap wyıy kyejy y'ıxpıjky, jøts mıdıt ja Eğıptıt jaa'y yjajtıp, nay jap ja Moısés yıkta'awaan. Ku ja jade'en y'ıxpıjky, kajpxwa'kx ja janch øy janch tsuj, jøts yjanchtumpy idø'øn ja kø'øm jade'en.

²³ Xjats ku ja Moısés wyınaty ja jyumøjt wıxıjky, wınets ja t'atspaatwa'añ ja mıyıgugajp ja israelıt jaa'y. ²⁴ Wınets jap oıts t'ejxpaaty ja mıyıgu'uk ku ja jap wyınaty ja eğıptıt jaa'y yjemduñı tyeduñı. Wınets ja Moısés ja mıyıgu'uk t'ayo'ıjxy jøts tnıgubøjky, patı ja tyık'ø'jky ja' eğıptıt jaa'y.

²⁵ Kumi jade'en ja yjawinmay jøts ku ja myigu'uktøjk tnijawidit, jøts ku ja Dios myo'owa'añidi ja awa'ats'ajtin, jøts nagyøøm ja twindsøn'attit; jøts ja myigu'uk ka'ap ja tnija'widøø. ²⁶ Xjats kyimjabom'ajty, winets ja Moisés tpaaty ja myigu'uk namaajtsk, nache'jkidip tam ja wyinaty, xjats ja Moisés wyinmaay jøts ñamiyuyj'atidit, jøts tñimaay: "¿Tiku jade'en mnayjemduñidi mnadyeduñidi, kidi mdukjaa'yip meets?" ²⁷ Xjats ja' midi ja myigu'uk wyinaty tjemdump ttedump jøts ja Moisés yiknajtstejimya, jøts ñimaajyøø: "¿Pøn mets tøm biktä'agyi yikutujkpi jøts øø x'ana'amt?" ²⁸ ¿Xyik'ookwamp øts nayide'en sam ja xyik'o'jkjy ja' egiptit jaa'y uxøø?" ²⁹ Xjats ku ja Moisés jade'en tmadøøy ja ayuujk, winets jatyi kyeejkjy ku yiknimaay jøts ku uxøø wyinaty ja jaa'y tøm tyik'øøky, winets ñijkxy jap tsinaabyi ma et jap txøøwi Madián. Japts chinaay sami ja'atjaa'y, winets jap ja y'u'nk tpaaty namaajtsk tum mixy.

³⁰ Tøm ja wyinaty chinaañi wixijkxy jumøjt, winets ñijkxy widejtpi jam tømøts etjotp, wingon et ma kojpk jam midi txøøw'ajtp Sinai, xjats jam t'ejxpaajty tu'uk ja ankilis jam jønnotp midi ujtsximungøjxp tøøpy. ³¹ Xjats ja Moisés ñigyumaap tja'wiyi'ñ ku ja jøøn t'ejxpaajty, jøts ku tjaakwingunøjkxøø wingon, winets tmadøøy ja Dios Teety y'ayuujk ku ja wya'añ: ³² "Øts mets m'apteety'amøj xdios'ajtp nayide'en ja Abraham, ja Isaac, jøts nayide'en ja Jacob." Xjats ja Moisés chø'øgidyøjkiña, jøts ka' y'uknadya'a'ejxinijyøø jøts twin'ext. ³³ Winets ja Dios Teety ñimaajyiyøø: "¿Tiku yøm mgø'øk xkajeñ, kumi tømøts yøm nwi'ixy ya'at et?" ³⁴ Kø'øm øts tøm n'ixy ja njaa'y ku jam y'ayo'ombaatti Egipto, tømøts nayide'en nmadøøy sa yjømødi sa ya'a'xti, sa yjatti sa kyubatti, ja' tøm nñimiñ jøts nyik'awa'atspidsø'ømdit. Mada'ak, jøts jam mnøjkxt Egipto."

³⁵ Øy ja Moisés wyinaty tøm yjayiknøjmi jøts ku ja ka' wyindsøn'att, jøts ku ja ka' tyiidyu'unt, Diosts ja kø'øm kajxiyi jøts ja tyik'awa'atspidsø'ømt, jøts nayide'en tniwindsøn'att ja myigu'uktøjk, ja'agøjxp ku ja ankilis jam tyukmadoji ujts ximungyøjxp jøøn agujkp. ³⁶ Nay yøm Moisés idø'øn tyikpidsøøm adøm n'apteety'amøjti jam Egipto, jøts nayide'en yjanchtuun ja milagri jøts ja Dios myø'ajtin tyiktuujnøø, jade'en ttuñ jam Egipto, jøts nayide'en ma ja Tsajpts Mejy, jøts jam tømøts etjotp, winet ku jam jade'en chinaay wixijkxy jumøjt. ³⁷ Nay yøm Moisés idø'øn tñimaay ja israelit jaa'y: "Myiktanigaxtip ja Dios Teety ja kyugajpxy tu'uk, nayide'en idø'øn ja mye'ent sam øts ja jawyeen tøm xkejxyin, jøts nay adøm idø'øn ja nmigu'uk ja'. Ja'ats idø'øn mbadu'unindip." ³⁸ Nay yøm Moisés idø'øn kyudanaay ja yjaa'y jam tømøts etjotp ma ja kojpk txøøwi Sinai, ku ja ankilis myøøjyøø ja øygajpxy ja øy'ayuujk midi ndajujky'ajtindip; jøts adøm ja nayide'en nñija'wint.

³⁹ Xjats adøm n'apteety'amøjti ka' tpadundøø pøni midi ja Moisés yjananktyunwajnip, jam ja ne'egi jadigojk ñøjkxwa'andi nay jam Egipto, jøts ja Moisés jade'en yikmajtstu'utwa'añ. ⁴⁰ Winets tñimaadyøø ja Aaron: "Yikojik øøts nwenkdioosti jøts øøts ja' xuu'wa'at, kumi ka'ap øøts nñijawi pøni sa ja Moisés jyaty ku øøts nichøky'ampy xyikpidsiimy Egipto." ⁴¹ Xjats tyik'a'øyiñaxti ja løjch, jøts tyik'oo'kti namay ja jiyujk, ja' idø'øn tyamiyoxtip tyawindsø'jkidip ja løjch awanax, winets ja' ttaxondaktøø midi kø'øm yik'øyidøø. ⁴² Xjats ja Dios Teety myajtstuujtidøø jøts ja wyaañ, wan yøm wenk dios yja' tpaduujnidi, wan tmaadsa'ji wan tti'i'ji. Yide'en idø'øn ja Dios Teety kyugajpxy jap ñøkyjøtpy tjaadyandi:

Ku meets jam mduu'yø'øy tømøts etjotp wixijkxy jumøjt,

¿myik'o'jkik meets ja jiyujk may'ampy øts nwindø'jkingøjxp?

43 Pø ka'axi yjade'eni, pø jinaxyi meets ja wenk dios yja' ixyam xpaduujniyi, ku ja dios Moloc møøt ja tyøjk xkiiwyidejtiiyidi ja tø'øts naxjotp.

Nayide'en jadu'uk ja wenk dios Renfán myaadsa' xpaduujniidi ja yja', yide'en idø'on ja kø'øm xyik'øiyidøø jøts xwindsø'jkiidøø.

Ja'agøjxp meets ngaxpidsømwaanidi jøts jam mnøjkxtit Babilonia jixkø'øm, jamts nayide'en m'ayo'ombaattit.

Yä'at idø'on ja Dios ja kyugajpxy tyukjaay, xjats ja Esteban yjaakwaañ:

44 'Nayide'en jam tø'øts etjotp ja n'apteety'amøjti tmøøt'ajttøø ja wetøjk tu'uk mā tpøkjø'økti ja kyutujkti, tsaagøjxp idø'on ja yja'ayi, Dios idø'on ojts tyuk'ijxyi ja Moisés sudso wetøjk y'øiyit. 45 Xjats ku ja tiempī ñajxy jeky jumøjt, winets ja mōjaa'dyøjkti tkøyajknidøø ja wetøjk møøt ja wyindsøn Josué. Winets ja myidsep tmimajadaktøø pøn jaty ja wyinaty tsinaadyip, kumi kø'øm ja Dios ja kyexyidi jøts ja chinaadyajk ja yikmo'odit. Nay ja wetøjk wyinaty yiktundip ku ja David yikutujky. 46 Jøts ja Dios ja ojts y'a'ejxyi, paty ja tu'uk tkøjwä'añ ja tsaptøjk mā ja chøønit ja Dios Teety pøn ja Jacob ojts Dios'ajtmi; 47 jøts ni ka'abyim ja tkøjy ja tsaptøjk; winets ku ja Salomón tyøki windsøn, ja'animts tkøj ja tsaptøjk. 48 Jøts øyim ja Dios jap kyidyimchøøni kuwani jap tsaptøjkøtpy midī ja jaa'y yik'øiyidip, kumi yide'en ja Dios ja y'ayuujk ttukmiyø'øy ja kyugajpxy ku ja yide'en wyä'añ:

49 Tsajpjøtpy ø ndsøøni, jøts nayide'en naxwiin.

¿Ti ndøjk meets idø'on myik'øiyip, jøts ti tsinaadyaajk meets idø'on xmo'owamp?

50 ¿Kidi øtsip jade'en tuki'iyi tø nyik'øiyi?

51 Xjats ja Esteban tjaaknimaay yide'en ja myigu'ukti:

—Meetsxi mgamadoop mgaja'gyujkidip, jøts nijuuni meets ja Espiritu Santo xkagupøjkti. Jade'en mee nugo mjanch'ity sami n'apteety'amøjti.

52 Ja'axi tjemdundip ttedundip ja Dios Teety kyugajpxy, jøts tyik'oo'ktøø pømbi yjöpja'widip ku ja myenwä'añ ja yiknitsokpi, pøn janch øy janch wa'ats. Ixyamts ja yiknitsokpi yjanchmiin, pø meetsxi ja mgøyajk jøts ja jaa'y yik'oogiyit. 53 Pø tøxi meets ja ankilis ja Dios kyutujk mjamø'øyi jøts nika'ap ja xpadundi.

Ku ja Esteban y'øjky

54 Xjats ku jade'en yiknimaadyøø ja windsøndøjkti, winets yikxon tjanchty-imy'i ambøjktøø ja Esteban. 55 Kumi ja Espiritu Santo ja Esteban yjanch-møøt'ajtpy, winets ja chajp'ijxy jøts t'ejxpaapty ja tsuj'ajtin ja øy'ajtin mā ja Dios Teety, jøts nayide'en t'ijxy ku ja Jesús jam tyani Dios Teety aga'ngyøj'øm. 56 Xjats tnimaay pøn yik'ookwajniyidip:

—i'Uk'ejxti! Awa'ats øts yø tsajp ø n'ixy, jøts nayide'en n'ejxpaaty ja Cristo tyani Dios Teety aga'ngyø'ampy.

57 Xjats ja jaa'dyi ka'ap ja tmadowdi, y'amætstip ja tyatsk ja', niyaxni niyjokni dø'on tnibidøktøø jøts tmætstøø. 58 Jøts tyikpidsømdøø aguwanikøjxp jap kajpjøtpy; winets ja ni'øø'nibidi jawyeen ja chabixy tjandøø jøts ja ttuk'ejx'etti ja mixy Saulo, xjats idø'on jaty twika'tsnibøjkiidøø ja Esteban.

59 Yika'tsp wyinaty ja Esteban, jøts ja chapkajpxy jøts ja wyaañ:

—Nwindsøn'ajtim Jesús, mets ndagødøjkip ø n'anmija'win.

60 Xjats ku jade'en wyaañ winets ñagyuxendyaajkiyøø jøts møk wyaañ:

—Kidi xukpøky'aty nmigu'uktøjkti yø n'o'jkin.

Kuts wyaanguijxy jade'en, winets y'oo'knäa.

8

Ku ja Saulo tjemduuñ tteduuñ ja Jesús yjanchja'wibidi

¹ Jòts ja mixy Saulo yjotkujk'ajty ku ja tyik'oo'ktøø ja Esteban. Xjats nay ja'abi xøøw, winets ja tsep cho'onndaajky møøt ja' pøn ja Jesús yjanchja'widip jam Jerusalén. Paty yide'en niduki'i'yi cho'onjòknidøø pøn ja tsep tkawandip, jòts jam ñòjkxti nay Judeit kajp wingon, jòts nayide'en Samaria y'etjotpti. May idø'øon choo'nidøø, ja'ayi dø'øon tandøø ja Jesús kyudanaabyi pøn nimakmajtskjaa'y'ajttip. ² Xjats winaagin jaa'y pøn ja Dios kya-jpxy tpadundip, ja' tyiknajxøjkidøø ja Esteban jòts nayide'en tjanchpaya'axti. ³ Xjats ja Saulo txumika'ødyuñ ja myigu'uk pøn ja Jesús yjanchja'widip, jòts t'ixaañibòjkøø tøj tøj. Kuts ja tpaajty, jòts ja t'ixjidøjtpidsimy tyøjkjotpy wan jayaq'yi wan tjatø'øxyi, jòts ja tyikpuxøjktøki.

Ku ja øgyajpxy ja ømyadya'aky ojts yikajpxwa'kxy jam Samariit etjotp

⁴ Xjats niduki'i'yi midi tsoo'nidøø Jerusalén jòts ja ñòjkxtøø omagajp, ja'ats ja Dios kyajpxy tkajpxwa'kxidøø midi anmija'win tyiknitso'ok'ajtp. ⁵ Xjats ja nidu'ukti, pøn txøøw'ajti Felipe, ja'ats nøjkx abikyajp jam Samariit y'etjotp, winets ja jam tkajpxwa'kxy sa yjajty sa kyubejty ja Jesús. ⁶ Winets ja jaa'y yjanchñamyujkidøø namay, jòts ja tjanchpatmadowdi sa wya'añ sa kyajpxy ja Felipe, jòts ku nayide'en milagri' ttuuñ. ⁷ Winets tyikpidsiimy ja mamyiku' midi ja jaa'y wyinaty tø tyatøkiyidi, jòts møk idø'øon ja tjanchmiyaaxti ku pyidsømdøø ja miku'; nay ja' tyiktsoojk may ja køxujxpi pakxujxpidi, jòts nayide'en tyiktsøøjky ja pakma'at jaa'dyi. ⁸ Paty idø'øon yjanchjotkujk'ajttøø ja jamit jaa'y.

⁹ Jòts nay jamts idø'øon ja yaa'dyøjk tu'uk y'ijty pøn txøøw'ajtp Simón, ja'ats jam yik'adujkp jòts nayide'en xyimay, ja'agøjxp idø'øon ja tjanchmøjawidi ku ja jade'en ñamyøjpikta'agyi ja Simón. ¹⁰ Xjats ja niduki'i'yi ja møj ja mutskti tpatmadowdi pøni sa jaty ja Simón wya'añ. Winets wyandøø jòts ku tjanchmyøødi ja Dios myøk'ajtin.

¹¹ Jòts tpaduujnidøø ja yja' ku ja xyimay jòts ku ja yik'aduky, may jumøjt idø'øon ja wyin'øø'nidøø. ¹² Xjats ku ja Felipe tñigajpxkijxy ja øgyajpxy ja ømyadya'aky pøni sa yjajty kyubejty ja Jesús, jòts ku ja tñigajpxy ja Dios kyutujk midi ja yjaa'y ja tyanitanaapy, winets ja yikpabøjknaa, xjats ja yaa'y ja tø'øxy ñøbajttøø. ¹³ Nayide'en ja Simón tpabøjknimaa, jòts ja ñøbajtmaa, jòts ja tjamyøøt'ajty ja Felipe, winets ja ñigyumaap tjanchja'wøø ku ja Felipe tjanchpikta'aky ja milagri, jòts ja Dios myøk'ajtin tyikwingaxi'iky.

¹⁴ Xjats ku ja Jesús kyudanaabyi pøn jam jaaktaandøø Jerusalén tñija'widøø, ku ja Samariit jaa'y winaagin tø wyinaty tkupøjkti ja Dios kyajpxy y'ayuujk jòts ku ja tpadu'undit, winets ja yjaakyikajxtøø ja Pedro møøt ja Juan. ¹⁵ Jòts ku jam yja'ttøø, winets tku'amidowdi ja Samariit jaa'y midi tpadundip ja Jesús yja' jòts tyatøkiyidit ja Espiritu Santo. ¹⁶ Ka'aním wyinaty ja Espiritu Santo tyatøkiyidi ja Samariit jaa'dyi; ja'ayi wyinaty tø ñøbattøø Jesús xyøøgøjxp. ¹⁷ Xjats ku ja tkønixajtøø ja jamit jaa'dyi, winets ja tyatøkiyidøø ja Espiritu Santo.

¹⁸ Ku ja Simón tjanch'ijxy ku ja Jesús kyudanaabyi ja Espiritu Santo ttukatøki ja jaa'dyi, winets ja juy t'amidøøy, ¹⁹ jòts tñimaay:

—Tiku meets xkadamidøøky yø Dios myøk'ajtin midi mee mmiwidijtpy, jòts ø nayide'en øy pøn ngønixajt, jòts nayide'en nduktatøkit ja Espiritu Santo.

²⁰ Xjats ja Pedro tñimaay:

—Pøni jap ja meeñ xmoødi, wan ja moøt mgudigø, jade'enxi mets yjawi mwinmay jøts yø yiktøoky midi ja Dios yajkpy. ²¹ Ka'ats mets yø mbaat'atyiyi ya'at midi øø nmiwidijtpy, ka' mets mwinmaa'ñ y'øyi pyaadi Dios wyingujky. ²² Majtstu'tut yø mga'øwiyinmaa'ñ, minuu'kxa'ak ja Dios pøni maa'kxujkiyip midi tø xwinmay m'am mjotp. ²³ N'ijxpy øts yjawi ku ka'øwiyinmaa'ñ xmoødi, yøøts myikjem'adøøjtsip myikte'adøøjtsip.

²⁴ Xjats ja Simón y'adsøoy:

—Ku'ajot'ajtik meets, jøts øts ja nbøky ngagu'ayo'ombaadit.

²⁵ Xjats ku ja Juan moøt ja Pedro tñigajpxkøxtøø ja Dios kyajpxy y'ayuujk, jøts nay ja' tkajpxwa'kxtip jam magyajpjtøp nay ja Samariit y'etjotp, yide'en ja wyandøø sudso'ampy yø anmija'win ñits'o'ok'aty, winets wyimbejtñidøø nam jam Jerusalén.

Ku ja Felipe moøt nabaajtyøø ja Etiopiit jaa'y

²⁶ Xjats ku ja jade'en wyimbejtñidøø, jøts ja nwindson'ajtim y'ankilis ojtts ja Felipe myigajpxyiyi, jøts ñimaajtyyøø:

—Pidø'ok mets jøts mnøjkxt abatko'm'ampy, ja tuu' midi naxp Jerusalén jøts nayide'en Gaza.

Jade'en idø'on ja ankilis ñimaajtyyøø ja Felipe. Ja'abi tuu' idø'on naxp tøøts etjotp ma' ka'apøn chøøni. ²⁷ Xjats ja pyidi'jky jøts ja chøø'ñ; winets tpaajty jam tuu'am tu'uk ja Etiopiit jaa'y, pøn ja Dios Teety jap t'atswindsø'jkip Jerusalén. Ja jaa'y isaabiky ja', jøts møj yikutujkpi ja', jøts nayide'en t'eix'ejtmtyyøø ja myeeñ ja tøøxy pøn jam møj windsøn'ajtp Etiopia, Candace ja xyøøw ja tøøxy. ²⁸ Kyajpkøjpx idø'on ja wyinaty wyimbejtni kyarretijøtpy, jøts jade'en tuktuu' tkajpx'adi'ich ja Isaías ñøky pøn ja Dios kyugajpxy'ajt. ²⁹ Winets ja Espiritu Santo myigajpxiyøø ja Felipe, jøts ja ñimaajtyyøø:

—Wingonjawi puwa'agi yø karreti.

³⁰ Xjats ku ja wingon tpuwa'jki, jøts tmadøy ku ja ñøkyajpxy, jøts ja tyiktiy ja Felipe:

—¿Mnimadøøpy idø'on midi ixja mgajpxpy?

³¹ Xjats ja wyaañ ja nøkyajpxpi:

—¿Sudso øts yø' nwinmado'ot, pø ka'ats ø pøn, pøn øts xukwinmado'op?

Winets ja Felipe yikway jøts tyøkit jap karretijøtpy jøts tmøøtsøønit. ³² Midi ja Etiopiit jaa'y wyinaty kyajpxpy, ya'at idø'on ja':

Ku jaa'y yik'o'jkoø kyupiky'ajt ja', jade'en ja y'ijty kidim ja borreegi maxu'nk y'øøky;

ka'ap ja sa wya'añ, uum ja' jade'en ejxim borreegi ku yikeepy.

³³ Jade'en idø'on ja jaa'y yik'ayoojtyyøø, jøts nika' koøm ñanky'ayowiyit;

ku ja jade'en yiktuñ, ¿pøn ja kugajpxiyip?

Tø dø'on jabaat kyixy ja chinaa'yin ya naxwiñ.

Yide'en idø'on jap yja'ayi midi ja Etiopiit jaa'y kyajpxpy.

³⁴ Xjats ja jaa'y yiktøøjøø ja Felipe:

—Tun ja may'ajt, nigajpx waani, ¿pøn idø'on yø jade'en ñimadyakpy, koømyi yø jade'en ñañimadya'agi, uk wenkpi dø'on yø ñimadyakpy?

³⁵ Xjats ja Felipe ttuk'ixpøjknibøjkøø sa yjajty sa kyubejty ja Jesús. ³⁶ Xjats ku ja jade'en yøødyi, winets ja møj nøø tpaattøø, jøts ja Etiopiit jaa'y wyaañ:

—Ixats ja nøø yjawi, ¿ti kidi ndejint y'øyt ku nnøbatt?

³⁷ Xjats ja Felipe t'adsøoy:

—Pøni mjanchja'wip ja Jesús tu'uk amumjoojt, o me nyiknøbatt.

Winets ja t'adsojimbijty:

—Njanchja'wip øts ku ja Jesucristo yjanch'u'nk'aty ja Dios Teety.

³⁸ Xjats ku ja jade'en wyaañ jøts ja karreti tyikwa'k'øyidøø; winets ñøjkxtøø jam møj nøøjotp, jamts ñøbejy ja Etiopiit jaa'y. ³⁹ Kuts jam pyidsømdøø møj nøøjotp, jøts ja Espiritu Santo yiknøjkxøø abiky et ja Felipe, jøts ja Etiopiit jaa'y nika'ap ja t'uk'ejxnaa; jøts ja tyuu' t'nøjkxnaa jotkujk. ⁴⁰ Jøts ja Felipe jap yja'aty ma kajp jap txøøwi Azoto. Kajp kajp idø'øn ja tkajpxwa'kxwidity sa dø'øn ja anmija'win ñitso'ok'att. Xjats ojts jap yja'tni ma kajp jap txøøwi Cesarea.

9

Ku ja Saulo tyiktigajch ja chinaa'yin

¹ Xjats ku ja jade'en, jødsyim ja Saulo tkidyimya'dyigøy ja o'jkin, kuwani tyimdyanekwa'añ ja' pøn yjanchja'widip ja Jesús yja'. Paty ojts t'ninijky ja teetywindsøn, ² jøts t'ats'amido'ot ja nøky ja tiy'ajtin. Ja'ats ja myinøjkxp jøts ja ttuk'ext ja teetyi pøn jam ttundip tsaptøjkjotp ma txøøwi Damasco, winets ja t'ixa'at pøni pøn ja Jesús yja' pyaduuñidip, jøts jam ja tyiknøjkxt kø'tsumy Jerusalén, wan tjayaa'yi wan tjatø'øxyi. ³ Kuts jam yja'atwaañi Damasco, winets ojts jotmøñ ja jaj ñawidityi midì kidakp tsajpjøtpy, janch tsamamp ja jaj. ⁴ Winets ja Saulo kyidaay, jøts tmadøøy ja ayuujk ku ja yide'en wya'añ:

—Saulo, Saulo, ¿tiku ø xjemduñ xeduñ?

⁵ Xjats ja Saulo tyiktiy:

—¿Mbønims me teety idø'øn?

Jøts ja y'adsoojøø:

—Øts idø'øn Jesús, nay yø' midì mjemdumpy mdedumpy. Kø'øm me mnay'ayo'ondunñyi jade'en kidi tsakaa ku ja ti tnepy, jøts ja kø'øm kujp ñadyukyø'dyiyi.

⁶ Xjats ja Saulo yjanchmibejpøjknaa ku jade'en yiknøjmi, jøts wyaañ:

—¿Tims me teety xamidsokp, ti ø ndu'ump?

Winets ja nwindson'ajtim ñimaajyøø:

—Pidø'øk jøts jam mnøjkxt kajpjotp, jamts myiktukmado'ot pøni ti mdu'ump.

⁷ Xjats ja Saulo yjamyøøt nayide'en yjanchø'jkidøø ku ja Saulo y'ayuujk ja jade'en tmadøjidi, jøts ka'ap ja t'ejxtøø pøni pøn ja myigajpxpy. ⁸ Winets jatyi ja Saulo pyidi'jky, jøts ku ja yjawin'ejxwa'kxy, ka'ap ja ti t'ejxpaaty. Winets ja myigu'uk y'ukwejtsniyidøø, jøts ja yiknøjkxi Damasco. ⁹ Jamts chinaay tigøøk xøøw jøts niti tka'ijxy, ni kyakay ni kya'uuky, niti tkatuñ.

¹⁰ Jamts idø'øn tu'uk chinaamyi yaa'dyøjk pøn tjanchja'wip ja Jesús, Ananías, idø'øn ja xyøøw, winets ja nwindson'ajtim ojts t'ninijky ja Ananías, jøts ja tñimaay:

—¡Mets Ananías!

Xjats ja Ananías t'adsøøy:

—¿Ti, teety?

¹¹ Xjats nay jatyi ñimaajyøø:

—Pidø'øk jøts mnøjkxt ma ja tuu' yiktijy Tidyuu', jøts ku jam mja'att Judas tyøjkwindum, jamts xyiknidøøwit ja Tarsit jaa'y midì txøøw'ajt Saulo. Dios'ajot'ajtp inet ja jam, ¹² jøts tø ja nayide'en tñijawi agumaa'gyøjxp, ku me mnøjkxt jøts ja wyin'ejxwa'kxkojmit wa'ats ku xkønixajt.

¹³ Kuts ja jade'en tmadøøy ja Ananías, jøts ja wyaañ:

—Janch namay, teety, idø'øn ja jaa'y tø xukmadowdi ku yø Saulo tjanch-jemduñ tjanchteduñ ja' pøn mets mjanchja'wiyip jam Jerusalén. ¹⁴ Xyamt

ja tɔ tmiʒa'aty nay ʒa ja tiy'ajtɪn, midi ja teetywindsɔn ja ojts t'amidɔy jɔts ja tyiktsoont midi me mbaduujniyɪp.

¹⁵ Winets ja nwindɔn'ajtim wyaʒaʒ:

—Nɔjɔx x'ats'ixy ja Saulo, tɔ ɔts ja nwi'ixy, nyiktunwampy ɔts ja', abikyajp ɔts ja ngaxwa'aʒ. Japts ɔts x'atsnigajpɔt x'atsnimadya'akt, jɔts ja ttukmado'ot ja jamit ʒaa'dyi mɔɔt ja' wyindsɔndɔjkti jɔts nayide'en ja ʒa'at israelit ʒaa'dyi. ¹⁶ Nduk'exp ɔts ndukmado'op ɔts sudso jawyeen tyu'unt, jɔts kuwani nayide'en tmi'ayo'ot ɔts ngajpxy ɔts n'ayuujk ku ja ʒaa'y yjemdunit tyedunit.

¹⁷ Xjats ja Ananias ojts tniinjky ja Saulo. Kuts ja ʒja'jty, jɔts ja ja'ayi ojts tknixajy jɔts yide'en tniimaay:

—Migu'uk Saulo, ɔts tɔ xkexy ja nwindɔn'ajtim Jesús, nay ja' midi ojts x'ixy jam tuu'am, ja'ats ɔts tɔ xkexy jɔts me nyikwin'ejxwa'kxt jadigojk, jɔts ja Espiritu Santo nayide'en mdatɔjkiniyit.

¹⁸ Xjats jotmɔʒ kya'ay wyeengɔjxp jade'en jajtp ja t'ixy ejximi ajkx jimeeʒin, winets wyin'ejpxijky jadigojk. Xjats ja Saulo pyidɔknaʒ, jɔts ojts ʒɔbety. ¹⁹ Jɔts ja jadigojk kyaabyijky, winetnɪmts ja myɔʒaaʒ tpijky, jɔts jap ʒjaaktsinaʒy ja matɔsk xɔɔw ja tigɔɔk xɔɔw mɔɔt ja' pɔn tjanchja'widip ja Jesús jam Damasco.

Ku kyajpxwa'kxy ja Saulo jam Damasco

²⁰ Xjats ja Saulo tkajpxwa'kxnibɔjkɔɔ jam tsaptɔjkjɔtp, yide'en ja wyaʒaʒ ku ja Jesús y'U'nk'atyɪ ja Dios Teety. ²¹ Xjats ja ʒnygyumaap tjanchja'widɔɔ pɔn jaty ja jam patmadojyɔɔ, jɔts ja xem yam ʒagyajpxidɔɔ, jɔts yide'en ʒawya'aʒidɔɔ:

—ʒKidi nay ja ʒaa'yɪp yɔ' midi jam Jerusalén y'ijty tkamaa'kxp ja myigu'uk ku ja tɔpɔkti ja Jesús? ʒKidi ja'ajɪp yɔ' tɔ t'uknɪmiʒ jɔts tmajtsmukɔxt ja Jesús yjanchja'wibidi, jɔts ttawinguwaʒawit ja mɔj tiidymbidi?

²² Xjats ja Saulo jɪnaxy ʒjaaktyimkyajpxwa'kxy, jɔts ja yikxon tyimʒigajpxy jɔts ku ja Jesús ʒa tɔ yjanchyikexy yiknitsokpi, jɔts ja israelit ʒaa'y jadi'iʒi myondi y'ookti pɔn jaty jam wyɪnaty tsinaadyɪp Damasco, niʒi kajpxy niʒi ayuujk ja'adi.

Ku ja Saulo ayu'uch kyeejky

²³ Xjats kyimjekʒin ja israelit ʒaa'y tkajpxy'ajtnidɔɔ jɔts ja tyik'ooktit ja Saulo; ²⁴ jaty Saulo ja tniʒa'wiyi'iʒi. Winxɔɔw windsuu ja myidsep y'awejx'ityi ma pidɔmdaajk jam, jamts ja tyimyk'oogiyit. ²⁵ Winets ja Saulo ja myigu'uktɔjkti pyiktaajkiyɔɔ kachjɔtpy jɔts ttanikiʒiʒaxti ja pɔch midi nawidity tukajpaa', jɔts nika'ap jam ja pyidsimy ma ja myidsep y'awijxy, paty idɔ'ɔn ja kya'ɔ'jky.

Ku ja Saulo jam ʒja'jty Jerusalén

²⁶ Xjats ku ja Saulo jam ʒja'jty Jerusalén, jɔts ja tminamyukwa'aʒi pɔn ja Jesús tjanchja'widip. Janchtsɔ'jkidipts ja', kumi ka'ap ja tjanchjawidi jɔts kudam ja Saulo nayide'en tjanchjawi ja Jesús. ²⁷ Paty idɔ'ɔn ja Bernabé wyajyɔɔ, jɔts ttukwinguwa'jkɔɔ ja Jesús kyudanaabyidi. Jɔts nay ja' ttukmadoow sudso wyɪnaty tɔ t'ixy ja Jesús jam tuu'am, jɔts nayide'en sa ja myigajpxiyɔɔ, jɔts nayide'en ja ttukmadɔy sa ja ojts jam jotmɔk tkajpxwa'kxy ja y'ayuujk Jesús kɔjxp. ²⁸ Xjats ja Saulo jam jade'en tyaaʒ Jerusalén, jɔts ja mɔɔt wyidejtni pɔn jaty ja Jesús ʒja' pyadundip. ²⁹ Jɔts ja ka' ti tkumayjawi, jɔtkujk ja tkajpxwa'kxi ja nwindɔn'ajtim ʒja', jɔts ja ttamimadya'aky ja israelit ʒaa'dyi pɔn ja griegit ayuujk tkajpxti; yikxon ja ʒadyawingugajpxiyidi ku ja ja xe ja ʒa tum jade'en kyanagyupijxyiyidi ja

wyinmaa'ñ, ja'ats ja israelit jaa'y ñiwinmaa'ayidip jøts ja tyik'ookit. ³⁰ Xjats ku ja myigu'uk jade'en tnija'widøø, winets ja yikwaañaa jøts yiknøjkxyøø jam Cesareit kajpjtøp, jøts yikejxñim jøts ja ñøjkt kyajpkijxpy midi txøowip Tarso.

³¹ Xjats ja janchja'wibidip pøn jaty tsinaadyip jam etjotp midi yiktejp Judea, Galilea, jøts Samaria, nekim ja jam chinaañidi, jøts ñija'wi'adøjtsidip ja Jesús yja' ja'adi. Jøts juuni ja tka'ukwindsø'ogidi, ejtp ja twindsø'ogidi jøts namay'adøtstip ja nayide'en, ja Espíritu Santo ja amuum pudøjkiyidip.

Ku ja Eneas chøøjky

³² Xjats ku ja Pedro wyinaty t'ayø'øy ma jaty ja janchja'wibi chøønidi, nayide'en ojts t'ixy ja janchja'wibi pøn jam tsinaadyip ma ja kajp txøøwi Lida.

³³ Jamts tu'uk tpaajty ja yaa'dyøjk midi txøøw'ajt Eneas, tyuktujk jumøjtíp ja pa'am ja wyinaty tø pyajtñiyi, kyidyimpyidi'iky jøts koxuxyi pakxuxyi pa'am idø'øn ja myøøt. ³⁴ Xjats ja Pedro ja tnimaay:

—Eneas, Jesús myiktsojkip. Pidø'øk, wejtsjø'øk yø mmaabajt.

Xjats ja Eneas pyidi'iky jaty, ³⁵ xjats niduki'iyi ja jaa'dyi pøn jaty kugajp'ajttíp jam Lida jøts jam Sarón kuuyi ja tnija'widøø, winets ja tyikutigøødyi ja møjaa'chinaa'yin midi ja wyinaty chinaadyip, jøts ja nwindsøn'ajtm yja' tpaøjknidyidøø.

Ku ja Dorcas yjujkyjky jadigojk

³⁶ Nay ja'abi xøøw nay ja'abi jumøjt idø'øn chinaay tu'uk ja tø'øxyøjk jam Jopit kajpjtøp, Tabita dø'øn ja xyøøw, yide'en yiktijy griegit ayuujk, Dorcas. Jøts nayi Jesús idø'øn ja yjanchja'wimyip paty ja tjanchpudøki pøn ayooop pøn winmaapy. ³⁷ Winetsik idø'øn ja pa'am pyaajtñiyaa jøts ja tyimyk'o'jkiyøø; jøts ku yikpujñaa, jøts ojts yikpiktä'aky myiduknipatøjkixpy. ³⁸ Xjats kumi wingonts ja kajp midi txøøw'ajtp Lida, ma jap wyinaty ja Pedro t'ayø'øy ja myigu'uktøjkti, jøts kumi tø ja wyinaty ja Dorcas myigu'uk tnijawidi ku ja jam wyidity, winets ja ñagyaxidøø namajtsk jøts ja t'atstukmado'odit ja Pedro jøts mye'ent putyi.

³⁹ Xjats ja Pedro jaty tñøødi ja kugajpxtyi. Ku jam yja'ttøø, jøts jap tyimwyaanøjkxyøø ma ja oo'kpi jap, winets ja Pedro ja ku'økytø'øxtyi ñawa'kwidejtñiyøø, jøts ja tyuk'ijxyi ja wet midi wyinaty ja Dorcas tø tyik'øyi.

⁴⁰ Winets ja Pedro tkajxpidsømguixy ja jaa'dyi, jøts ja ñagyuxendyaajkøø, jøts kuts ja twindsapkajpxkijxy ja oo'kpi, xjats ja tnimaay:

—Tabita, pidø'øk.

Winets ja oo'kpi wyin'ejxwa'kxy jøts ja Pedro yikwin'ixy, winets chinaagyukøø. ⁴¹ Jøts ja kyø' ja tmajstøø jøts ja jade'en pyidi'jky; winetnømts ja twaadsøøy ja Pedro ja myigu'ukti midi ja kyajxpidsøøm jøts nayide'en ja ku'økytø'øxtyi, xjats ja twin'ejxtøø, tødam yjujkyjky ja oo'kpi wyinaty.

⁴² Ñija'wigyøxtøø niduki'iyi ja Jopit kajp jaa'y, xjats namay tjanchja'widøø ja Jesús. ⁴³ Nay jam idø'øn ja Pedro tyaa'ni kawinaak xøøw jam po'ogoo'tspi tyøjkwindump, ja' idø'øn ja xyøøw Simón.

10

Ku ja Pedro tmigajpxy ja soldadi windsøn pøn yiktejp Cornelio

¹ Jam idø'øn tu'uk y'ijty ja yaa'dyøjk ma kajp jam txøøwi Cesarea, Cornelio dø'øn ja xyøøw, ja'ats idø'øn ja soldadidi tukpiky tñiwindsøn'ajtp pøn yikxøømøødyøø Italiáni. ² Xjats ja Cornelio møøt ja y'u'nk møøt ja ñidø'øxy, yjanchja'myatstíp idø'øn ja Dios Teety ja', jøts nayide'en twindsø'ogidi.

Ajot'ajttip idø'øn ja Dios jabom jabom, jøts nayide'en tjanchtabudøjkidøø ja myeeñ ja ayooobi jaa'y. ³ Tu'uk idø'øn ja xøøw sã yjajty sã kyubejty ja Cornelio, ku ojts wa'ats t'ixy awinmaa'ngyøjxp ja Dios Teety y'ankilis, tigøøk yaxpin idø'øn wyinaty ku ojts ñidøkiyi mã ja jap wyinaty, winets ja xøøw ja tymagajpxiyøø:

—iMets Cornelio!

⁴ Winets ja Cornelio tsø'øgijawi twin'ixy, jøts t'adsøøy:

—¿Ti, teety?

Xjats ja ankilis ojts ñii'mxyiyi:

—Tø ja Dios Teety ja m'ajot'ajtin mgupøjkxiyi, jøts ku tø xpudøki nayide'en ja ayooobi jaa'dyi. ⁵ Kax mgugajpxy jøts jam ñøjktit Jope, wan ja Simón t'atswawdi pøn nayide'en yiktejp Pedro. ⁶ Jam ja myidsøøni po'ogoo'tspi wyindump pøn yiktejmip nayi Simón, pøn jam tsinaapy mejy wingon. Ja'ats mdukmadoowiyip pøni ti mdu'ump.

⁷ Xjats ku ja ankilis ñøjxnaã, winets ja Cornelio twaadsøøy ja tyumbi namajtsk. Wyaadsoow nayide'en ja soldadi tu'uk pøn ja møøt ñamyayi, jøts pøn nayide'en twindsø'jkip ja Dios Teety. ⁸ Xjats ja ttukmadoogijxy ja kyugajpxtyi sã jaty ja ankilis ja wyinaty tø ñii'mxyiyi, winetnimts tkejxy.

⁹ Xjats ku kyimjabom'ajty, jawaani jam kyaja'tnidi kajpjotp mã ja yikaxtøø kugajpxy'ajtpi, winets ja Pedro pyejty jam tøjköjxp dios'ajot'ajtpi, kujk xøøw et idø'øn wyinaty. ¹⁰ Janch yu'oo'knip idø'øn ja wyinaty jøts ja kyaawya'añ; japnimts ja kaaky wyinaty y'øyi, ku jotmøñ t'ejxpaajty jade'en kidi jaa'y kyumaa'y, ¹¹ ku ja tsajp y'awa'ach jøts t'ixy ñaxkida'aky, jade'en ja t'ixy kidim ja møj manti, jøts tum wendi maktaxk iskiin. ¹² Jøts jam mantikøjxp mayjøøjp ja jiyujk t'ixy, jam ja tsaa'ñ, jam ja joon, jøts jam nayide'en ja maktaxkpi tekpyi jiyujk. ¹³ Winets tmadøøy ja ayuujk midi tsoo'mp tsajpjøtpy, jøts ja yide'en ñii'mxyi:

—Pidø'øk Pedro, yik'ook inet yø jiyujk tu'uk jøts xtsu'utst.

¹⁴ Xjats ja Pedro t'adsøøy:

—Ka' teety jade'en; niwindiøts jade'en ngatsu'uch ja kya'øybi kyawa'atspi, midi kapaat'ajtiyip yiktsu'utst sam ja Moisés kyutujk.

¹⁵ Xjats jadigojk tmadøøy ja kajpxy ja ayuujk, jøts wya'añ:

—Kidi jade'en xka'ødyij, tum mbaat'ajtip yø jiyujk tsu'uch midi Dios Teety tø ttanibiktaagi.

¹⁶ Tigøøk ojk idø'øn ja manti wyimbijty y'adijy, jøts pyatøjkiñaã nay jap tsajpjøtpy. ¹⁷ Ixjam ja Pedro jade'en wyinaty myay tyajy, ti dø'øn ja tyijpy jade'en midi wyinaty tø t'ixy ku ja Cornelio kyugajpxy yja'ttøø, tø ja wyinaty tyiknidøøwidi ja Simón tyøjk. ¹⁸ Kuts ja jam yja'ttøø tøk'agi'py, winets møk tkugajpxidøø pøni jap ja Simón midi nayide'en yiktejp Pedro. ¹⁹ Kumi ja' wyinaty ja Pedro myimaapy myidajpñim midi wyinaty tø t'ixy, winets ja Espiritu Santo ñimaajyøø:

—Nidigøøk ixyam ja jaa'y m'ixa'ayiyi. ²⁰ Pidø'øk, winak jøts xmøødit yø jaa'y, kidi ti xpawinmay, nay øts yø' ngugajpxy.

²¹ Xjats ja Pedro tniwinajky mã wyinaty ja Cornelio kyugajpxy y'awejxti, jøts ja tniimaay:

—Øts meets idø'øn x'ixaapy. ¿Ti dø'øn mnimendip?

²² Xjats ja kugajpxy t'adsoodøø:

—Ja Cornelio øø xyikugajpxy'ajtp, janch øy jaa'y ja' jøts nayi wyindsø'jkip ja Dios ja', xjats nayide'en janch tsojkip ja' ja israelit jaa'dyi. Nay ja Dios Teety idø'øn y'ankilis ja tniimaajyøø jøts me myikwa'at, jøts jam njaa'mint mã ja

chøøni ja Cornelio, jamts mets x'atstukmado'ot põni ti jaty me mnija'wip, jøts ti jaty mmadya'akwampy.

²³ Xjats ja Pedro tkuwaa'wiña tyøjkjøtpy, jøts jamyi myaadøø. Xjats ja kyimjabomnim choo'ndøø, winets ja Pedro twaay ja myijanchja'wibi winaagin midu jam Jope tsinaadyip.

²⁴ Jøtsnim kyimjabom yja'ttøø jam Cesarea, ma ja Cornelio y'awixxyiyi niduki'iyi møøt ja myigu'uktøjkti, midu wyinaty tø twaadsowdi jøts ja tpatmado'odit ja Pedro kyajpxy y'ayuuik. ²⁵ Kuts ja jam tyimya'ttøø ja Pedro, xjats ja Cornelio y'adsooyiøø jøts ja pyidsimy tyøjkjøtpy, xjats ja jatyi ñagyuxendyaajki ja Pedro wyingujky, jøts ja jade'en yikwindsøøgi ejxim ja diosin. ²⁶ Winets ja Pedro jatyi twejtsji'iky, yide'en ja wyaan:

—¿Tiku ø xwinguxaani? Pidø'øk, pø nay jaa'yts øts nayide'en sa mets.

²⁷ Jøts nay madyaktipnim idø'on ja wyinaty, ku jap tyøjkidøø tøjkjøtpy ma wyinaty ja jaa'y jap yjanch'awejxti namay. ²⁸ Xjats ja Pedro tnimaay yide'en: —Meets migu'uktøjkti, mnija'wip meets jøts ku øøts wenk n'israelitjaa'y'aty, ka'ap øøts n'øyjawi jøts øøts nmigu'uk tmøøtnabyaattit ja wenk jaa'dyi uk tyøkidit ja' tyøjkjotpti, ka'ap øøts ja n'ødyiy, ka'ap øøts ja nwa'atstijy. Tøts øts Dios xuknijawi, jøts ku ka'ap jade'en y'øyi jøts øts jade'en nwinma'aty. ²⁹ Ja'agøjxp ø nmiñ jatyi ku mee xwaadsøø. Jøts nnijawiwypy øts ixyam ti meets idø'on xamigajpxwamp ku meets xwaadsøø.

³⁰ Xjats ja Cornelio t'adsøø, yide'en ja tnimaay:

—Ixyam myimaktaxk xøøwiñi ku øts yide'en njajty, ya øts wyinaty ndøjkjøøjty n'ayuu'aty, jøts ja Dios wyinaty n'ajot'aty winakxyøøw, ku øts jotmøñ n'ejxpaajty tu'uk ja yaa'dyøjk, jøts janch tsamamp ja wyet amuum kyaxi'iky. ³¹ Winets øts yide'en xnimaay: “Mets Cornelio, tø ja Dios Teety ja mdios'ajot'ajtin mgupijkyiyi, jøts ku tø xpudøki nayide'en ja ayoobi jaa'dyi. ³² Kax mgugajpxy jøts jam ñøjkxt Jope, wan ja Simøn t'atsway pøn nayide'en yiktejp Pedro. Jam ja myidsøøni ja po'ogoo'tspi wyindump midu jam tsinaay mejy wingon. Ja'ats mdukmadowiyip põni ti mdu'ump.” Jade'en øts idø'on ja ankilis xnimaay. ³³ Paty øts ngugajpxy jatyi nguejxy jøts me m'atsyikwa'at, pø janch øy ku tø xpaduñ ku tø mmiñ ya. Wa'ats ja Dios Teety x'ixxyim xnija'wa'am ku adøm ixyaadi, ku øø nbatmadoowa'añ ja nwindson'ajtim kyajpxy y'ayuuik midu ja tø mdamigaxiyi, jøts mets ja ya jade'en xnigajpxt.

Ku ja Pedro kyajpxwa'kxy jam Cornelio tyøjkwindump

³⁴ Winets ja Pedro kyajpxniøjkøø, jøts ja yide'en wyaan:

—Ixyam njanch'ixy njanchnijawi ku ja Dios Teety chøjkpy ja' øpyønjaa'yi, ka'ap ja' tka'øyjawi, ³⁵ kyupijky ja' põni pøn windsø'jkijiyip, jøts y'øyjaa'y'attit nayide'en. ³⁶ Dios Teety idø'on jade'en ojts ttukmadøy ja Israelit jaa'y, ku xmi'øy'atwa'añindi jadigojk ja Jesucristo køjxp pøn nwindson'ajtyindip niduki'iyi.

³⁷ Pø mnija'wipxi meets niduki'iyi sa yjajty sa kyubejty jam israelit jaa'y y'etjotpti, jam idø'on cho'ondaajky ma et txøøwi Galilea, tø wyinaty ja Juan Bautista jawyeen kyajpxwa'kxy, xjats ja jaa'y ja nayide'en namay tyiknøbejty.

³⁸ Ja pø mnija'wipxi meets nayide'en ku ja Dios Teety ja Jesús ttukatøjkøø ja Espiritu Santo møøt ja myøk'ajtin, jøts nayide'en sa jaty ja wyidity ku ja t'ødyuñ ja jaa'y, jøts ku ja tyiktsø'øky põni pøn ja miku' møøt y'itynim. Ja'agøjxp ja jade'en ttuun ku ja Dios Teety ja ejtp tmøøt'ity. ³⁹ Øøts idø'on tø n'ixy, øøts idø'on tø nnijawi, sa jaty ja Jesús ttuun jam Israelit kyamwemp kymajotpti, jøts nayide'en jam Jerusalengit jaa'y myøjkajpjotpti. Jøts nay tø

øøts ja n'ixy sã jaty ja yjajty ku yik'o'jkiyøø ja jaa'y, jøts sã yikmitsumblejty jam kruskøjxp. ⁴⁰ Winets ja Dios Teety ojts kyidigøøk xøøw tyikpidsiimy jap oo'kpi jutjøtjy ma ñajxøjkøø ja Jesús, xjats øøts ja xukyikwingaxi'jky. ⁴¹ Ka'ap ja yiktuk'ejxtøø ja mayjaa'dyi, øøts yide'en yø xukyikwingaxi'jky, kumi tø øøts ja wyinaty jawyeen xwi'ixy, jøts øøts ja n'ext, jøts øøts ja nnijawit. Xjats ku ja jade'en jadigojk yjukpyijky, jøts øøts ja ngaay jøts øøts ja n'uuky møøt. ⁴² Xjats øøts ja xani'ane'emy ja kajpxwa'kxk, jøts øøts ja jaa'y ndukmado'ot nduknijawit ku ja Dios Teety ja kø'øm tpiktaajky ja Jesús, jøts ja jujukpyi ja øøkpyi ttiidyu'unt. ⁴³ Nayide'en idø'on wyinaty jekyip ja Dios Teety kyugajpxy tø tkajpxti tø tmadya'akti ja Jesús, jøts pøni pøn tjanchja'wip ja Jesús, winets yikmaa'kxuktit ja pyøky. Jade'en ja Pedro ja tniimaay ja jaa'y.

Ku ja Espiritu Santo ttatøjkøø pøn ka'israelit jaa'yidi

⁴⁴ Ñagyajpx'adøtsp wyinaty ja Pedro, ku ja Espiritu Santo tyatøjkiyidøø niduki'iyi ja jaa'y, pøn jaty jam wyinaty patmadojyyp ja Pedro. ⁴⁵ Xjats ja israelit jaa'y pøn ja Pedro tpadsoo'niyidøø ku ojts ja kugajpxy jam wyayidi, winets ja ñigyumaap tjanchja'widøø ku ja Dios tyuktatøjkiyidøø ja Espiritu Santo øpyønjaa'lyi, pøn ka'ap israelitjaa'yidi. ⁴⁶ Ja'agøjxp idø'on ja ojts yikniyawit ku ja adsu'jky ojts tjanchkajpxti tum ja wenk ayuujk, jøts ku ja nayide'en tjanch'øyja'widøø ja Dios. ⁴⁷ Xjats ja Pedro tniimaay ja myigu'uk midi myøøtwidijty:

—¿Ti pøn mibaat' xkadukyiknøbajtimp yø jaa'y, pø tøxi Espiritu Santo tyatøkiyidi jade'en sam adøm?

⁴⁸ Xjats ja Pedro tni'ane'jmy jøts ja ñøbattit ja nwindson'ajtim Jesucristo myø'ajtingøjxp. Jøts ja Pedro møkta'aky yikniimaay, jøts ja jam yjaakta'ant ja winaak xøøwin.

11

Ku ja Pedro ttamimadyaajky ya'atpi ayuujk pøn tjanchja'widip ja Jesús jam Jerusalén

¹ Xjats ja tnija'widøø ja Jesús kyudanaabyidi pøn jam tandi Judeit y'etjotp, jøts ku ja wenk jaa'y wyinaty tø tkupiky ja Dios kyajpxy y'ayuujk pøn ka'ap y'israelitjaa'yidi. ² Xjats ku ja Pedro jadigojk wyimbijty jam Jerusalén, winets ja twindsø'ødyøø ja Pedro:

³ —¿Tiku ja tø x'ats'ixy ja wenk jaa'y pøn ka' y'israelitjaa'yidi, tiku møøt tø m'atskay m'atsjiikxy?

⁴ Xjats ja Pedro tniimadyajktøjkøø sã ja yjajty sã ja kyubejty ku ja ojts yikway yikwich, jøts ja wyaan:

⁵ —Jam ø wyinaty Jopit jaa'y kyajpjotp, jøts Dios'ajot'ajtpi wyinaty, jøts jade'en nja'wøø kidi ja jaa'y kyuma'ay, jade'en n'ejxpaajty ejxim ja møj mantí, ku n'ijxy kyidã'aky tsajpwemp tum wendi maktaxk iskiini, jøts wyingøøn mã øts jap wyinaty. ⁶ Xjats nwin'ijxy yikxon ti dø'on jap mantijøtjy, winets jap n'ejxpaajty janch mayjøøjp ja jiyujk, jap wyinaty tsaa'n, jap wyinaty joon, jøts nayide'en ja jiyujk midi maktaxk ja tyeky, jøts nayide'en midi janch'awa'andi. ⁷ Winets nmadøøp ja ayuujk ku ø xnimaay: “Pidø'øk, Pedro; yik'ook inet yø jiyujk tu'uk jøts xtsu'tutst.” ⁸ Jøts ø n'adsøøp: “Ka' teety jade'en. Niwindii øts jade'en ngatsu'uch ja kya'øybi kyawa'atspi, midi kapaat'ajtyip yiktsu'tutst sam ja Moisés kyutujkin.” ⁹ Winets øts jadigojk xmigajpxy jøts øts xnimaay: “Midi ja Dios tø tyikwa'ach kidi xka'ødyijy.”

¹⁰ Tigøøk ojk idø'on ja mantí wyimbijty y'adijy, jøts pyatøjkiñaã nay jap

tsajpjøtpy. ¹¹ Xjats ku øts jade'en njaity, winets nay jatyi yja'ttøø nidigøøk ja yaa'dyøjktøø ma øts ja wyinaty, Cesarea dø'on ja choondi jøts jam ñøjkxti ma øts ja xpaattøø. ¹² Winets øts ja Espiritu Santo xnimaay jødsik øts ja kugajpxy nmøødidit, jøts ku nayide'en ka'ap ti nbawinma'aty. Winets ø xpadso'ondi niduduik ja Jopit jaa'dyi pøn tjanchja'widip ja Jesús. Xjats ku øøts jam nja'jty Cesarea, winets øø niduki'iyi ndøjkøø Cornelio tyøjkjotp pøn ø xnigajxøø. ¹³ Winets øøts ja xukmadøøy sa ja yjajty sa ja kyubejty jam tyøjkjotp, ku ja ankilis tu'uk t'ejxpaajty, jøts ku ja ñimaajyøø: "Kax mgugajpxy jøts jam ñøjkxt Jope, wan ja Simón t'atway mididi nayide'en yiktejp Pedro. ¹⁴ Ma'ats mdukmadowiyidip sudso m'anmija'win y'awa'atspidsø'ømdit møøt ñmigu'uktøjkti." Jade'en ojts ñi'mxyi. ¹⁵ Xjats ku ojts nmigajpxnibøki niduki'iyi, winets ja Espiritu Santo tyatøjkiiyidøø, nayide'en sam adøm xatøjka'andøø ku ojts myiduk'oik tyimiyi. ¹⁶ Xjats ku øts jade'en n'ijxy, winets øts jatyi nja'myejch ja nwindson'ajtim y'ayuujk sa ja wyaan ku ja Juan Bautista mayjaa'y nøø ttuktanøbejty, jøts ku ja wyaan: "Wenk mee mjatt, jade'en ku Espiritu Santo mdatøkiyidit." ¹⁷ Pøni tyuktatøkiwyampy ja Dios Teety ja y'Espiritu Santo ja wenk jaa'dyi jade'en sam adøm xuktatøjka'andøø, kumi adøm njanchja'windip ja Jesús, ¿ti øts ja jade'en ngaduktunip? Tsaachtyi øts idø'on, pø kø'ømx i ja jade'en ttunwa'añ.

¹⁸ Ku ja jade'en tmadoodøø ja Pedro y'ayuujk, winets y'amongøjxtøø jøts yjotkujk'ajttøø, jøts ja Dios Teety tmøjpiktaajktøø, jøts yide'en wyaandøø:

—Tø ja Dios Teety ttanibiktaagi jøts nayide'en yikunuu'kxtit øpyønjaa'y ku ja tmajtstu'uttit ja kya'ødyunk, winets ja tsinaa'yin xemikøjxp tpaattit!

Ku ja jaa'y ja Jesús tjanchja'wi'okwa'añ jam Antioquia

¹⁹ Ku ja Esteban t'ukuik'oo'ktøø, winets t'ixaañibøjkidøø pøn ja Jesús tjanchja'widip, xjats ja winaagin kyaknøjkxtøø Fenicia, Chipre, jøts nayide'en Antioquia. Japts ja tkajpxwa'kxtøø ja øgyajpxy ja ømyadya'aky. Ka'ap ja nugo ajawi tñidyukmadowdi o pøn, agø'ømyi ja tñadyamimadya'agyidi tuk'israelit jaa'dyi. ²⁰ Xjats winaagin ja'adi mididi jam tsoo'ndip Chipre jøts nayide'en Cirene, ku ja nay jam yja'ttøø Antioquia winets ja nayide'en tkajpxwa'kxtøø ja øgyajpxy ja ømyadya'aky, mididi anmija'win tyiknitso'ok'ajtp, ja'ayi tyukmadoodip pøn ka'israelit jaa'dyi. ²¹ Janchkunuu'kxidi ja Dios ja' ku ja kyajpxwa'kxti, winets ja japit jaa'y tjanchyiktigatstøø chinaa'yindi, jøts ja nwindson'ajtim yja' tpabøjkiñidøø.

²² Xjats ku ja jade'en tñija'widøø ja Jesús yjanchja'wibidi pøn jam tsinaadyip Jerusalén, winets ja tkaxti nay ja' myigu'ukti pøn txøøw'ajt Bernabé, jøts jam ja ñijxy Antioquia. ²³ Xjats ku jam yja'jty, jøts ja t'ijxy jøts ja tñija'wøø sa ja Dios Teety wyinaty tø tkunuu'kxy ja Antioquiit jaa'y ku ja chinaa'yin wyinaty tø tyiktigatsti, winets ja janch yjotkujk'ajty yjanchxondaajky. Xjats ja tkajpxjot'amøkøø jøts amumjoojt ja nwindson'ajtim yja' tpaduujnidit, jøts nijuuni tkamajtstu'uttit. ²⁴ Janch yuyi idø'on ja Bernabé, yjanchmøøt'ajtpy ja Espiritu Santo, jøts nayide'en ja Dios t'ajot'ajty. Xjats jade'en ja namay jaa'y tpabøjkidøø ja nwindson'ajtim yja'.

²⁵ Xjats ku ja jade'en yjajty kyubejty ja Bernabé, winets ja ñøjkxkojmaa ma txøøwi Tarso jøts ja t'ats'ixa'at ja Saulo. Kuts ja jam tpaajty, winets ja twaanijxy ma ja wyinaty tø tñidsøñ jam Antioquia. ²⁶ Japts chinaadyøø tu'uk jumøjt ka'pxy møøt ja janchja'wibidi jøts ja tyik'ixpøktøø. Nay jam idø'on Antioquia ma ojts ja Jesús yjanchja'wibi yiktejti mijawyeen cristianos.

²⁷ Nay ja'abi xøøw nay ja'abi jumøjt ku ja Dios Teety kyugajpxy ojts ñijxky nay jam Antioquía, pøn jam tsoo'ndip Jerusalén. ²⁸ Xjats ku yja'ttøø, jøts tu'uk txøøwi Agabo, ja' idø'øn jam ojts tyanaay'øyi mayjaa'y agujkp, jamts ja kyajpxwa'kxy Espíritu Santo myøk'ajtingøjxp, jøts wyaañ jøts ku ja yuu møk'ampy myeenwá'añ ya naxwiiñ. Janch tiy yide'en, janch jajt idø'øn ja jade'en winet ku Claudio wyinaty myøjwindsøn'aty. ²⁹ Xjats ku ja jade'en ja janchja'wibi tmadoodøø ku ja yuu myenwá'añ, winets ja tkajpxy'ajttøø jøts pudøjkin ttanigaxtit ja myigu'uk pøn jam tsinaadyip Judea, jade'en pøni sa kø'øm tmo'owa'andi nidu'uk nidu'uk. ³⁰ Jade'en ja tundøø, jøts ja ttanigajxidøø ja Bernabé møøt ja Saulo, jøts jam tkømo'odit ja jamit møjaa'dyøjkti.

12

Ku ja Herodes tnankiyik'o'jkøø ja Jacobo jøts ja Pedro ja'ayi yiktsuumy

¹ Xjats nay ja'abi xøøw nay ja'abi jumøjt ja møj windsøn Herodes tjem-dunibøjki ttedunibøjki winaaggin ja Jesús yjanchja'wibidi. ² Jøts ja ttukta'ø'jky ja yønchujx ja Jacobo, ja Juan y'ajch, ³ jøts ja t'ijxy ku ja israelit jaa'y ja yjawí jade'en ttaxonda'akti ku ja jade'en y'adi'ich. Xjats ja Pedro yjaaktyimykmaajch paski xøøjøjty, winet ku ja tsapkaaky jadi'ini yikay midí kalevadurimøøt. ⁴ Xjats ku jade'en ja Pedro yikmajch, winets ja windsøn Herodes ja pyiktaajkiyøø puxøjkjøtpy, japts soldadi ja y'ejx'ityiyi maktaxk piky jøts maktaxk soldadi tukpiky jaty. Jade'en ja Herodes yjawnimaay jøts ja tyikpidsø'ømt ja Pedro paski xøøguixy, jøts ja mayjaa'y ttuk'ejxwá'añ ttuknijawiwya'añ. ⁵ Jap wyinaty ja Pedro tsumy, jøts nayide'en ejtp idø'øn ja y'ejx'ityiyi ja soldadi, winets ja Jesús yjanchja'wibi tni'amidowidi tniøktsowidi ja Pedro amumjoojt, jøts ja ttukmadoodøø ja Dios.

Ku ja Dios Teety y'ankilis ojts tyik'awa'atspidsimy ja Pedro jap puxøjkjøtpy

⁶ Nay ja'abi tsuu ku wyinaty tyimbyaatwaañi ja kajpx'aats ku ja yikpidsømiyit jøts ja kajp jaa'y y'ejxit ñijawiyit, jøts jaakmaap jap wyinaty ja Pedro. Jap wyinaty adsow aduuk ja soldadi ñama'ayiyi, puxkadeen kxøøch wyinaty ja Pedro, jøts nayide'en ja soldadi t'ejx'etti ja tøk'aaw. ⁷ Winets jatyi ñimejniyøø ja nwindsøn'ajtim y'ankilis, jøts jap puxøjkjøtpy yjajpøjkijxy. Xjats ja Pedro yikjijxy jøts ku tyikniwijy, winets tniimaay yide'en:

—Pidø'øk putyi.

Kuts ja pyidi'iky jøts ja kadeen jade'eñi kø'øm kyajnaa, ⁸ xjats ja ankilis ñimaajyiyøø yide'en:

—Nachumjønnyi yikxon, jøts tawa'agi yø mgø'øk.

Xjats ku ja Pedro jade'en tpaduuñ, jøts ja ankilis yjaakniimaajyøø:

—Tatøki yø mxox jøts øts ix'oojk xpayø'øty.

⁹ Xjats ja Pedro ix'oojk tpadøø'ñ ja ankilis, ni tkanijawi pø janch kajanch ku ja yik'awa'atspidsømwá'añiyi. Jade'en jajtj ja tjawi ja Pedro kidi jaa'y kyuma'ay. ¹⁰ Xjats ku ja jade'en yiktsoo'niyøø ja ankilis, jøts jam ñaxti ma myidukpiky ja ejx'ejtpidi, jøts nayide'en twinaxti ma ja myimajtsk pikpyi ejx'ejtpidi, jøts jam yja'ttøø ma pux'agaj jam tuu' pa'am, winets ja pux'agaj kø'øm y'awaajch jøts pyidsømdøø. Xjats ku jade'en y'awa'atspidsømdøø, jøts yjaagyø'odyi jadu'ukpi tuu', japnimts ja Pedro ojts yikmajtstu'uty nadyu'uk.

¹¹ Xjats ja tjanchja'wøø ku ja y'awa'atspidsimy, jøts yide'en wyaañ:

—Pø janch jade'endamxi dø'øn ku ja nwindsøn'ajtim tø tjanchkexy ja y'ankilis jøts øts ja xyik'awa'atspidsø'ømt jap puxøjkjøtpy, jøts ja israelit

jaa'y m00t ja wyinds0n Herodes jade'en t0 xkamimajada'akti p0ni sa 0ts ja' xtyimyja'uktunwa'andi.

¹² Jade'en ja Pedro wyinmay, xjats ja ñijkxy jam María ty0kwindum midi ja Juan tyaagip, ja Juan midi nayi yikx00m00py Marcos. Ja' id0'0n ja tyaak ty0kwindum ñijkxy ja Pedro ma ja mayjaa'y jam wyinaty t0 ñamyukyidi, j0ts id0'0n ja jam Dios'ajot'atti. ¹³ Kuts ja Pedro twing0jxy ja t0k'agi'pyit agaj, winets ja kiixy Rode pyidsiimy t0jxj0tpy, j0ts ja ojts tpatmad0y p0ni p0n ja'. ¹⁴ Xjats ku ja ojts tyukmad0y kudam ja Pedro kyajpxy, nika'ap ja t0jk tyik'awaajch, janch jotkujk ja wyimbijty yukw00ñ chapw00ñ, j0ts ja myigu'uk ja t'atstukmado'ot ku ja Pedro jap kyajpxy. ¹⁵ Xjats ja myigu'uk ñimaajiy00:

—iP0 mguma'aymadyakp mets!

J0ts ja kiixy ja tyimyjanimaay ku ja tyimdyiy tyimyanchi. Xjats ja ka'ap tyimyb0kti tyimwyandip ja':

—iKa'ap inet y0 yja'aji; p0 ja y'ankilis y0' midi nitanaajiyiyip!

¹⁶ Ixap ja Pedro j0p'ijxy ty0kwing0xy. J0ts ku ja tyik'awatst00 ja t0jk'aaw, j0ts p0 ma ja tyimya'jtt00 ku ja twingu'ejxid00 j0ts kudam ja yjanchja'aji. ¹⁷ Ja'ayi ja Pedro ja ky0' tnanke'ejx00 j0ts ja tukween y'ettit am0ñi, winets ja tñimadyajknib0jk00 sa ja yjajty sa ja kyubejty ku ja nwinds0n'ajtim ojts yjuudyi jap pux0jkj0tpy; xjats ja nayide'en t'uknimaañaa j0ts ja ttukmado'odit ja Jacobo, nayide'en ja Jesús yjanchja'wibidi, j0ts ja tñijawidit.

Xjats ku jade'en t'uknigajpxk0jxnaa, winets ja choo'naa j0ts ja ñijkxy abikyajp.

¹⁸ Xjats ku kyimjabom'ajty ku xyiñj00, winets ja soldadi ñigyumaap ñayja'wiyid00 ku ka'ap ja Pedro jap ukp0ni. ¹⁹ Xjats ja Herodes m0k pya-gajxiyid00 j0ts ja t'ats'ixa'adit, ka'ats ja ma t'ukpaatnid00. Xjats ja Herodes wyaadsojiyid00 niduki'iyi j0ts ja tyuknigajpxwa'añidi sudso'ampy ja Pedro pyidsiimy, winets ja Herodes ja yik'oo'kiñid00. Xjats ku ja jade'en y'adiijch, winets jam choo'naa Judeit y'etjotp, j0ts ñ0jkxnaa tsinaabyi jam Cesarea.

Ku ja Herodes y'0jky

²⁰ Xjats ja m0j winds0n Herodes janch mi'ajkip ja jaa'y ja' p0n jam tsinaadyip Tiro j0ts nayide'en Sid0n. Xjats ja Tiro t'aa'y m00t ja Sid0ngit jaa'y tkajpxy'ajtnid00 sudso ttu'undit sudso tyaabyaattit. Winets ja kyuga-jpxy tkajxt00 j0ts ojts tpaatti ja Herodes kyudsinaabyi p0n tx00w'ajt Blasto, ja'ats ojts tñ0jmidi j0ts tñ0jmit ja wyinds0n Herodes, j0ts ka'ap cheptu'undit j0ts jotkujk ch00nidit, ja'ag0jxp ja jade'en tñimaady00 ku ja yji'kxy jam tjuydi tkajpxti ma Herodes yikutuky. ²¹ Xjats ja Herodes twaads00y ja namayjaa'y, j0ts jap mye'endit ma kya'amaadyaajk, xjats ku ja jade'en myeng0jxt00 ja jaa'y, winets ja ttat0jki ja xyox midi amuum tsamamp, winets kyajpxwa'kxnib0jk00 jam mayjaa'y wyingujkp. ²² Xjats ja mayjaa'y jade'en ñigyumaap tjanchja'widi ku ja jade'en kyajpxwa'kxy, j0ts ja xem yam m0k yjanchn00mdi:

—Y0' ixja kyajpxwa'kxy ka'ap y0 yjaa'yi, dios y0'.

²³ Xjats ku jap wyinaty kyajpxwa'kxy, winets ojts jatyi ja nwinds0n'ajtim y'ankilis yikpa'ambaadyiyi, ja'ag0jxp jade'en yjaty ku k0'0m ñamy0jpikta'agyiyi, j0ts ku ja Dios ne'egi tkam0jpikta'aky. Ku ja jade'en pyiky, tin0'ok id0'0n jam y'am yjotp t0jkiñaa, ja'ats jadi'iñi tsu'tsk0jxniy00.

²⁴ Winets ja nwinds0n'ajtim y'ayuuik my0jtak'ad0tsnaa, yikajpxwa'kx ja omagajp.

²⁵ Xjats ku ja jade'en tyungøjxtøø ja Bernabé møøt ja Saulo, ku ja tminaxti tmidøkidi ja pudøjkin, winets ja jap choo'nidøø jøts ñøjxknidøø Jerusalén møøt ja Juan midi nayide'en yiktejp Marcos.

13

Ku ja Bernabé møøt ja Saulo myiduk'ojk choo'ndøø kajpxwa'kxpi

¹ Jam Antioquia wyinaty namay ja Jesús yjanchja'wibidi, jam ja kyuga-jpxy'ajtpi jøts nay jam ja yik'ixpøjkpidi. Ya'at idø'øn jade'en yiktejp Bernabé, jøts ja Simón (midi nayide'en yiktejp Negro), nayide'en ja Lucio ja Cirenit jaa'y, jam ja Manaén (midi yaakti tuknax møøt ja Herodes midi windsøn'ajt jam Galilea) jøts jam nayide'en ja Saulo. ² Tu'ukpi xøøw idø'øn ya'at jaa'y jade'en ñamyujkidøø jøts ja nwindsøn'ajtim twindsø'jkidøø, ayuu'ajttip idø'øn wyinaty ku ja Espiritu Santo wyaañ:

—Jigaxti yø Bernabé møøt yø Saulo, jøts ttu'undit midi øts yø tø ndani'waadsowidi.

³ Xjats ku jade'en Dios'ajot'ajt'abajtiddøø ayuu, xjats ja myigu'uk t'ukønixajkøjxnidøø, winets ja yikajxtsoo'nidøø.

Ku ja Jesús kyudanaabyi kyajpxwa'kxtøø jam Chipre

⁴ Xjats ku jade'en ja Saulo møøt ja Bernabé yiktsoo'niñidøø ja Espiritu Santo, winets ñøjxktøø ma jam txøøwi Seleucia. Jamts ja barki ttatøjkidøø jøts ñøjxktøø jam Chipre. ⁵ Xjats ku jam yja'ttøø ma ja barki wya'k'øyyøø ma jam txøøwi Salamina, winets ja tkajpxwa'kxniðøjkidøø ja Dios kyajpxy jam tsaptøjkjotp. Jøts nay jap ja Juan tmøødidi, ja'ats ja pudøjkiyidøø. ⁶ Xjats ja jade'en ja Chiprit naajx ttayø'øñaxtøø, jøts jam yja'ttøø mejy wingon ma txøøwi Pafos. Jamts tpaattøø tu'uk ja israelit jaa'y pøn txøøw'ajt Barjesús, yik'adujkp ja' jøts nayide'en xyimay. Dios idø'øn kyugajpxy ja ñadyijyi jøts ja jaa'y tjanchwin'iñ. ⁷ Jam idø'øn ja tyuñ møj windsøn wyindump pøn txøøw'ajt Sergio Paulo, janch wijy janch kejy idø'øn ja windsøn. Winets ja tnigajxøø ja Bernabé møøt ja Saulo, yjanchmadoowampy idø'øn ja' ja Dios kyajpxy y'ayuujk jøts ja tyukmadowiyit. ⁸ Xjats ja yik'adujkpi midi nayide'en yiktejp Elimas t'agajpxøø ja møj windsøn, ku ka'ap tkupøkt pøni sa wya'andi ja Bernabé møøt ja Saulo. ⁹ Xjats ja Saulo pøn nayide'en yiktejp Pablo, yjanchmøøt'ajtpy ja Espiritu Santo ja', paty ja tjanchwin'iixy tiyim ja yik'adujkpi, ¹⁰ jøts ja yide'en tnimaay:

—iMets windaayibi jaa'y, kawindiy jaa'y mets, miku' mdeedyip, mi'ajkip mets ja' pøn øy tsinaadyip! ¿Tiku xyikutigøøwya'añ ja nwindsøn'ajtim kyajpxy y'ayuujk? ¹¹ Ixyam idø'øn ja nwindsøn'ajtim myik'ayo'ombaadiyit; kunim me mda'ant winjoox jøts may xøøw idø'øn jade'en xkawin'ext ja xøøw.

Xjats tyimyjaty tyaañ jade'en kugoots, winets t'ixaay pøni pøn tuu'wetsiyip. ¹² Xjats ku ja jade'en t'ijxy ja møj windsøn sa ja yjajty sa ja kyubejty ja yik'adujkpi, winets ja jatyi tjanchja'wøø pøni sa jatyi ja tyukmadoojyøø ja Saulo møøt ja Bernabé. Janch tyimñigumaap idø'øn ja tja'wiyi'iñ ku ja yik'adujkpi jade'en yjajtnaa ja nwindsøn'ajtin Jesús myø'ajtingøjpx.

Sayjajttøø sa kyubajttøø ja Pablo møøt ja Bernabé jam Antioquia midi tamp Pisiðiit y'etjotp

¹³ Xjats ja Pablo møøt ja yjamyøøt jam tyøjkidøø Pafos barkijotp, jøts jam ja ñøjxkti ma txøøwi Perge, nay jam Panfilia y'etjotpti; jøts ja Juan jamyi ja tminawya'kxidøø Pafos jøts ja ñøjxnaa Jerusalén. ¹⁴ Xjats ku jam ja

jade'en yja'ttøø Perge, winet jam choo'ngojmīdøø jøts yja'ttøø Antioquia, nay Pisidia y'etjotpti. Xjats poo'kxin xøøw winets tyøjkidøø jam tsaptøjkjotp, japtš y'ixaktøø. ¹⁵ Xjats ku ja jade'en yikajpxkixy ja nõky midi ja Dios kyutujk myøøt, jøts nayide'en sã wyandøø ja Dios kyugajpxtyi, winets ja tsaptøjk windsøn ojts ñimaajyidi ja Pablo møøt ja yjamyøøt:

—Meets migu'uktøjkti, kidi wan meets jap xmimiñ xmija'aty ja kajpxwejin, kidi wan meets xukmadowandip yø jaa'y, tukmadowdits.

¹⁶ Winets ja Pablo tyanaagyukøø jøts ja kyø' ja'ayi tñanky'ijxyi, ja' tyijpy jøts ja jaa'y y'amø'ondit jøts tpatmadø'odit, xjats ja yide'en wyaañ:

—Ukpatmadowdi meets Israelit jaa'y pøni pøn jaty ja Dios twindsø'jkidip: ¹⁷ Meets Israelit jaa'y niduki'yiyi pøn adøm ndios'ajtyindip, ja' ojts twi'ixy adøm n'apteety'amøjti jøts ja tpiaktakti adøm ndsinaadyaajkti janch mõj, winet ja yjajty ku wyinaty nay jam chøønidi Egiptit jaa'y y'etjotpti jade'en ejxim ja ja'at jaa'y; xjats ja mõk'amp jadigojk kø'øm ja Dios tyimykpidšøjmijidøø nay jam, ¹⁸ jøts ja tyiknaxtit jam tø'øts etjotp wixijkxy jumøjt, kuwañim ja Dios ja yikjuyky'ajtidø øy ja tpadundi tkabadundi ja Dios y'ayuujk. ¹⁹ Jøts ja nayide'en tyikudigøøy wixujk ja mõj kajp midi jam wyinaty ejttip mã txøøwi Canaán, jøts ja n'apteety'amøj yikmo'odit ja ñaajx. ²⁰ Xjats jade'en maktaxk magø'pxy jagujkp jumøjts ñitanaajyidøø kunim ja kugajpxy kyaxi'iky midi txøøw'ajt Samuel. ²¹ Xjats ja kø'øm t'amidoonidøø tu'uk ja windsøn pøn ja nitaniyidip, winets ja Dios tu'uk myøøjyidøø pøn txøøw'ajt Saúl, ja Cis y'u'nk, nay ja Benjamín y'ap, ja'ats wixijkxy jumøjt ttuuf. ²² Winets ja Dios jadigojk pyøkiyøø ja windsøn'ajtk, jøts ja nagyø'øm tpiaktaajk ja David, xjats ja Dios wyaañ: “Tø øts nbaaty ja David, midi ja Isai y'u'nk'ajtpy, yø' janch yujy janch tuda'aky, xpaduujnip øts yø' nja' pøni sã ø ndsøky.” ²³ Xjats ja Dios nayide'en tñajtskajxøø ja Jesús midi adøm n'Israelit jaa'y tyiknitso'ok'atp, yø' idø'øn ja David myigu'uk'ajtpy, kuts ja Jesús myiifn pø kø'ømxi wyinaty ja Dios tø wyanda'aky. ²⁴ Xjats ja Jesús namga'anym wyinaty tyundøki, winets ja Juan Bautista jawyeen tkajpxwa'kxy jøts ja Israelit jaa'y ttukmadøøy, jøts pyøkyu'unin tñajststuttit jøts ñøbatkøxtit. ²⁵ Xjats ku ja Juan Bautista y'oo'knãã, tø ja wyinaty tñøjmi ja Israelit jaa'y, jøts ku ja ka'ap yja'aji pøni sã ja wyinaty tñijawidi ku ja yiknitsokpi myiif, jøts ja tñimaay: “Ix'oojknim ja mye'ent pøn øts nijuuni møøt nganamyibaat'atiyit.”

²⁶ Xjats ja Pablo yjaakajpxwa'kxy, yide'en ja wyaañ:

—Meets migu'uktøjkti, pøni pøn jaty ja Abraham myigu'uk'ajtpy, jøts nayide'en pøni pøn ja Dios twindsø'jkidip, yø kajpxy yø ayuujk yø' adøm ndanitso'ok'ajttindip midi øts ixyam nnigajpxwampy. ²⁷ Ukmadooda'am, ja' pøn jaty jam tsinaadyøø Jerusalén nayide'en pøn ja wyindsøn'ajttøø, ka'ap ja tñija'widøø ku ja Jesús wyinaty tø kyexyi ja Dios Teety, jøts kyidyimwyinmadoodøø dø'øn ja kajpxy ja ayuujk midi ja Dios kyugajpxy wyinaty tø tjaadyañ, ja' idø'øn xyumikajpxtip etjp ku ja poo'kxin xøøw jam kyø'øm tsaptøjkjotpti; winets idø'øn ja kø'øm ttami'ambøjktøø ja Jesús, jøts ja jade'en ttuundøø sã ja Dios kyugajpxy tyiktaañ ja ayuujk. ²⁸ Xjats ku ja kø'øm tkamiwinmaa'nbyaattøø ti ja tyukpøky'ajttip jøts tyik'ookit, winets ja tñimaadyøø ja Pilato jøts ja Jesús tñankyik'oogiyit. ²⁹ Xjats ku ja jade'en ttundi tuki'yiyi sã ja Dios kyugajpxy tjaadyañ jap nõkyjotpy, winets tyikwinajktøø jam kruskøjxp jøts tyiknaxøjkidøø. ³⁰ Ja Dios Teetyts ojts kø'øm tyikjuykpyiky jadigojk jap oo'kpi jutjotpy. ³¹ Xjats ku pyidsimy, winets ojts jeky ñanky'ijxyiyi jam jaa'y wyindump midi myøøtwidejt ku choo'ndøø Galilea jøts ñøjktøø

Jerusalén. Ja' idø'ø'n ɪxyamdi pøn tkajpɔxtip tmadyaktip ja Jesús jøts ttukmado'odit ja jaa'y.

³² Jøts øøts nayide'en ɪxyam nnigajpxy nɪmadya'aky, jøts meets ndukmado'ot ja øy ayuujk sa ja Dios Teety tɔiktaajky ja wyandaajkin adøm n'apteety'amøjkøjxpti. ³³ Ja'agøjxp ku adøm ja n'apteety'amøj'ajtyindi, paty ja tø tɔaduñ ja Dios Teety ja wyanda'aky jøts ku ja tø tyikpidsimy jadigojk ja Jesús jap oo'kpi jutjøtpy, jade'en sam jap wya'añ myimajtsk salmojøtpy ku yide'en wyaañ: “Øts me n'u'nk'ajtpy, jøts tø mets mjujky'ajtin ɪxyam nmø'øy.”

³⁴ Xjats ja Dios jade'en wyinaty tø ttanibiktaagi jøts ku ja tyikpidsø'ømt ja Jesús jap oo'kpi jutjøtpy, jøts nayide'en ku ka'ap ja ñine'kx wyindigø'øty, jade'en idø'ø'n jap wya'añ ja Dios kyajpxy jap nøkyjøtpy: “Nayide'en meets ngunuukxt sa øts ja David tø nnøjmi.” ³⁵ Paty nayide'en jadu'ukpi salmo wya'añ: “Ka'ats me Dios Teety ja xyikjatt jade'en jøts øts nnine'kx wyindigø'øty, pø xtsøky'ajtpxi mets.” ³⁶ Janch tiy idø'ø'n ja' ku ja David ja yjaa'y ojts tɔudøki sa ja Dios ja wyinmaa'ñ myøjyøø, xjats y'oo'knaa jøts nay jam ñajxøjkiyiñ mǎ ja y'apteety'amøj wyinaty tø ñajxøkidi, jøts ja ñine'kx nayide'en wyindigøøy. ³⁷ Pønts ja Dios Teety kø'øm tø tyikjujkyiky jadigojk, ka'ap ja ñajxnine'kx ja jade'en tø wyindigøy. ³⁸ Meets migu'uktøjkti, kuwani xñijawidit ku ja Jesús ja' tu'ugyi xpojkpimaa'kxindip pøn meets ɪxyam myiktukmadoop. ³⁹ Ja'ayi dø'ø'n tu'umchi niduki'iyi tɔojkpimaa'kxp pøni pøn ja janchja'wiyip ja y'ayuujk, jøts ni ja Moisés kyutuik jade'en kyapojkpimee'kxy pøni pøn ja tɔadump. ⁴⁰ Øyim mnay'ejx'etidit jøts ka'ap jade'en mjattit sa ja Dios kyugajpxy tjaadyandøø, ku ja yide'en wyandøø:

⁴¹ Meets nixekpi taxekpidi, pø nigyumaap mee xjawit sa n'adø'øtst; pø ka' xjanchjawidit øy ja pøn kugajpxy mjadukmadøøyidi, pø jade'en ne'egi jøts mdyimgyudigø'ødyit.

⁴² Xjats ja Pablo jade'en ttukmadoogijxy ja israelit jaa'y sa ja Dios kyajpxy wya'añ, winets ja myigu'uk jap tmøøtpidsømnaa jam tsaptøjkjotp. Xjats ku jap pyidsømdøø, winets ja Pablo ñimaaajyøø pøn ka'israelit jaa'dyi, jøts nayide'en tnigajpxt nay ja'abi ayuujk jadu'ukpi poo'kxin xøøw. ⁴³ Xjats idø'ø'n jade'en ñawya'kxidøø jam tsaptøjkjotp, jamts wyinaty namay ja israelit jaa'y, jøts namay ja abikpyi jaa'y midì nayide'en tɔadundip ja israelit chinaa'yin, ja'ats niduki'iyi tɔpanøjktøø ja Pablo ja Bernabé, winets ja ojts yikajpxwejtì jøts yiknimaadyøø: “Ejtp idø'ø'n ja Dios kø'øm xtsøky'ajtyim paty ja Dios amumjoojt ja y'øgyajpxy xpaduujniyidit, jøts nijuuni xkamajtstu'uttit.”

⁴⁴ Xjats ku ja tɔaatkojmaa jadu'ukpi poo'kxin xøøw, ku ja tjanchpatmadowa'andi ja Dios kyajpxy, winets jawaani kyameengijxy niduki'iyi ja kajp. ⁴⁵ Xjats ku dø'ø'n ja israelit jaa'y jade'en t'ejxtøø, winets ja Pablo yiktami'amã'at'ajttøø ja namay jaa'y jøts yikmi'ambøktøø, xjats yiknimaadyøø ku ja jaa'y nugo twindaay'atti. ⁴⁶ Xjats ja Pablo ja Bernabé møk'ampy ojts tmigajpxti, jøts tmimaadyøø:

—Meets israelit jaa'y, jade'en mjapaat'atyidi jøts meets jawyeen myiktukmado'ot ja Dios kyajpxy; ka'ats meets ja xkupøkwa'andi, jade'en nugo mwã'andi jøts ka' pyaat'atyidi jøts ja Dios y'øy'ajtin xkupøjkiyidit, jam øøts ne'egi nøjx ngajpxwa'kxy mǎ jaty ja jaa'y kya'israelitjaa'yidi. ⁴⁷ Kumi jade'en øøts ja nwndøn'ajtim tø x'ane'emy ku yide'en wyaañ: Tø me nbikta'aky jøts øts n'øgyajpxy n'øy'ayuujk xukmado'ojit tuki'iyi ja naxwii'ñit jaa'y, jøts xñijawidit sudso'ampy ñitso'ok'attit.

⁴⁸ Xjats ku dɔ'ɔn jade'en tɔadoodɔɔ pɔn ka'israelit jaa'dyi, winets ja yjanchxondaktɔɔ jɔts ñawya'añidi kudam ja Dios kyajpxy janch'ɔy; jɔts niduki'yiyi ja' tmibɔjkɔxtɔɔ pɔn wyinaty ja Dios kɔ'ɔm tɔ tɔpikta'aky, jɔts nijuuni xɔɔw ja y'anmija'win kyawindigɔ'ɔdyit. ⁴⁹ Jade'en idɔ'ɔn jam ojts yikajpxwa'kxy ja Dios kyajpxy ma jaty ja kajp jam. ⁵⁰ Xjats ja israelit jaa'dyi ojts mɔɔt tkajpx'ɔyidi winaagin ja yaa'dyɔjk midi ja kajp tɔitanaadyip, jɔts mɔɔt nayide'en ja tɔ'ɔxyɔjkti midi ja kajp jaa'y windsɔ'jkiyidip jɔts midi ja israelit jaa'y tɔaduujnidip ja yja', ja'ats ja kajp jaa'y yik'ambɔjktɔɔ, xjats ja Pablo ja Bernabé ojts yikjemandi yiktedundi kunim ja tyikpidsɔmɔɔ ja'abi etjotp. ⁵¹ Winets ja Pablo mɔɔt ja Bernabé twinaptɔɔ ja pu'ux jam tyekyɔjxp, jɔts jade'en ttuk'ejxtit ku jade'embijaa'y ja tka'ɔyjawidi, winets jam ñɔjknidi ma ja kajp txɔɔwi Iconio. ⁵² Xjats ja Jesús yjanchja'wibi pɔn jam Antioquia tyandɔɔ, janch ejtni xoni ja ñayjawiyidi ku wyinaty tɔ tyatɔkiyidi ja Espiritu Santo.

14

Sa yjajttɔɔ sa kyubajttɔɔ ja Pablo ja Bernabé jam Iconio

¹ Ku ja Pablo ja Bernabé jap yja'ttɔɔ Iconio jɔts jam tyɔjkiɔɔ tsaptɔjktɔɔ, winets ojts kyajpxwa'kxti mɔk'ampy jɔts may tɔabɔjktɔɔ, nayide'en ja israelit jaa'y jɔts may pɔn jaty jam wyinaty midi' ka' y'israelitjaa'yidi. ² Xjats ja israelit jaa'y pɔn tkababɔjktip ja Dios kyajpxy, ja'ats t'agajpxidɔɔ pɔn ka'israelit jaa'dyi jɔts ja tyikwinmaamya'tni ja jaa'y pɔn ja Jesús tjanchja'widip. ³ Paty ja ojts tyaa'nidi jeky'ampy ja Pablo mɔɔt ja Bernabé, jɔts ku ojts mɔk tkajpxwa'kxti sa ja Dios Teety ttamidsɔjky ja naxwii'ñit jaa'y, winets nay ja' myɔk'ajtin mɔɔjyidip jɔts milagri'ajtin ttu'undit jɔts nayide'en ja ejxpajt tɔpikta'aktit, paty ja'agɔjxp ojts yiknijawi kudam ja yjanchi' midi ja kyajpxwa'kxtip, jɔts kudam ja Dios Teety xjanchɔjkyindi. ⁴ Jɔts ja kajp jaa'y ka'ap ja wyinaty tu'ugyi ja wyinmaa'ndyi, jam wyinaty ja israelit jaa'y yja' jɔts ja Jesús yja'ami. Majtsk jɔɔjp jap wyinaty ja wyinmaa'ndyi. ⁵ Jɔts ja israelit jaa'y kajpxy tɔndɔɔ mɔɔt pɔn ka'ap y'israelitjaa'yidi jɔts ñɔjktɔɔ ma ja kudunktɔjk, jamts tkajpx'ɔyidɔɔ mɔɔt ja kudunk jɔts tmi'ambɔjktɔɔ tɔpa'atswidetwa'andɔɔ ja Pablo mɔɔt ja Bernabé. ⁶ Kuts ja Pablo ja jade'en tɔija'widɔɔ mɔɔt ja Bernabé, xjats ja kyaknɔjktɔɔ jam Listra jam Derbe, jade'en ja kajp xyɔɔw midi jam Licaonia etjotp tandip, jɔts wine'enin ja abikyajp jam ni'awidity midi jam abiky etjopti, ⁷ jamts ja tkajpxwa'kxti ja Dios y'ɔgyajpxy y'ɔ'yayuujk midi xyiknits'ok'ajtindip.

Ku ja Pablo jam Listra yika'jch

⁸ Nay jam ma ja kajp txɔɔwi Listra, jamts wyinaty chɔɔni tu'uk ja yaa'dyɔjk pakma'at midi wyinaty niwine'enin kyidyimyɔ'ɔpy, tyimyjade'en idɔ'ɔn ja kye'jxy. ⁹ Jɔts ja pakma'at jaa'y myadɔɔpy ja' tuki'yiyi pɔni sa ja Pablo tyikwa'añ, winets ja Pablo twin'ijxy ku yjawi t'ajot'aty ja pakma'at jaa'y ja Dios ku cho'okwa'añ. ¹⁰ Winets ojts mɔk tjanchmigajpxy jɔts tɔnimaay:

—Tatani yɔ mdeky tiy.

Jɔts ja yaa'dyɔjk wya'kukɔɔ tukwo'onji'igyi xjats jade'eñi yɔ'ɔbyijky.

¹¹ Jɔts ja mayjaa'y t'ejxtɔɔ ku ja Pablo jade'en tyiktsɔɔjky, winets ja jaa'y yjanchwɔngaktɔɔ jɔts wyandɔɔ:

—iTɔ namajtsk ja Dios xjanchnigidaajkyindi nayide'en ejxim adɔm njaa'y'ajtyim!

Tum ja Licaoniit ayuujk kyajpxtip.

¹² Xjats wyandaktøø ku Bernabé ja' Dios Júpiter, jøts ja Pablo Dios Mercurio, ja'agøjxp ku ja kya'amay. ¹³ Xjats ja teety midi jam tump Júpiter chaptøjkjotp kajp'am, ja'ats ojts tyikniijkxy ja tsakaā namajtsk janch xøxy janch pijyi mā ja Pablo møøt ja Bernabé jam wyinaty; yjanchtawindsø'øgiwyandip ja tsakaā, tyamiyoxwandip ja tsakaā kitu'uk. ¹⁴ Ku tnija'widøø ja Jesús kyudanaabyi ja Bernabé ja Pablo jøts yjotmay'oo'kpøknidøø, jøts ja wyet tkøø'tstøø waani ja'agøjxp ku jade'en yikwindsø'øgidi ejxim ja Diosin, winets tyøjkidøø mayjaa'y agujkp jøts møk yide'en wyandøø:

¹⁵ —;Migu'uktøjkti! ¿Tiku jade'en m'adø'øtsti? Pø nay jaa'lyts øøts ejxim meedsin, yø' øø nnimimpy jøts mee ndukmado'ot jøts xmajtstu'tuttit yø'øbi tunk, ka' yø tyuñ. Pabøjkidi Dios yja' pøn jujky'ajtp, pøn tuki'yiyi tyik'øyiyi'ñ ja tsajp jits ja naajj jøts ja meji, tuki'yiyi midi ya naxwiiñ ejtp. ¹⁶ Kuwani Dios Teety yujy'aty ku ja naxwii'ñit jaa'y ojts y'ø'y'adø'øtsti kya'ø'y'adø'øtsti. ¹⁷ Ejtp idø'øn ja Dios Teety ja ejxpajt tjayaky, jøts jade'en yiknijawit pøni pøn idø'øn ja' ku ja janch'øy. Ja'agøjxp idø'øn ja tuu tkejxy, jøts pyidsimy ja moojk ja xøjk midi adøm ndajujky'ajtyim, jøts ejtni xoni nnayja'wandit.

¹⁸ Øy idø'øn ja mayjaa'y møk yjayiknimaadyi, ka' pøn tmadøøy, kuwani tyimiyik'ookwa'andi ja tsakaā jøts ja Pablo møøt ja Bernabé jade'en yik-tawindsø'øgiwya'andi ejxim ja Diosin.

¹⁹ Winets ja israelit jaa'y winaagin jam choo'ndøø Antioquia jøts Iconio, jøts jap yja'ttøø Lистра mā ja Pablo møøt ja Bernabé wyinaty. Ja'ats idø'øn ja kajp jaa'y t'agajpxidøø, winets ja kajp jaa'y y'ambøjktøø, jøts ja Pablo yikxon tsaagatstøø. Tyimwyandip idø'øn ja jaa'y jøts ku dø'øn ja wyinaty tø tyimiyik'ookti, winets ja t'ukpawejtsnidøø, jøts ja kajp pa'am tyiknøjktøø.

²⁰ Winets ja jam ñamyujkidøø Pablo wyindump pøn tjanchja'widip ja Jesús, xjats ja Pablo pyidi'jky jøts wyimbijty jadigojk nay jam kajpjotp; winets kyimjabom choo'ndøø møøt ja Bernabé, jøts ñøjktøø mā kajp txøøwi Derbe.

²¹ Winets jam ojts tkajpxwa'kxti sudso'ampy ja Jesús xyiknitso'ok'ajtndit, mā ojts ñamayidi pøn ja Jesús yja' tmibøjktip, jøts ja Pablo ja Bernabé wyimbejttøø mā kajp txøøwi Lистра, Iconio jøts nayide'en Antioquia. ²² Ku ja Pablo møøt ja Bernabé jam yja'jty tu'uk tu'uk ja'abi kajp, winets tkajpxjot'amøjkidøø pøn jaty ja Jesús yjanchja'widip, jøts ku Jesús yja' tu'ugyi tpaduujndit, nayide'en yiknimaadyøø kuwani ja ayon yikpaaty ku jap ndøkwy'a'anint mā Dios kyutujk, midi ja naxwii'ñit jaa'y ja tyanitanaapy.

²³ Jøts ja Pablo møøt ja Bernabé nayide'en tpiktaktøø ja møjaa'dyøjk mā jaty ja tsaptøjk wyinaty, jøts ku ja wyinaty tø Dios'ajot'atti tø y'ayu'u'atti, winets ja Dios ja ttagødøjkidøø jøts kyunuu'kxidit, pø tøxi ja wyinaty tjanchjawidi.

Ku ja Pablo møøt ja Bernabé yja'jty jadigojk Antioquia jam Siria etjotp

²⁴ Xjats ku ja ñajxtøø jam Pisidia etjotp, jøts ja yja'jtøø jam Panfilia etjotp. ²⁵ Ojts ja tkajpxwa'kxti ja Dios kyajpxy jam Perge kajpkøjxp, jødsnim ja ñøjktøø jam Atalia. ²⁶ Jamts ja ttatøjkidøø barki jøts ja ñøjktøø Antioquia, jam kajpkøjxp mā ja wyinaty tø yikugajpxaagidi tø yikunuu'kxaagidi, jøts Dios ja kyunuu'kxidit ku ja wyinaty jade'en ja tyunk tyiktso'onda'akti midi ixym wyinaty tø tyik'abajtiñidi. ²⁷ Jøts kuts ja jam Antioquia kajpkøjxp yja'jtøø, winets ja jam tnanñamyujkidøø pøn jaty ja Jesús tjanchja'widip jøts ja ttamimadyakøjxtøø sa jaty Dios ja wyinaty tø yikjatyidi yikubetyidi ku ja kyunuu'kxyidi, jøts ja nayide'en ttamimadyaktøø sa Dios wyinaty tø yik'awajtsxiyidi nøø' tuu' pøn ka'israelit jaa'dyi, jøts ja nayide'en ñitso'ok'attit ku ja tjanchjawidit ja nwindson'ajtim. ²⁸ Xjats ja Pablo jøts ja Bernabé jam

jeky tyaa'nid00, jeky tm00taa'nid00 ja jamit jaa'dyi p0n tjanchja'widip ja Jes0s.

15

Ku Jerusal0n n0amyujkid00 ja m0jaa'dy0jk

¹ Nay ja'abi tiempi winaagin ja jaa'y choo'nd00 jam Judeit naxjotp j0ts n0jkxt00 ma ja kajp tx00wi Antioquia, jam tta'awanib0jkid00 ja jaa'y p0n wyinaty ja Jes0s tjanchja'widip, j0ts tnimaadyi ku ja yaa'dy0jk kuwani yikmo'odit ja ejxpajt n0'kxk0jxp sami Moisés jekyip tyiky0'0y ja y'ana'amin, winets ja jade'en yiknitso'ok'atidit ja Dios. ² Winets ja Pablo m00t ja Bernab0 m0k'ampy ojts m00t n0agyajpxyidi ja jaa'y, j0ts ku ka' jade'en y'0yi y0'0bi winmaa'n. Winets ja Pablo ja Bernab0 yikpiktakt00 m00t winaagin ja jaa'y j0ts jam n0jkxtit Jerusal0n, jamts tjaak'atskajpx'0yidit ja'abi winmaa'n m00t ja'adi p0n jaty ja Jes0s kyudanaabyi'ajtpy, j0ts m00t ja m0jaa'dy0jkti p0n jaty jam m0jaa'y'ajttip tsapt0jkjotp.

³ Xjats kyajxtsoo'nyid00 ja janchja'wibidi jam Antioquia, xjats choo'nd00 j0ts jam naxti ma ja et tx00wi Fenicia j0ts Samaria. Jamts tnigajpxt00 tnimadyakt00, j0ts ku namay ja jaa'y wyinaty t0 tmajtstutnidi ja m0jaa'chinaa'yin p0n jaty ka'israelit jaa'dyi, j0ts tpab0jkt00 tu'ugyi ja Dios yja'. Xjats ja yjanchxondakt00 ja myigu'ukt0jk ku ja jade'en tnija'wid00 ja'abi ayuujk.

⁴ Kuts yja'tt00 ja Pablo m00t ja Bernab0 jam Jerusal0n, winets ojts kyajpxp00'kxyidi ja mayjaa'y j0ts ja Jes0s kyudanaabyi m00t ja m0jaa'dy0jkti. Xjats ja tnigajpxti tnimadyakti sa ojts ja Dios m0k tyukpud0kiyidi p0n ka'israelit jaa'dyi. ⁵ Xjats winaagin ja fariseit jaa'y p0n wyinaty ja Jes0s yja' tpaduujnidip, wya'kukid00 j0ts wyand00:

—Kuwani y0 tpaduujnidit Moisés kyutujk p0n ka'israelit jaa'dyi 0y y0 Jes0s yja' yjayikpaduñ, j0ts kuwani ejxpajt yikmo'odit n0'kxk0jxp.

⁶ Winets jadig0jk n0amyujkid00 ja Jes0s kyudanaabyi j0ts ja m0jaa'dy0jkti sudso'ampy yikajpxwimbett yik'adsojimbett. ⁷ T0 wyinaty jeky tkajpx'0yidi, j0ts ja Pedro tyanaagyukiyi'n j0ts tnimaay:

—Meets migu'ukt0jkti, mee mnija'wip j0ts ku 0ts ja Dios jekyip xwiwich, j0ts 0ts ndukmado'ot ja jaa'y p0n ka'israelit jaa'dyi, sudso'ampy ja nwind0n'ajtim xpojkpimaa'kxindit j0ts ja tmib0ktit. ⁸ Wa'ats ja Dios t'ixy sa jadu'uk jadu'uk nwinmaa'yindi, j0ts yide'en'ampy yiknijawi ku Dios ja t0 kyupikyidi ja'abi jaa'y, ku t0 tyuktat0kiyidi ja y'Espiritu Santo nayide'en ejxim ad0m ojts xm0'0yim ja kunuu'kxin. ⁹ Ka'ap ja Dios p0n tts0ky tkats0ky, tyumkupijky ja' wan tp0ni, ka'ap ja t'ixy wan p0n t'israelitjaa'yi uk wan p0n tka'israelitjaa'yi, patyts ja nayide'en t0 yikpojkipimaa'kxti p0n ka'israelit jaa'dyi ku ja t0 tjanchjawidi. ¹⁰ Migu'ukt0jkti, 0tiku xmimaydi xmidajti p0ni sa ja Dios t0 tpikta'aky, j0ts ja' xapaatti p0n ja Jes0s tjanchja'widip? 0Tiku kawinaak winmaa'n xaguwaanidi? Nika'ats ad0m ja ka'pxy n'ukpaduu'na'andi, ni ja n'apteety'am0j ad0m ja ka'pxy t0 tka'ukpaduunidi. ¹¹ P0 ka'axi jade'en y'0yi, njanchja'wa'amp ad0m ja' ku ja Jes0s yiknitso'ok'ajtyindi ky0'0mds0ky, nayide'en sam ja' p0n ka' y'israelitjaa'yi.

¹² Xjats niduki'iyi y'among0xt00, j0ts tpatmadood00 ku ja Pablo j0ts ja Bernab0 tnimadya'akti sa ja Dios m0k pyud0kiyid00, ku ja myilagritundi j0ts ja Dios y'ejxpajt tpaduujnid00 ja' y'etjotpti p0n ka'israelit jaa'dyi. ¹³ Ku

ja Pablo jøts ja Bernabé kyajpx'abaajttøø, jøts ja myigu'uk midi Jacobo txøøw'ajtmip, ja'ats waan:

—Meets migu'ukti, ukmadowdi waani: ¹⁴ Tø ja Simón Pedro tjanigajpxy sudso'ampy ja Dios tømø'øy ja may'ajt myiduk'ojk pøn ka' y'israelitjaa'yidi, jøts ku ja Dios ja nayide'en t'u'nk'aty t'una'jk'aty ja'abi jaa'dyi. ¹⁵ Kuwani icyam jade'en jyaty kumi jade'en ja Dios kyugajpxy ojts tjaadyań, ku ja Dios yide'en wyaañ:

¹⁶ Wimbejtkojmip øts jadigojk, jøts nbikta'akt nayide'en sam y'ijty ja David tjagyepy ja kutujk;

jøts øts nja' niduki'iyi xpaduujnidit pøn ka'israelit jaa'dyi,

¹⁷ jøts niduki'iyi ja naxwii'ńit jaa'dyi pøn jaty ø nja'ajtpy.

¹⁸ Jade'en idø'øn wyaañ ja nwindson'ajtm Dios, pøn tyuknija'wiyi'ń yø'øbi winmaa'ń jekyip.

¹⁹ Xjats ja Jacobo tjaaknøjmi ja jaa'y jøts wyaañ:

—Ka' nugo xmigajpxtit pøn ka'ap y'israelitjaa'yidi, pøn ja Jesús yja' tu'ugyi tpadunwajnidip, pøn tømajtstutnidi ja myøjaa'chinaa'yin. ²⁰ Øy'ajtp ja nøky ngajxindit, jøts ja'ayi ndukmadoo'indit jøts kida ja ttsu'utsti midi ja tsamaxan yiktawindsø'jkíp, jøts nayide'en ka'ap ja ñiyaa'y ñidø'øxy ñabyøjkxidit, jøts nayide'en ka'ap ja jiyujk tsu'uch ttsu'utstit midi ka' tyaxy, jøts midi yuktsumy'oo'kp, jøts nayide'en ka'ap ja ni'jpy tjøø'kxtit. ²¹ Wan yø'øyi, pø jaayimts ja Moisés kyutujk xyumiyikajpxwa'kxy, ti magajp ja kya'ukyiknigajpxy ma jaty ja tsaptøjk jam, ejtpts ja yknigajpx'ity wimboo'kxin xøøw.

²² Winets ja Jesús kyudanaabyi møøt ja møjaa'dyøjkti jøts niduki'iyi pøn jaty tjanchja'widip ja Jesús, jats ñawywejtsidi namajtsk ja jaa'y pøn tømødidøø ja Pablo jøts ja Bernabé jam Antioquía. Ja'abi jaa'y midi yikwindsø'jkij'ejttip, tu'uk txøøwi Judas Barsabas jøts jadu'uk txøøwi Silas, ²³ ja'ats tminøjkxtøø ja nøky jøts yide'en ja nøky wyaañ:

“Øøts idø'øn ja' pøn jaty ja Jesús kyudanaabyi'ajtpy, møøt ja møjaa'dyøjkti jøts niduki'iyi ja nmøøtjanchja'wibidi, øøts idø'øn ja kajpxpoo'kxin nguejxpy, ngajpxpøø'kxpy øøts niduki'iyi ja nmøøtjanchja'wibidi pøn ka' y'israelitjaa'yidi, pøn jam tsinaadyip Antioquía, jøts jam Siria, jøts nayide'en Cilicia. ²⁴ Tø øøts nnijawi ku winaagin ya'it jaa'y ojts ñøjkxti ma meets jam, jøts ojts nugo myikwinmaamy'a'adyidi, ku jade'en mni'mxyidi jøts ku kuwani ja mixyuna'jk yikmo'odit ja ejxa'an ñe'kxkøjxp, jøts ku kuwani ja Moisés kyutujk xpaduujnidit. Migu'uktøjk, kidi øødsipts ja jade'en ngajpxmyøøpy.

²⁵ Paty øøts yixkon ngajpx'øyi, jøts øø nbikta'aky namajtsk ja kugajpxy midi mee m'ats'ejxiyip, ja'ats myøødidip ja Pablo jøts ja Bernabé pøn øøts ndsøky'ajtpy, ²⁶ jøts pøn tømñadyamiyoxiyi amumjoojt ja nwindson'ajtm Jesús. ²⁷ Ya'at øø nguejxpy midi txøøw'ajttip Judas jøts Silas, jøts møøt m'ukmadya'aktit jøts mdukmadowiyidit ya'at tuki'iyi. ²⁸ Tø ja Espiritu Santo t'øyjawi, nayide'ents øøts, jøts ka'ap meets mayjøøjp ja winmaa'ń nmø'øy, øy ku ya'at xpadu'undit: ²⁹ ka' xtsu'utstit midi ja tsamaxan tøm yiktawindsø'øgi; jøts nayide'en ka'ap ja ni'jpy xjøø'kxtit, ka' xtsu'utstit nayide'en o ti jiyujk midi yiktsumy'oo'kp, nayide'en ka'ap ja mniyaa'y mniðø'øxy mnabyøjkxidit. Pøni mbadundip yø'øbi winmaa'ń, tsuj mduu'baattit meets jade'en. Yø'øbi ana'amín øø nguejxpy, Dios mgunu'u'kxidip.”

³⁰ Xjats choonðøø ja kunøky jøts ñøjkxtøø jam Antioquía. Winets ñamyujkidøø ja jaa'y pøn ja nøky yiktanigaxtip jøts yikømøodyøø. ³¹ Ku ja tpa'ejxtøø, jøts yjanchxondaktøø ku jade'en ja winmaa'ń yikmo'odi. ³² Kumi yjajttip wyinaty nayide'en ja Judas ja Silas sudso tkajpxwa'kxidit ja Dios

kyajpxy. Xjats ttukja'gyukidøø, jøts ja janchja'wibidi yjanchxondaktøø ku ja jade'en kyajpxjot'amøjkiyidi. ³³ Ku jap waani y'uktaa'nidøø, winets ojts tja'ukminawya'kxyidi ja myigu'uk, ojts ja y'ukmø'øñiyidi ja kajpxpoo'kxin jøts ja Dios kyunuu'kxidit, jøts nay jam wyimbejti ma jam choo'ndøø. ³⁴ Xjats ja Silas wyinmaa'y, winets ja jam tyaañ. ³⁵ Nayide'en ja Pablo jøts ja Bernabé jap tyaandøø Antioquia, namay ja myigu'uktø møøt, yik'ixpøjktøø tkajpxwa'kxtøø ja Dios kyajpxy.

Ku ja Pablo myimajtsk ojk chøø'ñ kajpxwa'kxpi

³⁶ Tø wyinaty ja tiempí waani ñaxkojmi ku ja Pablo tnimaay ja Bernabé, jøts wyaañ:

—Wan tjaa'myim jadigojk jam magyajp ma jaty ja Dios kyajpxy tø nmíwidiytyim, jamts nmigu'uktøjk n'ats'ejxint sa jam yjatti kyubatti.

³⁷ Xjats ja Bernabé twaawa'añ tu'uk ja jaaly pøn txøøw'ajt Juan Marcos; ³⁸ ka'ats ja Pablo ja twinjawi jøts ja' t møødit, kumi tø ja jam wyinaty t'ukyiktañ ma et txøøwi Panfilia, ka'ap ja wyinaty tyikyø'øy ja Jesús kyajpxy. ³⁹ Xjats ñagyajpxidi jeky ja Pablo møøt ja Bernabé, ka' ja wyinmaa'ñ y'uknabyajtniyidi jøts jade'eñi ñawya'kxinidyidøø; winets ja Bernabé tmøødiyí'ñ ja Marcos, jøts tyøjkidøø barkijøtpty jøts ñøjkxti ma et txøøwi Chipre, ⁴⁰ xjats ja Pablo ojts twaaj'i'ky ja Silas. Jøts ja janchja'wibidi ñimaajjyøø: “Nøjkk møøt ja Dios, Dios mgunuu'kxidip.”

⁴¹ Xjats ja choo'ndøø, jøts ñajxtøø ma et txøøwi Siria jøts Cilicia. Jamts tkajpxjot'amøjkidøø ma jaty ja tsaptøjk jam wyinaty.

16

Ku ja Timoteo tjamyøøt'ajty ja Pablo møøt ja Silas

¹ Xjats jam yja'ttøø ma kajp txøøwi Derbe jøts Listra. Jamts tpaattøø tu'uk ja janchja'wibi, Timoteo ja xyøøw. Ja tyaak, israelit jaa'y ja' jøts yjanchja'wip ja Jesús ja'; jøts ja teety, griegit jaa'y ja'. ² Ja mixy Timoteo janchtsojkip ja janchja'wibidi pøn jap wyinaty tsinaadyip Listra jøts Iconio. ³ Xjats ja Pablo tmøødiwya'añ ja Timoteo jøts pyudøkiyt, jøts ja Pablo wyinmaa'y jøts ku kuwani jawyeen yikmo'ot ja ejxpajt ñe'kxkøjpx, jøts kidi y'ejxma'adyidi ja israelit jaa'y ku jam yja'attit ja' y'etjotpti, wa'ats ja wyinaty tnijawidi ku ja Timoteo teety ka' y'israelitjaa'yi. ⁴ Xjats choo'ndøø ñajxtøø ma jaty wyinaty ja kajp jam. Jamts tnigajpxti tñimadya'akti ja janchja'wibidi, jøts t'uktukmadoodøø ti jaty wyinaty tø tkajpx'øiyidi ja Jesús kyudanaabyi møøt ja møjaa'dyøjkti jam Jerusalén, jøts sudso'ampy ja jaaly øy tsuj yjaa'y'attit pøn ka' y'israelitjaa'yidi. ⁵ Xjats tu'ugyi ja wyinmaa'ñ tpiktaknidøø amumjoojt ja janchja'wibidi, mayi'adøstip ja jabom jabom.

Ku ja Pablo ojts t'ixy agumaayjøtpty tu'uk ja Macedoniit jaa'y

⁶ Xjats ja Pablo møøt ja Silas jøts ja Timoteo choo'ngojmíidøø, jøts kumi ka'ap ja Espíritu Santo ojts tyikutuky jøts jam ñøjkxtit kajpxwa'kxpi ma et jam txøøwi Asia, winets jam ñajxtøø ma et txøøwi Frigia jøts Galacia, ⁷ jøts jam yja'ttøø tsawa'an'am ma et jadu'uk txøøwi Misia, jam wyinaty yjatøkiwya'andi ma et jadu'uk txøøwi Bitinia, nika' ja Espíritu wyaañ jøts jam tyøkidit. ⁸ Winets ttayø'øñaxti yøñ'ampy ja Misia y'et ñaajx, jøts jam kyidaktøø jam mejy'am ma tu'uk ja kajp txøøwi Troas. ⁹ Jamts ja Pablo koots twingumaay tu'uk ja Macedoniit jaa'y, windanaajyip tam ja jaaly jøts yjanchminuu'kxa'lagiyi, jøts ñii'mxiyi: “Tun ja may'ajt, nax jam ma ja Macedonia et, pudøjkik øøts.” ¹⁰ Xjats ku ja Pablo jade'en kyumaay, winets

00 nnay'a'ejxiy00 j0ts 00 nds00'n. 0ts id0'on Lucas p0n ya'at n0ky tjaapy, 0ts id0'on ja nayide'en nm00ts00'n, j0ts 00ts ojts nnijkxy jam Macedoniit etjotp. Nja'gyujkip 00ts wyinaty ku 00ts ja Dios xwaads0y, j0ts 00ts jam n0jxk ngajpxwa'kxy ja 0gyajpxy ja 0myadya'aky midi xyiknitso'ok'ajtindip.

Sa yjajtt00 sa kyubajtt00 ja Pablo m00t ja Silas jam Filipos

11 Winets 00 nd0jkxyi'n barkij0tpty, j0ts 00 tiy nnijkxy jam mejy agujkp ma ja naajx lii'nim tx00wi Samotracia, j0ts kyimjabomnim 00ts ja mejy ndanajxy j0ts 00ts jam nja'ljty Neapolis. 12 Jam 00 nds00'n tekyj00m, j0ts 00 nnijkxy ma kajp tx00wi jadu'uk Filipos, ja' midi ja romanit jaa'y k00m py0takt00. M0j kajp id0'on ja', nima ja kajp jam jade'en w'angon kyam0ji. Jam 00ts kawinaak x00w n'uktaa'niiy'i'n. 13 Jamts 00 ngajpids0mnaa poo'kxin x00w et, j0ts 00ts jam nnijkxy m0j n00 windump ma ja jaa'y kuwani ejtp n0jxkti Dios'ajot'ajtpi. Jamts 00 n'ixaajky, xjats 00 ndukmad00y ja Jes0s kyajpxy ja t0'oxy0jkti p0n jam wyinaty t0'namyukyidi. 14 Jamts ja t0'oxy0jk p0n tx00w'ajtp Lidia, p0n tsoo'mp jam Tiatora kajpjotp; wetoo'kk ja tyunk'ajtpy, tum ja 0ybi tsuu'nk wet id0'on ja ty00'kpy. Ja'ats id0'on ja Dios tjanch'ajot'ajtp, j0ts nwindson'ajtm ja yikwinmaa'nbyaaajtiy00 j0ts tjanchjawit sa jaty ja Pablo wyaan. 15 Xjats ojts n0bety m00t ja myi'gu'uk, winets 00 xminuu'kxaajky j0ts wyaan:

—Tundi may'ajt jaa'mindip 0ts nd0jkj0tpty, jap m'atsja'ada'aktit p0ni mjanchwamp meets j0ts ku 0ts nwindson'ajtm kyajpxy t0 njanchpaduujnyi. Xjats 00 kuwani xyiktaan.

16 Winets yide'en yjajty ku 00 wyinaty nnijkxy ma jaa'y jam Dios'ajot'atti, xjats 00 nminabyajtiyi tu'uk ja kiixy midi wyinaty ximaapy, ja miku' wyinaty my00t'ijtpy, ane'emy id0'on ja y'lity. Ku ja jade'en myiximay janchnimeenby0jkiyip ja wyinds0n ja' p0n ja y'ljty ana'amiiyip. 17 Ja'abi kiixy 00 xpawidejt0jkiinaa, xjats ojts m0k yjanchwa'aan jam mayjaa'y agujkp:

—Ya'atpi jaa'y m0k tjanchmidundip ja Dios midi jap tsajpj0tpty, y0' tkajpxwa'lxtip ja Dios kyajpxy sa ja xyiknitso'ok'ajtindit.

18 Ku jade'en pyawidejtiyid00 kawinaak x00w, xjats ja Pablo m0k y'adsipyiyi j0ts t'ejximbijty, j0ts tnimaay ja miku' midi ja kiixy wyinaty my00t'ajtpy:

—Jes0s my0k'ajting0jxp mets miku' majtstu'ut y0 kiixy. i'Pids0m!

Xjats ja miku' tmajtstuuyt nay jaty.

19 Ku ja kiixy ja wyinds0n tja'ejxnidi ku t0 ja wyinmaa'n tyigatsni, ku ka'ap ja kiixy y'ukmeenby0jki, winets ja Pablo j0ts ja Silas yikmatst00, j0ts yikn0jxid00 kudunk wyindump jam m0j maayjotp. 20 Ku jam yikja'jtid00 tiidyumbi wyindump j0ts ja tnimaady00:

—Ya'at jaa'dyi, israelit jaa'y y0'odi, m0k 00ts xjanch'adsipy ya kajpj00jty, 21 ku ja ky0'0midsinaa'yin 00ts kuwani xukpadunwa'aan midi 00 ka' njanch-jagup0kwa'aan, j0ts ja'abi tsinaa'yin ka'ap 00ts ja nnijawi. Abiky 00ts, romanit jaa'y 00ts.

22 Xjats ja mayjaa'y yjanchpid0'k0jxt00, j0ts ja tiidyumbid0jk t'ana'amdi ja jaa'y j0ts wan tyiknijandi tyik'ixjandi, j0ts wan ja nawyopi t'ukup0kti namajtsk ja Pablo m00t ja Silas. 23 Xjats ku yikwojp'abaajtid00, winets ja tyikn0jkt00 pux0jkjotp, j0ts ja t'ana'amdi ja pux0jk adsinaabyi j0ts tnimaadyi j0ts waani ttiymjaty'ejx'etit. 24 Ku ja pux0jk adsinaabyi jade'en ojts yik'ane'emy, winets tyikt0jkiyi'n j0ts kawinaak pux0jk'aaw ojts tyiknaxy, j0dsnim ojts yikni'agiibyatti jam okp. Ku jade'en jam yikpiktakt00, winets ojts ja kipy yiktanaxk0'odi ja tyeky kadeni m00t.

²⁵ Xjats ja Dios'ajot'ajttøø jøts t'øøðøø ja Dios kyajpxy jap puxøjkjøtpy, møk ja Dios ja tja'myajtstøø. Tsuu'miwyamp wyinaty ku ja Dios jade'en t'ajot'ajttøø, jøts ku ja myibuxøjk jaa'y ja nugo pyatmadøyidi. ²⁶ Xjats ku chuu'miyi'ñ, winets ja uyx møk yjanchmiñ, winets ja puxøjk møk yjanty-imy'adijch. Jøts ja puxøjk'aaw tuki'iyi y'axetutkøjxnaa, jøts ja puxøjk jaa'y pyaktum nayide'en wyinakøjxtøø. ²⁷ Xjats ja puxøjk adsinaabyi ojts ñiwijy, jøts ja t'ejxpaaoty ja pyuxøjk'aaw jøts kudam ja wyinaty tø y'awatskøxni, xjats ja jade'en wyinmay tø ja puxøjk jaa'y tijy pyidsømgøxnidi, winets ja yønchujx ja tju'ljty jøts ja kø'øm ñanky'ookwa'añiyi. ²⁸ Xjats ja Pablo ojts t'ejxpaaty ja puxøjk ejx'ejtpi ku ja wyinaty jade'en ñadyunwa'añiyi, xjats tñimaay:

—Kidi jade'en mnadyuñiyi, ka'ap øø ngue'eky, tum ixyp øøts niduki'iyi.

²⁹ Xjats ja puxøjk ejx'ejtpi t'amidøø ja jaj jøts ja ojts pujtp tyøki jap puxøjkjøtpy. Xjats ja yjanchmibejpnj jøts ja ojts ñagyuxendya'agyi jam Pablo tyekyjø'øm jøts ja Silas. ³⁰ Xjats ja tyikpidsimy jøts tyiktiiy, yide'en ja tñimaay: —Migu'ukti, çti ø ndu'ump, sudso'ampy ø nñitsø'ok'att?

³¹ Xjats ja Pablo møøt ja Silas ojts t'adsojimbetti, xjats tñimaadyøø: —Møjawi amumjoojt ja nwindson'ajtim Jesucristo, jøts myiknitsø'ok'atyi yidit niduki'iyi møøt ja m'u'nk møøt ja mñidø'øxy.

³² Xjats ja Pablo jøts ja Silas ttukmadoodøø ja Dios kyajpxy ja puxøjk adsinaabyi møøt niduki'iyi pøn jaty ja jam wyinaty tyøjkjøtp myøøtsinaapy. ³³ Nay jatyits ja puxøjk adsinaabyi tyikwajtsøø ja Pablo jøts ja Silas chaachi, winets ñøjkxtøø nøbajtpi niduki'iyi møøt ja y'u'nk jøts ja ñidø'øxy. ³⁴ Winets ja puxøjk adsinaabyi twaay kaabyi jap tyøjkjøtpy, janch øy janch tsuj wyinaty ñayja'wñididi niduki'iyi møøt ja y'u'nk ja ñidø'øxy, kumi tø ja wyinaty ja Dios tjanchjawidi.

³⁵ Xjats kyimjabom'ajty, winets ja tiidyumbidi ttaniguejxy ja kyugajpxy ja puxøjk adsinaabyi, jøts ku ja t' tyikutuky jøts tyik'awa'atspidsømnit ja Pablo jøts ja Silas. ³⁶ Xjats ja puxøjk ejx'ejtpi tñimaay ja Pablo:

—Tø n'atsyik'ane'emy, ja tiidyumbitøjk kø'øm ja kyajpxy tkajxtip jødsik meets jadi'iñi nyikpidsømnit; nøjknidits jotkujk, tø mee m'awa'atspidsømni.

³⁷ Xjats ja Pablo ka' tkupiky, winets tñimaay ja kugajpxy:

—Nayi romanit jaa'y øøts, tiku øøts jade'en nyiktuñ jøts ku øøts jade'en mayjaa'y agujkp nyikwøpy, nika'ap øø nyiktii dyuñ jøts jaty: øø nugo nyikpikta'aky puxøjkjøtpy; çsudso'ampy øøts ndejint ayu'uch jadi'iñi nyikmajtstu'utwani? ¡Ka' y'øyi! Wan ja kø'øm tmendi ja tiidyumbidi jøts øøts xyikpidsø'ømt.

³⁸ Jøts ja kugajpxy wyimbejtnidøø, jøts ttukmadoodøø ja tiidyumbi sa ja Pablo ja kajpxy t'adsojimbijty, winets ja tiidyumbi yjanchø'økñididi ku tñija'widøø jøts kudam ja Pablo jøts ja Silas nayide'en romanit jaa'yidi. ³⁹ Winets ja kudunktøjk tñinøjkxtøø t'atsmi nuukxaktøø ja Pablo møøt ja Silas. Xjats tyikpidsømdøø jap puxøjkjøøjty, jøts møk tñimaadyøø:

—Tun may'ajt pidsømdi ya waani kajpjøøjty.

⁴⁰ Xjats ja pyidsømdøø puxøjkjøtpy, jøts ñøjkxti ma ja Lidia tyøjk, jamts ja tñinabyajtidøø ja myøøtjanchja'wibidi, kuts ja tkajpxjot'amøjkidøø, winets ja choo'nidøø.

17

Ku ja Tesalonikit jaa'y yjanch'ambøjkjøø

¹ Xjats ku jam choo'ndøø, jøts ñaxtøø ma kajp txøøwi Anfipolis jøts nayide'en Apolonia, majtsk ja kajp ttanaxtøø jøts jam yja'ttøø møj kajpjotp midi

txøow'ajtp Tesalónica, jam wyinaty ja tsaptøjk. ² Winets ja Pablo tyøjkidøø kajpxwa'kxpi jam tsaptøjkjotp, sayim ja ttuñ øy madsoo ma jaty ja wyidity, tigøøk samani jam tyik'ixpijky ja jaa'y wimboo'kxin xøow. ³ Yide'en ja ojts ttuk'ixpiky pøni sa ja Dios Teety kyajpxy ojts jykjaadyañ, jøts kuwani mye'ent ja yiknitsokpi, jøts kuwani y'ayo'ombaatt jøts y'oo'kimbaatt, jøts kuwani yjujkyøkt jadigojk. Yide'en idø'øn ja wya'an:

—Jade'en ja Jesús yjajty midy mee ndukmadøøpy, nay ja' ja Dios Teety kyejpxy yiknitsokpi.

⁴ Ku ja Pablo ja ixpøjkin jam jade'en t'ukyiktandøø, winets ja israelit jaa'y winaagin tmibøjktøø, jøts ja møøt ñabyøjknidyidøø ja Pablo jøts ja Silas, jøts nayide'en namay ja griegit jaa'y pøn ja Dios Teety twindsø'jkidip. Nayide'en namay ja griegit tø'oxyøjk tmibøjkti pøn jam windsø'øgi'ejttip.

⁵ Winets ja israelit jaa'y niduki'iyyi y'ambøjktøø pøn jaty ja Pablo kyajpxy y'ayuujk tkagupøjxkidip, ja'ats twaamuktøø ja ka'øybi jaa'y pøn jap nugo widejttip kajpjøtpy. Xjats nugo wyidejtnibøjkidøø jøts ja jaa'y tu'uk tu'uk tyik'ambøjktøø. Winets yja'ttøø tu'uk ja jaa'y tyøjkjøtpy pøn txøow'ajtp Jasón, xjats awa'an'ampy tyøjkidøø tøjktjoty tajpi kaa'pi. Ja Pablo jøts ja Silas ja' idø'øn jade'en yik'ixaadyip jøts tyikpidsømmwa'andi jøts ja tyiknøjxktit mayjaa'y agujkp. ⁶ Kumi ka'ap ja tpaatti jap tøjktjoty, winets ja tmatstøø ja kudøjk møøt ja myøøtjanchja'wibidi, xjats tpawetstøø tpakoo'tstøø, kudunk wyindump tyiknøjxktøø, xjats ja Pablo jøts ja Silas yikxiguyaxtøø, jøts jade'en wyandøø:

—Ja'abi jaa'y pøn widejttip jøts tuki'iyyi ja naxwii'ñit jaa'y tyikwinmaa'nmyatkøxti, tønim ja ya nayide'en yja'tmidi, ⁷ jøts ya'at Jasón ja tø tyikja'ada'aky tyøjkjøtpy. Yø'øbi jaa'y tuki'iyyi y'ixwetswangøjxtip ja møj windsøn César kyutujk midy adøm ngajp xnitanajyamp. Jade'enxi wya'andi ku ja ja møj windsøn jadu'uk pøn txøow'ajtp Jesús.

⁸ Ku ja tmadoodøø ja jaa'y møøt ja kudunktøjk, winets niduki'iyyi yjanch'ambøjktøø. ⁹ Xjats ja Jasón kuwani tmøøpy ja meen ja kudunk jøts ja yikmajtstuttit; jøts yiknimaadyøø ku kuwani tyimbyidsø'ømdit ja Pablo møøt ja Silas jam kajpjotp jawyeen, jaanims ja myeen ja jadigojk wyimbett. Winets jade'en yikmajtstuttøø møøt ja myigu'uk.

Sa yjajttøø sa kyubajttøø ja Pablo møøt ja Silas jam Berea

¹⁰ Xjats nay jaty koots ja Pablo møøt ja Silas ja myøøtjanchja'wibi kya-jxtsoo'nidøø jøts jam ñøjkxti ma kajp txøowi Berea. Ku jam yja'ttøø winets nay jaty ñøjkxti jam tsaptøjkjotp. ¹¹ Yujyts ja ne'egi yjaa'y'atti ja'abi israelit jaa'dyi, ka'ap ja tyimyjade'enidi sam ja'adi pøn jam tsinaadyip Tesalónica. Chojktip ja øy wine'en tmado'odit ja Jesús y'øgyajpxy y'ømyadya'aky, jøts ja ejtp winjabom txumi'ejxti ja nøky ma ja Dios kyajpxy jap yja'ayi, pøni tiy janch idø'øn ja' sa ja Pablo ja ñii'mxyidi. ¹² Xjats ja namay tjaa'gyukidøø jøts tmibøjktøø, jøts nayide'en namay ja griegit jaa'y tpabøjktøø pøn ana'amdip, ja yaa'y ja tø'øxy. ¹³ Xjats ku ja israelit jaa'y pøn jam tsinaadyip Tesalónica tnija'widøø ku wyinaty ja Pablo tkajpxwa'kxy nayide'en ja Dios kyajpxy jam Berea, winets ñøjkxti ja israelit jaa'y jam Berea, jøts jamts jaa'y nugo tyikjot'ambøjktøø. ¹⁴ Jøts ja Pablo ja janchja'wibidi jaty kyajxtsoo'niyøø jøts ja ñiikxy jam mejy'am, xjats ja myigu'uk japyi t'ukyiktaanaa midy txøow'ajttip Silas jøts Timoteo. ¹⁵ Xjats ja Pablo yikjamyøø'tajty jøts tmøødidøø jagambaatt ma kajp txøowi Atenas. Xjats ja Pablo tkajxjimbity ja ayuujk jøts ñøjkxtit ja Silas møøt ja Timoteo pojyi'iky, jøts ja jam tminabyaadidit ma ja wyinaty.

Sa yjajty sa kyubejty ja Pablo jam Atenas

¹⁶ Exam idø'øn ja Pablo wyinaty t'awixy ja Timoteo jøts ja Silas, jøts ja ka'ap yjanchjotkuki ku jap kajpøtpty t'ixy janchmay ja awanax ja tsamaxan midii'ibi ja dios'ajttip. ¹⁷ Kumi ka' yjotkuki, winets jam ñijkxy tsaptøjkjotp, jamts møøt kyajpxy myadyaajky ja israelit jaa'y, jøts ja' møøt pøn jaty Dios Teety t'ajot'ajttip, jøts nayide'en jabom jabom ja ñijkxy maayjøtpty, japts nayide'en møøt kyajpxy myadyaajky pøni pøn jaty jap pyajtpy. ¹⁸ Jamts wyinaty ja xpiiky jaa'dyi winaagin midii y'ixpøjktip ja epicureo y'ixpøjkin, jøts jam nayide'en jadu'uk midii y'ixpøjkmidip ja estoico y'ixpøjkin, ja'ats øjts tpatmadowdi ja Pablo ku ja tkajpxwa'kxy pøni pøn idø'øn ja Jesús'ajtp, jøts ku kuwani ja naxwii'ñit jaa'y wyimbettit jadigojk pøn jaty tø y'øøky. Winets ja xpiiky jaa'y winaagin yide'en nawyajnidoø jøts wyandøø:

—¿Ti dø'øn yø chaachnigajpxy yø yaa'dyøjk, yikmibøjkp idø'øn yø tijy ku jadinø'øn yjanchkajpxy?

Jøts jadu'uk t'adsojimbity:

—Wa' yø yjawi kyajpxyø'øpy ja wenkpi dios y'ayuujk.

¹⁹ Xjats ja Pablo yikwetsøø'ñ, jøts jam yiknøjkxøø ma ja tjagyapti junti tundaajk. Ja' ja et xyøøw Areópago, jamts tyiktøødøø jøts tnimaadyøø:

—Ja' øøts nnijawiwypy yø wenk xipøjkin midii mmimimpy. ²⁰ Wenkts yjawi xkajpxy, nnijawiwypy øøts ti jade'en tyijpy ku jade'en mwaa'ñ.

²¹ Paty ja Pablo yik'amidoøy jade'en, kumi jade'en tuki'iyi ja Atenas jaa'y yjuky'atti, jøts nayide'en pøn jaty jam ja'atjaa'y'ajttip, ja' nugo ejtp chøky'ajttip jøts ñanktyuknigajpxidit sa ja kø'øm wyinmaydi, winets ja jemy xipøjkin tpaatti jade'en.

²² Winets ja Pablo wya'kukiyi'ñ jam mayjaa'y agujkp ma jam yjuntitundi, jøts ja wya'ñ:

—Meets Atenas jaa'y ukmadowdi, wa'ats øts n'ixy ku meets xjanchwindsø'øgi ja mdiosti midii mdiost'ajttip. ²³ Kuts øts jam wyinaty n'et'ixy ma meets mdiost xwindsø'øgi, jamts ø ndayø'øbyejty tu'uk ja altajr midii jap wyinaty ja letri tmøøt'ajtp midii yide'en wamp: “Ja Dios ya'at y'altajr midii kayikni'ja'wip.” Øy'ajtp, ja'abi dios midii mee mwindsø'jkip jøts ka' xnijawidi pøni pøn ja', ja'ats meets idø'øn yam ndukmadøøpy pøni pøn ja'.

²⁴ Ja'abi Dios tø tyik'øyi tuki'iyi tuktsajp'agida'aky, jøts nay ja' tuki'iyi tniwindsøn'ajtkøjxp wa'n ttsajpi wa'n tnaajxi. Jøts ka'ap ja Dios kuwani tu'ugyi chøøni tsaptøjkjotpy midii jaa'y yik'ø'yip, ²⁵ jøts ka' Dios ti tyigø'y'ajtxi midii'ibi ja naxwii'ñit jaa'y ja mo'owajniyip, pø ja'axi tuki'iyi xmøø'yindip ja nmøk'ajtin, jøts pøni ti jaty ndajjuky'ajtyindip.

²⁶ Tu'uk ja Dios Teety tpiktaajky adøm n'apteety'amøj midii niduki'iyi ja naxwii'ñit jaa'y y'apteety'amøj'ajttip. Tø ja ttanibiktaagi nayide'en juuni ja kya'axtit, nayide'en ja chinaadyaajk tmo'ot ma jaty ja chøønidit. ²⁷ Ja'agøjxp ja Dios ttuñ jøts ja adøm nwinmaa'nmyee'nindit pøni pøn ja'. Øy udyaa'aky nbaajtindit, ka' yjagami Dios, wingon ja møøt n'ijtyindi. ²⁸ Pø Diosxi xyikjuky'ajtyindip ku nnajxindi ndøjkindi; pø nayide'enxi meets mmigu'uk wya'ñ winaagin pøn wijtyi, ku yide'en wya'andi ku ja Dios x'u'nk'ajtyindi.

²⁹ Pøni janch jade'ents jaa ku ja Dios x'u'nk'ajtyindi, ka'apts ja Dios jade'en nnaajtsja'wandit jøts ku ja y'oori ne'egi, uk pyuxplati ne'egi, uk chaadsechi sa jaty ja jaa'y ja kø'øm wyinmaa'ñjotpy tyikpidsømdi. ³⁰ Dios ka' ja y'lijty ttunk'aty ja jaa'y kya'øwyinmaa'ñ pøn tø ñaxti, jøts ixyam tuki'iyi t'ane'emy ja ñaxwii'ñit jaa'y øy yjamadsowi jøts wan tmajtstu'utti ja kya'ødyunk. ³¹ Kumi tø ja Dios Teety ttanibiktaagi ti xøøw ti et ja nøjkkx ttiidyuñ ja naxwii'ñit jaa'y; jøts

tø ja tpikta'aky ja ejxa'an ku ja ojts tyikjujppyiky jadigojk ja nwindson'ajtim Jesús, jøts ja naxwii'ñit jaa'y jade'en ttuknijawi jøts ku dø'on ja yja'aji pøn idø'on me'emp.

³² Xjats ku ja Pablo jade'en ja ayuujk tyiknajxy ku jaa'y yjujppyiky jadigojk oo'kpi jutjøtpy, winets ja Atenas jaa'y winaagin yjanchtaxekniðøjkidøø, jøts jadu'uk winaagin ñømdøø:

—Wan jade'eñi, ja wyinaty jadu'ukpi xøøw xjaaknigajpxy.

³³ Xjats ja Pablo jade'eñi tmajtstuujty. ³⁴ Jamts ja jaa'y wyinaty winaagin pøn tja'gyukidøø ja ayuujk, jøts ojts tpaduujniði ja Jesús yja'. Ja'abi jaa'y niðu'ugin txøøw'ajt Dionisio pøn jam windsøn'ajtp mā ja junti tundaajk txøøw'aty Areópago. Jøts jam nayide'en tu'uk txøøw'aty ja tø'øxyøjk Dámaris, jøts jam ja niwinaagin ja myigu'uk.

18

Sa yjajty sa kyubejty ja Pablo jam Corinto

¹ Xjats ja Pablo chøø'ñ jam Atenas jøts ñijkxy mā kajp txøøwi Corinto.

² Jamts tu'uk tminabyajttøø ja israelit jaa'y pøn txøøw'ajtp Aquila midi jam kugajp'ajtp mā et txøøwi Ponto. Ja'ats wyinaty namdso'ondipnim jam Italia møøt ja ñidø'øxy pøn txøøw'ajtp Priscila, jøts ñamja'atinim Corinto. Claudio dø'on ja wyinaty jade'en tø tyuñiði pøn ja italiit jaa'y wyindsøn'ajttip, ja'ats tyikutuky jøts yikajxpidsømgøjxnidøø niduki'iyi ja israelit jaa'y pøn jaty jam wyinaty tsinaadyip Roma. Xjats ja Pablo ojts t'atmigajpxy ja Aquila jøts ja Priscila, ³ jøts ja jam tmøøtaañ tmøøtsinaay, ojts tmøøtuñ kumi nay ja'abi tunk ja tyunk'ajtpy ja wetøjkxuuky. ⁴ Jøts ja Pablo wimboo'kxin xøøw ñijkxy tsaptøjkjotp mā ja jam tngajpxy tñimadya'aky ja Jesús yja', jøts jade'en ttukmibiky øy pøn jaa'y, wan ja t'israelitjaa'yidi tka'israelitjaa'yidi.

⁵ Xjats ku ja Silas jøts ja Timoteo ñamdsøondøø jap Macedonia, jøts ñamja'tti Corinto mā Pablo jam wyinaty, winets ja Pablo tu'ugyi tpadøjkijyi'ñi ja kajpxwa'kxin, jøts ka'pxy ttukmadøy ja israelit jaa'y jøts ku ja Jesús yiknitsokpi'aty pøn ja yjajøp'ejx'ejttip. ⁶ Ku ja Pablo jade'en wya'añ, winets yikmi'ambiky jøts ja ojts yikmidsepiky, ojts yiktsepajpxy. Winets ja Pablo ja wyet twixijty, ja ejxa'an jade'en tmø'øxy jøts ku jade'en jaayibaat tmajtstu'utt, winets wyaañ:

—Mgø'ømbøky meets wyinaty ku m'anmija'win wyindigø'ødyit; øts ka' mee n'uktunk'ajtni. Ejxti sa x'ejxti, ixyaḡm øts jam ne'egi nnøjkxt kajpxwa'kxpi mā pøn kya'israelitjaa'yidi. Tø net jaabaat nmajtstu'utti.

⁷ Winets jam chøø'ñ tsaptøjkjotp, jøts ñijkxy kajpxwa'kxpi mā tu'uk ja jaa'y chøøni pøn txøøw'ajtp Justo, pøn jam tsinaapy tsaptøjk pa'am. Yjanch'ajot'ajtpy ja Dios ja nayide'en. ⁸ Jøts ja Pablo jade'en kyajpxwa'kxy Justo tøjøjkjotp, winets ja jaa'y tu'uk tmibøjktøø ja Dios kyajpxy møøt ja y'u'nk ja ñidø'øxy, pøn ja tsaptøjk niwindsøn'ajtp, ja' xyøøw Crispo. Xjats nayide'en namay ja Corintit jaa'y tmibøjktøø ja Dios kyajpxy, winets ñøbajtkøxti. ⁹ Xjats ja Pablo tu'ukpi koots ja nwindson'ajtim ñimaajyøø, jøts ja jade'en tja'wiyi'ñi kidi jaa'y kyuma'ay ku ja ñi'mxyi:

—Kidi mdsø'øgi; jaakajpxwa'kx, kidi m'amøñ. ¹⁰ Ka'ap pøn sa mduñi, ixya me møø n'ity. Ja øts ja jaa'y yḡ may kajpjøøjty njagyepy pøn øts n'ayuujk xmibøjkwajniyip.

¹¹ Winets ja Pablo jam tyaañ Corinto tukjumøjt jagujkp, jøts ja jaa'y ttuk'ixpiky ja Dios kyajpxy.

¹² Xjats tu'ukpɪ xøøw yjajty ku ja Galión wyinaty myøjwindsøn'aty jam Acaya, winets ja israelit jaa'y tmi'ambøjkti ja Pablo, jøts tyiknøjkxti ma ja kutujktaajk jam, ¹³ jøts ttukmadoodøø ja møy windsøn yide'en:

—Ja'at jaa'y ttukmibøjkp ja jaa'y jøts ku ja jade'en t'ajot'attit ja Dios sam ka'tyimy'ukpaat'ajtniyi. Ka'ats adøm ngutujk jade'en t'ukupøjkni.

¹⁴ Xjats ku ja Pablo wyinaty tyimgyajpxw'a'añ, winets ja Galión tnimaay ja israelit jaa'y:

—Ku jeexyip ja kajaa winmaa'n, uk ja møk ayo'on jee tø tyuñi, øts ja jeexyip nyikwingukip meets israelit jaa'y; ¹⁵ kumi ka'ats yjade'eni, jabi nugo ayuujkxi yø' jøts mgø'ømgutujk meets yø', ka'ap øts yø x'ukpaat'ajtni, yikwingukidi yø pøni sã xyikwingukidi. Ka'ap øts yø'øbi ndiidyunwa'a'ñ.

¹⁶ Xjats ja israelit jaa'y yikajpxidsømgøjxtøø ja' kutujktaajkjøtpy. ¹⁷ Winets ja griegit jaa'y tmajtstøø ja Sóstenes, pøn windsøn'ajtp jam tsaptøjkjøtp, jøts jamyi tnaxmiwojpidøø jam yikutujkpi tøjka'agø'øm, jøts ja møy windsøn Galión ka' tyimdyunk'aty niwinø'ønin.

Ku ja Pablo jadigojk yja'jty jam Antioquia, winets ja myidigøøk ojk chøø'n kaja'pxw'a'kxpi

¹⁸ Xjats ja Pablo yjaaktaa'niyi'n jeky. Winets ja myigu'uk tjaak'ukajpxpoo'kxkøjxnaa niduki'iyi ku nøjkw'a'andi barkijøtp jam Siria, møøt ja myigu'uk Aquila jøts ja Priscila. Xjats yja'ttøø tekyjø'øm jam mejy'am ma txøøwi Cencrea, winets ja Pablo kø'øm nabyiktaajkxiyi ja exa'an, jøts ja wyaay tke'jpy ku wyinaty tø tuki'iyi tpaduñ midi wyanda'ak'yajtpy. Winets barkijøtpy tyøkinidøø. ¹⁹ Jøts yja'ttøø ma kajp jam txøøwi Efeso, jamts ja Pablo ja myigu'uk t'ukyiktaañ jøts jam nijkxy tsaptøjkjøtp ma ja ojts tminagyajpxyi ja israelit jaa'y pøn jam namyujkidip. ²⁰ Winets ja Pablo øy yajikminuu'kxaajky jøts jap waani tyaa'nit, ka'ats ja tkupijky. ²¹ Xjats ja myøt y'uknagyaajpxpoo'kxiniyøø, xjats tnimaay:

—Ja'agøjpx øts yam nijkxy ku øts jam Jerusalén nyiknaxw'a'añ ja xøøw midi wingomp; kuwani øts jadigojk nme'ent jøts mee n'ats'ext ku Dios wya'ant.

Xjats jadigojk tyøjkii'n barkijøtpy, jøts chøø'n jam Efeso. ²² Xjats ku ja yja'jty ma kajp txøøwi Cesarea, winets jam choo'ngøjmaa tekyjø'øm jøts ja nijkxy Jerusalén, jam ja t'atskajpxpøø'kxy ja myøøtjanchja'wibi, winets yjøptaajky ma kajp txøøwi Antioquia. ²³ Jamts ojts kawinaak xøøwin tyaa'ni Antioquia, winets chøø'n jadigojk jøts t'ayø'øgyixy jadigojk ma wyinaty tø wyidity ma et txøøwi Galacia jøts Frigia, jøts ja myøøtjanchja'wibi tkajpxjot'amøki.

Ku ja Apolos ojts kyajpxw'a'kxy jam Efeso

²⁴ Winet'ets ojts nay ja'abi tiempi yja'aty jam Efeso tu'uk ja israelit jaa'y pøn txøøw'ajtp Apolos, jøts pøn kugajp'ajtp Alejandria. Ja'abi jaa'y janch tsuj janch øy ja kyajpxw'a'kxy, janch nija'wip idø'øn wa'ats ja Dios kyajpxy.

²⁵ Tø ja wyinaty t'ixpiky ja Dios kyajpxy ma wya'añ jøts ku ja nwindson'ajtim tsojk myeenwa'añ ya naxwiñ. Ja'ayi ixpøjkin ja nigajpxy sã Juan Bautista ojts yik'ixpiky, jøts tigøjpx ku jaa'y ja tyiknøbejty. ²⁶ Xjats ja Apolos møk kyajpxøjkii'n jam tsaptøjkjøtp; kuts ja Priscila jøts ja Aquila ja jade'en tmadowdi, winets ja abiky tjiwaawdøø, jøts ojs ka'pxy ttukmadowdi ku ja Jesús tø wyinaty y'atsmeni, jøts ti jaty ja ojts ttuñ. ²⁷ Xjats ku ja Apolos jam wyinaty naxw'a'añ ma et txøøwi Acaya, winets ja janchja'wibi pøn jam Efeso ja nøky tyik'øydøø, jøts ja janchja'wibi tkajpxnigajxidøø pøn jam Acaya,

jøts øy tsuj jam tyikja'attit ja Apolos. Kuts ja jam yja'ljty Acaya, winets møk tjaakpudøjkiiy'ñ pøn jaty ja Dios tø wyinaty y'ayo'eixingøjxp tyukjanchjawi ja nwindson'ajtim Jesús, ²⁸ jøts ja jam kyajpxwa'kxy mayjaa'y agujkp, jøts wa'ats ttukmadoogijxy midi ka' mibaat pøn tkajpxyo'ont. Tyukmadoow tuki'iyi ku ja israelit jaa'y kyatiwiyinmaydi, jøts pøni sa ja Dios kyajpxy jap yjaadya'ni ku ja Jesús yiknitsokpi'aty, pøn ja israelit jaa'y yjajøp'eix'ejtíp.

19

Sa yjajty sa kyubejty ja Pablo jam Efeso

¹ Ku ja Apolos jap wyinaty Corinto jøts ja Pablo jam ñajxy kojpkjotp, jøts yja'ljty jam Efeso ma tpaajty namay ja myigu'uk pøn jaty ja Dios tja'myajtstip.

² Winets ja Pablo jam tyiktiiy jøts tniimaay:

—¿Tø meets ja Espiritu Santo mdatøkiyi ku ojts xjanchjawiidi ja Jesús?

Jøts ja t'adsojimbettøø:

—Omik øøts idø'øn ja nnijawit jøts kudam ja Espiritu Santo jaa.

³ Winets ja Pablo jadigojk tyiktiiy:

—¿Sudso'ampyts ojts mnøbatti?

Xjats ja t'adsojimbettøø:

—Jade'en øø nnøbejty sami Juan Bautista ja jaa'y tyiknøbejty.

⁴ Xjats ja Pablo wyaañ:

—Nugo eja'an idø'øn ja Juan Bautista myøøy ja jaa'y ku ja yiknøbety, jade'en'ampy ja jade'en ttuun jøts ja jaa'y jade'en yiknijawidit jøts ku ja tjanchyiktigatsti ja chinaa'yin. Nayide'en ja tniimaay jøts ja amumjoojt t'ajot'attit pøn wyinaty menwampnim, ja Jesús idø'øn yiktejp wyinaty menwamp yiknitsokpi.

⁵ Xjats ku jade'en tnadoodøø ku ja Pablo jade'en tniagjpxy, winets ojts ñøbatti ja nwindson'ajtim Jesús køjxp; ⁶ ku ja Pablo jade'en kyønixajidøø, jøts ja Espiritu Santo ñimejnidi, winets ja abikpyi ayuujk ojts tkajpxti, jøts tkajpxwa'kxti ja Dios y'ayuujk pøni sa ja Dios wyinmaa'nmyø'oyidi.

⁷ Nimakmajtsk ja wyinaty yjaa'y'atti.

⁸ Tigøøk po' ja Pablo jap yø'ø'y'ijty jam tsaptøjkjotp ma jam møk'ampy kyajpxwa'kxy, jøts ttukmibiky jade'en ja jaa'y sudso'ampy ja Dios ja nitanaa'yin tpikta'aky. ⁹ Jamts winaagin pøn tkamijøjktp, ja'ats møk ja wyinmaa'ñ tpiktaktøø jøts jam mayjaa'y agujkp tjanchtaxe'ekti ja Dios kyajpxy. Xjats ja Pablo ja møøt ñamyatstuujtniyøø pøn ja ka'øy ayuujk tjagyaptip, winets ja tmøødiñaa ja myøøtjanchja'wibi jøts tmøødiyii'ñ ma jaa'y tu'uk txøøwi Tiranno pøn ja ixpøjktaajk wyinaty tjagyepy, jamts ja Pablo jabom jabom ja myigu'uk ttuk'ixpiky ja Dios kyajpxy. ¹⁰ Jade'en idø'øn ja jam tyuun majtsk jumøjt, ja agøjxp idø'øn ja jaa'y ojts tnija'wigyøxti jagambaat ja Jesús kyajpxy, jade'en ja israelit jaa'y jøts nayide'en pøn ka'israelit jaa'dyi, pøn tsinaadyip Asia etjotp. ¹¹ Jøts ja Dios møk tmø'øy ja myøk'ajtin ja Pablo jøts ja milagri ja ttuun, ¹² jøts ja Pablo yjanchyiktapaaty ja paay jøts ja wet, jøts ja tminøjkxti ma pamaa'y jaa'y jap, winets ja pamaa'y jaa'y ja'ayi tatsøktøø, jøts ja miku' jade'eñi myajtstuujtidøø.

¹³ Jam wyinaty niwinaagin ja israelit jaa'y pøn nugo widejtíp kajp kajp. Ja ja tyunk'ajttip ja miximaaky ja mimuu'kk, jøts jade'en ja miku' ttukmajtsu'utti ja jaa'y, nay ja Jesús myøk'ajtin yiktunwajnip, jøts tnøjmi ja miku':

—Øts wamp, majtsu'ut yø jaa'y Jesús myøk'ajtingøjxp midi kyajpxyø'øpy ja Pablo.

¹⁴ Tu'uk ja israelit jaa'y pøn txøow'ajtp Esceva, pøn ja teety tniwindsøn'ajtp, ja'ats idø'øn ja y'una'jk jade'en adøtstip, niwixujk wyinaty yjaa'y'atti. ¹⁵ Xjats ku ja jade'en ttundi, winets ja miku' y'adsojimbeytidøø, jøts yiknimaadyøø: —Ja' ø n'ejxkapy pøn txøow'ajtp Jesús, jøts nayide'en ja' pøn txøow'ajtp Pablo; jøts meets ka' mee n'ejxkapy pøn ja mbøn meets.

¹⁶ Winets ja jaa'y pøn wyinaty ja miku' tmøøt'ajtp, jøts møøt ñamyajtsiyøø ja niwixujkpi jaa'y, jøts ja jade'en myimajada'agyidi ja miku', jøts niduki'iyi yikakøjxidøø janchwindsaachi jøptsaaçi, niwa'ats ixwa'ats idø'øn ja yjanchpidsømniidøø jap tøjktøpy. ¹⁷ Ku dø'øn ja jade'en yjajty jam Efeso, winets niduki'iyi tnija'widøø ja kajp jaa'y pøn jaty israelit jaa'y, jøts nayide'en pøn ka' y'israelitjaa'yidi. Ku tnija'widøø jade'en ja ayuujk, winets niduki'iyi ja jotmay yjanchpaajtidøø, jøts tu'ugyi ja nwindsøn'ajtim yja' tmøjpiktajktøø.

¹⁸ Xjats nayide'en namay pøn jaty tmibøjktøø ja Jesús yja' winets ja pyøky tuki'iyi tkajpxnaxkøjxtøø, sa y'ijty kya'ø'y'adø'øtsti. ¹⁹ Jøts nayide'en may pøn jaty y'ijty tyundip ja miku' tunk winets ja kya'ø'øky tuki'iyi tniitøøgyøxnidøø jam mayjaa'y y'agujk. Xjats ku tpayø'ødyøø ja nøky ja chow, wixijxmyajk mil idø'øn tpayø'ødyi tum ja plati meen. ²⁰ Jade'en idø'øn ja nwindsøn'ajtim Jesús ja myø'k'ajtin møj tnanjy'ijxyiyi.

²¹ Xjats ku dø'øn jade'en yjajty, winets ja Pablo jade'en wyinmay jøts jam t'ats'ejxwa'añ ja myøøtjanchja'wibi jam Macedonia y'etjotp, jøts nayide'en Acaya y'etjotp, winets jam yja'atwa'añ jadigojk Jerusalén. Jøts nayide'en wya'añ, ku jam y'uknaxt Jerusalén jøts nayide'en ñøjkxt Roma. ²² Xjats ku jade'en wyinmaay ja Pablo, winets ja pyudøjkibi tkejxy namajtsk jam Macedonia. Timoteo ja xyøøw ja pyudøjkibi jøts jadu'øk Erasto, jøts ja Pablo jam jawaani yjaaktaa'niyiñ Asia.

Ku ja Efesit jaa'y yjanch'ambøjktøø

²³ Winet'et ja Efesit jaa'y tyiktsept'a'akwa'andi ja Jesús yja'. ²⁴ Tu'ugyi dø'øn ja' pøn jade'en tyiktso'ondaajk ja ayuujk, Demetrio ja xyøøw. Ja'abi tunk idø'øn ja yjagyepy, tum ja plati dø'øn yiksandi'øyip, jøts nayide'en ja mutsk tsaptøjkuna'jk tyik'a'øyiñaxy nayide'en sami dios Diana chaptøjk t'ixy. Janch nimeenbyøjktip idø'øn ja tyunk ja' pøn jaty jap møøt tyuñ. ²⁵ Xjats ja Demetrio twaadsøoy niduki'iyi pøn jaty nay ø'øbi tunk tmøøt'ajttip, xjats ja tniimaay:

—Migu'uktøjkti, mnija'widixpi ku yø'øbi tunk nduktanajxindi janch øy janch tsuj ku ya njanchmeembyijkyindi; ²⁶ kumi m'ijxpy meets, mmadøøpy meets ku ja Pablo jade'en tkajpxyø'oy jøts wya'añ ku ka' yø' Diosi midi jaa'y yik'ø'yip sa adømin; jade'en ja Pablo ja jaa'y namay tø ttukmibiky, kidi yayip nugo yjaty, niduki'iyi dø'øn ja Asit jaa'y ja tnija'winidi. ²⁷ Ka' yjanch'øyi, janch tsø'øgi møøt yø', tsojk adøm ndunk jade'en wyindig'øyindit, jøts nayide'en yø dios Diana chaptøjk tsojk yø nayide'en kya'ukyikmøjpiktaknit pøn yø twindsø'øgidi pøn jaty ya Asia tsinaadyip, jøts pøn jaty tsoo'ndip o mañaajx o magajp.

²⁸ Ku ja mayjaa'y jade'en tmadoodøø ja Demetrio y'ayuujk, winets ja yjanch'ambøjktøø jøts niduki'iyi wyandøø:

—Jjanch møj adøm ndios Diana jøts ka' kyudig'ø'oty!

²⁹ Xjats ja kajp jaa'y xem yam yjanch'adøtsnibøkidøø, jøts ja Macedoniit jaa'y namajtsk yikmajtstøø pøn txøow'ajttip Gayo jøts Aristarco midi ja Pablo myøøtwidijtpy. Xjats yikpawejtstøø yikpakoo'tstøø, xjats yiknøjxidøø jap møj tøjktøpy ma ja kajp ja yjunti tundaajk jap tjagyapti. ³⁰ Jamts ja Pablo nayide'en tyøkiwya'añ jøts ja myigu'uk t'atskugajpxwa'añ pøn wyinaty tø

yikmatsti, xjats ja nay ja myøøtjanchja'wibi pøn møøt wyidity ka'ap ja mya-jtstuuttidøø. ³¹ Winets ja Pablo myiw'in'ijxy nayide'en tkajxtøø ja y'ayuujk pøn jam windsøn'ajttip Asia, jøts ku ka' jam tpadøkit ja myigu'uk. ³² Xjats ja jaa'y jam juntitundaajkjøtpty nugo yjanchkajpxjø'økti, øy sa tu'uk jadu'uk yjanchwam'andi kumi tø ja jaa'y wyinaty namay yjanchyø'omyukti, jøts ni tkanijawidi namay pøni tigøjxp idø'øn yø'omyukti. ³³ Xjats tu'uk ja israelit jaa'y ja myigu'uk tyukmadoojøø pøni ti ayuujk idø'øn jap ñiyø'omyuktip, ja' xyøøw Alejandro, ja'ats ja myigu'uk ojts kuwani ñajtswetsiyi jøts jam kyajpxt mayjaa'y agø'øm. Winets ja Alejandro xyaji'jky, ja' tyijpy ku chajpxajy jøts ja niduki'iyi y'amo'ondit, ja' kyugajpxwampy ja myigu'uk miditø yikmatsti namajtsk. ³⁴ Ku ja Alejandro yik'ejxkajpy kudam ja y'israelitjaa'yi, winets ojts jinaxy yjanchjaakajpxjø'økti. Kajpxti ja majtsk hora'an, xjats wya'andi: —ijanch møj adøm ndios Diana jøts ka' kyudigø'øty!

³⁵ Xjats ja eskribaan ojts kø'øm tyik'amøn ja mayjaa'y, jøts tnimaay:

—Meets Efesit jaa'y, ukmadowdi. Ñija'widip niduki'iyi ja naqxwi'ñit jaa'y ku yø Efesit jaa'y t'ejx'etti adøm nmøjdios Diana chaptøjk, jøts nayide'en yiknijawi ku n'ejx'ijtyim ja y'awanax miditø kidaajk tsajpjøtpty. ³⁶ Kumi janch idø'øn ja yjajty, kidits nugo mdsø'øgidi, ka' pøn ti tuuñ, tukween meets et, tsuj mjaa'y'attit ³⁷ kumi ya'at jaa'y miditø meets ya tø xyikmiñ ka' yø ti ttundi, jøts nika'ap yø tjemdejti ttedejeti adøm ndios Diana. ³⁸ Jøts Demetrio møøt ja tyumbi, pøni jaa ja'adi pøn møøt ña'ni'øøniwya'andi, mibaat yik-payø'ødyit jam kudunk wyindump, jøts tnigajpxtiti kija' ja pyøky sudso'ampy ña'ni'øøniyidi. ³⁹ Pøni wenk winmaa'ñ yø' miditø meets ixyam m'amidøøpy, mibaat myø'omyuktit jøts yikxon ngajpx'øyi'indit møøt ja kudunktøjk; ⁴⁰ tø ja wyinaty kya'øyi ku jotmøn jam nyikni'øø'na'andit jam møj windsøn wyindump, jøts ku ja jotmøn wya'ant ku adøm ja møøt ñachep'ijxya'am. Niti winmaa'ñits adøm sudso'ampy n'adsojimbejtindit, ku jotmøn t'amido'ot tigøjxp ya jade'en n'adijchindi ngajotkujkindi.

⁴¹ Xjats ku ja eskribaan jade'en kyajpx'abajtyii'ñ jøts yø'øwya'kxnidøø niduki'iyi ja jaa'y.

20

Ku ja Pablo wyidijty Macedoniit etjotp jøts nayide'en Greciit etjotp

¹ Xjats ku ja mayjaa'y jade'en ñiyjotkukidøø, winets ja Pablo ja myigu'uk twaadsoogijxy jøts ja ojts tjaak'ukajpxwejni, ojts ttukmadøø miditø ja wyinmaa'ñ'ajtpy; winet møøt y'uknagayjpxpoo'kxiniyi jøts jam ñijxky ma et txøøwi Macedonia. ² Winets jam ojts tkajpxpoo'kxixy tjot'amøkajpxkixy niduki'iyi ja myigu'uk ma jaty jawyeen wyinaty tø ñaxy, winets jam choo'ngoymaa jøts jam yja'jty ma ja Grecia et. ³ Jamts y'uktaa'niyi'ñ tigøøk po', xjats ku jam choonwani barkijøtpty jøts ñøjxwa'añ Siria, winets nay jamiy tñija'wiyii'ñ kudam ja israelit jaa'y ñiwinmayiyi jøts yikmatst jap barkijøtpty. Winets wyinmaay jøts ne'egi ñøjkt tekyjø'øm, paty jadigojk nay jam wyimbijty Macedoniit etjotp. ⁴ Ja' ja wyinaty yjamyøøt'ajtpy niwixujk ja myigu'uk pøn txøøw'ajttip Sópater pøn kugajp'ajtp Berea, jøts ja Aristarco, jøts jadu'uk Segundo pøn kugajpidip Tesalónica, jøts ja Gayo pøn kugajpip Derbe, jøts jadu'uk txøøwidi Timoteo, jøts ja Tíquico, jøts jadu'uk Tróximo pøn jam kugajp'ajttip Asia. ⁵ Ku jam yja'tti Filipos, jamts øts wyinaty n'awixy, øts Lucas nxøøw miditø ya'at nøky tjaapy. Xjats ja niwixujkpi jaa'y cho'onjawyeenidøø, jøts øøts jam ndaañ møøt ja Pablo, jøts øøts jamnim x'awixy jadigojk ma kajp txøøwi Troas. ⁶ Nay jamiy øøts ja

xøøw njaaktyim'yukyiknajxy jam Filipos, ja'abi xøøw ku tsapkaaky yikay midi kalevaduri møøt. Xjats øøts jam ndsøø'ñ xøguixy jøts øøts ja barki jam ndatøjkiñaā, jødsnīm øøts kyimagoxk xøøw nja'jty jam Troas mā øøts ja nmīgu'uk nnajtspajtiyī'ñ, jamts øøts ojts ndaa'ni wixujk xøøw.

Ku ja Pablo ja myigu'uk ojts tmīgajpxy jam Troas

⁷ Ku dyomingixøøw'ajty jøts ja Jesús yja' yø'omyukti, jøts ja tsapkaaky tyikwa'kxwa'andi sa ja nwindson'ajtim ojts tnajstuni jøts tnankyayi, xjats ja Pablo jap nayide'en kyajpxwa'añ. Kumi kyimjabom ja wyinaty choonwani paty idø'on ojts jeky'ampy kyajpxy kunim myøjtsuu'miyī'ñ. ⁸ Jap ojts ñamyukyidi tigøøk nipatøjkijpxy mā jap wyinaty lampiri may yjajy; ⁹ jøts tu'uk ja mixy jam wyinaty chøøni wentani'am pøn txøøw'ajtp Eutico. Kumi jeky ja Pablo kya'amaay, winets ja mixy jamyi mya'uu'yjøknaā jøts tu'ugyi ojts tyimyaanijky, winets jam ojts kyunaxy jam nipatøjkøjpx jøts ñaxkidaajky najxkøjpx, jam øøky yikwejtsji'jky. ¹⁰ Jøts ja Pablo tniwinajky jøts jam ñagyøxmuujtsøø oo'kpi ñikøjpx jøts tkøbatxajiyī'ñ, jøts tniimaay ja myigu'uk: —Kidi mdsø'øgidi; jujky yø'.

¹¹ Winets ja Pablo jadigojk pyatøjkigyojmi jap nipatøjkijpxy; japts ja tsapkaaky ttukwa'kxy, jøts kyaadyøø; winets yjaaka'amaay kunim xiijñiyī'ñ, jøts ñøjxnaā. ¹² Xjats ja jaā'y tjanchtaxondaktøø ku ja mixy ja øy tsø'øky tyiknøjxniidi.

Ku ja Pablo chøø'ñ jam Troas jøts ñijky Mileto

¹³ Winets øø ndsoonjawyeenyī'ñ barkijøtpy, jøts øøts jap n'aweixwa'añ ja Pablo mā kajp txøøwi Asøn, tekyjø'øm ja yø'øwya'añ ku ja jam ñøjxwa'añ. ¹⁴ Ku øøts ja nminabyajtiyøø jam Asøn, winets øøts ja møøt barkijøtpy ndøjkijyī'ñ, jøts øø nmøøtnijky mejñinaxy mā kajp txøøwi Mitilene. ¹⁵ Jøts øøts jam ndsøø'ñ jadigojk, jøts øøts kyimjabom jam nnajxy ja' y'awemp mā et jam txøøwi Quo, winets øøts nja'jty jadu'ukpi xøøw mā kajp txøøwi Samos. Jøts øøts nnijky poo'kxpi mā kajp txøøwi Trogilio, jøts nay kyimjabomgøjmyi øø njatkojmi mā kajp jam txøøwi Mileto. ¹⁶ Jade'en idø'on yjajty kumi ka'ap ja Pablo jeky tyiknaxwa'añ ja xøøw jam Asia etjotp, paty kyanijky Efeso; kumi ja' ku tsojk yja'atwa'añ Jerusalén jøts jam tyiknaxwa'añ ja Pentecostés xøøw.

Ku ja Pablo ttukmadøø ja Efesit mōjaa'dyøjk ya'atpi ayuujk

¹⁷ Ku øø njam'ajty Mileto, winets ja Pablo twaadsøøy pøn jaty jam mōjaa'dyøjk'ajttip mā tsaptøjk jam Efeso, ¹⁸ xjats ku ja yja'ttøø jøts tniimaay: —Meets mnija'wip sa øts ya Asiit etjøøjty n'øyjaa'y'ajty ku øts ya miduk'ojk ojts nmiñ, jøts ixymbaāt jade'eñim njaa'y'aty. ¹⁹ Mnija'widip sa øts etjp nbaduñ ja nwindson'ajtim Jesús y'ayuujk jøts ka'ap øts nnamyikexyiyi, njanchkuyaajxip øts ku ja jaā'y tkatsokti ja Jesús yja'. Jøts nayi mnija'wip meets sa øts ya ojts n'ayo'ombaaty ku øts ja nmīgu'uk israelit jaa'y xjemdundi xedundi. ²⁰ Ka'ats meets ndamajst'uty ja øyajpxy midi meets kø'øm myiktu'ump, ku ø nnigajpxy nayide'en mayjaa'y agujkp jøts adøjkjøøjty nayide'en. ²¹ Niduki'iyi øts ndukmadooguixy jade'en ja israelit jaa'y jøts nayide'en pøn ka'israelit jaa'dyi, jøts ku tmajtstu'uttit ja kya'ødyunk amumjoojt møøt ja Dios, jøts tmōjāwidit tjanchjāwidit ja nwindson'ajtim Jesucristo. ²² Ixyam øts kuwani nnijky Jerusalén ja agøjpx ku ja Espiritu Santo møk xwaadsøy, ka'ap nnijāwi pøni sa øts jam nøjx njaty. ²³ Jade'eñi nnijāwi pøni magajp nnijky nja'aty, jade'en øts ja Espiritu Santo xuknijāwi jøts ku kuwani nyiktsu'umt jøts jam møk n'ayo'ombaatt. ²⁴ Ka'ats øts yø

nmøjpikta'aky; wan ø t'øøky, ka'ap ø nnabya'ayøyi ja'agøjxp jøts øts øy jotkujk kuwani nyikyø'øwya'añ yø ndunk, kunim yjøkøxt midi øts nwindson'ajtim Jesús tø xmø'øy, jøts øts ja jaa'y øy tsuj ndukmado'ot ku ja Dios kø'øm tpa'ayøy ja ñaxwii'ñit jaa'y.

²⁵ Tø øts ya ngajpxwa'kxy ja Dios myøk'ajtin sa ttanitani ja yjaa'y, ixyam inet najtsja'wip øts jøts ku meets ka' n'ukniwimbejtnit. ²⁶ Paty meets ixyam ndukmadowa'añ jøts ku nipøn nganadyapøkyjawiyit põni jaa winaagin tyuu'tigøødyi. ²⁷ Kumi tø øts nnigajpxy tuki'iyi põni sa ja Dios ja wyinmaa'ñ tpiktaajky, ka'ap øts midi n'ayu'uch'aty. ²⁸ Jøts nayide'en meets kø'øm mnay'ejx'etidit, jøts niduki'iyi nayide'en ja migu'uktøjk x'ejx'ettit, kumi tø meets ja Espiritu Santo mbikta'agiyi jøts mdaandi ejx'ejtpi põni põni jaty ja Jesús yja' tpaduujnidip, põn ja nwindson'ajtim Jesús kø'øm kyu'o'jkimbaajtip. ²⁹ Nija'wipts øts ku øts ya ndsoont jøts mye'endit wenkpi jaa'y, jøts myikwinmaa'nmya'atwa'anidit, jøts tyikutigøøwya'ant ja Jesús yja'. Jade'en idø'on y'adø'otswa'andit kakeey miy'uk tyikutigøy ja borreegi'u'nk. ³⁰ Jøts nayide'en meets winaagin nøjx xwin'øøndi ja mmøøtjanchja'wibi, jøts ja xukmibøktit midi ka' tyiyi yjanchi. ³¹ Paty øyim mnay'ejx'etidit; ja'myatsta'am ku meets tigøøk jumøjt xinaxy tsunaxy ngadamajststu'uty ja kajpxwejin ayo'ejxingøjpx.

³² Meets migu'uktøjkti, Dios møk mbudøkiyidip, jøts nayide'en myikti#wyinmayiyidit y'ø'yayuujkøjxp midi xamidsojkindip sa ja x'ayo'ijxyindi, jøts nayide'en myikmo'odit ja øy'ajtin ja tsuj'ajtin møøt ja'adi niduki'iyi põn jaty ja Dios wyinaty tø tyikpøkwy'a'ach. ³³ Ka' meets ya ti n'amidøøy, ni meen, ni wet, niti. ³⁴ Wa'ats xnijawidi ku øts kø'øm ojts nnay'amiduniyi, jøts øts kø'øm nbaajty põni ti jaty øts xka'ejtxøø, ndukpaajt øts nayide'en ja nmigu'ukti ja yja' põn jaty ø møøt nwidijty. ³⁵ Ejtp øts ja nnigajpxy jøts ku jade'en mnamyidunidit, jøts xpudøkidit ja mmigu'uk põn ja yja' ka'ejtxip, ja'myatsti ja nwindson'ajtim Jesús y'ayuujk sa ja wya'añ yide'en: "Ne'egi mõj ja xondaajkin ja wyimbidsø'ømxiyi põn windsø'jkip, jøts ka'ap ja' põn yikwindsø'jkip."

³⁶ Xjats ku ja Pablo jade'en kyajpx'abajtyii'ñ, winets møøt ñagyuxendyaajkøø ja myigu'uktøjk jøts ja Dios t'ajot'ajttøø. ³⁷ Winets niduki'iyi ja myigu'uk wyinmaa'ñ yjanchmendøø jøts yjanchyaxtøø, xjats ja Pablo yikyuxajnajx jøts yiktsu'kxy. ³⁸ Janchjotmay'oo'knidip idø'on ja wyinaty ku ja Pablo jade'en wya'añ jøts ku ka' nijuuni xøøw y'ukyikniwimbejtnidit. Winets tmøøtnøjxtøø ma wyinaty ja barki jam.

21

Ku ja Pablo ñijky jam Jerusalén

¹ Xjats ku øø nmajststuupty ja nmigu'uk jam, winets øøts barkijøtpy ndøjkiña, jøts øø tiy ndyimñijky ma ja et txøøwi Cos jam mejkyujk'am, jøts øø kymjabom nja'aty ma txøøwi Rodas, jamts øøts jadigojk ndsøø'ñ jøts øø nja'aty mejy'am ma txøøwi Pátara. ² Jamts øø nbaajty jadu'ukpi barki midi wyinaty nøjxpx ma et txøøwi Fenicia, winets øøts jap ndøjkiyi'ñ. ³ Jøts øøts jam nyø'øy mejyotp, winets øøts n'ixy anajy'ampy tu'uk ja et midi jam mejkyujk'am, ja' xyøøw Chipre, jøts øø nja'lty Siria ñaxjotp. Ja ku ja barki wyinaty tyiktanwa'añ ja tsimy ma kajp txøøwi Tiro, xjats øøts jam n'uk'awidijty. ⁴ Nay jam øø nminabyaajtyiøø ja nmøøtjanchja'wibidi, xjats øøts jam nmøøtgañ wixujk xøøw; winets ja nmigu'uktøjkti tnimaadyi ja

Pablo jøts ku ka' ñøjxkt jam Jerusalén, kumi tø ja wyinaty ja Espíritu Santo tyuknijawiyidi ku jam sa yjatt. ⁵ Ku øøts wixujk xøøw n'uksinaay winets øø ndsoonwani. Xjats øø niduki'iyi ja nmigu'uktojck møøt ja ñidø'øxyti jøts møøt ja y'una'jkti øø xpadsøø'ñ, xjats øøts ojts xnajtskaxi jam mejy'am, winets øøts ja møøt n'ukuxanaañaa, jøts øøts møøt ndios'ajot'ajty. ⁶ Winets øøts jam ja møøt n'uknagyajpxpoo'kxinjøø, xjats øø ndøjkiyii'ñ barkijøtpy, jøts ja wyimbejtnidøø tyøjkwindump.

⁷ Xjats øø ndsøø'ñ jam Tiro, jøts øø nja'jty ma kajp txøøwi Tolemada, jamnim øøts nminawya'kxiyøø ja barki jøts øøts ja nmigu'uk n'ukmigajpxy, xjats øøts ja møøt n'uktaa'niyii'ñ tukxøøw. ⁸ Winets øø kyimjabom ndso'ongojmaa møøt ja Pablo pøn jaty øø møø nwidity, jøts øø nja'jty jam ma kajp txøøwi Cesarea. Winets øøts nnijkxy jam tu'uk jaa'y tyøjkjotp pøn txøøw'ajtp Felipe, jøts pøn ja øy'ayuujk tmiwidejtp, jøts nayide'en y'ijty tunk'aty tyikwa'kxy ja jii'kxy, ja'ats øøts jam møøt ndaañ. ⁹ Ja Felipe jam ja wyinaty ja nimaktaxk ja ñøøx pøn ka'anim y'amatskidi, ja'ats tkajpxnaxtip ja Dios y'øgyajpxy pøn ti jaty ja ttukajpxnaxwajniyidip. ¹⁰ Tø øøts jam wyinaty ndaa'ni jeky ku tu'uk ja Dios kyugajpxy yja'jty pøn txøøw'ajtp Agabo, jøts pøn tsoo'mp jam ma et txøøwi Judea. ¹¹ Ja'ats øøts ojts xmigajpxy, jøts ojts ja Pablo chum yiknixaji winets ñadyabaktsujimiyøø jøts nayide'en ñadyakøtsujimiyøø, jøts jade'en ja ejxa'an ja Pablo yikmøøy, jøts yiknøjmi:

—Ja Espíritu Santo dø'øn wamp jøts ku ja israelit jaa'y jam jade'en nøjkx mduñiyi Jerusalén, jøts myikøyakt ma ja yikmøjkutujkpi pøn ka'israelit jaa'dyi.

¹² Xjats ku øøts jade'en nnimadøøy møøt nmigu'uk pøn kugajp'ajttip Cesarea, winets øøts ja Pablo møk njanchjanimaay jøts ka' ñøjxkt jam Jerusalén.

¹³ Xjats ja Pablo y'adsojimbijty:

—¿Tiku mya'axti jøts øts nugo xyikjotmay'ookti? Wan twanjaty, ngupøkp øts wan øts tyikøtsummy tyikpaktsummy. Jøts pøni xyik'ookwandip jøts Jerusalén, ngupøkp øts ja nayide'en nwindson'ajtim Jesús wyinmaa'ngyøjxp.

¹⁴ Xjats kumi ka'ap øøts ja Pablo xkajpxkyupiky, winets øøts jade'eni n'amøøñ, xjats øø nwaañ:

—Wan tjaty pøni sa Dios kø'øm tyamidsøkyi.

¹⁵ Ku dø'øn jade'en y'uknajxy ja kajpxy, winets øøts ndsimy nyik'øyiyii'ñ, jøts øøts jam nnøjkwaa'añ Jerusalén. ¹⁶ Winets øøts ja nmigu'uk winaagin xjamyøøt'ajty midti tsinaadyip Cesarea, jøts tu'uk midti kugajp'ajtp Chipre, ja' xyøøw Mnasón midti wyinaty jekyip ja Dios kyajpxy tø tpabøjkniiy, ja'ats øøts xyikja'ada'akwamp jam Jerusalén ma wyinaty ja tyøjk tjagyepy.

Ku ja Pablo ojts tmigajpxy ja Jacobo

¹⁷ Xjats ku øøts jam nja'jty Jerusalén, jøts ja nmøøtjanchja'wibidi janch ejtni xoni øø xyikja'jty. ¹⁸ Winets øøts kyimjabom nmøøtnijkxy ja Pablo jam Jacobo tyøjkwindump ma wyinaty ja møjaa'dyøjkti niduki'iyi.

¹⁹ Xjats ja Pablo tkajpxpøø'kxy niduki'iyi pøn jaty jam wyinaty, jøts jatyi ttamimadyakniböjkøø tuki'iyi sa jaty yjajty ku ja Dios ja myøk'ajtim jade'en tnanky'ijxyiyi jam ma jaty ja samdi pøn ka'israelit jaa'dyi. ²⁰ Xjats ku dø'øn jade'en tmadoolidøø ja Pablo kyajpxy, winets yjanchxonjajtøø ja myigu'uk jøts tmøjpiktaktøø ja nwindson'ajtim Dios, xjats tnimaadyøø:

—Øy'ajtp migu'uk, tø xnijawi ku ja israelit jaa'y mil'ampy tø tmibøkti ja Jesús yja', jøts nay ja' niduki'iyi wandip jøts ku kuwani ja Moisés kyutujk yikpadu'unt. ²¹ Jøts wandip ja ku mets ja israelit jaa'y jade'en xukmadøy midti jagamgajp tsinaadyip, jøts ku ka' ttunk'attit midti Moisés kyutujk'ajt jøts ku ka' ja mutsk mixy'una'jk ja ejxa'añ yikmo'ot ñe'kxkøjxp, ni ngatu'unindit

ja ngø'ømdsinaa'yin. ²² ¿Sudso'ampy yø ndu'unindit? Janchnamyukidip inet ja nmigu'uktøjkti ku tñijawidit ku ya tø mja'aty. ²³ Øy'ajtp ne'egi jade'en xpadu'unt: Ja ya nimaktaxk nmigu'ukti pøn ja wyanda'aky jap tjagyaptip tsaptøjkjøtpy. ²⁴ Møødi jøts ja wa'ats'ajtin xpaattit, jøts xkujuuyijt ja wyanda'aktyi jøts nayide'en jap xnankyaabiyit, jøts yiknijaawit ku ja wyanda'aky tø tyik'adukti, jøts tñijawidit pøni ka'adam meets ja Moisés kyutujk xjanchpaduujniyi. ²⁵ Jap øøts ayuujk jadu'uk njaakjagyepy, kumi tø øøts ja nøky jade'en nguexy ma jaty ja Jesús yja' pøn ka' y'israelitjaa'y'i, jøts øø ndukmadøy jøts ka'ap nugo tmijotmay'ookitit ja israelit jaa'y chinaa'yin. Ja'ayi øø ndukmadøy jøts ku ka'ap ja tsu'uch ttsu'utstit midi ja tsamaxan yiktawindsø'jkip. Nayide'en ka'ap ja ni'jpy tjøø'kxtit, jøts nayide'en ka'ap ja jiyujk tsu'uch ttsu'utstit midi ka'øy'oo'kp, jøts nayide'en kidi ja ñiyaa'y ja ñidø'øxy ñabyøjkxyidit.

Ku ja Pablo yikmajch møj tsaptøjkjøtpy

²⁶ Xjats ja Pablo tmøødiyii'ñ ja nimaktaxkpi jaa'y, jøts kyimjabom ojts tyiktso'onda'akti sudso tpaattit ja wa'ats'ajtin. Xjats møøt tyøjkyyii'ñ jap møj tsaptøjkjøtpy jøts ttukmadoowa'andi ja teety juuni yjøpkøxt ja'abi jotmay. Yø' tyijpy ku dø'øn ja yjøpkøxtit winets nidu'uk nidu'uk tyikme'endit ja yojxin.

²⁷ Xjats ku wyinaty wixujk xøøw tyika'pxwanidi ja yjotmay sudso tpaattit ja wa'ats'ajtin, winets ja Pablo ja israelit jaa'y jap y'ejxpaajtiyøø jap tsaptøjkjøtpy pøn tso'ondip Asia. Ku ja Pablo jade'en yiknija'wiyii'ñ, winets ja jaa'y ñanky'ambøjkøxidøø ja xem ja yam, winets tmajtswa'andi ja Pablo, ²⁸ jøts tjanchtaya'axti tjanchtajokti jøts wya'andi:

—iMeets Israelit jaa'y, pudøjkik øøts! Wan tmajchindi ya'atpi yaa'dyøjk pøn kajp kajp widejtp, jøts ja jaa'y jade'en ttuk'ixpiky jøts ku ka'ap adøm ndsinaa'yini y'øyindi, jøts ja Moisés kyutujk nayide'en t'abaajxi jøts nayide'en adøm ndsaptøjk; jøts jinaxy ixyam tyimyjaak'adi'ich ku ja griegit jaa'y ja tjaaktyimgyuwaaw'i, jøts jade'en tyikma'aty adøm ngunuu'kxchaptøjk.

²⁹ Jade'en ja israelit jaa'y wya'andi ku ja Pablo jade'en tø yik'a'ejxnaxy jap kajpjøtpy, ku jap tmøøtwidity tu'uk ja griegit jaa'y pøn kugajp'ajtp Efeso, ja' xyøøw Tróximo. Jøts jawandipyim idø'øn ja jade'en tø net ja Pablo tmøøtnijky ja griegit jaa'y jap tsaptøjkjøtpy.

³⁰ Xjats ja kajp jaa'y yjanch'ambøjkknibøjkidøø, winets ja Pablo yikjidøjtpidsiimy jap tsaptøjkjøtpy, jøts ja tsaptøjk jaty tyik'adujktøø.

³¹ Tyimyik'ookwandip ja wyinaty, ku ja soldadi ñiwindsøn tñija'wiyii'ñ ku ja kajp wyinaty nugo yjanch'adøtsnidi. ³² Winets ja myiwindsøn ja ttuknija'wigyixy jøts ja pujt yjanchja'ttøø jap ma ja mayjaa'y jap wyinaty. Kuts ja yik'ejxpaattøø møøt ja masyoldadi, winets ja Pablo jade'eni yikmajtsuujty jøts ka' y'ukyikwojpnaa. ³³ Xjats ja windsøn twinguyø'øyiyii'ñ ja Pablo, winets ja Pablo yikmajch, xjats ja windsøn tyikutujky winets ja Pablo adsow aduuk yiktagøtsuumy ja puxkadeen, xjats ja windsøn tyiktiiy pøn jaa'y ja', ti tundigø'øyin ja wyinaty tø ttuñ. ³⁴ Xjats ja jaa'y ja xem ja yam nugo yjanchkajpxjø'ktøø, ñi sudso'ampy ja windsøn tjanchkamadooguki, winets tyikutujky jøts jap tnankyiknijkxyi ma ja soldadi kyutujktaajk japti. ³⁵ Ku jap wingon tyikja'tti ma eskaleri jap, winets ja jaa'y tjanchjaakwojpw'a'andi ja Pablo ambøjkingøjxp, paty ja soldadi ojts køjxp tsapkö'ødi ja Pablo; ³⁶ janch mayjaa'y idø'øn ja wyinaty pameejnip, jøts tjanchtaya'axti tjanchtajokti:

—iWan tpa'øøky!

Ku ja Pablo yjanagyugajpxøø mayjaa'y wyingujkpy

³⁷ Ku wyinaty ja Pablo jap tyøkíwyani soldadi kyutujktaajkjøtpy, winets ja Pablo tjanøjmi ja windsøn:

—¿Kidi y'øy'att ku nmigajpxt?

Xjats ja windsøn t'adsojmbijty yide'en:

—Øy'ajtp põni mjaityp griegit ayuujk. ³⁸ ¿Kidi ja egiptitjaa'yip mets, põn ja tsep namnim jawaani tkayiktso'ondakp, põn ja yikjaa'y'oo'kpi jam ojts tmøøtsøøni nimaktaxk mil jam tø'øts'etjotp?

³⁹ Xjats ja Pablo t'adsøøy jøts tnimaay:

—Israelit jaa'y øts. Jam ø ngue'jxy Tarso midi jam møj kajp'ajtp Ciliciit etjotp; tun ja may'ajt jøts øts yø jaa'y nmigajpxt.

⁴⁰ Xjats ja windsøn tyikutujky jøts jaa'y tmigajpxt, winets ja Pablo jap eskalerikixpy yya'k'øyyii'ñ, jøts ja'ayi xaji'iky jøts ja jaa'y y'amo'ondit. Xjats ku ja jaa'y y'amongøxtøø, winets ja hebreit ayuujk ja tkajpxøjkii'ñ:

22

¹—Meets migu'uktøjkti jøts møjaa'dyøjkti, ukmadoojidik øts n'ayuujk midi ngajpxwampy.

² Xjats ku ja jaa'y tmadowdi jøts ku ja Pablo tkajpxy ja hebreit ayuujk, winets niduki'iyi y'amondøø, jøts ja Pablo tnimaay:

³—Israelit jaa'y øts, jam ø ngue'jxy Ciliciit etjotp ma kajp txøøwi Tarso, jøts øts ya tø nyeeky Jerusalén, jøts øts ja' xyik'ixpijky midi txøøw'ajtp Gamaliel, wa'ats øts ja xuknijawi adøm ndsinaa'yin põni sa ja møjaa'chinaa'yin. Ojts øts idø'on ja Dios yja' ka'pxy nbaduñ amumjoajt jade'en sa meets ixyam xuñin. ⁴ Øts y'ijty nmøjmidsep'ajtpy põn jaty ja Jesús yja' tpaduujnidip, nyik'ooktibaat øts ja y'ijty, jøts nyiknijkxy ja yaa'y ja tøøxy jap puxøjkjøtpy. ⁵ Wa'ats ja teetywindsøn tnijawidi møøt ja møjaa'dyøjk, kumi kø'øm øts ja xmo'odi ja kutujk jøts øts ja jam nminijky Damasco ma wyinaty adøm nmi'israelit jaa'dyi. Jøts øts ja jam n'ixa'ay põn jaty wyinaty tpaduujnidip ja Jesús yja', jøts øts ya nyikmeenwa'añ aguwanikøjpx jøts nyik'ayo'ombaatawa'añ.

Ku ja Pablo tnimadyaajky ja chinaa'yin ku ja tyiktigajch

⁶ Xjats ku øts ojts nminijky ja'abi winmaa'ñ, jam wyinaty wingon nja'atwani Damasco kujkxøøw et, winets øts ojts jotmøñ ja jaj xnawidity midi janch møk tsamamp, jøts n'ijxy ku kyidaajk tsajppjøtpy. ⁷ Winets øts jamyi nnaaxkidaajky, jøts øts nmadøøy ja ayuujk ku øts yide'en xnimaay: “Saulo, Saulo, ¿tiku ø xjemdunwa'añ xedunwa'añ?” ⁸ Xjats øts nyiktiy jøts nnimaay: “¿Windsøn, põn mets?” Jøts ø x'adsøøy: “Øts Jesús Nazaretit jaa'y, ja' põn mjemdumpy mdedumpy.” ⁹ Xjats øts njamyøøt yjancho'jkidøø ku ja jaj t'ejxpaattøø, ja' ka'ap ja tmadoodøø ku øts nyikmigajpxy. ¹⁰ Xjats ku øts idø'on jade'en nyikmigajpxy, winets ø nnimaay: “¿Ti windsøn ndu'ump, sudso'ampy ndaabyaatt?” Winets nwindsøn'ajtim xnimaay: “Pid'øk jøts mnøjkt jam Damasco, jamts tuki'iyi myiktumado't põni ti jaty mdu'ump.” ¹¹ Kumi tø øts wyinaty ja jaj xyikwinjøøxy xyikwinapy, winets ja nmigu'uk jam x'ukwejtsnidøø, jøts øts xyikja'ttøø jam Damasco.

¹² Jam wyinaty tu'uk ja jaa'y põn txøøw'ajtp Ananias, ja' idø'on tiy tjanchapadump ka'pxy ja Moisés kyutujk. Xjats niduki'iyi ja israelit jaa'y põn jaty jam tsinaadyip Damasco, yjanchojktip idø'on ja' ja Ananias. ¹³ Xjats øts ja Ananias ojts x'ixy, jøts øts xnimaay: “Migu'uk Saulo, tawin'ejx yikxon yø mween jadigojk.” Jøts øts jatyi ojts nwin'ejxpiky, xjats nmigu'uk n'ejxpaajty. ¹⁴ Jøts ø xnimaay ja Ananias: “Ja Dios Teety põn adøm n'apteety'amøj pyadundip

jeky'ip, ja' kò'òm tò mdsòkyi jòts me mduknijawiyit ja y'òw'ynmaa'ñ, jòts ñanky'ijxyiyi ja nwindson'ajtim Jesús pòn tum tsuj ja winmaa'ñ tmòot'ajtp, ja'ats kò'òm ja y'ayuujk mdukmadoojy'ip. ¹⁵ Ja'agòjxp ja Dios jade'en ttuun, jòts mets nòjxk xkajpxwa'kxy ja kyajpxy y'ayuujk, jòts xuknijawit tuki'iyi ja naxwii'ñit jaa'y sa tò x'ixy jòts sa tò xmadòy. ¹⁶ Jòts ixyam, ¿tiku nugo mgo'kni? Pidò'òk jòts mnòbatt, janchjawi amumjoojt ja nwindson'ajtim Dios yja' jòts myikpòk'wya'adsiyit."

Ku ja Pablo tñimadyaajky sudso'ampy ojts yikexy jam ma jaa'y ka' y'israelitjaa'yidi

¹⁷⁻¹⁸ Ku òts idò'òn jade'en njajty, winets òts jadigòjk nwimbijty ja Jerusalén, jòts òts jap nniikxy tsaptòjkjòtpy Dios'ajot'ajtpi. Jajts òts ja nwindson'ajtim xmigajpxy, jade'en òts ja n'ixy kidim ja jaa'y kyuma'ay, jòts ø xnimaay: "Puty: ya tsoon Jerusalén, ka'ap inet ja tmòjpikta'aktit sa òts inet n'ayuujk xjakajpxiyit." ¹⁹ Xjats ø nniimaay: "Mets teety, ñija'widip ja' ku òts jam y'ijty nniikxy ma jaty ta tsaptòjk, jòts òts jam nmach pòn jaty tpadundip mets mja', jòts òts ja ndagubety, yikxon njanchwiwòpy jòts nyiknijkxy puxòjkjòtpy. ²⁰ Ñija'widip ja nayide'en ku òts jam wyinaty ku ja Esteban jam y'ò'jky midi mets m'ayuujk ojts tkajpxwa'kxy, jam òts wyinaty nayide'en ndani, jòts òts nwaan nayide'en jòts tyik'ooktit. N'ejx'ejtidòø òts ja yik'oo'kpi ja wyet." ²¹ Xjats òts ja nwindson'ajtim xnimaay: "Puty, jagam me ngajxwa'añ kajpxwa'kxpi ma jaty pòn ka' y'israelitjaa'yidi."

Ku ja Pablo ja soldadi windsøn yikpuxòjktòjkiyø

²² Xjats ja Pablo jade'en yjakajpxy, winets ja mayjaa'y mòk'ampy jyanchkajpxjòktòø, xjats wyandòø:

—¿Wan tpa'òòky yò'òbi jaa'y! ¡Ka'ap y'ukpaat'ajtiñi jòts yjaaktsòønit!

²³ Xjats ja mayjaa'y tjanchtayax'adò'òtsti jòts ja wyet tjanchajpwòjti, jòts ja pu'ux nayide'en tjanchwiwò'òkti, ²⁴ paty ja windsøn nayide'en tyikutujky jòts ja Pablo jap yikpòk'jò'òkt jap windsøn kyutujktaajkjòtpy. Xjats ja windsøn tyikutujky jadigòjk jòts yikwopt, jòts kuwani ttuknigajpxwa'añ tigòjxp ku ja mayjaa'y jade'en myidsep'atyiyi. ²⁵ Xjats ku ja Pablo tò wyinaty yikòtsumni yikpaktsumni jòts yikwopwa'añ, winets ja Pablo tñimaay ja soldadi pòn jap wyinaty:

—¿Mbaat'ajttip meets jòts meets ja romanit jaa'y xwopt midi ka'anìm yiktìdyuñ?

²⁶ Ku jade'en tmadòoy pòn ja soldadi t'ana'amp, winets ja jaty tñinijky ja wyindsøn, jòts tñimaay:

—Ejxim ku jade'en m'adò'òtst, ¿kidi xnijawi ku yò' romanitjaa'y'i?

²⁷ Winets ja windsøn twingunòjkxiy'ñ ja Pablo jòts tyiktiy:

—¿Mjanchromanit jaa'y mets?

Xjats ja Pablo t'adsojimbijty jòts tñimaay:

—Paty ja' òts.

²⁸ Xjats ja windsøn tñimaay ja Pablo:

—Janch kajaa òts nmeef tò nyiktuñ ku òts ya nromanitjaa'y'atwa'añ.

Xjats ja Pablo tñimaay:

—Ka'ap òts ya ti jade'en tò nguujy, ja' ku òts ya tò ndyimgye'exy.

²⁹ Xjats ku dò'òn jade'en yjajty, winets ja soldadi jadi'iñi yjiyò'ogyòxniðø pòn ja Pablo t'ukwopwandip. Xjats ja windsøn ojts nayide'en chò'ògi kudam ja' ryomanitjaa'y'i pòn wyinaty tò tkòwòndi t'pakwòndi.

Ku ja Pablo yiktanay'oyiyøø ja israelit jaa'y myøjkutujk adsinaabyi wyingujky

³⁰ Xjats ja windsøn kuwani tñijawiwya'añ tigøjxp ku ja Pablo ja israelit jaa'y ñi'øøniyi. Xjats kyimjabom tñankwiyinajkiyøø ja puxkadeen, jøts tñankwyaamujkiyøø ja teetywindsøn jøts nayide'en ja israelit jaa'y kyutujk adsinaabyidi, winets ja Pablo jap yikwaanijxxy jøts tyikajpxwa'añ jap windsøn y'agui'ptyi.

23

¹ Xjats ja Pablo twinguwa'jkiyi'ñ pøn jaty jap wyinaty møj windsøn'ajttip, jøts tñimaay:

—Migu'uktøjkti, wa'ats Dios t'ixy ku øts ka'ap ja Dios nmidundigøy, ejtp øts jotkujk nnayjawiyi.

² Winets ja møjteetywindsøn tyikutujky midi txøøw'ajtp Ananias, jøts tñimaay pøn ja Pablo jap wyinaty wingon møøt tyani, jøts ja Pablo yik'akojxjøkt. ³ Xjats ja Pablo t'adsøø ja møjteetywindsøn:

—iTi windsøn mets idø'øn jade'en, nayide'en ja Dios mduniyit! Pøni mgutujk'adsinaapy tam mets, ¿sudsøts øts jade'en xnankyoaxwa'añiyi pøni jap tam ja kutujk xmøødi?

⁴ Xjats ja y'adsøødøø pøn jaty ja Pablo jap wyinaty møøt wingon y'ity, jøts ja Pablo yiknimaay:

—¿Jade'endam idø'øn xmigajpxigøy ja møjteetywindsøn?

⁵ Xjats ja Pablo y'adsøøy:

—Migu'ukti, ka' øts yø nnijawi kudam yø myøjteetywindsøni; janch jade'en ja Dios kyajpxy wya'añ ku wya'añ: “Kidi xmigajpxigøy pøn jam yikutujktip mgajpkøjxp.”

⁶ Winets ja Pablo jam t'ejxkajpy ku majtsk piky ja windsøndøjk jamdi. Jam wyinaty pøn ja' tpadundip ja saduceit ixpøjkin, jøts nay jam ja'amidi pøn tpadundip ja fariseit ixpøjkin, paty ja Pablo møk ojts kyajpxwa'kxy, jøts wya'añ:

—Meets migu'uktøjkti, fariseit jaa'y øts jøts fariseit jaa'y øts ndeety. Ja' meets ixyam xatiidyump ku øts n'awijxy'aty jøts ku ja oo'kpi jadigojk yjujkyiky jap oo'kpi jutjøtpy.

⁷ Xjats ku ja Pablo jade'en wya'añ, winets ja' pøn ja fariseit ixpøjkin tjagyaptip jøts nayide'en pøn ja saduceit ixpøjkin tmøøt'ajttip, ja'ats ojts møk ñadyamigajpxyidi kunim majtsk piky ja wyinmaa'ñ yjajttøø. ⁸ Ja saduceit jaa'y wamp jøts ku ka'ap ja oo'kpi yjujkyiky jadigojk jap oo'kpi jutjøtpy, jøts ku nayide'en ka'ap ja ankilis ma, jøts ni anmija'win jøts ni miku' niti kya'ity. Jade'en idø'øn ja saduceit y'ixpøjkin; xjats ja fariseit y'ixpøjkin tuki'iyi ja tjanchjawidi. ⁹ Xjats niduki'iyi kyajpxjøktøø; winets winaagin ja kajpxwejpi wya'kukiyi'ñ pøn tñija'widip ja Moisés kyutujk, jøts pøn tsojktip ja fariseit y'ixpøjkin, ja'ats ojts wya'andi:

—Ya'at jaa'y ka' ti tundigøøyin tjagyepy, jotmøn ku yø tø myigajpxy tu'uk ja ankilis uk øy ti, ka' y'øyi ku ja Dios yja' nugo ndatøjka'andi.

¹⁰ Xjats kumi janch møk idø'øn ja jeky ñagyajpxidøø, winets ja soldadi windsøn tjøpjaw ku ja Pablo jotmøn ja mayjaa'y y'uknujkw'a'kxniyit. Winets ja soldadi ja twaadsøøy, jøts ja Pablo jam yikwejtspidsiimy mayjaa'y agujkp, jøts jap jadigojk tyiknijxxy soldadi kyutujktaajk agui'py.

¹¹ Xjats ku kyoots'ajty, winets ja Pablo t'ixy kuma'ayjøtpy ja nwindson'ajtim Jesús, jøts ñii'mxyiyi:

—Pablo, jotmøk nabyikta'agi, nayide'en jam nøjkk mgajpxwa'kxy mā ja møj kutujktaajk jam Roma, nayide'en sam øts n'ayuujk tø xkajpxwa'kxyi ya Jerusalén.

Ku ja Pablo yiktanibiktaajkøø jøts ja y'amaa'tsk'ookt

¹² Xjats ku jade'en ja Pablo kyumaay, winets ja israelit jaa'y winaagin tkajpxy'ajttøø ja Pablo jøts tyik'ooktit, møk'ampy idø'on tyimñawyajnidøø, ka'ap ja tkugayidit tku'uugidit kunim ja Pablo tyimyik'ejxnaxt, kunim ja tyimyik'ooktit. ¹³ Wixijkxy ñaxy idø'on ja jaa'dyi pøn idø'on ja Pablo jade'en tkajpxy'ajttøø. ¹⁴ Winets ja ñiwixijkxpyi jaa'y jap ñøjkkxøø mā ja teetywindsøn jap wyin'atyi møøt ja møjaa'dyøjkti, jøts tnimaadyøø:

—Tø øøts idø'on ndyimñagyajpxyi, ka'ap øøts ngugaayiwya'añ ngu'uugiwy'a'añ, kunim øøts ja Pablo ndyimy'ejxtnim øøky. ¹⁵ Meets niduki'iyi pøn jaty ya kutujk adsinaadyip, amidowdi ja soldadi windsøn jøts jabom ya ja Pablo tyikme'ent mee mwindujy, jade'en xwindaaayidit ja windsøn jøts ku ka'pxy yikpayø'øwya'añ ja øøky, jamts øøts wyinaty tuu'am n'aweix'ity, jøts jam yø y'ookt.

¹⁶ Xjats ja Pablo pyøøpy tñaja'wiyii'ñ ja ayuujk ku ja yjamy ja jaa'y yik'ookwa'añi, winets ja yjamy ja ojts ttukmadøø mā ja soldadi kyutujktaajk jap. ¹⁷ Xjats ja Pablo twaadsøø tu'uk ja soldadi, jøts tnimaay:

—Møøt nøjkk ya'at mixy jap windsøn wyindujpy, jap ayuujk yø tu'uk tkajpxwa'añ.

¹⁸ Winets ja soldadi tmøødiyii'ñ ja mixy jøts ttukmadøø ja wyindsøn, jøts tnimaay:

—Tø øts ja Pablo xyaa'jxi midi jap tsumy, jøts øts tø xnøjmi jøts øts ya'at mixy nyikme'ent, jap ayuujk tu'uk tkajpxwa'añ.

¹⁹ Winets ja mixy kyøjø'øm ja windsøn y'ukwejtsøø, yiknijkxyi abiky jøts yiktøøji:

—¿Ti øts idø'on xamigajpxwamp?

²⁰ Xjats ja mixy t'adsøøy:

—Jade'en ja israelit jaa'y ayuujk tø tpikta'akti jøts tø tkajpxy'atti, jøts mets myik'amido'ot ja Pablo jøts jabom xyiknøjkkxt jap yikutujkpidi y'agui'py, ja'agøjpx tijy ku ka'pxy tpayø'øwya'añdi ja pyøky. ²¹ Taayidip ja', kidi xmibiky, jap ja jaa'y yu'uch y'aweixwa'añdi ñiwixijkxy ñaxy jap tuu'agui'py. Tø dø'on ja møk tyimñawa'y'añidi jøts ka' tkugaayiwya'añdi tku'uugiwy'a'añdi kunim ja Pablo tyimyik'ooktit; jam inet idø'on ja y'aweixti, ja'ayi mets ja nugo x'uk'adsojimbett.

²² Winets ja mixy ja windsøn y'ana'amiyøø jøts ku ka'ap pøn ttukmado'ot, xjats jade'eñi møøt ñawya'kkøø.

Ku ja Pablo yiktanikejxy ja møj windsøn Félix

²³ Xjats ja møj soldadi windsøn tyaa'jxyiyii'ñ nimajtsk ja syoldadi jøts t'ane'emy, jøts ja syoldadi nimajtsk magø'pxy ñayjøp'ejxidit pøn tekyjø'øm yø'ødyip, jøts ja nidugui'pxy myajk ja kawaagyøjxpidi, jøts nayide'en nimajtsk magø'pxy ja takuu'møøtpidi. Ja'ats jam nøjkkxtip Cesarea jøts choondit koots taxujk yaxp. ²⁴ Xjats ja windsøn nayide'en t'ane'emy jøts ja Pablo kyawaay nayide'en yikmo'ot, jøts nayide'en t'ane'emy jøts ja Pablo yik'ejx'ett, jøts møk møjaa'w yikø'aykt mā ja møj yikutujkpi Félix jam. ²⁵ Xjats ja windsøn ja nøky tyik'ø'iyiyii'ñ jøts ja soldadi ja yiktamigajxyiyii'ñ, yide'en ja nøky wya'añ:

²⁶ “Øts nxøøw Claudio Lisias midi møj soldadi windsøn, øts mets ja kajpxpoo'kxin ndaniguejxpy mets møj yikutujkpi Félix. Tu'uk øts ja ayuujk

nguexy. ²⁷ Jade'en ja israelit jaa'y tɔ y'adɔ'ɔtsti, tu'uk ya'at jaa'y tsumdɔɔ midɪ mets ɪxyam ndagɔdɔjkɪp. Yɔ' wyinatɪ yik'ookwɔndɪp, xjats ku ɔts oɪts nnɪjawɪ kudam yɔ' ryomanɪtjaa'yɪ, wɪnets ɔ nnɪɪjɪkxy mɔɔt ja soldadɪ, ja'agɔjɪp ja jaa'y kyayɪk'o'jɪkɔɔ. ²⁸ Xjats kumɪ nnɪjawɪwyampy ɔts tiku yɪkni'ɔɔni, jɔts nyɪkniɪjɪkxy jam mɔ ja israelit jaa'y myɔjɪkutujɪk'adsɪnaabyɪdɪ, ²⁹ ja'agɔjɪp yjɔwɪ oɪts yɪkni'ɔɔni ku ja oɪts tkamɪmadɔy ja israelit jaa'y kyɔ'ɔmgutujɪkɪ, ka'ats pyaɔt'atɪyɪ jɔts ku tyɪk'ooktɪt, jɔts nɪ kyapaɔt'atɪyɪ jɔts puxɔjɪkɔtɔp y'ett. ³⁰ Tɔ nyɪktuknɪjawɪ ku ja israelit jaa'y nɪwɪnmayɪyɪ jɔts yɪk'oogɪyɪt, paty ɔts ɪxya nnajɪtskajɪ, paty ɔts nayɪde'en tɔ ndukmadɔy pɔn tnɪ'ɔɔ'nɪdɪp yɔ Pablo, wan jam tyɪkwɪngukɪdɪ jam mets mwɪndump. Yɔ'ɔyɪ kajɪxy me ndanɪguejɪpɪ. Dioskujuyɪp."

³¹ Ku dɔ'ɔn jade'en ja soldadɪ ja kutujɪ yɪkmɔɔdyɔɔ, wɪnets koots tmɔtso'ondɔɔ ja Pablo jɔts jam tmɔɔtjɔ'ttɔɔ mɔ kajɪp txɔɔwɪ Antɪpatrɪs. ³² Wɪnets ja soldadɪ jam kyɪmjabom wyɪmbejtnɪdɔɔ midɪ tekyjɔ'ɔm yɔ'ɔdyɪp, jɔts ja kawaaɪchinaabyɪdɪ tjaakmɔɔtnɔjɪkxtɔɔ ja Pablo ³³ jam Cesarea, jɔts jam tkɔyɪktɔɔ ja nɔky mɔ ja mɔj yɪkutujɪkɪ jam jɔts nayɪde'en ja Pablo yɪkɔyɪjɪkɪ. ³⁴ Xjats ja mɔj yɪkutujɪkɪpɪ tpa'ɪjɪxy ja nɔky, wɪnets tyɪknɪdɔɔjɔɔ pɔnɪt jaa'y ja Pablo, xjats t'adsoodɔɔ ku ja Cyɪlɪcɪtjaa'yɪ, ³⁵ xjats ja Pablo yɪknɪmaaɪyɪ:

—Jaanim ɔts nmado'ot ja mgajɪpɪ ja m'ayuujɪ kunɪm ja mye'endɪt pɔn mni'ɔɔ'nɪyɪp.

Wɪnets tyɪkutujɪky jɔts ja Pablo yɪkpɔkjɔ'ɔkt mɔ Herodes ja mɔj kyutu-
jɪktaajɪk jam, jɔts jam tnɔnk'y'ejɪx'ɪtyɪyɪ.

24

Ku ja Pablo yjanagyugajɪpxɪyɔɔ mɔj wɪndsɔn Félix wyɪngujɪkɪ

¹ Xjats kyɪmagoxkxɔɔw'ajɪty, wɪnets ja mɔj teetywɪndsɔn Ananɪas yjɔ'ttɔɔ jam Cesarea mɔɔt ja mɔjjaɔ'dyɔjɪk, jɔts tu'uk ja kajɪpx'ɔyɪbɪ pɔn txɔɔw'ajɪp Tértulo. Jade'en ja mɔj yɪkutujɪkɪ jam twɪnguwa'jɪkɪdɔɔ, jɔts ja Pablo tnɪ'ɔɔniwɪya'andɪ. ² Xjats ja Pablo jap nayɪde'en tyɪkmendɔɔ, wɪnets ja Tértulo ttamɪ'ɪɪñ ja mɔj yɪkutujɪkɪ Félix sɔ Pablo kya'ɔy'adɪ'ɪch, jɔts wɪyaañ:

—Mets mɔj yɪkutujɪkɪ, dioskujuyɪp. Tsuj jɔtkujɪ xjagyepɪ ja mgajɪp, ka' mɔ ti tsep tyuñɪ mets mwɪjɪ'ajɪtɪngɔjɪp. ³ Ejɪp ɔɔts jɔtkujɪ xɔmɔ'ɔy jɔts ɔɔts jɔtkujɪ nnaɪy ndɔkɪ ɔmyadsowɪ, janchkunuu'kxy ɔɔ njawɪ mets mɔj yɪkutujɪkɪ. ⁴ Mets m'ukmaa'kxp, jɔts ka'ap ɔts mdiempɪ nugo nyɪkwɪndɪgɔ'ɔty. Jɔts njanchmɪnuu'kxakɪpɪ jɔts ja tsojɪkɪn xjagyapt, jɔts ɔɔts n'ayuujɪk waani xɔmadoɔjɪt. ⁵ Tɔ ɔɔts wa'ats nnɪjawɪ ku ya'atɪpɪ jaa'y tu'uk nugo y'ayo'ondɔwɪ, jɔts tnɔnkɪnɔwɪ'kxyɪ ja israelit jaa'y wyɪnmaa'ñ mɔ jatɪ yɔ wyɪdɪty, jɔts yɔ' tnɪgubajɪk'ajɪp pɔn tɔpadundɪp tu'uk ja nazaretɪt jaa'y y'ɪxpɔjɪkɪ. ⁶ Nayɪde'en ya'at jaa'y tkuwaawɪ ja grɪegɪt jaa'y jɔts ɔɔts ndsaptɔjɪk jade'en nugo xyɪkma'jɪtyɪ; paty ɔɔts ɪdɔ'ɔn yɔ tɔ nmach jɔts ɔɔ njatɪɪdyunwa'añ sɔ ɔɔts ngutujɪk wɪyɔ'añ; ⁷ ja soldadɪ wɪndsɔn Lɪsɪas ɔɔts jade'en nugo xump jɔts ttatɔkɪ ɔɔts nɪwɪnmaa'ñ, jɔts aguwanɪkɔjɪp yɪkpɪky yɔ Pablo, ⁸ jɔts ɔɔts xnɔjɪmɪ pɔnɪ pɔn nañɪ'ɔɔ'nɪyɪp wan yɔ tmendɪ me mwɪndujɪ, jɔts me xpayɔ'ɔty jɔts xnɪjawɪt tuki'ɪyɪ sɔ ɔɔts ja ɔɔ'nɪn nbɪkɪtɔ'akɪ.

⁹ Xjats ku ja Tértulo jade'en kyajɪpxɪjɪxy, xjats ja myɪgu'uk israelit jaa'dyɪ pɔn jatɪ jap wyɪnatɪ nayɪde'en tɔ wɪyɔ'andɪ jɔts ku ja janch wɪyɔ'añ ja Tértulo, ka'ap ja tyaaɪyɪ. ¹⁰ Wɪnets ja gobernador Félix ja Pablo tyɪkajɪpɪxy, xjats ja Pablo yɪde'en wɪyaañ:

—Mets møy yikutujkpi, nay ø ndsøjky øts jøts nwindanit ja nbøky mets nwindujy, kumi nnija'wip øts ku mets ya jeky yjumøtyip tø myikutujkt-soo'ni. ¹¹ Mets kø'øm m'ukyiktüdyøkip øts n'ayuujk pøni ka' xjanchjawí, ku øts jam wyinaty myakmajtsk xøøwipnim tø nja'aty jam Jerusalén Dios'ajot'ajtpi. ¹² Ka'ap øts jam wyinaty pøn møøt nnachepkajpxy, nisa øts ja jaa'y ngayik'adi'ich jam møy tsaptøjkjotp, ni jam ma jaty ja chaptøjk ja'adi, ni jam møy kajpjotp. ¹³ Ya'atpi jaa'dyi niti tkananky'eixidit midí øts yø xani'øø'nidip. ¹⁴ Yø'øyi øts wa'ats nnigajpxy jøts ku nbaduñ ja Dios midí øøts ejtp nbadumpy. Ka'ats øts yø nmigu'uk israelit jaa'dyi t'øyjawidí sa nbaduñ. ¹⁵ Njanchja'wip øts ja Dios nayide'en sam yø tjanchjawidí ku øø njøp'ixy ku ja Dios ja oo'kpi jadigojk tyikujkpyiky, øy ja oo'kpi y'øyi kya'øyi pøni sa ja y'atsøø'nidí. ¹⁶ Ja' ndsøjky jøts øts ja Dios ejtp nmi'øy'ajntit jøts nayide'en ja naxwii'ñit jaa'dyi.

¹⁷ Tø øts mawyeen n'atswidity kawinaak jumøjt, jøts øts jadigojk tø nwimbity Jerusalén, jøts øts nmigu'uk nmay'atwa'añ n'ayo'ejxwa'añ, jøts ja Dios nayide'en nwindso'øgiwya'añ. ¹⁸ Ja'ats øts jap wyinaty ndumpy tsaptøjkjotpy sudso ø nbaatt nwa'ats'ajtin, ku øts ja israelit jaa'y jap xpaajtøø midí tsoo'ndip Asia, ka'ap øts ja mayjaa'y wyinaty nmøødi, ka'ap pøn ti ttuñ. ¹⁹ Ja'abi dø'øn ya mibaat me'endip pøn øts jap ojts xpaatti jøts øts ya xni'øø'nidit, pøni ñija'widip ja' ku øts jap ndundigøy tsaptøjkjotpy. ²⁰ Uk ku ka' mye'endit sa øts idø'øn nwa'añ, wan ya'at tnigajpxti pøn jaty ixyaadi, pøni ojts øts ja nbøky nyiktapaaty ku øts ojts nyiktiidyuñ jap kutujk adsinaabyi wyindujpy. ²¹ Uk jotmøñts øts jade'en xukpøky'atti ku øts ojts møk nnigajpxjø'økti, jøts øts yide'en nnimaay: “Meets ixyam xiidyump ja'agøjxp ku øts njøp'ixy jøts ku ja oo'kpi jadigojk yjujkyiky jap oo'kpi jutjotpy.” Jade'en øts nnimaay.

²² Xjats ku ja møy yikutujkpi Félix ja Pablo y'ayuujk tmadooji, winets jaayi tkajpxuky ja payø'øyin ja'agøjxp ku nayide'en tnijawi sa ja Jesús yjanchja'wibi yjaa'y'atti, paty jade'en tnimaay:

—Wan t'uk'awijxñim jade'en kunim ja mye'ent ja møy soldadi windsøn Lisias, ja'ats øts xjaaktukmado'opnim ka'pxy yø'øbi winmaa'ñ.

²³ Winets ja møy yikutujkpi t'ane'emy ja soldadi jøts ja Pablo chumy'ettnim, jøts tnøjmi nayide'en jøts ja Pablo ja myigu'uk kuwani y'atmigajpxit, pøni pøn jaty mendip kidi ja tkayiknaxnidi.

²⁴ Xjats ja Pablo jap tyaañ winaak xøøwin, winets ja møy yikutujkpi tmøøtja'aty jadigojk ja ñidø'øxy Drusila, pøn nayide'en israelit jaa'y, winets ja Pablo yikyaxtsøøy jøts tnigajpxt sudso'ampy ja Jesús yja' yikjanchjawi.

²⁵ Xjats ja Pablo yikxon jade'en tnigajpxy sudso n'øyjaa'y'ajtindit sam ja Dios ttsøkyin, jøts kø'øm nayide'en nnay'ejx'ejti'indit, jøts ku Dios ja naxwii'ñit jaa'y nøjx ttiidyuñ. Winets ja møy yikutujkpi ojts ja' tkudsø'øgi jøts ja Pablo yiknimaay:

—Nøjxni ixyam, kunim ø n'awatsit jøts jadigojk nwaadso'ot.

²⁶ Xjats ja møy yikutujkpi may ojk ja Pablo twaadsøøy, jade'en ja yjawinmay jøts ja myeenmyo'ojit ayu'uch, winetnimts ja tmajtstu'utt. ²⁷ Majtsk jumøjt idø'øn jade'en ñajty, nugo tjaximiwaadsow'ity ja Pablo. Winets ja møy yikutujkpi tyigajtsnaa, jøts jadu'uk tyøjkiy'iñ pøn txøøw'ajtp Porcio Festo. Jøts kumi ka'ap ja møy yikutujkpi Félix tmidsep'atwa'añ ja israelit jaa'y, ja'agøjxp idø'øn ja Pablo jap tyaañ tsumy.

25

Ku ja Pablo twingunøjxøø ja møj yikutujkpi Festo

¹ Xjats ja Festo tyøjkiyii'ñ møj yikutujkpi jam Cesarea, jøts kyidigøøk xøøw chøø'ñ jøts jam pyatøjkiyii'ñ Jerusalén. ² Jamts ja teetywindsøndi møøt ja israelit møjaa'dyøjkti twinguwa'jkiðøø ja møj yikutujkpi Festo jøts ja Pablo yikni'øøni. ³ Xjats ja møj yikutujkpi yik'amidøøy ja may'ajt, jøts ja Pablo tnigaxit jøts jam tyikme'ent Jerusalén. Jade'en ja israelit jaa'y wyinaty tø tjaniwinmayidi jøts ja Pablo y'ookt tuu'ajy. ⁴ Xjats ja møj yikutujkpi Festo t'adsojimbijty jøts ku ja kø'øm tsojk wyimbetwa'añ jadigojk jam Cesarea, kumi ixjam ja Pablo tsumy y'ity. ⁵ Winets tnøjmi ja israelit jaa'y møøt ja teetywindsøndi:

—Wa'n tjaa'myindi ne'egi niduknax pøn jaty ku'aaw'attip, jamts xni'øønidit pøni tødam ja'abi jaa'y tyundigøy.

⁶ Xjats ja Festo waani tyaa'niiyii'ñ Jerusalén tuktujk xøøwin uk majk xøøwin, winets wyimbijty jadigojk. Xjats kyimjabom ttawa'jtsiyii'ñ ja kyutujktaajk, winets tnankñajtswaa'wiyøø ja Pablo. ⁷ Xjats ku ja Pablo twinguwa'jkiðøø pøn ja møj yikutujkpi, winets ja israelit jaa'y nayide'en twinguwa'jkiðøø pøn jam wyinaty tø choondi Jerusalén. Xjats ja Pablo mayjøøjp møk yjanchyik-tani'øøni ja tyundigø'yin, niti tiy'ajtin tkanank'yijyidi. ⁸ Xjats ja Pablo kø'øm ñagyugajpxyiyi jøts tnimaay ja møj yikutujkpi:

—Nipøn niti ngadamidundigøy, ni ja israelit jaa'y kyutujk jøts ni ja chaptøjk, jøts ni ja romanit jaa'y myøjyikutujkpi ngamidundigøy.

⁹ Xjats ja Festo, kumi tyunwajnip ja may'ajt ja israelit jaa'y jøts y'øyjawiyyidit, xjats ja Pablo tyiktiy jøts yiknimaay:

—¿Mnøjkwamp jam Jerusalén? Jamnim øts nbayø'øty ja mbøky.

¹⁰ Winets ja Pablo t'adsojimbijty jøts tnimaay:

—Paat'ajtp øts yaayi nyiktiidyu'unt, kumi ja møj windsøn César ya kø'øm tø tpikta'aky yø kutujktaajk. Wa'atsxi me xnijawi ku øts ka' yø israelit jaa'y ti ndamidundigøy pøn jap wamp jøts øts ja nbøky ngu'oogit, ¹¹ ka'ap ø nwa'añ jøts øts ngagupøkt ja o'jkin; jøts pøni ka'adam yjanchi midi øts yø' xani'øø'nidip, nipøn kyapaat'atyiyi jøts øts xkøyaktit ma' israelit jaa'y. Wamp øts jøts ja møj windsøn César øts kø'øm xiidyu'unt.

¹² Xjats ku ja Pablo jade'en kyajpxkijxy, winets ja møj yikutujkpi møøt tkajpx'øyiyii'ñ ja pyutanaabyi, winets yiknimaay ja Pablo:

—Tø kø'øm mwa'añ ku ja møj windsøn César mdiidyuniyit. Ja'ats idø'on mninøjxpx.

Ku ja Pablo twingunøjxøø ja rey Agripa

¹³ Xjats ku ja Pablo jade'en yiknimaay kuts tu'uk majtskin ja xøøw ñajxy, winets ja rey Agripa ojts ñinijkyiyi møøt ja Berenice, ja'ats t'atskajpxpoo'kxtip ja Festo. ¹⁴ Winets jam ojts kawinaak xøøw tyaa'nidi, xjats ja Festo ttamimadyaajky ja rey sa ja Pablo pyøky jap, jøts tnimaay:

—Ja ya tu'uk ja jaa'y midi ja møj yikutujkpi pasadi puxøjkjøtpy yiktaañ.

¹⁵ Ja'ats møk pyayø'ødyip ja teetywindsøndi møøt ja israelit møjaa'dyøjkti. Xjats ku øts ojts n'øch Jerusalén, winets øts jam ojts xwinguwa'agidi, jøts øts møk'ampy xnimaadyi jøts øts nnankyik'oogit yø Pablo. ¹⁶ Xjats øts nnøjmi jøts ku ka'ap jade'en ja romanit kyutujk wya'añ, ka'ap pøn ayu'uch nugo ñanky'oogidit, kuwani ja payø'øyin tyunit jøts kø'øm ñawyindaniyyidit pøni ti pønjabøn ñi'ii'mpy. ¹⁷ Ku ya yja'ttøø ja israelit jaa'y, ka'ap øts tiempi nugo nyikwindigøøy, jaty kyimjabom ja ngutujktaajk ndawa'jtsiyii'ñ jøts

ja Pablo nnankyikmejni. ¹⁸ Ku ja myendøø pøn jaty øø'ndip, ni tu'uk ja tka'uktapaatnidi ja pyøky midil'ibi øts idø'øn n'ukjøp'ijxpy. ¹⁹ Ja'ayi nugo yiktani'øø'nip ja chinaa'yin, jøts nayide'en pøn txøøw'ajtp Jesús, pøn ojts y'øøky jøts ja Pablo wya'añ ku ja yjujky'aty. ²⁰ Jøts øts ka' nmidaabyaaty sudso'ampy øts kø'øm nyikjøpkøxt yø'øbi winmaa'ñ, paty øts yø Pablo n'amidøøy pøni nøjkwamp Jerusalén jøts jam yiktiidyu'unt. ²¹ Kumi yø' kø'øm waan jøts jam yiktiidyu'unt ma ja møj windsøn César Augusto, paty øts jap nyiktsumy'ity kunim øts jam ngaxt møj windsøn windump.

²² Xjats ja rey tnimaay ja Festo jøts ku ja nayide'en tpatmadoowa'añ ja Pablo kyajpxy. Xjats ja møj yikutujkpi t'adsojmbijty, jøts tnimaay:

—Jabom ja x'ukmado'ot.

²³ Xjats kymjabom'ajty, winets ja rey Agripa yja'ttøø møøt ja ñidø'øxy Berenice, xjats ojts yjanchyikmøjpikta'akti jøts jap tyøjkidøø møj tøjkjøtpy møøt ja soldadi windsøndi, jøts nayide'en ja møjaa'dyøjkti pøn jaty jam kugajp'ajttip. Winets ja Festo twaadsøøy ja Pablo, ²⁴ jøts ttukmadøøy niduki'iyi ja windsøndøjkti, jøts tnimaay:

—Mets rey Agripa, jøts tuki'iyi pøn jaty ya tø myendi, ixya dø'øn ja jaa'y midixyam mbatmadoowajnidip y'ayuujk. Tø øts idø'øn ja israelit jaa'y namay øy xmi'øøndi ya'at køjxp jade'en ya jøts nayide'en jam Jerusalén, ejtp ø xnøjmidi jøts mibaat ku yø tyimy'oookt. ²⁵ Ka'ats yjawi ti møj tundigøø'yin tjagyepy jøts ja' tku'oogit; kø'øm yø t'amidøøy jøts jam nøjkw yiktiidyuñ ma ja møj windsøn Augusto jam, paty øts nayide'en jam ndyimgyaxwaa'ñ. ²⁶ Meets migu'ukti, ka'ap øts nmidaabyaaty ti pøky øts ndapaatp ya'atpi jaa'y, sudso'ampy øts nøky nyik'øyt jøts tñijawit ja nmøjwindsøn, jøts paty øts ixyam nyikmiñ mee mwindujy, jøts me rey Agripa x'ukpatmado'ot jøts øts xuknijawit midil'ibi ayuujk øts idø'øn ngaxp. ²⁷ Janchnigyumaap ø njaty ku øts ja pøkyjaa'y nugo njanch'ukaxt, jøts ni ngatukmado'ot øts nmøjwindsøn pøni ti pøky yiktani'øø'nip.

26

Ku ja Pablo tñigajpxy ja chinaa'yin jam rey Agripa wyindump

¹ Winets ja rey Agripa tnimaay ja Pablo:

—Mbaat'ajttip jøts me kø'øm mgajpxt.

Xjats ja Pablo ja kyø' tyikpidi'jky, jøts yide'en kyajpxøjkijyi'ñ:

² —Njanchtaxondakpy øts ku øts xyikajpxwaa'ñ ya mets mwindujy, jøts øts kø'øm nwindanit tuki'iyi pøni sa jaty øts ja israelit jaa'y xka'ødeyti.

³ Øy'ajtp nayide'en kumi mets mnija'wip tuki'iyi øøts ndsinaa'yin sa øø n'israelitjaa'y'aty, jøts ti jaty øøts ejtp nnadyamigajpxiyip. Paty mets n'amidøøy jøts waani x'ukmado'ot øts ngajpxy.

Sa ja Pablo chinaay myjawayeen ku ka'anim tyiktigach ja chinaa'yin

⁴ Ñija'widip nmigu'uk israelit jaa'y niduki'iyi sa øts njaa'y'ajty jam ndigam ku nmutsk'ajty, jøts nayide'en sa øts njaa'y'aty jam Jerusalén ixymbaadyim.

⁵ Pøni ñigajpxwandip wan tñigajpxti, kumi ñija'widip yø' nayide'en ku øts mutskyi ja fariseit ixpøjkin nbadøjkijyi'ñ midil'ibi ka'pxy tpadundip ja Moisés kyutujk. ⁶ Ja'agøjpx øts nyikni'øøni ku øts njøp'ixy ku ja Dios Teety ja øo'kpi jadigojk tyikjujkyiky jap øo'kpi jutjøtpy, kumi jade'en ja Dios Teety kø'øm ja wyandaajkin tmø'øø øøts n'apteety'amøj jøts jade'en ttu'unt. ⁷ Jøts niduki'iyi makmajtsk kajp ja israelit jaa'y tjøp'ejxtit jøts ku ja Dios ja wyandaajkin tyikjøpkøxt, paty ejtp t'ajot'attit ja Dios jøts tjä'myatsti jøpy ux.

Mets rey Agripa, nay yø'øbi winmaa'ñ øts idø'on yø nmigu'uk israelit jaa'y xkada'øya'widip, jøts øts xani'øøni. ⁸ ¿Ka' mee nayide'en xjanchjawi jøts ku ja Dios ja oo'kpi tyikjujkyiky jadigojk?

Sa ja Pablo jawyeen tjemduuñ tteduuñ ja Jesús yjanchja'wibidi

⁹ 'Øts kø'øm ojts nwinmaa'mbyaaty jøts øts ja Jesús Nazaretit yjanchja'wibidi ojts o sa nduujnyi, jøts ø møk nyik'ayo'ombaattøø. ¹⁰ Jade'ents øts idø'on jam n'adiijch Jerusalén ku øts ja teetywindsøn xmo'odi ja tiy'ajtin jøts øts ja Jesús yjaa'y namay ndsujmnyit; jøts nayi waan øts idø'on jøts y'ookit. ¹¹ Kawinaak ojk øts idø'on kø'øm ja møk nyik'ayo'ombaattøø, jøts kuwani ndukmajtstu'utti ja yjanchja'win. Jade'en øts idø'on n'adiijch ma jaty ja chaptøjk, janch awa'an'ampy øts idø'on nbawidijty jagamgajp paat.

Ku ja Pablo jadigojk tñimadyaajky sa ja chinaa'yin tyiktigajch

¹² 'Nay yø'øbi winmaa'ñ øts wyinaty nminijxpy jam Damasco sa øts ja teetywindsøn wyinaty ja kutujk tø xmø'øy. ¹³ Winets ø kujkxøøw et jam tuu'am ojts n'ejxpaaty tu'uk ja jaj midi tsajpjøtpy kyidaajky, janch møk idø'on ja yjajy nika'ap ja xøøw jade'en yjajy, jøts øøts ja jaj ojts tuki'iyi xnowidity pøn jaty øts jam wyinaty nmøøt. ¹⁴ Winets øøts niduki'iyi nnaxkidaajky, jøts øts nmadøøy tu'uk ja hebreit ayuujk ku ø xnimaay: "Saulo, Saulo, ¿tiku ø xjemdunwa'añ xedunwa'añ? Kø'øm mnay'ayo'onduniyi jade'en kidi tsakaa ku ja ti tnepy jøts ja kø'øm kujp ñadyuky'ødyiyi." ¹⁵ Winets nnimaay: "¿Windsøn, pøn mets?" Winets øts jaty n'windsøn'ajtim xnimaay: "Øts Jesús Nazaretit jaa'y, nay ja' pøn mjemdumpy mdedumpy. ¹⁶ Pidø'øk wa'kuki, ja'agøjx øts ixyam kø'øm nnanky'ijxyi jøts øts xmidu'unt, jøts mgugajpxy'att pøni ti jaty ixyam nduk'ijxpy, jøts pøni ti jaty me njaaktuk'exp. ¹⁷ Øts mets nnoø'mo'op nduu'mo'op jam israelit jaa'y etjotp, jøts nayide'en ma ja jaa'y kya'israelitjaa'yidi ma mets ixyam ngajxwa'añ. ¹⁸ Yide'en idø'on jam nøjx mduñ, jøts ja jaa'y xkajpxwejt jøts ja ka'øy winmaa'ñ tmajtstu'uttit, jøts ja tsuj winmaa'ñ tpabøktit. Kidi ja miku' y'ana'amin t'ukupøjkiniyidi, ja Dios yja' tu'ugyi pyaduujnidip; jade'en xukmado'ot jøts ku øts nja' xjanchja'widit, jade'en'ampy yikpøjkpimaa'kxtit, jøts nayide'en yikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios tøn wyinaty tyikpøkwyaa'ach."

Ku ja Pablo tpaduuñ ja ayuujk midi tsoo'mp tsajpjøtpy

¹⁹ 'Mets rey Agripa, nbaduujni øts idø'on tuki'iyi sa jaty øts ja Jesús xnimaay ku øts ja y'ayuujk nmadoojøø midi jap tsoo'mp tsajpjøtpy. ²⁰ Winets øts jam n'uktukmadowdi jawyeen pøn jaty jam wyinaty Damasco jøts nayide'en Jerusalén, jøts jam nayide'en tuki'iyi pøn jaty Judea etjotp, winets øts n'uktukmadowdi pøn ka'israelit jaa'dyi, jade'en øts jam n'uktukmadøøy jøts ja pyøkyu'unin tmajtstu'uttit jøts ja Dios yja' tu'ugyi tpaduujniyidit, nayide'en tsuj yjaa'y'attit jøts jade'en n'anky'ejxidit ku ja chinaa'yin tø tyiktigatsti. ²¹ Ku øts ja jaa'y jade'en ngajpxwejt ja'agøjx øts ja israelit jaa'y jap xmajtstøø tsaptøjkjøtpy jøts øts ja' xuku'oogiwyaa'andi. ²² Møj øts ja Dios ja pudøjkin xmø'øy ku øts ixymbaat ja kyajpxy y'ayuujk ngajpxwa'kxyiyi, jøts ø ndukmadøøy niduki'iyi pøn jaty xipiky pøn jaty ka'ixpiky. Nijuuni øts ja jaa'y ja wenkpi ayuujk ngadukmadøøy, yø'øyi ngajpxy nayide'en sa ja Dios kyugajpxy jøts sa ja Moisés oys wya'andi, ²³ ku ja yiknitsokpi kuwani y'ayo'ombaatt jøts ku ja wyinaty tø y'øøky, ja'ats myijawyeen tunjøpik ku ja yjujkyøkt jadigojk jap oo'kpi jutjøtpy, jøts jade'en øøts njaa'y ttuknijawit ja wa'ats'ajtin møøt tuki'iyi ja naxwii'ñit jaa'y.

*Ku ja Pablo tjadukmi**b**okwa**ñ** ja rey Agripa jøts tpadu'unt ja Jesús yja'*

²⁴ Xjats ku dø'øn ja Pablo jade'en ñagyugajpxiyi, winets ja møj yikutujkpi: Festo møk'ampy yjanchkajpxy, jøts ja Pablo yiknimaay:

—iMjanchmo'tp me Pablo! Yø m'ixpiky'ajtin me nugo myikmo'jtíp.

²⁵ Xjats ja Pablo t'adsojimbijty jøts tnimaay:

—Mets øy møj yikutujkpi, ka'ap øts nmø'øty; tiy øts idø'øn nwa'añ midì øts ngajpxy. ²⁶ Exya dø'øn ja rey Agripa pøn yø'øbi winmaa'ñ wa'ats

tnija'wip, paty øts ya jotmøk ngajpxy yø' wyinduujy; wamp øts idø'øn ku yø' tnijawi tuki'i'yi, kumi ka'ap ja jam ayu'uch yjajty midì øts idø'øn nnigajpxy.

²⁷ ¿Mjanchja'wip mets rey idø'øn sa ja Dios kyugajpxy wya'andi? N'ijxpy øts ku yjawi xjanchjawi.

²⁸ Xjats ja rey wyaañ:

—Kuk øts jeexyip jawaani xjaaktukmadøy, tøk øts yø jeexyip ngupiky.

²⁹ Xjats ja Pablo y'adsøøy:

—Øyi ja waani uk øyts ja yjamayi ya'atpi ayuujk, ka'ayi mets ja'ayi nadyu'uk xjanchjavit, wa'ambim ja Dios niduki'i'yi tjanchjawidit pøn jaty øts n'ayuujk ya tø xmadooji.

³⁰ Ku dø'øn ja Pablo jade'en kyajpxkijxy, winets ja rey niduki'i'yi wya'kukidøø møøt ja møj yikutujkpi, jøts møøt ja ñidø'øxy jøts pøn jaty jap wyinatyi, ³¹ winets abiky ñøjkxti jøts jap tkajpx'øyidi ja Pablo pyøky, jøts yide'en ñawyajnidøø:

—Ka'ap yø'øbi jaa'y yjawi ti ttuñ jøts yø' tku'oogit, jøts ni nayide'en kyapaat'atyi jøts jap puxøjkjotpy y'ett.

³² Winets ja rey Agripa tnimaay ja møj yikutujkpi Festo:

—Tø yø jeexy yikmajtstu'uty ku yø jeexy kø'øm tka'amidøy jøts ku ja møj windsøn César tyiidyuniyit.

27

Ku ja Pablo yikejxy Roma ma ja møj kutujktaajk

¹ Xjats ja møj yikutujkpi twinmaadyøø, winets ja Pablo yikajxwa'andi jam Italia møøt ja myibuxøjk jaa'y pøn jaty jap wyinaty tsumdyi, jøts nayide'en øts nmøødi pøn ya'at nøky tjaapy. Winets ja soldadi pyøkjø'jkidøø midì txøøw'ajtp Julio jøts midì tnigubajk'ajtp tukpiky ja soldadi, ja' xyøøw ja soldadi tukpiky Augusto. ² Jam wyinaty nayide'en tu'uk ja Macedoniit jaa'y midì kugajp'ajtp Tesalónica, ja' xyøøw Aristarco. Winets øø tuknaø ndøjkijyi'ñ møøt ja Pablo jap barkijøtpy, jam ja barki wyinaty tø chøøñ Adramitio, jøts ñøjkxwa'añ ma jaty ja kajp jam Asiat etjotp. ³ Xjats øøts jam ndsøø'ñ Cesarea, jøts øø kyimjabom nja'aty ma kajp txøøwi Sidón, jamts ja soldadi Julio t'ayo'ixy ja Pablo, jøts ja myigu'uktøjk t'atstukmigajpxy jøts ja myigu'uktøjk yikpoo'kxiyi. ⁴ Xjats øøts jadigojk ndsøø'ñ Sidón, winets øøts ja poj møk'ampy xjøpkuyø'øyi'ñ, paty øø kuwani nnayø'øy aga'ñ'ampy ja et midì txøøw'ajtp Chipre, ma ja poj tuda'aky yø'øy. ⁵ Xjats øøts ja mejy ndanajxy jam Cilicia y'et'amidiy jøts nayide'en Panfilia y'et'amidiy, winets øøts nja'jty ma kajp txøøwi Mira jam Licia y'etjotp.

⁶ Jamts ja soldadi tu'uk t'ixaay ja barki, jøts ojts t'ejxpaaty tu'uk midì tø wyinaty chøøñ Alejandria jøts jam ñijkxy Italia, jøts øøts jadigojk xyiktøjkijyi'ñ xjats øø ndsøø'ñ. ⁷ Kawinaak xøøw øøts idø'øn jade'en udy'a'agy'i n'awidijty, jøts øøts awisa jam njanchja'jty jam Gnido kajp y'amidiy, kumi ka'aním wyinaty ja møk poj y'amøki winets øøts jade'en'ampy jadigojk n'awidity Salmón kajp y'amidiy. Xjats øø nnayø'øy ma ja mutsk naajx jam mejy

kujk'am midi txøw'ajtp Creta. ⁸ Xjats øøts jade'en awisə njanchjanayø'oy ja naajx mejyjotp, xjats øøts awisə nja'jty ma kajp txøwi Buenos Puertos jam Laseit kajp wingon.

⁹ Tø øøts wyinaty jeky ndaa'niñi mejyjotp, janch tsø'øgi møøt wyinatyni, jade'en'ampy ku wyinaty ja xuxpyoj myenwani paty ja Pablo tjanimaay ja yikbarkiyø'øbyi, ¹⁰ jøts wyaañ:

—Meets migu'uktøjkti, ka' yjaw i y'øyt ku ndso'ongojmi'indit, nnaajtsja'wip øts ku yjawi mayjøjp n'ayo'ombaajtindit, windigø'opy yø barki møøt ja pyikta'aky, nayi kø'ømbaat yjawi adøm nwindigø'yindit.

¹¹ Ka'ats ja soldadi ja Pablo y'ayuuik tmibøjkøø, ja' ne'egi pyabøjk ja barki wyindsøn jøts ja yikyø'øbyi. ¹² Janch møk idø'on xyuxy jøts yjanchpøjy jam Buenos Puertos, paty namay yjanchwandøø jøts øy'ajtp øøts jam ne'egi ndsoont, jøts pøni majadaqk øøts jøts nja'att Fenice midi nay jam tamp Creta y'etjotp, jamts øø nyiknaxt ja xuxtyuu ja'agøjxp ku ja poj ka'ap jam jadine'en tyøki.

Ku ja poj yik'adøtsnibøjkiñaa ja mejy

¹³ Xjats ku ojts waani y'amøki ja poj, winets pyojkeeky jaduktamajñ jøts ja jaa'y wyandøø øy'ajtp jøts yjaakyø'odyit. Xjats øø ndsoø'ñ, jøts øø nyø'øy mejpya'am et, jøts øø nnajxy Creta wingon. ¹⁴ Kuts waani y'ijty, winets ja poj møk'ampy yjanchmiiñ midi yiktejp Nordeste. ¹⁵ Ja'ats ja barki møk tjøpkuwojppøø jøts nugo wyejtsma'jtiyøø, jøts ni sudso'ampy ja kya'ukyikmajadaajkniyi ja poj, xjats øøts ja ndyimy'ukmajstutni, wan tyikniykxy pøni ma tyikniykxy. ¹⁶ Xjats øøts jam nnajxy ja' yjøkø'øom ma ja naajx lii'nim mejkyuk'am midi txøw'ajtp Claudia, ma jam ka'ap jadine'en møk pyøjy. Jamts ja mutsk barki midi yikpajidøjtp, ja'ats øøts awisə njanchyiktøjkiyi'ñ jap møj barkijøtpy. ¹⁷ Kuts øøts jade'en nyikpatkijxy ja mutsk barki, winets ja møj barki ja møj tejpky yikta'awøø'nmujky. Xjats kumi tsø'øgidip ja jaa'y ku ja barki jam tyøkit pu'jotp midi txøw'ajtp Sirte, winets ja majpxy møj wet twejtstøøðøø midi ja poj møøt tminamyajtsip, ¹⁸ jøts øøts ja tsimy jamyi tuki'iyi nguwojnaxkijxy mejyjotp; ¹⁹ jøts kyimdigøøk xøøw ixanims øøts ndyimy'ukuwojnaxkøjxni tuki'iyi ti jaty ja barki jap wyinaty myøøt'ajtpy. ²⁰ Kawinaak xøøw øøts jade'en nugo agubajkpy njanchyø'oy, niti øø nga'ijxy ni xøøwi ni maadsa', ja'agøjxp ku møk yjanchtuuyøøch. Ka'ap øø n'ukjøp'ejxni jøts øøts jam jujky nbidsø'ømt mejyjotp.

²¹ Xjats øøts jade'en kawinaak xøøw n'ayuu'ijty, winets ja Pablo ojts wya'kuki jam jaa'y agujkp jøts wyaañ:

—Migu'uktøjkti, øy'ajtpik jeexy kuk øts n'ayuuik xmadøjidøø, winetsik ngatso'øñdøø jam Creta jøts ya'atpi ayo'on jeexy jane'en ngapaajtyindi.

²² Kidi mjotmay'ooakti, øy yø barki wyinaty yjawindigøy, nipønts kya'ooakt.

²³ Mnija'wip meets ku øts ja Dios Teety nmøøt n'ity, jøts ku øts ja y'ayuuik nbaduujniyi, ixyamgoots øts nwindson'ajtim tu'uk tø xaniguexy ankilis ²⁴ midi øts tø x'atsnøjmi: “Ni mgatsø'øgit Pablo, kuwani jam Roma xwinguwa'agit ja møj windsøn César, ja'agøjxp ja Dios myiknitso'ok'atidit niduki'iyi, jøts nipøn tu'ugin kya'ooakt ya barkijøjty.” ²⁵ Paty migu'uk ixyam nnigajpxy, møkpiakta'akti mwinmaa'ñ, njanchja'wip øts ja Dios jøts nnijawi ku kuwani jade'en tyikjatt sa øts ja ankilis tø xnøjmi. ²⁶ Ja' ku kuwani ja møk poj jam nøjxk xnajtsjibejpi'indi ma ja naajx jam mejyjotp.

Jade'en idø'on ja Pablo tnimaay ja myigu'uk.

²⁷ Majtsk samani øøts idø'on wyinaty tø nwidity barkijøtpy, winets øøts jam ojts koots nja'aty ma møj mejy txøøwi Adria, møk idø'on ja poj ja barki jam tjanchyik'adi'ich. Xjats ku chuu'm'ajty, winets ja yikbarkiyø'øbyi tnaitsja'widøø ku ja barki ja naajx yjawwi tpaatwani. ²⁸ Winets tkejpxti ja nøø kyøjnk'ajtin, xjats t'ejxti ku ja ee'pxmaktujt metri kyøjnki; xjats jawaaxni yjaakyø'odyøø jøts jadigojk tkejpxkojmidi, xjats t'ejxti ku ja ee'pxtaxujk metri kyøjnki. ²⁹ Winets chø'jikidøø ja yikbarkiyø'øbyi ku jotmøn ja barki jam wyinguwopit møj tsaagøjxp, winets ja yikbarkiyø'øbyi ja møj pux'ajo'jk twendidøø maktaxk, xjats ja tniwøjidøø kunim ja jap nøøbatki'py muum y'ajo'øky, xjats ja barki jade'en wya'k'amøkiyi'iñ. Janch tsø'øgijawwi dø'on ja jam tyknaxti ku pojin yjanchkaxiijñi. ³⁰ Jøts wyinmaydi ja yikbarkiyø'øbyi jøts kya'akwa'andi jam møj barkijotp, winets jam ñøjxiti barkijøp'am, jade'en ñadyiyi ttunwa'andi jøts ja pux'ajo'jk tjaakpikta'akwa'andi jap mejy'ok'ajpy, ja'agøjxp ojts tykipidsømwā'andi ja mutsk barki jøts jade'en kya'akwa'andi. ³¹ Xjats ja Pablo t'ejxpaajty, jøts jade'en ttukmadøøy ja soldadi jøts nayide'en ja myisoldadi, jøts tnimaay:

—Ku yø yikbarkiyø'øbyi ya kyata'andit, ni sudso'ampy adøm ya ngapidsøø'mindit.

³² Winets ja soldadi tmidsujkidøø ja mutsk barki jøts nøøjotp tyknaxkidaktøø, ja'agøjxp jøts nipøn kyaka'akt.

³³ Xjats ku xiijndyaajky, winets ja Pablo tnimaay ja myigu'uk jøts o winø'ønin kya'adyit, jøts tnimaay:

—Tø yjawwi myajtsk syamaniñi ku jade'en mgama'adi jøts ni mgakaydi.

³⁴ Øts wamp jøts winø'ønin mga'adyit jøts ja mōjaaw xpøktit, pø ixyam inet nipøn inet tu'ugin kyawindigø'øty.

³⁵ Xjats ku ja Pablo jade'en tkajpxwijy ja myigu'uk, winets tñixajiyi'iñ tu'uk tsapkaaky jøts ja Dios ttamōja'wiyi'iñ jam myigu'uk wyingujkp, jøts ja kø'øm kyaay. ³⁶ Xjats ku ja myigu'uk t'ejxtøø, winets ja yjotkujkidøø jøts kyaadyøø nayide'en. ³⁷ Majtsk magø'pxy ja tugui'pxmyaktujt øøts jap wyinaty njaa'y'aty barkijøtpy. ³⁸ Xjats ku kyaagyøxtøø, jøts ja ariimbajk kunchi'am tuki'iyi jamyi t'ukniwibejpatkøxnidøø mejyjotp, jøts jade'en ja barki tyiktøø'tskyidøø.

Ku ja barki mya'jty jam mejy'am

³⁹ Xjats ku dø'on xiijndyaajky, winets ja yikbarkiyø'øbyi ni tka'ejxkapti ja ñaxwi'iñit pø ma dø'on jam wyinaty tø tyaandi, ja'ayi ku t'ejxpaati ja mejpyaa' ma ja nøø ja poj jam møk kayik'adi'ichiyi, winets wyinmaydi jøts ja barki nugo tyikyø'øpyidsømwā'andi ma ja nøø jam t'ejxti ja pyaa'.

⁴⁰ Xjats tmidsujkidøø ja pux'ajo'jk midi ja barki tmach'ejtp, jøts ja japyi tyiktaandøø mejy'ok'ajpy. Winets ja jøpmiweenguipy tkajo'ongøxtøø midi ja barki twejtsyø'øpy, jøts ja majpxwyet nayide'en jam tkudiidyøø barki jøp'am. Xjats ku ja poj ja tmajch, winets ja barki jam udy'a'aky y'ukyø'øpyidsømwā'añ jam mejpya'am. ⁴¹ Xjats jam ojts adsu'jky tyøki ma ja nøø jam ñawyinaxiyi, winets ja barki yjøøjp jam ojts møk'ampy kyutopi pu'lotp, ma ja nøø jam wyinaty yø'øy'awidity. Jamts niwinø'ønin kya'ukyuukxni, xjats ja mejy møk'ampy ojts pyetyiyi jam y'ix'am'ampy, jøts ja barki'øjx jade'eñi ja nøø tyakø'jtsigyøjxiyøø. ⁴² Xjats ja soldadi wyinmaydi jøts tyik'ookwa'andi ja pøkyjaa'y, ja'agøjxp ku jotmøn kya'aktit jam mejyjotp. ⁴³ Ka'ats ja soldadi wyindsøn ja Pablo tñankiyik'ookwa'añ paty ka' tyikjajty, ja'ayi t'ane'emy pøni pøn tjaajtp ja nøøyumk wan ja jawyeen tnøøkidi jøts myeipyidsøømdit. ⁴⁴ Jøts

nayide'en t'ane'emy pøn jaty tkajajtp ja nøøyumk, wan ja pu'gyøjxp tyø'odyi, uk øy'ajtp nayide'en barki pidasikøjxp. Xjats idø'øn jade'en niduki'yiyi jujky myejpyidsømdøø.

28

Sq yjajty sq kyubejty ja Pablo jam ma naajx txøøwi Malta jam mejjyotp

¹ Ku øøts idø'øn jade'en tum jujky jam nbidsiimy mejjyotp, xjats øø nnija'wiyii'n kudam ja et jam txøøwi Malta midi jam mejkyuk'am. ² Winets øøts ja Malta jaa'y jam janch tsuj xwindsø'jkii'n, jøts ja jøøn tyikmøjidøø janch møj, ja'agøjxp ku yjanchxuxy ja et jøts ja tuu nayide'en. Winets øøts nyikyaa'jxiyii'n niduki'yiyi, jøts øø nnay'ajo'kxiyit. ³ Winets ja Pablo nayide'en t'atskajpmuky ja tø'øts ja'axy, ja'ats wyinaty yjøn'ø'ixip winets ja awa'andsaa'n jam tu'uk pyidsiimy ja'ax agujkp ku ja jøøn y'ikyiyi. Xjats ja Pablo yiktsu'jch kyøjø'øm. ⁴ Xjats ku ja kugajp t'ejxpaatti ku ja jiyujk jam tyiini Pablo kyøjø'øm, winets ñawyajnidøø:

—Yikjaa'y'oo'kpi ya'at yjawi, øy jap mejjyotpy yjabidsimy jujky, ixyamts kø'øm ja Dios ja tiidyu'unin tø myø'øyi jøts y'ookt.

⁵ Xjats ja Pablo tjønwejtsiyii'n ja tsaa'n jøts jade'en myatstuujiyøø, nisa dø'øn ja Pablo kyø' kyajajty. ⁶ Tum jade'en idø'øn ja jaa'y ja tjøp'ejxti juuni ja kyø' kyexpøkt, uk juunits yik'oogiyit. Ku dø'øn ja jade'en tjajøp'ejxtøø, xjats t'ejxti ku ja Pablo niti kyajatyiyi, winets ja wyinmaa'n jatyi tyiktigatstøø jøts ñawyajnidøø ku ja Pablo Dios ja'.

⁷ Xjats ku dø'øn jam jade'en yjajty, jamts wyinaty tu'uk wingon chøøni ja jaa'y pøn ja kajp jaa'y tniwindsøn'ajtp, ja' xyøøw Publio, ja'ats øøts jam xwaaw tyøjkjotp, jøts øøts jam tigøøk xøøw janch tsuj xyikja'adaajky.

⁸ Jamdam wyinaty Publio teety pyiky jøømba'am, jøts nayide'en ja ni'jpya'am tmøødi, winets ja Pablo ojts tniinjky jøts t'atsmigajpxy. Ja'ats ojts tkudsapkjpxy jøts ja pamaa'y jaa'y myøkpjiky ku ja ojts tkønixajy.

⁹ Winets ja Pablo niduki'yiyi ja pamaa'y jaa'y ñimejniyøø pøn jaty jap wyinaty kugajp'ajttip jøts jade'en choktøø. ¹⁰ Winets øøts may ja may'ajt jadi'iini nyikmø'y, xjats ku øøts jap barkijøtpy ndsoonwaa'ni, xjats øøts tuki'yiyi xmøøy pøni ti jaty øøts xka'ejtxip.

Ku ja Pablo yjajty jam Roma

¹¹ Tø øøts jam wyinaty tigøøk po' ndsinaa'ni jam Malta, jøts øøts ja tu'uk ndatøjkiiyii'n ja barki midi jam nayide'en tyiknajx ja xuxpyoj. Jamts ja'abi barki majtsk ja dios awanax txox'aty midi tyejtíp dios Castor jøts ja dios Pólux; ja'abi barki dø'øn ja wyindsøn kugajp'ajtp Alejandria. ¹² Xjats øøts jade'en ndsøø'n, winets øø nja'jty ma kajp Siracusa, ma øøts ndaa'n tigøøk xøøw. ¹³ Jamts øøts ndsøø'n jadigojk jøts øø nniikxy Regio. Jøts øø kyimjabom ndsøø'n, winets ja wimbatpoj myiini, ja'ats øø møk xpadej jøts øøts jam nja'jty kyimajtsk xøøw ma kajp txøøwi Puteoli. ¹⁴ Jamts øø nbaajty winaagin nmigu'uktøjk pøn ja Jesús yja' tpaduujnidip, ja'ats wandøø jøts øøts ja jam nmøøtaa'nit tu'uk samani, winets øøts jam tekyjø'øm ndsoo'naa jøts øøts nniikxy Roma. ¹⁵ Tø øøts ja wyinaty xnijawi ja nmøøtjanchja'wibidi, ja'ats jam tsoo'ndøø Roma jøts øøts x'atspatsøy tuu'am ma kajp txøøwi Foro de Apio, jøts nayide'en øøts jam ojts ja winaagin xpatsøy ma ja'taa'jk txøøwi Tres Tabernas. Xjats ku ja Pablo ja myigu'uk twin'ijxy, winets ja ttamøja'wiyii'n ja Dios jøts jotkujk ja ñayja'wiyøø. ¹⁶ Xjats ku øøts jam nja'jty Roma, jøts ja soldadi windsøn tkøyajky ja pøkyjaa'y jam ma ja puxøjk adsinaabyi windsøn.

Winets ja Pablo yikniṁaay jøts ja tyøjk abiky t'ixa'at, ja'ayi ku nugo tu'uk ja soldadi y'eix'ityi.

Ku ja Pablo kyajpxwa'kxy jam Roma

¹⁷ Xjats ku dø'øn jam jade'en ja Pablo chinaay tigøøk xøøw jam tyøjkjotp, winets twaadsøoy ja israelit jaa'y ja myøjaa'dyøjkti, xjats ja ñamyujkidøø, jøts ja Pablo tñmaay:

—Migu'uktøjkti, niti øts ngadamidundigøoy ja nmigu'uk israelit jaa'dyi, jøts nika'ap øts nayide'en nmidundigøoy ja møjaa'chinaa'yin, kuwanits adøm nmigu'uk israelit jaa'y xmajch jam Jerusalén, jøts øts ojts xkøyky puxøjkjotp mā romanit jaa'y kyutujk jam. ¹⁸ Ku øts nyikti'dyuuñ, winets øts jadi'iñi xmajtstu'utwandi ja'agøjxp ku øts nbøky ni tu'uk xkapaajtidi mid'i'ibi øts xuku'oogiwyandip. ¹⁹ Ka'ats ja israelit jaa'y tyikjatwa'andi jøts jadi'iñi nyikmajtstu'utt, ja'agøjxp øts kuwani n'amidøoy jøts øts yā xidiyu'unt ja romanit møj windsøn. Ka'ap øts ja' yā nnimiñ jøts øts nmigu'uk israelit jaa'y ja' ndani'øønit. ²⁰ Yø' meets ixyam ndaniwaadsøopy, jøts meets ka'pxy ndukmado'ot tigøjxp ku øts jade'en puxkadeen køwiiñ n'ity; ja'agøjxp ku adøm niduki'iyi israelit jaa'y njøp'ijxyindi ku ja Dios ja oo'kpi jadigojk tyikjujkyiky jap oo'kpi jutjøtpy.

²¹ Xjats ja møjaa'dyøjk t'adsojimbettøø, jøts wyandøø:

—Ni tu'uk øøts ja israelit jaa'y ñøky yā xkapaaty mets køjxp, jøts ni tu'uk adøm nmigu'uk israelit jaa'y nisā kyawa'añ. Ka'ap pøn mga'ødyijyiyi pøn jam tsoo'mp jøts yā tø yja'aty. ²² Nija'wip øøts ku yø' o mādsøo yikpagajpxy pøn yø jemy ixpøjkin tjanchja'widip, paty øøts ndsøky'aty jøts øø xukmado'ot.

²³ Winets tkajpxy'ajttøø ti xøøw jadigojk ñamyukidit, xjats ku tpaajty ja tiempi winets ja jaa'y may ñamyujkidøø mā Pablo jap wyinaty tø yja'ada'aky. Winets ja Pablo jøpyi kyajpxøjkiyiññ kunim chuu'iyiññ ja xøøw. Jøts jade'en ttukmadøoy sa nwindson'ajitn Dios ja ñaxwii'ñit jaa'y ttanitani ja kyutujk. Ja'ats tyukmadøoy ja ja Moisés kyutujk, jøts nayide'en sa ja Dios kyugajpxy ojts ttukjaadyañ, jade'en idø'øn ja udyā'aky tjadukja'gyujkiwyaañ ku ja Jesús ja yikni'sokpi pøn ja israelit jaa'y yjøp'ejxtip. ²⁴ Xjats winaagin tja'gyukidøø, jøts niwinaagin ka' tmibøjktøø sa ja Pablo tjanigajpxy; ²⁵ xjats kumi ka'ap ja niduknaξ tmibøjktøø, winets ja choonwanidøø, jøts ja Pablo jadigojk tñmaagyojmi:

—Janch tiydām idø'øn ja Espiritu Santo wyaañ midi ja Dios kyugajpxy Isaías tyukmadoow ja n'apteety'amøjti, ku ja yide'en wyaañ:

²⁶ Nøjkk x'atsnøjmi yø'øbi jaa'y:

Wā'ats meets xjamado'ot, jøts ka' xmøjpiktā'akti, nayide'ents wā'ats xja'ejxtit, jøts ka' x'ejxkaptit;

²⁷ jabi yø'øbi jaa'y kawine'enxi kyujuunidi,

janch wenk myadowdi,

jøts wimbets ñabyikta'agyidi;

paty ka'ti tmøjpiktā'akti,

jøts ni tkadamadowdi ja tyatsk,

niwinø'ønin ja kyubajk kyaja'gyukidi,

jøts ni tkadyimyikwimbetti yø wyinmaa'ñ ok nbojkipimaa'kxt.

²⁸ Nijawi meets ku ja Dios ja yikni'tso'ok'ajtin øøts ixyam ngajpxwa'kxtsoo'ni mā jaa'y kya'israelitjaa'yidi, ja'ats ne'egi tja'gyukidip.

²⁹ Xjats ku ja Pablo jade'en wyaañ, winets ja israelit jaa'y choo'nidøø, ja'ats møk'ampy ja xem ja yam nugo nadyakajpxidøø ja'abi ayuujk.

³⁰ Majtsk jumøjt ja Pablo jam ka'pxy tyaa'nii'iñ mā ja tyøjk jam t'ajuudyuky, tyajotkujk'ajtpy ja Pablo pøn jaty jam atsmigajpxiyip. ³¹ Jotkujk idø'øn ja tkajpxwa'kxy ka' ti jotmay, tyuk'ixpijkpy ja jaa'y sa ja Dios Teety ja kyutujk ttanitanì ja yjaa'y, jøts nayide'en ttukmadøy sa yjajty kyubejty ja nwindson'ajtim Jesús, xjats jade'en nipøn kya'adsejpiyøø.

JA NØKY MIDI JA PABLO TYANĠGAJX JA ROMĠT JAA'Y

Ku ja Pablo tnijayi pøn tjanchja'widip ja Jesucristo jam Roma

¹ Pablo'ajtp øts, jøts øts ja nwindson'ajtim Jesucristo nmidumpy. Øts ja Dios tø xwi'ixy jøts øts yide'en ngudanaabyi'att. Yide'en idø'øn wa'ats kajpxy nbiktaajkin, ja' øts idø'øn tø xanibiktaagi jøts øts ja ngajpxwa'kxix ja kyajpxy ja y'ayuujk midi nitso'ok'ajtin xukpaajtimp.

² Pø ma windi'ixyip Dios Teety yø tnigajpxni, jøts ja kyugajpxy ttukyiknaxy yø'øbi winmaa'n yø'øbi ixpøjkin jap ma y'lity ja kyajpxy ja y'ayuujk, ³ jøts tnigajpxy ja Dios U'nk pøn nwindson'ajtim Jesucristo'ajtp. Ku ja tnigajpxi ja yjaa'y'ajtin ja ñaxwiiñ'ajtin, ja rey David idø'øn ja y'apteety'ajtpy; ⁴ kuts ja dios'ajtin, jats ja tyiknigaxi'jky ku xemikøjxp jadigojk yjujkyiyjky jøts kyutujky møk'ampy, jøts ku dø'øn ja Dios U'ngi. ⁵ Ja nwindson'ajtim Jesucristo køjxp øøts ja Dios Teety tø xmø'øy ja kunuu'kxin jøts øøts ja ngudanit, jøts yā naxwiiñ yja'attit pøn tjanchja'widip pøn tpaduujnidip ja Dios yja' o ma'et o magajp. ⁶ Jøts meets idø'øn nayide'en mjaa'y'ajtmi, nayi tøxi ja Dios mwi'ixyidi jøts meets ja Jesucristo mja'atidit.

⁷ Meets idø'øn nnija'ayidip niwine'enin jam mdsøøniidi mdanidi Romit kajpkøjxp, niwine'enin ja Dios mdaba'ayøyidi ja chojkin, jøts ja mdamidsokyidi jøts ja amuum mnadyamiyoxidit. Mbattipts ja kunuu'kxin jøts ja øy'ajtin midi ja Dios Teety yajkpy møøt ja nwindson'ajtim Jesucristo.

Ku ja Pablo Roma y'ats'otswa'añ

⁸ Jawyeen øts ja Dios Teety ndukmøjawi ndukunuu'kxyjawi ja nwindson'ajtim Jesucristo køjxp, ku mee ni'ijtyi myiknigajpxti myiknimadya'akti øy madsoo sa ja janchja'win xjagyapti. ⁹ Diosts testigi'ajtp pøn øts ja y'U'nk ja kyajpxy ja y'ayuujk ngajpxwa'kxix amumjoojt, ku meets ejtp nja'myech ku øts ja Dios nmidsapkajpxy. ¹⁰ Ejtp øts ja Dios n'amidøy nbøktsoy jøts tyik'amøjatt jøts mee n'ats'ext, ja' kø'øm kyunuu'kxixngøjxp. ¹¹ Ja ku nbaatwa'andi n'ejxwa'andi jøts nmo'owa'andi yiin waan ja pudøjkin sa Dios ttsøky, jøts yjaakmøjit yjaakmayit ja m'ajot'ajtindi. ¹² Jade'en'ampy øts idø'øn ndijy jøts nixem niyam nnagyajpxjot'amøjka'andit nyiknigaxø'jkandit, jade'engøjxp sa jadu'uk jadu'uk njagyepjyindi ja janchja'win.

¹³ Uknimadowdi migu'uktøjkti, kawinaak ojk øts jam tø njanch-janøjxwa'añ jøts mee n'ats'ext, ni ixymbaatnim ø nganiijky. Jade'en'ampy øts jam njanøjxwa'añ jøts meets ndukmadowa'añ ja Dios yja', jøts ø n'ext sa wyingaxi'iky øts ja ndunkjøøjp, sam ø tø n'ixy abikyajp ma jaty ø tø nwidity. ¹⁴ Xpaat'ajtpxi øts niduki'iyi pøn ka'israelit jaa'dyi, wan ja t'ixpikyidi tka'ixpikyidi; ¹⁵ jøp'ixy ø nnanky'ityi jøts mee nayide'en ndukmado'ot ja Dios y'øgyajpxy ja Dios y'ømyadya'aky, pøn jaty jam Roma tsinaadyip.

Sa ja møk'ajtin tjagyepy ja Dios y'øgyajpxy ja Dios y'ømyadya'aky

¹⁶ Ka' øts ja Dios y'øgyajpxy y'ømyadya'aky ndatsø'ødyuujniyi, pø ja'axi ja' myøk'ajtin ja'axi ja yiktumpy, jøts ja ñitso'ok'atti pøn tjanchja'widip ja nwindson'ajtim, ja israelit jaa'y tyimyjapaajtidip, nayide'ents pøn ka'israelitjaa'ymidi. ¹⁷ Yø'øbi øgyajpxy ømyadya'aky tnigajpxp jøts ku janchja'wingøjxp ja Dios xkupijkyindi, janchja'wingøjxp ja'ayi sam ja Dios

kyajpxy y'ayuujk tyiktaañ ku wyaañ yide'en: "Pøn kupøjkip ja Dios, ja yjanchja'win ja ttukpaatip ja xemikøjxpit tsinaa'yin."

Ja naxwii'ñit jaa'y pyøky

¹⁸ Jap tsajpjøtpty ja Dios tyiktsøøñ ja møj ayo'on, jøts ja ttuktagida'aky ja kawindiyjaa'dyi ja ka'øyjaa'dyi, pøn kya'øy'ajtingøjxp kyananknijawiwyaajnidip ja Dios yja'. ¹⁹ Yjanija'widip wa'ats jøts tigøjxp pyaat'aty: ku ja Dios yiknijaawit, pø tøxi ja kø'øm tyuk'ijxyidi. ²⁰ Sa ja myøk'ajtin y'ejxi tyiyi øy ja yjagagaxi'iky. Jade'en'ampyts ja yik'ixy yiknijaawi ku yik'ixy sa ja tø tyik'øyi ja naxwii'ñit, jøts ku ja' tu'ugyi Dios'aty ku ja myøk'ajtin xemikøjxp myajada'aky; paty ja ka'ap pyaat'atyidi ja'abi jaa'y jøts ja yiktamaa'kxtit jøts ku dø'øn ja Dios ja tkanijaawidi. ²¹ Øy ja tjanijaawidi ja Dios jade'en, ka'apts ja twindsø'øgidi, ka'ap ja tmøjawidi tkunuu'kxyjawidi sam ja Dios pyaat'atyin. Ne'egi wimbet'ampy ja ne'egi wyinmaydi, ja' tyajotkøjxtip mididi niti kawamp jøts ja wyinmaa'ñ kya'øyidi, wimbeets kugoots y'ejtnidi. ²² Øy ja yjawa'andi jøts ku ja wyijyaa'yidi, jade'ents ja yjatti pøn niti tkajajtip; ²³ tøts ja t'ixwejtsidi ja Dios kyunuu'lxin, mididi nijuuni kawindigøøpy, jøts ja tyikmøjtøkididi ja jaa'y yja' ja awanax mididi windigøøpy ejtp, joon paat y'awanax, tsaa'ñ paat y'awanax, uk nayide'en øy mididi jiyujk mididi maktaxk ja tyekey.

²⁴ Yø'øgøjxpts idø'øn Dios ja tø myajtstu'udyidi, jøts ja tø tpanøjkxti ja kyø'øm tsojkin ja kya'øwyinmaa'ñ (mididiyim ja y'ijty y'ukjagyajptip), jøts jade'en tsø'ødyumbim y'adø'øtsti nixem niyam; ²⁵ ja ku ka'ap tjanchja'widi ja Dios tyiy'ajtin. Ja' ne'egi myibøjktip ja tum ja taay, jøts ja ja' tø twindsø'øgidi ja pikta'aky mididi ja Dios tø t'ødyuñ, jøts ni ja Dios ne'egi kø'øm kyayikwindsø'øgi, pøn paat'ajtip amuum ja windsø'jkin. Jade'en idø'øn ja y'ejxi tyiyi.

²⁶ Patyts idø'øn Dios ja tø y'ixmachidi jøts ja jade'en y'am'adø'øtsti chaach'adø'øtsti; ja tø'øxyøjk paat ja tyiktigajtsnidi ja tyø'øxyøjk'ajtin, tum wimbet ttundi sam ka'ap pyaat'aty: jøts ja jade'en y'adø'øtstit. ²⁷ Jøts yaa'dyøjk nayide'enmididi; ka' t'uknitanaañnidi ja yaa'dyøjk'ajtin ku ja tø'øxyøjk møøt, kø'ømyi ja tukyaa'dyøjk ñay'ejxkiyidi nixem niyam. Tukyaa'dyøjk ja axøøk y'adø'øtsti, ja ayo'onts idø'øn ttagidajkidip jøts jade'en tyuktuñnidi ku tkamøjpickta'akti ja Dios.

²⁸ Kumi ka'ap ja Dios tñijawiwya'andi, patyts ja tø myajtstu'udyidi jøts ja y'axøøkwinmaa'ñ tyikmajada'akti, jøts jade'en y'adø'øtstit sam ka'ap pyaat'aty. ²⁹ Tum ja ka'øybi winmaa'ñ yjagyajptip, ja kawindiy'ajtin ja axøøk'ajtin, y'ama'at'ajtkøjxtip o ti, ja ka'øy'ajtin y'amidip yjotpidip, windii'ñjaa'y'ajttip, yikjaa'y'o'ktpip, kudsep yjaa'y'ajttip, win'øø'ndip jøts tum wenk øy pøn tmimadyaagidi.

³⁰ Ja pagajpxk ja' tyunk'ajttip, ka'ap ja Dios ttsokti, yjemjaa'yidi tyejaa'yidi, namyikaxi yjaa'y'atti. Tum ja ka'øybi wyinmaa'ñ'ajttip, ka'ap tyeety tyaa'k tmimadowdi, ³¹ ka'ap yja'gyukidi, ka'ap y'ayuujk tpadundi, ka'ap yujy'ajtin tjagyapti, ka'ap tjatti jøts myaa'kxuktit jøts ka'ap pøn t'ayo'ejxti.

³² Yjanija'widip wa'ats sa Dios tyikutuky; wa'ats tjanijaawidi pøn jade'en adøstip jøts ku ja kyudigø'ødyit xemikøjxp. Jøts nijade'en tkadamajtstu'utti, tyun'adøstip jade'en jinaxy. Tyaxondaktip ku t'ejxti nayide'en y'adøtsmididi jadu'uk jadu'uk.

2

¹ Ja'agøjxp ka' mbaat'aty: jøts ja myiktamaa'kxt øy sã mjawa'añ, metsxi mbayø'opy jadu'uk øy pøn, mdyimyjapøni mets. Ku jade'en m'adi'ich kø'øm mnadyanipiky ja ayo'on, mbayø'opy jadu'uk jøts m'adøtspts jade'en kø'øm. ² Nnija'windipts adøm jøts ku Dios tiy'ajtingøjxp tyiidyuñ ku ja ttukniduki ja ayo'on pøn jade'en adøtstip. ³ Jade'en mets yjaw i mwani mduknawa'adsip mets ja Dios xijy ja ayo'on, metsxi mdanipijkpy ja mmigu'uk ja ayo'on pøn jade'en adøtstip, mja'adøtstip meets jade'en kø'øm. ⁴ Uk ka' idø'on xtsojki ja Dios y'øy'ajfin ja Dios tyuda'aky'ajtin, ni xkamøjpkta'aky jøts ku ja'abi øy'ajtin tyuñ jøts xmijotjimbett ja Dios jøts tyigatst ja mdsinaa'yin. ⁵ Møk ja mwinnaa'ñ xjagyepy jøts ka'anin xmijotjimbity ja Dios jøts xyiktigatst ja mdsinaa'yin. ⁶ Kø'ømyi ja m'ayo'on xyikmiweni xyikajaji, midni nøjxx yikpatp yik'ejxp ku ja Dios ja tyiidyu'unin tiy'ajtingøjxp tyikme'ent, ⁶ ku ja ttagubatt tu'uk tu'uk sã jaty pønjabøn tø y'adi'ich. ⁷ Pøn tpaatwandip ja kunuu'kxin ja øy'ajtin xondaajkin midni xemikøjxp, jade'en'ampy ku ejtp øy yikxon yjaa'y'atti, ja'ats idø'on Dios mo'ojidip ja juky'ajtin midni xemikøjxp; ⁸ pønts nay'ama'at'ajtyip jøts ka' tpadundi ja tyiiby: yjanchpi, tum ja ka'øybi tyundip, ja'ats ambøjkin'ampy Dios tiidyunidip. ⁹ Møk y'ayo'odit niduki'iyi, y'amjattit chaachjattit pøn ka'øy'adøtstip, ja israelit jaa'dyi jøts nayide'en pøn ka'israelit jaa'dyi. ¹⁰ Pønts øyjaa'y'ajttip wan t'israelitjaa'yidi uk tka'israelitjaa'yidi, ja'ats ja Dios mo'ojidip ja kunuu'kxin ja øy'ajtin jøts ja windsø'jk'ajtin.

¹¹ Kumi ka' Dios pøn t'øy'ixy tka'øy'ixy wan ja t'pøni; ¹² pøni pøn tkanija'widip ja kutujk midni ja Moisés ja Dios Teety møøjyi piri pøkyundip, nayide'en ja nøjxx wyindigøydi, ni ja kutujk kyatsokit; pønts tjanija'widip ja Moisés kyutujk jøts pyøkyun'adøtstti, nay ja'abi kutujk ja jaayi nøjxx yiktatiidyundip. ¹³ Ka'ap ja Dios tkupiky pøn nugo tmadoodip ja kutujk jøts ka' tpadundi. ¹⁴ Ku abiky jaa'dyi, pøn ja Moisés kyutujk tkanija'widip, tyundipts ja øybi midni ja Moisés kyutujk y'ane'emy øy ja ja'abi kutujk tjagajagyapti, kyø'ømgutujk ñamyayi yiktundip, ¹⁵ jabi yikwingaxø'ktipxi ja' sã jaty ja yjaa'y'atti jøts ku ja kutujk tjagyapti. Ja kyø'ømwinmaa'ñ ni'øøniydip sã y'øy'adøtstti kya'øy'adøtstti. ¹⁶ Ja'abi xøøw yiknijawit ku ja Dios Teety tpikta'akt ja Jesucristo jøts ttiidyu'unt niduki'iyi ja jaa'y ti jaty pønjabøn tø ttuñ ayu'uch, sãm ø tø nnigajpxi ja yiknitsokpi ayuujk.

Sã ja israelit jaa'y ja Moisés kyutujk ñadyamøjjiydi

¹⁷ Mets wamp jøts ku me israelitjaa'yi, jøts ku xpaduujni ja Moisés kyutujk jøts mnadyamikajxip ja mDios. ¹⁸ Wa'ats xnijawi sã Dios ttsøky, jøts wa'ats mduknijawiyi ja kutujk midni'ibi øy midni'ibi tsuj. ¹⁹ Mnay'aja'wiyip jøts ku xjaty xnøø'mo'ot xuu'mo'ot ja jaa'y pøn wimbeets kugoots ejttip. ²⁰ Mnay'aja'wiyip jøts ku xjaty sã xyik'ixpøkt pøn tkanija'widip pøn tkaja'gyukidip, pø japxi kutujkjøtpy xkajts'ixy ja wejin kajin, ja tyiiby yjanchpi. ²¹ Myik'ixpijkpy ja mmigu'uk, ¿ti kuts kø'øm xkatunjøpi sã ja m'ixpøjkin xyikyø'øy? Ku mgajpxwa'kxy, jade'en mwaa'ñ ku ka'ap y'øyi ja maa'tsk, maa'tspts mets kø'øm, ¿tigøjxp ku kø'øm mmeech? ²² Mets mwamp jøts ku ka'ap pyaat'aty: jaa'y ñiyaa'y ñidø'øxy ñabyøjkiyidit, jøts ¿ti'ajtp ku jawyeen jade'en kø'øm m'adi'ich? Ni mets kø'ømbaat xkatsøky ja awanaax, mwimaa'tsidipts ja çhaptøjk ti jaty ja yjagyeypy. ²³ Mnadyamikajxip mets ja kutujk, mmidundigøøpyts ja Dios ku ka'ap jade'en xuñ sã ja kutujk wya'añ. ²⁴ Paty idø'on ja Dios kyajpxy wya'añ: "Pøn ka'israelit jaa'dyi, ja' tka'ødyejtip ja Dios ku meets tum jiwimbet xunguixy."

²⁵ Pø wan wine'enin xjanchyiktuñ ja Dios y'ejxpajt mne'kxkøjxpx ku xpaduñ ja Moisés ja kyutujk, kuts ja ka'ap xpaduñ, jade'en ja tpaaty ejxim ja ejxpajt jeexyip xkamøøt'aty. ²⁶ Pønts ja ejxpajt kyamøøt jøts pyadumpy sa ja kutujk wya'añ, jade'en ja tpaaty jøts ku ja ejxpajt ja jeexyip tmøødi, øy ja windii ja ejxpajt yjagayiktu'unxinim. ²⁷ Pønts ja ejxpajt ka'ejtxip jøts pyadumpy ja kutujk øy ja kø'øm tka'ixpiky, mdabayø'øyip mets ja' ku xkabaduñ ja kutujk, øy mets ja jap xja'ixy jøts ku ja jap kyøxja'ayi jøts øy mets ja ejxpajt xjamøøt'aty. ²⁸ Ka'apts ja jade'en tijy jøts ku ja y'israelitjaa'y'i pøn jade'en nugo nikijxy nan'ky'ejxip, jøts ni ja' ka' yik'ejxpajtijy midì nikijxy ja'ayi yiktump. ²⁹ Ja' idø'øn israelit jaa'y pøn amuun tpadump, jøts ja' ejxpajtin'ajtp midì yikwinmaapy am jotp, jam anmija'wingøjxpx, midì ka'ap ma kyøxja'ayi, midì ka'ap ma kyaxi'iky. Pøn jade'en tpadump, kupiky ja y'ity jam Dios wyingujkpx, kidi jaa'y wyingujkyip.

3

¹ ¿Tiku yikajpxy ja israelit jaa'y? ¿Ti wya'añ ja ne'kxkøjxpit ejxpajt? ² Janch møk yjapaat'atyidi ja'agøjxpx ku ja' ja Dios kyajpxy y'ayuujk tyami'ajot'ajtidì jøts ja tpadu'undit. ³ ¿Tits idø'øn ja'adi? Øy ja tkabadundi jade'en, ¿winets ja Dios tmajtstu'utt ja y'ø'y'ajtin? ⁴ ¡Niwindem! Jinaxy ja Dios tyiktuñ ja tyiiby' yjanchpi, øy ja jaa'y niduki'iyi yjataayidi; jabi yide'enxi ja Dios Teety kyugajpxy tnmadyaajky ja Dios Teety:

Ja mgø'm'ayuujk me Dios Teety myika'pxytiidyumbipidsøøjmip, ku wyinaty nugo mwinmaa'n'ijxyidi ja'adi pøn mgamøjxpiktaajkyip.

⁵ Sam winaagin wya'andi yide'en: ku adømbøkyøjxpx tijy ja Dios ja y'ø'y'ajtin tyiknigaxi'iky, ¿sats adøm idø'øn ja'abi ayuujk nja'gyukandit? ¿Ka' idø'øn ja Dios y'øyi ku ja nyikjotmajtyindi, jøts ja ayo'on xjaniguejxyindi? ⁶ ¡Nijuuni ka' yjade'eni! Ku Dios jeexyip kya'øyi, ¿sudsots ja jeexyip ttidyuñ ja naxwii'nit jaa'y?

⁷ Jøts kuts øts nbøky jeexyip yjanchtuñ jøts ja Dios tyiy'ajtin tyikwingaxø'økt, ¿sudsots ø nyikpøky'ixy jøts ku øts nbojkitumbijaa'y'i? ⁸ ¿Winets ja tum øy wyimbejtxit ku pøn ttuñ tum ja ka'øybi? Jade'en ja jaa'y winaagin kya'øwyinmaydi jøts wya'andi, jøts ku ja'abi øøts jade'en ndukni'ixpøki. Yø'øbi jaa'y paat'ajtidip ja ayo'on.

Niduki'iyi ja pøky xaja'jtyindi

⁹ ¿Tits adøm idø'øn? ¿Ku adøm n'israelitjaa'yindi, paty adøm jawaani njaaktyimy'øyindi, jøts nika' pøn jade'endi? ¡Ka'ap yjade'eni! Pø tøxi nnigajpxy jøts ku tum ja pøky yik'adsøøni, wan t'israelitjaa'yidi uk wan tka'israelitjaa'yidi. ¹⁰ Ja'agøjxpxi jap nøkyjxpy yide'en wya'añ:

Ka' pøn y'øyi, nitu'ugin kya'ity pøn øy;

¹¹ nipøn kyaja'gyuki,
nipøn tkanijawiwya'añ ja Dios.

¹² Tum ja wenk tuu' tø tpøjknidi, windigøy ni'ijtyi yjatti.

Ka' pøn tjotmay'aty ja øwyinmaa'n, ok idø'øn tu'ugin ja'abi twinmaa'n'att.

¹³ Tum ja axøøk kajpxy pidsømp y'aawjøtpy yukjøtpy;

ja win'øø'nk ja'ayi majyip.

Wingajpxnajxpm kyajpxy;

¹⁴ tum ja ka'øybi kyajpxpidsømdip, kixy kyubety wya'andi.

¹⁵ Jøts ja'ayi majyidip ku tñibutti tniga'akti ja yikjaa'y'oo'k;

¹⁶ ja' tyunk'ajttip ku yikudigø'ødyit ku y'ayo'ondu'undit,

17 jøts ka' tñijawidi ja øy'ajtin ja tuda'aky'ajtin.

18 Niwine'enin tkawinmaydi jøts twindsø'øgidit ja Dios.

19 Jøts yiknija'wip sa jaty ja Moisés kyutujk wya'añ, ja'ats ja yikta'ana'amdip ja israelit jaa'dyi pøn ja tø yiktanibiktaagidi, ja'agøjxpts ne'egi amøni tyimy'tettit, jøts jade'en niduki'iyi ja naxwii'ñit jaa'y tpaattit ja Dios tyiidyu'unin; 20 nipøn ja Dios tka'øy'ext øy ja tø tjabaduñ midit ja kutujk ñi'ane'empy, jøts ja'ayi ja ñigajpxpy ku adøm nbojkipitumbijaa'yindi.

Janchja'wingøjpx ja nitso'ok'ajtin yikpaaty

21 Jats jadu'uk ja winmaa'ñi sa Dios xkupøjkin. Yjadyimyanigajpxpy ja Moisés ja kyutujk ja kø'øm, jøts nayi tø ja Dios kyugajpxy ja nayide'en tñigajpxti. 22 Ja' idø'øn ja Dios Teety kyupijky pøn tjanchja'widip, pøn t'ajot'ajttip ja nwindson'ajtim Jesucristo; kyupijky ja øy pøn, ka'ap ja pøn jadu'uk jadu'uk twenk'ixy, 23 niduki'iyixi jaa'y pyøkyundi, jøts ka'ap pøn tminaxy ja pyøky jam Dios wyingujkp. Jagam jixkø'øm ndsinaa'yindi, ni sudso'ampy ja ñitso'ok'ajtin ja ngapaajta'am. 24 Ejxim ja Dios Teety y'øyi ku ja jaa'y tyiknitso'ok'aty nwindson'ajtim Jesucristo køjpx, jøts jade'en tmay'aty ku tkupiky. 25 Ja Cristo ja Dios Teety pyiktaajk jøts ja tkudanaajytit ja naxwii'ñit jaa'y pyøky ku ja tku'oogit. Winets wyingaxi'ikñim adøm ja nitso'ok'ajtin ku ja njanchja'win, jøts ja Dios Teety jade'en xuknija'win ja y'øy'ajtin ja tyuda'aky'ajtin, jøts ku ja tkadagubety ja pøky midit tø yiktuñ jawyeen ku ja nwindson'ajtim tkagu'ooginim ja pøky. 26 Ja'agøjpx jade'en yjaty jøts nniija'win jøts ku Dios Teety y'øy'ajtin tyiy'ajtin tyik'awa'añ, jøts ejtp jade'en øy juuni tkupiky pøn tjanchja'widip ja nwindson'ajtim Jesús.

27 ¿Mats ja namyikaxi tyuñ? Pø ka'axi ja tyuñ ku ja janchja'win njagyajpin, ku njanchja'wyin ja nwindson'ajtim. Ja' ja tyiktundip pøn tta'ødyøkiwyandip ja tunk ma Dios, ku ja kutujk nadyijyi tpadundi pøn ja janchja'win tkajagya-jptip. 28 Jade'ents yik'ixy yiknijawi jøts ku janchja'wingøjpx ja jaa'y yikupiky jam Dios wyingujkp. Ka'ap ja yikpayø'øy pøni sa ja tø tpaduñ tkabaduñ ja kutujk sa ja y'ane'emy.

29 ¿Ti ja israelit jaa'y nugo ja Dios Teety y'ejx'ijtpy, jøts ja ka'ap t'ejx'lity pøn ka'israelit jaa'dyi? Ka'ap yjade'eni, pø tum ja'axi amuum tja'ajtp. 30 Tu'ugyi Dios, ka'ap ja Dios kyawinaagi; jøts pøni pøn tmøøt'ajtp ja janchja'win, ja'ats ja Dios kyupijky, wan tmøøt'aty uk tkamøøt'aty ja ejxpajt ñe'kxkøjpx sam ja israelit jaa'dyi. 31 ¿Ja'agøjpx adøm ja kutujk nga'ukpadu'unindit ku ja janchja'win nmøøt'ajtyindi? Ka'ap yjade'eni, jabi jade'eni ne'egi ka'pxy ja kutujk yikpaduñ ku ja Cristo njanchja'wint.

4

Sa ttunjøpi ja Abraham

1 ¿Ti adøm n'apteety'amøj Abraham tyuun jøts Dios ja ojts kyupiky? 2 Ku jeexyip ja Abraham ja'agøjpx ja Dios kyupiky ku ja wyinaty tø ttuñ tigati, nadyamøjjiypts ja jeexyip. 3 Yide'ents jap nøkyijpxy wya'añ: "Ojts ja Abraham tjanchjawi ja Dios, ja'ats ja Dios y'øyja'wiyi'ñi jøts ja ojts tkupiky." 4 Ku pøn øy ti tunk ttuñ jøts ku ja yikmijuy, ja tyunkts ja yiknimiju'uyip, ka'ap ja niñamyay'ati tpaaty, ja' ja kyudøjkip ku ja tø tyuñ. 5 Pønts ja tunk tkada'ødyøjkip ma Dios, øy ja ti tjagatuñ, jøts ku ja ja'ayi tjanchjawi ja Dios ku ja pojkipitumbi jaa'y ja tpojkpimee'kxy, ja'ayi ja Dios tyajotkuj'ajtpy ku ja tjagyepy ja janchja'win, jøts ja tmay'aty jade'en ku ja tkupiky. 6 Nayide'en ja David ojts wya'añ ku ja ojts tñigajpxy sa ja jaa'y xyonda'aky pøn ja Dios

kyupijky, jøts ja ka' tmøjpikta'aky pøni sã ja jaa'y tø y'adi'ich. ⁷ Yide'en ja wya'añ:

Nekim ja jaa'dyi pøn ja Dios ttamaa'kxidip ja tyundig'øyin, jøts ja ka'ap myøjpiktaajkxiyidi ja pyøky.

⁸ Nekim ja' pøn ja nwindson'ajtim pyojkpimee'kxpy.

⁹ Ja'ayi dø'øn nugo jade'en nekim t'ejxtip pøn ttundip ja ejxpajt ñe'kxkøjxp, uk nayide'en idø'øn ja'amidi pøn tkatundip ja ejxpajt? Nnija'windipts jøts ku ja Abraham ja'agøjxp ja Dios ojts kyupiky ku ja ja'ayi tjanchja'wi. ¹⁰ Juunits idø'øn ja jade'en yikupijky? Tø wyinaty ja Abraham jawyeen ja ejxpajt yikpiktaajki, uk ka'anim? Ka'anims ja wyinaty ttuñ ja ejxpajt. ¹¹ Oojknim ja Abraham ojts yikpiktaajki ja ejxpajt ku ja ojts yiktsuky ja ñe'kx, ejxa'an ja wya'añ jøts ja yiknijawu ku Dios ja tø kyupiky yjanchja'wingøjxp. Jade'ents ja Abraham ttunjøpiyi'ñ, jøts ja nayide'en niduki'iyi janchja'wingøjxp yikupøkti øy ja tmøøt'atti tkamøøt'atti ja ejxpajt ñe'kxkøjxp. ¹² Janch jade'en ku ja Abraham idø'øn kyudanaabyi'ajtp pøn ja ejxpajt tmøøt'ajttip, kidi ja'agøjxpip ja ja'ayi ku ja tø yiktu'unxidi ja ejxpajt. Jade'en'ampy ja tijy jøts ku ja tpa'ejxti, jøts ja nayide'en tjagyapti ja janchja'win sã ja Abraham, ku ja wyinaty ka'anim ja ejxpajt yiktu'unxi.

Jaa ja Dios y'aduky ja kyajpxy ku ja yikjanchjawu

¹³ Jade'en ja Dios wyanda'aky, jøts ja Abraham møøt niduki'iyi wine'enin ñajtska'axidi yikmo'odit amuum ja naajx kajp wine'en y'ity naxwiñ; kaja'agøjxpipts ja wanda'aky ojts yikpikta'aky jade'en ku ja kutujk ja wyinaty ka'pxy tø tpaduñ ja Abraham, pø jade'en'ampyxi ja jade'en ku Dios ja tjanchja'wi, jøts ja' ja wyinaty tø tyagupiky. ¹⁴ Jøts ku jeexyip ja'ayi yikupøkti pøn tpadundip ja Moisés kyutujk, jøts ja'ayi jeexyip yikmo'odi ja Dios y'øy'ajtin, ka'ats jeexyip tyuñ ja janchja'win, jøts ni ja Dios jeexyip ja wyanda'aky niti kyawa'añ. ¹⁵ Pø tiiidyumpxi ja kutujk; mats ja kutujk kya'ity, ka'ap jam ti yikmidundigø, jabi niti ana'aminxu jam.

¹⁶ Jade'en'ampyts idø'øn Dios ja twandaajky ja'agøjxp ku ja janchja'win ojts t'ixy, jøts ja tmay'att niduki'iyi pøn nayide'en ja janchja'win tjagyajp sã ja Abraham. Kidi ja'ap ja Dios tyamiwandaajki ja y'øy'ajtin pøn tpadundip tkabadundip ja kutujk, pø ja'axi tyamiwandaajki pøn tjanchja'widip ja Dios sam ja Abraham ttunjøpiyi'ñ. Jade'ents idø'øn ja tpaaty, ja' ñamyayi tñigubajk'ajtp ku ja jade'en ojts tjanchja'wi ja Dios, jøts ja' adøm ñamyayi ndeety'ajtyindip ¹⁷ jam Dios wyingujkp, pø nayi Diosxi ja yjanchja'wiyi'ñ ku wya'añ ja Dios kyajpxy: "Tø me nbikta'aky møjaa'y'ajtpi o ma'et o magajp." Janch møj ja Dios, øy ja tyikjujkyøkt pøn tø y'oo'kni tyigøøñi, jøts nayide'en tñanky'ijxyi o ti pikta'aky midi ka'ejtpnim.

¹⁸ Øy ka'ap ti jøp'ejxin, ka'ap ti winmaa'ñ, ojtsts ja Abraham ja tjanchjawu jøts yjøl'ijxy ja', xjats idø'øn ja jade'en may jaa'y ñamyayi tñigubajk'aty sã u'nkteety y'u'nk y'una'jk tñideety'aty, jade'en sã dø'øn Dios ja wyinaty tø ñii'mxyi ku ja wya'añ: "Janch may ja m'u'nk m'una'jk xpaatt." ¹⁹ Magøpxy ja Abraham wyinaty ja yjumøjt jøts ka'ap ja sã tijy, amuum ja t'ajot'aty øy ja ñidø'øxy Sara ja møøt tø yjamøjaa'yinidi, ka'ap ja y'u'nk y'una'jk t'ukpatnidit. ²⁰ Ka'ap ja sã tijy, ka'ap ja tka'øyja'wiyi ja Dios wyanda'aky, ne'egi ja amumjoojt piktaajky ja yjanchja'win jøts ja tmøjawi tkunuu'kxyjawi ja Dios, ²¹ jøts ja tu'ugyi tjøl'ijxy jade'en jøts ku Dios tjagyepy møk'ajtin, jøts ja ttu'unt jade'en sã ja wya'añ. ²² Jade'en'ampy ja Dios ja ojts kyupiky ku y'ijxyi jøts ku myajada'aky ja yjanchja'win.

²³ Jøts ku dø'øn Dios ja jade'en tkupijky ja yjanchja'win, kidi ja Abrahamip ja ja'ayi kyupøjkip jøts ja jade'en yikjaadyañ; ²⁴ pø nayide'enxi adøm ja xkupijkyim ku adøm ja Dios Teety njanchja'want. Pø ja'axi tø tyikjujkyiky jadigojk xemikøjxp ja nwindson'ajtim Jesucristo, ²⁵ pøn ojts yikøyaky jøts y'oookt adøm nbøkyøjxp, jøts jade'engøjxp ojts xemikøjxp yjujkyiky jadigojk jøts adøm nyikupøjkint jam Dios wyingujkp.

5

Øwymibdsimy ku xkupøjkint ja Dios

¹ Kuts ja Dios Teety xkupøjka'an ja njanchja'win, jøts jade'en ja nmiduda'aky'ajtin ja nwindson'ajtim Jesucristo køjxp. ² Ja'agøjxp adøm ja Dios Teety møøt n'ijtyindi ku ja nwindson'ajtim njanchja'windi, paty adøm ja xkunuu'kxyindi. Ja' adøm xyik'ejtindip tu'ugyi ja nwinmaa'n jøts ja xondaajkin xmø'øyindi, jøp'ijxy nyik'ijtyindi jøts ku ja nbaajta'andit amuum ja y'øy'ajtin. ³ Jøts nayide'en adøm ja ka'ap nwindijyindi ja ayo'on, øy adøm ja ngu'ayo'owa'andi jotkujk; pø nnija'wandipxi adøm ku n'ayo'owan winets ja tuda'aky'ajtin nbaajtindit, ⁴ jøts ja tuda'aky'ajtin ja' øy xyikwingaxø'jkindip, ja' xukjøp'ijxy'ajtindip midi ja Dios tø xanibiktaajkandi. ⁵ Jøts ka'ap majtsk'aaw majtskjoojt n'ejtindit, pø tøxi ja Dios amuum xmø'øyim ja y'øy'ajtin ja pya'ayo'owin ku ja tø xuktatøjka'am ja y'Espiritu Santo.

⁶ Ku adøm wimbeets kugoots nmijajtyim ja nbøky, niti nitsø'ok'ajtin kø'øm ngapaajtyim, xjats ja Cristo tø myiñ winet, jøts ja tø tkudani ja ka'øyjaa'y pyøky ku ja tø y'øøky. ⁷ Ka'ap pøn nugo tnigyu'oogi jadu'uk, ni jade'enbaat øy pøn mabaat yjadyimya'øyjaa'yi; pø wants winaagin pøn ñay'a'ejxyit jøts ja tku'oogit. ⁸ Xjanchojkimpts adøm ja Dios ku adømgøjxp y'øøky ja nwindson'ajtim Jesucristo, øy adøm njapøjkpitumbijaa'yandi. ⁹ Jøts tøts ja Dios xkupijkyim ja nwindson'ajtim Jesucristo pya'ayo'owingøjxp ku ja tø xku'o'jka'andi, jøts ne'egi jinaxy ja nøjxx xuknitso'ok'ajtyindi ja møk ayo'on, jøts ja ka'ap xuku'o'jka'andit ja nbøky, ja'ayi nwindson'ajtim Jesucristo køjxp. ¹⁰ Njagami'øy'ajtyindip adøm ja Dios, jøts adøm ja jade'en xjaaktuu'mø'øyindi sudso ja jadigojk nmijotjimbejtindit, ja'agøjxp y'ø'jky ja y'U'nk adøm nbøjkpikøjxp. Mats ku ja ixyam yjujky'aty xemikøjxp, jøts ku adøm ja tø nmijotjimbiytyindi ja Dios, ¿ti jats adøm ndejint ja winet xka'ukyknitso'ok'ajtna'ant? ¹¹ Xon'ejtnamdip adøm ixyam ja'agøjxp ku ja nwindson'ajtim Jesucristo tø xukmigu'ukwə'añim jadigojk ja Dios Teety.

Ja Adán jøts ja Cristo

¹² Jøts tu'ugyi ja jaa'y pøn pøkyun'okwaan ya naxwiiñ, jøts ja o'jkin tigøø'yin jade'en'ampy ñaxkidaajky, niduki'yi øy pøn pyaadyi ja'agøjxp ku ni'ijtyi nayide'en tø pyøjkpitunidi. ¹³ Ku ja kutujk wyinaty kya'litynim, jaayim ja pøky wyinatyni ya naxwiiñ; jaa ku ja Dios ka' tpayø'ñim, pø ka'animxi ja kutujk wyinaty te. ¹⁴ Ku ja et ja xøøw ñajxy midi tso'ondaajk Adán ñikøjxp jøts yjøkixy Moisés ñikøjxp, jøts wine'en pøn pyøkyundøø, ja' idø'øn ja o'jkin tigøø'yin mimajadaajkidøø, øy ja tjagajagyapti ja'abi pøky midi ja Adán tyuun ku ja tkamimadøøy ja Dios; sa ja Adán tyiktso'ondaajky ja pøky, nayide'ents ja tu'ugyi myenwami wyinatyni pøn ja øy'ajtin nitsø'ok'ajtin xukpaajtmandip, xjats tø myiñ ja nwindson'ajtim Jesucristo.

¹⁵ Windemts ja møøt n'uk'ejxkijpxyin ja Adán tyundigøø'yin møøt ja Dios y'øy'ajtin midi ja xmø'øyindip. Tu'ugyits ja jaa'y pøn ja pyøky tø

xukno'jka'andi niduki'iyi jøts windigøøy n'ejtna'andi; jøts tu'ugyi ja nayide'en ja nwindson'ajtim Jesucristo pøn ja Dios xuknitso'ok'ajtindip ja nbøky, jøts ka'ap ja pøn tmi'abaaty, namay adøm nyiktamay'ajtyindi ja nitso'ok'ajtin jøts adøm ja xmø'øyindi. ¹⁶ Ti'in ja ndami'a'ejxin ja tu'ukpi jaa'y pyøky møøt ja Dios nitso'ok'ajtin. Tu'ugyi ja tundigø'øyin ja'ats yikpayø'øpy jøts tønøkpjajtkixyindi; kuts ja Dios xmø'øyindi ja nitso'ok'ajtin, tyamay'ajtpy ja jaa'y ja ñamyayi jøts ja xkupiikyin, øy wine'en tønjøpjkpitu'uñindi. ¹⁷ Ku ja tu'ukpi jaa'y tønjøpjkpituñ, ja'agøjxpts ja o'jkin myajada'aky jøts ja yikudigøøy, møjts ja Dios jøts ja ttuñ ja may'ajtin, jøts ja tyaky ja myøk'ajtin midi yikjujky'ajtp xemikøjxp ku tu'ugyi njanchja'want ja nwindson'ajtim Jesucristo.

¹⁸ Jade'en sam ja Adán pyøkyøjxp ja jaa'y ttukpaatkijxy ja kudigø'øyin, nayide'en ja nwindson'ajtim Jesucristo y'ødyu'uningøjxp ttukpaajty niduki'iyi ja naxwii'ñit jaa'y ja nitso'ok'ajtin, jøts ka'ap ja møk tiidyu'unin tpaattit pøn jaty tjanchja'widip. ¹⁹ Tu'ukts ja jaa'y pøn kamadoow, jøts ja'agøjxp ja pøky xaja'atkijxyindi; nayide'ents ja tu'ukmi pøn tuki'iyi tmimadoow ja Dios Teety, jøts ja'agøjxp adøm nyikupijkyindi jam Dios wyingujkp.

²⁰ Jøts ku ja kutujk yikpiktaajky, ja' ja yiktanibiktaajkyii'ñ jøts ja pøky wa'ats yik'ejxkapt; jøts ja pøky møjtak'adøtsp ja', jinaxys ja Dios y'øy'ajtin myøk'ajtin tyikmøji'adi'ich nayide'en. ²¹ Sam ja pøky myajada'aky ku ja tyiknaxkida'aky ja o'jkin tigø'øyin, xjats ja Dios ja y'øy'ajtin nayide'en tyikmajada'aky sudso ja xkupøjkin, jøts ja nwindson'ajtim Jesucristo køjxp xmø'øyindi ja jujky'ajtin xemikøjxp.

6

Ka'ap ja pøky myajada'aky ku ja Cristo yjujky'ajtin nmøøt'ajtyindi

¹ ¿Tits njaaktu'unindip? ¿Jaaktyimbyøkyun'adøjtsindip adøm idø'øn ja'agøjxp ku tønñija'windi jøts ku ja Dios xu'unxim ja may'ajt ku ja xpojkpimee'kxyindi? ² ¿Ka'ap jade'en pyaadyi! Pø tøxi adøm nmajstuuftyindi ja pøkyu'unin; ¿jøts sudso adøm jade'en nbøkyun'adøjtsin? ³ ¿Ti ka'ap xnijawidi ja nnøbajtin, ti ja tyijpy? Pø ja'agøjxpxi adøm tønøbejtyindi jøts nmøøt'ejtindit ja nwindson'ajtim Jesucristo, jøts yiknijawit jøts ku adøm ja nbøky ja tønmi'o'jka'andi. ⁴ Møøt adøm ja Cristo ñamyayi nnaøjka'andi jøts ja møøt n'øøky'ijtyindi, jøts ku ja yjujkyijky xemikøjxp jøts adøm nayide'en nbajtma'an ja jemchinaa'yin midi ixyam jøts midi xemikøjxp, sam ja Dios Teety ja tyukmimadaajkøø ja o'jkin, jøts ja myøk'ajtin myø'øyi, jøts ja yjujkyijky xemikøjxp. Nay ja'ats idø'øn yiktump ku ja nøbajtin yikpaaty.

⁵ Pøni tødams adøm ja Cristo nmøøt'ø'jkyim nayide'en sam ja o'jkin ja tøn tpaaty, nmøøt'ijtyindipts adøm ja', jøts ku ja yjujkyijky xemikøjxp jøts nayide'ents adøm ja nmøøt'jujkyøjkma'andi. ⁶ Nnija'windipts adøm sã jaty tønjaa'y'ajtyindi, jøts ja' ja' ja Cristo myi'o'jk jam kruskøjxp, jøts adøm ja nbøky xniwaaajchim jade'engøjxp ku ja y'ø'jky, jøts ja ka'ap x'ukmimadaajkna'am, jøts ja ka'ap jade'en n'ukmidu'una'ant sã jaa'y ja wyindsøn tmiduñ, jade'en ja pøky ñamyayi yikmiduñ. ⁷ Pønts tøn y'øøky, tøts ja pøky ja ñiwaajtsniyi. ⁸ Pøni nmøøt'ijtyindip ja Cristo øy ja møøt nja'ø'jkyim, njøp'ijxy'ajtyindipts ja' jøts ku ja møøt njuky'ajtindit xemikøjxp, ⁹ pønñija'windipxi jøts ku ja Cristo tøn yjujkyijky xemikøjxp, nijuuni kya'uk'oo'knit, nijuuni kya'ukmimadaajkniiyt ja o'jkin. ¹⁰ Tuk'o'jkyi ja ja'ayi ttuku'o'jkiyi'ñ amuum ja pøky; jøts ja ixyam xemikøjxp yjujky'aty amuum ja Dios Teety tmøøt'ity. ¹¹ Jøts nayide'ents meets idø'ønmidi, øøky tigøy ndejint mnabyikta'agiyidit jøts ja pøky jade'en

xkayikmø'attit, wijy kejy meets ne'egi mnabyikta'agiyidit ku ja Dios yja' xpadaujnidit, ja'agøjxp ku ja nwindson'ajtim Jesucristo xmøø'tatti.

¹² Paty ka'ap mbaat'atyidi jøts nugo xyikmajada'aktit ja mbøky ja mga'øwynamaa'n, øy sa mduktunwa'añidi pøni sa ja ttsøky. ¹³ Kidi mnagyøyakyidi ma pøky, jøts ja kidi mduktuñidi ja ka'øy'ajtin. Ne'egi amuum mnayoxidit ma Dios, jøts ja mduktunidit tum ja øy'ajtin. Ka'ap meets ja pøky xukmijuky'ajtnit, jabi tøxi meets ndejint tøm'ats'øøky, jøts tømjukpyøkti jadigojk, jøts ja juky'ajtin tøm xpaatti midi xemikøjxp. ¹⁴ Jøts ja pøky ka'ap meets ja m'ukmimajadaajknuyit, pø kidi ja Moisés kyutujkixi meets mnitanajyiyip, ja Diosxi meets ja kyunuu'kxin mdanitanajyiyip.

Ja ejxpajt madya'aky ku ja jaa'y ja wyindsøn aguwani tmiduñ

¹⁵ ¿Sudsots adøm? ¿Jaaktyimbyøkyun'adøjtsindip adøm ja'agøjxp ku ja Dios xanitanaa'yindi ja y'øy'ajtin, ku adøm ja kutujk ka'ap xiidyu'uñidi?

¹⁶ Jøts mnija'widipts wa'ats ku tu'uk ja windsøn x'ukmidundøkidit, tu'ugyits ja xwindsøn'attit jøts ja' kuwani mmimado'odip, pø ja'axi wyinaty mdumbi'ajtidip. Nayide'ents idø'øn tpaaty ndejint ku ja pøky xmimado'odit, ja' meets idø'øn ndejint windsønbojknip øy ja yjayik'øøky jyatyiktigø, uk nayide'ents ku tu'ugyi ja Dios xmimado'odit jøts jade'en xu'undit sa ja ttsøky.

¹⁷ Janch møj ja Dios ku ja y'ixpøjkin xpadaujnidi midi tøm myiktagidøkidi, jøts ja pøkytunk tøm xmajtstu'utti midi y'ijty niwa'añ myik'ejtniyidip.

¹⁸ Tøts ja pøky mniwa'achidi ku ja ka'ap m'uknimajadaajknuyidi, jøts tøm xpatwa'jkidi ja øy'ajtin midi ja Dios yja'ajtpy. ¹⁹ Jade'en ndukmadowdi sa ø najtsjawi xmadodø'ødit, jøts nayide'en xnadyamiyoxidit ja Dios. Sam y'ijty mnagyøyakyidi amuum jøts xundi ja ka'øy'ajtin ja axøøk'ajtin, nayide'ents idø'øn amuum ja Dios xnadyamiyoxidit, jøts xuujnidit ja y'øy'ajtin jøts amuum xmøø'tettit ja Dios, tu'ugyi xagødøkidi ja mdsinaa'yin.

²⁰ Ku meets ja pøky y'ijty mganiwa'achinim, ka' meets y'ijty xuujni ja Dios yja', ja tiy'ajtin øy'ajtin; ²¹ jøts ¿ti jade'en tøm xpøkti? Mdatsø'ødyundip ja ixyam jadigojk, pø ja'ayixi ja yajkpy ja o'jkin tigø'øyin. ²² Kuts tøm mniwa'achidi ja pøky jøts ja Dios y'øy'ajtin tyiy'ajtin tøm xpadøjkiyidi, yø' tiy myiktu'undip, yø' mmo'ojidip sudso xmøø'tettit sudso xmidu'undit amuum ja Dios, jøts xpaattit x'ejxtit ja juky'ajtin xemikøjxp. ²³ Ja o'jkin tigø'øyin, ja' ja pøky ja'ayi yajkpy. Kuts ja Dios møøt, ja juky'ajtin ja Dios xamay'ajtimp midi xemikøjxp yikpatp, ku møøt n'ejtin ja nwindson'ajtim Jesucristo.

7

Amajtsk'ajtingøjxp tu'uk ja ejxpajt madya'aky pyidsimy

¹ Mee migu'uktøjkti, meets mnija'wip sa ja kutujk wya'añ, jøts mnija'wip jøts ku ja ya ja kutujk tmøø'taty ja møk'ajtin ku jaa'y jaagya yjuky'attinim.

² Ku n'ukpiktaajkint, ku tu'uk ja tømxyøjk y'amajtsk'aty, kutujkøjxpts ja tmøø't'amajtsk'aty ja ñiyaa'y pøni jaakjuky'ajtpnim ja'; kuts ja y'øøky ja ñiyaa'y jøts ja nayide'en ja kutujk ñiwa'achi, ku y'øøky pøn ja y'lity møøt y'amajtsk'aty. ³ Kuts ja tømxy jadu'uk yaa'dyøjk t'adsøy jam ja ñiyaa'y yjajuky'atynim, pøkyts ja tyumpy; kuts ja kyu'øøgyi, niwaajtsip ja kutujk ja', øy ja møøt jadu'uk ja yaa'dyøjk y'amajtskit, jøts ka'ap ja pyøkyi.

⁴ Jade'ents mee migu'uktøjk idø'ønmididi pøni niwne'en ja Cristo mja'atyidi, myikniwa'ats'ajtniyip meets ja Moisés kyutujk, tøxi mee ñamyayi ku'øøky mdañ ku ja pøky tøm wyindigøy jøts ja wenkpi xpadøkidi. Ja Cristo meets ixyam

mja'ajtniyidip pøn juikpyøjk xemikøjxp, ja'agøjxp ja yjajty jøts jade'en'ampy nmidu'unindit ja Dios. ⁵ Ku adøm y'ijty pøky y'agujkp ndsinaa'yimmimdi, jøts ja kutujk ja' ja wya'añ jøts ja tyikjinaxy adøm ja nga'øwysinmaa'ñ, ku ja ngabadu'uñindi jøts ja niti nitso'ok'ajtin xkadukjøp'ijxyindi. ⁶ Ixyamts tø xniwaaajchim ja'abi kutujk, tø ja ñamyayi ngu'ø'jkyim jøts ja tø xuk'ixmajchim ja myøk'ajtin; jøts adøm tø n'awa'atspidsø'omyindi, tu'ugyits nmidu'unint ja Dios jøts ja y'Espiritu Santo ja jemy juiky'ajtin xukmi'ejtint midi xemikøjxp, jøts ka'ap ja'abi møjaa'gyutujkin x'uk'ana'amnandit midi y'ijty nbadu'uñindip.

Ja pøky midi xmi'ejtp

⁷ ¿Wa'aním jøts ku ja kutujk pyøkyi? ¡Ka'ap! Ku jeexyip ja kutujk kya'ity, ka' øts jeexyip nnijawi ti pøky'ajtp, ku ja jeexyip tkanigajpxy kudam ja pyøkyi ku ja nmigu'uk pyikta'aky njanchpøkwa'anxant. ⁸ Ja'agøjxpts ja pøky tø myøjtøki jøts ja myøj'aty. Pøni sa ja kutujk yja'ane'emy jade'ents øts ja nnijawi midi'ibi ka'øy, jøts øts ja jinaxy nduñ sam øts y'ijty nga'adi'ich ku øts ja kutujk nganjawinim. Ku ja kutujk kya'ity, ka'ats ø nnijawi midi pøky. ⁹ Tø øts jade'en njaty ku ja kutujk ka' nnijawinim, tøøp ø njawi n'adi'ich, ka' njawi ja pøky. Kuts ø tø nnijawi sa kutujk y'ane'emy, jøts øts ja nbøky njawi yjaaktyimyajadak'adi'ich, jøts øts ja kawindem paadyim xuk'ijxy ja øy'ajtin ja kunuu'kxin. ¹⁰ Wimbet øts ja nduñ sa ja yja'ane'emy, midi'ibik øts idø'øn xukpaatp ja øy'ajtin, tø øts ja ne'egi xyikpøkyety. ¹¹ Ja pøky ne'egi nanmkyøjtøkiyip pøni sa ja kutujk y'ane'emy jøts øts ja win'øø'nin tø xmo'øy. Nay ja kutujk øts jadigojk xanikajpxp ja o'jkin tigø'øyin.

¹² Ja kutujk, øy ja', jøts øy wa'ats yikutuky nayide'en, øy'ajtingøjxp tiy'ajtingøjxp yikutuky. ¹³ Jøts pøni øy tam ja kutujk, ¿sudsøts øts ja xpayø'øy, jøts øts ja ñamyayi xuk'ejxni ja o'jkin tigø'øyin? Jøts øy ja kutujk, ja pøky øts jade'en xyik'ejtnip øøky tigøy, ka' ti jøp'ejxin, jøts øts ja jade'en xuknijawi jøts ku ja y' pyøkyi; tamibøki midi øy, jøts øts ja kutujk jade'en xuknijawi jøts ku ja pøky ni sudsø'ampy kya'øyi.

¹⁴ Jøts nnija'windip adøm jøts ku ja kutujk Dios tja'aji. Jøts pøjkpitumbijaa'y'ajtp øts, jade'en'ampy øts ja pøky xmimajada'aky. ¹⁵ Ka' øts nja'gyuki pø ti ø xjajtp, tum jiwimbejts ø nduñ, kuts ja njatunwa'añ midi øy, ja kya'øybi øts ne'egi xmimajadakp midi njagatunwampy. ¹⁶ Kuts øts ja nduñ ja ka'øybi midi njagawampy, jade'engøjxp nnijawi ku ja kutujk y'øyi, ja'abi kutujk ka'axi tyikutuky jøts ja'abi ndu'unint. ¹⁷ Kidi øtsip ja kø'øm ñamyayi jade'en ndyimyjatumpy, ja pøky jade'en adøtsp midi ø nnikøjxp'ajtpy. ¹⁸ Nnija'wip øts sa jaa'y'ajtin yikjagyepy, niwine'en ja ka'øy'ajtin kyayik-møødi; njatsøky'ajtpy øts jøts ja øybi ndu'unt, ni ka'apts øts ja nduñ. ¹⁹ Ka' øts ja øybi tsujpi nduñ midi njatsøjkpy, tum ja ka'øybi ø ndun'adichpy midi njagatunwampy. ²⁰ Kuts øts idø'øn ja nduñ jade'en midi ø ngatsøjkpy, ka'ap øts ja kø'øm ndsøkyøjxp nduñ, pø ja pøkxyi øts ja jade'en xuktump midi ø nnikøjxp'ajtpy.

²¹ Jade'en njaty ngubety, ku øts ja njatunwa'añ midi øy midi tsuj jøts tum ja ka'øybi ø ndumpy. ²² Wamp øts n'am njotp jøts ku øts ndsojki ja Dios kyutujk; ²³ kuts ø kø'øm nnay'ijxyi, jøts ø njawi jøts ku ja jaa'y'ajtin ka'ap jade'en ttsøky sam ø njawinmay, ja pøkyts idø'øn xuktump midi ø nnikøjxp'ajtpy, jøts ja' ø xkamajstutp jøts ja øybi ndu'unt.

24-25 Ja Dios øts ndagødøjkip ja nwinmaa'yin jøts øts nbaduujnit ja kyutujk, jøts øts ja njaa'y'ajtin ja' ja y'adsinaapy ja pøkyu'unin, ja' ja mimajadaajkip. iTi ø njanch'ayøøy! ¿Pøn øts ja pøky xukniitso'ok'atp mididi øts jam nikøjxp'ajtpy, mididi øts xyik'ookwamp xyiktigøøwyamp? Kuuyi Dios amuum, nwindson'ajtim Jesucristo køjxp yikpaaty ja nitso'ok'ajtin ja'ayi. jJanch møj ja Dios!

8

Ja juky'ajtin mididi Dios xmøø'yimp

¹ Pøn tmøøt'ejtipp ja Jesucristo ka'ap Dios Teety ja mibaat tyaguwaniyidit jøts ja y'ayo'odit, kumi ka'ap ja t'ukyikmøj t'ukyikmøjtøjkiñidi ja pøky. ² Ja Espíritu Santo mididi tyajkp ja juky'ajtin xemikøjxp ku nmøøt'ejtint ja nwindson'ajtim Jesucristo, ja' øts ja pøky tø xukniwa'ach mididi øts øøky tigøy tø y'ity xyik'ejtnip. ³ Jade'en'ampy ja kutujk y'ijty kyamajada'aky ku adøm n'ambojkipitu'uñim nadsaachpøjkpitu'uñim. Tøts ja Dios Teety tkexy ja y'U'nk, jøts ja nayide'en tnanky'ijxyi sam ja jaa'y'in, jøts ja tku'o'jki ja pøky. Xjats ja tømimajada'aky jade'en'ampy ja pøky, jøts adøm ja ka'ap x'ukmimajadaajkna'am. ⁴ Ja'agøjxp ja jade'en tøm tuñ jøts adøm ja kyutujk ja wa'ats nbaduujna'am, pø ja'ayixi adøm ja Espíritu Santo yja' nbawinmaa'jyam, jøts kidi kø'øm winmaa'ñip adøm nyikmajadaajkim.

⁵ Pøn kaniwaajtsipnim ja pøky, ja' yjotmay'ajttip sa kø'øm wyinmaydi; pønts tpaduujnidip ja Espíritu Santo yja', nay Diosts chøky'ajtin ja ja'ayi pyaduujnidip. ⁶ Jøts ku jade'en njotmay'ajtin sa kø'øm nwinmaa'yin, yø yjade'embidi dø'on yikwindigøøpy; kuts njotmay'ajtin ja Dios yja', ja'ats xukpaajtimp ja juky'ajtin xemikøjxp, jøts ja øy'ajtin mididi Dios yajkpy. ⁷ Pøn ja kø'øm winmaa'ñi tyiktundip sa kø'øm wyinmaydi, ja Dios ja jade'en myidsepøjktip kumi ka'ap Dios kyutujk ja ttojkidi, jøts nika'ats tja'atmididi sa tpadu'undit. ⁸ Paty idø'on pøn ja'ayi ttundip ja kyø'ømwinmaa'ñi mididi pøkmjøøt, ka'ap Dios ja mibaat jade'en twindsø'ogidit.

⁹ Jøts meets, kumi ka'ap meets x'ukyiktuni ja mgø'ømwinmaa'ñi, ja Diosts meets ja y'Espíritu Santo mjagyajpip, ja' mee myikjuky'ajtniyidi, pø ixamxi ja xnikøjxp'ajtnidi. Pønts tkayiktuujnip ja Espíritu Santo, ka'ap Cristo ja yja'atyi nayide'en. ¹⁰ Pøni mmøøt'ejtidipts meets ja Cristo, øøky windigøyts ja pøky ñamyayi ñøjxni møøt ja mnine'kxiti, jøts ja anmija'win ne'egi yjujky'aty ja'agøjxp ku ja Dios tøm mgupikyidi. ¹¹ Pøni mjanchmøøt'ajtidipst ja Dios Espíritu Santo, mididi ja nwindson'ajtim Jesucristo ojts jadigojk xemikøjxp yikjuykpyiky, nay ja Diosts meets ja mnine'kx kø'øm yikjuykpyøkip, jøts jadigojk xemikøjxp mjuky'attit.

¹² Jøts xpaat'ajttindip adøm, migu'uktøjk, jøts ka'ap njuky'ajttindit pøky agujkpy mididi tjuktump ja kø'øm winmaa'ñi. ¹³ Pøni mdunwandipst jade'en sa ja pøkyu'unin, øøky mee m'ejtni, kudigøy mee m'ejtni; pøni m'ajot'ajttipst ja Dios Espíritu Santo jøts ja xukmimajada'akti ja mbøky, mjuky'atpsts meets jade'en xemikøjxp.

¹⁴ Ja' ja Dios Teety y'u'nk'ajtpy pøn ja Espíritu Santo ja tyukpudøjkip jøts ja wyinmaa'ñi ja tyiktøøji tyiktudaajki. ¹⁵ Ku myikmo'odi ja Espíritu Santo, kidi ja'ajip ja myiktanimøø'yidip jøts meets tsø'øgi jawi myik'etidit, pø ja Espíritu Santoxi meets ja Dios mmøøjyidip jøts m'm'nk'atidit ja Dios, jøts ja' idø'on xyikwa'anindip amgujuk jotkujuk ku adøm ja ndeety'ajtyim. ¹⁶ Ja'abi Espíritu Santo majada'kp, jøts adøm ja tu'uk amumjoojt xukjanchja'want jøts ku adøm

ja Dios x'u'nk'ajtyindi. ¹⁷ Ja' adøm xja'ajtidip, paty adøm nayide'en ja Dios xmø'øyindit ja juky'ajtin midit ja tøm twanda'aky, midit ja xmøøpwy'a'nindip. Midit ja Cristo yikmøøpy, nay ja'ats adøm yikmø'øyindip. Pøni ngupøjkyindip adøm ja ayo'on sã ja tøm y'ayø, winets adøm ja nay ja'abi øy'ajtin xukpaajtin midit ja yikmøø.

¹⁸ Kidi nayide'enip ja' sã adøm ixyam ja ayo'on nbaajtyindi, ka'ap ja jade'en tmi'abaaty midit dø'øñ Dios kyunuu'kxin'ajtpy, midit dø'øñ jaanim nbaajtidip n'ejxindip. ¹⁹ Tuki'iyi midit ja Dios tøm tyikøjy, yjanchja'awejnip ja nayide'en juuninim yja'att ja et ja xøøw ku ja Dios tyiknigaxø'økt pøn jaty ja y'u'ngip, pøn jaty ja yja'ajtpy. ²⁰ Nayide'en amuum ja naxwii'nit tøm y'ayo'ombaaty Adãn pyøkyøjxp, kidi kyø'ømdsojkingøjxpip ja naxwii'nit ja jade'en yjaty, ja Dios ja jade'en tøm tyanibiktaagiyi; yikmøøpyts ja jøp'ijxy'ajtin jøts ja øy juuni ja øy'ajtin jadigojk tpaatt, ²¹ jøts ja Dios ja yiktigajtsmийit amuum, nay ja'abi øy'ajtin tpaatt midit ja jaa'y yikmø'odip pøn jaty ja Dios u'nk'ajtidip, jøts ja ñiwa'adsit nayide'en ku ja tøm pyøkyety, ku ja tøm wyindigø. ²² Jade'en ixyam yjaty ja naxwii'nit midit ja Dios tøm tyik'øyi, sam tu'uk ja tøm øxyøjk y'amnipiky chaachnipiky ja y'u'nk ku kye'exy, amuum tmigii'pxy tmbø'øty. ²³ Jøts kidi ja naxwii'nip jade'en ja'ayi tyimyjajtp, nayide'en adøm njajtma'an ku adøm tøm ayo'on nbaajtyim, øy adøm ja Dios ja y'Espiritu Santo tøm xmø'øyim ejxpajt'ajtin, ja'agøjxp ku xjaaktukpaatwa'añimnimdi midit paat'ajtyidip pøn jaty ja Dios u'nk'ajtidip. Njantymyjøp'ijxy'ajtyindip adøm, jøts ku øy juuni yja'att ja xøøw ku adøm ja Dios amuum xja'ajtidit ejxim tu'uk ja u'nkteedyin, jøts ja xyiktigajtsa'ant ja nne'kx. ²⁴ Janchja'wingøjxp ja'abi nitsojkin yikpaaty; kuts ja janchja'win yikmøø'ty, ja idø'øñ tyijpy ku adøm n'awijxyindinim midit ngapaajtyindipnim. Jaa ku ja jeexyip yikmøø'ajtni, ¿tits idø'øñ jaakyik'awexp? ²⁵ Kuts adøm idø'øñ jade'en njøp'ijxyindi midit kayikmøø'yindipnim, yiktudakpy ja tsinaa'yin jøts ja winmaa'ñ ja'.

²⁶ Jøts nay ja Dios Espiritu Santo adøm xpudøjkamp mã nayja'wiyam nduu'dujkyim, ku niti winmaa'ñ, niti aaw, niti ayuujk ngajagejpyindi, jøts ka' ja winmaa'ñ nbaajtyindi sudso nmøøtmadyaajkint ja Diosu'nk. Nay Espiritu Santots køm ja Dios Teety t'amidoop ja pudøjkin sã nduu'baajtin nduu'ejxint, ja'agøjxp ku tjaty sudso øy ja Dios Teety tminuu'kxa'akt. ²⁷ Jøts wa'ats ja Dios Teety xnija'wa'am sã jaty pønjabøn wyinmay, jøts ja ñimadøyi Espiritu Santo sã jaty ja wya'añ ku ja xku'amidoowam sam ja Dios Teety køm ttamidsøky pøn jaty ja yja'ajtpy.

Cristo køjxp nmajadaajkyindi

²⁸ Nnija'windipts ku ndsojkindit ja Dios, yajkpts ja pudøjkin ja' pøni mã jaty sagasa njajtyindi, jøts jade'en tyik'øpyidsimy pøn jaty ja tøm twi'ixy, sã ja jawyeen tøm ttanibiktaagi køm. ²⁹ Tøm ja Dios Teety twi'ixy patki'jyi ja yjaa'y jøts ja tøm twiwich. Tøøyip ttanibiktaagi jøts yjaa'y'attit nayide'en sã ja Dios U'nk yjaa'y'aty, pøn tnyigubajk'ajtp ja jaa'y pøn jaty ja Dios Teety ja'ajtidip, tum uch tum migu'uk ja tjawi niduki'iyi. ³⁰ Pøn ja Dios tøm ttanibiktaagi jade'en patki'jyi, jøts ja tøm twaadsøy; kuts ja tøm ñimiñiyi, jøts ja tøm tkupiky, winets ja nayide'en tøm ttamin'adsøwi ja øy'ajtin amuum.

³¹ ¿Sats adøm ja nwa'anin ndejint? Pø amuumxi adøm ja Dios møøt n'ijtyindi, ¿pønts adøm xnimymajadaajkimp jade'en? ³² Ka'ap ja Dios t'amaa't'ajty ja y'U'nk, kyøyajk ja' jøts ja y'ookt adøm nbøkyøjxp; ¿sudso dø'øñ ja ndejint adøm xkamøøgyøjxint tuki'iyi midit myøø'tajtpy, pøni tødam ja kyø'øm U'nk jawyeen tøm xaniguejxyim? ¿Tiku dø'øñ ja ndejint tkayakt? ³³ Øy

pøn tjani'øøniwya'añ ja jaa'y pøn ja Dios tø wyi'ijxyidi, pø Diosxi ja kø'øm tø kyupikyidi, ³⁴ çpønts ja mibaat nidyanigutujk'atidip jøts ja tpaattit ja ayo'on? Pø ja Cristoxi ja tø kyu'oogiyidi, jøts nay ja'ats tø yjujkpyiky xemikøjxp, Dios Teetyts ja amuum møøt y'lity, jøts ja' adøm jam xni'amido'owamp pøni sa ndyimyajtyindi ndyimgyubejtyindi. ³⁵ Ku xpa'ayø'øyim ja Cristo, çpøn adøm ja xnidyukmajststuujtimp ja pya'ayo'owin? Nipøn adøm ja xkadukmajststuujtint, wan tjati'ayo'oni, øy njajotmay'ø'jkyim, øy njayikjemdu'uñindi njayiktedu'uñindi, wan yuu tja'lity, uk ku wet naamy xka'ejtixindi, uk ku tsep, uk o'jkin tigø'øyin yjayikpaaty. ³⁶ Pø yide'enxi jap nøkyijxpy wya'añ: Ejtp øøts ja jaa'y xyik'ookwa'añ ja'agøjxp ku øø nbaduujni ja mja'; jade'en øøts nyiktuñ sa jiyujk sa borreek y'ookwa'añ.

³⁷ Øy adøm jade'en njajajtyindi, ne'egits adøm ja jinaxy ndyimyimajadaajkyindi ja' myøk'ajtingøjxp pøn ja pya'ayo'owin tø xmø'øyindi. ³⁸ Jade'ents ø nwa'añ jøts ku niti nipøn xkadukmajststuujtint mibaat ja Dios pya'ayo'owin, nja'ø'jkyindi njadigø'øyindi, uk njadyimyajujky'ajtyindi. Ni ja ankilis ja xkadukmajststuujtint uk yjayikutujkpitøjkidi, yjadyimyajaja'ajidi pøn jap tsajpjøtpy uk yjamajidi. Ni ja xøøw ni ja jumøjt mididi ixyam yø'øpy, uk mididi mēmp kidakpniim, nija' adøm ja xkadukmajststuujtint. ³⁹ Wan ti tkøjxpi, uk wan ti tkøjki, wine'en Dios tø tyikøjy niti kyamayi yjade'embidi jøts adøm nmajststuujtint ja Dios pya'ayo'owin, mididi ja tø tyiknigaxi'iky nwindson'ajtim Jesucristo køjxp.

9

Dios ja Israelit jaqy tø wyi'ijxyidi

¹ Tiy janch ø ngajpxy, pø ja Cristoxi øts njanchja'wip, ka'ap ø ndaabyaaty; ja Dios øts y'Espiritu Santo wa'ats xuknija'wip jøts ku øts tiy'ajtingøjxp ngajpxy. ² Janch jotmay'oo'kp øts, ndyimchaachkyuwinma'ayip øts kajaa, ³ jøts wamp øts, øy meets ayo'on patki'py ndyimgyu'ettit jøts ja Cristo ngamøøt'etnit pøni tsojkip jade'en, nugo ku øts nmigu'uktøjk n'ødyuñ jøts xpaattit ja Dios, wine'en ndukojpk'ajtyindi. ⁴ Ja Israelxi ja tyeety'apidip, jøts ja' Dios tø y'a'ejxyidi jøts yjagypedyidi. Jøts ojts ja kø'øm ja Dios kyunuu'kxin t'ejxyidi tnija'wiyidi, jøts ja' ja møøjyidøø ja tiy'ajtin sudso ja jadigojk ñitaniyidit ja Dios. Jøts nay ja' ja ttægøðøjkjyidøø ja Moisés kyutujk, jøts ja windsø'jkin mididi ja tyu'undip jam mā ja chaptøjkti. Jøts nay ja' ja Dios ttukmidajnidøø ja wyanda'aky jøts ku ja y'ødyunidit. ⁵ Tu'ugyi aats kugoj ja'adi pøn jaty israelit jaa'dyidi; jøts nay ja' ja tyeety'apidip pøn adøm ndeety'ap'ajtyindip, nayide'ents ja Cristo, pø adømxi ja' ñamyayi njaa'y, jøts køjy ja'ani ku ja amuum tñitanit ti jaty ejtp naxwiiñ, pø Diosxi ja', windsø'øgi winjawi ja y'lity xemikøjxp. Jade'en idø'øn ja y'ejxi. ⁶⁻⁷ Kidits nwa'añim jøts ku ja Dios tkayik'adukniim ja wyanda'aky mididi ja møjaa'y Israel yiktaniwandaajkøø wine'en y'ap y'ok ja tø ñajtska'axidi. Ka'ap ja Dios ja'ayi tø twi'ixy ja'ayi pøn ja Abraham y'apteety'ajtip; pø yide'enxi Dios ja wyinaty tø ñii'mxyi: "Nayi mets mnigojpk'ajtpy ja Isaac y'u'nk y'una'jkti pøni wine'en ja ñajtska'axidi." ⁸ Jade'ents adøm nnija'wa'am jøts ku Dios ka'ap t'u'nk'aty pøni mā pøn jadu'uk jadu'uk kyugajpi, wan t'israelit jaa'yidi wan tka'israelit jaa'yidi. Ja' dø'øn Dios y'u'nk'ajtpy pøn tjøp'ejxtip ja wyandaajkin. ⁹ Pø yide'enxi ja Abraham ja Dios ñimajjyøø ku ja Dios wyandaajky: "Tiempi køjxp ø nme'ent, u'nkpaatp yø mnidø'øxy Sara."

¹⁰ Jøts kidi ja'ayipts nadyu'ugyi yiktaniwandaajki ku ja y'u'nk ja tpaatt. Jabi nayide'enxi ja Rebeca ja y'una'jk tpaatmaa pøn ja Isaac tyeety'ajti,

adom ja ndeety'amøj. ¹¹⁻¹³ Jøts ka'aním ja wyinaty yjaja'atiním, kidy-imkya'axtipnim ja wyinaty, ka'aním ja wyinaty yiknijawi sa ja y'adø'øtstit øy ka'øy, jøts ja Rebeca ja Dios ojts ñii'mxyiyi: "Ja myøjpi tmidu'ump ja myutskpi." Nayide'ents ja møøt tuknaø tify ku wya'añ ja Dios kyajpxy: "Nwinja'wip øts ja Jacob, jøts Esaú ka'." Xjats ja Dios jade'en xuknija'wa'am jøts ku ja kø'øm twi'ixy kyø'øm dsojkingøjxp pøni pøn ja y'a'ejxip. Ka' tmøjpi ktaajkiyi ja y'ødyu'unin kya'ødyu'unin.

¹⁴ ¿Tits adom ñikyajpximp? ¿Ti ja adom nwa'anint jøts ku Dios ka'tyiy'adi'ich? ¹⁵ Pø yide'enxi ja Moisés yiknimaaay: "N'ayo'ejxp øts ja' pøni pøn ø kø'øm n'ayo'ejxwampy, pøni pøn ø kø'øm nba'ayoowampy." ¹⁶ Jade'en'ampyts ka' chøkyi jøts adom ngø'ømwinmaa'ñ ndamajadaajkint, pø ja Diosxi kø'øm x'ayo'ejxindipnim. ¹⁷ Pø patyxi ja Dios kyajpxy wya'añ ku Dios tnøjmi ja jaa'y pøn windsøn'ajtp jam Egipto: "Ja'agøjxp møj windsøn tø nyikjaty jøts øts ja nmøk'ajtin nyikwingaxi'iky ku mets nmimajada'aky, jøts øts nxøøw o madsoo yiknijawit." ¹⁸ Xjats idø'on jade'en ja Dios t'ayo'ixy pøni pøn ja y'ayo'ejxwampy, jøts ja twinmaa'mbyiky pøni pøn ja kyayik-madogukiwiyampy.

¹⁹ Winets meets idø'on x'adsojimbett: "Pøni janch ku yjade'eni, ¿tigøjxp Dios tpøky'ixy ja jaa'y? Jøts ¿pønts mibaat t'ukwindso'op ja Dios?" ²⁰ Jøts jaa'yts adom, jøts ¿jaaktyimbyøn meets ku meets Dios yja' xkagupøjkit? ¿Ti ja ja tu'jts tnimaañit ja ñijaa'y pøn ja tø yik'øyi: "¿Tiku øts jade'en tø xyik'øyi?" ²¹ Pø ja tu'jtsna'abixi kø'øm pajtip pøni sa ja kø'øm tyik'øyi wya'añ ja na'aknaajx; øy ja tyik'øyt ja tu'jts tu'uk midí øy midí tsuj jøts ja tu'ugyi ttanibiktaagi ti ja wya'ant, uk øyts ja nay ja'abi naajx tna'at jøts ja tyik'øyt jadu'uk ja tu'jts midí øy ti ñi wya'ant.

²² Ku ja Dios tmidani jøts tmiduda'aky'aty ja jaa'y pøn ja tø yikjotma'adyi, pøn tyimyjapaajtniyidip jøts y'ayo'odit uk jøts ja tyimgyudigø'ødyit, ti ja kamaa'niyip, ixø ja ayo'on ja ttuktagida'aky jøts ja myøk'ajtin ja jade'en tnanky'ejxit. ²³ Ots ja Dios jade'en ttuun, ka'ats adom ja jade'en tø xuu'ñim, ja'agøjxp ku adom ja xpa'ayo'øyindi jøts tnanky'ijxy jade'en mabaat ja tjagyepy ja myøk'ajtin, jøts ja t'ayo'ijxy pøn ja patki'jyip tø twi'ixy jøts ja ttukpaatwa'añ ja y'ø'y'ajtin. ²⁴ Tø ja Dios kø'øm xwi'ijxyindi, ku ja winaaagin twi'ijxy ja israelit jaa'y, jøts nayide'en winaaagin pøn ka'israelit jaa'dyi. ²⁵ Sam ja Dios ja kyajpxy ttamigaxiyi'ñ ja kyugajpxy Oseas, ku ja wya'añ yide'en:

Pøn øts y'ity ngaja'ajtp, ja' øts nja'bøkp,
pøn øts y'ity ngatsojktip, ja'ats ø ndsoktip.

²⁶ Nay jam et ja xemijujkpyi Dios ja kø'øm yja'bøkidit ma ja yikni maadyøø:
"Meets, ka' mee nja'aty."

²⁷ Kuts ja israelit jaa'dyi, pø yide'enxi ja kugajpxy Isaías wya'añ: "Øy ja Israel mabaat ja y'u'nk y'una'jk yjamøjidi yjamayidi sam nøø'abu' myayin, niwinaagints ja'adi pøn nitso'ok'attip, ²⁸ jabi ka'pxy ja Dios ja y'ayuujk tpadu'unt sa ja tø wya'añ, ku ja tyiknaxkida'akt adsu'jky ja tiidyu'unin ya naxwiin." ²⁹ Sam ja Isaías wyinaty jekyip tø wya'añ:

Ku ja Dios jeexyip tø tkayiknitso'ok'aty winaaagin ja aats ja kugoj midí yikojpk'ajtp,
tø adom jeexyip jade'en njajtna'am sa Sodomit kajp sa Gomorrit kajp ku ja tø kyudigøgyøjxti.

Sa israelit jaa'y tka'øyjawidi ja øgyajpxy ja ømyadya'aky

³⁰ ¿Tits adom ngajpxindip? Yjanchja'wingøjpxxi Dios ja tø kyupikyidi pøn ka'israelit jaa'dyi, yam ja y'ity tkajotmay'atti sa Dios ja kyupøkidit jøts ja

ne'egi tō kyupikyidi. ³¹ Jøts ja israelit jaa'y, pøn ja kutujk tpadundip jøts ja jeexyip ja' ja Dios tyagupikyidi, ka'ap ja ne'egi yikupōkti ja'agōjxp ku ja kutujk ka'pxy tkabadundi. ³² Ka'ap ja twinmaydi jøts ku Dios ja tyagupōkidit ja janchja'win, ja' Dios ja tity tagupōkidip ti jaty ja tyundip. Ja'ayi ja tyamōjti, ja'agōjxpts winguwopi jōpkuwopi tmajatti ku ja nwindson'ajtim tō myiñ. ³³ Jade'en yjatti sam yiknigajpxy mā jap nōkyijxpy wya'añ yide'en: Nyikaxō'ōkp øts jam Jerusalén tu'uk midi ja jaa'y nay'adsepi yjawip jøts ka'ap ja pøn myayit; pøni pøn ja tjanchja'wip, ka'ap ja windigøy yjatt.

10

¹ Møk øts, migu'uktōjk, ja tsojkin njagyepy jøts øts ja Dios n'ajot'aty, jøts ø n'amidøy nbøktsøy jøts ja israelit jaa'y tnisso'ok'attit. ² Jade'en ø nwa'añ jøts ku ja tjatsojkti ja Dios, jade'en'ampy ku ka'ap tjatti. ³ Ka' tmajawidi sudso Dios tkupiky jaa'y; kyø'omgutujk ja' yiktundip, ja' ja tity tagupōkidip ja Dios, ni tkamōjpikta'akti ja' midi Dios ja tagupōkidip. ⁴ Pø ja'agōjxpxi ja Moisés kyutujk kya'uktuni, pø ixaanixi ja Cristo jøts tum ja'ats ja Dios kyupijxpy pøn ja tjanchja'wip.

⁵ Jøts ku Dios ja kutujk xagupōjkint, pø yide'enxi ja Moisés ja tjaay: "Pøni pøn tpadunwamp ja kutujk, ka'pxy tpadu'unt winets yikjujky'attit mā Dios." ⁶ Jøts ku Dios xkupōjkin janchja'wingōjxp, yide'enxi ja wya'añ: "Kidi mwā'andi: ¿Pøndam nōjxpx tsajpjōtpy? —jøts ja Cristo mye'ent—; ⁷ jøts ni mgawa'andit: ¿Pøn jap nōjxpx mā ja o'jkin?" —jøts yjujxpyøkt ja Cristo xemikōjxp. ⁸ Pø ka'axi yjade'eni, pø yide'enxi ja wya'añ: "Ka'ap yjagami ja nitso'ok'ajtin, ixa ja xmøødidi wingon", ku xjanchjawidit sa ja øgyajpxy ømyadya'aky mduknijawiyidi midi øø ngajpxwa'kxpy. ⁹ Ku mwā'andit jøts ku ja Jesús ja' nwindson'ajtim'ajtyindip, jøts xjanchjawidit amumjoojt jøts ku Dios Teety ja tō yikjujxpyiky xemikōjxp jadigojk jap oo'kpi y'agujxpy, winets xpaattit ja nitso'ok'ajtin. ¹⁰ Ja' ja Dios xagupōjkimp ku ja amuum njanchja'want, jøts ku n'am njotp pyidsø'omint ja ayuujk, jøts nwa'anint jøts ku ja Jesucristo ja' nwindson'ajtim'ajtyindip, ja' xyiknitso'ok'ajtindip. ¹¹ Pø yide'enxi jap nōkyijxpy wya'añ: "Pøni pøn ja tjanchja'wip, ka'ap ja windigøy yjatt." ¹² Tu'ugyi nwindson'ajtim ja tnitani, wan t'israelitjaa'yidi uk wan ja tka'israelitjaa'yidi; ka'ap ja pøn t'ejxma'aty, myøøpy kyejxpy ja kyunuu'kxin pøni pøn ja t'ajot'ajtp, may'ampy ja tmø'øy. ¹³ Jabi yide'enxi wya'añ ja kyajpxy y'ayuujk: "Pøni pøn amumjoojt ja nitso'ok'ajtin t'amidoop nwindson'ajtimōjxp, ja'ats nitso'ok'attip." ¹⁴ Kuts ja pøn tkajanchjawidinim, ¿sudots ja t'amidojdit ja kyunuu'kxin? ¿Sudso ja tniyanchjawidit ku ja jeexyip kyayiktumadowdinim pøni pøn ja', ku jeexyip kya'ity pøn ja nidyukmadowidip ja øgyajpxy ja ømyadya'aky? ¹⁵ Pønts tkajpxwa'kxp ja øgyajpxy ja ømyadya'aky, ¿sudso ja jeexyip tnikyajpxwa'kxti ja øgyajpxy ja ømyadya'aky ku Dios ja jeexyip kyakexyidi? Pø patyxi jap nōkyijxpy wya'añ: "iNdxondaajkimp ja jaa'y pøn tkajpxwa'kxp ja Dios y'øgyajpxy y'ømyadya'aky midi xukmado'owimp ja øy'ajtin ja tuda'aky'ajtin!"

¹⁶ Ka'apts jaa'y niduki'iyi tmōjpikta'akti ja øgyajpxy ja ømyadya'aky. Jade'en ja ttundi sa ja kugajpxy Isaías tniyajpxy ku ja wya'añ: "Dios Teety, ¿pøn ja m'øgyajpxy ja m'ømyadya'aky yjawi tō t'ukjanchjawi?" ¹⁷ Winet ja janchja'win yikjagyepy ku ja tō nmado'øyim jawyeen ja øgyajpxy ja ømyadya'aky midi ja Cristo nigajpxip.

18 Ti kuts ø nyiktø'øt, jøts ø nwa'ant: ¿Wan ndefint tø xkamadowdi ja øgyajpxy ja ømyadya'aky? ¡Pø tøxi xjamadowdi! Jabi ja'agøjpxxi jap nøkyijpxy yide'en wya'añ:

Tø ja øy madsoo yikmadowdi pøn ja tø tkajpxwa'kxti, tø ja øgyajpxy ja ømyadya'aky øy madsoo yja'aty ya naxwiñ.

19 Uk nwa'ants øts inet: ¿Wan Israelit kajp ndefint ti tkanijawidi? Jøts tøts ja Moisés ja Dios tyuknigajpxyi ku ja wya'añ:

Mdami'ama'at'atp meets ja wenk jaa'y ja nitso'ok'ajtin pøn kanayide'endi sa meets,

pøn tkanija'widip, ja'agøjpx meets ja xami'ambøkt.

20 Jøts ja Isaías ja Dios yjaaktyimyikwa'animy yide'en:
Pøn øts y'ijty xka'ixaadyip, tøts øts ja ne'egi ixyam xpaatti;
tø øts ne'egi nnanky'ijxyi pøn øts y'ijty xkanija'widip.

21 Jøts ja Isaías ja Dios yjaakyikwa'añi ku ja tñigajpxy ja israelit jaa'y: "Tø øts kawine'en njawaadsøy ja jaa'dyi pøn kawindiy'oo'ktip, pøn niwine'enin kamadoodip."

11

Ja Israelit jaa'y pøn winaagin tpattip ja nitso'ok'ajtin

1 Jøts ø nyiktiidyøki: ¿Tø ja Dios tyimyjatstu'uty ja Israelit kajp, ka'ap ja t'ukupøjki? ¡Pø ka'axi! Israelit jaa'yxi øts køøm, tu'ugyi ja Abraham yik'aadi yikojpki, ja Benjamín ø ndeety'apip. 2 Jekyip ja Dios yø tja'biky yø israelit jaa'y; jøts ixyambaat tkamajstu'uty. ¿Ti ka'ap meets ja Dios kyajpxy y'ayuujk xnija'wiyi, ku yiknimadya'aky ja Elias, pøn ja Dios kyugajpxyip, ku ja ojts Dios t'ajot'aty jøts Dios ja ojts ttukmadøy sa Israelit jaa'y y'adø'øtsti? Ku ja wya'añ yide'en: 3 "Dios Teety, tø mgugajpxy yik'oo'kixyidi, tø yikjejtixy mǎ jaty myikwindsø'øgi, nadyu'uk øts njaaktañ, jøts xyik'ookwandip øts nayide'en." 4 Jøts Dios ja ojts yide'en y'adsøyi: "Tø øts abiky niwixujk mil ja jaa'y nwi'ejxti, pøn tkawinguxanaadyipnim ja awanax midu Baal yiktejp."

5 Nayide'ents idø'øn ixyam yjajtkojmi, ja winaagin pøn ja Dios tø wyi'ijxyidi, pøn ja køøm tø ttanibiktaagi y'ø'y'ajtingøjpx. 6 Ti tundaajk ja jaa'y øy ti pøn t'atuñ jøts tpaattit ja nitso'ok'ajtin, pø ja Diosxi tanibiktaajkip køøm jøts ja tyik'awa'añ ja myøk'ajtin y'ø'y'ajtin. Ku jeexyip jade'en køøm ja' yiktamajada'aky, jade'ents ja jeexyip tpaaty jøts ka'ap ja Dios y'ø'y'ajtin ti niwya'añ.

7 Xjats ja israelit jaa'y jade'en winaagin tkapaatti sa y'ity yjawinmaydi, tømts ja tpaatti ja ø'y'ajtin pøn ja Dios køøm tø wyi'ijxyidi, jøts jaayi jadu'uk wimbeets kugoots tmijatti, ni tkaja'gyukiyidi ja Dios yja'. 8 Jøts idø'øn ja jade'en yjaty sa jap nøkyijpxy wya'añ: "Dios ja køøm tuujnidip jøts ja kyadukjawayidi sa y'adø'øtsti; ja win'ejxtip jøts ka' t'ejxpaatti, jamadoodip jøts ka' yja'gyukidi jøts jade'en ixyambaat yjatti." 9 Jøts nayide'en ja David ja Dios yikwa'anmiyi:

Wan ja'ayi ttajotkøxti ja xødu'unin ja miga'ayin mi'uujkin, jøts nay ja'ayi tyapøkpyattip jadigojk jøts ja yiktagubattit.

10 Wan t'etti wimbeets kugoots jøts kyaja'gyukidit, jøts ja xemikøjpx yiktagubattip.

Sǎ nitso'ok'ajtin tpaatti pøn ka'israelit jaa'dyi

11 ¿Ku dø'øn ja israelit jaa'y jade'en ja Dios tø tyuñidi, tø ja tyimwyindigøøgyøxti? ¡Pø ka'axi! Øy idø'øn ja tø kyamadowdi, tøts ja yjadu'ukpi tpaatti ja nitso'ok'ajtin pøn ka'israelit jaa'dyi, jøts ja tpa'ejxtit,

jòts ja nayide'en ja janchja'win tjagyaptit sa pòn ka'israelit jaa'dyi. ¹² Ku ja israelit jaa'y jawyeen kò'òm tò tkagupòkti ja Dios y'òy'ajtin ja'agòjxpts ja tò yikmo'odi pòn ka'israelit jaa'dyi, jòts ja jade'en'ampy pyaat'atyidi ja Dios yja'. Kuts ja israelit jaa'y jadigojk tmiotjimbejtøkxtit ja Dios, ¿ja ti ka'ats ja naxwii'ñit jaa'y ja kunuu'kxin nayide'en jawaani mõj tpaattit?

¹³ Nyiknaxwampy òts nayide'en aaw ayuujk, jòts ø ndukmadoowa'andi meetsti pòn ka'israelit jaa'dyi. Pø meetssi tò nyiktaniguexy ku òts ja Dios tò xkexy, jòts xnijawidit jòts ku òts ja ngajpxwa'kxin ka' ñiñugoji. ¹⁴ Kidi wanik jade'en winaagin ñitso'ok'atti ja nmi'israelit jaa'dyi ku mba'ejxidit nayide'en sa mee xpaaty ja nitso'ok'ajtin. ¹⁵ Jabi jade'enxi ja naxwii'ñit jaa'y tò tpaatti ja nòø' ja tuu' sudso ja Dios myaa'kxujkin tpaajtedit, ku ja Dios tò t'ats'ejxma'aty ja israelit jaa'y. ¿Tiits idø'øn tyimyikpatp ku ja israelit jaa'y ja Dios jadigojk t'awimbetedit? Ja nitsoojkin idø'øn ja jadigojk pyatp pòn windiy'ejtndidip. ¹⁶ Ku ti t'ukja'biky ja Dios, amuumts ja tja'ajtkixy. Pøni myi'ijtpy ja ujts'aats ja ujtskojpk ja', nayide'ents inet ja tmi'ett amuum tuki'iyi mõøt y'awaj y'axeefi.

¹⁷ Jade'ents idø'øn ngajpxin ja israelit jaa'dyi sa ja kipy awaj midì ja olivo kipy y'awaj'ajtpy, jòts meets jade'en pòn ka'israelit jaa'dyi sa jadu'uk pa'olivo kipy y'awaj midì ñiñugo øy ma ujtsøøjtjy ejtp. Kuts ja yikajt-spøøty midì ja israelit jaa'y kipy'ajttip ndejint, jòts meets ja mja' ne'egi jam yikø'øoch ma dø'øn jam ja jadu'ukpi awaj tò wyinaky. Jòts meets ja jade'en xpaat'aty ja jujky'ajtin midì xemikøjxp, tu'ugyi ja m'aats mgøjpk ñamyayi y'etti. ¹⁸ Ka'ats mnadyamikaxidit, kidi xuktamøjidi xuktamutskidi ja israelit jaa'y pòn ñamyayi ixwejtsidip ja Dios. Pøni m'adø'øtswandip jade'en, jawidi jòts ku nayi israelit jaa'y ñikøjxp idø'øn ja nitso'ok'ajtin tò mnimiñidi, kidi mgø'ømnikøjxpiti.

¹⁹ Mjawa'añ meets: "Janch jade'enimts, tòts ja yjiwa'akti jòts øøts ja ixyam ngudanaañip." ²⁰ Jade'en'ampyts ja yik'ixwetsti ku tkajanchjawidi ja Dios, jòts meets myikupiky jade'engøjxp ku ja xjanchjawidi. Kìdits mnamyikexyidi, øyim yikxonim tuda'aky mnabyikta'agit. ²¹ Pø m'ejxtipxi mnija'widipxi ku Dios ja israelit jaa'y ja tkadamee'kxy, jòts nayide'ents meets ja mgadamaa'kxmiyit ku jade'en m'adø'øtstit. ²² Jòts m'ejxtip mnija'widip jòts ku Dios janch øy, jòts tum ja tiy'ajtin yiktumpy. Møk ja ttiiduyø' pøn ja midundigøjyip. Mmi'øy'ajtipts meets ja', jòts tu'ugyi xpayø'oyidit ja y'òy'ajtin; pøni ka'ap jade'en xpadundi, nayide'ents nøjkk mjatti sa ja israelit jaa'dyi. ²³ Kuts ja israelit jaa'y jadigojk tmiotjimbettit ja Dios jòts tjanchjawidit amumjoojt, kupøkidip ja jadigojk jòts ja jujky'ajtin myo'ojidit midì xemikøjxp; tyu'ump ja Dios jade'en, ti ja ka'ukmajyip. ²⁴ Sa meets ja tò mgupiky, jòts ka'ats meets mja'israelitjaa'y, jòts tòts meets ja mmø'øyi ja nitso'ok'ajtin, iti kuts ja israelit jaa'y kyayikupøktit, pø ja'axi ja y'ity tyimyjapaat'ajtidip!

Ku Israelit jaa'y ñitso'ok'attit xemikøjxp

²⁵ Meets migu'uktøjkti, ndukmadoowandip ixyam jòts xnijawidit sa Dios ja wyinmaa'ñi tmøø'aty, jòts ka' nugo mnay'agajpxidit jòts ku meets wijy'ajtin amuum xmøøt'ajtkixy: tò Israelit jaa'y ñamyayi y'amutski. Ejtpnim ja jade'en kunim ja yikupøktit namay pòn ka'Israelit jaa'dyi. ²⁶ Ku nøjkk jade'en tò y'ukjaty, winetnimts ja Israelit jaa'y ni'ijtyi ñitso'ok'attit, pø patyxi jap nõkyixpy yide'en wya'añ:

Kaxø'økp tu'uk ja Israelit jaa'y, ja yiknitsokpi, jòts ja' ttukniwa'ats'atp ja jaa'y ja ka'øybi pøn jaty ja Jacob t'aadsidip tko-jpkidip.

²⁷ Jòts ngajpxy n'ayuuujk øts wyinaty jade'en nyik'adujkpy,

ku ɔts ja nyikpɔkwa'atstít.

²⁸ Pɔn israelit jaa'dyi, pɔn tkagupɔjktip ja ɔgyajpxy ja ɔmyadya'aky sudso ja nitso'ok'ajtin yikpaaty, ejxma'jtniyidip ja Dios ja ñamyayi jɔts meets ja mgunuu'kxyi; ka'a'pts ja Dios ja tyimy'ixmachidi, tsojkidip ja' ja'agɔjpx ku ja Dios kɔ'ɔm tɔ twi'ixy ja mɔjaa'dyɔjk. ²⁹ Pɔ ka'axi Dios ja jadigojk tpiky pɔni ti ja yajkpy; pɔni tɔ ja twi'ixy ja jaa'y, ɔsudsots ja nugoyi t'ixmatst jadigojk? ³⁰ Meetsxi ja Dios y'ijty mga'ukmimadɔɔpy, kuts ja israelit jaa'y ja tɔ tkamimadowdi, xjats meets ja Dios tɔ m'ayo'ijxyi. ³¹ Jɔts ja nayide'en yjatti sɔ meets y'ijty xkamimadɔyin ja Dios, ja'agɔjpx ja jade'en ttuñ jɔts ja jadigojk t'ayo'ext nayide'en sɔ mee tɔ myik'ayo'ijxyin. ³² Ja Dios jade'en kɔ'ɔm tɔ ttanibiktaagi jɔts ja niduknɔx kyayikmimado't, ja'agɔjpx ja jade'en ttuñ jɔts tɔ pɔngapɔn tuknɔx ja ttuk'ext ja pya'ayo'ajtin.

³³ ¡Ka'ap jade'en ti tmi'abaaty sɔ ja Dios ja ɔy'ajtin tjagyepy, sɔ ja wijy'ajtin, sɔ ja ja'gyukin tmɔɔdi! Ka'ap pɔn tmiwinmaa'nbyaaty pɔni sɔ wyinmay, pɔni midi tyunwampy, mɔ ñɔjkwɔ'añ yja'atwa'añ. ³⁴ “¿Pɔn tniñija'wip sɔ ja Dios wyinmaa'ñ? ¿Uk pɔn ja tyukjaty jɔts ja jade'en ttu'unt? ³⁵ ¿Uk pɔn ja Dios jawyeen ti tɔ tmɔ'ɔy, jɔts ja ja' ttaguyaki midi ja xmɔ'ɔyimp?” ³⁶ Tum ja Dios amuum tja'ajtkɔjpx jɔts ja' tyik'ɔyigyɔjpx, jɔts ja tyiktunwa'añ pɔni ti jaty ja tɔ tyik'ɔyi. ¡Kunuu'kxy etpyim ja Dios xemikɔjpx! Jade'en idɔ'ɔn y'ejxi tyiyi.

12

Midi chɔjky ja Dios ku ja nnadyagɔdɔjkant

¹ Kɔ'ɔm mee migu'uktojk ja Dios amuum mnadyamiyoxit. ɔy'ajtp jɔts jade'en xu'undit midi ja y'ɔyja'wip kyunuu'kxyja'wip, ja' ñamyayi mdawindsɔ'ogidip ja Dios. Ku ja x'ayo'ijxyindi, jade'en mee nminuu'kxa'aky jɔts jade'en xu'undit. ² Kidi jade'en mdsinay'adɔ'ɔtsti sɔ xuktu'uñin ja kɔ'ɔmɔgutujk, ja kɔ'ɔmwinmaa'ñ. Mijotjimbetti ja Dios jɔts ja mwinmaa'ñ nayide'en tyigatstít, winets ja jujky'ajtin xpaattit midi amuum myiktigatsidip jɔts jade'en xnijawidit midi ja Dios chɔjky, ja ɔybi ja tsujpi midi ja Dios mda'ɔyja'wiyidip, midi ɔy wa'ats pidsɔmp.

³ Yide'en ɔts ja Dios xanigutujk'aty y'ɔy'ajtingɔjpx, jɔts ja' mee ndukmadɔɔpy, kidi nugo mnadyamɔjpikta'agyidi pɔni ti jam jadu'uk jadu'uk yjajty. Pɔni mabaat ja Dios kɔ'ɔm tɔ mdukjatyidi, ja' mja'gyukidip. ⁴ Ka' nduknɔx'ajtyindi, nayide'en sɔm ja nine'kx yikjagyepy may jɔɔjp yikmɔɔdi, jɔts ka' tum ja' wya'añ pɔni ti tu'uk wya'añ, ⁵ nayide'ents adɔm idɔ'ɔnmidi, ɔy adɔm mabaat njamaya'am, tu'ugyits adɔm ja Cristo xja'ajtyindi, jɔts nixem niyam ni'amuki n'ijtyindi sɔ kɔ' teky tkamajststu'uty ja nine'kx.

⁶ Kija' ja Dios xyikwinmaa'nbyaajtyindi pɔni sɔ ja kɔ'ɔm ttamidsɔky nidu'uk jaty. Wants tyiktunkpaajtyindi ɔy yikxon. Pɔni tɔ Dios xmɔ'ɔyim ja wejin kajin jɔts ngajpxnaxa'ant ja y'ayuujk midi ja tɔ xmɔ'ɔyim, ndu'unindipts ja jade'en pɔni mabaat ja janchja'win xukjagyepjyindi; ⁷ jɔts pɔni tɔts ja xmɔ'ɔyim ja wejin kajin jɔts ja nmigu'uk nduujna'ant ja y'ɔybi, mbadu'unindipts idɔ'ɔn ja jade'en. Jɔts pɔni pɔn ja Dios tɔ myɔ'ɔyi jɔts yik'ixpɔkt, ja'ats idɔ'ɔn ja tyu'ump; ⁸ jɔts pɔni jamts pɔn tɔ yikmɔ'ɔy jɔts tkajpxjot'amɔjkit ja myigu'uk, ja'ats idɔ'ɔn ja tyu'ump. Pɔni jamts pɔn ɔy ti yajkwɔ'añ, ka'ap kyɔ'ɔmwinmaa'ñ tyikyɔ'ɔty jɔts ja ja' ttaguyakit ɔy ti. Pɔni jamts pɔn yikmɔɔpy jɔts ja tnɔɔ'mo't ttuu'mo't ja myigu'uk, yikxonimts t'ext tuda'aky'ampy; jɔts pɔni pɔn tpudɔjkidip ja ayooobi jaa'y pɔn ti ka'ejtxidip, ejtni xoni dɔ'ɔn tpudɔkidit.

Sa pyaqt'aty; ttu'undit pøn ja Cristo yjanchja'widip

⁹ Nabya'ayowidi nixem niyam. Yikjiwa'akti ja ka'øybi, jøts tundi ja' midi øy midit tsuj, midit ja Dios kyupiky'ajtpy. ¹⁰ Yik'awa'andi ja amigu'uk'ajtin jøts nixem niyam mnamyayidit wine'en Dios mja'atyidi, nawyindsø'øgiyidi nixem niyam, kidi pøn xkamøj'ejxti.

¹¹ Jotmay'atti ja Dios, kidi mnuuxidi, amunjoojt xmidu'undit ja Dios.

¹² Taxonda'akti jøts ku ja myikmo'odit midit mjøp'ejxtip; jøts kidi nugo x'ayojidi wine'en mjemjatti mdejatti, jøts kidi x'ixmatsti ja Dios'ajot'ajtin niyuuni.

¹³ Pøni jam ti kya'lijtyxidi pøn ja Dios yjanchja'widip, pudøkidits; øyim yikxon xyikja'attit xyiktsoondit pøni pøn mbaajtidip m'ejxidip mjønjojt mdøjkjotp.

¹⁴ Pøni pøn mga'ødyuunidip, tagødøkidi ja Dios. Jøts amidowdi wan tyikunuu'kxti jøts kidi meets ja jawyeen xka'ødyijy.

¹⁵ Xonda'akti nayide'en pøni xondaktip ja mmigu'uk, tsaachjawidits nayide'en pøni jiidyip yaxtip.

¹⁶ Namyayidi nixem niyam, yikxon mdsøonidit mdanidit. Kidi mnamyikexyidi, møøt'etti pøn ayoobi jaa'y'ajttip. Kidi mwa'andi jøts ku meets nadyu'uk tuki'iyi xjaty.

¹⁷ Pøni tø pøn mga'ødyuñidi, kidits meets ja nayide'en xunwimbejtmidi. Ejtp xu'undit ja y'øybi øy maðsoo. ¹⁸ Yik'amijatti mabaat mmajada'akti, jøts yikxon xmøøtsøonidit xmøøtanidit ja mmigu'uktøk, amuum ja tuda'aky'ajtin xyiktu'undit. ¹⁹ Kidi mee migu'uk kø'øm xagubety ja mmidsep pøni sa ja mduñidi, ja Diosxi kø'øm yik'ayo'ombaaðiditnim; jabi yide'enxi jap nøkyijxpy wya'añ: "Øts xpaat'ajtp jøts øts ja ndiidyu'undit; øts ja ndagubattip, nømpxi Dios." ²⁰ Jøts nayide'en ja wya'añ, jøts ku tijy x'ødyu'undit pøn mmijotma'jtidip, wan ja tka'uknagyumayidi. ²¹ Kidi ja ka'øybi mmimajada'agy, jaa ja xmimajada'akt ku tum ja øybi xu'unt.

13

¹ Mimadowdi ja windsøndøk. Pø Diosxi kø'øm tø tyikutuky jøts ja kudunktøk yja'attit. ² Pøni pønts ja tkamimadoowampy, ja' idø'øn ja wyinaty kyamimadøøpy pøn ja tø tyikutuky jøts ku ja yja'attit. Pønts jade'en adø'øtswamp, pøky ja taja'adidip jøts ja nøjkx yiktidyundi. ³ Jøts kidi ja'ajip ja kudunktøk ñija'ajttip jøts ja t'adsø'øgidit pøn øyjaa'y'ajttip, pø ja'axi ja ñija'ajttip jøts ja tiidyu'undit pøn tundigøødyip. Pøni ka'ats tsø'øgi jawi mnachøkyi jøts jade'en xwingunøjkxi ja kudunktøk, jaa'y'ats yikxon jøts ja kudunktøk niti mgadamatsit, ⁴ pø ja'axi Dios ja tø tyanibiktaagiyidi jøts ja øybi xu'unt. Kuts kø'øm mga'øyjaa'y'att, pøkyjawits mets ja mbøky; pø kidi nugøjixi ja kudunktøk ja møk'ajtin tjagyapti ku ja tyidyundi, pø ja'axi Dios ja tø tyanibiktaagiyidi ku ja tø tyikutuky, jøts ja tiidyu'undit tiy'ajtingøjxp pøn tundigøødyip. ⁵ Ja'agøjxp pyaqt'aty; xmimado'odit ja kudunktøk pøn mwinmaadyipxi, kidi ja'agøjxp ja nugo xundi jøts ja mgatiidyuni. ⁶ Nay ja'axi ja Dios tyikutujk jøts ja kuguju'uyin xmo'odit ja kudunktøk; pø nay ja Diosxi ja tø tyanibiktaagiyidi jøts ja jade'en ja tyajujky'ajtin tpaattit, jøts jade'en mjaaknigudunk'atidyidit.

⁷ Migubajtkøxtits pøni pøn jaty jam mmijoy'ajttip. Pøni jam pøn kyayakñim kyagubetynim, wants ja tyakti; uk jamts pøn ti tkagujyynim tkagubetynim, wants ja tkugujuy tkugubety; pøni pøn jam ja windsø'jkin tyiktigøøpy, wan ja windsø'jkin tjagyepy; jøts pøni pøn jam ja amigu'uk'ajtin tyiktigøøpy, wan

t'amigu'uk'aty ja myigu'uk. ⁸ Ka' ti pøn xamiyoj'attit, ja tsojkin ja pa'ayo'owin ja' idø'øn tiy xem yam mjagyaptip; ku jade'en xu'undit, ja kutujkts meets idø'øn wyinaty jade'en tø xnimadøy. ⁹ Pø nømpxi ja Dios y'ana'amin: "Kidi mnidø'øxy kidi mniyaay'y mnabyøjkxiyidi, kidi myikjaa'y'øøky, kidi mmeech, kidi mdaay'aty, kidi xami'ama'at'aty ja mmigu'uk pyikta'aky"; jøts tuki'iyi ja Dios y'ana'amin tu'ugyi ja yide'en y'ayuujkpidimsy: "Mba'ayo'op ja mmigu'uk nayide'en ejximdam kø'øm mnabya'ayøyin." ¹⁰ Pøn ja tsojkin, pøn ja pa'ayo'owin tjagyajp, ka'ap ja tmidundigøy ja myigu'uk; jade'en'ampy ja Dios tkupik'atkixy ku ja tsojkin nyiktu'unint, jøts jade'en niwine'en ja kutujk kyayikmidundigøy.

¹¹ Jøts tø tymbyaaty ja et ja xøøw, tajotigøyyidi ja Dios yja'. Tyimwyingomp ja ayo'on winets xpaattit amuum ja nitsø'ok'ajtin. Nax'adøtsp ja et ja xøøw, ka'ap y'ity jaakjade'en ku njanchja'wiy'okwa'añindi miduk'oijk ja Dios y'øgyajpxy ja y'ømyadya'aky. ¹² Ka'pxnip ja et ja xøøw, tyimdyukmibaat'ajtpy ja Dios; wants tmajstuuityindi ja ka'ødyu'unin ja pøkyu'unin, jøts jøp'ijxy nnanky'ejtna'andit, tum ja øybi wa'atspi nyiktu'unindip midu kapøkmyøøt. ¹³ Wan tuda'aky tjaa'y'ajtna'andi sam pyaat'aty pøn tnija'widip ja Dios. Jøts kidi ja' ndunk'ajtyindi ja nøø ja mu'uk, uk ja pøjp ja tsa'pxp, nmiga'ayin nmi'uujkin, uk nnamyøøt'atwa'añindi øy pøn møøt, uk ja tsep ja' njot-may'ajtyimp, uk ndami'ama'at'ajtyindip ja nmigu'uk øy ti. ¹⁴ Kidi jade'en m'adø'øtsti, tu'ugyi nwindson'ajtim Jesucristo xpadu'undit sa ja ya chinaay, jøts kyamøjtøkidit ja mbøkyu'unindi.

14

Kidi mmigu'uk xpagajpxy

¹ Pøni jam pøn myajada'aky kyamajada'aky yjanchja'wingøjxp, kupøktits, kidi sa xeiti, øy ja wyinmaa'ñ yjaganayide'endi sam meets ja mja'ajin. ² Ja may pøn tjøø'kxtip øy ñityi, jøts nayide'en pøn amaay'ejttip, pøn nugo un'kjii'kxy tsujxkjii'kxy ttojxktip, jøts wya'andi jøts ku ja' chøkyi Dios wyingujkp. ³ Pønts tjøø'kxp øy ti, ka'ap ja tka'øyjawa'it pøn amaay pøn wi'ijxy øy ti tjøø'kxp; jøts nayide'en ja'ami, ka'ap ja pyagajpxmit, ka'ap ja sa ttejmit pøn øy ti tjøø'kxp, pø tøxi Dios ja kø'øm kyupikyiyi, ⁴ jøts ja'ats midundip. ¿Mjaaktyimbyønts meets ku meets ja xpagajpxt, yamts ja Dios ja tmiduñ? Wan ja t'øyi uk tka'øyi, ja wyindsønts ja paajtip pøni sa ja kø'øm tyuñi. Jøts yik'øyip ja', çti Dios ka'ukmajyip ku ja tka'ukyik'øyt myøk'ajtingøjxp?

⁵ Jøts jaa jadu'ukmidi pøn wandip tu'ugin ja xøøw yik'amaay'att, jøts jadu'uk wyamidi ku ka' pyaat'aty ni midu xøøw kyayik'amaay'att, tum jade'en ja xøøw tu'ugyi. Kija'ats tñitanidit ja wyinmaa'ñ tigøjxp ku jade'en wyinmaydi. ⁶ Pøn t'amaay'ajtp tu'uk ja xøøw, ja Diosts ja tyawindsø'jkkip; jøts pøn tka'amaay'ajtp, nay ja Diosts ja jade'en wyindsø'jkinmo'op. Jøts pøn tjøø'kxp øy ti, nay ja Diosts ja tyukmøja'wip tyukunuu'kxyja'wip; jøts pøn amaay'ajtmidip, ka' ti tñiyji'kxy, nay ja Diosts ja tyawindsø'jkkip ku ja jade'en ttuñ, jøts ja ttukmøjawi ttukunuu'kxyjawi amuum.

⁷ Ka'ap pøn nugo ñiyujky'aty, ka'ap pøn nugo ñiy'øøky. ⁸ Ku njujky'ajtyindi, Dios xyikujky'ajtindip, jøts pøni o'jkindipts, nay ja'ats xkwenti'ajtindip. Jøts jade'en yikñijawi jøts ku ja amuum xja'ajtyindi øy adøm njajuiky'ajtyim, uk nja'ø'jkyim njadigø'øyim adøm. ⁹ Pø ja'agøjpxxi ja Cristo yjujky'ajtyim xemikøjxp ku ja tmimajadaajky ja o'jkin, jøts ja tu'ugyi ixyam tñitanaagyixy øy midu'ibi.

¹⁰ ¿Tigøjxpts ku mee kò'òm ja mmigu'uk xabayø'øy sà y'adø'øtsti? Jøts ni xkatsokti paat meets ja'. ¿Pønts xijy ta'amp, pøn kanaxp jam Cristo wyingujkp? Pø ja'axi xabayø'øyindip ja nbøky, ja' xiidyu'unindip. ¹¹ Pø yide'enxi jap nøyijxpy wya'añ:

Øyi maðsoo n'ity, jøts øts nwingujky niduki'iyi jaa'y kuwani ñaguyendyakøxidit.

Jøts wya'andit ku øts ja'ayi tu'ugyi ndios'aty.

¹² Jade'ents idø'on, kija' idø'on ngøyajkindit jam Dios wyingujkp pøni sà nidu'uk jadu'uk tønjaa'y'ajtyindi ya naxwiiñ.

Ka'ap ja nmigu'uk nyikwinmaamya'jtindit

¹³ Paty ka'ap nnabyagajpxandit nixem niyam. Ne'egi ja' n jotmay'ajtindip sudso ja nmigu'uk ngayikpøkyajtindit. ¹⁴ Tumwa'ats nwindson'ajtim Jesús tøn tanibiktaagi, ka' ti nugo kò'òm tyimiykøkyety; kyø'ømwinmaa'ñ ja' pøn nømdip jøts ku øy ti kya'øyi kyawa'ads. ¹⁵ Jøts ku ja jii'kxy midikayik'ødeyep kayikwa'atstejp nnadyabagajpxandit nugo, ¿ti pya'ayo'owints jade'en njageyepyindip? Paty ka'ap pyaat'aty jøts ja nyikmøjindit pøni ti ja nmigu'uk yjii'kxyindip, jøts jade'en ngaduk'ayoojindit ja nmigu'uk, jøts ka'ap ja yjanchja'win kyudigø'øty. ¹⁶ Kidi ja' xun midiyjawi ja mdsinaa'yin ja mjanchja'win yiktabagajpxp. ¹⁷ Kidi ja kaagyip jii'kxyip xagupøjkindip ja Dios mā ja kyutujk amuum ttanitani ja yja', pø ja øchinaa'yinxi ja chøjkpy ja tuda'aky'ajtin ja xondaajkin midit ja Espiritu Santo xmø'øyindip. ¹⁸ Pøn jade'en tmidump ja Cristo, ja' Dios chøjkpy jøts øyja'wiyip ja jaa'y ja'.

¹⁹ Wants tjaaknija'wa'andi sudso nbaajtindit ja tuda'aky'ajtin midit nyiktu'unindip jøts ja nnadyabudøjkandit nixem niyam, jøts jade'en myøktajkindit ja njanchja'win. ²⁰ Kidi ja ngø'øm ja' adøm nugo nyikmajadaajkindip, jøts adøm ja Dios yja' ngayikmøjtøjka'andit. Øy ni midit jii'kxy yjagayikpøkyety, jade'en ne'egi pyaat'aty jøts ja' xkajøø'kxtit midit ja mmigu'uk kya'øyja'wip jøts ja jade'en xkayikpøky'a'at. ²¹ Ne'egi øy'atpsts ku ja tsu'uch ka' xtsu'utsttit, uk xka'uuktit ja vino, uk xkatu'undit o ti, nugo ku ja mmigu'uk xkayikwinmaa'nmya'atti, nugo ku kyapøkyatti jade'en'ampy jøts kyatuu'tigø'ødyit. ²² Dios ja ja'ayi mduknija'wip pøni sà mets ja mwinmaa'ñ xyikyø'øy. jJotkujk ja jaa'y pøn kyabadumpy midit ja pyøkyja'wip! ²³ Pønts tjøø'kxp øy ti majtsk aaw majtsk joojt, kò'ømts ja ñankpøkyetyi ku ja tjii'kxy, kumi ka'ap jotkujk tjii'kxy; jøts ti jaty kayiktump jotkujk'atyim, pøky ja'.

15

Ja' mdu'ump midit ja mmigu'uk tya'ødyøkip

¹ Pøn jaty nøk tjagyajtpit ja janchja'win, xpaat'ajtindip adøm jøts nbudøjka'andit pøn ja yjanchja'win tu'ugyi tkamøøt'ajtpnim, jøts kidi adømyi kò'øm nnabya'ayø'øyindi. ² Nidu'uk jaty adøm xpaat'ajtyindi jøts ja nd-abudøjka'am midit ja ødyunidip jøts ja yjanchja'win myøjtø'aktit. ³ Pø ni ja Cristoxi ojts kò'øm kyanabya'ayøyi, ne'egi ja yjaaktyimyjajty jade'en sà jap nøyijxpy yide'en wya'añ: "Tum øts ja tøn xaja'atkixy sà jaty ti jaty myayikta'ødyundip ngayikta'ønimaadyip." ⁴ Pø ja agøjxpxi ja Dios ja kyajpxy tñankyjajyøø jøts adøm ja nnija'wa'an ti jaty ja ñigajpxpy ja y'ixpøjkin, ja'ats adøm ja xmø'øyimp ja kajpxjot'amøki jøts tuda'aky ngupøjkindit o ti ayo'on, jøts tu'ugyi ja awejx'ajtin yikmøøt'att ku yikpaatt ja xemikøjxpit

jukjy'ajtin. ⁵ Ja Dios Teetyts adøm xyikmajadaajkimp o ti ayo'on jøts ja xkajpxjot'amøjka'an. Wants ja mbudøkiyidi jøts mdsøønidit mdanidit yikxon nixem niyam, sam nwindson'ajtim Jesucristo tñajtsu'uni, ⁶ jøts tu'ugyi ni'amuki xja'byaattit xkajpxpaattit ja Dios Teety pøn ja nwindson'ajtim Jesucristo tyeety'ajtpy.

Ku ja Dios y'øgyajpxy y'ømyadya'aky yikajpxwa'kxy ma jaa'y kya'israelit jaa'yidi

⁷ Nagyupøkidits nixem niyam, kidi sa mnadyijyidi mnawya'añidi, nagyupøkidi nayide'en sam adøm nwindson'ajtim Jesucristo tøkupiikyindi Dios Teety wyindsø'jkin wyinja'wingøjxp. ⁸ Pø israelit jaa'yxi ja Cristo ñimimpy jøts ja tpudøkit, jøts jade'en ja Dios Teety ja wyandaajkin tyik'adujkit midu ja mōjaa'dyøjk wyinaty tøkamawanda'agidi. ⁹ Jøts nayi ñimeen ja' pøn ka'israelit jaa'dyi, jøts ja tjā'byaattit tkajpxpaattit ja Dios ku ja pya'ayøyidi jadine'en, pø yide'enxi jap Salmos nøkyjøtpy wya'añ: Nja'byaätp mets ngajpxpaätp mets øy ma naajx øy magajp, ma jaty ja jaa'y chøøni pøn ka'israelit jaa'dyi, jøts n'øø't jøts nxu'uxt mets windsø'jkingøjxp.

¹⁰ Jøts nayide'en wyami ja Dios kyugajpxy: Mxonda'aktit tuknax pøn ka'israelit jaa'dyi møøt ja israelit jaa'y pøn ja Dios ja'ajtiyidip.

¹¹ Jøts jap abiky ma jap wyami: Mōja'wimyidi kunuu'kxyja'wimyidi ja Dios ni'ijtyi pøn ka'israelit jaa'dyi, kajpxwa'kximyidi ja myøk'ajtin o magajp.

¹² Jøts yide'en Isaías tyukjadya'anmiyøø ja Dios: Ja Isaí ñikøjxp pyidsø'ømt pøn ñiwindsøn'ajtmip pøn ka'israelit jaa'dyi; ja' ja tu'ugyi tyamiguy'ejxtip ja ñitso'ok'ajtin.

¹³ Wan ja Dios mmø'øyidi ja xondaajkin ja tuda'aky'ajtin, midu xukjøp'ijxy'ajtindip ja kyunuu'kxin ku ja njanchja'wint, jøts jade'en ja ajot'ajtin tu'ugyi mdukm'i'etidit Espiritu Santo myøk'ajtingøjxp.

¹⁴ Migu'uktøjkti, jade'en ø nwa'añ jøts ku meets amuun xjagyepy ja nadyamiyoxi'ajtin jøts ja nijawi'ajtin. Wa'ats ja xnijawidi, jøts n'a'ejxip øts jøts ku xjatti jøts nixem niyam mnagyajpxwejidit. ¹⁵ Ja'agøjxp mee ndanijayi ya'at nøky, jøts ndukja'myatstit tu'uk majtsk ja møj winmaa'ñ midu paat'ajtiyidip ja yikxon ja'gyukin. Tø øts ja Dios xanipiky y'øy'ajtingøjxp jøts øts jade'en ngajpxwejt. ¹⁶ Ja' øts ndamidumpy ja nwindson'ajtim Jesucristo ku øts ngajpxwa'kxi ja y'øgyajpxy ja y'ømyadya'aky ma ja jaa'y kya'israelitjaa'yidi jøts ja tpaattit ja nitso'ok'ajtin. Ja'ats øts ndagøðøjkip ja Dios, wan tñatjøk'atyiidi jøts kyupøkidit ku yikpøkwyā'adsidit ja Espiritu Santo.

¹⁷ Ku øts jade'en nmiduñ ja Dios Teety, xondaap øts jøts øts ja møk ndukmøjawi ndukunuu'kxyjawi, ku øts njanchjawi ja nwindson'ajtim Jesucristo. ¹⁸ Ka'ap øts ti nugo ñikyajpxy midu øts ja Cristo kø'øm xkaduktump xkadukpatp jam jaa'y agujkp pøn ka'israelit jaa'dyi, jøts tmimado'odit ja Dios. Tø dø'øñ jade'en tyimyjaty, tø dø'øñ jade'en tyimykmadøy sa ø nnigajpxy, ¹⁹ ku tñank'ijxyi ja myøk'ajtin, tyikaxi'iky ja ejxa'an, tyikaxi'iky ja milagri'ajtin, jøts jade'en yik'ixy yiknijawi ja Espiritu Santo myøk'ajtin. Jade'ents øts nnigajpxkixy øy madsoo ku ø ngajpxwa'kxi ja Cristo y'øgyajpxy y'ømyadya'aky midu nitso'ok'ajtin xukpaajtin, nwidity ø Jerusalem uk nja'aty øts jambaat Ilríco etjotp. ²⁰ Ja' øts ndajotigøøpy jøts øts jade'en ja øgyajpxy ja ømyadya'aky tø ngajpxwa'kxy, midu tñigajpxp ja nitso'ok'ajtin, ma niwindii kyayiknimadøynim ja Cristo xyøøw, jøts ka'ap øts nay ja'abi kajp tø n'anøjkxi

ma jadu'uk ja jaa'y jawyeen tō tyiktso'onda'aky ja Cristo y'ixpøjkin. ²¹ Jade'en øts tō nduñ sã ja Dios kyajpxy y'ayuujk wya'añ: Ja' ja ne'egi ejxiyip ni jawiyip pøn ja niwindii kamadobaajtipnim, jøts yja'gyukidip ja ne'egi pøn ja niwindii kanimadoodjidipnim.

Ku ja Pablo ttanibiktaagi jøts ñøjkxt Roma

²² Ku øts ja ngajpxwa'kxk ngayiktsojk'abaadi, ja'agøjxp meets tō nga'ajts'ixy, tō øts kawinaak ojk nja'ukniwinmayi jøts ø nnøjkxt ma meets jam. ²³ Tøts øts ja ndunk y'abaadi yam ya'at etjotp ma øts yam, jøts jekyip øts njaniwinma'ayini jøts mee nninøjkxt. ²⁴ Yamnimts øts inet jam n'uknaxt ku ø nnøjkxt jam España jøts mee n'uk'ext, jadya'ts øts jam wyinaty xpudøkidi, jøts øts jam nja'att ma øts idø'on nnøjkxwa'añ. ²⁵ Jerusalén øts ixyam nnijxxy, pudøjkin øts nyiknijkxpy jøts øts ja ngømo'owa'andi pøn jaty jam Dios ja'ajtidip, adøm ja nmøøtjanchja'wibidi. ²⁶ Ja' tō tyikmukti meeñ pøn tsinaadyip jam Macedonia jam Acaya, jøts ja ttanigaxti ja ayooobi jaa'y pøn tsinaadyip jam Jerusalén, adøm ja nmigu'uktøjkti pøn ja Dios ja'ajtidip. ²⁷ Tø twinmaydi jøts ku jade'en y'øyi jøts ja jade'en ttu'undit, pø tøxi ja israelit jaa'y ja ñamyayi y'ayo'ijxyidi ku ja tyukpaat'atyidi ja Dios; xjats ja nayide'en pyaat'ajtmiyidi, jøts ja ttbudøkidit ja israelit jaa'y ti jaty ja iiy yjagyajtpit. ²⁸ Kuts øts yø n'uktun'abaadit ku øts ja wyinaty tō ndagødøkidi ja pudøjkin, winets ø ndsoont jøts ø nnøjkxt jam España, uk naxpts øts jam ma meets jam. ²⁹ Jøts wa'ats ø nnijawi jøts ku øts ja Dios amuum ja kyunuu'kxin xbudøki, jøts øts ja Cristo ngajpxwa'kxit ja y'øgyajpxy ja y'ømyadya'aky ku øts jam nøjkx nja'aty.

³⁰ Tundits migu'uktøjk ja may'ajt nwindson'ajtim Jesucristo køjxp jøts Espiritu Santo pøn xukja'wimp ja tsojkin ja pa'ayo'owin, jøts meets nayide'en mnadyamiyoxidit øts ndunkjøjpp, ku meets ja Dios x'amido'ot ja may'ajt jøts ø xpudøkit. ³¹ Amidowdi ja Dios wan øts x'agø'duky x'axajtuky, jøts kidi myajada'akti ja jaa'y pøn tkagupøjkti ja nwindson'ajtim yja' jam Judea, jøts nayide'en x'amido'odit jøts ejtni xoni tkupøktit ja pudøjkin pøn tsinaadyip jam Jerusalén, pøn ja Dios ja'ajtidip, midi øts yam ndaninøjkxwandip, ³² jøts pøni yikajtpy Dios jøts øy jotkujk nja'att ma meets jam, jøts øts jam n'ukpoo'kxt. ³³ Diosts mjagyapidip pøn amuum ja øy'ajtin xondaajkin tyajkp. Jade'en idø'on ja yjatt.

16

Ku ja Pablo tkajpxpø'kxy ja myigu'uk pøn jam Roma

¹ Mjaty'ejxtip ja Febe, adøm ja nmøøtjanchja'wibi pøn tump jam tsaptøjkjotp jam Cencreat kajpjotp. ² Kupøkti ja' yikxon, tundi may'ajt Dios køjxpit sam pyaat'aty, pø tu'ugyixi ja Dios yikjanchjawi. Pudøkidits jøts xmo'odit ti jaty jam ka'ejtxip, tō ja may'ampy xjanchpudøjkandi, øts paat ja kø'øm tō xpudøki.

³ Kajjxpoo'kxti nayide'en ja Priscila møøt ja Aquila, pøn tō nmøøtundi jøts øøts ja Jesucristo yja' nyikyø'øyi. ⁴ Ja'agøjxpti øts ixyam njujky'aty ku ja kyø'ømjujky'ajtin ja o'jkin jøp'am tpiktaktøø, nugo ku øts ja'ayi jade'en xyiknitso'okti; xemikøjxp øts ja Dios ja ndamøjawit, jøts nayide'en ja ttamøja'wimiyidi niduki'iyi ja nmigu'uktøjk, pøn tjanchja'widip ja Jesús ma jaa'y kya'israelit jaa'yidi. ⁵ Kajjxpoo'kxti nayide'en ja migu'uktøjkti pøn namuykidip jam Priscila jam Aquila tyøjkjotpti. Kajjxpoo'kxidik øts ja nmigu'uk Epeneto, pøn midu'uk tjanchja'wiy'okwaan ja nwindson'ajtim Jesucristo jam Acaya etjotp. ⁶ Kajjxpoo'kxti ja María midi jadine'en tmidump

ja Dios mā meets jam. ⁷ Kajjxpoo'kxidik øts ja nmigugajp ja Andrónico jøts ja Junias, pøn øts møøt tønubxøjktsoønidi; janch'øyjawi ja y'etti sam nayide'en ja Cristo kyudanaabyitøjkti, jøts jawyeen ja ne'egi tjanchja'widi ja Cristo, oojknim øts.

⁸ Nayi mgajjxpoo'kxtip ja Amplias, pøn øts øy møøt namyayi Cristo køjxp. ⁹ Jøts nayi kajjxpoo'kxiti ja Urbano, pøn øøts ojts nmøøtuñ ku øøts ja nwindson'ajtim yja' nduujni, jøts kajjxpoo'kxiti nayide'en øts ja nmigu'uk Estaquis, ¹⁰ jøts nayide'en ja Apeles pøn kawinaak ojk tøn tta-majada'aky ja yjanchja'win Cristo køjxp, øy ja wine'en ja ayo'on yjayik-tanipiky. Jøts kajjxpoo'kxiti nayide'en ja Aristobulo møøt ja y'u'nk ñid'øxy. ¹¹ Kajjxpoo'kxidik øts ja nmigugajp pøn txøw'ajtp Herodión, jøts nayide'en ja Narciso, jøts pøn jaty jam tsinaadyip ja' tyøjkjotp, pøn ja nwindson'ajtim tøn tjanchjawidi. ¹² Jøts nayide'en xkajjxpoo'kxiti ja Trifena møøt ja Trifosa, pøn amuum tmidundip ja nwindson'ajtim, jøts nayide'en ja Pérsida, adøm ja nmigu'uk pøn kawine'en kujk tmiduñ ja Dios. ¹³ Jøts nayide'en xkajjxpoo'kxiti ja Rufo, pøn amumjoojt tjantyimyjanchja'wip ja nwindson'ajtim, jøts kajjxpoo'kxidi ja tyaak nayide'en, jade'en øts ja njawi sam jøts ngø'ømdaagin. ¹⁴ Kajjxpoo'kxiti ja Asincrito, ja Flegonte, ja Hermas, ja Patrobas, ja Hermes, jøts møøt niduki'iyi ja migu'uktøjkti pøn ja Dios yjanchja'widip, pøn jaty ja jam møøtti. ¹⁵ Nayi kajjxpoo'kxiti ja Filólogo møøt ja Julia, jøts ja Nereo møøt ja myiga'axkiixy, jøts ja Olimpas nayide'en xkajjxpoo'kxiti møøt niduki'iyi pøn jaty ja jam møøt, pøn ja Dios yjanchja'widip.

¹⁶ Nadyuknijawiyidi ja kajjxpoo'kxin nixem niyam sa Dios tsoøky. Mdanigajxidip ja kajjxpoo'kxin pøn jaty ja nwindson'ajtim Jesucristo yjanchja'widip øy maðsoo.

¹⁷ Migu'uktøjkti, mjatyimy'ejxtibim pøn yiktseptøjkidip pøn yiktundigøødyip. Ja tsep ja nugo yiknaxkida'akwandip jøts mee mnawya'kxiti, pø ja'axi ja yikma'atwandip mididi meets tøn myiktukmadøy, pø ka'axi ja yjade'eni mididi mee tøn xjaty mididi mee tøn xnijawi, jade'en ne'egi tymbyaat'aty ku xpuwa'atstii. ¹⁸ Ka' yø'øbi jaa'y tmidundip ja nwindson'ajtim Jesucristo, kø'øm yø ñayjotmay'atyidi ti yø ejtxidip ka'ejtxidip, jøts twin'øøndi ja jaa'y pøn tkanija'widipnim, øy ja Dios yja' nadyijyi amyuyj tsaachuyj tmgajjpxti. ¹⁹ Jøts ñija'wip øy pøn sa meets xpaduujni ja Dios yja'; ja'agøjxp mee ndajotkujk'aty. Ja' øts ja'ayi ndsoøjky jøts xwinmaa'ñ'attit sa xu'undit ja tum ja øybi, jøts kidi ja ne'egi mjaakmayidi ja ka'øybi. ²⁰ Jøts ja Dios pøn ja øy'ajtin xondaajkin amuum tjagyajp, tsojk ja nøjcx ja miku' myøk'ajtin tyikwindigøjyi, jøts ja niti majadaajkin tka'ukpatnit meets mwingujky. Paatti ja nwindson'ajtim Jesucristo ja kyunuu'kxin.

²¹ Nayi mdanigajxidipts ja Timoteo ja kajjxpoo'kxin pøn øts møøt nduñ, jøts nayide'en Lucio, møøt ja Jasón, møøt ja Sosípater, øts nmigugajp nmigunaajxti.

²² Nayi mgajjxpoo'kxmidiip ja Tercio nwindson'ajtimgøjxp, pøn øts ya'at nøky ndukjaapy.

²³ Jøts nayide'en mgajjxpø'kxyidi ja Gayo. Ja' tyøjkjotp øts yam ndsoøni, jøts nay ja' t'anuu'kxyajkp ja tyøjk mā ñamyukyidi pøn jaty ja Dios yjanchja'widip. Jøts nayide'en mdanigajxidip ja kajjxpoo'kxin ja Cuarto jøts ja Erasto, pøn ja ya'at kajpmeen ñyachomujkpy.

²⁴ Mo'ojidip ja nwindson'ajtim Jesucristo ja kyunuu'kxin mee niduki'iyi. Jade'ents øts id'øñ ndsoøky'aty.

Ku ja Dios y'ukyik'ajot'ajtni

²⁵ Tmøjə'windits tkunuu'kxyja'windits ja Dios, wan mbudøkiyidi jøts ja mjanchjə'win tu'ugyi amumjoojt xyik'ettit sam mduknijawiyidi ja øgyajpxy ja ømyadyə'aky, sa ja nitso'ok'ajtin yikpaaty midi øts ngajpxwa'kxpy, ja Jesucristo y'ixpøjkin. Jøts ja' yø' midi ja Dios jekñim tønigajpxy, midi ja jeky tøn xkaduknija'wa'am jøts ku ja jayimni jødsnim ja naxwii'ñit cho'onda'aky.

²⁶ Exyamts ja tøn yiknijawinim ku ja kyajpxy y'ayuujk tøn ttukjaadyañ ja kyugajpxtyøjk, sa kø'øm tyikutuky ja Dios Teety xemikøjxpit. Jøts ja tuki'iyi yiktuknijawidi ja kajp ja naajx jøts tjanchjawidit jøts tpaduujnidit ja yja'.

²⁷ iTu'ugyi Dios Teety møj jøts ja' tu'ugyi tnija'widyaapy, wants xemikøjxp ja tkupiky'aty tmadø'yaty adøm ja nwindso'jkin ku ja nja'byaajtindi ngajpxpaajtindi amuum nwindso'n'ajtim Jesucristo køjxp! Jade'ents idø'øn ja y'ejxi tyiyi.

JA MYĪDU'UKPI NØKY MIDI JA PABLO TYANĪGAJX JA CORINTI JAA'Y

Ku ja Pablo tnijayi ja janchja'wibi jaa'dyi pøn jam Corinti tsinaadyip

¹ Øts idø'øn Pablo'ajtp. Tø øts ja Dios Teety xamidsøky jøts øts tø xwaadsøy jøts øts ja Jesucristo ngudanaabyi'att. Møøt ja Sóstenes, pøn nayide'en tjanchja'wip ja Jesucristo, ² ixyam ø nnijayi ja Corinti jaa'y pøn jaty ja Dios Teety tø tnijawidi jøts tø tkupøkti ja chojkin ja pya'ayo'owin møøt ja y'ana'amín Cristo Jesús køjxp. Pø ja Dios Teetyxi meets tø mw'iijxyidi jøts ja amuum xamiyoxtit ja mdsinaa'yindi møøt nayide'en pøn jaty ja tjanchja'wyimidi, pøn jaty tkajpxpatmidip ja nwindson'ajtim Jesucristo, pø tum ja'axi amuki nwindson'ajtyindip nixem niyam. ³ Pajtidi kupøjkidi ja Dios Teety y'øy'ajtin kyunuu'kxin møøt nayide'en ja nwindson'ajtim Jesucristo jya'.

Sa ja kunuu'kxin yikpaaty Cristo køjxp

⁴ Ejtp øts ja Dios Teety ndamøjawi ndakunuu'kxyjawi ku meets ja kunuu'kx'ajtin tø xpaaty Cristo Jesús køjxp. ⁵ Paty meets ja Dios Teety ja møj øy'ajtin janch kajaa tø mmø'øyi jøts øy tsuj xjajtidi uk xnimadyajkidi ja y'øy'ajtin ja kyunuu'kxin ja'agøjxp ku ja Cristo yja' tø xpabøjkidi. ⁶ Tø meets idø'øn ja xjanchyikwindiy sa jaty ja Cristo tø yiknimadya'aky. ⁷ Ku meets jade'en mdsøønit mmo'ojidipts ja Dios pøni ti dø'øn ja ttamidsojpk, ixa mee x'awijxy ja xøøw ja jumøjt ku ja nwindson'ajtim Jesucristo ñanky'ejxpaaðiyit jadigojk. ⁸ Ja Diosts ja møk'ajtin mmo'ojidip jøts tu'ugyi mdsinaa'yin xyik'ettit, jøts wyinaty niti mgayiktaniwanbatti ku ja nwindson'ajtim Jesucristo jya'att. ⁹ Pyadumpy ja Dios ejtp ja y'ayuujk. Ja'ats tø mwaadsøyidi jøts ja y'U'nk xmøøtsinaajyidit, ja nwindson'ajtim Jesucristo.

Ja' ñi'ane'empy jøts tu'ugyi chøønidit

¹⁰ Migu'uktøjkti, nwindson'ajtim Jesucristo køjxp meets idø'øn n'amidøy jøts ka'pxy xu'undit jøts tu'ugyi mdsinaa'yin xpikta'aktit xyik'ettit. Kidi ki'abiky mdsøøni, tu'ugyi winmaa'ñ xmøøt'attit jøts tu'ugyi xmøøt'attit mididi mdajotigø'ødyip. ¹¹ ¿Ti ø migu'uktøjk idø'øn jade'en xyikwamp? Ja'agøjxp øts idø'øn jade'en nwa'añ kuts ja Cloé myigu'uk yø xukmadowdi ku meets jam mnamyijotma'adyidi. ¹² Yide'en øts idø'øn tø nyiktukmadøy ku mee tumdigach ja m'ayuujk; nømbik mum wya'andi: "Øts ja Pablo møøt", jødsik ñømidi: "Øts ja Apolos møøt"; uk nømidipsik: "Øts ja Pedro møøt"; jødsik jam ñømidi: "Øts ja Cristo møøt." ¹³ ¿Sudsøts idø'øn, uk tø dø'øn ja Cristo may ñawya'kxyi? ¿Ti tø meets ja Pablo mgu'oogiyi kruskøjxp? ¿Uk Pablo køjxp meets idø'øn tø mnøbety? ¹⁴ Ngajxajkpy øts ja Dios kuts ja'ayi tø nyiknøbety ja Crispo jøts ja Gayo, meets ja mjaa'y; ¹⁵ jøts jade'en mgawa'andit ku mee tø mnøbety øts køjxp. ¹⁶ Ixa njaakja'myech jadu'uk jøøn jadu'uk tøj kuts ja Estéfanas nayide'en tø nyiknøbety, jøts jade'eñi nipønxi øts jyawi tø njaga'ukyiknøbajtni. ¹⁷ Ja'agøjxp øts idø'øn jade'en tø n'adi'ich ku øts ja Cristo tø xkakexy yiknøbatpi, ja'axi øts ja xaniguexy jøts øts ja jaa'y ndukmado'ot ja nitsoojkin ayuujk, ka'ats øts ja janchkajajtni nnigajpxy sam ja i'xpiky jaa'y myadya'akti, jøts ja Cristo ja y'o'jkin jam kruskøjxp ejtp yikmøjpikta'akt.

Cristo, Dios Teety myøk'ajtin wyijy'ajtin ja'

¹⁸ Ku yjayiknimadya'aky ja Cristo y'o'jkin jam kruskøjxp, løki o'jkin ja jaa'y ja tjeiti pøn tø yiktanibiktaagidi jøts ja øy'ajtin tkapaattit; pønts ja Dios tø tkupøjkidi ja ñitsoojkin ja pya'ayo'owin ka'ap ja jade'en wya'andi, nømp ja wya'andi jøts ku Dios myøk'ajtin jade'en tyiknigaxi'iky. ¹⁹ Pø yide'enxi ja nøky wya'añ midi jap jaabyety ejtp:

Ka' øts ja y'ixpiky'ajtin ja wijy jaa'y nmøjpiktaajkit, jits ka'ap ø ngupøjkit ja ñimado'owin ku øts ja nimadoobi jaa'y xjamigajpxmit.

²⁰ ¿Mats idø'øn ja ixpiky jaa'y tyundi, jøts ja yik'ixpøjkpidi, jøts ja jaa'y pøn tnigajpxtip tñimadya'aktip ti jaty ya tuujnip naaxwiin? Kawejin kakajinxi ja Dios ja tø tyikwimbijty midi ya naaxkijxy yiktejp wejin kajin. ²¹ Wa'ats Dios tnijawi jøts ku ka'ap pøn myi'abaadyiyi ja wijy'ajtin sam ja wijy jaa'y yjawinmaadya'an pøn tkagupøjktip ja'abi winmaa'ñ. Ja' ja ne'egi tyukpaatp tyuk'ejxp ja nitsoojkin pøn ja kupøjkxiyip ja kyajpxy ja y'ayuujk tu'ugyi amumjoojt, øy ja yjadu'ukpi wine'en tja'abaxti ja'abi kajpxy ja'abi madya'aky.

²² Tum ja ijxyimbi ka'ijxyimbi ja israelit jaa'y chojktip, jøts ja griegit jaa'y t'amidomidi ja wejin ja kajin; ²³ ja Cristots øø nnigajpxpy ku ja kruskøjxp tø y'øøky. Nachø'ødyu'uni ja israelit jaa'y ja tjeiti, jøts ja griegit jaa'y ñømidi ku ja kyawej'ajtin kyakaj'ajtin. ²⁴ Ots ja jade'en yjawa'andi, tøts ja Dios twi'ixy ja israelit jaa'y jøts ja griegit jaa'y pøn ja amuum tyamay'ajtpy ja møk'ajtin ja wijy'ajtin Cristo køjxp. ²⁵ Midi ja jaa'y yjanch'uktejtíp Dios ja kyawejin kyakajin, ja' idø'øn ne'egi kamaabyim pidømp; midits tjejtíp kajotmøk'ajtin ja'ats kidi mibaatp pøn myayiyi, yjaaktyimjinajpxy ja tawaani øy wine'en ixpikyjaa'y yjanamyukyidi. ²⁶ Migu'uktøjkti, ejxti nijawidi ku Dios tø mwi'ijxyidi, o meets jam waani pøn janch'ixpiktyi sam idø'øn ya naaxwiin yiktsøky, jøts nayide'en niwaani pøn yikmøjpiktaaktip, uk jam tigati yikta'ejxkapti yjønjojp tyøjkjotp. ²⁷ Tigach ja Dios wyinmaa'ñ, tum ja' ja tø twi'ixy pøn kajotmøjkti jits ja tsø'ødyumbim jyattit pøn jotmøk nayja'widip ya. ²⁸ Ja' ja Dios tø twi'ixy pøn ya naaxwiin niti kayiktamøjpiktaaktip jøts jade'en tyikugøxit pøn jaty møjpiktaajkidip ja jaa'y ja naaxwiin, ²⁹ jøts niti nipøn kyanadyamikaxiyit Dios Teety wyingujkp. ³⁰ Ja Dios Teety idø'øn kø'øm tø ja Jesucristo mdukpaadyidi jøts muki møøt m'ettit; jits nay ja' tø ttuñ jøts adøm ja Cristo ndawejint ndakajint, jøts nay Cristo køjxpts ja Dios Teety xkupijkyindi jøts ja amumjoojt xukmøøt'ijtyindi, jøts ja nitsoojkin xmø'øyint. ³¹ Jabi yide'enxi ja Dios kyajpxy wya'añ: "Pøni pøn nay'agajpxwajnip wan ja nwindson'ajtim tnadya'agajpxyiyi."

2

Ja Cristo kyajpxy y'ayuujk pøn tø y'øøky kruskøjxp

¹ Migu'uktøjkti, ku mee nninijky jøts ja Dios kyajpxy ndukmadoojidi, ka'ap øts ja'abi ayuujk nyiktuuñ midi kanimadooni. ² Tu'ugyi øts ojts ja ixpøjkin nbikta'aky ku øts ja Jesucristo ja'ayi nnijawi, jøts jade'en øts ja nnigajpxy ku ja kruskøjxp tø y'øøky. ³ Janch yik'ayo'owim ngaxi'iky jøts tsø'øgi øts yjawi xjanchyik'oo'knip ku meets jam nninijky; ⁴ kuts mee tø ndamimadya'aky jøts tø nduknijawidi ja Dios kyajpxy y'ayuujk, ka'ap øts wi'ijxpyi ayuujk uk kanimadooni ayuujk nyiktuñ sa ja møj nija'wabidi. ⁵ Ja Dios Espiritu Santo meets ja tø mduknimadøyidi jøts ja Dios tø mbudøkiyidi, jøts meets idø'øn xmibøkt kidi ja wijy jaa'y y'ayuujkøjxpip, pø ja Diosxi myøk'ajtingøjxp.

Dios Espiritu Santo køjxp idø'øn ja Dios Teety ñankñijawiyi

⁶ Tiy idø'øn, janch møj nija'wibim øø ngajpxy ku øøts ja jaa'y nmigajpxy pøn jaty jawaani tø tñija'wiñi ja nwindson'ajtim y'ana'amin. Kidi meets jade'en xja'gyuki ku øøts ja ya'at kajin nyiktuñ sam møj yikutujkpi ya naxwiiñ ttundi, midi tsojk kudigøøñidip. Jabi Diosxi øøts idø'øn kø'øm jade'en xyikajpxp. ⁷ Ja Dios weyejin ja kyajin øøts n'ayuujk'ajtpy midi yu'uch yik'ijtpñim, jøts ja' øøts idø'øn nnigajpxpy ja nitsoojkin midi xemikøjxp ejtp, midi ja Dios yu'uch tø tyik'lity ku wyinaty niti tkayikøjñim. ⁸ Ni tu'ugin ja møj yikutujkpi yø tø tkanimadøy; ka'ap ja nwindson'ajtim Jesucristo ja jeexyip tø tyikruspatti kuk ja tjä'gyukidyøø. ⁹ Jade'ents idø'øn ja tø yjatti sa jap nøkyijpxy jaabyetyi:

Nipønim ja tka'ixy, nipønim ja tkamadøy, jøts nipønim ja tkawinmay pøni ti ja Dios tø ttanibiktaaqi

jøts ja tmo'ot pøn jaty ja chøjkpy.

¹⁰ Adømts idø'øn ja tø xuknija'wa'am pøni ti dø'øn ja tyijpy ku ja Dios Espiritu Santo tø xuknija'wa'am, jaa kuxi ja tñija'wiguixy tuki'iyi, jøts nija'wiyip ja Dios Teety ja wyinmaa'ñ nayide'en pøni sa jaty ja wyinmay.

¹¹ ¿Pøn idø'øn ja t'uknija'wip pøni ti jam y'am yjotp tu'uk jadu'uk ja jaa'y myøøt'ajtpy? Jabi wyinmaa'ñxi ja kø'øm ejxiyip midi ja ñikøjxp'ajtpy. Ja Dios Espiritu Santo nayide'en nadyu'uk tñija'wimiyip pøni ti jaty ja Dios Teety wyinmaa'ñ'ajtpy. ¹² Kidi ja naxwii'ñit winmaa'yints adøm tø nyikmø'øyim pø ja Diosxi adøm ja y'Espiritu Santo tø nyikmø'øyim jøts ja xukja'gyuka'am ja Dios myøjmay'ajtin ja Dios myøjkunuu'kxin. ¹³ Ja Dios Espiritu Santots øø tø xukyikyuyj pøni ti jaty øø nnimadyajkpy, ka'ap øøts ja ngø'øm ixpiky'ajtin nyiktuñ, paty øøts ja Dios tyiy'ajtin ndukmadøy ja jaa'y pøn ja'abi ayuujk ja'abi winmaa'ñ tñimadoojip.

¹⁴ Pøni pøn ja Dios tyiy'ajtin tkanimadoojip, ka'ap ja tkupøkti pøni ti ja Dios Espiritu Santo yjanigajpxpy, nugo ja tijj kawej'ajtin. Ka'ap tñimadøy, kumi ka'ap ja tñijawi sudso ja tjä'gyukit, ja' kuxi ja Dios y'Espiritu Santo tkamøøt'ajtidi. ¹⁵ Pønts ja Dios Espiritu Santo myøøt'ajtpy øy ja tigati tjä'gyukit jøts nipøn ja sa kyanø'ømxit. ¹⁶ Pø nømpxi ja kajpxy jap nøkyijpxy: "¿Pøn idø'øn tø t'uknimadøy ja Dios wyinmaa'ñ? Nipøn kyamayi jøts ja Dios tkajpxwejt." Øy ja yjade'en'aty, ja Cristo adøm ja wyinmaa'ñ nmøøt'ajtyimp.

3

Tu'ugyi øøts ja ndunk ku øøts ja Dios nmiduñ

¹ Kuts mee migu'uk ja Cristo y'ayuujk tø ndukmadowdi, ka' meets jade'en nmigajpxy sam idi'in yikmigajpxti pøn ja Dios Espiritu Santo yja' tø ñadyamiyoxkøjxniyidi, jade'en mee tø nmigajpxy sam ja jaa'y pøn tka-janchja'widipnim, jøts sam yiktukmadowdi ja mutsk una'jk, ja Cristo yja'.

² Tum ja' mee tø ndukyikyuyj midi jajtñi, jade'en mee tø nduñ sami maxu'nk ja'ayi tsejtsk nøø yikmø'øy jøts ka'ap kaaky tojkk; ja'agøjxp ku mee mgamayinim midi tsep sam ja maxu'nk tkagupøkti ja tø'øts kaaky ja tø'øts jii'kxy; nayide'ents meets ixyam ook tigøy m'lity, ka'anim mee mmayi ja tseppi, ³ ja'agøjxp ku nayide'en x'ejxtinim sam ja jaa'y pøn ja Dios y'ayuujk tkanija'widipnim, ku mee mnadyami'ekyi tigati; ku mnamyijotma'adyidi jøts mga'uknamyigajpxwa'anayidi jøts nayide'en mga'uknawyin'ejxwa'anayidi, nayide'en mee xuni sami nugo jaa'y pøn ja nwindson'ajtim Jesucristo tkanija'widipnim. ⁴ Pø kuxi mee mnimy: "Øtsi Pablo møøt", jøts jadu'uk ñømi: "Øtsi Apolos møøt", nayide'en mee m'adi'ich sam idø'øn ja jaa'y pøn ni tu'uk ja Dios kyajpxy tkanija'wip.

⁵ ¿Tymbyøn ja Pablo? jits ¿Tymbyøn ja Apolos? Pø ja Diosxi øøts ja'ayi xumbi'ajtp, nay ja'ats øø tø xyiktunkpaaty jøts meets yja' ja tø xmibøjki. Ja ndunk øø tø nduñ midi øøts ja Dios tø xaguwani. ⁶Jade'en ja tpaaty, øts idø'on ndejint tø nni'ipy ja tømt, jøts ja Apolos ja tø tnøguway jøts tø t'ejx'ity. Jøts ja Dios, ja'ayits tø tyikmxy tø tyikyøn ja tømt. ⁷Ja Dios idø'on tu'ugyi møj, jøts ja' idø'on tuki'iyi tungøjxp, pø ja'axi ja tømt tø tyiktsø'øky jøts niiti ja'adi pøn ja tø tjani'ipy uk pøn ja tø tjanøguway. ⁸Nipønts kyamøji kyamutski øy ja tø yjani'ipy uk øyts ja tø yjanøway, pø ja Diosxi kø'øm ttanipatp ja mijuu'ñ pøni sã ja tyunk ja ya tyikyø'øy naxwiiñ. ⁹Tum tumbi jaa'y øøts idø'on namajtsk. Ja Dios øøts idø'on xumbi'ajtp, jøts meets idø'on mgam'ajtp midi ja Dios yja'ajtpy.

Uk nayide'ents n'ukpiktaajkint, meets idø'on mdøjk'ajtp midi ja Dios kyøjpy. ¹⁰Øts idø'on ja Dios tø xpikta'aky pojtspi ana'ambi, jøts øts idø'on ja tøj k tø nbots'okwa'añ, jøts ja wenkpi pojtspi tjaakyikyø'øy ja tunk. Tum a'ejxits ja tsøky sã pønjabøn pyøch. ¹¹Nipønxi kyapaat'atyiyi jøts ja pøch ja abiky tyiktsø'onda'akt, pø tøxi ja tu'ugyi tyañ midi ja Jesucristo pyøchkojpk'ajtpy. ¹²Kuts ja tøj k yjaakjayikpøch, øts ja oori yjaakpat, uk ja platits, uk tum tsuj tsaa, uk øyts nayide'en ja pu'uy, uk ja miyts, uk øyts ja waxkipy, ¹³ku wyinaty ja tiidyu'unin tyaaty jamnimts ñigaxø'økt pøni sã pøngapøn tø tyuñ; pø tum jøønxi jam wyinaty tump, ja'ats tyiknigaxø'økp pøni ti ja tøj k tø yiktakøjy. ¹⁴Pøni pøn wyinaty tø tyiktuñ midi ja jøøn kamayip, yikmo'opts ja' myijuu'ñ; ¹⁵kuts ja wyinaty tyøy, windigø'øpyts ja tuki'iyi midi ja wyinaty tø tjaapøch øy wyinaty awisa yjanch'awa'atspidsimy pøn idø'on jade'en tø pyøch.

¹⁶¿Ka' mee xnijawi ku meets ja Dios Teety mdsaptøjk'atyidi jøts ku ja Dios Espiritu Santo jam chøøni? ¹⁷Pøni pønts tjejtjip ja Dios ja chaptøjk, yikudigøyip ja Dios ja', ja'agøjxp ku kyunuu'kxyi Dios chaptøjk, meets ja Dios mdsaptøjk'ajttip.

¹⁸Kidi kø'øm mnadyuñidi. Pøni jam tu'ugin ixpiky jaa'y ñayjawiyi, wan nayide'en nabyikta'agiyi ejxim ja jaa'y midi niiti tkajajtp, jøts jade'en tpaatt ja wejin ja kajin midi kanaxp. ¹⁹Pø janch jawaani kajaaxi ja Dios wyejin jøts nika' jade'en ja jaa'y y'ixpiky'ajtin. Yide'enxi ja Dios kyajpxy wya'añ: "Ja kyø'øm ixpiky'ajtin ja jaa'y tabakjo'opidip ja Dios, jøts ja kø'øm tyuktagidawiyidit." ²⁰Nayide'ents wyami: "Ñija'wip ja Dios ja' ku nimã kyatuñ ja ixpiky jaa'y wyinmaa'ñ." ²¹Paty meets mganadya'agajpxiyidit nipøn; pø meetsxi mja'ajtpy jøts øy xyiktunkpaattit tuki'iyi: ²²ixa Pablo, Apolos, Pedro, et naxwii'ñit, jujky'ajtin, o'jkin, ixyam'ajtin, jøts midi memp midi ja'tp; ²³ja Cristots mee mja'ajtidip, jøts ja Dios Teety ja Cristo tja'atmi.

4

Ja nwindson'ajtim kyudanaabyi tyunkjøøjp

¹Paty meets jade'en xja'gyukit jøts ku øøts ja'ayi ja Cristo nbudøki, ja'ats øø ndunk'ajtpy jøts øø nnigajpxt ja Dios y'ayu'uch winmaa'ñ. ²Pøni pøn ti tø yiktaguwani, yiknigaxø'økp idø'on ja' ku ja tpadu'unt. ³Ka' øts ja nmøjipikta'aky pøni sã meets xnigajpxy xnimadya'aky, uk pøni sats øts ja xejti xwa'andi pøn jaty ya naxwiiñ ja jaa'y tiidyundip. Ni øts paat nganadyunk'atyi kø'øm pøni sã ø njaa'y'aty. ⁴Nitits nganadyapøkyjawiyi, nnija'wip øts wa'ats ku øts ka' axøøk njaa'y'aty, ka'ats ja njøp'ejxin ku øts ja nbøky kya'ity, ja nwindson'ajtimts ø kø'øm xiidyu'ump. ⁵Paty kidi x'øyjawidi xka'øyjawidi ixyam tigati; awejxtinim wan ja nwindson'ajtim tyiknigaxø'kixy pøni ti jaty

kayik'ejxpatp, jøts nay ja Dios tyiknigaxø'økp pøni sa t'ixy tu'uk tu'uk ja anmija'win, jats ja Dios ja t'øyyawit uk tka'øyyawit.

⁶ Migu'uktøjkti, meets m'ø'y'ajtingøjxp øts jade'en nwa'añ jøts xni'ejxu'uttit ja Apolos uk xni'ejxu'uttit øts. Paty øts idø'øn jade'en nwa'añ jøts nayide'en njaa'y'attit sam øøts. Ka' nugo xu'undit agubajkpy yam ja Dios kyajpxy jade'en kyawa'añ jøts kidi nugo pøn xnadyamikexyidi uk xmi'ambøjkmidi pøn. ⁷ ¿Uk jaa dø'øn tu'uk jaa'y pøn jawaani myikwejidip? ¿Ti kø'øm tø xpaatti midit ja Dios tø mga'ukmø'øyi? Pøni tum ja Diosts tø mmø'øyi, jadits ku mnadyamikexy pøni ti jaty mmøøt'ajtpy, jade'enxi me mwani ku mets ja kø'øm tø xpaaty pøni ti jam mmøøt'ajtpy.

⁸ Kumeef jaa'yin meets yjawi mnayjawi yidi pøn niti tka'ukta'ayoonidip. Windsønin yjawi mnayjawi yidi, jøts øø xka'ukja'myatsni. jøgidø'øn tyimy-janch mjanchwindsøn'atti jeexyip, jøts øø nayide'en ja ngutujk xmo'ot! ⁹ Jade'enxi øts yjawi nja'gyuki, pø tø øøts idø'øn ja Dios tyimy'ixoojk xyiktañ; jøts øøts idø'øn yjawi tø nyiktanibiktaagi jøts øø n'ookt; jøts øøts jade'en ja tsajp ja naajx x'ext xjawit, nayide'en ja Dios y'ankilis møøt ja naaxwii'ñit jaa'y. ¹⁰ Maap mo'tp øø nyiktijy ku øøts ja Cristo yja' nbaduujni yam mee mnadyijyiyi møj nija'wibi pøn tnmadoogøjxidip ja Cristo yja'. Ka'ap øø njotmøjki yam meets yikxon myikwindsø'øgi. ¹¹ Ixyambaat øøts yuu ndani'ixy møøt tøødsi, jøts ka'ap øøts nwet nnaamy te; øy øøts jaa'y sagasa xuñ, ka'ap øøts ndøjk te ma øø nboo'kxt, ¹² jøts nmijotkijpxy øøts ndunk nbøjk. Xjamagajpxigøøpy øøts jaa'y, ja øy tsuj ayuujk øøts ja nda'adsojimbijtpy. Ngupijkpy øøts pøni xpawojp øøts jaa'y. ¹³ Xjanchjabagajpxp øøts jaa'y, tuda'akts øøts ja n'ane'emy. Pista'agin øø nyiktuñ uk jade'ents øø nyikjawi ejxim jaa'dyi'ñ jaa'dya'ach.

¹⁴ Ka' mee nnijayi jøts xatsø'dyundit ku jade'en mdsøonidi, n'ana'amwampy meets idø'øn ja'agøjxp ku mee n'u'nk n'una'jkin njawi pøn ø ndsojktip. ¹⁵ O meets jeexyip xjamøøt'aty namay ja yik'ixpøjkpi, ka' meets jadine'en ñamayi mdeety jabi øtsyixi meets ja'ayi tu'umpchi xeety'atp ja'agøjxp ku ja Cristo ñitsoojkin tø ndukmadowdi jøts ja janchja'win tø xpaatti. ¹⁶ Ixyamts mee n'amidøy jøts ø xpa'ejxti.

¹⁷ Paty meets ixyam ndaniguexy ja Timoteo pøn ø n'u'nkja'wip nwindson'ajtingøjxp, jøts pøn ø nayide'en xkamajsttup. Yø' mdukja'myatsidip sudso ø ndsøøni kuts ja Cristo nmibøjki ja yja' sa o magama ndukyikyujti pøn jaty ja Cristo tjanchja'widip. ¹⁸ Jam meets ja mmigu'uk pøn janchnamyikajxniyidip, nømp ja wya'andi kuk mee nga'ats'ext ja'agøjxp ku øts ja' ndsø'øgidi. ¹⁹ Pøni yikutujkpyts ja Dios, nninøjktipts pojin. Jamnimts ø n'uk'ext pøni janchtundip idø'øn pøn namyikajxidip uk nugo dø'øn kyajpxti. ²⁰ Ka'axi dø'øn nugo nmadyajkint ku ja Dios yja' nbaduujñindi, pø jatyixi dø'øn ja yikpadungojt. ²¹ ¿Sudsots uk mdsojktip jøts øts awa'an nnøjkxt jøts n'atskastigimø'odit, uk ja yujy'ajtin jøts ja tsojkin ø nminøjkxp ku wyinaty n'ats'ejxti?

5

Ja'yiknigajpxp ku ja kya'øyi ku pøngapøn ñamyøøt'atyidi nugo

¹ Jade'en ja kajpxy yø'øy, jamik ja mmigu'uk tu'uk ja kyudaak tmøøt'aty. Janch møj ka'øy jaa'y'ajtin idø'øn jade'embi tsinaa'yin, ni jambaat yø kyayikupiky ma ja jaa'y ja Dios tkanijawidi. ² ¿Jøts niti meets idø'øn xkidyimbyøkyjawi ku ja mmigu'uk jade'en y'adi'ich? ¡Meetspik idø'øn jeexyip mjotmay'oo'ktøjkip ku mmigu'uk jade'en y'adi'ich! Pøn yaa'dyøjk

idø'øn jade'en tø y'adi'ich ka'ap ja y'ukpaat'ajtniyi jøts ja jam xmøøtsøonidit, pawøpy ja pyaat'aty. ³ O meets idø'øn njagamøøtsøoni jamts øts ja nwinmaa'ñ nyik'lity; tøts ja ndiidyuni winmaa'ñjotp pøn jade'en tø y'adi'ich ejximdam øts jam jeexyip ndyimchøoni. ⁴ Namyukidi nwindson'ajtimgøjxp, jam ø wyinaty ja nwinmaa'ñ meets møøt, jøts ja nwindson'ajtim Jesucristo myøk'ajtin mbudøkiyidit. ⁵ Jøts xyikjiwa'aktit ja jaa'y, wan ya ja miku' yik'ayo'ombaa'dyiyi kunim ja nwindson'ajtim Jesucristo wyinaty myiñ tiidyumbi, janimts ja nøjxx yiknitso'ok'ajtxiyi ja y'anmija'win.

⁶ Paty kidi mnadyamikexyidi pøni ti jaty jam mdundip. ¿Ja ka' mee xnijawi ku ja ka'ødyumbi ja yja' nugo tyikmiweni? ⁷ Paty kidi xmaa'kxti ja ka'ødyumbi midit tø wyindigøøni, midi jam nugo myikma'jtidip. Jøts øy wa'ats m'ettit. Pø tøxi k'øøm ja Cristo xku'o'ka'am kruskøjxp, jøts ja tø wyindsø'jkin'aty adømgøjxp Dios Teety wyingujk. ⁸ Ja tiy'ajtin ja øy'ajtin adøm idø'øn ja Dios ndawindsø'jki'y'ejtimp, jøts ka'ap nijuuni nyikmø'ajtint ja y'axøøkpø midi ja anmija'win nugu tyikwindigøøpy.

⁹ Nnimaay meets ku ja nøky ojts tu'uk ndanigaxti, jøts xkamøøtsøonidit pøn jaty ja y'axøøkpø yigaappi pyawinmaadyip jøts tum ja' tyunk'ajttip. ¹⁰ Ka'ap meets idø'øn ja yide'en xja'gyukit jøts ku meets abiky mdyimñabyiktaajkmeyidit, jøts ja ka'øy jaa'y, jøts ja meengyax jaa'y, jøts ja maa'tspi jaa'y, uk jøts ja tsamaxan windsø'jkip jaa'y xkadyimy'ukwin'ejxnidit; jabi kuwañimxi ja ya x'ejxtit ja'abi jaa'y o madsoo. ¹¹ Yide'en øts idø'øn ja ndijy jøts ku meets mganamyukit møøt ja' pøn nañikajpxiyip Cristo padumbi, yam ja kya'øyjaa'y, uk meengyaxi, uk tsamaxan windsø'jkibi, uk yja'aji pøn tuki'yiyi tkajpxyø'ogyoep, uk pøn ja nøø ja mu'uk ttunk'ajtp, uk myeech. Ja jade'embijaa'dyi ni xkamøøtka'aty meets idø'øn ja'. ¹²⁻¹³ Ka'ap ø xpaat'aty jøts ø ndiidyu'unt ja wenk jaa'y midit abiktyi, ja Dios ja paat'ajtiyip. Meetsts idø'øn mbaat'ajtidip jøts xiidyu'undit ja mmigu'uk. Paty xyikjiwa'aktit ja pøkyumbi midit jam møøt tsinaadyip.

6

Ku ja kajanchja'wibi juez ja janchja'wibi jaa'y tmi'øøndi

¹ Ku meets mmigu'uk xni'øøniwya'añ, ¿tigøjxp meets idø'øn ja xaninijxxy ja juez pøn tkajanchja'wip ja nwindson'ajtim Jesucristo, jøts nika' ja xaninøjkxti pøn ja janchja'win nayide'en tmøøt'ajttip? ² ¿Uk ka' meets idø'øn xnijawi ku ja' tiidyu'undit ja naxwii'ñit jaa'y pøn ja Dios yja' tpaduujnidip? Pøni meetsts mdiidyumpy wyinaty ja naxwii'ñit jaa'y, ¿ka'ats meets idø'øn xjaty sudso xu'undit jøts xiidyu'undit pøni ti jam tuujnip jajtjip? ³ ¿Ka' xnijawidi ku ja ankilis paat ndiidyu'unindit? ¿Pøni jade'ents ja wyinaty, nija'wa'ampts adøm idø'øn sudso ya ndiidyu'unindit naxwii'ñ? ⁴ ¿Sudso dø'øn ja xaninøjkxti ja wenk jaa'y pøni ti dø'øn ya naxwii'ñ mdsep'ajttip m'ayo'on'ajttip? Ja' meets ja mdaninijxpxy pøn kajanchja'widip. ⁵ Ya'atpø dø'øn ti mjanchtatsø'odyu'undip. ¿Ni tu'ugin meets ja jam xkamøøt'aty pøn tjajtjip ja tiidyu'unin? ⁶ ¿Tsaach'øy idø'øn ja' jøts namajtks ja janchja'wibi ña'ni'øøniyidi ma' ja jaa'y jam kyajanchjawidi?

⁷ Tsø'ødyumbimxi mee mjagaxø'kni ku meets jam tukjanchja'wibi jaa'y mnamyidsep'atyidi. Ku ne'egi amøñi xkamidanidi pøni sã myiktundi. Nisã ne'egi mgawa'landit øy mjayikwimaa'tsti. ⁸ Janch tum wimbet'ampy mee ne'egi xuñ, øy meets ja mgø'øm mmigu'uk sã xuñ midit jagati pøky, uk wime'chpts meets ja' ne'egi.

9-10 ¿Uk ka' idø'øn xnijawidi ku ja Dios ja kyutujk wyinaty tkadanitani pøn jaty ja tiy'ajtin tkatundip? Nay'ejx'etidi, ejxim myikwin'øøndi, ka'axi wyinaty ja Dios ttanitani ja kyutujk pøn jaty namyøøt'ajtidip øy ja jyaga'amajtskidinim, ni ja' pøn jaty ja maxandsaa windsø'jkidip, ni ja' pøn jaty ja wenk tø'øxyøjk uk wenk yaa'dyøjk tmøøt'ajttip, ni ja yaa'dyøjkti pøn ja myiyaa'dyøjk tmøøt'ajttip, ni ja' pøn jaty maa'tstip, ni ja meengyaxti, ni ja' pøn tuki'iyi tjanchkajpxyø'øgyøxtip jatyi, uk pøn jaty ja win'øø'nk ttunk'ajttip. 11 Jam mee muumā pøn jade'en y'ijty tsinaadyip; ka'ats ja icyam jade'en y'uksinaañidi pø tøxi ja nwindsøn'ajtim Jesucristo køjxp pyøkwyatsnidi, jøts ja Dios Teety tø yiktagidøkidi, jøts y'Espiritu Santo køjxp ja tø xkupijkyindi.

Sudso ja nne'kx ndawindsø'jka'ant ja Dios

12 Jade'en ja ayuujk yø'øy ku o tigati nduu'nint, nipøn ja xkadabayø'øyint. Øy idø'øn ja jade'en yjawa'añ ka'ats tuki'iyi y'ødyuñ pøni ti yiktump; jabi ka'axi pyaat'atyiyi jøts ja tu'ugyi nugo ndyimyikmajadaajkin. 13 Janch idø'øn ku ja kaaky ja tojcx yā tø yikpikta'aky jøts ja maatsjotp ñøjkxt, ka'ats ja ne'kx ja' wya'añ jøts ja nugo yiktapøktyu'unt sam ja wināagin ja'ayi ttunk'atti. Kudigøøpy y'ity ja kaaky ja tojcx jøts ja maats nayide'en, ne'egi tampts xemikøjxp ku adøm nne'kx ja Dios Teety ndawinja'wa'ant ndawindsø'jka'ant jøts ja nayide'en amuum xmøøt'ejtint. 14 Nayi myøk'ajtin ja yik'awa'amp jøts ja xyikjujkyøjkin jadigojk sam ja nwindsøn'ajtim Jesucristo ja øjts tyikjujkyiky.

15 ¿Ka' mee xnijawi ku meets yø mne'kx Cristo tne'kx'aty nayide'en? ¿Øy idø'øn jøts ja Cristo ñe'kx nnixajiyit jøts øts ja nmo'ot ja ka'ødyø'øxyøjk mididi ttunk'ajttip ja yaa'dyøjk? ñNimā yø jade'en kyatyi! 16 ¿Uk ka'anim idø'øn xnijawidi ku ja ka'ødyø'øxyøjk yikmøøt'aty jøts tu'ugyi ja ne'kx namyayi wyimbejtni? Pø nømpxi ja nøky wya'añ: "Tu'ugyi ja nøjk wyimbejtni." 17 Kuts tu'uk ja jaa'y ja nwindsøn'ajtim Jesucristo tmīnamyayi, tu'ugyits ja nayide'en wyimbejtnidi.

18 Paty kidi nugo mnamyøøt'atyidi, wingaktu'utti yø'øbi pøky. Øy idø'øn pøky yjaji, yiktump øy mididi'ibi jadu'uk pøky, ka'ats ja jade'en tyimbyaaty sam ja jade'embidi pøky, pø ja kø'øm ne'kxi pøktyumbajt tyimwyamp kø'ømts ñamyayi ja namyidundigøyi. 19 ¿Ka' xnijawidi ku meets ja Dios Espiritu Santo mdsaptøjk'atyidi? ¿Jøts ku ja Dios Espiritu Santo jam chøøni mne'kxkøjxp? Pø ni yø mne'kxi mee xkaja'aty, 20 pø janch tsowixi ja Dios tø mjuyidi ku ja y'u'nk tø xku'ayo'ombajta'am. Paty meets idø'øn ja Dios ja mne'kx jøts ja m'anmija'win amuum xawindsø'øgit, jabi tum Diosxi yø' yja'.

7

Sudso ja amajtsk jaa'y'ajtin ñaxt

1 Ixyam øts ja nøky n'adsojmbijty mididi mee tø xaniguexy. Ja øy ja' ku jaa'y kya'amajtskidit; 2 jade'ents ne'egi pyaat'atyiyi jøts ja yaa'dyøjk kija' tmøøt'attit ja ñidø'øxy, jøts ja tø'øxyøjk kija' nayide'en tmøøt'attit ja ñiyaa'y, ja'agøjxp ku ja pyøkyi ku jaa'y nugo ñamyøøt'atyidi. 3 Myimado'op idø'øn ja yaa'dyøjk ja ñidø'øxy nayide'en sam ja tø'øxyøjk tmimadoomit ja ñiyaa'y, jøts jade'en nixem niyam ñadyajotkujk'atiyidit. 4 Ka'ap ja tø'øxyøjk nadyu'uk tja'aty ja ñe'kx, ja ñiyaa'y ja paat'ajtiyip; jøts nayide'enmi ja yaa'dyøjk, ka'ap ja nadyu'uk tja'aty ja ñe'kx, ja ñidø'øxy ja paat'ajtmīyip. 5 Nagyupøkidip idø'øn ja namajtsk jøts ñamyøøt'atidit; pøni tyundipts ja kajpxy jøts ñay'amaay'atidit ku ja Dios wyinaty t'ajot'atwā'andi, ots ja jade'en ttu'undit. Kuts ja jotmay

tyikugøxidit, nayide'ents ja chinaa'yin tyikyø'øgyojmidit, ja' ka'uk'øyni ku kya'uknagypupøjkniiyidi jøts ja miku' winøø'mbi tyuktunidit ja pøky abiky.

6 Ka' mee ndaguwani jøts mga'amajtskikit, amajtski meets pøni jade'en xtsojkti. 7 Jade'en ø njatsøjky jøts mee mga'amajtskit sam øts; ka'ats adøm ja Dios ja winmaa'ñ jøts ja kunuu'kxin tum jade'en tø xmø'øyim, tigach ja tø tyikwa'kxy.

8 Pøn jaty ka'amajtskidipnim, uk pøn tø kyu'o'kiñidi, ja' øts idø'on n'ana'amdip ku yjawi yja'øyi jøts kya'amajtskikit sam øts. 9 Pøni ka'ats tmimajada'akti jade'embi tsinaa'yin, wan ne'egi t'amajtskidi pø ka'axi y'uk'øyiñi ku ja wyinaty o pøngapøn t'ukmøøt'ajtni.

10 Pøn jaty amajtsk jaa'y, ja'ats ø n'ana'amdip jøts ja tø'øxyøjk nijuuni xøøw tkamajtsstu'tt ja ñiyaa'y. Kidi øtsip idø'on jade'en wamp, ja nwindson'ajtim idø'on jade'en kø'øm ana'amp. 11 Pøni myajtsstutpyts ja tø'øxyøjk ja ñiyaa'y, ka'ap ja y'amajtskit, uk myøøtnagya'jpxipts ja ñiyaa'y jøts jadigojkk y'amatskjaa'y'attit. Nayide'ents idø'on ja yaa'dyøjk pyaat'atyiyi tu'tunt.

12 Yide'ents ø nwami, øy ja nwindson'ajtim jade'en yjagawa'añ, pøni pøn yaa'dyøjk tø tmøøt'amatski tu'uk ja tø'øxyøjk pøn ja janchja'win tkamøøt'ajtp yam ja yaa'y ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja yaa'dyøjk ja tmajtstu'tt. 13 Pøni jamts ja tø'øxyøjk tniyaa'y'aty tu'uk ja yaa'dyøjk pøn ja janchja'win tkamøøt'ajtp yam ja tø'øxy ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja tø'øxyøjk ja tmajtstu'tt. 14 Pø tøxi ja yaa'dyøjk kunuu'kxy tyañ øy ja janchja'win ja tjagamøøt'aty ku ja tø tpiky tu'uk ja tø'øxyøjk pøn ja janchja'win tmøøt'ajtp. Jøts nayide'en kunuu'kxy tø tyañ ja tø'øxyøjk øy ja janchja'win ja tjagamøøt'aty, ku ja tø tpiky tu'uk ja yaa'dyøjk pøn ja janchja'win tmøøt'ajtp. Ku ja kyajade'enit, tum kajanchja'wip u'nkts meets ja m'u'nk m'una'jk wyimbidsømni; ka'ats, pø tøxi Dios ja y'øyjaa'y'ijxyidi Jesucristo køjxp. 15 Pøni y'amidøøpyts nidu'ugin ja yaa'dyøjk uk ja tø'øxyøjk pøn dø'on ja janchja'win tkamøøt'ajttip jøts ñawya'kxidit, wants tnawya'kxyidi. Niti ayuujkts tka'ukmidanidit ja yaa'dyøjk uk ja tø'øxyøjk pøn dø'on ja Dios tjanchja'widip, pø ja'axi ja Dios xamidsojkimp jøts ka' ja tsep uk ja ayo'on nmidsinaa'yindit. 16 ¿Ja ti me tø'øxyøjk mdanija'wip pøni myiknitso'okp mets ja mniyaa'y ku ja janchja'win ja tkamøøt'aty? uk çti me yaa'dyøjk mdanija'wip pøni myiknitso'okp mets ja mniidø'øxy ku ja janchja'win ja tkamøøt'aty?

17 Ots jyasa'ji, tum jade'en idø'on ndsinaa'yint sa ja nwindson'ajtim ttsøky, jøts pøni sa adøm ja juky'ajtni ja tø xmø'øyim nay jade'en sam wyinaty njujky'ajtyim ku ja Dios ojts xwaadsø'øyindi. Jade'en øts idø'on n'ane'empy ma jaty ja janchja'wibitøjkti. 18 Pøni wyaadsøøpy ja Dios ja jaa'y pøn ja ejxpajt ñe'kxkijxpy myøøt'ajttip sam ja israelit kostumbri, ka'ap ja ttatsøødyu'unt, wan ja jade'en ttañ; pøni wyaadsøøpyts pøn ja ejxpajt ñe'kxkijxpy tkamøøt'ajtp, ka'ap ja kuwanikøjxp yikpiktaajkit ja ejxpajt ñe'kxkijxpy. 19 Wan ja tmøøt'aty uk tkamøøt'aty ja ejxpajt jap ñe'kxkijxpy nugo ku ja Dios ja tpaduujni ja kyutujk. 20 Jade'en idø'on jaa'y tya'ant sam ja y'ijty t'ixy ku ja Dios y'ejxkajpiyi. 21 Pøni nugots øy pøn windsøn mdyimykutñiyi sam jaa'y jiyujk tsakaa tjagyepy winet ku ja Dios ojts mwaadsøyi, ka'ats mets ja xkumayjawit ku wine'enin xpaatt ja awa'ats'ajtni. Jatyits idø'on ja xkupøkt, ka'ap ja jeky xpawinma'aty. 22 Pøn idø'on wyinaty juy ja jaa'y yik'ejttip ku ja yiktamidsøky jøts ja nwindson'ajtim ja tjanchjawit,

ja nwindson'ajtimts ja ixyam myidunip kō'ōm̄dsōky, ka' juy, jōts ja jaa'y pōn jaty jade'en tkayiknajxtip nayide'en ja ixyam ja nwindson'ajtim kō'ōm̄dsōky tm̄idunidi, ja Cristo ja' tyumbidi. ²³ Janch tsowi meets ja Dios Teety ja y'U'nk mdagujuyi, paty kidi nugo mnay'ixmachidi jōts ja ka'ōchinaa'yin xpadojkiñidit. ²⁴ Jade'ents migu'uktōjkti, jōts jade'eña'am xyikyō'ōdyit ja mjuky'ajtin sam ja Dios tō mbaadyidi ku tō mwaadsōyidi.

²⁵ Tits ō nda'ana'am̄dip pōn ka'amajtsk jaa'dyi, ka' ja nwindson'ajtim ja sa tñigajpxy; ōts idō'ōn ixyam ngajpxnaxwampy tu'uk ja nwinmaa'ñ sudso dō'ōn yjawi tyuu'baatt tyuu'wetst ja tsinaa'yin. ²⁶ Jade'en ō njawa'añ jōts ja yaa'dyōjk jadi'ñi tya'ant ja'agōjxp ku ixyam ja tsinaa'yin janch tsep janch aduky. ²⁷ Pōni m'amajtskjaa'yits, kidits x'ixa'ay sudso ja mnidō'ōxy mōōt mnamyajtsu'udit; pōni ka'ats m'amajtskjaa'yi, kidits ja amajtsk'ajtin xpawinmay. ²⁸ Pōni m'amajtskipts ka' me mbōktyuñ; pōni amajtskipts tu'uk kiixe' ka'ats ja nayide'en pyōktyumi. Pōni amajtskidip tsep ja chinaa'yin ja tpaattit; ja'ats ōts idō'ōn njatsōjkpy ku ōts idō'ōn jade'en njawa'añ, jōts ja ayo'on xkapaattit.

²⁹ Meets migu'uktōjkti, ja'agōjxp ōts idō'ōn jade'en nwa'añ ku ja nwindson'ajtim wyingoni. Paty ixyam mdsinaañidit yide'en: Pōn jaty ja ñidō'ōxy jam, ja Dios idō'ōn ja yja' ja ne'egi tyajotmay'o'jkip jōts ja yjuky'ajtin tyiknaxt ejximdam ja jeexyip nadyu'uk'aty. ³⁰ Pōnts yaxtip jiidyip, jade'en ja chōōnidit sam ja' pōn kayaxtip kajiidyip; pōn jotkujk'ajttip xondaktip, jade'en ja chōōnidit sam ja' pōn kajotkujk'ajttip kaxondaktip; pōnts juudyip kajpxtip, jade'en ja yjuy kyajpxy ja tjawidit ejximdam ja jeexyip tkamōōt'atti. ³¹ Pōn jaty ttaxondip yō naxwii'ñit tsinaa'yin, jade'en ja ñiyayiwidit sam ja' pōn jaty ja tkadaxondip; jabi kugōxi jōp'amxi yō naxwii'ñit tsinaa'yin y'ity.

³² Ja' meets idō'ōn njadamidsōjkpy jōts ka' ōy ti nugo xtyimdyajotigō'ōdyit ya naxwiiñ. Ku dō'ōn ja yaa'dyōjk kya'amajtskjaa'yi, ja nwindson'ajtim ja ja'ay'i pyawinmaapy sudso ja tyikjotkujk'att; ³³ kuts ja y'amajtskjaa'yi, ja'ats ja pyawinmaapy sudso ja yjuky'ajtin tpaatt jōts ja ñidō'ōxy tyikjotkujk'att. ³⁴ Tigach ja tō'ōxyōjk tsinaa'yin tyiknaxy midi ka'amajtsk jōts nayide'en ja' midi amajtsk. Midi ka' y'amajtski ja nwindson'ajtim yja' ja tyajotigō'ōjyip jōts ja amuum ttamiyōxy ja ñe'lx mōōt y'anmija'win; pōnts jam ja ñiyaa'y, ja' myijotigō'ōpy jōts sudso ja ñiyaa'y tyikjotkujk'att.

³⁵ Ka'ap ōts ya'at nnigajpxy jōts mee niti xkadyimy'uktunk'atnit, paty ōts idō'ōn yō nnigajpxy jōts yikxon mdsōōnidit sam idō'ōn yjapaat'atyiyi jōts ja nwindson'ajtim yja' xm̄ijotigō'ōdyit.

³⁶ Pōni jamts ja u'nkteety pōn t'ōyja'wip jōts ku yjawi y'ōyi jōts ja ñōōx ne'egi y'amajtskit ja'agōjxp ku ja yjawi ja yjumōjt ñaxni jōts ja wyinmaa'ñ tyigatsni, wants jade'en ttuñ pōni ōy tjawi, pō ka'axi ja pyōkyi. ³⁷ Pōni jamts jadu'uk ja u'nkteety pōn idō'ōn yikxon tpawinmaapy ōy tsuj jōts ja ñōōx ne'egi kya'amajtskit, ōyts idō'ōn ja y'adi'ich jade'en. ³⁸ Paty idō'ōn jade'en pōn ja ñōōx tyik'amajtskip, ōy adōtsp idō'ōn ja wyinaty; pōnts ja ñōōx tkayik'amajtskip, jaaktyimwyindōōpts idō'ōn ja wyinaty jawaani ku ja jade'en wyinmay.

³⁹ Kutujkōjxp ja tō'ōxyōjk tmōōtsōōni ja ñiyaa'y pōni juky'ajtp ja'; pōni o'kp kudigōopyts ja', ōyts ja pōn tmōōt'amatskiñit, nugo ku nayide'en ja yaa'dyōjk ja janchja'win tmōōt'aty. ⁴⁰ Ne'egi jotkujk ja chōōnit pōni ka' y'uk'amajtskiñi. Jade'en ōts idō'ōn ja ngō'ōmgajpxwejin nyaky, jōts nmōōt'ajtpy ōts idō'ōn ndijy ja Dios Espiritu Santo.

8

Sudso ttu'undit ku ja windsø'jk'ii'ñ yiktaniwa'adit mididi yiktawindsø'jkíp ja maxandsaa uk øy ti jadu'uk awanax

¹ Ixyamts ø nnigajpxwa'añ sudso xu'undit ja kaaky tojx mididi tø yiktawindsø'øgi ja maxandsaa. Wa'ats ja njanija'wa'andi sa ja ndu'unindit; ja'ayi ja nugo nnadyamiguejxyindi ku adøm møj nija'wibim, ka'ap ja nmøjpiktaajkyin ku ja tsøjkin ja pa'ayo'owin tyikmøji tyikmayi ja winmaa'ñ. ² Pøni jam ja jaa'y pøn nadya'agajpxip ku ja ti yiin wan tñijawi ja'agøjxp ja jade'en wy'añ ku ja kyawijyi kyakejyi. ³ Jabi y'ejxkajpyts ja Dios ja' pøn ja tsøjkip.

⁴ Sudsots idø'on xu'undit, ¿mga'adyip mjøø'kxtip idø'on ja' mididi ja maxandsaa tø yiktawindsø'øgi? Nnija'wa'amp ndøm ku ja maxandsaa kya-Diosi, pø tu'ugyixi ja Dios. ⁵ Jaa dø'on ja jaa'y pøn wandip ku dios ja janch namaydi ya naxwiñ jøts jam tsajpjotp, ja'agøjxp idø'on may ja dios ja jaa'y twindsø'øgidi ku jade'en tja'gyukidi, ⁶ tu'ugyits adøm ja nDios, ja Dios Teety. Ja Dios Teety idø'on tuki'iyi tø tyik'øyi, jøts ja' adøm idø'on nnijuky'ajtyindip jøts ja ndamijoxin ja ndsinaa'yin. Jats tu'ugyi nayide'en ja windsøn, ja nwindson'ajtim Jesucristo, ja'agøjxp idø'on tuki'iyi tø y'øyi, jøts ja'agøjxp adøm idø'on nayide'en tø xyikøjyim ja Dios.

⁷ Jats may ja janchja'wibi jaa'y pøn tkaja'gyukidip ja yjade'embitsinaa'yin. Pøn jaty y'ijty ttawindsø'jkidip ja kyaaky ja tyøjx ja maxandsaa ku ja ixyam ja'abi tkaydi ttøjxiti jade'eñim ja wyinmaydi ku ja nay ja'abi dios yja' jadigojk ttawindsø'øgidi; kuts ja tpawinmaadyøkidi jøts ja tpøkyjawidi ja'agøjxp ku ja tkaja'gyukidinim. ⁸ Kidi ja' adøm inet jawaani øy nwibejtint pøni kaa'yimp jøø'kximp, nayi ka'ats adøm inet jawaani ka'ø y nwibejtint pøni ka' adøm ngaay'im. ⁹ A'ejxits mee m'adø'øtst, o meets ja xka'aty xøjxt jøts ka'ap ja mmigu'uk ja xukpøkyjawidit, pøni pyøkyjawidipnim ja tuki'iyi ja'agøjxp ku ja yjanchja'win ja ka' yikxon tyuu'døkidinim. ¹⁰ Ku n'ukpiktaajkint, yam mets ja mjanchja'win tø myøji myayi jøts m'a'ejxnaxit tu'uk ja mmigu'uk pøn okwa'añ ja yjanchja'win tyiktso'ondakpnim, ku mets jam mdsøøni agujk jotkujk jøts xji'kxy ja kaaky ja tojx mididi tø yiktawindsø'øgi ja maxandsaa uk øy ti jadu'uk awanax, ¿ka'ats idø'on ndejin mbaduu'miyit nayide'en ja mmigu'uk pøn m'a'ejxnaxiyip? ¹¹ Jøts jade'en xyiktuu'tigø'øty ja mmigu'uk ja'agøjxp ku kyatiynim kyaduda'akñim ja yjanchja'win, yam ja Cristo ja tø yjagu'oogiyi. ¹² Jade'ents idø'on, ku ja pøky jade'en xu'undit jøts ja mmigu'uk yjanchja'win xyik'amutskiyidit, ja Cristo meets idø'on køøm jade'en mmidundigøøpy. ¹³ Pøni ndukpaajtyimpts tam adøm jade'en ja mmigu'uk ja tyuu'tigø'øyin ku yikji'kxy ja maxan wyindsø'jk'ii'ñ, paat'ajtyiyps ne'egi jøts ja ka'ap jade'en n'uktu'una'ant jøts ja mmigu'uk jade'en ja pøky ngadani'ejxa'ant.

9

Ti dø'on paat'ajtyip ja nwindson'ajtim kyudanaabyi

¹ Tø øts idø'on ja Dios xaguwani jøts øts ja ngudanit jøts ja kyajpxy y'ayuujk ja nnigajpxiyit, nipøn jaa'lyts ø xkapaat'aty jøts øts ja ndukmado'ot pøni ti jaty ø ndumpy; pø tøxi øts ja nwindson'ajtim Jesucristo n'ixy, meests idø'on ndunkjøøp'ajty ku øts ja nwindson'ajtim tyunk nbadojkiyi. ² Jaa abiky ja jaa'y pøn ø xka'ejxkaptip jøts ku øts ja Dios xkudanaabyi'aty; meetspits mbaat'ajttip jøts øts jade'en x'ejxkaptit, pø øtsxi meets ja nwindson'ajtim

tø ndukmibiky, kuts meets jade'en tø ndukmadøy ja janchjā'win jade'ents idø'øn wyingaxi'iky jøts ku øts ja Dios njanchkudani.

³ Yide'en øts idø'øn n'adsøy pøn jaty ø xpagajpxtip: ⁴ Xpaat'ajtp ø nyikmo'ot ja kaaky ja uujkin, ⁵ jøts xpaat'ajtp ø nayide'en jøts ja nnidø'øxy miditjanchjā'wip ja Dios nbawaamit sam ja jadu'ukpi kudanaabyitøjk ttundi, møøt ja nwindsøn'ajtim y'ajch y'uch jøts nayide'en sam kø'øm tuñ ja Pedro. ⁶ ¿Ja ti øts yø møøt ja Bernabé xpaat'aty jøts øøts ja ngaaky ndojkx nnidu'unt? ⁷ ¿Ma dø'øn ja soldadi kø'øm y'uknay'ijxyiyi? ¿Ma dø'øn ja jaa'y tka'ukjii'kxy pøni ti tø tni'ipy jøts pøni ti tø tyikpidi'iky? ¿Pøn idø'øn nugo ukuborreegi'ajtp jøts niti kyagida'anxiyi? ⁸ Kidits mwinmaydi ku øts jade'en kø'øm n'awijy, nayide'enxi ja Moisés kyutujk wya'añ. ⁹ Pø yide'enxi jap jaabyety y'ity nøky kyutujkijxpy: "Kidi ja mdsakaá ajeñ xyik'okti ku ja xyiktunwa'andit." Kidi ja'agøjxp ja Dios jade'en wyaañ ku ja tsakaá ja ja'ayi tjomay'aty, ¹⁰ pø adømgøjpxi dø'øn ja ejxpajtin ja jade'en tpikta'aky. Paty ja kutujk jade'en yikjaay ku adøm ja y'øy'ajtin ja pya'ayo'owin ja xuktanitsoojkim; pø nayide'enxi ja jii'kxy ja pyaat'atyiyi pøn yuup tump sam ja' pøn yikpidi'jkpy ja pikta'aky. ¹¹ Tøts øøts ja Dios kyajpxy y'ayuujk namyayi nni'ipy mā meets jam. ¿Ka'ats idø'øn y'øyi jøts mee n'amido'ot ja pudøjkin? ¿Ti øø ndajujky'atp ya? ¹² Pøni m'amidoøjip mee tigati ja wenk jaa'y jøts meets ja xmø'øy, jawaani kajats øø xpaat'aty.

Øyts øøts ja jade'en xjapaat'aty, ka'ats øøts ja nbayø'øy kuwani; nmidanaapy øøts ja' pøni ti øøts xjajtp pøni ti øøts xka'ejtixp jøts øøts jade'ens ngayiktuu'duky ja Cristo y'ixpøjkin ja Cristo y'ana'amin. ¹³ Mnija'wip meets ku ja jaa'y pøn tsaptøjkotp ttundip, tum ja' ja tyajujky'ajtp pøni ti jam tøjkip. Pøn ja altajr jam t'ejx'ejtipp mā ja jiyujk jam y'øøky miditjandsøj'jkin'ajtp, ja'abi tsu'uchts ja yikmøødyip. ¹⁴ Nayide'en ja nwindsøn'ajtim Jesucristo tø yanimy jøts ja tyunk ja ttajujky'attit pøn ja nitsoojkin ayuujk tnigajpxtip. ¹⁵ Nijuuni ja'abi winmaa'n nugo ngadamajada'aky, ni ja'agøjxp mee nganijayi jøts mee xmo'ot o tigati. ¡Wan øts jade'en ne'egi t'øøky, pø ndajotujk'ajtpxyi øts ku øts jade'en ndsøøni!

¹⁶ Kuts idø'øn ja Dios y'øy'ayuujk y'øwinyimaa'n njanigajpxy, ka'ats øts ja nnadyamøjpikta'agyiyi, pø kø'ømxi øts ja tø ngupiky ku øts ja tø nyiktaguwani. ¡N'ayøøy øts ku øts nganigajpxt! ¹⁷ Pøni kø'øm tsojkingøjxpts øts nduñ, n'awijxpyts øts ja n'øy'ajtin. Ka'ap øts jade'en ja ndunk, jabi kø'ømxi ja Dios xwi'ixy ku øts ja øybi tunkjøøjp xmø'øy jøts jatyi ngupøjkøjy. ¹⁸ Ja' øts idø'øn ndajotujk'ajtpy ku øts ja nitsoojkin ayuujk nnigajpxy jøts ø niti mijuu'n nga'amidøy, øy ja jade'en xjapaat'aty jøts øts ja' ndajujky'att.

¹⁹ Ots ø nipøn njagamiduñ, tøts ø kø'øm nadyamidøkyi jøts mee nmidu'unt, jøts ja Cristo jade'en ndukpaattit. ²⁰ Kuts ja israelit jaa'y nmøøtsøøni nayide'ents ø ndsøøni sam ja chøøni jøts øts ja Cristo jade'en ndukpaattit; ja Moisésxi øts idø'øn ja kyutujk n'atskupøjkip øy øts ja'abi kutujk xjagapaat'aty. ²¹ Kuts øts abiky nnøjxmi mā ja Moisés kyutujk tkayiktunajni, nayide'ents ø ndsøøni sam ja chøøni, øy øts idø'øn ja Dios kyutujk ja'ayi nyikmøjtøjkiyi, pø ja Cristoxi øts ja y'ana'amin nbaduujnip. ²² Kuts ø nmøøtsinaamyidi pøn ja yjanchjā'win tyiktuu'døjkyidipnim, ka'ap øts ja nugo nyik'amutskidi, ni ja namyikaxi'ajtin ngayiktuñ, nayide'en ø tø nnabyikta'agyi sam ja'adi jøts øts ja jade'en nyikjotujk'atti. Tøts idø'øn tu'uk tu'uk nja'gyuki pøni sa ja chøøni, jøts øts ja jade'en ndukpaattit ja Cristo. ²³ Ja'agøjxp øts jade'en nduñ ku øts ja nitsoojkin ayuujk nnigajpxwa'añ, jøts ø wyinaty nayide'en nbaaty ja kunuu'kxin ja øy'ajtin møøt ja'adi pøn jaty tjanchjā'widip ya'atpi ayuujk.

²⁴ Mnija'wip meets ku jaa'y pyujtkejpxti, mayaj ja yjaputti tu'ugyits ja pujtkejpxpi myajada'aky jøts ja tpiky ja nibuty. Paty idø'on nayide'en mbuttit jøts ja øy'ajtin xpaattit. ²⁵ Pøn jaty tuki'i'yi t'a'ejxigyøjxp ku kyuyatwa'añ jøts kyuyajta'aky yikxon, ka'ats ja sa yjaty ku tyimgyuyajtni. Ja'agøjxpts ja jade'en kyuyata'akti jøts ja tpøktit ñiguyaty midi idø'on ja kuyajtpi pyøjktip ku ja myajada'akti, jøts ka'ap ja xemikøjxp y'ity; ja xemikøjxp pikta'aky adøm ya naqxwiñ nbatnajxyim midi wyinaty yikmøø'yimp xemikøjxp. ²⁶ Nnija'wip øts wa'ats midi'ampy ø nniikxpy ka' øts nugo nbuty wimbeets kugoots; nbaatp øts idø'on ja' midi ø nbaatwampy, ka' øts nugo n'adi'ich. Ka' øts jade'en nugo ngojxwidity jøts øts nika' ti ndukpety. ²⁷ Jawyeen øts yikxon nnay'a'ejxiyi jøts øts nne'kx ndukmibiky pøni sa øts idø'on ja ndsøky pøni ti øts idø'on ndunwampy, jøts øts kidi nøjkk jawyeen tsø'ødyumbim njaty Dios wyingujkp yam øts ja jaa'y tø ndukmadowdi sudso'ampy ja nitsoojkin ja pa'ayo'owin ja tpaattit, jaa ku øts ne'egi nga'ukpøjknit ja niduñ.

10

Ja' yikni'ana'amp jøts ja maxandsaa uk øy ti jadu'uk awanax kyayik-diosjawit

¹ Mnijawidip migu'uktøjk idø'on ku ja møjaa'dyøjk niduki'i'yi ja Dios ja yoots tyaduu'wajidøø, jøts nayide'en niduki'i'yi ja Dios øy tyuktanajxidøø ja Tsajpts Mejy. ² Jade'en idø'on ja ndejint niduki'i'yi tpaattøø ja nøbajtin jøts ja tmøøt'etti Moisés. ³ Niduki'i'yits nayide'en tjøø'kxtøø ja tsajppjotpit jii'kxy, ⁴ jøts nayide'en niduki'i'yi t'uktøø ja tsajppjotpit nøø. Pø ja'abi nøøjxi ja y'uktip midi jam mu'tp tsagøjxp midi payø'øydip. Ja Cristots idø'on ja myøk'ajtin ñanky'ejxip jam tsagøjxp. ⁵ Namayts ja'adi pøn ja Dios Teety tkamimadoodøø jøts ja jamyi abak etjotp y'oo'knidøø.

⁶ Ejxpajtin adøm idø'on ya xmø'øyindip paty idø'on ja jade'en yjatti jøts adøm ja ka'øybi tsinaa'yin ngatsojkin sam ja ttundi. ⁷ Paty kidi meets ja maxandsaa xwindsø'jkyinidi sam ja ttundøø niwinaagin, jøts sam idø'on ja yiknigajpxy nøkyøtpty: "Winets ja jaa'y kaabyi ukpi y'ixakti jøts twinxødundi ja maxandsaa." ⁸ Ka'ap adøm idø'on xem yam nugo nnamyøøt'ajta'ant kija' uk tu'ugyi ja amaajtsk jaa'y tyik'ettit ja ñiyaa'y uk ja ñidø'øxy, sam ja jaa'y tkamøjpiktaktøø winaagin ja y'amajtsk'ajtindi, jøts ja'ayi tukxøøwyi tku'oo'kyidi ja pyøky ni'ee'pxigøø mil. ⁹ Ka' mibaat ja Dios tyuda'aky'ajtin ndana'ejxin uk nugo nwinmaa'ñ'ejxwa'anin sam ja jaa'y winaagin y'adøtstøø midi ja tsaa'ñ ojts yikxon chu'tstigøyidi. ¹⁰ Jøts nisa xkatejtiti ja Dios pøni sa ja mduñidi. Ka'ap jade'en m'adø'østtit sam winaagin y'adøtstøø ku ja tka'ødeyji ja Dios, ja' midi ojts tyagida'agyidi ja ayo'on ku Dios ja tyumbi tkejxy midi ja o'jkin ojts tyukpaadyidi.

¹¹ Adømgøjxp idø'on jade'en ja møjaa'dyøjk yjajttøø kyubattøø, jøts nay adømgøjxp ojts jaabyety jade'en tyañ jøts yø n'ejxpaj'ajntin jøts jade'en ngadsinaa'yint sam ja chinaadyøø ixa ja nwindson'ajtim Jesucristo wyingoni ja tyiidyu'aktin xøøw. ¹² Pøn jaty yjawi nisa kajattip, pøn dø'on yjawi øy tsinaadyip, wants ja tnay'ejx'ityidi jøts ja kyawinmaa'nmya'attit. ¹³ Nay ja ayo'on midi ixyam mdanajxtip ku yik'ejxmatsti ja mjanchja'windi pøni mjanchpadundip idø'on uk ka'; nayja'abi ayo'on idø'on øy pøn tø tpaaty tø t'ixy. Øyts meets ja Dios x'ajot'att jøts ja m'agø'dukidit m'axajtukidit jøts niyjøjkk xanaxtit ja ayo'on midi kamidanaañi. Kuts wyinaty ja ayo'on tyimyjawani møk mbaadyidi, ja Diosts mmo'ojidip ja wyinmaa'ñ sudso ja xmimada'aktit.

14 Paty migu'uktojk idø'on ja maxandsaa uk jadu'uk øy ti awanax xka'ukwindsø'jkiñidit, ixmatsti yø yjade'embì tsinaa'yindi. 15 Wa'atsxi xnimadowdi sà mee nnøjmi wijy kejy ti sà m'ejxidi. Kò'ømts yikxon x'ukpayø'odyit pøni janch kidi yjade'eni sà ø nwa'añ. 16 Ku adøm ja tsapnøø kunuu'kxy n'uujkyindi ja Dios adøm idø'on jade'en nwindsø'øjka'am, ja Cristo dø'on ja ñi'jpy namyayi n'uujkyindip; kuts adøm ja tsapkaaky nyikwa'kxyindi ja Cristots adøm ja ñe'kx namyayi ñii'kxyindip midì ja y'ø'y'ajtin xukpaajtimp ku ja ojts xku'o'jka'am jam kruskøjxp. 17 Øy adøm njanamaya'am tu'ugyits adøm ja tsapkaaky ndamujkyindi, patyts adøm jade'en amuum tu'ugyi n'ijtyindi Dios wyingujkp pøn jaty tjanchja'widip ja Cristo.

18 Ejxtits ja Israelit kajp ma ja jaa'y tkaydi tjøø'kxiti ja windsø'jk'i'ñi; ja'ats idø'on ja ñamyayi tu'ugyi yik'ejtidip, tu'ugyi ja tumjade'en wyinmaydi nixem niyam. 19 Ka'ap øts idø'on nnimy ku ja maxandsaa uk jadu'uk øy ti awanax yjujkyidi, jøts ka'ap ø nnømi ku ja tsu'uch jawaani øy midì ja yiktawindsø'jkidip. 20 Yide'enxi øts idø'on ja njatijy, pøn jaty ja Dios tkanija'widip jøts ja windsø'jkin ja tpiкта'akti tsamaxan uk øy ti jadu'uk awanax wyindum y'agø'øm, ja miku' dø'on ja wyindsø'jkidip jøts ka'ap ja Dios; ja'ats meets idø'on ngadamidsøjkpy jøts ja miku' yja' xkupøjkidit. 21 Ka'ap ja mbaat'atyidi jøts mee majtsk jøøjp mdsøønit yam meets ja nwindsøn'ajtim ñi'jpy xja'uujkiyi, jøts nayide'en x'uujkmiyidi ja miku' ñøø; yamts meets ja nwindsøn'ajtim ñe'kx xjøø'kxiyi jøts ja miku' yjii'kxy xjøø'kxmiyidi. 22 ¿Ja ti adøm tø ndøjkiñam? ¿Nugo taguyajtpi jøts jade'en ja nwindsøn'ajtim nugo nyik'ambøjkint? ¿Ja tyimyabaat adøm nmøj'ajtin jøts adøm ja ne'egi nyik'amutskant'ant?

Ka'ap ja ngø'øm ja' n'ixa'ayint, ja tsojkin ja pa'ayo'owin ne'egi ndamiyøjxin ja nmigu'uk

23 Janch ja jade'en idø'on sam ja ayuujk wya'añ ku o tigati nduu'nint, nìpøn ja xkadabayø'øiyint; øy dø'on ja jade'en yjawa'añ, ka'ats tuki'iyi y'ødyuñ pøni ti yiktump; jabi ka'axi ja Dios yjanchja'win jade'en tuki'iyi xatøjka'ant. 24 Ja nmigu'uk adøm idø'on ja y'ø'y'ajtin n'ixaajya'amp jøts ka'ap ja ngø'øm ja' nugo ndunk'ajtant ja'ayi.

25 O mee tigati xjøø'kxt pøni ti jaty mjuudyip maayjotp, ka' xyiknidøwidit ma ja tyiktsoondi, ku nugo mnadyagumayidit; 26 jabi nwindsøn'ajtimxi ñaxwii'ñit yø' jøts tuki'iyi pøni ti jaty ya ejtp naxkijxy.

27 Pøni mwaajidipts ja jaa'y kaabyi pøn ja janchja'win tkamøøt'ajtp, kupøkti panøjxiti jøts kaydi jøø'kxiti pøni ti myikmøødyip jøts ka'ap ja xyiktø'ødit pøni ti pøni pøn yiktawindsø'øgi, jøts niti xkagumayjawidit. 28 Kuts jam tu'ugin ja jaa'y jotmøn wya'ant ku ja'abi tsu'uch ja maxandsaa tø yiktawindsø'øgi, ka'ats meets ja xjøø'lxxt, jøts ja mmigu'uk xkanankñaagumayiyidit ku ja nugo ñabyøkyjawiyidit ja'agøjxp ku ja janchja'win ja okwa'añ tyiktøwdinim tyiktuda'aktinim. 29 Ja mmigu'uk øts idø'on ja wyinmaa'ñ nnigajpxip, ka' mets mja'.

Jamts pøngapøn tyiktø'ødit jøts wya'andit: "¿Sudsøts ja wenk jaa'y nyikmøjtøjkiiyt ne'egi ja wyinmaa'ñ jøts øts nja' nika'?" 30 Jabi n'ajot'ajtpyxi øts ja Dios ku ngay ñii'kxy, ¿tits øts idø'on xabagajpxtip kuts ja'abi kaaky ndupøkt?" 31 Ots ja yjade'eni, pøni mgaadyip m'uktup uk pøni ti jatyts mgundip, tum ja Dios køjxp ja xu'undit jøts ja jade'en xyikmøjtøjkidit. 32 Kidi mee xuñ midì ja mmigu'uk tyadigø'odyip: ni ja israelit jaa'y jade'en xkatu'undit, ni ja' pøn ka'israelit jaa'y'ajttip, ni ja' pøn ja Dios Teety tø myø'øyidi ja janchja'win jøts ja nwindsøn'ajtim tmibøjktit. 33 Kuts øts, ja'

ø n'ixaapy sudso øts ja nmigu'uk nyikjotkujk'att; ka' øts ngø'øm øy'ajtin n'ixa'ay, jøts øts nmigu'uk yikxon chøønidit jøts wyinaty ja nitsoojkin yikmo'odi.

11

¹ Tundi nayide'en pøni sã ø nnajstuni, pø nay ja Cristoxi ø nni'ejxuujtip ja chinaa'yin.

Sã yjaa'y'attit ja tø'øxyøjk mã ñamyukyidi ja janchja'wibidi

² Migu'uktøjkti njanchtakajxakpy meets ku ø xja'myatsti, jøts ku nayide'en xpadundi ti jaty tøndukmadowdi. ³ Ja'ats ndsøjkpy jøts xja'gyukidit ku tu'uk tu'uk ja yaa'dyøjk ja Cristo ñigubajk'aty, jøts ku ja yaa'dyøjk ja ñidø'øxy tñigubajk'ajtm jade'en sam ja Dios Teety tñigubajk'aty ja Cristo. ⁴ Pøni ka' ja yaa'dyøjk ñaguyujptu'udyi ku Dios t'ajot'aty uk kuts ja Dios yja' tjanigajpxi, kyamøjpiktakpy idø'øn ja Cristo ja' pøn nigubajk'ajtiyip. ⁵ Pøni ka'ats ja tø'øxyøjk ñaguyujuuxy ku ja Dios t'ajot'ajtpi tøkø, uk kuts ja Dios yja' tjanigajpxi, kyamøjpiktakpyts idø'øn ja ñiyaa'y ja', nayide'enxi ja tpatni kidi ja jeexyip tø ñaguyukaa'ptu'udyi. ⁶ Pøni ka'ap ja tø'øxyøjk ñaguyujuuxy, wants ne'egi tñagyuka'aptutkixy. Pøni tyatsø'ødyumpts jade'en ja kyubajk keepy, wants ne'egi tpiktã'aky ja kyujuux. ⁷ Nagyujuptu'udip idø'øn ja yaa'dyøjk pø ja Diosxi ja myøj'ajtin ja chuj'ajtin ja yiknigaxø'jkip ku ja nayide'en tø yik'ø'yiyi sam ja Dios t'ixy. Jøts ja tø'øxyøjk ja ñiyaa'y myøk'ajtin ja yiknigaxø'jkidip. ⁸ Kuxi ja Dios tyik'ø'yiyi'ñ pø ja yaa'dyøjkxi ñikøjxp ja Dios tju'jty ja tø'øxyøjk. ⁹ Yaa'dyøjkøjpxi ja tø'øxyøjk y'ø'yiyi'ñ, jøts ka' tø'øxyøjkøjxp ja yaa'dyøjk y'ø'yiyi'ñ. ¹⁰ Patyts idø'øn ja tø'øxyøjk ñaguyujuuxit jøts ja jade'en tyiknigaxø'økt ku ja yaa'dyøjk ja y'ane'emy, jøts ja Dios y'ankilis nayide'en yjotkujk'attit. ¹¹ Nnija'wa'ampts adøm, ku ja janchja'win nmøøt'ajtyindi, ku ja yaa'dyøjk jøts ja tø'øxyøjk kuwani tu'ugyi y'etti. ¹² Janch tiyxi dø'øn ja' ku dø'øn ja tø'øxyøjk y'ø'yiyi'ñ, ja yaa'dyøjkts ja Dios yiktuun, nayide'en yjanchi ku tø'øxyøjk ñikøjxp kye'exy yaa'dyøjk yã nãxwiin; ja Diosts jade'en wãmp.

¹³ Kø'øm mee x'uknigajpxt pøni øyide'en ku ja tø'øxyøjk ja Dios t'ajot'att kuwa'ats, jabi ka'axi ja y'øyi. ¹⁴ Tsø'ødyumbim ja yaa'dyøjk pyidsimy ku ja wyaay ja tyikyon'anaxy, ka'ap adøm jade'en ngostumbri yø'øyindi. ¹⁵ Yiktakajxakpts ja tø'øxyøjk ku ja wyaay ja yøn, pø tøxi ja yiktanibiktaagi jøts ja wyaay ja kyubajk ttanipett. ¹⁶ Pøni pønts tkaja'gyukiwyamp sã øts idø'øn tø njawa'añ, ñijawip idø'øn ja' ku øøts ka'ap ja wenkpi winmaa'ñ nyiktuñ jøts ni ja' jade'en kyawinmaamyidi pøn jaty ja Dios tø wyaamukyidi wyejtsmukyidi øy madsoo, ja'agøjxp ku ja tø tjanchjawidi ja Dios.

Ku kya'ukyikmøjpiktakni ja nwindson'ajtim kyaajyik y'uujkik mididi ja ñajstunip ku ja ya'ux'ajty

¹⁷ Ku meets yãm nnijayi kidi ngajxa'akwampyp meets, ku yjawi mjanamyukyidi ñawine'en ja mga'øpyidsø'mxiyidi jøts ni mga'ødyuñidi ja yjawi. ¹⁸ Jade'en øts ja jaa'y xumdamimadya'akti kuk mee mjanamyukyidi mnawya'kxibik meets jam jøts mganamyee'kxyidi; nmibijkpy øts idø'øn, pø jade'en idø'øn jam yjanchnjaty. ¹⁹ Kuwanidsik idø'øn mnawya'kxidit jøts idø'øn ñigaxø'øktit pøn idø'øn Cristo yja' yjanchnpaduujnidip, jøts pøn idø'øn nugo nadyejidip jøts ku Cristo ja tpadundi. ²⁰ Kuts meets idø'øn jade'en mganamyee'kxyi, nika'ats meets ja nwindson'ajtim Jesucristo y'a'ux x'ukja'gyukiniyi, ni xkanijawidi pøni sudso yiktuñ. ²¹ Anaxukpimxi meets jam kø'øm a'ux xninijky ku ja ka'ayin tpaaty, jamts muum kyaku'uxyidi jøts

muum nugo tyimy'ukmuktigøøñidi. ²² ¿Ti ka' meets mdøjk te mā mga'adyit? Mgamøj'ejxtipxi dø'øn ja janchjā'wip jaa'dyī ku jade'en m'adø'østi, jøts namyikaxi mwīnbidsømdi ku ja mmigu'uk pøn ayoodip jam xwingayidi, jøts ja nugo xuk'ayoojidi. ¿Sats meets idø'øn nnøjmit? ¿Ndsaaçkajxa'akp meets idø'øn ku jade'en m'adø'øtsti? ¡Nijuuni xøøw meets ya'atpi ngadakajxa'akt!

Ku ja nwindson'ajtim yjaak'uk'a'ux'ajtni møøt ja pyabøjkpitøjk

²³ Pø ja nwindson'ajtimxi ø kø'øm tø xmø'øy midī mee tø ndukyikyujy. Ku dø'øn ja nwindson'ajtim Jesús wyīnaty yikøyakwani ux, nay ja'abi uxts idø'øn ja tñixajiyi'ñ tu'uk ja tsapkaaky, ²⁴ kuts ja Dios Teety t'ajot'ajty jøts tkajxajky, wīnets ja t'adujkpajky ja tsapkaaky jøts wyaañ yide'en: "Kaydi, øts idø'øn ya'at nne'kx midī meets mnitsoojkingøjxp inet yikøyakp. Mdu'undip idø'øn ya'at jade'en jøts øts xjā'myajtspajt'attit." ²⁵ Kuts idø'øn ja wyīnaty tø y'a'ux'atti ixjats ja uujk'i'ñ tu'uk tñixajiyi'ñ jøts yide'en wyaañ: "Ya'at tsapnøø'uujkin idø'øn ixyam tamp ejxpajt ku ja Dios Teety ja wyanda'aky tyik'aduky sam ja ttami'awa'anīyī'ñ ja naxwīl'ñit jaa'y ja nitso'ok'ajtin. Ëyamts idø'øn ja cho'onda'aky ku øts nni'jpy inet wyīdsu'unt wyīdaxt. Kuts ya'at tsapnøø'uujkin xumītu'undit, øts nja'myajtsingøjxp yø x'adunīdit." ²⁶ Jøts meets mīgu'uktøjk idø'øn, ja nwindson'ajtim mee mja'myejchp ku meets ja tø mgu'oogiyi ku jade'en ja tsapkaaky xka'adyit midī namyayi ñe'kx'ajtpy, jøts ku ja tsapnøø jade'en x'ukunaxit midī ja namyayi ñi'jpy'ajtpy kunim ja mye'ent jadigøjk.

Sudso ja nwindson'ajtim kyaajyik'y'uujkik'yikupøkt midī ja ñajstunip ku ja y'a'ux'ajty

²⁷ Ja nwindson'ajtim Jesucristo yjamīdundigøøpy pøn idø'øn yikxon tka-jøø'kxp tka'uukp ja nwindson'ajtim ñe'kx jøts ja ñi'jpy. ²⁸ Patyts idø'øn yikxon jawēne xpawīnma'adyit sã ja mdsīnã'yīn xyikyø'ødyi, namga'anīm wyīnajty xni'awīdi ja nwindson'ajtim ñe'kx jøts ja ñi'jpy. ²⁹ Ja kyø'øm ayø'onxi ja y'ixaapy pøn nugo tñi'a'wīp ja nwindson'ajtim chapnøø'uujkin. ³⁰ Ja'agøjpxi dø'øn may ja mmigu'uk pã'amøøtti jøts kajotmøjkti, jøts muum tø y'ookti. ³¹ Kuts adøm kø'øm a'ejxi ndu'unīnt, ka'ats ja nwindson'ajtim jade'en xīdyu'unīnt. ³² Kuts adøm ja nwindson'ajtim xīdyu'unīm ja'agøjxp ja ttuñ jøts ja xukjā'gyukant jøts ngamøøtkudigø'øyīndit ja pojkpītumbi jaa'dyī midī tkajanchjā'wīdip ja Dios.

³³ Paty mīgu'uktøjk idø'øn, ku mnamyukīdit jøts ja nwindson'ajtim ja chapnøø'uujkin x'atsjā'myatsīdit, nay'awexīdi jøts tu'ugyi mdsapnøø'uuktit. ³⁴ Pøni jam pøn yu'øøky, wan jamyī ne'egi kyø'øm tøjkotp t'ukay, jøts ja Dios wyīnaty kyadukuwanjatīyī ku ja tsapnøø'uujkin ja nugo tyikwa'ant nanktyamu'ugi nanktyaku'uxi. Mīdi'ibi jaty myīktøødīp jaanīm øts ja wyīnaty nnīgajpxy ku mee n'ats'ext.

12

Ja wījy'ajtin midī ja Dios Espīritu Santo yajkpy

¹ Mīgu'uktøjkti, jaa ja ayuujk midī ø ndsøjkpy jøts meets ja xñījawīt ku Dios Espīritu Santo tyaky ja wīnmaa'ñ ja wījy'atīn jøts ja tmø'øy ja jaa'y kija'.

² Mnījā'wīp mee ne'egi wā'ats ku mee wyīnaty xkamībīkñīm ja nwindson'ajtim Jesucristo, ja maxāndsaaajīmts meets tu'uk tu'uk y'lijty ja'ayi mwīndsø'jkdīdip. ³ Paty meets yam ndukmadøy jøts xñījawīdit ku pøn wya'ant: "¡Mīku' yø Jesús!" kīdi ja Diosīp y'Espīritu Santo ja wyīnaty jade'en yikwaañīyīp. Uk jadū'uk pøn nugo wyāmīt: "¡Ja Jesús idø'øn møj wīndsøn!"

tiyts ja wyinaty yjanchwa'añ pøni Dios y'Espíritu Santo ja wyinaty jade'en yikwaajniyip pøni ka'ats myigajpxigøopy Dios ja wyinaty.

⁴ Mayjøøjp idø'on ja jaa sa pøn øy tigati tjaty, jøts kija' ja yikmøøt'aty pøni sa pønjabøn ja wijy'ajtin tø yikmø'øy, tum Espiritu Santo wyingujkpts ja chøøn. ⁵ May tunkjøøjp yikmøøt'aty, tu'ugyits ja nwindson'ajtim Jesucristo yiktamiduñ. ⁶ Kawinaak jøøjp ja ødyunk nmøøt'ajtyindi, tu'ugyits ja Dios ja xmø'øyindi. ⁷ Ja Dios idø'on ja ejxpajtin tu'uk tu'uk tmøøpy ja jaa'y, jøts idø'on ja tyiknigaxø'økt ku ja Dios Espiritu Santo ja tmøøt'aty, jøts ja niduki'iyi yikta'øy'att. ⁸ Dios Espiritu Santo køjxp idø'on ja Dios Teety ja jaa'y tmø'øy ja wyiy'ajtin jøts ja tiy kyajpxwejt, jøts nayide'en ja jaa'y tmøømyi ja xpiky'ajtin jøts ja øy yik'ixpøjktit. ⁹ Jamts ja jaa'y pøn ja Dios Espiritu Santo janch møj jøts janch møk ja janchja'win myø'oyidi, jamts pøn yikmøødyip ja øybi møk'ajtin jøts ja pamaa'y tyiktsø'øktit. ¹⁰ Jam pøngapøn tmø'øy jøts ijxyimbi ka'ijxyimbi ja ttu'unt, jøts jam pøn myøøpy jøts ja Dios kyajpxy Dios y'ayuujk ja tnigajpxidit; jamts ja' pøn ja Dios tø tyamidøjkyidi jøts ja t'ejxkaptit pøn jaty ja ka'øybi winmaa'ñ tyiktundip jøts pøn ja øybi winmaa'ñ tmøøt'ajttip; jamts nayide'en pøn tø yiktamidsøkti jøts kawinaak ja ayuujk tkajpxtit midi ja myigu'uk kyakajpxtip; jamts ja'adi pøn tnamadoodip wa'ats ja ja'abi ayuujk jøts ja tnigajpxti ti dø'on ja tyijpy. ¹¹ Tu'ugyits idø'on jade'en y'adi'ich ja Dios Espiritu Santo, jøts idø'on ja tyikwa'kxy ja wijy'ajtin pøni ti dø'on ja pønjabøn tyukjatwampy kø'øm ja tø ttanibiktaagi.

Ja nwindson'ajtim tnigubajk'ajtp niduki'iyi ja jaa'y pøn tjanchja'widip ja Dios

¹² Jade'en idø'on ja Cristo n'ukpiktaajkint sam tu'uk jaa'y ñe'kx midi janch may tanibiktaagi tum tigach; øts idø'on ja kø' ja teky kija' ja tunk tø yiktanibiktaagi, tu'ugyit ja ñe'kx ja y'ity. ¹³ Nayide'ents adøm idø'on øy yjapøni, yja'israelit jaa'y uk yjaga'israelit jaa'y, yjagreciit jaa'y, yjamidumbi jaa'y uk yjanitøky jaa'y, ku adøm idø'on tø nnøbejtyim tu'ugyit adøm idø'on ja ne'kx namyayi nyik'øya'am Dios Espiritu Santo køjxp; jøts adøm jade'en ja tu'uk tu'uk tø xatøjka'am.

¹⁴ Ka'ap ja ne'kx tukjøøjpyi tmøøt'aty midi jaty ja yiktumpy, pø may jøøjpxi ja tmøøt'aty. Jade'ents ja y'amuum'aty ku ja ka'pxy tmøøt'aty ijxyim ka'ijxyim. ¹⁵ Øy yø teky yjawa'añ: "Ka'ap ø nduñ nayide'en sam ja kø' paty ø nipøn xkatunk'att", kidi ja'agøjxpts ja kya'ukpaat'ajtniyit ja ne'kx. ¹⁶ Uk y'ukwamit inet ja tatsk: "Ka'ap øts ja ween tyunk ndujni paty ø nipøn xkatunk'att", nigidi ja'agøjxpipts ja ne'kx ja myajtstuujtiniyt. ¹⁷ Ku jeexyip tum ween nne'kx'ajtyim, ¿sudsots jeexyip nmadø'øyim? Uk kuts jeexyip tum tatsk nne'kx'ajtyim, ¿sudsots jeexyip nxuu'ka'am? ¹⁸ Tø dø'on ja Dios ttanibiktaajkigyijxy ti jaty jadu'uk jadu'uk ja ne'kx tyu'undip sam ja kø'øm tø tstsøky. ¹⁹ Ku jeexyip tukjøøjpyi y'amuum'aty, ¿mats jeexyip ja maybi tyøkidi midi tyika'pxtip tuk'amuum ja ne'kx? ²⁰ Jabi nnija'wimpts adøm ku mayjøøjp chøkyi winets njaa'gyaxø'jkindit, pø tu'ugyixi ja ne'kx.

²¹ Ka'axi dø'on ja ween tnøjmit ja kø': "Ka' me nyiktunwa'añ"; ni ja kubajk tkanimaamyit ja teky: "Ka' me n'ajot'aty." ²² Jøts midi idø'on yjawi ka'a'ejxin kaxø'kp ja' idø'on ne'egi yikxon yik'ajot'ajtp, ja idø'on xyikjujky'ajtindip. ²³ Jøts midits yjawi kayiktsojxp ja'ats ne'egi n'ejx'ijtyindip jøts ja nnixøjxyim nnipijkyim; midits adøm ngananky'ejxwa'añimp ja'ats adøm janch'amaay ndø'øñim nyu'uchimp. ²⁴ Jade'en idø'on ja Dios tø xanibiktaajka'am jøts adøm ja ne'egi nmijotigø'oyint midi yik'ejxp ka' tyuñ, ²⁵ jøts kidi ki'abikyip nugo øy pøn tyuñ øy sa, pø nabyudøjkyidipxi dø'on ja'adi nixem niyam wan ja

sa t'ijxyidi, jøts ja amuum tyikjujky'ettit tuki'iyi ja ne'kx. ²⁶ Pøni tsaachip o magama tukween ja ne'kx, amuumts ja pøjkpi ambi yikja'wigyixy øy maðsoo; kuts øy maðsoo tukween yikxon yik'ejxy'ejtmi kunim ja yikxon chø'øky, tyimñejkpts nayide'en tuki'iyi øy maðsoo ja ne'kx.

²⁷ Meetsts idø'øn ñamyayi ja Cristo mne'kx'ajttip jøts jade'en meets ja mbikta'agyi sam ja kø' teky, ween aaw tyuñ, uk jadu'uk øy ti midi møøt kya'pxy ja ne'kx. ²⁸ Tøts idø'øn ja Dios Teety ttanibiktaagi ti tyu'undip nidu'uk jaty ja jaa'y pøn ja Dios tmibøjktip: midu'uk, ja nwindson'ajtim kyudanaabyitøjkti; mimajtsk, pøn tnigajpxidip ja Dios kyajpxy ja Dios y'ayuujk; midigøøk, pøn yik'ixpøjktip pøn kajpxwejtíp; jøts nayide'en pøn ijxyimbi ka'ijxyimbi ttundip, møøt nayide'en pøn ja pamaa'y tyiktsoktip tyikmøkøjktip, møøt ja pudøjkibitøjkti, jøts nayide'en ja ana'ambitøjkti, møøt ja'adi pøn tkajpxtip ja wenk aaw ja wenk ayuujk pøni sa Dios ja kø'øm yikajpxwa'añidi. ²⁹ ¿Pønts idø'øn janchja'wibi'ajttip? ¿Niduki'iyi ja nwindson'ajtim tkudanidi? ¿Tum ja' tnigajpxidip ja Dios kyajpxy y'ayuujk? ¿Tum ja' yik'ixpøjktip? ¿Uk tyumdundip idø'øn ja ijxyimbi ka'ijxyimbi? Ka' yjade'eni. ³⁰ ¿Tyumøøt'ajttip idø'øn ja møk'ajtin jøts ja pamaa'y tyiktsoktip? ¿Uk kyajpxtip idø'øn niduki'iyi kawinaak ja kanimadooni ayuujk? ¿Uk ñimadoogøxtip idø'øn pøni sa dø'øn ja wenk ayuujk wya'añ? Pø ka'axi. ³¹ Tajotigøyts sudso xpaattit yø'øbi øy'ajtin sudso ja Dios mgunuu'kxidit jøts myikwejidit myikajidit. Ixyamts mee nduknijawiwya'añ ja jawaani øybi tuu' sa øy tsuj njaa'y'ajttindit.

13

Ja tsojkin ja pa'ayo'owin

¹ Ku njakajpxt kawinaak ja wenk aaw kawinaak ja wenk ayuujk øy jyatsajpjotpit ayuujki uk øyts yjanaxwii'ñit ayuujki, pøni ka'ats øts ja tsojkin pøni ka'ats øts ja pa'ayo'owin nmøøt'aty, nayide'ents ja tpatni sam tu'uk ja tambur tawa'ats midu' nugo jagojpk, uk sam ja platiiy midu' nugo na'amp.

² Øy øts jeexyip ja Dios kyajpxy ja Dios y'ayuujk tuki'iyi njanigajpxi, uk njanija'wigyixyts øts tuki'iyi ti jaty memp ti jaty kidakp midu' ka' pøn t'ijxñim midu' ka' pøn tnijawinim, uk njamøøt'atyts øts tuki'iyi ja ixpiky'ajtin ja wijy'ajtin, uk nja'ajot'atyts øts ja Dios kawine'en ku øts ja ijxyimbi ka'ijxyimbi njatuñ jøts øts ja kojpk ngiidyigach, pøni ka'ats øts ja tsojkin pøni ka'ats øts ja pa'ayo'owin nmøøt'aty nitits øts mibaat ngawa'añ, tyimñugo øts iiy.

³ Uk njadagumaagyijxpyts øts ja ayooobi jaa'y tuki'iyi ja nbikta'aky, uk njanagyøyakyits øts jøts øts ja jaa'y xyiknitøty Dios køjxp, niwine'enin øts ja ngadamajada'akt, pøni ka'ap øts ja tsojkin, pøni ka'ap øts ja pa'ayo'owin nmøøt'aty.

⁴ Pøn tsojpk pøn pa'ayoop, tuda'aky ja yjaa'y'aty; jøts øy jaa'y ja', ka'ap myigu'uk ja øy ti tami'ekyi uk niti tkamo'owa'añ; jøts ka'ap ja ñamyikexyi, ni kyanadya'agajpxiyi ja' pøni ti ja tyumpy. ⁵ Ka'ap ja ka'øy'ayuujk ja ka'øwynmaa'ñ uk ja ka'øchinaa'yin ja ttunk'aty; jøts nika' ñadyamidsojkijxyi tuki'iyi yam ja myigu'uk y'ayøy wyinmay; ka'ap ja tuki'iyi tta'ambiky jøts nika'ap ja ejtp y'ekyi. ⁶ Ja y'øchinaa'yin ja myigu'uk ja tyadaxondakpy, kidi kya'øchinaa'yin ja ojts ttadaxonda'aky. ⁷ Pøn tmidanaapy tuki'iyi pøni sa yiktuñ jøts pøni sa yiknojmí, jøts jyøp'ixxy ja' ku kuwani ja tsojkin ja pa'ayo'owin myøjtøki, jøts ka'ap ja tigati tta'amutski, ejtp ja tyuda'aky'ajtin ja ttamajada'aky.

⁸ Nijuuni ja tsojkin ja pa'ayo'owin kyagudigöy. Ja'tp ja et ja xøøw ku wyinaty ja kajpxy ja ayuujk kya'ukyiknigajpxnit midi ja Dios yajkpy, jøts wyinaty nayide'en kawinaak ja wenk aaw ja wenk ayuujk kya'ukyikajpxni, jøts wyinaty ja ixpiky'ajtin kya'uktuni. ⁹ Ka'ap adøm tuki'iyi ka'pxy nnija'wa'am, jøts nika' ka'pxy yiknigajpxy ja Dios chojkin ja Dios pya'ayo'owin midi adøm ja xjadukmadowimp. ¹⁰ Kudigø'øpyts ya'atpi nija'win ku wyinaty tuki'iyi n'ijxyim nnija'wa'am pøni sa dø'øn tyiyi kya'pxyi tuki'iyi.

¹¹ Kuts y'ijty nmutsk'aty, mutsku'ngin øts y'ijty ngajpxy nmadya'aky, mutsku'ngin øts y'ijty nwinmay, jøts mutsku'ngin øts y'ijty nayide'en nja'gyuki. Kuts ø nyaa'knæa n'ixmatskøjxni øts ja mutsk'ajtin. ¹² Nayide'ents adøm ka' ka'pxy ja Dios yja' nnija'wa'am, winjo'ximp adøm yjawi ku ja nja'ejxpaatwa'añim; jaanim idø'øn ja wyinaty øy wa'ats n'ijxyim. Ka'ap øts ixyam tuki'iyi nnijawi, jaanim øts ja nøjx wa'ats yikxon nnijawinim tuki'iyi sam øts ja Dios ixyam wa'ats x'ixy wa'ats xnijawa'an. ¹³ Jade'ents idø'øn ku n'ajot'ajtin ja Dios, ku njøp'ejxin ja nitso'ok'ajtin, uk ku nmøøt'ajtin ja tsojkin ja pa'ayo'owin, nimidi mibaat kyagudigöy, ettip yø xemikøjpx; tigajtstipts idø'øn nidu'ukjaty, yø tsojkin yø pa'ayo'owin yø ne'egi tyimyjawaani møj, nigidi yø yjadu'ukpi jade'en myajada'akti.

14

Ja kawinaak ayuujk kanimadooni

¹ Kajaats idø'øn xmøøt'attit ja tsojkin ja pa'ayo'owin, amidowdi pøktsowdi jøts ja Dios myikwejidit myikajidit, ja'ats jawaani m'amido'odip sudso ja Dios kyajpxy y'ayuujk xnigajpxidit. ² Pø ja Diosxi ja ja'ayi myigajpxpy pøn ja wenk aaw wenk ayuujk tkajpxp, ka'axi ja myigu'uk ja ñimadøyi. Ja Dios Espiritu Santo ja jayik'awejmijip, ka'apts ja yiknimadøy ti ja kyajpxpy, jøts ti ja jade'en tyijpy. ³ Abikyts ja'amidi pøn ja Dios kyajpxy pøn ja Dios y'ayuujk tu'ugyi tyimdyunk'ajtmijidip jøts ja ttukmadowdi ja jaa'y pøn tpabøjktip ja Dios jøts ja yjanchja'win ja myøktä'aktit ku ja yikajpxjot'amøjkidi. ⁴ Nadyu'uk ja yjanchja'win ja tyikmøji tyikaja'aji pøn ja myigu'uk kanimadoojip ku ja tjakajpxy ja wenk aaw wenk ayuujk; pønts tngajpxidip ja Dios kyajpxy ja Dios y'ayuujk jøts ja ttukmadowdi ja jaa'y pøn tpabøjktip ja Dios jøts ja jade'en tyikmøjiyidi tyikajaajiyidi ja yjanchja'windi.

⁵ Njadamidsøjkpy meets jøts kawinaak ja wenk aaw wenk ayuujk xkajpxtit; jawaani kajaats mee ndamidsøky jøts ja Dios kyajpxy y'ayuujk xnigajpxtit, ja'axi ne'egi jawaani møj tump; ja tump jeexyip nayide'en pøni yiknimadoop jeexyip pøni ti dø'øn yikajpxp yiknimadyakp wenk aaw wenk ayuujk, jøts ku jeexyip yikxon yiknigajpxy tu'uk tu'uk ti jade'en tyijpy, winetimts ja tiy myøjiyidit mya'ayxiyidit ja yjanchja'win pøn jaty tpabøjktip ja Dios. ⁶ Pøni n'ats'ijpxy meets jøts meets ja wenk aaw wenk ayuujk ndamigajpxt, ka' meets ti pudøjkin jade'en nmo'ot. Kuts øts ja nnigajpxt midi ja Dios xuknija'wa'amp, uk ja' midi tiy midi øy, uk ja Dios kyajpxy y'ayuujk mee ndukmadøpy jøts nda'awa'andit, ja'ats idø'øn ti mjanxypudøkiyidip.

⁷ Wan ja ejxpajt t'ukpiktaajkyim. M'ijxy'ajttipxi xuujk sam ja kapxyuujk uk ja kow; pøni ka'ap nyiksuunipaajtyim, sudso jaa'y ja tjä'gyukit pøni ti yikoop, pøni ti yikxuxp. ⁸ Kuts ja jaa'y cheptumidi ku ja puxuujk wa'ats kyawinaa'ñ, ka'ats ja tsep pøn t'a'ejxi. ⁹ Nayide'ents meets idø'øn mjaty; pøni ka' meets ja ayuujk xkajpxy midi yiknimadoop, çsudsø dø'øn yiknijawit pøni ti dø'øn mgajpxtip? ija poj mee nugo mmigajpxpy! ¹⁰ Janch jaa dø'øn may ja naxwiñ ja ayuujk tigach, jøts tyumnimadoodip ja' pøn ja'abi

ayuuik tkajpxtip. ¹¹ Pøni ka'ats ø nnimadø y ja jaa'y pøn ja wenk ayuuik tkajpxp, wenk kugajp jaa'yts øts ja xejt, jøts nayide'en øts ja ndejmit. ¹² Pøni mjanchtajotigøødyip idø'on jøts ja kunuu'kxwyejin jøts ja kunuu'kxkyajin xpaattit x'ejxtit, ja' dø'on mmijotigøødyip midid m dabudøkidip ja mmigu'uk jøts ja yjanchja'win ja myøjidit kyajaajidit.

¹³ Paty idø'on ja jaa'y t'amido'ot ja Dios jøts yikwejit yikajit sudso ttuknimado'ot ja jaa'y pøni ti dø'on ja kanimadooni ayuuik tyijpy. ¹⁴ Kuts ja wenk ayuuik njadakajpxa'akt, ka'ap øts ja nnimadø y pøni ti ngajpxpy ø y øts ja ngajpxaajkin yjatiyi. ¹⁵ ¿Tits øts idø'on njaaktu'ump? Njayiktuñ øts ja wenk aaw ja wenk ayuuik ku ø n'ajot'att uk ku øts nwin'øø't ja Dios, ja' ja'ayi tsojkip jøts ku øts nmøø'tatt ja ja'gyukin ja madogukin. ¹⁶ Sudso meets ja mmigu'uk mmimadøwyit pøn ja wenk ayuuik tkajjtip pøni wenk ayuuik tam meets ja Dios mda'ajot'ajtpy. Kuts ja ka'ap tñimadowdi sa jaty mee mwa'añ ø y meets ja amuki møøt xja'ajot'aty ja Dios, ka'ats ja tja'gyukidi sa meets ja Dios xnøjmi. ¹⁷ Ø y meets ja mdsapkajpxy mabaat yja'øyi, kuts ja ka' yiknimadø y jade'ents ja tpaaty ku meets ka' ti pudøjkin xmø'ø y ja mmigu'uk pøn tkanimadoodip ja'abi ayuuik, jøts ja jade'eñi y'etti, ka'ap ja yjanchja'win myøwenidi kyajaajidi. ¹⁸ Ngajxajkpy øts ja Dios ku øts ja kawinaak xukajpxy ja wenk aaw wenk ayuuik midid mee ka' xkajpxy. ¹⁹ Kuts ø ngajpxy jøts ø n'awa'añ ja jaa'y pøn jaty Dios tja'myajtstip, magoxk aaw øts ja'ayi ne'egi ngajpxy ja ayuuik midid yiknimadoodip jøts ka' kawinaak mil ja ayuuik midid kyayiknimadoodip.

²⁰ Migu'uktøjkti, ku ja ka'ø ybi ku ja pøky xpaattit, jade'en mnabyikta'agidit kidi mutskuna'jk ti kyamayidinim. Kuts mwinma'adyit, jade'en mwinma'adyit sam møjaa'dyøjk yikxon wyinmaadya'an. ²¹ Yide'en jap wya'añ nøky ja kutujuk: "Wenk aaw wenk ayuuik øts nyiktunkpaatp ku øts ja naxwii'ñit jaa'y ø y madsoo nmigajpxt, uk ndanigaxit øts ja' ja' wenk jaa'y midid wenk puix wenk kajp tso'ondip jøts øts ngajpxy jøts øts n'ayuuik ja xyiknajxidit, nijade'ents øts ja naxwii'ñit jaa'y nøjkx xkamibøkti, jade'en wya'añ ja nwindson'ajtim." ²² Ejxpajtxi dø'on jayikmøødyip pøn jaty tkamibøjktip ja Dios ku dø'on ja wenk aaw wenk ayuuik xkajpxti jøts ja Dios ja tmibøjktit, kidi ja'ajip ja jade'en kyujajttip pøn tø tmibøjknidi ja Dios. Abiky yja' ja'amidi ku Dios nayide'en myø'ø yidi ja ejxpajt ku ja yikxon tyukjatyidi sudso ja tñigajpxidit ja kyajpxy ja y'ayuuik, kidi ja'ajipts ja jade'en tyanibiktaajkip pøn tkamibøjktip ja Dios. ²³ Kuts mee niduki'iyi mnamyukit jøts mjamadya'aktit jøts tum tigach ja m'aaw m'ayuuikti, jøts nipøn kyanañimadowidit, kuts ja jaa'y pøn ja Dios tkanija'widipnim jam tyøkidit ma mee mnamyukyidi jøts ja niti nayide'en tkanimadoodimid, ¿ka' meets idø'on ja mo'tpi jaa'y mdejit? ²⁴ Pøni mgubajttiyipts meets ja jaa'y jøts ja tmadø y ku meets ja Dios kyajpxy y'ayuuik xnimadyaajki, pyawinmagyøjxpts ja chinaa'yin ja' jøts pyøky ja tjawit ku ja tmado'ot jøts kudam ja yikpøky'ixy. ²⁵ Jade'ents ja Dios ja tjanchjawit jøts ja tyiknigaxø'køxt pøni sa jaty ja tø chøøni, jøts ja Dios tmøjpkta'akt kuxani, jøts meets ja mnø'ømxit jøts ku meets ja Dios jam xmøøtsøøni.

Tundi tuki'iyi tsuj, jøts tum tanibiktaagi sam pyaat'aty

²⁶ Yide'en me migu'uktøjk idø'on yjawi xuñ ku mnamyukyidi. Jam niwinaagin pøn ttunk'ajttip ja øøk, jøts niwinaagin y'awa'andi, uk ja'ats ja ñigajpxtip pøni sa ja Dios kyajpxy y'ayuuik wya'añ; jamts niwinaagin kya'amaamyidi, wenk aaw wenk ayuuik ja yiktundip, jamts pøn tkajpxnajxtip ja wenk aaw ja wenk ayuuik. Ø y'ajtp ku jade'en xundi, nugo

ku xja'myatsti jøts ku nayide'en ja mjanchja'win xyikmøjedit. ²⁷ Ku ja wenk aaw wenk ayuujk xkajpxtit midi kanimadooni, namajtsk nidigøok ja'ayi mgajpxtit jøts nidu'ukjaty; jøts kuwani tu'uk tkajpxnaxt ja ayuujk. ²⁸ Pøni ka'ats jam pøn, pøn ja ayuujk tkajpxnaxp, ka'ats ne'egi ja wenk aaw wenk ayuujk xkajpxtit, kinadyu'uk ne'egi ja Dios xmøøtmadya'aktit. ²⁹ Nayide'ents xu'undit pøni mnigajpxwandip ja Dios kyajpxy ja Dios y'ayuujk, nayide'ents namajtsk nidigøok ja'ayi mgajpxkojtit, jøts nayide'en nidu'ukjaty, pønts kakajpxtip wants ja ja'ayi tpatmadowdi jøts t'ejxti pøni tøøp uk ka' tyiy. ³⁰ Pøni wyinmaa'nmyøøpyts ja Dios tu'uk ja jaa'y midi jam patmadoop, wants ja tkajpxmi jøts ja y'amo'ont pøn ukajpxp. ³¹ Jade'ents mee mgajpxt niduki'iyi pøni winmaa'nmyøøjyidip ja Dios, jøts jade'en xem yam mnankyixpøkidit jøts mnagyajpxjot'amøkiyidit. ³² Tuda'aky idø'on, tsuj idø'on ja kyajpxtit pøn ja Dios kyajpxy y'ayuujk tngajpxidip, ³³ jabi ja øy'ajtinxi ja jotkujk'ajtinxi ja Dios chøjkpy, ka'ap ja tsep, ka'ap ja nugo o pøngapøn ttatøkit ja madyaajkin.

Nayide'en meets idø'on xu'unt sam niduki'iyi ma jaty ñamyukyidi ja janchja'wibi jaa'dyi midi adøm nmigu'uk'ajtyindip. ³⁴ Ka'ap idø'on ja tøøxyøjk xyikajpxtit ku mnamyukidit, pø ka'axi jade'en kyutuky. Mbadu'undip idø'on ja kuwani sa ja Dios kyutujk wya'añ. ³⁵ Pøni yiktøwandip tigati, jam tyøjkjotp tyiktøødit ja ñiyaa'y; ka'axi y'øgyaxi'iky ku tøøxyøjk kyajpxy ma mnamyukyidi ku Dios x'ajot'atti.

³⁶ Ja'myatsti migu'uktøjk ku meets jawyeen ka' y'ijty xnijawwi ja Dios kyajpxy, jøts ku mee ka' nadyu'ugyi xnijawwi ya'atpi ayuujk. ³⁷ Pøni jam tu'ugin tjawi ku tnijawwi sudso ja Dios kyajpxy y'ayuujk tngajpxtit, uk tø tjawi ku ja Dios Espiritu Santo tø wyinmaa'nmyøøyi, paat'ajtip jøts tja'gyukit ya'atpi ayuujk midi meets ixyam ndaniguejpxy jøts ku nwindson'ajtim yø tkutujki. ³⁸ Pøni ka'ats ja tkutujkjawwi, ka'ats ja nayide'en ja ejxkajpin pyaat'aty. ³⁹ Jade'en migu'uktøjkti, jotmay'atti sudso ja Dios kyajpxy y'ayuujk xnigajpxidit, jøts kidi xpayøødyi pøni kyajpxtip ja jaa'y ja kanimadooni ayuujk; ⁴⁰ tum øy tsujts idø'on ja xu'undit, ka'ap anaøxkim.

15

Ku ja Cristo yjujkpyijky jadigojk

¹ Ja' migu'uktøjk ixyam ndukja'myatswandip midi tønjanigajpxmi, ja Dios ñitsoojkin ayuujk. Ya'at kajpxy ya'at ayuujk meets idø'on tøkxupiky, jøts nay yø' meets idø'on ixyam mdsinaa'y'in'ajtpy. ² Ja'agøjxp meets idø'on nayide'en ja Dios myiknitsøøgyidi, pøni mbadundip idø'on midi tønndukmadowdi, jøts pøni tu'ugyi dø'on ja mjanchja'win xyikyøødyi.

³ Ja' meets idø'on tønndukmadøy midi ø nayide'en tønnyktukmadøy. Tø mee nda'awa'añ ku adøm ja Cristo tøkxu'o'jka'am, ku adøm nbojkpitumbijaa'y'ajtyindi sam jap nøkyijxy yjaabyetyi jøts jade'en ja wya'añ; ⁴ jøts nayide'en tønndukmadowdi ku tyikjutøjkidi, jøts ku ja kyimidigøok xøøw yjujkpyijky sam nayide'en ja nøky tngajpxmi; ⁵ jøts ku ja ojts jadigojk ñanky'ijxyiyi yam ja tø yja'oo'kni jam Pedro wyindum, ja' ja ojts t'ixy jøts jadigojkøjmyi ma ja kyudanaabyitøjk jam wyinatyi. ⁶ Jøts nimagoxk magø'pxñaxy ojts y'ejxmiyi ja janchja'wibi jaa'y tuktøñi, may nay jaa yjujky'attinim winaggin tø y'ooknidi. ⁷ Jøts ojts y'ejxmiyi ja Jacobo midi Santiago yikejpx, jøtsnim niduki'iyi ja kyudanaabyi ojts y'ejxkøjxmiyi.

⁸ Jøtsnim ø tyimy'ix'oojk nayide'en tøn'ejxmi, øy øts idø'on øy tsuj tønngatso'onda'aky n'uktejint sam ja'adi. ⁹ Ja'agøjxp øts idø'on øy ngamøji

ngakøjxpi, pø øtsxi dø'øn ñamyayi jawaani mutsk wimbidsømp, ka'ap øts nayide'en sam ja nwindson'ajtim kyudanaabyidi, jøts ni xjagapaat'aty øts jøts ø nwindson'ajtim kyudanaabyi nyiktejt, jabi ka'axi øts y'ijty nmaa'lxkti pøn jaty tjanchja'widip ja nwindson'ajtim. ¹⁰ Tøts øts ja Dios xjanchmi'ø'y'aty, ja'agøjxpts øts ixyam jade'en njaa'y'aty pøni sa øts ja tø xamidsøky, tøts ja chojkin ja ngupøjki, ka'ap øts ja nugo tø xanaxy. Tø ne'egi jawaani kajaa nduñ sam ja tø tkatundi ja nmigudanaabyitøjkti; kidi øtsipts kø'øm tø ndyimyajada'aky, ja Dios øts idø'øn ja myøk'ajtin jade'en tø xuktuñ y'ø'y'ajtingøjxp. ¹¹ Ka'ats ja ndunk'ajtint pøni øts jawaani tø nduñ, uk tøts ja yjadu'ukpi nwindson'ajtim kyudanaabyi jawaani tyundi; nugo ku øøts tum ja' tø nnigajpxy ja Dios y'øgyajpxy ja Dios y'ø'y'ayuujk mididi mee tø xjanchjawwi.

Ku ja oo'kpi jadigojk yjujkpyøktit

¹² Pø njanigajpxpyts øøts ku ja Cristo tø yjujkpyiky jadigojk, ¿sudsø dø'øn jam muum wya'andi ku ja oo'kpi kyajujkpyiky? ¹³ Pøni ka'ats ja oo'kpi jadigojk yjujkpyøkti, ka'ats ja Cristo nayide'en tø yjujkpyiky jadigojk; ¹⁴ pøni ka'ats ja Cristo jadigojk tø yjujkpyiky, ka'ats øøts ja ngajpxy tyuñ mididi øø ndijpy Dios kyajpxy Dios y'ayuujk, jøts ni kyatumi meets ja mjanchja'win mididi mjadinaadyip. ¹⁵ Kuts idø'øn ja wyinaty janch jade'en, Dios tystigiti ataayts øø nwimbidsømni, pø tøxi øø nnimy ku ja Dios Teety jadigojk tyikjujkpyiky ja Cristo; pøni tiyts ku ja oo'kpi jadigojk kyajujkpyøkti, ka'ats ja yjanchi ku ja Dios Teety ja Cristo tø jadigojk tyikjujkpyiky. ¹⁶ Pøni ka'ap ja oo'kpi jadigojk yjujkpyøkti, ni ja Cristots kø'ømbaat jadigojk tø kyajujkpyiky. ¹⁷ Pøni ka'ats ja Cristo jadigojk tø yjujkpyiky, nitits meets ja mjanchja'win kyawa'añ; nayi mbøkyjotp m'ayo'onjotp mee mdsøøni. ¹⁸ Pøni jade'ents ja', tøts inet idø'øn tyimy'oo'kti pøn jaty ja Cristo tø tjanchjawwi ku tø yjujky'atti. ¹⁹ Pøni yayi adøm njøp'ijxy'ajtyim ja Cristo ñitsoojkin jøts ja nayi yayi ndajujky'ajtint nañwiñ, ti adøm n'ayøøy, adøm ne'egi yikxon ayo'ijxyim jajtint, nigidi pøn jade'en ku adøm jade'en n'adøjtsin.

²⁰ Ka'ats ja yjade'eni, tø dø'øn ja Cristo tyimyjanch jadigojk yjujkpyiky; ja' idø'øn kø'øm midu'uk tø ttunjøpi, jøts idø'øn wyinaty nayide'en yjujkpyøkti ja abiky oo'kpidi. ²¹ Pø tu'ukxi ojts ja jaa'y ja o'jkin tyiktso'onda'aky ya nañwiñ, nayi tu'ukts ja' pøn ojts tyiktso'onda'kmi jøts ja oo'kpi jadigojk yjujkpyøkt. ²² Jade'en sam niduki'iyyi ja o'jkin yikpaaty Adan pyøkyøjxp, nayide'ents wyinaty niduki'iyyi ja jujky'ajtin xemikøjxp yikmo'odi pøn ja Cristo tjanchja'widip. ²³ Tanibiktaagits idø'øn ja wyinaty ja xemikøjxpit tsinaa'yin nyikmø'øyindi. Ja Cristo jawyeen pø ja'axi jawyeen tø yjujkpyiky; kuts ja Cristo mye'entnim jaanimts wyinaty yikmo'odi ja tsinaa'yin xemikøjxp pøn jaty ja tø yjanchjawwi. ²⁴ Jats idø'øn wyinaty tuki'iyyi kyixy, ku ja Cristo wyinaty tyikudigøøgyixy niduki'iyyi pøn jaty jaa windsøn'ajttip nañwiñ, jøts pøn wyinaty yikutujktip, ana'amdip, pøn tmidsep'ajttip ja Dios; jøts idø'øn ja Cristo wyinaty ja Dios Teety tyagidø'iggyixy tuki'iyyi wine'enin ja tja'aty. ²⁵ Pø jaanimts idø'øn ja Cristo wyinaty kuwani yikutuky kunim ja myidsep tteky'aa'anjtkøxt, ku ja Dios Teety ja jade'en wyinaty tø tyamidsøkyi jøts ja myidsep ja tmimajada'akt, ²⁶ jøts ix'oojknim ja o'jkin ja Cristo t'ukmimajadaknit ku ja jujkpyøjkin tyiknañkida'akt. ²⁷ Pø tøxi ja Dios Teety tsoøky jøts ja Cristo tuki'iyyi tyikutukt. Kuts idø'øn ja nøky jade'en yjawa'añ, ka'ap idø'øn ja Dios Teety tyagida'agiyi jøts ja Cristo ja yikutukiyit, pø ja'axi tø tsoøky jøts ja Cristo tuki'iyyi tyikutukt. ²⁸ Kuts idø'øn ja Cristo wyinaty tuki'iyyi tø tmimajadaxixy, winets ja wyinaty ja Dios Teety kyutujk tkupøjkti, pø ja kuxi ja Dios U'ngi. Jøts idø'øn jade'en ja Dios Teety myøjikutujk

o maḍsoo wyingaxø'økt pøn ja Dios U'nk tø ttamidsøky jøts ja myidsep ja niduki'iyi tmimajada'akt.

²⁹ Jam yjawī pøngapøn ja oo'kpi tkunøbatti. ¿Tigøjxpts ku jade'en m'adø'øtsti? Pø nømdipxi ku ja oo'kpi kyajukpyøktit jadigojk, ¿sudsøts ja xkunøbatidi?

³⁰ ¿Ti øøts jeexyip ndamidanaapy ja ayo'on ku øøts njemjaty ndejaty, pøni ka'adam ja yjanchi ku jadigojk njujukpyøjkint? ³¹ Janch ø migu'uktøjk idø'øn nwa'añ, wingon øts ja o'jkin jabom jabom n'ixy; ka'ats øts ja nwandijy, ja'ayi øts nugo ndyimdyajotkujk'ajtpy ku meets ja nwindson'ajtim Jesucristo tø xjanchjawidi. ³² Pøni kajpxwamp øts, nø'ømp øts inet ku øts ja jaa'y jawaani xkayikpa'ookti jam Efeso. Tøts øts ja nmimajada'akti, ¿tits øts idø'øn jade'en nbijky? Pøni janch tiy idø'øn ku ja oo'kpi jadigojk kyajukpyøkti, jade'ents ne'egi ndu'unindit sam wya'andi: "Wants yixxon tjaaktyimkyaa'yindi tjaaktyimy'uujkyindi ixyam jabi o'jkindipts jabom."

³³ Nay'ejx'etidim jøts mgayikwin'øøndit. Sam ja kajpxy wya'añ: "Ja kø'øm ka'ømyigu'uk idø'øn kayu'kxtip pøn tyikma'ttip ja myigu'uk chinaa'yindi." ³⁴ Yiktso'onda'akti jadigojk tiy tsuj ja mdsinaa'yindi, kidi pøky x'uktunk'ajtnidi, pø ka'axi xumnijawidi ja Dios. Paty øts yide'en nwa'añ jøts xtsø'ødyunjawidit ja mga'øwysinmaa'ñ.

Sa dø'øn ja oo'kpi jadigojk yujukpyøktit

³⁵ Jamts inet muum ma tyiktø'ødit: "¿Sudso dø'øn jadigojk ja oo'kpi yujukpyøktit? ¿Sa dø'øn ja ne'kx wyinaty t'ixy?" ³⁶ ¡Xøjknat! ¿Ku me tigati x'ukni'ipy, nay ja tømt idø'øn pidsømp ku ja myuxy? Kuwanixi ja kyudigøy jøts ja ujts myuxy. ³⁷ Ka'axi ja tømt pajk tyimñayide'en t'ixy sam ja ujts midī muxp, øy ja'ariindømt pajki, uk yjamidi tøm̄di. ³⁸ Ja Diosts tanibiktaajkip jøts ja tømt pajk myuxt pøni sa ja ttsøky, jøts pøni sa dø'øn pyaat'atyī ja tømt midī yiknejp. ³⁹ Tumdigachxi tuki'iyi t'ixy tigati; wenk ja jaa'y ñe'kx t'ixy jøts wenkts ja jiyujk ñe'kx t'ixy, wenk nayide'enmi midī ja kyajnk jamdi, jøts wenk ja ajkx ñe'kx. ⁴⁰ Jats ja ne'kx midī tsajpjøtppyit'ajttip jøts nayjaa ja'amidi midī naẁwiin'ajtmidip; midits idø'øn tsajpjøtppyit'ajttip, wenk idø'øn ja chujidi, ka'ap ja nayide'en kyaxø'økti sam ja'adi midī ya tsuj naẁwiin'ajttip. ⁴¹ Wenk yø xøøw tyi'kxy, wenkts yø po' chamami; jøts nayī wenk yø maḍsa' tyøø'kxmidi, jøts tigajstip yø maḍsa', wenk yø tyøø'kxti tu'uk tu'uk. ⁴² Nayide'ents idø'øn yjaty ku oo'kpi jadigojk yujukpyøkti. Putsnip ja' midī ñe'kx yiknitajp, jøts midī ñe'kx jadigojk jujukpyøkp nijuunits idø'øn ja kya'uk'oo'knit. ⁴³ Ja' yiknitajp midī yiktatsø'ødyump, jøts yujukpyiky midī janchtaxonda'akyim xemikøjxp. Ja' yiknitajp midī kamøk, midī kamajadaqp, jøts yujukpyøkt jadigojk midī janch møk møjaaaw. ⁴⁴ Ja ñe'kx yiknitajp midī yikwin'ejxp jøts midī yiktomp yikmajtsp; jøts ja ne'kx yujukpyøkt jadigojk midī kayik'ejxp, kayiktomp, kayikmajtsp. Pøni jats ja ne'kx midī yik'ejxp jøts y'øøky tyigøy, nay jats ja ne'kx midī kayik'ejxp midī ka'oo'kp kadigøpy.

⁴⁵ Jabi yide'enxi ja Dios kyajpxy wya'añ: "Ja'ukyikmøøxyi ja mijawyeen jaa'y ja juky'ajtin, pøn idø'øn Adán'ajt"; ka'ats ja nwindson'ajtim Jesucristo yjade'eni sam ja Adán y'ijty, tyimiyikjuky'ajtpi ja ja'ayi myiñ. ⁴⁶ Jawyeents adøm ja ne'kx tø nyikmøø'yim midī ya nmøø'ajtyindip naẁwiin; jøtsnim wyinaty ja ne'kx nyikmøø'yindi sam ja nwindson'ajtim ñe'kx t'ijxy ku ja yujukpyiky jadigojk. ⁴⁷ Naẁne'eyxi ja Adán ñe'kx'ajt naẁwiin'it jaa'yin; tsajpjøtpts ja myiñ ja nwindson'ajtim Jesucristo ñe'kx paty ja jawaani øy. ⁴⁸ Tum jade'ents adøm nne'kx ya naẁwiin t'ijxyim sam ja jawyeen jaa'y

ñe'kx t'ijxy, midits idø'øn wyinaty yikmø'øymp jade'ents ja t'ext sam ja nwindson'ajtim ñe'kx. ⁴⁹ Nayide'en sam adøm ya naxwiiñ tø n'agojnaxxyim ja midu'ukpi jaa'y, kuts jam tsajpjotp nayide'ents adøm nøjkx nwimbijtyim sam ja nwindson'ajtim t'ixy.

⁵⁰ Yide'en ø migu'uk idø'øn njatijy ku yø ne'kx midi nmøøt'ajtyindip midi xixmyøøt midi ni'jpmyøøt, kidi yø'øjip wyinaty twinguwa'jkip ja Dios ma ja amuum ja kyutujk ttanitanit ja jaa'y; midi kataa'nip, midi oo'kp tigøøpy, ka'ap ja pyaat'aty; jøts ja xemikøjxpit jujky'ajtin yikmo'ot. ⁵¹ Ja'ats meets ndukmadoowampy jøts yikxon xnijawidit midi yu'uch, midi amaa'tsk ejtp, midi ka' pøn nugo ajawi tnijaw: Ka'ap adøm niduki'iyi ja o'jkin nbaajtindit; ja'ayi ku tyumdigatst ja ne'kx ku nøjkx ja nwindson'ajtim nximi'iñim, ⁵² widsukin idø'øn ja tyunit, ku ja puxuujx jadigojkyi yjaak'ukyikmadoonit. Winets idø'øn ja oo'kpi yujkpyøktit jadigojk møøt ja ñe'kx midi xemikøjxp myijujky'attip; pønts wyinaty jujky'ajttipnim ja'ats ja ñe'kx tigatstip. ⁵³ Kuwanixi dø'øn tyigatst yø ne'kx midi adøm ya naxwiiñ nmøøt'ajtyindip, midi amøjip, midi køjxp, midi anuu'kxip; jøts ja nyikmø'øyint midi xemikøjxp etp ja'agøjxp ku ja kyakixy ni kya'amøji. Jøts adøm wyinaty nmajtstuuptyim ja ne'kx midi oo'kp midi tigøøpy, jøts ja nyikmø'øyint midi nijuuni ka'oo'kp midi xemikøjxp ejtp. ⁵⁴ Kuts adøm idø'øn wyinaty tø nmajtstuuptyim ja ne'kx midi kajajkp, jøts wyinaty ja ne'kx tø nyikmø'øñ'am midi jajkp, jøts ku dø'øn wyinaty ja ne'kx tø nmajtstuuptyim midi oo'kp jøts wyinaty tø nyikmø'øyim midi xemikøjxp jujky'atp, jaanims idø'øn ja Dios kyajpxy tyøøt midi jap jaabyety nøkyjxpy ejtp: "Tø ja o'jkin yikmimajada'aky. ⁵⁵ O'jkin, ¿ma dø'øn ja mdukta'o'jk? ¿Ma dø'øn ja møk'ajtin tø xyikwingaxi'iky?" ⁵⁶ Ja pøky idø'øn ja o'jkin xukta'oo'kimp, jøts ja møjaa'gyutujk idø'øn ja tyamø'ajtpy midi ka'uktunip. ⁵⁷ Ndamøja'wampst ja Dios Teety ku ja tø xyikmajadaajkyindi nwindson'ajtim Jesucristo pyudøjkingøjxp.

⁵⁸ Jade'ents migu'uktøjk idø'øn, møk jøts tu'ugyi ja mwinmaa'ñ xjaakpiktaojtit jøts ja nwindson'ajtim tyunk xjaakyykyø'øgyojtit; pø mnija'widipxi ku ka' nugo wyindigøydi ja mdunk midi ja nwindson'ajtim mduktuujnidip.

16

Sa ja pudøjkin myukt

¹ Ku xyikmuktit ja pikta'aky midi mdabudøkidip ja abiky kugajp ja migu'uk midi tjanchja'widip ja Dios, yide'en xu'undit sam ø nayide'en tø ndukmad-owid pøn jaty jam Galacia etjotp namyujkidip. ² Kija' idø'øn windomingi xpukond'u'uttit ja mijuu'ñ pøni wine'en tø mmajada'akti, jøts ja xpøkjø'øktit a'ejxi, jøts wyinaty abaadi xyik'awejxnidi ku ø nnøjkxt. ³ Kuts øts jam wyinaty nnijxxy winets ø wyinaty nguexy ja jaa'y jam Jerusalén pøni pøn mee mwi'ijxpy, jøts øts ja nøky ja nmo'odit jøts ja møøt tyiknøjxxtit ja pudøjkin. ⁴ Pøni paat'ajtyip jøts ø nnøjkxt, øyts øts ja wyinaty xmøøtnøjxxti.

Ku Pablo tniagjpxy ma jaty ja wyidetwa'añ

⁵ Kuts jam wyinaty nnijxxy ma meets jam, jawyeen ø nnaxwa'añ jam Macedonia etjotp, jøtsnim øts jam Corinto wyinaty nja'aty. ⁶ Ni kyajaa øts jam yjawi ndaa'nit ma meets jam, jotmøñ øts jam nyiknaxy ja xuxpyoj jøts mee nayide'en wyinaty x'atskexy ma ø wyinaty nnijxxy. ⁷ Ka' meets idø'øn nugo pojn n'uknina'axwa'añ, nmøøt'aa'n'iwypmy meets idø'øn niyjeky pøni yikutujkpy ja Dios. ⁸ Yam øts Efeso kajpkøjxp njaakta'a'niwya'añ kunim

Espíritu Santo xøøw tpaatt. ⁹ Øy øts idø'øn may ja jaa'y xjami'ekyidi ya Efeso kajpkijxy, jats ja jaa'y nayide'en pøn ø xmadowandip jøts øts ja nduk-mado'odit ndukyikyujtit ja nwindson'ajtim Jesucristo yja'.

¹⁰ Pøni ja'tp ja Timoteo jam, m'ejxtibim jøts jotkujk jam ñayjawiyit jøts niti tkadajotmay'oock, pø nayi nwindson'ajtimxi yja' ja tyunk'ajtip sam øts.

¹¹ Paty idø'øn ja tum jade'en xkupøktit, jøts jade'en xpudøkidit jøts øts øy tsuj yam xpaatt, pø n'awijxpyxi øts ja yam møøt ja myigu'uk pøn møøt wyidity.

¹² Tøts øts Apolos njanchjaminuu'kxa'aky adøm ja nmigu'uk jøts ja jeexyip tmøøtnijkxy ja migu'ukti pøn jaty meets m'ats'ejxwajnip, ka'ats ja ixyam inet myajada'akt; jaanim ja ñøjkxt ku y'awatsit.

Ku ja Pablo t'ukyajkni ja kajxpoo'kxin

¹³ Wijyim mnabyikta'agidit jøts ejtp møk ja mjanchja'win xyik'ettit. Yaa'dyøjkin tuki'iyi xmidanidit jøts jotmøk mnabyikta'agidit. ¹⁴ Pøni ti jaty mdundip, tsojkingøjxp pa'ayo'owingøjxp ja xu'undit.

¹⁵ Mnija'widip migu'uktøk ku dø'øn ja Estéfanos møøt ja myigudøjk jawy- een tjanchja'widyi ja Dios kyajpxy y'ayuujk jam Acaya etjotp. Tøts ja ñadyamiyøxyidi jøts ja tpudøkidit ja jaa'y pøn ja janchja'win tmøøt'ajttip nayide'en. ¹⁶ Pøni jade'ents ja tyundi, nayide'ents mee mbaat'aty mdu'unt, jade'ents ø ndsøky jøts meets ja xmimado'ot jøts ja nayide'en xpudøkidit, nayide'en xu'undit ja jaa'y pøn jaty tundip pøn jaty pudøjkidip. ¹⁷ Tøts idø'øn njanchtajotkujk'atti ja Estéfanos, ja Fortunato jøts ja Acaico ku ja ya tø y'atsmendi jøts ø tø x'atspaatti, ja'ats øts ojts ja pudøjkin xmo'odi jøts meets jade'en myikudanaay. ¹⁸ Tøts idø'øn ja xjanchyikjot'amøkpøkti sam ja jam nayide'en myikjot'amøkpøjkidøø. Ngajxajkimp idø'øn ja yjade'embi jaa'dyi.

¹⁹ Mdanigajxidip ja kajxpoo'kxin ja janchja'wibi jaa'dyi pøn kugajp'ajttip Asia etjotp. Mjanchkajxpoo'kxidip ja Aquila jøts ja Priscila, jøts nayide'en niduki'iyi ja jaa'dyi midi xuminamyujkidip ja' tyøjkjotpti, pøn nayide'en tø tjanchjawidi ja Dios sam meets. ²⁰ Nayide'ents mgajxpøø'kxyidi pøn jaty yam tø tjanchjawidi ja Dios. Nagyajxpoo'kxidi niduki'iyi xem yam sam ja Dios ttsøky'aty.

²¹ Pøn idø'øn Pablo'ajtp, øts idø'øn kø'øm njaapy ya'at nøky jøts ndanigaxidi ya'atpi kajxpoo'kxin.

²² Pøni ka' pøn tkupiky jøts tkatsøky ja nwindson'ajtim Jesucristo, wan wyinaty kø'øm ttani'ixy. iWingonip ja nwindson'ajtim!

²³ Mmo'ojidip ja nwindson'ajtim ja kyunuu'kxin. ²⁴ Meets niduki'iyi ndanigajxtip ja tsojkin ja pa'ayo'owin Cristo Jesús køjxp. Jade'en idø'øn ja yjatt.

JA MYHMAJTSKPI NØKY MIDI JA PABLO TYANIGAJX JA CORINTI JAA'Y

Ku ja Pablo tnijayi ja janchja'wibi pøn jam Corinto

¹ Øts idø'øn Pablo'ajtp. Tø øts ja Dios Teety xamidsøky jøts ø ngudanit ja Jesucristo. Jøts nayide'en ja Timoteo midi øts møøt ya'at nøky nja'ay jøts øøts ndanigaxi pøn jaty ja Dios Teety ja'ajtidip jam Corinti, jøts nayide'en pøn jaty jam Acaya etjotp tsinaadyip. ² Paatti kupøjkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Sq Pablo y'ayo'ombaajty

³ Tkajxajkyindi ja Dios midi tyeety'ajtpy ja nwindson'ajtim Jesucristo, jabi jade'enxi dø'øn ja tyeety'ajtin tyiknigaxi'iky ku adøm x'ayo'ijxyindi, nijjuuni xka'ixmajchindi, ejtp xkajpxjot'amøjkandi Dios'ajtingøjxp. ⁴ Ja'agøjxp ja Dios xkajpxjot'amøjkandi pøni sa jaty nidu'uk nidu'uk n'ayo'ombaajtyindi jøts jade'en nnija'wandit sudso dø'øn ja nmigu'uk nayide'en ngajpxjot'amøjkimyandit sam ja Dios tø xpudøjkandi. ⁵ Nayide'en sam adøm kajaa ngu'ayo'ombaajta'andi ja Cristo yja', kajats ja nayide'en ja jot'amøkpøjkin xmø'øyim. ⁶ Ixyamts øøts nyikjemduñ ja'agøjxp ku meets ndukmadøy ja nitsoojkin ayuujk jøts ku meets nayide'en ngajpxjot'amøjkidi. Ku øøts yø'øbi ayo'on ndanaxy, ja Dios øts tø xkajpxjot'amøjki. Nayi meets m'ø'yajtingøjxp øøts idø'øn jade'en tø njaty jøts meets nduknijawit sam nayide'en ja Dios mbudøkiyidit ku nay yø'øbi ayo'on wyinaty xpaatti. ⁷ Njantyimyjøp'ijxy'ajtpy øøts idø'øn jøts meets nayide'en ja Dios myikjotkujk'atyyidit sam øøts, øy idø'øn nayide'en mja'ayo'ombaatti.

⁸ Meets migu'uktøjkti, jade'en øøts ndsøky jøts meets waani x'ext xnijawit sa øøts idø'øn jam ja ayo'on nyiknajxy Asia. Yikxon øøts møk ja ayo'on jam n'ijxy, niti awejxin niti jøp'ejxin øø wyinaty nga'ukmøøt'ajtni, niti majadaajkints øøts, ja o'jkin yjøp'am øøts wyinatyni. ⁹ Jade'ents øøts idø'øn ojts jam nnayjawiysi sam ja jaa'dyi pøn ja xyøøw tø yiktanimacho'owifiñ jøts ja o'jkin tpaattit. Øyts idø'øn ja ne'egi ku jade'en yjajty, jabi jaanimxi øts ja Dios idø'øn tuki'iyi nmibøkøjxi jøts ku oo'kpibaat ja tyikjujkyiky. Jøts øøts jade'en nja'gyuykiyiñ ku adøm niti kø'øm xkama'ayim. ¹⁰ Ja' øøts idø'øn x'axajtujk x'agø'ødujk jøts øøts jade'en ja o'jkin xkadukpaajty, jøts nayide'en xyiknitso'ok'ejtint ku ja o'jkin wyinaty xmimajada'akwa'añim. ¹¹ Nayide'en meets idø'øn ja mdsapkaaky tyumi ja'agøjxpts adøm idø'øn ni'amuki ngajxajkindit ja Dios jøts øøts ja pudøjkin xmø'y'ett.

Tigøjxp idø'øn ja Pablo ojts kyanijky Corinto

¹² Ja'agøjxp øøts n'aaw njoojt yjotkujk'aty ku øøts nnijawi ku øøts o madsoo øy tsuj tø nyiknaxy ja ndsinaa'yin, niti taay. Tu'ugyi øøts ja Dios ja y'ø'yajtin tø xabudøki, ka'ap øøts ja ngø'øm wijy'ajtin tø myajada'aky. Meets windumxi dø'øn øøts ja ndsinaa'yin øy tø nyiknaxy. ¹³ Jøts nayide'en ja nøky midi meets tø ndanigaxi, niti taay ja tkamøøt'aty, mibøkøxti ja'. ¹⁴ N'awijxy'ajtpy øøts ku meets ja njaa'y'ajtin xkupøjkit tuki'iyi sam ixa waani tø xkupø'okwa'andi, jøts jade'en nnadyajotkujk'ajtandit nixem niyam ku wyinaty myeni jadigojk ja nwindson'ajtim Jesucristo.

15 Ja'ayɪ ndamɔj'ajtpy ku meets idɔ'ɔn tɔ xkupɔj'kni, jɔts ɔ nwa'añ ku meets majtsk ojk n'ats'ejxwa'añ jɔts jade'en n'atsyikjotkujk'attit. 16 Ja'agɔjxpts ndanibiktaajkiyi'i'ñ jɔts ku ɔts ya nmiñ Macedonia, myijawyeen meets n'uk'ext jɔts jadigojk ku nwimbejtnit. Wanik meets xpudɔkit jɔts ɔɔts nja'tt jam Judea. 17 ¿Ka'ap ɔts idɔ'ɔn ja ndejint yikxon ndyimdyanibiktaajkiyi'i'ñ ku ɔts ɔjts jam nga'uknɔj'kni? ¿Sə tɔ mwə'andi, jade'en ɔts idɔ'ɔn xijy sam muum ja jaə'y ja yja' nugo tyikmajada'aky ku ja nugo t'ukupiky jɔts ja ka' t'ukpaduni? 18 Pɔ ka'axi. Wa'ats ja Dios tnijawi ku ka'ap ɔts jade'en nugo ndaay'aty. 19 Jabi ka'axi ja Dios U'nk Jesucristo tyaa'yaty midɪ ɔɔts ja yja' ngajpxwa'kxɔɔ mɔɔt Silvano jɔts Timoteo, ma meets jam. Pyadunguijxpy ja y'ayuujk ja', 20 jɔts ja' tuki'iyi tmidanaagyɔjxp pɔni ti jaty ja Dios Teety ñi'adso'owip. Ja'agɔjxpxi ja xyɔɔw ja yikajpxpaaty ku adɔm Dios Teety nmɔja'wa'am ngunu'u'kxyja'wa'am ja myɔj'ajtin jɔts nwa'añim janch tiigyajpxy idɔ'ɔn yɔ', nwindson'ajtim Jesucristo kɔjxp. 21 Nayi Dios Teetyxi adɔm idɔ'ɔn xukmɔɔt'ejtindip ja Cristo jɔts ɔɔts ja tɔ xjibiky jɔts ɔɔts ja jade'en ngajpxwa'kxit ja yja'. 22 Tɔ nayide'en ja Espiritu Santo xmɔ'ɔyim midɪ ejxpaj'ajtp ku adɔm ja xja'ajtyim, jɔts jade'en nnija'windit ku xmɔ'y'ukwa'añindi ja jujky'ajtin midɪ xemikɔjxp'etp.

23 Ñija'widyaapy ja Dios ku meets nga'uknɔj'kni jade'engɔjxp ku meets ka' nyikjotmay'ooktɔkiwya'añ ku mɔk nwindso'odyit. Pɔni ka'ats yjanch-jade'eni, pɔ jats ɔts idɔ'ɔn ja Dios kɔ'ɔm xiidyu'unt. 24 Ku meets wyinaty nniinjxxy, ja xondaajkin ja ɔy'ajtin meets ndaninɔj'kxwampy. Ka'ap meets nda'aguwanɪwya'añ ja janchja'win pɔ mɔkxi meets ja xmɔɔt'ajtni.

2

1 Jabi ja'agɔjxpxi meets idɔ'ɔn tɔ nga'uknɔj'kni ku meets nugo n'atsyikjotmay'ooktɔkit. 2 Ja ku meets n'atsyikjotmadyɔkit, ¿pɔnts ɔts idɔ'ɔn ndajotkujk'atp? ¿Kidi meedsip? Yamts meets wyinaty kɔ'ɔm tɔ nyikjotmadyɔki. 3 Patyxi meets tɔ nniijayi jawyeen jɔts jam tuki'iyi xyik'ɔyidit xyikpaadidit ku ɔts jam wyinaty nja'aty jɔts meets xaxonda'akt. Jabi jade'enxi nwa'añ ku mee mɔxnda'kmit ku meets x'ext jɔts ku ɔts jotkujk. 4 Ku meets ja'abi nɔky ndanija'yiyi'i'ñ, janchjotmay'oo'kp ɔts wyinaty, ja ya'axyi ja ji'iyi ɔts idɔ'ɔn wyinaty xmimajada'kp ku meets yjawɪ ja jaə'y myikwinmaa'nmya'atwa'añidi jɔts ɔ xkagupɔkit. Ka' meets nayide'en nyikjotmay'ookwa'añ, ja'axi ɔts idɔ'ɔn nanky'ejxwajni'p mabaat meets idɔ'ɔn ndsɔky nba'ayɔy, patyxi meets idɔ'ɔn ngajpxwijy.

Jade'en pyaat'aty jɔts yikmaa'kxukt pɔn tɔ tyundigɔy

5 Ja jaə'y'u'nk pɔn ɔts idɔ'ɔn tɔ x'ukyikjotmadyɔki ka'ap ɔts ja nadyu'uk tɔ xyik'ayɔy jabi nixem niyamxi meets idɔ'ɔn ndejint winaa'agin tɔ mbaajtmɪyidi nayja'abi jotmay. Ka'ap ɔ nwa'añ ku nijum. 6 Ka'ap ɔts ja mɔk n'ukwindso'ɔwyanɪ pɔn idɔ'ɔn tɔ tyundigɔy. Jabi tɔxi meets ja nijum ne'egi kɔ'ɔm xkastigimɔɔñi. 7 Jade'en idɔ'ɔn ne'egi pyaat'aty jɔts meets ja xmaa'kxujkni, kajpxjot'amɔkidi, ja kuts ja jotmay myimajada'kniyit jɔts jade'en ja chinaa'yin tyikwindigɔɔñit. 8 Paty meets ixyam ja may'ajtp n'amidɔy jɔts jadigojk ja tsojkin ja pa'ayo'owin xmo'odit. 9 Tɔ meets ya'atpi kajpxy ya'atpi ayuujk jawyeen ndanijayi ja'agɔjxp jɔts ɔ n'ext nnijawit pɔni xjanch'ukpaduujnidip ɔts idɔ'ɔn ja ngutujk. 10 Paty xnijawidit, pɔni pɔn meets mmee'kxpy, nayide'ents ɔts ja maa'kxin ja nmɔɔmyi. Pɔni tɔ ɔts idɔ'ɔn tigati nmee'kxy, ja'agɔjxpts ɔts jade'en tɔ nduñ ku mee n'ayo'ixy, y'ijxpy

ñija'wip ja Cristo. ¹¹ Jøts jade'en o tigati tkadamøj'att ja miku'windsøn Satanás, jabi nnija'wampxi adøm wə'ats ku ja o tigati tamibøki tamiejxi.

Ku ja Pablo ttajotmay'øøky ja Tito jam Troas

¹² Ku nja'jty jam Troas jam kajpjotp, nugo øts ndunk jam tyimy'ity øy maðsoo jøts øts ja Cristo yja' ngajpxwə'kxixit. ¹³ Yamts øts wyinaty tø nja'uktundsoo'mi, kumi ka'ats øts øy njotkujk'aty ja'agøjpx ku øts ja Tito jam ngapaajty, adøm ja nmigu'uk, patyts øts jam øjts ndso'ongojmi jøts øts ojts nnøjxni jam Macedonia.

Ku ja Cristo møøt nmajada'ijtyindi

¹⁴ Nmøja'wimp ngunuu'kxyja'wimp ja Dios Teety ku ja ejtp xyikmajadaajkyi tu'ugyi møøt ja Cristo, jøts ja kyajpxy jøts ja y'ayuujk ja xukajpxwa'kxyim øy magama. ¹⁵ Y'øyja'wip chuja'wip ja Dios Teety pøn ja Cristo møøt y'ity jøts ja yja' tkajpxwə'kxi. ¹⁶ Øy ja magama ja y'ixpøjkin wyidity jam muum tkamibøkti, o'jkin tigø'øyin ja yiktatiidy'undip. Jøts muum tjanchjawidi, ja'ats ja tyajujky'attip xemikøjpx. ¿Pønts idø'øn yø'øbi tunk nugo niyøjxk tyimy'ukniyajtp? ¹⁷ Jabi ka'axi øøts ja nugo ndameemyiky ku øøts ja Dios kyajpxy ngajpxwə'kxi sam muum y'adø'øtsti, uk ka'baat ka'pxy tnigajpxti tum wimbet ja tñimadya'akti. Ka'ats øøts jade'en n'adi'ich, tiy janch øøts ja nnigajpxy pø tøxi øøts Dios kø'øm xkexy jøts øøts kyajpxy ja ngajpxwə'kxixit Cristo pyudøjkingøjpx øy maðsoo jam Dios wyingujkp.

3

Ku ja Dios ja chojkin ja pya'ayo'owin jadigojk tyiktso'ondaajky Jesucristo køjpx

¹ ¿Sa meets idø'øn yø xja'gyuki ku øøts jade'en nwa'añ? ¿Kø'øm øøts idø'øn xijy nnagyajxa'akwa'añi sam ja muum ma ttundi pøn ja ixpøjkin wenk tyajktip? ¿Ja ejxpajtin øts idø'øn kuwani ndyimyøøt'atp jøts meets yø n'ixpøjkin xmibøkit? ² Ka' yjade'eni, jabi meetsxi myiknigaxi'kpy pøni sa øts idø'øn ja ndunkjøøjp y'øyi. Jade'en ja ñigaxi'iky ku meets ja Dios yja' tø xmibøjki jøts øy ja pøn t'ext tnijawit sa dø'øn ja mdsinaa'yin tø tyigatsti. ³ Kø'ømx i Cristo jade'en tø mðanibiktaagiyidi jøts m'ejxpajt'attit jøts øts ja ndunk jade'en wyingaxi'iky. Jabi Diosxi dø'øn kø'øm ja y'Espiritu Santo tø tyaky jøts ja y'ejxpajt'att ja'agøjpxts ja' kyakudigøy. Jawaani møj ja', mid i anmija'winjotp ja Dios pyiktakpy jøts ka'ap ne'egi ja jawyeembi kutujk mid i Moisés kyøxjaay tsaagøjpx.

⁴ Sa jaty øø nwa'añ tiy yø' janch yø', wə'ats øøts nnijawi jøts ku øøts ja Dios Teety pyudøjkin amuum xmø'øy Cristo køjpx. ⁵ Ka'ap øøts kø'øm nnankmyajada'agiyi, ja Dios wyingujkpxi dø'øn chøøn ja møk'ajtin jøts øøts ja øybi ndu'lunt. ⁶ Jaa ku øøts ja jeexyip tø xkamø'øy ja møk'ajtin sudsots øøts idø'øn jeexyip nnigajpxy sa ja Dios chojkin ja pya'ayo'owin jadigojk tnanky'ijxyi sa ja naxwi'ñit jaa'y ñitso'ok'attit. Ka'ap ja tsinaa'yin yikpaaty ku nbadungøjxint tuki'tiyi ja Moisés kyutujk, ja Espiritu Santoxi dø'øn tnanky'ejxip ja øyajpxy ja ømyadya'aky sudso yikpaaty ja jujky'ajtin xemikøjpx. Ja o'jkin tigø'øyin pyatpy ja anmija'win ku ja Moisés kyutujk ngabadungøjxint yam ja Espiritu Santo yja' tyumyikujky'aty.

⁷ Jade'en idø'øn ja Moisés kyutujk ja myøj'ajtin kyaxi'iky mid i tsaagøjpx yikjaay ku ja aju'uk agujkp yikmøøy, janch tøø'kxp tsamamp idø'øn ja

wyeen y'aaw. Jøts janch win'oo'ktip idø'on ja myigugajp israelit jaa'y ku ja yjayik'ejxwa'afñ. Waani dø'on ja y'aju'uk møj y'atskaxi'iky, pojin ja ñaxkojmi. Sats idø'on ja janchtyimyøj y'atsmiñ ja'abi kutujk midì anmija'win ja o'jkin tyukupiky'ajtpy. ⁸ Kuts ja øgyajpxy ja ømyadya'aky ka'ap ja tmi'abaaty, pø ka'axi ja winmaa'ñ myajada'aky mabaat ja yja'aty ja myø'ajtin ja y'ø'y'ajtin midì ja Espiritu Santo xuk'ejximp xuknija'wimp. ⁹ Sats idø'on ja kutujk janch møj, yam ja tjayikudigøj ja anmija'win, jsudsots idø'on ja Dios y'øgyajpxy y'ømyadya'aky jawaani kyidyimy'ukmøjit midì adøm ja xagupøjkimp! ¹⁰ Jabi ka'axi ja Moisés kyutujk møøt ñabyaadyi ja Dios y'øgyajpxy. ¹¹ Øyi dø'on ja kutujk møj tø yjamiñ ka'ap ja Dios y'øgyajpxy ja twinajxi midì ejtp xemikøjxp.

¹² Ja'agøjxp øøts ja njøp'ijxy'aty, paty øøts agujk jotkujk ja Dios yja' nnigajpxyi, ¹³ jøts ka'ap y'ukpaat'ajtniyi jøts øøts ndu'unt nayide'en sam ja Moisés ttuui ku ja y'ijty ñawynjuuxyiyi jøts jade'en ja myigugajp tka'ejxtit ku ja y'aju'uk tuda'aky tyigøøñi. ¹⁴ Ja israelit jaa'y ka'ap ja tja'gyukidi tigøjxp idø'on ja Dios ttanibiktaagi ja kutujk midì ja Moisés yikmøøj. Ni ixymbaat ja tkaja'gyukidinim ku ja Dios ñøky tkajpxidi. Jaanim ja ja'gyukin ja tpaattit ku ja Cristo yja' tkupøjkidit. ¹⁵ Yjaakjakajpxidibimts ja Moisés kyutujk ja'adi, jade'en ja tjøp'ejxti jøts ja ñitso'ok'attit ku ja tpadungøxtit. ¹⁶ Kuuyidsik øy pøngapøn tkupøktit ja nwindson'ajtim Jesucristo jatyits ja pyøky ja ñiwa'adsidit jøts ja wa'ats tuki'yiyi tja'gyukigyøxtit. ¹⁷ Ja nwindson'ajtimxi tmøøt'ajtp ja jujky'ajtin jøts ja ja'gyukin, pønts ja nwindson'ajtim tjanchja'widip ka'ap ja Moisés kyutujk ja y'ukmimajadakniyidit, ni kya'ukjujky'ajtnidit ja pøky agujkpy. ¹⁸ Paty adøm ja ja'gyukin nmøøt'ajtna'andi ku ja nwindson'ajtim yikmibiky. Kuts ja ejtp njotmay'ajntindit ja y'ø'y'ajtin ja myø'ajtin, nay ja'ats nanky'ejxamp xjats adøm jade'en njajtnant sam ja nwindson'ajtim. Yjujky'ajtingøjxp idø'on ja jade'en xpudøjka'am.

4

¹ Paty øøts idø'on ni juuni ngadawindsuun ja ndunkjøøjp midì øøts ja Dios y'ø'y'ajtingøjxp tø xanibiktaagi. ² Jagam jixkø'øm øøts idø'on nbikta'aky midì amaa'tsk midì tsø'ødyuñim yiktump. Ka'ap øøts n'ijxy ngøj jøts o pøngapøn nwindaa'y'att. Ni ja Dios øøts ja y'ayuujk ngakajpxma'jti. Ja tyiiby ja yjanchpi øøts idø'on ja'ayi nnigajpxy, jøts jade'en ni pøn jaa'y kyawa'ant jam Dios wyingujk ku øøts n'ayuujk kyatiyi. ³ Ku jaa winaagindi pøn tkaja'gyukidip ja nitsoojkin ayuujk midì øø ngajpxwa'kxpy, ja kyudigø'yin idø'on ja kø'øm y'ixaawyandip. ⁴ Ku ja wyinaty kø'øm tkajanchjawidi, ja miku'windsønts idø'on ja tø yikwinajpniyidi pøn ja'ayi ya naxwiñ ne'egi diosja'widip, jøts jade'en tkapaattit ja kudøø'kxaagi ja kujajtaagi midì yajkpy ja øgyajpxy ja ømyadya'aky ku ja Cristo y'ø'y'ajtin myø'ajtin yiknimadya'aky. Ja Cristots tñanky'ejxip ja Dios Teety pøn y'agojnax'ajtpy. ⁵ Ku øøts ngajpxwa'kxy ka'ap øøts ngø'øm ja' nnigajpxy, ja Jesucristoxi øøts ja wyindsøn'ajtin ngajpxwa'kxiip, jøts øøts jade'en nyikwimbejtñit ja y'ø'y'ajtin midì tø tyaky, ku meets nbudøki ja' chojkingøjxp. ⁶ Jabi nay ja'abi Dios Teetyxi dø'on midì ja jaj ja tøø'kx tyiktso'ondaajik, nay ja' adøm tø xmø'øyindi ja kujajtaagi ja kudøø'kxaagi jøts n'ejxindit nnija'windit sa dø'on ja y'ø'y'ajtin myøji midì ja Jesucristo ñanky'ejxip.

Janchja'wingøjxp ja tsinaq'yin nyiknajxyim

⁷ Dios wyingujk ja chøøñ ja'abi kujaj'ajtin kudøø'kx'ajtin midì niwindem xøøw tkamøøt'ajtp ja kudigø'yin, ja' øøts nmøøt'ajtpy njujky'ajtingøjxp.

Ka'ap øøts ngø'øm møk'ajtin nyiktuñ, ja Diosxi myøk'ajtin idø'øn jade'en tyiknigaxø'j'kp. ⁸ Øy øøts tsep agujkp aki agujkp ja njujky'ajtin yjanaxy, niwindem xøøw øøts ja nnøø' ja nduu' kya'aduky; øy øø njamay njatajy sudso øø nyiknaxt, nbatpy øøts ja winmaa'ñ sudso tyuu'baat tyuu'wetst. ⁹ Øy øø njayikjemuñ njayikteduñ, ka'ap øøts ja Dios x'ixmach; øy øøts ja nmidsep xjatekpya'an'atwa'añ, ka'ap øøts ja tu'ugyi xmi:majada'aky. ¹⁰ Winjaa windsojk øøts ja jaa'y ja o'jkin xjadukpaatwa'añ sam ja Jesús yjajty. Nay ja'ayi øø kø'øm xpudø'j'kip jøts jade'en tyiknigaxi'iky ku ja ya xemikø'j'xp yjujky'aty. ¹¹ Pøn jaty øøts møøt nbaduñ ja Jesús yja', nay ja'agø'j'xp øøts ja o'jkin jabom jabom x'ijxy xkøy, ja'agø'j'xp øøts ja xka'ixmach jøts jade'en tyiknigaxø'økt ja yjujky'ajtin øøts nnikø'j'xp. ¹² Øy øøts ja o'jkin xumijapaatwan'lity xumijam:majada'akwan'lity, ja xemikø'j'xpit jujky'ajtin meets ne'egi mbaajtip m'ejxip.

¹³ Njanchja'wip øøts nayide'en ku yide'en wya'añ ja Salmos nøky: "Paty ø nnigajpxy ku njanchjawi." ¹⁴ Nnija'wip øøts ku ja Dios Teety tyikjujky'ajty ja Jesús, nayide'ents adøm ja møøt xyikjujky'ajty, jøts jam nnø'j'kint niduki'yiyi ja' wyingujkp. ¹⁵ Midi øø tø ngu'ayowi ja'agø'j'xp øøts idø'øn ja ngupiky jøts meets ja øy'ajtin xpaatt, mayts ja jaa'y Cristo kø'j'xp tpaattit ja Dios kyunuu'kxin ja Dios y'øy'ajtin jøts may nayide'en pøn ttukmø'j'awidip pøn ttukunuu'kxyjawidip ja Dios ja'agø'j'xp ku ja tkaxa'akti.

¹⁶ Ja'agø'j'xp øøts idø'øn ngadawindsuun. Øy øøts ja nne'kx yjaga'ukmajadakni, møwenip kajaajip øøts ja njanchja'win jabom jabom. ¹⁷ Yø ya'it ayo'on waani yø ñaxkø'jy, ka'ap yø jeky tyaa'ni; jøts yø' øy'ajtin xemikø'j'xp ne'egi xukpaajtip mǎ ja Dios. ¹⁸ Jabi ka'axi yik'ixa'ay midi ya naxwiiñ yik'ejxp, ja Dios y'øy'ajtin ne'egi yik'ixaapy midi kagaxø'kp. Ja pikta'aky midi kaxø'kp myøøt'ajtpy ja' ja kudigø'øyin. Ja øy'ajtin midi kayik'ejxp ka'ap ja y'aats ja kyø'j'kp ja kyudigø'y.

5

¹ Nnija'windip adøm ku ja nne'kx kyudigø'øyim midi kajajkp sam tu'uk ja tøjk kyudigø'y naxwiiñ, jap adøm ja Dios tø xadanibiktaajkindi tu'uk ja tsinaadyaajk tsajpø'tpy. Etp ja xemikø'j'xp, jabi kidi naxwii'ñit jaa'yipxi ja tø tyik'øyi. ² Janch jade'en idø'øn yjaty ku adøm nne'kx ja yjujky'ajtin tyiknaxy ya, ka'ap adøm n'øyja'wam, winjaa windsojk adøm nnø'j'kxwa'añim mǎ ja tsinaadyaajk ja Dios tø xadanibiktaajka'am, ³ mǎ adøm n'anmija'win yiknitanaa'yim. ⁴ Yø ne'kx midi nmijujky'ajtyindip ya naxwiiñ ka'ap yø øy ti xuk'øyja'wam, jøts yiktsoj'kp ja tsinaadyaajk midi ja Dios tø xanibiktaajkindi, yjagayikwa'añ ja o'jkin. Yø naxwii'ñit tsinaa'yin adøm idø'øn njadayiktigatswa'añimp ja jemchinaa'yin. ⁵ Ja Dios idø'øn kø'øm tø xanibiktaajkindi jøts tø xuktatø'j'kindi ja Espiritu Santo midi ejxpaj'ajtp ku adøm ja nyikmø'øyindit midi ja yik'awijxpy.

⁶ Jade'ents adøm idø'øn ndajotkujky'ajtint, jøts nnija'windip ku ja yø nne'kx nmijujky'ajtyindinim ka'ap adøm ja tsinaadyaajk nbaajtyindinim. Ka'anim adøm idø'øn ndyimyja'atyim mǎ dø'øn ja nwindson'ajtim jap. ⁷ Janchja'wingø'j'xp adøm idø'øn nmøøt'ajtint ja jøp'ejxin øy ja njaga'ijxyindi. ⁸ Ka'ap ja o'jkin tigø'øyin ndso'j'kandit. Jotkujk idø'øn adøm njøp'ejxindit ja o'jkin ku wyinaty xpaat'ajtyindi jøts nnø'j'kxindit jap mǎ ja nwindson'ajtim møøt n'ejtint. ⁹ Paty adøm idø'øn øy mǎdsoo nwindso'j'ka'ant ja nwindson'ajtim wan ne'kxkø'j'xp wan anmija'wingø'j'xp. ¹⁰ Jabi kuwanixi

ja Cristo tyidyu'unt jøts jade'en nyikmø'øyindit midì xpaat'ajtindip nidu'uk nidu'uk pøni sà wyinaty ja njujky'ajtin yà tø nyiknajxyindi.

Ja kajpxy ja madya'aky midì ñigajpxy sà jadigojk møøt nnamyajyint ja Dios

¹¹ Ja'agøjxp ku øø nnijawi sà ja nwindson'ajtim yikmøjawit yikunuu'kxyjawit y'øy'ajtingøjxp paty øøts ja jaa'y ndukja'gyukiwyanguixy ku øøts tiy janch ja kyajpxy ja y'ayuujk nnigajpxyi. Ñija'wip ja Dios sa øøts ja njaa'y'aty, njøp'ijpxy øøts jøts meets nayide'en xja'gyukit. ¹² Ka'ap øø kø'øm nnay'agajpxyi, ja ja'gyukinxi meets idø'øn ndukmøøt'atwampy jøts jotkuk nnayjawiyidit ku meets ngawindaayi. Jøts jade'en agujk jotkujk x'adsojimbettit ja jaa'y pøn y'anmija'win yjamøøt'ajtpy. ¹³ Pøni nugo øøts ndyimyajpxy pøni nugo øøts ndyimy'adi'ich, Dios ja tu'ugyi tnija'wip; pøni øyts, pøni tøyts, pøni ka'px øø nnigajpxy ja yja', meets ja mda'øy'atp. ¹⁴ Ja Cristo chojkingøjxp pya'ayo'owingøjxp øøts idø'øn ja ndunk ngamajstutuyt yaa ku øøts ndyimyanchjawi ku niduki'iyi tø xku'o'jkindi jøts ka' n'uknijuky'ajtna'ant ja pøky. ¹⁵ Paty ja Cristo tø xku'o'jkindi jøts pøn juky'ajtitp ka'ap ja kø'øm t'ukjøø'ømit'ajtni ja chinaa'yin, ja Cristo ja ñijuky'ajtnidip pøn ja ojts kyujkpyøkiyidi jadigojk. ¹⁶ Paty øøts jade'en nga'uk'abaxni pøni sà nidu'uk nidu'uk ja chinaa'yin tyiknaxy; Cristo paat øøts y'ijty n'abexy midì øø nga'øyja'wip ja yja', ixyam ka'ap øøts ja'abi winmaa'ñ n'ukyiktuni. ¹⁷ Jade'ents idø'øn, pøn ja Cristo møøt y'ity, jemyjaa'y ja'; ja tigøy winmaa'ñ midì y'ijty nmøøt'ajtyindip ka'ap ja y'uktuni, tum ja yjembyi dø'øn tø nhabøjknandi. ¹⁸ Kyø'ømdunkjøøjp ja Dios Teety jade'en tyumpy Cristo køjxp jøts ja møøt nnamyajya'ant. Jøts øøts ja ndunk tø xmø'øy ku niduki'iyi ja jaa'y ja Dios møøt ñamyaa'ñiyit. ¹⁹ Yide'en idø'øn nbiktaajkint, ja Cristo køjxp idø'øn ja Dios Teety niduki'iyi ja naxwii'ñit jaa'y møøt ñamyawa'aniyi. Ka'ap ja pøky tmøjpikta'aky. Jøts øøts xanipijky ya'atpi øy'ajtin. ²⁰ Paty meets xnijawit ku øøts ja Cristo xyikugajpxy'aty, sam idø'øn ja Dios Teety kø'øm jeexyip meets mminuu'kxa'agyi. Paty øøts idø'øn yide'en n'ane'emy ku meets idø'øn ja Dios ja mdsojkin xmøøgyøxt. ²¹ Niti pøky idø'øn ja Cristo tkamøøt'ajty xjats ja Dios Teety tymñayide'en ja ttuuñ sam ja møj pøkyjaa'y yiktuñim, jøts nyikupøjkandit sam ja Dios Teety ttsøky ku ja Cristo møøt n'ejtint.

6

¹ Jade'ents migu'uktøjk idø'øndi, niduki'iyi niwine'en adøm ndunk'ajtyindi ja Dios yja', n'amidøøpy meets jøts kidi nugo ja Dios y'øy'ajtin xyikwindigøjyidi midì ja tø mduk'ijxyidi midì ja tø mduknijawiyidi. ² Jabi jade'enxi ja køøm wy'a'ñ ñøkyijpxy:

Ku ja xøøw ja jumøjt tpaajty nmadoow øts ja mji'iyin ja myajxin;

jøts ku ja yiknitso'ok'ajtin tpaajty winets me nbudøjkiyi'ñ.

Ïxyam idø'øn ja mxøøw ja mjumøjt tø yja'tni jøts ja myiknitso'ok'ajtin tø tpatni.

³ Øy øøts idø'øn ja ndsinaa'yin nyiknaxy jøts øøts jade'en ja ndunkjøøjp nipøn xkada'abaxt. ⁴ Jade'enxi øøts idø'øn ne'egi nyiknigaxø'økwaa'ñ ku øøts ja Dios nmiduñ, tuda'aky øøts ngupiky'aty tuki'iyi ja ayo'on; ⁵ tø øø nyiktsumy nyikwøpy; tø øøts ja jaa'y namay xamuky, møk øøts ja ndunk nyiknaxy kunim øøts ngø' ndeky kya'ukmajadakni; kawinaak tsuu øøts tø ngamaa'y tø nga'ity, ayuu øøts kawinaak xøøw tø nyiknaxy. ⁶ Njujky'ajtingøjxp øøts nyiknigaxi'iky ku øøts ja Dios nmiduñ. Jøts jade'en kyaxi'iky ku øøts ja Dios

y'ixpøjkin ka'pxy nniija'wiyi jøts øøts nduda'akyjaa'y'aty. Tø øøts n'øyjaa'y'aty jøts tø øøts ja Espíritu Santo yja' nyiknigaxø'kmi jøts nayide'en øøts ja tsojkin ja pa'ayo'owin øy pøngapøn tø nmø'øy. ⁷ Ja tiy'ajtin ja janch'ajtin øøts tø nmøøt'aty, jøts ejtp øøts ja Dios ja myøk'ajtin xa'agø'duky xa'axajtuky. Ja ødyu'unin ja tiidyu'unin øøts tø nyiktuñ ku øøts ja Dios yja' tø nyikyø'øyi jøts ku øøts ja y'ayuujk nniitanaa'miyi. ⁸ Juunjaty øø nyikajxa'aky jøts nay jaayi øøts nyikpagajpxy. Øy øøts jaayi n'ukyiknimadya'aky jøts nay jaayi øøts wenk n'ukyiknimadyaknimi. Ja øøts juunjaty nyiknøjmi ku øøts nugo ndaayi jøts nay jaayi wyangojmidi kuk øøts ja y'øybi tyiiby nniigajpxy. ⁹ Juunjaty øøts ngayik'ejxkapy jøts nay jaayi øøts nyik'ejxkapmi; ja øøts ja jaa'y juunjaty ja o'jkin xukpaatwa'añ, jajujky'ajtp øøts idø'en jade'en. Yikastigimøøpy øøts, ka'ap øø n'øøky. ¹⁰ Øy øøts njamay njatajy, xondakp øø nnayjawi; ayoobi jaa'y øøts, ja øy'ajtints øøts nyajkpy; øy øøts niti njagamøødi, jade'en øø nnayjawi; ejxindam øøts jeexyip tuki'iyi ndyimøøt'ajtkøjxni.

¹¹ Meets migu'uktøjkti, tiy'ajtingøjxp meets tø ndamigajpxy; tuki'iyi meets ja ndsojkin ja nba'ayo'owin tø ndamay'aty. ¹² Øyimik idø'en wine'enin ngondukt nbøktukt øts ja ndsojkin øts ja nba'ayo'owin. Meets idø'en jade'en yjawi ne'egi ndumpy. ¹³ Sam ja u'nkteety ja myajnk tmigajpxy nayide'en meets nmigajpxwami ku ja mdsojkin ku ja mba'ayo'owin niwine'en xka'ama'at'attit. Tundi nayide'en waani sam øts tø nnajtstuni.

Adøm nikøjxp ja Dios yjujky'ajtyim

¹⁴ Kidi mjujky'ajtin xyiknaxti møøt pøn tkajanchja'widip ja Dios, jabi nijuunixi kyanamyayidit ja tiidyu'unin møøt ja tundigø'øyin, sam ja kudøø'kx'ajtin møøt ja kugoots'ajtin. ¹⁵ ¿Sudso dø'en ja Cristo yja' møøt ñamyayidit ja miku' yja'? ¿Uk sudso ja janchja'wibi jaa'y møøt ñamyigu'ukwa'aniiyt pøn midsepwajniyip? ¹⁶ Ka'ap ja yjujky'ajtin tyiknaxti tu'ugyi ja Dios Teety møøt ja dios mididi kø'øm yiktsajstip. Ka'ap adøm njade'enindi jabi kø'ømxi Dios wyinaa'ñ yide'en:

Pøni ma ja chøøniidi jam øts ja nmøøtjujky'attit,
jøts pøni mididi ja ñøjkxtip ejtp øts ja njamyøøt'attit;
øts ja xdios'attip,
jøts øts njaa'y ja'adi.

¹⁷ Paty ja yide'en yjaakwaañ:

Nanky'abikyidi,
kidi ja kya'øybi xyiktundi;
jøts jade'en ngupøktit,

¹⁸ øts meets xteety'atp, jøts øts meets n'u'nk'atp,
jade'en idø'en wyaa'ñ ja Dios Teety.

7

¹ Jade'ents meets migu'uktøjk idø'en xnijawidit ku ya'at øy'ajtin ja Dios tø tyiktañ. Ja'agøjxp adøm idø'en øy tsuj njujky'ajtin, ka'ap ja nne'kx ka'ap ja n'anmija'win nyik'ejtint pøky agujkp. Dios chø'jkingøjxp adøm idø'en ja Dios ndamiyojxint ja njujky'ajtin.

Sa ja Corinti jaa'y tyiktigatsti ja wyinmaa'ñ

² Jja'gyukidik øts ndsojkin nba'ayo'owin! Jabi ka'axi meets niti windigø'øyin tø xkapaatti øøts køjxp. Nipøn øø ngawindaay'aty, nipøn øø ngana'ixy. ³ Kidi meets ya'at xja'gyuki ku meets nugo nbøknipiky, jabi jade'enxi tø nwa'añ jawyeen ku meets ja ndsojkin ja nba'ayo'owin tø ndamiyøxy, jade'en ja tpatni møøt mee ñamyayi njujky'aty jøts møøt mee ñamyayi n'oock. ⁴ Njøp'ijxy'ajtpy

meets jøts amuum mee ndajotkujk'aty. Øy øøts idø'øn n'ayo'ombaaty janch jotkujk ø nnayjawiyi.

⁵ Ja'ayip øø nja'jty ya Macedonia, ka'ap øøts ja poo'kxin nmøøt'aty, øy øøts magama jaa'y xmidssepwa'añ jøts øøts ja tsø'øgi nyikmajada'akwa'añ.

⁶ Yikjotjimbijtpy ja Dios ja yjaa'y, tøts øøts ja xyikjotjimbity ku ja Tiro tø yja'aty. ⁷ Kidi ja'ayip øø nugo ndymdyajotkujk'ajtpy ku ja yam tø yja'aty, jabi ja'axi øø nayide'en ndajotkujk'ajtpy ku meets ja nekim mmimadya'akyyi mjantyaxondajkip meets ja'. Jade'en øøts ja xamimadya'aky ku meets xjapaatwa'añ xja'ejxwa'añ jøts nayide'en tnigajpxmi ku meets xajotmay'øøky. Jotkujk øts idø'øn nnayjawiyi ku meets xja'myech.

⁸ Øy ja nøky tø mja'atsyikjotmaadyøkiyidi midi meets øjts ndaniguexy, ka' øts ja icyam sa n'ukja'wiñi. Njanch'ayojyii'nimts øts idø'øn ja jawyeen, ku øts n'ijxy ku øts nnijawi ku meets ja nøky yikxon ja jotmay tø mduktatøkiyidi tøts idø'øn ja jade'en y'ukjajtkøjy sa n'ukjatka'am. ⁹ Jotkujk øts icyam nnayjawiyi jøts kidi ja'ajip øts ndajotkujk'ajtpy ku meets ja jotmay møk'ampy tø m'atspaadyiyi, jabi ja'axi øø ndajotkujk'ajtpy ku meets ja mdsinaa'yin tø xyiktigach sam idø'øn pyaat'aty. Tøxi dø'øn xmidanidi ja jotmay'øøgyi sa ja Dios ttsøky sa Dios tkupiky. Jøts ku øøts ja nøky jade'en tø nguexy kidi ka'øy adøtspip øøts, kidi ayo'onip meets ja mdukpaatwajniyip. ¹⁰ Ja ayo'on midi tuda'aky yikupøjkp sam ja Dios ttsøky'aty, yiktigachp ja tsinaa'yin ja' jøts jade'en yikpaaty ja yiknitso'ok'ajtin. Pøn tkajanchja'widip ja Dios wenk ja tjawidi ja ayo'on jøts ja y'anmija'win tyikudigøydi. ¹¹ Øy meets ja ngajpxy tø m'atsyikjotmaadyøkiyidi, tuda'aky meets ja tø xkupiky sam ja Dios ttsøky'aty. jEjxtits inet ku ja mdsinaa'yin ne'egi tø tyigatsti! Tø meets ja ngajpxy ne'egi myikwinmaa'mbyaadyiyi jøts jatyi tø xnigajpxti ti dø'øn tø xundi; tø m'atsyikjotma'adyidi, tøts nayide'en xtsaachjawidi. Winets meets jatyi xjadyimygajpxwa'añ jøts nayide'en xiidyunwamidi pøni pøn idø'øn tø mmidundigøydi. Ja' meets idø'øn myiknigaxi'kpy ku meets tø mgatundigøy. ¹² Ja'agøjxp meets jade'en tø nnijayi ku meets ejtp nja'myech jøts kidi ja'agøjxpi øts ja nøky tø nguexy ku øts ja'ayi ngajpxwejwa'añ pøn tø tyundigøy uk pøn tø yikmidundigøy. Pø ja'agøjpxxi mee nnijayi jøts ja Dios xuknijawidit mabaat ja mba'ayo'owin myajada'akti ku øø xpa'ayøy. ¹³ Paty øøts jotkujk nnayjawiyi.

Jawaani jotkujk øø nnayja'wiyi ku ja Tito ya tø yja'aty jøts ku meets ja tø xpudøki jøts ja jotkujk tyiknaxt. ¹⁴ Ka'ap øø nugo tø nwindaa'yi ja Tito ku meets øy tø mjaa'y'aty samdam øts ja jawyeen ndamimadyaajky. Ka'ap øts ja n'ayuuik nugo tø xyiktsø'ødyuñ, tiy ja tø pyidsimy. ¹⁵ Jabi mdojixpxi meets ja ne'egi icyam jawaani møj ku meets ja tuki'iyi tø xpandungoixy pøni ti jam mda'ana'amiyidip, jøts ku meets ja øy tuda'aky tø xwindsø'øgi. ¹⁶ Ka' xnijawidi mabaat øts nxondaajkin yja'aty ku mee nnijawi ku adøm øy tsuj nnayja'gyukiyindi.

8

Ku ja Pablo pudøjkin t'amidøy jøts yiktatubøkidit ja ayoobi jaa'dyi

¹ Ixyam meets migu'uktøjk nduknijawiwya'andi mabaat idø'øn ja Dios jø'y'ajtin tø pyudøkiyidi ja Macedoniait janchja'wibidi. ² Øy ja sagasa tjamøjatti øyi myeeñ øyi pyikta'aky yjaga'etti may, jotkujk ja tø tyakøjti ja pudøjkin jade'en samdam ja møj kumeeñ jaa'dyi. ³ Tø ndyimy'ixy tø ndymfijawwi mabaat idø'øn tø tyakti ja pudøjkin øy ja niti yjaga'uktaa'nxinidi. ⁴ Møk øøts ja tø x'amidøy, tyimdyanuu'kxaktip idø'øn jøts pyudøjkin ja yikupøktit

midi yiktabudokiwiyandip ja jaa'y midi nayide'en tjanchja'widip ja Dios. ⁵ Jinaxy idø'øn ja ne'egi tø ttundi yam øts ja jade'en ngajøp'lijxy'aty, jabi jawyeenxi ja Dios ñadyamiyojxiyidi jøtsnim øøts ja xpaduñ samdam idø'øn ja Dios ttanibiktaagi. ⁶ Ja'agøjxp øøts idø'øn ja Tito ndaguwani jøts pudøjkin ja jam tjaakyikmukojt midi mee kø'øm mdsojkingøjxp myakwampy midi ja jam tø t'ukyikmuktoøñ. ⁷ Agajpxy mee mbidsimy øy yjadyimysudso'ambyi: møk meets ja ajot'ajtin xmøødi møøt ja winmaa'ñ sudso yikxon xyaktit ja Dios y'ixpøjkin, jøts mwijy meets, wa'ats xjatti wa'ats xnijawidi, jøts møk mee xtsøky møk mee xpa'ayøy niwine'en øø nyam'aty. Patyxi øø nwa'añ ku meets agajpxy mbidsømit nayide'en ku ja pudøjkin xyaktit.

⁸ Ka' meets ya'at ndyimdyaguwani, ja' øøts idø'øn nanky'ejxwajnip sa dø'øn ja Macedoniit jaa'y ja chojkindi pya'ayo'owindi jøts yiknijawit nayide'en jøts ku meets ja mdsojkin ja mba'ayo'owin tyiyi yjanchi. ⁹ Mnija'widipxi jøts ku ja nwindson'ajtim Jesucristo ja y'øy'ajtin jadine'en tyikmajada'aky, jøts møk ja tsojkin møk ja pa'ayo'owin tmøøt'aty ku ja mguwanjatiyidi ja'agøjxp ku ja mdsøkyidi mba'ayøyidi, jabi jotkujkxi ja y'ijty tyiknaxy møøt ja Dios Teety. Adømgøjxp ñanky'ayodøjkixi jøts ja øy'ajtin jade'en nbaajaint Cristo køjxp.

¹⁰ Meets m'øy'ajtingøjxp øts idø'øn yide'en nwa'añ ku meets junkti'ijyip ja pudøjkin xyikmuk'okwa'añ janch pe'tpy janch yijy. ¹¹ Nayide'ents idø'øn ixyam xu'undit sam tø xyiktso'ondā'akti. Tuki'iyi ja m'aaw ja mjoajt xpikta'aktit kunim ja xyik'abaadidit, pøni mabaat nidu'uk nidu'uk myajada'akti. ¹² Jabi ka'axi ja Dios tuki'iyi t'amidooguixy, ja'axi ja y'ijxpy mabaat idø'øn nidu'uk nidu'uk chojkingøjxp tyaky.

¹³ Ka'ap jade'en xja'gyukidit ku meets ja mmigu'uk nduku'ayowidyøkiwya'andi; ¹⁴ jabi nixem niyamxi dø'øn tuknax nmøøt'ajtindit ja pikta'aky. Ixam meets xmøøt'aty midi yø ka'ejtxidip, ja'atp ja xøow ja jumøjt jøts ku meets yø wyinaty mga'ejtximiyidi winets yø mmø'omyiyidit. Jøts jade'en ñi'awich'att, ¹⁵ sam ja Dios kyajpxy wya'añ: "Pøn tyumøøt'ajtkijxpy ka'ap ja tø wyinda'anxiyi; jøts pønts waani tmøøt'ajtp, tuki'iyi ja tø ttapatkixy."

Tito jøts ja myigu'uktøjkti

¹⁶ Ja' øts Dios ndamøja'wip ku meets ja Tito nayide'en mba'ayøyi sam øts. ¹⁷ Tø ja tjanch'øyjawi ku meets ja ndanigaxwa'añ, tøyim ja jeexyip ttuñ kø'ømmdsojkingøjxp jabi mjanch'ejxwajnipxi meets ja'.

¹⁸ Ixyamts ja Tito møøt nguexy tu'uk adøm nmigu'ukti midi øy yiknimadyakp mā jaty ja janchja'wibi jaa'y ñamyukyidi, jade'en ja yiknijawi ku ja øy tyi tnigajpxy ja nitsoojkin ayuujk pøni mā jaty ja tø wyidity. ¹⁹ Kø'omyi ja Macedoniit jaa'y tø twi'ejxti jøts øøts yø møøt ndu'unt jøts øøts yø møøt njaakyikmukojt ja pudøjkin. Ja'agøjxp øøts yø'øbi tunk nduñ jøts ja nwindson'ajtim jade'en yiktawindsø'øgit jøts jade'en meets xyiknigaxø'økt ja mdsojkin ja mba'ayo'owin. ²⁰ Ja nabyagajpxi dø'øn kayiktsojpk ku øøts ya'at pudøjkin nyikmuky. ²¹ Paty øøts niti taay ngayiktuñ øy øøts yø nminaxt Dios wyingujkp jøts jaa'y wyindump.

²² Nayide'en øøts ixyam ndamigaxi jadu'uk adøm nmigu'uk midi ja Dios yja' øy tsuj pyaduujnip jøts ku meets ja nayide'en mdajotkujk'ajtmiyi. ²³ Ku pøn jam tyiknidøøwit ti dø'øn ja Tito tyumpy, jade'en x'adsojimbettit jøts ku øts yø nmigu'ugi, øts nmøøtumbi yø', øøts idø'øn ndumpy ja pudøjkin pøni pøn tsojpk ja Dios. Jøts pøni yiknidøø'jimyidip ti yø tyundip yø jadu'ukpi migu'ukti, jade'en x'adsojimbettit ku janchja'wibitøjk yø tø kyexyidi jøts ku ja

Cristo yø jade'en twindsø'øgidi. ²⁴ Paty ø nwa'añ ku jam mbaa'diyidit yikxon xuk'ejxtit xuknijawidit sa meets ja tsojkin sa meets ja pa'ayo'owin xmøøt'aty jøts ñigaxø'økt jade'en jadits meets ndajotkujk'aty.

9

Ku ja Pablo tñigajpxy sudso ja pudøjkin yjaakmukt

¹ Ka' pyaat'atyiyi ku meets ya'atpi winmaa'ñ jeexyip ndanijayi, ² jabi nnija'winipxi øts ku meets ja pudøjkin jaty xyakøjy. Jotkujk øts idø'on ja Macedoniit jaa'y nnimay'etti ku meets junkti'jyip ja pudøjkin xyakwani jøts jade'en namay ttunwamidi sa me to xunjøpi. ³ Ja'agøjxp øts ya'at migu'uktøjk ngaxti jøts mdukja'myatsidit ku ja pudøjkin xyik'awejxtit. Jøts øts jade'en ja n'ayuyk tyø'øt sam øts yø to ndamimadya'akti jawyeen. ⁴ Ja kuts jotmøn ja Macedoniit jaa'y nmøøtnøjkxt jøts ja jam m'atspaadidit yam meets jam wyinaty niti xka'awixy. Tsø'ødyuñimts ja tya'ant ku wyinaty jade'en jyaty yam meets øy to n'uknimadya'aky. Jaa kidi meets ja tsø'ødyu'unin jawaani møj mbaa'diyit? ⁵ Yide'ents øts yjawi ne'egi ndanibiktaagi jawyeen ya'at jaa'y m'ats'ejxidit jøts jade'en mjaakpudøjkigyoyiyidit jøts kya'pxt ja pudøjkin midit meets to xni'adsowi. Jøts jade'en wyinaty jam mgø'ømdsojkin xyiknigaxø'økti jøts ka' mwā'andit ku øøts nugo ndyimyajada'aky.

⁶ Ejtp ya'at xja'myats'ettit: Pøn waani nepp, nayi waani ja tpiky ja pyikta'aky; jøts pøn may nepp, nayi may ja pyikta'aky ja wyimbijty. ⁷ Kø'ømdsøky'ampy idø'on ja pudøjkin xyaktit. Kidi adsep'amip ja xu'undit jabi tsojkipxi Dios ja' pøn xondaajkingøjxp tyajkp ja pyudøjkin. ⁸ Maajyip ja Dios jøts tkaxt køx kida'ak ja kunuu'kxin jøts jade'en xmøøt'at'ettit pøni ti tsojkip, jøts nayide'en ja mmigu'uk xjaaktanipaattit tuki'iyi ja pudøjkin. ⁹ Pø yide'enxi ja Dios kyajpxy wya'añ: Pøn ttabajaa'ñaxp ja ayo'on, pyudøjkip ja ayoobi jaa'y ja', jøts ja y'øyjaa'y'ajtk niwindem ja kyagugøxi.

¹⁰ Abaadit ja Dios tyaky ja jujky'ajtin jøts adøm jade'en tuki'iyi nmøøt'ajtkøjxint jøts ja nmigu'uk nayide'en ja pudøjkin ndanipaajtint. ¹¹ Jøts meets nayide'en køx kida'ak xmøøt'attit ja øy'ajtin jøts øy pøngapøn xmo'odit. Ja pudøjkin midit meets xanigaxip, ja Dios ja tyamøjawidip tyagunuu'kxjawidip ku ja wyinaty yiktanipaatti. ¹² Kidi ja'ayip adøm ja nugo ndabudøkiwya'añindip midit ja ka'ejtxidip, jabi ja'axi nayide'en yiktump jøts ja Dios ja tkajxak'ettit. ¹³ Ja'agøjxp ja Dios ja ttamøjawidit ku meets tiy ka'pxy xmimadowdi ja Cristo y'øgyajpxy y'ømyadya'aky sam nayide'en ttamøjawidit ttagunuu'kxjawidit pøn jaty wyinaty paajtmiyidip ja pudøjkin. ¹⁴ Jøts meets ja nay jaayy mgugajpxajkmiyidit jabi tøxi meets ja Dios ja myø'øy'ajtin wyinaty xyiknigaxø'økti. ¹⁵ Janch møj ja Dios ku ja møj kunuu'kxin to xmø'øyim! ;Ka'ap aaw ayuyk yikpaaty sudso ja nnimadyajkin!

10

Sa ja Pablo yikutuky ku ja nwindson'ajtim tkudani

¹ Tyimgyø'øm øts idø'on nnuu'kxa'aky nayide'en sam ja Cristo jeexyip kø'øm ttuñ. Jade'en ja kajpxy yø'øy kuk mees nnijayi, tyimy'ap meets ja nøy ndanigaxi, jøts ka'ap øts nayide'en njaa'y'aty ku øts ja jaa'y møøt nnaabyaadyi, ja tsø'øgik øts nyikmajadakpy. ² Paty nwa'añ, ku mee wyinaty n'ats'ixy jøts ø xkayik'ambøktit ku øts ja jamyi n'uknibidø'knit pøn ja y'aaw ttakajpxtip ku øts ngø'ømwinmaa'ñ nyiktuñ sam øy pøn jaa'yin. Ka'ap ø pøn

ndsø'ogi pøni jade'en ja ttsokti. ³ Janch tiy idø'on ku øts nbojpkpitumbijaa'y'i, ka'apts øts mibaat ja pøky x'ana'amt. Ja Diosxi øts ja yja' xuu'mø'y'ejtp. ⁴ Ja nmøk'ajtin øøts, ka'ap ja pøky agujkpy pyidsimy, Dios wyingujk ja chøøn midi tyikudigøopy pøn ja Jesucristo møøt kyanamyayi. ⁵ Jade'ents idø'on, nyikudigøopy øøts ja katiiby'i kajpxy midi nugo nankmyøjtøjkijyip ku ja Dios ja yja' tkañank'ejxwajniyi. Jawyeen øøts ja Cristo nduknijawi sã pønjabøn wyinmay jøts ja tu'ugyi ja yja' tpaduujnidit pøni yikutujkpy ja jade'en. ⁶ Ndiidyu'ump øøts pøn ka'pxy tkabadu'undip ya'atpi ana'amin ku meets wyinaty tø xpadunguixy jawyeen.

⁷ Ku mee x'ijxy ku ndsø'ogi ka' xnijawidi sam ndyimyjaa'y'aty. Pønjabøn wya'andi ku ja Cristo yja'atyidi, nayide'en idø'on tnijawidit ku øøts ja Cristo xja'ajtmi. ⁸ Wan meets jam winaagin mwa'añ ku øts ja nwindson'ajtim kyutujk nugo ndyimdyamajada'aky, niti ngapøkyjawi jabi kø'ømxi ja nwindson'ajtim tyajky ja kyutujk jøts meets jade'en ja mjanchja'win myøjit, jøts ka'ap meets ja mgudigø'øyin n'ixajyi jade'engøjpx. ⁹ Kidi xja'gyukidi ku meets yø nøky nugo nda'adsø'øgiwya'añ. ¹⁰ Jade'en ja kajpxy yø'øy ku tyimy'ap ja n'ayuujk nguexy jøts ja jaayi kø'øm nga'uknitanaañ, ka'abik øts øy tsuj ja madyajkin nmøødi. ¹¹ Pøn idø'on yide'en ja ayuujk tyikyø'øpy nayide'en idø'on ja tnijawidit ku øøts nayide'en ndyimyjaa'y'att meets windump sam øøts n'ayuujk nguexy jagam.

¹² Ka'ap øø nnay'a'ejxiyi jøts øø kø'øm nnay'agajpxiyit sam jam muum winaagin ttundi. Ja kaja'gyukin ja yikmajadajktip ku ja nixem niyam kø'øm yjanch'uknay'agajpxyidi. ¹³ Nijuuni øøts ja kutujk ngayiktuñ midi øø ngamøøt'ajtpy. Ja Dios øøts idø'on xuknija'wip mabaat idø'on ja tunkjøøjp yja'aty, jøts nay ja' øøts tø xuu'mø'øy kø'øm ku meets jam tø n'atsnija'aty Corinto. ¹⁴ Ku øø nwa'añ ku øøts ja kutujk nmøøt'aty jøts meets n'ana'amt, ka'ap øøts ngø'øm ja' nyiktuñ, pø jade'en ja jeexyip yjaty kuk øøts jam jawyeen jeexyip tø nga'ats'øch. Jabi meetsxi jawyeen ndanija'jt ja øgyajpxy ja ømyadya'aky sã ja Cristo y'ø'y'ajtin xukpaajtint. ¹⁵ Ka'ap øø ndsøky jøts øøts nugo nnadya'agajpxit ja wenk jaa'y tyunk ja kajpxwejin midi tø myikmo'odi. N'awixy'ajtpy øøts ku meets ja mjanchja'win winjaa windsojk myøjit myayit mabaat idø'on pyaat'aty; jøts mabaat øøts nayide'en nmajada'aky ku øøts jam ndu'unt ma meets jam. ¹⁶ Xjats øøts jade'en ngajpxwa'kxt ja nitsoojkin ayuujk abiky'et abikyajp meets mjixkø'øm, jøts nijuuni øøts nganadya'agajpxit ja wenk jaa'y y'ixpøjkin.

¹⁷ Pøni jaa pøn ñay'agajpxwa'añi kø'øm, ka'ap jade'en pyaat'atyiyi, ja Dios idø'on ja y'ø'y'ajtin ja ne'egi ja'ayi y'agajpxip. ¹⁸ Ka'ap y'øbyidsimy ja jaa'y pøn kø'øm nay'agajpxiyip, ja'ats ne'egi øbyidsømp pøn ja nwindson'ajtim t'øyja'wip jøts ja t'agajpxy.

11

Pablo jøts pøn ñadyijyi nañikajpxidip Jesús kyudanaabyi

¹ Meets migu'uktøjkti, wan meets mwa'ant ku nugo mo'tpin nmadya'aky, ja'gyuki meets waani wan øts ngajpxy t'ukyiknaxy midi n'am njotp nmøøt'ajtpy. ² Øy mee n'ama'at'aty ja Dios øts idø'on jade'en kø'øm xyik'adøtsp; jabi tøxi ja Cristo yja' tu'ugyi ndukpabøjkidi jøts ku meets ja ndawinguawiwya'añ. Wa'ats meets jam nyiknøjkxwa'añ, sam pøn ja pøky tkidyimy'ijxy'ajtipnim. ³ Jade'en sam ja Eva ja tsaa'ñ wyindaayiyøø, wan meets yjawi nayide'en myikwindaay'atwa'añ jøts mwinmaa'ñ tyigatsttit jøts jade'en mga'uknadyamiyojxnijidit ja Cristo. ⁴ Jam pøn ja Cristo

y'ixpøjkin wenk tnigajpxip, ka'ap nayide'en sam øøts nnigajpxy; jøts meets ja Espiritu Santo yja' nayide'en wenk xnija'wiyi, tigach meets ja yiknitsokpi ayuujk xnijawidi, ka'ap nayide'en sam øø nnigajpxy. ⁵ Pøn jade'en myikwinmaa'nmya'jtidip ka'ap øts ja mabaat xyik'amutskidi øy ja nugo ñadyijyi yjanañikajpxyidi ja Jesús myøjkudanaabyi. ⁶ Øy øts n'aaw n'ayuujk øy tsuj ngamøø'aty, ka'ap øts nwinmaa'n ñayide'eni. Tø øøts yø nyiknigaxø'kni ku meets o tigati tø ndabudøki.

⁷ ¿Tø øts idø'on ndundigøy ndejint ku meets jadi'iñi tø ndukmadøy ja nitsoojkin ayuujk ku ni tu'uk centabi tø nganibiky, jøts øts jade'en ayo'ijxyim njaty nugo ku mee xpiky ja øy'ajtin? ⁸ Wenkpi janchja'wibitøjk øts ja myeeñ tø ngupøjkidi ku meets janch nduknijawiwya'añ ja øy'ajtin. ⁹ Jøts ku øts jam n'uknajxy ma meets jam, ka'ap øts jam ojts pøn nyik'ayøy pøni ti jaty ø xka'ejtixip; jabi ja nmigu'ulxxi øts ojts xujnidi ja may'ajt pøn tso'ondip jam Macedonia. Jade'ents mee ka' nyikjotkixy, jøts ka'ayim meets nugo nyikjotkøxwa'añ, jade'eñim ø nyiknaxt sayim ø nyiknaxy. ¹⁰ Nayide'en sam øts ja Cristo tyiy'ajtin njanchja'wiyi nayide'en ø njawi ku meets nnøjmi, ku jam Acayi y'etjotp ni tu'uk ja jaa'y jam, pøn ø xuk'ixmatsp ja'abi xondaajkin ku øts Dios yja' nnigajpxiyi. ¹¹ ¿Jadits øts n'ayuujk jade'en nyikwa'añ? ¿Ja'agøjxp idø'on ndejint ku meets nga'uktsojki? Wa'ats ja Dios tñijawi mabaat øts ndsojkin yja'aty meets køjxp.

¹² Jade'eñim øts yø ndunk nyikyø'øy'ett jøts ja kyamøj'attit pøn ñadyijyi nañikajpxidip ku ja nayide'en tyumidi sam øøts. ¹³ Yø'øbi jaa'dyi nugo yø tyaa'y'atti ku ja Cristo tkudanidi. ¹⁴ Ka'ap yø kumaap nja'wa'ant, jabi kø'ømbaaxti ja miku'windsøn Satanás ñanky'ijxyiyi ejximdam ja Dios y'ankilis kunuu'kxy. ¹⁵ Paty nayide'en yø tyumbi ñanky'ejximi samdam ja øybi tumbi jaa'y. Ja chinaa'yin ja yiktatidyu'undip jade'en sam ja pya'at'atyidi.

Sa ja Pablo y'ayo'ombaaty ku ja Jesús tkudani

¹⁶ Ixyam mee nnimaagyojmi jøts kidi nugo mwinmaydi jøts ku nmø'øty. Pøni jade'ents xja'gyukidi, wants øts jade'en tmadya'aky jøts øts nadyijyi namyikajxim nnayjawiit. ¹⁷ Kidi mee mw'a'añ ku øts ja nwindson'ajtim jade'en xyikmadya'aky, jabi nugo mo'tpixi øts idø'on, ku njanch'uknay'agajpxiyi. ¹⁸ Jaaxi jaa'y pøn nadyamikajxidip ja ñaxwii'ñit tsinaa'yin, wants ø nayide'en nduknamyikajximi. ¹⁹ Jabi møj ja'gyukixpi meets mjaa'y'aty, patyts meets sa xkatijy pøn mo'tpa'an madyakp. ²⁰ Ja' mee ne'egi m'øya'wip pøn jiyujkin myiktuujnidip, pøn mwindaa'y'ajtidip, pøn mnijuu'yniyidip, pøn mdekpya'an'ajtidip. Mgupiky'ajttip ja' øy sagasa myiktunidit. ²¹ Øy øts ixyam nnabyøkyjawi ku øts jade'en tø ngajaa'y'aty kudam meets yø' ne'egi jade'en x'øyjawi!

Pøni jaa pøn ap tyimñayjawi, xmaapy øts ja', øy øts nayide'en njaa'y'att. ²² ¿Ja hebreo ayuujk nadya'agajpxidip? Nnija'wip øts ja nayide'en. ¿Israelit jaa'y ja'adi? Nayide'en øts. ¿Y'apteety'amøj'ajttip ja Abraham ja'? Nayide'en øts ja n'apteety'amøj'ajtmi. ²³ ¿Jade'en ja wya'andi ku Cristo tmidundi? Jawaani øy øts ja ne'egi nmiduñ, øy øts jade'en ja tsojkin njagamøø'aty jøts ø nnay'agajpxit kø'øm. Jawaani møk øts ndunk ne'egi tø nyiknigaxi'iky yam yja' ja ka' ne'egi ñigaxø'økti. Tø øts ngu'ayo'ombaadi ja ndunkjøšp, ne'egi ka'ap ja'adi. Ne'egi jawaani may ojk øts idø'on ja tø nyiktagdusmi, jøts kawinaak ojk øts ja n'ojkin tø n'ixy jaayi wingon xwindani. ²⁴ Magoxk ojk øts ja ayo'on tø ngupiky midi øts nmigugajp israelit jaa'y tø xmø'øy sam ja kyutujk

wya'andi ku ee'pxmajk taxujk ojk nyikwøpy. ²⁵ Tigøøok ojk ø tø nyikipwøpy, jøts tu'uk ojk tø nyiktsaaga'ach. Tigøøok ojk øts ja nbarki tø myejy'okida'aky. Tu'uk ja xøøw tu'uk ja koots nyiknajxy jam mejkyujk'am, ja kipy pyidasi, ja puu' pyidasi jøts iij xjaakyiknøøwinganamp. ²⁶ Jagambaat øts kawinaak ojk tø nwindson'ajtm muum ja møj nøgom xyikjø'øtwa'añ, jøts ja jaa'y muum xwimaatswami. Ngø'øm migugajp paat øts xni'adani xuu'adani sam nayide'en y'adøtsmidi ja wenkajp jaa'dyi. Nbatpy ø nayide'en ja ayo'on møj kajpjoetp samdam abak etjoetp uk jam mejyjoetp. Nayide'en øts ja xka'ødyumidi pøn ñadyiyi Jesucristo janchja'wibiidi nañikajpxidip. ²⁷ Tø nduñ mabaat øts ja ngø' ja ndeky myajada'aky, øy øts ayo'on ja xadukpaaty; kawinaak ojk ø ngamaa'y nga'ity; ayuu adøøtsi tø nyiknaxy kawinaak ojk; tø ndanaxy ja tep ja xux, ni ja nwet ni ja nnaamy tka'ukpatni.

²⁸ Øy øts idø'øn jade'en ya'atpi ayo'on njapaaty uk midi jatyts njayiknaxpy, møjip mayip øts ja njotmay ku øts ja njotmay'ati jabom jabom pøn jaty tjanchja'widip ja nwindson'ajtm. ²⁹ Pøni jaa pøn ja yjanchja'win kamøj, janch pamaa'yin ø nnayjawi. Pøni jaa pøn wenkpi winmaa'ñ tpanøjkxidip, møk øts ja n'ayooji, møk øts ja ngudsø'ødyuni jøts øts ja nugo njantya'ambiky. ³⁰ Pøni janchpaat'ajtipts idø'øn ja nay'agajpxi ja ngamøk'ajtipts ø ne'egi nadya'agajpxip. ³¹ Ja Dios Teety midi ja nwindson'ajtm Jesucristo ty-eety'ajtpy midi paat'ajtiyp xemikøjxp yikmøjawit yikunuu'kxyjawit, wa'ats ja tnijawi ku øts ejtp ja tyiibi ja yjanchpi nnigajpxy. ³² Jøts ku øts nnajxy jam Damasco kajpjoetp, jam dø'øn tu'uk ja windsøn midi tmidump ja yjadu'ukpi møj windsøn Aretas, ja Damaskit windsøn idø'øn ojts t'ane'emy ja tyumbitøk jøts ja tyimyik'adujkøxtit ja tuu' ma jaty ja kajp yiknidøki jøts øts ja xmatstit jøts ø ndyimyiktsu'umt. ³³ Ti mats ja Dios xuk'ixmajtsint, jabi jamxi nguejky, ma ja møj pøch jam, midi ja kajp nawidejtip. Øts nmigu'uk xkatstidyøø mutsk ventani agø'øm kachjøtpy. Jade'en øts idø'øn ja xkapøktøø.

12

Sa ja nwindson'ajtm tnanky'ijxyiyi ja yja' Pablo kyumaa'yjøtpy

¹ Nniija'wip øts ku niwine'en kyajami ku nnay'agajpxa'ant kø'øm. Meets ukja'gyuki, kuwani øts idø'øn nnigajpxt sudso nwindson'ajtm ja yja' tø tnanky'ijxyiyi ku ø kø'øm nnay'ijxyiyi kumaa'yjøtpy. ²⁻³ Ndyimy'ijxy'ajtpy tam øts tu'uk ja jaa'y midi tjanchja'wip ja nwindson'ajtm Jesucristo midik myakmajkts jumøjtøp ojts yikwaanijky jap tsajpjøtpy. Pø sudso idø'øn ja yikwaanijky, pø møøt ñe'lx uk nugo y'anmija'wints idø'øn ja nøjxp Dios tu'ugyi tyimy'ukniija'wip. Ja'ayi ø nniija'wip ⁴ ku ojts yikwaanijky jap tsajpjøtpy ma ojts tmadøy ja kajpxy ja madya'aky midi ka' pøn nugo ñiyiktukmadøy. ⁵ Ti kanadyamiguexyim idø'øn ja yjawi ku øts jade'en sam ja jaa'y, ka'ats øts nnamyikexyiyi pø wanims øts ja ngamøk'ajtm nnadyamikexyiyi. ⁶ Øyimts øts kø'øm njanchjanañigajpxwa'añiyi, pø ka'axi ja nugo kajpxy, pø ty'ajtinxi øts wyinaty nnigajpxpy; ka'ats øts jade'en nduñ jøts kidi pøn nugo wyinmay jøts ku øts ngamaabyi jøts ku øts ka' njade'eni sam pøn yamts øts idø'øn ja jade'en ngatuñ sam ja wyinmaydi.

⁷ Kawinmaañixi dø'øn ja chuji midi øts ja nwindson'ajtm xuk'eix ngumaa'yjøtpy; jøts øts ja nganadyamikaxiyit, winets nja'wigyejky adsu'jky nikøjxp yjajkejky samdam ja kujp xkuu'mint. Ja miku'windsøn Satanás ja tyunkjøjpp jade'en ñanky'eixip. ⁸ Tigøøok ojk øts ja nwindson'ajtm ojts njanch'amidøy jøts tyiknaxt ja jajin ja tøø'yin; ⁹ jøts øts ja nwindson'ajtm yide'en ja'ayi x'adsøy: "Ja ndsojkin ja nba'ayo'owin mets ja'ayi mbudøkiyp;

¹ Ixyam mee myidigsook ojk n'ats'ejxwa'añ, jøts ku øts ja tundigøøyin jam nyiktiidyokit põni põn jam nugo tymdyunk'ajtnidip ja pøkyunk, tsokip ja a'ejxnajxpi namajtsk uk nidigsook põn ja wa'ats ntimadyakøxtip sa y'ejxi tyiyi. ² Ku myimajtsk ojk n'ats'øjch n'ana'amdi øts ja' põn jam yjawi wyinaty pøky agujkpy tymchinaañidip. Xyamtswa'añ ku nnøjkxt jadigojk ku nayide'en nbatkojmidiit nay ja' põn ø t' n'ana'amdi, niwine'en øts ja ayo'ejxin ngamsoot'att. Pøni jamidits põn ja chinaa'yin tyik'ejtnidip pøky agujkpy nayide'en ja pyaat'atyidi jøts tiidyu'unin tyagida'agidit. ³ Jade'ents meets idø'on xajotkujk'att ku øts ja Cristo xyikmadya'aky jøts meets jade'en mgawa'ant ku ja' kyajotmøjki; jabi ñanky'ejxipts ja myøk'ajtin ma meets jam. ⁴ Ja kyamøk'ajtin kyu'o'jki kruskøjxp, xemikøjxpts ixyam yjujky'aty Dios Teety myøk'ajtingøjxp. Nayide'en adøm idø'on ja kajotmøk'ajtin njagyeypyim sam ja yjajty. Ku ja xemikøjxp nmøøtjujky'ajtin ja nwindson'ajtim jade'ents ja Dios Teety tyaky ja møk'ajtin midi meets ndabudøjkip.

⁵ Yikxon meets køøm nabyawinmayi, mjanchpadundip idø'on ja mjanchja'windi? ¿Ja ka' xja'myatsti ku ja Cristo xmøøt'atti? Uk nugo meets idø'on mnañikajpxyiyi Cristo janchja'wibi. ⁶ Jade'ents øø nwa'añ jøts meets xnijawit ku mee ka' nugo nwindaa'yi ku øøts ja Cristo yja' nbaduujni. ⁷ N'amidøøpy øøts ja Dios jøts meets øy mjaa'y'att. Kidi ja'agøjxpiip jøts øøts jade'en ja n'ana'amin myøjtøkit. Ja m'øy'ajtinxi øøts ja'ayi n'ixaapy. Padun meets ja', øy øøts agajpxy njagabidsimy. ⁸ Ka'ap øøts ja møk'ajtin nmøøt'aty jøts øøts nwindson'ajtim ja tyiy'ajtin ngajpxwe'jtit, ja' øøts ndunkjøøjp'ajtpy jøts ja yiknigajpxt tiy ka'pxy. ⁹ Ndaxonda'akp øøts ku meets ja møk'ajtin xmøøt'att øy øts ja ngutujk njagayiktuñ. Ejtp øøts ja Dios n'amidoo'ett jøts meets ja mjanchja'win jøts meets ja mjujky'ajtin yikxon y'øyit yikxon tyuda'akt. ¹⁰ Namga'anin øø ndsøøñ ku meets ya'at nøky ndanigaxi jøts ku meets wyinaty n'ats'ixy ka'ap xjawidit møk ja tiidyu'unin midi ø tø xaguwani ja nwindson'ajtim. Ja'agøjxp øts ja kutujk tø xmøøy jøts meets ja mjanchja'win myøjit jøts kidi ja'agøjxpiip øts ja nmøødi jøts meets ja kudigøøyin xpaatti.

¹¹ Meets migu'uktøjkti, øy meets. Yikxon meets ndamidsøky xyiknaxtit ja mdsinaa'yin, ixa'adi ja øy'ajtin ja tuda'aky'ajtin, ñankyjotkujk'atidi nixem niyam, yikxon mnamyigu'ukwa'anidit yikxon mnamyayidit, jøts jotkujk x'ejxtit. Winets meets ja Dios xemikøjxp mmøøt'etidit midi tyajkp ja jotkujk'ajtin midi tyajkp ja tsojkin ja pa'ayo'owin. ¹² Nagyajpxpoo'kxidi nixem niyam sadam ja Dios ttsøk'aty. ¹³ Niduki'yiyi ja janchja'wibidi midi øøts ixyam møøt, nayide'en ja tkaxmidi ja kyajpxpoo'kxin.

¹⁴ Paatti kupøkti ja nwindson'ajtim Jesucristo kyunuu'kxin, nayide'en ja Dios Teety chojkin ja pya'ayo'owin jøts nayide'en ja Espiritu Santo nima mgamajststu'udidit. Tiigvajpxy idø'on, jade'en idø'on yjatt.

JA NØKY MIDI JA PABLO TYANĠGAJX JA GALACHT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Galacia

¹ Øts idø'øn Pablo'ajtp, nwindson'ajtim ngudanaapy, nīpøn jaa'y ø tø xkakexy, ja Jesucristoxi ø kø'øm tø xpikta'aky møøt ja Dios Teety pøn ja nwindson'ajtim kø'øm tø yikjujkyikyiyi jap oo'kpi y'agujkpy. ² Ixyamts øts møøt niduki'yiyi ja nmigu'uk janchja'wibitøjkti, meets ndanijayi ya'at nøky mā jaty xpadumidi ja nwindson'ajtim yja' jam Galacia etjotp. ³ Paat meets ja øy'ajtin ja kunuu'kxin midi ja Dios Teety yajkpy møøt ja nwindson'ajtim Jesucristo, ⁴ pøn nagyiyajkiyøø jøts adøm nøky ja xku'o'jkandi jøts kidi ja axøøkpi tsinaa'yin mibaat xmmadaajkyindi midi yikpatp ya naxwiiñ, tøxi ja Dios Teety jade'en kø'øm ttanibiktaagi. ⁵ iTu'ugyi ja Dios myø'ajtin ndamiguy'ejxint xemikøjxp! Jade'ents idø'øn ja yjatt.

Ka'ap ja jadu'uk abiky midi tnigajpxp ja yiknitsoojkin

⁶ Tyimñigyumaap ø nnayjawiyi ku meets pojn xmajststutkojmi ja Dios, pøn meets kø'øm tø mwaamīñidi tø mwaadsøyiidi ku ja Cristo xpa'ayonajxyindi, jøts meets ja janchpi nitsoojkin xijy xpabiky, ja wenkpidam ja'. ⁷ Ka'ap idø'øn ja wenkpi nitsoojkin ya jadu'uk y'ity. Yide'en idø'øn yjaty, jaa dø'øn jaa'y pøn meets nugo mjanchjaa'midip, ja Cristoxi dø'øn ja ñitsoojkin yjayiktigatswandip. ⁸ Tøxi meets tu'ugyi ndukmadøy ja janchja'win, kuts wyinaty pøn nidu'ugin tyiktigatswa'añ midi øøts jawyeen tø n'uknigajpxy, møkts idø'øn ja Dios tya'ambøkkit, jøts møj ayo'on tyukpaadit wan tjapøni ku ttu'undit jade'en, o njadyimya'øtsi uk yjadyimdioskugajpxy'ajtpi, ku wyinaty ja wenkpi janchja'win tpikta'akwamidi sam muum ixyam yjawi ttunwa'andi. ⁹ Ixyam meets ndukja'myatskojmidi: Pøni jaa pøn ja wenkpi ixpøjkin mdawindaayiwyañnidip, paat'ajtiyip ja' ñigida'agiyit ja Dios myø'ayo'on.

¹⁰ Ti øts idø'øn jade'en xijy xyikwamp ku øts idø'øn jade'en nwa'añ. ¿Ja' øts idø'øn xijy ndsøjkpy jøts øts ja jaa'y kuwani xtyimgyupøkt jøts øts ja kuwani xtyimdyakajxa'aktit uk kuwani øy nayide'en xtyimgyupøkt ja Dios? Pø ka'axi, ku øts ja jeexyip ja'ayi nugo nda'ødyøki ya naxwiiñit jaa'y wyingujky, ka'ats øts ja Cristo jeexyip x'uktumbi'ajtni pø ja'axi ø tu'ugyi tø nnadyamiyøxyiyi.

Sudso ja Pablo tyøjkiy'ñ kudanaabyi jøts ja tkudanit ja nwindson'ajtim

¹¹ Nijawi meets ya'at, migu'uktøjkti, ku yø nitso'ok'ajtin midi ø nnigajpxy, ka'ap jaa'y øt twinmaa'ñi. ¹² Kø'øm øts idø'øn ja Jesucristo yø tø xuknijawi. Kidi me mwa'añ ku øts yø øy pøngapøn jaa'y tø xuk'ixpiky.

¹³ Tø meets idø'øn ja kajpxy ja madya'aky xnijawidi sa øts y'ijty njaa'y'aty ku øts ja chinaa'yin nbaduujnidi ja israelitøjkti. Mnija'wip meetsmi sa øts idø'øn y'ijty awa'an'ampy njemduñ ndeduñ pøn ja Dios tjanchja'widip jøts ø nyikudigøøwya'andi. ¹⁴ Øts idø'øn y'ijty ja israelit jaa'y chinaa'yin jawaani ka'pxy nbadumpy nika'ap øts ja nmiyaaktøjk ni tu'uk pøn jade'en kyama-jada'aky sam øts. Jabi ja'ats øts idø'øn y'ijty n'amip njootp ja møjaa'dyøjk chinaa'yin. ¹⁵ Tigajts øts ndsinaa'yin. Ka'anīm øts wyinaty ya naxwiiñ ngaxi'iky ku øts ja Dios wyinajty tø xwi'ejxni xwigoni, pya'ayo'owingøjxp øts

idø'øn tø xwaaðsøy. Ku ja xøøw ja jumøjt tpaajty sam ttanibiktaajkiy#ñ, ¹⁶ xjats øts idø'øn xuk'ijxy xuknijawiy#ñ ja y'U'nk, jøts ngajpxyø'øyit ja nitsoojkin madya'aky ma pøn kya'israelitjaa'yidi, pøn tkanija'widipnim ja nwindson'ajtim Jesucristo. Kuts idø'øn ya'at jade'en yjajty, nipøn øts idø'øn nga'ats'ixy nga'ats'amidøy, ¹⁷ ni nganijxy øts jam Jerusalén ma jam pøn ja kudanaa'yin jawyene tpadøjkidyøø. Tiy øts idø'øn ne'egi ndyimñøjkxøjy jam Arabia etjotp, jamts ø nwimbijty jøts ø nja'jty jam Damasco.

¹⁸ Kyidigøøk jumøjtnim ø nnijxy jam Jerusalén; winets øts ja Pedro ojts nminabyaadyiyi jade'en'ampyts øts ja n'ijxy'aty, makmojxx xøøw øts ja jam nmøøtsinaay. ¹⁹ Ni tu'uk øts ja nga'ejxtøø jadu'ukpi kudanaabyidi, ja Jacobo øts ja'ayi nbaajt, ja nwindson'ajtim y'uch myigu'uk. ²⁰ Y'ijxy ñija'wip ja Dios ku ya'at tyiyi yjanchi midimeets ndanija'ayip. Ka'ap ø nugo ndaabyaaty.

²¹ Kuts idø'øm jade'en y'uknajxy, jamts ø ndsøø'ñ jøts ø nnijxy jam Siria etjotp jøts jam Cilicia nayide'en. ²² Ka'ap øts y'ijty x'ijxyidi adøm nmigu'uktøjkti midimeets tjanchna'wimyidip ja Cristo jam Judeit etjotp. ²³ Ja'ayi dø'øn ja y'ijty tmadowdi ja kajpxy, ku ñømidi: "Ja' pøn y'ijty tkamaa'kxpx ja janchja'wibitøjkti ja Cristo yjaa'y, ja' ixyam kø'øm tngajpxnøp øy tsuj ja Dios kyajpxy ja Dios myadya'aky yam ja y'ijty t'ukyikudigøøwya'añ." ²⁴ Tyamigunuukxyja'widip idø'øn ja Dios ja' ku øts ja ndsinaa'yin tø nyiktigach.

2

Ku ja Jesús kyudanaabyi tkupøkti ja Pablo jøts ja nayide'en tyu'unt

¹ Kyimakmajkts jumøjt øts jadigojk nnijxy jam Jerusalén møøt ja Bernabé, jøts ø nayide'en nbawaay ja Tito. ² Paty øts jam nnijxy ku øts ja Dios xuk'ijxy jøts øts jam nnøjxy. Jøts øts jam møøt amaa'tsk ngajpxy nmadya'aky pøn idø'øn jam tngubajk'ajttip ja kudanaabyitøjkti Jerusalén. Jøts nduk'ejxtøø nduknija'widyøø sa øts idø'øn ja nwindson'ajtim y'ixpøjkin nnanky'ijxyi pøn tkanija'widip pøn ka'israelit jaa'dyi. Njøpja'wip øts ja' ku øts ja jotmøñ xkagupøktit paty øts ja jade'en nnigajpxy jøts øts ja ndunk nugo kyanaxt midimeets jam wyanaty ndumpey. ³ Xpudøjkidits øts ja'. Niti nisa ja Tito kyayiktuuñ, ka'ap ja ejxpajt ñe'kxkøjpx yikpiktaajky sam ja israelit jaa'y ttsøøni. ⁴ Ka'ap øts ya'at jeexyip ngajpxpaaty sa ja Tito yjajty kuk idø'øn kyanøjxiti ja ejxpi ja kowbi jøts tmadya'akwidettit mabaat adøm idø'øn nga'ukpadu'unindi ja møjaa'byi kutujk midimeets ja Jesucristo tø xukniwaaajchim ku møøt n'ijtyim. Ja' idø'øn ja chojktip jøts adøm nbaduujna'andit ja myajaa'byi kyutujk sam ja israelit jaa'dyi. ⁵ Nijuuni øøts ja ngayikmøjtøki jøts ka' meets xinwina'aty ku ja'ayi ejxpajtingøjpx yikpiky ja yiknitsoojkin. Jaa ku øø ndsøky jøts meets tiy xmøøt'ajt'ettitnim ja winmaa'ñ sa ja yiknitsoojkin nbaajtyim.

⁶ Niti nisa øts ja xkanimaadyi pøn jam tngubajk'ajttip ja kudanaabyitøjkti pøni sa øts ndunkjøøp nyikyø'øy; øy ja yjamøjwindsonidi tuknax øts ja møøt nnayja'wiyidi, jabi tum jade'enxi adømdi Dios wyingujkp. ⁷ Ka'ap øts ja wenk ana'amin ja x'ukmøøñidi, jabi yja'gyukidixi ja' ku øts ja Dios kø'øm tø xanipiky jøts øts ja nitsoojkin ayuujk ngajpxyø'ty ma pøn kya'israelitjaa'yidi, sam ja Pedro yiktanipøjkmi nayide'en jøts nay ja'abi ayuujk tkajpxyø'ty jam israelit jaa'yjotp. ⁸ Nayide'en øts ja Dios myø'ajtin kudanaabyi tø xpiktajkmi jøts øts ngajpxwa'kxiti ja y'ayuujk pøn ka'israelit jaa'dyi sam ja Pedro tø yikpiktajkmi kudanaabyi jam israelit jaa'yjotp.

⁹ Patyxi dø'øn ja Jacobo, ja Pedro jøts ja Juan pøn tngubajk'ajttip ja kudanaabyitøjkti tja'gyukidi ku øts ja Dios tø xmøøy ja øy'ajtin jøts ja

yja' nranky'ejxit. Ojts øøts n'ukyikøpatni møøt ja Bernabé, jade'en'ampy ja jade'en ttundi jøts ku øøts ja xmigu'ukwá'añ jøts ku ja t'øyjawidi jøts øøts ndunk øy nyiknaxt jam ka'israelit jaa'yjotp, yam ja nayide'en ja tyunk tyikyø'omyidi jam israelit jaa'yjotp. ¹⁰ Ja'ayi øøts idø'øn x'amidowdi ku øøts nximija'myajts'ett ja israelit ayoobitøjkti. Yá'ats øts idø'øn ne'egi nbadun'ijtpy, ka'ap øts yø'øbi winmaa'ñ n'ixmach.

Ku ja Pablo twindsø'øy ja Pedro jam Antioquía

¹¹ Ku øts jam møøt nnabyaajti ja Pedro jam Antioquíit kajpjtøp, jam øts ojts ndawindsø'øy midi jam wyinaty tyumpy, ku ja ka'ap y'øgyaxi'iky. ¹² Ku ja møøt øy tyimy'ukaagyøjy pøn ka'israelit jaa'y jøts ja jaayi tmajt-stutkojmi, ja'ayi ku winaagin ja israelitøjk yja'atti pøn wyinaty tø tkexy ja ja'abi jaa'y midi tpadundipnim ja møjaa'byi kutujk ja møjaa'byi tsinaa'yin sam ja y'ijty nayide'en tpadumi. ¹³ Nayide'en ttumidi sam ja Pedro pøn jaty jam wyinaty ka'israelit jaa'dyi, nayide'en idø'øn ja Bernabé paat ttumi. ¹⁴ Kuts øts idø'øn ja n'ijxy jade'en ku tkabadundi sam ja øgyajpxy ømyadya'aky ttanibiktaagi, yide'en øts idø'øn ja Pedro nnimaay jøts niduki'yiyi tmadoomidøø ja janchja'wibitøjkti: "¿Tigøjxp mets ya'at jaa'y xuk-padunwá'añ ja israelit jaa'y chinaa'yin? Pø tøts mets ja kø'øm x'ixmatsni jekyip o mets jam mjadyimyjagugajpi."

Janchja'wingøjxp ñitso'okti ja israelit jaa'y sam o pøn jaa'dyi

¹⁵ Israelit jaa'y adømdi ja' ku jade'en tø ngue'exyindi, ka'ap adøm ja pøky nayide'en ndyimyikmajadaajkyindi sam ja' pøn ka'israelit jaa'dyi. ¹⁶ Tøts nnija'windi ku ka'ap adøm ja Dios xkupøjkindit ja' wyingujkp ku ja'ayi nbadu'undit ja Moisés kyutujk. Ja Jesucristoxi dø'øn ja yja' njanchja'wimp patyxi dø'øn adøm ja Dios Teety tø xkupijkyindi, kidi ja'agøjxp ku ja Moisés kyutujk nbaduujñidi. Jabi nipønxi kyayikupøkt Dios wyingujkp ku ja Moisés kyutujk ja'ayi tpaduujnit.

¹⁷ Ku dø'øn ja Dios tø x'ukupijkyindi Cristo køjxp, jøts adøm ja Moisés kyutujk tø n'awimbejtigyojmandi, ¿ja Cristo adøm idø'øn kø'øm xyik-tuu'tigøø'yimp? ¡Ka' yjade'eni! ¹⁸ Ku øts ndungojmit midi tø n'uk'ixmach, ngø'ømbøky øts ja'. ¹⁹ Ka'ap øts ja Moisés kyutujk n'ukyiktuni ja'agøjxp ku øts ja Dios y'ø'yajtin jade'en'ampy ngapaaty; tø nja'gyuki jøts ku ja Dios yja' yikpaaty ku njanchja'want ja Cristo. ²⁰ Ka'ap øts nugo n'uktsinaa'ni, tø øts ja Cristo xku'oogi kruskøjxp; ja' øts idø'øn ndu'ump midi ja Cristo y'øyja'wip jaa ku øts ja chinaa'yin ndajujky'ajti. Janchja'wingøjxp øts ya'at jujky'ajtin nyiknaxy yá naxwiñ ku ja Dios U'nk tø xjanchøky xjanchpa'ayøy jøts nayide'en tø xku'oogi. ²¹ Ka'ap øts ja Cristo y'o'jkin nugo nyiknaxwá'añ; kuts Dios ja jeexyip xagupijkyindi ku ja Moisés kyutujk nbadu'unint, niti jeexyip kyawa'añ ja Cristo y'o'jkin, ka'ap ja jeexyip mā tyuñ.

3

Midi nyikmajadaajkim: ja Moisés kyutujk uk ja nwindson'ajtim yjanchja'win

¹ ¡Meets gálatas jaa'dyi! ¿Tiku tø mwinmaa'nmya'atti? ¿Jadits ku xka'ukupadunidi ja y'øybi ja tyiibi, pøn tø myikwinmaa'ndyigøyidi? Jabi tøxi meets ka'pxy ndukmadooguxy jøts tø xja'gyukidi ku ja Jesucristo tø xku'o'jkindi kruskøjxp. ² Uk'adsojimbetti meets idø'øn ya'at: ¿Sudso'ampy meets idø'øn ja Dios Teety ja y'Espíritu Santo tø mmø'øyidi, ku ja Moisés kyutujk xpaduujñidi, uk ku ja tø xmibøjkti ja yikñitsokpi ayuujk midi øøts

tø nnigajpxy? ³ ¿Tiku xkaja'gyukidi? ¿Sa tø mwa'andi, jade'en idø'on xijy jawaani mjanchja'win myøjidit ku xpadunwa'andi ja Moisés kyutujk? ⁴ ¿Ti nugo meets jadi'iñi xyiknaxwa'añ ja m'ayo'ondi ku myikjemanduni myiktedundi ku ja mjanchja'win x'ukyiktso'ondajktøø? ¿Ka'ap jade'en pyaat'aty, myiktunkpatpy meets ja ndijy ku kawine'en tø m'ayowdi! ⁵ Kuts ja Dios Teety ja y'Espiritu Santo tø mmø'øyidi jøts ja x'ejxiyidi ja myøk'ajtin ku ja tñanky'ixxyiyi ja ixyymbi ka'ixxyimbi, ¿tigøjxpts ja jade'en ttuñ? ¿Ja'agøjxp ja ttuñ ku meets ja Moisés kyutujk xujni? Pø ka'axi, pø ja'agøjpxxi ja ttuñ ku tø xjanchjawidi sa øøts tø nnigajpxy.

⁶ Ejxpajtingøjxp idø'on ja n'apteety'amøj Abraham ku ja tjanchja'wiyii'ñ ja Dios, ja'ayits Dios ja tagupøjkiyøø. Ka'ap ja ja'agøjxp yikupijky pøni ti ødyunk ja tyuun. ⁷ Paty meets idø'on xja'gyukidit jøts ku ja Abraham ñamyayi ja t'apø t'oki pøn ja janchja'win nayid'en tmøø'tajttip sam ja ojs tmibiky ja Dios. ⁸ Windi'ixxyip idø'on ja Dios ttukmadowni ja Abraham sa yikjaadyaañ jap nøkyijxpy jøts ku yide'en wyaañ: "Tuki'iyi ja naajx ja kajp ja kunuu'kxy'ajtin tpaattit ku øts xjanchjawidit sa mets tø xunjøpi." Paty ja Dios jade'en wya'añ ku ja janchja'wingøjxp tkupøkt pøn ka'israelit jaa'dyi. ⁹ Jade'ents idø'on pøn ja Cristo tjanchja'widip, nayide'en ja kunuu'kxin ja tpaatti sam ja Abraham ja kunuu'kxin yikmøøy ku ja Dios ja tjanchja'wiyii'ñ.

¹⁰ Pøn tyimjabadunwandip ja Moisés kyutujk jøts ja jade'en ñitso'oktit, tø Dios ja ttanibiktaajkiñi jøts ja yik'ayo'onmo'odit. Jabi yide'enxi dø'on ja Dios kyutujk wya'añ jap nøkyjstpy: "Pøni pøn tuki'iyi tkabadungøjxp ya'at kutujk midy yap tø yikjaadyaañ, paajtidip ja møj ayo'on ja'aj midy øts tø ndanibiktaagi." ¹¹ Ja'gyukits idø'on tyañ ku ja Dios ka'ap tkupiky pøn wyinaty ja'ayi tø tpaduñ ja Moisés kyutujk, jabi yide'enxi ja Dios ñøky wya'añ: "Pønts ja Dios wyinaty kyupijky janchja'wingøjxp, jujky'ajttipts ja' x'emikøjxp." ¹² Ka'ap ja Moisés kyutujk yiknitsøøky janchja'wingøjxp, yide'enxi ja wya'añ: "Pøni pøn tuki'iyi tpadungøjxp ya'at kutujk, ja'ayi nitso'ok'ajtp."

¹³ Tøts ja Cristo xukniwajchim ja ayo'on sam ja Moisés kyutujk ttanibiktaagi pøn ka'pxy tkabadundip. Yide'en'ampy tsoo ku ja Cristo møj pøkyumbi yiktijy jøts jade'en kø'ømdsøky tpatwa'jkiyii'ñ ja møj ayo'on midy adøm xjapaat'ajttindip, jabi yide'enxi ja Dios ñøky wya'añ: "Pøn jam yikudiipy kipkyøjxp, møj pøkyumbi ja'." ¹⁴ Paty idø'on ja Jesucristo y'øjky kruskøjxp jøts ja kunuu'kxin tpaattit pøn ka'israelit jaa'dyi nayide'en sam ja Abraham ja Dios ojs ñii'mxyiyi; jøts jade'en adøm niduknax nbaajttindit janchja'wingøjxp ja Espiritu Santo midy ja Dios Teety tø tni'adsowi.

Ka'ap ja Moisés kyutujk tyik'amutski ja may'ajtin midy ja Dios ñi'adsowwi

¹⁵ Meets migu'uktøjk, ku dø'on n'ukpiktaajkint ku tigati n'ukajpx'ø'yint n'ukajpxpaajttint, kuts ja yikjaadyaañ, kuwani dø'on ja yikpadu'unt, sa tø wyinguki ka'ap ja pøn tyiktigatst. ¹⁶ Kuts ja Dios Teety ja may'ajtin tmøøwya'añ ja Abraham, nayide'en ja tmøøwyaami jadu'uk ja jaa'y midy ja y'apip y'okip pøni wine'en ja tø ñajtska'axyini. Sam ja Dios ñøky wya'añ: "Tu'ukpi jaa'y ja', ka'ap ja ñamayidi." Ja'ats idø'on Cristo'ajtp. ¹⁷ Yide'en øts idø'on ja ja'gyukin nyakwa'añ: Ja may'ajtin midy ja Dios ja Abraham ojs tyami'awaniyi, ka'ap ja mibaat niwine'enin tyiktigajch ja Moisés kyutujk midy meen ix'øojk maktaxk magøpxy ja ee'pxmajk jumøjtnim. ¹⁸ Kuts ja Dios ja may'ajtin jeexyip kuwani xukpadunwa'añin ja Moisés kyutujk, ¿ti may'ajtin idø'on ja jade'en? Yide'en'ampyts idø'on ja y'øyi ku ja Dios ja jadi'iñi ttamay'atwa'añ ja Abraham.

19 ¿Tigøjxpts idø'øn ja Moisés kyutujk nyikmø'øyim? Paty idø'øn ja ix'oojknim yikpiktaajky tø wyinaty tni'adso'owiñi ja may'ajt jøts ja jaaly niduki'iyi tnijawidit midì idø'øn pøky'ajtp. Jaayi tyuñ kunim yja'aty ja Abraham y'apu'nk pøn nayide'en ja may'ajtin yiktami'awa'aniiy'iñ. Ku ja Dios ja kyutujk tyajky, ja ankilistøjk ja tyamigaxiyi'iñ jøts ja Moisés ja ttigidøkidit, jøts ja ttuk'ext ttuknijawit ja jaa'y. 20 Ku ja Dios ja may'ajtin tmøøwya'añ ja Abraham, ka'ap ja ankilistøjk ni ja kugajpxtyøjk ja tkayiktuñ, kø'ømyi ja nadyu'ugyi ttami'awa'aniiy'iñ.

Tigøjx ja Moisés kyutujk yikpiktaajky

21 ¿Sats idø'øn ya'at nja'gyukant? ¿Ka'ap idø'øn ja Moisés kyutujk møøt ñamyayi ja Dios myay'ajtin? Ka'ap idø'øn yjade'eni, jaa ku ja Dios ja kutujk jeexyip tø tyaky nitsoojkin møøt, ja'ayits ja jaa'y jeexyip yiktagupøjktip, ja'ayi jeexyip yikpadump pøni sa ja tyikutuky. 22 Jabi jade'enxi ja Dios ñøky wya'añ ku adøm nijum pøkñiwa'añ n'ejtnandi. Kuts ja Jesucristo njanchja'wint, jade'en idø'øn ja'ayi ja nitso'ok'ajtin nbaajttint midì ja Dios tø tni'adsowi.

23 Tum ja Moisés adøm ja kyutujk wyinaty tø xniwa'anandi ku kyamiñim ja Cristo, pø ka'anixi ja Dios Teety wyinaty xukja'gyukam ja Cristo yjanchja'win. 24 Ja'abi kutujk adøm y'ijty xuu'wa'anindip xuu'wejtsnindip kunim ja Cristo myiñ, kuts ja njanchja'wa'ant jade'ents ja Dios Teety xkupøjkindit. 25 Kuts ja Cristo myiñ, ka'ap adøm ja kutujk x'uk'ana'ammindi.

26 Jabi ixyamxi adøm ja Dios x'u'nk'ajtnindi ku ja Jesucristo njanchja'windi. 27 Ku Cristo køjxp nnøbejtyindi nayide'en adøm ja ndsinaa'yin nyiknajxyindi sam ja tø tjøptuni. 28 Ka'ap y'ukpaat'ajtniyi adøm nnayjiwejtsandit nnayjigaxandit o pøn y'israelitjaa'yidi kya'israelitjaa'yidi, tumbidi yikmidumbidi, sam ja tø'oxyøjkmidi yaa'dyøjkmidi; tu'ukpi jaa'y adømnidi ku ja Jesucristo nmøøt'ajtnandi. 29 Kuts adøm ja jade'en nmøøt'ajtnant, xjats idø'øn tyimbyaat'atyiyi ndeety'ap'ajtnant ja Abraham jøts xpaat'ajtindip adøm ja Dios myay'ajtin midì ja ñi'adso'wiyi'iñ.

4

1 Ukja'gyuki meets ya'at: Ku tu'uk ja u'nkteety y'øøky jøts ttanipaaty tuki'iyi ja pyikta'aky ja myutsku'nk, kuts ja tyimy'ukmutskinim ka'anim ja pyaat'aty tøkøt ja maay øy ja tuki'iyi tjaja'ajtkixy. 2 Jabi kuwanixi dø'øn tjamimado'ot ja y'eix'etpidi kunim ja yjumøjt tpaatt jøts t'axajit ja tyeety ja myaay. 3 Nayide'en adøm idø'øn y'ijty njajtyindi ku ja Cristo kyamiñim. Tum ja møjaa'ychinaa'yin y'ijty nyikmajadaajkyindip øy ja nitso'ok'ajtin tjagamøødi. 4 Kuts ja xøøw ja jumøjt yja'jty, kyajx ja Dios Teety ja y'U'nk tø'oxyøjk ñikøjxp jøts jade'en kye'jxy israelit jaa'yin, pyadungøjx nayide'en tuki'iyi ja'abi jaa'dyi ja chinaa'yin møøt ja kyutujk. 5 Paty ja jade'en myiñ jøts ja wa'ats'ajtin xmøø'yindit pøn y'ijty tpadundip ja Moisés kyutujk, jøts jade'en Dios Teety x'u'nk'ajtnit.

6 Yide'en idø'øn ja tnanky'ijxyi ku adøm ja x'u'nk'ajtna'am ku ja tkexy ja Espiritu Santo adøm n'anmija'wingøjxp; jøts møk ja winmaa'ñ nmøøt'ajtnindit ku janch ja Dios Teety ndeety'ajtyindi. 7 Ja Dios Teety adøm idø'øn xtyim'y'u'nk'ajtindip, ka'ap adøm nugo midumbidi. Paty adøm idø'øn xtyimbyaat'ajtyindi ja maay midì ja Dios Teety tø tni'adsowi, jøts midì ja Cristo xmøø'yindip.

Ku ja Pablo tpamay tpadajy ja janchja'wibitøjkti

⁸ Ka'ap meets y'ijtyip ja Dios Teety x'ijxyi, tum ja awanax agojnax meets y'ijty windsø'jkidip winja'widip, midi ka'ap ja Dios'ajtin tmøøt'atti. ⁹ Tø meets ja Dios Teety xpatni, uk yide'en'ampyts idø'on ne'egi ngajpxint, tø meets idø'on ja Dios Teety mbaajtniyi, ¿suso meets idø'on xkupøjkojmi ja wenk tsinaa'yin midi niti møk'ajtin niti nitsoojkin kyayajkpy, nayide'en sam ja mgø'øm ja'adi midi tø xuk'ixmatsti? ¹⁰ Jøts ixyam xjanch'ukjøp'ejxti ku ja Dios m'ø'jwawiyidit ku x'amaay'attinim ja xøøw ja po', ja xøøw ja jumøjt. ¹¹ A'ø'y'ampy øts yjawi njøptsø'øgi ku øts ndunkjøøjp meets køjxp tø wyindigøy.

¹² Migu'uktøjkti, tun ja may'ajt jøts xu'undit sam øts idø'on tø njøptuni ku øts ja israelit jaa'y chinaa'yin tø n'ixmajtsni. Kupøjkik øts n'ayuujk, ka'axi meets nijuuni xmidsepwandip. ¹³ Øy meets xkupijky mijawyeen ku øts ja yiknitsokpi madya'aky nnigajpxy øy øts wyinaty njabama'ayø. ¹⁴ Wan øts nba'am meets mja'axiigyidi, ka'ap meets xpawøjpy. Jade'en meets ne'egi xkupijky sam tu'uk ja Dios y'ankilis tnaajtskaxi, uk sam ja Cristo yjawi kø'øm tyimya'aty ma meets jam. ¹⁵ ¿Tiku mga'ukjotkujk'ajtnidi? Tyimyøj meets ja mba'ayo'owin xnanky'ejxøø ku nbamaa'ychinaay. Patyts ø nwa'añ, wanik meets yjawi mgø'ømween xtyimyu'jty jødsik øts ja xamay'ajttøø, jøts øts jade'en ndso'økt. ¹⁶ ¿Xmidsepwandip meets ixyam ku øts ja'ayi tø nnigajpxy ja tyiiby yjanchpi?

¹⁷ Ja winaagin ja israelit jaa'y pøn taagyøjxp yik'ixpøjktip. Ja'ayi dø'on ja yjanch'awejxtip jøts meets ja xmibøkt jøts x'ixmatstit ja m'ø'wynmaa'ñ midi meets tø ndukmadøy, jøts jade'en ja abiktyuu' xpadøjkiñidit. ¹⁸ Ka'ap ja sa y'ejxi ku meets ja møøt mnamyayiyidit, ja'ayi dø'on tsojkip jøts yixxon ja y'ø'wynmaa'ñ y'ø'y'ixpøjkin tnigajpxtit, ejtp jade'en ttu'undit, ka'ap ja'ayi nugu ku meets jam møøt. ¹⁹ Meets u'nk meets unaj'ik, møk meets jadigojk xjanchyikmay xjanchyiktajy. Jaayim øts yø jade'en njawit kunim ka'pxy ja Cristo xpadungøxtit samdam ja ttsøky'aty. ²⁰ ;ok meets jam møøt jeexyip ixyam, jøts øts øy tsuj ne'egi ndukmado'ot ya'at winmaa'ñ; jabi ka'axi øts ja ayuujk n'ukpatni pø sudso meets njanchñijayit!

Ja Agar jøts ja Sara ñikøjpx ja ejxpajtin yikajpxpidsimy

²¹ Meetsti, pøn ja Moisés kyutujk tpadunwajnidip, nigajpx meets sa dø'on wya'añ ja'abi kutujk. ²² Pø nømpxi ja wya'añ ku ja Abraham namajtsk ja y'u'nk tpaajty: tu'uk ja tumbi tyik'u'nkpaajty midi nitøøky'ejtnip, jøts jadu'uk ja kyø'øm nidø'øxy yja'. ²³ Ku ja nitøøky tø'øxy y'u'nkpaajty nayide'eñim ja tpaajty sam o pøn tø'øxyøjk, jøts ku ja ñidø'øxy ja y'u'nk tpaajty kidi nugøjip ja jade'en yjaty pø ja Diosxi y'ayuujk jade'en ka'pxp sam ja wyinajty tø tni'adsowi ku ja tø'øxy y'u'nkpaatt møjaa'gyijxñim. ²⁴ Ejxpajtin øts idø'on ya'at nbikta'aky. Ja namajtskpi tø'øxy wa' idø'on ja kyudanaadyip majtskpi ky ja pudøjkin sa ja Dios tø ttanibiktaagi. Midukpiky, ja Agar idø'on jade'en sa ja Moisés kyutujk, ja' midi yikmøøy jam Sina'i kojpkøjxp. Pøn ya'atpi kutujk ja'ayi tpadundip ka'ap ja ñitso'øktit. ²⁵ Kyudanaapy ja Agar nayide'en ja Jerusalén kajp midi ixyam ñajx'ajttip ja israelit jaa'dyi ma dø'on wya'andi ku ja nitso'ok'ajtin yikpaaty ku nbadu'unin ka'pxy ja Moisés kyutujk. Pøn jade'en tpadundip jade'en ñamyayi pyidsimy sam ja tø'øxy midi nitøøky'ejtnidip. Yikmajadaktip idø'on ja' ja'abi kutujk. ²⁶ Ma ja tsajpjotpit Jerusalén jam ka'ap ja Moisés kyutujk jam tyuñ, jamts adøm idø'on xpaat'ajtyindi. ²⁷ Jabi ja'axi dø'on ja Dios kyajpxy tyijpy ku yide'en jap nøkyijxpy wya'añ:

Mets tø'øxyøjk nøy,

mbaat'ajtiyip mxonda'akt ja agøjxp ku xpaatwa'añ ja m'u'nk.

Jotkujk mnayjawiyit o mets nijuuni xjagapaaty xjaga'ijxñim m'u'nk. Oy ja mniya'a'y tɔ waani mja'atsmajtstu'udyi, wimbetp ja jadigojk jɔts ja m'u'nk may xpaat,

yam ja jadu'ukpi tɔ'ɔxyɔjk nika'ap jade'endi.

²⁸ Migu'uktɔjkti, ni'adsowigɔjxp adɔm ja Dios x'u'nk'ajtyindi nayide'en sam ja Dios ja Isaac tni'adsowiyii'ñ midi ja Sara y'u'nk'ajtpy. ²⁹ Jade'en sam Ismael, ja nitɔɔky tɔ'ɔxy y'u'nk, tmidsepwan'ijty ja Isaac, midi ja Sara myajnk'ajtpy, nayide'eñim ɔxyam ku adɔm xmidsep'atwan'ijtyindi ja jaa'y pɔn ja Dios yja' tkajanchja'widip, yam adɔm ja Espiritu Santo ja myɔk'ajtin xyikujky'ajtyim. ³⁰ Yide'en idɔ'ɔn ja Dios ñɔky wya'añ: "Jigax ja nitɔɔky tɔ'ɔxy mɔɔt ja y'u'nk, jabi ka'axi pya'at'aty nay ja'abi maay midi ja Sara myajnk paat'ajtyip." ³¹ Jade'ents migu'uktɔjk idɔ'ɔndi, ka'ap adɔm idɔ'ɔn ñamyayi x'u'nk'ajtyindi ja nitɔɔky tɔ'ɔxy, ja Abraham idɔ'ɔn ndejint ja ñidɔ'ɔxy ndaak'ajtyindip, ja'agɔjxp ku ja Dios tu'ugyi yikjanchjawi.

5

Mimɔk'atti pɔn mni'tso'ok'ajtin mdu'k'ixmatswajni'yidip

¹ Tɔ adɔm ja Cristo xukmajtstuujtyindi ja Moisés kyutujk, ka'ap adɔm ja xukja'ajtnandi. Ejx'ettits ja nitsoojkin midi ja Cristo tɔ xamidsɔjkyin.

² Madowdi yikxon. Pɔni mdamɔk'atwandip ja m'ejxpajt midi ne'kxkɔjxp, ja Cristo meets idɔ'ɔn ja ñitso'ok'ajtin mgayikmɔjtɔjkiyidip. ³ ɔxyam meets ndukja'myech jadigojk ku ja'abi jaa'y pɔn ja ejxpajt tkupɔjxp ñe'kxkɔjxp, kuwani dɔ'ɔn ja Moisés kyutujk tymbyadungɔjxit. Kuts jade'en tkatu'unt, ja kudigɔ'ɔyin idɔ'ɔn ja pya'atp. ⁴ Jam meets winaagin winmay ku ja Dios ja xagupɔjkint ku yikpadu'unt ja Moisés kyutujk, ja Cristo meets idɔ'ɔn ñamyayi abiky mbiktaknip jɔts ja Dios Teety chojkin ja pya'ayo'owin x'ixmajtsidi. ⁵ Jabi adɔmxi nmɔɔt'ajtyindip ja jɔp'ejxin ku ja Dios Teety xkupɔjkindit jade'engɔjxp ku ja Espiritu Santo xpudɔjkindit jɔts ku njanchja'windit ja nwindson'ajtim Jesucristo. ⁶ Kuts ja nwindson'ajtim tu'ugyi nmɔɔt'ejtindit, wan ja ejxpajt tyikmɔɔt'aty tkayikmɔɔt'aty ne'kxkɔjxp, niti ja kya'ukwanit. Kuxi ja Cristo njanchja'want ja'axi tump, jɔts ja'agɔjxpxi adɔm nmigu'uk tum ja ɔybi ndamidsɔjkyim.

⁷ Oy meets tɔ m'uktso'onda'aky jawyeen. ɔPɔnts idɔ'ɔn tɔ myikwinmaa'ndyia'adyidi ku xka'ukpadunidi ja tyi'byi ja yjanchpi midi ja Cristo yja'ajtpy? ⁸ Jabi ka'axi ja Dios Teety jade'en mduñidi midi tɔ mmɔ'ɔyidi ja nitso'ok'ajtin Cristo kɔjxp. ⁹ Pɔ yikni'ja'wipxi ku tu'ukpi jaa'y ne'egi namay tyikwinmaa'ndyigɔy ja myigu'uk. ¹⁰ Dios kɔjxp ɔts ja jɔp'ejxin nmɔɔt'aty ku meets jadigojk x'awimbettit midi jawyeen tɔ nduk'ixpɔkti; pɔn meets idɔ'ɔn myikwinmaa'ndyigɔɔwajni'idip, ja' idɔ'ɔn ne'egi mɔk ayo'onbaatp ɔyi yjadyimyjapɔni.

¹¹ Kuts meets jeexyip ndaguwani ku ja ejxpajt ne'kxkɔjxp ja'ayi tu'ugyi tyuñ ka'ap ɔts ja israelit jaa'y jeexyip xmidsepwa'andi xmi'ekyidi. Niti nisa jeexyip kyawa'andi ku ɔts ja jeexyip n'agajpxmukixy ku ja Cristo tɔ xku'o'jkandi kruskɔjxp, jɔts ku nayide'en tyumidi ja israelit jaa'y y'ixpɔjkindi. Tu'ugyi ɔts ja'ayi nnigajpxy ja Cristo yja'. ¹² Pɔnts meets ya'at tsinaa'yin kuwani mdukupɔkwanidip, paat'ajtyip jɔts ja ne'egi kɔ'ɔm ñankyudigɔ'ɔyiniidit.

¹³ Migu'uktɔjkti, tɔ Dios mwi'ijxyiyidi jɔts ka' kuwani x'ukpadunidit ja Moisés kyutujk jɔts jade'en ja awa'ats'ajtin xpaatit. Ka'ap yɔ'ɔbi awa'ats'ajtin xyikwa'andit ku adɔm o tigati ndymdyu'unandit; ja' ne'egi xyikwa'andit jɔts nixem niyam mnachokiyidit sam nayide'en

mnabyudøkiyidit. ¹⁴ Ku ya'atpi tu'uk kutujk nbadu'unint, tuki'iyi dø'øn ja ndejint ja Dios kyutujk yikpadunguixy, midi yide'en wamp: "Tsok ja mmigu'uk samdam meets kø'øm mnachøkyi." ¹⁵ Kuts meets mnachepwa'añidi mnachep'ijxyidi, jnay'ejx'etidim, kidi meets kø'øm mnankwyyinmaa'ndyigøyyidi jøts mjanchja'win jade'en xkayikwindigø'ødyit!

Ja ka'ødyu'unin midi ya naxwiñ yiktanaxp jøts ja øchinaa'yin midi ja Espiritu Santo yajkpy

¹⁶ Ya'at meets idø'øn ndukmadøøpy: jøts ja mdsinaa'yin xyiknaxtit sam ja Espiritu Santo mdamidøkyidi, jøts jade'en ka' xyikmøj'attit ja ka'øybi midi ya'it tsinaa'yin y'amidøøpy. ¹⁷ Ya'atpi ka'øybi midi ngø'øm dsojkingøjxp nbadunwa'añindip, ka'ap ja Espiritu Santo møøt ñamyayiyi. Tum majada'akwandip ja' jøts ka' xuktunwa'añim pøni midi adøm kø'øm njatsøky'ajtyimp. ¹⁸ Pøni janch ja Espiritu Santo meets mduu'møøjyidip, ka'ap meets ja Moisés kyutujk m'ukpaat'ajtniyidi.

¹⁹ Nigaxi'iky ja chinaa'yin ja'adi pøn ja ka'ødyu'unin pyadundip midi ja ne'kx ja kojpk y'amidøøpy. Ya'atpi pøky y'agujkpy yide'en ja yjuky'ajtin tyiknaxti: øy ja pøn yaa'dyøjk tø'øxyøjk møøt ñamyøøt'atyidi wan tja'amajtskidi tka'amajtskidi, tum ja axøø'kpi yigaappi y'amidip yjotpidip, ²⁰ ja awanax ja agojnax wyindsø'jkidip wyinja'widip, ja miku' tyunk ja kyamimaadip kyami'ejtipp. O pøngapøn myi'ekyidi, ja'ayi tyajotkujk'ajttip ku ja myigu'uk tyikjø'ødi tyikya'axti, øy ja myigu'uk ttami'ekyidi ja ñidsinaa'yin. Øy ja tigati ttatsep'ixa'adi, kyø'øm jotkujk'ajtin ja ja'ayi y'ixaadyip, ja'ayi ja chøky'ajttip jøts ja wenk winmaa'yinyøjxp abiky ñabyikta'agiyidit. ²¹ Tyami'ama'at'ajttip o tigati ja myigu'uk, yikjaa'y'oo'k yikjaa'gyudigøøky tyunk'ajttip, ja amu'uky'ajtin kawindiy'ajtin yikmajadaktip. Tum yø'øbi axøø'kpijøtpy yigaappijøtpy idø'øn ja chinaa'yin tyiknaxti. Ixyam meets ndukja'myech jadigojk, pøni pøn ya'atpi tsinaa'yin ne'egi tpadump niwindem xøøw ja tkapaattit ja Dios kyutujk ma ja yjaa'y tuutanitanit.

²² Ku ja Espiritu Santo ndsinaa'yin xuu'mø'øyint, winets idø'øn wyingaxi'iky ja tsojkin ja pa'ayo'owin nixem niyam, ndaxondaajkindip ja Dios, jøts ja øy'ajtin nmøøt'ajtant, nja'gyujkandit nduda'aky'ajtant, n'amigu'ukjaa'y'ajtant, n'øyjaa'y'ajtindit, jøts ja windaay'ajtk ngayiktu'unindit, ²³ nmiyujy'ajtindip ja nmigu'uktøjkti jøts ka'ap ja ngø'øm ja' nyikmajadaajkindit. Nima niwindem, niti kutujk adøm xkadatiidyu'unint yø'øbi øyjaa'y'ajtk. ²⁴ Pøn ja Cristo ja'ajtyidip, tø dø'øn ja ñamyayi tkrustsumgøjxnidi tuki'iyi ja ka'øyjaa'y'ajtin midi yikmøøt'ajtp. ²⁵ Pø tødam adøm ja Espiritu Santo ja jemchinaa'yin xjanchmø'øyidi, ztits ku adøm idø'øn ja ngamibøjkindit pøni ma ja xuu'waa'wa'añindi?

²⁶ Ka'ap adøm idø'øn niti nnadyamikajxint, niti nganadyami'ajkiyindit. Jagam jixkø'øm n'ixwejtsint ja tami'ama'at'ajtk.

6

Nixem niyam nabyudøkiyidi

¹ Meets migu'uktøjkti, pøn ja Espiritu Santo yja' tmøøt'ajtkøxyidip, ku xnijawidit ku nidu'uk ja mmigu'uk ja pøky tø myimajada'agyiyi, pa'ayo'owingøjxp meets idø'øn ja xpudøkidit jatyi, jøts jade'en t'awimbetidit ja øybi tsinaa'yin jadigojk. Mdabajaa'ñaxtip ku meets nayide'en jotmøñ wyinaty ja pøky mmimajadakniyidi. ² Nabyudøkiyidi nixem niyam jøts

ni'amuki jade'en xmiimajada'aktit ja ka'oybi, jabi jade'enxi dø'øn wyinaty xpadundi sam ja Cristo ja kyutujk tnigajpxy.

³ Pøni jaaxi pøn jaa'y midi tymñamyøja'wiyip, nugo ja kø'øm ñawyindaay'aty. ⁴ Nidu'uk nidu'uk adøm idø'øn kø'øm nnija'wandit ku ja ndsinaa'yin nyiknaxjyindi øy; kuts øy ñayjawyiyit kø'øm idø'øn ja chinaa'yin ja ñadya'ajawiyit, ka'ap ja myigu'uk yja' ttatøjkiyt. ⁵ Kija' adøm idø'øn ndsinaa'yin ngajpx niwaajtsin Dios wyingujkpx.

⁶ Tabudøkidi ja mbikta'aky pøn ja øgyajpxy ømyadya'aky ñanky'ejxiyip.

⁷ Kidi kø'øm mnawyindaay'atyidi, jabi ka'axi ja Dios jadi'iñi yiktañ pøn ja nugo taguyatwajnip. Ku tigati n'ukneejpint, nay ja'ayi dø'øn n'ejxmukojmamp nbøkmukojmamp ku ja xøøw ja jumøjt wyinaty tpatni. ⁸ Nayide'ents idø'øn ja tsinaa'yin: ku pøngapøn ja'abi tsinaa'yin nugo tpaduñ midi ja ñe'kx ja kyojpk ja'ayi y'amidøøpy, ja o'jkin tigø'yin idø'øn ja wyinaty pyøkmujknip kyonmujknip ku ja tiidyu'unin mye'ent kyida'akt. Pønts jade'en tpadump sam ja Espiritu Santo ñadyamidsøkyiyi, nay ja'ayi dø'øn kø'øm mo'ojiyidip ja jujky'ajtin xemikøjpx. ⁹ Ka'ap adøm idø'øn ja xwindsejppindit ku ja øybi tsinaa'yin nnanky'ejxindit, ku jade'en ndu'unindit xjats idø'øn nyikmø'yindit ja kawinmaabyi kunuu'kxin. ¹⁰ Paty meets idø'øn xun'ett, jøts pøngapøn xpadøkidi winjaa windsojk pøni juuni pyaag'aty. Ja'abi jaa'y idø'øn ne'egi mguidyimyja'dyigø'ødyip midi adøm nmigu'uk'ajtyindip tu'ukpi janchja'wingøjpx.

Ku ja Pablo kyajpx'abajtiñi xjats y'ukajpxwejni y'ukajpxpoo'kxni

¹¹ Kø'øm meets ixyam yikxon ndyimñijayi sam idø'øn pyaag'aty jøts yikxon xja'gyukidit. Ejxti mabaat øts yø nja'ay myøji. ¹² Yø'øbi jaa'y pøn meets mdaguwa'an iyidip ja ejxpajtin ne'kxkøjpx, ja'agøjpx ja ttundi jøts ja øy yik'ejxtit yiknimadya'aktit jøts ka'ap jade'en pøn chep'ejxiyidit chepjawiyidit ku jeexyip ja Cristo yja' ja'ayi tnanky'ixpøjkiyidi ku tø xku'o'jkandi kruskøjpx. ¹³ Øy ja ejxpajtin ne'kxkøjpx tjamøødidi, ka'ats idø'øn ka'pxy kø'øm tpadundi midi ja Moisés kyutujk ñigajpxpy. Kuwani meets ja mdukupøkwa'añiyi ja ejxpajtin ne'kxkøjpx, jøts ja jade'en ja'ayi ñadya'agajpxiyidit ñadya'øyjawiyyidit ku meets ja yja' tø xpadøjkiniyidi. ¹⁴ Jøts øts ka'ap ø niti nnadyamikexyiyi, ja'ayi øts tu'ugyi nmøk'ajtin'ajtpy ku ja nwindson'ajtim Jesucristo tø xku'oogi kruskøjpx. Paty øts ja yigaappi naxwii'ñit tsinaa'yin nga'ukmøkpiktakni, nika'ap øts ja nayide'en xukmiimajadakni. ¹⁵ Jaa kuxi adøm ja Cristo Jesús møøt nnamyajyindi, niti kyawa'añ pøni jam ja nmøøt'ajtyindi ngamøøt'ajtyindi ja ejxpajtin ne'kxkøjpx; ja' idø'øn ne'egi tump pøni tø ja axøøkpi n'ixmajchindi jøts ja ndsinaa'yin tø nyiktigajchindi. ¹⁶ Wan ja tpaatti tkupøkti ja øy'ajtin kunuu'kx'ajtin pøn ya'at winmaa'n tpadundip, jøts møøt ja israelit jaa'dyi pøn idø'øn ja Dios tyimyja'ajtyiyidip.

¹⁷ Ixyam ø nnigajpxy jøts ka'ap øts pøn xyiktuu'dukt ku nnigajpxt ja Cristo y'ixpøjkin; jabi yamxi øts nmøøt'aty ja ejxpajt ku tø nyikwøpy nyiktsiiky ku øts ja Cristo ngudani.

¹⁸ Meets migu'uktøjkti, jade'en ø nwa'añ jøts xpaattit xemikøjpx ja Dios kyunuu'kxin. Tiigyajpxy idø'øn, jade'en idø'øn ja yjatt.

JA NØKY MIDI JA PABLO TYANĠGAJX JA EFESIIT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Efeso

¹ Øts Pablo'ajtpi, Dios ø kø'øm chojkingøjxp tø xpikta'aky Jesucristo kyu-danaabyi jøts ø jade'en xyikugajpxy'aty. Ya'at nøky ja' øts yø ndanija'ayidip ja Efesiit jaa'y pøn jaty ja Dios yja'ajtpy jøts tjanchjawidi nayide'en ja nwindson'ajtim Jesucristo. ² Paat meets ja kunuu'kxin ja øy'ajtin midi ja Dios Teety møøt ja nwindson'ajtim Jesucristo yajkpy.

Ja møj øy'ajtin midi nbaajtimp ku Cristo nmøøt'eitin

³ Ngajxajkindip ja Dios midi tyeety'ajtpy ja nwindson'ajtim Jesucristo, jabi tøts ja kunuu'kxin xmø'øyim ku ja Cristo nmøøt'ijtyim. Ja' y'øy'ajtin tø xanigajxa'andi ma ja chøøni. ⁴ Namga'anin naxwii'ñit cho'onda'aky jøts ja Dios Teety kø'øm xwi'ijxyindi xwigø'øñindi Cristo køjxp ku ja xku'ayo'ombaajta'andi, jøts jade'en adøm wa'ats nwingunøjkxa'ant ja' wyingujkp niti pøky niti kadyeey. ⁵ Windi'ixyip idø'on kø'øm ja Dios Teety ttanibiktaajkiñi jøts ja x'u'nkupøjkint Jesucristo køjxp. ⁶ Paty ejtp nga-jxajkindit ja Dios sa tø tnanky'ijxyi ja myøj kunuu'kxin, ku ja y'U'nk tø tnajtskaxi midi kawinmaa'ni chøjky. ⁷ Ku xtsojknajxyim adøm ja Dios, paty adøm tø xyiknitsøjkyim ku ja y'U'nk Jesús wyidsuñ wyidajxy, jøts y'o'jkingøjxp xpojkipimee'kxyim. ⁸ Kajaa Dios tø tnanky'ijxyi ja chojkin ku tø xmø'øyim ja wejin ja ja'gyukin, ⁹ jøts jade'en tø tnanky'ijxyi ja yu'uchwinmaa'ni midi adøm ja kø'øm tø xanibiktaajkim sa dø'on ja ttunwa'añ. ¹⁰ Jatp idø'on jade'en sa dø'on ja wyinmaa'ni tø ttanibiktaagi, kuts ja xøøw kuts ja jumøjt tpaatt, winets ja Dios Teety tuki'iyi ttagidøjkigyøxt ja nwindson'ajtim Jesucristo ti jaty ejtp øy madsoo, yjanaxwiñi uk yjatsajpjøtpyi, jøts ja amuum kø'øm tnigubajk'att.

¹¹ Kuts adøm idø'on ja Cristo nmøøt'ajtyim, windi'ixyip adøm ja xwi'ejxna'andi xwigø'onandi ja Dios Teety jøts jade'en xmø'øyindit midi xamidsojkimp. Tuki'iyi dø'on ja ttuñ sa ja chojkin tø ttanibiktaagi. ¹² Tø dø'on ja ttuñ jade'en jøts øøts idø'on ja Dios ndakajxa'akt ja y'øy'ajtin ja myøj'ajtin, jabi øøts idø'on jawyeen tø njanchjawi ja Cristo. ¹³ Meets nayide'en, ku xmadowdi ja Dios tyi'y'ajtin midi tnigajpxp ja yiknitsoojkin, jøts ku xjanchja'widøø ja Cristo, jade'en idø'on ja Dios Teety mdamiguy'ejxidøø ja y'Espiritu Santo, jøts ja myiktami'ejxkapidit jøts ku meets ja Dios mja'atyidi. Jade'ents idø'on ja y'ayuujk tyikniwaajch sam ja jawyeen tø tnigajpxy. ¹⁴ Nay ja Espiritu Santo midi meets m'ejxpajtin'ajtpy, ja' myikta'ejxkaptip ku ja Dios ja myaay tyikwa'kxt. Jade'en ja Dios ttu'unt ku wyinaty tø tyiknitsoojkøjxni midi tø tniwanguixy. Jade'ents ja Dios yikwindsøøgit yikwinjawit myøj'ajtingøjxp y'øy'ajtingøjxp.

Ku ja Pablo t'amidøøy tpøktsøøy ja Dios jøts ja wejin ja ja'gyukin yikmo'odit pøn ja Dios tpadundip

¹⁵ Tø nnijawi ku meets møk ja nwindson'ajtim Jesús x'ajot'aty, ku mee nayide'en øy tsuj ja tsojkin xmø'øy pøn jaty ja Dios ja'ajtyidip. ¹⁶ Ejtp øts ja Dios ndamøjawi ndagunuu'kxyjawi ku ja mgunuu'kxyidi, ka' mee nja'dyigøy, ejtp meets nni'amidowdi nnibøktsowi ku ø ndsapkajpxy. ¹⁷ N'amidøøpy øts ja

kunuu'kxy Dios Teety midi tyeety'ajtpy ja nwindson'ajtim Jesucristo jøts ja mmo'o'jyidit ja wejin ja kajin midi yikxon mdukja'gyukiyidip sa ja y'ejxi tyi. ¹⁸ N'amidøøpy øts nayide'en ja Dios jøts mgujajiyidit mgudøø'kxiyidit, jøts jade'en xnijawidit ti dø'on m'awejxtip midi tø myiktaniwaadsowidi, ku janch kawinmaafi ja maay midi ja Dios tyagumaawyampy pøn ja yja'ajtpy, ¹⁹ jøts nayide'en ø n'amidøy ja Dios jøts xnijawidit ku niti kya'adaniyi kya'adsø'øgiyi ku kawinmaafi ja Dios myøk'ajtin midi adøm ja xabudøjka'amp ku adøm ja njanchja'wa'andit, ²⁰ nay ja'abi møk'ajtin idø'on midi ñanky'ejxi ku Cristo jap oo'kpi agujkpy wyimbijty jujky jadigojk, jøts ku ja nayide'en chajpajntaa jøts ja Dios Teety y'aga'ngyøjøm ja kutujktaajk myøøjyi. ²¹ Jawani møj idø'on ja Cristo yikpiktaajky, nipøn windsøn nipøn yikutujkpi tkami'aguijpxy'aty ya naxwiñ jøts tsajpjotp, ixyam jøts xemikøjxp nipøn ja tkamibaat'att. ²² Tuki'iyi dø'on midi ja Dios tø tyikøjy, ja Cristo dø'on tnitanaagyøjxp, ja idø'on tnigubajk'ajtp niduki'iyi pøn jaty ja Dios tjanchja'widip. ²³ Jade'en sa tu'uk ja jaal'y ñine'kx kyaka'pxyi pøni ka'ap ja kyubajk ja te, nayide'en idø'on ja janchja'wibitøjk ndejint kyaka'pxyidi pøni ka'ap ja Cristo ja ñigubajk'atyidi, jøts ja ka'ap ja myøk'ajtin myø'øyiidi pø ja'axi tuki'iyi tyik'ejtp tyiknajxp ja naajx ja tsajp.

2

Tø ja Dios xyiknitsøjkyim chojkingøjxp

¹ Tø meets m'anmija'win y'ats'oockti ku mdsøøniidi pøky'agujkpy, jøts tø yjujkyøjkti ja m'anmija'win jadigojk Cristo køjxp. ² Ku meets y'ijty xpadundi ja ka'øwyinmaa'ñ midi tpadundip pøn ja Dios tka'ijxyidip, ku ja miku'windsøn yja' xpabøjkidi midi tkajxp ja tyumbitøjk jøts ja t'atskajpxjot'amøjkidit pøn ja Dios tkabadundip. ³ Nayide'en ø tø njaa'y'aty samdam meets. Tum ja' øøts y'ijty ndumpy ja axøøk ja kya'øyi midi ja ne'kx y'amidøøpy, jøts tum ja' midi yigaap pidøomp winmaa'ñjøtpy. Paty øøts idø'on xjapaat'aty jøts øøts ja møj ayo'on nyikmo'ot nayide'en sam o pøn pojkpitumbi. ⁴ Janch møj ja Dios pya'ayo'owin ⁵ ku tø tyikjujkyiky adøm ja n'anmija'win Cristo køjxp, øy adøm ja axøøkpi ja yigaappi tø yjayik'o'jknii ja n'anmija'win. Jade'ents idø'on niduki'iyi adøm tø nniitsoojknandi ku ja Dios y'øy'ajtin myøji. ⁶ Ku ja Dios tø tyikjujkyiky ja Jesucristo, nayide'en adøm idø'on ja ñamyayi møøt njujukpyikyim. Nayide'en idø'on ja tpaaty ndejint ku ja tsajpjøtpy pyatøjkifi møøt adøm ja nniikxyim jøts ja jap møøt n'ejint. ⁷ Paty yø Dios Teety jade'en ttuñ jøts t'ejxtit tnijawidit pøni ti pøni pøn wyinatit memp kidakp, jøts jade'en tnanky'ejxit mabaat ja chojkin mabaat ja y'øy'ajtin tø xmø'øyim Cristo køjxp. ⁸ Jabi ja Dios chojkingøjpxxi meets tø mniitsoøky ku xyiktundi ja mjanchja'win. Ka' meets kø'øm xmøøt'aty ja ñankñitso'ok'ajti, ja Dios ja tyajkp. ⁹ Ka'ap ja n'øchinaa'yin xyiknitsø'ok'ajtint midi adøm kø'øm njatu'uñindip, paty ja nganadyamikajxandit. ¹⁰ Tø ja Dios Teety xanibiktaajkim Jesucristo køjxp jøts ja øchinaa'yin ndu'unint sayim ja wyinmaa'ñ ja tmøøt'aty.

Ja øy'ajtin midi ja Dios Teety tø xmø'øyim Cristo køjxp

¹¹ Ja'myatsti sa meets y'ijty mjatti mgubatti ku meets ja israelit jaal'y xkamigu'uk'attinim, kø'ømyixi ja y'ijty ñadyamøjawiyidi ja Dios y'ejxpajtin midi pyiktaktip ñe'kxkøjxp. Paty meets wenk myiknimadya'aky wenk myikniwinmayi ja'agøjxp ku xkamøøt'atti ja'abi ejxpajtin. ¹² Agoostujpy aduktyujpy meets ojts mdsøøni, ni xkanijawidi pøni pøn pøni ti ja tø tnimiñ

midi tyejtíp Cristo. Aduky meets ja mduu', tsí'lkxy meets ja mduu' mā y'ukyiknijawit ja øgyajpxy ja ømyadya'aky pøni sadam ja Dios t'ødyunwā'añ ja naxwii'ñit jaa'y. Ja Israelit jaa'y ja ja'ayi y'ijty tmøøt'ajttip, ka'ap y'ijty tu'ugyi ja Dios Teety x'ajot'atti, niti awejxin niti jøp'ejxin xkajagyapti ya naxwiiñ. ¹³ Ixyamts meets ja Jesucristo mja'ajtniyidi y'o'jkingøjxp, o meets jagam jixkø'øm ja mdsinaa'yin tø xyiknaxy. ¹⁴ Tøts adøm ja xmø'øyim ja øy'ajtin ja jotkujk'ajtin. Jabi ja'ats idø'øn tø t'awaamuky t'agonmuky ja israelit jaa'dyi møøt pøn ka'israelit jaa'dyi. Jade'en ja tsep tø tyikudigøy. ¹⁵⁻¹⁶ Kuts ja y'o'jky jam kruskøjxp, jade'ents idø'øn tyikudigøjyi ja Moisés kyutujk midi kuwani yikpadump y'ijty, midi tyamøk'ajttip ja israelit jaa'yiyi. Jøts jade'en ja jadu'uk tsinaa'yin tyiktsø'ondaajky, jøts jade'en tyiknamyujki ja israelit jaa'y møøt pøn ka'israelit jaa'y'ajttip. Tu'ugyits jade'en yjaa'y'attit jotkujk Cristo køjxp jøts jade'en ja Dios Teety tkamidsep'attit.

¹⁷ Jade'en'ampy ja Cristo myiñ jøts ja øgyajpxy ømyadya'aky tnigajpxy sa dø'øn ja øy'ajtin nbaajttint midi meets y'ijty mganija'wipnim, jøts midi øøts tø ngaja'gyuki, øy øøts ja tø nja'ixy, øy øøts ja tø njamøøt'aty. ¹⁸ Jabi Cristits adøm xuu'mø'øyindip sudso ja Dios Teety nbaajttind ni'amuki wan t'israelit jaa'yidi wan tka'israelit jaa'yidi, jøts tu'ugyi adøm idø'øn ja Espiritu Santo myøk'ajtin nyiktu'uñimp. ¹⁹ Migugajp ja'winiyidip meets ixyam niduki'yiyi ja Dios janchja'wibidi, ka'ap ukjade'eni sam y'ijty. Ja Dios meets idø'øn mja'ajtniyidip møøt ja'adi pøn jaty ja y'u'nkja'wip. ²⁰ Jade'en idø'øn tpaaty ja Dios kyajp sam tu'uk ja møj tøjki midi møj tsaā tø yiktapojtsøñ; jøts jade'en ja Cristo sam ja møj tsaā midi yiktapojtsø'omp, jøts ja kyudanaabyitøjk møøt ja kyu'aaaw jade'endi sam ja mutsk tsaā una'jkindi. ²¹ Adøm idø'øn tsaptøjk'ajttindip ndejint pøn tjanchja'widip ja Dios. Kuts ja jaa'y pøn tka'ijxyidip ja Dios jøts ja tjanchja'wiñidi, jade'ents adøm ja ndsaptøjk myøjandi midi ndejint tø yikpojtsøñ Cristo køjxp. ²² Nayide'en meets idø'øn ja Dios mja'ajtniyidi jøts tø mduktatøjkmiyidi ja y'Espiritu Santo.

3

Ku ja Pablo tnigugajpxy'aty ja øgyajpxy ja øy'ayuujk jøts ttukmadøy pøn ka'israelit jaa'dyi

¹ Ixyam ø puxøjkjøtpy ndsøøni ja'agøjxp ku meets tø ndukmadøy ja Jesucristo ja yja' ku meets nayide'en mbaat'aty xpaatt ja' y'øy'ajtin. ² Pø mnija'wiñip meets ku øts ja Dios y'øy'ajtingøjxp tø xpikta'aky jøts øts ja yja' nnigajpxit jøts meets ja øchinaa'yin xyiknajxnit. ³ Sam meets jap nøkyjøtpy jawyeen tø nduk'ixy tø nduknijawi ku øts ja Dios tø xukmadøy ja yu'uch winmaa'ñ, ku meets nayide'en xpaatt ja' y'øy'ajtin sam israelit jaa'y ja tø tpaatti. ⁴ Ku ja nøky xkajpxtit, jap meets idø'øn x'ext xnijawit ku øts ja Dios yu'uch winmaa'ñ nnija'wiyi midi ja Cristo yja' tnigajpxip. ⁵ Nijuuni ja'abi winmaa'ñ tø yiknigajpxy tø yiknijawi, ixyamnim idø'øn ja Dios jade'en tø tuk'ixy ja kyudanaabyitøjkti ja kyugajpxtyjkti ku ja Espiritu Santo tø y'agajpxiniyidi. Ja'abi jaa'y ja'adi, pøn ja Dios tø ñadyamiyojxniyidi. ⁶ Ya'at idø'øn yu'uch wyinmaa'ñ'ajtp midi ja Dios myøøt'ajtpy: ku dø'øn jade'en tjanchjawidit ja øgyajpxy ja ømyadya'aky midi xyiknitsø'ok'ajttindip, winets jade'en ni'amuki tpaattit ja Dios myaay ja israelit jaa'dyi sam nayide'en pøn ka'israelit jaa'dyi. Jøts jade'en ñamyayidit jøts tpoøktit ja' midi Dios tø tni'adsowi Jesucristo køjxp.

⁷ Ka'ap ɔts xjapaat'aty ku ɔts ja ɔy'ajtin tɔ nyikmɔ'ɔy jɔts ɔts ja ɔgyajpxy ja ɔmyadya'aky tu'ugyi ndu'unt, jabɪ jade'ents idɔ'ɔn ja Dios ja myɔk'ajtin tɔ xamidsɔky. ⁸ Meets niduki'iyi pɔn ja Dios ja'ajtidip, ɔts idɔ'ɔn nayja'wiyip ty-imyutsk, jɔts ɔts jade'en ja Dios tɔ xanɪpiky jɔts ndukmado'odit pɔn ka'israelit jaa'dyi sa ja myɔji ja Cristo y'ɔy'ajtin. ⁹ Tɔ ɔts ja Dios jade'en xanɪpiky jɔts ɔts ja naxwii'nit jaa'y nduk'ext nduknijawit sa dɔ'ɔn ja yu'uch winmaa'n windi'ixyip tɔ ttanibiktaajkiñi, jaayip ku ja naxwii'nit tyiktso'ondaajky. ¹⁰ Paty idɔ'ɔn ja jade'en yjaɣty, jɔts ja yiktuk'ext yiktuknijawidit ja ankiɪstɔjkti jɔts nayide'en pɔn jaty mɔj'ajttip jap tsajpjɔtpy mabaat idɔ'ɔn ja Dios ñijawi'ajtin yja'aty. Jade'en ja tnan'ky'ijxyi ku ja tɔpɔkmuky tkonmuky ja ɔybi ka'ɔybi jaa'y, tu'ugyi tnan'kñamyuky janchja'wingɔjxp. ¹¹ Jade'en ja tɔ ttuñ sa ja windi'ixyip tɔ ttanibiktaajkiñi ku ja nwindson'ajtim Jesucristo jade'en ja chinaa'yin tnan'ky'ijxyi tnan'kñijawiyi. ¹² Ku adɔm ja nwindson'ajtim Jesucristo njanchja'wim, aguɣk jotkujk adɔm nwingunɔjkiñant ja Dios Teety, niti tso'ɔgi niti jɔpjawi ja', ja'ayi nmɔk'ajtim ja njanchja'win. ¹³ Paty meets nnɔjmi jɔts ka'ap mjotmay'ooktit ku ɔts yap puxɔjkɔtpy n'ayɔy meets kɔjxp. Jotkujk meets idɔ'ɔn ne'egi mnayjawiyidit, jabɪ jade'ents idɔ'ɔn ja Dios yja' yikmɪjaty.

Ja Cristo chojkin

¹⁴ Ku nja'myatskixy midɪ ja Dios tɔ ttuñ, jats ɔts jade'en ja Dios Teety y'ɔy'ajtin ngunuukxyja'wiyi pɔn tyeety'ajtpy ja nwindson'ajtim Jesucristo, ¹⁵ jɔts pɔn tyajkp ja wyinmaa'n ja yjujky'ajtin jap tsajpjɔtpy sam naxwiiñ. ¹⁶ N'amidɔɔpy ɔts ja Dios Teety ja myɔk'ajtin midɪ myɔɔt'ajtpy kawinmaañi jɔts ttamigaxit ja Espiritu Santo, jɔts jade'en myikjotmɔk'atɪyidit. ¹⁷ N'amidɔɔpy ɔts jɔts jam m'anmija'wingɔjxp y'ettit xemikɔjxp ja Cristo jade'en ku janchja'win xmɔɔt'atti, jɔts jade'en ja tsojkin mɔk xmɔɔt'attit midɪ ja Dios mdamiyoxtip, ¹⁸ jɔts jade'en xja'gyukidit mɔɔt pɔn tɔpɔbjktip ja nwindson'ajtim Jesucristo mabaat idɔ'ɔn myɔji ja chojkin midɪ kawinmaañi. ¹⁹ N'amidɔ'ojip meets jits x'ejxtit xnijawidit ja'abi tsojkin jɔts jade'en tuki'iyi mdatɔjkigyɔjxyidit ja Dios, ɔy ja ka' tyimykñijawigyixy mabaat idɔ'ɔn ja myɔji.

²⁰ Ixyamts idɔ'ɔn pyaat'atyi jɔts adɔm ja Dios ndagunuukxyja'wa'ant ndamɔja'wa'ant ja agɔjxp ku mɔj ja myɔk'ajtin midɪ tɔ xjamɔ'ɔyim. Ka'ap adɔm ja nwinmaa'n myajadaajkyim, ni ka'baat ja yikja'gyuki mabaat idɔ'ɔn ja myɔk'ajtin myajada'aky midɪ adɔm xyiktu'unimp. ²¹ Iwan twindsɔjka'andi twinja'wa'andi ja Dios Teety xemikɔjxp ni'amuki pɔn jaty ja janchja'wiyip Cristo kɔjxp! Jade'en idɔ'ɔn ja yjatt.

4

Tu'ugyi adɔm nnayja'wiyindi Espiritu Santo kɔjxp

¹ Ja nwindson'ajtimgɔjxp ɔts tɔ nyiktsumy, paty meets n'amidɔy nbɔktsɔy jɔts ɔy yikxon mjaa'y'attit sam idɔ'ɔn pyaat'atyi ttu'undit pɔn ja Dios tɔ wyi'ijxyidi wyigɔñidi, ma meets idɔ'ɔn nayide'en tɔ myikpiktakmidɪ. ² Tuda'aky'atti, mɔɔt'atti ja maa'kxujkin; nachokidi nixem niyam, kidi xa'ambɔkti ku ti ku sa mjatti. ³ Tu'ugyi m'ettit, ja Espiritu Santo mbudɔkiyidip jɔts jade'en xemikɔjxp y'ett ja jotkujk'ajtin. ⁴ Tu'ukpi jaa'y adɔm pɔn tɔpadundip ja Dios, tu'ugyi ja Espiritu Santo jɔts tu'ugyi nayide'en ja awejxin nmɔɔt'ajtyim midɪ ja Dios tɔ tni'adsowi. ⁵ Tu'ugyi adɔm ja nwindson'ajtim, jɔts tu'ugyi ja njanchja'win, jɔts ja nnɔbajtin, ⁶ tu'uk ja Dios midɪ tnideety'ajtp

niduki'iyyi tuknax. Ja' tñigubajk'ajtp niduki'iyyi, adomgøjxp ja tñanky'iixxyi midì ja tyunwampy, jøts møøt ja y'ity pøn jaty ja yja'ajtpy.

⁷ Kija' adom idø'on tø nyiktanibiktaajkindi ja ndunkjøøjp, sam ja Cristo kø'øm tta'ejxi, jade'en ja tø tyaky. ⁸ Paty ja Dios jade'en ja kyajpxy wyaañ ja nwindson'ajtm wyimbijty jadigojk tsajpjøtpy ku tyik'awa'atspidsømgijxy pøn ja miku' wyinajty tø myimajadaajkniiyidi jøts tmo'ot ja myøk'ajtin ja naxwii'ñit jaa'y.

⁹ ¿Tits idø'on jade'en tyijpy ku dø'on ñiimy ku wyimbijty jadigojk jap tsajpjøtpy? Ja' idø'on ku ya myiñ naxwiiñ jøts jade'en ja amutsk'ajtin tpaajty. ¹⁰ Nay ja' idø'on patøjkiñi tsajpjøtpy midì ya atsmen naxwiiñ, jøts jade'en yikpiktaajkni møjwindsøn jøts o ma jade'en tyiknigaxø'økt ja myøk'ajtin. ¹¹ Jøts jade'en nidu'uk nidu'uk tmoøy kija' ja jaa'y tyunkjøøjp, jam pøn kudanaabyitøjkti, jam pøn kugajpxtyøjkmidi, pøn ja øgyajpxy ømyadya'aky tyikyø'omyidip tyiknaxmidip, jøts jam pøn kajpxwejmidi yik'ixpøjkmidi. ¹² Jade'en ja yjaa'y ja ojts tuu'mø'øy sudso ja tyunkjøøjp ja tpadu'undit, jøts jade'en myiwenit ja yjanchja'win pøn jaty Cristo yja'ajtpy, ¹³ jøts kunim adom ja yikxon ni'amuki ni'aga'pxi nnija'wa'andit ja Dios U'nk janchja'wingøjxp. Winetnimts ja nwinmaa'ñ myøktajkindit jøtsnim idø'on iiy nayide'en ndu'unint sam ja Cristo. ¹⁴ Ka'ap adom ja mutsk winmaa'ñ n'ukmøøt'ajtna'ant sam o pøn tigati tpadungøjy ja'ayi ku tsuj tmadø, øy ja yjanchi kyajanchi myøjpiktakpy ja'. ¹⁵ Ku adom idø'on ja Cristo n'aduunaxkøjxint, jaanimts idø'on nmøøt'ajtint ja tsojkin jøts jade'en nduk'ejxna'ant nduknija'wa'ant ja nmigu'uk ja tiy'ajtin, jabi Cristits adom xñigubajtimp. ¹⁶ Ku ja tñigubajk'aty, sa dø'on øy ñijxy ñaxy. Pøni sats adom nidu'uk nidu'uk tø nyikmø'øyim ja ndunkjøøjp, jade'en adom ja xpudøjka'amp jøts øy møk y'ettit ja yjanchja'win, jøts myøjdidit myayidit ja wyinmaa'ndyi, tyatøjkiniiyidit ja tsojkin.

Ja jemchinaa'yin midì ja Cristo tø xmø'øyim

¹⁷ Ya'ats øts idø'on nnigajpxpy nwindson'ajtmgøjxp: jøts ka'ap jade'en m'uktsinaañidit sam ja chøonidi pøn tka'ejx'ajttip ja Dios, midì tmøjpiktaajktip ja katumbi winmaa'ñ, ¹⁸ jøts agoostujpy abe'etstujpy ja yja'gyuki tmøøt'atti. Ka'ap ja tmøøt'atti ja juky'ajtin midì ja Dios yajkpy, ku ja kø'øm ka' ttsokti ku ja kø'øm ka' tñjawiwy'a'andi. ¹⁹ Tø ja chø'ødyu'un'ajtin ja tyiktigøñidi jøts jam tø ñagyiyajkniiyidi ma jam ja y'axøøkpi yigaappi yiktuñ. ²⁰ Ka' meets jade'en ja Cristo yja' tø mduk'iixxyiyidi tø mdukniyawiyidi, ²¹ pøni tødam meets idø'on ja xjanchpatmadoji ja yja' ku dø'on ja jade'en ka' wya'añ, ku dø'on tø myiktukmadowdi ja tyiy'ajtin. ²² Majtstutnidi tuki'iyyi pøni sa y'ijty ja mdsinaa'yin xyiknaxti, ku xpadundi ja y'øbyi kya'øbyi midì pidsømp winmaa'ñjøtpy, midì mnadyawindaay'ajtidip kø'øm. ²³ Myikjemiñidip meets idø'on ja m'aaw ja mjoøt sam ja mwinmaa'yindi nayide'en, ²⁴ jøts jade'en xpøjknidit ja jemchinaa'yin sam ja Dios kø'øm tø mdamidsøkyidi. Jade'ents ja øchinaa'yin ñigaxi'iky ku øy ku tsuj ja mdsinaa'yin xyiknaxtit, niti pøky niti kadyeey.

²⁵ Paty meets ka' m'uktaay'ajtnit; ku mmigu'uk xmigajpxt tiy janch idø'on ja møøt mmadya'akt, jabi tu'ygyits adom idø'on ja janchja'win nbaduu'ñim.

²⁶ Pøni m'ambøjktip, kidi mnankpyøkpetyidi; ka'ap ja m'aki xyikta'añidit.

²⁷ Kidi ja miku' xyikmøj'atti.

²⁸ Pøn y'ijty maa'tsp, wan ja tmajtstutni jøts ne'egi tyundøjkiñit, jøts jade'en ja ødyunk ttu'unt jøts jade'en tpuðøkit pøn ayoop.

²⁹ Ka'ap axøøkpi kajpxy axøøkpi madya'aky xyiktu'undit, ja øybi madya'aky ne'egi xyiktu'undit jøts jade'en ja mmigu'uk xmo'odit ja tigajtsin jøts ja kunuu'kxy'ajtin. ³⁰ Kidi meets xyikjotmay'øøky ja Dios ja y'Espíritu Santo, ja'ats meets idø'øn m'ejxpajtin'ajtpy jøts jade'en ja Dios m'ejxkapidit ku meets ja mja'atyí, íxyam sam wyinaty ku mmøøgyøjxniyidit tuki'iyi ja nitso'ok'ajtin.

³¹ Majstutnidi tuki'iyi ja m'aki, kidi mjotma'atti, ja pøjpi tsa'pxpi madya'aky jagam ja yiktanidi sam tuki'iyi ja' midí ka'øy nayide'en. ³² Yikxon meets idø'øn ne'egi m'øy'att, mnabya'ayowidip meets, jøts nayide'en mnamyaa'kxukiyidit jade'en sam meets ja Dios Teety tø mmee'kxyiyidi Cristo køjxp.

5

Sa dø'øn ja chinaa'yin ja tyiknaxtit pøn ja Dios u'nk'ajtiyidip

¹ Kawinmaa'ni meets idø'øn ja Dios Teety mdsøkyidi paty meets idø'øn ja xpadu'unt sam ja mutsk una'jk tpadundi ja tyeety. ² Nanky'ejxidi ja mdsøjkin nayide'en sam ja Cristo xtsøjkyindi jøts ku ja xku'ayo'owim adøm nbøkyøjxp. Jade'ents ja Dios t'øyja'wiyii'ñ kø'øm ku ja jade'en ttuuf.

³ Íxmatskøjxti tuki'iyi ja kya'øybi. Kidi ø pøngapøn møøt mnamyøøt'atyidi, kidi xniwängøjxwa'andi tuki'iyi ja juky'ajtin midí ya naxwii'ñ najxp, jabi ja Diosxi meets ja'ayi mja'ajtniyidip. ⁴ Kidi ja axøøkpi ja yiktsø'odyumbi madya'aky xmøøt'atti, jabi ka'axi jade'embí pyaat'atyiyi. Ja Dios meets idø'øn ne'egi ja y'øy'ajtin mnimadyajkidip. ⁵ Tøts meets xnijawi ku o pøn yaa'dyøjk o pøn tøøxyøjk ñamyøøt'ajtkøjyidi, ok pønts ja axøøkpi yigaappi tyumpy, ok pønts ne'egi ttsojpk midí ja naxwii'ñit yajkpy, ka'apts ja mibaat pyaat'atyí tpaatt ja Dios kyutujk ma ja Cristo ttanitanit ja yjaa'y. Jabi wenkpi diosxi dø'øn ndejint y'ajot'ajtnip pøn ja naxwii'ñit øy'ajtin ttajotmay'oo'kp.

⁶ Kidi xyikmajada'akti ja win'øø'mbidi pøn wandip ku yø'øbi winmaa'ñ y'øyi jøts xpadu'undit, øø møkts ja Dios ja tyikastigipaatt pøn ja kabaduujnip. ⁷ Íxmatskøjxti tuki'iyi yø'øbi jaa'y.

⁸⁻⁹ Jabi jaj agujkpyts meets mdsinaa'ni kuts ja nwindson'ajtim møøt m'etti. Ka'ap jade'en ja mdsinaa'yin x'ukyiknaxnidi sam y'ljtyin. Ku ja nwindson'ajtim jade'en ja kuno'jkin xmø'øyim, jade'ents idø'øn nnanky'ejxint nnankñija'wa'ant ja øybi tsinaa'yin, sam idø'øn ndejint ja øy'ajtin ja tiy'ajtin jøts midí paat'ajtip ndu'unim. Yikyø'odyi dø'øn jade'en ja mdunk. ¹⁰ Tun meets ja may'ajt jøts x'ejxtit xnijawidit midí'ibi dø'øn ja Dios chøjky. ¹¹ Kidi xundi ja' midí katump, ja' yø ttundip pøn agootstuppy tsinaadyip; ne'egi pudøki meets idø'øn ja' jøts xukpaattit ja kuxiijndya'aky'ajtin. ¹² Janch tsø'odyu'unin idø'øn ja ñaxy ku adøm nnimadyajkindit sa dø'øn ja chinaa'yin amaa'tsk tyiknaxti. ¹³ Øy idø'øn ja nayide'en tpaaty ku adøm ndukja'gyukandit mabaat idø'øn ja chinaa'yin ja kya'øyidi, wan wyinaty jade'en ja Dios o pøn tpaabøjkni. ¹⁴ Paty idø'øn ja wijkyajpxy wya'añ:

Wejnidi kajnidi meets;
kidi agootstuppy abe'etstuppy m'uksinaa'ni,
ja Cristits ja kuno'jkin kudøø'kxin tyakp.

¹⁵ Patyts meets idø'øn øy x'ejxtit sa dø'øn ja mdsinaa'yin xyiknaxtit. Kidi jade'en mdsøønidi sam pøn kube'ets kumon, wijy kejy xyiknaxtit. ¹⁶ Wijy kejy mnabyikta'agiyidit jøts tum ja øybi ttundi, jabi ja ka'øybixi yjawí íxyam nankmyøjtøkiwyajniyip. ¹⁷ Kidi mgawinmaa'mbyaati, íxa'adi nijawidi pøni

ti dɔ'ɔn ja nwindɔn'ajtim tɔ mdamidsɔkyidi. ¹⁸ Kidi mnadyamiyɔxyidi ja nɔɔ ja pa'ak ja amu'ukyjaa'y'ajtin midi ja windigɔ'ɔyin tyajkp, yikmɔj'atti yikmajada'akti, nadyamiyojxidi ne'egi ja Espiritu Santo. ¹⁹ Ja nwindɔn'ajtim idɔ'ɔn ne'egi mnimadya'aktip, ku ja Salmos xkajpxtit jɔts ja y'ɔɔjik xawin'ɔ'odit. Tu'ugyi ja m'aaw ja mjoort xpikta'aktit. ²⁰ Nwindɔn'ajtim Jesucristo kɔjxp xamɔja'wikyunaɔxtit ja Dios Teety ku ja kunuu'lxin tyaky kɔx kida'ak.

Sq dɔ'ɔn chɔɔmidit ja teety ja taak ja u'nk ja una'jk pɔn ja Cristo tpadundip

²¹ Jade'ents ja Dios xawindsɔ'ɔgidit ku nixem niyam mnagyupɔkidit.

²² Ja tɔ'ɔxyɔjkti pɔn amajtskti ja ñiyaa'y pyadu'undip, nayide'en idɔ'ɔn sam ja nwindɔn'ajtim tpadu'undit. ²³ Ja yaa'dyɔjk tngubajk'ajtp ja ñidɔ'ɔxy, nayide'en sam ja Cristo tngubajk'aty ja yjaa'y, pɔn nayide'en yiknitsɔjky. ²⁴ Jade'en sam ja Cristo kyupiky'atyiyi ja yjaa'y, nayide'ents idɔ'ɔn ja amajtsk tɔ'ɔxyɔjkti ja ñiyaa'y tkupiky'ajtmidit tuki'iyi.

²⁵ Ja amajtsk yaa'dyɔjkti, choktip ja ñidɔ'ɔxy ja nayide'en sam ja Cristo tɔ tɔsɔky ja yjaa'y ku ttamiyɔxy ja yjujky'ajtin. ²⁶ Paty ja jade'en ttuun' jɔts tjibijky tjugɔn ja yjaa'y niti pɔky niti kadyeey, tyikwatsni jade'en nɔbajtingɔjxp ku ja ɔgyajpxy ɔmyadya'aky yikpaduun' yikjanchjawi, ²⁷ jɔts jade'en mɔɔt y'ett jɔts jade'en tɔnky'ejxit tsuj wa'ats, ni tu'uk kya'ɔybi tyikwingaxɔ'ɔkt. ²⁸ Jade'ents idɔ'ɔn ja yaa'dyɔjk tɔsɔktit ja ñidɔ'ɔxy sam t'ejx'etti ja kyɔ'ɔmne'kx ja kyɔ'ɔmgojky. Pɔn idɔ'ɔn ja ñidɔ'ɔxy tɔsojky kɔ'ɔm idɔ'ɔn ja ñadyamidsɔkyi. ²⁹ Pɔ ka'axi pɔn ja ñe'kx tmidsep'aty, y'ejx'ijtpy ja' jɔts yjujky'ett chuxk'ett; tymñayide'en idɔ'ɔn ja Cristo ttunni mɔɔt ja yjaa'y, ³⁰ jabi ñe'kx'ajtpyxi dɔ'ɔn ja ndejint ja yjaa'y ma adɔm nayide'en tɔ nyikpiktaajkyindi ma dɔ'ɔn ndejint adɔm nbajk'ajtyindi nxixy'ajtyindi. ³¹ Sam jap nɔkyijpxy wya'añ: “Myajtstu'utp ja yaa'dyɔjk ja tyeety ja tyaaak jɔts jade'en ja ñidɔ'ɔxy mɔɔt y'ett ejximdam tu'ukpi jaa'y.” ³² Nnija'wip ɔts ku ya'atpi madya'aky janchtyimchep, ja' idɔ'ɔn yɔ wya'añ jɔts yikja'gyukit waani sq dɔ'ɔn adɔm ja Cristo mɔɔt tu'ugyi njaa'y'ajtyim. ³³ Nayide'ents idɔ'ɔn tngajpxmi ku nidu'uk nidu'uk ja yaa'dyɔjk tɔsɔktit ja ñidɔ'ɔxy sam kɔ'ɔm ñabya'ayɔyidi, jɔts nayide'en ja tɔ'ɔxyɔjk tkajpxkyupɔktit ja ñiyaa'y.

6

¹ U'nk una'jkti, ja' meets idɔ'ɔn mdunkjɔɔj'ajtpy ku ja mdeety xpadu'undit. Jade'en xyiknigaxɔ'ɔktit ku meets ja Dios xjanchjawi, jade'en idɔ'ɔn pyaat'aty. ² Ja myidu'ukpi ka'ama'ayin midi myɔɔt'ajtpy ja awejxin, ya'at idɔ'ɔn ja': “Windsɔ'ɔgi ja mdeety jɔts ja mdaak, ³ jɔts jade'en ɔy jotkujk xyiknaxt jɔts yo'ont ja mdsinaa'yin ya naxwiin.”

⁴ Meets u'nkteetyi, kidi o tigati m'u'nk xa'oiti, ots ja jade'en mmidsepwa'anidit jɔts ka'ap m'ukyikajpxkyupɔjknidit. Ja'gyuki kɔjxp meets idɔ'ɔn ja ne'egi mɔɔt mgajpxt mmadya'akt jɔts jade'en xuk'ejxtit xuknijawidit ja nwindɔn'ajtim ja tyi'y'ajtin.

⁵ Tumbitɔjkti, mimadowdi ja mwindsɔndi ya naxwiin. Windsɔ'ɔgidi, padundi tuki'iyi midi ñi'ane'empy sam idɔ'ɔn pyaat'aty nmidu'unint ja Cristo.

⁶ Tungɔjxti ejtp midi y'ane'empy, ka'ap jaayiyi yijy mnabyikta'agidit ku ja m'ijxyidi jɔts jade'en ñadyijyi myikajxa'aktit. Jade'ents idɔ'ɔn ne'egi xu'undit sam ndejint ja Cristo yikmiduun', jɔts tuki'iyi ja m'aaw ja mjoort xpikta'aktit, jɔts jade'en ja Dios yja' xpaduujnidit midi kɔ'ɔm tɔ ttanibiktaagi. ⁷ Kidi mdunk xuñ a'aka jot'aka, ja nwindɔn'ajtim idɔ'ɔn ne'egi mdawindsɔ'ɔgip

jòts ka' x'ixa'at ja jaa'y kyajxajkin. ⁸ Pø tòts xnijawidi ku adøm nidu'uk nidu'uk xkumaa'yin ja nwindson'ajtim pøni sà adøm ya øy tø ndu'uñim, wan pøn awa'atstum ka'awa'atstum tø tyiknaxy.

⁹ Meets yiktumbitøjkti, yikxon meets ja mdumbi ana'am, kidi xwinwopti xjøjwopti. Ja'myats meets ku meets ja nwindson'ajtim nayide'en xmidunmi midì tsajpjøpy tsinaapy, jòts ka'ap ja' twi'ixy twigøñ, tuknax adøm di ja' wyingujkp, wan tumbi tkatumbi.

Ja nigubojkin midì myøøt'ajttip pøn ja Cristo tjanchja'widip

¹⁰ Ixam migu'uktøjkti, yikmøkidi ja møk'ajtin midì tø mdatøkiiyidi ku ja nwindson'ajtim xmøøt'atti. ¹¹ A'ejxidi abaadidi ja mnigubojkin midì ja Dios yajkpy, jòts jade'en møk xwindanidit ja miku' jòts ka' xyikmajada'aktit ja tyaay'ajtin. ¹² Ka'axi adøm nmøøtseptuñim ja jaa'y, ja'ats adøm møøt ja tsep nyiknajxim pøn kayik'ejxp kayiktomp, midì yiktseptump, ku ja tnigubajk'aty tuki'i'iyi ja kya'øbyi ya naxwiiñ pøn ja Dios yja' tkatsojkip. ¹³ Paty meets x'ejxmukt xkonmukt tuki'i'iyi ja nigubojkin midì ja Dios yajkpy, jòts jade'en xmimajada'aktit wyinaty ku ja miku' ja kya'øy'ajtin møk tyikmiñ. Kuts ja jade'en xu'undit, møk mda'andit. ¹⁴ Møk mnabyikta'agidit, ja' møk'atti ja tiy'ajtin nayide'en ndejint sam ku nnachujma'ant, møk ndu'unint. Ja øchinaaa'yin ja tiichinaaa'yin midì mee mdumpy, ja' mnadyagubokiyidip sam ja tseptumbi yiknitso'øgyi ja pujx midì kyachwiiñ. ¹⁵ Nay'a'ejxiyidi nay'abaadiyidi jòts xkajpxy'ødyit ja øgyajpxy ja ømyadya'aky midì ja øy'ajtin yajkpy, tyimñayide'en ndejint xu'undit sam ja soldadi ja kyø'øk ttawa'agi jòts jade'en t'a'ejxi ja tsep. ¹⁶ Yø janchja'wints idø'øn ne'egi mmøøt'attip jòts ka' sa mjattit o ti o sà mjatufidit ja miku'. Jade'en idø'øn ndejint mnigubokiyidit sam tu'uk ja møj pujx tkayiknaxy ja tsujxjøøjp ja tsujxpa'a' ku ja soldadi ja pujx ñadyagubokyi. ¹⁷ Janchjawidi ja yiknitso'ok'ajtin jòts jade'en ja m'anmija'win nitì nisa kyajattit, jade'en n'ukpiktaajkint sam tu'uk ja soldadi pyujxkujup y'adaniyi. Tamøk'atti ja øgyajpxy ja ømyadya'aky midì ja Espiritu Santo mmøøjyidip jòts jade'en xniguboktit ja tiy'ajtin ja øy'ajtin sam ndejint ja soldadi ja y'espadi ja chinaaa'yin yiknitso'øgyi. ¹⁸ Dios'ajot'ajtingøjxp meets ya'at xungøxt, jòts ja Dios x'amido'odit xpøktso'odit tum ja y'øbyi midì ja Espiritu Santo kyupijkpy. Ku ya'at xu'undit jøp'ejxti jøpjawidi, kidi meets jatyi xaka'akwa'añ, ni'amidowidi nibøktsowidi pøn jatyi ja Dios yja'ajtpy. ¹⁹ Ni'amido'owidik øts nibøktso'owidik øts nayide'en jòts ja Dios xmo'ot ja winmaa'ñ jòts øts aguj jotkujk nnigajpxt ja ñitso'ok'ajtin midì y'ijty ja Dios kyananky'ejxipnim. ²⁰ Tø øts ja Dios xnajtskaxi kugajpxy'ajtpi, ja'agøjxp ø tø nyiktsumy. Amidowdi ja Dios jòts øts tuki'i'iyi nyiktungøxt ja møk'ajtin sa dø'øn pyaa't'aty ku øts yø'øbi winmaa'ñ nnanky'ejxiyit nnankñijawiyit.

Ja kajpxpoo'kxin midì tyagugøjxiñip

²¹ Yø Tiquico, yø' idø'øn mduknija'wigyøxiyidip pøni ti pøni sà øts idø'øn yam nduñ. Adøm nmigu'uk yø' pøn øts yam møk ja pudøjkin xmøøpy jòts jade'en ja nwindson'ajtim Jesucristo yja' nyikmøjit nyikaja'it. ²² Paty meets ndanigaxi, jòts mdukmadowiyidit sà øøts idø'øn yam jòts øøts jade'en xajotkujk'att.

²³ Paat meets migu'uktøjkti ja tuda'aky'ajtin, ja tsojkin møøt ja janchja'win midì ja Dios Teety ñajtskajxip ñajts'ejxip møøt ja nwindson'ajtim Jesucristo. ²⁴ Jòts Dios Teety ja kunuu'kxidip pøn ja chojkin tø ttamioyxti ja nwindson'ajtim Jesucristo xemikjøxp. Tiigyajpxy idø'øn, jade'en idø'øn yjatt.

JA NØKY MIDI JA PABLO TYANĠGAJX JA FILIPENSĪT JAA'Y

Ku ja Pablo jap puxøjkjøtpy tñijayi pøn tjançhja'widip ja nwindson'ajtim Jesucristo yja' jam Filipos kajpxkøjxp

¹ Pablo jøts ja Timoteo, øøts nwindson'ajtim Jesucristo nwindson'ajtpy. Xyants meets ja nøky tu'uk ndanijayi niwine'en ja Dios Teety mja'atyidi jam Filipos kajpjotp, møøt ja windsøndøjkti jøts ja møjaa'dyøjkti, niduki'iyi wine'en møøt m'etti ja Jesucristo. ² Paatti kupøkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Ku ja Pablo tni'amidowi trübøktsowi ja janchja'wibitøjkti

³ Ejtp øts ja Dios Teety ndukmøjawi øy mee winaak ojk nja'myech. ⁴ Ku øts Dios n'ajot'aty amumjoojt øts ja Dios n'amidøy nbøktsøy jøts ja mbudøkiyidit; ⁵ pø tu'ugyixi adøm ja winmaa'ñi xyambaat nyikyø'øyindi midi ja Dios yja'ajip, nayide'en sa ja xpadøjkyi'okwandøø. ⁶ Øts wamp jøts ku ja Dios Teety tyikmiweni tyikaja'i y'adø'øtst ja myøk'ajtin midi ja tømdukpadso'onda'agyidi, kunim mye'ent jadigojk ja nwindson'ajtim Jesucristo. ⁷ Øwyinmaapy øts idø'on ja'agøjxp ku njanchokti jøts ku nay ja Dios kyunuu'kxin x'adsinaajyidi. Nitaniwym øts ja yja' jøts wa'ambyim øts jøts ku ja tyiyi yjanchi, øy øts ja tøm njadyimyjagupuxøjktøki uk øy øts wyinaty ja kudunktøjk ja windsøndøjk njadyimyjawinguwa'agidi. ⁸ Pø Diosxi tñija'wip wine'en mee njanchøky nayide'en sa nwindson'ajtim Jesús xtsøjkyim. ⁹ Jade'en øts idø'on n'amidøy nbøktsøy ja Dios jøts ku øy tsuj mnamyayidit ku ja tyiiby xwinma'adyit, jøts ku ja ja'gyukin xjagyaptit øy juuni. ¹⁰ Ku jade'en xñijawidit jøts xpadu'undit midi øy midi tsuj, jade'ents xjagyaptit m'annija'win øy wa'ats jøts niti pøky mgapaadiyidit ku mye'ent ja Cristo. ¹¹ Øy wa'ats wyimbidsø'ømdit ja mdunk midi ja nwindson'ajtim mdamidundip, jøts ja yjade'emb i idø'on ja Dios wyindsø'jkinja'wip ja yjade'emb i idø'on ja myøja'wip.

Ja Cristo øts xjagyajp amuum jøts ja' øts amuum xyikjuyk'ajtp øy yjuuni'att

¹² Migu'uktøjk, nimadowdi meets, øy øts idø'on yjawi njemjaty ndejaty, ne'egi nabyudøki ja yjawi tøm'ukpatni, jinaxy ø ne'egi ngajpxwa'kxi ja Dios kyajpxy ja y'ayuujk. ¹³ Tyumnija'widip ja tøjk'adinaabyi ja'adi, jøts nayide'en øy pøn, ku øts ja' nyiktagudsumi ku øts ja nwindson'ajtim yja' nyikø'øyi. ¹⁴ Jøts ku jade'en tøm'tejxti tñijawidi adøm ja nmigu'uk pøn ya'ajttip jøts ku øts yajp tsumy n'ity, ne'egi jinaxy ja tøm yjotmøktø'akti jøts ja jade'en tkajpxwa'kxidi ja Dios kyajpxy ja y'ayuujk.

¹⁵ Jats ya pøn øy'ajtin tsuj'ajtingøjxp tkajpxwa'kxtip ja Cristo yja', jats nayide'en pøn winaagin nugo tsepjøjxp ta'ajkingøjxp ttundip, ¹⁶ jøts ja kyøøm ja' tyikmøjtøkidi, jøts ja ja'ayi nugo xjaaktsepnipøkwa'andi ku øts yap puxøjkjøtpy; ¹⁷ pønts ttundip y'øwyinmaa'ngyøjxp, ja'agøjxp ja jade'en ttundi ku øts ja xpa'ayowdi, pø ñija'widipxi jøts ku ø nyam'aty, ku øts møk ja Dios yja' nyikyø'øyi. ¹⁸ Jøts tiku øts nugo ndyimy'a'aty ndyimdajjt? Wan pøn tyikyø'øy y'øwyinmaa'ngyøjxp uk kya'øwyinmaa'ngyøjxp, pø nugo tum ja Cristo yja' tkajpxwa'jkxidi; yø' ø ndajotkujk'ajtpy.

Jøts jaaktyimxyonda'akp øts yikxon, ¹⁹ pø nnija'wipxi øts ku øts ya'at ayo'on tuki'iyi nmimadakøxt, ja'agøjxp ku meets ja Dios x'ajot'aty jøts meets xni'amidowi xnibøktsowi jøts ku øts nayide'en xpudøki ja Espiritu Santo. ²⁰ Ja'ats ø njøp'ijxpy jøts øts ja ka' ndatsø'ødyu'unt, tu'uk amumjoojt øts ja ngajpxit ja yja'. Ixyam idø'øn pyaat'aty yjaaktyimñigaxø'økt yikxon ja Cristo myøk'ajtin midt ø nyiktumpy, njajujky'aty øts uk nja'øøky njadigøy øts, ka' øts ja nwandijy. ²¹ Pø ja Cristoxi øts amuum xjagyajp, ja'ats ø nmøk'ajtpy. Nja'øøky øts, jinaxy øts ja øy xwimbidsø'ømxit. ²² Pøni jaakjujky'ajtpst øts ya, nay'øy'ajtpst ja nayide'en, jøts øts ja Dios yja' njaakyikyø'øyt, jade'ents ø ka'ap nnijawi pø midt'ibi. ²³ Tum jade'en tum øy, midt'ibi øts ngupøkp ngagupøkp: ne'egi jadyimya'ats'ookwamp øts, jøts øts ja Cristo xemikøjxp nmøøt'ejtnit, ne'egi jadyimya'øy'ajtp ja jade'en; ²⁴ jadu'ukts ja winmaa'nmyi, ne'egi jinaxy yjawi chøkyi jøts meets ka'ap jade'eñi nmajtstu'utt, jaakjujky'ajtp øts. ²⁵ Patyts ø nwa'añ jøts ku mee njaakmøøtja'ajt jøts njaakpudøkidit jøts xajotkujk'attit ku tu'ugyi janchja'wingøjxp xyikmiwenidit xyikajajidit ja Dios yja'. ²⁶ Jade'ents meets njaakminabyaadit ja nwindson'ajtim Jesucristo kyunuu'kxngøjxp amuum. ²⁷ Yø' mjadyimyejxtip yø mdsinaa'yin, jade'en xu'undit sa ja nwindson'ajtim yja' wya'añ. Øy meets jam nja'ats'ixy kø'øm, uk øy øts jadyimyjama jagam, ja' ø ndsøjkpy jøts øts ejtp nnijawit jøts ku meets ni'amuki mnabyudøkiyidi, tu'ugyi ja mwinmaa'n xyik'etti, xem yam ni'ijtyi xni'winmayidi janchja'wingøjxp sa y'øyt sa tyuda'akt ja Dios y'øyajpxy ja y'øy'ayuujk. ²⁸ Ni xkatsø'øgidit pøn ja mdamidsep'ajtidip. Wa'ats yiknijawidi jøts ku ja windigøy yjattit; jøts meets, ja nitsø'ok'ajtin mee mbaatp midt ja Dios yajkpy. ²⁹ N'øjja'windip ku nwindson'ajtim njanchja'windi, jøts nayide'en ku ngu'ayo'ombaatjindi. ³⁰ Nay ja' ayo'on mbaattip midt ø tø nbaaty. Tu'ugyi yø tum jade'en n'adsinaa'yindi jøts mnija'widipts sa øts ixyam n'ayo'ombat'adi'ich.

2

Ku Cristo yik'ayowim yjaty jøts ku tyik'awa'añ ja myøk'ajtin sam ka'ap pøn

¹ Jøts pøni myikjotmøktajkidip ja Cristo, pøni mdajotkujk'ajtidip ja y'ayo'ejxin, pøni jap ja Espiritu Santo xmøødiyidi, pøni mnija'widip sa ja chojkin sa ja pya'ayo'owin, ² yikxondaktik øts ku yikxon mdsøonidi mdanidi, tu'ugyi tum jade'en mnamyayidi ni'amuki jøts tu'ugyi mwinmaydi. ³ Kidi ti xundi mgø'ømwinmaa'ngyøjxp uk xyiktundi ja namyikaxi; yø' øy, ku tuda'aky jøts møj'ejxti ja mmigu'uk. ⁴ Kidi ja ngø'ømja'ajip nugo ndyimyikmøjtøjka'am, pø ja'axi tsojkip sudso ja nmigu'uk nbudøjka'am.

⁵ Yikyø'ødyi ja winmaa'nñ nayide'en sa ja nwindson'ajtim Jesucristo. ⁶ Øy ja wyinaty amuum ja Dios'ajtin tjagyepy, ka'ap ja wya'añ jøts ja kuwani tyimñayide'en tmi'abaaty ja Dios Teety. ⁷ Ojts ja kø'øm tjibiky midt ja wyinaty amuum yja'ajtpy jøts ja jade'en ñabyikta'agyi sa øy pøn tumbi ku ja ya ñaxwiin'ajty. ⁸ Jøts ku ja jade'en jaa'yin myiñ, ojts ja tkupiky'aty ku ja yjemjaty tyejaty. Ejtp øy tpaduñ jabaat ku ja y'ø'jky, øy tsaach'ijxyim ja o'jkin yjayikmøøy jam kruskøjxp. ⁹ Ja'agøjxp ja Dios Teety ja ojts myøjawiyi jøts ja yikmøjtøkiyøø, ka'ap pøn myi'abaadyi øy yjapøni, ¹⁰ ku pøn myadobaadit ja nwindson'ajtim øy madson, nagyuxendyakøxidip ja ni'ijtyi, ¹¹ jøts ja niduki'iyi t'ejxkaptit jøts ja wya'andit jøts ku ja' wyindsøni ja Jesucristo, tum Dios y'øy'ajtingøjxp.

Sam ja jaj sam ja tøø'kxpi jade'en ja jaa'dyi pøn ja Dios ja'ajtidip

¹² Migu'uktøjkti, nayide'en ndsøky jinaxy xmimado'odit øy øts yam jagam, sam ø xmimadowdi ejtp ku meets jam y'ljity møøt ndsøøni. Windsøøgi ja Dios, tuda'aky mnabyikta'agidit, jotmay'atti sudso ja nitsoojkin xpaattit. ¹³ Ku ja tsojkin xjagyapti jøts mdunwa'andi, ja Dios jade'en myikwinmaajyidip, jøts nay ja' mbudøkiyidip ku ja xundi jade'en sa ja Dios mdamidsøkyidi øy tsuj.

¹⁴ Ejtni xoni tuki'iyi xu'undit, kidi amikajpxy xpøkti, ¹⁵ jøts ka'ap pøn mbøky'ejxidit, ja' myik'awa'andip jøts ku Dios m'u'nk'atyidi, øy wa'ats mjaa'y'attit ma ja ka'øy jaa'dyi ma ja kawindiy jaa'dyi. Jade'en meets jam mgaxø'økt sam ja xøøw tkujajy tkudii'kxy ma koots, ¹⁶ jade'en'ampy ku ja Dios ja kyajpxy ja y'ayuujk xyikyø'øyidit. Jøts ku ja Cristo mye'ent jadigojk, møk mee ndaxonda'akt ku ø nnijawit ku ø ka' nugo tø ñiyikyø'øyi ja Dios yja', ka' ø nugo ja ndunk ñiwindigøy. ¹⁷ Øy øts yø pøn xjaduku'oogi, ja' ñamyayi ka'pxp ja windsø'jkin mididi ja Dios y'ity mmøødyip ku ja xjanchjawidi. Xonda'p øts jade'en, niduki'iyi nxondaajkindit. ¹⁸ Jotkujk'at mee nayide'en, ja'agøjxp ku øts nayide'en njotkujk'aty.

Yikajxtip ja Timoteo møøt ja Epafrodito

¹⁹ Pøni wamp ja nwindson'ajtim Jesús, ngaxp øts tsojk ja Timoteo jøts ja m'ats'ejxidit jøts ø njotkujk'att ku ja tmime'ent ja kajpxy ja ayuujk sa meets jam. ²⁰ Pø ka'axi jadu'uk pøn nayide'en wyinmay sam ø nwinmayin, sam mee njotmay'atyin jøts ja øy'ajtin xpaattit; ²¹ tum kø'øm winmaa'ñixi pøngapøn yik-tundip jøts ka'ap ja nwindson'ajtim Jesucristo yja' t'uktunk'ajtniyidi. ²² Tøts xnijawidi sa Timoteo øy tyuñ, sa øts ja møøt ja Dios kyajpxy ja y'ayuujk ngajpxwa'kxiyi, jade'en øts ja xpudøki sam ja jaa'y ja y'u'nk pyudøkiyi. ²³ Jade'ents ø nwinmay pøni sa øts yø nja' y'ukwin'øyi ngaxpts øts ja' jøts m'ats'ejxidit; ²⁴ n'ajot'ajtpy øts Dios jøts meets kø'øm tsojk n'ats'ext.

²⁵ Paat'ajtipts yjawi nayide'en ndanigaxit ja Epafrodito, ja nmigu'uk, pøn øts amuum møøt nduñ, pøn meets ojts xaniguexy jøts øts ja xpudøkit ku ti jaty y'ity kya'ity. ²⁶ Mjanch'ejxwajnidip ja' niwine'en mjam'atti, jøts mjanchjotmay'atyidi ja'agøjxp ku tø xnijawidi jøts ku y'ity pyikyiyi. ²⁷ Tøts ja yjanch'atspikyiyi, jawaani ja tø kya'øøky; tøts ja Dios y'ayo'ijxyi jøts øøts ja tø xpudøki jøts ø nayide'en kyajinaxt ja njotmay, ti øts yam ndaxømpy. ²⁸ Ja'agøjxp meets ja ndyimdyanigaxwa'añ jøts xaxonda'aktit ku jadigojk xpaattit x'ejxtit jøts øts jade'en ka' nugo ndyimyjotmay'oock. ²⁹ Taxonda'akti ku ja jam yja'att. Jade'en pyaat'atyi tu'ugyi ja Dios xjagyepxindi pøn jaty nayide'en tpadundip sam ja Epafrodito, minamyayidi yixxon; ³⁰ jawaani tø kya'øøky ku tmiduñ ja Cristo. Tø tmiwanjaty yik'ayowim ku øts ja pudøjkin xmø'øy, jøts meets ja ñamyayi mgudaniyi øy mee mgaya'aty.

3

Ja tsinaq'yin mididi tuj janch

¹ Migu'uktøjk, tajotkujk'ajtidi ja Dios kyunuu'kxin. Ka' øts n'adsepjawi øy øts yam jadigojk nja'at nay yø', tø ø nnijawi jøts ku meets yø xyiktu'unt. ² Øyim mnay'ejx'etidit, jam ja jaa'y pøn ja wenk winmaa'ñ tyikyø'ødyip, pøn ttundip ja ka'øbyi, ja' pøn tta'ødyøkiwyandip ja Dios ku ja tsuki ñe'kx jøts ja ejxpajt jade'en ñabyiktaajkxiyidi. ³ Jade'en ne'egi tpaaty, adøm idø'on nmøøt'ajtyindip ja ejxpajt ja'agøjxp ku adøm ja yja' tu'ugyi nyikmøjtøjka'andi, jøts ku ja Cristo Jesús ndaxondaajkyindi, jøts ka'ap nmi'agijxyindi

nmijotkijxyindi ja'ayi midi kaxø'kp iiy ja'ayi nikijxy. ⁴ Wa'ambimts øts inet jøts ku ja nayide'en y'øyi ku jade'en ja nachuki ñaxy kostumbri køjxp. Jawaani ka'pxy øts ja ne'egi ndyimñijawi ja'abi tsinaa'yin; ⁵ ku ngue'jxy kyiduktujk xøow øts ojts ja ejxpajt nyiktu'unxi, israelit jaa'lyxi øts; ja Benjamín øts ndeety'amøjip, jøts hebreit etjotp ø ngue'exy, jøts nay jam øts ndeety ndaak choondi. Fariseotøjk øts y'ijty møøt nnamyayi, nay ja Moisés øts y'ijty nbaduujnip ja kyutujk; ⁶ møk øts ja nnitani, jantyimdyøøp øts ja njawi, jøts øts ja jaa'y nbawidetti ndagumatsiwy'a'andi pøn jaty ja Cristo tjanchja'widip. Ka' øts y'ijty pøn ja kutujk xawindsø'øy sa ja tyikutuky, nadyijyi tñigajpxy midi'ibi øy midi'ibi tøøp. ⁷ Midi'its øts y'ijty jade'en nnøjja'wip, jade'en øts yø icyam nja'wiñi jøts ku ka' ma tyuñi, ja'agøjxp ku øts ja nwindson'ajtim Jesucristo tø nnija'wiyi ja pya'ayo'owin. ⁸ Jøts pøni ti øts ja njaak'øjja'wip, tum kudigøøpy øts njawi, ma t'ukmi'abaat ku ja nwindson'ajtim Jesucristo nnija'want. Ja'agøjxp øts tuki'iyi tø n'ixmajtskixy, aayin pista'agin ja tuki'iyi ñøjkkøjxni, ja'ayi øts tu'ugyi njøp'ijxpy ja Cristo ⁹ jøts øts ja møøt n'ett, kaja'agøjxp ku øts ja kutujk ka'pxy nbaduñ, jade'en'ampy ku øts ja nwindson'ajtim Jesucristo tyiy'ajtin njanchja'wiyi jøts øts ja Dios Teety jade'en tø xkupiky. Ja'ats ja Dios kyupijpky pøn ja janchja'wiyip. ¹⁰ Ja' ø ndsøjkpy jøts øts yikxon ndyimñijawit sa ja nwindson'ajtim tyiy'ajtin jøts øts ja myøk'ajtin ja xmo'ot midi ja yjagejpy ku ja ojts tmimajada'aky ja o'jkin ku yjukpyijky xemikøjxp, nja'ayø yø nayide'en, uk njadyimya'øøky ø nayide'en sa ja y'ø'jky, ¹¹ jøts øts jade'en njøp'ext ja jukpyøjkin nayide'en sam ja yjukpyijky.

Ja' n jotmay'ajtim sudso nbaajtint ja øy'ajtin

¹² Ka' nwa'añ jøts ku øts jade'en tuki'iyi ngøjø'ømit'ajtni, uk ka' nwa'añ jøts ku øts tyimwya'atsni tyimy'øyni; tu'ugyits øts ja nbanøjkx'adi'ich, jøts njøp'ijxpy øts ja nbaatt midi øts ja nwindson'ajtim Jesucristo tø xaniwaadsowi patki'jyi. ¹³ Ka' øts migu'uk nwa'añ, jøts ku øts ja jade'en tø ndyimbyatkixy tuki'iyi; nja'dyigøøgyijxpy øts icyam sa jaty ø tøjaty ngubeti ti jaty tø tyuñi, ja' ø ndumpy jøts øts ja njotmay'aty midi mempnim kidakpnim, ¹⁴ jøts nja'jtint ma pyaat'aty ma yjøjpkixy jøts ja Dios ja y'ø'ajtin xukpaajtint jap tsajpjøtpy midi ja xaniwaadsoo'wa'amp, jøts adøm ja nyikmø'øyint ja'agøjxp ku ja Cristo møøt n'ijtyindi.

¹⁵ Wine'en ja Dios møk njanchja'wa'andi, paat'ajtip jøts jade'en tu'ugyi nwinmaa'yindit. Pøni sats pøn wyinmay, jam pøn ja wenk winmaa'n tpaaty, nay ja Diosts ja tuknijawiyip midi tøøp. ¹⁶ Tu'ugyits yø winmaa'n nbøjkindit, jøts yø' idø'øn nyiktu'unindip amuum sam adøm yø tø nnija'wa'ant.

¹⁷ Pa'ejxtik øts, migu'uktøjk, jøts ejxti nayide'en pøn nay yø'øbi tyiktundip midi mee tø nda'ane'emy. ¹⁸ Jaa may pøn ja nwindson'ajtim Jesucristo yja' tkamøjawidip jøts ja wyinmaa'n ja' yiktundip jøts jade'en chøonidi. Tø meets yø kawinaak ojk ndukmadøy, icyats øts jadigojk yik'ayowim nnigajpxkojmi. ¹⁹ Ka'ap ja wyindø'ødit, windigøy ja nøjx yjatti. Ja kyø'ømwinmaa'n sa kø'øm ttsokti, ja' yikmøjtøjkidip, ja' ñamyayi dios'ajttip. Ne'egi jinaxy ja ñadyamikexyidi midi'ibik idø'øn ja yjawi tyatsø'dyu'undip, ja' nugo yjotmay'ajttip sa jaty ti jaty ya naxwiiñ. ²⁰ Ja' adøm amuum xkøjø'ømit'ajtindip jap tsajpjøtpy, jøts ja' adøm njøp'ijxyindip jøts ku ja jap choont ja nwindson'ajtim Jesucristo pøn ja pøky ttuknitso'ok'ajtp. ²¹ Ja' adøm xyikwimbejtindip xyiktigajtsindip jøts nayide'en njajtint sam ja

kø'øm amuum ja kunuu'kxy'ajtin tmøødi, jøts nay ja myøk'ajtin ja jade'en yik'awampy ku jade'en xu'unin, pø ja'axi tuki'iyi tñitanaagyøjxp øy ti.

4

Xondakunaxti ku Dios xjagyejpyindi

¹ Njantyimyja'ats'ejxwandip mee migu'uktøjk, mee ndajotkujk'ajtpy, meets jam Dios wyingujkp ndamajada'akp, jøts tu'ugyi jaaktyimy'ajot'atti ja Dios.

² Ngajpxñigaxidip øts ja Evodia jøts ja Sintique jøts ø møk nnøjmi, wan tnayja'gyukiyidi tkajpx'øyidi ti ka'ø'xyidip jøts tu'ugyi ja Dios yja' tyikyø'øyidit, pø tum ja'axi køjø'ømit'ajtidip. ³ Mets migu'uk, pudøki yø Evodia møøt ja Sintique, ja' øts øjts ngajpxwa'kxi ja Dios kyajpxy ja y'ayuujk møøt ja Clemente jøts møøt jadu'ukti pøn jaty øts øjts xmøøtundi. Wa'ats ja Dios ja ñijawiyidi pøn jaty ti jaty ja xyøøwdi.

⁴ Ejtp ja Dios yja' xaxondaajkidit. ¡Njaaktyimñigajpxpy øts yikxon jøts mxonda'aktit! ⁵ Wan øy pøn mnijawiyidi jøts ku mee tudā'aky mjaa'y'aty. Ja'myats'etti ku tsojk ja nwindson'ajtim myenit.

⁶ Kidi ti x'ayo'onjawidi, tukmadowdi ne'egi ja Dios ku ja x'ajot'attit; ja' m'amido'odip mbøktsø'odip ti mga'ejtxidip, jøts tukmøjawidi tukunuu'kxyjawidi ku wyinaty myikmo'odi midi m'amidoodip. ⁷ Jøts ja mmo'ojidit ja y'ø'y'ajtin ja tudā'aky'ajtin midi ka'ap ti tmi'abaaty sa adøm njaniwinmaa'yam; ja'ats tyikjotkujk'atp ja mwinmaa'ndyi jøts ja m'anmija'windi jøts ku ja nwindson'ajtim Jesucristo møøt m'etti.

Ja' mwinma'adyip midi øy

⁸ Yø', migu'uktøjk, mjotmay'attip midi tiy midi janch, midi xpaat'ajtidip, midi øy pidsømp, midi wa'ats, midi tsøkyim, midi øy agajpxy pidsømp o maðsoo. Tum ja y'øyi mwinma'adyip midi øñigajpxni øñimadyakni.

⁹ Yiktundi midi tø nduk'ixpøkti, sa jaty tø n'ana'amdi, jade'en xu'undit sa øts øjts nwa'añ jøts sa øts øjts kø'øm x'ejxti ku øts ja øjts nduñ: tundits jade'en, winets ja Dios nijuuni mga'ixmatsidit, ejtp ja yjotkujk'ajtin ja mmøøgyuna'xiyidit.

Ku ja filipensit jaa'y tmay'atti ja Pablo

¹⁰ Xyikxondakp øts ja Dios jøts ku meets jadigojk xja'myech. Kidi jade'enip ø ndijj jøts ku meets tø xtyimyja'dyigøøni, ja ku ka' ñibidsømi juuni mee xpudøkit. ¹¹ Ni ka'ap ø nwa'añ jøts ku øts yam sa ndyimyjaty. Tø øts yø n'ejxandigøøni. Yø'øyi ø ndajotkujk'ajtpy midi nmøøt'ajtpy. ¹² Wa'ats ø nnijawi sa yik'ayowim nyiknaxint, jøts nayide'en sa ngumeeñ'ajtint. Tø øts yø nyikyuyj jøts øts øy midi ngawingudsø'ogit, øy ø ngay øy ø ngakay, uk øy ti y'ity kya'ity. ¹³ Øy ø midi nwinguwa'agi, ja nwindson'ajtim Jesucristo nmøk'ajtpy, ja' ø xkuwamp. ¹⁴ Øy'ajtpis ku meets ja n'ayo'on nayide'en mnadyapaadyidi jøts øts jade'en xpudøkidi.

¹⁵ Mnayinija'widipts wine'en jam Filipino kajpxkøjx mgugajp'atti, ku øts ja Dios kyajpxy ja y'ayuujk øjts ngajpxwa'kx'okwajni, ku øts øjts nnijky jam Macedonia kajpkøjxp, pø meeçixi øjts xaniguexy ja pudøjkin midi ja Dios mdamiyojxtip ja'agøjxp ku ja wyinaty ja myøk'ajtin tø xpaajtiyidi. ¹⁶ Jøts ku øts jam wyinaty Tesalónica kajpkøjxp, nayi meetsxi øjts xaniguexy ja meeñ majtsk øjk, jøts øts ja nyiktu'unt ti jaty ø ka'ejtxip. ¹⁷ Kayø'øjip ø nugo njotmay'ajtpy jøts øts ja nugo n'axajit øy ti; ja' ø ndsøjkpy jøts meets yjaaknipatt ja mja' jam Dios wyingujkp. ¹⁸ Tits ø kayikmøøpy, ne'egi o ti tø nyikmø'øy.

Tyimchaachjam yø kajaa midi yø Epafrodito tø xamigaxidi. Jøts jade'en ja Dios yø tjawi kunuu'kxy, sa ja poom pya'akxuuky, ja windsø'jkin yø ñamyayi yikmøøpy. ¹⁹ Ja Dios pøn xjagyajpidip, ja' mmo'ojidip, ja' tyikwimbetp tyiktigatsp pøni ti mga'ejtxidip. Ja nwindson'ajtim Jesucristo møøt ja Dios Teety, ja' tjagyajtpip ja kunuu'kxin ja jotkujk'ajtin midi nijuuni niwindem kagudigøøpy. ²⁰ iXemikøjx Dios Teety møj janch ja kunuu'kxin tjagyepy! Jade'en idø'on ja yjatt.

Ku kyajpx'abaadiwya'añ jøts ja kajpxpoo'kxin t'ukyajkni

²¹ Nguejpxy øts ja kajpxpoo'kxin nwindson'ajtim Jesucristo køjxp jøts xukmado'odit niduki'iyi pøn jaty ja Dios jagyajpidip. Ñayi kyajxmidip ja kajpxpoo'kxin ja'adi pøn jaty øts yam nmøøtti. ²² Niduki'iyi pøn ja Dios ja'ajtidip ya, jøts ja'adi pøn namyajyidip ma ja romanit windsøn ja tyøjk, nayi mdanigajxidip ja kajpxpoo'kxin ja'adi.

²³ Ja nwindson'ajtim Jesucristo mgunuu'kxidip niduki'iyi. Tügajpxy idø'on, jade'en idø'on ja yjatt.

JA NØKY MIDI JA PABLO TYANĠGAJX JA COLOSIT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Colosas kajpkøjxp

¹ Pablo øts, øts ja Dios tø xamidsøky jøts øts ja tø xpikta'aky nwindson'ajtim Jesucristo kyudanaabyi. Jade'en'ampyts øts møøt ja Timoteo ² ya'at nøky nja'ay jøts øø ndanijayi pøn jam Colosas kajpjotp ja'ajtidip ja Dios, pøn jaty jam tjanchja'widip ja Cristo, ja yiknitsokpi. Wants ja Dios Teety ttuñ ja may'ajt jøts ja myo'ojidit ja kunuu'kxin jøts ja myo'ojidit ja tuda'aky'ajtin.

Sa ja Pablo tni'amidowi tniøktsowi pøn jaty ja Dios tjanchja'widip jøts ja tukmadøj ja Dios

³ Ejtp øøts ja Dios ndukmøjawi ndukunuu'kxyjawi midi nwindson'ajtim Jesucristo tyeedyip ku øøts ja' n'ajot'aty meets køjxp. ⁴ Tøts øø nnimadøj jøts ku meets ja nwindson'ajtim Jesús møk xjanchjawi pøn yiktejp Cristo, jøts ku nayide'en xtsokti xpa'ayowdi ja mmigu'uk pøn jaty ja Dios ja'ajtidip, ⁵ ja'agøjxp ku tu'ugyi xjøp'ejxti midi myikmo'owandip midi jap pøkji'iky ejtp jap tsajpjøtpy. Tøts xnijawidi tigøjxp xjagyapti ja jøp'ejxin, ja'agøjxp ku tø xmadowdi ja Dios kyajpxy ja Dios y'ayuujk, ja Dios tyiy'ajtin midi yiknitsokp. ⁶ Nay yø'øbi kajpxy nay yø'øbi madya'aky midi ojts myiktukmadowdi, janch møjta'adøtsp yø icyam, jøts tum øy wyimbidsimy øy madsoo wine'en ja naxwii'ñit, nayide'en yjaty sam tø mjatti kuyip xmadoo'okwandøø ja Dios chojkin ja pya'ayo'owin, jøts tø xnijawidi jøts ku yø tyiyi jøts ku yø yjanchi. ⁷ Yø'øxi øøts ja nmigu'uk Epafraas ojts mduk'ixpikyidi pøn øøts amuum nmøøtumpy jøts yjanchpaduujnip ja nwindson'ajtim yja' ja', jøts ja' meets idø'øn jam tø mbudøkiyi. ⁸ Nay ja' øø tø xukmadøj sa meets ja tsojkin xjagyøp midi ja Espiritu Santo mmøøjyidip.

⁹ Patyts ku øøts ja jade'en ja'ayi nnimadøøj, winetyipts øøts ja Dios niijuuni ngamimøñ meets køjxp, ejtp øøts ja n'amidøj jøts ja Dios yikxon mduknijawiyidit ja winmaa'ñ sa ja tsoky, jøts ja mmo'ojidit wine'en ja wijy'ajtin kejy'ajtin, jøts nayide'en sa xnimadojidit ja Dios yja'. ¹⁰ Jade'ents øøts ja n'amidøj nbøktsøj jøts yikxon mjaa'y'attit sam idø'øn pyaat'aty ttu'undit pøn ja Dios ja'ajtidip, jøts tum ja' mdu'undip midi ja Dios tyajotkujk'ajtpy, midi øy midi tsuj wimbidsømp m'ødyu'uningøjxpti, jøts yikxon xnijawidit ja Dios. ¹¹ N'amidøøpy øøts ja' jøts ja mmo'ojidit ja kyunuu'kxin ja myøk'ajtin, jøts xmidanidit øy midi ayo'on, jøts xyiktuda'aktit ja mwinmaa'ndyi midi ne'egi mdajotkukidip, ¹² jøts ja Dios Teety xukmøjawidit xukunuu'kxyjawidit jøts ku ja tø xanibiktaajka'am ku adøm xpaat'ajtyim jøts adøm ja xmø'øyim ma ja kyunuu'kxin, midi ja yikmøodyip pøn jaty ja Dios ja'ajtidip. ¹³ Pø ja'axi tø xukniwaajchim ma amuum mya-jada'aky ja wimbeets'ajtin ja kugoots'ajtin yja', jøts ja tø xyiktøjka'am ma ja Dios U'nk ja kutujk ttanitani ja yjaa'y, ¹⁴ pøn ojts tyaky ja nitsø'ok'ajtin jade'en'ampy ku tø xku'o'jkandi jøts adøm ja xpojpkimee'kxyindi.

Ku ja Cristo ojts xku'o'jkandi adøm nbøky, jade'en'ampyts ja Dios Teety jadigojk xmijøtjimbijtyindi

¹⁵ Ka'ap ja Dios Teety yik'ixy yiknijawi, jade'en'ampyts ojts ñanky'ijxyi ku ja y'U'nk tyikmiñ, pøn tu'uk møj, ka' pøn jade'en. ¹⁶ Ja' Dios Teety tyukyik'öyiyi'ñ tuki'iyi ti jaty ejtp tsajpjötpy, ti jaty ejtp naxwiñ, midì kaxø'jkp midì kagaxø'jkp. Jøts ja tyik'öyi sa ja ankilistøjk ñagyutujkmø'öyidi, ja'ats ja tyik'öyiyi'ñ jøts ja' ja tja'ajtp. ¹⁷ Jaayim ja yiknitsokpi wyinatyni, ja Cristo, jøtsnim öy ti kyaxi'ikñim, jøts ja' tuki'iyi tkøjø'ømit'ajtp ti jaty ja'ajtp. ¹⁸ Ja' tñigubajk'ajtp ja jaa'y pøn ja Dios yja'ajtpy, jøts ja' tjagyajp amuum yø'öbi jaa'dyi. Ja' tyikjujky'ajtp jøts ja' midu'uk tmimajadaajk ja o'jkin ku ja yjujkpyjky, jødsyim ja jøp'am ejtp tyimy'ity. ¹⁹ Ja Dios Teetyts ja kø'øom tyikjajt jøts ja tyikdiosajjty ja nwindson'ajtim Jesucristo amuum, ²⁰ jøts nay ja' nayide'en tyikjajt nwindson'ajtim Jesucristo køjxp jøts ñamyi'öy'atidit tuki'iyi midì ejtp tuktsajp'agida'aky, jøts yjotkujk'attit wan tjapønidì midì ja'ajttip naxwiñ, jøts midì jap nayide'en tsajpjötpy. Jade'en'ampyts ja yjotkujk'ajtin ja ñamyayi tpaatti ku ja nwindson'ajtim Jesucristo y'ø'jky kruskøjxp.

²¹ Ja mga'öwyinmaa'ñ ja mga'ödyunk ja' meets y'ijty myik'ejtìdip jagam ixkø'øom, jøts m'am mjotp xmi jotma'atti ja Dios; ja Diosts tø myikjotkukiyyidi jøts ja tø xmi jotjimbetti, ²² ja agøjxp ku ja nwindson'ajtim y'ø'jky jøts ja wemp ijxy tyimy'ats'ayo'ombajty ñikøjxp kyubajkp. Jade'en'ampyts ja jade'en ttuuñ jøts meets ja Dios Teety xwingunøjkit ku tø mbøkwyatsnidì, niwine'en mga'ukyikpøky'ejxnidit. ²³ Jade'engøjxpts chøkyi jøts tu'ugyi amumjoojt xyikyø'ödyit ja mjanchja'win tiy'ajtingøjxp. Kidi meets ja xkajøp'ejxni sa tø xnijawidì midì yiknitsokp. Yø'öbi kajpxy yø'öbi ayuujk yikajpxwa'kxp öy sudso ya naxwiñ. Pablo øts jøts øts yam tø nyiktanipiky jøts øts ja jade'en ngajpxwa'kxi ja yja'.

Ku ja Pablo yiktanipiky jøts tpudøkit pøn jaty ja Dios tjanchja'widip

²⁴ Jotkujk øts nnayjawi'y öy mee njagu'ayowi. Nay jade'en ø ñamyayi ja ayo'on nbaaty sa ja nwindson'ajtim Jesucristo ku ja tku'ayo'owiyi'ñ pøn jaty ja janchja'wiyip. ²⁵ Øts tø xaja'aty jøts øts ja nbudøkidit pøn ja Dios tjanchja'widip. Ja' øts ja Dios tø xanipiky jøts meets nmo'ot ka'pxy ja Dios kyajpxy ja Dios y'ayuujk, ²⁶ jøts mee ndukmado'ot midì pøn tkanija'wipnim midì y'ity yu'uch'ejtp, ma windi'ixyip ja jade'en pøn tkanijawi. İxyamts ja Dios ttuknijawiwya'ñ ja jaa'y pøn jaty ja paduujniyip ja yja'. ²⁷ Ja'ats ja Dios ja tuknijawiwya'ñidip ti öy'ajtin idø'on ja yjade'embi yjagyepy jøts ja yikmo'odit pøn ka'israelit jaa'dyi. Jøts ja' idø'on y'ity kayiknija'wip jøts ku ja Cristo ja' mee mjagyajpìp, jøts ja' tyajkp ja jøp'ijxy'ajtin jøts ku nøjxk xpaajtidì ja Dios y'öy'ajtin ja Dios chuj'ajtin.

²⁸ Ja Cristo øøts ja yja' nnigajpxip, jøts øøts niduki'iyi öy pøn ngajpxwijy jøts øø nyik'ixpiky öy pøn, jøts yixxon tñimado'odit, jøts jade'en nidu'uk nidu'uk tñijawidit yixxon ku tmøøt'etti ja Cristo. ²⁹ Yø'øts ø nduñ'ajtpy jøts øts jade'en amumjoojt nnadyamiyøxyi, öy ø nwanjaty, ja'ats nyiktumpy ja Cristo myøk'ajtin midì øts ja xmøøpy.

2

¹ Ja' ø ndsøjky jøts meets xnijawit sa mee ngamijotkuki ku øts ja Dios n'amiduy ja pudøjkin meets køjxp jøts nayide'en pøn jaty tsinaadyip jam Laodicea, nmijotigøøpy øts nayide'en ja nmi'gu'uk pøn ø xka'ijxy'ajttipnim. ² Ja'ats ø ndsøjky jøts xjagyaptit ja tsojkin amumjoojt nixem niyam midì ja Dios yja'ajip midì öy midì tsuj pidsømp, ku ja awejx'ajtin xjagyaptit jøts xja'gyukidit sa xnijawidit ja Cristo pøn ja Dios nugo ajawi ka' pøn

ttuknijawī; ³ ja'ats id'ōn tmōōt'ajtp ja ōy'ajtin ja tsuj'ajtin, ja wejin ja kajin. ⁴ Jade'engōjxp meets ya'at ndukmadōy jōts kidi pōn mwindaay'atyidi pōn tum jaayi tkajpxtip. ⁵ Ōy ō kō'ōm nguidyimyjam'aty, jamts ōts ja nwinmaa'ñ nyik'ity, jōts ndaxondakpy ōts ku ō nnijawī ku ōy yikxon xundi jōts nayide'en ku tu'ugyi xjanchjawidi ja Cristo.

⁶ Paty ja'ayi xu'undit midī tsojkip, sa myiktani'ejxidi myiktaguwanidi ku xjanchja'wiy'okwandōō ja nwindson'ajtim Jesucristo, ja'ats id'ōn tu'ugyi mdū'undip jōts ja jade'en mōōt m'ettit. ⁷ Ja' amuum mnadyagidōkiyidip jōts ja' id'ōn mmōk'ajtin'attip. Ja'axi mjanchjawidip sa ojts myiktani'ejxidi myiktaguwanidi jōts jade'en ejtp ja Dios xukmōjawidit xukunuu'kxyjawidit sam ja tō xnijawidit ku ja ixpōjkin myikmōōdyi.

Ja ōchināa'yin midī yikpatp Cristo kōjxp

⁸ Ōyim mnay'ejx'etidit; kidim ja xmibōkti ja jaa'y pōn mdawin'ōōnwajnidip ja ixpōjkin, midī wenk winmaa'ñ tyikyō'ōdyip uk midī tyiktundip ja tum ja taay; ja' ja' yiktundip sa ja jaa'y chinaa'yindi sa jaa'y wyinmaa'ndyi, ka'axi ja tyikmōjtōjkīyidi ja Cristo yja'.

⁹ Pō ja Cristoxi kō'ōm amuum tmōōt'ajtkōjxp ja Dios'ajtin, ¹⁰ jōts kumi mmōōt'ijtpy meets ja', tits mee mjaaka'ejtxip. Ja' tuki'iyi tjagyajp jōts ka'ap ja pōn myi'abaadyiyi, wan ja mā tyimyatsoondi, wan tjamiku'ku'pyi uk wan tjanajyapi tsajpōtpy. ¹¹ Ku meets ja jade'en xmōōt'ity ja Cristo, tō meets ja űamyayi mbiktaajkxiyi ja ejxa'anin kyunuu'kxingōjxp, ka'apts ja nayide'en tō mbiktaajkxiyidi sam ja israelit jaa'y űadyuñidi. Ja' mee m'ejxa'anin'ajtpy ku xpaatti ja nitso'ok'ajtin jōts ja mbōky mniwā'achidi midī yiktump ku ya naxwiiñ njaa'y'ajtyindi. ¹² Ku ja nōbajtin xpaatti, jade'en meets id'ōn űamyayi ja Cristo mōōt m'ō'jky, jōts nayide'en űamyayi mjujkyōjkti, ja'agōjxp ku tō xjanchjawidi ja Dios, pō ja'axi ja myōk'ajtin majadaajk ku ja Cristo yujkpyijky. ¹³ Jade'en ja ngajpxin, ōōky meets y'ijty myik'ejtniyidi ja mbōky ku ka'anin ja ejxa'an xpaatti, midī yikpatp nwindson'ajtim Jesucristo kōjxp; xjats ixyam ja Dios tō mmō'ōyidi ja jujky'ajtin jōts mee űamyayi mōōt mjujky'aty ja nwindson'ajtim Jesucristo, ja' mee mmaa'kxip tuki'iyi ja mbōky. ¹⁴ Tōts ja Dios tjibiky ja kutujk jōts ka' y'uktunit midī y'ijty myiktanigutujk'ajtip, midī y'ijty xjanch'adsejpidip jōts ja xuktaja'jtyindi ja nbōky jōts adōm ja yiktagubejtyindi. Jade'en'ampy ja Dios ja tyikudigōōy ku ja nwindson'ajtim kyiruspejty. ¹⁵ Ja'ats ja tyamimajadaajk ja miku' jōts ja tō tyik'amutskiyi ja myōk'ajtin jōts ja jade'en ttuk'ixy ttuknijawī ja naxwii'ñit jaa'y.

Jotmay'atti ja Dios yja'

¹⁶ Jade'en'ampyts ka' pōn xmōjpkita'aktit ku pōn mdabayō'ōwya'andit ja mgaajyik ja m'uujkikti, uk ku ja xōōw xkabadundi midī winsamaan jōts midī wimbo'yiktump. ¹⁷ Ja' yō y'ity wya'añ jōts yō tniagjpxy midī menwamp, ya'at tsinaa'yin y'ijty tunkpatp ku ja Cristo kyamiñim ku ja jaa'y ja tjōp'ejxti. Kuts ja tō myiñ, ja' id'ōn tu'ugyi yikjanchja'wiñip. ¹⁸ Kidits ja jaa'y mdukmajt-stu'udyidi ja nwindson'ajtim pōn űadyijyi janch tuda'aky nabyiktaajkidip, jōts wya'andi ku ja ankilis ne'egi yikwindsō'ogit. Ja' űigajpxtip űimadyaktip midī nijuuni kya'ejxtipnim kyamadoodipnim, jōts jade'en ōy űadyamōjpkita'agyidi ja kyō'ōmwinnmaa'ñ. ¹⁹ Ka'ap ja tmōōt'etti ja Cristo, pōn mōj pōn jōp'am, pōn yikmōja'wip, jōts pōn amuum yikjanchja'wip ku ja yja' ja yiknijawī jōts jade'en tyika'pxy'ity ja jaa'y pōn nayide'en myōōpy ja mōk'ajtin, sam ja Dios kō'ōm tō ttanibiktaagi.

²⁰ Pøni janch idø'on ku ja Cristo namyayi møøt tø mjantyimy'ookti, çtigøjxpts ku jade'en mdsinay'adø'øtsti sam ja'ajindi, pøn ja Dios yja' tkabadu-ujnidip? Ja' yikmajadaktip jøts ñadyanigutujk'atyidi ja kyø'øm'ana'amin, ²¹ ku yide'en ñay'ane'emyidi: "Kidi yø' xji'kxy, uk kidi yø yjade'embì xji'kxy, kidi yø xøn." ²² Yø yjade'embì ana'amin, tum ja' yø ñi'ane'empy midì waani ejtp jøts ja ñajxni jade'en sam o ti pikta'aky midì tø tyuñ jøts ja ka' ti y'ukwani, jade'ents ja jaa'y ja kyutujk jade'en ja y'ixpøjkin. ²³ Øy idø'on ja yjawi njantyiyja'wa'ant, jabi øyxi ja yik'ayowim yikpadu'unt tsø'øgi køjxp. Nitits ja kyawa'añ, kaja'ajipxi xpudøjka'am jøts nbøky xniwaajtsint.

3

¹ Jøts kumi tø mee ñamyayi mjujkpyiky nayide'en ku ja nwindson'ajtim Jesucristo yjujkpyiky, ja'agøjxp xjotmay'ajtidit ja nwindson'ajtim yja', pø ja'axi ja Dios Teety amuum tø myø'øyi ja møk'ajtin. ² Ja' ejtp mwinmaa'ñ'attip midì ja Dios yja'ajip jøts ka'ap ja xyikmøjtøkidit midì yä naxwiñ. ³ Jade'ents ngajpxin ku ja Cristo y'ø'jky jøts mee ñamyayi nayide'en tø m'øøky, ka' x'uktatøjkifidit ja ka'øybi midì yä naxwiñ. Ja nwindson'ajtim mee mgøj'ømit'ajtniyidip jøts mee mjujky'aty xemikøjxp ma ja Dios, ⁴ jøts ku ja Cristo kyaxø'økt nayide'ents meets ja wyinaty møøt mgaxi'iky jøts meets nayide'en ja y'øy'ajtin ja xyondaajkin xpaajtiyidit.

Ja øchinaa'yin jøts ja ka'øchinaa'yin

⁵ Paty x'ixmatstìt tuki'iyi ja ka'øybi: ka' pøn amajtskjaa'y tmøøt'att ja wenk yaa'dyøjk uk ja wenk tø'øxyøjk, ka'ap ja axøøk winmaa'ñ xyiktu'undit, jøts nayide'en ka' ti x'ama'at'attit. Jade'en yø tuki'iyi tpaaty ku yø xu'undit ejximdam jeexyip xwindsø'øgidi ja awanax ja agojñax. ⁶ Yø'øgøjxp ja Dios tkexy ja ayo'on jøts ja ttuktagidä'aky ja yjade'embì jaa'y pøn ja kamimadojyiyip; ⁷ jøts ku y'ity ka'anim xjanchja'wiyidi ja Dios yja', tuki'iyi meets yø y'ity nayide'en xun. ⁸ Ixyamts, ixmajtskøjxnidi yø ka'øybi, yø ambøjkin, yø axøøk winmaa'ñ, yø ka'ødyu'unin, yø nawyingajpxnaxi jøts yø ka'øy'ayuujk. ⁹ Kidi mnawyindaay'atyidi, pø tøxi x'ixmatstì sà y'ijty mjaa'y'atti, ti jaty y'ijty mdundip. ¹⁰ Tøts ja Dios myiktigachidi jøts ja yjembyi tø xpadøkidi, pøni sà meets ja yja' xjanchja'wiyi, nayide'ents meets ja myiktigachi kunim yikxon xtyimñijawidit sà ja Dios. ¹¹ Jøts ka' chøkyi wan pøn tgriegitjaa'yi uk t'israelitjaa'yi, wan ja t'ejxa'aninmøødidi uk tka'ejxa'anmøødidi, wan ja abiky ma tsoondi uk wan ja tja'ajidi pøn ja Dios tkanija'widipnim. Yjaja'ajidi ja' pøn tmidundip ja windsøn, uk pøn najtspøki ejttip, tum ja nwindson'ajtim Jesucristo ja' yja', jøts myøøt'ijtpy ja øy pøn.

¹² Mdsojkip meets ja Dios, ja'agøjxp meets ja tø mwi'ixxyi jøts ja tø mja'bikyidi. Tsøønidits yikxon. Yiktundi ja øy'ajtin amuum, ja ayo'ejxin, ja jotwä'añ'ajtin, ja windsøjkin, ja wijy'ajtin jøts ja tuda'aky'ajtin. ¹³ Namyiduda'aky'atidi xem yam jøts namyaa'kxukidi ku pøn ti tyuñ jøts ja myigu'uk tpøky'ixy. Nayide'en xu'undit sam ja nwindson'ajtim Jesucristo mbojkipimee'kxyidi. ¹⁴ Ka'apts ti jade'en sam ja tsojkin sam ja pa'ayo'owin, ja'ats idø'on myiktu'undip, pø ja'axi amuum tsojkip, ja'axi øy ti tyik'øgyaxø'kp jøts niti jadu'uk jade'en abiky kyatsøkyi. ¹⁵ Ja Diosts ja yjotkujk'ajtin, ja Diosts ja xyondaajkin mwinmaa'nmyo'ojidip, pø ja'agøjpxi ja Dios tø mdukpabikyidi ja yja' jøts ja'abi jotkujk'ajtin xyiktu'undit ni'amuki niwine'en ja Dios xja'ajtyindi. Tukmøjawidits tukunuu'kxyjawidits ja Dios.

¹⁶ Jøts ja gyukiyidi yikxon ja nwindson'ajtim Jesucristo kyajpxy ja y'ayuujk jøts ja xwinmaa'ñ'attit. Nadyuk'ixpøkidi jøts nagyajpxjot'amøjkiyidi nixem niyam, ja wejin ja kajin myiktu'undip. Øøjidi ja Salmos, jøts øøjidi ja kunuu'kxkyajpxy jøts jade'en xukmøjawidit xukunuu'kxyjawidit ja Dios. ¹⁷ Ku ti xunwa'andi uk xkajpxwa'andi, ja nwindson'ajtim Jesús myøk'ajtin myik'awajnidip, jøts jade'en'ampy ja xukmøjawidit xukunuu'kxyjawidit ja Dios Teety, ja' myøk'ajtingøjpx.

Sa yjaa'y'attit pøn tjanchja'widip ja Cristo o madsso

¹⁸ Jøts ja tøøxyøjk pøn amajtskti, mimadowdi ja mniyaa'y, jade'en pyaat'atyidi pøn tjanchja'widip ja nwindson'ajtim. ¹⁹ Jøts nayide'en ja yaa'dyøjkmidi pøn amajtskti, yikxon xjagyaptit ja mnidø'øxy. Kidi møøt atsep a'aki mdsøonidi. ²⁰ Jøts u'nk unaj'jkmidi, mimadowdi ejtp ja mdeety ja mdaak, jade'en ja Dios ttsøky. ²¹ Jøts u'nkteety u'nktaak nayide'enmidi, ka' nugo xyik'ambøktit ja m'una'jk jøts kidi t'ayojidi. ²² Jøts pøn midundip, mimadowdi ja jaa'y pøn mwindsøn'ajtip, jøts kidi jaayi nugo nadyiyi myuyj'atti ku ja m'ijxyidi jøts ja jade'en nugo m'øyjawiyidit. Mdu'undipxi dø'øn sam pyaat'atyidi Dios wyindsø'jkingøjpx. ²³ Yikxon xu'undit ku ti xunwa'andi, ja Dios meets ja mdamidumpy jøts kidi ja jaa'yip øy ja' mjayiktuñidi. ²⁴ Tøts xnijawidi jøts ku ja nwindson'ajtim mmo'o'jidi ja øy'ajtin jøts meets ja mdukpaa'dit ja kyunuu'kxin. Kumi Cristo meets ja yja' mdu'unxip, nay ja' meets ja kø'em mmo'o'jip. ²⁵ Pønts ja kya'øbyi tump, nayide'ents ja ka'øy'ajtin ja tikmo'odit. Ka'ap ja Dios ja t'ixy wan ja tjapønidi, tuknax ja tum jade'en ttu'unt pøni sa tø yjaa'y'atti.

4

¹ Jøts meets windsøn pøn ja tunk mtoøt'ajtip, øy yikxon mjaa'y'attit jøts jade'en xyiktu'undit ja mdumbi sam pyaat'atyidi. Ja'myatsti jøts ku ja nwindson'ajtim jap tsajpøtpy midi mee mwindsøn'ajtmip.

² Kidi mjotmondi, ejtp ja Dios x'ajot'attit, ejtp ja øy ti xukmøjawidit xukunuu'kxyjawidit. ³ Amidowdi pøktowdi jøts øøts ja nwindson'ajtim ja nnøø' ja nduu' xyik'awajtsit, jøts øøts ja ngajpxwa'kxiti ja y'øgyajpxy ja y'ømyadya'aky, jøts nayide'en yiknigajpxt wa'ats ja Dios Teety wyinmaa'ñ, sudso ja nitso'ok'ajtin yikpaaty Jesucristo køjpx, ja'axi øts yam mgudsumchinaa'yip, pø ja'axi ngajpxwa'kxpy. ⁴ Ajot'attits Dios jøts øts ja kyajpxy ja y'ayuujk øy pøn nduknija'wiyit sam idø'øn pyaat'atyidi ndu'unt.

⁵ Øy yikxon mjaa'y'attit, migu'ukwa'andi pøn ja Dios yja' tkanija'wip jøts tukmadowdi, kidi ja xøøw ja jumøjt nugo xyikwindigøydi. ⁶ Øy tsuj ja mmadya'aky xyikpidsø'ømdit, jøts mjattip nayide'en ja adsojimbejtik sa nidu'uk nidu'uk øy pøn x'adso'odit.

Ku kyajpx'abaqadiwya'qñ jøts ja kajpxpoo'kxin t'ukyajkni

⁷ Ja nmigu'uk Tiquico meets jam mdukmadowip sa øts yam. Janch øy yø pyudøki, janch tsuj tmiduñ ja Dios. Tø øts yø nmøøtwidity. ⁸ Paty meets ja yam ndaniguexy jøts ja mgajpxjot'amøjkiyidit, jøts ja nayide'en mdukmadowidit sa øøts yam. ⁹ Ja Onésimo ja jam møøt ñijky, adøm ja nmigu'uk pøn amumjoojt tpaduujnip ja Dios yja'. Meets yø' mjaa'y. Yø'øts meets ja mdamimadya'agip ti yam tuujnip jajtip.

¹⁰ Jøts øts ja nmigu'uk Aristarco pøn øts yam nmøøtsumchinaapy, ja' yam nayide'en mdanigaxidip ja kajpxpoo'kxin, jøts ja Marcos nayide'en ja yja' tkajxmi, ja Bernabé ja myigu'uk. Tøts ja myiktukmadowdi ja Marcos;

pøni mbaajtidip jam, øy yikxon xkupøktit. ¹¹ Nayi mgajpxpoo'kxidip ja Jesús pøn nayide'en yiktejp Justo. Yø'øyi dø'øn israelit jaa'y'ajttip pøn tmidundip ja Dios, pøn ø tø nmøøtundi, jøts yø' øts yam njanchtajotkujk'ajttip.

¹² Nayi mdanigajxidip ja kajpxpoo'kxin ja Epafras pøn ja nwindson'ajtim tmidump, nay meets ja mjaa'y. Ejtp ja mni'amidowiyidi mnibøktsowiyidi ku Dios ja t'ajot'aty jøts tu'ugyi øy yikxon xpanøjkxtit ja Dios, uk amuum mnadyamiyoxidit jøts ja xu'undit sa ja ttsøky. ¹³ Kumi wa'ats ø n'ixy nnijawi sa ja Epafras mdajotigøyi, jøts nayi tyajotigøøpy ja nayide'en pøn tsinaadyip jam Laodicea kajpkøjxp jøts jam Hierápolis kajpkøjxp. ¹⁴ Nayi mgajpxpoo'kxidip ja Lucas, pøn tsøyip jøts nayide'en ja Demas.

¹⁵ Kajpxpoo'kxtits adøm ja nmigu'uktøjkti pøn ja Dios ja'ajtidip midi tsinaadyip jam Laodicea, jøts nayide'en xkajpxpoo'kxtit ja Ninfas møøt ja'adi pøn ja Dios tjanchja'widip, pøn jam namyujkidip ja' tyøjkjotp. ¹⁶ Ku yø nøky x'uk'ejxkøxtit winets ja xanigaxtit jøts wan t'ejxti pøn ja Dios tjanchja'widip jam Laodicea, jøts meets ja nøky nayide'en x'ejxmit midi jam tso'omip.

¹⁷ Jøts nøjmidi ja Arquiipo jøts ku ka'pxy tpadu'unt sa ja nwindson'ajtim tø tyunkmø'øyi.

¹⁸ Øts njaapy ya'at kajpxpoo'kxin jøts meets ja ndaniguexy. Jøts xja'myatstibim øts ku Dios x'ajot'attit jøts ku øts yam ndsumy'ity. Dios mgunuu'kxidip. Jade'en idø'øn ja yjatt.

JA MYĪDU'UKPI NØKY MIDI JA PABLO TYANĪGAJX JA TESALÓNĪKT JAA'Y

Ku ja Pablo tñijayi pøn ja nwindson'ajtim tjanchja'widip

¹ Pablo ø nxøw, jøts øø yam nguejxpy ja nøky møøt ja Silvano jøts møøt ja Timoteo, jøts øøts ja ndaniguexy pøn jaty tjanchja'widip ja Jesucristo yja' jam Tesalónica kajpkøjxp, pøn møøt amumjoojt t'etti ja Dios Teety jøts møøt ja nwindson'ajtim Jesucristo. Nay ja'ats amuum mgunuu'kxidip jøts ja jotkujk'ajtim mmo'ojidit møøt ja nwindson'ajtim Jesucristo.

Ku ja Tesalónikīt jaa'y tyiktaañ ja ejxpajt sa ja Dios yikjanchjawi

² Ejtp øøts ja Dios ndukmøjawi ndukunuu'kxyjawi ku meets ja xjanchjawi, jøts ku øøts ja Dios n'ajot'aty ejtp mee nja'myech. ³ Ku mee ngajpxpaaty ku øøts ja Dios n'ajot'aty ka'ap øøts ja nja'dyigøy ja m'øy'ajtindi, sa ja tsojkin ja pa'ayo'owin xmøøt'atti, jøts sa ja ajot'ajtin møk'ampy xjagyapti jøts xjøp'ejxti ku mye'ent jadigojk ja nwindson'ajtim Jesucristo. ⁴ Meets migu'uktøjkti, pøn jaty ja Dios janchja'widip, Dios mee mdsojkip jøts nay ja' tø mwi'ijxyidi jøts mee mnitso'ok'att. ⁵ Jade'en'ampy øøts nnijawi ku øøts jam ojts ja Dios y'øgyajpxy ja y'ømyadya'aky ngajpxwa'kxiyi mā meets jam, kidi øødsip ja ojts jade'en nugo ngajpxy, pø jamxi ja Espiritu Santo ja myøk'ajtin ja tmøødiyi jøts ja jade'en wa'ats yiknijawit jøts ku ja'abi kajpxy jøts ku ja'abi ayuujk tyiyi yjanchi. Wa'atsxi xnijawidi jøts ku øøts ja nduñ, kidi øødsip ja kø'øm nadyamiduujnip pø ja'agøjpxxi øøts ja nduñ jøts meets ja xyiktu'unt.

⁶ Ja Espiritu Santots mee mmøøjyip ja xyondaajkin jøts meets ejtni xoni xkupøkti ja Dios y'øgyajpxy ja Dios y'ømyadya'aky øy meets ja kawine'en tø xkuwanjati. Xjats meets nayide'en xuiñ sa tø xpa'ejxti ku øøts ja ayo'on nmidani midi ja nwindson'ajtim tø ttunjøpi. ⁷ Xjats jade'en tø mbidsømdi jøts ejxpajt mwa'andi jøts ja mni'ejxu'udyidi niduki'iyi pøn jaty ja Dios tjanchja'widip, pøn jam tsinaadyip Macedoniit jøts jam Acayit etjotp. ⁸ Jade'ents idø'on ja Dios y'øgyajpxy ja y'ømyadya'aky tø xyikwa'kxiyidi, jøts kidi jamyip meets ja jade'en nugo tø xuiñ Macedonia uk jam Acaya, yiknija'wip yø o madsoo jøts ku meets ja Dios amuum xjanchjawi. Ti sa øø njaakwa'ant, ti øø njaaknikyajpxp. ⁹ Ja'axi ja kø'øm tmadyaktip jøts ku øøts jam ojts n'øch mā meets jam jøts y'øyja'widip ja' sa meets jam ojts xkupiky, jøts øy ja yikxon tñimadya'akti sa mee xmajtstuupty ja'abi winmaa'n midi ja Dios kyaja'ajip, jøts ku ja Dios tu'ugyi tø xpabøjkpinaxwa'akti pøn xemikøjxp ejtp, pøn tu'ugyi Dios'ajtp. ¹⁰ Jøts ñayiñimadyaktip ja nayide'en sa meets nwindson'ajtim Jesús xjøp'ixy jøts ku ja jadigojk wyimbett jap tsajpjøtpy ja Dios U'nk, pøn ja Dios Teety tyikniwaajts ja o'jkin jøts ja tyikjujkyjky. Ja'ats adøm idø'on xuknitso'ok'ajtindip ja' ayo'on midi memp midi wingomp.

2

Sa ja Pablo kyajpxwa'kxy jam Tesalónica

¹ Mnija'widipts migu'uk ja'adi, jøts ku øøts jam n'ats'øjch mā meets jam, ka'ap øøts ja nxøw nugo wyindigøøy. ² Øy øøts jam wyinaty Filipit kajpkøjxp tø nyikjemduñ, mnija'widipts ja wa'ats jøts ku øøts ja Dios tø xjanchpuðøki jøts øøts ja kyajpxy jøts øøts ja y'ayuujk ja tø nyiknajxyi amumjoojt midi xyiknitso'ok'ajtindip, jøts meets ja tø myiktukmadøy yam idø'on ja tsep

yjanchjatuñi. ³ Jøts ka'ap øøts ngajpxigø y ti jaty øøts ojts ngajpxwa'kxy, jøts kidi wenk winmaa'ñip øø njagyeypy ku øøts jam jade'en ojts ngajpxy jøts nika' myikwin'øøndi. ⁴ Pø tiy'ajtinxi yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midy yiknitsokp, jøts jade'ents øøts ja tø ngajpxnaxy. Jøts ni ka'ap øøts ja n'ixa'ay jøts øøts ja kuwani ndy-imyikta'øy'ext uk ndyimyiktakajxa'akt, pø ja Diosxi yikmidump jøts ja'ats tu'uk tu'uk t'ejxp sa jaty pøngapøn yjaa'y'aty. ⁵ Jøts mnija'widipts ku øø ka' nugo ngajpxy sa jaty ojts myiknøjmidi jøts nigidi taayip øø n'ixaapy sudso øøts ja meen nbøkt. Ja Dios yø tnija'wip jøts ja' yø t'ejxp. ⁶ Niwindii øø ngawa'añ jøts øøts ja jaa'y xwindsø'øgit, wan meedsy uk øy tyimyjapøni. Xpaat'ajtpimts øøts, øy øøts ja jeexyip jade'en tø nduñ jøts meets jeexyip ja nwindson'ajtim Jesús kyutujk møk'ampy tø ndanipiky, pø ja'axi øø nbadumpy. ⁷ Ka'ap øøts jade'en tø n'adi'ich; øy yikxon mee tø nmiyujy'aty sam ja u'nktaak tyikyeeky tyiktsø'øky uk t'ejx'ity ja y'u'nk ja y'una'jk. ⁸ Njanchøjkpy meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'o'jkipaat meets jeexyip ja'agøjxp ku ndsokti ja'agøjxp ku nba'ayowdi. ⁹ Mee migu'uktøjk, wa'ats inet xja'myatsti sa øøts y'ijty nduñ nbiky, sa øøts nnamiyiwinnmaa'mbyaadyi jøts øø nbaaty ja nidsinaajyk. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios jø'y'ayuujk.

¹⁰ Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'ejxwa'añ. ¹¹ Jøts mnayi mnija'widip nayide'en sa nidu'uk jaty tø myik'ayo'ejxti ku myikajpxjot'amøjkidi, jade'en sam ja jaa'y ja ty-eety yjagyepyyi. ¹² Tøxi myiktukmadowdi jøts ku øy yikxon mjaa'y'attit sam pyaat'aty pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk ma ja amuum xyiktuujnidit ja myøk'ajtin, ja y'øy'ajtin jøts ja xyondaajkin.

¹³ Ja'agøjxpts øøts idø'øn ja Dios ja ndukmøjawi ndukunuu'kxyjawi ku meets ja kyajpxy ku meets ja y'ayuujk ja ojts xmadojyiyi midy mee ndukmadoow. Ojts ja xjanchkupøkti jade'en jøts ku ja Dios ja tja'aji, kidi nugo jaa'yipxi ja' yja'. Jøts janch tiy janchts idø'øn ja', jøts ku ja Dios ja tkajpxy jøts ku ja Dios ja t'ayuujki, jøts ja mbudøkiyidi pøn jaty ja tjanchja'widip.

¹⁴ Mee migu'ukti, ku tø xku'ayo'ombaadidi ja Dios, kawine'en ja mmigugajp tø mdagubetyidi, nayide'en tø mjatti sam ja jaa'dyi pøn ja Dios tjanchja'widip pøn ja nwindson'ajtim Jesucristo tjanchja'widip pøn tsinaadyip jam Judea, pø nayide'enzi ja tø yjatti, nayide'en ja myi'israelit jaa'y ja kyamee'kxyidi.

¹⁵ Yø'øbi israelit jaa'yts idø'øn tyik'oo'ktøø ja nwindson'ajtim Jesús. Nayide'en ttungojmidi sam ja tø tyik'ookti ja kyø'øm migu'uk pøn jaty ja Dios kyugajpx'ajtpy, jøts øøts ja tø xpawøpy. Niwine'en ja Dios ja tkayikjotkujk'atti jade'en, jøts yjanchtumwenk'ejxtip ja jaa'y øy pøn, ¹⁶ jøts ku øøts ja Dios yja' njadukmadoowa'anmiyi pøn ka'israelit jaa'dyi jøts ja ñitso'okti, ka'ats øøts ja jade'en xuktunwami. Xjats jade'en ja pyøky nugo tyikmiweni'adø'tsti. Xyamnimts inet ja Dios ja møk ayo'on tø tyuktageida'agidi.

Ku ja Pablo øy tjapaatwa'añ jadigojk ja Tesalonikit jaa'y

¹⁷ Mee migu'uktøjk, ku ojts nnawya'kxyindi jøts waani ñajxy ja et ja xøøw, nja'myajts'ijtpyim meets øy mee njaga'ijxy jøts øøts njanchja'atsnøjkxwa'añ kawinaak ojk jøts mee n'ats'ext. ¹⁸ Ojts øøts njadyimya'uktsøøñ; øts meets jam kø'øm kawinaak ojk tø njadyimy'ats'ejxwa'añ, jaty jatyits øøts ja mikul'

xyiktuu'duky jøts øøts jam nganiijkxy. ¹⁹ Jøts tigøjxp øø nxonda'aky, ti øøts idø'on ndaxondakpy, ti øøts idø'on njøp'ijxpy, ti øøts idø'on ndajotkujk'ajtpy, pø meetsxi dø'on ndajotkujk'ajtpy ku mye'ent ja nwindson'ajtim Jesucristo. ²⁰ Meetsxi dø'on ndajotkujk'ajtpy ku øø nxonda'aky.

3

¹ Jade'en'ampy øø tø nwinmay jøts øø nda'ant yam Atenas kajpkøjxp ku øø ka' n'ukmajadaḱni, kumi ka' øø n'ukmidanaañi jadine'en ja jøtmay, ² paty øø tø nguexy tu'uk ja nmigu'uk pøn jam tø m'ats'ijxyidi. Timoteo øøts nguexy, ja'axi ja Dios tmidump jøts ejtp øøts ja tø nmøøtuñ ku øøts ja nwindson'ajtim Jesucristo y'øgyajpxy ja y'øy'ayuujk tø ngajpxwa'kxiyi midi ja nitso'ok'ajtin tyajkp, ja'ats mdukmadowidip jøts ja mgajpxjot'amøjkiyidit jøts ja m'ajot'ajtin tu'ugyi xyik'ettit, ³ jøts jade'en ka' pøn t'ixmatst øy idø'on ja tsep jade'en y'ity. Wa'atsxi kø'øm xnijawidi jøts ku jade'en ja ayo'on nbaajtindit. ⁴ Jøts ku øø nay jam wyinaty møøt meets, ojtsxi øø nnigajpxy jøts mee ndukmadø jøts ku n'amjajtindit ndsaachjajtindit; tøts xnijawidi jøts ku jade'en tø yjanchjaty. ⁵ Paty øts, kumi ka' øts jadine'en n'ukjotkujk'ajtni, ja'agøjxp mee tø ndaniguexy ja jaa'y jøts ja tyiktø'øt sa ja mjanchja'win xyik'etti, ja'ats ø ndsø'jkip uk wan meets ja miku' tø mduktuñidi ja yja' jøts jeexyip ja Dios kyajpxy jade'en nugo ñiwyindigøy sa meets ja ojts njadukmadøy.

⁶ Tøts ja Timoteo wyimbity jam Tesalónica jøts ja yam tø tmija'aty ja kajpxy ja ayuujk midy yikjotkujk'atyim jøts ku meets ja janchja'win møj xjagyepy jøts xyiktuujnidi xem yam ja Dios chojkin. Yide'ents ja yam wya'añ jøts ku meets ejtp xja'myech, jøts ku nayide'en ja tsojkin xjagyajpti jøts øø xjapaatwa'añ nayide'en sam mee nja'ejxwami. ⁷ Ñiyjot'amøkpøjpk øø migu'uk yjawi, ku øø nnimadø jøts ku tu'ugyi ja Dios xjanchjawidi, yam øøts idø'on yjawi yide'en tsep'agujkpy njaty. ⁸ Ku øøts jade'en nnimadøy jøts ku ja Dios tu'ugyi amumjoojt møøt m'etti, jade'en øø nnayjawi; tyimxyajimbejtp øøts yjawi. ⁹ Ku meets jade'en xuñ, øy øøts ja Dios møj njanchtamøjawi ku meets jade'en xpadundi ku jade'en xwindso'øgidi ja Dios. ¹⁰ Xjats øøts yide'en xinaxy tsunaxy ja Dios n'amidøy jøts mee ndyimy'ats'ext, kø'øm ndyimy'atspaattit, jøts ka'pxy myiktukmado'odit ti jaty mjaaka'ejtxidip jøts ja mjanchja'win tu'ugyi t'ettit.

¹¹ Ja' øø ndsøjkpy jøts øøts ja Dios Teety, jøts øøts ja nwindson'ajtim Jesucristo xpudøkit jøts øøts jam nnøjkxt jøts jam m'atsyik'ejxtit. ¹² Nay ja Diosts myikmøjta'agiyidip ja mwinmaa'ñ jøts ja tsojkin møj xjagyaptit nixem niyam, jøts xminamyayidit øy pøn møøt nayide'en sam mee myiktsoktin sam meets ja tsojkin ndamijagyapi. ¹³ Nay ja Dios Teety mmo'ojidip ja myøk'ajtin jøts xmīdanidit ku sa mjattit, jade'ents ja mja'bikyidi jøts mgapøky'ijxyidi ku ja nwindson'ajtim Jesús jadigojk mye'ent møøt niduki'iyi pøn jaty ja Dios ja'ajtidip.

4

Sa ja Dios xajotkujk'ajtint

¹ Ixyamts øø migu'uk nnigajpxy jøts mee myiktukmadowdi ja nwindson'ajtim Jesús y'ana'amingøjxp: jøts ku jade'en xun'ettit sa øøts ojts nyik'ixpiky jøts ku mdsøonidit mdanidit jade'en sa ja Dios ttajotkujk'aty. Tun'ettits meets ja jade'en.

² Mnija'widipxi ja ana'amin midy myikmøødyi, midy øø tø nnigajpxy ku jade'en tyikutuky ja nwindson'ajtim Jesús. ³ Ja' Dios chøjkpy jøts ja

tu'ugyi xnadyamiyoxidit; jøts kidi nugo mnamyøøt'atyidi põni ka'adam ja xniyaa'yidi põni ka'adam ja xnidø'øxyidi, ⁴ ku põn y'amajtskiwya'añ, ka'ap ja patki'iyi nipøn tø'øxyøjk tkamøøt'att. Ja' øy wa'ats pidsømp jøts ja jade'en kø'øm ñawyindsø'øgyi. ⁵ Jøts kidi nugo mbøkti ku mnachuj'ijxyidi ja'ayi sam ja jaa'y y'adi'ichin põn ja Dios tkanija'wip. ⁶ Kidi põn ja myigu'uk ñidø'øxy twin'øø'nidi, møk nwindson'ajtim mdagubatudit, pø tøxi øø nnigajpxy. ⁷ Ja'ats adøm ja Dios tø xanibiktaajka'am jøts adøm øy tsuj njaay'ajtindit. Ka'ap ja jade'en wya'añ ja Dios jøts ja kya'øbyi ndu'unint. ⁸ Jade'ents idø'øn, põni põn yø'øbi ixpøjkin tkamøjpiktakp kidi myigu'ugip ja jade'en wyinaty tyumpy, ja Dios idø'øn ja wyinaty jade'en kyamimadøøpy, põn adøm ja y'Espiritu Santo tø xmø'øyim.

⁹ Wine'en ja tsojkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit. ¹⁰ Ejtp meets ja mmigu'uk jade'en xminamyayi põn ja Dios tjanchja'widip jam Macedonia. Ja'ayi ø nugo nnigajpxy jøts ja n'øyjaa'y'ajtin møk xjaakyik'awa'andit, jøts myøjit ja m'amigu'uk'ajtindi. ¹¹ Øy jotkujk idø'øn mdsøønidit mdanidit, ja mdunk ja mbøjk ja idø'øn mjotmay'attip pø jade'enxi øø nxumiwa'añ, ¹² jøts ja abikpyi jaa'y mwindsø'øgyidit jøts kidi ti mga'ijtxyidi.

Sa ja nwindson'ajtim jadigojk mye'ent

¹³ Mee migu'utøjk, ka'ap øø ndsøky jøts jadi'iñi mdä'andit, ni xkanijawidinim sa yjatt añmi'oo'kpi, jøts kidi jade'en mjotmay'ookti sam jadu'uk yjotmay'ooktin põn ka' ti awejx'ajtin tjagyapti, põn tkanija'widip ja Dios. ¹⁴ Pøni nmibijkyimts adøm ja Jesús ku ja tø y'øøky jøts ku ja tø yjujkyiky jadigojk, sudsots adøm ja ngamibøjkim jøts ku ja Jesús jadigojk wyimbett ku ja Dios Teety ja møøt tyikjujkyøøkt ja añmi'oo'kpi põn jaty ja wyinaty tø 'atsjanchjawiyidi.

¹⁵ Paty idø'øn myiktukmadowdi nwindson'ajtim y'ixpøjkingøjxp, jøts ku adøm, põn jaty wyinaty juky'ajtipnim ku ja nwindson'ajtim mye'ent, kidi adømip tyimyjawyenygojindip jøts nika'anim ja' põn tø y'ookti. ¹⁶ Pø kø'ømniimxi ja nwindson'ajtim kyida'akt jam tsajpjotp jøts ja kyajpxt kyutujkingøjxp, jøts ja kyajpxt sam ja møj ankilis, jøts ja pujxuujx ja tyiktu'unt midu ja Dios yja'ajtpy. Winetnimts ja yjujkyøøktit jawyeen põn tø t'atsjanchjawidi ja Cristo, põn tø y'ookti tyigøydi; ¹⁷ jøtsnim adøm põn juky tändipnim jaanimts adøm ja møøt nnøjxindit yootsjøtpy ma ja nwindson'ajtim nminabyaajtindit jam tsajpwemp. Jøts ja nwindson'ajtim jade'en xemikøjxp nmøøtjujky'ajtindit. ¹⁸ Paty mjadyimñagyajpxjot'amøjkiyidit xem yam, yø'øbi kajpxy yø'øbi ayuujk myiktu'undip.

5

¹ Migu'uktøjk, ka' chøkyi jøts ø nja'at ti xøøw ti jumøjt mye'ent ja nwindson'ajtim. ² Wa'atsxi meets ja xnijawi jøts ku ja nwindson'ajtim yja'att jotmøn tu'ukpi xøøw, yam ja wyinaty ka'ap põn tjøp'ixy. Jotmøn ja mye'ent sam ja maa'tspi koots y'atsmiñ. ³ Ku jaa'y wya'andit: "Jotkujk ixyam, ka' ti tyuñi, ka' ti kumay", winets ja jotmøn tyaja'atpatidit jøts ja ayo'on myo'ojidit møk, jade'en tyaja'adidit sam ja tø'øxyøjk y'u'nkpiyin põn ja y'u'nk tnikøjxp'ajtp jøts niwine'en ja chookin ja tkapaattit. ⁴ Jøts meets migu'uktøjk, ka' meets mwimbeedsu mgugoodsu. Me'emp ja juuni xøøw ja nwindson'ajtim jøts ka' nugo jotkumoni mbaadiyidit ejxim ja jaa'y

adsu'jky yikwimeech. ⁵ Pø Diosxi mjagyajpidip jøts adøm wimbeets kugoots nga'ijtyindi. ⁶ Paty ka'ap jade'en nugo njotmo'onindit sam jadu'ukpi y'adø'tsta'an, njøp'ejxindip idø'on ja' wijy kejy. ⁷ Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mujkip kujxip, nay ja' ja yikmajadakpy. ⁸ Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njanchja'windit amumjoojt ja Dios yja' jøts nnachojka'andit nnamyajya'andit. Jade'en idø'on nnadyagubojka'andit ja Dios yja' ejxim ja soldadi ñadyagubøkya'an ja pyujx jøts ja nisa kyajaty. Jøts njøp'ejxindip adøm ja nitso'ok'ajtin, jade'en idø'on ja ñamyayi tpaaty sam ja soldadi pyujxkujup midi ja kyubajk ja adanaajiyip. ⁹ Pø kidi ja'ajipxi adøm ja Dios tø xanibiktaajka'am jøts adøm n'ayo'ombaaajtindit, pø ja'axi ja chøjkpy jøts adøm ja øy'ajtin nitso'ok'ajtin nbaajtindit nwindson'ajtim Jesucristo køjxp. ¹⁰ Adømxi ja nwindson'ajtim Jesucristo tø xku'o'jkindi jøts adøm ja møøt njuky'ajtindit. Nbaajtmpxi ja' xemikøjxp øy njadyimyjajuky'ajtyindinim uk øy wyinaty tø njadyimya'o'jknandi. ¹¹ Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaay tkajpxwijy pøn tø tjanchjawidi ja Dios

¹² Migu'uktøjkti, ndukmadoodip ixyam jøts waani xwindsø'ogidit pøn ttundip ma meets jam, pøn jam nduu'møøjiyidip, pøn jam mda'ana'amidip ja nwindson'ajtim yja'. ¹³ Øy tsuj xaxonda'aktit ku jade'en tyundi, yiktundi ja tuda'aky'ajtin, yikxon namyiyujy'atidi nixem niyam.

¹⁴ Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemdundi yiktedundi, pudøkidi pøn waani jot'amutsk'ajtpnim jøts tuda'aky mjaa'y'attit øy pøn møøt.

¹⁵ Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'odyuñin. Tum ja y'øbyi ne'egi ejtp mdu'undip. Øy xwindsø'ogidit ja mmigu'uk nixem niyam jøts nayide'en øy pøn møøt.

¹⁶ Øy jotkujk m'ettit. ¹⁷ Ajot'at'etti ja Dios Teety. ¹⁸ Pøni ti jaty tuujnip, tukmøjawidi tukunuu'kxyjawidi ja Dios, yø' ja Dios chøjkpy jøts meets jade'en xu'unt pøn jaty tjanchja'widip ja nwindson'ajtim Jesucristo.

¹⁹ Kidi ja Espíritu Santo xyiktuu'dujkidi ja myøk'ajtin midi meets ja mdunwa'anxiiyip mjuky'ajtingøjxp. ²⁰ Jøts kidi xkagupøkti ja mmigu'uk pøn amuum kunuu'kxip ja Dios jøts ja tkajpxi ja Dios y'øgyajpxy ja Dios y'ømyadya'aky. ²¹ Yikxon tuki'iyi x'uk'ejxtit, jøts midi øy, ja'ats mbaajtidip.

²² Ixmajtskøxti ja kya'øbyi.

²³ Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaa'y'ajtindi kunim ja nwindson'ajtim Jesucristo wyinaty myiñ. ²⁴ Pø tøxi ja Dios mw'i'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajpxpoo'kxni ja myigu'uk

²⁵ Migu'uktøjkti, ni'amido'owik øøts, nibøktso'owik øøts.

²⁶ Yiknajxidik øøts ngajpxpoo'kxin jøts ja mmigu'uktøjk xkajpxpoo'kxtit sam ja Dios tsøkyin.

²⁷ Jøts nayide'en ndanipøkti Dios y'ana'amingøjxp, jøts ya'at nøky kuk-mado'odit niduki'iyi ja mmigu'uk pøn ja Dios tjanchja'widip.

²⁸ Mgunuu'kxidip ja nwindson'ajtim Jesucristo. Jade'en idø'on ja yjatt.

JA MYĪMAJTSKPI NŌKY MIDI JA PABLO TYANĪGAJX JA TESALŌNIKĪT JAA'Y

Ku ja Pablo tñjayi pøn ja nwindson'ajtim tjanchja'widip

¹ Pablo ø nxøw, jadu'uk txøw'aty Silvano jøts jadu'uk Timoteo. Ja' øts ya'at nøky ndanija'ayidip pøn jaty ja Jesucristo tjanchja'widip jam Tesalónica kajpkøjpx, pøn ja Dios Teety møøt y'etti jøts møøt ja nwindson'ajtim Jesucristo. ² Paatti kupøkti ja Dios Teety y'øy'ajtin ja Dios Teety kyunuu'kxin midi ja yajkpy møøt ja nwindson'ajtim Jesucristo.

Tyĩdyu'ump ja Dios Teety pøn tø kya'øjja'y'aty ku ja nwindson'ajtim mye'ent

³ Migu'uktøjkti, pøn jaty ja Dios tjanchja'widip, ejtp øøts ja Dios ndukmøjawi ndukunuu'kxyjawi meets køjpx sam idø'on pyaat'aty jøts øøts jade'en ndu'unt. Møjy y'adøjtsidipxi ja mjanchja'windi jøts nayide'en ja tsojkin midi ja Dios mmøøjyidip jøts ja mmigu'uk xtsoktit xpa'ayo'odit. ⁴ Xondakp øøts, xjats øøts jade'en nnimadya'aky mā jaty ja Dios tjagyepy ja yjaa'y, jøts meets jade'en myiknimadya'akti ku tudā'aky mjaa'y'atti jøts ku ja mjanchja'win xyikmajada'akti øy m'amjatti mdsaaehjatti uk ja ayo'on xpaatti. ⁵ Jade'ents yø yikja'gyuki jøts ku ja Dios ka' nugo tya'oo'kpety ku tyĩdyuñ, m'ejxip meets ja' jøts ku mee mbaat'aty jøts meets ja myiktøkiyidit mā ja kyutujk ja ttanitani ja yjaa'y, pø ja'axi dø'on ixja mgu'ayo'owidip.

⁶ Paat'ajtidipts ja' ku ja Dios yik'ayøyiidi pøn mga'ødyuujnidip, ⁷ jøts ja myikpoo'kxidit tuknaž møøt øøts, ja'abi xøw ku ja nwindson'ajtim Jesús wyinaty myiñ, ku tsajpjøtpty tmigida'akt ja myøk'ajtim møøt y'ankilistøjk. ⁸ Ja' ja ñime'emp jøts ja ttiidyu'unt pøn ja Dios tkamøja'widip ni tkabaduujnidi ja y'øgyajpxy ja y'ømyadya'aky. ⁹ Xemikøjpx ja nøjkx tyimgyudigøydi, jade'en ja yiktiidyu'undit jøts ja jagam yikpikta'aktit mā nwindson'ajtim ja kya'ejxidit, mā ja tkapaajtidit ja y'øy'ajtin ja myøk'ajtin ku ja mye'ent. ¹⁰ Ku dø'on ja nwindson'ajtim mye'ent ja'abi xøw jøts ja wyindsø'øgiyit pøn jaty ja yja'ajtpy jøts ja kyajxa'agiyit niduki'iyi pøn jaty ja janchja'wiyip, tøts meets ja xjanchjawi midi øø tø nnigajpxy ku ja tø myiktukmadowdi.

¹¹ Ja'agøjxpts meets idø'on ejtp nni'amidowi nnibøksowi, jøts øø n'amidøy jøts øø nbøksøy ja Dios jøts ja m'øy'ejxidit, pø tøxi ja kø'øm m'a'ejxiyidi; jøts nayi n'amidøopy øøts jøts nayi nbøksøopy øøts jøts ja Dios ja myøk'ajtim tyiktu'unt jøts ja jade'en tyik'amøjatt sa meets ja tsojkin xjagyepy ku xunwa'andi midi tum øy jøts midi ja Dios mdamidundip. ¹² Ku jade'en xyiknaxti ku jade'en mjujky'atti, jade'en idø'on ñamyayi ja nwindson'ajtim Jesucristo xwindsø'øgidi, amuumts ja Dios Teety, amuumts ja nwindson'ajtim Jesucristo ja y'øy'ajtin mdakajxa'agidit.

2

Ja' pøn møj pøkyump

¹ Mee migu'uktøjk, ku dø'on ja nwindson'ajtim Jesucristo myenwa'ant ku ja nminabyaajta'andit, ja'ats øts yam nnigajpxwampy, ² jøts kidi nugo mwinmaamyā'atti, ni xkatsø'øgidit paat ja' ku ja wenk kajpxy wenk ayuujk myiktukmadowdi jøts ku ja Dios ja tyaky, uk xmadowdi ja ka'ama'ayin,

uk myiktanigaxti ja nõky, ñadyijyi jade'en tpiкта'akti jøts ku øøts ja nguexy, ñadyijyi wya'andi jøts ku tø yja'aty ja et ja xøøw ku ja nwindson'ajtim myiñ. ³ Niwine'ents ja yjade'embì taay xkamibøktit. Kuts idø'on ja et ja xøøw wyinaty kya'pxwani, jawyeen ja yide'en yjatt, tum midsep ja Dios yik'ejxnit, ka'ap ja y'ukyiktsojknit. Ja dø'on kyaxø'økt ja yikpøktymbi pøn ja xemikøxpit kudigø'øyin tø yiktanibiktaajkiñi. ⁴ Ja' idø'on ja Dios tmidsep'ajtp, ja' ja tka'øyja'wip tuki'iyi midì jaty ja Dios yja'ajtpy, uk midì jaty paat'ajtip jøts ja yikwindsø'øgit. Ja'atp paat ja jap tsaptøjkjøtpy midì ja Dios yja'ajip jøts ja jap y'ixa'akt sami Diosin. Ja' kø'øm nadyejip jøts ku ja Diosi.

⁵ Ku njam'ajty mã meets jam, zkidi ja xja'myatsti ku øts yø ojts nnigajpxy? ⁶ Jøts wa'ats meets ja xnijawì tigøjxp ja yjaakta'ani, jøts ja ka' tsojk kyaxi'iky ku ja et ja xøøw ka'anìm tpaat'aty. ⁷ Jaanits ja' midì ja ka'ødyumbi yja'ajtpy kuuyi ja ja'ayi yjiwa'akt midì ja tyik'amøjkip. ⁸ Jøts ja jatyì kyaxø'økt, ja nwindson'ajtim Jesús ja tyik'lookp, ja'ayi ja tpiXujt. Jøts ku ja mye'ent amuum kudøø'kx møøt, ja'ayits ja tyukttagudigø'øpy. ⁹ Ja' midì idø'on ja'atp, ja miku' ja' yja' jøts ja' tmija'atp ja møk'ajtin, jøts ja yikxon tmija'att ja taay jøts ja nadyijyi tnankyja'ejxit ja y'ijxyimbi kya'ijxyimbi. ¹⁰ Jøts ja tum ja ka'øybi ja tyiktu'unt jøts ja jade'en twindaay'att pøn nøjkx windigøødyip, tøxi tkawa'andi ja tyiibyì ja yjanchpi midì yiknitsokp. ¹¹ Xjats ja Dios ja nayide'en tyikjaty, wan jade'en tyikwindaay'atti ja'agøjxp ku tø tyundigøydi jøts ja tjanchjawidi jade'en ku yikwindaayidi, ¹² jøts jade'en niduki'iyi yiktabayø'ødyit ja pyøky, tøxi tkatijjawidi tkajanchjawidi midì tiy midì janch. Ja' ne'egi chojktip tyumjaka'øybi.

Tø ja Dios ttanibiktaagi jøts ñitso'ok'attit ja Tesalónikit jaay

¹³ Meets køjxp øøts ja Dios ejtp ndukmøjawi ndukunuu'kxyjawi, mee migu'uktøjkti wine'en ja nwindson'ajtim mdsøky'atyidi. Patki'iyipxi ja Dios tø mdanibiktaagiyidi jøts mnitso'ok'attit, ja'agøjxp ja Espiritu Santo wa'ats myik'ijtyidi jøts ku nayide'en tø xjanchjawidi ja tyiibyì ja yjanchpi. ¹⁴ Jade'en'ampy ja Dios tø mjotøkiyidi ku øø tø nnigajpxy ja øgyajpxy ja ømyadya'aky midì yiknitsokp, jøts jade'en xpaattit ja kunuu'kxin midì yja'ajtpy ja nwindson'ajtim Jesucristo.

¹⁵ Jade'ents migu'uktøjk idø'on, ndukmadowdi jøts tu'ugyi xyik'ettit ja mjanchja'win, jøts kidi xja'dyigøydi ja ana'amìn midì øø tø nyaky ku øøts jam kø'øm n'ats'øjch, jøts nayide'en midì nõkyøjxp tø myiktanigaxti. ¹⁶ Ja nwindson'ajtim møøt ja Dios Teety, ja' y'øy'ajtingøjxp tø xtsøjkyindi. Tø ja nayide'en xmø'øyindi ja kajpxjot'amøki midì xemikøjxp, jøts ja yikxon njøp'ejxin. ¹⁷ Wants ja nayide'en tyikmøjki ja m'aaw ja mjoojtti jøts tu'ugyi xwindanidit jøts jade'en xnigajpxtit uk xu'undit tum ja y'øybi.

3

Amidowdi pøktsowdi ja Dios jøts øøts ja kyajpxy nyikyø'øyiyit

¹ Migu'uktøjkti, ja' øts yam njaaknigajpxwampy jøts øø xni'amidowit xnibøktsowit wan ja jaay' tsojk tñimadowdi ja nwindson'ajtim y'øgyajpxy ja y'ømyadya'aky pøn jaty tsinaadyip øy madsoo, jøts tsojkingøjxp tkupøktit nayide'en sam meets ja tø xkupøkti. ² Jøts nayide'en x'amido'odit ku Dios x'ajot'attit jøts øø x'ixmatst ja ka'øyjaa'dyi ja kawindiy'ajtpidi, jabi ka'axi niduki'iyi ja jaay' ja janchja'win tmøødidi sam adøm. ³ Øyts ja nwindson'ajtim, ja' mee tu'ugyi mdukmi'ettip ja winmaa'ñ jøts ja m'ejx'etidit jøts ja miku' mgamimajada'agidit. ⁴ N'ajot'ajtpy øøts ja nwindson'ajtim jøts ku xundi

jade'en jøts xun'adø'øtstit sa jaty mee n'ane'emy. ⁵ Wan ja nwindson'ajtim nagyø'øm mbudøkiyidi jøts xjaaknijawidit sa ja Dios xtsøjkyindi jøts nayide'en xjagyaptit ja jotmøk'ajtin ja tuda'aky'ajtin sam ja Cristo.

Paat'ajtiyip tu'ugyi nnadyamiyojxa'ant ja ndunkjøøjp

⁶ Mee migu'uktøjkti, ja nwindson'ajtim Jesucristo køjxp øøts yam n'ane'emy jøts xmajtsu'tuttit ja mmigu'uk pøn katunwandip uk pøn tkabadunwandip chinaa'yingsøjxp ja ixpøjkin midi tø myiktukmadowdi, midi øø tø nnigajpxy.

⁷ Mnija'widipxi sa mjuyky'attit sa mdsøønidit mdanidit jøts xpadu'undit nayide'en sa øø nduñ, ka'axi øø juuni ngatuñ ku øøts jam ndsøøni ma meets jam.

⁸ Uk ngagujuy øøts ja ndsapkaaky, jadi'iñi øøts ja nugo ngay, ka'ats yjade'eni, tump øøts, jotigøøpy øøts xinaxy tsunaxy jøts jade'en nidu'ugin mgayik'adsepti. ⁹ Øy øøts idø'øn ja xpaat'aty jøts meets xyakt ja pudøjkin, jøts øøts ja n'amido'ot, ka'apts øøts jade'en nduñ, tump øøts, pøjpk øøts, jøts jade'en myiktuk'ejxti sa xu'undit.

¹⁰ Ku øøts jam ndsinaay ku myik-møøtsinaadyi, yide'enxi øø nyajky ja tiy'ajtin: Pøni pøn katunwamp ka'ats kya'aty. ¹¹ Jade'en øø tø nyiktamimadya'aky jøts ku meets jam winaagin pøn jadi'iñi nugo tyiknajxtip, niti tkatundi. Ja'ayi tyuñ'ajttip sudsø niti tkatu'undit, ne'egi ja myigu'uk tyikwinmaamya'atti. ¹² Yø'øbi jaa'yts øøts idø'øn nni'ane'emy ja nwindson'ajtim Jesucristo kyutujkøjxpit jøts wan ttajotkujk'atti ja tyunk jøts jade'en tpaattit midi tyajuyky'attip.

¹³ Migu'ukti, kidi juuni x'ixmatsti ja ødyu'unin. ¹⁴ Ku jam pøn tkamøjpkta'akwa'ant midi øø nnigajpxy ya'at nøkyjøtpy, øyim x'ejxtit pøn jade'en adøtsp jøts kidi xunk'atti, wan iiy wine'enin tsø'ødyunjawidi. ¹⁵ Kidi xmidsepøkti, jade'en x'ana'amdit sam pyaat'aty: jaa'y ja myigu'uk t'ane'emy.

Ku ja Pablo y'ukajpxpoo'kxni

¹⁶ Jøts ja nwindson'ajtim tyakp ja øy'ajtin, ja' ejtp mgunuu'kxidip øy madsøø, øy tigati yjatuñi, ja nwindson'ajtim ni'ijtyi mjagyapidip.

¹⁷ Øts ngøjø'øm meets ya'at kajpxpoo'kxni ixyam ndanijayi. Jøts øts nxøøw nayide'en nbikta'aky sa øøts ejtp nduñ ku øøts ja nøky nguexy. Pablo. ¹⁸ Ja nwindson'ajtim Jesucristo niduki'iyyi mmo'ojidip ja kunuu'kxin. Jade'en idø'øn ja yjatt.

JA MYIDU'UKPI NØKY MIDI JA PABLO TYANĠGAJX JA TIMOTEO

Ku ja Pablo ojts tnijayi ja Timoteo

¹ Øts idø'øn Pablo'ajtp. Øts ja Jesucristo ngudanaapy sam øts tø xpikta'aky ja Dios Teety midi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nits'ok'ajtin xmø'øyindit. ² Mets Timoteo ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Ku yikni'ane'emy jøts kyayikupøkt ja ka'øy'ixpøjkin midi ka' tyiyi yjanchi

³ Tan meets jam Efeso kajpjtøp sam tø nda'ane'emy ku øts jam wyinaty nnøjkxwa'añ jam Macedonia. Ana'am ja jaa'y midi jam winaagindi jøts kidi ja tnanky'ixpikyidi ja winmaa'ñ midi ka' tyiyi yjanchi ⁴ jøts nayide'en kidi nugo tyikmøjtøkidi ja kwenti ja madya'aky midi nisudso'ampy katiidyøjkip. Nugo amyøñ tsaachyøñ tniimadya'aky ja aptøkti. Nugo adøm njaka-jpxy'ajtyindi sudso tpaaty, nisudso'ampyts kyatiidyøki. Niwine'en adøm ja xkabudøjka'andi jøts adøm nbaduujnin ja Dios yja' midi adøm ja tø xanipijkyim midi tø nyikmø'øyindi janchja'wingøjxp.

⁵ Jøts ja'agøjxp ya'at myikta'ane'emy jøts nixem niyam ja tsojkin xjagyaptit midi ja Dios yja'ajip, midi yiktump øy'ajtingøjxp øwynmaa'ngyøjxp ku ja nadyamiyoxi ñaxy amuum janchja'wingøjxp. ⁶ Tøts yø winaagin tmajt-stutnidi jøts nugo ñanktyuu'tigøyidi ku tpaabøkti ja winmaa'ñ midi nisudso katiidyøjkip, nugo nadøki tnikeyajpxy'atti. ⁷ Ja' chojktip jøts kyajpxwejpi'attit sa ja Moises kyutujk wya'añ, ni tkaja'gyukidits ja wyinmaa'ñ kø'øm sa jaty wya'andi, ni ja y'ixpøjkinbaat tkanijawidi midi nadyijyi ñigajpxtip amimøjnija'wibim tij janch.

⁸ Nnija'windip adøm jøts ku ja'abi kutujk y'øyi ku jade'en tyunkpaaty sam tø yiktanibiktaagi. ⁹ Jøts yiknijawit nayide'en jøts ku nima ja kutujk kyayiktanibiktaagi ja øyjaa'y midi katundigøødyip; pø ja'axi ja kutujk wya'añ ku ja tø kyøjy jøts ja tyu'unt ma ja jaa'y pøn tum nay'adsep tja'widip, pøn kamadoodip. Jaa ja tyuñ ma ja ka'øyjaa'dyi, ma ja møjpøkyjaa'dyi; pøn tkawindsø'jkidip ja Dios, pøn tkawindsø'jkidip ja tsinaa'yin; pøn ja yikjaa'y'oo'k tyunk'ajtpy, øy ja tyeety ja tyaak ja tyik'ooktit tyiktigø'ødyit. Jats idø'øn ja kutujk tyunkpaaty jøts ja tpayø'øy ¹⁰ pøn namyøøt'ajtidip nugo, yam ja ka'ap y'amajtsk'atti; uk tmøøt'atti myiyaa'dyøjk myidø'øxyøjk; pøn jaa'myaa'tstip, pøn myigu'uk twin'øøndip, pøn ja Dios nugo tniwambajttip jøts ja myigu'uk twin'øøndi. Nayide'ents ja kutujk tpayø'øy pøn ja øy'ixpøjkin tkatsojpk, ¹¹ ja øy'ixpøjkin midi tniagjpxp ja øgyajpxy ja ømyadya'aky, ja Dios yja' midi yiknitsokp, midi øts yam tø nyiktanipiky.

Tyamøja'wip ja Pablo ja Dios ku ja pya'ayoyiyi

¹² Ndukmøja'wipst ndukunuu'kxyja'wipst øts ja nwindson'ajtim Jesucristo pøn ø tø xyikjotmøktä'aky jøts øts ya'at ndunkjøøjp ndu'unt. Tøxi øts ja x'ixy jøts ku øts ja nmi'øy'aty, xjats øts ja tø xpikta'aky jøts øts ja jade'en nmidu'unt. ¹³ Ja' øts idø'øn jade'en kø'øm xump, øy øts idø'øn ja y'ijty

nja'axoøkmigajpxy, øy øts idø'on ja y'ijty njabawidity jøts øts ja nmatswa'añ ngawindiy'ajtingøjxp jøts øts ja y'ijty nyik'amjaty nyiktsaachjaty. Møj ja Dios ku øts ja xpa'ayøø, ka'ap øts ja wyinajty njanchjawinim, ni nganjawwi øts pøni ti øts jade'en ndumpy. ¹⁴ Paty øts ja nwindson'ajtim møj ndukmøjawi ku øts ja xukjanchja'wiyi ja yja', jøts jade'en ja nmigu'uk ndsojkändit nminamyajyändit ku møøt n'ejtändit ja Cristo Jesús.

¹⁵ Tiy'ajtin yø' jøts niduki'iyi njanchja'wa'ant: ku ja nwindson'ajtim myiñ ya naxwiñ jøts ja tyiknitso'ok'ajty ja pøjkpitumbi jaa'y. Møj tundigøøbyi øts y'ijty, nika' pøn jade'en. ¹⁶ Jade'engøjxp øts ja Dios xpa'ayøø jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkipimee'kxy. Jade'en ø ndunjøpi sudso yikpaatt ja jujky'ajtin midu xemikøjxp ku ja yikpabiky yikjanchjawi. ¹⁷ Paty nayide'en nwindson'jka'ant, nmøja'wa'ant n'øya'wa'ant ja Dios Teety midu nwindson'ajtyindip xemikøjxp, ni kya'øøky ni kyadigøy ja', ka'ap ja yik'ixy. Ja'ayi dø'on tu'ugyi ejtp, pøn tnija'widyaapy. Jade'en idø'on ja y'ejxi tyiyi.

¹⁸ Mets u'nk Timoteo, mets ya'at ndanipijky jøts yikxon xpadu'undit ja Dios yja' samdam mmimadyajkidi ja Dios kyugajpxtyi. Mjanchjawip ja nwindson'ajtim amumjoojt jøts øy ja mwinmaa'n xyik'ett. ¹⁹ Jaa winaggin jade'en yjajttøø ku ka' tmøjpiktaktøø sam tjanijawidi, jade'ents ja yjanchja'win tø tyuu'tigøydi ²⁰ sam yjajttøø ja Himeneo jøts ja Alejandro. Tøxi øts ja kutujk nmø'øy ja Satanás jøts o sagasa ja y'ayo'on ja tpaajtidit jøts jade'en tja'gyukidit jøts ku ja Dios kyayikwindsøy.

2

Ku Pablo ttukmadøøy ja Timoteo sudso tkugajpxa'akt o pøngapøn jaa'y

¹ Ixya meets jawyeen ndukmadøy jøts ndanipøkti jøts møk xukunuu'kxyjawidit ja Dios jøts x'amido'odit xpøktso'odit jøts tpuðøkit ja naxwiñ'ñit jaa'y. ² Kuwandaagidi ja windsøndøjk ja kudunktøk jøts øy tsuj nyiknaxindit agujk jotkujk, jøts ja Dios jade'en ni'amuki xkunuu'kxändit ku amumjoojt nwindson'jka'ant nwinja'wa'ant. ³ Ku jade'en nbadu'unänt jade'ents t'øyjawi ttsujawi ja Dios midu xyiknitso'ok'ajtim, ⁴ jabi jade'enxi ja ttsøky jøts niduki'iyi nnitso'ok'ajtidit jøts nnija'wa'andit ja tyiiby ja yjanchpi. ⁵ Tu'ugyi jaa ja Dios Teety, jøts nayi tu'ugyi ja' midu xyiknitso'ok'ajtim jam Dios wyindum: ja nwindson'ajtim Jesucristo, ja' pøn jaa'y'ajtin nayide'en myøøt'ajtpy. ⁶ Ojts ja nwindson'ajtim Jesucristo ñagyøyakyi jøts ja ojts xku'oo'ka'am adøm nbøkyøjxp jøts adøm nitso'ok'ajtin jade'en nbaajtyindi, xjats ja jade'en enkyi tø yiknijawinim ku ja xøøw ja jumøjt tø tpaatynim sa ja yjajty kyubejty. ⁷ Ja'agøjxp øts tø nyikpikta'aky kugajpxy'ajtpi ku'aaw'ajtpi jøts øts ja janchja'win jøts øts ja tiy'ajtin nduk'ixpøktit pøn ka'israelit jaa'dyi. Tiy janch øts idø'on nwa'añ, ka' nugo ndabyaaty, pø ja Cristoxi øts amuum njanchja'wip.

⁸ Paty ø nwa'añ, jøts o ma pøn tja'myatstit ja Dios, ka'ap ja tsep, ka'ap ja aka y'øyi. Tu'ugyi amuum nbiktaajkin ja njanchja'win. ⁹ Jøts ja tø'øxyøjk, tuda'aky'ajtin øyjaa'y'ajtin yiktundip. Ka'ap ja ja'abi wet tpiakta'aktit midu namyikaxi kaxø'kp midu ja myigu'uk nugo tyukta'amutskidip. Kidi namyikajxingøjxp ja wyaay tyik'øyidi tyikpaadidi. ¹⁰ Jade'en ne'egi tpuðøkidit ja myigu'uktøk ku ja øy'ajtin tyiktu'undit sam ja'adi pøn ja Dios tø ñadyamiyøxyidi. ¹¹ Ku ja Dios yja' yikajpxwa'kxy, amøñi ja tø'øxyøjk tpat-mado'odit, tuki'iyi ja yujy'ajtin tpiakta'aktit. ¹² Ka'ap mibaat ja tø'øxyøjk

tkajpxwa'kxiti ja Dios yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit. ¹³ Jabi jawyeenxi ja Dios tyikaxi'jky ja Adán jøtsnim ja Eva. ¹⁴ Jøts ja Adán ka'ap ja yikwin'ii'ñ. Ja tø'øxyøjk ja' ne'egi yikwin'øø'n, jøts ku yikwin'ii'ñ jade'ents ja pøky tpaajty. ¹⁵ Jade'en'ampy ja tø'øxyøjk ja nitso'ok'ajtin tpaatti ku ja u'nktaak'ajtin tyik'awa'andi, ku ja janchja'win tpadu'undit, ku tjagyaptit ja tsojkin jøts ja wa'ats'ajtin, jøts møøt ñadyabudøkiyidit ja ja'yukin.

3

Sa yjaa'y'attit pøn ana'amp tsaptøjkjotp

¹ Janch tiy'ajtin yø': janch øy yø'øbi tunk pøn tniwindsøn'ajtwamp ja Dios yja'. ² Paty nayide'en øy tsuj yjaa'y'attit jøts ka' nugo o sa yiknøjmidit. Pøni jam ñidø'øxy, tu'ugyi ja tmøøt'att, ka'ap ja kawinaak. Tuda'aky yjaa'y'att, sam ja tyunk tmøøt'aty ja'ats pyadu'ump. Jøts twindsø'øgit twinjawit pøn nimejnip nija'jtijp jam tyøjkjotp; jøts øy tsuj nayide'en yik'ixpøkt; ³ ka'ap y'øyi jøts y'amuu'kyjaa'y'att jøts ka'ap tsep t'ixa'at. Ka'ap ja myigu'uk nugo twin'øønt jøts ja meeñ jade'en tpaatt. Ja' tsojkip jøts ja pa'ayo'owin ttu'unt jøts ka'ap ja meeñ nugo pøkpaa't tjawit. ⁴ Øy tsuj y'u'nkteety'att sam pyaat'aty jøts tuki'iyi t'ext yjønjotp, jøts ja y'u'nk øy tsuj wyindsø'øgiyit; ⁵ ku jade'en pøn tkatu'unt yjønjotp tyøjkjotp sam u'nkteety'ajtin, ζsudsots ja t'ana'amt pøn ja Dios tjanchna'widip? ⁶ Ka' pyaat'aty ana'ambi tyøkit pøn tjemyabøjkp ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tø tyaja'adyi ja ayo'on. ⁷ Nayide'en chøkyi jøts ttunjøpit ja øy'ajtin ja tuda'aky'ajtin jøts jade'en wyindsø'øgiyit pøn ja Dios yja' tkabaduujnijnim, jøts ka'ap ja jade'en pøky tyaja'adiyit jøts nayide'en ka'ap ja miku' nugo wyin'øøniyit.

Sa yjaa'y'attit ja møjaa'dyøjk pøn tundip tsaptøjkjotp pøn tpuðøjkp ja ayoobi jaa'y

⁸ Nayide'en ja møjaa'dyøjk pøn tkumaadyip ja ayoobi jaa'y jøts tyuda'aky'att y'øyyaa'y'att jøts kø'øm ñawyindsø'øgiyit. Ka' ti ttu'undit, ka' ti tkajpxtit. Ka' myuktigø'ødyit jawyeen ja'adi, jøts ka'ap ja meeñ nugo pøkpaa't tjawidit. ⁹ Øy tøky wa'ats tñijawidit sa ja Dios yikjanchjawit midit y'ijty kayiknija'wip, jøts ja wyinmaa'ñ øy tsuj wa'ats tmøøt'attit. ¹⁰ Ja' tsojkip jøts yik'ext yiknija'wip pøni ka' ti tundigø'øyin tmøøt'atti, møjaa'y'attipts ja' jøts tkuma'adyit ja ayoobitøjk. ¹¹ Nayide'en ja ñidø'øxy tyuda'aky'ajtmidit y'øyyaa'y'ajtmidit. Ka' nugo yjemgajpxtit pyagajpxtit. Ja' tyu'undip midit tiy'ajtin. ¹² Ja møjaa'dyøjk tu'ugyi ja ñidø'øxy ja tmøøt'att, jøts øy t'ext ja y'u'nk y'una'jk jam yjønjotp tyøjkjotp. ¹³ Ja møjaa'dyøjk pøn øy tsuj tundip sa ja tø yiktanipøkti, jinaxy ja myøjtøkidi jinaxy ja yikwindsø'øgidi jøts ja nayide'en ka' tsep t'ukja'wiñidi tñigajpxtit sudso yikjanchjawit ja nwindsøn'ajtim Jesucristo.

Sa Dios ja wyinmaa'ñ tnanky'ijxyiyi midit y'ijty kayiknija'wipnim

¹⁴ Tsojk ø nnøjkxt jøts me n'ats'ext; ixyamts mets ya'at nøky ndanijayi. ¹⁵ Ku øts jøtmøñ nda'anigyotit, jøts xnijawit sa njaa'y'ajtindit møøt ja nmigu'uk pøn tø tjanchna'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn tñigubojktip ja tyiiby ja yjanchni. ¹⁶ Janch tiy'ajtin yø', ku janch møj ja Dios wyinmaa'ñ midit y'ijty kayiknija'wip. Ixyamts yik'ixy yiknija'witi jabi jade'enxi jap jaabyety y'ity ku:

Jaa'yin ja nwindson'ajtim Jesús ñanky'ejxiyi ya naxwiiñ; jøts ja Espíritu Santo tnigajpxy ku ja' tiy'ajtin tmøøt'aty jøts nayide'en ja ankilistøjk y'ejxøø ñija'wiyøø. Tø yikajpxwa'kxy ja Jesús y'ixpøjkin o magajp, jøts jade'en tpadundi ja naxwii'ñit jaa'y jøts ja chajpajtnaa ma ja Dios Teety jap. Jade'en ja nøky wya'añ.

4

Sa winaagin tmajtstu'uttit ja Dios'ajot'ajtk

¹ Tiy'ajtin ja Espíritu Santo wya'añ ku winaagin tmajtstu'uttit ja Dios'ajot'ajtk ku wyinaty wyingøñ jøts kyøxt ja naxwii'ñit. Jøts ja tpadu'undit ja ixpøjkin midit ka' tyiyi yjanchi, midit ja miku' yja'ajtpy. ² Ja'abi jaa'y ja tmado'odip pøn taay'ajttip pøn ja pyøky tkaja'widip øy ja tjanijawidi ku møj tø tyundigøydi. ³ Jade'en wya'andit jøts ku ka' n'amajtska'ant jøts ka'ap o ti njøø'kxint øy ja Dios ja køø'm tø tjabikta'aky; pø tøxi ja Dios ja ttanibiktaagi jøts ja nyiktunkpaajtindit tuki'iyi ja pikta'aky, pøn jaty ja Dios tjanchja'widip pøn jaty tnija'widip ja tyiiby i yjanchpi yjøø'kxtipts ja', wan Dios ja ttamøjajwidi tagunuu'kxyjawidi. ⁴ Midit ja Dios tø tyik'øyi, tum øy ja', ka'ap adøm ja ngagupøjkint. Ndamøja'wimp ja Dios ja' ku nyiktunkpaajtint, ⁵ ku ja jade'en ndu'unint kunuu'kxyts ja wýmbejtñi ja pikta'aky sam ja kyajpxy wya'añ.

Sa ja Jesucristo øy tsuj yikmiduñ

⁶ Ku ya'at øy xuk'ixpøkt ja migu'uktøjk, øy idøø'n ja Jesucristo wyinaty xmiduñ, jøts m'ajot'atp ja', myiktunkpaatp ja' ja ixpøjkin sudso n'ajot'ajtim ja Dios midit ixyambaat mgamajstutpy. ⁷ Ka' xmojpkita'akt ja kajpxy ja ayuujk midit ka' tyuñ. Amumjoojt ja Dios yja' xpaduujnit; ⁸ øy nugo njanay'ejx'ejtint jøts møk møjaa'w nyiknaxint, ja Dios yja' ne'egi møj ku nbaduujna'ant. Ja'ats xpudøjka'amp jøts øy tsuj ndsinaa'yint jøts nayide'en ja øy'ajtin xukpaajtint xemikøjxp. ⁹ Janch yø' tiy yø', paa't'ajttip jøts yø niduki'iyi nbadu'unint. ¹⁰ Ja'agøjxp møk ndu'unint øy njagu'ayo'omaa'ajtindi øy njayikjemdu'uñindi nyiktedu'uñindi. Ka' ti ngumaa'yindit, jabi tøxi ja Dios xmø'øyiindi ja jøp'ejxin jøts niduki'iyi tyiknitso'okt pøn jaty pabøjkjyip.

¹¹ Yøø'bi winmaa'ñ idøø'n mni'ana'amp jøts nayide'en xnanky'ixpøkit. ¹² Øy tsuj jawyeen xunjøpit sam pyaat'atyin tpadu'undit pøn ja Dios tjanchja'widip jøts jade'en myikupøkt øy mja'una'jkinim; jøts ja m'ayuujk øy tsuj xyikpidsøømt møøt ja m'øyyaa'y'ajtin, møøt ja mba'ayo'owin, møøt ja mjanchja'win. ¹³ Ku øts jam udyaa'gyi nja'att, kajpx ja nøky jam ma mnamykyidi sa ja Dios kyajpxy wya'añ. Yikxon xukwinjawit ja migu'uktøjk jøts ja yjotmøkt'a'aktit, yikxon waani xyik'ixpøkt. ¹⁴ Yiktuñ ja møk'ajtin ja wijy'ajtin midit ja Dios tø mmø'øyi, Dios waan ku ja møjaa'dyøjk ojts mgønixajji.

¹⁵ Tu'ugyi xu'unt yøø'bi winmaa'ñ jøts jade'en t'ejxtit tnijawidit sa tø xyikmaweni xyikaja'aji ja mja'gyukin jøts ja mjanchja'win. ¹⁶ Øyim mnay'ejx'ettit køø'm midit mwinnmaa'ñ'ajtpy, midit mduk'ixpijky, midit mduknija'wip ja migu'uktøjk, tu'ugyi xyik'ett midit mdumpy. Ku jade'en xu'unt mbaatpts ja øy'ajtin jade'en, nayide'en ja'adi pøn tmadoodip ja ixpøjkin.

5

Sa ja Timoteo mөөт y'ett pөн ja Dios tjanchja'widip

¹ Ka' xwindso'ot, ka'ap o sa xnөjmit ja mөjaa'dyөjk; ne'egi tuda'aky xkajpxwejt sam ja mdeedyin; nayide'en ja una'jktөjk өy tsuj xjawit sam ja mgө'өmigu'ugin. ² Nayide'en ja mөjaa'dyө'өxy xwinjawit xwindsө'өгit sam ja mdaagin, jөts nayide'en ja kiixyuna'jkti sam ja mgө'өm'uchin, jade'en ja mdua'da'aky'ajtin xyiktu'unt.

³ Pudөki ja ku'өktyө'өxy pөн ti kadyimy'ejtxip. ⁴ Pөni jamts ja ku'өktyө'өxy mөөт y'u'nk y'una'jk mөөт y'ap y'ok, jade'en ja una'jk pyaat'atyidi jөts ja tpuдөkidit ja tyety tyaak jөts ja tyikwimbejtniyidit ku ja тө y'ljxyidi, yө' Dios y'өyja'wip, jade'en Dios ttsөky. ⁵ Ja ku'өktyө'өxy pөн nadyu'uk тө tyañ, pөн nipөн ka'ejtp, ejtpts ja Dios ja t'ajot'aty jөts ja pyudөkiyit, ka'ap ja Dios ja tja'dyigөy jөpy ux. ⁶ Jamts nayide'en ja ku'өktyө'өxy pөн ja Dios tka'ajot'ajtp. Tyumpy ja' pөni ti ja tyunwampy, өөky ja ñabyiktaajkniyi. ⁷ Tukmadow yixxon, wan tñijawi jөts ka' pөн өy sa ñөө'mxiyit. ⁸ Jamts winaagin tkajotmay'aty ja myigu'uktөjk, abiky tpikta'aky ja yjөөн ja tьөjk jөts ja t'ixmajtsni ja Dios'ajot'ajtk. Tyimwyenkts ja ne'egi pyidsimy, ka'ap jade'en pөн ja janchja'win tkajagyajptinim.

⁹ Yө ku'өktyө'өxy yiklisti'atp miditugi'pxy jumөjt pөni tөts ja tu'ugyi ñiyaa'y тө t'atsmөөт'aty, paat'ajtiyip ja mibaat yikpuдөkit. ¹⁰ Mibaat ja yikpuдөkit ja'agөjxp ku тө y'өyjaa'y'aty, pөni тө y'u'nk y'una'jk yixxon tyikyeeky tyiktsө'өky, pөni тө өy tsuj t'adsөy ja jaa'y pөн төjk'ayө'өdyip, pөni тө yixxon twinjawi twindsө'өгi ja myigu'uk pөн тө tkupөjknidi ja Dios, pөni тө tpuдөki pөн amjajtip tsaachajtip, uk pөni тө ttuñ jadu'uk өy ti may'ajt өy ti pudөjkin.

¹¹ Ka' mibaat yikjaabyatt ja ku'өktyө'өxy pөн una'jknim; ja'agөjxp ku jotmөñ y'amajtskit, jade'en'ampyts ja Cristo yja' ka'pxy tka'ukpadu'uniiyt, ¹² jөts yikpөky'ixy ku тө tmajtstutni ja' miditө t'ukpadөki. ¹³ Jats ja' pөн nugo ttunk'ajtp ja төk'ayө'өky, ja nuux'ajtin ja pagajpxk nugo jade'en myiwidijtpy, jөts nugo ttatөki midit jagapaat'ajtiyip. ¹⁴ Paty y'өyi jөts y'amajtskit pөн ku'өktyө'өxy una'jknim, jөts ja y'u'nk t'ext tjagyapt sam pyaat'atyi jөnjөtpy төjkjөtpy n'ejxint njagyajpint, jөts ka' nugo ja jaa'y pyagajpxiyit. ¹⁵ Jamts winaagin pөн ja Dios yja' тө tmajtstuuji, ja miku' yja' тө tpanөjkxiyi. ¹⁶ Pөni pөн ja Dios yja' тө tkupөjkidi jөts pөni jam ja myigu'uk ku'өktyө'өxy, mibaat ja kө'өm tpuдөkidit pөni ti ja ka'ejtxip, jөts ja ka' pyudөkiyidit ja mөjaa'dyөjk miditundip jap tsaptөjkjөtpy. Jade'en'ampyts nayide'en yikpuдөkit ja ku'өktyө'өxy pөн ja myigu'uktөjk kadyimy'ejttip.

¹⁷ Ja mөjaa'dyөjk miditnigutujk'ajttip ja janchja'wibidi jөts nwindso'jka'ant nwinja'wa'ant. Jamts ja' midit xuk'ejximp xuk'ixpөjkimp ja Dios kyajpxy, ne'egits ja mөj nwindso'jka'ant jөts ja nbudөjka'ant. ¹⁸ Jabi'andexi jap jaabyety y'ity: "Kidi ja mdsakaa ajeñ xyik'okti ku ja xyiktunwa'andit." Jөts nayide'en: "Ku jaa'y nyiktu'unint kuwani myijuu'ñ ja ttsөky." Jade'en ja nөky wya'añ miditө xajawidi.

¹⁹ Ka' xmөjpitka'akt ku yikni'өөнit ja mөjaa'dyөjk pөni ka'ap ja a'ejxnaxpi te majtskin uk tigөөgin. ²⁰ Pөni tundigөy'adөstip ja mөjaa'dyөjk, mibaats ja jam yiktamigajpxt ma ñamyukyidi ja janchja'wibidi jөts jade'en tjөptsө'өгidit tjөpjawidit ku tyundigөydi. ²¹ Ku ya'at jade'en ndanipiky wa'ats Dios Teety tmadөy, wa'ats ja nwindson'ajtim Jesucristo tmadөy mөөт ja ankilistөjkti, jөts өy yixxon idө'өн xpadu'unt yө ana'amин, ka' pөн nugo xukta'oo'kpatt. Pөni pөн tundigөөdyip tuknaç ja xpayө'өty. ²² Ka' nugo ajawi xpikta'aktit ja

møjaa'dyøk midi tñigutujk'atp ja janchja'wibidi, jawyeen yik'ext yiknijawit põni sa yjaa'y'aty, kuts kya'øyjaa'y'aty jøts ja pyøky ttpaatt ja janchja'wibidi, øyim mnay'ejx'etit jøts ja pøky mgapaadit.

²³ Kidi nugo tsuxknøø xumi'uuky, pø pøjk'ejtpxi xijy mjoojt, vino m'uukp waani.

²⁴ Pøn tundigøodyip midi yiknija'wip wa'ats, ja'ats yikpayø'øpy, midi'its kayiknija'wip jaanimts ja yiknijawit ku ja payø'øyin xøøw y'ett. ²⁵ Nayide'en ku ja øybi ndu'unint; øy ja jatyi yjagayiknijawi, kuwani yiknijawi udy'a'agyi. Ka'ap ja jadi'iñi tyañ.

6

¹ Yø tumbitøk øy tuda'aky yjaa'y'attit jøts twindsø'øgikit yikxon ja wyindsøndi, jøts ka' nugo ja Dios yikpagajpxt, jøts nayide'en ka' nugo nyiktabagajpxint ja n'ixpøjkin. ² Nayide'ents ja tumbitøk põni jam ja wyindsøn midi nayide'en tpadump ja Dios yja', ne'egi mõjts ja twindsø'øgikit, pø pyadumpxi nayide'en. Jade'ents ja ne'egi tpudøkidit sam ja tsojkin tjagyapti. Me Timoteo, tukmadow kajpxwa'kx yø'øbi ana'amin midi nnigajpxpy.

Sa ja Dios yja' nbaduujna'ant jøts agujk jotkujk n'ejtnt

³ Pøni jam pøn tkajpxwa'kxy ja wenk ixpøjkin midi ka' tminabyaadyi ja nwindson'ajtim Jesucristo yja', midi tkawindsø'jkip ja Dios, ⁴ nugo ja ñamyikexyi, ka'ap ja tnijawi põni ti kyajpxpy. Nugo tyikjø'øpy ja winmaa'ñ ja ixpøjkin; jøts jade'en nugo ja tsep tyiknaxkida'aky ku nixem niyam ja ñanky'amutskiwy'añidi. ⁵ Nugo ja y'awa'an'ajtk tyiktunidi ku tka'uknija'wiñidi ja tyiibi. Nugo win'øø'ningøjxp nadyijyi ja Dios yja' ttuujnidi. Jade'en ja wyinmaydi jøts jade'en tijy ja kumeen'ajtin yikpaatt. Mets Timoteo, majtstu'ut yø' põni pøn jade'en jaa'y'ajttip, kidi xminamyayi. ⁶ Jade'en'ampy adøm ja jotkujk'ajtin nmøøt'ajtyim ku ja Dios yja' nbaduujña'am øy meeñ o ti ngamøøt'ajtyim. ⁷ Ka' ti pøn tmimiñ ku ngaxi'jkyimp ya naxwiñ, nayide'ents ku nwindigøø'ña'ant, ka'ats ti n'uk'ejxna'ant; ⁸ põni nbaajtyimp ja ngaajyik ja n'uujkik jøts ja nwet ja nnaamy, ndajotkujk'ajtimpts idø'on ja'. ⁹ Jamts pøn ja kumeen'ajtin ttsojkp. Tyumpy, o ti ttu'unt, jøts ja jade'en o sa nugo tpaatt ja meeñ, kø'ømts ja jade'en ñanktyuu'tigøyidi, ka' tjä'gyukidi põni ti tyundip. Kø'øm ayo'on ja jade'en ñanktyukpaadyidi, jade'ents ja nugo ñankwyindigøyidi. ¹⁰ Ne'egi nugo xyiktundigøø'yint xyikajpxigøø'yint ku ja kumeen'ajtin ndsojkin; jamts pøn winaagin nugo tsojk'anaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadyit.

Sa ja Timoteo yikxon tñigubajk'att ja janchja'win

¹¹ Mets Timoteo, kidi me nayide'en m'adøtsmi, pø Diosxi mets ja yja' mbaduujnip. Yikyø'øy mets ja mdsinaa'yin øy tsuj, ja m'ajot'ajtin jøts ja mjanchja'win. Jøts xminamyayit øy pøn ja mmigu'uktøk, jøts ja tuda'aky'ajtin yujy'ajtin xyiktu'unt. ¹² Nitani møk yø janchja'win; kidi xmajtstu'uty midi ja Dios tø mdamidsøkyiyi midi xemikøjxp ejtp, jabi øy tsujxi tø xukmadø ja mayjaa'y sa ja janchja'win xjagyepy. ¹³ Ja Dios Teety midi xyikjujky'ajtindip, ñija'wipts ja', sam ixyam n'ane'emy, nayide'ents ja nwindson'ajtim Jesucristo ttukmadøøy ja tiy'ajtin ja Poncio Pilato. ¹⁴ Paty yikxon xpadu'unt jade'en, midi tø myiktanipiky, ka' xyiktigatst, jøts ka' pøn mbøky'ejxyit. Jade'en xu'unt kunim ja nwindson'ajtim Jesucristo mye'ent. ¹⁵ Ku tpaatt ja xøøw ja jumøjt, jøts ja Dios Teety ja tkaxt ja nwindson'ajtim ya

naxwiiñ. Tu'ugyi Dios Teety myøji midi ja øy'ajtin ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en. ¹⁶ Yø' tu'uk møj, ka' y'øøky, xemikøjxp ja y'ity. Jaj agujkpy chøøni ma ka' pøn mibaat pyaadyi y'ijxyi. iYikwindsø'jkip yikwinja'wip ku ja myøk'ajtin tmøøt'aty xemikøjxp! Jade'en idø'øn ja y'ejxi.

¹⁷ Ana'am pøn kumeeñ'ajtp ya naxwiiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'attit amumjoojt, pø ja'axi ejtp xemikøjxp jøts tuki'iyi xmø'øyim ja øy'ajtin ja jotkujk'ajtin. ¹⁸ Nøjmi ja kumeeñ jaa'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip. ¹⁹ Ku jade'en tpadu'undit jøts ja øy'ajtin jade'en tpaattit, jøts tmøøt'ettit ja Dios xemikøjxp.

Midi ja Timoteo jaakyiktanipøjkp

²⁰ Mets Timoteo, møjpikta'ak midi tø myiktanipiky. Kidi xmøjpikta'aky ja ka'øy ayuujk midi ja Dios yja' tkaminabyaajtip, midi ñadyijyi yiktejp ku ja tyiy'ajtin. ²¹ Tø winaaagin tyuu'tigøydi pøn yø jade'emb i winmaa'ñ tpadump. Jade'en ja yjanchja'win tka'ukpadunidi.

Dios mgunuu'kxip, mets Timoteo. Jatp idø'øn jade'en.

JA MYĪMAJTSKPI NŌKY MIDI JA PABLO TYANĠGAJX JA TIMOTEO

Ku ja Pablo ojts tnijayi ja Timoteo

¹ Pablo ɔts, jɔts ɔts ja nwindson'ajtim Jesucristo ngudanaapy, ɔts xkajxp ja Dios Teety sam ɔts ja tɔ xamidsɔky jɔts ɔts ja yja' ndukmado'ot ja naxwii'nit jaa'y sa nbaajint ja ɔy'ajtin xemikɔjxp ku ja Jesucristo mɔɔt n'ejtint.

² Mets Timoteo ya'at nɔky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip mɔɔt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Sa ja Timoteo tyiknigaxɔ'okt ja Cristo ja yja'

³ Ndamɔja'wip ɔts ja Dios ku me nni'amidoo'wi y'ity jɔpy ux. Ja' ɔts idɔ'ɔn ja yja' nbadumpy samdam ja t'ɔyjawɪ sam nayide'en ja mɔjaa'dyɔk y'ijty ttundi. ⁴ Nja'myejchp ɔts sa myaaajxy ku nnawya'kxyim. Wamp ɔts o me ma njanch'ejxpaatt jɔts njotkujk'att. ⁵ Nja'myejchp ɔts nayide'en sam ja Dios Teety xjanchjawi. Jabi jawyeenxi ja mdigamɔj jɔts ja mdaak nayide'en tyiktundɔɔ ja yjanchja'win.

⁶ Paty mets ixyam ndukja'myech jɔts ɔy tsuj xyikmiwenit ja mdunkjɔɔjip midi ja Dios tɔ mdanipiky ku mets ojts ngɔnixajy. ⁷ Ka'ap ja Dios Espiritu Santo tɔ tpikta'aky jɔts ɔy ti ngudsɔ'jka'ant. Nayi Espiritu Santo ja myɔk'ajtin xmɔ'ɔyimp jɔts amumjoojt ndu'unint jɔts ja tsojkin jɔts ja ɔyja'gyukin nmɔɔt'ajint. ⁸ Ka' ti xtsɔ'ɔdyunjawit sam ja Dios yja' xkajpxwa'kxi, jɔts ni ɔts xkatso'ɔdyunjawit ku ɔts nay ja' nyiktagudsumi. Kupɔk o myikjemduñ myikteduñ myikjemnɔjmi myiktenɔjmi ku tka'ɔyjawidi ja Dios kyajpxy midi xyiknitso'ok'ajtimp. Jade'en xmidanit sam ja Dios ja myɔk'ajtin tyaky. ⁹ Jade'en ja Dios tɔsɔky jɔts ja xyiknitso'ok'ajint jɔts nayide'en amumjoojt nnadyamiyojxint. Kidi ja'agɔjxpip adɔm ja xtsɔjkyim ku adɔm n'ɔyjaa'y'ajtyim nga'ɔyjaa'y'ajtyim. Ma windiixyip adɔm ja Dios jade'en xamidsɔjkyim, ka'anim wyinaty ja naxwii'nit cho'onda'aky. Ja nwindson'ajtim Jesús kɔjxp adɔm ja nitso'ok'ajtin nbaajint ku mɔɔt n'ejtint. ¹⁰ Tɔ ja Dios Teety tnankyja'ijxyi sa ja pa'ayo'owin tjagyepy adɔmgɔjxp ku ja nwindson'ajtim Jesucristo xaniguejxyim. Sa ja y'ɔ'jky jɔts yjujkyjky, nayide'ents adɔm nbaajint sam ja tɔ tnajtstuni. Jade'ents Cristo kɔjxp ja ɔ'jkin xka'ukmimajadaajkna'ant jɔts xemikɔjxp ja juky'ajtin nbaajint ku ja y'ayuujk tnitanay sam ja wyinaty tɔ ttanibiktaagi.

¹¹ Dios ɔ tɔ xpikta'aky jɔts ɔts ya'at ja kyajpxy ja y'ayuujk ngajpxwa'kxit jɔts ɔts yɔ ngudanit, jɔts ɔ nduk'ixpɔkt pɔn ka'israelit jaa'dyi. ¹² Paty ɔts ixyam ɔy ti ngu'ayo'ombaadi. Ka'ap ɔ ti ndsɔ'ɔdyunjawi, pɔ Diosxi ɔts ja yja' nbaduujnip. Wampɔts ɔts jɔts ɔts ja Dios xpɔkjɔ'knit kunim ja tiidyu'unin xɔɔw mye'ent.

¹³ Mets Timoteo, sam ɔ tɔ nnajtstuni, tu'ugyi ja ɔy ixpɔjkin jade'en xyikyɔ'ty, ja Dios yja'. Jade'ents ja Dios xjanchjawit jɔts ja mmigu'uktɔjk xpa'ayo'ot xminamyayit nayide'en sam ja nwindson'ajtim Jesucristo xamidsɔjkyim ku mɔɔt n'ijtyim. ¹⁴ Ja Espiritu Santo midi adɔm

nmøøt'ajtyindip, ja' pyudøjkingøjxp xpadun'ett ja Dios yja' midi tø mdanipikyiyi.

¹⁵ Tøxi me xnijawi sam øts ja Asiit jaa'y xmajstuttøø, ja Figelo møøt ja Hermógenes paat. ¹⁶ Diosts ja kunuu'kxiyip ja Onesiforo møøt ja myigu'uktøjkti ku øts ja kawinaak ojk xnimiñ jøts ø xpuðøki. Ka'ap ja tsø'odyu'unin tjagyepy øy ø njatsumy'ity. ¹⁷ Ne'egi øts ja x'ixaay ya Roma ku øts ja ma xka'ijxy kunim øts ja xpaajty. ¹⁸ Wan ja Dios ja pya'ayo'ajtin tmø'øy ku ja tiidyu'unin xøøw tpaatt. Wa'atsxi me xnijawi sa ojts xpudøjka'am jam Efeso kajpjtøp.

2

Sq Timoteo møk tmidanit ja ayo'on Jesucristo køjxp

¹ Mets u'nk Timoteo, jotmøkpkø, yiktun ja møk'ajtin midi ja nwindson'ajtim Jesús yajkpy. ² Ja ixpøjkin midi m'ijxpy midi mnija'wip sam øts ja mayjaa'y nyik'ixpiky, ja'ats nayide'en mdanipøk pøn øy tsuj jaa'y'ajtp, midi øy tsuj yik'ixpøjkp nayide'en.

³ Møk xmidanit ja ayo'on midi mbatpy ku ja nwindson'ajtim Jesucristo yja' xpaduujni. Møk nabyikta'agi jade'en sam pøn yikexy tseptumbi. ⁴ Ka'axi mibaat ja tseptumbi pyaat'aty jøts nugo ajawi o ti ttatøkit. Tu'ugyi ja yja' tyikyø'dyit sa ja wyindsøn ja y'ane'emyidi. ⁵ Nayide'en ja kuyajtpi, tu'ugyi ja yja' ja ttu'undit sa ja tø yik'ana'amdi, winets ja tpøktit ja ñiguyaty. ⁶ Nayide'ents ja kamdumbi nayja' paat'ajtiyip kø'øm tpøkjø'økt ja pyikta'aky. ⁷ Pawinmaajyik øts yø n'ayuujk, nayi nwindson'ajtimts mbudøkiyip jøts xja'gyukit.

⁸ Ja'myats ja nwindson'ajtim Jesucristo sa ojts yjujkpyiky jap oo'kpi jutjotpy midi ja rey David y'ap'ajtpy. Yø' øts ja yja' ngajpxwa'kxiyip sa ja øy'ajtin xukpaajtint. ⁹ Yø' kajpxwa'kxiingøjxp øts øy nyikmi'ekyi, møkts øts yø nwindani, jade'ents ø nyik'ixy ejxim tu'uk ja møj tundigøøbya'an; øy øts njayiktsumy ka'ap ja Dios kyajpxy jaayi tyañ. ¹⁰ Ja'agøjxp øts yø ayo'on møk nwindani jøts ñitsø'ok'attit pøn ja Dios tø wyi'ijxy jøts tpaattit ja øy'ajtin midi xemikøjxp xmø'øyimp ja nwindson'ajtim Jesús.

¹¹ Janch tiy'ajtin yø':

Ku ja Cristo møøt nayide'en n'ø'jkyim, nayide'ents ja møøt njuky'ajtint;

¹² pøni ngu'ayo'ombaaajta'am ja yja', xmø'øyimpts ja' ja y'øy'ajtin ma ttanitani ja yjaa'y.

Pøni ka' ja ngupijkyim, nayide'ents ja xkagupøjkint.

¹³ Pøni ngamøk'ajtingøjxp adøm ja njanchja'win kyamajadaajkyim, jade'eñim ja Dios tyikyø'øy ja yuyj'ajtin jøts ja pudøjkin ja xmø'øyim, ka'ap ja Dios mibaat ñay'ixmajtsiyit kø'øm, paty ja xkaja'dyigø'øyim.

Yikyø'øpy jade'en ja Timoteo sq tø yiktanipiky

¹⁴ Mets Timoteo, tukja'myats pøn jaty ja Dios yja' tjanchja'widip jøts kidi nugo kyajpxjimbetti kyajpx'adøjti, kidi nugo tkajpxyøndi midi ka' tyuñ; ñanktyuu'tigøjyidip yø jade'en. ¹⁵ Amumjoojt nabyikta'agi sa ja Dios yja' xpaduujnit jøts øy tsuj yø mdunk pyidsø'ømt Dios wyingujk. Ka' ti nugo xtsø'odyunjawit ku ja tiy janch xkajpxwa'kxi ja Dios tyiy'ajtin. ¹⁶ Kidi xpbiky yø'øbi ayuujk pøn jam nugo o sa kajpxtip. Pøn jade'en ttundip, ja kya'øyjaa'y'ajtin idø'on ja yikmiwenidip. ¹⁷ Pøn jade'en nugo kajpxtip, jade'ents ja kya'øy'ixpøjkin ja myøjidi myayidi jøts ja windigø'øyin nugo

tyiknaxkida'akti. Jade'en y'adø'øtsti ja Himeneo jøts ja Fileto, ¹⁸ ku kø'øm tø ñanktyuu'tigøyidi jøts ja wya'andi ku ka' y'uk'ejtnit ja jujkpyøjkin ku ja o'jkin nbaajtint ya naxwiñ. Jade'ents ja myigu'uk winaagin tø ttukmajtstu'utti ja yjanchja'win. ¹⁹ Ka'ap mibaat pøn tyiktigatst ja Dios wyinmaa'ñ, jabi yide'enxi jaabyety y'ity: "Wa'ats ja Dios Teety ja t'ixy tñijawi pøn padu'unxip ja yja"; jøts nayide'en wya'añ: "Wan tmajtstutnidi ja ka'øbyi, pøn ja Cristo yja'ajtpy."

²⁰ Jade'en n'ukpiktaajkint ku jaa'y xnime'enint xnija'jtint njønjojp ndøjkjojp, jøts nduktajøø'kxa'ant ja' midi øy midi tsuj midi tsoatp; jøts ja' midi ka' chobaaty, ja'ats o pøn tyiktu'ump. ²¹ Nayide'ents idø'øn adømdi, ku øy tsuj nnay'eix'ejtindit jøts nja' nayide'en chobaajtint Dios wyingujkp; jade'en'ampyts idø'øn ja xyiktu'unint jøts nmigu'uktøjk nbudøjka'ant.

²² Majtstu'tut yø una'jk winmaa'ñ midi ka' tyuñ. Tu'ugyi xyikyø'øty ja tiy'ajtin jøts ja mjanchja'win, jøts xminamyayit ja mmigu'uktøjk øy tsuj pøn tu'ugyi t'ajot'ajtp ja Dios. ²³ Nnimaapyts mets jøts ka' xpadøkit yø'øbi ayuujk midi katump. Mnija'wip ku jade'en ja tsep nugo yikpaaty. ²⁴ Pøn tpaduujnip ja Dios yja' ka'ap ja nugo ajawi o ti ttatøkit ma ja tsep, ma jaa'y o ti ttundi. Ja' ja tyu'ump øy'ajtin tuda'aky'ajtin øy pøn møøt. Ja y'ixpøjkin ja tyuk'exp tyuknijawip sam ja tuda'aky'ajtin nayide'en tmøøt'att. ²⁵ Jade'ents ja øy tsuj tkajpxuda'akt pøn ja wenk winmaa'ñ tmøøt'ajtip midi ka' tyiyi, wan ja Dios pyudøkiyi jøts tyigatstit ja wyinmaa'ñ jøts tpadu'undit ja tyiiby' yjanchpi. ²⁶ Wan tmajtstu'utti ja miku' yja' ku ja nugo tø wyin'ñiñidi jøts ja nugo tø tyuktuñi pøni sa ja ttsøky.

3

Sa jaa'y wyinaty'i ku ja t'adyu'unin xøøw tpaatwani

¹ Me Timoteo, nayide'en xnijawit ku wyingoni ja xøøw ja jumøjt jøts windsøn'ajtin mye'ent, janch tsep ja xøøw ja jumøjt ñaxt. ² Øy sa pøn y'adø'øtsttit. Kyø'øm winmaa'ñ ja nugo yikmøjtøkiwya'andip, meen ja nugo may choktip, namyikaxi winmaa'ñ ja nugo yiktu'undip. Tpatit tñaxtit ja Dios, ka'ap ja tyety ja tyaak twindsø'øgidit, niti ja tkamøj'ejxtit tkamøj'awidit jøts ni tkawindsø'øgidit ja Dios yja'. ³ Ka'ap ja ti tsojkin, ka'ap ja ti øy'ajtin tmøøt'attit. Pagajpxk ja' yø tyunk'attip, ka'ap ja maa'kxujkin tjagyaptit, tyunwändig o ti ttunwa'andit, nugo øy pøn tmidsep'atwa'andi øy wyinaty pøn tuda'akyjaa'y'aty. ⁴ Kyøyakp ja kyø'øm migu'uk, adø'øtsp o sa y'adø'øtst. Kyø'øm ja' y'ixa'ap, ka'ap ja Dios yja' ne'egi t'ixaajyit. ⁵ Ejxingøjxp nadyijyi ja Dios yja' tpaduujnidit pø sa ja y'am yjojp, ka'ap ja tmøjipiktaajkit ja ñitso'ok'ajtin.

Me Timoteo, ka'ap yø jade'emb'i jaa'y xunk'att. ⁶ Adøtstip o sa y'adø'øtsti, tøj k'ejkidip jøts ja tø'øxyøjk twin'øøndit pøn ñadyu'uk'ejxtip pøn y'amutsk'ejxtip. Nayide'ents ja tø'øxyøjk, jaa'y'ajtp ja' o sa yjaa'y'aty. Kyupijky ja nugo, ⁷ ixpøjkin ja jade'en tijy yikmøøpy, nisudso'ampyts ja jade'en tkaja'gyuki ja Dios tyiy'ajtin. ⁸ Nayide'en sam ja Moisés y'ijty kyayikpaduñ ja yja' sa ja yjawa'añ ku ja kyamibøjkøø ja ximaabyi Janes møøt ja Jambres, nayide'ents yø jade'emb'i jaa'y tkamibøjkmidi ja Dios yja'. Tum wenk ja wyinmaa'ñ yikyø'ødyi, ka'ap ja Dios jade'en kyupikyidi. ⁹ Ka' nugo ajawi myajada'aktit ja yja', kuwani yiknijawi ku ja myo'tpi winmaa'ñ nugo tyikmøjtøkiwya'andi. Nayide'ents yjajtmidøø ja namajtskpi midi twindsow ja mōjaa'y Moisés.

Midi ja Pablo yjaak'uktanipøkniip ja Timoteo

¹⁰ Mets Timoteo, øy tsuj mets ja n'ixpøjkin xyikyø'øyi. Nayide'en mjaa'y'aty sam ø njaa'y'atyi, tu'ugyi ja mwĩnmaa'ñ xyikyø'øj, ja øy'ajtin tuda'aky'ajtin jøts ja janchja'win. Nayide'en mjaty ¹¹ sam njajty sam ngubejtyin. Mnija'wip pøni sa njajty jam kajpjotp midi yiktejp Antioquia jøts nayide'en jam Iconio møøt ja Listra ku øts ja Dios yja' ngajpxwa'kxi. Jamts øts ja jaa'y xjem-duñ xeduñ, jøts øts nwindson'ajtim nja'myejch xjats ø møj xpudøjkiy'ñ. ¹² Janch tiy'ajtin yø', yikjemdu'undip yiktedu'undip pøn ja Cristo yja' nadyamiyoxwajniyip; ¹³ jøts ja' pøn ja myigu'uk nugo twin'øø'ndip kø'øm ja ñanktyu'tigøyidi, nisudso'ampy ja kya'øyidi ja yja'adi ku nugo jade'en ñawin'ñidi ja xem ja yam.

¹⁴ Mets Timoteo, tu'ugyi mets yø mja' jade'en xyikyø'øty sam tø x'ixpiky sa tø xnijawĩ. Mnija'wipxi pøn mduk'ejxi pøn mduk'ixpøjki, ¹⁵ ku yø mutskyi xnija'wiy'ñ yø Dios kyajpxy, midi xyikujajtaajkimp, midi xyiknitso'ok'ajtim ku njanchja'wa'ant ja nwindson'ajtim Jesucristo. ¹⁶ Tu'ugyi ja Dios kyajpxy ja y'ayuujk jade'en y'ity, sa ja tø yikwinmaa'nmyø'øty pøn tø tjaadyañ. Nay yø' xuknija'wamp ja tyiiby ja yjanchpi. Ku ndundigø'øyint ngajpxigø'øyint nay yø'øts xuknija'wimp ku yø pyøkyi. Xmø'øyimpts yø' ja xipøjkin sa ja øy'ajtin ja tuda'aky'ajtin njagyajpint, ¹⁷ jade'en'ampyts ja Dios yja' ka'pxy nnija'wa'ant jøts jade'en ndu'unint tum ja øybi tum ja tsujpi.

4

¹ Mets ixyam ndanipijkpy Dios Teety wyingujkp jøts nayide'en nwindson'ajtim Jesucristo wyingujkp midi nanky'ejiy'ip ja møj windsøn'ajtin pøn tiidyu'ump ja jujkpyi jøts ja øøkyi, ² jøts xkajpxwa'kxiyit ja yja'; tu'ugyi jade'en pojyi'iky xpadu'unt wan pøn mgupiky mgagupiky. Ana'am pøn tundigøøpy pøn kajpxigøøpy jøts xukja'gyukit. Jade'ents tuda'aky xuk'ext xuknija'wit ja xipøjkin. ³ Pyaatp ja xøøw ja jumøjt ku ja jaa'y tkawa'andit yø'øbi xipøjkin; pyikta'aktip ja' kyø'øm yik'ixpøjkipidi pøni sa ja ttsoktit pøni sa ja tmadowa'andit. ⁴ Yø tyiiby yjanchpi ka'ap yø ttsoktit, ja' yø ne'egi choktip ja kwenti ja madya'aky midi kayikja'gyukip. ⁵ Me Timoteo, tu'ugyi møk xyik'ett yø mwĩnmaa'ñ, møk nabyikta'agi øy ja ayo'on yaj'ity, nadyamiyoxi amumjoojt ja kajpxwa'kxin sa ja nitso'ok'ajtin nbaajint, tu'ugyi jade'en xyikyø'øty yø mdunk.

⁶ Jøts øts, tøts øts jade'en nadyamiyøxyi ja Dios yja', jøts øts yjawi tsojk ja o'jkin nbaatt. ⁷ Møk ø tø nwindani ja Dios yja' jøts øts jade'en nyikjøpkøjxni ja ndunk ja nwĩnmaa'ñ. Tø øts ja njanchja'win jade'en nmi'ity. ⁸ Ja øy'ajtin øts xjøp'ejxp jøts øts ja nbaatt, ja'agøjxp ku øts ja Dios tø xkupiky. Jaanimts øts ja nyikmo'ot ku ja tiidyu'unin ka'pxy xukpaajtint. Ni kidi øtsip ja nadyu'uk yikmo'op, niduki'iyi ja tpaattit pøn tjøp'ejx'ajttip jøts ja nwindson'ajtim mye'ent.

Ku ja Pablo ttukmadøy ja Timoteo sa tyu'unt

⁹ Tun wan ja may'ajt jøts tsojk mme'ent jøts ø x'ext; ¹⁰ pø tøxi øts ja Demas xmajststu'uty, kyø'øm winmaa'ñ ja yiktunwampi, jøts tø ñijky jam Tesalónikit kajpjotp. Jam øts ja Cresente tø nguexy Galacii y'etjotp, jøts ja Tito tø ñijky jam Dalmacia y'etjotp. ¹¹ Ja Lucas øts ixyam møøt njaak'ity. Ixa' jam ja Marcos jøts møøt mme'ent, jøts øts ja xpudøkit. ¹² Nayide'ents ja Tiquico tø nguexy jam Efeso kajpjotp. ¹³ Ku mme'ent, xyikmejnip øts ja nnixox midi

jam nyiktañ Carpo tyøjkjotp jam Troas; xja'myajtsip øts ja nlibri jøts øts ja nnøky xjadyimyikmejniti midi nyiktumpy.

¹⁴ Tø øts xmidundigø y møj ja Alejandro midi ka'tsp; Dios wyingujkpts ja tkubbatt pøni ti tø ttuñ. ¹⁵ Øyim mnay'ejx'etit møøt ja', jot'ambøjkp ja' ku ja Dios ja yja' yikajpxwa'kxi.

¹⁶ Ku øts myijawyeen nwinguwa'jkijii'ñ ja windsøndøjk ja kudunktøjk, nipøn ø xkabudøjkijii'ñ; xmajtstutkøjxnidi øts ja' niduki'iyi. Øts wamp jøts ja Dios ja kyadabayø'yidit. ¹⁷ Ja nwindson'ajtim øts xpudøjkijii'ñ jøts øts ja møk'ajtin xmøøy, jøts øts nyikyø'y ja kajpxwa'kxin sã ja nitso'ok'ajtin nbaajtint, jøts øts ndukmadøøy niduki'iyi pøn ka'israelit jaa'dyi. Jade'ents øts ojts ja nwindson'ajtim xuu'mø'y mã jaty øts n'ayo'ombaaty. ¹⁸ Xyiknitso'ok'ajtip øts ja nayide'en ja n'anmija'win jøts øts ngapaatt ja ka'øybi jøts ø xpøk'jø'økt jap tsajpjøtpy mã ja y'ity. iKunuu'kxy'ejtpim ja Dios xemikøjxp! Jade'en idø'on ja y'ejxi tyiyi.

Ku ja Pablo kyajpxpøø'kxy jøts ja kunuu'kxin t'ukyajkni

¹⁹ Kajpxpoo'kx jam ja Prisca møøt ja Aquila, jøts nayide'en ja Onesiforo ja myigu'uktøjk. ²⁰ Tø øts ja Erasto nyiktañ jam Corinto, tø ja Tróximo pya'ambety jam Mileto kajpjotp, paty øts jam tø nyiktañ. ²¹ Tsojk mme'ent ka'anin ja xuxpyoj tpaaty. Møj ja kajpxpoo'kxin mdaniguexyi ja Eubulo møøt ja Pudente. Nayide'ents ja kajpxpoo'kxin mdaniguexyi ja Lino, jøts ja Claudia, møøt niduki'iyi adøm nmigu'uk janchja'wibidi.

²² Møøt ja nwindson'ajtim Jesucristo m'ett, jøts niduki'iyi ja Dios mgunuu'kxidit. Jade'en idø'on ja yjatt.

JA NØKY MIDI JA PABLO TYANĠGAJX JA TITO

Yide'en yiknijayi ja Tito

¹ Pablo'ajtp øts, Dios Teety ø nmidumpy, jøts øts nwindson'ajtim Jesucristo ngudanaapy, ku øts ja xamigaxi jøts øts ja yja' ja ndukjanchja'wiyit pøn ja Dios Teety tø twi'ixy, jøts nayide'en tñijawidit ja tyiy'ajtin sa ja Dios øy tsuj yikpaduñ, ² jøts jade'en t'awejtixit ja jujky'ajtin midim xemikøjpx etp. Ya'atpi tsinaa'yin ja Dios kø'øm tø tni'adsowi namga'anim wyinaty ja naxwii'ñit cho'onda'aky. Niwindem xøow ja Dios Teety kyawindaay'aty, midim tø ttanibiktaagi, pyadumpy ja'. ³ Ku ja xøow ja jumøjt tø tpatni sam ja kø'øm tø ttanibiktaagi xjats ja kyajpxy tñanky'ejxit jøts øts idø'øn ngajpxwa'kxt midim øts ja Dios Teety yiknitsokpi tø xanipiky. ⁴ Ixyamts me Tito nñijayi. Ndyim'y'unkja'wip mets, ja'agøjpx ku tu'ugyi janchja'win ndamujkyim, jade'en øts ja tsojkin nmøøt'aty jøts xpaatt ja kunuu'kxy'ajtin ja pudøjkin jøts ja øy'ajtin midim ja Dios Teety yajkpy møøt ja nwindson'ajtim Jesucristo pøn adøm nyiknitsokpi'ajtyindip.

Ja tunkjøjpx midim ja Tito pyatwa'jkjy'i'ñ jam Creta

⁵ Ku mets jam nyiktaañ Creta, ja'agøjpx øts ja jade'en nduun jøts mets xyika'pxt xyik'abaadit ja tunkjøjpx midim øts jam wyinaty tø nyiktso'onda'aky. Jade'en ø nwa'añ ku mets tu'uk tu'uk xpikta'akt pøn tñimøjaa'y'atp ma jaty ñamyukyidi kajp kajp ja jaa'y pøn ja nwindson'ajtim tjanchja'widip. ⁶ Ja'abi møjaa'y'ajtpi mbikta'akp pøn øy tsuj tsinaapy, pøn niti windsø'yin, pøn tu'ugyi tmøøt'ajtp ja ñidø'øxy, jøts ja y'una'jk nay ja'abi janchja'win pyadundip, jøts øy tsuj ja chinaa'yin tyiknaxmidim. Myimadoodip ja tyeety, niti windsø'yin ja jade'en tkapaattit. ⁷ Pøn idø'øn jade'en tñigubajk'ajttip, pø ja Diosxi yja' ja y'ejx'ejtindip, paty idø'øn pyaat'aty kuwani øy ja chinaa'yin tyiknaxtit. Ka'ap idø'øn ja kyujuun'ajtin ja tyikmajada'aktit. Ka'ap winjaa windsojk y'akidit; ni ja amu'uky'ajtin ni ja tsep'ixaaky ja tkatunk'attit, jøts ka'ap ja meeñ nugo tjaa'xmukwa'andit. ⁸ Jabi yide'enxi dø'øn ne'egi ja chinaa'yin tyiknaxtit, yikja'ada'aktip o pøn jaa'y jam tyøjkjotp øy tsuj, tum ja øy'ajtin ja myigu'uk ja tyamidsoktip, ja'gyukin idø'øn ja myøøt'attip jøts tum ja' tyu'undip midim øy paat'ajtiyip. Pyadungøxtip idø'øn ja', midim ja Dios y'øyja'wip jøts ka'ap ja kyø'øm ja' tyikmajada'aktit. ⁹ Ja'ayi dø'øn ja tu'ugyi tyimyjanchjawidip ja tyi'ajtin midim tø nduk'ixpøkti, jøts jade'en ja myigu'uk ttakajpxjot'amøkidit ja'abi tñiyi'ixpøjkin, nayide'en ttukja'gyukidit pøn wyinaty t'agajpxukp ja'abi ixpøjkin.

¹⁰ Jabi mayxi ja jaa'y jaadi pøn tkamimadoodip ja Dios yja', sam winaagin ja israelit jaa'dyi pøn nugo jemgajpxtip tegajpxtip jøts ja myigu'uk twin'øøndi. ¹¹ Ja'abi jaa'dyi, amøñi pyaat'aty nyikta'anint, jøts ka'ap ja ka'øybi ixpøjkin ttuktawinmaa'ndyigø'ødyit tu'ukpi jøøn tu'ukpi tøj, ja meeñts ja nugo y'ixaadyip ku ja y'ixpøjkin tyakti.

¹² Nay yø kø'øm yide'en ojts ja myigugajp ñimadya'agyidi pøn wa'ats najtsja'wigyøjpx ti jaty tunip jatip, ja' yide'en waan: "Yide'en ja Creta jaa'y yujky'atti: o tyimdyaa'yidi, janch awa'andi, nuux'ajtin ja yikmajada'aktip jøts ja yji'lxy nugo ja tta'aa'wiywa'andi." ¹³ Janch idø'øn ja wyaañ; paty meets idø'øn møk xamigajpxtip ja chinaa'yin jøts jade'en tyikmøkidit ja yjanchja'win pøn ja nwindson'ajtim yja' tø tpadøjkiñidi. ¹⁴ Jøts ka'ap jade'en

nugo tmibøktit ja madya'aky midi yik'ø'yidip yikpaajtidip ja israelit jaa'dyi, ni tkamøjpiktaajkidit ja y'ana'amindi pøn jagam jixk'ø'om tyiktandip ja Dios tyiy'ajtin.

¹⁵ Pøn̄ts ja Dios yja' ja'ayi tpaduujnip, tyum'øy'ejxtip ja' midi ja Dios kø'om tø tyik'øyi, jamts ja'amidi pøn wamidip ku ja yikpøkpyety; paty ja jade'en ttejtī ku ja pøky ja ja'ayi twinmaa'n'atti jøts tum yikpøkpyajtpi t'ejxti; jabi agootstujpxyi ja wyinmaa'n ja y'etti jøts jade'en tka'ejxkapti midi øy uk midilits ka'øy. ¹⁶ Jade'en idø'øn ja chaachwa'andi kuk idø'øn ja Dios ja t'ijxyidi, pø sudso dø'øn ja Dios ja t'ijxyidi; jabi wenkts ja chinaa'yin ja tyiknaxti, ja kyawindiy'ajtin ja yikmajadaktip, ka'ap ja madoogukin ja wine'enin tmøødidi, nisudso'ampy ja ødyu'unin ja tkayikwingaxø'økti.

2

Ja tiībyi ixpøjkin

¹ Pøni midi mets Tito mnigajpxpy, ja tiībyi ixpøjkin idø'øn ja møøt ñabya'adit. ² Tuknijawi ja møjaa'dyøjkti jøts ejxkujk yjaa'y'attit, tuda'aky yikxon ñabyikta'agidit, jøts ja'gyukidip idø'øn yiktu'undip idø'øn ja wyiy'ajtin; møk tyik'ettit ja Dios'ajot'ajtin møøt ja tsojkin, møøt ja pa'ayo'owin jøts møøt ja tuda'aky'ajtin. ³ Jøts ja møjaa'dyø'øxy nayide'eni yjaa'y'ajtmidit sam pyaat'aty pøn ja Dios tpadundip. Ka'ap ja jigajpxk pagajpxk ja ttnk'attit, ni ja mu'ugyi ja ku'uxyi tkayikmajada'aktit. Øybi tsinaa'yin idø'øn ja ne'egi ñanky'ejxidip, ⁴ jøts jade'en ttuk'ejxtit ttuknijawidit ja tø'øxyøjk pøn nam amajtskidipnim sa ja ñiyaa'y sa ja y'u'nk y'una'jk ja møøt øy yikxon chøønidit tyanidit. ⁵ Myøøt'attip idø'øn ja ja'gyukin ja'adi. Tum ja wa'atspi tum ja øybi tsinaa'yin idø'øn ja pyadu'undip. Ja yjøøn ja tyøjk idø'øn ja' kyamijotkukidip, pøn jam tso'ondip ja'ttip myiduda'aky'attip idø'øn ja'. Pøni ti y'ane'empy ja ñiyaa'dyi, pyadu'undip idø'øn ja'. Jade'en idø'øn ya'at tpadungøxtit jøts ja Dios y'øgyajpxy ja y'ømyadya'aky kyayikjigajpxt kyayikpagajpxt.

⁶ Taguwani mets Tito ku ja wajtyøjkti ja ja'gyukin tmøøt'attit, ⁷ jøts idø'øn ja kø'om jawyean mjøøtunip pøni sa dø'øn ja øchinaa'yin tpadu'undit. Ku dø'øn ja wyinaty xkajpxwejwa'añ, yikxon idø'øn ja xnigajpxt, niti nixi'iky niti taxi'iky xkajawit. ⁸ Tiy ka'pxy idø'øn ja ixpøjkin xnanky'ejxit jøts ka' nipøn jade'en m'agajpxkuyit. Jøts kø'om ttatsø'ødyu'unt ja jaa'y pøn wyinaty nugo mjigajpxiyip mbagajpxiyip jabi ja'gyukidipxi ja kø'om ku meets ja tyi'ajtin xnigajpxy.

⁹ Kajpxwej ja tumbitøjkti jøts tpadungøxtit ja wyindsøndi; yikxon idø'øn ja yjaa'y'attit jøts ka' twindsø'odit ja wyindsøn. ¹⁰ Ka'ap idø'øn ja tma'jtsit ja pyikta'aky pøn ja yiktuujnip. Yiknigaxø'økp idø'øn ja y'øyjaa'y'ajtin jøts o pøn jaa'y jade'en tsujawit ja tsinaa'yin midi ja Dios yiknitsokpi yajkpy.

¹¹ Jabi tøxi ja Dios ja øy'ajtin tnanky'ijxyi midi tyiknitsø'okwamp tuki'iyi ja naxwii'ñit jaa'y; ¹² ja'agøjxpts ja Dios ja y'øy'ajtin tnanky'ijxyi jøts xuknija'wint jøts n'ixmajtsint midi ja Dios tkaminamyaa'jyip sam nayide'en midi n'am njotp xnimajada'akwa'andip, jøts ja tsinaa'yin ja nyiknajxint ja'gyuki køjxp, samdam nayide'en øy tiīy ja Dios ttsøky'aty jøts ja tu'ugyi nwindsø'jkant nwinja'want. ¹³ Nayide'en idø'øn ja xuknija'wim sa dø'øn n'aweixint jotkujk ja øy'ajtin, midi ja Dios kø'om tø tni'adsowi, ku ja mye'en kyida'akt aju'ukjotp, ja Jesucristo yiknitsokpi pøn ndios'ajtyindip. ¹⁴ Nagyøyajkiyi ja', jøts adømgøjxp ja xku'o'jkindi jøts jade'en axø'økpi yi-gaappi agujkpy nga'ejtindit, jøts jade'en nbaajtant tu'ugyi ja wa'ats'ajtin jøts ja'ayi nnadyamiyojxandit, jøts tum ja øybi n'amindip njotpindip.

¹⁵ Ya'at mets Tito idø'øn mnanky'ixpøkiyip, mgajpxjot'amøkip idø'øn, jøts nayide'en møk ja mgutujk xamigajpxt pøn tkamimadowandip ja'abi ixpøjkin. Kidi mets ja jaa'y kø'øm myik'amutskiniyi.

3

Sq dø'øn ja chinaa'yin tyiknaxtit pøn ja nwindson'ajtim tjanchja'widip

¹ Tukja'myatsti ku tkajpxkyupøktit ja windsøndøjkti samdam nayide'en ja kudunktøjk tmimado'odit, jøts tpadu'undit tuki'iyi ja ødyunk mididi wyinaty tøyiktaguwanidi. ² Nipøn idø'øn ja wenk tkanimadya'aktit, nika'idø'øn ja tsep ja t'ixa'adit. Ja øy'ajtin idø'øn ja ja'ayi yikmajada'aktip, ja tuda'aky'ajtin idø'øn nixem niyām ja myigu'uk tyamay'attip.

³ Jabi nayide'enxi adøm y'ijty ngakajpxkyupijkyim jøts ja Dios yja' ngamimadooja'am jøts jade'en nwidijtyim kube'ets kugoots. Tum ja axøø'kpi yigaappi y'ijty nyikmajadaajkyindip mididi n'amindip njopta'andip; jap adøm y'ijty ja nxøøw ja njumøjt nyiknajxyindi mā wyindsøn'aty ja ka'øy'ajtk møøt ja windi'iiñ'ajtk, øy y'ijty pøngapøn møøt ndyimñami'ambijkyindi, sam adøm idø'øn kø'øm y'ijty ndyimyjotkidaajkyim. ⁴ Kuts adøm ja Dios ja yiknitsokpi tnanky'eixøø ja y'øy'ajtin, sa ttsøky'aty ja naxwii'ñit jaa'y, ⁵ jade'en adøm idø'øn ja xyiknitsøjkyim, kaja'agøjxpi ja ttuuñ ku adøm ja øchinaa'yin wyinaty tøy nmoøt'ajtyim, jabi pa'ayo'oningøjxpxi dø'øn ja ojts xyiknitsøjkyim, xukyikniwaajchim ja nbøky jade'en jøts ja jemchinaa'yin ja Espiritu Santo xukpaajtyim. ⁶ Ja yiknitsokpi køjx ja nwindson'ajtim Jesucristo køjx ja Dios Teety tøy xmoø'øyim kawine'en ja Espiritu Santo jøts ja xpudøjka'am, ⁷ jøts ja Dios Teety y'øy'ajtingøjxpx kxupøjkindit jøts nyikmø'øyindit ja jujky'ajtin mididi xemikøjx etp mididi adøm n'awejx'ajtyindip.

⁸ Tyimdyiy idø'øn ya'at, paty øts idø'øn ndsøk'aty jøts mets winjaa windsojk xkajpxt ya'atpi ixpøjkin jøts jade'en pøn ja Dios tjanchja'widip tunkjøøjp'attit tum ja y'øybi tyiiyi. Tyum'ødyunguixpy ya'atpi ixpøjkin, øy yø pøngapøn t'ødyuñ. ⁹ Kidi xyikmøjtøki nugo ja kugoots madya'aky mididi niti kyawa'añ, jøts ka'ap ja apmadya'aky ja møjaa'y ayuujk nugo xunk'att, ni xkadatøkit pøn ja Moisés kyutujk nugo ttamadya'akpyattip. Ni mā ja tiy'ajtin ja' tkamøøt'atti.

¹⁰ Pøni jam pøn tnankñawya'kxwa'añidi ja Jesucristo yjanchja'wibitøjkti, tawindsø'øy tuk'ojkin uk majtsk'ojkin, kuts wyinaty mgamimadøyi, jagam ja x'ixwejtsnit; ¹¹ jabi jade'enxi mets xnijawit ku ja'abi jaa'y tøy ja chinaa'yin ja ka'øybi myimajadaajki jøts kø'øm ja pyøky ja ñi'øøniyi.

Ku ja Pablo ttanipiky ja kyø'øm jotmay ja Tito

¹² Ku me wyinaty ndanigaxi ja Artemas uk ja Tiquico, tun ja may'ajtin jøts øts waani wyinaty x'ats'ixy jam Nicópolis, jabi jamxi øts tøy ndanibiktaagi nyiknaxwa'añ ja et ja xøøw kunim ja møk xux ñaxt. ¹³ Tabudøki øy tigati ja nitanaabyi mididi yiktejp Zenas jøts nayide'en ja Apolos, mo' ja pudøjkin jøts yjaakwidettit kunim ja tyunk tyik'abaadidit nugo ku ti kya'ijtxyidi. ¹⁴ Nøjmi ja nmigu'uktøjkti pøn jamdi mets møøt jøts mbudøkiyidit, jøts jade'en tnijawidit sa ja øchinaa'yin wyingaxø'øt ku tpudøkidit ja myigu'uk pøn ti ka'ejtxip.

Ku ja Pablo kyajpxpø'kxy jøts ja kunuu'kxin t'ukyajkni

¹⁵ Pøn jaty øts ixyam møøt, mdanigajxidip ja kajpxpoo'kxin ja'. Tukja'myatstiduki'iyi ja nmigu'uktøjkti pøn jaty tu'ugyi ja janchja'win tmøøt'ajtmidip ku øøts ixyam ja kajpxpoo'kxin nguexy. Paat meets ja Dios kyunuu'kxin niduki'iyi. Jade'en idø'øn ja yjatt.

JA NØKY MIDI JA PABLO TYANĪGAJX JA FILEMÓN

Yide'en ja Pablo tnijayi ja Filemón

1-2 Øts idø'øn Pablo'ajtp. Øts yam tsumy ku nwindson'ajtim yja' nbaduujni. Ixyam mee nnijayi møøt yø Timoteo pøn jaty namyukidip jam mdøjkjotp, jøts nayide'en øø nja'myech ja ndsø' Apia jøts Arquipo midi nayide'en tump sam øts nduñ. ³ Paatti meets niduki'iyyi ja Dios Teety jøts ja nwindson'ajtim Jesucristo kyunuu'kxin møøt ja y'øy'ajtin.

Sa ja Filemón tjagyepy ja tsojkin ja pa'ayo'owin møøt ja Dios'ajot'ajtin

⁴ Ku øts ja Dios n'ajot'aty nxumikajxajkpy øts ja Dios ku me nja'myech, ⁵ ja'agøjxp ku tø nnijawi ku mets nayide'en xtsojki ja nwindson'ajtim Jesús yja', jøts pøn jaty ja janchja'wiyip. ⁶ N'amidøopy øts ja Dios jøts tjä'gyukiyidit yixxon ja y'øy'ajtin midi nbaajtyindip ku njanchja'wa'andi ja nwindson'ajtim. Wa'nts tum jade'en ttundi, pøni sa tø xukmadøy pøn jaty tø tpabøkti. ⁷ Janch jotkujk øts ixyam ku nmadøy ku xpa'ayøy ja mmigu'uk jøts xkajpxjot'amøki, jøts jade'en xyikjotkujk'aty.

Ku Pablo t'amidøy ja may'ajtin jøts yikupøkt jadigojk ja Onésimo

⁸ Øy øts ja Cristo kyutujk nayide'en njamøøt'aty jøts me n'ana'amt pøni ti jaty mdu'ump, ka'ats mets ixyam n'ana'amwa'añ ⁹ ja'agøjxp øts ixyam migu'uk'ajtingøjxp tu'uk ja may'ajt n'amidoowa'añ. Møjaa'ñip øts ixyam jøts tsumyim n'aily nwindson'ajtingøjxp, ¹⁰ paty mets n'amidøy ja may'ajtin jøts xkupøkt jadigojk ja Onésimo midi øts yam tø ndukja'gyuki ja Dios yja'.

¹¹ Ku ojts jawyeen nmøøtsinaay yø Onésimo, ka'ap øy y'ijty ti t'ødyuñ. N'ajot'ajtna'amp ixyam ¹² paty ndaniguexy jadigojk jøts xkupøkt, ¿kidits øts jeexyip xkupiky? ¹³ Jade'en ø njatsøky'aty jøts ja yam jeexyip tyañ, jøts øts ja jeexyip xpudøki sam mets jeexyip kø'øm xpudøki. ¹⁴ Ixyamts mets ja ndaniguexy ja'agøjxp ku ka'ap mibaat ja mgutujk njinajxit, jabi yide'enxi njawa'añ pøni xunwajnip meets ja may'ajtin, ka'ap ja xu'unt ana'amingøjxp, mgø'ømdsojkingøjxp idø'øn ja xu'unt. ¹⁵ Pø ja'agøjxp idø'øn ja ojts chøøn jøts ja mniwimbetiyit jadigojk xemikøjxp, ¹⁶ jits ka'ap jade'en x'ukyiktunit ejxim jiyujkin, jade'en xjawit ejxim n'uchin ejxim nmigu'ukin. Njanchpa'ayøøpy øts yø', jawaani møk mets yø xpa'ayo'ot, ka' nugo jaa'y x'ext, jade'en x'ext sam adømin, tøxi tpabiky ja nwindson'ajtim yja'.

¹⁷ Paty ø nwa'añ, pøni xmigu'ukja'wip øts, kupøk ejxim øts jeexyip xkupiky. ¹⁸ Pøni tø mmidundigøyi, uk japts mmiyojyiyi, øts ja ngubajtkøjxp. ¹⁹ Kø'øm øts ixyam nwa'añ jøts ngubajtkøxt ja yoj, paty ø kø'øm ndyimyja'ay; ka' yjawi njadukja'myajtswa'añ ku me tø mnañito'jknuyi. Kidim xjanchja'wiñi, taxi'iky yø'. ²⁰ Sam ø nwa'añ, tun waani ja may'ajt jøts ø xyikjotkujk'att ja'agøjxp ku tu'ugyi njanchja'windi ja nwindson'ajtim.

²¹ Nnajtsja'wip øts ku xpadungøxt sa jaty øts ixyam nwa'añ. ²² Jøts nayide'en x'awejxtip øts; jotmøñ mee nninijkxy sa jam ja Dios x'amidowdi.

Ku ja Pablo t'ukyajkni ja kajpxpoo'kxin jøts ja kunuu'kxin

²³ Nayide'en mdaniguexyidi ja kajxpoo'kxin ja Epafra, pøn øts ixyam møøt ndsumchøøni nwindson'ajtingøjxp. ²⁴ Nayi kyajxtip ja kajxpoo'kxin ja Marcos, møøt ja Aristarco, møøt ja Demas jøts ja Lucas, midi øts xpudøjkidip.

²⁵ Mbaajtidip ja nwindson'ajtim Jesucristo kyunuu'kxin ja y'øy'ajtin. Jade'en idø'øn ja yjatt.

JA NØKY MIDI YIKTANIJA'AYIDØØ JA HEBREOS JAA'DYI

Dios U'nk køjxp adøm ja Dios Teety xmigajpxyim

¹ Janch tigach idø'øn ja Dios Teety y'ijty nanky'ijxyiyi, ku dø'øn ja kyugajpxy ttuknijawiwya'añ pøni ti jaty idø'øn ja tyukmadowampy ja møjaa'dyøjkti. ² Ixyamnim idø'øn ja kyø'øm U'nk kugajpxy tø tkexy. Y'U'nk køjxp idø'øn ja Dios Teety ojts tuki'iyi tyik'øyi ja naajx jøts ja tsajp, jøts nay ja y'U'nk tø ttagidøjkiguixy køx kida'ak midi ja wyinaty tø tyik'øyi. ³ Ja Dios U'nk idø'øn tnanky'ejxip ja Dios Teety ja myøj'ajtjn, jøts nayi ja' ja tnanky'ejxip sa dø'øn ja Dios Teety t'ixy; nay ja'ats ja myøkwinmaa'ñ ja myøk'ayuujk tpatanaagyøjxp tuktsajp'agida'aky ja pikta'aky midi ja Dios Teety tø tyikøjy. Ja Dios Teety ja møøt yikutuky y'aga'ngyøj'øm jam tsajpiotp, ku adøm ja yä jawyeen tø x'ukyikpojkiwaajchim.

Jawaani møj ja Dios U'nk, ka'ap ja ankilis jade'endi

⁴ Tø ja Dios U'nk jawaani møj wyimbidsimy jøts ja Dios Teety y'ankilis ne'egi ka', ja'agøjxp ku ja Dios U'nk tø tmidañ jawaani møj ja kutujk. ⁵ Jabi nijuunixi ja Dios Teety tkanimaay tu'uk ja y'ankilis yide'en:

Mets idø'øn n'U'nk'ajtpy;

øts mets ja jujky'ajtjn ti nmø'øy,

ni ja Dios Teety tkanimaamyi tu'uk ja y'ankilis:

Øts me n'u'nk'atp,

jøts øts me xeety'atp.

⁶ Yide'ents tø wyami ku ja myøjt'u'umts U'nk tø xaniguejxyim yä naxwiifñ:

Wan niduki'iyi øts ja n'ankilis mwindsø'øgiyi.

⁷ Ku ja y'ankilis tnimadyajkmi, yide'en ja Dios Teety wya'añ:

Øy øts ja n'ankilis o sa nnanky'ejxyit,

nayide'en sam ja pojjn, uk sam ja jøøn yowin.

⁸ Kuts ja y'U'nk tnimadya'aky yide'ents ja tnimaamyi:

Xemikøjxp me Dios U'nk mgutujk y'ity;

tij mets mgutujk ja mdiidyu'unin y'ity.

⁹ Mdsøky'ajtpy mets ja tyiiby; jøts ka' x'ejxwa'añ ja ka'øbyi;

paty ja mDios Teety jawaani øy ja jotkujk'ajtjn tø mmø'øyi,

jøts ni ka'ap jade'en o pøn tø yiktuñ.

¹⁰ jøts nayide'en wyami:

Mets Dios U'nk, tø xanibiktaajkguixy tuki'iyi ku yø naxwii'ñit tø xyikøjy,

jøts mgø'jotp ja tsajp tø pyidsimy.

¹¹ Køxtip naxtip yø', jøts mets xemikøjxp me mdañ.

Nayide'en yø yjattit sam wet pyachi;

¹² jøts mets ja xpøkjø'økt ane'eky ade'kxy, jøts jadigojk xyikjemyit xyik'øyt.

Mets idø'øn xemikøjxp jade'eñim m'ejtp, nijuuni xøøw mets mdsinaa'yin

kyakixy.

¹³ Jøts nijuuni ja Dios Teety tu'uk ja y'ankilis tkanimaay:

Yä yikutuk n'aga'ngyøji'jy,

kunimts mets mmidsep nduktekpya'an'att.

¹⁴ Dios Teety idø'øn myidundip niduki'iyi ja ankilis, nayi Dios Teetyts kajxidip jøts tpuðøkidit pøn jaty ja nitso'ok'ajtjn tkupøkwandip.

2

Ka'ap ja nitso'ok'ajtin ngamøjpiktaajkin

¹ Ja'agøjxp idø'on nyikmøja'am nyikøjxpa'am pøni sa tø nmadø'øyim jøts kidi ja nwinmaa'ñ nyiktigajchim, tu'ugyi ja nyikyø'øyim. ² Tø dø'on ja ayuujk yjanchwindiy midi ja ankilis ja israelit jaa'y tyukmadowdi, pøn jatyts ja tkabadundøø, yiktiidyundi ja', jøts ja ayo'on yikmøødyøø sam idø'on pyaat'atyiyi. ³ Pøni jade'endam ja yjaittøø, ¿sudsots adøm idø'on ndejint nga'ayo'ombaaajtindit pøni ka'ap adøm ja møj nitso'ok'ajtin nmøjpiktaajkyim? Jabi jawyeenxi ja nwindson'ajtim kø'øm tø tnigajpxy, pønts ja tpatmadoojidøø, tøts ja ayuujk ja jawyeen tiibyøkti jøts ja tø ttsøonidi, jitsnim øøts ja tø xukmadøy. ⁴ Tøts ja Dios Teety nayide'en kø'øm tyaky ja ejx-pajt ku dø'on ja y'ayuujk ja wyindiy, ku ijxyimbi ka'ijxyimbi tyiknaxkida'aky, nayide'en ja Dios Espiritu Santo tø xmø'øyim ja møk'ajtin sam ja kija' tø xamidsøjkyim.

Nayide'en ja Jesucristo yjaa'yjajty sam ja myigu'uk naxwii'ñit jaa'y

⁵ Ja tsinaa'yin ja juiky'ajtin midi memp ja'tp Cristo køjxp, midi øts icyam nnigajpxpy, ka'ap ja ankilistøjk ja mihaat tniwindsøn'attit. ⁶ Jabi yide'enxi ja David ja Dios Teety t'ajot'aty jøts ja tø tjaadya'n:

¿Tyimbyøn idø'on yø jaa'y'ajtp ku yø niwine'en xkaja'dyigøy?

¿Ti tyimbyøn idø'on yø naxwii'ñit jaa'y midi oo'kp tigøøpy ku yø xmi jotigøy?

⁷ Tø yø waani x'atsyik'amutski jøts tø x'atmøjpikta'aky ja m'ankilis,

ixyamts ne'egi jawaani møj tø xmø'øy ja møj'ajtin jøts ja øy'ajtin,

⁸ jøts tuktsajp'agida'aky tyikutujkøxt.

Ku dø'on ja Dios tuki'iyi tø ttagidøjkiguixy ja jaa'y, niti dø'on ja tø tkayikta'n midi ja jaa'y kya'ana'amp. Ots ja yjade'eni, ka'anims adøm n'ijxyim ku tuki'iyi myimadooguixyi. ⁹ N'ijxyindipts adøm ja Jesús pøn ja Dios Teety waani tø t'atsyik'amutski, ni ja ankilis tø tka'atmibaat'aty. Tøts icyam tmøøgyojmi ja møj'ajtin jøts ja windsø'jkin jawaani møj, ja'agøjxp ku ja o'jkin ja tø tkupiky, ku ja Dios Teety ja jade'en tø tyamidsøkyiyi jøts adøm ja xku'o'jka'ant.

¹⁰ Dios Teety køjxp tuki'iyi y'ijty, jøts tum ja' idø'on paat'ajtiyip; ja'ats ja Dios Teety chøjkpy jøts nayide'en ja y'u'nk ja myaay tpaattit ja øy'ajtin. Paty idø'on ja Dios Teety tø ttamidsøky ja nwindson'ajtim Jesucristo jøts ja y'ayo'owin jøts ja y'o'jkin jade'en ttuktabaja'ñaxy, sa dø'on ja naxwii'ñit jaa'y y'ejxidi tyiyidi, jits jade'en jawaani øy xukja'gyukant sudso ja nitsoojkin nbaajtint.

¹¹ Jabi nay ja'axi ja tyeety'ajttip pøn jaty tø pyojkpiwa'atsti, jøts nay ja'ats ja tyeety'ajtmip pøn yikpojkiwatsp. Paty ja Dios U'nk tkadatsø'odyuñ ku adøm ja xmiga'axa'am, ¹² sam jap wya'añ nøkyjøtpy:

Mets Dios Teety idø'on nnimadya'akp ku øts ja nmiga'ax nmigajpxt,

jøts tu'ugyi øø wyinaty n'iy mets køjxp.

¹³ Jøts nayide'en jap jaabyety wyami:

N'awejax'etp øts ja Dios Teety.

Jøts abiky ñømgøjmi:

Ixyam ø møøt n'u'nk n'una'jk, midi øts ja Dios Teety tø xmø'øy.

¹⁴ Jade'en sam ja naxwii'ñit jaa'y ja juiky'ajtin tmøøt'ajttøø, ja'agøjxp idø'on ja nwindson'ajtim Jesucristo yjaa'yjajty jøts jade'en ja o'jkin tkupøkt, jøts jade'en tmimajada'aky ja miku' midi ja o'jkin tniwindsøn'ajtp.

¹⁵ Jade'en ja nitso'ok'ajtin xuktajotkujk'ajtant jøts jade'eñi dø'on ja o'jkin nga'uktsø'jkiñant. ¹⁶ Wa'ats yikja'gyuki ku ja nwindson'ajtim ja' tkanimiñ

jøts ja ankilis tpuðokit, jabi tum naɣwii'ñit jaa'yxi ja ja'ayi ñimimpy, pøn teety'amøjkojpk'ajttip ja Abraham. ¹⁷ Ja'agøjxpts ja nayide'en yjaa'yjajty sam ja myigu'uk naɣwii'ñit jaa'y, jøts jade'en t'ayo'ext sam nayide'en ja Dios Teety tpadun'ett, ku ja kyø'øm o'jkin ja ttayikpojkpwa'ach ja naɣwii'ñit jaa'y. Ja'agøjxp idø'øn ja amuun ndeety'ajtyindi. ¹⁸ Tø dø'øn ja jawieen ttanaxy ja ayo'on, ja winmaa'ñi, jøts nayide'en yikxon tø yikwinmaa'ñi'ixy, paty idø'øn myayi ja pudøjkin pøn jaty nayide'en ya jajtíp kubajttíp.

3

Jawaani møj ja Jesús, ka'ap ja Moisés

¹ Kunuu'kxy mee migu'uktøjkti, meetspi dø'øn mbaat'ajtiyíp jøts yikxon x'ejxtit ja Cristo Jesús, pøn tø nyiktaniguexyindi jøts pøn ndeety'ajtyindíp, ja'agøjxp ku meets idø'øn ja Dios Teety tø mwi'ijxyidi jøts ja mja'atiyidít. ² Ejtp ja Jesús tiy ja Dios Teety tmimadøy pøni ti ja tø tyaguwaníyí, sam ja Moisés nayide'en tu'ugyi tmiduun ja Dios Teety ma ja janchja'wibi jamdi. ³ Jawaani møjts ja Jesús ja wyindsø'jkin pyaadyi jøts nika' jade'en ja Moisés, nayide'en idø'øn ja tpaaty, sa jawaani møj yikwindsø'øgi ja tøjkojpi jøts nika'ap ja tøj jade'en. ⁴ Ots idø'øn ja jaa'y may yjadøjkojti, tum ja Dios Teety tuki'iyi tø ttanibiktaagi wine'en ijty tuktsajp'agida'aky. ⁵ Janch øy idø'øn ja Moisés yjatuun, ku ja janchja'wibitøjk ttukmadøøy ja Dios kyajpxy y'ayuujk, pøni ti dø'øn ja wyinaty tyunwampy ja Dios. ⁶ Tu'ugyits adim ja Cristo xpawinmaa'yim wine'en adøm njanchja'wa'am, ja'agøjxp ku ja tkøjø'mit'ajtkixy, pø Diosxi ja' ja y'u'nk. Ja' tsojkip jøts møk ja winmaa'ñi nbiktaajkint, jits jotkujk n'aweixint ja øy'ajtin midí memp midí ja'tp.

Ja janchja'wibi pyoo'kxinxøøwdi Dios wyingujk

⁷ Paty yide'en ja Dios Espíritu Santo wya'añ, sam jap jaabyety y'ity nøkyjxpy:

Pøni mmadøøpy meets ja Dios Teety kyajpxy ixyam,

⁸ kidi jade'en mgujuun'atti sam ja jaa'y ttundi jam abak etjotp, ku tkagupøjkti ja Dios,

jøts ja yujy'ajtin nugo ttaguyajtidi.

⁹ Jam øts idø'øn ja m'apteety m'aptaak xwinmaa'nmyø'ejxti, øyi ja tja'ejxti tjanija'widi ja ijxyimbi ka'ijxyimbi wixijky jumøjt midí jaty øts jam njatungunajxpy.

¹⁰ Paty øts idø'øn n'atsmi'ambøjkti,

winets ø nwaañ: "Ejtp mee mjadigøy m'anmija'wingøjxp,

jøts ka' xtsojkti jøts øts ja nduu' xpaduujnidit."

¹¹ Ja' øts idø'øn ja ndami'ambøjkti, jøts ø nwandaajky ku kyatøkidit ma øts ja n'uktamidsojkti.

¹² Migu'uktøjkti, nay'ejx'etidim tu'uk jadu'uk, jøts xkamajstuttit ja Dios ja yikujky'ajtpi, jøts ja' ejtp xjanchjawidit. ¹³ Nay jaakjamnim ja xøøw ja jumøjt, nagyajpxjot'amøjkiyidi xem yam jabom jabom, jøts ja pøky mgawin'øønidit, jøts ja Dios ejtp xmimado'odit. ¹⁴ Pøni tu'ugyi nyikyø'øyim ja janchja'win pøni sa ja tø nyiktso'ondaajkyim, kuwani ja Cristo møøt nbaajtin ja øy'ajtin.

¹⁵ Paty xja'myatstit ku ja ayuujk wya'añ:

Pøni mmadøøpy meets ja Dios Teety kyajpxy ixyam,

ka'ap nayide'en mgujuun'attit sam ja

ttundøø pøn ja Dios Teety tkamimadoodøø.

¹⁶ ¿Põnts idø'øn ja Dios kyajpxy tjamadoodøø jøts ja tka'ukpadunidøø? Ja' dø'øn jade'en adøtsti pøn ja Moisés yik'awa'atspidsøøm jam Egipto etjotp. ¹⁷ ¿Põnts idø'øn ja Dios myijotma'jt wixijkxy jumøjt? Ja'ats idø'øn jade'en jajtøø pøn jaty pøkyundi, jøts ja jamyi abak etjotp y'oo'ktøø. ¹⁸ ¿Põnts idø'øn ja Dios tyamiwandaajki ku ja kyatøkidit ma' dø'øn ja Dios wyinaty tø y'uktamidsøkyidi? Ja' dø'øn ja'adi pøn tkamimadowdi ja Dios. ¹⁹ Ixyats adøm n'ixyym, ja'agøjxp ja øy'ajtin ja tkapaattøø ku ja Dios ja tkamibøjktøø.

4

¹ Ka'anim ja tpaaty jøts adøm ja Dios Teety nmøøtnøjkxna'ant poo'kxpi, paty idø'øn tsø'øgi jawi ndsinaa'yinditnim ja ku wyinaty pøn nidu'ugin kyanaxy. ² Nayide'en adøm tø nyiktukmadø'øyim ja nitsoojkin ayuujk, sam ja møjaa'dyøjk yjayiktukmadowdi; ka'apts ja ti øy'ajtin tpaatti ja kuxi ja tkamibøjktøø øy ja tjamadoodøø. ³ Adømts idø'øn ja Dios Teety møøt nbaajtint ja poo'kxin ku adøm ja tø nmibijkyim, jabi yide'enxi ja Dios kø'øm tø wya'añ: Ja'agøjxp øts idø'øn ja nmi'ambøjkti ku øts ja xkamibøjktøø, jøts øts ndyimñimy ku nijuuni xøøw xkamøøtpoo'kxtit. Jade'en idø'øn ja Dios wya'añ, øy ja wyinaty ja tyunk tøjayik'abajtyini ku ja wyinaty tuki'iyyi tø tyikojkixy, jøts t'agajpxujky jøts ja tpaattit ja poo'kxin pøn mimadoojip; ⁴ pø japxi nayide'en jaabyety y'ity ti dø'øn ja Dios Teety tyuun kyiwixujk xøøw:

Poo'kx ja Dios kyiwixujk xøøw ku ja tyunk tyik'abajtyiñ.

⁵ Jøts nayide'en jap jaabyetyimi:

Ka'ap øts ja xmøøtpoo'kxtit pøn xkamibøjktip.

⁶ Ka'anim ja jaa'y ñiga'pxidi jøts tpaattit ja poo'kxaajk, øy ja tø tjamadowdi ja nitsoojkin ayuujk, ka'ap ja poo'kxaajk ja tø tpaatti ku ja tø kyamadowdi;

⁷ paty ja Dios Teety jadu'uk ja xøøw ja et tø tñigajpxy midi adøm ixyam n'ixyindip ndsinaa'yindip, jabi Davidxi dø'øn ja Dios kyajpxy yiktumpy ku ja wya'añ sa jap jaabyety y'ity nøkyijpxy:

Pøni mmadøøpy meets ja Dios kyajpxy ja y'ayuujk, kidi xkamibøkti.

⁸ Ku ja Josué jeexyip ja israelit jaa'y ja poo'kxin ti tmøøñi, ka'ap ja Dios Teety jeexyip jadu'uk ja xøøw ja et tñigajpxy ma' ja poo'kxin yikyakt. ⁹ Patyts idø'øn y'awejx'ityiyi ja kunuu'kxy poo'kxin, niduki'iyyi pøn ja Dios tjanchnja'widip.

¹⁰ Pøn ja Dios Teety møøt pyøø'kxy, nayi tø ja wyinaty ya naxwiiñ tyikixy ja y'ødyu'unin. Jotkujk idø'øn ja pyoo'kxnit sam ja Dios pyøø'kxy ku tyik'abajtyiñ ja tyunk tuktsajp'agida'aky. ¹¹ Kuwanits nmijotigø'øyindit jøts ja'abi poo'kxin nijum nbaajtindit, jøts nipøn tkabadu'unt ja jaa'y pøn tkamibøjkti ja Dios.

¹² Jabi xemikøjpxi ja Dios Teety y'ayuujk y'ity, jøts jawaani wenk yikt-saachi myøk'ajtingøjxp, niti tsujx adsow jøpi jade'en kyayiktsaachi, ja kuxi tyimya'aty anmija'winjotp jøts jade'en tnanky'iixyiyi pøni ti yiktunwamp uk yikwinmaa'ñ'ajtp. ¹³ Niti dø'øn ja Dios tkayu'uchjawi, tyumnija'wigyijpxy ja' tuki'iyyi jøts ja' idø'øn wyinaty nwinguwa'jka'amp jøts ndsinaa'yin ndagidøjkant.

Ja Jesucristo idø'øn tu'uk mõjteetywindson

¹⁴ Ja Jesús midi dø'øn Dios U'nk'ajtip, ja' adøm idø'øn njawanimøjteety'ajtyindip, ja'ats idø'øn ja Dios Teety tø twinguwa'agi, paty adøm idø'øn ja nDiosja'myajtsin møk nyik'ejtint. ¹⁵ Xja'gyuka'amp adøm ja Jesús midi dø'øn mõjteety'ajtp, ja'agøjxp ku ja tñijawi sa adøm

ndsinaa'yim ya. Pø tøxi ja nayide'en ja ka'øwynmaa'ñ yjayikmø'øy jøts ja tø tkagupiky, jøts jade'en ja pøky tø tkatuñ. ¹⁶ Tja'myejchims ja Dios, jøts wan tninijksyim jotkujk jøts n'amido'owint pya'ayo'owingøjxp ja pudøjkin ma ngamajadaajkyim.

5

¹ Wi'ijxy idø'on jam israel kajpkøjxp, tu'uk jadu'uk ja teety, jøts tø yikpikta'aky jaa'gyudanaabyi, jøts ja jiyujk'øøky ja Dios ttawindsø'øgidit ttawinjawidit jøts idø'on ja jaa'y pyøky ñiwa'adsiyit jøts ja Dios tmaa'kxt.

² Kumi nayide'en yø teetyti pyojkpitumbijaa'yidi, paty yø tja'gyukidi pøn jaty tsuj kadsinaadyip jøts pøn jaty tundigøødyip; ³ ja'agøjxpts idø'on ja wyindsø'jkin tpikta'akti ku ja nayide'en pyojkpitumbijaa'y'ajitti, jøts ku ja jaa'y tkudanidi.

⁴ Nipøn ja kø'øm kyanankteetyepidsimyi; ja Dios Teety idø'on ja møøjyip, jøts nay ja' idø'on tkunuu'kxp tkuwamp sam yiktuñ ja Aarón pøn myidu'ukpi møjteety'ajti ja israelit jaa'y. ⁵ Nayide'en yjajty ja Cristo; ka'ap ja kø'øm ñankmyøjteetyepidsøjmi, ja Dios Teety ja møøjyi ku dø'on ja ñimaajyi:

Mets idø'on n'U'nk'ajtp;

øts mets ja jujky'ajtin ya tø nmø'øy.

⁶ Jøts ku nayide'en ja Dios Teety wyaamaa:

Mets idø'on xemikøjxp møjteety'atp,

jøts jade'en mdu'unt sam ja Melquisedec ttuñ.

⁷ Møk ja Cristo ja Dios Teety twingajpxajky tminuu'kxajky ku ya chinaay naxwiin, jøts twinjiy twinyaaajxy ja Dios Teety, midi tmøøt'ajtp ja kutujk jøts ja o'jkin tkapaat tka'ext, jøts ja Dios Teety myadooju ku ja tu'ugyi yikxon t'ajot'aty. ⁸ Kuwani dø'on ja Cristo ja ayo'on tkupøjki sam adøm, øy ja yjaDios U'ngi, kuwani ja tø tnanky'ijxyi ja mado'owin; ⁹ kuts ja jade'en tja'gyukyiyi'ñ ja naxwiil'ñit ayo'on, jade'ents tmibaat'ajty sudso ja yiknitsoojkin ka'pxy tmo'tøn jaty ja mimadojyip, ¹⁰ ja'agøjxp ku møjteetywindsøn ja Dios Teety wyinaty tø pyiktaajknii sam ja Melquisedec y'ijty teety'aty.

Yik'ejxtip ja janchja'win ku ja jotmøñ yikmajstutnit

¹¹ Kajaanim ja kyayiknigajpxy ja'atpi ayuujk ja'agøjxp ku meets yjaw i xkaja'gyukiwya'añ, jade'en'ampyts inet idø'on ja yjaw ngajatt sudso ndukmado'odit. ¹² Meetspik idø'on jeexyip mdukyikyuujnidiip ja mmigu'uktøjkti, kawinaak xøøw ja m'ixpøjkin xjayikyø'ñidi jøts ni jade'enbaat xkaja'gyukidinim ja ixpøjkin midi ka' mabaat chepi.

Ne'egi jade'en meets yjawi mwimbejtini sam ja mutskøn'k ja'ayi ja che'tsknøø tkupiky, jøts ka'ap ja kaaky ja tojx ja ttsøky. ¹³ Maxu'ngin idø'on ndejint wyinmay pøn tkaja'gyukipnim sudso n'øchinaa'yint, kuts ja nduk'ixpøkwa'anin midi niwyaani tsep ka'ap ja tkupiky, nayide'en idø'on ja' sam ja maxu'nk ja'ayi tkupiky ja che'tsknøø jøts ka'ap ja wenkpi jii'kxy.

¹⁴ Pønts tjajtñip t'ixa'at ja øybi uk ja kya'øybi, ja'ats ja Dios y'ixpøjkin tnijawiwyangøjxp øy ja wine'en yjatsepi jøts yikja'gyukit.

6

¹ Jade'en nyiktaa'nint pøni ti jaty jawyeen tø nyiktukmadø'øyim, ku ja Cristo tønjanchnja'wa'am, jøts ja Dios yja' njaaknija'wigyojint jøts ja ja'gyukin nmøøt'ajtint. Ka'ap ja nugo ngajpxjimbejtint ngajpx'adøjint sudso nma-jtstuujtint ja ka'øy chinaa'yin, midi ja o'jkin tukpatp, jøts sudso ja Dios njanchnja'windit, ² jøts pøni ti dø'on nøbajtin'ajtp, pøni sudso jaa'y tkunuu'kxy

ja myigu'uk, jøts sudso ja jaa'y yjujkyøktit jadigojk, jøts sudso ja taidu'unin y'ett. ³ Paty adøm nja'uknijawigyojint põni ti jaty yiktukmado'owimp, põni jade'en ja Dios xamidsøjkyim.

⁴ Ku põn jaa'y tuk'ojkyi tø ttajotkujktøki ja Dios y'ixpøjkin, ku ja Espiritu Santo tø yikwijyidi yikejyidi ⁵ jøts ja Dios kyajpxy nekim tø t'ukupøkti, jøts nayide'en tø tyatøkiyidi ja Dios chojkin ja myøk'ajtin midì ixyam jøts midì xemikøjxp ejtp. ⁶ Pøni tø ja tjä'dyigøydi ja Dios jøts ja kyø'øm ka'øchinaa'yin ja tø t'awimbetidi jadigojk, nisudso ja kya'ukjotimbejtñidit ku ja Dios U'nk ja kyiruspajtin jade'en nugo ttaguyajtidi, jits ja nugo o magama taxe'ekti. ⁷ Jade'ents ja yjatti sam ja naajx ku tyu'uy, y'uktichp nøø, kuts ja pikta'aky jam yikxon y'ity jøts ja tyikjotkujk'aty põn jaty tø ñe'epiti. Dios idø'øn ja kunuu'kxip ja naajx. ⁸ Kuts ja pikta'aky ja tkayik'ity, ku nugo ujts jøts kujp tyik'ity, tits ja wya'ant, ka'ap ja y'øyi. Mi'ambøjkipts ja Dios ja' jøtsnim ja yiknitsa'att.

Jade'en idø'øn ndejint ja naaxwii'ñit jaa'dyi.

Ja awejx'ajtin midì jotkujk xyik'ejtimp

⁹ Ots ø migu'uktøjk jade'en njakajpxy, njanchja'wipst øts, ku meets ja Dios tø mgunuu'kxyiyi, ku tø myikmo'odi ja nitso'ok'ajtin. ¹⁰ Pø janch tixyi ja Dios jits ka'ap ja mdajaa'dyigøyidit põni ti jaty meets ja tø xuujni, jøts ku ja tø xuk'ejxti wine'enin ja xtsojkti, ku ja mmigu'uk midì nayide'en tjanchja'widip ja Jesús tø xpudøkidi, midì meets ixyam mjaaktun'adichpñim. ¹¹ Ja'ats øø ndsøjkpy, jøts meets jade'en mdsinaa'yin xyikyø'ødyit jotkujk jøts tsuj, kunim ja øy'ajtin xpaattit midì m'awejxtip. ¹² Ka'ap øø ndsøky jøts mee mnuux'ookt, ja' øø ndsøjkpy jøts ja jaa'y xpa'ejxtit põn jaty ja øy'ajtin tpaattip y'awejx'ajtingøjxp ku ja Dios tjanchjawidi.

¹³ Jade'en ja mõjaa'y Abraham yjajty ku ja Dios tyamini'adso'owiyi ja øy'ajtin. Kyø'øm jujky'ajtin ja Dios tyakajpx, ja'agøjxp ku wyinaty nipøn jawaani mõj kya'ity; ¹⁴ xjats yide'en ja Abraham yiknimaay: "Ngunuu'kxp mets, jøts ja m'u'nk m'ap nyiknamayit." ¹⁵ Tuda'aky ja Abraham ja t'awejx'ijty midì idø'øn ja Dios ñigajpx, jøts ja Dios ja myøøjyi midì wyinaty tø tyamidsøkyi. ¹⁶ Ku jaa'y tigati ttamøjtøkiwya'andi ttajanchtøkiwya'andi, ja' ja y'agajpxtip põn jawaani mõj, jøts ja nisa kya'ukyiknimaañidit. ¹⁷ Paty idø'øn ja Dios ojts ja kyajpxy tyimyiktañ, jøts ja yikjanchjawit ja y'ayuujk, jøts ku ja tuki'iyi tpadu'unt põni ti jaty ja wyinaty tø ttamidsøky ja jaa'y. ¹⁸ Majtsk idø'øn ja winmaa'ñ midì ja Dios myøøt'ajtpy jøts ka'ap ja taay'ajtingøjxp ttuñ; tu'uk ja wyandaajkin midì adøm idø'øn xamidsojkimp, jøts tu'uk ja kyajpxy y'ayuujk midì ja awejx'ajtin xmø'øyimp ku ja wyandaajkin ja tpadu'unt. Jade'ents adøm ja Dios xyikjotkujk'ajtyim, jøts n'awijxyimpts adøm põni ti dø'øn xmø'øyimp. ¹⁹ Ya'at awejxin adøm idø'øn ja n'amija'win tu'ugyi xyik'ejtindip, sam ja kudii'byajt tu'ugyi tyik'ity ja pikta'aky, midì'its adøm idø'øn nadyagumajtsa'amp jøts adøm ja Dios nbaajtant. ²⁰ Jam idø'øn ja møk y'ity tsajpjotp ma ja Cristo jawyeen tø tyøki jøts ja tuu' tyik'awa'atst, jøts idø'øn ja jade'en xemikøjxp tø tyañ mõjteetywindsøn sam ja Melquisedec.

7

Nayide'en ja Jesús tyeety'aty sam ja Melquisedec

¹ Salemit windsøn idø'øn y'ijty ja Melquisedec jøts ja tsajpjotp Dios tñideety'ajtmì. Kuts idø'øn ja Abraham wyinaty ja myidsep tø tmimajada'aky ixats idø'øn ja Melquisedec ojts y'atspaatsøyi jøts kyunuu'kxi. ² Jøts ja

Abraham tmøøy tukpiky ja majkpkipyi pikta'aky põni ti jaty idø'øn ja wyinaty tø t'atspiky. "Ka'pxy tiidyumbi windsøn" idø'øn ja Melquisedec y'ayuujkpidsimy; kuts ja tñiwindsøn'aty ja Salem kajp midì tyijpy "jotkujk'ajtin", ixyats ja Melquisedec wyimbidsømni "ja windsøn põn kyajp ttamidsojpk ja øy'ajtin jøts ja jotkujk'ajtin." ³ Ka'ats idø'øn ja teety tyaaq ja põn, ni myigu'uk; ku dø'øn ja ñanky'ejxpajti, ni kyayiknigajpxmi ja kya'axin jøts ja y'o'jkin; paty idø'øn ja Dios U'ngin t'ixy, ja teety midì xemikøjxp teety'ajtp.

⁴ Janch mõjts idø'øn ja Melquisedec wyimbidsimy, ku dø'øn ja Abraham, midì adøm ndeety'amøjkojpk'ajtyindip, ja tmøøy tukpiky ja myajkpkipyi pikta'aky midì ja wyinaty tø t'atspøjkxi ja myidsep. ⁵ Jade'en ja Moisés kyutujk yjawa'añ jøts ja teety põn yiktso'ondaajkidi ja Levi jøts t'amido'odit ja jaa'y tukpiky ja myajkpkipyi pikta'aky, øy ja tjamigu'ugidi, uk tu'ugyi tjakojpk'atti ja Abraham. ⁶ Øts ja Melquisedec jade'en yagateety'aty sam ja'adi põn yiktso'ondaajkidi ja Levi, y'amidoow ja nayide'en tukpiky ja myajkpkipyi pikta'aky ja Abraham põn wyinaty ja Dios tø tyamiwanda'agiyi ja øy'ajtin. Jøts ja Melquisedec tkunuu'kxy ja Abraham; ⁷ nipõnts sã kyawa'añ, ku ja yjawanimøji põn kunuu'kxp, jøts ka'ap ja' põn yikunuu'kxp. ⁸ Tum oo'ktipts ja jaa'y põn ya naxwiiñ tukpiky ja myajkpkipyi pikta'aky yikmøødyip, ka'apts ja Dios kyajpxy jade'en tñigajpxy ku ja Melquisedec tø y'oo'kni, nõmp ja wya'añ ku ja yjujky'atynim. ⁹ Nayide'en idø'øn n'ukwa'anint, øy idø'øn ja teetytøjk põn ja Levi ñigubajk'ajtpy ixyam tjayikmukti tukpiky ja myajkpkipyi pikta'aky, kuwani dø'øn ndejint kø'øm tjagubajtmidi ja yjade'embì nay winet ku ja Abraham tmøøy ja yja' ja Melquisedec. ¹⁰ Ja'agøjxp idø'øn ja ndejint ja ttuuñ ku ja tmøjnigojpk'aty ja Levi põn wyinaty kaka'xpnim naxwiiñ, ku ja Abraham ja Melquisedec pyaatsøji.

¹¹ Ja Leviit teety idø'øn midì ja Aarøn yiktso'ondaajkidi, ja' idø'øn tmøødyi ja kutujk ja Israel kajp. Kudsik idø'øn jeexyip ya'atpi teety ttukpaattøø ja Dios põn jaty ja kyutujk paduunidip, ka'ats jeexyip chøjky jøts ja teety jadu'uk kyaxø'økt midì tkawindsøn'ajttip ja Aarøn, jøts nayide'en teety'attit sam ja Melquisedec. ¹² Kuwani dø'øn tyigach ja kutujk ku ja teety tyigatsti; ¹³ ni tu'uknimts ja teety kyabidsimy abikyajpkøjxp, sami ja nwindson'ajtim Jesucristo midì dø'øn jade'en yiknigajpxp jap nõkyijpxy. ¹⁴ Yiknija'wipxi ja' ku ja nwindson'ajtim Jesucristo tãtskojpk'aty ja Judá, jøts ka'ap ja Moisés tyikutujky ku teety jam Judá etjotp pyidsø'ømdit.

¹⁵ Jawaani øyts ja ne'egi wyingaxi'iky, ku yiknijawi jøts ku ja Jesús ja jemyeety'ajtin ñanky'ejxiyi, nayide'en sam ja Melquisedec. ¹⁶ Kyø'øm møk'ajtingøjxp ja Jesucristo tpaajty ja teety'ajtin, ja ku tmøø'aty ja jujky'ajtin xemikøjxp; jøts ka'ap ja pyidsimy jam jaa'y agujkp, põn jaty idø'øn paat'ajtiyip ja teety'ajtin, sam ja kutujk ja'ayi ttanibikta'agi. ¹⁷ Pø yide'enxi ja Dios Teety ja ñigajpxyi:

Mets idø'øn xemikøjxp mdeety'atp,

jøts jade'en mdu'unt sam ja Melquisedec tuuñ.

¹⁸ Paty ja Moisés yjawayeen'ana'amin tø kyudigøy, ku ja møk'ajtin tkayaky sudso yikpadu'unt; ¹⁹ jøts niwine'enin ja ka'øchina'ayin tø tyiktigach. Ixyamts nmøø'ajtyindi tu'uk ja jøp'iixy'ajtin midì øy midì mõj jøts midì ja Dios xukpaajtimp.

²⁰ Diosts idø'øn kø'øm ja y'aaw y'ayuujk tø tyaky jøts idø'øn ja nwindson'ajtim Jesucristo xemikøjxp tyeety'att. ²¹ Ja abikpyi teety, ka'ap

ja jade'en tō yiktamidsokti sam idø'øn ja nwindson'ajtim Jesucristo tō yiktamidsøky, sam jap jaabyety nøkyijxpy wya'añ:

Pøni tō ja Dios wya'añ ka'ap ja y'aaw y'ayuujk
ja tyiktigatst, ku ñiimy:

“Mets idø'øn xemikøjxp mdeety'ajtp,

jøts jade'en mdu'unt sam ja Melquisedec ttuñ.”

²² Paty idø'øn ja Jesús jawaani tō myøjtøki, ku ja jawaani øy ja tyeety'ajtin midu tyajkp ja nitsoojkin. ²³ Yam janch namay ja jadu'ukpi teety, jøts tum jøpwetsti y'etti ku y'oocki, wenkpits ja tyunk tmidandip; ²⁴ ka'ats ja Jesús jade'en, ni juuani xøøw ja kya'øøky, paty ja tyeety'ajtin ja nipøn tkadukmidañ.

²⁵ Ja'agøjxpts idø'øn ja jade'en xemikøjxp tyik'awa'atspidsimy pøn jaty ja Dios t'ixaadyip, ku ja xemikøjxp yjujky'aty jøts ku adøm ejtp xni'amido'owa'am.

²⁶ Ya'atpi teety'ajtpi adøm idø'øn jeky tō n'awijxyim; ja nwindson'ajtim Jesucristo ja' idø'øn øyjaa'y pøn tkamøøt'ajtp ja ka'øwynmáa'ñ, ni ja pøky, pøn ja pojkpitumbi jaa'y tō kyadapaadyi ja ka'øchinaa'yin øy ja tō tjamøøtsøøni, jøts pøn ja Dios Teety møøt yikutuky. ²⁷ Tō dø'øn ja tu'ugyi ja Dios wyindsø'øk'ajtin tyika'pxi, ku ja ayo'on kø'øm tō tkupiky. Ka'ap ja jade'en tō ttuñ sam ja jadu'ukpi teetyti, pøn jabom ja Dios twindsø'øjkidip jøts ja kyø'ømbøky yikmaa'kxtit, jøtsnim ix'oock ja jaa'y nayide'en tkugajpxti jøts ja pyøky ja wya'atstt. ²⁸ Tum naxwii'ñit jaa'y ja Moisés y'ana'amin yik-

teety'ajtpy, pøn nayide'en ja pøky øy myimajada'agiyidit; tøts yø'øbi ana'amin kyugøxi jøts ja Dios Teety ja y'aaw y'ayuujk tō tyaky jøts ja y'U'nk, ja nwindson'ajtim Jesucristo, tō tpikta'aky øy tyeety'ajtpi pøn xemikøjxp ja wya'ats'ajtin møøt y'ity.

8

Ja Jesús xkugajpxindip Dios Teety wyingujkp

¹ ¿Midi'ibits idø'øn tsojkip yikxon ja'gyuki? Ja' idø'øn ku adøm ja møjteetywindsøn nmøøt'ajtyim jøts ja jam tō y'ixa'aky Dios Teety y'aga'ngyøjøøm yikutujkpi, ² jøts ja jam tyeety'aty tsaptøjkjotp midu ja Dios Teety kø'øm tō tkøjy, ka'ap ja jaa'y ja tō ttukyikøjy. ³ Windsø'øk'ajtin, tamay'ajtin, ja' idø'øn ja teety tyundip, paty idø'øn nayide'en ja nwindson'ajtim Jesucristo kuwani pyaat'aty: jøts ja windsø'øk'ajtin tmo'ot ja Dios Teety. ⁴ Ku ja nay ya jeexyip chøøni naxwiiñ, ka'ap ja yjeexyip tyeety'aty, pø jaaxi teety ya pøn jade'en ttundip sami ja Moisés wya'añ. ⁵ Nugo agojnaxts ja abikpyi teetyti myidundip, tum ja' y'agojnax midu jam tsajpjotp. Ja'agøjxp ja jade'en yiknijawu ku Moisés ja Dios ñimaajyi, ku dø'øn ja wyinaty tu'uk ja tsaptøjk tyik'øyiwya'añ, ku yide'en yikniimaay: “Yikxonim x'ext, jøts nayide'en pyidsø'ømt sam tō nduk'ixy kojpkøjxp.” ⁶ Ja øy'ajtin, ja ty'ajtints adøm ja nmøjteetywindsøn myidumpy, ja'agøjxp ku ja tkugajpxy tkudani ja øy'ajtin, midu adøm ja Dios Teety kø'øm tō xamidøjkyim.

⁷ Kuk idø'øn jeexyip nisa kya'ejxi ja jaween kutujk midu ja Moisés ja Dios tukajpxnaxxøø, ka'ats jeexyip jadu'uk chøkyi sam ja Cristo yja' tō nånky'ijxyi.

⁸ Ja kuxi ja Dios tkaka'pxyjawi ja jaween kutujk sam ja kø'øm wya'añ jap nøkyijxpy:

Yide'en ja Dios Teety wya'añ: Me'emp ja xøøw ja jumøjt

ku øts ja Israelit jaa'y jøts ja Judajit jaa'y nmo'odit jadu'uk ja kutujk pøni kyupøjktip.

⁹ Ka'ap ja jade'en t'ext sam ja' midu tō njatumi møøt ja myigugajp, midu jekyip tsinaadyøø,

ku øts ja nwaapidsømdi Egipto y'etjotp;
kumi ka'ap ja tpadundi, paty øts ja nmajstuttøø.

¹⁰ Yide'en yjaakwa'añ ja Dios Teety, yide'ents idø'on ja y'ett, midi øts idø'on
ndunwajnip ja Israelit kajp;

Ndukja'gyukip øts ja øgyutujk ja'adi,
jøts øts ja y'anmija'wingøjxp nbiktaajkidit.

Ja'ats øts idø'on niDios'attip,
jøts øts ja ngajp'attit.

¹¹ Ka' dø'on pøn wyinaty ja myigu'uk niti tkadukyikyujti pøni ti dø'on ja
tyu'ump;

ja'agøjxp ku øts ja wyinaty ja møj ja mutsk tønduknijawidi jøts øts ja niduki'iyi
x'ejxkaptit.

¹² Nmaa'kxidip øts ja' ja kya'øchinaa'yin, jøts nijuuni øts ja pyøky ja
nga'ukja'myajtsniyidit.

¹³ Ku dø'on ja Dios Teety ja jemy ayuujk ja jemy winmaa'ñ tnigajpxy,
mijaa'yinip idø'on ja myijawyeembi kutujk; kuts ja tø myijaa'yini, pojn ja
kyudigøønit.

9

Ja naxwii'ñit tsaptøjk jøts ja tsajpjotpit tsaptøjk

¹ Jamts idø'on y'ijty tmøøt'aty ja jawyeen kutujk sudso yikwindsø'øgit
ja Dios jam tsaptøjkjotp midi ya naxwiiñ. ² Yide'en idø'on y'øyiyii'ñ ja
tsaptøjk ya naxwiiñ, midi dø'on jawyeen yikpatp ku ndøjka'ant, ja' idø'on
xyøøw'ajtpy Kunuu'kxy Et, japts idø'on y'etti ja seri adøø'yin, jøts ja pøjkpajt
mā ja kunuu'kxy chapkaaky y'etti. ³ Japts myimajtsk adiduyuky jixki'py
tyañ, ja amaagyunuu'kxy et; ⁴ mā jap tu'uk ja altajr midi tum amuum
oori mā kyøxøøy ja poom, jøts tu'uk ja mutskaaxi midi oori nimøch mā ja
kutujk jap y'ity. Japts mutskaaxijøtpy tu'uk ja tu'jtsu'nk midi tmøøt'ajtp
ja manā midi dø'on yjøø'kxtøø ja israelit jaa'y jam abak etjotp. Nayi jap
idø'on kaaxijøtpy y'ijty ja Aarøn ja tyajk midi ojts jadigojk xyimummy, jøts ja
tsaa mā jap kyøxja'ayø ja kutujk ja ñi'ayuujk. ⁵ Jamts kaaxi ñikøjxp y'etti ja
ankilistøjk ja y'agojnax, midi tyiknigaxø'ktip jøts ku ja Dios jam, jøts ja kyajnk
ja ttanimu'uxti mā ja pøky y'ijty yikmee'kxy. Wants ya'at ja'ayi t'uknijawam.

⁶ Kuts idø'on ja jade'en tø ttanibiktaagidi, winets idø'on y'ijty ja teety tyøkidi
jap mijawyeen tøjkjøtpy midi Kunuu'kxy Et yiktejp, jøts idø'on ja windsø'jkin
ja yikjuyk'ajtpi t'atsmo'odi pøni juuni ja kø'øm tsojkin'ajttøø. ⁷ Jøts idø'on
jap myimajtsk tøjkjøtpy midi yiktejp Amaagyunuu'kxy Et, tuk'ojkyits ja
winjumøjt ja møjteetywindsøn jap tyøki; ja jiyujk ni'jpy idø'on ja myidøjkip
midi y'atswa'xpy mā ja pyøky jawyeen yikmaa'kxt jøtsnim ja jaa'y yja'
nayide'en. ⁸ Yide'ents idø'on ja Dios Espiritu Santo xukja'gyukam ku dø'on
jap nipøn nugo kyatøki myimajtsk tøjkjøtpy mā txøøw'aty Amaagyunuu'kxy
Et. Japyi ja midu'uk tøjkjøtpy ja'ayi xyumitøkidi. ⁹ Yø' adøøm idø'on
n'ejxpajtin'ajtimp wine'enin naxwii'ñit jaa'y'ajtyindi, jøts nniija'wa'ant ku ja
winmaa'ñ kyawa'ach øy ja wine'en ja wyindsø'jkin tjayika'pxtøø. ¹⁰ Ja' idø'on
ja wyindsø'jkin'ajttip sudso kya'adyit sudso y'uuktit, jøts sudso ñanky'øyiyidit
ñankchuyiyidit, sam ja møjaa'y chinaa'yin tyikutuky. Niwine'enin ja
anmija'win ja tkayikwa'ats'aty. Ja'ats ja jade'en tyungunajxtip kunim ja Dios
kø'øm tø tyiktigach.

¹¹ Tøts idø'on ja nwindson'ajtim Jesucristo myiñ, ja'ats idø'on ixyam
tnimøjteetywindsøn'ajtp ja jemchinaa'yin midi ya tø tyañ. Jawaani øy idø'on

jøts jawaani tsuj idø'øn ja tsaptøjk ma dø'øn ja tyuñ, ka'ap ja jaa'y ja tkøjy, paty idø'øn ja kyanaxwii'ñit tsaptøjki. ¹² Tø dø'øn ja nwindson'ajtim Jesucristo ñaxy jap myimajtsk tøjkjøtpy midi xyøøw Amaagyunuu'kxy Et, ka'ats ja t'ukmidøjkiñi ja mutsk chiibi ni'ljpy jøts ja løjch ñi'ljpy; kyø'øm ni'ljpy ja myidøjkip tuk'ojkøjxp ja'ayi, midi adøm idø'øn xemikøjxp tø xuktanitsøøjkyim. ¹³ Yikwachptsik idø'øn y'ijty ja pøky ja tsigiduuri ni'ljpy, jøts ja tsapaxuna'jk ni'ljpy, jøts nayide'en ja tsigivaki jaam midi yiknitøødyip jam altajrkøjxp, ku dø'øn ja y'ijty ñadyaninuugyidi nikijxy jøts ja pøky jade'en tyikwa'atswa'andi xjats ja kunuu'kxin ja jade'en tpattoø. ¹⁴ Pøni jade'ents ja', jawaani kajaats idø'øn ja nwindson'ajtim Jesucristo ja ñi'ljpy yikpøkwa'ach jøts kyunuu'kxy, pø patyxi ja Dios Espiritu Santo køjxp ñagyøyajkiyi pakwa'ach, midi ja Dios Teety kyupijky, jøts idø'øn ja ñi'ljpy ja tyikwa'atst ja ka'øchinaa'yin midi ja kudigø'øyin xukpaajtimp, jøts ja Dios jøts ja yikjujky'ajtpi jade'en nmimado'owin.

¹⁵ Paty idø'øn ja Jesucristo møj yik'ajot'aty ku yjemgyutujk tø tyik-tso'onda'aky, pø ja'axi ja kyu'o'jkip jøts yikpøkmyaa'kxtit pøn jaty tø pyøkyundi ku ja møjaa'gyutujk y'ijty tyuñim, jøts ja jaa'y tpaattit ja xemikøjxpit øy'ajtin, midi ja Dios Teety ttamidsøjkijyidip windi'ixip. ¹⁶ Jabi jade'enxi yiktuñ ku ja maay wya'kxy, jaanim ja wya'kxy ku ja jaa'y y'øøkñim. ¹⁷ Jøts ka'ap ja ayuujk mibaat nugo myøjtøkit pøni nay jujky'ajtpnim ja kumaay. ¹⁸ Kuwanixi ja ni'ljpy ojts chuñ xye'kxy ku ja møjaa'gyutujk cho'ondaajky. ¹⁹ Ku dø'øn ja Moisés wyinaty ja kajp tø ttukmadøy ja Dios kyutujk y'ana'amin, winets tnixajiyi'ñ tukmutsk øøxy ja ujts aay møøt ja tsajpts wet, jøts ttuktaxø'øky ja tsigini'ljpy ja chiibi ni'ljpy, midi nøø wyinaty møøt tø yik'adaamuky, xjats ttanixejtwidity ja kutujk nøky jøts niduki'iyi ja jaa'y nayide'en. ²⁰ Winets wyaan: "Ya'at ni'ljpy idø'øn tyikmøjtøjkip ja Dios kyutujk midi mee tø myiktamidsøky." ²¹ Tyaniwa'jx idø'øn ja Moisés ja ni'ljpy nayide'en ja tsaptøjk, jøts tuki'iyi pøni ti jaty yiktundip, ku dø'øn ja Dios ja t'atswindsø'øgidi. ²² Jade'en idø'øn kyutuky jøts ku ja ni'ljpy tuki'iyi tyikwa'atst, kuts ja ni'ljpy kya'ett ka'ats ja pøky yikmee'kxy.

Cristo y'ayo'ongøjxp ja pøky wya'ach

²³ Paty idø'øn chojki ja ni'ljpy jøts wya'atstit ja pikta'aky jap tsaptøjkjøtpy, midi y'agonax'ajttip ja tsajpjøtpyt tsinaa'yin. Jawaani øy pyaat'atyi yi ja tsajpjøtpit'ajtin ja windsø'øgi, midi ja Cristo ko'øm tø ttuñ. ²⁴ Jøts ka'ap ja Cristo jam tyety'ajty tsaptøjkjøtp midi ya naxwiiñ ja jaa'y tø tkøjti, jøts tsajpjøtpit tsaptøjk ja' nugo y'awanax. Jamxi dø'øn ja tymchajpjøtp tø tyøki, ma adøm ja icyam x'agø'dujkyim x'axajtuikyim Dios Teety wyingujkp. ²⁵ Tuk'ojkyi dø'øn ja Jesucristo ja o'jkin tø tkupiky, ka'ap ja jade'en tø ttuñ sam ja jadu'ukpi teetywindsø'øndi midi dø'øn y'ijty winjumøjt ja'ayi tmidøjkip ja ni'ljpy jam tsaptøjkjøtp jøts ni tkakø'ømni'ljpyi ja'adi. ²⁶ Ka'ats idø'øn ja Jesucristo jeexyip nayide'en ttumi, tøts idø'øn ja jeexyip may'ojk y'oo'kni kuyip cho'ondaajky ja naxwii'ñit, ka'ats ja jade'en tø ttuñ. Ixja tø kya'pxy, ixja tø tyiy ja et ja naxwii'ñit, tuk'ojk ja o'jkin ja ja'ayi tø tkupiky jøts ja pøky tuki'iyi xemikøjxp tyikwa'atst. ²⁷ Nayide'en sami jaa'y niduki'iyi tuk'ojk y'oo'kti, jøts yikii'dyunditnim, ²⁸ nayide'ents ja Cristo tuk'ojkyi tø y'øøky, jøts may ja jaa'y tyikwaajtsit ja pyøky. Kuts idø'øn wyinaty jadigojk ñanky'eixpaadyiyi, ka'ap ja yikpøkwa'atspi wyinaty y'ukmeni, ja' ja wyinaty ñimimpy pøn jaty ja awejx'ajtiyip.

10

1 Ja jemgyutujk idø'øn ja' y'aga'ax ja nugo kutujk midi ja Moisés yiktaan, paty idø'øn ja kyamajada'aky nijuuni. Øy ja jiyujk ja namay tjayik'ookti winjumøjt, ka'ats ja pøky ja tyikwa'ach. 2 Ku dø'øn ja jeexyip ja pøky tyikwa'ach, jøts ja øchinaa'yin jeexyip tyaky, tuk'ojkyits idø'øn ja jeexyip jade'en yjaty. Ka'axi ja jeexyip y'uknabyøkyja'winiyidi. 3 Kumi ka'ats ja yjade'eni pø ximija'myatstipxi ja pyøky ja'adi ku ja winjumøjt tjatundi ja windsø'jkin, 4 ja'agøjxpts ja jade'en yjatti ku ja pøky ni ja tsigini'jpy ni ja chiibi ni'jpy tkayikwa'ach nijuuni.

5 Paty idø'øn ja Jesucristo ja Dios Teety tnimaay ku ya myiñ naxwiiñ: Ka'ats xtsøky'aty jøts myiktawindsø'øgit ja jiyujk,

patyxi øts tø xyikjaa'yjaty jøt øts ja ne'kx jøts øts ja ni'jpy tø xmø'øy.

6 Ka' myikjotkujk'aty ku ja jiyujk yjanitøøy, ni ja windsø'jkin midi jayiktump jøts ja pøky xmaa'kxt.

7 Winets ø nwaañ: "Ixyam ø Dios Teety, jøts ø nbadu'unt pøni ti me nmi'ana'amwampy sa jap jaabyety nøkyijxpy y'ity."

8 Ku dø'øn ja jawyeen tø tnigajpxy ku ja Dios Teety tkadajotkujk'aty ja windsø'jkin ku dø'øn ja jaa'y ja jiyujk tjayik'ookti, jøts ku tigati tjayik-tøømyidi jøts ja pyøky wya'atstis sam idø'øn ja yjagutujkyi. 9 Winets ja nwindson'ajtim Jesucristo wyaañ: "Ixyam ø Dios Teety, jøts ø nbadu'unt pøni ti mdsøjky." Yikudigøøpyts idø'øn ja nwindson'ajtim Jesucristo ja jawyeengutujk jøts ka kyø'øm windsø'jkin ttawinguwijch. 10 Tøts adøm idø'øn ja Dios xkunu'u'kxyim, pø tøxi ja nwindson'ajtim Jesucristo xemikøjxp tuk'ojkyi ja ñine'kx tkøyaky midi idø'øn ja Dios Teety tø tmø'øy adømgojxp.

11 Tum jade'enty ja israelit teety tundinim, nay ja jiyujk ja tyawindsø'jkidip ja Dios, øy ja pøky ja nijuuni tjagayikwa'ach. 12 Tuk'ojkyits ja Jesucristo ja'ayi tø y'øøky jøts adøm ja nbøkwyaajtsindit, jøts ja jam tø y'ixa'aky yikutujkpi, Dios Teety y'aga'ngyøjøm. 13 Jamts ja y'awixy kunim ja myidsep yikpikta'akt tyekvyi'py jøts ja ttekpya'an'att, 14 pø tøxi ja tu'ugyi ja wyindsø'øk'ajtin ttamajada'aky ku ja kø'øm tø ñadyagidøkyi ja Dios Teety, jøts jade'en xemikøjxp tø tyik'awa'atspdimsimy pøn jaty ja kunuu'kxin tø tmø'øy. 15 Jøts ja Dios Espiritu Santots ja kajpxy nayide'en tyiktuu'yø'øpy tyiktuu'wejtsp ku wya'añ yide'en: 16 Midi øts idø'øn yø jaa'y ndamidsojkip, ku dø'øn ja xøøw ja jumøjt tpaatt, yide'en øts idø'øn ja wyinaty nduñ.

Ndukja'gyukip øts ja ngutujk jøts øts ja nbiktaajkit y'anmija'wingøjxp.

17 Jøts yjaakwa'añ:

Ka'ap øts ja pyøky ja wyinaty n'ukja'myajtsniyi, ni ja kya'øy'ajtin.

18 Paty idø'øn nja'gyuka'ant yikxon pøni tø ja pøky xemikøjxp yikmee'kxy, ka'ats y'uktsojkniiyi jøts ja Dios Teety njaaktawindsø'jka'ant o ti jøts ja xpojkpimaa'kxint.

Møk ja Dios janchja'win nbiktaajkint

19 Paty migu'uktøjk idø'øn ka' tsø'øgijawi nwingunøjxindit ja Dios Teety jap tsajpjøtpy, pø tøxi ja nwindson'ajtim Jesucristo xkudsu'una'am xkudajxa'am. 20 Ja'ayi tsojkip jøts adøm ja nwindson'ajtim Jesucristo ja yjemdyuu' nguyø'øyint midi ttukpatp ja xemikøjxpit juky'ajtin, jøts midi ja nwindson'ajtim Jesucristo tø awa'ats tyiktañ kyø'øm y'o'jkingøjxp. 21 Ja nwindson'ajtim Jesucristots adøm idø'øn nmøjteetywindsøn'ajtyimp jam tsajpjøtp; 22 paty idø'øn tu'ugyi ja n'anmija'win nbiktaajkint ku ja Dios Teety n'ajot'ajtant, jøts tu'ugyi dø'øn ja janchja'win amumjoojt nmøøt'ajtant; pø

tøxi ja xyikpøkwyaaajchim jøts adøm nga'uknabyøkyja'wiña'ant, tøts nayide'en ja nøbajtin nøø xyikwaajchindi. ²³ Yikxonimts idø'øn ja n'awejxint midi ja Dios tø t'agajpxuky ku adøm ja kyutujk ja tø ngupijkyim. Pyadu'ump ja' ja y'ayuyjk. ²⁴ Ja' adøm idø'øn n'ixa'ayimp sudso xem yam nnabyudøjka'ant jøts nnachojka'ant. ²⁵ Ka'ap adøm ja jaa'y chinaa'yin nyikmøjtøjka'ant pøn jaty kamendip ku nnamyujkyandi Dios ajot'ajtpi, nagyajpxjot'amøjkamp adøm idø'øn ne'egi, ixa ja nwindson'ajtim Jesucristo wyingoni.

²⁶ Ku adøm køømdsojkingøjxp ja Dios yja' n'ixmajtsint, ka'ats ja maa'kxujkin yikpaatt, jabi ka'axi ja abiky yiknitsocki y'ukmenit. ²⁷ Ja'ayits adøm njøp'ejxindip pøni jade'en adøm ndsinaa'yin, jøts ja Dios Teety ja myøktiidyu'unin nbaajtant, jøts xemikøjxp ja tø'øyin xmø'øyindit midi dø'øn pyaattip pøn ja Dios tmidsep'ajttip. ²⁸ Pø nayide'enxi y'ijty yiktundi pøn tkamimadoodip ja Moisés y'ana'amin, ku namajtsk uk nidigøøk ja a'ejxnaxpi kyajpxti, kuwanits ja y'ijty y'øøky, niwine'en ja kyayik'ayo'ejxti. ²⁹ Jawaani kajaats ja pyaat'atyidi ja ayo'on pøn jaty ja Dios U'nk nugo t'uktaa'nwidejtnidip, jøts ja y'o'jkin tka'ukmøjppiktaajkniiyidi midi tø yikpojkiwa'achidi, jøts nayide'en ja Dios Espiritu Santo tø t'ukmigajpxigøøniidi yam ja yjaba'ayøyidi. Pø ja y'o'jkinxi ja Cristo y'ejxa'anin'ajtpy ku dø'øn ja Dios Teety chojkin tø tnigajpxy, midi tø yjayikpøkwyaa'achidi pøn ja ka'ukmøjppiktaajkniiyidip. ³⁰ Pø nnija'wampxi ku ja Dios Teety tø wya'añ: "Øts xpaat'ajtp jøts øts ndagubattit ja pyøky; øts yø nmo'odip kija' ja y'ayo'on pøni wine'en yø pyaat'atyidi." Jøts nayide'en wyami: "Ndiidyu'ump øts ja ngajp." ³¹ Janch kawinmaañi dø'øn ja y'ayo'on'ixy pøn ja Dios, pøn ja yikjujky'ajtpi tyukpatpy myøk'ajtingøjxp ja y'aki!

³² Kidi mee xja'dyigøy ku ja nwindson'ajtim yja' x'ejxidi jøts ja chinaa'yin xpadøjkidyøø, winets o sagasa xkujajtidøø ja mjanchja'win. ³³ Jam mee niwinaagin pøn ja mayjaa'y m'ejxidi ku myikta'ohti jøts myiktatsee'kti ja mdsinaa'yin, jøts nayide'en ajotmay'oockti ja mmigu'ukti pøn o sagasa yiktundip. ³⁴ M'ayo'ejx meets ja tsumyjaa'y, jøts mimadaajk meets ja jotkujk ku ja mbikta'aky tuki'iyi myikpøjkigyøxtøø, pø mnija'wipxi meets ku jam tsajpjotp jawaani y'øybi xpaattit midi xemikøjxp etp. ³⁵ Wan ttuñi pøni ti tuujnip, awejx'et meets ja ejtp pøni ti ja nwindson'ajtim tø t'agajpxuky, myikmo'op meets ja kaja. ³⁶ Tuda'aky ja Dios Teety y'ana'amin paduñ ttsøky, jøts ja tyakt pøni ti ja tø t'agajpxuky. ³⁷ Pø yide'enxi ja nøky wya'añ: Jawaani jaak'awejx'etti,

tsøj ja mye'ent ja nwindson'ajtim pøn ja øy'ajtin xmø'øyimp.

³⁸ Midi'its øts idø'øn ngupijky, janchja'wingøjxp idø'øn t'awixy'aty ja øy'ajtin, pøni windsi'jkyts ja', ka'ats øts ja ndajotkujk'att.

³⁹ Ka'ats adøm nwindsi'jkyjaa'yandi midi pojn yikmimajadaktip, tum ja'abixi adøm pøn ja janchja'win ttajuiky'ajttip, jøts jade'en ja n'anmija'win xemikøjxp nyiknitsoojkindit.

11

Ti dø'øn janchja'win'ajtp

¹ Ja' dø'øn janchja'win'ajtp ku amumjoojt tu'ugyi n'awejxint pøni ti dø'øn yikmø'øyimp jøts ku amumjoojt nmibøjkint midi nga'ixyindip. ² Ja janchja'win idø'øn ja ndeety'amøjtøjk yiktakajxajkti.

³ Ja janchja'win adøm xukmibøjkimp ku ja Dios ja tsajp ja naajx jøts tuki'iyi tø tyik'øyi y'ayuujkøjxp ja'ayi, jøts ja' midi ixyam n'ijxyindip ka'ap ja y'ity te.

⁴ Janchja'wingøjxp ja Abel øy ja Dios twindsø'jkøø, yam ja Caïn kajade'en, paty ja Dios ja Abel tkupijky jøts ja'agøjxp ja wyindsø'jkin tkupøjki. Ots ja Abel tø yja'oo'kni, tø ja ejxpajtin ja xemikøjxp tyiktañ ku ja janchja'win ja tmøøt'ajty.

⁵ Janchja'wingøjxp ja Enoc yiktaniwawi ja xemikøjxpit tsinaa'yin øy ja o'jkin ja tjagapaajty, jøts ja tka'ukpatnidi ku tja'ixaadyøø pø tøxi ja Dios ja wyinaty pyawa'aniyi. Yide'ents jap nøkyjxpy wya'añ ku ja Dios ya naxwiin tyikjotkujk'ajty. ⁶ Janch tsepts jøts ja Dios nyikjotkujk'ajtint, pøni ka'ap ja janchja'win yikmøøt'aty, ja kuxi ja Dios yikpaatwa'añ, jawyeen idø'on ja njanchja'want ku dø'on ja jaa, jøts ku ja nayide'en tkunuu'kxy pøn jaty ja ixajjiyip.

⁷ Janchja'wingøjxp idø'on ja Noé ja Dios tmibijky, jøts tmimadøøy ku ja tyukmadooji pøni ti jaty idø'on tunwajnip wyinaty, o dø'on niti kyagaxi'ikñim, jøts ja barki tyik'ø'yii'n'ñ midi yiknitso'ogip wine'enin jam tyøjkjotp yjaa'y'atti. Ja yjanchja'win ja tyamøj'ajt jøts ja ttuk'ijxy pøn jaty ja pøky ttunk'ajtip, jøts nay ja'agøjxp ja Dios tyaxonda'agyi.

⁸ Yjanchja'win ja Abraham yikmadooji, ku ja Dios ojts myigajpxyi jøts ja kyajp tmajtstuupty, jøts tniidsø'øn ja naajx ja et midi ja Dios ttamidsojki, øy ja tjaganijawi pøni ma dø'on ñijxxy. ⁹ Ja'agøjxp idø'on ja Abraham chinaay jam etjotp midi dø'on ja Dios ttaniwaadsojjiyi ku janchja'win ja tmøøt'aty, jøts jabyøø'kxyin ja jam chinaay. O magama ja tyøjk tkøjwidettøø sam ja tuu'yø'obyidi. Jøts nayide'en ja y'u'nk Isaac møøt ja Jacob ttundøø, jabi nayide'enxi ja Dios ja tyamiguy'ejxidøø ja naajx ja et. ¹⁰ Ja'agøjxp ja jade'en ttuui ja Abraham, ku tjøp'ijxy'aty ku tyukpaattit ja kajp midi ja Dios kø'øm yik'øyip yikpaadip, ja tsajjotpit kajp midi tu'ugyi etp.

¹¹ Nay ja janchja'win ojts ja Sara tyukmibikiyi ku ja tu'uk ja y'u'nk tpaatt øy ja wyinaty tø yja'amøji kyidakni. Pyaajt idø'on ja y'u'nk ja ja'agøjxp ku tjanchjaa'wiyii'n'ñ jade'en sa ja Dios ñimaajyøø. ¹² Ots idø'on ja ñiyaa'y Abraham yjadyimyøjaa'yini, ojts idø'on tniogjpkteety'aty janch namay ja naxwiin'ñit jaa'y, ejxim maadsa', uk ejxim pu' mejy'agø'øm kyamachooni.

¹³ Tum oo'køjxtits yø jaa'y, ixa jade'en tø yikja'myatsti, jøts nika' ja ya naxwiin yikmøøgyijxy pøni ti jaty ja Dios wyinaty tø tni'adsowi; ttuk'ejxidits ja jagamyi ja yjanchja'win midi ja Dios yakwanguijxpy jøts jade'en ttaxondaktøø, jøts ja jade'en tnankñija'widøø ku ja ya naxwiin nugo ñaxti.

¹⁴ Pønts jade'en ttundip, y'ixaadyipnim idø'on ja' tu'uk ja kajp ma tu'ugyi chinaañidit. ¹⁵ Kuk ja ttajotmay'oo'knidi ja kyajp midi yiktandi, wimbejtsisik ja jadigojk nay jam. ¹⁶ Kumi øgyajpts ja jawaani ja chojktip midi dø'on jam tsajjotp, paty ja Dios jam a'ejxi abaadi tyik'ity tu'uk ja kajp jøts ka'ap ja tyatsø'ødyuñidi, kajpja'wiyidip ja'.

¹⁷ Nay ja janchja'win ja Abraham ja Dios ttukmimadooji ku myøkwinnmaa'ñ'ejxiyi jøts ja tyu'umts majnk y'amidoojiyi jøts ja Dios ja ttuktawin'oogit. Tø ja Abraham wyinaty tkupiky jøts ja tyu'umts majnk twindsø'jkin'att, o dø'on ja Dios kø'øm wyinaty tø ñii'mxyi: ¹⁸ "Yø Isaac mets idø'on myikmayiyip." ¹⁹ Ja'agøjxp idø'on ja Abraham jade'en ttuui ku ja twinmay ku ja Dios myøk'ajtin myøji jøts tyikjujkyøkt ja oo'kpi jaa'y. Oo'kpi agujkpy idø'on ja Abraham ndejint ja y'u'nk wyimbijty jadigojk øy idø'on ja yjaga'øøky.

²⁰ Janchja'wingøjxpx ja Isaac t'agajpxuujky ja kunuu'kxin midi ja y'u'nk Jacob jøts ja Esaú paadidip. ²¹ Jøts ku ja Jacob wyinaty y'ookwani, janchja'wingøjxpx idø'on ja ttami'awa'aniyi'iñ jøts ja José y'u'nk y'una'jk tpaattit ja kunuu'kxin. Xjats ojts winda'aky t'ajot'aty ja Dios jøts ja tyajk ojts ñadyagudijiyi. ²² Janchja'win ja José yikwajni, kuk ja israelit jaa'y pyidsø'ømdit Egipto y'etjotp, jøts tni'ana'ami sudso ja pyajk yiktu'unt.

²³ Janchja'wingøjxpts ja Moisés ja tyeety tyaak yu'uch yik'ejttøø tigøøk po'; ja'agøjxpx ku t'ejxti ku ja janch tsuj jøts ka'ap tsø'jkidyøø ja windsøn kyutujk pøn wyinaty tø ñimy jøts ku tuki'iyi ja mutskuna'jk y'ooktit. ²⁴ Jøts nay ja janchja'win ja Moisés kaduktsojki jøts ja Egipto windsøn ñøøx ja taak tejt ku wyinaty tø yaa'dyøjkjatni. ²⁵ Nugo ku ja nayide'en tkupijky pøni sa jaty ja myigu'uk israelit jaa'y yiktundi, jøts ka'ap ne'egi nugo ttaxøøñ ja naxwiiñ'ajtñ midi naxp midi tigøøpy. ²⁶ Jade'en ja wyinmaa'y ku ne'egi jawaani øy jøts ja Cristo o sagasa tñijatt, midi dø'on yiknigajpx me'emp, ka'ap ja tmøjpktaajky pøni wine'enin jam ja meef jøts ja pikta'aky Egipto; ja' y'awijxpy midi ja Dios mo'ojip. ²⁷ Ja janchja'win ja Moisés yiktsoo'noø jam Egipto etjotp, ka'ap tsø'jkidy'i'iñ ja windsøn y'aki, nugo ku ja tpadunguixy ja y'øwyinmaa'ñ ejximdam ja Dios ja jeexyip tyimy'ixy.

²⁸ Janchja'wingøjxpx ja Moisés tyiktso'onda'aky ja paski xøøw ku tyikutujky jøts ja israelit jaa'y ja ni'jpy ttawinja'adit ja tyøjk'agaj, jøts ja yjagyooobi majnk ka'ap ja Dios Teety y'ankilis yik'oogidit sam ja Egipto jaa'y yjajttøø. ²⁹ Janchja'wingøjxpts ja israelit jaa'y ttanaxti ja Tsajpts Mejy ejxim jaa'y yø'øy tø'tøts naxkøjxpx; kuts ja egiptit jaa'y nayide'en tjatunwandøø winets ja ñjøøø'kxti niduki'iyi.

³⁰ Janchja'wingøjxpts ojts ja Jericó kajp ja ñawaap kyidaagijxy, ku ja israelit jaa'y wixujk xøøw ja kajp tni'awidejttøø. ³¹ Jøts nayi janchja'wingøjxpx ja Rahab, ja ka'odyø'øxyøjk, ojts møøt kya'øøky pøn tkamimadoodip ja myigugajp, ku ja wyinaty øy tsuj tø twindsø'øgi ja israelit jaa'y pøn kajptøjkidi ejxpi koobi.

³² ¿Ti jaty ø njaakmadya'akp? Ka'ap ja et ja xøøw ñibaadi ku ø nnimadyaktøkit ja Gedeon, ja Barac, ja Sanson, ja Jefté, ja David, ja Samuel jøts ja jaa'dyi' midi y'lijty ja Dios y'aaw y'ayuujk'ajtpy ku ti tñigajpxwa'añ. ³³ Janchja'wingøjxpx idø'on yø tø tmimajada'akti ja wenk kajp, jøts tiy øy tø kyudunk'atti jøts ja Dios ja pyudøjkin tø tpaatti sa ja wyinaty tø tni'adsowi. Ja møj kaa jadi'iñi tø t'apanmujkidi ja y'apajk, ³⁴ jøts ja møj jøøon nayide'en tø tmimajada'akti, jøts tsujx kumy tø kya'ookti. Jøts tø yjotmøkpøkti pøn kajotmøkti, jøts ja y'awa'ambi midsep tø tmimajada'akti. ³⁵ Jam idø'on ja tø'øxyøjk pøn janchja'wingøjxpx ja ñiyaay' tø t'ejxpaatti jadigojk jujky.

Mayts y'oo'kmidi ayo'on agujkp, jade'en idø'on ja ne'egi ttsoktøø jøts ka'ap ja Dios yja' t'ixmajtsidøø ja'agøjxpx ku ja t'awejx'atti ja jujky'ajtñ xemikøjxpx. ³⁶ Jøts may nayide'en yixkon tø yiktaxe'ekt jøts tø yikwopti, jøts ja p-jxkuwøøñ tø yikpitaajkidi jøts tø yiktsumdi. ³⁷ Jøts nayide'en tø tsaaga'ach y'oo'kmidi, uk tapoodits, jøts tø yikmøjwinmaa'ñ'ejxti, jøts tsujkøjxpx tø y'oo'kmidi; jøts ja borreegi'ak jøts ja chiibi'ak yik'ayowim tñiwidejttøø, o sagasa ja ayo'on tpaattøø. ³⁸ Ja'abi jaa'y idø'on tø wyidetti abak etjotp, kojpkøjxpx, jøts tsaq ankjøtpy, tsaq jutjøtpy. Niwine'en ja naxwii'ñit jaa'y ja'abi jaa'y kyapaat'atyiyi. ³⁹ Ots idø'on yø øy tsuj tø yik'ejxty yikpaatti ku janch møj ja yjanchja'win, ka'ap yø ti tø yikmo'odi pøni tø dø'on ja Dios tø t'uknigajpxy; ⁴⁰ pø tøxi ja ttanibiktaaggi kø'øm jawaani øy jøts ja y'øbyidsø'ømdit adøm møøt.

12

Ja Jesús adøm n'ejxpajt'ajtimp

¹ Janch mayts adøm ja jaa'y nnija'wa'andi pøn jaty ja janchja'win tømøøt'atti jøts ja tøm tñankñigaxi'igyidi. Wants adøm tmajtstuujtina'am tuki'iyi pøni ti jaty xyikjotkøjximp, jøts ja pøky nayide'en nmajststuujtint midi yjawí xyikpak'amujkna'amp, jøts yikxon njaakpadungojindit tuda'aky ja øchinaa'yin. ² Ja Jesús adøm n'ejxpajt'ajtimp pøn ja janchja'win tyajkp jøts pøn nayide'en tjaakyik'øyip jøts tjaakyiktsujip. Tøm ja Jesús jam kruskøjxp y'løøky, ots ja yjatsø'ødyuñ, ja'abi o'jkin ka'ap ja tøm tømøjpikta'aky, pøm ñija'wipxi ja'ku ja ayo'on ja ttanaxt jøts ja tpaatt ja jotkujk'ajtin ja xondaajkin; jøts ja tøm y'ixa'aky yikutujkpi mømøt ja Dios Teety jam y'aga'ngyøjøm.

³ Paty mee kidi mjotkixy ni mga'amutskidit, ja Jesús meets ja'myats jøts ja xni'ejxu'uttit ku pojkpitumbi kyøjøm kawinø'on tøm y'ayo'ombaaty. ⁴ Ka'aním meets ja pøky xmøøtseptuñ jøts xkudaxit. ⁵ ¿Uk tøm meets idø'on ja xja'dyigøøñi sã adøm Dios Teety y'u'ngin xja'ane'emyindi? Pøm yide'enxi jap jaabyety nøkyijxpy:

U'nk, kupøk ja ayo'on midi ndaniguejxpy jøts mdsinaa'yin xyiktigatst, jøts kidi x'ayooji ku me n'ojt.

⁶ Pøm tum ja'axi øts ja chinaa'yin tigach ndamidsøjkpy pøn jaty ø ndsøjkpy, jøts ja ayo'on nmø'øy pøn jaty n'u'nk'ajtpy.

⁷ Midani meets idø'on ja ayo'on, pøm ja'agøjpxxi meets ja Dios ja mmø'øyi ku y'u'nk y'una'jkin mdsøkyidi. ¿Uk jaa dø'on ja jaa'y pøn nijuuni ja tyeety tøm kyakajpxwiji? ⁸ Pøni ka'ats meets ja Dios mgajpxwiji sami dø'on ja y'unk y'una'jk ja ttamidsøjky, mga'u'nktejpts meets idø'on ja', wenk u'nk meets ja mdijyiyi. ⁹ Nayide'enxi mutskyi ja ndeety ndaak tøm xkajpxwijiindi, jøts adøm ja y'ljty øy tsuj nmigajpxyindi, yayits ja y'ana'amín ja yjatundi naxwiin. ¿Sudsots adøm idø'on ja Dios Teety midi jam tsajpjotp ngagupøjkint ja kyajpxwejin? Pøm ja juky'ajtinxi adøm ja xukpaatwa'animp. ¹⁰ Ja'ayi adøm ja ndeety ndaak xakajpxwejinidip pøni sudso dø'on ja tja'gyukidi ku ja tsinaa'yin tyiyi yã naxwiin; kuts ja Dios x'ane'emyindi, tiyts ja y'ane'emy, jøts ja' ja xani'ana'amindip sudso ja wa'ats'ajtin nbaajtant nayide'en sam ja'.

¹¹ Nipøn ja ayo'on tjanchjagatsøky ku ja yikpaaty, janch møk ja yikjawi; pønts ja ayo'on pønts ja kastigi tpaattip, ku wyejti kyajti, ja'ats idø'on ja chinaa'yin tiy tsuj tyikyø'ødyip, ka' ti, ka' sã, ka'ap ja tsep.

Ja ayo'on ku ja Dios kyajpxy kyayikmimadø

¹² Yikmøkøkti mgø' mdeky pøni tøm ja y'anuu'kxyinidi. ¹³ Ixa'adi ja tiy'ajtindi jøts ja mmigu'uk pøn ja yjanchja'win kamøktinim mba'ejxyiidit jøts ja ky-atuu'tigø'ødyit, jøts ja jade'en ne'egi yjotmøkøktit.

¹⁴ Øy tsujim ja mdsinaa'yin xyikyø'ødyit, tuda'aky ja jaa'y niduki'iyi mømøt mdsøonidit; ku wyinaty jade'en mgajaa'y'atti sudso ja Dios x'ejxtit, pøm ka'axi jadi'iñi nugo ñiyik'ixy ñiyikpaaty. ¹⁵ Yikxonim wanidi, ejxim xka'ukpatnidi ja kyunuu'kxin midi ja Dios pya'ayo'ajtingøjxp mmo'owajnidip, øy ja jade'en tøm yja'ukwa'añ ku ja mbudøkyidit; kidim ta'am ujtšin mnabyikta'agyidi midi pa'amdump jøts ni xkayiktsokmi ja mmigu'uk.

¹⁶ Kidi nugo mnaymøø'tatyidi pøni ka'adam ja xniyaa'yidi xniðø'øxyidi, tum ja Dios yja' ne'egi mjotmay'attip; kidi Esaújin xundi pøn nugo y'u'nk ttaguyajt ja yjagyooi, tuktxy ja tokx ja'ayi ttagugøøy. ¹⁷ Mnijawidipxi ja nayide'en ku ja Esaú ja tyeety kya'ukmøø'ñiyi ja kunuu'kxin ku ja tja'uk'amidoonaa; øy ja wyinmaa'ñ ja tja'uktayaaxnaa ni sudso ja kya'ukyikmøø'ña ja kunuu'kxin.

18 Ka'anım meets idø'øn ja Dios myøk'ajtin nayide'en xpaajti sam adøm ndeety'amøj t'ejxti ku ja kojpk Sinai ñitøøwyidity. Ni ja xaachkoots meets xka'ijxñim ma ja anaaw ja widsuk adsø'jkibim wyidity, 19 jøts nayide'en ka' xmadowðinim ja pujxujx midı yjawı xyiknajtımp ku ja nmado'owınt, jøts nika' ja ayuujk tø xmadowðinim janch møk midı dø'øn kyamidanaadyı ja jaa'y jøts yjanuu'kxaknıdı, jøts jade'en jya'ukyikmigajpxnıdı. 20 Ja'agøjpx idø'øn ja jade'en ku ja adsø'jkibim ja kutujk yikmøødyı midı wamp: "Pøni pøn yø kojpk tyømpy pyatpy yika'tspa'ookp inet ja', uk yikumba'ookp øyi yjajıyujki." 21 Janch adsø'jkibim idø'øn ja t'ejxti tuki'ıyi, ja sa Moısés paat kø'øm wyaañ: "Xjançhyikmıbejpnıp øts ya'at et."

22 Ka'ats meets, ja Dios kyunuu'kxy'et jade'en tø xpaatti, jabi jotkujkxi meets ja Dios ja yikjujky'ajtpı y'øy'ajtin tø x'ejxi møøt ja y'ankilis kamachoonı 23 pøn ja Dios twin'øøgunajxtıp. Tøts nayide'en xpaatti pøn ja Cristo tø tjanchja'wımyıdı pøn ja ñıtso'ok'ajtin abaadi awejxnıdıp. Ja Dios meets idø'øn tø xwingunøjkxıdı midı dø'øn niduki'ıyi tıııdyungøxp, jøts ja øyjaa'y'oo'kpi y'anmıja'win midı ja Dios jam møøt çhınaañıdı, nayide'en meets ja møøt ja winmaa'ñ xyikyø'øñıdı. 24 Jøts ja Jesús tø xpatmıdı pøn jam Dios Teety wyıngujkp xkugajpxındıp pøn ja ñı'jpy xnıtanaa'yındıp. Ka' xukpøky'ajtıym ja y'o'jkin, ja maa'kxujkin ja ne'egi yajkpy jøts ka'ap ja Abel y'o'jkin jade'en.

25 Paty idø'øn yıkkxon x'ejxtit jøts ja kyajpxy y'ayuujk xku'oojkıdı, pø kuwanıxi ja y'ayo'ombaatti pøn jaty ja Dios kyugajpxy tkamımadoodøø. Jawaani kajaats adøm xpaat'ajtınt ja ayo'on, pøni ka'ap adøm ja Dios kyajpxy nmadooja'am ku adøm ja tsajpjotp kø'øm xjamıgajpxıym. 26 Ojts idø'øn ja møk uix ñajxy ku ja Dios kyajpxy jam Sinai kojpkøjpx. Yıde'en ıxyam ja y'ayuujk wya'añ jadıgojk: "Ku øts wyınaty jadıgojk ja uix nyikmiñ ka'ap ja naajx ja'ayı y'adø'øtst, nayide'enxi ja tsajp y'adøtsmit." 27 Ku dø'øn ja Dios wya'añ ku tyik'adø'øtst ja'ayı jadıgojk tuki'ıyi, ja' idø'øn ja tyıjpy ku ja tuki'ıyi tyıkudıgø'øty midı jaty jawyeen tø tyik'øyi. Ka'ats ja sa yjattıt midı xemıkøjpx ja çhınaa'yın tø yıktanıbıktaagi. 28 Ja'abi øy'ajtınts adøm idø'øn ja Dios tø xamıdsøjkyım, ka'ats idø'øn ja nıjuuni sa yjatt, xemıkøjpx idø'øn ja y'ett. Paty adøm ja Dios ngajxajkınt, jøts øy tsuj nwindso'jka'ant pøni sa dø'øn ja pyaat'atyı jøts pøni sa dø'øn ja ttsøky; 29 pø ja' kuxı adøm ja nDios jade'en yıkwındıgøy sami jøøn.

13

Sudso tsınaa'yıngøjpx ja Dios nwindso'jka'ant

1 Kidım xja'dyıgøyđı, ejtpım mnachokıdıt xem yam Cristo køjpx. 2 Kidım xja'dyıgøyđı, jøts ejtp xtøjkmø'odıt pøn jaty mdøjkjotp ja'ttıp, pø mayxi jade'en tø yjattı ku ja jabyøø'kxy ja tyıkpoo'kxtı, ja Diostam idø'øn ja y'ankilis ja yıkpoo'kxtıp øy ja tjaganıjawıdı.

3 Nayıde'en ja tsumyjaa'y xja'myatstıt ejxımdam meets jeexyıp mdsumyı. Ja'myatstı pøn jaty ja çhınaa'yın tø tkuwanjatıdı jabi mnıja'wıdıpxı pøni sa dø'øn ja'abi ayo'on.

4 Yıkkxonım x'ejx'ettıt m'amajstk'ajtınt jøts øy tsuj mnamyøøt'atıdıt, tyııdyumpy ja Dios ja wyınaty pøn jaty namyøøt'atıdıp jadı'iñı yam ja tkanıyaa'yı ku tkanıdø'øxyı.

5 Kıdı ja meen ni ja pıkta'aky nugo mganadyapıkmyo'ojıdıt; tajotkujk'attı pøni tı jam nmøøt'ajtıtp pø tøxi ja Dios wya'añ: "Nıjuuni me ngaja'dyıgø'øty, ni nga'ıxmatst." 6 Paty adøm nwa'anınt jotkujk: "Ja ndeety'ajtınt øts idø'øn xpudøjkıp,

ka'ap øts ja ndsø'øgit pøni sã xunwa'añ tu'uk ja jaa'y."

⁷ Kidi xja'dyigøydi pøn jaty tø mgajpxwijiidi jøts ja Dios y'ayuuik tø mdukmadøyiidi; pawinmaydi sã ja chinaa'yin tø tyikøxti tyikubatti, jøts tundi jade'en sa ja yjanchja'win ja'adi.

⁸ Tu'ugyi dø'øn ja Jesucristo y'ity, nay ja' jekyip, nay ja'ats icyam, nay ja'ats wyinaty xemikøjpx ejtp. ⁹ Paty idø'øn xkamibøktit pøni ti jaty abiky jøts tigach mjayiktukmadoodip. Dios y'øy'ajtingøjpxxi ja anmija'win y'øy'aty jøts ka'ap ja ja'agøjpx ku yikpaduñ sudso kya'pxy ja ka'ayin ja uujkin, jabi nijuunixi ya'atpi tsinaa'yin ja øy'ajtin tø tyukpaadyidi pøn jaty ja øy tjanchjabadundip.

¹⁰ Jawaani øy adøm nwindso'jkin jøts ka' mibaat twindsø'jkin'attit ja møjteetywindsøndi pøn ja møjaa'gyutujk tyiktundipnim. ¹¹ Ku ja møjteetywindsøn tyoxti ja jiyujk ni'jpy Amaagyunuu'kxy Tøjkjotp jøts ja pøky wya'atst, kajp pa'am ja jiyujk nine'kx ja tyiknøjkxti jøts ja jam tyiknitøødyi.

¹² Nayide'ents idø'øn ja Cristo kø'øm y'ø'jky kajp pa'am jøts ja naxwii'ñit jaa'y ttagunuu'kxy ja kyø'øm ni'jpy. ¹³ Wants t'ixmajtsnandi ja møjaa'gyutujk jøts ja Cristo n'anøjkxandit, øy ja sã njaguwanjajtandi sam ja yjajty. ¹⁴ Pø ka'axi adøm ya naxwiiñ ja tsinaa'yin xemikøjpx nmøøt'ajtyindi, n'ixa'ayindipnimxi adøm ja' midi dø'øn me'emppnim ja'atpnim. ¹⁵ Ja Jesucristo adøm ja y'o'jkin xpudøjka'amp jøts ja Dios Teety ejtp nyikjotkujk'ajtant ku ja kyø'øm U'nk ja ndawindsø'jka'ant; jøts nayide'en ja Dios ja n'aaw ja n'ayuuik ndadaxondaajkint. ¹⁶ Jøts kidi xja'dyigøydi ku ja Dios nayide'en twindsø'jkinjawi ku ja mbiktã'aky xem yam mnadyabudøkiyidi.

¹⁷ Mimadowdi pøn jaty mgajpxwejidip; pø ja'axi dø'øn m'anmija'win t'eix'ejtittip jøts ñija'widip ja' ku ja Dios ja wyinaty nay ja' tyamachidi. Pudøkidi jøts jotkujk mmøøtunidit, kidi ayowim xundi, pø ni meetsxi wyinaty jotkujk mgatsøøni.

¹⁸ Ni'amido'ojik øøts, nibøktso'owik øøts, nitiixi ngapøkyjawi jøts jade'en øøts ja ndsojkin wya'añ ku ja n'anmija'win wa'ats jade'eñim y'ett.

¹⁹ Tundi may'ajt jøts øts jawaani møk xni'amidoowidit jøts wyinaty nnabyaãtkojma'andi tsojk.

Yikyajkp ja kunuu'kxin jøts ja kajpxpoo'kxin

²⁰⁻²¹ Ja Dios Teety, pøn ja øy'ajtin tyajkp, ja' mgunuu'kxidip mguwa'anidip, jøts nwindson'ajtim ja y'o'jkin mdabudøkiyidit jøts øy tsuj mdsøønidit mdanidit jøts ndungøjxindit pøni ti tø xamidsojkyim. Mutsk borreegi u'ngin adøm idø'øn ja nwindson'ajtim Jesucristo x'eix'ijtyindi pøn ja ñi'jpy tø tyaky jøts ja Dios Teety kyajpxy tø tyik'adujki, pøn adøm idø'øn xkøjø'ømit'ajtimp, øy ja ti xmø'øyint pøni ti jaty ja xamidsojkimp. Øy'ajtin agujkp ja Cristo xemikøjpx y'ett. Jade'en idø'øn ja y'ejxi.

²² Migu'uktøjkti, tuda'aky waani ya'at nøky xpa'ejxtit jøts xja'gyukidit ti dø'øn nda'ana'amdip. Winmadowdi waani ya'at ayuuik, øy idø'øn yø wine'en kyidyimgyajajai. ²³ Nijawidi ku adøm nmigu'uk Timoteo tø pyuxøjktøjkipidsimy; pøni nabyaãjtipp øø pojin, nmøøtnøjkxp øts ja wyinaty.

²⁴ Kajpxpoo'kxti pøn jaty m'ana'amidip jøts niduki'iyi ja janchja'wibitøjkti. Nayide'en mguejxyidi ja kajpxpoo'kxin ja Italiit jaa'y.

²⁵ Mbaattip ja Dios kyunuu'kxin niwine'enin jam mdsøønidit. Jade'en idø'øn ja yjatt.

JA NØKY MIDI JA SANTIAGO YJAAY

Ku ja Santiago tnijayi ja israelit jaq'y pøn tø ñawyq'kxniyidi

¹ Santiago'ajtp øts. Øts ja Dios Teety, øts ja nwindson'ajtim Jesucristo nmidumpy. Ixyam mee nnijayi jøts øts ngajpxpøø'kxy niduki'iyi ja israelit jaq'y pøn jaty tø choondi ya jøts tø ñøjkxti tsinaabyi abiky tsoo.

Ja wijy'ajtin ja njia'win midi ja Dios yajkpy

² Meets migu'uktøjk, mbaat'ajtip meets ka' ti xkumayjawidit øy yjady-imyĩn o midi ayo'on. ³ Nnija'windipts ku ja ayo'on ja myiĩn, jade'ents ja Dios x'ejxint xnija'wint ku tu'ugyi ja nwinmaa'ñ nyik'ijtyindi, kuts ja Dios amumjoojt njanchja'windit jøts jade'en'ampy ja øy'ajtin ja tuda'aky'ajtin njagyajpindit. ⁴ Øy ka'pxy yikxon mwinma'adyit, winets nayide'en yikxon mwimbidsø'mxiyidit ja m'øwynmaa'ñ jøts xjagyaptit ja ja'gyukin, kidi mwa'andi jøts ku ti mga'ijtxyidi.

⁵ Jøts pøni jats meets winaagin pøn ka'ejtxidip ja wijy'ajtin, ja ja'gyukin, amidowdits ja Dios jøts ja mmo'ojidit, pø ja'axi tuki'iyi tyajkøjxp, ka'ap ja ti t'ama'at'aty jøts ka'ap ja ti tyamigajpxy. ⁶ Ja'ats idø'on tsojkip jøts tu'uk amumjoojt n'amido'owint, ka' nwinmaa'yint majtsk aaw majtsk joojt. ⁷ Pøni pøn jade'en winmaapy, ka'ap ja Dios ja ti y'ukmø'øñiyit, ⁸ ja'agøjxp ku ixyam ti t'uktøky jøts jabom ja wyinmaa'ñ tyiktigatškojmi, ka' tu'ugyi ja wyinmaa'ñ tyik'ity.

⁹ Jøts pøni pønts ayoop winmaapy, pøn tpaduujnidip ja Dios yja', jotkujk idø'on t'ejxnidit, tyaxonda'aktip idø'on ku Dios nøjkk wyaadso'oniyidi jøts ja yiknitso'ok'atidit. ¹⁰ Jøts nayide'en pøni jam pøn kumeeñ'ajtp jøts pøni pyaduujnidip ja Dios yja', jotkujk idø'on ja ñayjawiyidit øy myeeñ ja yjagayik-tamø'ejxti. Jabi yiknitso'ogidipts ja Dios ja' ku wyinaty twingunøjkxiñidi. ¹¹ Tigøøpy ja kumeeñ jaq'y ja myeeñ ku ayo'on myiĩn. Nayide'en ñamyayi yjaty sam ja ujts pijy u'ngin yjaty ku ja xøøw cha'ayiyi jøts ja tyøtskøjxni ja pyijy.

Ku ja ka'øybi x'amutsk'ejxwa'qñidi

¹² Janch jotkujk meets ku tuda'aky mjaa'y'atti øy ja ayo'on xjapaatti; ku jade'en mmajada'akti, winets ja mmø'øyidi ja Dios ja jujky'ajtin midi xemikøjxp, midi ja Dios mdamidsojkiyidip, jade'en'ampy ku ja Dios xtsojkti.

¹³ Ku pøn ñayjawiyi ka'øybi ttunwa'añ, kyø'øm winmaa'ñ ja yiktump, ka'ap ja Dios yø'øbi winmaa'ñ tyaky; ka'axi ja Dios twinmaa'ñ'aty jøts ja axøøkpi yiktu'unt, jøts nipøn ja jade'en tkawinmaa'nmyø'øy jøts ja jade'en ttu'unt.

¹⁴ Ku pøn jade'en ttunwa'añ ja ka'øybi, kyø'øm winmaa'ñ, kyø'øm tsojkin ja jade'en pyadundip. ¹⁵ Yø'øbi ka'øwynmaa'ñ, pøky yø'; jøts ku ja pøky yikmøt'aty, ja o'jkin tigø'øyin ja yajkpy.

¹⁶ Migu'uktøjk, kidi mnawyin'iiñidi; ¹⁷ tuki'iyi ja øybi tsujpi midi nmøøt'ajtyindip, Dios yø tyajkp, tøxi ja tpikta'aky ja jaj ja tøø'kx jam tsajpwemp. Tu'ugyi ja', ka'ap ja tyigach. ¹⁸ Tø ja Dios xmø'øyim ja øy'ajtin midi xemikøjxp ku njanchja'wa'am ja kyajpxy ja y'ayuujk, ja tiiby; ja janchpi, ja'agøjxp ja jade'en ttuñ jøts adøm nyiktso'ondak'okwa'anint pøn ja pyabøjkpi'ajttip, sam ja ttamidsøkyin.

Saqyikpaduñ ja Dios yjanchja'win

¹⁹ Paty, migu'uktøjk, njaaknigajpxy jøts tuda'aky mjaa'y'attit. Yikxon xmadow'ettit ja mmigu'uk sa wya'añ, kidi mnay'øøjyidi, jøts kidi mmigu'uk xmi'ambøkti. ²⁰ Nisudso'ampy idø'on ja Dios xkadajotkujk'ajtyindi ku ja nmigu'uk nmijot'ambijkyindi. ²¹ Paty mastu'utti tuki'iyi midu ka'øy, ja ka'øwiyinmaa'ñ jøts ja ka'ødyunk. Møj pikta'akti yikxon ja Dios kyajpxy midu tø myiktukmadøwdi; pø yø'øxi tyanitso'ok'attip ja n'anmija'windi.

²² Padundi dø'on pøni sa jaty ja Dios kyajpxy wya'añ, kidi ja'ayi nugo xmadøwdi. Nawyin'øø'nindip nugo ku ka' nbadu'unint. ²³ Pøni pøn jade'en adøtsp, jade'en ja ñamyayi n'ukpiktaajkint ejxim ja jaa'y pøn tku'ejxip ja wyeen ja y'aaw jap ejxjøtøy ²⁴jøts ku ka' wya'adsu. Ku ñijxxy, ka' tja'myech jøts wyimbujt. ²⁵ Jotkujk idø'on ja ñayjawiyyidit pøn ja Dios kyutujk tpaduujnidip midu xyik'awa'atspidsø'ømimp, ka'ap ja ja'ayi nugo tpatmadøy.

²⁶ Pøni mwandip jøts ja Dios yja' xpaduujnidit, jøts nay jaty ja mdoojts nugo xyik'awidetti yam nadyijyi ja Dios yja' xpaduujnidi, jade'ents nugo mnawyin'iiñidi jøts ka' x'ukpadunidi jade'en. ²⁷ Ja' ja Dios Teety kyupijky ku nbudøjka'ant ja ku'øky'u'nk jøts ja ku'økyø'øxy pøn ayoodip, jøts nayide'en ka' nugo nbøkyu'unint ya naxwiñ.

2

Ka'ap pøn ñay'øy'ejxidit kyanay'øy'ejxidit wan tjaøøni

¹ Meets migu'uktøjk, pøn jaty tjanchja'widip ja nwindsøn'ajtim Jesucristo ku ja wa'adsu ku ja myøji, kidi meets pøn x'øy'ejxiti xka'øy'ejxiti wan tjaøøni.

² N'ukpiktaajkimp tu'uk ja madya'aky, pøni tøkikidip ja jaa'y jap ma meets mnamyukyidi, tu'uk kumeen jaa'y janch xyøxy janch wyeti janch ñaamyi, jøts jadu'uk ayoobi jaa'y nipach xipach, ³jøts ku ja'ayi øy tsuj xkajpxpoo'kxti, ja' pøn janch kumeen pøn janch xyøxy, jøts ja øybi tsinaabyajt xmo'odi, jøts ja ayoobi xkamøjpikta'akti jade'en xnøjmidi jøts wan ttani uk najxkijxy chøønit, ⁴pø yide'en'ampxyi yik'ixy yiknijawi ku tu'uk x'øyjawi jøts jadu'uk xka'øyjawi. Ka'ap jade'en y'øyi, mbøkyundip jade'en.

⁵ Ukmadøwdi, migu'uktøjk, jøts ja'gyukidi ya'at: Ja ayoobi jaa'y pøn ejttip ya naxwiñ, ja' idø'on ja Dios Teety tø wyi'ijxyidi jøts ja tjanchjawidit ja Dios yja' jøts yikmo'odit ja y'øy'ajtin midu ja Dios ja yjaa'y tyanitanaapy, pø tøxi ja ttamidsøky jøts ja tmo'ot pøn tsojkijip. ⁶ Jøts meets, jade'en meets ja ayoobi jaa'y nugo xtsø'ødyundi ku xkamøj'ejxiti. Nayide'en meets ja kumeen jaa'y njatu'umiyidi ku myikni'øø'nidi jam kudunk wyindump. ⁷ Yø' nayide'en tka'ødyejtip tka'øñimadyaktip ja nwindsøn'ajtim Jesus pøn adøm xyiknitso'ok'ajtindip.

⁸ M'øy'adøtsp meets wyinaty pøni mbadundip ja Dios Teety y'ana'amin midu yide'en wamp: "Tsok ja mmigu'uktøjk, windsø'øgi ja mmigu'uktøjk, jade'en xtsokt jøts jade'en xwindsø'øgit sa kø'øm mnachøkyi jøts sa kø'øm mnawyindsø'øgyi." ⁹ Pøni jamts meets ja mmigu'uktøjk x'øy'ejxiti xka'øy'ejxiti wan tjaøøni, mbøkyundipts idø'on jade'en, ka'ap ja Dios y'ana'amin jade'en xpaduujnidi. ¹⁰ Øy ja Dios kyutujk ka'pxy njabadunwa'añindi jøts jam tu'uk y'ana'amin kyaykpaduñ, pøkyu'unindipts adøm idø'on ku ka' ka'pxy yikpaduñ. ¹¹ Nay ja' midu tyikutujk, jøts yide'en ñiimy: "Kidi mmigu'uk ñiyaa'y ñidø'øxy xpøjkxi", nay ya'at tyikutujkmaa' jøts: "Kidi myikjaa'y'øøky." Øy pøn ja myigu'uk ñidø'øxy ja tjagapøjkxi jøts ja ne'egi yikjaa'y'øøky, pøkyumpts ja jade'en ku ja Dios yja' ka'pxy tø tkabaduujni. ¹² Øy yikxon ngajpxint ndu'unint sam ja Dios ttsøky, jabi nay ja'abi kutujkxi xiidyu'unimp midu

ja nitso'ok'ajtin nayide'en tyajkp. ¹³ Pøni pønts ja myigu'uk tø tka'ayo'ixy, nayide'ents ja Dios ja nøjxk ka'ayo'ijxyim tyiidyuñiyi; pønts ja myigu'uk t'ayo'ejxp, pyaapts ja' ja øy'ajtin ku ja tiidyu'unin ñaxt.

Ja janchja'win jøts ja ødyu'unin

¹⁴ Migu'uktøjkti, çti ja ñiwy'a'ant ku ja'ayi nwa'añim ku ja Dios njanchja'wa'am jøts nika'ap ja øybi n'ukpadu'una'am? Ka'ap jade'en ja nitso'ok'ajtin nbaajtint. ¹⁵ Ku n'ukpiktaajkint ku tu'uk nmigu'uk ti kya'ijtxyi ejxim ja kyaaky ja wyet, ¹⁶ jøts nnimaa'yint: “Mbaatp ja mwet ja mnaamy ja mji'kxy”, jøts ka' ti nmø'øyint pøni ti yjatsøjkpy. ÇTi ja ñiwy'a'ant jade'en? ¹⁷ Ku ja Dios njanchja'wa'am jøts nika'ap ja nmigu'uk n'ukpudøjkiña'am, ka'ap ja janchja'win jade'en tyuñ.

¹⁸ Jamts pøn jawamp: “Mets ja Dios mjanchja'wip, jøts ka'ap ja mmigu'uk xpudøki; jøts øts, øy øts ja Dios ngajanchjawi, nbudøjkip øts ja nmigu'uk.” Jade'en'ampyts idø'on ja janchja'win yik'ixy yiknijawi ku nbudøjka'am ja nmigu'uk, kuts ja nmigu'uk ngabudøjka'ant nisudso'ampyts ja Dios jade'en ngajanchja'wa'andi. ¹⁹ Mjanchja'widip meets ku jaa tu'uk ja Dios, øyi jade'en; nayide'enxi ja miku' tjanchjawi ku jaa ja Dios, kyudsø'jkips ja'. ²⁰ Kidi nugo mgujuun'aty, çka' xnijawi ku ja njanchja'win jade'en wyingaxi'iky ku ja nmigu'uk nbudøjka'ant? ²¹ Jade'en'ampy ja n'apteety'amøj Abraham ja Dios kyupøjki ku ja tpaduun sam ja Dios tsøkyin jøts ja y'u'nk Isaac ttamiyoxt. ²² Ja'gyukidi meets jade'en jøts ku ja Abraham jade'en tnanky'ijxyi ja yjanchja'win ku jade'en tpaduun, jøts jade'en ttuk'abaaty ka'pxy ja yjanchja'win. ²³ Y'abaajt idø'on jade'en ja Dios kyajpxy ku wya'añ: “Ojts ja Abraham tjanchjawi ja Dios, ja'ats ja Dios y'øyja'wiyi'ñ jøts ja ojts tkupiky.” Paty ja Dios myigu'ukjawi ja Abraham.

²⁴ M'ejxtip mnija'widip ixja sa ja Dios tkupiky ja jaa'y ku ja tpaduun, jøts ni kidi ja'ayip tu'ugyi sam ja yjanchjawi. ²⁵ Nayide'en ja ka'ødyø'øxy Rahab ja Dios kyupøjkøø jade'engøjxp ku ja t'ødyuun ja Dios kyugajpxy; ku tjønmoøy ttøjkmøøy jøts abiky tyuu' ttajøpkajxyi'ñ ku ja myidsep wyinaty pyayo'øyi. ²⁶ Ka'ap jade'en tyuñ ku ja Dios njanchja'wint ku ngabadu'unint sam ja tsøkyin. Jade'en ja tpaaty sam ja jaa'y'øøgyin, ka'ap ja ñine'kx tyuñ ku y'anmija'win kya'uk'ejtni.

3

Sam nugo yø toojts yiktakajpxy

¹ Meets migu'uktøjk, ka' pyaat'aty jøts mee niduki'iyi myik'ixpøkt. Pøn t'ejxtip pøn tnija'widip, ja' ka'pxy tpadundip. Nay jade'ents ja møk yik-tabayo'ødyit ku ja ka'pxy tkabadu'undit. ² Tum jade'en ja tundigø'øyin yikjagyepy; winaagin ja' pøn katundigøødyip kakajpxigøødyip, ja' idø'on janch'øy jaa'y ku ja tpaduun ku ja ñay'ejx'ityiyi. ³ Jade'en'ampyts ja kawaay kyajpxy kyupiky ku ja axots tmøøt'aty y'aawjøtpy midi yikwa'k'øyip, øy midi'ampy nduknøjxint. ⁴ Ku n'ukwinma'ayint nayide'en sam tu'uk ja barki yø'øy; øy janch jamøj ja' jøts ja poj ja wyetsmiñ wyetsxøpyi, mutskts ja pujxu'nk midi ja jaa'y yikyø'øpy, jøts ja tyikyø'øy pøni ma ja tsøky. ⁵ Nayide'en yø toojts; win'ii'nxyip ja' midi xyikajpxigø'øyim. Jade'en yø kidim ja jøøn tyøøbyikyin jøts ja tyøømyøji, jøts ja et tyøøyi. ⁶ Jade'en yø toojts ejxim ja jøøn tyøøyin. Yø' amuum xyikma'jtimp ku xyikajpxigø'øyint xyiktundigø'øyint. Miku' yø jade'en xuktu'unimp. ⁷ Yikyuyjy ja jaa'y o midi jiyujk, wan tjooni wan tsaa'ñi jøts ja' midi tsinaadyip mejjotp. ⁸ Ka' pøn mibaat jade'en ja

toojts tmimada'aky, tundigøøpy yø nugo. ⁹ Nayi toojts xyikajpximp ku ja Dios nja'myejchim n'ajot'ajtyim, nayø'øts ja nmigu'uktøjk xukmigajpxigø'øyimp, Diosts jade'en ñamyayi nmigajpxigø'øyimp ja y'agojnajxy midi kø'øm tø tpikta'aky. ¹⁰ Nayi aawjøtpy pyidsimy ja øgyajpxy tsujkajpxy, jøts nay jaayi pyidsimy ja axøøkajpxy. Migu'uktøjk, ka'ats idø'on jade'en yjapaat'aty. ¹¹ Ku n'uk'ejxint ma ja wa'ats nøø pyidsimy, tu'ugyixi ja wya'atsnøø'aty, ka'ap jam ja tya'mtspi, ka'ap jam ja pya'akpi. ¹² Migu'uktøjk, çm'uk'a'ejxip meets tyøømit jam iigi kipkyøjxp ja wenk tsa'am? Ka'axi mibaat nayide'en ja nøø pyidsimy jam nøømu'utjotp ja tya'mtspi ja pya'akpi.

Ja ja'gyukin midi ja Dios yajkpy

¹³ Pøni jap pøn tñimadøy tñijawi, wan tñanky'ijxyi sa ja y'øy'ajtin ja y'øyjaa'y'ajtin, wan jade'en ja ja'gyukin tyiktuñ jøts ka' ñamyikaxit. ¹⁴ Pøni ja meets ti mnadyami'ama'at'atyidi ku nugo kø'øm jade'en xwinmaa'ñ'atti, ka' ja ja'gyukin jade'en xnanky'ijxyidi, taay yø jade'en pyidsimy. ¹⁵ Ka'ap ja Dios jade'en xuknija'wim jøts jade'en n'adøøjtsint, ja' jade'en adøøtstip pøn ka'øyjaa'dyi ku ja miku' jade'en tyuktuñidi. ¹⁶ Ma y'ity ja windi'ñ'ajtin jøts ja nadyami'ama'at'ati, nay jam y'ity ja tsep jøts o ti axøøk'ajtin. ¹⁷ Pøn ja ja'gyukin ja Dios møøjyip, ja'ats øyjaa'y'ajttip, wa'ats chinaa'yin ja tyiknaxti; ka'ap cheptundi chepkajpxti, myøøt'ajttip ja tuda'aky'ajtin jøts ja ja'gyukin. Tsaach'ejxtip jøts ja øy'ajtin ttundi; ja myøkwinnmaa'ñ pyadundip, ka' twindaay'atti ja wyinnmaa'ñ. ¹⁸ Pøn tja'gyukip tkajpxkukip, ja'ats ja øy'ajtin ttukpatp ja myigu'uk.

4

Ka' nminamyaa'yint ja ka'øy'ajtin midi ya naxwiñ

¹ ÇMa chøøñ ja tsep ja aka midi mdundip? Kø'ømyi xyiktso'onda'akti ku ti mnadyami'ama'at'atyidi. ² M'animp y m'adsøjkpy pøni ti mmigu'uk myøøt'ajtpy, kuts ja xkapaatti winets ja tsep xyiktøkidi, jøts jade'ents ja mmigu'uk xyik'ookti. Ka'ap agujk jotkujk m'etti ja'agøjxp ku ja Dios xka'amidowdi xkabøktowdi midi mdsojktip. ³ Pøni m'amidoodip mbøktsoodip jøts ka' myikmo'odi, jade'engøjxp ku øy ka'øy x'amidowdi jøts xyiktunwa'andi nugo ma ka' pyaat'aty. ⁴ iMeets mga'øwyinmaadyip! ÇTi kidi meets xnijawi ku øy møøt nnayja'win ja' midi ja Dios kyatsøjkpy, jade'en'ampyts idø'on adøm ja Dios nmidsepøjkna'am jøts nga'ukja'myajtsna'am? ⁵ Yide'en jap nøkyijxpy wya'añ: "Øy xtsojk'anajxyim ja Espiritu Santo midi ja Dios xukmi'ejtimp jøts ka' t'øyjawi ku wenkpi nbadu'unint." ⁶ Dios ne'egi xmay'ajtimp xpudøjkimp sam ja kyajpxy ja y'ayuujk yide'en wya'an: "Myi'ambijky ja Dios pøn namyøjpiktaajkiyip; pønts tuda'aky'ajtp øy'ajtp, pudøjkiyipts ja Dios ja'." ⁷ Amumjoojt mnadyamiyoxidit ja Dios. Møk windanidi ja miku' jøts mniwa'adsiyidit. ⁸ Wingunøjxkidi ja Dios jøts ja ne'egi mnimeniyidit. Yikwa'atsti ja mbøky, meets, ku nugo ja Dios majtsk'aaw majtskjoojt xtsokti, ku xpadundi nayide'en ja ka'øbyi. ⁹ Jotmay'ookti, taya'axti ja mbøky. Kidi jotkujk mnayjawiidi ku tø mbøkyundi. Yikmendi ja mwinmaa'ñ jøts xjagyaptit ja jotmay. ¹⁰ Nabyikta'agidi yik'ayowim nwindson'ajtim wyingujkp, jade'ents ja ñitso'ok'ajtin ja møj mmo'ojidit.

Ka' nugo nbayø'øyint ja nmøøtjanchja'wibi

¹¹ Meets migu'uktøjk, kidim mnabyagajpxyidi nidu'uk ja nidu'uk. Pønts jade'en pagajpxp, pønts ja myigu'uk jade'en tpøky'ejxp, ja Dios ja kyu-tujk ja jade'en wyindsojip mā wya'añ jøts ku ja nmigu'uk ndsojkint, tiidyumbits ja ne'egi nugo ñabyikta'agyidi jøts ni tkabaduñ kø'øm ja kutujk. ¹² Tu'ugyi ja' pøn ja kutujk tmøøt'ajtp, nay ja'ats xpayø'øyim, ja'ats nayide'en xyiknitso'ok'ajtp, nay ja' xyikwindigø'øyim. ¿Mbøen mets ku xpøkpyayø'øwya'añ ja mmigu'uk?

Ka'yiknijawi pøni ti memp jabom wixøjkp

¹³ Ukmadowdi meets sã x'ukwinmaydi: "Jabom wixøjkp njaa'mint abikyajp jøts jam tukjumøjt n'ejtint. Najxint ndøjka'ant, jamts ja meef jade'en nbaajtint", ¹⁴ nipøn tkanijawi pøni ti memp kidakp jabom wixøjkp. Jade'en adøm n'ijtyindi ejxim ja yoots n'ejxint, jøts nay jaayi n'ejxint, tø tyigøøgyomi. ¹⁵ Yide'en ne'egi mwa'andit: "Pøni xpudøjkimp ja Dios, winets jade'en ndu'unint pøni ti jaty ndunwa'añimp." ¹⁶ Meets ja mgø'øm winmaa'ñ mee myiktunwampy jøts ja namyikaxi; ka'øyts idø'on yø jade'en pyidsimy. ¹⁷ Pøn wa'ats tjanija'wip jøts ja ka'pxy tkabaduñ, pøkyundipts ja jade'en ne'egi.

5

Sã ja kumeeñ jaa'y yikajpxwejt

¹ Madowdi meets kumeeñ jaa'y! Mdaya'axtip ja mwinmaa'ñ ku ja ayo'on xpaattit x'ejxtit. ² Tuki'iyi ja mjujky'ajtim jadi'iñi pyutskøjxnit jøts ja m'øybi wet ja m'øybi naamy ja kipkyaa'tspi jadi'iñi tyikwindigø'øty. ³ Towigyøjxp ja oori ja plati midi mmøøt'ajttip, jade'ents idø'on m'ukyik'ejxtit m'ukyiknijawidit ku møøt mwindigø'ødyit ja mbikta'aky. Tøxi ja mgumeeñ'ajtin øy xpaatti, wingompxi ku ja tiidyu'unin mye'ent. ⁴ Ja kamdumbi pøn tø xkamijuudyi, ja' myiktabayø'ødyip. Wa'ats ja nwindson'ajtim ja t'ixy tnijawi ku ja mdumbi jade'en xkamijuudyi. ⁵ O meets ya naxwiiñ jotkujk xyiknaxti, o ti kø'øm tønadyamay'atyidi, wingompts ja xøøw ku ja tiidyu'unin mye'ent. ⁶ Tø ja xmidundigøydi pøn ti tkatump pøn ti tkanija'wip, jade'en idø'on ku nugo tø xpayø'ødyi jøts xyik'ookti ku ka'ap ja møk'ajtin tjagyapti.

Ja tuda'aky'ajtin jøts ja dios'ajot'ajtin

⁷ Meets migu'uktøjk awejxti tuda'aky, kunim ø nwindson'ajtim mye'ent, nayide'en sam ja kamdumbi tuda'aky t'awixy ja tuu jøts ja pyikta'aky tpøkmukt. ⁸ Nayide'ents meets x'awejxti tuda'aky, kidi nugo mjotigøydi, wingomp jøts mye'ent ja nwindson'ajtim Jesucristo. ⁹ Meets migu'uktøjk, kidi nugo mnagyajpxyidi mnay'øjyidi jøts ka' myikpayø'ødyit; wingompxi ja Dios pøn ja naxwii'ñit jaa'y tiidyunidip. ¹⁰ Migu'uktøjkti, windanidi ja m'ayo'on nayide'en sam ja Dios Teety kyugajpxy twindanaay ja yja'. ¹¹ Jotkujk ja'adi pøn tø tyiknaxti amumjoojt ja y'ayo'on. Pø tøxi xnijawidi sam ja Dios kyugajpxy Job ja ayo'on t'ijxy, jade'ents ja øy'ajtin ja Dios myøøjyi; x'ayo'ejximpts xpudøjkimpts ja Dios jade'en.

¹² Meets migu'uktøjk, yø' mdu'undip ku ti xkajpxtit ku ti xu'undit, tiy'ajtin mgajpxtip. Kidi nugo xuk'ejxti ja Dios ku nwa'anint "Tiy ja", tiy'ajtints ja'; kuts nwa'anint "Ka'ap ja tyiy'ajtin", tyimwya'animppts jade'en ku ka'ap tyiy'ajtin, ka'ats ja Dios jade'en xpayø'øyint.

¹³ Pøni jam pøn y'ayøý wyinmay, wan ja Dios t'ajot'aty. Pøni pønts agujk jotkujk tyiknajxp, wants ja t'øwdi ja kunuu'kxy ayuujk. ¹⁴ Pøni pøn pøjkíp, wants ja twaadsøý ja møjaa'dyøjk pøn tundip tsaptøjkjotp, jøts ja kyugajpxidit jøts aceite tpikta'aktit nwindsøn'ajtim køjxp. ¹⁵ Ku amumdu'uk t'ajot'attit ja nwindsøn'ajtim, tso'okpts ja pamaa'y. Pøni tø tyundigøý, yikpojkipimaa'kxpts ja'. ¹⁶ Paty nayide'en mnadyamimayatsidit ja mbojkipi nidu'uk ja nidu'uk, jøts ajot'atti ja Dios pøni pøn pøjkíp jøts cho'okt. Pøn øyjaa'y'ajtp jøts amumjoojt ja Dios t'amido'ot tpøktso'ot, jade'ents ja Dios myøk'ajtin myajada'akt. ¹⁷ Ja Dios kyugajpxy pøn txøøw'ajt Elias nayide'en ja y'ijty sam adømin; ku ja Dios ja t'amidøøý jøts kyatu'ut, winets ja tuu kya'ukmenaa tigøøk jumøjt jagujkp. ¹⁸ Jøts ku jadigojk t'ajot'ajty ja Dios jøts tyu'ut, xjats myiñ ja tuu jadigojk xjats ja pikta'aky y'øyiyiñ.

¹⁹ Migu'uktøjkti, pøni jaa pøn tka'ukpaduni sam jawyeen tø t'ukpaduñ, jats ja' pøn ja nayide'en tukpaduniyip, ²⁰ mnijawidipts nayide'en ku tø tyiknitso'ok'aty ja mmigu'uk y'anmija'win jøts yikmaa'kxtit ja pyøky.

JA MYĪDU'UKPI NØKY MIDI JA PEDRO YJAAY

Ku ja Pedro tnijayi ja janchja'wibitøjk pøn tø ñawya'kxniyidi

¹ Øts idø'øn Pedro nxøøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam nja'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwa'kxnidi mgajpkøjxp jøts jam tø mnøjkxti jam Ponto, jam Galacia, jam Capadocia, jam Asia jøts Bitinia. ² Tøyip meets ja Dios Teety mw'e'jxniyi jøts ku meets ja m'u'nk'atiyit sayim ja tniwinma'ayiyi'ñ. Yø Espíritu Santo meets ja mdabudøjkiiyip, jade'en'ampyts meets ja Jesucristo yja' xpaduujniyi ja'agøjxp ku ja tø myikwaajtsiyidi ja mbøky, pø adømx i nbøky ja xkubajta'am ku ja chuuiñ tyajxy. Dios mjanchkunuu'kxidip jøts øy tsuj xyiknaxtit.

Ja tsinaa'yin midi awejxingøjxp nyiknajxyimp

³ Tkajxajkyim ja Dios Teety pøn ja nwindson'ajtim Jesucristo tyeety'ajtpy, ku ja xjanchpa'ayø'øiyindi jøts ja jadigojk xukpaajtyin ja juky'ajtin xemikøjxp. Xjats ja jade'en tø xja'bijkyindi jøts ja xukjøp'ijxyindi amumjoojt ja'abi juky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy juky'ajtpi xemikøjxp. ⁴ Paty tu'ugyi njøp'ejxin jøts ku ja Dios ja myaay xmø'øyim, pø tøxi ja t'a'ejxi jap tsajpjøtpy pøni ti ja xmøøwya'animp midi tum øy, midi nisa kajajtp. ⁵ Jøts kumi m'ajot'ajtpy meets Dios amumjoojt, jade'ents meets ja myøk'ajtin ja mdabudøkiyi kunim meets ja juky'ajtin xtyimbyaatt midi xemikøjxp, jøts jaanim ja tnanky'ejxit wiingybety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanchjagu'ayo'ombaa'didi yø'øbi winmaa'ñ. ⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jawyeen y'atswidø'øty winets ja yik'ijxñim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajadakixy ja ayo'on pøni sã ndyimyjagujajta'am ja øwyinmaa'ñ, ja'ats idø'øn jawaani tyimy'øy pø ka'axi ja jade'en wyindigøøy sam oori. Jade'en meets ja mjanchja'win yikmøk'ixy ku xmidanaagyøxtit ja ayo'on, ja'ats mee myiktagupøkp, nay ja'ats mee myiktawindsø'øgip myiktamøja'wip jam nwindson'ajtim wyingujkp ku ja jadigojk ñankñigaxø'øgiyit.

⁸ Mwampy mdsøjkpy meets ja nwindson'ajtim Jesucristo, m'ajot'ajtpxi meets ja' øy meets ja xjaga'ijxñim, patyts meets xmøøt'aty ja kunuu'kxin, ⁹ jøts ku xnijawidi ku ñitso'ok'atti ja m'anmija'windi xemikøjxp; jats idø'øn m'ajot'ajtin tyundi, jade'en idø'øn ja wyingaxi'iky.

¹⁰ Tøyip Dios Teety kyugajpxy tpmaydi tpadajti yø'øbi nitsoojkin ayuujk, jøts tnigajpxti jøts ku meets Dios y'øy'ajtingøjxp mmo'owa'añiyim yø yjade'embi. ¹¹ Ja Espíritu Santo midi ja Cristo tkajxp, ja' ja kuga-jpxy ttukmadoooidøø sã jaty ja Cristo yiknitsokpi wyinaty yjatwa'añ ku ja y'ayo'ombaa'tt, jøts sã nayide'en yikwindsø'øgit yikwinjawit. Ja'ats ja nugo pyamaadyip pyadajtip ja tyimy'ukpøn idø'øn ja' jøts juunim idø'øn ja yjatyimy'ukme'ent ku ja Espíritu Santo ja jade'en tyukmadøyidi. ¹² Ku ja Espíritu Santo ja jade'en tyukmadøyidi jøts ku ja ka' tpaattit t'ejxtit midi wyinaty ttunwajnip, adømnimts inet ja ixyam nbaajtyim n'ijxyim jøts ja myiktukmadowdi ja nitsoojkin ayuujk nayide'en sã jaty ja Espíritu Santo ja tø tyuknijawiyidi pøn jaty kajpxwã'kxtip jøts ku dø'øn ja jade'en tø yjaty.

Ankilis paat ja tjantymy'ejxwa'andi tjantymñijawiwya'andi sudso'ampy adom nniitso'ok'ajtyindi.

Xwaaqds'o'jimp ja Dios jøts ja ndsinaa'yin wa'ats tsuj nyiknaxjint

¹³ Paty øy jawyeen xwinma'adyit ku ti xunwa'andit, kidi møj kamøj o ti xjawidi, jade'ents mdsinaa'yin øy xyikyø'odyit. Amumjoojt meets ja Dios y'øy'ajtin ja kyunuu'kxin xjøp'ejxidit midit ja yakwampy ku nwindson'ajtim Jesucristo mye'ent jadigojk. ¹⁴ Madowdi, jade'en mmado'odit sam jaa'y y'u'nk myimadøyin. Kidi jade'en m'uksinaa'ñidi sa y'ijty mga'øchøøniidi ku Dios wyinaty ka'ananim xpabøjkidi ja yja'. ¹⁵ Øy tsuj mjaa'y'attit jøts jade'en x'aduunaxtit ja Dios Teety wya'ats'ajtin y'øy'ajtin, pøn idø'on tømwi'ijxyidi; ¹⁶ pø yide'enxi jap nøkyijxpy wya'añ: "Øy tsuj mjaa'y'attit sam øtsin, kumi ka' ø nbøkmyøødi."

¹⁷ Pøni mdeetyja'wip meets ja Dios Teety, windsø'øgip meets idø'on ja ejtp, pø ja'axi ka'pxy tiidyu'ump sa pønjabøn ja chinaa'yin tyikyø'øy, ka' pøn ja tiidyu'unin tkapaatt. ¹⁸ Jabi ja Dios Teetyxi meets tømduknitsok'atyidi ja ka'øchinaa'yin midit adom ja n'apteety'amøj tøm pamendi tpabatti; mnija'widipts wa'ats jøts kidi oorip plätip ja yiktaguyajkip, windigøy'ejtpxi yø'. ¹⁹ Ja' ja yiktaguyakiyi'ñ ku ja nwindson'ajtim jade'en wyidsuun wyidajxy, øy ja niti pøky tjugamøødi sam ja borreeg'u'nk y'ijty yiktamiyøxy ja Dios Teety. ²⁰ Windi'ixyip ja tanibiktaagi y'ejtni, namga'ananim ja naxwii'ñit cho'onda'aky, xjats ja yannim tøm yin ku kyøjxwa'añ ja naxwii'ñit jøts ja xa'ødyøkidit ma ja Dios Teety. ²¹ Ja nwindson'ajtimgøjxp meets ja Dios Teety xpabiky midit tøm tyikjujkyiky jadigojk xemikøjxp; jade'en'ampy ja tøm tømø'y ja myøk'ajtin, ja kyutujuk, jøts ja njanchja'win amumjoojt, jøts tu'ugyi njøp'ejx'ejtin ja Dios.

²² Jade'ents ja m'anmija'win wa'ats y'etti ku ja Dios tyiy'ajtin xmimadojidi midit ja Espiritu Santo xuknija'windip. Jade'en'ampyts mnabya'ayowidit, tsokti, wa'andi ja mmigu'uk sa Dios ttsøkyin. ²³ Jade'en idø'on tpaaty, tøm meets jadigojk mga'axigach, ka' meets ja ñamyayi x'ukteety'ajtni ja jaa'y midit oo'ktip tigøødyip, ja Dios meets ja kyajpxy tøm myikjujky'atigachidi midit nijuuni sa kajajtp. ²⁴ Kumi nømp ja':

Jade'en idø'on naxwii'ñit jaa'dyi sam o ti ujtsin,

jøts ja tyunk jade'en sam ujtspijy midit ja tyiknigaxø'kp.

Paty tuki'iyi wyindigøy, ti ti uktamp ku ujts tyi'ich, pø nayide'enxi ja pyijy wyindigøy;

²⁵ jøts kuts ja Dios ja kyajpxy, ejtp ja xemikøjxp, ka'ap ja kyudigøy.

Yø øgyajpxy yø ømyadya'aky mee myiktukmadoop.

2

¹ Paty x'ixmatsttit tuki'iyi ja mga'ødyu'unindi, ja mga'øwyinma'andyi, wine'en mwin'øø'ndi, wine'en o ti mnadyawindaay'atyidi, wine'en x'ama'at'atti, xka'ødyejti, xka'øbyikta'akti pøngapøn. ² Nayide'en sam tu'uk ja maxu'nk ñamgaxi'iky jøts ja chets tsojk mabaadyim tpaatwa'añ, jade'ents meets idø'on xtsoktit ja Dios kyajpxy y'ayuujk, midit øy midit wa'ats, jøts jade'en ja mjanchja'win myiweni'adø'østtit, jøts ja nitso'ok'ajtin xpaattit, ³ pøni tødam idø'on xjanchnijawidi ku ja nwindson'ajtim yja' y'øyi.

Ja Cristo dø'on ja xemikøjxpit jujky'ajtin tyajkp

⁴ Mbaattip m'ejxtip ja nwindson'ajtim Jesús, yø' xyikjujky'ajtim xemikøjxp, jade'en ja myøk'ajtin tjagyepy ejxim tu'uk ja jønts tsaajin. Jats may

pøn tkatsojkip pøn tkaja'gyukip, tøts ja Dios Teety yø twi'ixy jade'en ejxim ja pojtspi ja øybi tsaa twi'ixy midi yiktunwampy. ⁵ Nayide'en meets sam ja pojtspi ja øybi tsaa twi'ixy midi yiktumpy ku tsaptøjk tyik'øyi. Jade'ents meets ja Dios Teety myiktunwa'añiyi jøts xpaduujnidi ja yja' ku ja amuum mnadyamiyoxidit jøts ku nayide'en ja mbikta'aky xamiyoxtit, ja' idø'øn ja jade'en mdawindsø'øgidip, jøts ja Dios Teety xkupøjkidit ku jade'en ndu'unidit Jesucristo køjxp. ⁶ Paty ja Dios kyajpxy wya'añ:

Nbiktakpy øts jam Sion jade'en tu'uk ja ejxpajt ejxim ja tsaa ma pøch cho'onda'aky, tu'ugyits ja yikpa'ext jade'en; pøn ja tpadump jade'en, ka'ap ja wyinguwopi yjöpkuwopi, pyaatp ja øy'ajtin ja'.

⁷ Pøn yø tmøja'wip tjanchja'wip, møj yø', yø' xyiknitso'ok'ajtimp; pønts tkamøjpiktakp, pøn tkajanchja'wip jatyi, jatpts idø'øn ja yide'en sam ja Dios kyajpxy wya'añ:

Ja tsaa midi ja pojtspi kya'a'ejxip tyiktunwa'añ, ja'ats ne'egi ja Dios tø t'a'ejxi jøts ja ne'egi yikxon tyiktuñ.

⁸ Xjats nayide'en ja Dios kyajpxy wya'añ:

Jade'en yø', ejxim tu'uk ja tsaa midi ja jaa'y tyagidaapy.

Jade'en yø yjatti wyinguwopidi yjöpkuwopidi ku tkabadundi ja øy ayuujk midi ñigajpxy ja nwindsøn'ajtim yja'; jade'en ja Dios tø ttanibiktaagi jøts jade'en yjattit.

Pøn ja Dios ja'ajtiyidip

⁹ Tum ja' meets pøn ja Dios tø wyi'ijxyidi, meets mmidumpy ja nwindsøn'ajtim Jesucristo yja', jade'ents meets wa'ats mjaa'y'atti jøts tu'ugyi ja Dios mja'atyidi pøn ñiwindsøn'ajtpy ja tsajpjotpit jøts naxwii'ñit, ja'agøjxp jade'en tø myikwi'ejxti jøts xkajpxwa'kxtit xkajpxy'ødyit sã ja Dios janch øy janch møj. Nay ja'ats øjts øy tsuj myikujajtaajkidi myikudø'kxaajkidi ku y'ijty m'etti agoostujpy. ¹⁰ Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pøn mba'ayøyiidi, mba'ayojidipts ja Dios ixyam.

Yikxon xpadu'undit ja Dios

¹¹ Meets migu'uktøjk, tøg'ayø'øbyi adøm n'ijtyindi ya, tsajpjøtpy adøm ngugajp'ajtyindi xemikøjxp paty mee møk nminuu'kxa'aky, kidi xyikmajada'akti ja ka'øyjaa'y'ajtin midi tmimada'akwamp winjaa windsojk ja anmija'win. ¹² Jagyapti ja tuda'aky'ajtin ja øyjaa'y'ajtin ma pøn ja Dios tkanijawinim. O meets ja wine'en mjabagajpxyidi jøts mee myiktijy ka'øyjaa'dyi, kuts t'ejxti ku tñijawidi ku tsuj mjaa'y'atti winets ja Dios ja twindsø'øgidi twinjawidi jøts jade'en ja nitso'ok'ajtin tpaattit ku wyinaty ja tiidyu'unin xøøw yja'aty.

¹³ Ja nwindsøn'ajtim Jesús køjxp xkupøktit xmimado'odit ja kudunktøjk jøts ja møj windsøn, ¹⁴ jøts ja tyumbi nayide'en midi tpayø'øpy ja tundigøøbyidi ja kajpxigøøbyidi, midi'its øyjaa'y'ajttip tuda'akyjaa'y'ajttip, ja'ats y'øyja'wip. ¹⁵ Jade'ents ttsøky ja Dios jøts øy tsuj mjaa'y'attit jøts jade'en xyik'amo'ondit pøn nugo agubojidip, pøn tkanija'widip.

¹⁶ Tø meets ja øy'ajtin myikmøøñidi, jøts ka' ti nugo ajawi mmimajada'agidit. Ka' mwa'andit jøts øy sagasa m'adøøtsnidit ku ja øy'ajtin tø xpaatti. Ja' tu'ugyi mbadu'undip midi ja Dios ñi'ane'empy. ¹⁷ Windsø'øgidi winjawidi niduki'iyi sam pyaat'atyin. Tsokti ja mmigu'uktøjkti pøn nay ja'abi

janchja'win pyadundip midī meets, windsø'ogidi winjawidi ja Dios, jøts nayide'en ja windsøndøjk kudunktøjk.

Ja ejxpajt midī ja Cristo tø xmø'øyim ku y'ayo'ombaaty

¹⁸ Tumbitøjkti, kajpxkyupøjkkøjxti niti jot'aka ja mwindsøndi, wan tja'awa'anidi tka'awa'anidi, wan ja tja'gyukidi tkaja'gyukidi. ¹⁹ Jabi øyxi ja' ku ja Dios tuki'iyi xamijawidit ja m'ayo'on ku myikjemandi myiktedundi niti pøkyøjxp, paty ja amgujuk jotkujuk xmidanidit. ²⁰ Ku meets xku'ayo'ombaattit o ti o mā øy tsuj tø xkayik'øyidi, çti øy'ajtin meets idø'on mdsaaçpaatp? Kuts meets øy tø mjatañ jøts kuwañim myik'ayo'ombaadyidi pøn m'ana'amidip, ya'at idø'on ja Dios y'øyja'wip ku meets tuda'agyi xkupiky'aty ja ayo'on. ²¹ Paty meets ja Dios tø mwaadsøyidi, jabi tøxi Cristo y'ejxpajt tyiktañ ku y'ayo'ombaaty niti akikøjxp jøts meets ja xpadu'undit jade'en. ²² Niti pøky ja tkatuñ, niwindem xøøw ja jaā'y ja tkawindaay'ajty; ²³ ku ja y'ijty yikmi'akikajpxy, ka'ap ja nayide'en y'adsøy; ku ja y'ijty tyik'ayo'ombaatti, ka'ap ja tmidsepiky pøn jade'en tuujnidip. Dios Teety ja ne'egi tyanipijky ja ka'pxy tiidyunk. ²⁴ Kø'øm idø'on ja Cristo adøm ja nbøky tuki'iyi tku'o'jkigyijxy jam kruskøjxp, jøts ka'ap adøm nyikmøj'ajntin ja nbøky jøts jade'en øy tyy ja ndsinaa'yin nyiknaxint. Pyaajt ja tsaachi'ajtin ja', jøts adøm jade'en nniitsoojkindit. ²⁵ Jabi jade'enxi y'ijty sam ja borreegi tyigøyin, tøts meets jadigojk xniwimbity ja nwindsøn'ajtim Jesucristo pøn m'ejx'ejtīdip jøts pøn ttunk'ajtp ja m'anmija'windi.

3

Sa dø'on pyaqt'aty: chøønidit ja amajtsk jaā'y

¹⁻² Jade'en meets tø'øxyøjkti, kajpxkyupøkti ja mgø'ømniyaa'dyi jøts xuk'ejxtit xuknijawidit ja tyy'ajtin ku meets ja mjaā'y'ajtin tuda'aky xyiknaxy. Jats idø'on winaagin ja yaa'dyøjkti pøn tkagupøjktipnim ja øyaypxy ja ømyadya'aky, ja'ayi meets ja jade'en xukupøktit mjaā'y'ajtingøjxp, niti kajpxy niti madya'aky. ³ Jøts ka'ap meets ja mdsuj'ajtin xmiat xmi'ookt midī ja'ayi nikijxy kaxø'kp ku tum ja oori, tum ja wimbatjaaxy wimbatwøky, jøts tum ja tsowibi wet xjotmay'attit. ⁴ Jabi wa' tsuj'ajtinxi meets idø'on ne'egi myiktu'ump midī m'am mjoojtp yik'øyjaā'y'ajtp, ja'abi midī kawindigøøpy. Janch øy ñaxy idø'on ja jam Dios wyingujkp. ⁵ Jade'ents idø'on y'ijtyip ñajxmi ja tø'øxyøjkti pøn ja Dios yja' tpadundip ku ja nayide'en tmøøt'ajti ja tuda'aky chinaa'yin. Yjanchja'widip idø'on ja Dios ja y'ijty jøts ja ñiyaā'y tuki'iyi tkajpxkyupøjkidi nayide'en. ⁶ Jade'ents idø'on ja Sara yjaā'y'ajty, tuki'iyi tkajpxkyupøjkijxy ja ñiyaā'y Abraham, jade'en ja tpikta'aky sam tu'uk møj øy windsøn. Pøni øy meets mjaā'y'aty, nayide'ents meets idø'on xu'unt sam ja Sara tø tjøptuni jøts jade'en ja mniyaa'y xkatsø'ogidit.

⁷ Nayide'en meets yaa'dyøjkmi, ja'gyukidi ja mnidø'øxyti, windsø'ogidi sam ja pyaqt'atyidi. Kidi meets ja xamøj'aty ku ja nayide'en kyamøkidi sa meets, jabi nay ja'abi øchinaa'yinxi dø'on ja Dios tø myø'øydi midī meets tø xpaaqy y'øy'ajtingøjxp. Tundi jade'en, jøts ka'ap ja Dios mgamo'ojidit midī jaty m'amidoodip mbøktsoodip.

Ku ja øy'ajtin yiku'ayo'ombaadi

⁸ Jade'ents idø'on xyiknaxtit ja mdsinaa'yin: øy tsuj mnachokidit sam tu'uk jaā'yin, nabya'ayowidi nixem niyam jøts xyiknigaxø'øktit jade'en ja mduda'aky'ajtin. ⁹ Kidi meets ja kya'øyi nayide'en xyikwimbity jøts ja

mmigu'uk xuk'ayojiwya'andi ja ka'øgyajpxy ja ka'øy'ayuujk. Ni'amidowip meets idø'øn ja ne'egi ja kyunuu'kxin, pø ja'axi adøm tø nyiktaniwaadsø'yim jøts ja Dios kyunuu'kxin nbaajtindit. ¹⁰ Jabi yide'enxi dø'øn ja Salmos wya'añ: Pøni pøn idø'øn øy tsuj ja xøøw ja tsinaa'yin yiknaxwampy, y'ejx'etp idø'øn ja tyoojts ja', jøts ja yigaappi y'axøøkpi ja tkakajpxt jøts ja y'aaw tkadataay'att.

¹¹ Paat'ajtp idø'øn ja t'ixmatst ja yigaappi jøts ja y'øybi chujpi tpadu'unt ne'egi, y'ixa'ap idø'øn ja øy'ajtin jøts tuki'iyi tpanøjkxt.

¹² Jabi Dios Teetxyi idø'øn t'ejx'ejtp pøn øy jaa'y'ajttip

jøts nay ja' tmdado'op ja tsapkajpxy,

ka'ats idø'øn ja møøt ñamyayi pøn ja y'axøøkpi yigaappi yikmajadaktip.

¹³ ¿Pønts meets idø'øn ndejint mdamidsepwa'aniyidip ku ja y'øybi chujpi xunwan'ettit? ¹⁴ Pøni jats pøn wyinaty mjanchtuku'ayo'ombaadiyidi ku ja y'øybi xjatu'undit, øyjawidi kunuu'kxyjawidi meets idø'øn ja ne'egi, jabi møjxi ja Dios y'øy'ajtin tyikwimbejtnit. Patxyi meets idø'øn niti nipøn xkatsø'øgidit,

¹⁵ nadyamiyoxiyidi ja Cristo pøn adøm nwindson'ajtyimp. Awejx'et meets idø'øn ja', ku pøn tyiknidøøwit tiku xpaduñ ja mjanchja'win jade'en, ku x'adsojimbettit, tsuj tuda'aky meets idø'øn ja xu'unt. ¹⁶ Yikxon meets idø'øn m'øy'att jøts xmøøt'attit jade'en ja m'aaw ja mjoojt jotkujk, jøts ku wyinaty pøn mdamigajpxyidi ja Cristo yjanhja'win, køøm ja kyajpxy ja myadya'aky ja ttatsø'dydu'undit ku meets ja jade'en nugo mnitaayibyetyiyidi. ¹⁷ Øyts ja ne'egi ku ja øy'ajtin ngu'ayo'ombaajta'ant pøni jade'endam ja Dios køøm ttsøky jøts idø'øn jade'en ne'egi ngatu'unint ja axøøkpi ja yigaappi.

¹⁸ Jabi nayide'enxi Cristo køøm tø y'ayo'ombaatmi adøm nbøkyøjxp, tuk'ojkyi ja tø ttanaxy ja ayo'on. Øy ja y'ijty yja'øyjaa'y'i, ayo'ombaajt ja' adømgøjxp wine'en nga'øyjaa'y'ajtyindi, jøts jade'en ja Dios Teety xukwingunøjkxa'andi. O dø'øn ja ñine'kx wyindigøøy, jujky'ajttpts ja ixyam jadigojk. ¹⁹ Ja Espiritu Santo myøk'ajtin ja yiknøjkxøø mā dø'øn jap namay annija'win t'awejxti ja y'ayo'ondi, jøts ttukmadøøy ja nitso'ok'ajtin. ²⁰ Ya'atpi jaa'dyi ku yujky'ajttøø ka' idø'øn ja tmøjpktajktøø ja Dios sa ja Noé tjanigajpxy yam ja Dios ja yjanhja'awijxyindi. Ixyam idø'øn wyinaty ja Noé tyik'øyi tyik'abaadi ja møj barki mā dø'øn niwaani ñitsokti, niduktujk idø'øn ja'adi ka'pxy pøn jap barkijøtptyi yikanaanwidejtdi ja møj nøø, jøts jade'en sa kyajajttøø. ²¹ Yø'øbi nøøjts ndamiguy'ejxa'amp ja nøø midi tump ku nnøbjatint midi tø xukpaajtyim ja nitso'ok'ajtin. Ka'ap ja nøbjatin ja' wya'añ jøts ja ne'kx ja'ayi wya'ats'ejtindit. Ku dø'øn nnøbjatint, ja Dios idø'øn n'amidø'owimp jøts ja nbøky xyikwaajtsa'ant. Jade'en'ampyts idø'øn ja nøbjatin tyuñ jøts ja nwindson'ajtim xukniwaajtsim ja ka'øybi pø ja'axi ja kyujkpyøjkyi'ñ jadigojk xemikøjxp. ²² Jøts ja ojts chajpety, ojts tpu'ixaagi ja Dios Teety y'aga'ngyøjøm, ja' tniwindson'ajtp ja ankilistøjk jøts wine'en y'etti niduki'iyi ja yikutujkpiøjkti, tum ja' amuum paajtip.

4

Jade'en nbadu'undit sam ja Dios ja ndunkjøøjp tø xmø'øyindi

¹ Tøxi ja Cristo y'ayøy, nayide'en meets idø'øn xkupiky'att ja ayo'on. Ku jade'en xu'undit tø wyinaty ja pøky xkayikmøj'atti, ² jøts jade'en mjaaktsøønidit ya naxwiññ sam ja Dios køøm ttsøky'aty, jøts ka'ap ja mgøøm ja' xu'undit, ja kya'øybi. ³ Tø meets xyikjotkidakøjy jekyip ku xpadundi y'ijtyip pøn ja Dios tka'ejxidip. Ja' y'agujkpy meets y'ijty mdsøøni mā ja axøøkpi

yigaappi, ma ja awanax agojnax nayide'en xwindsø'ogidi xwinjawidi, midi idø'on kapaat'ajtiyip nbadu'unint. ⁴ Ja'abi jaa'dy, kumaap ja tjawidi ku meets ja xka'ukpadu'unxinidi ja y'axøøki yigaappi tsinaa'yin, paty meets myikjigajpxy myikpagajpxy. ⁵ Ka'ap meets ja xmø'jipkta'akt, kyø'yaktip ja kø'øm ja tiy'ajtin jøts ja yikti'dyundit, ja' ja nøjkx ti'dyundidip pøn ti'dyump ja oo'kpi jøts ja jujkpyi. ⁶ Ja' pøn tø y'oo'kni, tø yiktuk'ixy yiktuknijawi sudso dø'on ja y'anmija'win xemikøjxp ndejint y'uksøønit møøt ja Dios. Jaayip idø'on ja ñamyayi tpadso'ondakni ja xemikøjxpit jujky'ajtin ku ja Dios yja' tkupøjkiyidi, øy ja kawine'en yjayikt'dyundi ya naxwiin, tjapaatti tja'ejxti ja kajkin ja o'jkin ja'adi.

⁷ Wingonipxi jits kyudigøgyøjxint tuki'iyi ja pikta'aky, paty meets ja y'øybi winmaa'ñ xyiktu'undit jøts xamija'myatsidit ja Dios. ⁸ Ja tsojkin meets idø'on ne'egi mmøøt'ajtp, jabi yajkpxyi ja maa'kxujkin ja', jøts ka'ap ja tsep ni ja aki ja tkayikmajada'aky. ⁹ Nagyupøkidi mjønnotp mdøjkjotp, pøni pøn jam memp ja'tp, kidi ti x'ama'at'atti. ¹⁰ Kija' meets idø'on xu'unt ja mdunkjøøjp sam ja Dios tø mmø'øyidi jøts jade'en mnadyabudøkiyidit nixem niyam pøni sã Dios ja kunuu'kxin køx kidã'ak tø mmø'øyidi. ¹¹ Pøni jaa pøn tñigajpxwa'añ ja Dios yja', ja Dios idø'on ja y'ayuujk ja wyinmaa'ñ ja yiktuujnip. Pøni jaa pøn myigu'uk tpudøkiwya'añ tuki'iyi dø'on ja tyiktungøxt ja møk'ajtin midi ja Dios yajkpy. Jøts jade'en ja Dios Teety ndamøja'wa'ant ndagunuu'kxyja'wa'ant ja ndunkjøøjp nwindson'ajtim Jesucristo køjxp, pøn tu'ugyi ja øy'ajtin ja møk'ajtin tmøøt'ajtp xemikøjxp. Jade'en idø'on yjatt.

Ku ja Cristo nbadu'unint, ayo'ombaajtip

¹² Meets migu'uktøjk, kidi kuma'ayin xjawidi ku møk m'ayo'ombaatti, kidi mnømdi ku jade'en kyapaat'aty. ¹³ M'øyjawip meets idø'on ne'egi ku meets idø'on Cristo møøt m'ayo'ombaaty, jøts nayide'en wyinaty xaxondaknidit ku tñank'yejxit ja myø'ajtin ja y'øy'ajtin ku wyinaty myeni jadigojk. ¹⁴ Jotkujk meets idø'on mnayjawiyidit ku myikwingajpxtit myikpagajpxtit Cristo køjxp; jabi ja Diosxi meets ja y'Espiritu Santo mmøøt'ajtip. Axøøk yigaap ja nwindson'ajtim ja tñimadya'akti, ka'ap meets nayide'en, ja'axi meets mwindsø'jkip mwinja'wip. ¹⁵ Møk tsø'ødyu'unin møk payø'øyin ne'egi ñaxy ku nyikjaa'y'o'jkit ku nma'jtsint, ku tigati ndatøjka'ant ndakajpxa'ant midi'ibi adøm xkapaat'ajtip. ¹⁶ Ka'ats ja ne'egi chø'ødyu'uni ku ja Cristo yja' ngu'ayo'ombaajta'ant. Ndamøja'wa'amp ndagunuu'kxyja'wa'amp adøm idø'on Dios ja ne'egi.

¹⁷ Ixym adøm idø'on ndi'dyunk tyuu'na'amp pøn jaty ja Dios ja'ajtidip. Møkts adøm ja ndi'dyunk ñajxindit, çsats idø'on ja yja' mye'endit kyidã'aktit pøn ja Dios tkabadundip? ¹⁸ Jabi ja øyjaa'yts ja ñitsoojkin ñiyjøjxk tkapatip, çsats idø'on ndejint tyimyjattit pøn ja Dios tkamamadoodip, pøn ja chinaa'yin tyiknajxtip pøky'agujkpy? ¹⁹ Patyts pøn ja Dios yja' tmi'ayo'ombaajtidip sam ja kø'øm tø tyamidøkyidi, ka'ap ja mibaat t'ixmatstij ja y'øybi, tyun'etibyim ja'adi, amuum ja y'anmija'win ttamiyoxtit ja Dios pøn yikojidip yiktsoojkidip, nijuuni ja kyamajtstu'udyidi.

5

Ku ja Cristo yjanchja'wibi yikajpxwejti

¹ Ixym ngajpxwejwa'añ pøn jam mnigubajk'ajtiyidip, ja møjaa'dyøjkti, jabi nayja'abi tunkxi nmøøt'ajtpy, ja ku øts idø'on kø'ømyi ndyimy'ijxy sã dø'on ja Cristo y'ayo'ombaajty. Nbaatp øts nayide'en ja øy'ajtin sam nayide'en

ja mōjaa'dyōjkti, ku wyinaty ja nwindson'ajtim tō ttukmibaat'aty. ² Paty ōts ixyam mee mōjaa'dyōjk nnōjmidi jōts yikxon x'ejx'ettit pōn ja Dios yja' tpaduujnidip midī meets tō myiktagidōki; kō'ōmdsōky idō'ōn meets ja xu'unt sām idō'ōn ja Dios kō'ōm ttsōky'aty, ka'ap akikōjxp jōts nī meengyōjxp ja xkatu'undit. ³ Kidi meets ja mgutujk nugo xamajadā'aky, tudā'aky idō'ōn ja xuu'mo'odit jōts ja m'ōchināa'yin xuk'ejxpajtin'attit. ⁴ Kuts jade'en wyinaty myeni ja mōj ejx'etpi jōts meets xpōkt ja mōj ōy'ajtin midī nīwindem xōōw ja kyudigō'ōyin kaja'tp.

⁵ Ixyam meets unā'jktōjkti ngajpxwejwamidī, mimadoow meets idō'ōn tuki'iyyi ja kyutujk ja mōjaa'dyōjkti, sām meets niduknax nixem niyam mnagyupōkidit. Jabi jade'ents ja wijkyajpxy wya'añ ku ja Dios ka' ttsōky pōn kō'ōm namyōjpiktajkidip, jōts ja' tpuđōki y'ōy'ajtingōjxp pōn tmōōt'ajtp ja tudā'aky'ajtin. ⁶ Ku xmidudā'aky'attit ja Dios myōk'ajtin, nay ja'ayi dō'ōn kō'ōm mgunuu'kxiyidip ku ja xōōw jumōjt wyinaty tpaaty. ⁷ Tagidōkidi ja Dios tuki'iyyi midī mbamaadyip mbadajtip jabi ja'axi ja tyunk'ajtpy jōts adōm ja xtsōjkint.

⁸ Nay'ejx'etidim, wijy kejy nabyiktā'agidi; jabi oxī mā y'ixy kyōy ja miku', ja mmidsep pōn mduk'ixmātswajniyidip ja mjanchja'win. ⁹ Mimōk'atti, tamōk'atti ja mjanchja'win, ja'myatsti ku nayide'en ja mmigu'uktōjk y'ayo'ombatmidī o māđsoo sām meets. ¹⁰ Ku adōm wyinaty tō n'uk'ayo'ombāajtyindi waani, xjats adōm idō'ōn ja Dios xyik'ōō'yandit jōts xmōōgyōjxindit ja mōk'ajtin jōts jade'en nisa nga'ukjajtnindit. Xpa'ayo'ondip idō'ōn ja Dios ku kawinmaañi xkunuu'kxindi, jōts ku kō'ōm tō xwaadsōō'yim jōts adōm n'ejxindit nbaajtindit ja y'ōy'ajtin ja myōj'ajtin xemikōjxp mōōt ja Jesucristo. ¹¹ Tu'ugyi dō'ōn ja Dios Teety myōk'ajtin mōj midī nīwindem xōōw ja kyugōjx'ajtin kamemp. Jade'ents idō'ōn ja yjatt.

Ja kajpxpoo'kxin midī tyagugōjxiñip

¹² Yjanchpadumpy tudā'aky'ampy ja janchja'win yō Silvano adōm nmigu'uk. Ixyamts ōts ja ndamigaxi tu'uk ja nōky midī tō nja'ay jōts meets ngajpxwejwā'añ jōts ku Dios kyunuu'kxin tō mmō'ōyidi jōts jade'en'ampy tnanky'ijxyi pōni ti jaty tō xpaatti x'ejxti. Mdsojkidip meets ja Dios jōts kidi mibaat x'ixmātssti, tu'ugyi yikxon xpanōjkxtit.

¹³ Mdanigajxidip ōts ja kajpxpoo'kxin ja Babilonia janchja'wibidi pōn ja Dios tō t'awaagwmujkmi nayide'en sām meets. Nayide'en ja mgajpxpoo'kxmīyidi ja mixy Marcos midī n'u'nkja'wip pōn ōts xpudōjkip. ¹⁴ Nagyajpxpoo'kxidi nixem niyam sām tu'ugyi ja jaā'y nīamyayidi Cristo chojkingōjxp.

Jade'en ō nwa'añ jōts ja ōy'ajtin xmōōt'attit pōn ja nwindson'ajtim Jesucristo yja'ajtpy. Jade'ents idō'ōn yjatt.

JA MYĪMAJTSKPI NŌKY MIDI JA PEDRO YJAAY

Ku ja Pedro tnijayi pøn tjanchja'widip ja nwindson'ajtim Jesucristo

¹ Ōts idø'øn Simōn Pedro nxōw'ajtpy. Ōts ja nwindson'ajtim Jesucristo nmidump jøts øts ja nayide'en ngudanaapy. Ixym meets ja nøky ndanigaxi pøn nayide'en tō xpaatti ja janchja'win sam øøts ja nja', ja'agøjxp ku ja nwindson'ajtim Jesucristo tyiyi kya'pxyi. ² Jade'en sam x'ejxtit xnijawidit ja Dios Teety jøts ja nwindson'ajtim Jesús, nayide'en idø'øn mdaja'adiyidit ja y'øy'ajtin kyunuu'kx'ajtin.

Ja' midi yiknigajxø'øgiyip pøn tjanchja'widip ja Cristo

³ Myøk'ajtingøjxp adøm ja Dios Teety xmø'øyim kōx kida'āk midi xka'ejtxa'amp jøts jade'en øy tsuj ja ndsinaa'yin nyiknajxint, sam ja ajot'ajtin nayide'en yikmo'ot, jabi tōxi Cristo kuk'ijxyim pøn tō xwi'ijxyim xwigø'ønīm y'øy'ajtingøjxp myøk'ajtingøjxp. ⁴ Nay yø'øbi kōjxp adøm nayide'en tō xmø'øyim ja y'øybi, ja awejx'ajtin sam idø'øn ku tijy xyiknitsø'okwa'añim yā naxwiñ, mā ja tigø'øyin kadye'eyin y'ity, jøts jade'en ja kyunuu'kxy y'øy'ajtin xukpaajint. ⁵ Pøni nbaatwa'añimp idø'øn ya'at, ja janchja'win idø'øn nmøøt'ajtim; ku ja wyinaty nmøøt'ajtyimp, winets ja tiichinaa'yin ja øchinaa'yin n'ixa'ayint; ku ja wyinaty tō nbaajtyim xjats idø'øn nbadøjka'ant sudso ja Dios yja' nnija'wa'ant midi tō ttanibiktaagi; ⁶ kuts ja wyinaty nmøøt'ajtna'am, jøts ja yja' jade'en nbaduujna'ant jøts adøm ja ngø'øm ja' n'ixwejtsint; kuts ja wyinaty jade'en tō ndu'uñim xjats idø'øn ja maa'kxujkin nbadøjka'ant jøts nyiktu'unint nixem niyam, jøts ja Dios yja' kōx kida'āk jade'en nnadyamiyojxa'ant; ⁷ kuts idø'øn nmøøt'ajtna'ant xjats idø'øn ja nmigu'uk adøm nixem niyam møøt nnamyajja'ant; jøts jade'en ja tsojkin nmøøt'ajtim midi kamastu'udyim yikja'wip.

⁸ Kuts ya'at xyikmøjdidit xyikyajkidit midi mmøøt'ajttip, zja ti nugo meets ndejint tō x'ejxnī xnija'wiñi ja nwindson'ajtim Jesucristo? Jabi ka'axi ja mdsinaa'yin nugo xyiknaxtit ya. ⁹ Pønts ya'atpi winmaa'ñ tkaba'ayoodip, jade'en idø'øn tyimyjaty sam tu'uk ja jaa'y kube'ets kugoots y'etwa'añ kø'ømsojkingøjxp; ka'ap ja t'ukja'myajtsni ku ja nwindson'ajtim Jesucristo ja pyojkpi tō tku'oogi jøts ku yam yjapaat'ajtniyi jøts ja chinaa'yin tyiktigajtsnit. ¹⁰ Jade'ents mee migu'uktøjkti, nan'ky'ejxidi dø'øn ku meets ja Dios tō mw'i'ijxyidi tō mwigø'ñidi, jøts jade'en niñi nima ja mjanchja'win kyawinguwopidit. ¹¹ Jøts jade'en wyinaty agujk jotkujk mdøjkiñidi mā ja nwindson'ajtim Jesucristo ja kyutujk ja yjaa'y ttanitani, mā ja yiknitsokpi xemikøjxp xyik'ejtint.

¹² Paty meets ya'at ejtp ndukja'myats'ett, øy yø xanija'wiñidi øy yø xjadamø'ajtnidi Dios tyiy'ajtin midi mmøøt'ajttip. ¹³ Øy øts idø'øn ja njawi ku meets njaakajpxwejt, ku njaakjujky'att, ¹⁴ jabi tōxi øts ja nwindson'ajtim Jesucristo xuknijawi ku øts tsojk ya'at naxwiñ'ñit nmajstutnit. ¹⁵ Tuki'iyi øts yø n'aaw njoojt nbikta'akt, jøts xja'dyangøxtit yø' kajpxwejin, jøts jade'en ku wyinaty tō nja'oo'kni njadigø'ñi, ejtp yø xja'myats'ettit.

Pøn t'ejxtø wyemp y'amp sa Cristo tnanky'ejxø ja myø'ajtin

¹⁶ Øy meets mwa'ant ku myikwindaay'atti ku meets tō ndukmadøy ja ixpøjkin midi ñigajpxpy ja nwindson'ajtim Jesucristo myøk'ajtin jøts ku ja mye'ent jadigojk. Ka'ap øøts yø kø'øm tō nyik'øyi yø' madya'aky, jabi

tøxi øøts idø'on kø'øm ndyimy'ixy ja nwindson'ajtim y'øy'ajtin ja myøj'ajtin. ¹⁷ N'ejx øøts ku ja Dios Teety tyikjajty jøts ja Cristo ja windsø'jkin winja'win tpaatt, ku ja ñine'kx tyigajch jøts ku amuum chamaambijky aju'uk agujkp. Nmaadoow øøts nayide'en ja Dios Teety y'aaw y'ayuujk ku yide'en wyaan: "Øts ya'at n'U'nk midì kawinmaa'ni ndsojknajpxy, midì øts ixyam øy yikxon ndajotkujk'ajtpy." ¹⁸ Kø'ømxi øøts idø'on ndyimyadøøy ja Dios Teety y'ayuujk midì tsajpjøtpy kidaa'jk, jabi jamxi øøts wyinaty kojpkøjxp midì kunuu'kxy, møøt øøts ja nwindson'ajtim jam wyinaty.

¹⁹ Kidi yø'øyipxi dø'on ja'ayi nugo ejxpajt'ajtp, pø tøxi ja Dios Teety ja kyajpxy tpaduñ midì ja kyugajpxy windi'ixyip yjaadyandøø. Øy'ajtp idø'on jade'en ku jade'en xu'unt ku xunk'attit yø'øbi kajpxy, yø'øbi ayuujk, midì ja wejin ja kajin xmø'øyimp jøts ja kugoots'ajtin jade'en xmajtstuu'jtint. Jade'ents Cristo ja yja' xagujajamp xagudøø'kxamp kunim ja mye'ent jadigojk jøts kø'øm ñanky'ejxiyitnim. ²⁰ Ja ku dø'on jawyeen kuwani xnijawidit jøts ku ja Dios kyajpxy ka' nugo øy pøngapøn nugo ajawi tja'gyuki, ²¹ jabi ka'axi ja Dios kyugajpxy kyø'øm winmaa'ñ ttakajpxtøø. Dios Teety miyøxy ja'adi, jøts tñigajpxidi ja yja' sà jaty ja Espiritu Santo wyinmaa'nmyøøjyidøø.

2

Pøn ñanky'ixpøjkidip ja taay'ajtin

¹ Nayide'en idø'on Israelit jaa'y y'ejtmidi pøn ñadyijyi nañikajpxidip ja Dios kyugajpxy; nayide'en meets idø'on winaa'gin xnitaayibyajtmidit ja Dios yja', pøn idø'on kø'øm t'ejxma'tnidip ja nwindson'ajtim midì tø yiknitsø'øgyidi; kø'øm idø'on ja myøj'ayo'on wyinaty tsojk t'ixa'adi. ² Namay idø'on jaa'y ja t'pabøktit ja y'axøøkpi tsinaa'yin, jøts ja'agojxpti wenk yiknimadya'akt ja Dios kyajpxy midì yiknitsoojkp. ³ Kuts ja meen ja t'amidit tjo'tpidit, jade'en meets idø'on mwigaadsidit mwibøkidit, ku o tigati kajpxy mdawindaay'atidit meengyøjxp; ja'atp idø'on ja myøj'ayo'on ja'adi, niti nitsoojkin, jabi jekyipxi dø'on tø yiktanibiktajkiñidi ku jade'en yjattit.

⁴ Ka'ap ja Dios tmaa'kxuujky ja y'ankilistøjki pøn kamimadoojyidi, jagam idø'on ja tñajtswojpiy'i'ñ mā ayodaajk jap, jøts jap kube'ets kugoots tsumy t'awe'jxti ja tiidyu'unin. ⁵ Nika'ap nayide'en ja Dios tmaakxuujkmi ja jaa'y pøn jekyip tsinaamyidøø ku ja Noé yjujky'ajty. Ja kom tuuxi dø'on tyanigajx, jøts jade'en tuki'yiyi ja na'xwii'ñit ñijaa'xni ñigomni, jøts jade'en y'o'jkøjxtøø ja ka'øyjaa'dyi. Ja'ayi tyiknitsøøjky ja niwixujkpi jaa'y jøts ja Noé pøn ja tichinaa'yin tñigajpx. ⁶ Nayide'en tyikutujkmaa jøts kyudigø'ødyit ja kajp midì txøøw'ajtøø Sodoma jøts Gomorra, jade'en tyikudigøøy, nugo jaam tyiktaañ, jøts jade'en t'ejxpajt'attit ja ka'øy jaa'y pøn wyinaty ja chinaa'yin tyiknaxwandipnim. ⁷ Yiknitsoojk ne'egi ja Lot, pøn y'ijty øyjaa'y'ajtp jøts pøn nayide'en tjancho'ødyunja'widip ja y'axøøk tsinaa'yindi. ⁸ Jabom jabom idø'on ja y'ijty yjotmay'øøky ku t'ixy tñijawi sà ja'abi jaa'y yjan'adø'østøø. ⁹ Jade'ents idø'on, maajyip idø'on ja nwindson'ajtim jøts ja xpudøjka'ant mā ja yigaappi y'axøøkpi xmimajada'akwa'añim wine'en adøm tø nadyamiyojxna'andi ja nwindson'ajtim yja', jøts nayide'en myaa'miyi tyik'ayo'ombaatt øy pøn tundigøøbyidi ku wyinaty ja tiidyu'unin myñ kyida'aky.

¹⁰ Yik'ayo'ombaatp ja Dios ja'adi dø'on pøn kø'øm ja y'axøøk tsojkin tpadundip jøts pøn ttekpya'an'ajttip ja nwindson'ajtim kyutujk. Namyikajxidip ja', ap tyimñayjawi'yidi; ka' ñadyijyi tyimchø'øgidi jøts

tka'omyigajpxti tka'odyeji ja kutujk'ajtin mididi jap tsajpjotpy, ¹¹ yam ja ankilistøjkti niti nisa kyawa'andi jam nwindson'ajtim wyingujkp, jawaani møkts ja ne'egidi ja kyutujk.

¹² Nayide'en idø'on ja'adi sam ja jiyujkindi, niti ja'gyukin tkamøøt'atti, nugo ja yjujky'ajtin yikjujky'atyidi, ja'ayi t'awejx'atti sa ja myigu'uk tmatstit uk yikmatstit kø'øm, sa ja o'jkin tigø'yøvin tpaattit. Tum wimbet ja tmadoojidi ja Dios yja'. Ka'ap ja tjagyapi ja madoogukin; tymñayide'en idø'on ja y'looktit sam ja jiyujkti nugo ñaxti, ¹³ kyu'ayo'ombaadidip sam ja myigu'uk tø tyik'ayo'ombaatti. Jotkujk idø'on ja tjanch'ukjawidi ja y'øybi yjøjkcipi mididi pojñ najxp; nugo dø'on ja chø'ødyundi ku meets ja mxøduñ møøt, jøts ñadyijyi yjanch'uknankjotkujk'atyidi jøts meets ja jade'en xpabøkt.

¹⁴ Ka' idø'on ja tø'øxyøjk ja nugo t'ejxtit, ja' idø'on ja wyinmaa'ñ'attip jøts tmøøt'attit; ka' idø'on ja pøkyu'unin yjotnaxyidi. Ja win'øø'nik ja'ayi tyunk'ajttip jam ma pøn ja yjanchja'win kyamøjkidinim; tuki'iyi tniwa'anwa'angøjxti ti jaty ja myigu'uk yja'ajttip; ja dø'on møk ayo'on ja Dios ttukpaadidip. ¹⁵ Abiktyuu' idø'on tø tpaabøknidi ku ja tiidyuu' tø t'ixmatsti. Wa' idø'on ja y'ejxpajtin pyaduujnidip ja Beor myajnk mididi Balaam xyøøw, pøn ñadyijyi kyajpxnajx ja Dios yja'. Ya'at jaa'y, o dø'on ja tigati ttunwaañ, jøts jade'en ja meeñjingaap taagyøjxp tpaaty, ¹⁶ kunim idø'on ja Dios tu'uk ja jachu' tyikajpxt jøts ja pyøky yiktawindsø'øty jøts jade'en ja kyujuun'ajtin tka'ukyikmajadañnit.

¹⁷ Jade'en idø'on ya'at jaa'dyi sam tu'uk ja tø'øts nøømu'ut ni tukxa'kx ja ñøø. Nayide'en ja'adi, sam ja poop yoots mididi katuup, nugo pyøjwidity; jap idø'on ja kyastigi agootstujpy tø yiktanibiktaajkiñidi. ¹⁸ Jabi tum wenkxi ja myadya'aky ja'adi, tum ja katumbi kyajpxy'ajttip, jøts ja jaa'y twindaay'atti ku ja y'axøøk winmaa'ñ ttukpadundi yam ja wyinaty namñim tø tja'uk'ixmajtsmididi ja'abi tsinaa'yin. ¹⁹ Ja tsinaa'yin ja tyaguwa'anidip ma øy sa y'adøtsnidit. Tø ja kø'øm tniimyiwantajtnidi jiyujkin ja axøøkpi tsinaa'yin. Ku pøn nugo tyimyikmajada'aky yø yjade'embi, janch amøñi dø'on ja tpaduñ øy yjawi sa tmijajtni. ²⁰ Jawaani møk idø'on ja ayo'on tpaattit pøn ja nitso'ok'ajtin tø t'ukpaaty nwindson'ajtim Jesucristo køjxp, jøts jadigojk ja kya'øy'ajtin tpadundøjkigyojmididi. ²¹ Ne'egi øy jeexyip tpaaty ku jeexyip tkanijawidi ja tiichinaa'yin, jøts jade'en jeexyip tka'uk'ixwejtñi ja Dios kyutujk mididi øy mididi wa'ats, mididi wyinaty tø y'ukyikmo'odi. ²² Jabi tøxi dø'on ja' ayuujk tyiy ku jaa'y y'ukwa'añ ku ja uk ja y'iich jadigojk tniwimbity, jøts ku ja kuch mididi namdseepnim jits ja jadigojk nay jaayi ja mo'onts tseemujkojmi. Jade'en idø'on yø ndejint yø'øbi jaa'dyi.

3

Ku ja nwindson'ajtim mye'ent jadigojk

¹ Meets migu'uktøjkti, ya'at idø'on myimajtsk nøky mididi mee ndanija'ayip. Nayide'ents meets ixyam ndanijayi sam jawyeen, jøts ku meets x'ejxkapt ja tiwiyinmaa'ñ mididi ngajpxpatpy. ² Jade'en ø nwa'añ ku meets xja'myatst ja Dios kyugajpxy sa ja y'ayuujk tyikwaañ pøn ja Dios tø ñadyamiøxyidi, jøts nayide'en xja'myajtsmidit ja nwindson'ajtim kyutujk pøn yiknitsoojkp, sam øøts tø nnigajpxy pøn ja kyudanaabyi'ajttip.

³ Jawyeen idø'on tymbyaat'atyidi meets xnijawit ya'at: ku wyinaty myeni kyidakni ja tiidyu'unin, winets idø'on ja jaa'y kyaxø'øktit mididi tyaxe'ektip tuki'iyi ja Dios yja', jøts nugo tñidsøønidit mididi axøøk wyinmaa'njyøtpty myøøt'ajttip, ⁴ jøts yide'en wya'andit: "¿Samts idø'on ja Cristo y'ayuujk tø

yjajtni kuts idø'øn ja tijy wyimbett jadigojk? ¿Windemnimts idø'øn ja yjatt? Jabi nitits kyamiñ kyaja'aty, jade'eñim y'ity sayim ja n'apteety tyiknaxtøø." 5 Kyaja'myajtstip idø'øn yø' ku naaxwii'ñit kawinaak ojk tø yjadigach, jabi windi'ixyixpi ja tsajp ejtni jøts ja naajx pyidsimñim nøøjøtpy, Dios Teety y'ana'amingøjxp. 6 Kyaja'myajtstip idø'øn nayide'en ku ja Dios kawinaak xøøw anaduu' tkejxy, jøts ja naaxwii'ñit jaa'y jade'en kyudigøøgyøxtøø.

7 Y'awixy'ajttip idø'øn yø', jawaani møj ja ayo'on midi wyinaty memp sam ja kø'øm tø ttanibiktajkiñi ku tnajtskaxit ja jønyow. Ja'abi jøøn idø'øn yiktøøyidip ja ka'øyjaa'dyi ku wyinaty ja tiidyu'unin ñaxy.

8 Mnija'wip meets nayide'en ku ka'ap ja nwindson'ajtim ja xøøw ja jumøjt tmøjpikta'aky, jade'en ja t'ixy ja tu'ukpi xøøw sam ja tukmilbi jumøjt. 9 Kidi meets mwinmay sam winaagin wya'andi ku ja nugo tyaa'ni ku kyamiñ jadigojk sam ja kyajpxy tø tpikta'aky, møk idø'øn tyuda'aky'ajtin ja tyikma-jada'aky jøts ja jadine'en xmaa'kxujkyim. Ja' chøjkpy jøts ka'ap pøn nugo wyindigø'øty jøts ja ndsinaa'yin nyiktigajtsint.

10 Jade'en idø'øn ja nwindson'ajtim jotkumoni ja tyiidyu'unin tmøøtja'att, jade'en sam maa'tspa'an adsu'jkyi koots myiñ yam niti kyayikjøp'ixy. Kuts ja nwindson'ajtim yja'att jade'en, winets idø'øn tsajp pyømemga'akt ku ja kyudigø'øyin tø myeni. Winets tyøøbyøjkøxnidit tuk'oiky; ja tøø'kxpi tsamambi midi jam tsajpwemp, jøts yø naaxwii'ñit tuki'iyi tyigøøñit jønyow agujkpy.

11 Jabi jade'enxi dø'øn ja ayo'on ñaxkida'akt ya naaxwiiñ, ijadits adøm idø'øn nganadyamiøjxa'ant ja Dios! 12 Yikyijyidi ja mxøøw ja mjumøjt jøts ja yja' xyikmayidit, jøts jade'en chojkit ja xøøw ja jumøjt ku wyinaty kyudigøøgyixy jønyow agujkp tuki'iyi midi jam tsajpwemp jøts ya naaxwiiñ; 13 ja'ats idø'øn adøm n'aweixindip ja jembyi tsajp ja jembyi naajx midi ja Dios tø tni'adsowi kø'øm, ma dø'øn niduki'iyi ja jaa'y ja y'øbyi ja tyiiby; ttu'undit.

14 Paty meets migu'uktøjkti, ku ya'at xjøp'ijxy'attit, tum ja' meets mdu'ump midi ja Dios chøjkpy, tsokti ja tuda'aky'ajtin, nixem niyam mnamyayidi jøts jade'en ja Dios mbaadiyidit niti pøky niti kadyeey. 15 Ja'gyukidi ku ja nwindson'ajtim tsojk kyamiñ, paty idø'øn ja ttuñ jøts nyikmøja'ant nyikmaya'ant ja nitso'ok'ajtin, ja tyuda'aky'ajtin idø'øn ja jade'en yiknigaxi'kpy. Nayide'en meets idø'øn tø mdanija'ayimidi yø'øbi winmaa'yin ja Pablo, adøm nmigu'uk, ku tyaktuñ ja ja'gyukin midi ja Dios tø myø'øyi. 16 Tum ya'atpi ixpøjkin idø'øn kyajpx'ijtpy ma ja nøky ja jaa'y ttanijayi, øy idø'øn ja muum tsep ku nja'gyukiwya'anint, jaa dø'øn ja kaja'gyukibidi, jøts pøn ja yjanchja'win kamøktaktipnim tum wenk idø'øn ja ixpøjkin ja tjuutti, ka'ap jade'en ja Pablo yjawa'añ ñøkyjøtpy. Nayide'en idø'øn ja ttumidi tuki'iyi ja Dios kyajpxy kyø'ømgudigø'øyingøjxpti.

17 Paty mee migu'uktøjkti, jabi mnija'wiñidixpi meets ya'at tuki'iyi. Nay'ejx'etidi jøts ka' xpabøktit sa yø' jaa'y wya'andi, ku taagyøjxp myikpøjkiwya'andi ja mjanchja'win. 18 Ne'egi ja' pawinmaydi sa ja nwindson'ajtim Jesucristo ja tyiy'ajtin xnija'wiyidi. Yikmøjidi ja tsojkin ja pa'ayo'owin midi ja yiknitsokpi tø xmø'øyim, pøn ja y'øy'ajtin myø'ajtin xemikøjxp ejtp. Jade'ents idø'øn yjatt.

JA MYĒDU'UKPI NØKY MIDI JA JUAN YJAAY

Ja' midi xyikjujky'ajtindip

¹ Ya'atpi nõky øø nguejpxy, jøts mee ndukmadøy ja Jesucristo, ku ja jaayim wyinaty ku cho'ondakijxy tuktsajp'agida'aky. Nay ja' øø tøn'ixy tønmadøy jøts nayide'en øø tøndukpaaty ja ngø' ndeky; yø' y'ayuujk yø' wyinmaa'yin adøm ndajujky'ajtyindip. ² Tø ja ñankñigaxi'igiyi, øøts tøn'ixy øøts tønñijay, paty mee ndukmadøy ixyam ku ja ejtp møøt chøøni ja Dios Teety, tøts idø'on ixyam xnimi'iñindi. ³ Tyiiby; øøts ndyimñigajpxy midi øøts idø'on tønndyimy'ixy ndyimyadøy; paty mee ndukmadøy jøts meets m'ett amuki møøt øøts, kumi tyimdyiy tyimyjanch ku øø møøt n'ity ja Dios Teety jøts nayide'en møøt ja y'U'nk Jesucristo. ⁴ Yø'øbi ayuujk yø'øbi winmaa'yin meets ixyam ndanija'ayip jøts yikxon ejtni xoni mwinnmaa'ñ y'ettit.

Janch wa'ats ja Dios ejxim ja jajin

⁵ Yø' øøts nnigajpxwampy yø øy'ayuujk yø ømyadya'aky midi øøts ja tøndukmadøy: jøts ku ja Dios Teety janch øy janch wa'ats ejxim ja jajin, jøts niwine'enin ja ka'øy'ajtin tkamøødi. ⁶ Kuts nwaq'ñindi ku ja Dios Teety nmøøt n'ijtyindi jøts nika' n'ukpaduu'na'andi ja n'ayuujk, nugo adøm ja nmidundigøy adijchindi. Yø' idø'on møj taay ku jade'en nugo nwaq'ñindi. ⁷ Kuts ndsinaq'yindit øy wa'ats ejxim ja Dios Teety chøøni, winets nixem niyam tu'ugyi ja winmaa'ñ nmøøt'ajtindit, jade'en idø'on ja y'U'nk Jesús xyikpøwyaajchindi midi jaty ndu'uñindip ku ja wyidsuuñ wyidajxy. ⁸ Xjats ku nugo nichøky nwaq'ñindi jøts ku ka' ndundigø'yindi, nugo køøm nnawyindaay'ajtya'andi jøts tiy ngakajpxyindi. ⁹ Kuts ndamimadyakøxindit ja Dios Teety nbøky, njøp'ejxindip ja' ku ja ttu'unt midi paat'ajtip, jøts nay ja xpojkpimaa'kxindip jøts nay ja' jatyi xyikwaajtsindip midi jaty adøm ndundigøø'yin'ajtyindip. ¹⁰ Kuts nugo nwaq'nint ku ka'ap nbøky nmøøt'ajtyindi, jade'en idø'on ja nbiktaajkyindi jøts ku ja tyaayi ja Dios Teety, niwine'enints jade'en ngamimadoo'ja'ant ja kyajpxy ja y'ayuujk.

2

Jesucristo amuum xnikajpxuujtimp

¹ Meets u'nkti una'jkti, ya'at meets ndukmadøøpy tuki'iyi ku ka'ap mbøkyu'undit, jøts põni põn wyinaty sã tyimyjajtp paty xnijawidit ku jaa nmøøt'ajtyindi tu'uk ja nikajpxutpi jam Dios Teety wyingujkp, ja Jesucristo dø'on ja' põn janch, põn tiy. ² Tø ja Jesucristo tku'ayo'ombaadi adøm ja nbøky, jøts nigidi adømyipti, niduki'iyi dø'on nayide'en ja naxwii'ñit jaa'y. ³ Pøni nbadu'uñindip ja Dios ja kyutujk sã ja tønuk'ijxyindi xuknija'wa'andi, jade'en'ampts adøm ja x'u'nkja'wa'ant. ⁴ Jøts põni põn wamp ku ja y'u'nk'atyiyi ja Dios jøts nika'ap ja tpaduujniyi ja kyutujk, ja' nugo kajpxigøøpy, nugo ja tyaayi. ⁵ Jøts põni põn amumjoojt nadyamidsøky'ajtip ja Dios, ja'ats tpaduujnip ja Dios kyutujk; jade'ents ja yiknijawu ku nwindson'ajtim ja møøt y'ity. ⁶ Pøni põn tyimwyamp ku møøt tyim'yity ja Dios, wants nayide'en tyiknaxy sami Jesús tyiknajxy.

Nbadu'unimp yq'at jembyi: ana'amin

⁷ Migu'ukti, ka'ap meets ja jemgyutujk ixyam ndanijayi; nay ja' yø' mididi mee tø xmadowdi xnijawidi ku ja mdsinaa'yin xyiktsø'ondaktøø jadigojk. ⁸ Yø' meets ixyam njaaktukmadøøpy, yø kutujk, mididi janch øy janch tump, øgyajemgyutujk, ja ku ja xem ja yam nnachojkindit jade'en sã ja Cristo ttuun, jøts mbaat'ajtiyip meets nayide'en xu'unt. Yø'øbi winmaa'n tiyikudigøøpy ja ka'ødyunk, jade'ents ja tsinaa'yin y'øyi pyaadi.

⁹ Jøts pøni pøn nugo wamp ku ja tpaduñ ja jemchinaa'yin, yam ja myigu'uk ja tmi'ambikñim tmijotma'atynim, ja ka'ødyunk ja wyinaty pyadun'adichpnim. ¹⁰ Pøni pøn twamp ttsojpk ja myigu'uktøjkti øpyøni, ja' idø'on tpadump ja øchinaa'yin jøts niwine'enin ja pyøky kyanadyukpaadyi jade'en. ¹¹ Jøts pøni pøn ja myigu'uktøjk tmi'ajkidip, ja' nugo tsinaapy ka'ødyunk agujkpy, ka' tñijawi pøni ti tyumpy kyajpxy, jade'en ja wyimbejtñi ejxim ja kugoots jaa'y.

¹² Meets u'nkti meets una'jkti, ixyam mee nijayi jøts ndukmadowdi ja'agøjxp ku ja Dios Teety tø mbojpkimee'kxyidi Jesucristo køjxp. ¹³ Teetyi taakti, nayide'en meets ixyam ndukmadøø ya'at ayuujk kumi tø mee xpabiky ja Jesús yja' mididi jaayim wyinaty ku cho'ondakijxy tuktsajp'agida'aky. Meets wajtjøjkti meets kiixye'edi, ixyam mee ndukmadøø ya'at ayuujk kumi tø xmiamadaj'akti ja miku' yja'.

Nayide'en meets u'nkti meets una'jkti ndanijayi ya'at ayuujk, kumi tø m'u'nk'atyidi ja Dios Teety. ¹⁴ Meets teetyi taakti, jade'en meets ixyam ndanijayi ya'at ayuujk kumi tø xjanchjpabøjkti ja Jesús yja' mididi jaayim wyinaty ku cho'ondakijxy tuktsajp'agida'aky. Nayide'en meets wajtjøjkti kiixye'edi ixyam ndanijayi ya'at ayuujk ku ejtp mjanchmøkwinmaydi jøts ku ja Dios Teety kyajpxy y'ayuujk tø xpabøjkidi amumjoojt, jøts nayide'en ku tø xmiamadaj'akti ja miku' yja'.

¹⁵ Kidi nugo xtsojkti ja pøkyunk ni ja pikta'aky mididi ya ejtp naxwiin. Jøts pøni pøn t'anømp t'adsojpk ja pøkyunk jøts nika' ja Dios Teety ne'egi tsøky'aty jade'en. ¹⁶ Yide'en idø'on ja naxwiin'it jaa'y tjanchojkti ja pøkyunk mididi winmaa'njøtpy mee'nxidip, jøts mididi tyimchuj'ejxtip tyimchujawidip. Ja'ats nugo ja pikta'aky nadyamøja'wiyidip, ja' ja' nugo pyawinmay'ejttip mididi jaty jaa kayik'ødyump ya naxwiin, yamts ja Dios Teety ja jade'en tø tkadanibiktaagi. ¹⁷ Windigøøpy y'ity mididi yikpøkyump ya naxwiin, mididi nugo yiktsojkanaxp; jøts pøni pøn tpadump sã jaty ja Dios tsøky, ja'ats y'anmija'win xemikøjxp jujky'atp.

Pøn mibøjkip ja Cristo, jøts pøn ja kamibøjkip

¹⁸ Meets u'nkti una'jkti, tø jabaat tpaaty ja et ja xøøw ku myenwa'añ tu'uk ja jaa'y pøn ja Cristo møk myidsep'atwampy, pøn meets nayide'en tø xnijawi xnimadøø; ixyamts nayide'en tø kyaxø'knidi namay pøn tmidsep'ajttip ja Cristo, paty jade'en yiknijawi ku tø jabaat ja et ja xøøw tpaaty. ¹⁹ Nay adøm nmigu'uk jade'en winaagin adøstip pøn adøm tø xmajtstuujtyindi paty ja tmidsep'atwa'andi ja Cristo; nigidiits ja' pøn adøm nwinmaa'n møøt tuknaxti, ku jeexyip ja'adi, tø ja jeexyip møøt ndaa'nindi. Jade'en idø'on yjaty ku winaagin xpuwaajchindi, paty wa'ats yiknijawi ku ka' yikxon tømøø'tatti ja winaa'n sã adøm nja'.

²⁰ Adømts ja Cristo tøkuktatøjka'andi ja Espiritu Santo, ja'agøjxp ixyam nnija'wa'andi ja tyiiby ja yjanchipi. ²¹ Paty meets ixyam nnijayi ku xnijawidi mididi tiy mididi janch, ka'ap ø nwa'añ ku ka' xnijawidi; wa'ats mee xnijawi ku ja tyiiby ja yjanchipi ka' nayide'en sã ja taay.

²² ¿Põnts idø'øn taay'ajtp? Ja'ats idø'øn pøn wamp ku ja Jesús ka' yiknitso'ok'aty. Pø ja'axi tkawamp tkatsojpk ja Dios Teety møøt ja y'U'nk Jesús. ²³ Pøni pøn tkawandip tkatsoktip ja Dios Teety y'U'nk, ja Dios Teety idø'øn wyinaty jade'en kayiktojpk; jøts pøni pøn twandip ttsoktip ja y'U'nk Jesús, ja Dios Teety idø'øn wyinaty jade'en yiktsojpk.

²⁴ Paty øøts idø'øn nnigajpxy jøts xwinmaa'ñ'attit ja øgyajpxy ja øy'ayuujk midi tø xpabøkti jøts midi yajkpy ja øchinaa'yin; pøni mwinmaa'ñ'ajttip yø', jade'en ja Dios Teety jøts ja y'U'nk Jesús møøt n'lijtyindi. ²⁵ Kumi Jesús kø'øm ñi'adso'owi ku ja xmø'øyint ja øchinaa'yin midi xemikøjxp yikmøøt'atp.

²⁶ Ja'agøjxp mee nnijayi ku nugo myikwindaa'yidit. ²⁷ Pø tøxi ja Jesucristo mmø'øyindi ja Espiritu Santo, paty ka' pya'at'aty jøts pøn jaduk'uk mgajpxwejiyidit, pø ja Espiritu Santoxi mee kø'øm myikwejiyip myikajiyip midi tiy midi janch jøts ka' tyaa'y. Meets migu'uktøjkti, jade'en idø'øn y'ejxi tyiyi jøts yikxon mdsøønidit mdanidit amuki møøt ja Cristo, jade'en sã kø'øm mdukjatyidi ja Espiritu Santo.

²⁸ Jøts jade'en wingujk jøtkujk njøp'ejx'ejtindit ku ja mye'ent ja Jesús, jøts jade'en ka' nmitsø'ødyu'unindit. ²⁹ Pø tøxi meets xnijawi ku ja Jesucristo y'øyi tyiyi, jøts kuwani xnijawidit nayide'en jøts ku pøn øy tiy yjaa'y'aty, ja'ats ja Dios u'nk'ajtiyip.

3

Sã ja Dios x'u'nk'ajtyindi

¹ Ejx ja Dios Teety xjanchøjkyindi, jøts ja wya'añ ku ja x'u'nk'ajtyindi x'una'jk'ajtyindi, pø janch jade'enxi adømdi. Pø patyimxi adøm ja ka'ødyumbi xka'ejxkajpyindi xkanija'windi kumi ka'ap ja t'ejxti tnijawidi pøni pøn ja Dios Teety. ² Migu'uktøjkti, tø dø'øn ja Dios x'u'nk'ajtyindi xmaa'byijkyindi; ka'animts xuknija'wa'andi pøni sudso njaa'y'ajttindit wiingyubety. Ja'ayi nugo nnija'wa'andi jøts ku ja Jesús ñankñigaxøøkwa'anayi jadigojk, jøts jade'en njaa'y'ajttindit njuk'ap'ajttindit nayide'en sam ja', pø yik'ejxpxi ja' sam idø'øn ja chøøni tyani. ³ Pøni pøn tjøp'ejxp jade'en, ja'ats nay'ejx'ejtjip jøts ja pøky kyapaadit, jøts ja jade'en chøønit sami Jesús wya'ats'atyin.

⁴ Jøts pøni pøn tundigøy'ejtp, ja' Dios kyutujk kyamøjpktaajkidip, pø yø'øxi tundigø'øyin'ajtp ku ja Dios kyutujk kyayikmimadøy. ⁵ Pø tøxi mee xnijawi ku ja Jesucristo ya tø myiñ naxwiñ jøts adøm xyikpøkwyaa'jtsindit, jøts nayide'en xnijawidi ku ja janch wa'ats, ni tu'uk ja pøky tkamøødi. ⁶ Jade'en idø'øn, pøni pøn møøt y'ity ja Jesús, ka'ap ja jade'en y'ukpøkyun'adøtsnidi sam ja jaa'y pøn tkidyimñija'widip ja Jesús. ⁷ Meets u'nkti una'jkti, kidi nugo myikwindaa'yidi; pøn y'øyb tiybyi tpadump, yø' idø'øn øy jaa'y'ajttip nayide'en sam ja Cristo y'øy'ajtin wya'ats'atyin. ⁸ Põnts ejtp tyimdyundigøøpy, ja miku' yja' pyadu-ujnidip, pø ja'axi jade'en tyiktso'ondaa'jk ja pøkytu'unin ja win'øø'nin. Paty idø'øn ja Jesús ojt myiñ jøts ja tyikudigø'øty ja miku' pyøkytu'unin, ja wyin'øø'nin, sã jaty ja y'adi'ich.

⁹ Ka'ap y'ukpøkyunidi pøn ja Dios u'nk'ajtniyidip, pø ja'axi kø'øm møøjyidip ja myøk'ajtin; paty ka' nugo y'ukpøkyun'adøtsnidi, pø Diosxi u'nk'ajtniyidip.

¹⁰ Yide'en'ampy idø'øn yiknijawi pøn ja Dios u'nk'ajtidip jøts pøn ja miku' u'nk'ajtidip, kumi ka'ap ja Dios ja tja'aji pøn ja myigu'uk tkatsojktip, jøts pøn tundigøy'ejttip.

Nachokindip ja xem ja yam

¹¹ Yø'øbi kajpxy yø'øbi ayuujk midi mee tø xnijaw'i ku ja m'øchinaa'yin xyiktso'ondaktøø, yø' idø'øn tyijpy ku nnachojka'andit nixem niyam. ¹² Jøts ku ka'ap jade'en njaa'y'ajtindit sam ja Cain ku ja y'uch ja tyik'øøjky, ja' pyadumpy ja miku' yja'. ζTi ja tyuku'o'jkøø? Ja'agøjxp ku ja tkabaduñ ja miku'.

¹³ Meets migu'uktøjkti, kidi sa xjawidi ku mmi'ambøjkidit yø ka'ødyumbidi. ¹⁴ Tø adøm nmajstuujujyindi yø ka'ødyunk jøts ja øchinaa'yin tø nbabijkyindi, jade'en idø'øn yiknijaw'i ku nixem niyam nnachøjky'andi. Pøni pøn tkawamp tkatsojpk ja myigu'uk, ja' pyadun'adichp ja ka'ødyunk. ¹⁵ Jøts nayide'en pøn tmi'ambøjpk tmi'otmatp ja myigu'uk jade'en ja pyidsømni sa yikjaa'y'ookpi, pø mnija'wipxi meets ku ka'ap ja yikjaa'y'ookpi y'anmija'win y'ity xemikøjxp, windigøøpy ja'. ¹⁶ Nnija'windip sa Jesucristo xtsøjkyindi amumjoojt, paty adøm ja xku'o'jkandi; jøts nayide'en adøm ja xpaat'ajtyindi ndsojkindit ja nmigu'uktøjkti sam adøm tø nyiktsøjkyindi sam adøm tø nyiku'o'jkandi. ¹⁷ Pøni pønts jotkujk tyiknæxp, yja'ijxpy ku ja myigu'uk y'ayøwinnmay, niwine'enin tkidyimdy'a'ayo'ixy ja pyikta'aky midi ja myøøt, ζsudsots ja nugo wya'añ jøts ku Dios ja twa'añ ttsøky? ¹⁸ Meets u'nkti una'jkti, ka'ap y'øyi ku nugo nwa'anindit jøts ku nmigu'uktøjk ndsojkyindi; yø' ne'egi øy ku ndyimbyadu'unindit tiy janch. Yø'øts jade'en wingaxø'kp ku ja nachoki amumjoojt yikmøøt'aty.

Sudso jotkujk nnajja'wa'ant Dios wyingujkp

¹⁹ Jade'en idø'øn yiknijaw'i jøts ku nbadu'uñindi ja tyiiby'i ja yjanchpi, jøts jade'en idø'øn niti ngagumaa'yindit Dios wyingujkp; ²⁰ kuts kø'øm nnañ'øø'na'andit, ku nmaa'yindit ndajindit ku ja Dios tø x'u'nkpijkyindi, pø kø'ømxi ja jade'en tø xtsøjkyindi jøts møj ja', ja' tuki'iyi tnija'wip sa adøm njawinmaa'yindi. ²¹ Jøts ku ngamaa'yindit ngatajindit winets ngatsø'jka'andit jam Dios wyingujkp. ²² Ja' adøm tuki'iyi xmø'øyindip ti jaty adøm n'amidowa'añindip nbøxtsowa'añindip ja'agøjxp ku nbadu'uñindi sa ja x'ane'emyindi pøni sa ja ttsøky. ²³ Yide'en idø'øn ja y'ana'amin ku njanchja'windi ja y'U'nk Jesucristo, jøts nayide'en nachojki'indit nixem niyam sam ja Jesús kø'øm xa'ane'emyindi. ²⁴ Pønts jade'en tjanchpadundip ja y'ana'amin, ja'ats ja Dios tmøøt'ejtjip jøts ja nayide'en myøøt'ityidi. Jade'en'ampy nnija'windi kudam ja tø xuktatøjka'andi ja y'Espiritu Santo jøts ja jade'en kø'øm xmøøt'ijtyindi.

4

Ja Espiritu Santo jøts ja' midi tkaminamyaajyip ja Cristo

¹ Mee migu'uktøjkti, kidi nugo xmibøjkti ja jaa'y pøn wandip jøts ku ja tnigajpxidi ja Dios y'øgyajpxy ja y'ø'y'ayuujk, ejxti yikxon pøni janchpi tyiiby'i dø'øn ja kyajpxtip, pø may adøstipxi ja jaa'y ya naxwiñ pøn windaay'ajttip. ² Yide'ents meets ja xnijawidit: ja' idø'øn ja wyinatyi pøn tjanchja'widip jøts ku Jesucristo ya y'atsnanky'ejxøø tyimyjaa'yin, ja'ats idø'øn ja Dios Teety møøt y'ity. ³ Pønts jade'en tkamibøjpk ja Jesús, ja'ats idø'øn ja Dios Teety kamøøt'ejtjip; ja ka'øwinnmaa'n ja ne'egi yiktumpy midi tkaminamyaajyip ja Cristo. Tøxi xnimadowdi jøts ku ja mye'ent ja ka'ødyumbi øy juuni; tøts idø'øn ja yjanchmiñ, pø jaanixi ja wyinnmaa'n ja ya naxwiñ.

⁴ U'nkti una'jkti, Dios mee mja'ajttip, tøxi xnimajada'akti pøn mwindaay'atwajnidip; pø tyimyøkxi ja' pøn mee mmøøt'ejtjip jøts nika'ap ja jade'en myøki ja ka'ødyumbi yja'. ⁵ Ja' ja nugo tyunk'ajttip ja

ka'odyunk ja ka'owyinmaa'n paty ja tum jap ttuk'ixpøkti ja jaa'y jøts ja jade'en yikmøjawidit. ⁶ Diosts adøm xja'ajtindip jøts ja xmibijkyindi pøn jaty ja Dios møøt'ejtindip. Ja'ats xkamibøjkindip pøn kamøøt'ejtindip ja Dios; jade'en'ampyts nnija'wa'an pøn tpadundip ja y'øybi ja tyiiby jøts pøn tpadundip ja taay'ajtin.

Dios amuum ja tsojk'ajtin myøøt'ajtpy

⁷ Mee migu'ukti, xpaat'ajtindip ejtp nixem niyam nnachojkandit, jabi Dios wyingujkpxi chøøn ja øchojkin. Pøn ja myigu'uk ttsojqp, pøn ja myigu'uk tpa'ayoop, ja'ats idø'øn ja Dios tjanchja'wip jøts ja jade'en y'u'nk'atyiyi. ⁸ Pøn tkatsojqp tkaba'ayoop ja myigu'uk, ja'ats tkidyimyjanchja'wip ja Dios, kumi ejtp ja Dios ttsøky ja jaa'y, ejtp ja tpa'ayø. ⁹ Jøts adøm ja ojts xani'ejxa'andi sa ja xjanchøjkyindi xpa'ayø'øiyindi ku ja tyu'umtpspi U'nk ja ojts xaniguejxyindi, jøts ja øchinaa'yin xmø'øiyindi y'oo'kingøjxp. ¹⁰ Yide'en'ampy idø'øn ja Dios chojkin ja pya'ayo'owin y'ejxi tyiyi: pø nigidi adømxi ja tøndsojkyindi nba'ayø'øiyindi jawyeen, pø ja'axi adøm kø'øm tøndxyimchøjkyindi jøts ja y'U'nk ja xaniguejxyindi jøts ja xku'ayo'owandit ja nbøky.

¹¹ Migu'uktøkti, pøni tødam ja Dios xtsøjkyindi, ti kuts adøm nganachøjkyindi nayide'en ja xem ja yam. ¹² Pøn ja Dios tønd'uk'ixy, nipøn ja tka'ixy; pøni nachojka'andipts nabya'ayo'owa'andipts nixem niyam jade'en ja xmøøt'ijtyindi jøts ja jade'en njaaktyimchojkin. ¹³ Nnija'windip ku ja Dios møøt n'ijtyindi jøts xnamyøøt'ejtindip ja nayide'en, ja'agøjxp ku ja tøndxuktatøjka'andi ja y'Espiritu Santo. ¹⁴ Tønd øøts n'ixy, tønd øøts nnijawi wemp'am, paty øø nwa'añ jøts ku ja Dios Teety tønd tjanchkexy ja y'U'nk yiknitsokpi ja naaxwiin. ¹⁵ Pønts tjanchja'wip jøts wya'añ ku ja Jesús Dios U'ngi, ja'ats ja Dios tmøøt'ejtp jøts nayi møøt'ejtip ja nayide'en.

¹⁶ Jade'en'ampy adøm ja tønd nnija'wa'andi jøts ku xjanchøjkyindi xpa'ayø'øiyindi ja Dios. Pø ja'axi ejtp tsojqp, pø ja'axi ejtp pa'ayoop; pønts ja tsojkin yikwingaxi'kpy, ja' ja Dios møøt'ejtip. ¹⁷ Ku jade'en nbadu'unint, jade'en ja nyikmøjtaajkint ja øwyinmaa'n, jøts ja jade'en ngawingudsøjkant ku ja mye'ent tiidyumbi; ja'agøjxp ku ja nayide'en kukwinmaa'yimp ja tsojkin ja pa'ayo'owin sam ja xtsøjkyindi sam ja xpa'ayø'øiyindi. ¹⁸ Niwine'enin ja Dios chojkin ja Dios pya'ayo'owin xkayiktsøjkandit. Yjaaktyimykigtøøgyijxpy ja tsø'øgi ja ne'egi, jøts pø yiku'ayo'owipxi ja tsø'øgi ku pøn chø'øgi, ja'ats idø'øn tkayikmøjtøjkapnim ja Dios chojkin ja Dios pya'ayo'owin.

¹⁹ Ja'agøjxp adøm ja Dios ndsøjkyindi kumi jawyeen ja jade'en tønd xtsøjkyindi. ²⁰ Pøn nugo wamp: "Ndsøjkpy øts ja Dios", jøts ni ka'animdims ja myigu'uk ja twa'añ ttsøky, ja'ats idø'øn taayip. Sudso'ampyts ja Dios tjaaqtyimchokt, pø ka'axi ja kyaxi'iky, ti ja' net ja yjaaktsokp pø ja myigu'ukxi ja kyatsøjkpy pøn yja'ijxpy wiin'ajy. ²¹ Jøts ja Dios yide'en xmø'øiyindi ja y'ana'amin: pøni pøn ja Dios ttsojqp, nayide'en ja myigu'uk ja twa'añt tssokt.

5

Sudso'ampy ja ka'odyumbi yja' xkamimajadaaqjkin

¹ Pøn jaty tjanchja'widip ku ja Jesús yikejxy ja naaxwiin yiknitsokpi, ja'ats ja Dios Teety u'nk'ajtiyidip; pøni chojktip tam ja Dios Teety jade'en, nayide'ents idø'øn ja ttsojktip tpa'ayo'odit pøn jaty ja Dios Teety y'u'nk'ajtpy. ² Kuts ja Dios ndsojkindit jøts ja jade'en ndyimbyadu'unindit sa ja y'ana'amin ja

wya'añ, jade'ents ja nnija'wa'ant ku ja nayide'en ndyimchøjkyindi pøn ja yja'ajtpy. ³ Kuts jade'en ndsojkindit ja Dios, ja' idø'øn ja tyijpy ku dø'øn ja y'ana'amin nbadu'uñindi, jøts ka'ap ja mabaat chepi. ⁴ Jøts pøn jaty ja Dios møøt y'ity, ka'ats ja tmibøjkidi ja ka'ødyumbi yja'. Pø paty ja Dios janchja'win xuktamajadaajkyindi jøts ja xkadukmibijkyindi ja ka'ødyumbi yja'. ⁵ Pønts tkamibøjkti ja ka'ødyumbi yja', ja'ats idø'øn tjanchja'widip ja Jesús jøts ku ja Dios U'ngi.

Ku ja Jesús yiknigajpxy ku ja Dios U'ngi

⁶⁻⁷ Nnija'windip adøm ku ja Jesús Dios U'ngi, jabi kø'ømxi ja Dios Teety ja tymñigajpxy ku ja Jesús ñøbejty jøts ku nayide'en wyinaty y'ookwaanimi; jøts ja Espíritu Santo ejtp nayide'en tnigajpxmi, jabi myøøt'ajtpy ja tiy'ajtin ja'. ⁸ Tigøøts adøm idø'øn ja ejxpajtin nmøøt'ajtyindi midi tnigajpxtip ku ja Jesús Dios'u'nk'aty. Ja myidu'ukpi, ja Espíritu Santo kyajpxy y'ayuujk ja' midi xuknija'wandip ja tyiibi ja yjanchpi. Ja myimajtskpi, ja Dios Teety y'ayuujk ja' midi yikmadoow ku ja Jesús ñøbejty; jøts ja myidigøøkpi, nay ja Dios Teety y'ayuujk ja' midi yikmadoow tsajpjøtpy kyida'aky ku ja Jesús wyinaty y'ookwani. ⁹ Sa ja jaa'y tyiy'ajtin ngupijkyindi, ¿ti Dios idø'øn ja tyiy'ajtin njaakidyimgyupøjkin? Pø ja'axi jawaani tymdyiy tyimyjanch ku ja tnigajpxy sa ja y'U'nk ja yjajty kyubejty. ¹⁰ Pøn tjanchja'wip ja Dios U'nk, kø'ømst ja tjá'gyuki ja tiy'ajtin; jøts pøn tkajanchja'wip ja Dios ku ja tnigajpxy sa y'U'nk yjajty kyubejty, ja'ats taadyejp ja Dios. ¹¹ Ya'at tiy'ajtin xuknija'windip jøts ku Dios tø xmø'øyindi sa n'anmija'win xemikøjpx yjujky'ajtindit, ja y'U'nkts ja'abi jujky'ajtin tmøøt'ajtp. ¹² Pønts møøt y'ity ja Dios U'nk, yikmøøpyts ja'abi jujky'ajtin ja'; jøts pøni ka'ap jade'en yikmøøt'ity, niwindem jade'en ngapaajtindit ja'abi jujky'ajtin.

Ku ja kajpxwejin jøts ja kajpxpoo'kxin y'ukyikyajkni

¹³ Ya'at mee ndanija'ayip wine'enin jam xjanchjawidi ja Dios U'nk, jøts xnijawidit ku ja jam xmøøt'ajtnidi ja jujky'ajtin midi xemikøjpx.

¹⁴ Jade'ents ngawingudsøjkindi ja Dios ku n'amido'owin nbøktso'owin pøni ti ja kø'øm xamidojkindip, ja' ja myadøøpy. ¹⁵ Tøts inet nnija'windi ja Dios kudam ja tmadøy ja amido'owin ja pøktso'owin, jøts nay jaty x'adsowimbijtyindi pøni ti dø'øn tø n'amido'øyindi.

¹⁶ Pøni n'ijxyindip nnija'windip ja nmigu'luk ku ja ttundi ja pøky midi ttukja'dyigøøpy ja Dios, jatyits ngu'amidoo'wandit jøts ja Dios ja myaa'kxukiyit. Jabi jaaxi ja kajabøky midi ja anmija'win tyikwindigøøpy jøts ja Dios tyukja'dyigøy, kidi ja'apts ndijpy. ¹⁷ Tumbøky yø tundigø'øyin kajpxigø'øyin; jamts ja winaagin midi tkayikwindigøøpy anmija'win.

¹⁸ Nnija'windipts ja' pøn ja Dios Teety møøt y'ity, ka'apts ja pøky'agujkpy chøøni; pø Dios U'nkxi axajtujkiyip jøts ja miku' ja sa kyatuniyit.

¹⁹ Pø nnija'windipxi adøm ja' ku adøm ja Dios xja'ajtyindi, jøts may ja'amidi pøn ja miku' tø ñiwangøjxniyidi.

²⁰ Jøts nay yiknija'wip ja' ku ja Dios U'nk tø xnimii'ñindi, jøts ja tø xuknija'wandi midi tu'ugyi ndios'ajtyindip. Ja' tu'ugyi møøt n'ijtyindi ja y'U'nk Jesucristo. Ja'ats idø'øn tu'ugyi ndios'ajtyindip, ja'ats tyajkp jøts ja n'anmija'win xemikøjpx yjujky'ajtindit. ²¹ U'nk una'jkti, nay'ejx'etiyidi yikxon, kidi nugo o ti xdiospikta'akti, kidi jade'en o ti xwindsø'øgidi. Jade'en idø'øn ja yjatt.

JA MYĪMAJTSKPI NØKY MIDI JA JUAN YJAAY

Ja tiy'ajtin, ja tsojkin jøts ja pa'ayo'owin

¹ Mets u'nk Ciria, mōjaa'y'ajtp øts, ixyamts meets ya'at nøky ndanijayi mōøt m'u'nk m'una'jkti wine'enin ja Dios tō m'a'ejxiyidi jøts ja jade'en mja'atyidi. Jade'ents mee ndsøky, jade'ents mee nba'ayøy, jøts kidi øtsip tu'ugyi, pø nayide'enxi meets ja mdsøkyidi mba'ayøyidi pøn jaty ja y'øybi tyiibi tpadundip. ² Ja' øts jade'en xyik'adøtsip ja ku nmøøt'ajtyindi ja y'øybi tyiibi jøts nijuuni adøm ja xkamajststuuptyindi. ³ Dios Teety jøts ja Dios U'nk, ja'ats mee mgunuu'kxidip mba'ayoojidip jøts mmø'øyidi ja øy'ajtin ja jotkujk'ajtin tiy janch sa ja ttsøjkyin.

⁴ Jade'en øts ja m'u'nk ja m'una'jk winaagin njanchtaxonda'aky ku øts ja nbaaty ku øts ja n'ixy tpadundi ja y'øybi tyiibi jade'en sam ja Dios Teety ja tō xa'ane'emyindi. ⁵ Mee migu'uktøjkti, mdyimdyu'undip ja may'ajt jøts ja xem ja yam nmigu'uk ndsojkindit nba'ayo'owindit. Kidi ixyamnim yø jade'en yikmadøy, jaayip yø yikmadoodsø'ondakni ku ja ndsinaa'yin nyiktigajchindi. ⁶ Yø' idø'øn tsojkin'ajtp, yø' idø'øn pa'ayo'owin'ajtp ku ja Dios kyutujk nbadu'unin; jøts yø' idø'øn kyutujkin'ajtpy midit tō xmadowdi ku mdsinaa'yin tō xyiktigatsti, jøts xem yam mnachokidit mnabya'ayowidit.

Pømbi win'øø'ndip

⁷ Jats may ixyam ja win'øø'mbidi pøn tkajanchjawidip ja Jesucristo ku ja y'atsnanky'ejxøø jaa'yin. Pønts jade'en win'øø'mp, ja'ats idø'øn tkawamp tkatsojpk ja Cristo. ⁸ Øyim mnay'ejx'etidit, kidi xkamøjpikta'akti ja ixpøjkin midit mee tō nduk'ixpiky. Jade'en Dios øy ti mmo'ojidit pøni ti ja mdamidsojkidip.

⁹ Pønts nugo tyimwyinmay'anajxp nika'ap ja t'uktajotkujk'ajtniyi ja Cristo y'ixpøjkin, ja'ats kamøøt'ejtip ja Dios; pønts jade'en tjantyimbyadump sa ja y'ixpøjkin wya'añ, ja'ats idø'øn møøt'ejtiyip ja Dios Teety jøts ja Dios U'nk. ¹⁰ Kuts pøn mninøjkxidit mjøn jotp mdøjkjotp, yamts meets ja xanijawi jøts ku wenk ixpøjkin ja tmøødi, kidi meets ja xyiktøki jam mdøjkjotp, jøts kidi meets ja xmo'odi ja kajpxpoo'kxin; ¹¹ pønts ja tkajpxpoo'kxp, ja'ats idø'øn tpadump ja ka'øy ixpøjkin.

Sa ya'at ayuujk yjøpkixy

¹² Maynim øts ja winmaa'ñ nmøødi midit mee ndukmadoowampy, jøts ka' meets ja nugo ndanijayi wya'añ; ndyimñinøjkxwampy mee kø'øm jøts ixy windani ndukmado'odit, jøts jade'en ndyimdyajotkujk'ajtindit.

¹³ Ja m'uch pøn ja Dios tō y'a'ejxiyi, ja'ats ja y'u'nk ja y'una'jk yam mdanigajxiyip ja kajpxpoo'kxin. Jade'eñi øts ja ayuujk nguexy, jade'en idø'øn yjatt.

JA MYĪDIGØØKPI NØKY MIDI JA JUAN YJAAY

Øy tsuj ja Gayo yikniġajpxy

¹ Møjaa'y'ajtp øts, ixyamts øts ya'at nøky ndanijayi mets migu'uk Gayo, ja'agøjxp ku niujuuni ngaja'dyigø.

² Migu'uk, wamp øts jøts øy yikxon xyiknaxt møk møjaaaw, nayide'en sam ja Dios øy tsuj myik'ityi. ³ Njanch'øjja'wipts øts, njanchuja'wipts øts, jøts ku øts ja jaa'y winaagin xnimendøø pøn nmigu'uk'ajtyindip, jøts øts ja xamimadya'akti jøts ku mets øy tsuj mjaa'y'aty sam ja Dios kyajpxy wya'añin. ⁴ Midi'iibi øts idø'øn njaaktyimy'øjja'wip njaaktyimchuja'wip pø nmadøøpxyi øts jøts ku øts nmigu'uk ja møj ja mutsk tpaduujnidi ja Dios kyajpxy.

⁵ Migu'uk, øy'ajtp ku øy tsuj mjaa'y'aty ku jade'en nmigu'uk xpudøki pøn jaty tmīnaxtip tmīdøkidip ja Dios kyajpxy øy ja xjaga'ijxy'aty. ⁶ Tøts øøts ja winaagin xukmadowdi sã mets ja xtsøky sã mets ja xpa'ayø. Jaaktyimdyun ja may'ajt jøts ja xjaakpudøkit sam ja Dios tkupikyin, ku ja jam jade'en yja'attit choondit. ⁷ Pø ja'axi ja tø tndsoondi jøts ja jade'en tmīwidejtidit ja Dios kyajpxy, jade'ents ja ka'ap tkupøkti ja pudøjkin midi ja jaa'y ja møøjyidip pøn jaty tkanija'widipnim ja Dios. ⁸ Patyts adøm xpaat'ajtyindi jøts ja ndyimbyudøjkandit ku ja jade'en tmīyø'ødyi tmīnaxti ja y'øybi ja tyiibi.

Ka'ap y'øyjaa'y'aty ja mixy Diótrefes

⁹ Tø meets ja nøky ndanijayi jøts mee ndukmadø yø'øbi winmaa'ñ, ja' ku ja mixy Diótrefes tkamøjpikta'aky ja n'ayuuik ja n'ana'amīn, ja'ats ne'egi kø'øm nabyiktaajkip windsøn jøts niwine'enin øts ja xkamimadø. ¹⁰ Paty ku øts wyīnaty nniġkxy, møk øts ja ndawingugajpxit ku adøm ja xwingajpxyindi xpagajpxyindi ku ja xnidaay'ajtyindi. Nayide'ents ja tkadajotkujk'aty, yjaaktyimy'ane'empy ja myigu'uk ja', jøts ja ka'ap tkupøktit pøn jaty tmīja'ttip tmīdso'ondip ja Dios kyajpxy, pønts ja jade'en tjagabadunwamp, jatyits ja tpaawøpy jøts ja ka' t'uktuktatøjkiñi mā ja Dios kyajpxy yikpatmadø.

¹¹ Migu'uk Gayo, niujuuni jade'en xkatu'unt sam ja ka'ødyumbi ttuñ, tum ja øybi mdu'ump. Pøn jade'en øy jaa'y'ajtp, ja'ats ja Dios ja'ajtyip, pønts ka'øy'ajtp, ja'ats idø'øn tka'ejxp tkanija'wip ja Dios.

Janch øyjaa'y'ajtp ja Demetrio

¹² Øy tsuj yiknimadya'aky ja Demetrio. Ñanky'ejxip ku ja tpaduñ ja y'øybi ja tyiibi. Nayide'ents øø nwaami, nyiktīdyøjkīp øøts ja nayide'en, pø mnija'widipxi ku øø ka' ndaayi.

Ja kajpxpoo'kxin midi ya'at nøky tyagugøjxp

¹³ Maynim øts ja winmaa'ñ nmøødi midi me ndukmadoowampy, jøts ka' mets ja nugo ndanijayi wya'añ; ¹⁴ ndyimñinøjkwampy me kø'øm jøts ixy windani nnagyajpxindit.

¹⁵ Øy yikxon xyiknaxt. Ixyam mmigu'uk mdaniguexyiyi ja kajpxpoo'kxin pøn jaty yam tsinaadyip. Tunts ja may'ajt jøts nayide'en xkajpxpoo'kxt pøn jaty jam nmigu'uk'ajtyindip.

JA NØKY MIDI JA JUDAS YJAAY

Ku ja Judas tnijayi pøn jaty ja Dios tø twi'ixy

¹ Judas'ajtp øts. Øts ja Jacob nmiga'ax'ajtpy. Nmidumpy øts ja nwindson'ajtim Jesucristo jøts meets ya'at nøky ndanijayi pøn jaty ja Dios tø tyamidsøkyiyi jøts ja yja'atiyit, ku ja tø y'agø'dukiyi y'axajtukiyi ja nwindson'ajtim Jesucristo, ku ja møøt y'etti. ² Mbaattip yikxon ja Dios kyunuu'kxin jøts øy tsuj mba'ayowiyidit jøts ja øy'ajtin myikmo'odit.

Pøn nugo jawindaqy'atwamp

³ Meets migu'uktøjk, o meets ja nøky kawinaak ojk tø njadanijayiwy'a'añ sa dø'øn y'ejxi tyiyi ja nitso'ok'ajtin mididi njagyeyjyindip, ixyamts mee nnijayi jøts tu'ugyi xyik'ettit ja mjanchja'win mididi ja Dios tu'ugyi tø xmo'øyim, ku ja xja'ajtyindi. ⁴ Jabi tøxi ja jaa'y jam tmidøki ja win'øø'nin jøts meets ja mdukupunwa'añidi mididi ja tyi'ajtin kyamøøt. Pø wampxi ja Dios kyajpxy jøts ja tyik'ayo'ombaatt sam pyaat'atyiyi ku ja kya'øyjaa'y'atti, wandipts ja' øy ja ti ttu'undit maa'kxukidip ja Dios ja'. Ka'ap ja Dios Teety yja' ttsojkidi pøn xja'ajtindip møøt ja nwindson'ajtim Jesucristo.

⁵ O meets ja xjanijawi, nduknijawiywampy meets ja jadigojk jøts ku ja Dios Teety ojts tyik'awa'atpidsimy ja Israelit jaa'y jam Egipto, xjats tyikwindigø y ja' pøn ja kamibøkiyi kabaduujniyi. ⁶ Jøts nayide'en ja ankilistøjk winaagin ja yja' ka' t'ukpadunidi sam pyaat'aty, Diosts ja tø myachi jøts ja tø pyikta'agyi agootstujpy, jam ja y'lawejxti ku ja tiidyu'unin mye'ent. ⁷ Nayide'ents ja yjajtmidi ja Sodoma kajp jøts Gomorra kajp, jøts mididi jaty jam kajp wingon ejttøø. Øy sa y'adøstøø, yaa'dyøjk namyøøt'ajtidip tukyaa'dyøjk, tø'øxyøjk namyøøt'ajtidip tukto'øxyøjk. Jade'ents ja ka'øybi ttundøø. Jøts ja Dios xemikøjxp tø yik'ayo'ombaadyidi ma xemikøjxp tyø y. Jade'ents yø xuk'ijxyimp xuknija'wimp jøts ka'ap jade'en n'adøøjtsint.

⁸ Øyi tjanijawidi pøn meets ixyam nugo mwin'øø'nip, kyø'øm winmaa'ñjøtpy ja jade'en ttundi ku ja kya'øyjaa'y'atti jøts ka' tmøjpkta'akti ja Dios kyutujk. Nugo twindsø y ja ankilistøjk mididi ja Dios myøøtsinaapy. ⁹ Janch wenk idø'øn ja Dios yø'øbi jaa'y twindsowdi, nika'ap ja møj ankilis Miguel twindsø y ja mikul jade'en ne'egi, ku ja Moises ñine'kx tyiktsepjajtidi sudso dø'øn ja yiktu'unt. Ne'egi yide'eñi ja'ayi tnimaay, "Dios paat'ajtiyip pøni sa ja mdunwa'añi." ¹⁰ Yø jaa'y mididi mwin'øø'nidip ku yø ti kø'øm tkaja'gyukidi, ja'ats yø kyajpxtip ka'øy; ja'ayi nugo ñija'widip jøts yø jade'en y'adø'østst ejxim jiyujkin, kø'ømts yø nugo jade'en ñankwyindigø yidi.

¹¹ Ayo'ombaattip ja'adi ku nay ja' tpadunidi sam ja Cain yjaa'y'ajty ku ja myigu'uk ja tyik'øjky. Tundip nayide'en sam ja Balaam jøts ja meeñ patp tjawidi. Jade'en nøjkk wyindigø ydi sam ja Coré ku y'ookøxti ku ja Dios tmidsepøjktøø. ¹² Nugo mdsø'ødyuñidi meets ma mee mgaadyi m'uukti tukpabøjkpitøjk, ku meets yø ka'ap mnimiñidi amumjoojt, jøts ku yø nugo ku'uxy'i kyaydi y'uukti jøts yø jade'en nugo mdaxi'ikyidi, niti windsø'jkin tkabikta'akti, kø'øm ja ne'egi ñay'ejx'ityidi, ka'ap ja t'ixy pøni ti ja tø yik-taguwanidi. Jade'en ja'adi ejxim ja yoots ne'ejxint mididi ka' tyu'uuy, jøts nayide'en ejxim tu'uk ja ts'a'mguipy mididi katøømip, øy ja tyøøm'ajtin ja tjapaaty, windigø y'ejtnidipts ja jadi'iñi. ¹³ Tum ja ka'øybi tyundip jøts

ne'egi o sa tyimy'adø'otswa'andi tsø'odyumbim. Jade'ents tø tyuu'tigøødyi jøts xemikøjxp jap y'ettit agootstujpy.

¹⁴ Ja mõjaa'y Enoc pøn myiwixujk najtskaxi, ku ja Adan jawyeen, ja' ja Dios kyugajpxy'ajt jøts yide'en tñigajpxy ja ka'øy jaa'y, jøts wyaañ: “Jøts ø n'ijxy ja nwindson'ajtim ku ja mil'ampy tmøøtmiñ ja pyabøjkpitøjk, ¹⁵ jøts pøky pyayø'øwya'añ pøn ka'øyjaa'y'ajttip, pøn tø tyundigøydi kyajpxigøydi jøts ku tø twindsowdi ja nwindson'ajtim.” ¹⁶ Yø'øbi jaa'y nugo ña'amdi nugo pyagajpxti, ja y'øy'ajtin yø nugo yjayiktunwandip jøts ja jaa'y øy tsuj nadyijy' tñigajpxti ja'agøjxp ku nugo tkajpxwyetswa'andi.

Ku ja pabøjkpitøjk yiktukmadøy sa yjaa'y'attit

¹⁷ Meets migu'uktøjk, ja'myatsti sa ja nwindson'ajtim Jesucristo kyudanaabyi mdukumadoodidøø ¹⁸ ku wyandøø yide'en: “Ku wyingøñ jøts ja nwindson'ajtim mye'ent jats kyaxø'øktit ja jaa'y pøn tka'ødyejtíp tka'øgyajpxti ja Dios yja'. Ka'øyjaa'y'ajttip ja' jade'en sa ja kø'øm ñadyamidsøkyidi.” ¹⁹ Yø' nugo tyikwinmaa'nmya'atwamp ja jaa'y; ja'ayi chojktip ja kya'øybi jøts ka'ap Espiritu Santo ja tmøøt'atti.

²⁰ Meets migu'uktøjkti, tu'ugyi mnabyikta'agidit jøts tu'ugyi xyik'ettit ja mjanchja'win midi ja Dios yajkpy. Ku ja Dios x'ajot'attit, ja Espiritu Santo mbudøkiyidip. ²¹ Xtsojkindip ja Dios, xpa'ayo'owindip ja Dios, paty øyim mnay'eix'etidit sam ja ttsøkyin. Njøp'eix'ejtindip ku ja nwindson'ajtim Jesucristo xmø'øyint ja øy'ajtin midi xemikøjxp.

²² Yikjotkujk'atti ja' pøn pyamaapy pyadajpy pøni midi'ibi pyabøkp. ²³ Tuu'mo'odi kajpxwejti ku tyundigøydi jøts ka'ap ja ayo'on tpaattit; jøts xpa'ayo'ot nayide'en pøn ka'øyjaa'dyi, øyim mnay'eix'etidit kø'øm, jøts ka'ap jade'en xu'undit sam ja'adi.

Ku ja Judas tkajxa'aky ja Dios jøts tyikjøpkijxy ja ñøky

²⁴⁻²⁵ Tu'uk ja Dios mõj, pøn tñija'wip, pøn xyiknitso'ok'ajtimp, ja'ats ja myøk'ajtin xa'eix'ejtimp jøts ka' ndundigø'øyint, jade'en'ampyts agujk jotkujk kukwinguwa'jka'ant ja' wyindump, ku niti pøky ngamøøt'ajtint. Ja'ats tmøøt'ajtp ja øy'ajtin ja møk'ajtin nwindson'ajtim Jesucristo køjxp, jaayip ku ja tyiktso'ondakijxy tuki'iyi, jøts kunim ja nayide'en tyikjøpkøxt. Jade'en idø'on ja y'eixi tyiyi.

YA'AT AYUUK JA JESUCRISTO TYUKNIJA'WI KUMAA'YJOTPY JA JUAN

Ku ja Jesucristo ttuk'ijxy ja Juan sa ja naxwii'ñit yjatt

¹ Ya'at idø'on tiy'ajtin midì ja Dios Teety tyukmadoow ja Jesucristo, jøts ja pyadumbi pyabøjkpi ttuk'ext ttuknijawit sa nøjkx yjatt kyubatt tsojk ya naxwiiñ. Nay øts ja tiy'ajtin tuki'iyi tø xuk'ixy tø xuknijawi sa tu'uk y'ankilis tø xukmigajpxy. ² Xjats øts njaadyangijxy tuki'iyi pøni ti jaty ja Dios Teety møøt ja nwindson'ajtim Jesucristo tø xuk'ixy xukmadøy.

³ Tya'øy'ajtidip ja Dios kyunuu'kxin pøn ya'at nøky t'ejxp jøts tpadu'unt, nayide'ents ja' pøn tmadoop, pø wingompxi dø'on jøts jade'en yjatt sam yø nøky wya'añ.

Ku ja Juan tnija'ayiyi'ñ pøn jaty ja Dios tjanchja'widip ja niwixujkpi kajp

⁴ Øts Juan, øts meets ya'at nøky ndanija'ayip pøn ja Dios tjanchja'widip, ja niwixujkpi kajp midì jam Asia y'etjotp. Paat meets ja kunuu'kxin øy'ajtin midì ja Dios yajkpy, ja' midì xemikøjxp jujky'ajtp, nayide'ents mgunuu'kxidit ja niwixujkpi ja'win midì møøt y'ity ja Dios Teety. ⁵ Wan mgunuu'kxyidi nayide'en ja nwindson'ajtim Jesucristo pøn tnanky'ejxip ja tiy'ajtin, jøts pøn myijawyeen tø yjujkyøjkøjmi jap oo'kpi jutjøtpy. Ja'ats nayide'en tnigutujk'ajtp niduki'iyi ja møj windsøndøjkti ya naxwiiñ. Nayide'en ja Cristo xpa'ayø'øyimp sa tø xyikpøkwyaaajchim ku tø wyidsuñ wyidaxy adøm nbøkyøjxp. ⁶ Tøts ja xpiktaajkyim jade'en øyjaa'y møjaa'y, jøts nbadu'unindit ja Dios Teety yja' midì tyeety'ajt nwindson'ajtim. iWan tjä'myejchim xemikøjxp ja Dios y'øy'ajtin myøk'ajtin! Jade'en idø'on ja yjatt.

⁷ iMeets, uk'ejxti ukmadowid, jade'en idø'on ja Cristo mye'ent yootsjøtpy! Jøts niduki'iyi n'ejxint, nayide'en ja'adi pøn ja nwindson'ajtim yik'ayo'ombaajti kruskøjxp; janch ya'axtip janch ji'idyip ja naxwii'ñit jaa'y ku jade'en t'ejxtit. Jade'en idø'on ja yjatt.

⁸ Yide'en ja Dios Teety wya'añ pøn ja myøk'ajtin møj, jøts pøn xemikøjxp jujky'ajtp: "Øts idø'on ja tso'ondaajkin jøts øts nayide'en ja jøpkøjxin'ajtin najkpy."

Ku ja Juan t'ijxy ja Cristo

⁹ Øts Juan, meets nmigu'uk'ajtpy ku ixyam nayide'en ngu'ayo'ombaajtindi ja nwindson'ajtimgøjxpit, paty adøm xmø'øyim ja øy'ajtin ja tuda'aky'ajtin jøts ja xyik'ejtint mā ja kyutujk xanatanaa'yimp. Jam øts wyinaty ndsumchøøni mā txøw'aty Patmos jam mejy kyujk'am, ja'agøjxp ku øts ja Dios kyajpxy ngajpxwa'kxi jøts ja Jesucristo yja' nnigajpxi. ¹⁰ Domingi xøow wyinaty ku øts ja Espiritu Santo adsu'jky xatøki, jøts kumaa'yjotpy møk øts xjiguyaaaxi ejxim tu'uk ja puxujx, ¹¹ yide'en ja wya'añ:

—Øts idø'on nyiktso'ondaajk tuki'iyi jøts nay øts nyikjøpkøxp. Midì jaty m'ejxp mnijawip, tanijayi pøn ja Dios ja'ajtip mā niwixujkpi kajp jam Asia y'etjotp. Ja' xøow ja kajp: Efeso, Esmirna, Pèrgamo, Tiatura, Sardis, Filadelfia jøts Laodicea.

¹² Xjats n'ejximbijty pøn øts xmigajpxp, jøts n'ejxpaaty wixujk ja kandeeleri midì tum oori. ¹³ Jam wixujkpi kandeeleri kujk'am n'ijxy tu'uk ja jaa'y jade'en sam adømin, jade'en ja wyet tyek'ok'am paat kyida'aky. Tum oori ja chum kyaxi'iky midì ja'tp kyachwiiñ. ¹⁴ Ja kyubajk, janch amuum poop

ja wyaay kyaxi'iky ejxim ja poop pixyin, ejxim tsap'øøpkyin, jøts ja wyeen jade'en kyaxi'iky ejxim jonyowin. ¹⁵ Ja tyeky, jade'en kyaxi'iky janch amuum tsamamp ejxim ja pujx n'uk'ejxint midu janch tøø'kxp, midu øyip ornijøtpy; ku ja kyajpxy, møk idø'øn nmadoo'wint, jade'en ejxim ja møj nøø y'iichin. ¹⁶ Jam y'aga'ngyø'øm tmach'ity wixujk ja maadsa', jøts y'aawjøtpy pyidsimy tu'uk ja yøñchujx midu janch jøpxuu'ñ jøts adsow jøøjp. Jade'en kyaxi'iky ja wyeen ja y'aaw ejxim ja xøøw møk y'añin.

¹⁷ Ku øts n'ijxy jade'en, winets øts ojts øøky nayjawiyi nnaxkida'aky ja tyekyjø'øm, jøts øts ojts y'aga'ngyø' xanixajy jøts ø xnimaay:

—Kidi mdsø'øgi; øts idø'øn, tø nyiktso'onda'aky tuki'iyi nayide'en sã nyikjøpkøxt. ¹⁸ Jujky'ajtp øts idø'øn øy tø nja'øøky, xemikøjxp njujky'aty jøts øts ja møk'ajtin njagyeyjy, jøts øts nyikjujkyøkt pøni pøn tø y'oockti tyigøydi. ¹⁹ Jaadyangøx tuki'iyi midu ixyam m'ijxpy, midu ixyam mnija'wip, jøts midu jatwamp. ²⁰ Jade'en idø'øn ja twandijy midu tø x'ixy, ja wixujkpi maadsa' n'aga'ngyø'øm jøts ja wixujkpi kandeeleri nayide'en: ja wixujkpi maadsa', yø' twandeyj pøn ø ngugajpxy'ajtpy ma øts ja njanchja'wibitøjk jamdi ma wixujkpi kajp jam, jøts ja kandeeleri ja janchja'wibitøjk ja'adi, pøn jam'ajttip.

2

Ya'at ayuujk ja nwindson'ajtim tyaniguejxpy ja yjaay ma ja wixujkpi kajp: Yide'en jawyeen yiktanija'ayiyi'ñ ja Efesit jaa'y

¹ Nijayi øts ngugajpxy midu jam Efeso sã øts ixyam nnigajpxy: “Yide'en ja wya'añ pøn jam y'aga'ngyø'øm tmach'ejtp ja wixujkpi maadsa' jøts pøn jam tanaapy wixujkpi kandeeleri kujk'am: ² Wa'ats ø nnijawi tuki'iyi pøni ti mdumpy; nnija'wip ø tuki'iyi sã møk mduñ øts køjxp, jøts sã mduda'aky'aty, nayide'en ø nnijawi ku xkagupsiky pøn ka'øyjaa'y'ajttip. Tøxi x'ixy tu'uk jaty pøn nugo nadyejidip øts ngudanaabyitøjkti, ka'ap ja tyiy'ajtin wyingaxi'iky, nugo ja wyindaayidi. ³ Øy møk ja maa'kxujkin tø xjagyepy ku tø xpaduujni øts nja', jøts ku tø xku'ayo'ombaaadi øts køjxp, jøts ka'ap ja jotkøjxin tø xmøøt'aty. ⁴ Tu'uk øts nga'øyjawu mets ja mjaa'y'ajtin: ku mets ka' nayide'en x'uktsojknì sam xyiktso'ondaajky. ⁵ Paty ø nwa'añ, ja'myats pøni ma tø mduu'digøy, jøts xyiktigatst ja mwinmaa'ñ, jøts nayide'en xu'unt sam jawyeen tø xuñin. Pøni ka' xuñ jade'en, nbøjknip øts yø kandeeleri midu mmøøt'ajtpy. ⁶ Øts idø'øn yjade'eni, mjagyeyjy nayide'en ja øy'ajtin ku nayide'en xkatsøky ja nicolaitas y'ixpøjkin sam ø ngatsøkyin. ⁷ Madowdi yikxon sam ja Espiritu Santo tmigajpxy pøn ja Dios ja'ajttip, yide'en ja wya'añ: Pøni pøn tmimajadap ja miku' yja', ja'ats nmo'op ja øy'ajtin xemikøjxp ma Dios y'ity.”

Yide'en ja Esmirnit jaa'y yiktanija'ayiyi'ñ ja ayuujk

⁸ Nijayi nayide'en øts ngugajpxy pøn jam ejtp ma øts njanchja'wibitøjk jam Esmirna kajpøtp: “Yide'en ja wya'añ pøn tuki'iyi tø tyiktso'onda'aky jøts pøn nayide'en tyikøxp, ja' pøn ø'jk jøts yjujkyøjkojmi oo'kpi y'agujkpy: ⁹ Nnija'wip ø tuki'iyi pøni ti mdumpy; pøni sã m'ayøy mwinmay, øy yø meeñ kyidyimy'ity, tø ja Dios mdsuj'ijxyi mdsujawiyi ja' wyingujk. Nnija'wip øts ku mjemigajpxyi mdemigajpxyi winaagin pøn nugo nadyejip israelit jaa'y, yø' yide'en nugo tjayikmajada'akwajnidip ja miku' yja', pø ka'axi Dios ja tja'aji. ¹⁰ Kidi mdsø'øgidi pøni sã mja'ttit mgubattit; yø miku' mnankchumwajniyidip jøts nidu'uk nidu'uk myikjøt'ejxtit, jøts xmajtstu'uttit ja Dios yja'; øy yø mjayik'etidit majk xøøw puxøjkjøtpy, tu'ugyi ja mwinmaa'ñ xyik'ettit o mjadyimy'oockti, øts mee nmo'op ja jujky'ajtin midu xemikøjxp. ¹¹ Madowdi yikxon

sá yø Espírítu Santo tñigajpxy pøn ja Dios ja'ajtíp, yide'en ja wya'añ: Pøni pøn tmimajadákp ja miku' yja', ka'ap ja tpaat t'ext ja ayodaajk. Ka'ap ja y'anmija'win sa yjatt."

Yide'en ja Pérgamit jaa'y yiktanija'ayiyi'ñ ja ayuujk

¹² Nijayi nayide'en øts ngugajpxy pøn jam ejtp má øts njanchja'wibitøjk jam Pérgamo kajpøtp: "Yide'en ja wya'añ pøn tmøøt'ajtp ja yøñchujx yjøpxuu'ñ adsow jøøjp: ¹³ Nnija'wip ø tuki'iyi pøni ti mdumpy jøts ku jam ja miku' møk y'ane'emy má mdsøøni, ka' xja'dyigøy ja mjanchja'win øy øts njanchja'wibitøjk yjadyimy'ø'jky pøn txøøw'ajt Antipas, pøn øy tsuj xpaduujni øts n'ayuujk. ¹⁴ Ya'at øts n'ø'y'ijxpy nga'ø'y'ijxpy pøni ti mdumpy: jam meets winaagin jam Pérgamo, pøn tkamajtstu'utwamp sam ja Balaam ja y'ixpøjkin jekyip tyik'ity, ja'ats øjts t'agajpxi ja Balac jøts ttukmado'ot ja israelit jaa'y sa tyundigø'ødyit. Ojts ttukmadøy jøts tjøø'kxtit midit tø wyinaty yiktamiyøxy ja maxandsaa, jøts nayide'en o sa pøn ñamyøøt'atiyidit. ¹⁵ Nayide'en meets jam winaagin pøn tkamajtstu'utwamp ja nicolaítas y'ixpøjkin midit øts ngatsøjkpy. ¹⁶ Paty ø nwa'añ, jøts tyiktigatstít ja wyinmaa'ñ; pøni ka'ats, tsøjts ø nnøjkxt jøts ndatseptu'unt ja nyøñchujx midit pidsømp n'aawjøtpy. ¹⁷ Madowdi yixxon sa yø Espírítu Santo tñigajpxy pøn ja Dios ja'ajtíp: Pøni pøn tmimajadákp ja miku' yja', ja'ats nmo'op ja jii'kxy midit yiktejp maná midit yu'uch ejtp; nayide'ents ø nmo'ot ja mutsk tsaa'u'nk midit poop, japts tu'uk ja xøøw kyøxia'ayí midit jemy jøts midit ka' yik'ixy yiknijawí, ja'ayí tu'uk tñija'wip pøn ja yikmøøpy."

Yide'en ja Tiatirit jaa'y yiktanija'ayiyi'ñ ja ayuujk

¹⁸ Nijayi nayide'en øts ngugajpxy midit jam ejtp má øts njanchja'wibitøjk jam Tiatira kajpøtp: "Yide'en ja Dios U'nk wya'añ pøn ja wyeen jade'en kaxø'kpx ejxim ja jøn'ayowin, jøts ja tyeky ejxim tu'uk ja puix midit janch tøø'kxp tsamamp: ¹⁹ Nnija'wip øts tuki'iyi pøni ti mdumpy, sa mmigu'uk xpa'ayøy, sa ja Dios kyajpxy xpaduujni, sa xpuðøki pøn ti ka'ejtíp jade'en sa mduda'akyjaa'y'aty. Tø øts nja' xyikmiweni xyikaja'aji jawaani øy yam, ka'ap jade'en sam jawyeen tø xyiktso'onda'akyl. ²⁰ Ya'at ø n'ijxpy nga'ø'yja'wip mets køjxp: ku xkupiky ja ka'ødyø'øxy Jezabel, pøn ñadyijyi ja Dios kyajpxy tkajpxip, nugots ja y'ixpøjkin ja ttawin'iiñ øts ja njanchja'wibitøjk kuk idø'on øy o sa pøn ñamyøøt'atiyit jøts ku tjøø'kxtit midit tø yiktamiyøxy ja maxandsaa. ²¹ Tøts øts nayide'en njanøjmi jøts tyiktigatstít ja wyinmaa'ñ sam pyaat'atyí, ka'ats ja tpadunwa'añ: ka' tmajtstu'utwa'añ ja kya'ø'y'ajitin. ²² Øts ja nwandu'ump sa ja yuu ja pa'am pyaadyyit, nayide'en niduki'iyi pyaatkøxyiyit ja ayo'on pøn jaty møøt tø tyundigøy. ²³ Nwandu'umpts øts nayide'en ja y'u'nk ja y'una'jlk pøn ka'ødyø'øxy'ajittip. Jade'en idø'on t'ejttit tñijawidit niduki'iyi øts njanchja'wibitøjk sam øts wa'ats n'ejxkapy sam pøn tu'uk jadu'uk wyinmaa'ñ tjagyeyjy y'am yjotp. Nidu'uk nidu'uk meets ndidyu'undit pøni sa jaty pøn tø y'adø'øtsti. ²⁴ Ka'ap øts sa nwa'andijy ku ja ka'ødyø'øxy yja' tø xkabaduujni ku ja miku' kyootswinmaa'ñ tø xkayikmajadaajkidi. ²⁵ Padun'etti xemikøjxp ja winmaa'ñ midit myiktundip kunim ø nme'ent. ²⁶ Pøni pøn tmimajadákp ja miku' yja' jøts nayide'en ttu'unt sam ø ndsøkyin, ja'ats nmo'op ja møk'ajitin jøts tñiwindsøn'att niduki'iyi ja naxwii'ñit jaa'y. ²⁷ Yø'øbi møk'ajitin midit øts ja Dios Teety tø xmø'øy, nay yø'øts mdaba'ejxtip mdabayø'ødyip ja naxwii'ñit jaa'y. ²⁸ Nayide'ents meets nmo'ot

ja øy'ajtin jøts meets møøt n'ett xemikøjxp. ²⁹ Madowdi yikxon põni sã jaty ja Espíritu Santo tnøjmi ja janchja'wibitøjk pøn ejtip jam mã niwixujkpi kajp."

3

Yide'en ja Sardisit jaq'y yiktanija'ayiyi#ñ ja ayuujk

¹ Nijayi nayide'en øts ngugajpxy pøn jam ejtp mã øts njanchja'wibitøjk jam Sardis kajpjojp: "Yide'en ja wya'añ ja' pøn tkajxp ja niwixujkpi kugajpxy jøts midì tpøkjø'kp ja wixujkpi maadsa': Wa'ats ø nnijawi põni ti mdumpy. Ots myiktijy myikwa'añ ku øy tsuj mduñ, nnija'wip øts ku ka' mduñ. ² Jawidi, nay'ejx'etidi, jøts ka' jadi'iñi mwindigø'ødyit; n'ijxpy nnija'wip øts midì mdumpy ku ka'ap tyiy'aty Dios wyindump. ³ Ja'myatsti ja øy'ayuujk ja øgyajpxy midì tømadowdi tøm xukpøkti; nay yø' mbadu'undip jøts ja mwinnmaa'ñ xyiktigatstìt. Ku xkatu'unt sam nwa'añ, winets ø nme'ent adsu'jky sam ja maa'tspi myiñ, nika'ap ja xnijawit põni juuni nme'ent ejxpi payø'øbyi. ⁴ O meets yø'øbi winmaa'ñ tøm xjababiky, jamts winaagin pøn øy wa'ats jaq'y'ajttip, ja'ats ø møøt n'lity xemikøjxp sam pyaat'aty. ⁵ Pøni pøn tmimajadakp ja miku' yja', ja'ats ja wa'ats'ajtin tsuj'ajtin tpaajt, ka'ats øts ja xyøøw nyiktigøjy midì tøm yikja'ay jap nøkyjøtpy mã jap y'lity ja jaq'y xyøøw pøn jujky'ajttip xemikøjxp. Ngajpxkaxø'jkijxpy øts ja jam Dios Teety wyindump jøts jam y'ankilis wyindump. ⁶ Madowdi yikxon põni sã jaty ja Espíritu Santo tnøjmi ja janchja'wibitøjk pøn ejtip jam mã niwixujkpi kajp."

Yide'en ja Filadelfit jaq'y yiktanija'ayiyi#ñ ja ayuujk

⁷ Nijayi nayide'en øts ngugajpxy pøn ejtp jam mã øts njanchja'wibitøjk jam Filadelfia kajpjojp: "Yide'en ja wya'añ ja' pøn øy'ajtp wa'ats'ajtp, ja janchpi ja tiiby, nayide'en ja møk'ajtin tjagyepy jade'en ejxim ja rey David y'ijty yikutuky: Ku ja tuu' nyik'awa'ach ka' pøn mibaat tyik'awa'atst. ⁸ Nnija'wip øts tuki'iyi põni ti mdumpy. Tøts ja mduu' nyik'awa'ach midì ka' mibaat pøn tyik'adukt; øy ja møk'ajtin waani tøm xjagyepy tøts ja n'ayuujk xmøjpiptaajki, ka'ap ø tøm xkagupiky. ⁹ Jamts winaagin pøn nugo nadyejip israelit jaq'y jøts øts nja' ñadyijy xyiktuujni. Ka' tyiy'ajtin, taay ja pyiktakpy ku ja miku' yja' tyiktuujni, nay øts ndukupøkp jøts mwindsø'øgyit, m'ejxkapiyit ku mee ndsøky. ¹⁰ Tøm øts n'ayuujk xpaduujni ku øy tuda'aky mjaq'y'atti sã dø'øn nda'ane'emy, nayide'ents nbøkji'kpy n'ejxji'kpyts meets m'øy'ajtin. Jats yik'ext ku ja møk ayo'on ku ja tiidyu'unin ñaxkida'akt jøts ja payø'øyin tyunit pøn jaty tøm y'øy'atti yã naxwiñ. ¹¹ Me'emp øts tsojk. Yik'etim yøm mwinmaa'ñ jade'en sã tøm xpaduñ, ka' pøn mibaat ja Dios yja' mbøkxiyit. ¹² Pøni pøn tmimajadakp ja miku' yja', ja'ats møjtoqip mã ja Dios, nijuuni ja tkamajstu'uttit; nayide'ents meets ja Dios xyøøw ndawinja'att jøts ja kyajp midì yiktejp jemy Jerusalem, yø' tsoomp jam Dios wyingukp; ndawinja'apts meets njemxyøøw nayide'en. ¹³ Madowdi yikxon sã yøm Espíritu Santo tnøjmi pøn ja Dios ja'ajtip mã niwixujkpi kajp."

Yide'en ja Laodiceit jaq'y yiktanija'ayiyi#ñ ja ayuujk

¹⁴ Nijayi nayide'en øts ngugajpxy pøn ejtp jam mã øts njanchja'wibitøjk jam Laodicea kajpjojp: "Yide'en ja wya'añ ja' pøn tyakp ja tyi'ajtin, pøn tyiktso'ondakøjx tuki'iyi: ¹⁵ Nnija'wip øts tuki'iyi põni ti mdumpy, ku nugo ejxingøjxp øts nja' xpaduujni, ka'ap amumjoojt. iøy'ajtp ku tu'ugy xpadu'undit, põni ka'ats, majstu'utkts øts! ¹⁶ Kumi ka' xnijawidi põni midì ndunwandip, nugo mee møk xyikjotkixy, ndyimyajtstu'utwampy mee ne'egi. ¹⁷ Nømp mee mwa'añ jøts ku meets jotkujk xyiknaxy, ku niti

mgadigø'øxyi; ka'ats mnayjawiyi ku niti mga'ijtxyi, ku nugo wimbeets ku-goots xyiknaxy. ¹⁸ Yide'ents idø'øñ ja kajpxwejin nmøø'y, jøts ø x'amido'ot xpøktso'ot midi øts nmøøt'ajtpy, jade'ents xpaat ja øy'ajtin, ja wa'ats'ajtin jøts ja ja'gyujkin. ¹⁹ Jade'engøjxp meets ixyam møk n'ane'emy ku mee nba'ayø. Møk xwindanidit jade'en sam øts xmijotimbettit. ²⁰ Ejx ku meets ya ngugajpxi y'ity ya mdøk'agi'y; pøni pøn øts n'ayuujk xmadøjip jøts øts nja' xkupøjkit, ejtpts øts ja møøt n'ett. ²¹ Pøni pøn tmimajadakp ja miku' yja', møøts øts ja n'ett, jøts øts ja kutujk nmo'ot nayide'en sam øts ja Dios Teety tø xmøø'y ku øts ja miku' yja' nmimajadaajki, møøts øts ja Dios Teety n'ity. ²² Madowdi yikxon sa ja Espiritu Santo tnøjmi ja janchja'wibitøjk ma jam ja niwixujkpi kajp."

4

Sa ja Dios Teety yikajxa'aky jap tsajpjøtpy

¹ Ku tø jade'en y'ukjaty jøts n'ejxpaaty ja tsajp y'awa'adsis ejxim ja tøjkaawin; jøts ja ayuujk nmadøøy møk sam ja trompeta'an midi øts jawyeen xmigajpx, jøts øts xnimaay:

—Pat yam, jøts nnanky'ejxit tuki'iyi sa yjatwa'añ kyubatwa'añ.

² Tø øts wyinaty ja Espiritu Santo xatøki, kumaa'yjøtpy n'ixy jade'en tu'uk ja tsinaabyajt jap tsajpjøtpy ejxim ja møj windsøn yja'ajin, jamts chøøni tu'uk ja jaay' ³ midi jade'en kaxø'kp ejxim ja tsaa' midi janch tøø'kxp tsamamp, sa ja jasje tsaa, uk ja cornalina tsaa; jamts i'jch tø ñawidityi, jade'en ty'ikxy sam ja esmeralda tsaa. ⁴ Ma ja møj tsinaabyajt jam, jamts ø n'ixy ee'pxmaktaxk ja tsinaabyajt nawidity, jamts ja møjaa'dyøjk ni'ee'pxmaktaxk chøøni, amuum poop ja wyetti jøts tkujup'atti ja koroni janch amuum oori. ⁵ Møk ja anaaw ja widsujk pyidi'iky ma møj tsinaabyajt jam; nay jam wyingujkpi wixujk ja jøøn tyøøbyiky, ja niwixujkpi ja'win idø'øñ ja' midi ja Dios Teety møøt y'ity. ⁶ Nay jam møj tsinaabyajt wyindump kyaxi'iky tu'uk ja mejy, janch wa'ats janch tøø'kxp ejxim keega'an.

Jøts jam nayide'en ja møj tsinaabyajt ñawidityi namaktaxk ja jiyujk midi may ja wyeen tmøøt'ajttip, kaxø'kp yjøxki'py kaxø'kp wyindujy. ⁷ Ja myidu'ukpi jiyujk, jade'en ja kyaxi'iky ejxim tu'uk ja kaajin: ja myimajtskpi jiyujk, jade'en ja kyaxi'iky ejxim ja tsakaajin; ja myidigøøkpi jiyujk, jade'en ja wyeen ja y'aaaw kyaxi'iky ejxim ja jaay'in; jøts ja myimaktaxkpi jiyujk kyaxi'iky ejxim ja weejts kyakwidityin. ⁸ Tu'uk jaty ja jiyujk tudujk ja kyank tmøøt'aty, may ja wyeen nayide'en kyaxi'iky yjøxki'py jøts wyindujy; xinaxy tsunaxy ja Dios tja'myatsti jøts ñøm'etti:

Janch øy janch wa'ats me Dios Teety,

Mets tu'ugyi ja møk'ajtin mjagyeypy,

jøts xemikøjxp mjujky'aty.

⁹ Xjats ku ja jade'en ja nimaktaxkpi jiyujk ttundi, ku ja jade'en tja'myatsti ja' midi xemikøjxp ejtp, midi tsinaapy møj tsinaabyajt køjxp, ¹⁰ xjats ja ñi'ee'pxmaktaxkpi møjaa'dyøjk jaty ñagyuxendya'agyidi, jøts ja kyoroni tkiidyakti jam møj tsinaabyajt wyingujkpi jøts wyaa'andi:

¹¹ Mets Dios Teety, mets amuum møj sam pyaat'aty myikwindsø'øgit myikwinjawit.

Pø tøxi xyiktso'ondakijxy tuki'iyi mdsojkingøjxp jøts jade'en y'ett.

5

Ja nøky jøts ja Borreek U'nk

¹ Xjats n'ijxy ja' pøn jam tsinaapy møj tsinaadyajkøjxp ku jam tmach'ity y'aga'ngyøjø'øm tu'uk ja nøky abidity midi ja'ay jøtpy jøts ñikøjxp, wixujk weents ja cha'ayi, jøts ja jade'en y'aduky. ² Winets ø n'ijxy tu'uk ja møj ankilis jøts ja møk t'amidøy:

—¿Pøn paat'ajtip tyik'awa'atst yø nøky, jøts t'agø'øtstu'utt yø seeyi?

³ Nipøn ja tkanadyaja'ejxyi tyik'awa'atst, ni tsajpjøtpy ni naxwiñ ni naxpatkipy, nipøn ja tkawin'ejxwa'añ. ⁴ Xjats øts nyaaxni njiñi, nipøn kyayikpaaty pøn tyik'awa'atst ja nøky jøts yik'ext yiknijawit, nipøn ja tka'ukwin'ejxwani. ⁵ Xjats øts xnimaay ja møjaa'y tu'uk:

—Kidi mjanच्या'axy, jaa tu'uk pøn tnigubajk'ajtp ja Judajit jaa'y, jøts pøn ja rey David y'apip, yø'øts tøm myajada'aky jøts t'agø'øtstu'utt ja wixujkpi seeyi jøts tyik'awa'atst ja nøky.

⁶ Xjats ø n'ijxy tu'uk ja Borreek U'nk tyani mā møj tsinaabyajt jam, ja' kyujk'am mā ja møjaa'dyøjkti, jøts mā ja nimaktaxkpi jiyujk jam. Jamts ja yik'ijxy kyaxi'iky sam ti yjaty kyubety y'ayo'ombaaty. Wixujk ja wyaj tmøø'taty jøts wixujk ja ween; jade'en yø tujy yø wixujkpi ween sam ja niwixujkpi ja'win midi ja Dios tøm kexy ja naxwiñ. ⁷ Xjats ja Borreek U'nk tninijxy pøn wyinaty tsinaapy møj tsinaabyajtkøjxp jøts tøjki ja nøky midi wyinaty myøø'tajtpy y'aga'ngyøjø'øm. ⁸ Ku ja tpijky ja nøky, winets ja nimaktaxkpi jiyujk jøts ja ni'ee'pxmaktaxkpi møjaa'dyøjk ñagyuxendyajkidi jam Borreek U'nk wyingujk. Nidu'uk nidu'uk ja møjaa'dyøjk tmøø'tatti ja kow midi yiktejp arpi, jøts nayide'en tkondi ja poom tøy'i'i'ñ, tum oori ja', jade'en yø poom tujy sam ja Dios'ajot'ajtin midi jayjxtpit pøn jaty ja Dios Teety ja'ajtip. ⁹ Jamts yide'en ja jemy iij tyikwandøø: Mets idø'øn mbaat'ajtip yø nøky jøts yø seeyi xkøøtst; ja pø tøts xniwanguixy niduki'iyi ja jaa'y, o midi kajp o midi ayuujk, jade'engøjxp ku tøm m'ayo'ombaaty mā tøm mdsuñ tøm mdaxy.

¹⁰ Tø øøts xyikmøjtøki jøts øø nbadu'unt sam ja Dios tsøkyin, jøts øø nwindson'att ja naxwiñ'it.

¹¹ Winets ø n'ixy ja ankilis namay tn'awidetti mā ja møj tsinaadyajk jam, nay jamts wyinaty ja nimaktaxkpi jiyujk jøts ja møjaa'dyøjkti, ¹² møk y'øøwdi tum jade'en jøts wya'andi:

Janch øy ja Borreek U'nk midi tøm y'ayo'ombaaty, paat'ajtip jøts tpaatt ja møk'ajtin ja øy'ajtin, ja wejin ja kajin. Paat'ajtip yikwinjawit yikwindsø'øgit.

¹³ Xjats nmadøy nayide'en ku y'øøwdi niduki'iyi ja naxwiñ'it jaa'y jade'en tsajpjøtpy naxkijxy, jøts jade'en øy ja mā jøts wya'andi: Janch øy janch møj ja Borreek U'nk, paat'ajtip yikwinjawit yikwindsø'øgit xemikøjxp.

¹⁴ Xjats nayide'en ja nimaktaxkpi jiyujk wyandøø:

—iOts jade'en!

Xjats ja ñi'ee'pxmaktaxkpi møjaa'dyøjk niduki'iyi ñagyuxendyajkøxidi jøts twindsø'øgidi ja Dios.

6

Ja wixujkpi seeyi

¹ Jøts ø n'ijxy ja Borreek U'nk ku ja myidu'ukpi seeyi t'ago'otstu'uty ja wixujkpi seeyi, jøts nmadøøy tu'uk ja nimaktaxkpi jiyujk ku møk yjanchwina'añ jade'en sam ja anaawin, jøts yide'en wya'añ:

—iMen x'uk'ixy!

² Jøts ø n'ijxy tu'uk ja poop kawaay, pønts ja tyatsinaajyip, arki ja tu'uk pyagajpy. Tu'uk ja koroni yikmøøy ku tø myajada'aky ma tsep, tyun'adø'øtswampy jøts cho'ongojmi.

³ Xjats ja Borreek U'nk ja myimajtskpi seeyi t'agø'øtstu'uty, jøts ja myimajtskpi jiyujk wya'añ:

—iMen x'uk'ixy!

⁴ Jøts jadu'uk ja kawaay kyaxi'iky, tsajpts ja' ñine'kx. Pøn ja ttatsinaapy ja'ats yikmøøy tu'uk ja amøjtsujxyøn jøts yiktanipijky jøts ja cheptu'unt, jøts niduki'iyi ja naxwii'ñit jaa'y ñañibidøkøxyit, xem ja yam ñanky'oogiyidit, ka'ap ja jotkujk'ajtin ma.

⁵ Xjats ja Borreek U'nk ja myidigøøkpi seeyi t'agø'øtstu'uty, jøts ja myidigøøkpi jiyujk wya'añ:

—iMen x'uk'ixy!

Winets ø n'ixy tu'uk ja yøk kawaay, pøn ja ttatsinaapy, tati'yin ja wyejts'ijtpy kyøjø'øm. ⁶ Jats ja ayuujk nmadøøy jam ñimaktaxkpi jiyujk kyujk'am, ku wya'añ yide'en:

—Wimbatp nøjkx ja trigo jøts nayide'en ja cebada midi amuum tump; aceite jøts ja vino ka' wyimbatt.

⁷ Xjats ja Borreek U'nk ja myimaktaxkpi seeyi t'agø'øtstu'uty, jøts ja myimaktaxkpi jiyujk wya'añ:

—iMen x'uk'ixy!

⁸ Winets ø n'ixy tu'uk ja pu'ts kawaay, pøn ja ttatsinaapy ja'ats yiktanipøjk jøts ja yikjaa'y'oøkt. Ix'oøjk ja pyamiñi pøn tkudanaapy ja ayodaajk. Xjats ja yiktaguwa'anøø jøts tyik'ayo'ombaatt jawaani kagujkwa'kxy ja naxwii'ñit jaa'y, jade'en'ampyts ja tyik'oøkt ku tkaxt ja tsep, ja yuu, ja pa'am jøts ja awa'an jiyujk.

⁹ Jats ja Borreek U'nk ja myimagoxkpi seeyi t'agø'øtstuujty, jøts n'ijxy altajr patki'py may ja anmija'windi pøn tø tku'oogidi ja Dios yja'. ¹⁰ Ja'ats kajpxtip møk, jøts ja Dios yiknimaay:

—Janch øy janch wa'ats me Dios Teety, jøts xuñ ja tiy'ajtin. Juuninim xpayø'øty xiidyu'unt ja jaa'y pøn øøts tø xyik'øøky ya naxwiiñ.

¹¹ Jøts yikmøøy ja poop wet jøts yiknimaadyi jøts pyoo'kxtit y'awejxtitnim øy winø'ønin. Wan t'uknamyukyidi ja migu'uktøjk pøn tku'ookwajnipnim ja Cristo yja'.

¹² Xjats ku ja Borreek U'nk t'agø'øtstuujty ja myidudujkpi seeyi, xjats ja tsaachmøk uyx ñajxy. Jøts ja xøøw amuum yøk yjajty ejxim tu'uk ja yøk wetin, jøts ja po' tsajpts kyaxi'ijky ejxim ja wa'ats tsajpts ni'jpyin, ¹³ jøts ja maadsa' kya'y naxkijxy, jade'en ejxim ja tsaachmøk poj tyikajtskøøy ja ujts tøøm. ¹⁴ Jøts ja tsajp jadi'iñi ñawya'lkxkøjxniyi, jade'en ja yjajtni ejxim ja nøky jadi'iñi y'abidejtmuky, jøts ja kojpk jøts ja naajx midu mejy kyujk'am tuki'iyi tyigatskøjxni ma ja y'uk'ijty. ¹⁵ Xjats ja jaa'y kyakwidejtnidi, t'ixaabyi naxwa'knidi ja nayu'utstaajk, tyøjkiñøø tsaaj jutjøtpy tsaaj ankjøtpy øy ma. Jajttip ja windsøndøjk ja kumeendyøjk, ja møj ja mutsk. Jajttip ja soldadi wyindsøndøjk, nayide'ents ja jaa'y pøn mijuy kamijuy tundip. ¹⁶ Jøts wyañidi ku ayo'on jade'en t'ejxti:

—iWan ja kojpk wan ja tsaaj ne'egi xyik'o'jknindi jøts jade'en xka'ukwin'ejxna'ant ja' pøn jam tsinaapy møj tsinaabyajt køjxp, jøts nayide'en ja Borreek U'nk ka' x'ukmøø'ña'ant ja møj ayo'on!

¹⁷ Tøxi ja xøøw jade'en kya'pxy ku ja møj ayo'on jade'en yik'ijxy, nipøn ja jade'en tkamimajada'aky.

7

Ku ja Israelit jaa'y yikmø'øy ja ejxa'an pøn jaty ja Dios tyami'ejxip tyamidsojkip

¹ Ku ja jade'en yjajty jøts ø n'lijxy nimaktaxk ja ankilis ku ja wyinaty tyani naxwii'ñit eskiini køjxp, jamts ja poj ja t'axajtuky jøts ja møk poj niwine'en kyanaxkida'akt naxwiingyijxy mejkyijxy, jøts ja aay jøts ja kipy kyapojwidett.

² Jamts ø n'lijxy jadu'uk ja ankilis xøbidsimbyi myiñ, jap ja Dios syeeyi tmøøt'ajtti pøn xemikøjxp jujky'ajtp. Nay ja'ats møk tnimaay ja nimaktaxkpi ankilis midi wyinaty tø yiktanipiky jøts tuki'i'yi tyikwindigøøgyøxt tuktsajp'agida'aky, jøts wya'añ:

³ —Uk'awejxti. Kidi xkaxti ja ayo'on kunim øøts ja ejxa'an nbikta'akt jaa'y wyimbojkojxp nidu'uk nidu'uk, pøn jaty ja Dios yja' tpaduujnidip. Jaanims tyikwindigø'øty ja naajx, ja meyy jøts ja aay ja kipy.

⁴ Jade'en ø nnimadøty ku tukmagø'pxy ja wixijxxy myaktaxk mil tø yik'ejxandi ja israelit jaa'y pøn ja ñimakmajtskpi y'apteety'ajttøø.

⁵ Nimakmajtsk mil idø'on yik'ejxandi pøn tyatsk'apip ja møjaa'y Judá. Nimakmajtsk mil yik'ejxandi pøn tyatsk'apip ja møjaa'y Rubén jøts nimakmajtsk mil nayide'en pøn tyatsk'apip ja møjaa'y Gad, ⁶ nimakmajtsk mil yik'ejxandi pøn tyatsk'apip ja møjaa'y Aser, nimakmajtsk mil yik'ejxandi pøn tyatsk'apip ja møjaa'y Neftalí, nimakmajtsk mil yik'ejxandi pøn tyatsk'apip ja møjaa'y Manasés, ⁷ nimakmajtsk mil yik'ejxandi pøn tyatsk'apip ja møjaa'y Simeón, nimakmajtsk mil yik'ejxandi pøn tyatsk'apip ja møjaa'y Levi, nimakmajtsk mil yik'ejxandi pøn tyatsk'apip ja møjaa'y Isacar, ⁸ nimakmajtsk mil yik'ejxandi pøn tyatsk'apip ja møjaa'y Zabulón, nimakmajtsk mil yik'ejxandi pøn tyatsk'apip ja møjaa'y José, jøts nimakmajtsk mil yik'ejxandi nayide'en pøn tyatsk'apip ja møjaa'y Benjamín.

Ja møjaa'y pøn ja poop wet wyet'ajttip

⁹ Ku jade'en nnimadøty jøts ø n'lijxy janch may jaa'y nikyamachooni. Choondi o magajp, o ti ayuujk tkajpxti pøni sa jadu'uk ja nidu'uk ja kajp ja y'ayuujk tjagyepy; jam twindanidi mā møj tsinaabyajt jøts nay jam mā Borreek U'nk, poop wet wyet'ajttip jøts tixy'aay tkøñidi. ¹⁰ Niduki'i'yi dø'on tja'myatsti ja Dios jøts møk wya'andi:

Yø Dios Teety xyiknitso'ok'ajtim,
pøn jam tsinaapy møj tsinaabyajtkøjxp,
nayide'ents ja Borreek U'nk.

¹¹ Jamts ja ankilistøjk nawidity tnadanidi mā møj tsinaabyajt jam, mā ja møjaa'dyøjk jøts mā ja nimaktaxkpi jiyujk, jøts ñagyuxendyaajkidi ja' wyingujkp mā ja møj tsinaabyajt jam; møj tjanchja'myajtsti ja Dios, ¹² jøts wyandøø:

Nmøja'wip øøts, njanchja'wip øøts Dios Teety.

Mets ja møk'ajtin, ja ja'gyukin jøts ja øy'ajtin mmøøt'ajtpy xemikøjxp. Jade'en idø'on xemikøjxp y'ejxi.

¹³ Jøts nidu'uk ja møjaa'dyøjk wyaañ jøts x'amidøøty:

—¿Pøn idø'on yø'ødi ixja poop wetxøødi, mā dø'on yø choondi?

¹⁴ Jøts ø nnimaay:

—Mets møjaa'y, mnija'wip mets yø'.

Jøts ø xnimaay:

—Yø' dø'on jap tø ñaxti mā ja møj ayo'on jam, ja Borreek U'nk ñi'jpy tø yikpøkwyā'achidi. ¹⁵ Paty idø'on jam y'etti møj tsinaabyajt wyingujkp

mā ja Dios chøøni, jamts ja tpaduujnidi ja Dios yja' xinaxy tsunaxy; jøts ja pyøkjø'øgidit xemikøjxp ja' wyingujkp. ¹⁶ Ka'ap ja ayo'on t'uk'ejxnidit, kya'ukyu'ooknidit kya'uktøøjtsiñidit, ni an niti kya'ukpaajtniyidit, ¹⁷ jade'engøjxp ku ja Borreek U'nk t'ejx'ity jøts ttukpaatwa'añ ttuk'ejxwa'añ ja wa'ats nøø mididi xyikujky'ajtim xemikøjxp; nayide'ents ja Dios tyiktigø'ty ja yjotmay'o'jkindi.

8

Ja myiwixujkpi seeyi jøts ja poomdø'øy'ii'ñ mididi tum oori

¹ Ku ja Borreek U'nk ja myiwixujkpi seeyi t'agø'østuuju, jøts kujkp hora'an y'amongøjxti niduki'iyi jam tsajpjotp. ² Nay jatyi n'ijxy ja niwixujkpi ankilis mididi jam tanaadyip Dios wyingujkp ku ja yikmøødyi nidu'uk nidu'uk ja puxujx. ³ Jøts jadu'ukpi ankilis myiñ jøts jam tyanaay'øyiyi'ñ altajr wyingujkp mididi tum oori, poomdø'øy'ii'ñ ja myimeen, jamts yikmøøy altajr wyingujkp may ja poom, jade'ents ja altajrkøjxp ttawinjøjky; jøts jamts ja nayide'en y'ity y'amido'owin pyøktso'owin ja'adi pøn jaty ja Dios ja'ajtip. ⁴ Jøts ja poom jok jam yja'aty Dios wyindump møøt ja y'amido'owindi ja pyøktso'owindi pøn ja Dios tmøja'widip tjanchja'widip. ⁵ Xjats ja ankilis tnixajiyi'ñ ja poomdø'øy'ii'ñ jøts tpiktaajky ujts ja jøndsabajk mididi wyinaty altajrkøjxp, jøts tko'wididjty jam naxkøjxp; winets ja møk anaaw jøts ja widsuk y'adi'ich, jøts ja tsaachmøk ujj.

Ja niwixujkpi puxujx

⁶ Xjats ja niwixujkpi ankilistøjk tjøp'ejxti ttaxu'uxwa'andi ja puxujx. ⁷ Ku ja myidu'ukpi ankilis xyuujxy, jøts ja møk tuu myiñ jøts ja tøst jøts ja jøøn møøt ja ni'jpy ñaxkidaajky. Jade'en tyøøy ja naxwii'ñit jawaani kyagujkwa'kxy, møøt ja kipy møøt ja ujts kyudigøøy. ⁸ Ku ja myimajtskpi ankilis xyuujxy, winets yjawi tigati ñaxkidaajky jam mejyotp ejxim ja møj kojpkim, ja'ats jam tøøbyøjk; jøts ja mejy wyimbijty jawaani kagujkwa'kxy wa'ats ni'jpyin. ⁹ Jawaani kagujkwa'kxy ja jiyujk kya'ookøxti mididi jam wyinaty tsinaadyip, jøts ja barki nayide'en wyindigøøy. ¹⁰ Ku myidigøøkpi ankilis xyuujxy, winets tu'uk ja maadsa' tsajpwemp kyatska'ay, tyøøy jade'en ejxim ja møj jøønin. Naxkidaajky mā may ja møj nøø yø'ødyi jøts mā ja kom nøø pyidsimy. ¹¹ Ja'abi maadsa' txøøw'ajtp Ajenjo, jøts ja nøø ja tyikma'tnaa. May ja y'ooktøø pøn jaty ja t'uktøø, janch ta'am ja wyimbejtnaa ja nøø.

¹² Ku ja myimaktaxkpi ankilis xyuujxy, xjats ojts waani wyindigøøy ja xøøw, ja po' jøts ja maadsa'. Nayide'en ojts xyaachkugoodsigyijxy sam yø xøøw yø po' wyindigøøy.

¹³ Winets n'ejxpaaty tu'uk ja ankilis ñaxy tsajp kujk'am, jøts ja møk wya'añ: —iMeets naxwii'ñit jaa'y, mjanch'ayo'odip meets ku xmado'odit ja puxujx ku ttaxu'uxtity ja nidigøøkpi ankilis!

9

¹ Ku ja myimagoxkpi ankilis xyuujxy, jøts n'ijxy tu'uk ja maadsa', tø wyinaty ñaxkida'aky naxwingijxy. Xjats yikmøøy ja ñi'awaajts mā ja møj jut jam mididi nøjkxp ayodaajk. ² Xjats ja møj jut tyik'awaajch xjats ja jok yikxon jap pyidsimy sam møj orni jøtpyin; jøts ja xøøw tyikwingoodsiñaa, ni poj niti tka'ukyikyø'ñi. ³ Jajts jokjøtpy may pyidsømdi ja møj mu' jøts tuki'iyi ja naxwii'ñit twinguyø'øgyjxnāa; jade'en ja yikejxy sam ja kajpyin jøts ja naxwii'ñit jaa'y tyik'ayo'ombaatt. ⁴ Ka'ap ja jade'en tø yikexy jøts ja

aay ja ujts ja tyikwindigø'oty ya naxwiiñ. Ja' ja pyayø'opy pøn jaty ja Dios y'ejxa'anin tø kyabikta'agyi midì yikpiktaktip wyimbojkwemp. ⁵ Ka'ap ja jaa'y tjadyimiyik'øoky, ayo'on ja myøøpy jøts ja jajyi ja tøøyi tukmiba'am tsøøni magoxk pol'jin; jade'en ja pya'am ja tjawidi ejxim ja kajpy xøjpint. ⁶ Møk ja tjawidi, jadyimwyandip ja' jøts tyimy'ooktit; o kø'øm ñanky'ooigidit, ka'anims ja y'o'jkin kya'pxti.

⁷ Jade'en ja møj mu' kyaxø'økti ejxim ja møj kawaayin midì nay'a'ejxiyip tseptumbi nøjxktip; tum jade'en ja kyubajk kyaxø'økti koroni kujupy midì amuum oori, jøts ja wyeen ja y'aaw jade'en kyaxi'iky ejxim ja jaa'yin.

⁸ Jade'en ja wyaay tmøøt'atti ejxim ja tø'øxyøjkin, jøts ja tyøøjts jade'en t'ixy ejxim ja kaajin. ⁹ Tum pujx ja amuum y'ak'ajttip, jøts ku kyajkwidetti jade'en møk yikmadøy ejxim ja maakyareti midì kawaay myinøjxktip tseptumbi.

¹⁰ Jade'en ja tyu'tst tmøøt'atti ejxim ja kajpyin. Ja'ats ja tyukta'ayo'ombatpy ja jaa'y jøts tukmiba'am tsøøni magoxk po'. ¹¹ Jamts tu'uk ja ankilis midì tso'omp jap ayodaajkøtpy, ja'ats tniwindsøn'ajtp ja møj mu'; ja'ats txøøw'ajtp Abadón ja hebreit ayuujk, jøts ja griegit ayuujk Apolión midì tyijpy pøn yikwindigøøpy.

¹² Jade'en idø'on ja myidu'ukpi ayo'on ñajxy; naxkida'akpts ja mimajtskpi ayo'on.

¹³ Xjats ja myidudujkpi ankilis ttaxuuxy ja puxujx, winets pyidsiimy ja ayuujk jam nimaktaxkpi tsakaa waj agujk jam altajrkøjxp jam Dios wyingujk.

¹⁴ Xjats ja myidudujkpi ankilis yiknimaay midì ja puxujx tmøøt'ajtp:

—Migaji ja ñimaktaxkpi ankilis midì jamdi ma ja møj nøø midì yiktejp Eufrates.

¹⁵ Xjats ja jade'en yikmigajidøø jøts tyik'ookti jawaani kagujkwa'kxy ja naxwii'ñit jaa'y. Jabi a'ejxixi y'ejtni jøts ja jade'en yjattit ja'abi xøøw ja'abi jumøjt. ¹⁶ Namajtsk magø'pxy millones idø'on ja ankilis cheptumbi midì idø'on jade'en yikjaa'y'ooktip, midì kawaagyøjxpti.

¹⁷ Yide'en ø n'ijxy kumaa'yjøtpty ja kawaay, jøts ja' pøn ttatsinaadyip, pujx ja myøøt'ajttip kyachwiiñ, tsajpts, tsujxk jøts pu'ts jade'en ja kyaxi'iky. Ja kawaay kyubajk jade'en ja kyaxø'økti ejxim ja kaajin jøts ja y'aawjøtpty pyidsimy ja møj jønyow møøt ja jok jøts jøky. ¹⁸ Jøts jade'en'ampyts ja mayjaa'y y'ookøti, jawaani kagujkwa'kxy idø'on kyawindigøøgyøxtøø. ¹⁹ Ja'ats idø'on ja kawaay tya'awa'an'ajtpy ja y'aaw jøts ja tyu'tst; jade'en ja tyu'tst ja t'ixy tsa'ngyubajkin, jade'ents ja jaa'y ja tyik'ayo'ombaaty.

²⁰ Pønts jaaktandi ka'abyim ja tmajtsu'utti ja ka'ødyunk ja ka'øwyinmaa'ñ. Wyindsø'jkij'ejttip ja miku'tøjkti jøts øy ti awanax agojnax. Nayide'en twindsø'øgidi ja nugo dios agojnax midì oori øyip, midì plati øyip, midì bronze øyip jøts nayide'en midì kipy øyip, ka'ap ja y'ixy, ka'ap ja yø'øy, jøts ka'ap ja myadøy. ²¹ Ni jade'en ja tkamøjpiktaajky ku ayo'on tø yjinaxy, yik'ook'adichpim ja myigu'uk ja', jøts ja miku' tunk ttun'adø'øtsti, ñamyøøt'atyidi øy pøn møøt myigu'uktøjkti, jøts myaats'adø'øtsti.

10

Ja ankilis midì tkon'ejtp tu'uk ja mutsk libri'u'nk

¹ Kuts jade'en yjajty jøts ø n'ejxpaaty tu'uk ja møj ankilis. Yoots'agujk kyida'aky jam tsajpwemp jøts ja i'jch jam kyaxi'iky y'agubajk. Jade'en ja wyeen ja y'aaw t'ixy ejxim ja xøøw y'añin, jøts ja tyeky jade'en ejxim ja jønyowin. ² Jam tu'uk ja libri'u'nk tmøøt'aty jøts ja t'agiibyajky kyøjø'øm, jøts ja y'aga'ndyeky ttawinwa'aky ja mejy jøts ja y'anajtyeky naxwingijxy. ³ Jøts

ja chap'aay mək ejxim ja møj kaa myu'uyin jøts nay jatyi wixujk ojk ja anaaw pyijy. ⁴ İxyam øts wyinaty njaadyanwa'añ sa ja anaaw wya'añ jøts ø nmadøoy ja ayuujk midi kidakp tsajpwemp jøts ø xnimaay:

—Amaa'tsk'at yø' sam tø wya'añ yø anaaw, kidi xjaadyañ.

⁵ Jøts ja ankilis midi tuktamajndyegy tawa'kpajt ja mejy jøts jaduktamajndyegy ja naxwii'ñit, ja'ats y'aga'ngyø jam tkonjø'jk, ⁶ jøts ja tkajpxwa'kxy ja Dios tyiy'ajtin pøn tø tyiktso'ondakijxy tuki'iyi tuktsajp'agida'aky, jøts yide'en wya'añ:

—Ka' y'ukyø'øñit ja xøøw ja jumøjt; ⁷ kuts xyu'uxt ja myi'wixujkpi ankilis, tø wyinaty kya'pxy ja Dios wyinmaa'ñ midi ja'ayi tyuknija'wiyi'ñ ja kyugajpx-tyøjkti. Ka'ap ja o pøn nugo ajawi ttuknijawi.

⁸ Xjats ja ayuujk nayide'en nmadooojmi midi tsajpjøtpy tsoo'mp, jøts ja jadigojk xmigajpxkojmi jøts wya'añ:

—Nøjxk atspøjkit ja libri'u'nk midi jam agiibyaky kyii'y'ijtpy ja ankilis, ja' midi tanaapy mejkyøjpx jøts naxkijxy.

⁹ Jøts ja ankilis nninijxy xjats ja libri'u'nk n'amidøoy jøts ø xmo'ot, jøts ø xnimaay:

—İxya ja libri, mats jøts x'ixpøkt. Øy tsuj mnayjawiyit ku x'ixpøjk'okwa'ant, ku x'ixpøjkøxnit jøts ja jotmay'øøgyi xpatnit.

¹⁰ Xjats ja libri n'axajiyi'ñ jøts ja n'ixpijky, janch øy janch tsuj øts nja'wiyi'ñ, kuts ja nyikøxnaa ja libri, jøts ja jotmay'øøgyi xpatnaa. ¹¹ Jøts ø xnimaagyojmi:

—Kuwanı jadigojk xkajpxwa'kxt ja Dios yja' sa chøønıdıt sa tyanıdıt niduki'iyi ja naxwii'ñıt jaa'y, wan tmøji wan tmutski.

11

Namajtsk ja jaa'y pøn testigi'ajttip

¹ Jøts tu'uk ja kapy nyikmøoy midi yiktajepxp, jøts ø xnimaay:

—Tani jøts xkejpxit ja Dios chaptøjk møøt ja altajı, jøts nayide'en xmacho'ot pøn jaty jap twindsø'jkıp ja Dios. ² Ka'ap yø xkepıt yø tsaptøjk aaw, tsaptøjk øjx jøts ja tsaptøjk paa' ja'agøjpx ku wenk jaa'y myenwa'andi jøts jap wyıdettıt, jade'ents ja tyikma'attıt ma jaty ja wyıdettıt jap Dios kyajpjøtpy, wıxıjky myajtsk po' y'ettıt jade'en. ³ Ngaxp øts namajtsk ja ngugajpxy midi tum yøk wet twet'ajttıp, ja'ats xkajpxıp ja nja' tigøøk jumøjt jagujk.

⁴ Ja namajtskpi kugajpxy, jade'eñi n'ukpıktaajkin ejxim ja olıvi kipyın, jøts nayide'en ejxim ja majtskpi kandeleerı midi jam ejtp nwindson'ajtım wyıngujk. ⁵ Pøni pøn midundıgøøwyajınıp, yıkpidsoımdıp ja jøøn ja y'aawjøtpy, jade'eñıs ja myıdseptøjk tyık'ookøxtıt tyıkwindıgøøgyøxtıt. ⁶ Yø namajtskpi kugajpxy yjagyajptı ja møk'ajtın jøts ka'ukyıktunıt winøønin ja Dios yja' tkajpxwa'kxıdıt. Nayide'en ja nøø tyıkajtınıdıt wa'ats ni'jpyın, jøts tkaxtıt kawınaak jøøjp ja pa'am sa ja køøm t'a'ejxidıt. ⁷ Kuts ja jade'en tkajpxwa'kxkøxtıt ja Dios yja', winets tu'uk ja møk awa'an jıyujk pyıdsøømt jam ayodaajkotp jøts ja namajtskpi kugajpxy yık'oogıyıt. ⁸ Jamts ja oo'kpi jadı'ıñı ty'a'ant, jam ja wyıbejpnıt jam tuu' kujk'am, nay ja kajp ma ja nwindson'ajtım Jesucristo kyıruspejty. Nugo døøon jade'en yø kajp yıktıjy Sodoma jøts Egipto. ⁹ Tigøøk xøøw jagujk yık'ejtıt yıknıjawıdıt ja oo'kpi. Øy pøn jaa'y o magajp mye'endıt jøts ka' tnanıyıkpidı'ıgyı ja oo'kpi. ¹⁰ Xjats ja naxwii'ñıt jaa'y jade'en agujk jotkujk ñayjawıyıdı, janch nıxem nıyam o tı ñadyamay'atyıdı ja'agøjpx ku tø y'ooktı ja'adı pøn møk tø yık'ayo'ombaadyıdı pøn ja Dios yja' tkajpxwa'kxıdıp. ¹¹ Xjats ku myıdıgøøk xøøw jagujk'ajty,

winets ja Dios tyikjujkyiky jadigojk ja oo'kpi. Janch tsø'jkidøø ja'adi pøn jaty jam wyinatyi. ¹² Winets ja namajtskpi kugajpxy møk yikmigajpxti, tsajpjøtpy ja kyajpxy, jøts yiknimaydi:

—Pat yam.

Jøts chapajtnidi tsajpjøtpy yoots'aguikpy jøts ja myidseptøjk y'eixidøø ñija'wiyidøø. ¹³ Jøts nay jaty; ja møk uyx ñajxy, jøts wixujk mil ja jaa'y y'ookti ku ja kajp kyuja'wiyii'ñ kyujejtii'ñ. Janch tsø'jkidip ja' pøn jaty jaaktandøø, jøts ja Dios ja tjanchja'myajtsti mididi jap tsajpjøtpy.

¹⁴ Jade'en ja myimajtskpi ayo'on ñajxy; tsojks mye'ent ja myidigøøkpi.

Ja myiwixujkpi puxujx

¹⁵ Xjats ku ja myiwixujkpi ankilis ttaxuuixy ja pyuxujx, jøts møk yikmadøy may ja ayuuik jap tsajpjøtpy jøts wya'añ:

Ëxam ja kutujk ñaxkida'aky mididi ja Dios Teety jøts nwindson'ajtim Jesucristo yja'ajtip;

jøts xemikøjpx ja tyiktu'undit ma y'ijty ja naaxwii'ñit jaa'y yja' tyiktundi.

¹⁶ Xjats kyuxanidi jøts ñaxkowdi ja ni'ee'pxmaktaxkpi møjaa'dyøjk pøn jam tsinaadyip Dios wyingujk, jøts ja Dios tmøjawidi twindsøøgidi, ¹⁷ jøts yide'en wya'andi:

Janch møj me Dios Teety,

tu'ugyi me m'ity xemikøjpx.

Møj øøts nmøjawi ngunuukxyjawi ku tø xyikmajada'aky ja mmøk'ajtin

jøts ja mgutujk ma ja naaxwii'ñit jaa'y.

¹⁸ Jøts ja naaxwii'ñit jaa'y mmijot'ambikyiyi,

tø kya'pxy jøts ja ayo'on xmo'ot jøts nayide'en xidyu'unt ja oo'kpitøjk.

Jøts xmo'ot ja øy'ajtin pøn jaty ja mja' tø mbadu'unxiyi pøn jaty tø tkajpxwa'kxy wan tmøji wan tmutski.

Tø kya'pxy jøts nayide'en xyikwindigøøty pøn jaty tø tmidundigøy ja naaxwii'ñit jaa'y.

¹⁹ Xjats ja Dios chaptøjk y'awaajch jap tsajpjøtpy jøts yik'ixy ja kaaxi ma jap y'ity ja Dios kyutujk. Xjats ja møk uyx ñajxy jøts ja anaaw, jøts ja widsuk jøts ja møk tøtst ñaxkidaajky.

12

Ja tøøxyøjk jøts ja awa'andsaa'ñ

¹ Xjats winet kyaxi'iky tu'uk ja møj ejxpajt jam tsajpwemp: jamts tu'uk ja tøøxyøjk tyani po' kyubajkp. Jade'en yø møk chamamy sam ja xøøwin, jøts tkujup'aty tu'uk ja koroni mididi makmajtsk maadsa' tjagyajp. ² Jøtpyts ja tøøxyøjk wyinatyi, ka'axwampmts jøts møk ja y'u'nk ja yik'ayøyi jøts kyaxøøkt. ³ Winets jam tsajpwemp n'ijxy jadu'uk ja ejxpajt: jamts tu'uk ja awa'andsaa'ñ, amuum tsajpts ja ñine'kx jøts wixujk ja kyubajk, majk jaty ja wyaj nidu'uk nidu'uk ja kyubajk tmøø'aty, jøts ja koroni nayide'en tu'uk jaty tkujup'aty. ⁴ Jøts ja tyu'tst ttabajaa'xkijxy may ja maadsa' jam tsajpwemp, jøts naaxkijxy ja tñajtswøjii'ñ. Jam tyanaay'øiyii'ñ ma ja tøøxyøjk jam kya'axwa'añ jøts ja y'u'nk jaty; tsu'jtsit ku ja kya'axt. ⁵ Ka'ax ja', mixyu'nk ja', ja'ats nøjcx niwindsøn'aty møk'ampy ja naaxwii'ñit jaa'y. Xjats ja y'u'nk ja Dios tpojknaa jøts ja tyiknijxy ma ja møj tsinaabyajt jam; ⁶ jøts ja tøøxyøjk kyeejky, jøts jam ja ñøjkxni ma abak et, ma ja Dios jam wyinatyi ja y'et tø t'a'ejxi, jamts ja kya'aty agujk jotkujk, jade'ents jam chøønit tigøøk jumøjt jagujkp.

⁷ Xjats ku jade'en yjajty winets ja tsep tyuujni jap tsajpjøtpty. Ja møj ankilis Miguel møøt ja y'ankilistøjk minamyajtsi ja awa'andsaa'ñ møøt ja y'ankilistøjk ja' møøtmi. ⁸ Ka'ap ja myajada'aktøø ja awa'andsaa'ñ; ka'ap ja ma y'uk'etnibajtniyi tsajpjøtpty. ⁹ Jøts ja jade'en yikpawojpnaa, yikaxni naxwingijxy. Yø' dø'ø'n ja møj miku' windsøn midi yiktejp Satanás midi twin'øø'n ja naxwii'ñit jaa'y.

¹⁰ Winets nmadøøy møk ja kajpxy jap tsajpjøtpty midi yide'en wamp:

—Tø ja Dios ja naxwii'ñit jaa'y tyiknitso'ok'aty. Tøts ja myøk'ajtin tnanky'ijxyiyi jøts ja kutujk tmø'øy ja Cristo sa ttanitanit ja yjaa'y; tøts ja nayide'en tpawøpy ja' midi xinaxy tsunaxy tni'øø'nip jam Dios wyindump ja' midi tø y'ookti Dios køjxp. ¹¹ Tø tmimajada'akti ja miku' yja', ja'agøjxp ku ja Borreek U'nk tøkudsuni tkudaxi ja naxwii'ñit jaa'y, jøts ku tønigajpxkøxti sa tjanchjawidi ja Dios yja', wan tjaty pøni sa yjaty. ¹² Ejni xoni meets pøn jap tsajpjøtpty, jøts janch yik'ayow meets pøn ya naxwii'ñit tyiknajxtip. Tø meets ja miku' mnimee'n iyidi jøts awa'an'ampy mga'ødyunidit, ñija'wipxi ja' ku tsojk kya'pxt.

¹³ Xjats ku ja awa'andsaa'ñ tja'wiyii'ñ ku ja ya naxwii'ñ tø yikajxni, xjats ja tømøxyøjk ja tpayø'øy pøn ja y'u'nk wyinaty tø tyikaxi'iky. ¹⁴ Winets ja tømøxyøjk yikmøøy majtsk ja weejts myøjkajnk, jøts ja kyajknijxxy ma ja y'et ja jam abak etjotp. Jade'en ja tnikeyk ja awa'andsaa'ñ. Jamts ja kya'aty yjøø'kxt amgujuk jotkujuk tigøøk jumøjt jagujukp. ¹⁵ Jøts ja awa'andsaa'ñ ja møj kom nøø tyikpidsimiy y'aawjøtpty, jade'ents ja tømøxyøjk ja tyikjø'øtwa'añ; ¹⁶ jøts ja tømøxyøjk ja naxwii'ñit pyudøjkjyi. Møj et aaw awaajts, japts ja nøø jadi'iñi tyøtskøjxnaa. ¹⁷ Jade'ents ja awa'andsaa'ñ møk tmi'ambijky ja tømøxyøjk, jøts ja tmidsepiky ja y'ap ja y'ok. Jade'en idø'ø'n ja'adi pøn ja Dios yja' tpaduujnidip sam ja nwindson'ajtin Jesucristo tñigajpxy.

13

Namajtsk ja møj ka'ø y jiyujk

¹ Jam ø mejy'agø'ø'm nwa'k'øyyii'ñ jøts ø n'ijxy jam pyidsimiy tu'uk møj ka'ø y jiyujk. Wixujk ja kyubajk tmøøt'aty jøts majk ja wyaj. Tu'uk tu'uk ja wyaj tmøøt'aty ja koroni, jøts jam kyubajkøjxp yikja'ay ja letri midi ja Dios kya'øyya'wip. ² Jade'en ja kyaxi'iky ejxim ja møj kuxibyijyin, jøts ja tyeky kyaxi'iky ejxim ja osa'an, jøts ja y'aaw ejxim ja kaajin. Ja'ats ja awa'andsaa'ñ møøjyi tuki'iyi ja myøk'ajtin ja kyutujk midi ja wyinaty myøøt'ajtpy. ³ Jade'en ja kyubajk tu'uk kyaxi'iky ku janch møj tø chaachi, tyimiyik'ookwajnip. Ka'ats ja yik'o'jki, tsoojk ja'. Kuts ja t'ejxti ja naxwii'ñit jaa'y, ñigyumaap ja tja'widyøø xjats ja tpadundi ja yja'. ⁴ Nayide'ents ja tmøjawidi twindsø'øgidi ja awa'andsaa'ñ, ja'agøjxp ku wyinaty tømø'øy ja myøk'ajtin ja kyutujk ja møj ka'ø y jiyujk, jøts ja nayide'en yikwindsø'øgi. Yide'en ja wya'andi ja naxwii'ñit jaa'y:

—iPøn jade'en t'uktu'ump sam yø møj ka'ø y jiyujk, pønts jade'en ukma-jada'akp!

⁵ Xjats ja møj ka'ø y jiyujk yikmøøy ja tuu' jøts ja møk'ajtin jøts tjemnøjmit ttenøjmit ja Dios yja', wixijxxy myajtsk po' y'ett. ⁶ Jade'en idø'ø'n ja ttuuñ; tuki'iyi tñigajpxigøøy midi ja Dios yja'ajtpy jøts ja xyøøw jøts ja chinaadyaajk, jøts midi ejtp tsajpjøtpty, tuki'iyi ja yikmigajpxigøøgyijxy. ⁷ Nayide'en yikmøøy ja tuu' jøts tmøøtseptu'unt pøn jaty ja Dios yja' tpaduujnip kunim ja tmimajada'akt; jade'en ja kyutujk yikmøøy jøts tniwindsøn'att niduki'iyi ja

naxwii'ñit jaa'y. ⁸ Jøts ja naxwii'ñit jaa'y jade'en twindsø'egi ja møj ka'øy jiyujk, ja' tpadundip jade'en pøn jaty kajaabyety jap nøkyjōtpy kuuyip ja naxwii'ñit cho'ondaajky. Yø' nøky ja Borreek U'nk myøøt'ajtpy midit tø y'øøky adømgøjxp.

⁹ Øy yikxon madowdi. ¹⁰ Pøni pøn ja myigu'uk tsump, nayide'ents ja yiktsu'umt; jøts pøni pøn ja myigu'uk tyik'ookp, nayide'ents ja yjatt. Paty chøkyi mduda'akyjaa'y'attit jøts x'ajot'attit ja Dios sam pyaat'aty pøn ja Dios yja' tpaduujnip.

¹¹ Jøts jadu'uk ø n'ijxy møj ka'øy jiyujk pyidsimy naxjōtpy. Majtsk ja wyaj tmøøt'aty jade'en sam ja borreegi wajin, jøts jade'en kyajpxy sam ja møj awa'andsaa'ñ. ¹² Nayide'en ja kyutujk tjagyepy sam ja myiga'øy jiyujk midit ja kyubajk tsaachiyi'ñ, jøts yø tnøjmit ja naxwii'ñit jaa'y jøts yikwinjawit yikwindsø'egit. ¹³ Nayide'ents ja myilagri'ajtin tnanky'ijxyi, møj jøøn tyiktsøøñ tsajpwemp jøts naxkijxy tyiknaxkida'aky, jøts ja jaa'y ttuk'ixy wyemp amp. ¹⁴ Jade'en'ampy ja jaa'y twini'ñ ku myilagri'ajtin tnanky'ijxyi, xjats ja naxwii'ñit jaa'y tnimaay jøts tyik'øyit ja tsamaxan ja awanax midit t'ejxp jade'en sam ja møj ka'øy jiyujk midit tsaachiyi'ñ. ¹⁵ Xjats ja yikmøøy ja møk'ajtin jøts tyikjuykpyøkt tyikajpxt ja tsamaxan, pønsts ja kawindsø'jkijip, yik'ookp ja'. ¹⁶ Xjats nayide'en ja møj ka'øy jiyujk ja y'ejxa'anin tpiktaajky kyøjōm uk wyimbojkwemp tuki'iyi ja naxwii'ñit jaa'y, wan tmøji wan tmutski, wan tkumeen jaa'yi, wan t'ayoobi jaa'yi, øy ja yjawindsøndøjkidi, øy ja yjatumbitøjkidi. ¹⁷ Ka'ap pøn mibaat ti tjuy, ti tkajpxy, ti ttoøky, ku ja y'ejxa'anin tkamøøt'atti midit ja møj ka'øy jiyujk tø tpikta'aky. Ja' y'ejxa'anin'ajtpy ja xyøøw jøts ja ñumeri. ¹⁸ Yø'øbi numeri ka'ap yø o pøn tnijawi; ja' yø tnija'wip pøn yikxon t'a'ejxip. Yø jade'embis numeri, jade'en yø kyajpxy ejxim ja jaa'lyxøøwin, tudujk magø'pxy ja tugl'pxyudujk jade'en ja'.

14

Ku ja tukmagø'pxy wixijky myaktaxk milbi jaa'y y'øøwdi

¹ Kuts jade'en yjajty jøts ø n'ejxpaaty ja Borreek U'nk jam tyani kojpkøjxp ma yiktijy Siøn. Tukmagø'pxy ja wixijky myaktaxk mil ja jaa'y tmøødi pøn wyinaty wyimbojkwemp tø yikpikta'aky ja Dios Teety xyøøw jøts ja Borreek U'nk yja'ami. Ja'ats idø'øn ja y'ejxa'anin'ajttip. ² Jøts nmadøøy møk wyina'añ tsajpjōtpy ejxim ja møj nøø y'lichin jøts ja møk anaawin; jade'en yikmadøy wyinaa'ñ ejxim ja maagyow midit yiktejp arpi. ³ Jamts ja jemy'iy t'øøwdi ma ja møj tsinaabyajt jam, ma ja nimaktaxkpi jiyujk jam jøts ja møjjaa'dyøjkti. Nipøn ja'abi iy tkajaty, ja'ayi t'ajttip pøn nitso'ok'ajtti ya naxwiñ, tukmagø'pxy ja wixijky myaktaxk mil jade'en ja'adi. ⁴ Wa'ats øy tsuj yjaa'y'atti jøts ka'ap ja o pøn tø'øxyøjk tmøøt'atti, tu'ugyi tpadundi ja Borreek U'nk pøni ma ja ñijky. Yø' dø'øn ojts jawyeen ñadyamiyøxyidi ma ja Dios Teety jøts ja Borreek U'nk, jade'en yø ttanitso'ok'atti. ⁵ Ka'ap ja win'øø'nin, ka'ap ja taay'ajtin tjagyapti, øy tsuj wa'ats yjaa'y'atti Dios wyingujkp.

Kyugajpxy'atti ja nidigøøkpi ankilis

⁶ Winets ø n'ejxpaaty jadu'uk ja ankilis midit kajkwidejtp jam tsajp kujk'am. Ayuujk myimimpy jøts tkajpxwa'kxwa'añ sa ttanitso'ok'attit ja naxwii'ñit jaa'y o magajp o ma'ayuujk. ⁷ Jøts møk kyajpxy yide'en:

—Windsø'ogidi winjawidi ja Dios, tø kya'pxni jøts ja tūdyu'unin n̄axkidaknit. Jade'ents xwindsø'ogidit ja Dios pøn ja tsajp ja naajx tyik'øyiyi'ñ tuki'iyi.

⁸ Xjats jadu'uk ja ankilis pyamiñi midi waan:

—Tø ja møj kajp Babilonia wyindigøy, ja'agøjxp ku tuki'iyi ja naxwii'ñit twin'ñiñ jøts ttuktuñ sam ja kya'øyjaa'y'atti.

⁹ Xjats ja ankilis jadu'uk pyamengojmiyi, jøts ja møk nayide'en wya'añ:

—Pøni pøn ja twindsø'jkip ja ka'øy jiyujk jøts ja y'awanax, jøts jade'en yik'ejxa'andit wyimbojkwemp uk kyøjø'øm, ¹⁰ yø'øts ja ayo'on yikmo'odip ja'agøjxp ku ja Dios tø tyikjotma'atti; jade'ents ja jøøn jøts ja jøky tyukpaadidit tyuk'ejxidit Dios y'ankilis wyindump jøts ma ja Borreek U'nk jam.

¹¹ Xemikøjxp ja ayo'on jap t'ejxtit, nijuuni ja poj xyuxy'ajtin tkapaajtidit. Xinaxy tsunaxy ja y'letti pøn tø twindsø'ogidi ja ka'øy jiyujk jøts ja y'awanax, sam ja tø yik'ejxandi nidu'uk ja nidu'uk. ¹² Jade'ents yø chøkyi jøts møk y'ettit tyuda'aky'attit pøn ja Dios ja'ajtidip jøts ja y'ana'amin tpaduujnidi, jøts pøn ja Jesús møøt tu'ugyi ettip.

¹³ Winets nmadøøy møk kyajpxy tsajpjøtpy jøts ø xnøjmi:

—Ja' ya'at: “Pyaattipts ja øy'ajtin xondaajkin ku y'ookitit tyigø'odyit pøn ja nwindson'ajtim Jesucristo tjanchja'widip.” Nayide'en ja Espiritu Santo wya'añ jøts y'ejtñit ejtñi xoni jøts ja y'øy'ajtñin pyudøkiyit nayide'en.

Sa ja Dios ttūdyunwa'añ ja naxwii'ñit jaa'y

¹⁴ Xjats ø n'ejxpatkojmi, jam ø n'ixy tu'uk ja jaa'y chøøni poop yootskøjxp, koroni kyujup'ajtpy midi tum amuum oori, jøts ja møj tsujx tkap'ity. ¹⁵ Jøts jadu'uk ja ankilis pyidsimy ma ja Dios chinaadyaajk jøts møk tmigajpxy midi jam yootskøjxp tsinaapy:

—Kajpjø'øk yø tsujx jøts xyikpidø'økt yø pikta'aky; tiempi yø' jøts pyidø'knit, tø yø myijaani yø pikta'aky midi naxwii'ñit'ajtp.

¹⁶ Xjats ja' midi tsinaapy yootskøjxp, nay jatyits ja møj tsujx ttao'otmujky ja pikta'aky.

¹⁷ Xjats jadu'uk nayide'en ja ankilis pyidsimy ma ja Dios chinaadyaajk jap tsajpjøtpy, jam tu'uk ja møj tsujx janch jøøjp nayide'en tkapi. ¹⁸ Altajr wyingujkp jadu'uk ja ankilis chøøñ midi t'ejx'ejtp ja jøøn jam altajrkøjxp. Ja'ats møk tyajxiyi'ñ midi ja tsujx tmøøt'ajtp, jøts tñimaay:

—Kajpjø'øk yø møj tsujx jøts xyikpidø'økt yø uvi tsa'am kumi tø yø myijaani.

¹⁹ Jøts ja ankilis ja tsujx tyiktuuñ naxkijxy, jade'ents ja uvi tsa'am tyikpidi'jky, japs ja t'abøjkii'ñ y'abøjk'ii'ñjøtpy ma yikmøø'kxt, jade'en idø'øn yø tijy ku ja Dios møk ja ayo'on tyiknaxkida'akt. ²⁰ Jam kajp wingon ja uvi tsa'am yikmi'kxy, jøts ja ni'jpy kom'ampy pyidsimy. Kawaay y'aawgijxy ja yja'aty jadine'en ja kyøjki, jøts yø'øy tigøøk magø'pxy kilometri.

15

Ja wixujk ayo'on midi ja ankilistøjk yikme'endip

¹ Kuts jade'en yjajty jøts n'ixy tsajpwemp jadu'uk ja ejxpajt, janch adsø'jkibim: jade'ents ja niwixujkpi ankilis tñimiñ ja wixujkpi ayo'on midi tø yiktanipiky, kuts ja ayo'on n̄axt jade'ents ja Dios y'ambøjkin yjøpkøxt.

² Jøts ø n'ejxpaaty tu'uk ja mejy janch wa'ats, janch tøø'kxp, jønyowin kyaxi'iky. Jamts mejy'agø'øm tyanidi niduki'iyi pøn tø tkabadundi ja ka'øy jiyujk yja' jøts ja y'awanax, sam nayide'en ja ñumeri tø tkagupøjkidi. Jamts

ja kow ja tmøøt'atti midì ja Dios tømøø'øyi. ³ Jøts ja t'øwdi ja møjaa'y Moises y'i'y pøn ja Dios kyugajpxy'ajt, jøts ja t'øømidì ja Borreek U'nk yja', midì nømp: Tu'ugyi me Dios Teety ja møk'ajtin xjagyepy.

Jøts midì tømøø'øyi, janch øy janch tsuj jøts kamidaabyaadyim; janch tiy'ajtin ja' midì mdumpy midì mbiktakpy, jøts xnideety'aty xnimøjaa'y'aty ja naxwii'ñit jaa'y.

⁴ Pøn Dios Teety mga'uktsø'øgiyip, jøts pønts mga'ukwindsø'øgiyip? Pø tu'ugyixi mets mwa'adsi.

Mwinjawiyip mjanchjawiyipts niduki'iyi ja naxwii'ñit jaa'y, ja'agøjxp ku mdiy'ajtin xnanky'ijxyi sà mduñ sà mbiky.

⁵ Nay winets ø n'ejxpaajy ku ja Dios chinaadyaajk y'awajch jap tsajpjøtpy mǎ yikpøjki'iky ja Dios kyutujk. ⁶ Nay japts pyidsømdì ja niwixujkpi ankilis midì myimendip ja wixujkpi ayo'on. Ja' wyet'ajttip ja øybi wet midì janch tømø'kxp janch tsamamp. Midì chum'ajtpy, amuum oori ja', kyachwiiñ ja chum yja'aty. ⁷ Nay winets ja ñamaktaxkpi jiyujk nidu'uk ja niwixujkpi ankilis tmøøy kitu'uk ja kopi midì amuum oori. Ujts ja ayo'on ja tmøøt'aty midì ja Dios yajkpy, midì xemikøjxp jujky'ajtp. ⁸ Jøts nayide'en mǎ ja Dios chinaadyaajk tøm ja jok kawinø'on jap tøm tya'tspøjknì. Ja Dios myøk'ajtin jade'en adøtsp jøts nipøn jap mibaat kya'uktøjkiñi kunim yjøpkøxt ja wixujkpi ayo'on midì ja niwixujkpi ankilis yiktamigajxidip.

16

¹ Kuts jade'en yjajty xjats nmadøøy møk kyajpxy jap mǎ ja Dios chinaadyaajk, xjats ja niwixujkpi ankilis tnimaay:

—Nøjkx atsyiktawaatstìt yøm wixujkpi kopi jam naxwingøjxp, ja ayo'on yøm myøøt'ajtpy midì ja Dios yajkpy.

² Winets ja myidu'ukpi ankilis tyiktawaajch ja kyopi jam naxwingøjxp, jøts ja jaa'y pyatkøjxniyi ja tsamaax jøts ja ka'øbyu'uts. Ja' jajttip niduki'iyi pøn ja ka'øy jiyujk ja y'eja'anin tmøøt'ajttip jøts pøn twindsø'jkidip ja y'awanax.

³ Xjats ja myimajtskpi ankilis mejyotp ja kyopi tyiktawaajch, jøts ja yjajtnaa wa'ats ni'jpy ejxim ja jaa'y ni'jpyin ku pøn chaachi, jøts ja y'oo'køjxni niduki'iyi midì jaty jam tsinaapy mejyotp. ⁴ Jøts ja myidigøøkpi ankilis ja kyopi tyiktawaajch møj nøøjotp jøts mǎ jaty ja nøømu'ut. Nayide'ents ja wyimbejtnimaa wa'ats ni'jpy. ⁵ Winets nmadøøy ja ankilis midì tniwindsøn'ajtp ja nøø ku wya'añ:

—Me Dios Teety, tiy'ajtin ku jade'en xuñ. Janch øy janch wa'ats mets, jøts xemikøjxp me m'ity, ⁶ ja'agøjxp jade'en yjatti ku mets ja mjanchja'wibitøjk yik-jemdundi yiktedundi, tøm tyik'ookti, kawinø'on tøm tyiktsuñ tyiktaxy. Paty mets ja nøø xyikwimbejtni wa'ats ni'jpy jøts yøm t'uukti; jade'ents yøm pyaat'atydi.

⁷ Nmadøøy nayide'en ku jap altajrwimpy kyajpxy yide'en:

—Mets Dios Teety, tu'ugyi mets ja møk'ajtin xjagyepy, ku naxwii'ñit jaa'y jade'en tøm xpayø'øy, tiy'ajtingøjxp idø'on ja tøm xuñ.

⁸ Jøts ja myimaktaxkpi ankilis tyiktawaajch ja kyopi jam xøøw wyingøjxp, jøts ja xøøw ja myøk'ajtin tpijky, jøts ja jaa'y chaaba'oo'kniyi ja xøø'an.

⁹ Øy ja kawinø'on ja xøø'an yjatsa'yidi ni jade'embaats ja wyinmaa'ñ ja tkayiktigatsti. Ni jade'embaat ja Dios tkaja'myatsti ku ayo'on tja'ejxti, ne'egi ja Dios tmigajpxigøy'adø'øtsti.

¹⁰ Jøts ja myimagoxkpi ankilis tyiktawaajch ja kyopi mǎ ja møj ka'øy jiyujk ja myøjtsinaabyajt jam, jøts tuki'iyi kyoodsigyijxy winø'ømbaat t'ane'emy ja yjaa'y. Øy ja ayo'on ja møk tja'ejxti, jadi'iñits ja tjantyimyimajada'akti. Nugo

ja tyoojts ja tjanch'ats'uutsmukti; ¹¹ ni jade'embaats ja tkamajtsu'uty ja kya'oy'ajtin midi ja tyundip, ne'egi ja tmigajpxigoy'adø'øtsti ja Dios pøn jap tsajpjøtpy, ja'agøjxp ku ayo'on ja jade'en ttuk'ijxy.

¹² Xjats ja myidudujkpi ankilis tyiktawaajch ja kyopi møj nøjøtp midi yiktejp Eufrates. Ku jade'en ttuun' jøts ja tyijch, jøts ja tuu' jam y'awaajch, jøts ja møj windsøndøjk jam ñajxti midi tsoo'ndip xøøbidsimdsø'ampy.

¹³ Winets ø n'ijxy ku ja miku' pyidsimy jap awa'andsaa'ñ y'aawjøtpy. Nayide'en pyidsømi jap møj ka'oy jiyujk y'aawjøtpy, jøts nayide'enmi jap kugajpxtyøjk y'aawjøtpy midi nadyejidip ku ja Dios tkugajpxy'atti jøts twindaay'atti nugo ja jaa'y. Nidigøøk ja miku' jade'en pyidsømdi ejxim ja pokleenin. ¹⁴ Yø'øbi miku' jade'en ja møj ejxpajt ñanky'ejxip jøts niduki'iyi ja møj windsøndøjk tyiknamyukøxwa'añi pøn ya naxwiiñ. Jade'ents ja tsep t'a'ejxidit ku ja xøøw tpaatt jøts ja Dios tmime'ent ja myøk'ajtin midi ka' pøn tmi'abaaty. ¹⁵ Yide'en ja Dios wya'añ: "Ukmadowdinim, adsu'uky ø nme'ent ejxim ja maa'tspa'an, nipøn tkanijaw. Tya'oy'ajttip ja Dios kyunuu'kxin pøn nay'ejx'ejtidip nabyøk'ø'kidip. Ka'ap øts xmidsø'ødyu'unt ku nme'ent." ¹⁶ Jøts ja møj windsøndøjk ñamyukøjxidøø ma jam hebreo ayuujk tejt Armagedón.

¹⁷ Xjats ja myiwixujkpi ankilis tyiktawaajch ja kyopi pojotp jøts yikmadøøy møk kyajpxy midi tsoo'mp jap tsajpjøtpy ma ja Dios chinaadyaajk, jøts wya'añ:

—Tø y'oyigyixy jøts tyunit jøts yjatit.

¹⁸ Jøts møk ñaxkidaaiky ja widsuk, jøts wyinanguejky ja anaaw, jøts ja tsaachmøk uyx myiñi midi ka'anin windii yik'ijxy yiknijawi ya naxwiiñ. ¹⁹ Xjats ja møj kajp Babilonia y'ajaabajky tigøøk ween. Jade'en'ampy jade'en ja Dios tyuñidi ku ja kya'oyjaa'y'atti jøts jade'en ambøjkin'ampy tyukji'kxyidi ja ayo'on. Tuki'iyi ja kajp wyindigøøgyixy jøts yjaajø'kijxy ya naxwiiñ. ²⁰ Wyindigøøgyixy ja naajx midi jam mejkyujk'am jøts ja kojpk nayide'en yjajty. ²¹ Nayide'en ja jaa'y pyajtigøøjyøø ja tøtst midi je'mch'ajtp wixijkxy kili tu'uk tu'uk. Ni jade'en ja jaa'y tkaja'myatsti ja Dios øy yø sa wyan'adø'øtsti, øy ja ayo'on møk tø yjayikmo'odi.

17

Ku ja ka'ødyø'øxy tø pyajtniyi ja myiwini'øø'mbi

¹ Kuts jade'en yjajty, jøts myiñi nidu'uk ja ñiwixujkpi ankilis midi tmøøt'ajttip ja wixujkpi kopi, jøts ø xnimaay:

—Men, jøts ø n'uktuk'ext sa y'ayo'ombaatt ja ka'ødyø'øxy pøn jam tsinaapy mejwyngøjxp. ² Yø møj windsøndøjkti pøn ya naxwiiñ, tø yø tmøøtpøkyundi yø ka'ødyø'øxy. Jade'ents ja naxwii'ñit jaa'dyi tø ttuktuñ ttuknijawi ja kya'oyjaa'y'ajtin, jøts jade'en tu'ugyi tø yikwin'øø'nidi.

³ Nayi kumaa'yjøtpy ja Espiritu Santo xuk'ijxy ku øts ja ankilis xyiknijkxy jam møj abak etjotp, jamts ø n'ijxy tu'uk ja tøøxyøjk ttatsøøni tu'uk ja møj ka'oy jiyujk, tsajpts ja' jøts wixujk ja kyubajk, majk ja wyaj tmøøt'aty, amuum nija'ay ja y'ak midi kya'ødyamigajpxy ja Dios. ⁴ Jøts ja tøøxyøjk ja wyet twet'aty tsuu'nk jøts tsajpts, amuum oori xyox'ajtpy, jam n'ijxyimbi nga'ijxyimbi. Jamts ja kopi tu'uk tmach'ity midi amuum oori, ujts ja kopi nayide'en tmøøt'aty midi kyada'oyjaa'y'ajtpy; ⁵ jøts wyimbojkwemp ja letri tmøøt'aty midi ka' nugo ajawi yiknijawi. Yide'en ja tijy: "Ja møj Babilonia midi tnigubajk'ajtp ja ka'ødyø'øxyøjkti, ja ka'ødyunk jøts ja ka'øwynmaa'ñ." ⁶ Jøts nay jatyi n'ijxy ku ja ka'ødyø'øxy myu'ugyi, ja ni'jpy tam ja muujkjp

pøn ja Dios ja'ajtip ku ja Jesús yja' tø tku'oogidi. Nigyumaap njawu ku jade'en n'ijxy. ⁷ Xjats ja ankilis xnimaay:

—¿Tiku nigyumaap xjawu? İxyam n'uktuknijawit sudso'ampy idø'on yø jade'en tijy yø tø'øxyøjk jøts yø ka'ø'y jiyujk midi ja tø'øxyøjk tyatsinaapy, midi wixujk ja kyubajk jøts majk ja wyaj. ⁸ Yø ka'ø'y jiyujk midi İxyam m'ijxpy, jekyuj yø jaayi y'ijty. Ka'ap yø İxyam ma y'ukyik'ejxni; øy jade'en tø yjaty, pidsømgøjimip jap ayodaajkjøtpy jøts ñøjkxt ma wyindigø'øty xemikøjxp. Jøts ja jaa'y pøn ja xyøøw kayikja'ay jap nøkyjøtpy ma jap y'ity ja jaa'xyøøw midi jujky'ajttip xemikøjxp, yø'øts nigyumaap tjawidip ku ja t'ejxkojmidit ja ka'ø'y jiyujk ku ja nay jaa yjujky'aty.

⁹ Ukmadow yikxon midi ndukmadowampy: Yide'en yø wixujkpi kubajk twandijy yø wixujkpi kojpk ma yø tø'øxyøjk chøøni. ¹⁰ Nayide'en yø wixujkpi kubajk twandijy niwixujk ja windsøndøjkti. Tø wyindigøy nimagoxk, jøts nidu'uk İxyam wyindsøn'aty, jøts jadu'uk ka'anım ja myiñ. Kuts ja mye'ent, ka'ap ja jeky y'ett. ¹¹ Jøts ja ka'ø'y jiyujk midi ya ejt naxwiiñ jøts ka' İxyam ma y'uk'ejtni, ja' idø'on etp myiduktujkpi windsøn. Ja' idø'on ndejint yjapatpy ja ñ'wixujkpi windsøn pøn øy sa tø yikajpxpaaty, jøts jade'eñi ja kyudigø'øyin ñaxt.

¹² Ja majkpi waj midi tø x'ixy, ja' wyandijpy nimajk ja windsøndi, ka'anım İxyam ja kutujk yiktanipøkti; pyøktiıps ja kyutujk jøts tu'uk hori ja'ayi møøt wyindsøn'attit ja ka'ø'y jiyujk. ¹³ Tu'ugyi ja wyinmaa'ñ tyik'etti yø nimajkpi windsøndi jøts tmo'odit ja myøk'ajtin ja ka'ø'y jiyujk. ¹⁴ Xjats møøt cheptu'undit ja Borreek U'ñk, mimajada'akidiıps ja' ja'agøjxp ku møk ja myøk'ajtin tjagyepy; nipøn ya naxwiiñ kyajade'eni, pøn ja møøtti køøm ja Dios Teety ja tø wy'i'ijxyidi jøts ja tø yajxiyidi, myiduda'aky'ajttip ja'.

¹⁵ Jøts ja ankilis nayide'en xnimaay:

—Yø mejy midi tø x'ixy ma yø tø'øxyøjk chøøni, yø' wyandijpy niduki'iyi naxwii'ñit kajp. ¹⁶ Jøts ja nimajkpi windsøndøjkti midi wyandijpy ja ka'ø'y jiyujk wyaj, ja'ats kyadami'ejxiwyampy ja ka'ø'dyø'øxy jøts tyiktuu'duktıt; jøts jade'eñi tyikwindigø'ødyit jønjøtpy. ¹⁷ Tundi jade'en sam ja Dios køøm tø mwınmaa'nmyø'øyidi sam ja køøm ttsøky, paty tkajpxmuktıt ja windsøndøjk jøts ja kyutujk tmo'ot ja ka'ø'y jiyujk kunım yø ttu'undit jade'en sam ja Dios tø ttanıbıktaagi. ¹⁸ Yø ka'ø'dyø'øxy pøn tø x'ixy, jade'en yø sam yø møj kajp Babilonia midi niduki'iyi ja naxwii'ñit ja windsøndøjk y'ane'empy.

18

Ku ja møj kajp Babilonia wyindigøy

¹ Xjats ku jade'en yjaty winets n'ijxy tu'uk ja ankilis ku ja tsajpjøtpy kyidaajky, møk ja kyutujk tmimiñ jøts ja naxwii'ñit tyikjajtaajky ku ja møk tyi'ıkxy chamamy. ² Xjats ja ankilis møk kyajpxy jøts wya'añ:

—Tø ja møj kajp Babilonia wyindigøy. Miku' tsinaadyaajk tø wyımbejtıni jøts tum ja ka'ø'y jiyujk jam tsinaadyıp. ³ Ja'agøjxp jade'en yjajty ku ja naxwii'ñit jaa'y tø ttukpaduñ ja kya'ø'y'ajtin. Tø ja windsøndøjk møøt y'øyjaa'y'aty kya'øyjaa'y'aty. Pønts atstooktıp atsyaktıp tø ja ttamøktøjkiñidi ku ja ttooktı midı yiktundıp ja pøkyumbı.

⁴ Xjats ø nmadøøy jadu'uk ja ayuujk midi tso'omp tsajpjøtpy, xjats wya'añ:

—Pidsømdi meets jam kajpjøtp pøn jaty ø nja'ajtpy. Kidi nugo ja pøky xpaatti jøts kidi nayide'en ja ayo'on nugo xpaatti. ⁵ Tø yø jade'embı kajp ja pyøky ñıpaıtnı, xjats ja Dios ka' tjä'dyigøy ku jade'en kya'øyjaa'y'atti. ⁶ Wan

yø tjaty nayide'en sam yø tø tka'ødyuñ ja naqxwii'ñit jaa'y. Wan jawaani møj tkubety ja kya'øy'ajtin. ⁷ Pø øyxi ñamyikejxyi, møj ñayjawiyi, wants t'ixy tñijawi nayide'en ja ayo'on. Wampts ja' y'am yjotp: "Windsøn'ajtpyim øts ixyam; ka'ap ø nmay ndajy sam ja ku'økyø'øxyin, ka'ap ø sa njatt." ⁸ Ja'agøjxp tuktoñi nøjx ñaxkida'aky mayjøøjp ja ayo'on: ja o'jkin, ja yuu, ja pa'am, jøts nayide'en nøjx tuki'iyi tyøøyjø'køxti; ja Dios janch møj ku ja ayo'on jade'en myo'ojidit.

⁹ Jøts ja naqxwii'ñit windsøndøjkti tpaya'axtit tpajø'ødit ja kajp ma ja tø pyøkyundi, ku t'ejxtit ku ja tø yjønmajsniyi, jøts ja jok nugo pyidø'kni.

¹⁰ Jagam ja tsø'øgi y'a'ejxuktit, ja ku ja nayide'en yjattit, jøts yide'en wya'andit:

—iMjanch'ayøøy meets Babilonia! Janch møk ja møk'ajtin y'ity xmøø't'atti. Pø tøxi tuktoñi mwindigoy.

¹¹ Nayide'en ja too'kpi ajuubyitøjk, pyaya'axtip ja', ja'agøjxp ku ka' pøn jade'en y'ukjuuñit sam y'ijtyin, ja tyøøky myimaadyip myidajtip ti jaty ja myøø't'ajttip: ¹² jap oori, jap plati, jap n'ijxyim nga'ijxyim, jap ja øybi wet, tsuu'nk jøts tsajpts; jap nayide'en mayjøøjp ja kipy midi pa'akxukp, jap tsaadsech tsaagueegidi, jap bronze jøts ja nugo pujx, ¹³ japts nayide'en ja kanela, to'kx tsøøy, poom, mirra, jøts ja pa'akxukpi, jap ja vino, aceite, y'øybi ariin way jøts ja ariinbajk; jap nayide'en ja jiyujk midi tsmchømp, jap ja borreegi, jap ja kawaay jøts ja karreti. Nay jap ja tumbi jaa'y tyøøgyi pøn tundip sam ja jiyujkin. ¹⁴ Xjats ja too'kpitøjk wya'andit:

—Tø wyindigøøgyixy tuki'iyi midi y'ijty mdsojktip; tø tyigøøgyixy ja mgumeen'ajtin ja mjujky'ajtin, nijuuni jadigojk kya'ukyikpatnit.

¹⁵ Jøts ja too'kpitøjk, tsø'jkidip ja', jøts jagam y'a'ejxuktit ku nayide'en y'ayo'ombaattit, pyaya'axtip pyajø'ødip ja', ¹⁶ jøts wya'andit:

—iMjanch ayøøy meets Babilonia kajp! Janch tsuj meets mgajp y'ijty sam tu'uk ja tø'øxyøjk tsuj ñaxyøxyin, ku øybi wet tpikta'aky wan tsuu'ngi wan tsajptsi, kuts o midi'ibi xox tpikta'aky wan ja oori jøts ja tsaadø'kxpi. ¹⁷ iPø tøxi tuktoñi kyugøxi ja mgumeen'ajtin ja mjujky'ajtin!

Jøts nayide'en pøn jaty jam tundip barki jotp, jagamyi ja tyandøø. ¹⁸ Jøts t'ejxpaa'ttøø ja jok ku tø tyøøbyøjkni ja kajp, jøts møk wyandøø:

—iNimā jade'en ja kajp ejxim ya'at tø y'ityin!

¹⁹ O sa yja'adø'tsnidi o sa ñadyu'uniiyidi, ja' møk yja'widip ku ja kajp jade'en jyaty, chap'aawdi, jøts wya'andi:

—iMjanch'ayøøy mee Babilonia kajp! Ja mgumeen'ajtin ja mjujky'ajtin øø tø ndamajada'aky pøn jaty ja barki tmøø't'ajttip yam mejyjøøjty, jøts jotmøñ tø mdyimgyudigøødyi!

²⁰ Taxonda'akti meets pøn jap tsajpjøtpy, meets kugajpxtyøjk, meets janchja'wibitøjk, pø tøxi ja wyindigøy ja ka'øgyajp jøts jade'en ja Dios tø tpayø'øy ku tø myika'ødyundi.

²¹ Xjats tu'uk ja møj ankilis tkijyi'iky tu'uk ja amuum møj paandsaa jøts ja mejyjotp tkuwibejpiyi'ñ, jøts ja wya'añ:

—Jade'en yø Babilonia kajp wyindigøy ejxim yø tsaa yikuwibejpi mejyjotp, jøts nijuuni xøøw kya'ukyik'ejxnit. ²² Nimā jadigojk ti kya'ukyikmadooni kajpjøøjty ja xuxpi ja kowbi; nimā pøn ti tka'uktundi, nimā pøn kya'ukjōtsnidi. ²³ Niti jaj niti tøø'kx kya'ukaxø'kni jøts niti jade'en kya'ukyikmadooni sam ti y'ityin xyødundi. Tø yø kajp wyindigøy, øy ja too'kpi yajkpidi tø tjamøø't'atti møj, øy tuki'iyi ja naqxwii'ñit kajp tø tjawin'øø'nguixy møøtpi ja kya'øy'ajtin.

24 Ja'agøjpxy yø kajp jade'en tø yjaty ku jam tø tyik'ookti ja Dios kyugajpxy jøts ja Dios yjanchja'wibitøjk. May ja jaa'y tø tyik'ookti o magajp.

19

1 Kuts jade'en yjajty jøts nmadøøy ku mayjaa'y kyajpxti jap tsajpjøtpty jøts møk wya'andi:
iTu'ugyi adøm nDios Teety janch møj janch øy! Ja'ats tu'ugyi xyiknitso'ok'ajtindip.

2 Tiy'ajtingøjpx ja Dios ttiidyuñ; t'ayo'onmø'øya ja ka'ødyø'øxy, ja'agøjpx ku ja naxwii'ñit jaa'y tø tyikma'aty ja' kya'øy'ajtingøjpx; paty ja Dios ja tpayø'øya ku jade'en tø tyik'ookti ja yjanchja'wibitøjk.

3 Xjats jadigojk wyangojmidi:

—janch møj ja Dios! Nijuuni yø kajp kyatøøy'amø'ty, jok'ejtp yø'.

4 Xjats ja ñi'ee'pxmaktaxkpi møjaa'dyøjk jøts ja nimaktaxkpi jiyujk ñagyuxendyaajkidi jam Dios myøjtsinaadyaajk wingujkp, Dios tja'myatsti jøts wya'andi:

—jade'en, ku Dios janch møj!

5 Jøts yikmadøøy ja kajpxy ja ayuujk ma ja møj tsinaabyajt jam, midi wamp yide'en:

Winjawidi kunuu'kxyjawidi meets ja Dios,
pøn tpadundip pøn twindsø'jkidip
wan tmøjidi wan tmutskidi.

Ku ja Borreek U'nk yikxødu'unt

6 Xjats nmadøøy nayide'en ejxim ja mayjaa'y kyajpxyin, sam ja møj nøø øø'tspín wyina'añ jøts ja tsaach møk anaaw, jøts wya'añ yide'en:

janch møj ja Dios! Tø ñaxkida'aky ja kyutujk jøts jade'en xníwindsøn'ajtindit.

7-8 Wan t'øy'ajtyim wan txondaajkyim, wan twinja'wa'am wan twindsø'jka'am.

Tøxi tpaaty ja yja' midi yiktejp Borreek U'nk jøts tmøøtsinaawya'añ tmøø'tetwa'añ ja yjanchja'wibitøjk pøn øy'ajttip wa'ats jaa'y'ajttip.

Jade'en idø'øn yø tijy sam ja jaa'y ja xøøw ttundi ku y'amajtskidi.

9 Xjats ja ankilis xnimaay:

—Ja' jade'en: "Tya'øy'ajttip pøn tø yikway ma ja Borreek U'nk xyøduñ."

Jøts ja yjaakwa'añ:

—Yø' ayuujk midi tø xjaadyañ, tiy janch yø', Dios tyiy'ajtin yø'.

10 Xjats ø nagyuxendyaajki ankilis wyingukp jøts nwindso'øgiwya'añ, jøts ø xnimaay:

—Ka'ap jade'en m'adøø'tst; pø tu'ugyixi ja Dios Teety yikwindsø'øgi. Nayide'enxi øts ja nwindso'øjtim Jesús yja' nbaduujni sam metsin, sats ja nmijanchja'wibitøjkindi. Ja Jesús kyajpxy y'ayuujk nbagajpxa'amp pøn jaty ja Dios ja'ajtiyip.

Ja jaa'y pøn ttatsinaapy ja poop kawaay

11 Xjats ø n'ejxpaaty ja tsajp y'awaajch; jamts kyaxi'jky tu'uk ja poop kawaay, ja'ats ja ttatsinaapy pøn øy pøn tiy'ajtin møøt, jøts tpayø'øwya'añ ttiidyunwa'añ ja naxwii'ñit jaa'y. 12 Janch tøø'kxp ja wyeen ejxim ja jonyowin, jøts kyubajkøjpx may ja koroni tmøø'taty. Jamts ja xyøøw yja'ayi wyimbojkwemp, øy ja pøn tja'ijxy ka'ap ja pøn t'ejxkapy, ja' kø'øm tnija'wip.

13 Amuum ni'jpy ja wyet midi wyet'ajtpy, jøts ja xyøøw, Dios kyajpxy ja' Dios y'ayuujk ja'. 14 May ja myøøtseptumbi pyayø'øyi pøn tso'ondip jap tsajpjøtpty. Amuum poop, øybi wet, wa'ats wet wyet'ajttip jøts tum poop

kawaagyoxpti. ¹⁵ Japts y'aawjwõtpy pyidsimy tu'uk yõñchujx, janch jøøjp ja', ja'ats tyayiktsaachip ja naxwii'ñit jaa'y ku ja møk tniwindsøn'atwa'añ ja naajx ja kajp; møk ja ayo'on ja payø'øyin tyiknaxwa'añ ku ja Dios Teety tø yjanchjot'ambiky. ¹⁶ Yjixki'py ja xyøøw yja'ayi jøts pyuugyixy. Jade'en ja twandijy ku møk ja kutujk tmøø'taty, nipøn ya naxwiiñ kyajade'eni.

¹⁷ Winets ø n'ijxy tu'uk ja ankilis jam xøøw wyindump, jøts tmgajpxy ja jiyujk midi kajkwidjettip tsajpwemp, jøts wya'añ yide'en:

—Mendi namyukidi jøts xka'adyit x'a'uxidit ja Dios yja', ¹⁸ jøts xtsu'utstid xjøø'kxtit ja windsøndøjk ja soldaditøjk. Nayide'en xtsu'utstid ja kawaagy jøts pøn ja tatsinaajyip. Niduki'iyi xjøø'kxtit pøn ja jaa'y yiktuujnip jøts pøn midundip, wan tmøji wan tmutski.

¹⁹ Xjats ø n'ijxy ja møj ka'øy jiyujk jøts ja windsøndøjk pøn ya naxwiiñ møøt ja syoldaditøjk, ja'agøjpx tø ñamyukyidi ku cheptunwa'andi møøt ja' pøn ttatsinaapy ja poop kawaagy. ²⁰ Jøts ja ka'øy jiyujk yiktsuumy møøt ja' pøn nugo win'øø'ndip ñadyijyi ku Dios ja tkajpxnaxpi'aty. Jade'en ñadyijyi tnanky'ejxi ja myilagri'ajtin jøts jade'en ja jaa'y twin'ii'ñ jøts yikmo'odit ja møj ka'øy jiyujk y'ejxa'anin jøts jade'en twindsø'ogidit ja y'awanax. Xjats ja møj ka'øy jiyujk møøt ja' midi nugo win'øø'mp yikuwibejpidyi mejjyotp, ma yjanchtøøy yjancha'ay ja nøø. ²¹ Ja'ats ja tya'ookøxti ja myigu'uk midi ja yõñchujx tmøø'tajtp y'aawjwõtpy, jøts ja jiyujk ja yjø'kxkøxiyidi midi kajkwidjettip.

20

Sa ja kutujk midi tukmil jumøjt etp

¹ Xjats ø n'ijxy tu'uk ja ankilis midi tso'omp tsajpjøtpy, jøts ja tkøñ'tity ja ñi'awaajts ja ayodaajk jøts nayide'en tu'uk ja møj pujxkadeen. ² Myajts ja ankilis ja møj ka'øchaa'ñ midi yiktejp møj miku' ja Satanás, jøts yikøxøjch, yikpaxkøjch jøts tukmil jumøjt y'ett ³ y'ayo'ot ma yikuwibejpiyi'ñ ayodaajkjøtpy. Jap ñi'adujkpejty jøts ja seeyi yikpiktaajky ja agaj, jade'engøjpx jøts ka'ap ja naxwii'ñit jaa'y nugo ajawi t'ukwin'øø'ñit. Tukmil jumøjt y'ayo'ot, winets yikmajststutt øy win'øø'nin.

⁴ Winets ø n'ijxy ja møj windsøndøjk chøønidi jam møj tsinaabyajtkøjpx. Tø yikmo'odi ja kutujk ja møk'ajtin jøts tidiyu'unin ttu'undit. Nayide'en ja yik'ijxy ja anmija'windi pøn ja kyubajk tø wyinakti, ku ja tkajpxwa'kxti ja nwindson'ajtim Jesús yja'. Jade'ents ja Dios yja' tø tpaduujnidi. Ka'ap ja twindsø'ogidi twinjawidi ja møj ka'øy jiyujk jøts nika'ap ja y'ejxa'anin yikpikta'akti wyimbojkøjpx jøts kyøø'øm. Yik'ijxy ku ja yjujkyøøxti jøts tukmil jumøjt møøt wyindsøn'attit ja Cristo. ⁵ Yø'øts jawyeen jujkyøøxtøø, pønts jaaktandøø jaanims ja yjujkyøøktit kunim ja tukmil jumøjt ñaxt. ⁶ Tya'øy'ajtip tyaxondaajkip ja Dios yja' pøn jawyeen jade'en jujkyøøxtøø. Ja'ats ja Dios ja'ajtidip jøts ka'ap ja y'ayo'odit ku ja myimajtskpi o'jkin ñaxt. Pyadundip ja Dios yja' jøts møøt wyindsøn'attit ja Cristo tukmil jumøjt.

⁷ Ku wyinaty tø kya'pxy tukmil jumøjt winets yikmajststutt ja Satanás.

⁸ Ku pyidsø'ømt, wyin'øø'mp ja' ja naxwii'ñit jaa'y. Nøjkx twin'ii'ñ nayide'en ja kajp ma yiktijy Gog jøts Magog, jøts ñamyukidit ja tseptumbi niduki'iyi ja syoldadi. Janch namay ja'adi, ka'ap ja myachooni. ⁹ Namyujkidøø jam møj jøgyøjpx jøts tnawidejtkøxti ma jam y'etti pøn jaty ja Dios ja'ajtidip, pøn ja chøjkpy. Xjats ja Dios ja jøøn tnaajtskajxiyi'ñ jap tsajpjøtpy jøts niduki'iyi tyøøgyijxy. ¹⁰ Xjats ja miku' nayide'en yikmaajch ja'agøjpx ku ja jaa'y nugo

twin'iiñ. Nay jam yikpiktaajky mejyotp ma yjanchtøoy yjanča'ay ja nøø. Møøt ja' ja møj ka'øoy jiyujk, jøts ja' midī nadyejip kugajpxy pøn nugo twin'øø'mp ja naḡwii'ñit jaa'y. Jamts y'ayo'odit xemikøjxp xinaxy tsunaxy.

Ku ja Dios tt#dyu'unt ja jaa'y ma ja pyoop tsinaabyajt jam

¹¹ Jøts ø n'ijxy tu'uk ja møj tsinaabyajt, poop ja', jam ja Dios chøøni. Xjats ja tsajp, xjats ja naajx tuki'i'yi wyindigøøgyijxy Dios wyingujkp, nima niti kya'uk'ejtñi. ¹² Jøts ø n'ijxy ja jaa'y, Dios wyingujkp tyanidi pøn tø y'ookti, ja møj ja mutsk ja'adi. Jamts ja nøky yik'ijxy sã tø yjaa'y'atti nidu'uk nidu'uk. Nayide'ents ja nøky jam yik'ejxmi ma ja xyøøw jap yjaabyetyidi pøn jaty ja Dios yja' tø tpaduujni, xjats jade'en niduki'i'yi yikpayøødyi. ¹³ Jam ja'adi pøn tø y'ookti mejyøtpty jøts nayide'en pøn tø y'ookti naḡkijxy. Jamts ja yikpayøødyi tu'uk tu'uk pøni sã tø yjaa'y'atti. ¹⁴ Winets ja Dios tyikjøpkixy ja o'jkin tigøøyin jøts ka' pøn y'uk'oooknit jadigojk. Ja' tøødyip pøn tø tyundigøødyi jap mejyøtpty ma yjanchtøoy yjanča'ay ja nøø. ¹⁵ Ja' jade'en yikpiktaktip jam, pøn ja xyøøw jap ka'ejttip nøkyøtpty, pøn tkabadundip ja Dios yja'.

21

Ku ja tsajp ja naajx jadigojky'øyi'ñ jemy

¹ Nay winets ø n'ijxy ja jemchajp ja jemñaajx jadigojk; pø tøxi ja tsajp ja naajx wyindigøoy midī jawyeen ejt. Nayide'ents ja mejy kya'uk'ejtñaã. ² Xjats ø n'ijxy tu'uk ja jemgyajp kyida'aky tsajpjøtpty, kunuu'kxy Jerusalén xyøøw'ajtpy, Dios wyingujkp ja chøøñ. Janch tsuj janch xøxy ja kajp, jade'en ja kyaxi'iky ejxmi ja jaa'y pyøkwã'añin. ³ Winets nmadøoy møk kyajpxy jap tsajpjøtpty, xjats wya'añ:
—Ejx sã ja Dios tmøøtsinaawya'añ ja naḡwii'ñit jaa'y. Ja' amuum ja'ajtidip jøts ja ja' xemikøjxp tmøøt'ett. ⁴ Yiktigøøpy ja yjotmaydi ja yjotmay'o'jkindi. Ka'ap ja o'jkin y'uk'ejtñit y'ukpaajtñiyit, ka'ap ja jajyi tøøyi t'uk'ejxnit; sam tø y'uk'lityin, tø ja ñaxy.

⁵ Xjats ja wya'añ pøn jam tsinaapy møj tsinaabyajtkøjxp:

—Uk'ejxim sã øts tuki'i'yi jemy nyik'øygyøxt.

Xjats jade'en wyangojmi:

—Jaabyat ya'at ayuujk ja'agøjxp ku tyi'yi yjanchi, ka' ma ndagudsø'jka'ant.

⁶ Winets øts xnimaagyojmi jøts yide'en wya'añ:

—Tø y'øygyixy. Øts idø'on nyikts'o'ndaajk tuki'i'yi jøts nayide'en nyikjøpkøxt. Pøni pøn tøøjtsip, øts ja nøø ja nmo'op midī yikjujky'ajtp xemikøjxp, jøts may'ajt ja'. ⁷ Pøni pøn tmimajadaajkip ja miku' yja', ja'ats nmo'op ja øy'ajtin; jade'ents øts ja n'u'nk'att jøts nmøøt'ett xemikøjxp. ⁸ Pøn tkawamp øts nja', pøn tkamibøjkp, pøn xkatsojkp øts nja', pøn yikjaa'y'o'kp, pøn ka'øyja'a'y'ajtp, pøn ja miku' yja' tyiktuujnip, pøn twindsø'jkp ja maḡandsãã, pøn taay'ajttip, ja' nøjkxkøxtip xemikøjxp jam mejyotp ma yjanchtøoy yjanča'ay ja nøø.

Tsuj kyaxi'iky ja jemgyajp Jerusalén

⁹ Winets tu'uk myiñ ja ñiwixujkpi ankilis midī ojts tyikmiñ ja wixujkpi ay'o'on ya naḡwiiñ, jøts ø xnimaay:

—Men, jøts ø nduk'ext ja janchja'wibitøjk pøn møøt y'ettit ja Borreek U'nk.

¹⁰ Nayi kumaa'yjotpy ja Espiritu Santo xuk'ijxy, ku øts ja ankilis jam møj kojpkøjxp xyiknijxy, jøts ø xuk'ijxy ja kunuu'kxy jemgyajp, ja Jerusalén midī kidãkp tsajpjøtpty jam Dios wyingujkp. ¹¹ Janch tsuj janch tøø'kxp ja kajp sam

ja Dios chinaadyaajkin, jade'en chamamy ejxim ja wa'ats tsaadøø'kxpa'an, tajajnaɣp jade'en sam ja wa'ats keega'an. ¹² Køjxɣp nabojs'tawidity ja kajp jøts makmajtsk ja agaj tjagyepy, jamts ja ankilis tyanidi ma jaty ja agaj. Jam agajkøjxɣp kyøxja'ayidi ja xyøøw pøn ja Israelit jaa'y y'aadsip kyugojip, namakmajtsk idøø'n ja'adi jøts tu'uk tu'uk ja agaj ja xyøøw tmøøt'ajtti. ¹³ Tigøøk ja agaj tyañ aga'n tso'ampy, jøts ja jadigøøkpi agaj tyañ anajy tso'ampy. Xjats ja jadigøøk agaj tyanmi windujy tso'ampy, nayide'en jadigøøk agaj tyañ jixkø'øm tso'ampy. ¹⁴ Makmajtsk ja tsaaj yiktapojtsøø'n ja pøch, jøts tu'uk jaty ja tmøøt'aty ja xyøøw pøn jaty ja Jesús kyudanaabyi'ajtpy.

¹⁵ Ja ankilis mido ø xmiimadyakp jam ja takejpx ja tmøødi, tum oori, xjats tkijpxy winøønin ñabojs'tawidity ja kajp, jøts nayide'en winøønin myøji ja agaj. ¹⁶ Kwadradi ja kajp, ni sudso'ampy kyayøni kyakoni. Majtsk mil ja majtsk magø'pxy kilometri tuktamajñ jaty, jøts nayide'en kyøxpi. ¹⁷ Winets nayide'en tkijpxy ja pøch, tugui'pxy myaktaxk metri ja myajpx'ajtin tjagyepy. Jade'en ja ankilis tkijpxy sam adøm nguipxyin.

¹⁸ Amuum jaspe tsaaj tø ttaapøch, jøts ja kajp amuum oori ja', jøts wa'ats keegi kyaxi'iky. ¹⁹ Ma ja makmajtskpi tsaaj tø yiktapojtsøøñ, mayjøøjp ja øybi tsaaj'u'nk tø yiktaxoxy. Ja myidu'ukpi tsaaj tmøøt'aty ja jaspe, jøts ja myimajtskpi tsaaj tmøøt'aty ja zafiro. Ja myidigøøkpi tmøøt'aty ja ágata, jøts ja myimaktaxkpi tmøøt'aty ja esmeralda. ²⁰ Ja myimagoxkpi tsaaj txox'aty ja ónice, jøts ja myidudujkpi tsaaj txox'aty ja cornalina. Ja myiwixujkpi tsaaj txox'aty ja crisólito jøts ja myiduktujkpi txox'aty ja berilo. Ja myidaxujkpi tsaaj txox'aty ja topacio jøts ja myimajkpi tsaaj txox'aty ja crisoprasa. Ja myimaktu'ukpi tsaaj txox'aty ja jacinto jøts ja myimakmajtskpi txox'aty ja amatista. ²¹ Tum perla ja makmajtskpi agaj, jøts amuum oori ja møj tuu' mido najxp kajpjotp, jajp tsamamp ja'.

²² Ka'ap ja tsaptøjk jam yik'ijxy jemgyajpjotp. Ka'ap ja chøkyi, kumi amuum ja Dios ja tkajp'aty møøt ja Borreek U'nk. ²³ Ka'ap ja chøkyi jøts ja xøøw ja po' jam y'a'nt kajpjotp. Køø'm ja Dios Teety jøts ja Borreek U'nk ja y'aju'uk ja y'ajaj tyikjajit tyiktøø'kxt. ²⁴ Nay ja' tkudøø'kxidip tkujajidip ja naɣwii'ñit jaa'y pøn tø ñitso'ok'atti, jøts nayide'en ja windsøndøjkti pøn ja y'øy'ajtin jam tø tminøjkxti. ²⁵ Awa'ats jam y'ity ma ja pøch agaj jam. Nijuuni jam kyakoodsi, xiijñ jam y'lity. ²⁶ Xjats jam tminøjkxti ja naɣwii'ñit jaa'y ja y'øy'ajtin ja wya'ats'ajtin; ²⁷ ka'ap jam tyøkit pøn ka'øy'ajtip, pøn ja myigu'uk nugo twin'øø'mp twindaay'ajtp jøts o ti tkadami'ejxiwya'añ. Ja'ayi jam tøjkidip pøn ja xyøøw jap jaabyety jap nøkyjøtp, ma jap y'lity ja jaa'y ja xyøøw pøn jujky'ajttip xemikøjxp. Ja'abi nøky tmøøt'ajtp ja Borreek U'nk.

22

¹ Xjats ø xuk'ijxy ja ankilis tu'uk ja møj nøø. Midi yik'ukp janch wa'ats ja', ja'ats xyikjuky'ajtin xemikøjxp. Janch ti'kxy ja', jøts ja jam pyidsimy ma ja Dios Teety chøøni møøt ja Borreek U'nk. ² Jamts ja møj tuu' kujk'am yøøy ja nøø. Adsow aduuk ja kipy jam yøñ nøøba'am. Ja' tyøøm yiktapojtsøø'ajtp xemikøjxp. Wimbo' wimbo' ja tyøøm'aty jøts ja y'aay tsøøy'aty ja naɣwii'ñit jaa'y. ³ Pøn jap tsinaadyip ka' pøn y'ukjemñimaa'lyniyi y'uktenimaa'lyniyi. Ja Dios Teety jam tu'ugyi ejtp møøt ja Borreek U'nk, ja'ats windsø'jkiyidip ja yjanchja'wibitøjk. ⁴ Ejxiyidip nijawiyidip wemp'am ja Dios Teety, jøts nay ja xyøøw myøøt'ajtidip wimbojkwemp. ⁵ Ka'ap ja koots'ajtin jam y'uk'ejtnit; ka'ap ja jaj ka'ap ja xøøw t'ukyiktunit; Dios Teety tkujajip tkudøø'kxip, ja'ats jam windsøn'attip xemikøjxp.

Wingomp ja' ku ja Jesucristo mye'ent

⁶ Winets ja ankilis xnimaay yide'en:

—Tiy janch ya'at ayuujk midi ixyam tø xjaadyañ, ka' nugo xkudsø'øgit. Nay ja Dios Teety pøn y'ijty tyukajpxwa'kxpy ja kyugajpxy, tøts ja nayide'en tekjey ja y'ankilis jøts ttukmado'ot ja pyadumbi pyabøjkpi sa tsojk yjatwa'añ kyubatwa'añ.

⁷ Nøøm ja nwindson'ajtim:

—iMe'emp øts tsojk! iTya'øy'ajttip tyajotkujk'ajttip pøn ja Dios kyajpxy tmøjpiktaajkip sa yap nøkyjøtpy yjaabyetyi!

⁸ Xjats øts nmadoøy n'ijxy kø'øm sa øts ya'at nøkyjøtpy tø njaadyañ. Winets øts ja ankilis wyingujky nagyuxendyaajki sam øts ja xuk'ijxy jøts øts ja nwindso'øgit. ⁹ Jøts øts ja xnimaay:

—Ka'ap jade'en m'adø'tst; pø tu'ugyixi ja Dios Teety yikwindsø'øgi. Nayide'enxi øts ja nwindson'ajtim Jesús yja' nbaduujni sam metsin, sats ja mijanchja'wibitøjkindi, jøts niduki'iyi pøn jaty tmøjpiktakp midi yap nøkyjøtpy jaadyañ.

¹⁰ Jøts nayide'en ja ankilis xnimaay:

—Ka' nugo x'amaatsk'att ja Dios kyajpxy midi yap nøkyjøtpy jaadyañ. Wingompxi jøts yjatt kyubatt jade'en. ¹¹ Wan jade'en tjaa'y'atti pøn ka'øy'ajttip, jøts pøn ja Dios yja' tpaduujnip, wañim ja tyikyø'ødyi jade'en ja yjaa'y'ajtin.

¹² Yide'ents ja nwindson'ajtim wya'añ:

—Tsojk ø nme'ent jøts ø nmime'ent ja øy'ajtin. Ja'ats ndamay'atp nidu'uk nidu'uk sa tø yjaa'y'atti. ¹³ Øts idø'øn nyiktsø'ondaajk tuki'iyi jøts nayide'en nyikjøpkøxt.

¹⁴ Tya'øy'ajttip tyajotkujk'ajttip pøn tø ñitso'ok'aty. Awa'ats ja tyuu'di jøts ja tyøkidit jam kunuu'kxy kajpjøtp. Jamts tpaattit ja kipy midi jam yiktajujky'ajtp xemikøjxp. ¹⁵ Ka'ap jam tyøkidit pøn ka'øyjaa'y'ajttip pøn ja miku' yja' tpaduujnidip, pøn maa'tstip, yikjaa'y'oo'ktip, jøts pøn ja myigu'uk nugo twin'øø'mp.

¹⁶ —Tø øts ja n'ankilis nguexy jøts tuki'iyi yiknigajpxkøxt ya'at Dios kya-jpxy, jøts jade'en yiknijawit pøn jaty ja Dios ja'ajtidip jam niwixujkpi kajp. Øts ndeety'ap'ajtpy ja møj windsøn David. Jade'en øts ja naxwii'ñit jaa'y nyikujajtaagi sam ja møj jaxyøøw midi jøpyidsømp.

¹⁷ Xjats ja Espiritu Santo jøts ja nwindson'ajtim yjanchja'wibitøjk wya'andi jøts ø nwindson'ajtim yiknøjmi:

—iMen!

Pøn jaty tmadoop yø'øbi ayuujk wan nayide'en twa'andi:

—iMen!

Jøts pøn tsojkp ja øy'ajtin ja xondaajkin wan tmiñ jøts tpaatt ja may'ajt.

¹⁸ Ixym ø nnigajpxy pøn jaty yam tmadoop ja Dios kyajpxy sam yap nøkyjøtpy yjaabyetyi: Pøni pøn nugo tyiktigajtsp ya'at ayuujk jøts ne'egi tijy midi ka' tyiy'ajtin, Diosts ja ayo'on mo'ojip sam yap nøkyjøtpy yja'ayi.

¹⁹ Pøni pøn yø Dios y'ayuujk tyiktigajtsip jøts ka'pxy tka'ukajpxnidi sam yap nøkyjøtpy yja'ayi, Diosts ja pøjkiñip ja y'øy'ajtin jøts ka' tyøkidit ma ja kunuu'kxkyajp jam midi yø nøky ñigajpxy.

²⁰ Xjats ja nwindson'ajtim wya'añ pøn ya'at tñigajpxp:

—Tsojk nme'ent.

Jøts ø n'adsojimbijty:

—Øy jade'en. iMen, nwindson'ajtim Jesús!

²¹ Ja nwindson'ajtim Jesucristo mgunuu'kxidip meets niduki'iyi. Jade'en idø'on ja y'ejxi tyiyi.